


Tí Nuevo Testamento cuènte Inchéni Jesucristo

C'óna Nquìva



New Testament in Popoloca, San Juan Atzingo

Tí Nuevo Testamento cuènte Inchéni Jesucristo C'óna Nquià New Testament in Popoloca, San Juan Atzingo

copyright © 1982 Wycliffe Bible Translators, Inc.

Language: Popoloca, San Juan Atzingo

Translation by: Wycliffe Bible Translators, Inc.

Popoloca, San Juan Atzingo [poe], Mexico

Copyright Information

© 1982, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Popoloca, San Juan Atzingo

© 1982, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 25 Aug 2023 from source files dated 29 Jan 2022
b9b09122-b3f6-59f0-9594-749907b32b5b

Contents

SAN MATEO	1
SAN MARCOS	59
SAN LUCAS	96
SAN JUAN	157
LOS HECHOS	203
ROMANOS	255
1 CORINTIOS	276
2 CORINTIOS	297
GALATAS	310
EFESIOS	317
FILIPENSES	324
COLOSENSESES	329
1 TESALONICENSESES	334
2 TESALONICENSESES	339
1 TIMOTEO	342
2 TIMOTEO	348
TITO	352
FILEMÓN	355
HEBREOS	357
SANTIAGO	373
1 PEDRO	378
2 PEDRO	384
1 JUAN	388
2 JUAN	393
3 JUAN	394
SAN JUDAS	395
APOCALIPSIS	397

Tí tan jína chrónka ch'ín Mateo

*Tí sín k'uaxrjeníxin ch'ín Jesús
(Lc. 3.23-38)*

¹ Tíhi mé chrónka nkexro kaín tí sín k'uaxrjeníxin ch'ín Jesucristo. Mé jehe ch'án k'uaxrjeníxin ch'án tí ch'ín David la ko tí ch'ín Abraham. ² Ch'ín Abraham mé it'é tí ch'ín Isaac la ko ch'ín Isaac mé it'é tí ch'ín Jacob la jehe ch'án mé it'é tí ch'ín Judá la ko kaín kíchó ch'án. ³ Ch'ín Judá mé it'é tí ch'ín Fares la ko ch'ín Zara la tí iné sín mé it'in Tamar. Ch'ín Fares mé it'é tí ch'ín Esrom la jehe ch'án mé it'é tí ch'ín Aram. ⁴ Ch'ín Aram mé it'é tí ch'ín Aminadab la jehe mé it'é tí ch'ín Naasón la jehe mé it'é tí ch'ín Salmón. ⁵ Ch'ín Salmón mé it'é tí ch'ín Booz la iné mé tjan Rahab. Ch'ín Booz mé it'é tí ch'ín Obed la iné tí ch'ín Obed mé tjan Rut. Tí ch'ín Obed mé it'é tí ch'ín Isaí. ⁶ Ch'ín Isaí mé it'é tí rey David la jehe ch'án la ko tí tjan k'uéchjién ch'ín Urías mé táha it'é la ko iné tí ch'ín Salomón.

⁷ Ch'ín Salomón mé it'é tí ch'ín Roboam la jehe mé it'é tí ch'ín Abías la jehe ch'án mé it'é tí ch'ín Asa. ⁸ Ch'ín Asa mé it'é tí ch'ín Josafat la ch'ín Josafat mé it'é tí ch'ín Joram la ch'ín Joram mé it'é tí ch'ín Uzías. ⁹ Ch'ín Uzías mé it'é tí ch'ín Jotam la ch'ín Jotam mé it'é tí ch'ín Acaz la ch'ín Acaz mé it'é tí ch'ín Ezequías. ¹⁰ Ezequías mé it'é tí ch'ín Manasés la ch'ín Manasés mé it'é tí ch'ín Amón la ch'ín Amón mé it'é tí ch'ín Josías. ¹¹ Ch'ín Josías mé it'é tí ch'ín Jeconías la ko kíchó ch'án. Tí sín a mé k'uéjó sín tí yaon a ntá xrínahya ikui tí sín Babilonia sákjuíko sín tí sín israelita kíxin ts'ejóchjina sín tí chjasén sín Babilonia.

¹² Ntá kjuixin sákjuí sín mé ch'ín Jeconías mé it'é tí ch'ín Salatiel la ch'ín Salatiel mé it'é tí ch'ín Zorobabel. ¹³ Ch'ín Zorobabel mé it'é tí ch'ín Abiud la ch'ín Abiud mé it'é tí ch'ín Eliaquim la ko ch'ín Eliaquim mé it'é tí ch'ín Azor. ¹⁴ Ch'ín Azor mé it'é tí ch'ín Sadoc la ko ch'ín Sadoc mé it'é tí ch'ín Aquim la ko ch'ín Aquim mé it'é tí ch'ín Eliud. ¹⁵ Ch'ín Eliud mé it'é tí ch'ín Eleazar la ch'ín Eleazar mé it'é tí ch'ín Matán la ch'ín Matán mé it'é tí ch'ín Jacob. ¹⁶ Ch'ín Jacob mé it'é tí ch'ín José la ch'ín José mé k'óna xií tjan María la jehe tjan María mé iné tí ch'ín Jesús. Tí ch'ín Jesús la mé nchek'in sín Cristo.

¹⁷ Mé xíkaha catorce t'áchrji k'uaxrjeníxin tí ch'ín Abraham ntá kjuák'e ch'ín David la í jnko catorce t'áchrji k'uaxrjeníxin tí ch'ín David la ntá tí sín Babilonia sákjuíko tí sín israelita chjasén sín la ntá í jnko catorce t'áchrji k'uéjó la ntá kokjíhi Cristo.

*Kokjíhi Jesucristo
(Lc. 2.1-7)*

¹⁸ Tí kokjíhi Jesucristo mé xíkahi kónhen. Tí tjan María iné ch'án mé tsotéhe tjan ch'ín José. A ntá naxa kuákjahya kíchó sín ntá kónoxín kíxin jehe tjan la ó tjetýa tjan kíxin tíha la kjuachaxién Nchakuen Dios. ¹⁹ Ch'ín José mé tí nkexro ts'óna xií tjan María, mé ijnko chojni jína la tjinkakonhya ch'án noxín chrók'óxoan ch'án tjan ntá kjuenkayáxin ch'án imó chrókuák'eh ch'án tjan kíxin tjinkaon ch'án kíxin ninkexró ts'onoehyá. ²⁰ Ntá tí naxa tjenkayáxin ch'án kíxin xíkaha sich'e ch'án ntá kotáchrién ch'án chrónkaxín titayá k'uíkuén ch'án ikui ijnko ángel kuénte Ínchéni nixja, chrónka kíxin:

—José jaha mé k'uaxrjeníxian David. Tóxakuanhya la ko chrakonhya chrókuák'ja tjan María ts'óna ichjián kíxin tí xjan tsochónta tjan la kjuachaxin kuénté Nchakuen Dios ikui mé k'óna tí xjan a. ²¹ Sinchekokjíhi tjan ijnko xjan ntoa la its'in xjan Jesús mé xíkaha its'in xjan kíxin jehe xjan tsjakjiin ijié chojni —mé xíkaha chrónka tí ch'ín ángel.

²² Kaín tíha kónhen kíxin tsoxiteyá tí nkehe chrónka Ínchéni k'uénixja tí sín k'uéchrónka itén ch'án ósé. Mé ntáchro xíkahi:

²³ Ijnko tjan naxa chóntahya chojni ntoa mé tsjak'eyá tjan la tsochónta tjan ijnko xjan,

la sinchek'in sín ch'án Emanuel,* la tíha t'axrjexín kíxin Dios tjejókoni. Mé xíkaha chrónka itén Dios.

²⁴ Ntá k'uàya ch'ín José ntá kjuínchexiteyá ch'án tí nkehe k'uetoan tí ángel kuènte Închéni la kuákja ch'án tjan María ts'óna ichjién ch'án. ²⁵ A ntá kjónté xíkaha la naxa kójnkojéhya sín tí naxa kokjéhya xjan la ntá tí xjan mé kjuínchek'in sín Jesús.

2

Tí sín mago kjuítsjehe sín xjan

¹ Tí kokjíexín ch'ín Jesús tí chjasin Belén estado Judea la tí yaon a kjuák'e ijkno ch'ín rey it'in Herodes mé k'uetoenhen ch'án tí nación a. A ntá xrinahya iso chojni ntoa kjuixin ijkno chjasin nó tjitoxin yaon mé kjuíji sín chjasin Jerusalén. Jehe sín mé sín mago mé tónoexín sín tí konotsé. ² Ntá kjuanchankí sín kíxin:

—¿Nketí tjen tí xjan tsíkokjíhi ts'óna tí rey ts'etu'enhen tí sín judío? K'uíkonxínni tí konotsé kuènte ch'án nó tjitoxin yaon na ntá ó kjuini kíxin tsochjéheni ch'án kjuasáya —ichro sín,

³ Ntá kuínhin tí ch'ín rey Herodes tí xíkaha ichro sín ntá imá tóxakonhen ch'án la ko tóxakonhen kaín tí sín chjasin Jerusalén. ⁴ Ntá tí ch'ín rey k'uetoan kíxin síxrakoa kaín tí sín ncháñt'a t'etoan la kaín tí sín tjako tí ley la ntá kjuanchankíhi sín ch'án nketí chrókokjéxín tí nkexro Cristo. ⁵ Ntá jehe sín kjuátuhe sín kíxin:

—Tsokjíexín xjan chjasin Belén estado Judea mé xíkaha tsíkjín tí sín tsíchrónka itén Dios. Ntáchro xikihi:

⁶ Jaha chjasin Belén nonte Judá,
jaha la jehya ijkno chjasin imá ntsí;
kíxin tí nonte ts'axrjexín tí nkexro qantsí t'etoan,
la jehe ch'án ts'ayakonhen tí chjasin kuéntana mé chjasin Israel.*
Mé xíkaha nixja itén Dios.

⁷ Ntá imó k'uíyéhe ch'in Herodes tí sín mago la kjuanchankíhi ch'án sín nkesá kjuankíxin k'uíkon sín tí konotsé. ⁸ Ntá chrónka sín ntá tuénxín k'uetoan ch'án kíxin sátsji sín chjasin Belén la ntáchro ch'án kíxin:

—Sátjirá ntiha la tjeyará tí xjan la tió ts'itjará xjan la tsochronkará kíxin ntá kjaxian janhan sátsjia ntiha tsotjaha xjan kjuasáya —mé xíkaha k'uetoan ch'ín Herodes.

⁹ Ntá kuínhin tí sín mago tí nkehe k'uetoan tí ch'ín rey ntá sákjuí sín la xík'ikon sín tí konotsé ínaá la kjuítaón va ntia la ntá chréhe sín hasta kjuák'e va chrítaón tí nchia tjen tí xjan a. ¹⁰ Ntá tió k'uíkon tí sín mago nketí kjuák'e tí konotsé la imá kóchéhe sín. ¹¹ La k'uíxenhen sín tí nchia la k'uíkon sín tí xjan kjuák'eko tí tjan María iné xjan. Ntá k'uéjoxin toch'in sín la chjéhe sín kjuasáya ntá kuakitjéhe sín tí nkehe kjuikao sín la kjuanjon sín chica oro la ko ihnti tsochéxin chjinco la ko xroqan xraxé náxrjón. ¹² Ntá chr'éxín kotáchrién sín chrónkaxín kíxin chrókjanhyá sín tí tjen ch'ín Herodes. Méxra kjanxin sín í jnko ntia la sákjuí sín chjasén sín.

Ch'ín José la ko tjan María sákjuí sín chjasin Egipto

¹³ Ntá tió kjuixin sákjuí tí sín mago la ntá kotáchrién ch'ín José chrónkaxín titaya k'uíkon ch'án ijkno ángel kuènte Închéni chrónka kíxin:

—T'ayá sátsjikoa xjan la ko iné xjan la sátsjirá chjasin Egipto la ntahó ts'ejorá hasta tsoxrjankajia, kíxin tí ch'ín Herodes xritjeyá tí xjan chrók'oyán ch'án xjan —mé xíkaha chrónka tí ángel.

¹⁴ Ntá ch'ín José k'uàya la ntá sákjuíko ch'án xjan la ko iné xjan la sákjuí sín chjasin Egipto tí tie a. ¹⁵ Ntahó k'uéjó sín hasta ik'uén ch'ín Herodes. Mé xíkaha kónhen kíxin tsoxiteyá

* ^{1:23} Isaías 7.14 * ^{2:6} Miqueas 5.2

kaán tí nkehe chrónka Ìnchéni, k'uénixja tí sín tsíchrónka itén ch'án. Mé ntáchro sín kíxin: “Chjasin Egipto kjuák'e xjanna ntá k'uíyahá ch'án”.[†]

Ch'ín Herodes mé k'uetoan its'en xjan

¹⁶ A ntá kónokaon ch'án la k'uetoan ch'án kíxin its'en kaín tí chánjan ntoa siín chjasin Belén ó chóntha iyó nánó la ko tí xjan naxa chontahya iyó nánó. Mé xikaha k'uetoan ch'án kíxin ó xraxinkaon ch'án nkehe kuínhin ch'án chrónka tí sín mago. ¹⁷ Mé xikaha ó xiteyá tí nkehe tsíkjín tí ch'ín Jeremías ntáchro ch'án kíxin:

¹⁸ Kuínhin sín itén chojni chjasin Ramá

mé tsjánka sín.

Tíha mé tí tjan Raquel la tsjánkama tjan xjeen tjan.

Kohya nkexro sinchechéhé tjan kíxin ó kaín xjan tsík'en xjan.[‡]

Mé xikaha chrónka itén Dios.

¹⁹ Ntá tió kjuixin k'uén ch'ín Herodes ntá ijnko ángel kuénte Ìnchéni mé k'uíkonxín ch'ín José kotáchrién ch'án tí kjuák'e ch'án chjasin Egipto mé ntáchro kíxin:

²⁰ —T'ayá sátsjikoa tí xjan la ko tí iné xjan la tsokjan chjasin Israel kíxin ó kjuixin k'uén tí nkexro chrók'óyán tí xjan a —mé xikaha k'uetoan tí ch'ín ángel.

²¹ Ntá ch'ín José mé k'uáya ch'án la sákjuíko ch'án tí xjan la ko tí iné xjan la sákjuí sín chjasin Israel. ²² A ntá kuínhin ch'ín José kíxin ch'ín Arquelao xjeen ch'ín Herodes mé k'uetoan ch'án tí estado Judea la ntá chrakon ch'án la sáchrókuihya ch'án ntiha. A ntá kotáchrién ch'án chrónkaxín Dios kíxin sáchrókui ch'án estado Galilea. ²³ Ntá tió kjuiji sín ntiha ntá sákjuí sín ijnko chjasin it'in Nazaret la ntaha k'uéjó sín. Mé xikaha xiteyá tí nkehe tsíchrónka tí sín k'uénixja itén Dios senó. K'uéntáchro sín kíxin jehe ch'án mé tsíkitexín sín nazareno.

3

Juan el Bautista mé kjuák'e ch'án nteje

(Mr. 1:1-8; Lc. 3:1-9, 15-17; Jn. 1:19-28)

¹ A ntá tí yaon a kjuák'e ch'ín Juan Bautista nteje Judea la kjuako ch'án. ² Ntáchro ch'án kíxin:

—Títóherá ijiará la tjinkirá tí nkehe tjenkayáxinrá kíxin í séhya itsi kjuachaxién Dios.

³ Tí ch'ín Isaías, mé ijnko ch'ín tsíchrónka itén Dios, mé tsíkjín ch'án kuénte tí ch'ín Juan mé chrónka ch'án kíxin:

Tsinhin sín itén ijnko nkexro tsjak'e nteje ts'èya tsontáchro kíxin:

“Tóxakonhanrá ncheyóxinrá ntia tsixin Ìnchéni.

Takitjehérá ijnko ntia ntoi.”*

⁴ Tí iké ch'ín Juan mé tsík'óna kaxrée kocamello la ko tí nkehe chr'ínkat'óxin ch'án mé tsík'óna tjoa. A ntá tí nkehe kjóne ch'án mé kochjoá la ko itsjen kotsjenta tónoxín nteje. ⁵ Itsjé chojni kuijin sín chjasin Jerusalén la ko í so chjasin síin estado Judea la ko chjinaxón tí ntarió Jordán kíxin tsinhhin sín nkexrí tjechrónka ch'án. ⁶ Ntá chrónka sín ijié sín ntá ch'ín Juan kuijketexín ch'án sín tí ntarió Jordán.

⁷ Ntá xrínahya k'uíkon ch'ín Juan ikui nchónhya tí sín fariseo la ko tí sín saduceo kíxin tjinkaon chrókuikite sín la ntá ntáchro ch'án kíxin:

—Jahará tsík'axrjeníxinrá konche. ¿Xá nkexro kjuíntanohará kíxin chrókuinkéhérá tí kjuánkaon kuénte Dios ó tsi? ⁸ T'ichjánxin kíxin chrók'uejorá jnkojína chrókjuákoxinrá kíxin chaxín kjuítioxihínrá tí nkehe tjenkayáxinrá. ⁹ Jahará nccheinkerá ntáchrórá kíxin k'uaxrjeníxinrá ch'ín Abraham. Janhan ntáxrjan kíxin kjónté tí xro i la Dios tsjacha chrókjuich'éna ch'án chojni k'uaxrjeníxin ch'ín Abraham. ¹⁰ Tí chica hacha ó tjechónhen

[†] 2:15 Oseas 11.1 [‡] 2:18 Jeremías 31.15 * 3:3 Isaías 40.3

tsochrínjinxín tí nta. A ntá kaín xín nta t'ónahya to jína mé tsochrínjin kíxin tsoche. ¹¹ Janhan mé inta títexián chojni kíxin tsjakoxín sín kíxin ó kjuitoxínhin sín ntíe sín. A ntá tí nkexro itsi chr'eréxín mé tsikítexínrá tí Nchakuen Dios la ko xrohi. Antsí tjetóxin t'etoan ch'án a ntá janhan la kánhyó. Méxra chrókósuaña sáchrókjuijkan tokaté ch'án. ¹² Jehe ch'án la ó tjexraá ch'án pala sinchetjuáxin ch'án noatrigo kíxin tí ntachjiji trigo la ókjé ts'ejo ch'án a ntá tí noatrigo la tsjenájín ch'án la ts'enkachjina ch'án. A ntá tí ntachjiji trigo la tsjakaxín ch'án ijnko xrohi ts'ankahya jnkochríxín —mé xíkaha kjuako ch'ín Juan.

Kuíkite ch'ín Jesús

(*Mr. 1.9-11; Lc. 3.21-22*)

¹³ Ntá ch'ín Jesús kjuixin ch'án nó estado Galilea ikui ch'án tí ntarío Jordán tí tjen ch'ín Juan kixin ch'ín Juan tsikite tí jehe ch'án. ¹⁴ A ntá tí sáoxín chrohya ch'ín Juan chrókuíkite tí ch'ín Jesús ntáchro ch'án kíxin:

—Náhí. Jeheni t'ichjánxinhinni jaha chrókuíkite tí jeheni. A ntá jaha k'uinka kíxin jeheni chrókuíkita tí jaha —ichro ch'ín Juan.

¹⁵ Ntá kjuátehe ch'ín Jesús kíxin:

—A ntá jie la titohé tí xíkaha tjenkayáxian kíxin t'ichjánxín tsikiteni kíxin sinchexiteyáni tí nkehe k'uetqoan Dios.

Ntá ch'ín Juan kuítekaon ch'án la xíkaha kjuich'e ch'án. ¹⁶ Ntá tió kuíkite tí ch'ín Jesús la ntá xrínahya titaya xitjehe nkajní la k'uíkon ch'án tí Nchakuen Dios, éxí kontóá tsjehe, k'uínkajinxín nkaya nkajní ntá kjuák'e chrítaón kja ch'ín Jesús. ¹⁷ Ntá xrínahya kuínhin sín ijnko tan kuijxín nkaya nkajní ntáchro kíxin:

—Tíhi mé xjanña la imá tjuahá ch'án la imá chàna kíxin nchexiteyána ch'án.

4

Ch'ín Tsochren chrókjuachroe ch'ín Jesús

(*Mr. 1.12-13; Lc. 4.1-13*)

¹ Ntá tí Nchakuen Dios mé sákjuíko ch'ín Jesús tí nteje a ntá ch'ín Tsochren tjinkaon chrókjuachroe ch'ín Jesús. ² Tí nteje a mé kjuák'e ch'án kjónehyá ch'án cuarenta yaon la ko cuarenta tie la ntá chr'eréxín konohe ch'án ik'uén ch'án kjinta. ³ Ntá ch'ín Tsochren mé kóchjinehe tí ch'ín Jesús kíxin tjinkaon chrókjuachaxín ch'án. Ntáchro ch'án kíxin:

—Tí chaxín jaha Xjeen Dios la ntáche tí xro i kíxin chrók'óna niotja.

⁴ Ntá kjuátehe ch'ín Jesús ntáchro kíxin:

—Náhí. Ntáchro xroon itén Dios kíxin: “Jehya niotja ó chrók'uejóchónxin chojni. Náhí. Kaín tí tán nixja Dios tjejóchónxin chojni”* —ichro ch'án.

⁵ Ntá ch'ín Tsochren mé sákjuíko ch'ín Jesús tí chjasin tjóá mé chjasin Jerusalén, la sákjuíko ch'án tí chrítaón tí kja ninko a ⁶ la ntáchro ch'án kíxin:

—Tí chaxín Xjeen Dios jaha la titohé t'anótjenxian tí noi ntihi kíxin ntáchro xroon itén Dios kíxin:

Dios mé ts'etuenhen tí sín ángel kuénte ch'án kíxin ts'ayakonhan sín.

Tsotsé sín itjá

kíxin tsotéhya totá ts'itja xro tí ts'anótjen†

—ichro ch'ín Tsochren.

⁷ Ntá kjuátehe ch'ín Jesús ntáchro ch'án kíxin:

—Náhí. Kjáxin ntáchro xroon itén Dios kíxin: “Chjiníhya chrókjuásixián kjuaxroan kjuachaxin kuénte Ínchéni Dios”‡ —ichro ch'ín Jesús.

⁸ A ntá tió kjuixixín sákjuíko ch'ín Tsochren tí ch'ín Jesús ijnko jná imá noi ntá kjuako tí Jínahya kaín xín tí nación siín chjasintajni la ko tí nkehe t'etoan kuénte. ⁹ La ntáchro ch'ín Tsochren kíxin:

* **4:4** Deuteronomio 8.3 † **4:6** Salmo 91.11-12 ‡ **4:7** Deuteronomio 6.16

—Kaín tíha mé tsotjaha tí tsjak'éxian tóch'ian tsjíkosáyana tí janhan —mé xíkaha ichro ch'ín Tsochren.

¹⁰ Ntá kjuátēhe ch'ín Jesús ntáchro ch'án kíxin:

—Sátjia Satanás kíxin xroon itén Dios ntáchro kíxin: “Chrókjuíkosáyehé Ìnchéni Dios la jehó ch'án chrókjuiç'héhé xra”[§] —ichro ch'ín Jesús.

¹¹ A ntá ch'ín Tsochren mé kuítōhe tí ch'ín Jesús la iso tí sín ángel ikui tsjinkitsa tí jehe ch'án.

*Ch'ín Jesús kjuankíxin ch'án tí xra kuènte ch'án estado Galilea
(Mr. 1.14-15; Lc. 4.14-15)*

¹² A ntá ch'ín Jesús mé kuínhin ch'án kíxin tí ch'ín Juan mé tjechjina ch'án ntøechiso a, a ntá jehe ch'án mé sákjuí ch'án estado Galilea. ¹³ Kuítøehya ch'án chjasin Nazaret ntiha. Náhí. Sákjuí ch'án chjasin Capernaum la kjuák'e ch'án ntiha. Tí chjasin a mé tjen chrínta ntayaon chjino estado Zabulón la ko estado Neftalí. ¹⁴ Mé xíkaha kjuúch'e ch'án kíxin tsoxiteyá tí nkehe tsíkjin ch'ín Isaías, ijkno nkexro k'uéchrónka itén Dios. Ntáchro ch'án kíxin:

¹⁵ Tí estado Zabulón la ko Neftalí tí ntja chrínta ntayaon la tí nó chók'á tjitoxín yaon tí ntarío Jordán, mé tí estado Galilea tí tjejó tí sín jehya judío.

¹⁶ Mé ntiha tjejó tí sín siín tí sítié mé ts'íkon sín ijkno xrohi jié, la tí sín éxí tsík'en xritjejó sín mé ts'inkaséyanxín ts'ejo sín.

¹⁷ Ntá kjuankixin kjuako ch'ín Jesús ntáchro ch'án kíxin:

—Tjitoxínhinrá ntíará. Tsákjárá ijkno ntía nixin kíxin kjuachaxin kuènte Dios tjen nkaya nkajní la í séhya tsí.

*Ch'ín Jesús k'uíyehé noó chojni k'uétsé koche
(Mr. 1.16-20; Lc. 5.1-11)*

¹⁸ Ntá sákjuí ch'ín Jesús chrínta ntayaon Galilea ntá xrínahya k'uíkon ch'án yaá sín jnkokoá kíchó sín, ijkno mé it'in Simón mé kjaxin it'in ch'án Pedro la ko íjkno it'in Andrés. Jehe sín mé koche xritsé sín. Ntá tinkák'e sín nchísén chrínkí ntá. ¹⁹ Ntá ch'ín Jesús nixjehé sín ntáchro ch'án kíxin:

—Chréhérá tí janhan ntá tsotjahará xra tsjeyárá chojni.

²⁰ Ntá tuénxín kuítóhe sín tí nchísén k'uétséya sín koche, ntá sákjuíko sín ch'án.

²¹ Ntá kjínya kjuíji ch'án ntá k'uíkon ch'án ijkno yaá sín, jnkokoá kíchó sín, mé tí ch'ín Jacobo la ko ch'ín Juan, mé xjeen tí ch'ín Zebedeo. Tjejóko sín it'é sín tí ntabárcó la tjejótjonite sín tí nchísén tséya sín koche. Ntá kjaxin tí sín a k'uíyehé ch'ín Jesús. ²² La ntá tuénxín kuítóhe sín tí ntabárcó la ko tí it'é sín ntá sákjuíchréhe sín tí ch'ín Jesús.

*Kjuakohé ch'ín Jesús nchónhya chojni
(Lc. 6.17-19)*

²³ Ntá sákjuí ch'ín Jesús nkuíxín tí estado Galilea la kjuakoxin ch'án tí níjko Israel siín jnkojnko chjasin mé kjuako ch'án tí tan jína chrónka nkexrí tí kjuachaxin kuènte Dios la ko kjuínchekitohe ch'án jína kaín chojni chóntha kaín xín chin la ko kaín kjuatjoté. ²⁴ Ntá kaín xín tí sín tjejó tí estado Siria mé kuínhin sín kuènte Jesús la kjuikao sín kaín xín tí sín níhi chóntha kaín chin la ko tí sín imá tjotéhe sín la ko tí sín chóntha nchákuén tí jínahya la ko tí sín t'aniáte sín la ko tí sín sítexná toté sín, la ntá ch'ín Jesús mé kjuínchekitohe ch'án sín jína. ²⁵ Ntá itsjé chojni kjuíchréhe tí ch'ín Jesús, mé kjuíxín sín estado Galilea la ko tí chjasin chjinaxón Decápolis la ko chjasin Jerusalén la ko kuenté tí estado Judea la ko tí nó chók'á tjitoxín yaon tí ntarío Jordán.

5

Kjuakoxin ch'ín Jesús ijnko jna

¹ K'uíkon ch'ín Jesús kíxin k'uéjó nchónhya chojni la ntá chrìin ch'án ijnko jna la ntaha kjuák'etjaxin ch'án. Ntá tí sín k'uájiko ch'án a mé kóchjina sín chjinaxón tjejóntaxin sín tí tjen ch'án. ² Ntá ch'ín Jesús kjuankíxin kjuakohé ch'án sín kíxin:

Tí nkexro tjejó náxrjón

(Lc. 6.20-23)

³ —Náxrjón tjejó tí sín nohe kíxin t'ichjánxinhin sín nkehe kuènte Dios kíxin ntá jehe sín mé tsochónta sín tí kjuachaxin kuènte Dios.

⁴ 'Náxrjón tjejó tí sín t'ává kíxin Dios mé sinchechéhé asén sín.

⁵ 'Náxrjón tjejó tí sín hnkehya asén kíxin jehe sín mé ts'áyéhé sín tí nonte tsjanjon Dios.

⁶ 'Náxrjón tjejó tí sín éxi yóhé chrók'uenxín sín kjinta la chrók'uenxín sín ntá kíxin xíkaha imá tjinkaon sín sinchexiteyéhé sín Dios ntá Dios tsjinkitsa sín kíxin ts'áyéhé sín tí nkehe tjinkaon sín.

⁷ 'Náxrjón tjejó tí sín tikonóhé kichó sín kíxin ntá Dios kjaxin tsikonóhé tí jehe sín.

⁸ 'Náxrjón tjejó tí sín kótjóá asén kíxin ntá jehe sín sátsjík'ikon sín Dios.

⁹ 'Náxrjón tjejó tí sín tjinkaon kjuaxróxin kíxin Dios sinchek'in ch'án xjeen ch'án tí jehe sín.

¹⁰ 'Náxrjón tjejó tí sín kjonté tjejótjasótexín sín kíxin kjuínchexiteyéhé sín Dios kíxin ntá jehe sín mé kuènte sín nkajní.

¹¹ 'Náxrjón tjejorá kjonté t'ántaxíhanrá sín la ko ntachrakonrá sín la ko kaín nkehe náxrjónhya ntáchro sín kíxin tinkachónkirá tí janhan. ¹² Chrókócháhará la ko kjuaxróxin chrók'uejorá kíxin ntá chr'éxín jahará ts'ayéhérá ijnko nkehe antsí má jína nkaya nkajní. Mé xíkaha kjuasóte tí sín k'uéjó ósé k'uéchrónka sín tí itén Dios.

Jahará la éxi yóhé xíjnta la ko éxi xrohi t'inkaséyanxín chjasintajni

(Mr. 9.50; Lc. 14.34-35)

¹³ 'Jahará mé yóhé éxi xíjnta chjasintajni. A ntá tí chrók'uánkéhé tí jní tí xíjnta la ntá xitjahya chrókójní ínaá. Ninkehó chrókjuich'ehya xra la chrók'uikitjí ntója la ko chrókuinkátja chojni.

¹⁴ 'A ntá jahará la mé tí xrohi t'inkaséyanxín chjasintajni. Ijnko chjasin itjen chrítaón jna la xitjahya tsjak'emá. ¹⁵ La ko kohya nkexro sinchek'ákjen ijnko lámpara ntá tsjak'e chrínkí ijnko ntacajón. Íchá jína tsjak'e ch'án xrohi noi kíxin ntá ts'inkaséyanxín kaín nkexro siín tí nchia ntiha. ¹⁶ Mé xíkaha tí jahará chrókoyóhárá éxi tí xrohi t'inkaséyanxín kíxin ts'íkon kaín chojni tí xra jína tjejoch'erá la ntá chrókjuanchehe sín kjuasáyé It'éni tjen nkaya nkajní.

Kjuako ch'ín Jesús kuènte tí ley

¹⁷ 'Jahará chróntáchrohyará kíxin k'uinka kíxin tsjakjíyan tí ley tsík'etoan ch'ín Moisés la ko tí nkehe kjuako tí sín k'uéchrónka itén Dios. Náhí. Jehya xíkaha k'uinka kíxin tsjakjíyan tíha. Náhí. K'uinka janhan kíxin tsjákoxian nkehe chaxín t'axrjexín tíha. ¹⁸ Chaxín xrjanka kíxin tí naxá tjen nkajní la ko chjasintajni la kohya ninkehó ley tsjlinhya, mé tsjlinhya nijnko punto la nijnko letra kuénté tí ley tsjixinjian tsoxiteyá kaín tí nkehe t'ichjánxín tsoxiteyá. ¹⁹ Mé xíkaha tí nkexro tsitekakonhya tí nkehe k'uetoan tí ley kjonté ijnko nkehe imá intsí, la ko chrókjuako kíxin xíkaha chrókuitekakonhya chojni, la jehe sín la imá tsontsí sín tí tsi kjuachaxin kuènte Dios. A ntá tí nkexro tsitekaon la ko tsjakohe ókjé nkexro tsitekaon sín, mé antsí imá ts'etoan sín tí tsi kjuachaxin kuènte Dios. ²⁰ Méxra tjonkará kíxin t'ichjánxín kíxin antsí jína ts'ejorá la tsoyóahyará tí sín tjako ley la ko tí sín fariseo kíxin tí tsoyóhárá sín la ntá xitjahya tsákjárá tí kjuachaxin kuènte Dios tjen nkaya nkajní.

*Kjuako ch'ín Jesús kuènte tí kjuaníkaon
(Lc. 12.57-59)*

²¹ 'Jahará tsíkinhínrá kíxin tí sín ósé tsík'ítuenhen sín kíxin: "T'oyáñhyará kíchuárá*" kíxin tí nkexro t'óyán kíchó mé t'ichjánxín tsjasóte sín." ²² A ntá janhan tjonkará kíxin jnkojín nkexro tsonínkakonhen kíchó mé t'ichjánxín tsjasóte. A ntá tí nkexro t'ántaxínhín kíchó la mé tí sín t'etoan mé sinchekeitoxén ijié ch'án. La ntá tí nkexro tsontáche kíchó kíxin tsíxénká ch'án la tíha mé sátsji tsjasótexín tí siín xrohi. ²³ A ntá tí tsjikuehérá Dios nkehe tsochjehérá ch'án ntá tsjasánrá tí altar ntá tsoxráxinkáonrá tí jnkojín kíchuárá kjuánjónkoará sín ²⁴ la ntá tí xíkahá la títójehérá tí nkehe tí altar la sátsjirá tsonixjehérá ch'án jnkojína kíxin í tsokohya kjuaníkaon. La ntá tsjixin la ntá tsjihará tsjánjonrá tí nkehe tjinkáonrá tsjánjonrá.

²⁵ 'Tí siín jnkojín nkexro tjanchia jie tí jahará la tjinkaon chrókuikoárá ch'án juzgado, a ntá íchá jína jnkokoá chrókuenkayáxinrá, jehe ch'án la ko jahará, ntia ó, kíxin ntá sáchrókuihyará tí tjen ch'ín juez. Kíxin sáchrókuihyará tí tjen ch'án ntá jehe ch'án ts'etuenhen ch'án tí policía kíxin ts'ixenhenrá ntøechiso. ²⁶ A ntá chaxín tjonkará kíxin tí ts'ikjahárá sín ntøechiso la ts'axrjéxínyará ntiha tsjixinjían tsjenkeherá sín kaín xín chichaon chontará.

Ch'ín Jesús kjuako kíxin chrókuasinha sín jie, chróchontahya sín chojni chjin ókjé

²⁷ 'Jahará tsíkinhínrá tí nkehe tsík'ítuenhen tí sín ósé ntáchro kíxin: "Chrókuásinha sín jie, chróchontahya sín chojni chjin ókjé."[†] ²⁸ A ntá janhan tjonkará kíxin tí nkexro tsokomá ijno tjan ókjé tjak'e əsén chrókuákja ch'án la ó kjuixin kjuasin ch'án jie nkaya əsén ch'án.

²⁹ A ntá tí ikuan chjina chrókuásixián jie la chrókuakitsjenkiá ikuan la chróchr'an ikjín kíxin íchá jína ts'ítjáyan it'ó cuerpo kuéntá kíxin jehya kuenté cuerpo kuéntá sátsji tsjasótexín tí siín xrohi. ³⁰ A ntá tí itja chjina chrókuásixián jie la chrókóchrínjian tí tjá a la chróchr'an ikjín kíxin íchá jína ts'ítjáyan it'ó cuerpo kuéntá kíxin jehya kuenté cuerpo sáchrókui tsjasóte tí siín xrohi.

*Ch'ín Jesús kjuako kíxin chrók'uítjéhya kíchó sín
(Mt. 19.9; Mr. 10.11-12; Lc. 16.18)*

³¹ 'Kjaxin tsík'ítuenhen tí sín ósé kíxin tí nkexro tjinkaon chrók'uitjíhi ichjién t'ichjánxín ts'óna xroon tsakja tí ichjién kíxin ts'itjíexín kíchó sín.[‡] ³² A ntá janhan tjonkará kíxin ijno nkexro tsjákehé ichjién tí chróchontahya tjan ókjé nkexro la jehe ch'án kuítóhe ch'án tjan kíxin tsjasin tjan jie. A ntá tí nkexro tsotéhe ijno tjan tsíkítsínkehe la kjaxin ó kjuasin ch'án jie.

Ch'in Jesús kjuako kíxin chjiníhya chrók'uákjenxínni ihnié Dios

³³ 'Kjaxin tsíkinhínrá tsík'ítuenhen tí sín ósé kíxin: "T'ichjánxín sínchexiteyará tí nkehe tsíntáchrórá kíxin chrók'uákjenxínyará ihnié Ìnchéni chjiní."[§] ³⁴ A ntá janhan mé tjonkará kíxin chrók'uákjenxínyará ihnié Dios ninkehó la ko chrók'uákjenxínyará nkajní kíxin ntaha tjen Dios t'etoan. ³⁵ La ko chrók'uákjenxínyará chjasintajni kíxin ntaha tjejókjen toté ch'án la ko chrók'uákjenxínyará chjasin Jerusalén kíxin ntiha la itjen tí Rey t'etoan. ³⁶ La tjenkayáxixínyará ikjárá ó kíxin jahará xitjahya tsjakérá ijno kaxíhi tjóá ə njinko kaxíhi tié. ³⁷ Tí nkehe tsontáchrórá chaxín la chaxín la tí nkehe náhí la náhí la kohya nkehe chrókuakét'oxinrá chróchrónkará. A ntá ichrén nkehe tjakét'oxinrá tsochrónkará la táha mé jinahya.

*Ch'ín Jesús tjako ch'án kuènte tí sín t'itjáyenhya ichréñ kjuaníkaon
(Lc. 6.29-30)*

* ^{5:21} Éxodo 20.13; Deuteronomio 5.17 † ^{5:27} Éxodo 20.14; Deuteronomio 23.21 § ^{5:31} Deuteronomio 24.1-4

§ ^{5:33} Números 30.2; Deuteronomio 23.21

³⁸ Jahará mé ó tsíkinhínrá tsík'ítuenhen tí sín ósé kíxin tí takitsjenkí sín ikonrá la kjaxinrā chrókuakitsjenkíra ikon sín. A ntá tí chrókuakitsjenkí sín nenorá la kjaxinrā chrókuakitsjenkíra neno sín kjaxin.* ³⁹ A ntá janhan mé tjonkará kíxin tí jnkojín nkexro ichrén nkehe jínahya sit'ahará la jahará ch'ehyará xíkaha. Náhí. Tí chjéhe ijnko nkexro ijnko tuqan la ntá tjóka tí í jnko nànto tuqan. ⁴⁰ La tí siín jnkojín nkexro tjanchia jíe la tjinkaon sín chrókuakitsjaha sín camisá la títóhé sín sátsjiko sín tí ka t'ínkayate kjaxin. ⁴¹ La tí t'etuanhanrá sín tsámárá nkehe ijnko kilómetro la tjakét'oxinrá í yaá kilómetro. ⁴² Tí jnkojín nkexro tsjanchia nkehe la tí tjinkaon ch'án nkehe la chróntáchrohyará kíxin "náhí", chrókjuiñchekjenrá ch'án.

Tjuèhérá tí sín nímkakonhanrá sín

(Lc. 6.27-28, 32-36)

⁴³ Kjaxin ó tsíkinhínrá tsík'ítuenhen tí sín ósé kíxin: "Tjuèhérá tí nkexro choxinrá la tsoninkákonhénrá tí sín jínahya kjuít'ahará." † ⁴⁴ A ntá janhan mé tjonkará kíxin chrótjuèhérá tí sín nímkakonhanrá la chrókjuiñcheyaonrá tí sín jínahya kjuít'ahará la jína chrókjuiñktsará tí sín tjinkakonhya tí jahará la chrónixjehérá Dios kíxin chrókjuiñktsa ch'án tí sín t'ántaxínhanrá la ko tí sín t'ahará tí jínahya. ⁴⁵ Tí xíkaha sich'erá la ntá jahará chaxín xjeen It'eni tjen nkaya nkajní kíxin jehe ch'án mé t'etoan ch'án tsjitón yaon ts'inkaséyehen tí sín jínahya la ko tí sín jína la ko kjaxin t'etoan ch'án kíxin ts'aniá ichrin tí siín tí sín jína la ko tí sín jínahya. ⁴⁶ Tí jehó tjuèhérá tí nkexro tjuáhará, ¿la ntá nkehe chrókjuauchará? A ntá kjaxin tí sín nchekjénki la xíkaha ch'e sín. ⁴⁷ La tí jehó nixjehérá tí sín kíchuárá la ntá, ¿á chaxín imá jína tíha ní? Kíxin tí xíkaha la kjaxin tí sín chónhya Dios la xíkaha ich'e sín. ⁴⁸ Kjaxinrá jahará ntoá chrók'uejorá kíxin It'eni tjen nkaya nkajní la antsí má ntoá tjen ch'án.

6

Kjuako ch'in Jesús kuénté tí xra jína

¹ 'Chrókjuaśixíhyará kjuaxroan tí nkehe tinkachónkirá kíxin tjinkáonrá chrók'uikon chojni ó. A ntá jahará tí xíkaha chrókjuiç'h'erá ntá It'eni tjen nkaya nkajní la ninkehó nkehe tsotjáhyará ch'án. ² Tí tjinkitsará ijnko chojni nòa la ninkexró chróchenkahyará. Jähará chrókjoyóahyará tí sín ntoáhya tjenkayáxin ixri t'óxroan kíxin mé xíkaha ch'e sín t'óxroan sín nkaxenhen njinko la ko tí ntja kíxin chrók'uikon chojni la chrókjukosáyehe sín tí jehe sín kíxin jína tjejóch'e sín. A ntá janhan ntáxrjan kíxin ó kjuixin k'uáyéhé sín nkehe la í ts'áyéhya sín ínaá. ³ A ntá tí jahará tió chrókjuiñktsará ijnko chojni chaxín nòa la íchá jína kíxin chrókónoehya ninkexró kjónté ijnko nkexro tjuá jína. ⁴ A ntá jahará tí chrókjuañjonrá ichrén nkehe la ninkexró chrókónoehya la ntá tí It'eni ts'ikon ch'án kíxin xíkaha ch'erá la ninkexró noehya la ntá tí jehe ch'án mé tsotjáhará ch'án nkehe.

Tjako ch'in Jesús nkexrí tsonixjehení Dios

(Lc. 11.2-4)

⁵ A ntá tió nixjehérá Dios la jehya éxi tí sín jnkojínxónhya tjenkayáxin sín chrónixjará. Jehe sín mé tóxrjinhín sín ts'ejóxin toté sín nkaxenhen njinko la ko ts'ejó sín esquina calle kuénte ntasin kíxin ts'ikon kaín chojni kíxin tjejónixjehé sín Dios. Ntá janhan chaxín ntáxrjan kíxin jehe sín la xíkaha kjuich'e sín la ó kjuixin k'uáyéhé sín nkehe la í ts'áyéhya sín ínaá. ⁶ A ntá tió nixjehérá Dios la t'ixenhenrá nchia ntqará la t'ikjehérá tí puerta la nixjehérá It'eni kíxin ntaha tjekoará ch'án. A ntá jehe ch'án ts'ikon kíxin xíkaha ninkexró ts'ikonyha ntá jehe ch'án tsjanjon ch'án nkehe ts'ayéhérá.

⁷ 'Ntá tió chrónixjehérá Dios la chrókjateehya chrónixjará kíxin chrókjoyóahyará éxi tí sín chónhya Dios kíxin jehe sín tjenkayáxin sín kíxin nchónhya tsonixja sín, la mé xíkaha

* 5:38 Éxodo 21.24; Levítico 24.20; Deuteronomio 19.21 † 5:43 Levítico 19.18

mé chrókuinhin Dios, ichro sín. ⁸ A ntá jahará chrókóyóahyará éxí tí jehe sín. It'éni ó nohe ch'án nkehe t'ichjánxínhanrá kjónté naxa tjanchéhyará ch'án. ⁹ Méxra xikihi chróntáchrorá:

It'éni tjen nkaya nkajní jaha imá tjóá.

¹⁰ Chrókui tí kjuachaxin kuénta.

Chrókjuch'e tí nkehe tóxrínhan jaha ntihi chjasintajni éxí tjech'e nkaya nkajní.

¹¹ Ijie la tsjánjuan tí niotja t'ichjánxínhinni.

¹² T'oxíka tí nkehe jínahya kjuich'eni kíxin kjaxin jeheni ts'itjáyenhenni tí nkehe kjuich'eheni chojni.

¹³ Titoéhyani kíxin xrähya chrókjuasinni jie. Nchekaáni kaín tí jínahya chrókónhenni, kíxin jaha mé kuénta tí kjuachaxin kíxin ó noheni kíxin jaha tjetétoan tí kjuachaxin jnkochríxín. Amén.

¹⁴ 'Tí jahará ts'itjáyanhanrá tí nkexro kjuasinhánrá ichréni jie la mé kjaxin It'éni tjen nkaya nkajní mé ts'ikon ch'án kíxin xikaha kjuich'erá la ntá kjaxin jehe ch'án ts'oxíka ch'án tí jie kjuásinrás. ¹⁵ A ntá tí jahará ts'itjáyanhyará tí jie kjuasinhánrá í jnko chojni la ntá kjaxin It'éni tjen nkaya nkajní ts'ikon kíxin xikaha kjuich'erá k'uitjáyanhyará la ntá kjaxin jehe ch'án la ts'oxíkahya ch'án tí jie chontará.

Ch'ín Jesúko kíxin chrók'oxroanhya sín kíxin kjónehyá sín

¹⁶ 'A ntá tí jahará tí naxa kjóntehyará kíxin tjinkáonrá tsonixjehérá Dios la ntá chrók'uejohyará éxí t'avárá éxí ch'e tí sín jehya jnkojínxón tjenkayáxin sín. Mé xikaha ch'e sín kíxin tjinkaon sín ts'ikon chojni kíxin naxa kjónehyá sín. Tí xikaha ch'e sín la janhan ntáxrjan kíxin ó kjuixin k'uayéh sín nkehe la í ts'ayéh sín ínaá. ¹⁷ A ntá tí jahará kjónté naxa kjóntehyará kíxin tjinkáonrá tsonixjehérá Dios la t'ontirá ikonrá la tjentoará kjará ¹⁸ kíxin tsongoehya chojni kíxin naxa kjóntehyará. Jehó It'éni tjekoará ntiha mé jehe ch'án nohe ch'án xikaha ntá tsjanjon ch'án nkehe ts'ayéhérá.

Tí nkehe chaxín tjete siín nkaya nkajní

(Lc. 12.33-34)

¹⁹ 'Jahará chrókjuásitonhyará nkehe tjete ntihi chjasintajni kíxin ntihi la ts'ín kué tí nkehe tjete sinchek'itjáyanhanrá va la ko tsochjisen tí chichaon la ko xichée ts'ixenhen tsaáhará. ²⁰ Ichá jína tjásitonrá tí nkehe tjete nkaya nkajní kíxin ntaha kohya iko sinchek'itjáyan nkehe la tsochjisenhyá tí nkehe la ko kohya xichée ts'ixenhen tseé. ²¹ A ntá tí nkaya nkajní tsochontará nkehe tjete la ntá tí nkehe tjenkayáxinrá la kjaxin ntaha tjen.

Tí xrohi t'inkaséyanxín cuerpo

(Lc. 11.34-36)

²² 'Tí ikonrá mé éxí yóhē ijnko xrohi t'inkaséyanxín tí cuerpo kuéntará. Tí jína ikonrá la ntá kjaxin kuenté tí cuerpo kuéntará mé chóntha xrohi. ²³ A ntá tí ikonrá la jínahya la ntá kuenté tí cuerpo kuéntará la sitié tjen. A ntá tí chrókjuak'ehya tí xrohi la ntá antsí má chrókjuinchetié tí sitié.

Dios la ko tí chichaon

(Lc. 16.13)

²⁴ 'Kohya ninkexró tsjacha sich'ehe xra yaá lamó. Tí xikaha chrókjuich'e ch'án la ntá ijnko tsóníkkakonhen ch'án la tí í jnko tsotjuéhe ch'án o ijnko la tsitekakonhen ch'án la tí í jnko la tsitekakuenhyá ch'án. Méxra xitjahya chrókjuich'ehe chojni xra Dios tí tjinkaon sín chróchóntha sín itsjé chichaon.

Dios mé t'ayakonhen tí xjeen ch'án

(Lc. 12.22-31)

25 A ntá ntáxrjan kíxin chrókóxakuanhyará tí nkehe chrókjónterá o tí nkehe chrók'uirá o tí ka chrók'uítsará. ¿Á jehya antsí má sínkí tí kjuachón chróchontará, a ntá kánhyó sínkí tí nkehe chrókjónterá, la á jehya antsí má sínkí tí cuerpo kuéntará, a ntá kánhyó sínkí tí ka chrók'uítsará? **26** Xráxinkáonrá nkexrí siín tí koxroxe xritjaka. Jehe va la t'enkahya va noa la ko tjáhya va la ko chóntahya va nketí ts'inkachjinayá va tí noa, la kjánchó It'eni tjen nkaya nkajní la tjanjon ch'án nkehe sine va. A ntá jahará mé antsí tjetoan a ntá tí koxroxe la kénhyó. **27** ¿Á tjejó jnkojínrá tjenkayáxinrá kíxin tí chrókóxakonhanrá imá a ntá naxa chrók'uankírá it'o metro ntetoxinrá ínaá?

28 ¿Nkekuénté kíxin imá tóxakonhanrá ikárá ó? Tsjehérá nkexrí sít'ánkí tí catsjo siín nteje. Tí itsjo la ní ch'ehya xrä la ko tjonhya. **29** La tjonkará kíxin kjónté ch'ín rey Salomón k'uéchóntha itsjé chichaon la naxa kjuíncheyóehya ch'án nkexrí náxrjón tsjehe tí tsjo a. **30** A ntá tí Dios la ncheck'itsa tí ka yoa siín nteje kjónté ijie síchón ka la ntóye tsochexín tí nkaxenhen tja, a ntá jahará mé antsí chrókjuintak'itsará ch'án. ¿A ntá nkekuénté títekákonhyará ch'án? **31** Méxra xíkaha chrókóxakuanhyará chrókjuchankíhyará kíxin nkehe chrókjónterá o nkehe chrók'uirá o nkehe chrók'uítsará. **32** Kaín tí nkehe la tí sín chónhya Dios mé tóxakonhen sín tíha. A ntá jahará chontará It'eni tjen nkaya nkajní la mé nohe ch'án kaín nkehe t'ichjánxínhanrá. **33** A ntá senó mé chrókjueyará tí kjuachaxin kuénté Dios la chrókjuchexiteyará tí nkehe jína tjinkaon ch'án, a ntá jehe ch'án mé tsjanjon ch'án kaín nkehe t'ichjánxínhanrá. **34** Tóxakuanhyará tí nkehe tsónhen ntóye xíkaha kíxin ntóye la í jnko yaon táha la jnkojno yaon tjikao kjuaxikaon kuénte.

7

Chrók'uantaxíenhyará kíchuárá

(Lc. 6.37-38, 41-42)

1 'Chrókuéhyará ókjé chojni jie kíxin ntá Dios kjaxin chrókjuchahya jie tí jahará. **2** A ntá Dios la tsjanchia ch'án jie tí jahará tí tsékará ókjé chojni jie. A ntá tí xíkaha sich'erá la mé xíkaha tsónhanrá kjaxin. **3** ¿A ntá nkekuénte tsjehé tí chjinínó ntsí tjenkánki ikon tí kíchuá tí naxa ántosán tí inta jie tjenkánki ikuan? **4** A ntá tí chonta jaha tí nta jie tjenkánki ikuan, ¿a ntá nkexrí kíxin chróntáche tí kíchuá kíxin: "Títihé tsakitsjenkíni tí chjinínó ntsí tjenkánki tí kuan?" **5** A ntá jaha la ntoáhya tjenkayáxian. Senó chrókuakitsjenkiá tí nta jie tjenkánki ikuan kíxin ntá chrók'uikuan tsakitsjenkiá chjinínó ntsí tjenkánki ikon tí kíchuá.

6 'Chróchjéhyará tí nkehe tsíkótjóá tí konja kíxin jehe va tsokjan va tsónínkakonhanrá va ntá sinchekuenrá va. La ko kjaxin chróchjéhyará tí cochíno tí xro perla tjete kíxin tsinkátja va la tsokuen.

Tjanchia la tjéyá la t'inka puerta

(Lc. 11.9-13; 6.31)

7 'Tjanchiará nkehe la Dios tsotjáhará. Tjéyará nkehe la ts'itjará. T'inkará puerta la ntá tsoxitjehé. **8** Kíxin tí nkexro tjanchia nkehe la ts'áyéhé tí nkehe la tí nkexro tjejá nkehe la ts'itja la tí nkexro t'ínsa puerta la tsoxitjehé.

9 ¿A tjejó jnkojín nkexro ntihi chrókjuanjon xro chrókjónce xjeen tí chrókjuchchia xjan niotja? Kja náhí. **10** Q tí chrókjuchchia xjan ijkno koche la, ¿á chróchjéhe ch'án tí xjeen ch'án konche chrókjónce ní? Kja náhí. **11** A ntá jahará kjónté jínahyará la ó nohará nkehe jína chjehérá xjaanrá. A ntá It'eni tjen nkaya nkajní kjaxin antsí tsochjéhe ch'án nkehe jína tí nkexro tsjanchia nkehe.

12 'Méxra xíkaha chrókjuchkosáyehérá kíchuárá éxí yóhé nkexrí tjinkáonrá chrókjuchkosáyahará sín mé xíkaha k'uetoan ch'ín Moisés la ko xíkaha ntáchro tí xroon kuénte tí sín k'uéchrónka itén Dios ósé.

*Tí puerta tekahya
(Lc. 13.24)*

¹³ T'ix̄eenxínrá tí puerta tekahya. Kíxin tí puerta la ko tí nt̄ia ts'itjáyanxín chojni la imá iton la ko teka la nchónhya chojni sátsji tí nt̄ia ntiha. ¹⁴ A ntá tí puerta la ko tí nt̄ia sátsjixinni tí kjuachón la tekahya ntiha la ko tsjéhya chojni ts'itja tí nt̄ia a.

*Tí to mé tjátsqanxínni tí nta
(Lc. 6.43-44)*

¹⁵ 'Méxra tóxakonhanrá tí ts'ikonrá itsi tí sín ch'ia tsontáchro sín kíxin kjaxin sín nixja sín itén Dios. Jehe sín la chrítaón ó tjoé kolélo ó, a ntá nkaya la kolobo jiehe. ¹⁶ Jahará la chrókjuatsoanxínrá tí jehe sín kíxin tí xr̄a ch'e sín kíxin tí ntach'i la xitjahya chrók'óna to uva la ko tí kach'i xitjahya chrók'óna to higo. ¹⁷ Méxra kaín inta jína la t'óna to jína la ntá tí nta jínahya la kjaxin tí to la jehya to jína. ¹⁸ Tí nta jína la xitjahya chrók'óna to jínahya, la ko tí nta jínahya xitjahya chrók'óna to jína. ¹⁹ Kaínxín tí nta t'ónahya to jína mé tsochrínjin la tsoche. ²⁰ Mé xíkaha chrókjuatsoanxínrá jahará tí sín jehya jína kíxin tí xr̄a tjejoch'e sín.

*Jehya kaín chojni ts'ixenhen tí kjuachaxién Dios tjen nkaya nkajní
(Lc. 13.25-27)*

²¹ 'Kénhya chojni tsontáchro: "Inchéni, Inchéni", mé ts'ixenhen sín tí kjuachaxién Dios tjen nkaya nkajní. Náhí. Jehó tí nkexro sinchexiteyá tí nkehe tóxrjínhin T'aná t'etóan tjen nkaya nkajní. ²² Tsjixraká tí yaon a la ntá itsjé sín tsontáchro sín kíxin: "Inchéni, Inchéni, k'uénixjaxínni ihniá la ko tí ihniá mé kuakitsjexínni nchakuen tí jínahya la ko kjuachaxién ihniá kjuasixínni nchónhya kjuaxroan." ²³ A ntá janhan tsjatahá kíxin: "Janhan la chonhya tí jahará. Titonará sájtirá kíxin jahará imá jínahyará."

*Ch'ín Jesús kjuíncheyóexin ch'án kíxin yaá nchia
(Lc. 6.47-49; Mr. 1.22)*

²⁴ 'Méxra tí nkexro tinhin tí nkehe ntáxrjan la titekaon ch'án la jehe ch'án mé éxi yóhé ijkno nkexro chóntha kjuaxrexinkaon jína la kjuich'eña nchia chrítaón tjo. ²⁵ A ntá xrínahya xrakoa chrin, ikui yeé ntāninche la tjan chjéhe xrjinto la kjónté xíkaha la xíkahya tí nchia kíxin itjo tjekjen nchia. ²⁶ A ntá tí nkexro tinhin tí xrjanika la titekakonhya mé jehe la éxi yóhé ijkno nkexro lonti la kjuich'eña ch'án ijkno nchia tí siín nchesen. ²⁷ La ntá xrínahya xrakoa chrin ntá antsí kóyeé ntāninche tí tsaka la ko chjéhe xrjinto la ntá xíka tí nchia, la ijkno kjuachrakon kónhen tíha.

²⁸ A ntá tió kjuixin nixja ch'ín Jesús la ntá imá chrakon tí chojni kíxin nkexrí kjuako ch'án. ²⁹ Kíxin kjuako ch'án éxi ijkno nkexro chóntha imá kjuachaxin la tóyóehya ch'án tí sín maestro kjuako tí ley.

8

*Ch'ín Jesús kjuínchekitóhe jína ijkno chojni chóntha chin lepra
(Mr. 1.40-45; Lc. 5.12-16)*

¹ A ntá ch'ín Jesús k'uinkajinxin ch'án tí jn̄a la chréhe nchónhya chojni. ² La ntá kóchjina ijkno ch'ín níhi chóntha chin lepra la kjuák'exin toch'in ch'án nkayakon ch'ín Jesús la ntáchro ch'án kíxin:

—Inchéni tí tjinkávan la jína chrókjuínchekitohéni jína —ichro ch'án.

³ Ntá ch'ín Jesús mé kjuak'etja itja ch'án chrítaón tí ch'ín a la ntáchro ch'án kíxin:

—Méxra xíkaha tjinkávan. Ntá jie sintakitoha jína.

A ntá tuénxín kuítóhe ch'án jína la ó kjuìn tí chin k'uéchóntha ch'án.

⁴ La ntá ntáchro ch'ín Jesús kíxin:

—Ninkexró ch'enkahya ntihi. Jehó sájtja tjákohé tí ch'ín nch'at'á kíxin kuít̄ha jína la ko sájtíkoá nkehe tsík'etqoan ch'ín Moisés* kíxin ntá xíkaha tsongoexín kaín xín chojni kíxin ó kuít̄ha jína —mé xíkaha k'uetoan ch'ín Jesús.

*Ch'ín Jesús kjuínchekitohe jína ijkno nkexro ch'ehe xra ijkno capitán romano
(Lc. 7.1-10)*

⁵ A ntá tió k'uixenhen ch'ín Jesús chjasin Capernaum la ntá xrínahya kóchjina ijkno capitán romano la chrónòa ch'án ⁶ ntáchro ch'án kíxin:

—Inchéni ntöeni itjen ijkno ch'ín ch'eheni xra mé níhi ch'án, tjetsíka ch'án, tsík'en toté ch'án la imá tjotéhe ch'án —ichro ch'án.

⁷ A ntá ch'ín Jesús kjuát̄ehe ch'án ntáchro ch'án kíxin:

—¿Á sátsjia sintakitoha jína tí ch'ín a? —ichro ch'án.

⁸ Ntá tí ch'ín capitán kjuát̄ehe kíxin:

—Náhí, Inchéni, tósueheni kíxin chrók'uixenhen ntöeni kíxin jehya chojni jínani. Jehó chrókuánjuan kjuachaxin kuéntá, ntá tí ch'ín ch'eheni xra chrókuitohe ch'án jína.

⁹ Janhan na kjaxin chonta chojni t'etuanna la ko kjaxin janhan tétuanhán tí sín soldado. Tió tétuanhán ijkno sín sátsji sín la ntá ó sátsji sín. La kjaxin tió tétuanhán ijkno sín kíxin xrakoa sín la mé tji sín. La ko tió tétuanhán ijkno nkexro ch'ena xra kíxin sich'e xra la ich'e xra —ichro ch'án.

¹⁰ Ntá kuínhin ch'ín Jesús ntá kóxakonhen ch'án kíxin xíkaha chro tí ch'ín a, ntá nixjehé ch'án tí sín chréhé ch'án ntáchro ch'án kíxin:

—Chaxín ntáxrjan kíxin kuenté tí nación Israel la k'uitjahya janhan ninkexró tinkáchónki xíkaha éxí tinkáchónki tí ch'ín i. ¹¹ Janhan xrjanka kíxin nchónhya chojni ókjé tjixin tí tjitoxin yaon la ko tí tjiatóxin yaon la sineko sín tí ch'ín Abraham la ko Isaac la ko Jacob tí tjen tí kjuachaxin kuénte Dios. ¹² A ntá itsjé tí sín chrók'uejó tí tjen tí kjuachaxin kuénte Dios la ts'axrjexín sín ntiha, sátsji sín tí sítié la ntaha tsotsjánka sín la sinetaón neno sín.

¹³ La ntá ch'ín Jesús mé nixjehé ch'án tí ch'ín capitán ntáchro ch'án kíxin:

—Sátja ntoa. Éxí kuítekávan jaha la tsoxiteyá tsonghen tíha —ichro ch'án.

La ntá tí ch'ín ch'e xra la o tuénxín tí hora a tsíkitohe ch'án jína.

*Ch'ín Jesús kjuínchekitohe ich'ee ch'ín Pedro jína
(Mr. 1.29-31; Lc. 4.38-39)*

¹⁴ A ntá sákuí ch'ín Jesús tí ntœe ch'ín Pedro la ntaha k'uíkon ch'án kíxin tí ich'ee ch'ín Pedro la níhi tjan tjetsíka tjan la chónta tjan sóa. ¹⁵ Ntá itsé ch'án itja tjan la ntá kjuínhin tjan tí sóa la ntá k'uínkajen tjan la kjuankíxin yaxínhin tjan kíxin tsjanjon tjan nkehe sine sín.

*Ch'ín Jesús kjuínchekitohe nchónhya tí sín níhi jína
(Mr. 1.32-34; Lc. 4.40-41)*

¹⁶ La ntá tí ó kóntanonte ntá kjuikohe sín ch'ín Jesús nchónhya chojni chónta nchakuen tí jínahya. La ntá jnkokoá nixja ch'án la k'uaxrjexín tí nchakuen tí jínahya tí jehe sín la kjaxin kjuínchekitohe ch'án jína kaín tí sinnihi. ¹⁷ Mé xíkaha kjuich'e ch'án kíxin tsoxiteyá tí nkehe tsíchrónka tí ch'ín Isaías tí ch'ín k'uéchrónka itén Dios. Mé ntáchro ch'án xikihi: “Jehe ch'án kuákja ch'án tí chin chóntani la ko jehe ch'án kuámá ch'án tí kjuatjoté.”[†] Mé xíkaha ichro itén Dios.

*Tí sín tjinkaon tsochréhé tí ch'ín Jesús
(Lc. 9.57-62)*

* **8:4** Levítico 14.1-32 † **8:17** Isaías 53.4

¹⁸ Tió k'uíkon ch'ín Jesús kíxin nchónhya chojni k'uántatjen sín ch'án la ntá k'uetoan ch'án kíxin ts'átöye sín í jnko chrínta ntä. ¹⁹ La ntá ijnko tí sín maestro tjako tí ley mé kóchjinehe ch'án tí ch'ín Jesús la ntáchro ch'án kíxin:

—Maestro tjinkaonni chróchréheni tí jaha kjónté nketí tjinkávan sátsjia —ichro tí ch'ín a.

²⁰ La ntá kjuátehe ch'ín Jesús ntáchro ch'án kíxin:

—Tí koxrónta chóntha va itjuéé va la ko tí koxroxé chóntha va kaké va. A ntá tí Xjeen Dios K'óna Chojni mé chóntahya nketí ts'ok'èxin ch'án.

²¹ A ntá ijnko tí chojni k'uájiko ch'án, mé ntáchro ch'án kíxin:

—Inchéni, titohéni senó sátsjikjaváni it'eni —ichro ch'án.

²² La ntá kjuátehe ch'ín Jesús ntáchro ch'án kíxin:

—Náhí, chréhé tí janhan. Titohé kíxin tí chojni tsík'en la jnkokón sín tsík'en tsjavá kíchó sín —mé xíkaha ichro ch'ín Jesús.

Ch'ín Jesús kjuínchek'ixrata tí xrínto la ko tí nta

(Mr. 4:35-41; Lc. 8:22-25)

²³ Ntá ch'ín Jesús k'uíxenhen tí ntabárco la k'uíxenko ch'án tí sín k'uájiko ch'án. ²⁴ La ntá xrínahya imá síchrica ntä la ó chjina sítikia ntä tí ntabárco. La kjánchó ch'ín Jesús la tjejua ch'án. ²⁵ La ntá tí sín k'uájiko ch'án kjuínchek'aya sín ch'án la ntáchro sín kíxin:

—Inchéni nchekaáni kíxin tí ntabárco la ó meró ts'aniánkí ntä —ichro sín.

²⁶ Ntá kjuátehe ch'án ntáchro ch'án kíxin:

—¿Nkekuénté kíxin imá chrakonrá? Intsíkoá tinkachónkirá Dios —ichro ch'án.

Kjuixin ntáchro ch'án xíkaha ntá k'uàya ch'án la k'uetoenhen ch'án tí xrínto la ko tí ntayaon la ntá tuénxín k'uixrata. ²⁷ La ntá imá chrakon sín la ntáchro sín kíxin:

—¿Xá nkexro tíhi? Kjónté xrínto la ko ntayaon la mé nchexiteyéhe ch'án —ichro sín.

Tí sín chóntha nchákuén tí jínahya tí nonte Gadara

(Mr. 5:1-20; Lc. 8:26-39)

²⁸ Ntá tió k'uátöye ch'ín Jesús tí ntayaon a ntá kjuíji sín tí nonte Gadara. La ntá yaá chojni chóntha nchákuén tí jínahya k'uaxrjexín tòyé chojni tsík'en la kóchjinehe sín ch'án. Jehe sín mé imá jíehe sín la kohya ninkexró tjacha ts'atsínska tí ntä ntiha. ²⁹ La ntá kjuankíxin k'óyako sín ntáchro sín kíxin:

—Tjiatéhya jaha tí jeheni jaha Jesús mé Xjeen Dios. ¿Á k'uinka ntihi kíxin sinchekjasóteni kjónte naxä kjuixrakáhyá tí yaon tsjasóteni? —ichro sín.

³⁰ A ntá ntiha kánhyó kjín siín itsjé cochíno xrine va. ³¹ La ntá tí nchákuén tí jínahya mé chrónóehé tí ch'ín Jesús kíxin:

—Tí tsétoan kíxin sátsjini la chrókjúánjuan kjuachaxin chrók'uixenhenni tí cochíno —ichro sín.

³² Ntá ntáchro ch'ín Jesús kíxin:

—Tí xíkaha la sájtja —ichro ch'án.

La ntá tí nchákuén tí jínahya a mé k'uaxrjexín tí chojni la k'uíxenhen tí cochíno. La ntá kaín xín tí cochíno kuinká va, k'uínkajinxín va ntiha kjuítsínkayá va tsäka, ntá kjuítsínkankí va ntä, kjuínhin va ntä.

³³ La ntá tí chojni t'ayakonhen tí cochíno mé chrakon sín ntá kuinká sín sákjuí sín chjasin la kjuankíxin chrónka sín kaín tí nkehe kónhen la ko kaín nkehe kónhen tí sín k'uéchóntha tí nchákuén tí jínahya. ³⁴ A ntá kaín tí sín chjasin ntiha sákjuítsjehe sín ntá kjuíji sín tí tjen ch'ín Jesús ntá k'uíkon sín kíxin xíkaha tsíkónen la chrónóehé sín ch'án kíxin sáchrókjui ch'án okjé.

9

*Ch'ín Jesú斯 kjuínchekitóhe jína ijnko chojni tsík'en toté
(Mr. 2.1-12; Lc. 5.17-26)*

¹ La ntá kjuixin tíha ntá ch'ín Jesús mé k'uíxenhen ch'án ijnko ntabárcq la k'uátsínka ch'án í jnko lado chrínta ntá la kjuíji ch'án chjasén ch'án. ² A ntá ntiha kuiqao sín ijnko ch'ín tsík'en toté la tjetsínkatak'á ijnko kania. Ntá k'uíkon ch'ín Jesús kíxin chaxín tinkáchónki sín ch'án la ntá nixjehé ch'án tí sinníhi ntáchro ch'án kíxin:

—Xjeenni nchechéhé qasán. Tí jie chonta la ó kjuixin kjuinhan —ichro ch'án.

³ La ntá iso tí sín maestro tjako tí ley mé jehó sín ikjo sín qasén sín, ntáchro sín kíxin:

—Tí ch'ín i mé ncheyóhe ch'án qasén ch'án Dios kíxin xikaha nixja ch'án.

⁴ Ntá ch'ín Jesús mé ó nohe ch'án kíxin nkehe tí kjo sín qasén sín ntá ntáchro ch'án kíxin:

—¿Nkekuénté kíxin xikaha jínahya tjenkayáxinrá? ⁵ ¿Nkehe qantsí xrähya chróntátjan ch'án? ¿Á qantsí xrähya chróntátjan ch'án kíxin ó kjuixin kjuinhan ch'án tí jie yámá ch'án o á qantsí xrähya chróntátjan ch'án kíxin chrók'uínkaten ch'án sáchrókui ch'án? ⁶ Méxra tsjákoxian kíxin tí Xjeen Dios K'óna Chojni mé ntihi chjasintajni chóntha kjuachaxin tsjakjlinhin ijié chojni.

Ntá ntáche ch'án tí sinníhi a kíxin:

—Ijie la t'inkatjen tjatsíyan kaniqa na sátsjia ntøa —ichro ch'án.

⁷ Ntá tí ch'ín tsík'en toté na tuénxín k'uínkaten ch'án la sakjuí ch'án ntøe ch'án. ⁸ Ntá kaín tí sín siín ntiha k'uíkon sín kíxin xikaha kónhen la imá chrakon sín la kjuanchehe sín Dios kjuasáya kíxin tí nkexro imá kjuakoxin ch'án kjuachaxin kuénte Dios.

Ch'ín Jesú斯 k'uíyéhe ch'án tí ch'ín Mateo

(Mr. 2.13-17; Lc. 5.27-32)

⁹ A ntá ch'ín Jesús sákjuixin ch'án ntiha la k'uíkon ch'án ijnko ch'ín it'in Mateo tjetjaxin ch'án ntiha nchekjènki ch'án. Ntá ntáchro ch'ín Jesús kíxin:

—Chröhé tí janhan —ichro ch'án.

Ntá ch'ín Mateo tuénxín k'uínkaten ch'án chröhé ch'án tí ch'ín Jesús.

¹⁰ A ntá chr'éxin ch'ín Jesús kjuák'e ch'án ntøe tí ch'ín Mateo la ntaha xranjon nkehe sine ch'án la ntá itsjé tí sín nchekjènki la ko í so sín chóntha jie mé kjuíji sín la kjaxin kjóneko sín tí ch'ín Jesús la ko tí sín k'uájiko ch'án. ¹¹ La ntá tí sín fariseo kjaxin k'uíkon sín xikaha la kjuanchankíhi sín tí sín k'uájiko ch'ín Jesús, ntáchro sín kíxin:

—¿Nkekuénté kíxin tí ch'ín maestro kuéntará mé neko ch'án tí sín nchekjènki la ko tí í so sín chóntha jie? —ichro sín.

¹² Ntá ch'ín Jesús la kuínhin ch'án nkehe tí tjo sín la ntáchro ch'án kíxin:

—Tí sín niehya la t'ichjánxienhya sín nkexro sich'e xroqan. Náhí. Jehó tí chojni níhi mé t'ichjánxinhin sín nkexro sich'ehe sín xroqan. ¹³ Sátjirá la ts'ítjará nkexri t'axrjexín tí nkehe ntáchro xroon itén Dios. Mé ntáchro kíxin: “Janhan tjinkavan kíxin chrókuíkonóehérá chojni la tjinkakonhya kíxin chrók'oyánrá iko chrókjuánjonrá.”* Mé xikaha ichro itén Dios. Janhan na k'uinkahya ntihi kíxin chrók'uíyahá chojni jína tjejó. Náhí. K'uinka kíxin ts'iyahá tí chojni chóntha jie kíxin chrókuítóhe sín tí ijié sín ntá chrókjuinkí sín tí tjenkayáxin sín —ichro ch'án.

Kjuanchankí sín kuénte tí nehya sín

(Mr. 2.18-22; Lc. 5.33-39)

¹⁴ Ntá iso tí sín k'uék'ajiko tí ch'ín Juan Bautista mé kóchjinehe sín ch'ín Jesús la kjuanchankíhi sín ch'án, ntáchro sín kíxin:

—Jeheni la ko tí sín fariseo la jnkoyaxon nehyani, a ntá tí sín xrikoá la, ¿nkekuénte xikahya ch'e sín? —ichro sín.

¹⁵ Ntá kjuátehe ch'ín Jesús, ntáchro ch'án kíxin:

* 9:13 Oseas 6.6

—¿Xá chrók'uává kaín tí sín tsík'íyehé sín tsochjina tsotéhe ijnko chojni kíxin naxa tjen tí ch'ín tsíkótehe tjejóko sín ntiha? A ntá tsjixraká ijnko yaon tsotsé sín tí ch'ín tsíkótehe sátsjiko sín ch'án ntá kaín tí sín tsíkóchjina mé ts'ává sín la í sinehya sín.

¹⁶ 'Nijnko chojni chrókuak'eniehe tí ka ó ntaxis it'o ka nixin kíxin ntá chrókuixéhe tí ka nixin chrók'uítjan tí ka ntaxis ntá qantsí má chrók'uichje. ¹⁷ La ko kjaxin éxi yóhe chrókuikiahya chojni xranvino nixin ijnko tjuaxran ó ntaxis kíxin tí xíkaha chrókuich'e sín ntá chrók'uichje ti tjuaxran ntaxis. Ntá chrók'uitjáyan tí xran la ko chrok'uitjáyan tí tjuaxran. Ntá tí xranvino nixin chrókuikia ijnko tjuaxran nixin la ntá xíkaha la yói nkehe chrók'uitjáyanha.

Ch'ín Jesús kjuínchexchón tí tjachjin xjeen ch'ín Jairo la ko kjuínchekite jína ijnko tjan kuákóxín iké ch'án

(Mr. 5.21-43; Lc. 8.40-56)

¹⁸ Ntá naxa tjenixja ch'ín Jesús la ntá ikjui ijnko ch'ín t'etoan kuente tí sín judío la kjuák'lexín toch'in ch'án nkayakon tí ch'ín Jesús la chrónóhe ch'án kíxin:

—Tí xíjanna na ntá kjuixin k'uén. Xrjanóha sáchrókuini chrókuakétja tjá jehe tjan ntá chróhexchón tjan —ichro ch'án.

¹⁹ Ntá k'uinkatjen ch'ín Jesús ntá sákjuíko ch'án tí ch'ín a la ko sákjuíkotoxin ch'án tí sín k'uajiko ch'án. ²⁰ A ntá itjen ijnko chojni chjin níhi tjan, ó teyó nánó chóntha tjan ijnko chin ts'ítji tjan jni. Ntá kóchjina tjan nótton tí ch'ín Jesús ntá kuákóxín tjan tí iké ch'án ²¹ kíxin tjenkayáxin tjan kíxin kjónté chrínta iké ch'án ó chrókuákóxín tjan, la táhó chrókuítexín tjan jína. ²² Ntá nkátjíá ch'ín Jesús la k'uikon ch'án tí tjan a ntá ntáchro ch'án kíxin:

—Xjeenni, nchechéhé asán jaha. Jaha la ó kuítøha jína kíxin kuítekávan tí janhan —ichro ch'án.

Na ntá tuénxín ó kuítøhe tjan jína.

²³ Ntá tió kjuíji ch'ín Jesús ntøe tí ch'ín judío t'etoan la k'uikon ch'án kíxin ó yaxínhin tí sín músico kíxin ó sátsjixravá xjan. La kaín tí chojni tsíkójkotsé la tsjánkàmá sín xjan. ²⁴ La ntá ntáchro ch'ín Jesús kíxin:

—Tí xjan méhe titohérá, kíxin tsík'enhya xjan, la tjejua xjan ó —ichro ch'an.

Ntá kjuanoá sín ch'án. ²⁵ A ntá tí k'uaxrje kaín chojni la ntá ch'ín Jesús la k'uixenhen ch'án la itsé ch'án itja tí tjan a la ntá tuénxín k'uinkatjen tjan. ²⁶ Ntá kuenté chjasin ntiha la kuínhin sín kíxin xíkaha kónhen.

Ch'ín Jesús kjuínchekite jína yaá sín t'ikonhyá

²⁷ Ntá sákjuixin ch'ín Jesús ntiha la ntá yaá chojni t'ikonhyá kjuíchréhe tí jehe ch'án la k'uíyehé sín ch'án ntáchro sín kíxin:

—Tíkonóhéni jaha tsík'axrjeníxian David.

²⁸ Ntá k'uixenhen ch'ín Jesús ijnko nchia na ntá kóchjina tí yaá sín t'ikonhyá la ntá ch'ín Jesús kjuanchankíhi sín ch'án, ntáchro ch'án kíxin:

—¿A títekávan kíxin tsjácha sít'a xíkaha? —mé xíkaha kjuanchankí ch'án.

Ntá kjuátøhe sín kíxin:

—Jeén, Inchéni, titekaonni.

²⁹ Ntá ch'ín Jesús kjuak'etja tja ch'án chrítaón ikon sín la ntáchro ch'án kíxin:

—Tí xíkaha kuítekávan la tsoxitayá —mé xíkaha ichro ch'án.

³⁰ La ntá tuénxín ó jína t'ikon sín. Ntá ch'ín Jesús k'uuetuenhen sín ch'án kíxin:

—Ninkexró tsochéñkahyará —ichro ch'án.

³¹ Ntá tuénxín sákjuí sín la nkuíxín chjasin ntiha chrónka sín tí kjuaxroan kjuasin ch'ín Jesús.

Ch'ín Jesús kjuínchekite jína ijnko ch'ín nòsin

³² Tió sákjuú tí sín k'uék'ikonhya, a ntá iso chojni kjuikao sín ijkno ch'ín nósin ch'án la chóntha ch'án nchakuen tí jínahya. ³³ Ntá ch'ín Jesús kuakitsje tí nchakuen tí jínahya ntá tí ch'ín nósin la ó kjuankíxin nixja ch'án. Ntá kaín chojni la k'uikon sín la ntáchro sín kíxin:

—Nunca t'ikonyéni ijkno kjuaxroan xíkaha kuenté tí nación Israel —ichro sín.

³⁴ A ntá tí sín fariseo ntáchro sín kíxin:

—Tí nkexro t'etueñhen tí nchakuen tí jínahya tsíkjanjon kjuachaxin mé xíkaha takitsje tí ch'ín i tí nchakuen tí jínahya —mé xíkaha ichro sín.

Ch'ín Jesús kuijkonóehe ch'án chojni

³⁵ Ntá k'uátsínska ch'ín Jesús itsjé chjasin jié la ko chjasin ntsí la kjuakoxín ch'án jinkojnko njinko Israel. Chrónka ch'án tí tan jína nkexrí tjen tí kjuachaxin kuénte Dios. La ntá kjuinchekeitóhe ch'án jína chojni níhi chóntha kaín xín chin la ko chojni chóntha kjuatjoté.

³⁶ K'uikon ch'án kíxin nchónhya chojni k'uéjó sín ntá kuijkonóehe ch'án sín kíxin imá tóxakonhen sín la k'uéjó sín exí kolélo chóntahya nkexro t'ayakonhen. ³⁷ Ntá ntáche ch'án tí sín k'uájiko ch'án kíxin:

—Chaxín ntáxrjan janhan kíxin imá tsík'óna, kjánchó chojni sich'e xra mé tsjéhya.

³⁸ Chrókjuanchehérrá tí Ínché tí nonte kíxin chróchr'án ch'án itsjé chojni chrókjuch'e xra —mé xíkaha ichro ch'ín Jesús.

10

Ch'ín Jesús kjueyá teyó sín ts'ajiko ch'án

(Mr. 3.13-19; Lc. 6.12-16)

¹ Ntá ch'ín Jesús mé kjueyá ch'án teyó sín ts'ajiko ch'án la kjuanjon ch'án kjuachaxin tsakitsje sín kaín tí nchakuen tí jínahya t'etueñhen asén chojni la ko sinchekeitóhe sín jína kaín chojni chóntha kaín chin la ko kaín xín kjuatjoté.

² Na mé tí teyó sín k'uájiko ch'án mé it'in sín xíkihi: saoxín mé ch'ín Simón na mé kjaxin it'in ch'án Pedro la ko kíchó ch'án Andrés la ko ch'ín Jacobo la ko kíchó ch'án Juan mé tí xjeen ch'ín Zebedeo. ³ La ko kjaxin ch'ín Felipe la ko ch'ín Bartolomé la ko ch'ín Tomás la ko ch'ín Mateo mé tí ch'ín nchekjénki la ko ch'ín Jacobo xjeen ch'ín Alfeo la ko ch'ín Lebeo, mé jehe ch'án kjaxin it'in ch'án Tadeo. ⁴ La ko kjaxin ch'ín Simón, mé kuénte tí sín cananista, la ko kjaxin ch'ín Judas Iscariote, mé tí nkexro chr'éxín kjuinchejkji tí ch'ín Jesús.

Ch'ín Jesús k'uetuñhen tí teyó sín kíxin sátsjikjako sín kjuachaxin kuénte Dios

(Mr. 6.7-13; Lc. 9.1-6)

⁵ Ntá k'uetuñhen ch'ín Jesús tí teyó sín kíxin sátsji sín la k'uetoan ch'án kíxin:

—Tjíhyará tí tjejó tí sín jehya judío la ko t'ixeenhyará tí chjasin siín estado Samaria.

⁶ Náhí. Ichá jína sájtírá tí tjejó tí chojni exí kolélo kjuichroe kuénte nación Israel. ⁷ Sájtírá tjákhérá sín kíxin kjuachaxién Dios tjen nkaya njajní la í séhya tsi. ⁸ Sincheikitohérá jína chojni níhi la ko sincheikitohérá jína tí sín chóntha chin lepra la ko sinchexechónrá chojni tsík'en la takítsjerá tí nchakuen tí jínahya. Jahará kjaxin kuitonhanrá tí kjuachaxién Dios, méxra chrókjuañhyará jahará kjaxin.

⁹ 'Chrókjuañhyará ninkehó chichaon oro la ko ninkehó chichaon plata la ko ninkehó chichaon cobre ¹⁰ la ko tí sájtírá ntja la chrókjuañhyará ka bolsa la chrókjuañhyará yaá ka chrókjuañhyará la ko chrókjuañhyará tokatárá la ko chrókjuañhyará nta tjíxinrá. Tí nkexro ch'e xra la jehí siín kjuachaxin ntihá chrókjone.

¹¹ 'A ntá tió tsjasánrá ijkno chjasin jié o ijkno chjasin ntsí la tjeyará ijkno nkexro tsjanjon kjuachaxin la ntøe sín ntahó chrókuitohará ntá tsjixin tí xra ntá sátsjirá. ¹² A ntá tió t'ixenhná nrá ntøe sín la nixjehérá sín tjákoxinrá jnkójina. ¹³ A ntá tí chaxín jína asén sín la ts'ayéhë sín tí kjuaxróxin, a ntá tí náhí la sájtikorá tí kjuaxroxin. ¹⁴ A ntá tí tsochrohya sín tsjanjon sín kjuachaxin tsitohará la tjinkakonhya sín tsinhin sín tí nkehe

tsochronkará na mé t'axrjéxínrá tí ntœ sín o tí chjasén sín la t'oxènjinrá tí inche chónata totará. ¹⁵ A ntá chaxín tjonkará kíxin tió tsjixraká tí yaon tsjixixín na mé tí sín chjasin Sodoma la ko tí sín Gomorra kjónté imá k'uéchóntha sín jie la kánhyó tsjasóte sín, a ntá tí sín chjasin a la antsí tsjasóte sín kíxin k'uéjóxróxinhya sín tí tan chrókuaáxin sín.

Ókjé sín tsóníkkakonhen tí sín kuènte Cristo

¹⁶ 'Janhan tsochr'an tí jahará éxí yóhé chróchr'an kolélo ts'ejóyakjan kolóbo. Listo chrók'uejorá éxí konche xikaha la chrók'uejorá éxí kontóá chrókójiahýará. ¹⁷ Chrókóxakonhanrá kíxin itsi chojni tsotsé sín tí jahará la sátsjikoará sín tí tjejó tí sín t'etqan la ko nkaxenhen tí ninkoé sín tsjatiaxínrá sín. ¹⁸ La ntá tsjikaánrá sín tí tjejó tí sín t'etqan la ko tí siín tí sín rey kíxin tinkachónkirá tí janhan. Ntá jína tsochronkará kíxin tinkachónkirá tí janhan nkayakon tí jehe sín la ko nkayakon tí sín chónhya Dios. ¹⁹ A ntá tió sátsjikoará sín tí tjejó tí sín t'etqan la tóxakuanhyará nkehe tsontáchrórá o nkexrí tsonixjará kíxin tió tsjixraká tí hora la ntá Dios mé tsjinkitsará tsonixjará. ²⁰ Kíxin jehya jahará tsonixjará. Náhí. Tí Nchäkuen It'éni mé tsochrónka nkehe tsonixjará.

²¹ 'Ntá iso chojni mé tsjikaán sín tí kichó sín kíxin its'en la ko tí it'é mé tsjikaán tí xjeen. A ntá tí xjan mé tsokjan tsóníkkakonhen tí it'é kíxin its'en. ²² Kaínxín chojni chjasintajni tsóníkkakonhanrá sín kíxin tinkachónkirá tí janhan. A ntá tí nkexro tsítóehya tsinkáchónki sín tí janhan hasta tsjéje chjasintajni mé tsaa. ²³ Tió má chónkíhará sín ijkko chjasin la ntá sátsjirá í jnko chjasin. La ntá chaxín tsoxrjanka kíxin tí Xjeen Dios K'óna Chojni mé tsokjan tí naxa tjixinha ts'atsíñkará kaín tí chjasin Israel.

²⁴ 'Tí nkexro xrakohe la kánhyó tjetoan la tí maestro la antsí tjetoan, la ko kjaxin tí nkexro ch'e xra la tjetoanhyá la antsí tjetoan tí lamo. ²⁵ A ntá tí nkexro xrakohe chrókuakoxín ch'án éxí tí nkexro kjuakohé ch'án la ko tí nkexro ch'e xra chrókuakoxín ch'án éxí tí lámoé ch'án ch'ehe ch'án xra. Tí ch'ín ìnché nchia la kjaxin ncheck'in sín Beelzebú la kjaxin tí sín kjéhya xikaha ncheck'in sín.

Nkexro tí chróchrakonhénrá (Lc. 12.2-9)

²⁶ 'Méxra chróchrakuénhyará chojni. Kohya ninkehó nkehe imó chrókónoehya chojni la ko kohya nkehe tjemá ijie kíxin chrókónoehya chojni chr'éxín. ²⁷ Tí nkehe tjonkará sítié la t'ichjánxín tsochronkará tió itsi xrohi t'inkaséyanxín tí yaon. La ko tí nkehe tjonkará ijie ninkexró noehya la t'ichjánxín chrónkará chrókuinhin kaín sín. ²⁸ Chróchrakuénhyará tí sín t'óyán cuérpoé chojni kíxin asén chojni xitjahya ts'óyán sín. Ichá jína chróchrakonhénrá tí nkexro tsjacha sincheck'itjáyanxín cuérpoé chojni la ko asén chojni tí xrohi ts'ankayahá.

²⁹ 'Á chrókóxixinha yaá koxroxé ntsíntsí ijkko chichaon ntsí? A ntá kjónté xikaha la chrók'uánótjenhyá nijuko tí jehe va nonte tí chrókuanjonhyá It'éni kjuachaxin. ³⁰ A ntá kjónté tí kaxihí chóntha ikjárá la ó nohe ch'án nkekjaín ka chontará. ³¹ A ntá jahará chróchrakonhyará kíxin tóyóahýará tí koxroxé kíxin antsí sínkí tí jahará, a ntá tí koxroxé, kjónté nchónhya va, la kánhyó sínkí tíha.

Tí sín tósuehýa tsochrónka sín kíxin tinkáchónki sín Cristo nkayakon chojni (Lc. 12.8-9)

³² 'Kaín tí chojni tsochrónka kíxin tinkáchónka sin nkayakon chojni la janhan mé kjaxin tsoxrjanka kíxin choxian tí jehe sín nkayakon T'aná tjen nkaya nkajní. ³³ A ntá tí nkexro sinchemána tsontáchró sín kíxin chónhya sín tí janhan nkayakon chojni la kjaxin janhan tsontáxrjan kíxin chonhya tí jehe sín nkayakon T'aná tjen nkaya nkajní.

Jnkokoáhya tsjenkayáxin chojni kíxin ó kui Ìnchéni Jesús (Lc. 12.51-53; 14.26-27)

³⁴ 'Tjenkayáxinhyará kíxin k'uinkakian kjuaxróxín chjasintajni. Náhí. Janhan k'uinkakianhyá kjuaxróxín. Tsjanjonko kichó chojni kíxin k'uinka janhan. ³⁵ Janhan

k'uinka kíxin tsonínkakonhen chojni it'é, la ko tí xjeen sín chjin mé tsonínkakonhen iné, la ko tí títintá tsonínkakonhen ich'ee. ³⁶ Mé xikaha tí sín tsonínkakonhen kichó la mé tí sín naxá kjéhya sín.

³⁷ A ntá tí nkexro qantsí tjuèhe it'é sín la ko iné sín la kánhyó tjuèhe tí janhan la mé xitjahya ts'óna sín kuéntana, la ko tí nkexro qantsí tjuèhe xjeen sín la kánhyó tjuana sín la mé xitjahya ts'óna sín kuéntana. ³⁸ La tí nkexro tamáhya ntacruz, chrèhya sín tí janhan la mé xitjahya ts'óna sín kuéntana. ³⁹ Tí nkexro tjinkaon kíxin kohya nkehe chrókónhen sín mé ts'itjáyan sín, a ntá tí nkexro chrókjuinchek'itjáyanxín əsén kíxin tinkáchónki sín tí janhan la mé tsaá sín.

Tí nkexro ts'áyéhé nkehe

(Mr. 9.41)

⁴⁰ Tí nkexro chrókjuanjon kjuachaxin chrók'uejorá la mé exí chrók'uáyéhé sín tí janhan la ko tí nkexro chrók'uáyéhé tí janhan la exí yóhé chrók'uáyéhé sín tí nkexro ichr'ánnna k'uinka. ⁴¹ La tí nkexro chrókjuanjon kjuachaxin tsjak'e ijnko nkexro nixja itén Dios kíxin táha la Dios ichr'án la mé ts'áyéhé nkehe exí ts'áyéhé tí nkexro kjuako. La ko tí nkexro chrókjuanjon kjuachaxin tsjak'e ijnko chojni jína kíxin jína ch'án mé xikaha ts'áyéhé sín nkehe exí ts'áyéhé tí nkexro jína. ⁴² A ntá tí nkexro sinchekitonhen ijnko vaso ntá kin kjónté ijnko chojni noehya má, chréhé tí janhan, la mé chaxín ntáxrjan kíxin tí ch'ín a mé chaxín ts'áyéhé ch'án nkehe jína kíxin xikaha kjuich'e ch'án.

11

Ch'ín Juan Bautista k'uētuēnhen iso sín

(Lc. 7.18-35)

¹ Ntá ch'ín Jesús kjuixin kjuakohé ch'án tí teyó sín xriko ch'án la ntá sákjuíxín ch'án ntiha la sákjuíkako ch'án iso chjasín chjinaxón ntiha.

² A ntá ch'ín Juan mé tjechjina ch'án ntøechiso ntá xrínahya kuínhin ch'án nkerí xrø tjech'e Cristo. La ntá k'uētuēnhen ch'án iyó tí sín k'uék'ajiko ch'án kíxin sátsjitsjehe sín tí ch'ín Jesús. ³ Ntá sákjuí sín kjuíji sín ntiha ntá kjuanchankíhi sín ch'án ntáchró sín kíxin:

—¿Á jaha tí nkexro itsi ní o á naxá tsochónhenni í jnko nkexro? —ichro sín.

⁴ A ntá kjuátehe ch'ín Jesús, ntáchró ch'án kíxin:

—Sátjirá tjichenkárá tí ch'ín Juan tí nkehe k'uíkonrá la ko tí nkehe kuínhínrá.

⁵ Chenkará ch'án kíxin tí sín k'uék'ikonyha la ó t'ikon sín jie la tí sín xitjahya k'uékji la ó tji sín la ko tí sín k'uéchóntha chin lepra la ó kótjoá sín kuítohe sín jína la ko tí sín k'uékiényha la ó tinhin sín jie. Kjaxin tí sín tsík'en na ó xechón sín ínaá la ko kaín tí sín nòa mé síxrakohé sín tí tan jína tsaáxin sín. ⁶ Méxra imá náxrjón tí nkexro kohya nkehe t'inkákonhen tinkáchónki tí janhan.

⁷ Tió sákjuí sín ntá ch'ín Jesús kjuankíxín nixjéhé ch'án tí sín k'uéjó la chrónka ch'án kuénte ch'ín Juan ntáchró ch'án kíxin:

—Tí sákjuítsjehérá ch'ín Juan nteje la, ¿nkexrí k'uíkonrá tí jehe ch'án? ¿Á k'uíkonrá ch'án exí ijnko tji nchexrayehe xrínto? ⁸ Tí náhí, la ¿nkehe k'uíkonrá? ¿Á k'uíkonrá ch'án exí ijnko nkexro tsík'itsa jína? Jahará ó nohará kíxin chojni tsík'itsa jína la tjejó sín tí nchia kuénte tí sín rey. ⁹ ¿Á ntá nkehe k'uíkonrá? ¿Á ijnko nkexro chrónka itén Dios? Jehe chaxín la qantsí chóntha ch'án kjuachaxin la tí sín k'uéchrónka itén Dios la kánhyó. ¹⁰ Ch'ín Juan mé tí nkexro kui exí xikaha chrónka xroon itén Dios ósé. Mé ntáchró xikihi:

Janhan mé tsochr'an ijnko nkexro tsochrónka itan kuéntana tsítónxin ntia, kíxin tsjasiyóxin ch'án ntia kuéntá.*

Mé xikaha chrónka itén Dios. ¹¹ Ntá ijnko nkehe chaxín tsotjonkárá kíxin kaín tí nkexro k'uéjó senó la kánhyó tjetoan sín la qantsí tjetoan tí ch'ín Juan Bautista. Kjánchó ijnko

* 11:10 Malaquías 3.1

nkexro kjónté tjetuanhya la tí ts'áyéhé sín tí kjuachaxién Dios tjen nkaya nkajní la əntsí tjetoan sín la ntá jehe ch'ín Juan la kénhyó.

¹² 'Tí ikui ch'ín Juan Bautista hasta ijie la imá tjanjonxín tí sín tjinkaon ts'ikon sín tí kjuachaxin kuènte nkaya nkajní. La jehó tí sín imá chóntha kjuachaxin mé tsjacha sín. ¹³ Kaín tí sín profeta la ko tí ley kuènte ch'ín Moisés mé chrónka nkexrí tí kjuachaxin kuènte Dios hasta ikui ch'ín Juan. ¹⁴ A ntá tí jahará chrókuítekáonrá tíhi; kíxin ch'ín Juan la mé ikui kíxin tí xra kuènte ch'ín Elías tsjintaxín sich'e ch'án kíxin ch'ín Elías la t'ichjánxín chrókui ch'án ínaá. ¹⁵ Tí nkexro tjinkaon chrókuinhin la chrókuinhin.

¹⁶ ¿Nkexrí chrókuíntayóaxian tí chojni tjejó ijie? Tójóhē sín tí chánjan tjejótjaxín sín ntasin tsítán sín la t'íyéhé sín kíchó sín ¹⁷ ntáchro sín kíxin: "K'uánoani flauta kjánchó jahará la tēhyará. Itsjeni isón kuènte chojni tsík'en la ntá k'uaváhyará la ko tsjankahyará." ¹⁸ Kíxin tí ikui ch'ín Juan la kjónehya ch'án la k'uíhya ch'án vino la jahará ntáchrórá kíxin ijkno nchakuen tí jínahya mé chóntha ch'án. ¹⁹ A ntá tió kui tí Xjeen Dios K'óna Chojni ntá kjóne ch'án la ko ik'ui ch'án, ntá ntáchrórá kíxin imá itsjé kjóne ch'án la imá ik'ui ch'án la ko imá t'ito ch'án tí chojni chóntha jie la ko tí sín nchekjènki, ichrorá. A ntá tí kjuachaxin kuènte Dios mé tjakoxin tí xjeen ch'án.

Tí chjasin titekakonhya (Lc. 10.13-15)

²⁰ Ntá ch'ín Jesús mé kjuankíxin ch'án ntáche ch'án tí sín tjejó iso tí chjasin imá kjuasixín ch'án kjuaxroan kíxin kjónté xíkaha la naxa kuinkáchónkiha sín Dios. ²¹ Ntá ntáchro ch'án kíxin:

—Nòará jahará tjejorá chjasin Corazín la ko nòará jahará tjejorá chjasin Betsaida. Tí chrók'uixin tí kjuaxroan tí chjasin Tiro la ko chjasin Sidón exí k'uíkonrá jahará ntá tí chrókojehe sín la tjoka chrókuinkáchónki sín Dios la tjoka chrókuakoxin sín chrók'uinkaya sín ka tié la ko nteso chrókuinchek'ia sín asén sín. ²² Ntá ntáxrjan kíxin tí yaon tsitqexín ijie chojni a ntá jahará əntsí tsjasótiará, a ntá tí sín chjasin Tiro la ko chjasin Sidón la kénhyó tsjasóte sín. ²³ A ntá jahará chojni chjasin Capernaum tjenkayáxinrá kíxin imá nohará a ntá sátsjirá nkaya nkajní, ichrorá, kjánchó chaxínya. Jahará la tsjasinkajinxinrá ntiha sátsjirá tsjasótiará tí siín tí sín tsík'en. Tí chrókjuásian tí kjuaxroan tí chjasin Sodoma exí kjuásian chjasánrá la tí chjasin la kjá naxa chrók'uixin sín naxa chrók'uítjáyanhya sín tí yaon ijie kíxin tjoka chrókuitekaon sín. ²⁴ A ntá tjonkará kíxin tió sinchekitoéxín Dios ijie chojni la əntsí tsjasótiará la tí sín chjasin Sodoma la kénhyó tsjasóte sín.

Xrákirá tí tjén janhan la ts'ok'áhará (Lc. 10.21-22)

²⁵ Ntá tí yaon a ch'ín Jesús mé nixjehé ch'án It'é ch'án ntáchro ch'án kíxin:

—Tjáncháha kjuasáya It'éni mé Ìnché nkaya nkajni la ko chjasintajni kíxin jaha kjuánjonhya kjuachaxin chrók'uitja tí sín imá nohe a ntá kjuánjuan kjuachaxin kíxin ts'itja tí sín noehya. ²⁶ Mé xíkaha It'éni jaha kóxrjínhán kíxin xíkaha tsónhen —ichro ch'ín Jesús.

²⁷ Ntá ntáchro ch'ín Jesús kíxin:

—T'aná mé chjína kaín xín nkehe. Kohya ninkexró chaxín chóxin tí Xjeen ch'án. Jehó It'é ch'án mé chóxin ch'án la kohya ninkexró chóxin tí It'é ch'án. Jehó tí Xjeen ch'án mé chóxin ch'án la ko tí sín tsíkjeyá ch'án tsochóxin sín ch'án. ²⁸ Xrákirá kaín rá tí tjén janhan tí jahará imá tsíkóxrjérá kjuich'erá xra la yamará nkehe iye la ntá janhan mé sintak'ok'áhará. ²⁹ Tákjárá tí xra kuéntana la ts'itjará kuéntana kíxin janhan mé jína əsenná la ntahnkehya. Ntaha mé ts'itjará ts'ok'èxin əsánrá. ³⁰ Tí xra tsotjahará la xrahya la tí nkehe tsotjahará la yehya.

12

*Tí sín k'uajiko ch'ín Jesús mé ik'uín sín iso noatrico ijnko yaon t'ok'éhe tí sín Israel
(Mr. 2.23-28; Lc. 6.1-5)*

¹ A ntá ijnko yaon la ch'ín Jesús k'uátsínka ch'án ijnko nonte siín noatrico tí yaon t'ok'éhe tí sín Israel. Na ntá tí sín xriko ch'án mé tsík'en sín kjinta la ntá kjuankíxín sín ik'uín sín iso noatrico a kíxin sine sín. ² A ntá iso tí sín fariseo k'uíkon sín kíxin xíkaha kjuich'e tí sín xriko ch'ín Jesús la ntá ntáchro sín kíxin:

—Tsjehé tí sín xrikoa mé tjejóch'e sín xrä tí yaon t'ok'éheni na mé kohya kjuachaxin tsónhen xrä tí yaon i —ichro sín.

³ Ntá kjuátēhe ch'ín Jesús kíxin:

—Jahará ¿a kjuinchekuáxinhayará tí xroon chrónka nkehe kjuich'e ch'ín David la ko tí sín k'uájiko ch'án tió k'uén sín kjinta? ⁴ A ntá jehe sín mé k'uíxenhen sín tí nchia kuénte Dios la kaín sín kjóne sín tí niotja tsíkóyaon kuénte Dios kjónté kohya kjuachaxin sine ch'án ni tí sín k'uájiko ch'án. Jehó siín kjuachaxin sine tí sín ncháat'. ⁵ Jahará ¿á nchekuáxinhayará tí xroon tsíkjín ch'ín Moisés ntáchro kíxin tí sín ncháat'á kuénte ninko mé t'ok'éhya sín tí yaon sábado la kjónté xíkaha la jehya jié tíha? ⁶ Ntáxrjan kíxin itjén janhan la qantsí má chonta kjuachaxin la ntá tí ninko la kénhyó. ⁷ Jahará la tiénxinhyará nkexrí t'axrjexín tí nkehe ntáchro xroon itén Dios. Mé ntáchro kíxin: “Janhan Dios tjínkávan kíxin chrókuíkonóhérá chojni la tjínkakonhya kíxin chrók'oyánrá iko chrókjuánjonrá.”* Tí chrókuiénxinrá tíha la ntá chrókóninkákuénhayará tí janhan kíxin ninkehó jié chontahya. ⁸ A ntá tí Xjeen Dios K'óna Chojni mé chónta kjuachaxin ts'etqan nkexrí tsónhen tí yaon t'ok'éheni —ichro ch'ín Jesús.

*Ch'ín Jesús kjuinchekitóhe jína ijnko chojni tsíxámá tja
(Mr. 3.1-6; Lc. 6.6-11)*

⁹ Ntá ch'ín Jesús mé sákjuíxín ch'án ntiha la k'uíxenhen ch'án ijnko ninko Israel. ¹⁰ Mé ntiha itjen ijnko ch'ín tsíxámá tja. Na ntá tjejóntaxín iso sín fariseo a tjinkaon sín tsjanchia sín jié. La ntá kjuanchankíhi sín ch'án kíxin:

—¿Á siín kjuachaxin sinchekitóheni jína ijnko chojni níhi tí yaon t'ok'éheni ní? —ichro sín.

¹¹ Ntá kjuátēhe ch'ín Jesús ntáchro ch'án kíxin:

—Jnkojín tí jahará chontará ijnko kolélo chrókjuítsínkáya ijnko tóye tí yaon t'ok'éheni ¿á chrókjuíhyará chrókuakitsjetaónrá va tóye ní? ¹² Kjánchó tí chojni qantsí má tjete sínkí a ntá tí kolélo la kénhyó. Méxrä jína sich'eni tí xrä jína kjónté tí yaon t'ok'éheni.

¹³ Méxrä nixjéhe ch'án tí ch'ín níhi a, ntáchro ch'án kíxin:

—Tjéntoá tja —ichro ch'án.

A ntá tí ch'ín níhi tja kjuentoá tja ch'án la ó kjuixin kuítóhe jína éxi tí í jnko tja ch'án xíkaha. ¹⁴ Ntá tí sín fariseo kóninkaon sín k'uaxrjexín sín ntiha sákjuí sín la kjuenkayáxin sín nkexrí ts'oyán sín tí ch'ín Jesús.

Itén Dios senó chrónka kuénte ch'ín Jesús

¹⁵ A ntá ch'ín Jesús mé kónohe ch'án kíxin xíkaha tjenkayáxin sín la ntá sákjuíxín ch'án ntiha la itsjé sín chréhé sín ch'án. Kjuinchekitóhe ch'án jína kaín tí sinníhi ¹⁶ la k'uetoan ch'án kíxin tsochrónkahya sín noxín kíxin nkexro tí jehe ch'án. ¹⁷ Mé xíkaha ó xiteyá tí nkehe chrónka ch'ín Isaías, tí nkexro chrónka itén Dios ósé, mé tsíntáchro ch'án xíkihi:

¹⁸ Ntihi tjen tí nkexro ch'ena xrä la janhan mé kjuéyá ch'án,
janhan tjuaqhä ch'án la chàna kíxin itjen ch'án.

Tsotjaha ch'án tí nchakuenná

la jehe ch'án mé tsochrónka ch'án nkexrí sintakitoaxián ijíé chojni chjasintajni.

¹⁹ Tsónínkakuenhyá ch'án chojni la chjiníhya ts'oyako ch'án,

* 12:7 Oseas 6.6

la ko kohya nkexro tsinhin itén ch'an tí ntia.

²⁰ Ts'óchjenjinha ch'án kjónté itji tsíxréya,
la ts'ók'ankahya ch'án kjónté ijnko nkehe síhnchikoá.

Jehe ch'án naxa sich'e ch'án xra tsjixrakája tí yaon ts'etoan ch'án.

²¹ La kaín xín chojni chjasintajni mé tsitekaon sín tí jehe ch'án.[†]

Mé xikaha chrónka itén Dios óse.

*Tí sín fariseo mé ntáchro sín kíxin ch'ín Tsochren t'etuēnhen asén tí ch'ín Jesús
(Mr. 3.19-30; Lc. 11.14-23; 12.10)*

²² Ntá iso chojni sákjuikohe sín ch'ín Jesús ijnko ch'ín t'ikonhya la ko nixjahya kíxin chóntha ch'án nchakuen tí jinahya. A ntá ch'ín Jesús mé kjuínchekitohe ch'án jína la ntá jína nixja ch'án la ko jína t'ikon ch'án. ²³ Ntá kaín xín chojni la chrakon sín la tjanchankíhi kichó sín ntáchro sín kíxin:

—¿Á jehya xjeen David tíhi? —ichro sín.

²⁴ Ntá kuínhin tí sín fariseo la ntáchro sín kíxin:
—Tí ch'ín a takitsje ch'án nchakuen tí jinahya kíxin chóntha ch'án tí kjuachaxin kuénte ch'ín Beelzebú, mé tí ch'ín mé Tsochren t'etuēnhen kaín tí nchakuen tí jinahya.

²⁵ Ntá ó konohe ch'ín Jesús tí nkehe tjenkayáxin sín ntá ntáchro ch'án kíxin:

—Jnkójin gobierno jnkokoáhyá tjenkayáxin sín ntá tjanjonko kichó sín na mé ts'itjáyan tí kjuachaxin ts'etoanxín sín, la ko kjaxin tí sín jnkokoá chjasin q tí sín jnkokoá nchia jnkokónhya tjenkayáxin sín la kjaxin xikaha ts'itjáyan sín. ²⁶ A ntá tí chaxín ch'ín Tsochren chrókuakitsjexín asén ntihi kjá í chróchontahya kjuachaxin naxa chrók'uetoan. ²⁷ Jahará ntáchrorá kíxin janhan kuakítsjexián tí nchakuen tí jinahya kjuachaxin kuénte ch'ín Beelzebú. A ntá tí chaxín xikaha la ntá ¿nkexro chjéhe kjuachaxin tí sín chréhe tí jahará kíxin tjacha sín takitsje sín nchakuen tí jinahya? Jehe sín mé tjakoxin sín kíxin ntoáhya tjenkayáxinrá. ²⁸ A ntá janhan mé kuakítsjexián tí nchakuen tí jinahya kjuachaxin kuénte Nchakuen Dios la tíha mé chrókónoaxínrá kíxin tí kjuachaxién Dios mé ó kui tí tjejorá.

²⁹ ¿Nkexrí chrók'uixenhen ijnko nkexro ijnko ntøe ijnko ch'ín jiehe la chrókuakitsjehé ch'án tí nkehe chóntha ch'án? Senó la chrókónteto ch'án kíxin jína chrókueéhe sín ch'án.

³⁰ 'Tí nkexro titekakonhya tí janhan la mé nínkakonna sín. A ntá tí nkexro tjinkakonhya tí janhan mé t'inkákonhen tí xra it'a.

³¹ 'Méxra xrjanka kíxin Dios tsjakjìin jnkojnko jie tjasin chojni la ko kaín nkehe jinahya nixja sín. A ntá tí t'ántaxíñhín sín Nchakuen Dios la xitjahya tsjìin ijié sín. ³² La ko xrjanka kíxin kaín nkehe t'ántaxíñhínrá tí Xjeen Dios K'óna Chojni la tsjakjìin Dios. A ntá tí ts'antaxíñhínrá Nchakuen Dios la ntá mé í tsjìnhya tí ijiará kjónté ntihi chjasintajni la ko kjónté tí chr'éxín.

*Tí nta chrókjuatsoanxín sín tí to jína
(Lc. 6.43-45)*

³³ 'Tí nta tsík'ánkí jína la t'óna to jína la tí nta tsík'ánkíhya jína la t'ónahya to jína. Méxra tí nta mé chrókjuatsoanxínni tí to a. ³⁴ Jahará tsík'axrjeníxirá konche. ¿Nkexrí jína chróntáchrará jahará tí jehya jínará? Tí nixja ir'vará la exí ntáchro asánrá mé nixja ir'vará.

³⁵ Ijnko chojni jína mé jína nixja kíxin jína asén ch'án. A ntá ijnko chojni jinahya mé nixja tí nkehe jinahya kíxin tí asén ch'án kjaxin jinahya. ³⁶ Ntá tjonkará kíxin itsi tí yaon tsjixixín tió sinchekitoexín Dios ijié chojni ntá tsonohará kaín nkehe chjiní tsníxjará. ³⁷ Kíxin tí nkehe nixjará tsjakoxin á kjuásinrá jie ní o náhí.

*Tí sín jehya jína tjanchehe sín ch'ín Jesús kíxin tsjakoxin ch'án ijnko kjuaxroan jie
(Mr. 8.12; Lc. 11.29-32)*

³⁸ Ntá iso tí sín fariseo la ko tí sín maestro tjako tí ley mé nixjehé sín ch'ín Jesús ntáchro sín kíxin:

[†] **12:21** 12.18-21 Isaías 42.1-4

—Maestro, tjinkaonni chrók'uikonní chrókjuásian ijnko kjuaxroan náxrjón tsønoexínni kíxin nkexro jaha —ichro sín.

³⁹ Ntá kjuát̄ehe ch'ín Jesú斯 ntáchro ch'án kíxin:

—Tí sín jínahya la ko tí sín kuít̄ohe Dios mé tjanchia sín chrókjuásian kjuaxroan náxrjón. Kjánchó tsjákoxínhya í jnko kjuaxroan la jehó tí kjuaxroan kónhen ch'ín Jonás, tí nkexro k'uéchrónka itén Dios ósé. ⁴⁰ Éxí yóhę kjuák'e ch'ín Jonás iní yaon la iní tie nkaxenhen tsee koche jié mé xíkaha tí Xjeen Dios K'óna Chojni tsjak'e nkaxenhen tòye tsoxrvá iní yaon la iní tie. ⁴¹ A ntá tí yaon tsitøexín ijié chojni la ntá tí sín chjasin Nínive mé tsjanchia sín jié kíxin tí sín tjejó jie, kíxin tí sín chjasin Nínive mé kuít̄ohe sín ijié sín tió kuínhin sín itén Dios chrónka ch'ín Jonás. A ntá ijie itjén janhan la antsí má chonta kjuachaxin. A ntá tí ch'ín Jonás la kénhyó k'uéchónta ch'án kjuachaxin, kjánchó jahará kuítekákonhyará tí janhan. ⁴² Kjaxin tí yaon tsitøexín ijié chojni la tí tjan reina k'uetoan kjuixín nó Sur mé tsjanchia tjan jié kíxin tí sín tjejó ijie kíxin jehe tjan kjuixín imá ikjín kíxin chrókuinhin tjan tí kjuaxrexinkaon jína k'uékjako ch'ín Salomón. A ntá ijie itjén janhan la janhan antsí má nòna a ntá ch'ín Salomón la kénhyó k'uénohe ch'án.

Tió tsokjan tí nchakuen tí jínahya

(Lc. 11.24-26)

⁴³ A ntá ijnko nchakuen tí jínahya tsík'axrjexín ijnko chojni la mé ixri tí nonte xámá xritjeyá nketí náxrjón ts'ok'éhe. A ntá k'uitjahya nketí náxrjón ts'ok'éhe. ⁴⁴ La ntá kjuenkayáxin kíxin: “Áxri tsokjan ntona k'uaxrjéxian”, ichro. A ntá tió ikjan tí nchakuen la t'ikon éxí ijnko nchia kohya ninkexró la éxí ijnko chojni tsík'anjón ntøe la náxrjón tsjehe tí nkaxenhen nchia. ⁴⁵ A ntá k'uíkon tí jínahya xíkaha tjen nchia la ntá sákjuíkakjín í jnko yato nchakuen tí jínahya antsí má jínahya. A ntá kaín k'uíxenhen tí ntiha. A ntá antsí má jínahya kónhen tí ch'ín a, a ntá tí senó la kénhyó. Mé xíkaha tsønhen kaín tí sín siín ijie titekakonhyá.

Tí iné la ko kichó ch'ín Jesú斯

(Mr. 3.31-35; Lc. 8.19-21)

⁴⁶ Ntá ch'ín Jesú斯 naxq̄a tjenixjehé ch'án chojni la ntá xrínahya kjuíji iné ch'án la ko kichó ch'án. Ntá kuít̄ohe sín ntója ó la tjinkaon sín chrónixjehé sín ch'ín Jesú斯. ⁴⁷ Ntá ijnko nkexro ntiha sákjuíchénka tí ch'ín Jesú斯, ntáchro ch'án kíxin:

—Iná la ko kíchua tjejó sín ntója la tjinkaon sín chrónixjaha sín tí jaha.

⁴⁸ A ntá ch'ín Jesú斯 kjuát̄ehe ch'án nixjehé ch'án tí nkexro chrónka a, ntáchro ch'án kíxin:
—¿Xá nkexro tí nñaná la ko nkexro tí kíchiná? —ichro ch'án.

⁴⁹ Ntá kjuákoxin tja ch'án tí sín xríko ch'án la ntáchro ch'án kíxin:

—Tí sín i la mé nñaná la ko kíchiná. ⁵⁰ Tí jnkojín sín i nchexiteyá nkehe tjinkaon T'aná tjen nkaya nkajní na mé táha mé nñaná la ko kíchiná mé xíkaha t'íkuān tí jehe sín —ichro ch'án.

13

Ch'ín Jesú斯 mé kjuíncheyóexin ch'án éxí ijnko chojni t'enka nontee

(Mr. 4.1-9; Lc. 8.4-8)

¹ A ntá tí yaon a ntá ch'ín Jesú斯 k'uaxrjexín ch'án nchia la sákjuí ch'án kjuák'etjaxín ch'án chrínta ntayaon. ² Ntá k'uíxikóchjina nchónhya chojni tí tjen ch'án la ntá jehe ch'án mé k'uit'ótjen ch'án ijnko ntabárcø kjuák'etjaxín ch'án la kaín sín na tí chrínta ntä ó kuít̄ohe sín. ³ A ntá nchónhya nkehe kjuako ch'án kjuíncheyóexin ch'án, ntáchro ch'án kíxin:

—Éxí ijnko ch'ín sákjuík'enka nontee ⁴ mé xíkaha sákjuík'enka ch'án iso tí noatriga a. Ntá iso noa la tsík'ánótjen ntja ntá ikui koxroxe k'uink̄a va noa. ⁵ A ntá iso noa na mé k'uít̄ji chrík'á xro tí kohya itsjé nche ntá tjoka k'uayan kíxin ntaha tjínya chónha nche.

⁶ Ntá tí kjuiton yaon la ntá tí ka la xámá kíxin ninkahya chóna nuèe. ⁷ A ntá í so noa kjuít sinkak'á tí siín kach'i na k'uánkí tí kach'i a na ntá í xitjahya k'uánkí tí noa trigo a kíxin tsíkjate tí kach'i. ⁸ A ntá tí noa tsík'itjí nche jína na ntá tió k'uánkí la mé k'óna jína. Iso tí no na jnkokoá noatje mé k'óna ciento neno noa, a ntá í jnko mé k'óna sesenta neno noa, a ntá í jnko mé k'óna treinta. ⁹ Tí nkexro tjinkaon chrókuinhin la chrókuinhin —ichro ch'ín Jesús.

Nkekuénté kjúñcheyóexin ch'ín Jesús

(Mr. 4.10-12; Lc. 8.9-10)

¹⁰ Ntá iso tí sín k'uájiko ch'ín Jesús mé kóchjinehe ch'án sín la ntá kjuanchankíhi sín kíxin: —¿Nkekuénté xikaha nixjehé sín ncheyóexián? —ichro sín.

¹¹ A ntá ch'ín Jesús kjuátehe ch'án ntáchro ch'án kíxin:

—Jahará la Dios me tsjinkitsa tsñohará tí nkehe noe hya í so chojni kuénte tí kjuachaxin kuénte Dios. A ntá tí jehe sín a la náhí. ¹² Tí nkexro ó chóna nkehe la qantsí ts'áyéhe sín kíxin qantsí má tsochóna sín. A ntá tí nkexro chontahya la kjónté tí ntsí chóna sín la ts'axrjehe sín. ¹³ Mé xikaha kjuintayóaxuán kjuákuaxiān sín kíxin jehe sín t'ikon sín la ntá kjónté tjátsoanhya sín la tjejótinhin sín a ntá kjónté kienxínhyá sín. ¹⁴ Mé xikaha ó xiteyá tí nkehe k'uéchrónka ch'ín Isaías tí nkexro k'uéchrónka itén Dios, mé ntáchro ch'án xikihi:

Jehe sín tsinhin sín a ntá tsienxínhyá sín
la ts'ikon sín la tsjatsoanhya sín tí nkehe ts'ikon sín.

¹⁵ Imá icha asén tí sín chjasin i.

Chóna sín ntatsjon kjánchó ts'íkjehe
la chóna sín ikon sín kjánchó t'íkonhya sín,
kíxin chrók'uikonhya sín
la chrókuienhya sín la ko
xitjahya kienxín sín,
kíxin í tjinkakonhya sín chrókjan sín kíxin janhan mé chrókjuntakitoha sín jína.*
Mé xikaha tsíkjín ch'ín Isaías.

¹⁶ Ntá ntáchro ch'ín Jesús ínaá kíxin:

—A ntá jahará la imá náxrjón tjejorá kíxin t'íkonrá la ko tinhínrá. ¹⁷ Chaxín xrjānka kíxin itsjé tí sín k'uéchrónka itén Dios la ko tí sín jína mé k'uétjinkaon sín chrók'uikon sín tí nkehe t'íkonrá la ntá k'uíkonhya sín la ko k'uétjinkaon sín chrókuinhin sín tí nkehe tjejotinhínrá la ntá kuíenhya sín.

Ch'ín Jesús chrónkaxín nkexrí t'axrjexín tí nkexro sákjuík'enka

(Mr. 4.13-20; Lc. 8.11-15)

¹⁸ Tinhínrá nkexrí t'axrjexín tí ch'ín sákjuík'enka nontee. ¹⁹ Tí nkexro kuínhin tí itén Dios chrónka nkexrí tí kjuachaxin kuénte Dios la ntá kienxínhyá sín la yóhe tí noa xéñjintja ntja. Ó kui ch'ín Tsochren ntá kjuínchek'itjáyan ch'án tí itan jína kuínhin sín. ²⁰ A ntá tí tje kjuít sinkak'á xro la mé t'axrjexín kíxin tí chojni kuínhin itén Dios la tjoka kóxrjínjin sín la kuinkáchónki sín. ²¹ Kjánchó ninkahya chóna nuèe na ntá itsi tí kjuaxróxinhya o tsochónkihi sín chojni chrók'óyán sín kíxin tí itén Dios kuítekaon sín, a ntá tsítóhe sín tí tinkáchónki sín Dios. ²² A ntá tí tje kjuít sinkak'á kach'i na mé éxi yóhe ijnko chojni kuínhin itan jína kjánchó tjitoxienhya ntje sín kíxin tóxakonhen sín tí xra chóna sín chjasintajni la ko tjinkaon sín tsochóna sín itsjé nkehe. Kaín tíha mé t'inkákonhen tí itén Dios kuínhin sín la ntá xikaha xitjahya sich'ehe sín xra Dios. ²³ A ntá tí tje k'uínka tí nonte chóna nche jína na mé yóhe tí chojni kuínhin tí itén Dios na ko kienxín sín la ntá xikaha jína ch'ehe sín Dios xra. Na iso sín la yóhe éxi tí tje k'óna ijnko ciento neno noa la iso sín la yóhe tí k'óna

* **13:15** 13.14-15 Isaías 6.9-10

sesenta neno noa la iso sín la yóhe tí k'óna treinta neno noa —mé xíkaha chrónka ch'ín Jesús.

Ch'ín Jesú斯 kjuíncheyóexin ch'án éxí tí kajnto k'uánkíkué tí noatrigó

²⁴ Ntá ch'ín Jesú斯 kjuíncheyóexin ch'án ínaá ntáchro ch'án kíxin:

—Tí kjuachaxin kuénte Dios mé yóhe ijnko ch'ín k'uénkä noa jína nontee ch'án. ²⁵ A ntá tió k'uéjója kaín sín ntá ikui ijnko nkexro nínkakonhen sín la k'uénkä ch'án kajnto chrík'á tí noa a la ntá sákjuí ch'án. ²⁶ La ntá tí noatrigó k'uánkí la ntá ó sítintaa la ntá ntiha kjaxin kónoxíxín k'uánkí tí kajnto. ²⁷ Ntá tí sín ch'e xrä mé sákjuínixjehe sín tí lámoe sín la ntáchro sín kíxin: “Tí noa k'uénkä nontaa la noa jína tíha. A ntá ¿nketí kjuixin tí kajnto tsík'ayan?” ichro sín kjuanchankí sín. ²⁸ Ntá kjuátehe tí ìnché tí nonte ntáchro kíxin: “Kjá ijnko nkexro nínkakonna mé kjuich'e xíkaha”, ichro ch'án. Ntá tí sín ch'e xrä mé kjuanchankí sín kíxin: “¿Á tjinkávan kíxin sátsjini tsakitsjenkií tí kajnto?” ichro sín. ²⁹ A ntá kjuátehe ch'án kíxin: “Náhí. Tí sátsjia tsakitsjenkií tí kajnto la kjá chónte tí katrigó ts'axrjenki. ³⁰ Ichá jína títójé kíxin ts'ánkíkué tsjixin tsotjájiani. Ntá ts'etuēhenni tí sín tsotjá kíxin senó ts'ejo sín tí kajnto la sinchenteto sín kíxin tsoche la ntá chr'éxín tsotjá sín tí noatrigó ntá ts'inkachjina tí noa a” —mé xíkaha chrónka ch'ín Jesús.

Ch'ín Jesú斯 kjuíncheyóexin ch'án éxí tí xroqan ijnko ntayoa it'in mostaza

(Mr. 4.30-32; Lc. 13.18-19)

³¹ Ntá ch'ín Jesú斯 kjaxin kjuíncheyóexin ínaá ntáchro ch'án kíxin:

—Tí kjuachaxin kuénte Dios mé éxí yóhe ijnko tje mostaza k'uénkä ijnko chojni nontee ch'án. ³² Tí tje a mé ąntsí má ntsí la ntá tí í so tje la kánhyó, a ntá chr'éxín ntá ts'ayan tí nta mostaza la ts'ánkí ijnko nta imá jié la tí í so nta la kánhyó. Ntá koxroxé xritjaká mé itsi va sich'eña va káké va tí chrík'á tí chaon nta.

Ch'ín Jesú斯 kjuíncheyóexin ch'án éxí tí xroqan t'ánkíxín niotja

(Lc. 13.20-21)

³³ Kjaxin kjuíncheyóexin ch'án tíhi mé ntáchro ch'án kíxin:

—Tí kjuachaxin kuénte Dios mé éxí yóhe tí xroqan t'ánkíxín niotja. Kjuinkíkjānxín ijnko chojni chjin iní medida harina ntá tí ch'o mé k'uánkí.

Tí nkehe kjuíncheyóexin ch'ín Jesú斯 tí nixja ch'án

(Mr. 4.33-34)

³⁴ Ch'ín Jesú斯 kjuakohe ch'án tí chojni la kjuíncheyóexón ch'án la nixjahya ch'án ninkehó tí kohya nkehe chrókjuincheyóexin ch'án. ³⁵ Mé xíkaha kjuako ch'án kíxin tsoxiteyá tí nkehe tsíchrónka ijnko nkexro k'uéchrónka itén Dios ntáchro xíkihi:

Mé tsoníxjaxiān sítayóaxión nkehe
tsontáxrjān tí nkehe ninkexró noehya desde k'óna chjasintajni.[†]

Ch'ín Jesú斯 chrónkaxín ch'án nkexrí t'axrjexín tí kjuíncheyóexin ch'án tí kajnto la ko tí notrigó

³⁶ Ntá kjuixin nixjehé ch'ín Jesú斯 tí sín a ntá sákjuí sín kaín sín la jehe ch'án k'uíxenhen ch'án nchia. Ntá kóchjina tí sín k'uájiko ch'án la ntáchro sín kíxin:

—Chrónkaxián nkexrí t'axrjexín tí kajnto k'uánkíkué tí noa trigo tí nonte —ichro sín.

³⁷ Ntá ch'ín Jesú斯 kjuátehe ch'án ntáchro ch'án kíxin:

—Tí nkexro k'uénkä tí noa jína mé tí Xjeen Dios K'óna Chojni. ³⁸ A ntá tí nonte mé chjasintajni tíha. Tí noa jína mé éxí yóhe tí chojni kuákja kjuachaxin kuénte Dios. La ntá tí kajnto mé éxí yóhe tí chojni t'etuēhen Tsochren. ³⁹ Tí nkexro nínkakonhenni mé k'uénkä tí kajnto mé Tsochren tíha. A ntá tí tsotjá sín la mé tsjeje chjasintajni. A ntá tí sín tsotjá la mé tí sín ángel. ⁴⁰ Éxí xrenájín tí kajnto la tsoche mé xíkaha tsonhen tió tsjixixín tsjeje chjasintajni. ⁴¹ Tí Xjeen Dios K'óna Chojni mé ts'etuēhen tí sín ángel kíxin tsakitsjexín

[†] 13:35 Salmo 78.2

sín tí tjet'etoan Dios kaín tí chojni tjachroe í so chojni la ko tí sín ch'e tí nkehe jínahya.
42 La tsochr'án sín sátsji sín tí tja siín xrohi la ntaha tsotsjánka sín la sinetaón neno sín.
43 Ntá kaín xín tí sín nchexiteyá tí nkehe tjinkaon Dios mé exí tí yaon xikaha tsotsjehe sín
 tí tjet'etoan It'eni Dios. Tí nkexro tjinkaon chrókuinhin la chrókuinhin —mé xikaha ichro
 ch'ín Jesús.

Ch'ín Jesús kjuíncheyóexin ch'án exí ijkno nkehe tjete tjemá

44 'Tí kjuachaxin kuènte Dios mé exí yóhe ijkno nkehe tjete tjemá ijkno nonte. Ijkno
 chojni k'uitja ch'án tí nkehe tjete la ntá kjuak'ema ch'án ínaá ntahó. Ntá chéhé ch'án
 sákjuí ch'án la kjuínchekji ch'án kaín nkehe chóntha ch'án la ntá ikjan ch'án la k'uena ch'án
 tí nonte a.

Ch'ín Jesús kjuíncheyóexin exí ijkno xro perla tjete

45 Ntá ntáchro ch'ín Jesús kíxin:

—Kjaxin tí kjuachaxin kuènte Dios mé exí yóhe ijkno nkexro tjeyá xro perla náxrjón.

46 Ntá tió ts'itja ch'án ijkno xro imá tjete la ntá sátsji ch'án sinchekji ch'án kaín nkehe
 chóntha ch'án kíxin ts'ena ch'án tí xro perla.

Ch'ín Jesús kjuíncheyóexin exí ijkno nchísén tséya sín koché

47 Ntáchro ch'ín Jesús kíxin:

—Kjaxin tí kjuachaxin kuènte Dios mé exí yóhe ijkno nchísén tséya chojni koché t'enki
 sín tí ntayaon la ntá tsotsé nchónhya clase koché. **48** Ntá tió tsíkaón koché tí nchísén tséya
 sín va la ntá tsakitsjenkí sín la tsjak'e sín chrínta ntá la ntaha ts'ejótjaxin sín la tsichéhe sín
 koché jína la t'enka sín ntaxra. La ntá tí jehya koché jína la it'e sín. **49** Mé xikaha tsónhen
 tió tsjeje chjasintajni. Sátsji tí sín ángel la tsakitsjekjan sín chojni jínahya la tsitohe tí chojni
 jína. **50** La tsochr'án sín tí sín jínahya sátsji sín tí tjen tja tí siín xrohi la ntaha tsotsjánka sín
 la ko sinetaón neno sín.

Tí nkehe tjete nixin la tí nkehe tjete ntaxis

51 Ntá ch'ín Jesús mé kjuanchankí ch'án kíxin:

—¿Á tiénxinrá jahará kaín tí nkehe ní? —ichro ch'án.

Ntá kjuátehe sín kíxin:

—Jeén, Inchéni, ó kíenxínni —ichro sín.

52 Ntá ntáchro ch'ín Jesús kíxin:

—Ijkno maestro nohe tí nkehe kuènte ley la ntá ó nohe ch'án kuènte tí kjuachaxin
 kuènte Dios la jehe ch'án la exí yóhe ijkno inché nchia chóntha itsjé nkehe tjete tjejóchjina
 la ntá nohe ch'án tsakitsje tí nkehe tjete nixin la tí nkehe tjete ntaxis —mé xikaha ichro
 ch'ín Jesús.

Ch'ín Jesús kjuák'e ch'án chjasin Nazaret

(*Mr. 6:1-6; Lc. 4:16-30*)

53 Ntá kjuixin nixja ch'ín Jesús kjuíncheyóexin ch'án tíha na ntá sákjuixin ch'án ntiha.

54 La ntá sákjuí ch'án chjasén ch'án Nazaret. Ntaha kjuankíxin kjuakoxín ch'án tí ninko
 Israel. Ntá itsjé sín la kóxakonhen sín kuínhin sín tí tjako ch'án la ntáchro sín kíxin:

—Tí ch'ín i la, ¿nketí tsírxakohe ch'án kíxin imá nohe ch'án la ko nkexrí kíxin tjasin ch'án
 kjuaxroan? **55** ¿Á jehya tíhi xjeen tí ch'ín carpintero la iné ch'án mé María? La ko chóxinni
 tí kichó ch'án a mé ch'ín Jacobo la ko ch'ín José la ko ch'ín Simón la ko ch'ín Judas. **56** Kjaxin
 tí sín chjin kichó ch'án na ntihi tjejó sín. Méxra ¿nkexrí nohe ch'án kaín tí nkehe? —ichro
 sín.

57 Mé xikaha chrohya sín tsitekakonhen sín ch'án. Ntá ntáchro ch'ín Jesús kíxin:

—Nkuíxin tjikosáyehe chojni ijkno nkexro chrónka itén Dios. A ntá tí sín chjasén ch'án
 la ko kaín tí sín ntoe ch'án mé tjikosáyehya sín ch'án —ichro ch'án.

58 A ntá tsjéhya kjuaxroan kjuasin ch'án ntiha kíxin kuítekakuenhyá sín ch'án.

14

*Ik'uén ch'ín Juan Bautista
(Mr. 6.14-29; Lc. 9.7-9)*

¹ A ntá tí yaon a ntá tí ch'ín Herodes mé tí nkexro k'uetoan tí estado Galilea mé kuínhin ch'án nkexrí ichro ch'ín Jesús. ² Ntá nixjehé ch'án tí sín ch'ehe ch'án xrä, ntáchro ch'án kíxin:

—Kjá tíha la ch'ín Juan Bautista ó tsíxechón ch'án ínaá. Mé xíkaha chónta ch'án kjuachaxin tjasin ch'án kjuaxroan —ichro ch'ín Herodes.

³ Méxra tí ch'ín Herodes mé tsík'etoan kíxin ch'ín Juan tsontetoxín cadena la ko tsjak'echjina ch'án. Mé xíkaha kjuich'e ch'án kíxin xíkaha tsíkjanchia tí tjan Herodías, tí tjan ichjién tí ch'ín Felipe, kíchó ch'án. ⁴ Tí ch'ín Juan tsíntáche ch'án tí ch'ín Herodes kíxin:

—Jehya jína tsochonta tí ichjién tí kíchuá —mé xíkaha tsíntáchro ch'án.

⁵ Ntá ch'ín Herodes tjinkaon ch'án chrók'oyán ch'án tí ch'ín Juan kjánchó chrakonhen ch'án tí chojni kíxin kaín sín ntáchro sín kíxin ch'ín Juan mé nixja itén Dios, ichro sín. ⁶ A ntá tí yaon kia tsíkjitoxin hin nánó ch'ín Herodes la tí xjeen tjan Herodías mé ité tjan tí tjejó tí chojni tsík'iyehé ch'án. A ntá imá kóxrjinhin ch'ín Herodes nkexrí ité tjan. ⁷ La ntá nixjehé ch'án tjan k'uákjenxin ch'án ihnié Dios ntáchro ch'án kíxin tsochjéhe ch'án tjan kjónté jnkojín nkehe tsjanchia tjan, ichro ch'án. ⁸ Ntá jehe tjan la senó kjuíkjanchankíhi tjan iné tjan ntá iné tjan tsíntachro kíxin ikja ch'ín Juan mé tsjanchia tjan ntá jehe tjan mé nixjehé tjan tí ch'ín Herodes ínaá ntáchro tjan kíxin:

—Chjehéni ijnko plato tsjak'enkáya kja ch'ín Juan Bautista —ichro tjan kjuanchia tjan.

⁹ Na ntá ch'ín Herodes la mé imá k'uává ch'án kíxin xíkaha kjuanchia tjan. Na ntá kaín tí sín siín ntiha ó kuínhin sín kíxin kjuínchenohe ch'án Dios kíxin ichrén nkehe tsjanchia tjan tsjanjon ch'án. ¹⁰ Méxra k'uetoan ch'án kíxin ts'óchrínjin sín ikja ch'ín Juan tí tjen ch'án ntøechiso. ¹¹ Ntá kjuíkjao sín kjuíkjoyá sín tí kja ch'ín Juan ijnko plato la chjéhe sín tí tjan tjarisoá ntá jehe tjan la sákjuíkénhen tjan iné tjan.

¹² Ntá tí sín k'uék'ajiko ch'án a mé sákjuíkakitsje sín tí cuérpoé ch'án la sákjuíkjává sín. La ntá chr'éxín la sákjuí sín sákjuíchénka sín tí ch'ín Jesús kíxin xíkaha tsíkónhen ntiha.

*Ch'ín Jesús kjuínchekjine ch'án in'ó mil chojni
(Mr. 6.30-44; Lc. 9.10-17; Jn. 6.1-14)*

¹³ Ntá tí kuínhin ch'ín Jesús kíxin xíkaha tsíkónhen la ntá jehó ch'án sákjuí ch'án k'uit'ótjen ch'án ijnko ntabárco la sákjuí ch'án ijnko nonte ninkexró tjihya. A ntá kaín tí chojni la kuínhin sín nketí tjen ch'án la ntá k'uaxrjexín sín chjasén sín la ntá totó sín sákjuíchréhe sín ch'án. ¹⁴ A ntá k'uaxrjexín ch'ín Jesús tí ntabárco a, a ntá k'uíkon ch'án kíxin nchónhya chojni siín ntiha ntá kujkonóehé ch'án tí jehe sín na ntá kjuínchekitóhe ch'án jína tí sín níhi tsíkjikjao sín. ¹⁵ La ntá ó k'uíxin tie na ntá tí sín k'uájiko ch'ín Jesús a mé kóchjinehe sín ch'án, ntáchro sín kíxin:

—Ntá ó kóntó la kohya nkexro tjejó ntihi. Na ntá jaha chrókuétuénhén sín kíxin sátsji sín tí chjasin ntsí chjinaxón tsjik'ena sín nkehe sine sín —ichro sín.

¹⁶ Ntá kjuátuhe ch'ín Jesús, ntáchro ch'án kíxin:

—T'ichjánxinhya sátsji sín. Chjehérá sín nkehe sine sín —ichro ch'án.

¹⁷ Ntá kjuátuhe sín kíxin:

—Chóntahani itsjé nkehe. Jehó in'ó niotja la ko yaá koche chóntani —ichro sín.

¹⁸ Ntá ntáchro ch'ín Jesús kíxin:

—Xrakoanará tí nkehe méhe ntihi —ichro ch'án.

¹⁹ Ntá k'uetoan ch'án kíxin kaín xín sín ts'ixitjaxin sín tí chrítaón kaxi a. Ntá kuákja ch'án tí in'ó niotja la ko tí yaá koche ntá konta ch'án nkajní la kjuanchehe ch'án kjuasáyé Dios. Ntá kóchrít'q ch'án tí niotja chjéhe ch'án tí sín k'uájiko ch'án la jehe sín mé k'óxikayehé sín chjéhe sín tí chojni siín a. ²⁰ Ntá kaín sín kjuixin kjóne sín kókjehé sín. Ntá kjuixin ntá tí

sín k'uájiko ch'ín Jesús kjuenájín kaín tí nkehe sítexéhe sín la mé teyó ntaxra kaón. ²¹ Na mé in'ó mil chojni ntoa kjóne sín, la tí chojni chjin la ko chánjan la kuákjahya sín cuenta nkekjaín tí sín a.

*Ch'ín Jesús mé tjetjitaón ch'án nta
(Mr. 6.45-52; Jn. 6.16-21)*

²² Ntá kjuixin tíha ntá k'uëtuénenhen ch'ín Jesús tí sín k'uájiko ch'án kíxin ts'it'ótjen sín tí ntabárco ts'atòye sín í jnko nánko ntayaon. Ntá jehe ch'án naqá kuítuhe ch'án nixjehé ch'án tí sín siín ntiha. ²³ Ntá kjuixin xíkayéhe sín na ntá jehó ch'án chriin ch'án ijnko jnq tsonixjehé ch'án It'é ch'án tjen nkaya nkajní. Na ntá ó k'uíxín tie la jehó ch'ín Jesús itjen ch'án ntiha. ²⁴ La ntá tí ntabárco na mé tjenkátaón nta jnkosiné ntayaon. Ntá imá chjéhe ntá tí ntabárco kíxin tí xrínto la chjéhe la xitjahya sátsji ntabárco. ²⁵ Na ntá las tres nantóye a mé sákjuíchréhe ch'án sín. Totó ch'án mé sákjuítónxin ch'án tí ntayaon la ntá kóchjinehe ch'án tí tjejó sín. ²⁶ Na ntá tí sín k'uájiko ch'án mé k'uíkon sín kíxin tjetjitaón ch'án tí ntayaon na ntá imá chrakon sín la k'óyako sín. Ntáchro sín kíxin kjuacha sín ichro sín, chrakon sín.

²⁷ Na ntá nixjehé ch'ín Jesús tí jehe sín ntáchro ch'án kíxin:

—Nchefuérte əsánrá, chrakonhyará. Janhan kjuihá —ichro ch'án.

²⁸ Ntá ch'ín Pedro mé nixjehé ch'án Inchéni, ntáchro ch'án kíxin:

—Inchéni tí chaxín jaha la ntá chrókjúanjuan kjuachaxin chrókjuitaónni tí ntá tsjijini tí tjen jaha —ichro ch'án.

²⁹ Ntá ntáchro ch'ín Jesús kíxin:

—Xrákiá.

Ntá k'uinkajinxín ch'ín Pedro tí ntabárco la kjuankíxin ch'án tjetjitaón ch'án nta sákjuíchréhe ch'án tí tjen ch'ín Jesús. ³⁰ A ntá xrínahya ntá kónohe ch'án kíxin imá chjéhe xrínto chrítaón nta, ntá chrakon ch'án la kjuankíxin tinkák'aniánkí ch'án nta, ntá k'uèya ch'án ntáchro ch'án kíxin:

—Inchéni, nchekaáni —ichro ch'án.

³¹ A ntá tuénxín ch'ín Jesús mé itsé ch'án tja ch'ín Pedro la ntáchro ch'án kíxin:

—Intsíkoá tinkachónkia tí janhan. ¿Nkekuénté títekákonhya? —ichro ch'án.

³² Na ntá tió k'uít'ótjen sín yói sín tí ntabárco la ntá tuénxín k'uíxratá tí xrínto. ³³ Ntá kaín xín tí sín tjejóxenhen tí ntabárco mé k'uéjóxin tochr'in sín nkayakon ch'ín Jesús la ntáchro sín kíxin:

—Jaha mé chaxín Xjeen Dios —ichro sín.

Ch'ín Jesús mé kjuínchekitóhe jína tí chojni níhi nonte Genesaret

(Mr. 6.53-56)

³⁴ Ntá tió k'uátöye sín tí ntayaon ntá kjuíji sín tí nonte Genesaret. ³⁵ Ntá tí sín siín ntiha tjoka kjuátsoan sín kíxin jehe ch'ín Jesús tíha, ntá kuínhin tí sín chjasin chjinaxón ntiha la ntá kuikao sín kaín tí sín níhi tí tjen ch'án. ³⁶ Na ntá chrónóhe sín ch'án kíxin chrókuítóhe ch'án kíxin kjónté chrínta iké ch'án chrókuákoxín sín, la ntá kaín tí sín kuákoxín iké ch'án mé kuítuhe sín jína.

15

*Tí jie tjasin chojni
(Mr. 7.1-23)*

¹ A ntá chjasin Jerusalén kjuixin iso sín fariseo la ko iso tí sín maestro tjako tí ley la kjuíchréhe sín tí ch'ín Jesús. Ntá kjuanchankíhi sín ch'án kíxin:

² —¿Nkekuénté kíxin tí sín xrikoa la nchexiteyáhya sín tí nkehe k'uékinkáchónki tí sín tsík'axrjeníxinni kíxin t'óntihya sín itja sín ntá kjónté ine sín? —ichro tí sín fariseo a.

³ A ntá kjuanchankí ch'ín Jesús kíxin:

—¿Nkekuénté jahará kjaxin títekákonhyará nkehe tsík'etoan Dios? A ntá jahará tjinkáonrá naxa chrókuinkachónkirá tí nkehe kuinkáchónki tí sín tsík'axrjeníxirá.
4 Ntáchro Dios kíxin: “Tsochontehérá kjuasáya it'ará la ko inárá”, la ko ntáchro ch'án kíxin: “Tí nkexro t'ántaxínhin it'é la ko iné la chrók'uen.”* **5** A ntá jahará tsíntáchrórá kíxin ó nchoxon kíxin ijnko nkexro tsochénka it'é la ko iné kíxin: “It'éni, inéni, chrokjuahya tsjinkitsani tí jaha kíxin kaín nkehe chóntani la ó chjéheni Dios.” **6** A ntá jnkojín nkexro tsontáchro ch'án tíhi ntá í t'ichjánxínhya tsjinkitsa tí it'é la ko tí iné, mé xikaha tsixrorá. Mé xikaha jahará kuitohérá tí nkehe k'uetoan Dios kíxin tjinkáonrá chrókjuich'erá éxi kjuich'e tí sín tsík'axrjeníxirá. **7** Juhará la jehya jnkojínxón tjenkayáxinrá. Ntoá tsíntáchro tí ch'ín Isaías, tí nkexro k'uéchrónka itén Dios óse. Mé chrónka ch'án kíxin nkexrí tjejorá la xikaha tsíkjin ch'án kíxin:

8 Tí chojni tí chjasin i ir'va ó xraxinkakonxín sín tí janhan
 a ntá tí asén sín la ikjín kuítuhe sín tí janhan.

9 Méxrá ó chónko tóchjina sín xraxinkaon sín tí janhan
 kíxin tí nkehe tjako sín la tí nkehe tsík'etoan chojni ó.†
 Mé xikaha ichro itén Dios.

10 Ntá k'uýehe ch'ín Jesús tí chojni ínaá la ntáchro ch'án kíxin:
 —Chrókuinhínrá la ko chrókuiénxirá. **11** Kaín nkehe ine chojni la ó nchoxon, jehya jie. Tí jie la tí nkehe t'axrjexín ir'va chojni —mé xikaha ichro ch'ín Jesús.

12 A ntá tí sín k'uájiko ch'ín Jesús mé kóchjinehe ch'án la ntáchro sín kíxin:
 —¿Á noha kíxin tí sín fariseo mé kóninkaon sín tí kuínhin sín tí nkehe ntáche sín? —ichro sín.

13 Ntá kjuátehe ch'án ntáchro ch'án kíxin:
 —Kaín tí ka jehya T'aná tjen nkaya nkajní k'uenkaxin la mé ts'axrjenkíxín nué. **14** Nté titohé sín. Tí jehe sín la ntakótán sín la t'etueñhen sín í so sín ntakótán. A ntá tió ijnko chojni ntakótán tjitaón ntja la ntá yói sín ts'anótjenyá sín ichréen tóye —ichro ch'án.

15 Ntá ntáchro ch'ín Pedro kíxin:
 —Chrónka nkexrí t'axrjexín tíha —ichro ch'án.

16 Ntá kjuátehe ch'ín Jesús ntáchro ch'án kíxin:
 —¿Á kjaxinrá jahará tiéñinxhyará? **17** ¿Á tiéñinxhyará kíxin kaín tí nkehe ineni na sájtí nkaya tséeni na ko xík'axrjexín tí cuérpoeni ínaá? **18** A ntá tí nkehe t'axrjexín ir'va chojni la t'axrjeníxín asén chojni la tíha la mé tí jie tjasixín chojni. **19** Kaín tíha mé t'axrjeníxín asén chojni, mé tí jinahya tjenkayáxin sín la ko tí t'óyán kichó sín la ko tí tjaçhehe kichó sín la ko tí chónta sín í jnko chojni chjin ókjé la ko teé sín la ko tí kjuach'ia la ko tí t'ántaxínhin kichó sín. **20** Tí nkehe a mé tjasixín chojni jie. A ntá tí sineni kjónté nchexiteyáhyani ts'ónti tjani la tíha la jehya jie —mé xikaha ichro ch'ín Jesús.

Ijno tjan jehya sín israelita mé kuinkáchónki tí ch'ín Jesús (Mr. 7.24-30)

21 Ntá ch'ín Jesús mé k'uaxrjexín ch'án ntiha la ntá sákjuí ch'án nó chjasin Tiro la ko chjasin Sidón. **22** Ntá ikui ijnko chojni chjin na mé ijnko tjan cananea na kjuák'e tjan tí chjasin ntiha. Kóchjinehe tjan tí ch'ín Jesús la k'uèya tjan ntáchro tjan kíxin:

—Inchéni, Xjeen David, tikonóehéni kíxin tí xjeenni chjin la mé níhi tjan chónta tjan ijnko nchákuén sín ch'án kíxin —ichro ti tjan a.

23 A ntá ch'ín Jesús la ninkehó kjuátehyá ch'án. A ntá tí sín k'uájiko ch'án na kóchjina sín la ntáche sín ch'án kíxin:

—Tétueñhen tjan sátsji tjan kíxin tinkák'óyako tjan chréhe tjan tí jeheni —ichro sín.

24 Ntá ntáchro ch'ín Jesús kíxin:

—Dios mé ichr'ánnna tsjéyá jehó tí kolélo kjuichroe kuénte nación Israel —ichro ch'án.

* **15:4** Éxodo 20.12; 21.17; Levítico 20.9 † **15:9** 15.8-9 Isaías 29.13

²⁵ A ntá tí tjan a kóchjina la kjuák' exín toch'in tjan nkayakon tí ch'ín Jesús la ntáchro tjan kíxin:

—Inchéni, tjínkitsani —ichro tjan.

²⁶ A ntá ch'ín Jesús kjuátehe ch'án ntáchro ch'án kíxin:

—Jehya tí jína chrókuakitsjhá niotja tí xjan ntá chrótjhá konja chrókjóne va —ichro ch'án.

²⁷ A ntá jehe tjan la ntáchro tjan kíxin:

—Chaxín xíkaha, inchéni. Kjánchó kjónté tí konja na tí nkehe tsjixènjinní mesa kuénte inché la ine va —ichro tjan.

²⁸ Ntá ntáchro ch'ín Jesús kíxin:

—Jaha imá tinkachónkia tí janhan. Tí nkehe tjinkávan la tsoxiteyá —ichro ch'án.

Ntá tuénxín tí hora la tí xjeen tjan ó kuítóhe jína.

Ch'ín Jesús mé kjuínchekitohe jína nchónhya chojni níhi

²⁹ Ntá ch'ín Jesús mé sákjuín ch'án ntiha la kjují ch'án chrínta ntayaon Galilea. Ntá chriin ch'án ijnko jná la ntiha kjuák'etjaxin ch'án. ³⁰ Ntá kójnkotsé itsjé chojni tí tjen ch'án la kjuikao sín tí sinníhi, mé tí sín xitjahya tji la ko tí sín t'ikonhyá la ko tí sín nixjahya la ko tí sín tsíxénká la kaín xín tí í so sinníhi. K'uejo sín tí sinníhi toté tí ch'ín Jesús kíxin jehe ch'án mé sinchekitohe ch'án sín jína. ³¹ Kaín chojni la imá chrakon sín kíxin k'uíkon sín kíxin tí sín k'uénixjahya la ó nixja sín la tí sín tsíxénká la tsíkitohe sín jína la tí sín xitjahya tji la ó tji sín la ko tí sín k'uék'ikonhyá la ó t'ikon sín. Méxra kjuanchehe sín kjuasáyé tí Dios kuénte tí sín Israel.

Ch'ín Jesús mé kjuínchekjine noó mil chojni

(Mr. 8.1-10)

³² Ntá k'uíyehé ch'ín Jesús tí sín k'uájiko ch'án la ntáchro ch'án kíxin:

—Imá tíkonóahá kaín tí chojni kíxin ó ní yaon tjejókoni sín ntá kjuéhe sín nkehe sine sín. Tjinkakonhyá chrókuétuñhan sín sáchrókjui sín ntoi sín kíxin naxa nehya sín la ntia ó tsotienxín sín kjinta —ichro ch'án.

³³ Ntá ntáchro tí sín k'uájiko ch'án kíxin:

—Ntá jaha la ó noha kíxin nteje tjejóni la kohya nkehe tsochjéheni kaín xín tí chojni a —ichro sín.

³⁴ Ntá ch'ín Jesús mé kjuanchankíhi sín, ntáchro ch'an kíxin:

—¿Nkekjaín niotja chontará? —ichro ch'án.

Ntá ntáchro sín kíxin:

—Yato niotja chóntani la ko iso koche ntsíntsí —ichro sín.

³⁵ Ntá ch'ín Jesús k'uetoan ch'án kíxin kaín xín sín ts'ixitjaxin sín nonte, ichro ch'án.

³⁶ Ntá kuákja ch'án tí yato niotja la ko tí koche ntsíntsí la kjuanchehe ch'án kjuasáyé Dios. Ntá kóchrít'ó ch'án tí niotja a la ntá k'uetuñhen ch'án tí sín k'uájiko ch'án kíxin ts'óxíkayéhe sín tí niotja la ko tí koche kaín xín tí sín siín a, sine sín. ³⁷ Na mé kaín xín sín kjóne sín na kókjehe sín ntá kjuenájín sín yato ntaxra tot'ó tí nkehe naxa tsíxehé. ³⁸ A ntá tí sín kjóne mé noó mil chojni ntoa. A ntá tí chojni chjin la ko chánjan la mé kuákjahya sín cuenta nkekjaín tí sín a. ³⁹ Ntá ch'ín Jesús mé nixjehé ch'án sín sákjuí sín la ntá k'uit'ótjen ch'án ntabárcó la sákjuí ch'án nó Magdala.

16

Tí sín fariseo la ko tí sín saduceo tjanchia ijnko kjuaxroan náxrjón

(Mr. 8.11-13; Lc. 12.54-56)

¹ A ntá iso tí sín fariseo la ko iso tí sín saduceo mé sákjuitsjehe sín tí ch'ín Jesús. Tjinkaon sín chrókuachaxin sín ch'án la kjuanchehe sín ch'án kíxin chrókuakoxin ch'án ijnko kjuaxroan kíxin á chaxín jehe ch'án tsíkixin ch'án tí tjen Dios. ² A ntá ch'ín Jesús na kjuátehe ch'án, ntáchro ch'án kíxin:

—Jahará ntáchrórá kíxin ijie ntá kónjín ó tsí ijkno yaon jína kíxin kjátse nkajní. ³ La ntá nchítjen ntáchrórá kíxin ijie la náxrjónhya kíxin kjátse nkajní la tjenkáya tui. Méxra jahará ntoáhya tjenkayáxinrá. Ó nohará tjátsqanrá tí nkajní, a ntá tjátsqanhyará tí kjuaxroan sítónhen jie. ⁴ Tí sín jínahya la tí sín titekakonhya la tjanchia sín ijkno kjuaxroan jié. A ntá ts'ikonhyará í jkno kjuaxroan, jehó tí kjuaxroan kuènte ch'ín Jonás mé ts'ikonrá —mé xíkaha ichro ch'ín Jesús.

Ntá kuítuhe ch'án sín la sákjuí ch'án.

*Ch'ín Jesús ntáchro kíxin chrókuitekakonhya sín tí nkehe tjako tí sín fariseo
(Mr. 8.14-21)*

⁵ Ntá tí sín k'uájiko ch'ín Jesús mé k'uátøyé sín ntayaon la ntá k'uitjáyehen sín tsíkjikohya sín niotja. ⁶ Ntá ntáchro ch'ín Jesús kíxin:

—Chrókoxakonhanrá kíxin tí xroqan ts'ánkíxín niotjé tí sín fariseo la ko tí sín saduceo.

⁷ Ntá tí sín k'uájiko tí ch'ín Jesús mé ikjo sín kichó sín ntachro sín kíxin:

—Mé xíkaha ichro ch'án kíxin tsíkjikohyaní niotja —ichro sín.

⁸ Ntá kónohe ch'ín Jesús kíxin nkehe tí kjo sín kichó sín, ntá ntáchro ch'án kíxin:

—¿Nkekuénté tjórá kíxin chontahyará niotja? Jahará la intsíkoá tinkachónkirá tí janhan. ⁹ Jahará ¿á naxqá tiénxinhayará la ko á xráxinkákonhyará tí in'ó niotja k'óxikayéheni kjóne tí in'ó mil chojni la ko á xráxinkákonhyará nkekjaín ntaxra kjuenájinrá tí nkehe tsíxhe? ¹⁰ La ko ¿á xráxinkákonhyará jahará tí yato niotja xikayehe kjóne tí noó mil chojni la ko á xráxinkákonhyará nkekjaín ntaxra kjuenájinrá tí nkehe tsíxhe? ¹¹ A ntá ¿nkekuénté kíxin kuiénxinhayará kíxin janhan la jehya kuènte niotja tjénixja tió ntáxrjan kíxin chrókoxakonhanrá kíxin tí xroqan ts'ánkíxín niotjé tí sín fariseo la ko tí sín saduceo? —mé xíkaha ichro ch'ín Jesús.

¹² Na ntá kuienxín sín kíxin nixjahya ch'án kuènte tí xroqan t'ánkíxín niotja. Náhí. Tjenixja ch'án kíxin chrókoxakonhen sín kíxin tí nkehe tjako tí sín fariseo la ko tí sín saduceo.

*Chrónka ch'ín Pedro kíxin ch'ín Jesús mé tí nkexro Cristo
(Mr. 8.27-30; Lc. 9.18-21)*

¹³ Kuijí ch'ín Jesús chjino tí chjasin Cesarea de Filipo ntá jehe ch'án mé kjuanchankíhi ch'án tí sín k'uájiko ch'án, ntáchro ch'án kíxin:

—¿Nkehe tjo sín kíxin nkexro tí Xjeen Dios K'óna Chojni? —ichro ch'án.

¹⁴ Ntá jehe sín kjuátehe sín ntáchro sín kíxin:

—Iso sín mé ntáchro sín kíxin Juan Bautista, ichro sín. A ntá í so sín na mé ntáchro sín kíxin Elías, ichro sín. A ntá í so sín mé ntáchro sín kíxin Jeremías o í jkno nkexro k'uéchrónka itén Dios —ichro sín.

¹⁵ Ntá ntáchro ch'ín Jesús kíxin:

—¿A ntá jahará nkechrórá kíxin nkexro tí janhan? —ichro ch'án.

¹⁶ A ntá ch'ín Simón Pedro kjuátehe ch'án ntáchro ch'án kíxin:

—Jaha mé tí Cristo mé Xjeen Dios tjechón —ichro ch'án.

¹⁷ Ntá kjuátehe ch'ín Jesús ntáchro ch'án kíxin:

—Náxrjón tjen jaha Simón xjeen Jonás kíxin kohya nijnko chojni kjuakoha tíha. Jehó T'aná tjen nkaya nkajní mé kjuakoha tíha. ¹⁸ Méxra ntáxrjan kíxin jaha mé Pedro mé t'axrjexín kíxin ijkno xro la chrítaón tí xro mé sit'ána nijnko la kjónté tí kjuachaxin kuènte kjuach'én la tsjachahya sinchek'itjáyan. ¹⁹ Méxra jaha mé tsotjaha tí llave kuènte kjuachaxin nkaya nkajní la ntá tí nkehe tjánjonhya kjuachaxin tsonhen ntihi chjasintajni la kjaxin nkaya nkajní tsochontahya kjuachaxin. A ntá tí nkehe tsjánjuan kjuachaxin tsonhen ntihi chjasintajni la ntá kjaxin nkaya nkajní siín kjuachaxin.

²⁰ Ntá ch'ín Jesús mé k'uétuenhen ch'án tí sín k'uájiko ch'án kíxin ninkexró tsochénkahya sín kíxin jehe mé tí Cristo.

*Ch'ín Jesús chrónka ch'án kíxin its'en ch'án
(Mr. 8.31—9.1; Lc. 9.22-27)*

²¹ Ntá ch'ín Jesús kjuankíxin ch'án chénka ch'án tí sín k'uájiko ch'án kíxin t'ichjánxín satsji ch'án chjasin Jerusalén la ntaha la tí sín t'etqan kuènte ninko la tí sín nchat'á tjetoan la ko tí sín maestro tjako ley mé imá sinchekjasóte sín ch'án. La chrónka ch'án kíxin ts'óyán sín ch'án kjáchó tí níxin yaon mé tsozechón ch'án ínaá. ²² Ntá ch'ín Pedro mé kuakitsjenta ch'án tí ch'ín Jesús la kjuankíxin nixjehé ch'án ntáchro ch'án kíxin:

—Kjá Dios tsjanjonhya kjuachaxin xikaha tsónhan Ìnchéni kíxin jaha la xitjahya tsjasóte xikaha —ichro ch'ín Pedro.

²³ A ntá ch'ín Jesús mé kuinkátjá ch'án la nixjehé ch'án tí ch'ín Pedro, ntáchro ch'án kíxin:

—Sátjia ntáha, Sátanas. Tjiatéhya tí jaha tí nkehe tsonna. Jaha chrók'uínkakonhén tí nkehe tjinkaon Dios. Jaha tjenkayáxinhya éxí tjinkaon Dios. Náhí. Tjenkayáxian éxí tjenkayáxin chojni ó —ichro ch'ín Jesús.

²⁴ Ntá nixjehé ch'ín Jesús tí í so sín k'uájiko ch'án, ntáchro ch'án kíxin:

—Jnkojínrá tjinkáonrá tsochréhérá tí janhan la t'ichjánxín tsítjhérá kaín tí nkehe tjaké asánrá, ntá tsámárá tí ntacruz kuéntará, a ntá tsochréhérá tí janhan. ²⁵ A ntá tí nkexro tjinkaon jehó sinchekaá asén la ts'itjáyan. A ntá tí nkexro chrókjuinchek'itjáyanxín asén kíxin tinkáchónki sín tí janhan la tsaá. ²⁶ ¿A ntá nkehe tsónhen tí chrókjuacha ijkno chojni chróchóntha kaín nkehe siín chjasintajni a ntá tí kjuachón chrókjuinchek'itjáyan? ¿Nkehe chrókjuenkó chojni kíxin chróchóntha tí kjuachón? ²⁷ Tí Xjeen Dios K'óna Chojni tsikao ch'án tí kjuachaxin jié kuènte It'é ch'án tjen nkaya nkajní la kaín tí sín ángel tsikao ch'án na ntá tsjenkehe ch'án jnkojnko chojni nkexrí tí xra kjuich'e jnkojnko tí jehe sín. ²⁸ Chaxín xrjanka kíxin isorá tjejorá ntihi la naxa ts'énhyará naxa ts'ikonjará kíxin nkexrí tí kjuachaxin tsochóntha tí Xjeen Dios K'óna Chojni tí tsikao ch'án kjuachaxin jié —ichro ch'ín Jesús.

17

*Ch'ín Jesús mé k'uíxitóxín nkexrí tsjehe ch'án
(Mr. 9.2-13; Lc. 9.28-36)*

¹ Ntá injón yaon chréxín ntá ch'ín Jesús mé sákjuiko ch'án ch'ín Pedro la ko ch'ín Jacobo la ko ch'ín Juan, kichó ch'ín Jacobo, la k'uít'ótjen sín ijkno jná imá noi. ² Ntá ntiha tjejó sín ntá xrínahya k'uíkon sín kíxin ch'ín Jesús mé k'uíxitóxín nkexrí tsjehe ch'án. Tí nkayakon ch'án la imá tjákini tsjehe éxí yaon la ko iké ch'án la k'óna imá tjóá la tsjehe éxí yóhé ijkno xrohi t'inkaséyan. ³ Na ntá xrínahya k'uíkon sín itjen ch'ín Moisés la ko tí ch'ín Elías tjejótjo sín tí ch'ín Jesús.

⁴ Na ntá ch'ín Pedro mé ntáche ch'án tí ch'ín Jesús kíxin:

—Ìnchéni, jína kíxin tjejóni ntihi. Tí tjinkávan la chrókjuich'énani iní nchia la mé ijkno kuéntá jaha la ijkno kuénte ch'ín Moisés la í jnko kuénte ch'ín Elías —ichro ch'án.

⁵ Ntá naxa tjenixja ch'ín Pedro na ntá xrínahya ikui ijkno tjuí imá t'inkaséyan kjuák'etja chrítaón tí jná tjejó sín. Ntá xrínahya chríkjan tí tjuí kuínhin sín itén ijkno nkexro nixja na mé ntáchro kíxin:

—Tíhi mé xjanna. Imá tjuahá ch'án la ko chàna kíxin itjen ch'án. Chrókuinhínrá tí nkehe tjako ch'án —ichro Dios.

⁶ Kuínhin tí sín k'uájiko ch'án xikaha la ntá kjuitsínska sín nonte kíxin imá chrakon sín.

⁷ Na ntá ch'ín Jesús mé kóchjina tí tjejó sín la kuákoxín sín ch'án la ntáchro ch'án kíxin:

—T'aya chrakonhyará —ichro ch'án.

⁸ Na ntá xrínahya k'uíkon sín kíxin kohya ninkexró. Jehó ch'ín Jesús mé tjen.

⁹ Na ntá tí k'uínkajinxín sín tí jná ntá k'uetoan ch'ín Jesús, ntáchro ch'án kíxin:

—Ninkexró chenkahyará tí nkehe k'uikonrá ijie hasta tsoxechónjan tí Xjeen Dios K'óna Chojni —ichro ch'án.

¹⁰ Ntá tí sín k'uajiko ch'ín Jesús mé kjuanchankí sín, ntáchro sín kíxin:

—¿Nkekuénté ntáchro tí sín maestro tjako tí ley kíxin saoxín itsi tí ch'ín Elías la ntá chr'éxín itsi tú nkexro tsaáxinni? —ichro sín.

¹¹ Ntá kjuátehe ch'ín Jesús, ntáchro ch'án kíxin:

—Chaxín senó itsi ch'ín Elías kíxin tsjasiyóxin ch'án kaín nkehe. ¹² Kjánchó ó xrjanka kíxin chaxín ó kui ch'ín Elías la tí sín chjasintajni la mé kjuátsoanhya sín ch'án la kjuínchekjasóte sín ch'án éxí kóxrjínhin sín. Mé xíkaha kjaxin tí Xjeen Dios K'óna Chojni la mé kjaxin sinchekjasóte tí jehe sín —mé xíkaha ichro ch'ín Jesús.

¹³ Ntá tí sín k'uajiko ch'án mé kónohe sín kíxin ch'ín Jesús la nixja ch'án kuénte Juan Bautista.

Ch'ín Jesús mé kjuínchekitohe jína ijnko xjan t'aniáte

(*Mr. 9.14-29; Lc. 9.37-43*)

¹⁴ Ntá tió k'uiji sín tí siín nchónhya chojni la ntá kóchjina ijnko ch'ín tí tjen ch'ín Jesús la kjuák'exín toch'in ch'án nkayakon ch'án. La ntáchro ch'án kíxin:

¹⁵ —Inchéni, tikonóehéni kíxin xjeenni laníhi, chóntha ch'án chin t'aniáte. Nchónhya veces tjitsínkate ch'án xrohi la tjitsínkankí ch'án ntá. ¹⁶ Ntá kjuikäoni ch'án ntihi la tí sín xrikoá la kjuachahya sín kjuínchekitohe ch'án jína.

¹⁷ A ntá kjuátehe ch'ín Jesús ntáchro ch'án kíxin:

—Jahará la chaxínya tinkachónkirá tí janhan la imá tjásinrá jíe. ¿Xá hasta nkesá tjinkáonrá naxa ts'ejóni? ¿Hasta nkesá tsjácha tsjak'é tsjákohará? Xrakoa tí xjan méhe ntihi —ichro ch'án.

¹⁸ Ntá ch'ín Jesús mé k'uetuñhen ch'án tí nchäkuen tí jínahya la ntá k'uaxrjexín tí nchäkuen tí jínahya tí chánjan la tuénxín kuítóhe xjan jína.

¹⁹ Ntá kjuixin sákjuí sín la jehó ch'ín Jesús tjen ch'án la ntá tí sín k'uajiko ch'án mé kjuanchankíhi sín ch'án, ntáchro sín kíxin:

—¿Nkekuénté kíxin kjuachahyani kuakitsjeni tí nchäkuen tí jínahya a? —ichro sín.

²⁰ Ntá ntáchro ch'ín Jesús kíxin:

—Jahará la kjuachahyará kuakitsjerá nchäkuen tí jínahya kíxin intsíkoá tinkachónkirá tí janhan. Chaxín xrjanka kíxin tí chrókuinkachónkirá kaín asánrá kjónté intsíkoá éxí ijnko tje mostaza intsíla ntá chróntácherá tí jná kíxin: “Sátjíxian ntihi la sátsjia ókjé”, chróchorrá chróntácherá tí jná la ntá tí jná sáchrókjuixin ntiha. Mé xíkaha kaín nkehe chrókjuachará chrókjuich'erá tí chaxín tinkachónkirá tí janhan. ²¹ A ntá tí tsakitsjerá ijnko nchäkuen tí jínahya la t'ichjánxiñ tsonixjehérá Dios la ko sintehyará.

Ch'ín Jesús chrónka ch'án ínaá kíxin its'en ch'án

(*Mr. 9.30-32; Lc. 9.43-45*)

²² Naxa k'uék'aji sín jnkokoá tí estado Galilea la ntáchro ch'ín Jesús kíxin jehe ch'án tí Xjeen Dios K'óna Chojni mé tsotsé sín ch'án la ko tsjikaán sín ch'án tí siín chojni t'etoan sinchekjasóte sín ch'án ²³ la ts'oyán sín ch'án. A ntá tí yaon níxin ntá tsoxechón ch'án ínaá, ichro ch'án. Ntá tí sín k'uajiko ch'án mé kuínhin sín la imá k'uává sín.

Ch'ín Jesús kjuenka ch'án tí nkehe kjuanchia tí sín kuénte njinko

²⁴ Ntá tió kjuíji ch'ín Jesús la ko tí sín k'uajiko ch'án tí chjasin Capernaum la ntá tí sín nchekjènki kuénte njinko mé sákjuítsjehe sín tí ch'ín Pedro la kjuanchankí sín kíxin:

—Tí maestro kuéntá la, ¿a tjenkähya ch'án tí nkehe tjanchia tí sín nchekjènki kuénte njinko? —ichro sín.

²⁵ Ntá kjuátehe ch'ín Pedro, ntáchro ch'án kíxin:

—Kjá tjenkä ch'án —ichro ch'án.

Ntá k'uíxenhen ch'ín Pedro tí nchia la ch'ín Jesús mé senó nixja ch'án ntáchro kíxin:

—¿Nkechrua, Simón? ¿Nkexro chrókuéenká tí nkehe tjanchia tí sín t'etoan chjasintajni, á tí sín kuénte ntihó o á tí sín tsíkjixin ókjé? —ichro ch'ín Jesús.

²⁶ Ntá kjuátehe ch'ín Pedro, ntáchro ch'án kixin:

—Tí sín tsíkjixin ókjé mé tjenka sín —ichro ch'án.

Ntá ntáchro ch'ín Jesús kixin:

—A ntá tí sín chjasén sín la t'ichjánxinhya chrókuéenká sín. ²⁷ Kjánchó tjínkakonhya tsoníkaon ninkexró ntihí. La ntá sátsja tí ntayaon sátsjikoá tí ichjon chóntha gancho tséxin sín koche la ntaha itsé tí chjon chrínkí ntayaon. Ntá tsákjá tí koche saoxín sítsé gancho. Ntá takitjehé nkaya ir'va va la ts'itja ijnko chichaon. Táha mé tsjacha tsjenka kaín tí tjásikáha sín la ko tí tjásikehé sín jaha. Táha mé sátjikoá tjènka —ichro ch'ín Jesús.

18

¿Nkexro tí imá ts'etoan?

(Mr. 9.33-37; Lc. 9.46-48)

¹ A ntá tí yaon a tí sín k'uájiko ch'ín Jesús mé kóchjinehe sín ch'án ntá kjuanchankíhi sín ch'án kixin:

—¿Nkexro tí qantsí má ts'etoan tí kjuachaxin kuénte nkaya nkajní? —ichro sín.

² Ntá ch'ín Jesús mé k'uíyéhe ch'án ijnko chánjan la kjuak'e jnkosiné tí tjejó tí jehe sín ³ la ntáchro ch'án kixin:

—Chaxín xrjanka kixin tí ts'ónahyará éxí ijnko xjan ntsí ntá xitjahya tsákjárá tí kjuachaxin kuénte Dios. ⁴ Tí jnkoyín nkexro ts'óna éxí tí chánjan ihnkehya la mé qantsí tjetoan ntihá. ⁵ A ntá tí nkexro ts'áyéhe ijnko chánjan kixin tinkáchónki sín tí janhan la mé xikaha éxí chrók'uáyéhe sín tí janhan —mé xikaha ichro ch'ín Jesús.

Tí chojni tjasin jie mé tsjasóte sín

(Mr. 9.42-48; Lc. 17.1-2)

⁶ 'Tí jnkoyín nkexro chrókuachroe ijnko chánjan ntsí tinkáchónki tí janhan la íchá jína chrókuincheteyá sín ch'án ijnko xro tsík'óna xrochré ntá chrókuíkakánki ch'án ntayaon ninka. ⁷ Imá náxrjónhya tjejó tí sín chjasintajni kixin siín nkehe tjasixín chojni jie. Xráxín la jehí siín, a ntá nòa tí nkexro tjasin tí nkehe tsjasixín chojni jie.

⁸ 'Tí itjá o totá tjásixián jie na chrókójína chrókochrínjian chróchr'an ikjín kixin íchá jína chróchonta kjuachón kjónté it'oo itjá o it'oo totá. Á ntá tí yói itjá o yói totá chróchonta tsjásixián jie la tíha mé sátsjixián tí síche xrohi jnkochríxín. ⁹ La ko kjaxin tí ikuan tjásixian jie na chrókójína chrókuakitsjenkiá tí ikuan chróchr'an ikjín kixin kjónté náyó ikuan na chróchonta kjuachón. A ntá tí yói ikuan chróchonta tsjásixián jie la tíha mé sátsjixián tí síche xrohi jnkochríxín.

Kjuíncheyóexin ch'ín Jesús éxí ijnko kolélo tsík'itjáyan

(Lc. 15.3-7)

¹⁰ 'Chrókójoniéhyará nijnko tí chánjan ntsíntsí. Tjónkará kixin nkaya nkajní la tí sín ángel kuénte tí xjanntsí la xráxín tjejó sín tí tjen T'aná nkaya nkajní. ¹¹ Tí Xjeen Dios K'óna Chojni la mé ikui kixin chrókuinchekáa tí chojni xrichroe.

¹² 'Jahará nkechrórá? Ijnko chojni chóntha ijnko ciento kolélo ntá chrók'uitjáyan ijnko va na ¿á chrókuítjehya ch'án tí noventa y nueve va tí jnq o a ntá á chrókuikjeyáhya ch'án tí ijnko tí ko k'uítjáyan ni? ¹³ A ntá tí tsjacha ch'án ts'itja ch'án va ntá qantsí tsochéhe ch'án kixin tí kolélo k'uitja ch'án la ntá kánhyó tsochéhe ch'án kixin tjejó tí noventa y nueve ko tsík'itjáyanhya va. ¹⁴ Mé xikaha kjaxin It'éni tjen nkaya nkajní la tjinkakonhya ch'án kixin chrók'uitjáyan ninkexró kjónté ijnko chojni kánhyó tjetoan.

Chrók'uitjáyanhanrá tí jie kjuasinhánrá kíchuárá

(Lc. 17.3)

¹⁵ 'Tí kíchuá tí chrókuit'aha ichréñ nkehe jínahya la ntá jahvá chrónixjehé ch'án la nchexraxinkaon ch'án tí jie kjuasin ch'án. ¹⁶ A ntá tí kjuacha nixjehé tí kíchuá la í kohya kjuanínkaon. ¹⁶ A ntá tí tahya ch'án kuentá nkechrua la ntá ntáche á jnko o yaá chojni sájtikoa kíxin tsinhin sín á chaxín titekakonhya ch'án. ¹⁷ A ntá tí kjónté xíkaha naxa titekakuenhya ch'án sín la ntá chenka tí sín tsíkójnkotsé nkehe tí jie kjuasin ch'án la ntá tí naxa titekakuenhya ch'án tí sín tsíkójnkotsé la ntá ts'ikonrá ch'án éxí ijnko chojni tinkáchónkihya Dios o éxí ijnko chojni nchekjènki.

¹⁸ 'Chaxín ntáxrjan kíxin tí tsjánjonhyará kjuachaxin nkehe tsónhen ntihi chjasintajni la ntá kjaxin nkaya nkajni tsjanjonhya Dios kjuachaxin la ko tí tsjánjonrá kjuachaxin nkehe tsónhen ntihi chjasintajni la kjaxin ntaha nkaya nkajní tsjanjon Dios kjuachaxin.

¹⁹ 'Kjaxin ntáxrjan kíxin tí tjejó yaárá ntihi chjasintajni la tí jnkokoá tjejótjenkayáxinrá chrókuancheherá Dios ijnko nkehe tjinkáonrá la ntá jehe ch'án mé tsotjáhará ch'án.

²⁰ Kíxin tí tjejó yaá o iy'á chojni tjejó jnkokoá t'ákjenxín sín níná la janhan koína tjéntaxian tí tjejó sín ntiha.

²¹ Ntá kóchjina ch'ín Pedro mé kjuanchankí ch'án ntáchro ch'án kíxin:

—Inchéni, ¿nkekjaín veces chrók'uitjáyenhenni tí jie kjuasin kichó ni? ¿Á yato veces ó ní?
—ichro ch'án.

²² Ntá kjuátēhe ch'ín Jesús, ntáchro ch'án kíxin:

—Náhí, jehya yato veces ó. Náhí, hasta setenta veces tí yato.

Ch'ín Jesús kjuíncheyóexin ch'án ijnko chojni ch'exón xra k'uítjáyenhya ch'án ijé kíchó ch'án

²³ 'Tí kjuachaxin kuénte Dios la éxí yóhe ijnko rey tjinkaon ch'án tsjentoáko ch'án kuentá tí sín ch'ehe ch'án xra. ²⁴ Ntá kjuankíxin ch'án tsítsíkaxín cuenta la ntá xrínahya kóchjina ijnko ch'ín ch'e xra síká nchónhya millones chichaon. ²⁵ Tí ch'ín a mé chontahya ch'án chichaon ts'ókjenhen ch'án tí ch'ín rey la ntá tí ch'ín rey mé k'uetoan ch'án kíxin tí nkexro a mé tsöxi ch'án la koí tí ichjién ch'án la ko xjeen ch'án la ko kaín nkehe kuénte ch'án kíxin ntá xíkaha mé tsokenka kaín tí síká ch'án. ²⁶ A ntá tí nkexro ch'e xra mé kjuák'exín toch'in ch'án nkayakon tí rey la chrónóehé ch'án, ntáchro ch'án kíxin: "Jaha Inchéni tikonóehéni la kjónté kjaxón tsjenkahani kaín tí sikáhani", ichro ch'án. ²⁷ A ntá tí ch'ín rey kuikonóehé ch'án tí ch'ín a kjónté itsjé síká ch'án, ntá kuítóhe ch'án sákjuí. ²⁸ A ntá tí sákjuí tí ch'ín a ntá xrínahya xéta ch'án ijnko nkexro ch'eko ch'án xra mé ijnko nkexro síkéhe ch'án iso chichaon. La ntá tí ch'ín a mé tsénkíhi ch'án isin la ntáchro ch'án kíxin: "¡Tsíenkana tí nkehe tjasíkàna ní o náhí!" ichro ch'án. ²⁹ A ntá tí ch'ín chóxin ch'án mé kjuák'exín toch'in ch'án nkayakon ch'án la chrónóehé ch'án ntáchro ch'án kíxin: "Tikonóehéni ijie la kjónté kjaxón tsjenkahani kaín tí nkehe sikáhani", ichro ch'án. ³⁰ A ntá jehe ch'án la kuikonóehya ch'án. K'uetoan ch'án kíxin tí ch'ín a mé tsjak'echjina ch'án tsjixinjian tsjenká ch'án kaín tí síká ch'án. ³¹ Ntá tí í so sín ch'exón xra mé k'uíkon sín la ntá imá kóxakonhen sín la sákjuichénka sín tí lámoé sín nkexrí kaá kónhen tí ch'ín síká. ³² A ntá tí lamo mé k'uetoan tsjik'iyéhe sín tí nkexro jínahya la ntá ntáchro ch'án kíxin: "Imá jínahya jaha. Janhan mé kjuintak'itjáyanhan tí nkehe tjasíkàna kíxin jaha chronóqana. ³³ A ntá jaha mé kjaxin chrókuikonóehé tí nkexro choxian éxí janhan kuikonóha tí jaha", ichro tí ch'ín lamo. ³⁴ A ntá imá kóninkaon tí lamo a la k'uetoan ch'án kíxin tsjasóte tí ch'ín a tsjixinjian tsjenká ch'án kaín tí síká ch'án.

³⁵ A ntá tí ch'ín Jesús ntáchro ch'án kíxin:

—Mé xíkaha T'aná tjen nkaya nkajní xíkaha sit'ahará jahará tí jehya kaín ąsánrá ts'itjáyanhanrá tí jie chóntha kíchuárá —ichro ch'ín Jesús.

19

*Tjako ch'ín Jesús kuénte tí sín t'itjíhi kíchó
(Mr. 10.1-12; Lc. 16.18)*

¹ A ntá kjuixin nixja ch'ín Jesús kaín tíha, ntá sákjuíxín ch'án estado Galilea la kjuíji ch'án estado Judea nó tóhe tí ntario Jordán. ² Ntá nchónhya chojni kjuíjichréhe sín ch'án ntá ntihá mé kjuínchekitohe ch'án jína tí chojni níhi.

³ Ntá iso sín fariseo mé kóchjinehe sín tí ch'ín Jesús kjuanchankíhi sín ch'án kíxin tsotsjehe sín nkexrí tsixro ch'án, ntáchro sín kíxin:

—¿Á siín kjuachaxin tsjákehe jnkojín chojni ichjién kjónté kohya jie jié? —mé xíkaha kjuanchankí sín.

⁴ Ntá kjuátēhe ch'ín Jesús ntáchro ch'án kíxin:

—¿Á nunca kjuínchekuáxinhárá jahará kíxin ntáchro xroon itén Dios kíxin tí nkexro kjuích'éna kaín chojni siín chjasintajni tí xrankíxíxín, la tí nkexro mé “kjuích'éna ch'án chojni ntoa ko chojni chjin”?* ⁵ La ko ntáchro kíxin: “Mé xíkaha tí chojni ntoa la tsítōhe sín it'é sín la ko iné sín la tsakja sín ichjién sín la yói sín la éxi ó jnko chojni xíkaha ts'óna sín.”† ⁶ Mé xíkaha la í jehya yaá chojni tí jehe sín. Náhí. Ó jnko chojni k'óna tí jehe sín la mé Dios kjuanjon kjuachaxin kíxin kuákja kíchó sín, la i xitjahya ts'itjíhi kíchó sín.

⁷ Ntá tí sín fariseo mé kjuanchankíhi sín ch'án kíxin:

—¿Ntá nkexrí kíxin tí ch'ín Moisés k'uetoan kíxin ts'óna ijkro xroon tsakja tí ichjién kíxin tsjákeexín kíchó sín?‡ —ichro tí sín fariseo.

⁸ Ntá ntáchro ch'ín Jesús kíxin:

—A ntá jahará títekákonhyará. Méxra ch'ín Moisés kjuanjon ch'án kjuachaxin kíxin ts'óna tí xroon ts'itjíexín kíchuárá. Kjánchó tí xrankíxíxín la xíkahya kónhen. ⁹ Méxra ntáxrjan kíxin jnkojín sín tjákehe ichjién tí kjuasinha jie, chóntahya tjan í jnko chojni, ntá kjuákehe ch'án tjan ntá tsakja ch'án í jnko chjin mé xíkaha la ó jie tíha. La ko kjaxin tí ijkro chojni chjin tsíktsínkehe ntá tsakja í jnko chojni la kjaxin jie tíha.

¹⁰ La ntá tí sín k'uájiko ch'ín Jesús ntáchro sín kíxin:

—Tí xíkahya tjanjongo kíchó sín chrók'uitjíhi kíchó sín la íchá jína chrókóteehya sín.

¹¹ Ntá ntáchro ch'ín Jesús kíxin:

—Kénya chojni tsjacha tienxín tíha. Jehó tí sín kjuanjon Dios kjuachaxin tienxín sín.

¹² Siín iso chojni tí tsík'ónaxín sín la chóntahya sín kojé sín la xitjahya tsochonta sín ichjién sín. La í so sín la chrokjuahya tsakja kíchó sín ókjé chojni kjaxin kjuích'ehe sín xíkahya, la ko í so sín la takjahya kíchó sín kíxin tjinkaon Dios kíxin xíkahya sich'ehe sín ch'án xra. Tí sín tsjacha sich'e tíha la chrokjuich'e sín xíkahya.

Ch'ín Jesús mé kjuíncheyaon ch'án chánjan

(Mr. 10.13-16; Lc. 18.15-17)

¹³ Ntá ikjui chojni kjuíkao sín iso xjan kíxin tjinkaon sín tsjak'etja tja ch'ín Jesús chrítaón tí chánjan la sincheyaon ch'án sín. Ntá tí sín k'uájiko ch'án mé kóninkakonhen sín tí sín kjuíkao tí xjan. ¹⁴ A ntá ntáchro ch'ín Jesús kíxin:

—Nté titohérá tsoxrakoa xjan tí tjén janhan la t'ínkakuéñhyará xjan kíxin tí sín kuente kjuachaxin nkaya nkajní la mé tóyóhe éxi tí jehe xjan —ichro ch'án.

¹⁵ Ntá kjuak'etja tja ch'án chrítaón tí xjan la ntá kjuixin ntá sákjuí ch'án ókjé.

Ijnko ch'ín ntasoá rico mé kjuínixjéhe ch'án tí ch'ín Jesús

(Mr. 10.17-31; Lc. 18.18-30)

¹⁶ A ntá ijkro ch'ín ntasoá sákjuitsjehe ch'án tí ch'ín Jesús la kjuanchankíhi ch'án kíxin:

—Jaha la ijkro Maestro jína. La ntá ¿nkehe jína chrókjuich'eni kíxin chróchontani kjuachón jnkochríxín? —ichro ch'án.

¹⁷ Ntá ch'ín Jesús kjuátēhe ch'án, ntáchro ch'án kíxin:

* **19:4** 19.4: Génesis 1.27; 5.2 † **19:5** Génesis 2.24 ‡ **19:7** Deuteronomio 24.1-4

—¿Nkekuénté ntáchrua kíxin jína tí janhan? Jehó jnkokoá nkexro la mé jína la tíha mé Dios. A ntá tí tjinkávan tsochonta kjuachón jnkochríxín la títekávan tí nkehe k'uetqan Dios —ichro ch'ín Jesús.

¹⁸ Ntá ntáchrro tí ch'ín ntasoá kíxin:

—¿Nkehe tíha? —ichro ch'án.

Ntá ntáchrro ch'ín Jesús kíxin:

—Chrók'oyánya chojni la ko chrókjuich'iyehya nijnko chojni chjin la ko chrókuéehya la ko chrókjuich'enahya kjuach'ia kuénte ókjé chojni ¹⁹ la ko chrókjuíkosáyehé it'á la ko ìná la ko chrótjuéhé kíchuá éxi tjuèxian asán. § —mé xíkaha ichro ch'ín Jesús.

²⁰ Ntá ntáchrro tí ch'ín ntasoá kíxin:

—Kaín tíha la kjuínchexiteyáni desde tí ntasoáni. ¿A ntá nkehe tí naxa t'itjáyan? —ichro ch'án.

²¹ Ntá ntáchrro ch'ín Jesús kíxin:

—Tí tjinkávan antsí ntoá sinchexiteyá la sájtja sinchekjia kaín tí nkehe chonta la sinchekitonhén tí sín nòa. Ntá kaín tí nkehe tjete la tsochonta nkaya nkajní. Ntá tsjixin ntá tsjhá la chréhé tí janhan —ichro ch'ín Jesús.

²² Ntá kuínhin tí ch'ín ntasoá a xíkaha ntá t'ává ch'án sákjuí ch'án kíxin imá itsjé nkehe chóntha ch'án.

²³ Ntá ch'ín Jesús mé nixjehé ch'án tí sín k'uájiko ch'án, ntáchrro ch'án kíxin:

—Chaxín tjonkará kíxin tí chojni chóntha imá itsjé nkehe na imá xrä ts'ayéhé sín tí kjuachaxin kuénte nkaya nkajní. ²⁴ Kjatée xrjanca kíxin antsí xrahya chrók'uatsínka ijnko kocamello ijnko tjar'i ntachica tjexrja. A ntá antsí xrä kíxin tí sín chóntha itsjé nkehe chrók'uayéhé tí kjuachaxin kuénte Dios —ichro ch'ín Jesús.

²⁵ Ntá tí sín k'uájiko ch'án mé kuínhin sín la imá chrakon sín, la jehe sín kjuanchankíhi kíchó sín kíxin:

—Tí xíkaha la ¿xá nkexro chrókjuacha chrókuaá? —ichro sín.

²⁶ Ntá komá ch'ín Jesús tí jehe sín la ntáchrro ch'án kíxin:

—Chojni chjasintajni la xitjahya xíkaha sich'e. A ntá Dios mé tsjacha sich'e xíkaha —ichro ch'ín Jesús.

²⁷ Ntá ntáchrro ch'ín Pedro kíxin:

—Inchéni, jeheni kaín ni la kuítóheni kaín nkehe chóntani kíxin tsochréheni tí jaha. A ntá ¿nkehe ts'ayéheni? —ichro ch'án.

²⁸ Ntá kjuátehe ch'ín Jesús kíxin:

—Chaxín ntáxrjan kíxin tió itsi tí yaon tsónixin kaín nkehe la tí Xjeen Dios K'óna Chojni la mé tsjak'e tí trono tsochonta kjuachaxin jié la ntá kjaxinxará jahará chréhéra tí janhan la ts'ejorá teyó trono sinchekitoexínrá ijé kaín tí sín tsík'axrjeníxín tí teyó xjeen ch'ín Israel.

²⁹ La ko kaín tí sín kuítóhe sín ntoe sín la ko kuítóhe sín tí kíchó sín la ko kuítóhe sín it'é sín o iné sín la ko kuítóhe sín ichjién sín la ko xjeen sín la ko nontee sín kíxin tinkáchónki sín tí janhan, na ntá antsí má tsochonta sín la ko kjaxin tsochonta sín kjuachón jnkochríxín. ³⁰ A ntá nchónhya tí sín t'etqan ijie, mé tsjixixín tsochréhe sín. A ntá nchónhya tí sín t'ítuenhen ijie la tí sín a mé ts'etqan sín tí ntiha.

20

Ch'ín Jesús kjuíncheyóexin ch'án éxi tí sín ch'e xra

¹ Tí kjuachaxin kuénte Dios la éxi yóhe ijnko chojni chóntha xrä nontee ch'án la ntá ijnko yaon imá nchítjen sákjuíkjeyá ch'án chojni tsotjéhe ch'án to uva. ² Ntá tí k'uitja ch'án tí sín sich'ehe ch'án xrä ntá ikjo ch'án sín kíxin ijnko denario tsjenkehé ch'án sín tí xrä sich'e sín nontee ch'án tí yaon a. ³ Ntá chr'éxín como las nueve nchítjen ntá sákjuí ch'án ntasin la k'uíkon ch'án í so sín tjejó ntasin chóntahya sín xrä. ⁴ Ntá nixjehé ch'án sín ntáchrro ch'án

kixin: “Kjaxinrá sáchrókjurá chrókjuich'erá xrä nonteeni la jína chrókjuénkahará”, ichro ch'án. La ntá jehe sín sákuí sín. ⁵ A ntá tí ìnché nonte la sákjuí ch'án ínaá chonkxin naxä xík'itja ch'án í so sín ch'ehe ch'án xrä la nta tí las tres kónjín la xíkaha naxä xík'itja ch'án í so sín ínaá. ⁶ A ntá las cinco kónjín sáxíkji ch'án ntasin ínaá la k'uitja ch'án í so chojni ntaha chontahya sín xrä la ntá kjuanchankíhi ch'án sín kixin: “¿Nkekuénté tjejorá ntihi ch'ehyará xrä kuenté yaon? —ichro ch'án.

⁷ Ntá ntáchro sín kixin: “Kohya nkexro kjuanjon xrä chrókjuich'eni”, ichro sín. Ntá ntáchro ch'án kixin: “Kjaxinrá chrókjurá chrókjuich'erá xrä nonteeni la jína chrókjuénkahará”, ichro ch'án. ⁸ A ntá ó kónto ntá tí ìnché nonte mé nixjehé ch'án tí ch'ín t'etoan sítónen xrä nontee ch'án la ntáchro ch'án kixin: “T'iyejhé kaín tí sín kjuich'e xrä tjénkehé sín. Tjankixian tjénkehé tí chojni kjuixixín k'uíxenhen xrä la chr'éxin tjénkehé tí sín saoxín k'uíxenhen xrä”, ichro ch'án. ⁹ A ntá kóchjina kaín tí sín k'uíxenhen xrä las cinco kónjín la jnkojnk sín k'uayéhé sín jnkojnk denario. ¹⁰ Ntá chr'éxin, tió kóchjina tí sín k'uíxenhen xrä nchítjen la ntá kjuenkayáxin sín kixin qantsí itsjé chichaon chrókjuacha sín, ichro sín. Kjánchó kjaxin sín k'uayéhé sín jnkojnk denario ó. ¹¹ A ntá tí kjuachahya sín tjete ntá kjuankixín sín kóninkakonhen sín tí ìnché nonte ¹² la ntáchro sín kixin: “Tí sín ikui kjuixixín la kjuich'e sín xrä jnkokoá hora la ntá kjaxin kjuénkehé sín jnkokón éxí kjuacha tí jeheni. La ntá jeheni kjuich'eni xrä kjónté sóa la kuenté yaon kjuich'eni xrä”, ichro sín. ¹³ A ntá kjuátēhe tí ìnché nonte nixjehé ch'án ijnko tí jehe sín, ntáchro ch'án kixin: “Janhan la kjuítayahyará ninkehó. Ó kuitoexínni kixin ijnko denario tsjénkahará tí yaon. ¹⁴ Ntá tsákjá chichakoan la sájtia. Janhan tjinkavan tsjénkahá tí sín k'uíxenhen kjuixixín éxí tí kjuénkahá jaha. ¹⁵ ¿Á chontahya janhan kjuachaxin xíkaha chrókjuénkahá sín kixin tíha la chichakonna? ¿Nkekuénté tóchjinoxínhan jaha kixin xíkaha kjuénkahá sín?” ichro ch'án. ¹⁶ Mé xíkaha iso tí sín tsjixixín chréhé sín la tí sín a senóxin ntiha la ntá itsjé tí sín senó la mé tsjixixín tsochréhé sín ntiha kixin nchónhya sín k'uíyahá kjánchó tsjéhya sín k'uítja —ichro ch'ín Jesús.

*Chrónka ch'ín Jesús ínaá kixin its'en ch'án
(Mr. 10.32-34; Lc. 18.31-34)*

¹⁷ Ntá ch'ín Jesús sákuí ch'án ntia nó chjasin Jerusalén la ntá k'uaxrjentako ch'án tí teyó sín k'uajiko ch'án la ntáchro ch'án kixin:

¹⁸ —Jahará ts'ikonrá ó sátsjini chjasin Jerusalén la ntá tí Xjeen Dios K'óna Chojni mé tsotsé chojni tsjikaán sín ch'án tí siín tí sín nchat'á t'etoan la ko tí sín maestro tí tjako ley. Ntá jehe sín ts'etoan sín kixin its'en ch'án. ¹⁹ Ntá tsjikaán sín ch'án tí siín chojni jehya judío la jehe sín mé tsjanoá sín ch'án la ko tsjate sín ch'án ntá tsjak'enkani sín ch'án ijnko ntacruz kjánchó yaon níxin mé tsozechón ch'án ínaá —mé xíkaha chrónka ch'ín Jesús.

*Tí nkehe kjuanchia tí iné ch'ín Jacobo la ko ch'ín Juan
(Mr. 10.35-45)*

²⁰ A ntá tí iné tí xjeen ch'ín Zebedeo mé kjuikao tí jehe sín mé ch'ín Jacobo la ko ch'ín Juan mé kóchjinehe tjan tí ch'ín Jesús. Kjuák'exín toch'in tjan nkayakon tí ch'ín Jesús la chrónóehé tjan ch'án. ²¹ Ntá ch'ín Jesús kjuanchankíhi ch'án tjan kixin:

—¿Nkehe tjinkávan? —ichro ch'án.

Ntá kjuátēhe tjan ntáchro tjan kixin:

—Tió tsétoanxián tí kjuachaxián jíe la tsjánjuan kjuachaxin kixin tí iyó xjeenni chrók'uejó sín ijnko la itjá chjina la í jnko la itjá ikjon —ichro tjan.

²² Ntá kjuátēhe ch'ín Jesús, ntáchro ch'án kixin:

—Jahará la noahyará nkehe tjanchiará.

¿Á chrókjuachará chrók'uirá tí nkehe itsjá its'ia janhan la ko á chrókjuachará chrókuikiterá exí tsikite janhan? —ichro ch'án.

Ntá kjuátēhe sín, ntáchro sín kixin:

—Kjá tsjachani —ichro sín.

²³ Ntá ntáchro ch'ín Jesús kíxin:

—Chaxín kjónté chrókuikiterá éxí tí nkehe itsjá its'ia la ko chrókuikiterá éxí tsikite janhan, kjánchó janhan xitjahya tsjánjuan kjuachaxin kíxin ijnkorá chrókuak'erá tjaná chjina la í jnkorá chrókuak'erá tjaná ikjon kíxin janhan la tónahya tocar kíxin tsjánjuan tíha. Jehó T'aná tjen nkaya nkajní mé nohe kíxin nkexro tsíkjeyá ch'án ts'ayéhé tíha —ichro ch'ín Jesús.

²⁴ Ntá kuínhin tí ite sín kíxin xíkaha tsíkjanchia tí sín a ntá kóninkakonhen sín tí yaá a. ²⁵ A ntá ch'ín Jesús mé k'uíyéhé ch'án tí jehe sín ntá ntáchro ch'án kíxin:

—Jahará ó nohará kíxin tí sín t'etoan chjasintajni la imá t'etuenhen sín kaín chojni la tí sín t'etoan imá nchehnkehe əsén sín kíxin ihyé sín t'etoan sín. ²⁶ Kjánchó jahará la xíkaha chrókuich'erá. Náhí. Tí jnkoyínrá tjinkáonrá chrókuétoanrá la chrókuínkitsará tí í so sín. ²⁷ A ntá tijnkoyínrá tjinkáonrá chrókuétoanrá mé t'ichjánxín senó chrókuákoxínrā chrókuich'eherá kíchuárá xra. ²⁸ Mé xíkaha tí Xjeen Dios K'óna Chojni mé kuihya kíxin chojni chrókuich'ehe xra. Náhí. Ikui ch'án kíxin sich'ehe ch'án sín xra la ko ts'enýákonhen chojni kíxin tsaáxin nchónhya sín.

Ch'ín Jesús kjuínchekitóhe jína yaá chojni t'ikonyha

(Mr. 10.46-52; Lc. 18.35-43)

²⁹ Ntá k'uaxrjexín sín chjasin Jericó la nchónhya chojni chréhé tí ch'ín Jesús. ³⁰ Ntá ntaha chrínta ntja tjejótjaxín yaá sín t'ikonyha. La ntá kuínhin sín kíxin k'uatsínka ch'ín Jesús la ntá kjuankíxin t'íyéhé sín ch'án ntáchro sín kíxin:

—Inchéni, jaha tsík'axrjeníxian David, tikonóehéni —ichro sín.

³¹ Ntá nchónhya chojni mé ntáche sín tí sín t'ikonyha kíxin:

—Tánírá tí jahará —ichro sín.

Ntá tí jehe sín əntsí itsén k'uèya sín, ntáchro sín kíxin:

—Inchéni, jaha tsík'axrjeníxian David, tikonóehéni —ichro sín.

³² Ntá ch'ín Jesús kjuák'echónhen ch'án ntá k'uíyéhé ch'án tí sín t'ikonyha la kjuanchankíhi ch'án sín ntáchro ch'án kíxin:

—¿Xá nkehe tí tjinkáonrá chrókuít'ahará? —ichro ch'án.

³³ Ntá jehe sín kjuátehe sín ntáchro sín kíxin:

—Jaha Inchéni, tjinkaonni chrókuinchek'ikuanni —ichro sín.

³⁴ Ntá ch'ín Jesús mé kujkonóehé ch'án tí jehe sín la kjuínchekuákoxín tja ch'án tí ikon tí sín t'ikonyha. Ntá tuénxín k'uíkon sín la chréhé sín tí ch'ín Jesús.

21

K'uíxenhen ch'ín Jesús chjasin Jerusalén

(Mr. 11.1-11; Lc. 19.28-40; Jn. 12.12-19)

¹ Ntá kjuíji chjina sín chjasin Jerusalén, mé kjuíji sín tí chjasin ntsí Betfagé itjen chjinaxón tí jnä Olivo. Ntá ch'ín Jesús k'uëtuénen ch'án iyó tí sín k'uájiko ch'án ² ntáchro ch'án kíxin:

—Sátjirá tí chjasin ntsí itjen tóhe ntiha. Ntiha mé ts'ítjará ijnko kolócho tjechroé va la ko ijnko kolochóxjan. Ntá tjasintənkehérá va ntá tsjíkuanará va ntihi. ³ A ntá tí jnkoyín nkexro tsjanchankíhará nkekuénté tjasintənkehérá va la ntá tsontáchrórá kíxin “Inchéni t'ichjánxínhin va la ntá tió tsjixin ntá tuénxín tsjikaáni va”, ichrorá —ichro ch'ín Jesús.

⁴ Mé xíkaha kónhen kíxin tsoxiteyá tí nkehe chrónka ijnko ch'ín k'uéchrónka itén Dios ósé ntáchro xíkihi:

⁵ Ntáche tí chojni chjasin Sión kíxin:

“Tsjehérá ó kui tí ch'ín Rey kuéntará.

Ihnkehya ch'án la ijnko kolócho ó tjekjen ch'án,

mé ijnko kolóchóxjan, xjeen ijnko kolócho támá nkehe.”*

Mé xíkaha ichro tí itén Dios ósé.

⁶ Ntá tí iyó sín mé sákjuí sín la kjuínchexiteyá sín tí nkehe k'uetóan ch'ín Jesús. ⁷ Ntá kjuikao sín kolócho la ko xjeen va la kuakitsje sín ika titsáte sín ntá kjuínchekamá sín va ntá kjuák'ekjen ch'ín Jesús. ⁸ Ntá itsjé chojni kuakitsje sín ka titsáte sín na kjuentoá sín ka tinkák'ikjínxin sín ka tí ntja ts'atsíkaxín ch'ín Jesús. La iso sín xraá kajni la ko chaon nta yoa tsíkóchrínjin sín la tinkákjasin sín ntja a. ⁹ Ntá iso sín tsítaón ntja la ko í so sín chréhe iton ch'án mé kjuankíxin sín itsje sín kíxin:

—Tjancheheni kjuasáyé tí nkexro k'uaxrjeníxín tí rey David. Jína tí nkexro kjuixín kjuachaxién ihnié Inchéni. Tjancheheni kjuasáyé Dios —ichro sín itsje sín.

¹⁰ Ntá k'uíxenhen ch'ín Jesús tí chjasin Jerusalén la ntá kaín tí sín ntiha mé kóxakonhen sín la itsjé sín kjuanchankí sín kíxin:

—¿Xá nkexro tíhi? —ichro sín.

¹¹ La ntá nchónhya sín kjuátehe sín ntáchro sín kíxin:

—Tíhi mé tí nkexro Jesús chrónka itén Dios kjuixín ch'án chjasin Nazaret estado Galilea —ichro sín.

Ch'ín Jesús kjuínchetjóá tí ninko

(*Mr. 11.15-19; Lc. 19.45-48; Jn. 2.13-22*)

¹² A ntá ch'ín Jesús mé k'uíxenhen ch'án tí ninko la ntá kuakitsje ch'án kaín tí sín nchekjixin nkehe ntiha la ko tí sín t'ena nkehe ntiha. La kótéka ch'án tí mesa tjinkítóxixín sín chichaon la ko tí silla tjejókjen tí sín nchekji kontóá. ¹³ La ntá ntáchro ch'án kíxin:

—Tí xroon itén Dios tsíkjin sín ósé mé ntáchro kíxin: “Tí ntóna imé it'in nchia tsonixjananaxian sín.” A ntá jahará tí nchia i tsíkjich'énará itjueé xíchée† —mé xíkaha ichro ch'ín Jesús.

¹⁴ Ntaha nkaxenhen ninko kóchjinehe ch'ín Jesús iso tí sín t'ikonhya la ko iso tí sín xitjahya tji la ntá ch'ín Jesús mé kjuínchekitohe ch'án sín jína. ¹⁵ A ntá tí sín ncháñ'á tjetean la ko tí sín maestro tjako tí ley mé k'uíkon sín kaín tí kjuaxroan kjuich'e ch'án la ko kuínhin sín kíxin iso chánjan mé itsje sín nkaxenhen ninko ntáchro sín kíxin: “Chjéheni kjuasáyé tí nkexro k'uaxrjeníxín rey David”, ichro sín. Ntá kuínhin tí sín a xíkaha ntá kóninkaon sín ¹⁶ la nixjehé sín tí ch'ín Jesús ntáchro sín kíxin:

—¿Á kuínhin tí nkehe itsje tí chánjan? —kjuanchankí sín.

Ntá ntáchro ch'ín Jesús kíxin:

—Ó kuínhan. Kjánchó, ¿á nunca kjuinchekuáxinhayará tí xroon itén Dios? La xíkihi chro:

Jaha kjuánjuan kjuachaxin kíxin tí sín chánjan hyé la ko chánjan naxa tjejótakí mé tsotsje sín‡

—mé xíkaha ichro ch'ín Jesús.

¹⁷ Ntá jehe ch'án mé kuítóhe ch'án sín la k'uaxrjexín ch'án chjasin Jerusalén la sákjuí ch'án chjasin Betania la ntiha k'ók'éhe ch'án tí tie a.

Ch'ín Jesús kóninkakonhen ch'án ijnko nta t'óna to higo

(*Mr. 11.12-14, 20-26*)

¹⁸ A ntá tí kóyaon nchítjen ntá kjan sín chjasin Jerusalén ínaá la ikui sín ntja ntá ch'ín Jesús mé ik'uén ch'án kjinta. ¹⁹ Ntá k'uíkon ch'án itjen ijnko nta t'óna to higo chjino ntja. La ntá sákjuítsjehe ch'án tí nta, ntá k'uíkon ch'án kíxin jehó ka itsa tí nta, naxa k'ónahya to. A ntá jehe ch'án mé nixjehé ch'án tí nta, ntáchro ch'án kíxin:

—Í nunca ts'ónahya to ínaá —ichro ch'án.

* **21:5** Isaías 62.11; Zacarías 9.9 † **21:13** Isaías 56.7; Jeremías 7.11 ‡ **21:16** Salmo 8.2

Ntá tí nta t'óna to higo mé tuénxín xámá. ²⁰ Ntá tí sín k'uájiko ch'ín Jesús mé k'uíkon sín kíxin xíkaha kónhen tí nta, ntá chrakon sín la kjuanchankíhi sín tí ch'ín Jesús kíxin:

—¿Nkekuénté kíxin tí nta t'óna to higo tuénxín xámá? —ichro sín.

²¹ Ntá kjuátēhe ch'ín Jesús, ntáchro ch'án kíxin:

—Ntá chaxín ntárxjan kíxin tí tinkachónkirá Dios chaxín la ntá jehya jehó tí nta xíkaha kónhen, la kjaxin chrónixjéherá tí jná i kíxin: “Sátjíxian ntihi sájtíkjankiá ntayaon”, la mé xíkaha tsónhen. ²² Tí tinkachónkirá Dios kaín nkehe tsjancheherá ch'án la ts'ayéhérá —ichro ch'ín Jesús.

Tí kjuachaxin chóntha ch'ín Jesús

(Mr. 11.27-33; Lc. 20.1-8)

²³ Ntá kjuixin ntá ch'ín Jesús mé k'uíxenhen ch'án tí njinko ntiha. Ntá tió tjetjako ch'án ntá kóchjina iso tí sín nchat'a t'etoan la ko tí sín táda judío t'etoan la kjuanchankíhi sín ch'án ntáchro sín kíxin:

—¿Nkehe tí kjuachaxin chonta kíxin xíkaha ch'e la ko nkexro tí kjuanjon kjuachaxin? —mé xíkaha kjuanchankí sín.

²⁴ Ntá kjuátēhe ch'ín Jesús ntáchro ch'án kíxin:

—Ntá kjaxian janhan tsjánchánkíhará ijnko nkehe siná tsjateherá ntá janhan tsotjonkará nkehe tí kjuachaxin chonta tjét'a tí xra i. ²⁵ ¿A ntá nkexro k'uéetuénen ch'ín Juan kíxin tsikite ch'án chojni? ¿Á Dios ní o á chojni ó? —mé kjuanchankí ch'ín Jesús.

Ntá jehe sín itjo sín kichó sín kíxin:

—A ntá tí tsontáchroni kíxin Dios tsík'etueñhen tí ch'ín Juan ntá tsjanchankí tí ch'ín a kíxin nkekuénté kuítekakuenhyani ch'án. ²⁶ A ntá tí tsontáchroni kíxin chojni ó tsík'etueñhen ch'án la ntá chrakonhenni tí chojni kíxin kaín sín kuítekaon sín kíxin ch'ín Juan la nixja ch'án itén Dios —ichro sín.

²⁷ A ntá kjuátēhe sín ntáche sín tí ch'ín Jesús kíxin:

—Náhí, noehyani —ichro sín.

Ntá ntáchro ch'án kíxin:

—La ko kjaxin janhan tsosxrjankahya nkexro kjuanjon kjuachaxin kíxin tjét'a tí xra —ichro ch'án.

Ch'ín Jesús mé kjuíncheyóexin ch'án kíxin éxíyaá xjan

²⁸ Ntá ntáchro ch'ín Jesús kíxin:

—¿Nkehe tsixrorá? Itjen ijnko chojni chóntha yaá xjeen ch'án la ijnko yaon nixjehé ch'án ijnko xjan ntáchro ch'án kíxin: “Xjeenni ijie la sátsjia t'akjínjián to uva nonteeeni”, ichro ch'án. ²⁹ Ntá kjuátēhe tí xjan kíxin: “Náhí tjinkakonhyani”, ichro ch'án. A ntá chr'éxín ntá k'uíxitoxín tí kjuenkayáxin ch'án la sákjuíkjich'e ch'án tí xra a. ³⁰ A ntá tí it'é xjan a mé kjuíncheyóexin ch'án tí i jnko xjan la jnkokón k'uéetuénen ch'án la kjuátēhe tí xjan kíxin: “Jeén, ó sátsjini”, ichro ch'án. La ntá chaxínhyá sátsíki ch'án —ichro ch'ín Jesús.

³¹ Ntá kjuanchankí ch'ín Jesús kíxin:

—¿Nkexéhe tí yaá chánjan kjuínchexiteyá tí nkehe k'uéetuénen it'é? —ichro ch'án.

Ntá kjuátēhe sín kíxin:

—Tí xjan sao —ichro sín.

Ntá ntáchro ch'ín Jesús kíxin:

—Méxra chaxín tjonkará kíxin tí sín nchekjènki la ko tí chojni chjin ch'iyehé nchónhya chojni ntoa la saoxín ts'ixenhen sín tí kjuachaxin t'etoan Dios la ntá jahará la náhí.

³² Kíxin ch'ín Juan Bautista mé ikui ch'án kjuakohará ch'án nkexrí chrók'uejorá la ntá jahará kuítekákuénhyará tí chrónka ch'án. A ntá tí sín nchekjènki la ko tí chojni chjin ch'iyehé nchónhya chojni ntoa mé kuítekaon sín. A ntá jahará kjónté xíkaha k'uíkonrá la kjuítioxíénhyará tí tjenkayáxinrá la ko kuítekákuénhyará —ichro ch'ín Jesús.

*Ch'ín Jesúś kjuíncheyóexin ch'án kíxin éxí chojni ch'e xrə la jínahya qasén sín
(Mr. 12.1-12; Lc. 20.9-19)*

³³ Ntá ch'ín Jesúś ntáchro ch'án kíxin:

—Tsinhínrá ijnko nkehe sintayóaxian. Éxí ijnko ch'ín k'uénkaxin ch'án itsjé ntanoa t'óna to uva nontee ch'án. Ntá kjuich'éna ch'án ijnko corral. La ko ijnko tjo kjuich'éna ch'án tòye kíxin ts'énaya sín inté to uva. La ko kjuich'éna ch'án ijnko tјat'qo noi kíxin ts'it'ótjen ch'án tsotsjehe ch'án nkuíxín. §

'A nta kjuínchekjen ch'án tí nontee ch'án iso tí sín ch'e xrə ntá kjuixin ntá sákjuí ch'án imá ijkjín. ³⁴ A ntá tí kjuixraká tí yaon k'óna nkehe ntá jehe ch'án mé ichr'án ch'án iso tí chojni ch'ehe ch'án xrə kíxin tsjikjanchehe sín tí sín ch'e xrə nontee ch'án kíxin tsjanjon sín tí nkehe tsakja ch'án. ³⁵ A ntá tí sín t'ayakonhen tí nonte mé itsé sín tí sín kjuíkjanchia tí nkehe la kjuate sín iso la ko í so la k'oyán sín la í so la ixrə k'uíchexín sín. ³⁶ A ntá tí lñché nonte a xíchr'án ch'án iso chojni ch'ehe ch'án xrə ínaá, a ntá tí sín ch'e xrə la kjaxin xíkahó kjuich'ehe sín tí sín kjuíji.

³⁷ 'A ntá xíkaha tsíkónhen ntá kjuenkayáxin ch'án ichr'án ch'án tí xjeen ch'án, la kjá chróchóntehé sín kjuasáyé tí xjeen ch'án, ichro ch'án. ³⁸ A ntá tí k'uíkon tí sín ch'e xrə tí xjeen ch'án la ntá jehó sín kjuenkayáxin sín kíxin: "Tí ch'ín i mé ts'ayéhé ch'án kaín nkehe. Ts'oyánni ch'án kíxin ntá tsitoekoni kaín tí nkehe kuènte ch'án", ichro sín. ³⁹ Ntá itsé sín tí xjeen ch'án ntá kuakitsjexín sín ch'án tí nonte ntaha ntá k'oyán sín ch'án —mé xíkaha kjuako ch'ín Jesúś.

⁴⁰ Ntá kjuanchankíhi ch'ín Jesúś tí sín kóchjina, ntáchro ch'án kíxin:

—Tió itsi tí lñché tí nonte a la, ¿nkehe sich'ehe ch'án tí sín ch'e xrə? —ichro ch'ín Jesúś.

⁴¹ Ntá kjuátēhe sín kíxin:

—Mé tsjiji ch'án la tsíkonóehya ch'án tí sín jínahya la ts'oyán ch'án sín la tsjeyá ch'án ókjé chojni sinchekjen ch'án tí nonte a. Tsjeyá ch'án chojni jína tsjanjon tí to tsjixraká tí yaon ts'ínjin sín to —ichro sín.

⁴² Ntá ntáchro ch'ín Jesúś kíxin:

—¿Á nunca kjuinchekuáxinyará tí xroon itén Dios tsíkjín sín ósé? Mé ntáchro xíkihi:
Tí xro náxrjónhya kuítuenta tí sín ch'éná tјat'qo,
a ntá mé jie k'óna tí xro tjetooan.

Mé xíkaha kjuich'e lñchéni Dios,

na ntá tíha mé ijnko nkehe kjuachrakon k'uíkonni.*

Mé xíkaha ichro itén Dios.

⁴³ Ntá ntáchro ch'ín Jesúś kíxin:

—Tjónkará kíxin Dios tsakitsjahará tí kjuachaxin kuènte ch'án la ntá sinchek'ayéhé ch'án tí sín ch'e xrə jína. ⁴⁴ A ntá jnkojín nkexro tsjitsínka chrítaón tí xro i mé tsokuen ch'án la tí ts'ánótjen tí xro tsoxratja ijnko chojni la jehe sín ts'óna inche —mé xíkaha ichro ch'ín Jesúś.

⁴⁵ Ntá tí sín nchät'á tjetooan la ko tí sín fariseo mé kuínhin xíkaha kjuincheyóexin ch'ín Jesúś ntá kienxín sín kíxin kaín tí ntáchro ch'án kjuincheyóexin ch'án kíxin tí jehe sín xíkaha tsónhen sín. ⁴⁶ La ntá tjinkaon sín chrókjuinchekjasóte sín ch'án kjánchó chrakonhen sín tí chojni kíxin kaín sín ntáchro sín kíxin chaxín tí nkehe nixja ch'ín Jesúś la kuènte Dios.

22

Ch'ín Jesúś kjuíncheyóexin éxí ijnko kia kótehe sín

¹ Ntá ch'ín Jesúś mé kjuankíxin nixja ch'án ínaá la kjuincheyóexin ch'án ntáchro ch'án kíxin:

² —Tí kjuachaxin kuènte Dios mé éxí yóhé ijnko ch'ín rey kjuasin ch'án ijnko kia kíxin tsotéhe xjeen ch'án. ³ K'uëtuënen ch'án tí sín ch'ehe ch'án xrä kíxin tsjik'iyéhe sín tí sín kjueyá ch'án, kjánchó jehe sín mé tjinkakonhya sín tsochjina sín. ⁴ A ntá k'uëtuënen ch'án ínaá í so tí sín ch'ehe ch'án xrä ntáchro ch'án kíxin: “Chenka tí sín ó k'uíyahä kíxin kaín tí nkehe sineni la ó tjechónhen. Ó kuétogan its'en tí koxinta la ko í so ko tsankä la kaín nkehe la ó síchónhen. A ntá chróxrakoa sín tí siín kia”, mé xikaha k'uëtoan ch'án. ⁵ A ntá tí sín tsik'iyéhe ch'án mé ántosén sín. Ijnko sín la sákjuí nontee la í jnko la sákjuí ch'án í jnko xrä chóntha ch'án. ⁶ La í so tí sín a mé tsítsé sín tí sín tsik'etuënen tí ch'ín rey la k'óka tí sín a hasta ik'uén tí jehe sín. ⁷ Ntá tí ch'ín rey mé kóninkaon ch'án ntá k'uëtuënen ch'án tí sín soldado kíxin its'en tí sín kjuaya la ko tsoche tí chjasén sín. ⁸ Ntá nixjehe ch'án tí sín ch'ehe ch'án xrä ínaá ntáchro ch'án kíxin: “Kaín nkehe la ó síchónhen kíxin tí nkexro tsotéhe la ntá tí sín k'uíyahä kuítekakonhya sín la kjuihya sín. ⁹ Méxra sátsjirá tí esquina tí ntja jié la t'iyehérá kaín tí sín tsoxetará kíxin itsji sin ti kia”, ichro ch'án. ¹⁰ Ntá tí sín ch'e xrä mé sákjuí sín la k'uíyéhe sín kaín tí sín t'átsinka tí ntja ntiha, mé chojni jína la ko chojni jínahya hasta k'uíxikaón chojni tí nchia ntiha.

¹¹ Ntá tí ch'ín rey mé kuitsjehe kaín tí sín tsik'iyéhe ch'án la ntá k'uíkon ch'án ijkno ch'ín ntiha chóntahya ka jína kuènte tí kia a. ¹² La ntá nixjehe ch'án, ntáchro ch'án kíxin: “Amigo, ¿nkexrí k'uíxenhén kíxin tsik'ítsahya kuènte kié chojni tsotéhe?” ichro ch'án. Ntá tí ch'ín a kjuátéehya ch'án ninkehó. ¹³ A ntá tí ch'ín rey mé k'uíyéhe ch'án tí sín ch'ehe ch'án xrä la ntáchro ch'án kíxin: “Sinchenteto toté la ko itja tí ch'ín a la ité ntója sitié la nta ntiha a mé tsotsjánka ch'án la sinetaón ch'án neno ch'án.”

¹⁴ Ntá ntáchro ch'ín Jesús kíxin:

—Nchónhya sín k'uíyahä la séhya sín k'uítja —mé xikaha kjuako ch'án Jesús.

*Ch'ín Jesús ntáchro ch'án kíxin ó nchoxon tsjenkehe sín gobierno
(Mr. 12.13-17; Lc. 20.20-26)*

¹⁵ Ntá tí sín fariseo mé sákjuí sín ókjé la jnkokqá kjuenkayáxin sín kíxin tsjachaxín sín tí ch'ín Jesús kíxin ách'e ichrén jie tsjasin ch'án la ntá tsjanchia sín jie. ¹⁶ Ntá ichr'án sín iso tí sín ch'ehe sín xrä la iso tí sín ch'ehe tí ch'ín Herodes xrä kíxin tsjachaxín sín tí ch'ín Jesús. Ntá tí sín a nixjehe sín ch'án ntáchro sín kíxin:

—Maestro, ó noheni kíxin tí nkehe ntáchrúa jaha la chaxín, la ko ntoá tjàkua ntje Dios, la ko jehya nkexrí tsjehe chojni tjenkayáxián kíxin á jína sín. ¹⁷ A ntá jaha chronka nkehe tjenkayáxian. ¿Á jína chrókjuenkeheni tí gobierno romano q náhí? —ichro sín kjuanchankí sín.

¹⁸ Ntá ch'ín Jesús kónohe ch'án kíxin ntoáhya tjenkayáxin sín ntá ntáchro ch'án kíxin:

—Jahará ntoáhya tjenkayáxinrá. ¿Nkekuènte chrókjuáchaxinráni? ¹⁹ Tjákonará tí chichaon tjénkehérá sín méhé —mé xikaha k'uëtoan ch'ín Jesús.

Ntá kjuikohe sín ch'án tí chichaon a. ²⁰ Ntá k'uíkon ch'ín Jesús ntá kjuanchankí ch'án kíxin:

—¿Nkexro tí tsik'axrjexín tjenkáni tí chichaon méhé la ko nkexro ihnjé chóntha? —ichro ch'án.

²¹ Ntá kjuátéhe sín kíxin:

—Tí ch'ín t'ëtoan mé tjenkáni ch'án —ichro sín.

Ntá ntáchro ch'ín Jesús kíxin:

—Chróchjehérá tí ch'ín gobierno t'ëtoan tí nkehe kuènte ch'án la kjaxin tí nkehe kuènte Dios la chróchjehérá Dios —mé xikaha chro ch'ín Jesús.

²² Ntá tí kuñhin sín xikaha la chrakon sín la komá sín ch'án ntá sákjuí sín.

*Kjuanchankí sín kíxin á tsoxechón chojni
(Mr. 12.18-27; Lc. 20.27-40)*

²³ Ntá tí yaon a la iso sín saduceo sákjuítsjehe sín tí ch'ín Jesús. A ntá tí sín saduceo mé titekakonhya sín kíxin tsozechón chojni tsík'en la mé xíkaha chrókjuächaxín sín ch'ín Jesús. Ntáchro sín kíxin:

²⁴ —Maestro, tsíntáchro ch'ín Moisés kíxin tí its'en ijkno chojni la naxa itjen tí ichjién ch'án la tsík'ikonhya sín xjeen sín, ntá tí kichó tí nkexro tsík'en chrókuakja ch'án tí tjan k'án, a ntá tí xjeen sín mé ts'óna éxí xjeen tí ch'ín sao tsík'en. ²⁵ Ntá ntihi k'uejó yato sín jnkokoá kichó sín. Ntá tí ch'ín sao kótehe ch'án. La ntá ik'uén ch'án. A ntá k'uéchontaya sín xjeen sín la ntá tí ichjién ch'án kótehe tjan tí ch'ín tsoyo. ²⁶ A ntá tí ch'ín yóxin ik'uén kjaxin la tí ch'ín níxin kuákja ch'án tjan la ntá xíkaha kónhen ínaá. La kayatoé tí sín k'uéchonta sín tjan xíkaha kónhen sín kaín sín ik'uén sín. ²⁷ A ntá kjuixixín ntá kjaxin tjan ik'uén tjan. ²⁸ Ntá tió tsozechón kaín xín chojni tsík'en, ¿ntá nkexro ts'óna xì tí jehe tjan kíxin kayatoé sín kótehe tjan? —mé xíkaha kjuanchankíhi sín tí ch'ín Jesús.

²⁹ Ntá ch'ín Jesús kjuátuhe ch'án ntáchro ch'án kíxin:

—Jahará la ntoáhya tjenkayáxirá kíxin noahyará nkehe chro xroon itén Dios la ko chonhyará tí kjuachaxin kuénte Dios. ³⁰ A ntá tí chojni tsík'en tió tsozechón la tsotéehya sín la ko tsotéehya tí xjeen sín kíxin tí sín tsík'en la éxí tí sín ángel kuénte Dios ts'ejó sín nkaya nkajní. ³¹ A ntá tí kaín tí sín tsík'en tsozechón, já kjuinchekuáxinyará nkehe ntáchro Dios? Jehe ch'án xíkihi chro ch'án: ³² “Janhan mé tí Dios tinkáchónki ch'ín Abraham la ko ch'ín Isaac la ko ch'ín Jacob.”* Méxra tí Dios i la jehya tinkáchónki tí sín tsík'en. Náhí. Tí Dios i la tinkáchónki tí sín tjejochón —mé xíkaha ichro ch'ín Jesús.

³³ Ntá kuínhin sín nkexrí kjuako ch'án ntá chrakon sín.

Ch'ín Jesús chrónka tí nkehe imá tjetoan

(Mr. 12.28-34)

³⁴ Ntá tí sín fariseo mé tsíkójnoksé sín tió kónhe sín kíxin nkehe chro ch'ín Jesús la ninkehó kjuátéehya tí sín saduceo. ³⁵ La ijkno tí sín maestro tjako tí ley mé tjinkaon ch'án chrókjuächaxín ch'án tí ch'ín Jesús. Ntá kjuanchankí ch'án kíxin:

³⁶ —Maestro, ¿nkexéhe tí nkehe imá tjetoan kuénte tí ley? —ichro ch'án.

³⁷ Ntá ntáchro ch'ín Jesús kíxin:

—“Chrótjuèhérá Ìnchéni Dios kaín asánrá la ko kaín kjuaxrexinkaon kuéntará.”† ³⁸ Mé tíha mé tí ley imá tjetoan la ko saoxín k'uétoan Dios tíha. ³⁹ A ntá tí nkehe yóxin la tóyóhe la mé ntáchro xíkihi: “Chrótjuèhérá kíchuárá éxí tjuèxínrá asánrá.”‡ ⁴⁰ Tí iyó nkehe i la mé antsí tjetoan kuénte tí ley tsík'etqan Moisés la ko tí nkehe kjuako tí sín k'uéchrónka itén Dios.

¿Xá nkexro it'é tí Cristo?

(Mr. 12.35-37; Lc. 20.41-44)

⁴¹ A ntá tí sín fariseo la naxa jnkokoá tjejó sín ⁴² la ntá ch'ín Jesús mé kjuanchankí ch'án ntáchro ch'án kíxin:

—¿Nkehe tjenkayáxirá jahará? ¿Nkexro tí Cristo la nkexro tí tsík'axrjeníxín ch'án? —kjuanchankí ch'án.

Ntá ntáchro sín kíxin:

—Tí Cristo mé tsík'axrjeníxín ch'án ch'ín David —ichro sín.

⁴³ Ntá ntáchro ch'ín Jesús kíxin:

—¿Ntá nkexrí kíxin Nchákuén Dios chénkaxín ch'ín David kíxin David chróntáchro ch'án kíxin Ìnché ch'án tí Cristo? Ntáchro ch'ín David xíkihi:

⁴⁴ Ìnchéni Dios ntáche tí Ìnchéni kíxin:

“Tjak'e tjaná chjina ntihó tsétoan,

tsjixinjian kaín xín tí sín nínkakonhan la tsjachahya sín ts'etqan sín kíxin jahvá mé tsétoan.”§

* ^{22:32} Éxodo 3.6 † ^{22:37} Deuteronomio 6.5 ‡ ^{22:39} Levítico 19.18 § ^{22:44} Salmo 110.1

Mé xíkaha chro itén Dios. ⁴⁵ A ntá ¿xá nkexrí kíxin Cristo chrók'óna xjeen David a ntá jehe ch'ín David kuijítexín ch'án Inché ch'án tí Cristo? —ichro ch'ín Jesús.

⁴⁶ A ntá ninkexró xitjahya kjuát̄ehe sín ninkehó la desde tí yaon a chrakon sín la í ninkehó kjuanchankiéhya sín ch'án.

23

*Ch'ín Jesús tjanchia jie tí sín fariseo la ko tí sín maestro tjako tí ley
(Mr. 12.38-40; Lc. 11.37-54; 20.45-47)*

¹ Ntá kjuixin tíha ntá ch'ín Jesús mé nixjehé ch'án tí chojni la ko tí sín k'uájiko ch'án, ntáchro ch'án kíxin:

² —Tí maestro tjako tí ley la ko tí sín fariseo mé chóntha sín kjuachaxin tsocrónkaxín sín tí ley kjuako ch'ín Moisés. ³ Méxra chrókjuinchexiteyéherá kaín tí nkehe t'etoan sín la ko chrókjuich'erá kaín nkehe ntáchro sín kjánchó chrókuankíehyará tí jehe sín kíxin jehe sín la ijnko nkehe ntáchro sín la ókjé nkehe ch'e sín. ⁴ T'etueñhen sín chojni tsamá ijnko nkehe imá ye, mé ijnko nkehe chrókjuachahya chrókuamá chojni. A ntá jehe sín na nijnko dedo tja sín chrókjuinkitsa sín tí nkehe imá ye yamá chojni. ⁵ Ich'e sín kaín xín nkehe kíxin tsotsjehe chojni. Tóxrjínhin sín tsjak'enkáni totjen sín la ko itja sín ijnko xroon kjínjin iton ts'ínixín itén Dios la tjinkaon sín iké sín síxinkáni nkehe tjákini. ⁶ Tjinkaon sín tsochóntha sín sillá jína ts'ejókjen sín sine sín tió sátsji sín tí siín kia la ko xritjeyá sín tí sillá antsí náxrjón chrók'uejóya sín nkaxenhen ninko. ⁷ La ko tjinkaon sín kíxin chojni chrókjuicosáyehe sín tsoxeta sín tí ntja la ko tjinkaon sín kíxin tsontáchro chojni kíxin maestro tí jehe sín.

⁸ A ntá jahará la titoéhyará kíxin tsontáchro sín kíxin maestro tí jahará kíxin jehe sín la ko jahará la ó jnkokónrá, la jahará chontará jnkokoá Maestro la mé Cristo tíha. ⁹ La ntá chróntáchrohyará kíxin ninkexró mé it'ará ntihi chjasintajni kíxin jahará la chontará jnkokoá It'ará mé itjen nkaya nkajní. ¹⁰ La ko jehe sín chróntáchrohyá sín kíxin jefe tí jahará kíxin jehó Cristo mé jefe. ¹¹ Tí nkexro antsí tsjinkitsa iso chojni la jehe ch'án mé antsí t'etoan ch'án. ¹² Kíxin tí nkexro ntáchro kíxin imá ijié la mé imá tsontsí. A ntá tí nkexro nchehnkehya la antsí tsojié.

¹³ Nòará tí jahará maestro tjákorá tí ley la ko tí jahará chojni fariseo. Jahará la jnkójinxónhya tjenkayáxinrás. Jahará la t'ikjéherá tí puerta ts'ixenxín chojni tí kjuachaxin kuénte Dios kíxin titoéhyará ts'ixenhen ókjé chojni. A ntá ni jahará la xitjahya t'ixenhyará la ko tjánjonhyará kjuachaxin ts'ixenhen tí sín tjinkaon chrók'uixenhen.

¹⁴ Nòará tí jahará maestro tjákorá tí ley la ko chojni fariseo. Jnkójinxónhya tjenkayáxinrás. Jahará takitsjeherá ntøe tí chojni tsíkók'án la ntá isé nixjehérá Dios kíxin ch'iyexínrás chojni kíxin jína tí jahará. A ntá xíkaha kjuich'erá jahará la antsí tsjasótiará.

¹⁵ Nòará tí jahará maestro tjákorá tí ley la ko chojni fariseo. Jahará la jnkójinxónhya tjenkayáxinrás. Jahará sájtirá nonte la chrítaón ntayaon kíxin tsjákokhéral ijnko chojni tsinkáchónki xíkaha tí tinkachónkirá la ntá tió kjuachará kjuachroerá sín la ntá jehe sín antsí má tsjasótexín sín tí xrohi la kánhyó jahará.

¹⁶ Nòará tí jahará kíxin tétoanrá kjánchó ntakótánrá. Ntáchrórá kíxin tí jnkójín chojni tsontáchro kíxin sinchexiteyá sín nkehe la t'ákjenxín sín tí ninko la ntá t'ichjánxínhyá sinchexiteyá sín. A ntá tí tsontáchro sín kíxin sinchexiteyá sín nkehe la t'ákjenxín sín tí chica oro siín nkaxenhen ninko la ntá t'ichjánxín sinchexiteyá sín. ¹⁷ Imá lontirá la ko ntakótánrá. ¿Á imá tjetoan tí chica oro o á imá tjetoan tí ninko kíxin tí ninko mé kótuáxin tí chica oro? ¹⁸ Kjáxin ntáchrórá kíxin: "Tí jnkójín chojni tsontáchro sín kíxin sinchexiteyá sín nkehe la t'ákjenxín sín tí altar la ntá t'ichjánxínhyá sinchexiteyá sín. A ntá tí tsontáchro sín kíxin sinchexiteyá sín nkehe la t'ákjenxín sín tí nkehe tjokehé sín Dios chrítaón tí altar la ntá t'ichjánxín sinchexiteyá sín tí nkehe tsintáchro sín." ¹⁹ Imá lontirá la ko ntakótánrá. ¿Á imá tjetoan tí nkehe tsochjehérá Dios o á imá tjetoan tí altar kíxin tí altar mé tótjuáxin tí

nkehe tsjánjonrá? ²⁰ Kíxin tí nkexro tsontáchro kíxin sinchexiteyá nkehe la t'ákjenxín ch'án tí altar la jehya t'ákjenxín ch'án tí altar ó. Náhí. Kjáxin t'ákjenxín ch'án kaín tí nkehe siín chrítaón ntiha. ²¹ A ntá tí nkexro tsontáchro kíxin sinchexiteyá ch'án nkehe la t'ákjenxín tí ninko la jehya t'ákjenxín ch'án ninko ó. Náhí. Kjáxin t'ákjenxín ch'án tí Dios itjen ntiha. ²² A ntá tí nkexro t'ákjenxín nkaya nkajní la ntá kjáxin t'ákjenxín sín tí trono kuènte Dios la ko tí nkexro tjet'etqan ntiha.

²³ 'Nòará jahará maestro tjákorá ley la ko jahará chojni fariseo. Jahará jnkójinxónhya tjenkayáxinrá. Jahará la chjehérá Dios ijnko ite parte kaín tí kaxroqan tsjiko tí nkehe ineni, mé tí menta la ko anís la ko comino. Kjánchó tahuará kuentá tí nkehe imá tjetoan kuènte tí ley. Mé ntoá chrókuenkayáxinrá la ko chrókuinkonóehérá kíchuárá la ko chrókuinkachónkirá Dios. Tíhi la antsí tjetoan chrókuinchexiteyará la kjáxin chrókuítqéhyará chrokjuich'erá tí í so nkehe. ²⁴ Jahará la tétoanrás kjánchó ntakótánrá. Jahará la ncheck'ankihirá kjónté ijnko kochjisen intsí chóntha tí nkehe its'irá, a ntá ijnko kocamello kjónté ijié va la t'ínkárá.

²⁵ 'Nòará tí jahará maestro tjákorá ley la ko jahará fariseorá. Jahará la jnkójinxónhya tjenkayáxinrá. Jahará la imá nchetjóará chrítaón tí vaso la ko tí plato, a ntá tí nkaxenhen tsíkaón kjuachée la ko jahórá tjinkáonrá chróchontará itsjé nkehe. ²⁶ Jahará chojni fariseorá imá ntakótán jahará. Sáoxín chrókuinchetjóará tí nkehe nkaxenhen tí vaso la ko tí plato la ntá ó chrókótjóá tí chrítaón kjáxin.

²⁷ 'Nòará jahará maestro tjákorá tí ley la ko chojni fariseorá. Jnkójinxónhya tjenkayáxinrá. Jahará la éxi yóhé ijnko tóye tsíx ravá chojni, imá náxrjón tsjehe ntója, a ntá nkaxenhen mé tsíkaón huésoé chojni tsík'en la ko kaín nkehe tjuáhyá. ²⁸ Mé xíkaha tí jahará la tsjehe éxi chojni jína xíkaha, a ntá jnkójinxónhya tjenkayáxinrá la ko jínahyará.

²⁹ 'Nòará tí jahará maestro tjákorá ley la ko chojni fariseorá. Jahará la jnkójinxónhya tjenkayáxinrá. Jahará la kjuich'énará tjet'ó náxrjón chrítaón tí tóye tsíx ravá tí sín k'uékjako itén Dios ósé la ko ncheck'ítsará tjet'ó chrítaón tóye kuènte tí sín jína asén. ³⁰ La ntá ntáchrará kíxin tí chrók'uejorá tí k'uéjó tí sín tsík'axrjeníxinrá la ntá chrókuinkitsahyará chrók'uén tí sín kjuako itén Dios. ³¹ Méxra xíkaha jahórá ntáchrará kíxin chaxín tsík'axrjeníxinrá tí sín k'óyán tí sín k'uékjako itén Dios. ³² Méxra ijie la tjinkáonrá tsjixinhanrá tí xra kjuich'e tí sín tsík'axrjeníxinrá.

³³ 'Jahará la tsík'axrjeníxinrá konche. ¿Ntá nkexrí chrókuaará kíxin itsi tí tsjasótiará? ³⁴ Méxra janhan mé tsétuanhán chojni chrónka itén Dios la ko chojni imá nohe la ko chojni tjako, itsi sín. A ntá jahará la ts'oyánrá sín ts'ejoyánirá sín ntacruz la í so sín la tsjatexínrá sín nkaxenhen ninko la ko tsochonkíhirá sín chjasin la chjasin. ³⁵ Méxra jahará la yamará tí jie kíxin tí sín jína k'uítjixín ijnié senó. Méxra tsamárá tí jie kíxin ik'uén ch'ín Abel, tí nkexro jína, la ko kaín tí í so sín hasta ik'uén ch'ín Zacarías, xjeen Berequías, tí nkexro k'oyánxinrá chjino tí altar. ³⁶ Chaxín tjonkárá kíxin kaín tí jie a mé yámá tí chojni siín ijie.

Tsjánka ch'ín Jesús (Lc. 13.34-35)

³⁷ Ntá ntáchraro ch'ín Jesús kíxin:

—Jerusalén, Jerusalén, jahará t'oyánrá tí sín tjako itén Dios la chjehérá xro tí sín ichr'án ch'án ikui chrókuinkitsará. Nchónhya veces tjinkávan chrókójnkotsérá la chrók'uáyakonhánrá éxi ijnko cochiká mé t'ayakonhen xjeen va chrínkí kañenée va mé xíkaha tjinkávan chrók'uáyakonhánrá tí jahará. Kjánchó jahará la tjinkáonhyará xíkaha. ³⁸ Ntá jie la Dios la tsítqhe tí jahará. ³⁹ Ntáxrijan kíxin í ts'ikonyará tí janhan ínaá tsjixrakájia tí yaon tsontáchrará kíxin: “Imá jína tí nkexro kuixin kjuachaxié iñnié Ìnchéni” —mé xíkaha ichro ch'ín Jesús.

24

*Chrónka ch'ín Jesús kíxin ts'itjáyan tí ninko
(Mr. 13.1-2; Lc. 21.5-6)*

¹ Ntá ch'ín Jesús k'uaxrjexín ch'án tí ninko la ntá ó sáchrókuí ch'án la ntá tí sín k'uájiko ch'án mé kóchjina sín kíxin tsochónhen ch'án kíxin kjaxin ch'án chrótsehe ch'án kíxin náxrjón tsík'óna tí ninko a. ² A ntá ch'ín Jesús mé kjuát̄ehe ch'án kíxin:

—Jahará ¿á tjejotsjehérá kaín tíha? Chaxín tjonkará kíxin tsjixraká tí yaon ts'oya kuenté ninko. Nijnko xrø ts'ejókjenhya kichó kíxin kaín tíha la tsqxíka —ichro ch'án.

*Tí nkehe tsonhen tió tsjixixín
(Mr. 13.3-23; Lc. 21.7-24; 17.22-24)*

³ Ntá sákjuí sín chrítaón tí jnq Olivo la ch'ín Jesús kjuák'etjaxin ch'án la ntá tí sín k'uájiko ch'án mé kjuanchankíhi sín ch'án kíxin:

—Tjinkaonni tsochronka nkesá tsonhen tíha. ¿Nkexrí tsonoexínni tió ts'inka tí jaha la ko nkexrí tsonoexínni tí itsi tí tsjixixín chjasintajni? —ichro sín.

⁴ Kjuát̄ehe ch'ín Jesús kíxin:

—Tóxakonhanrá titoéhyará kíxin ninkexró chrókjuit'ayahará. ⁵ Nchónhya chojni itsi sich'iyaxín njna tsontáchro kíxin: “Janhan mé tí ‘Cristo’” tsixro sín, la sich'iyehé sín nchónhya chojni. ⁶ A ntá tió tsinhínrá tsontáchro chojni kíxin ó siín kjuaníkaon la ko ts'ixin kjuachrakon kíxin tsjanjonko kichó sín la kjónté xíkahya tsonhen la chrakonhyará. Ó jehí tsonhen tíha tí naxa ts'itjáyanhya chjasintajni. ⁷ Ijnko nación tsjanjonko í jnko nación la tsjanjonxiín sín tí xrø ts'etoan sín. La ko itsjé chjasin na tsokjinta la ko tsoníhi chojni la ko ntihi la ntaha tsinkí nonte. ⁸ Kaín tíha la ntá tsoxrankíxión tí kjuatjoté tsonhen chojni.

⁹ A ntá tsotsérá chojni la tsjikaánrá sín tí tjejó tí síxréé kíxin sinchekjasótiará sín la ntá ts'oyánrá sín. La ko kaín xín chojni siín chjasintajni tsonínkakonhanrá sín kíxin tinkachónkirá tí janhan. ¹⁰ Ntá tí yaon a la itsjé sín la tsítuhe sín tsinkáchónkiya sín tí janhan la ko tsonínkakonhen sín kichó sín la ko sinchekji kichó sín. ¹¹ Ntá itsi nchónhya chojni ntoáhya tsjako la ntá sich'iyehé sín nchónhya chojni. ¹² La ts'ixin nchónhya jie jinahya la ntá ts'ixin itsjé chojni tsotjuèhya sín kichó sín. ¹³ A ntá tí nkexro naxa tjejótinkáchónki tí janhan hasta tí tsjixixín la mé tsaá. ¹⁴ La ko tí itán jína chrónka nkexrí tjen tí kjuachaxin kuénte Dios la t'ichjánxiín tsinhin sín kuenté chjasintajni, la tió tsjixin tsinhin sín kuenté chjasintajni la ntá ó ts'itjáyan chjasintajni.

¹⁵ Ch'ín Daniel k'uéchrónka itén Dios mé tsíkjin ch'án kíxin tsjixraká ijnko yaon tsjak'e ijnko nkehe jinahya nkaxenhen ninko tjóá.* Ntá jahará ts'ikonrá tíha. A ntá tí nkexro nchekuáxin mé tsienxín nkehe tíha. ¹⁶ Ntá kaín tí sín tjejó estado Judea tsochriin sín jnq sátsji sín. ¹⁷ A ntá tí sín tjejó chrítaón nchia ntoé sín la í xitjahya tsakitsje sín ninkehó. ¹⁸ Ntá tí tjejoch'e sín xrø nontee sín la kjá í tsokjanhya sín tsjikakja sín iké sín. ¹⁹ Ntá nòa tí chojni chjin tjejóyá sín la ko nòa tí sín nchekakí xjan tí yaon a. ²⁰ Chrókjuanchehérá Dios kíxin tí tsonhen tíha la chrókjehya nchakuen kin la ko chrókjehya tí yaon t'ok'éhe chojni. ²¹ Kíxin tíha mé ijnko kjuachrakon imá ijié la desde tí xrankíxión chjasintajni la nunca xíkahya kónhen. ²² Ntá tí chrók'uetoanhya Dios kíxin tjoka ts'atsínska tíha ntá chrókuaáhya ninkexró. Ntá ts'etoan ch'án kíxin tjoka ts'atsínska tí kjuachrakon jié kíxin jehe ch'án mé imá tjuèhe ch'án tí sín tsíkjeyá ch'án.

²³ Ntá tí tsontáchro chojni kíxin: “Tsjehé ntihi itjen Cristo”, o “Tsjehé ntiha itjen ch'án”, la ntá chrókuétekákuénhýará sín. ²⁴ Kíxin ntá itsi iso sín tsontáchro sín kíxin Cristo tí jehe sín la ko kjaxin itsi í so sín ntoáhya tsjako la ko tsjasin sín kjuaxroan jié kíxin tjinkaon sín chrókjuih'iyehé sín chojni kjónté tí sín tsíkjeyá Dios. ²⁵ Ó xrjanca senó nkehe tsonhen kíxin tsonohará. ²⁶ Méxrø tí chróntáchro sín kíxin: “Tsjehérá tí nteje ntiha tjen ch'án”, la

* 24:15 Daniel 9.27

ntá tsjihyará nó ntiha. Q tí chróntáchro sín kíxín: “Tsjehérá ntihi tí cuarto mé tjen ch'án”, la chrókuítékákonhyará. ²⁷ Méxra éxí tsjónkíxín la t'íkon chojni t'inkaséyanxín tí tjitoxin yaon hasta tsjiatóxin yaon mé xíkaha ts'íkon chojni tió itsi tí Xjeen Dios K'óna Chojni. ²⁸ Mé éxí yóhe tí tjen ijnko cuerpo tsík'en la ntiha tsojnkotsé tí kontexjuen.

*Tsokjan tí Xjeen Dios K'óna Chojni
(Mr. 13:24-37; Lc. 21:25-33; 17:26-30, 34-36)*

²⁹ A ntá séhyó tí tsjixixín tí kjuachrakon jié la ntá tí yaon la tsotie a ntá tí nitjó la í ts'inkaséyanxínhy. La ko tí konotsé la tsoxènjinxín nkajní la kjaxin kaín nkehe siín nkaya nkajní la tsinkí. ³⁰ La ntá ts'íkon chojni kíxín nkajní tsixín tí Xjeen Dios K'óna Chojni. La ntá kaín chojni chjasintajni tsochrakon sín la tsotsjánka sín la ts'íkon sín kíxín itsi tí Xjeen Dios K'óna Chojni, mé chríkjan tjuí mé tsjak'enkakjan ch'án tsíkao tí kjuachaxin jié. ³¹ Ntá tsochr'án Dios tí sín ángel kíxín ts'ánoa sín tí trompeta itsen kíxín tsochjina kaín tí nkexro k jueyá Dios tsjixin kanoé lado chjasintajni.

³² 'Chrók'uitjará nkexrí sintayóxian kuente ijnko nta to higo. Éxí yóhe tió chónta ntahnté la ko ts'ixin kayoa la nta tsqnoaxínrá kíxín í séhya tsokjan ichrin. ³³ Mé xíkaha tí ts'íkonrá ts'atsínska kaín tíha la ntá xíkaha tsqnoaxínrá kíxín í séhya itsi Ínchéni. ³⁴ Ntá tsonkará chaxín kíxín kaín tíha senó tsónhen tí naxq ts'enhya tí chojni siín jie. ³⁵ A ntá tí nkajní la ko tí chjasintajni mé ts'itjáyan. A ntá tí nkehe ntáxrjan la nunca ts'itjáyanhy tsoxiteyá tíha.

³⁶ Á ntá tí yaon la ko tí hora tsoxiteyá tíha la kohya ninkexró nohe. Ni tí sín ángel tjejó nkaya nkajní noehya sín la ko ni tí Xjeen Dios noehya. Ó jehó tí It'é mé nohe.

³⁷ 'Éxí yóhe tí nkehe kónhen tí yaon k'uékjak'e ch'ín Noé mé xíkaha tsónhen tí tsokjan tí Xjeen Dios K'óna Chojni. ³⁸ Tí naxq titjiéhya sín ntá la kaín chojni la jína k'uéjó sín la kjóne sín la ko ik'uí sín la ko sítotehe sín kjuixrakája tí yaon k'uíxenhen ch'ín Noé ntabárco. ³⁹ A ntá jehe sín mé kienxínhy sín hasta kuijia tí k'uániá chrin ntá ikui ntá la k'uátjoá kaín sín. Mé xíkaha tsónhen tió itsi tí Xjeen Dios K'óna Chojni. ⁴⁰ A ntá yaá chojni ntoa tjejóch'e sín xrá nonte la ntá ijnko la sátsji la í jnko la tsitohe. ⁴¹ La ko yaá chojni chjin mé tjejót'o sín la ijnko la sátsji la í jnko la tsitohe.

⁴² 'Chrók'uejotsjehérá kíxín noahyará nkehora la ko nkesá ts'inka janhan. ⁴³ Chrókónohará tíhi: tí chrókonohe ijnko ìnché nchia nkehora tie chrókjui ijnko nkexro tseé la ntá chrókjuak'echónhen tí ìnché tí nchia ntá xitjahya ts'ixenhen tí nkexro tjinkaon chrókueé. ⁴⁴ Méxra jahará la jína chrók'uejorá kíxín tí Xjeen Dios K'óna Chojni me titáya itsi.

*Tí nkexro jína ch'e xrá la tí nkexro ch'ehya xrá jína
(Lc. 12:41-48)*

⁴⁵ 'Tí nkexro chaxín ch'e xrá jína la ko imá nohe la ntá tí lámoé ch'án ts'etuenhen kíxín ts'ayakonhen ch'án tí sín siín ntóe ch'án la ko tsjanjon ch'án nkehe sine sín chintji tí hora a. ⁴⁶ Náxrjón tjen tí nkexro ch'e xrá tió itsi tí lamo la ts'íkon kíxín xíkaha tjenchexiteyá ch'án tí xrá k'uítuenhen ch'án. ⁴⁷ Chaxín tí lamo la tsjanjon ch'án kaín tí xrá chónta ch'án ts'etqan tí ch'ín a. ⁴⁸ A ntá ijnko chojni ch'ehya xrá jína la ntá tsjenkayáxin ch'án kíxín kjá tjokahya tsokjan tí lámoé ch'án ⁴⁹ la ntá tsjankíxín ch'án tsjanjonko ch'án tí í so sín ch'e xrá la ko tsjankíxín sineko ch'án la ko its'ikao ch'án kaín tí sín sítokoan. ⁵⁰ Ntá xrínahya tsokjan ti lamo ijnko yaon la ko ijnko hora noehya tí nkexro ch'e xrá. ⁵¹ La ntá jehe ch'án la sinchekjasóte tí ch'ín kuítóhehe xrá kjuínchexiteyáhya la ts'etqan ch'án kíxín tsjasóte tí ch'ín a éxí tí sín jnkojínxónhy tjenkayáxin. Ntá ntiha la tsotsjánka ch'án la ko sinetaón neno ch'án.

[†] 24:38 Génesis 6:5-8

25

Ch'ín Jesúś kjuíncheyóexin ch'án kíxin ite sín tjarisoá

¹ Ntáchro ch'ín Jesús kíxin:

—Tí kjuachaxin kuénte Dios mé éxí yóhe ite sín tjarisoá sátsji tí tsotéhe chojni chuénko linterna tjiá aceite la sákjuichónhen sín tí ch'ín tsíkótehe. ² In'ó sín la tsíkóyaxiénya sín la in'ó sín ó tsíkóyaxínhin sín. ³ Tí sín tsíkóyaxiénya na kjaxin la tsíkjijiko sin linterna kjánchó tsíkjijikohya sín aceite tsíkia ínaá. ⁴ A ntá tí sín tsíkóyaxínhin la sátsíkjiko sín xro tjiá aceite la ko tí linterna kuénte sín. ⁵ A ntá tí ch'ín tsíkótehe la tjokahya kui ch'án la ntá jehe sín mé tsíkihi sín kotáchrín la tsík'ejójua sín kaín sín. ⁶ A ntá kuichjina k'áxrótjen la kuínhin sín t'èya ijkno chojni kíxin: “Ó kui tí ch'ín tsíkótehe na t'axrjerá ntója tsoxetará ch'án”, ichro ch'án. ⁷ A ntá kaín tí sín tjarisoá la k'uàya sín la kjuasiyóxin sín tí linterna kuénte sín. ⁸ A ntá ti in'ó sín tsíkóyaxiénya la nixjehé sín tí sín in'ó tsíkóyaxínhin ntáchro sín kíxin: “Chjéhéní intsí aceite kuéntará kíxin ó k'uànkä aceite tjiá linternéni”, ichro sín. ⁹ A ntá tí sín tsíkóyaxínhin mé ntáchro sín kíxin: “Náhí, tí aceite tí xíkaha tsjanjonní intsí jahará la antsí jeheni la tsjachahya. Íchá jína sátkj'ènará tí sítoxín ntiha”, ichro sín. ¹⁰ Ntá tí in'ó tí sín kóyaxiénya mé sákjuík'ëna sín aceite la ntá ó kui tí ch'ín tsíkótehe. Tí in'ó sín tjejóchónhen mé sákjuiko sín ch'án kia tsíkótehe sín la ntá ó tuénxín k'uikjéhé tí puerta. ¹¹ Ntá chr'éxín ikui tí in'ó sín tjarisoá tsíkóyaxiénya la t'ínga sín puerta ntáchro sín kíxin: “Ó kuini takitjehé nchia.” ¹² A nta jehe ch'an kjuátehe ch'án ntáchro ch'án kíxin: “Chaxín tí jahará la ní chonhyará”, ichro ch'an.

¹³ Ntá ntáchro ch'ín Jesús ínaá kíxin:

—Méxra xíkaha tí jahará chrók'uejótsjehérá kíxin noahyará nkeyaon la nkehora itsi ti Xjeen Dios K'óna Chojni —ichro ch'án.

Ch'ín Jesúś kjuíncheyóexin ch'án kuénte chichaon

¹⁴ Ntá ntáchro ch'ín Jesús kíxin:

—Tí kjuachaxin kuénte Dios la yóhe ijkno chojni tjinkaon sáchrókjui ch'án í jnko nación la ntá k'uíyéhe ch'án tí sín ch'ehe ch'án xra la ntá chjéhe ch'án sín tí chichaon a kíxin ts'ayakonhen sín.

¹⁵ 'Jnko ch'án la k'uáyéhe ch'án in'ó mil chichaon, la í jnko la k'uáyéhe ch'án iyó mil chichaon, la í jnko la k'uáyéhe ijkno mil chichaon. Tí nkexro kjuanjon chichaon la mé kónohe ch'án nkexro ti tsjacha sich'e jnkojnkoxra. Ntá jehe ch'án tió kjuixin kjuanjon ch'án la ntá sakjuí ch'án ikjín. ¹⁶ Ntá tí nkexro k'uáyéhe in'ó mil chichaon la kjuich'eko ch'án xra tí chichaon kuákja ch'án la kjuacha ch'án í jnko in'ó mil. ¹⁷ Kjaxin tí nkexro k'uáyéhe iyó mil chichaon mé xíkjacha ch'án í jnko iyó mil. ¹⁸ A ntá tí nkexro k'uáyéhe ijkno mil chichaon mé sákjuí ch'án la kjuich'ëna ch'án ijkno tòye kjuavá ch'án tí chichaon kuénte lámoé ch'án.

¹⁹ A ntá nchónhya nánó k'uátsína la ntá ikjan tí lámoé sín kíxin ntá tsjentoáko sín ch'án cuenta. ²⁰ Saoxín kui tí nkexro k'uáyéhe tí in'ó mil la chjéhe ch'án tí lamo í jnko in'ó mil la ntáchro ch'án kixin: “Jaha me chjéhéní in'ó mil la ó kjuachani í jnko in'ó. Tákjá tjinhin tí chichaon i”, ichro ch'án. ²¹ Ntá tí lamo mé ntáchro kíxin: “Nchoxon tí xíkaha. Jaha la ijkno chojni jína ch'e xra. La ó kjuinchenxiteyá jína. Kjónté jehya xra jié la kjuinchenxiteyá jína la ntá tsotjaha ijkno xra antsí jié la tjak'e tsochéheni.” ²² Ntá chr'éxín ikui tí nkexro k'uáyéhe iyó mil la ntáchro ch'án kíxin: “Jaha mé chjéhéní iyó mil la kjuachani í jnko iyó. Tákjá tjinhin tí chichaon i”, ichro ch'án. ²³ La ntá tí lamo ntáchro kíxin: “Nchoxon jaha mé ijkno nkexro jína ch'e xra la ó kjuinchenxiteyá. Kjónté jehya xra jié la kjuinchenxiteyá jína la ntá tsotjaha í jnko xra antsí jié. Tjak'e tsochéheni”, ichro ch'án. ²⁴ A ntá ikui tí ch'ín k'uáyéhe ijkno mil la ntáchro ch'án kíxin: “Ó nóna kíxin ijkno chojni imá jiéhe tí jaha la itjaa tí nonte jehya jaha k'uénkaxian la tsákjá nkehe kjónté k'uénkahya. ²⁵ Méxra chrakonni la sákjuíkjak'emáni tí chichaon chrínkí nche. Tákjá chichakoan tjinhin”, ichro

ch'án. ²⁶ A ntá kjuátehe tí lamo kíxin: “Jaha ijkno chojni jínahya la ko séhe. Jaha la ó noha kíxin chrótjaá tí nonte k'uénkahya la chrókuákjaá tí nkehe k'uénkahya. ²⁷ A ntá tí chichaon chróchr'an banco. Ntiha chrókjuich'exín xrä ntá tí ikjan janhan ntá chrók'uayáh₄ qantsí itsjé chichaon chrókjuacha kíchó chica”, ichro tí lamo. ²⁸ A ntá nixjehé ch'án tí í so sín tjejó la ntáchro ch'án kíxin: “Takitsjehérá tí mil chóntha ch'án la chjehérá tí nkexro chóntha tí ite mil chichaon ²⁹ kíxin tí nkexro kjónté itsjé chóntha la mé ts'áyéh₄ qantsí la ntá tí nkexro chóntahya la kjónté tí intsí chóntha la ts'axrjehe. ³⁰ A ntá tí nkexro ch'ehya xra la tsétueñhén sátsji ch'án tí sítie ntója la ntá ntiha la tsotsjánka ch'án la ko sinetaón ch'án neno ch'án.”

Tsitoexín ijíé chojni chjasintajni

³¹ A ntá tí tsí tí Xjeen Dios K'óna Chojni la tsikao ch'án kjuachaxién jié éxí ijkno Réy la ko tsikao ch'án kaín xín tí sín ángel ntá ntaha tsjak'etjaxin ch'án tí trono ts'etoanxín tí kjuachaxién jié. ³² Ntiha kaín xín tí chojni tsíkjixin nkuíxín nación tsochjina tí tjen ch'án la jehe ch'án tsakitsjekjan ch'án ijkno la í jkno. Éxí ijkno nkexro t'ayakonhen kolélo mé tsakitsjekjan ch'án tí kolélo la ókjé ts'ixin va la ko tí koténtsø la ókjé ts'ixin. ³³ Méxra ts'etoan ch'án kíxin tí kolélo la ts'ixin nó tja ch'án chjina, a ntá tí koténtsø la nó ti tja ch'án kjon. ³⁴ Ntá tí Rey tsonixjehé tí sín tjejó tja ch'án chjina tsontáchro kíxin: “Xrákirá jahará ti tjen kjuachaxin kuénte T'aná kíxin T'aná ó kjuíncheyaonrá ch'án. Tí naxq kjuich'énahya Dios chjasintajni la xráxín kjuenkayáxin ch'án xíkaha tsónhen. ³⁵ Janhan mé k'uén kjinta la jahará kjuánjonrá nkehe kjoné. La ik'uén ntá la jahará kjuánjonrá nkehe ik'ua, la k'uájia éxí ijkno chojni kjuixin ikjín la jahará kjuánjonrá nketí k'ok'ána. ³⁶ La ko k'uéchontahya kaná la jahará kjuánjonrá ika k'uítsa, la ko kónina la jahará kjuasántsjehérá ti janhan, la kjuak'echjina la ntá jahará kjuasántsjehérá tí janhan.” ³⁷ A ntá tí sín jína la tsjanchankí sín kíxin: “Inchéni, ¿nkesá k'uíkonni kíxin ik'uén kjinta ntá kjuanjonní nkehe kjónte? ¿La nkesá k'uíkonni kíxin ik'uén ntá la kjuanjonní nkehe ik'ua? ³⁸ ¿La ko nkesá k'uíkonni kíxin ikjín kjuíxian ntá kjuanjonní nketí k'ok'áha? ¿La ko nkesá k'uíkonni kíxin chontahya iká la kjuanjonní ika k'uítsa? ³⁹ ¿La nkesá k'uíkonni kíxin kóníha o kjuák'echjina la ntá kjuíjitsjeheni tí jaha?” mé xíkaha tsjanchankíhi sín ch'án. ⁴⁰ A ntá tí Rey tsontáchro kíxin: “Tió kjuínkitsará ijkno kíchó ni kjónté ijkno chojni nòé la mé yóhe kíxin tí janhan chrókjuínkitsará.”

⁴¹ A ntá tí Rey t'etoan mé tsonixjehé tí sín tjejó nó tja ch'án kjon tsontáchro kíxin: “Sátjirá jahará kíxin jahará tsjasótiará. Sátjirá tsjasótiará tí tjen tí xrohi ts'ankahya. Mé tí xrohi tjechónhen kíxin tsoche tí ch'ín Tsochren la ko kaín tí sín ángel kuénte ch'án. ⁴² Tí ik'uén kjinta la jahará kjuánjonhyará nkehe kjoné la ko ik'uén ntá la jahará kjuánjonhyará nkehe ik'ua. ⁴³ K'uájia éxí ijkno nkexro kjuixin kjín la jahará kjuánjonhyará nketí k'ok'ána la ko k'uéchontahya kaná la jahará kjuánjonhyará ka chrók'uítsa la ko k'uénina la kjuak'echjina la jahará kjuasántsjehyará tí janhan.” ⁴⁴ Ntá tí jehe sín la tsjanchankí sín kíxin: “Inchéni, ¿nkesá k'uíkonni kíxin ik'uén kjinta la ik'uén ntá la ko kjuíxian kjín la ko chontahya iká la ko níha la ko kjuák'echjina? ¿Mé nkesá k'uíkonni xíkaha la ntá kjuínkitsahyani ti jaha?” tsixro sín. ⁴⁵ La ntá tí Rey tsjatehe ch'án tsontáchro ch'án kíxin: “Tí xíkaha kaín tíha kjuínkitsahyará ijkno chojni imá nòé la éxí xíkaha kjuínkitsahyará tí janhan.” ⁴⁶ A ntá tí sín jínahya xíkaha kjuich'e la mé sátsjixin sín ntihi tsjasóte sín jnkochríxín. A ntá tí sín jína la sátsjí sín ts'áyéh₄ sín kjuachón jnkochríxín —mé xíkaha chrónka ch'ín Jesús.

¹ Ntá kjuixin chrónka ch'ín Jesús kaín tíha, ntá nixjehé ch'án tí sín k'uájiko ch'án, ntáchro ch'án kíxin:

² —Jahará ó nohará kíxin t'itjáyan iyó yaon ntá tsjasin sín tí kia pascua la ntá tí Xjeen Dios K'óna Chojni mé tsotsé sín ch'án tsjikaán sín ch'án tí tjejó tí sín t'etoan ntá tsjak'enkani sín ch'án ijnko ntacruz —ichro ch'ín Jesús.

³ Ntá tí sín ncháñt'á t'etoan la ko tí sín maestro tjako tí ley la ko tí sín táda kuénte tí sín judío mé kójinkotsé sín tí ntasin kuénte tí nchia kjuák'e ch'ín Caifás tí ch'ín ncháñt'á t'etoan.

⁴ Ntaha tjenkayáxin sín kíxin nkexrí tsotsé sín ch'ín Jesús la ts'oyán sín ch'án. ⁵ A ntá ntáchro sín kíxin:

—Tí siín kia la chrótséhyani ch'án kíxin imá tsóninkaon tí chojni —ichro sín.

Ijnko tjan kjuikao aceite xraxé kuikite tjan ikja ch'ín Jesús

(Mr. 14.3-9; Jn. 12.1-8)

⁶ Ch'ín Jesús tjen chjasin Betania ntøe ch'ín Simón tí ch'ín k'uéchóntha chinlepra. ⁷ Ntá xrínahya kóchjina ijnko tjan kjuikao tjan ijnko xro tsík'óna xro mármol mé kuíkaón aceite xraxé náxrjón la imá tjete k'uíte. A ntá tí tjene ch'ín Jesús ntá tí tjan a mé kuikite aceite ikja ch'án. ⁸ A ntá tí sín k'uájiko ch'ín Jesús mé k'uíkon sín xíkaha ntá kóninkaon sín la ntáchro sín kíxin:

—¿Nkekuénté koxéhen tí xroqan a? ⁹ Íchá jína chrókóxiñ itsjé chichaon tí xroqan ntá tí chichaon a chrókjuinkitsa tí sín nòe a —ichro sín.

¹⁰ Ntá kuínhin ch'ín Jesús tí nkehe tjo sín, ntá ntáchro ch'án kíxin:

—¿Nkekuénté t'antaxínhínrá tí tjan i? Ó nchoxon ijnko nkehe jína kjuich'e tjan. ¹¹ Tí sín nòe la ó xráxín ts'ejókoará sín, a ntá janhan la jnkochríxinya ts'ejóni. ¹² Tí nkehe kjuich'e tjan mé kjuíncheka tjan aceite xraxé tí cuerpo kuéntana la mé xíkaha kjuakoxin tjan kíxin xíkaha tsoxravána. ¹³ Ntá chaxín tjonkará kíxin kuenté chjasintajni tió tsjako sín tí tán jína tsaáxin sín ntá tsochrónka sín kíxin xíkaha kjuich'e tjan ntá tsoxraxinkakonxín sín kíxin nkehe tí kjuich'e tjan —ichro ch'ín Jesús.

Ch'ín Judas kjuínchekji tí ch'ín Jesús

(Mr. 14.10-11; Lc. 22.3-6)

¹⁴ A ntá ijnko tí teyóxin sín k'uájiko ch'ín Jesús mé it'in Judas Iscariote sákjuínixjehé ch'án tí sín ncháñt'á t'etoan ¹⁵ la ntáchro ch'án kíxin:

—¿Nkekjaín tsochjínará tsoxrjanya nketí tjen tí ch'ín Jesús? —mé xíkaha chro tí ch'ín Judas.

Ntá tí sín ncháñt'á t'etoan kjuenkehe sín ch'án treinta chichaon plata. ¹⁶ Ntá tuénxín tí hora tí ch'ín Judas mé xritjeyá ch'án nkexrí tsochénka ch'án sín nketí tjen tí ch'ín Jesús.

Kjuixixín kjóneko sín tí ch'ín Jesús

(Mr. 14.12-25; Lc. 22.7-23; Jn. 13.21-30; 1 Co. 11.23-26)

¹⁷ Ntá ikui tí yaon xrankíxín kia sine sín niotja tsíkjikohya tí xroqan t'ánkíxín niotja. Ntá tí sín k'uájiko ch'ín Jesús mé kóchjina sín kjuanchankíhi sín ch'án kíxin:

—Inchéni, nketí tjinkávan sincheyaxíxinni tí sineni tí kia pascua? —ichro sín.

¹⁸ Ntá ntáchro ch'án kíxin:

—Sátsjirá Jerusalén la tsjasánrá ntøe ijnko ch'ín la nixjehérá ch'án tsontáchrórá kíxin: “Ntáchro Maestro kuénténi kíxin í séhya naxa tsjak'e ch'án la ntá ijie ntøa ntihi tsøyaxíxín kíxin sineko ch'án tí sín xriko ch'án tí kia pascua”, tsixrorá —mé xíkaha ichro ch'ín Jesús.

¹⁹ A ntá tí sín k'uájiko ch'ín Jesús mé kjuínchexiteyá sín la kjuíncheyaxíxín sín ntiha tí nkehe sine sín kia pascua.

²⁰ Tió ntá kóntó la ntá ch'ín Jesús k'uéjóko tí teyó sín k'uájiko ch'án kjóne sín. ²¹ La ntá tió naxa tjejóne sín la ntáchro ch'ín Jesús kíxin:

—Chaxín tjonkará kíxin jnkøjínrá tjejorá ntihi mé sinchekjirána —ichro ch'án.

²² Ntá kaín sín la kjuankíxín kóxakonhen sín k'uává sín la ntá kjuankíxín sín jinkojnko sín kjuanchankíhi sín tí ch'ín Jesús kíxín:

—Ínchéni, ¿á jeheni ní? —ichro sín.

²³ Ntá kjuátehe ch'ín Jesús kíxín:

—Tí nkexro tsochr'ánkíkian niotja tí plato a mé tí nkexro a mé sinchekjina ch'án. ²⁴ Tí Xjeen Dios K'óna Chojni xíkaha tsjasóte ch'án éxí nixja xroon itén Dios, a ntá nòa tí ch'ín sinchekji ch'án. Íchá jína chrókokjéhya ch'án —mé xíkaha ichro ch'ín Jesús.

²⁵ Na ntá tí ch'ín Judas tí ch'ín sinchekji ch'ín Jesús, mé ntáchro ch'án kíxín:

—Maestro, ¿á janhan? —ichro ch'án.

Ntá ntáchro ch'ín Jesús kíxín:

—Méxrä xíkaha tsíntáchrwa —ichro ch'án.

²⁶ Ntá tió tjejóne sín na ch'ín Jesús mé kuákja ch'án tí niotja ntá kjuanchehe ch'án kjuasáyé Dios. Ntá kóchrít'ó ch'án tí niotja ntá chjéhe ch'án kaín tí sín k'uájiko ch'án sine sín. Ntá ntáchro ch'án kíxín:

—Sinterá tíhi mé cuerpo kuéntana —ichro ch'án.

²⁷ Na ntá kuákja ch'án ijkno vaso tjiá inté to uva na ntá kjuanchehe ch'án kjuasáya Dios ntá kjuixin ntá chjéhe ch'án kaín tí sín tjejóko ch'án ik'ui sín. Ntá ntáchro ch'án kíxín:

—Tíhi mé kaín rá it'irá ²⁸ kíxin tíhi mé jnjina mé chrónkaxín ijkno nkehe njixin tsöñhen.

Mé tí jnjina ts'ítji na mé tsjacha tsjinkitsa nchónhya chojni kíxin ts'íjmáxin ijié sín.

²⁹ Tjonkará kíxin ts'íhya janhan tí inté to uva ínaá tsjixrakája tí yaon ts'ayàjia kjuachaxin

kuénte T'aná ntá xík'ini inté to uva ínaá —mé xíkaha ichro ch'ín Jesús.

*Ntá chrónka ch'ín Jesús kíxín ch'ín Pedro sinchemá ch'án kíxín chónhya ch'án tí ch'ín Jesús
(Mr. 14.26-31; Lc. 22.31-34; Jn. 13.36-38)*

³⁰ Ntá itsje sín ijkno himno ntá kjuixin ntá sákjuí sín tí jnä Olivo. ³¹ Ntá ntáchro ch'ín Jesús kíxín:

—Jahará tsítönaráni kaín rá ijie tie kíxin ntáchro tí xroon itén Dios kíxín: “Its'en tí nkexro Pastor t'ayakonhen kolélo ntá kaín tí ko mé tsjichroe va.”* ³² Na ntá tió tsoxechónna ntá sátsjia senó estado Galilea, a ntá jahará la chr'éxín tsochréhérá —ichro ch'án.

³³ Ntá kjuátehe ch'ín Pedro ntáchro ch'án kíxín:

—Kjónté kaín sín tsítöha sín ntá janhan la náhí —ichro ch'án.

³⁴ Ntá ntáchro ch'ín Jesús kíxín:

—Chaxín tsoxrjanca kíxin tí tie i naxä tsotsjehya kochíntoa la ó sinchemána níya —ichro ch'án.

³⁵ Ntá ntáchro ch'ín Pedro kíxín:

—Kjónté koína its'en la sintamáhya tí jaha —ichro ch'án.

La ntá kaín tí sín k'uájiko ch'án na xíkaha ichro sín kaín sín.

*Ch'ín Jesús chrónóehe ch'án It'é ch'án tí tjen ch'án tí Huerto Getsemani
(Mr. 14.32-42; Lc. 22.39-46)*

³⁶ Ntá ch'ín Jesús la ko tí sín k'uájiko ch'án mé kjuíji sín tí nonte ntiha mé ncheck'in sín Getsemani. Ntá jehe ch'án mé ntáchro ch'án kíxín:

—Tjejerá ntihó ntá janhan sátsjia tsonixjahä T'aná —ichro ch'án.

³⁷ Ntá sákjuiko ch'án tí ch'ín Pedro la ko tí iyó xjeen ch'ín Zebedeo la kjuankíxín kóxakonhen ch'án la ko k'uává ch'án. ³⁸ Ntá ntáche ch'án tí iy'á sín kíxín:

—Imá t'ává asenná éxi its'en ntá ts'axrje asenná. Ntá jahará ntihó tsitohará ts'ejotsjehekoárána —ichro ch'án.

³⁹ Ntá sákjuí ch'án qantsí kjínxin ntá kjuák'exín toch'in ch'án k'uísén ch'án hasta caxin kja ch'án nonte ntá chrónóehe ch'án It'é ch'án tjen nkaya nkajní, ntáchro ch'án kíxín:

* **26:31** Zacarías 13.7

—It'éni, tí tjinkávan chrókjuincheakaáni kíxin chrók'uihyani tí nkehe tsjá tjiá tí copa i. Kjánchó jehya éxí tjinkaonni jeheni. Náhí. Éxí tjinkávan jaha —ichro ch'án.

⁴⁰ Ntá ikjan ch'án tí kuítuhe sín la ó k'uíkon ch'án kíxin tjejójua sín. Ntá nixjehé ch'án tí ch'ín Pedro ntáchro ch'án kíxin:

—Xá xitjahya chrók'uejótsjehkoarána ijnko hora. ⁴¹ Titohará tjejotsjehérá la nixjehérá Dios kíxin tsjinkitsará ch'án kíxin chrókjuachroehyará ch'ín Tsochren. Asánrá tóxrjínhin kjánchó tí cuerpo chontará la imá ntá —mé xikaha ichro ch'ín Jesús.

⁴² Ntá sákjuí ch'án yóxin ínaá chrónóehé ch'án It'é ch'án, ntáchro ch'án kíxin:

—Jaha It'éni tí xitjahya tsjakjíyan tí nkehe tsjasótexínni la ntá tjinkaonni éxí jaha tjinkávan —mé xikaha ichro ch'án.

⁴³ Ntá ikjan ch'án la k'uíkon ch'án tjejójua tí sín k'uájiko ch'án ínaá kíxin tjiehya sín kotáchrin. ⁴⁴ Ntá kuítuhe ch'án sín ínaá la níxin sáxíkji ch'án ntá ó xikahó xínixja ch'án ínaá. ⁴⁵ Ntá kjan ch'án tí k'uéjó sín la ntáchro ch'án kíxin:

—¿A ntá jie, tjejochrinrá la t'ok'áhará ní? Ntá ó tjen. Ntá jie kjuixraká tí hora ntá tí Xjeen Dios K'óna Chojni tsotsé tí sín chóntha jie tsjikaán sín ch'án. ⁴⁶ Ntá ijie t'inkatjenrá sátsjini kíxin ó kjui tí ch'ín sinchekjina —ichro ch'án.

Sákjuíko sín tí ch'ín Jesús tsjak'echjina ch'án ntoechiso

(Mr. 14.43-50; Lc. 22.47-53; Jn. 18.2-11)

⁴⁷ Ntá naxqá tjenixja ch'ín Jesús ntá xrínahya kui ch'ín Judas, mé ijnko tí teyóxin sín k'uájiko ch'án. A ntá jehe ch'án kuiqao ch'án nchónhya chojni kjujiko sín chica espada la ko inta. Na mé kjuachaxién tí sín nchat'á t'etoan la ko tí sín tada kuénte tí sín judío mé kui sín. ⁴⁸ Ntá ch'ín Judas, tí ch'ín kjuínchekji, mé tsíntáchro ch'án kíxin:

—Tí ch'ín tsakihá tuéen ch'án na mé tsongoaxínrá kíxin jehe ch'án. Ntá itsérá ch'án —mé xikaha tsíntáchro ch'ín Judas.

⁴⁹ Ntá kóchjinehe ch'án tí ch'ín Jesús la nixjehé ch'án ntáchro ch'án kíxin:

—¿Á jína tjen, Maestro? —ichro ch'án.

Ntá kjóneko ch'án kochíto. ⁵⁰ Ntá kjuátuhe ch'ín Jesús, ntáchro ch'án kíxin:

—Amigo, á ó k'uinka tí xrá tjinkávan sich'e?

Ntá xikaha kaín sín kóchjinehe sín ch'án la itsé sín ch'án.

⁵¹ Ntá ijnko ch'ín k'uájiko ch'ín Jesús mé kuakitsje ch'án chica espada kóchrínjin ch'án taatsjon ijnko tí sín ch'ehe tí nchat'á t'etoan xrá. ⁵² Ntá ntáchro ch'ín Jesús kíxin:

—Chr'axenhén tjoe chica espada méhé. Kaínxín tí sín tjayaxin chica espada la xikaha ts'enxín sín. ⁵³ ¿Á noahyará kíxin janhan jína chrókjuáncháha T'aná la ntá tuénxín chróchr'án ch'án teyó ejército sín ángel? ⁵⁴ Kjánchó tí xikaha chrókónhen la chróxitayáha éxí nixja xroon itén Dios kíxin itén Dios mé chrónka kíxin t'ichjánxín ó jehí xikaha tsónhen —ichro ch'ín Jesús.

⁵⁵ Ntá ch'ín Jesús mé ntáche ch'án tí sín ikui kíxin:

—Jahará k'uinkakoará chica espada la ko inta kíxin tsotserána éxí chrótserá ijnko síchee xikaha. A ntá kaín yaon kjuak'é nkaxenhen ninko kjuàkua ¿na ntá nkexrí ntiha mé tsexinhyarána? ⁵⁶ Kjánchó jehí kaín tíha tsónhen kíxin tsoxiteyá tí chrónka tí sín tsíkjín xroon itén Dios ósé —ichro ch'án.

Mé xikaha ntá kaín tí sín k'uájiko ch'ín Jesús na mé kuítuhe sín ch'án, ntá sákjuí sín.

Ch'ín Jesús kóchjina ch'án tí síxreé t'etoan

(Mr. 14.53-65; Lc. 22.54-55, 63-71; Jn. 18.12-14, 19-24)

⁵⁷ Ntá tí sín itsé ch'ín Jesús la sákjuíko sín ch'án ntoe ch'ín Caifás, tí nchat'á t'etoan. Ntaha mé tsíkjónkotsé kaín tí sín maestro tjako tí ley la ko tí sín t'etoan kuénte ninko. ⁵⁸ Ntá ch'ín Pedro ikjín tinkáchréhe ch'án ntá kjuíji ch'án tí ntásin ntoe tí nchat'á t'etoan la kjaxin k'uíxenhen ch'án tí ntásin la kjuák'eko ch'án tí sín policía kuénte ninko kíxin tsotsjehé ch'án nkerí tsónhen.

⁵⁹ Ntá tí sín nchá^tá t'etoan la ko tí sín táda la ko kaín tí sín t'etoan mé kjueyá sín nkexrí ts'eka sín jie tí ch'ín Jesú s kíxin jína chrók'óyán sín ch'án. ⁶⁰ Ntá kjónté nchónhya chojni kuikjanchia sín jie kjánchó k'uitjahya sín nkerí jie t'íká ch'án. Ntá kjónté la kóchjina iyó testigo ntoáhya chrónka sín ⁶¹ la ntáchro sín kíxin:

—Ó kuínhinni ntáchro ch'án kíxin: “Janhan na ts'oxíka tí njinko kuènte Dios la ntá iní yaon koá la ó tsjaké ínaá”[†] —mé xíkaha chro sín.

⁶² Ntá tí nchá^tá t'etoan k'uínkatjen la kjuanchankíhi ch'án tí ch'ín Jesú s, ntáchro ch'án kíxin:

—¿Nkekuénté tjáteéhya ninkehó? ¿Á chaxín xíkaha tsíntáchrúa éxí xíkaha ichro sín?
—ichro ch'án.

⁶³ Ntá ch'ín Jesú s la táníkoá ch'án nixjahya ch'án. Ntá ntáchro tí nchá^tá t'etoan kíxin:

—Kjuachaxiéñ ihnié tí Dios tjechón t'akjénxian chronka ntoá, ¿á jaha tí Cristo Xjeen Dios? —kjuanchankí ch'án.

⁶⁴ Ntá kjuátehe ch'ín Jesú s ntáchro ch'án kíxin:

—Éxí tí ntáchrúa jaha. Ntá kjaxin xrjanca kíxin chr'éxín ts'ikuan kíxin tí Xjeen Dios K'óna Chojni mé tsjak'etjaxín nánko tí tja chjina Dios chóntha kaín xín kjuachaxin la ko ts'ikuan itjuí mé tsixín ch'án nkaya nkajní —ichro ch'ín Jesú s.

⁶⁵ Ntá kuínhin tí nchá^tá t'etoan la ntá imá kóninkaon ch'án ntá kótséchje ch'án tí iké ch'án la ntáchro ch'án kíxin:

—Tí ch'ín a k'uántaxíñin ch'án Dios kíxin xíkaha nixja ch'án. Méxra t'ichjánxíñhya í so chojni tsochrónka. La ntá jahará la ó kuinhínrá kíxin nkexrí nixja ch'án. ⁶⁶ ¿A ntá jahará la, ¿nkechrórá? —mé ichro tí nchá^tá a.

Ntá kjuátehe sín ntáchro sín kíxin:

—Chóntha ch'án jie la chrók'uen ch'án —ichro sín.

⁶⁷ Ntá iso sín la kuíkite sín ntate sín nkayakon ch'án na í so sín na kjuate sín ch'án la í so la chjéhe sín ikon ch'án. ⁶⁸ La ntáchro sín kíxin:

—Tí chaxín tí Cristo jaha la tónoha nkexro kjuatia —ichro sín.

Ch'ín Pedro kjuíñchemá ch'án kíxin chónhya ch'án tí ch'ín Jesú s

(Mr. 14.66-72; Lc. 22.56-62; Jn. 18.15-18, 25-27)

⁶⁹ Ntá ch'ín Pedro naxa tjetjaxín ch'án tí ntásin la ntá ikui ijkno tjan ch'e xra ntiha kóchjinehe ch'án, la ntáchro tjan kíxin:

—Kjaxian xríkoá tí ch'ín Jesú s tsíkjixín estado Galilea —ichro tjan.

⁷⁰ A ntá ch'ín Pedro kjuíñchemá ch'án nkayakon kaín sín la ntáchro ch'án kíxin:

—Nonahya nkehe tí ntáchrúa —ichro ch'án.

⁷¹ Ntá sákjuí ch'án kjuíji ch'án chjina tí puerta. La ntá í jkno tjan k'uíkon tí jehe ch'án la nixjehé tjan kaín sín tjejontaxín, la ntáchro tjan kíxin:

—Tí ch'ín i la kjaxin k'uájiko ch'án tí ch'ín Jesú s tsíkjixín chjasin Nazaret —ichro tjan.

⁷² Ntá ch'ín Pedro kjuíñchemá ch'án ínaá, k'uákjenxín ch'án ihnié Dios, ntáchro ch'án kíxin:

—Chonhya tí nkexro a —ichro ch'án.

⁷³ Ntá qntsí chr'éxín tí sín k'uéjóntaxín kóchjinehe sín ch'ín Pedro la ntáchro sín kíxin:

—Chaxín jaha kjaxin jnkoyín tí sín a kíxin tjátsqanxínni tí nixja jaha —ichro sín.

⁷⁴ Ntá k'uákjenxín ch'án ihnié Dios ntáchro ch'án kíxin:

—Chonhya tí nkexro a —ichro ch'án.

Na ntá xrínahya itsje kochíntoa. ⁷⁵ Ntá ch'ín Pedro mé xraxinkaon ch'án kíxin nkexrí chrónka ch'ín Jesú s senó kíxin: “Naxa tsotsjehya kochíntoa mé ó tsjixin sinchemána níya kíxin chonhyana.”[‡] Ntá xíkaha xraxinkaon ch'ín Pedro ntá k'uaxrjenta ch'án ntiha la imá tsjánka ch'án la ó mero ts'enxín ch'án tí kjuancheníhi, la sákjuí ch'án.

27

Kjuikéñhen sín ch'ín Jesús tí ch'ín Pilato

(*Mr. 15.1; Lc. 23.1-2; Jn. 18.28-32*)

¹ Ntá tí kóyaon k'uínkaséyan ntá kaín sín ncháñt'á t'etoan la ko tí sín t'etoan kuénte tí sín judío kjuenkayáxin sín nkexrí ts'óyán sín tí ch'ín Jesús. ² Ntá tjechronteto ch'án sákjuiko sín ch'án tí tjen tí ch'ín Poncio Pilato, tí ch'ín gobernador romano.

Ik'uén ch'ín Judas

³ Ntá tí ch'ín Judas, tsíkjinchekji ch'ín Jesús, mé k'uíkon ch'án kíxin ts'óyán sín tí ch'ín Jesús. La ntá xraxinkaon ch'án tí jie kjuasin ch'án la sákjuíkéñhen ch'án sín ínaá tí treinta chichaon plata kuákja ch'án, mé chjéhe ch'án tí sín ncháñt'á t'etoan la ko tí sín táda. ⁴ La ntá ntáchro ch'án kíxin:

—Ó kjuasinni jie kíxin kjuínchekjini ijkno nkexro tjóá —ichro ch'án.

A ntá jehe sín kjuát̄ehe sín kíxin:

—Ntá janhanna la nonahvana tíha. Tíha la ó jie kuénta —ichro sín.

⁵ Ntá ch'ín Judas mé sákjuík'e tí chichaon nkaxenhen níjko ntá sákjuí ch'án kjuísik'á isin ch'án nta.

⁶ Ntá tí sín ncháñt'á t'etoan kjuenájín sín tí chichaon la ntáchro sín kíxin:

—Tí chichaon la kóxixín ijnié chojni la chrokjuahya chr'áxenhenni tí caja kuénte ofrenda —ichro sín.

⁷ La ntá kjuenkayáxin sín jnkokoá kíxin tí chichaon la ts'enaxín sín ijkno nonte it'in Nontee Tí Ch'ín Ch'éna Nchésen kíxin tsochóntha sín nketí tsoxravá tí chojni tsíkjixín ikjín. ⁸ Mé xíkaha kjuínchek'in sín tí nonte mé Campo Kuénte Jni la hasta ijie la naxa xíkaha nchek'in sín. ⁹ Mé xíkaha ó xiteyá tí nkehe k'uéntáchro profeta Jeremías, ntáchro ch'án kíxin: “Kuákja sín tí treinta chichaon plata (tí chichaon kjuanjon tí sín israelita kuénte tí ch'ín a), ¹⁰ la k'uénaxín sín tí nonte kuénte tí ch'ín ch'éna nchésen kíxin xíkaha kjuínchexiteyá sín tí nkehe k'uétuannna Inchéni.”*

Ch'ín Jesús kóchjina nkayakon tí gobernador Pilato

(*Mr. 15.2-5; Lc. 23.3-5; Jn. 18.33-38*)

¹¹ Na ntá ch'ín Jesús sákjuíko sín ch'án nkayakon tí ch'ín gobernador la ntá jehe ch'án kjuanchankí ch'án kíxin:

—¿Á jaha tí Rey kuénte tí sín judío? —ichro ch'án.

Ntá kjuát̄ehe ch'ín Jesús, ntáchro ch'án kíxin:

—Éxi ntáchrua jaha —ichro ch'án.

¹² Na ntá tí sín ncháñt'á t'etoan la ko tí sín táda t'etoan t'eka sín jie tí ch'ín Jesús kjánchó la ch'ín Jesús la ninkehó kjuát̄ehya.

¹³ A ntá ch'ín Pilato kjuanchankí ch'án kíxin:

—¿Á kiénya kaín tí jie t'eka sín tí jaha? —ichro ch'án.

¹⁴ Kjánchó ch'ín Jesús la ninkehó kjuát̄ehya ch'án. Ntá tí ch'ín gobernador la chrakon ch'án.

K'uetóan sín kíxin its'en ch'ín Jesús

(*Mr. 15.6-20; Lc. 23.13-25; Jn. 18.38—19.16*)

¹⁵ A ntá tí kié pascua mé kuénen tí ch'ín gobernador kíxin jnkognko nánó takitsjexín ch'án ntoechiso ijkno chojni tjechjina. Ntá tí chojni mé tsjanchia sín nkexro tí tsítóhe ch'án sátsji. ¹⁶ Ntá tjechjina ijkno ch'án, mé kaín sín ntiha ó nohe sín kíxin jínahya ch'án, mé it'in ch'án Barrabás. ¹⁷ Ntá itsjé chojni kójnkotsé la ntá ch'ín Pilato mé kjuanchankí ch'án kíxin:

* **27:10** Zacarias 11.12-13

—¿Nkexro tjinkáonrá ts'atjánta, á tí ch'ín Barrabás o á tí ch'ín Jesús ncheck'in sín Cristo?
—ichro ch'án.

¹⁸ Kíxin tí ch'ín Pilato la ó nohe ch'án kíxin kjuachjinoxínhin chóntha tí sín kjuíkaán tí ch'ín Jesús.

¹⁹ Ntá jehe ch'án naxa tjetjaxin ch'án tí ncheckitoxín ch'án ijié chojni la ntá tí ichjién ch'án mé k'uētuēnhen tjan ijnko chojni tsjichénka ch'án kíxin tsjiatéhya ch'án tí nkexro jína kíxin kónto náxrjónhyá k'uíkonxín tjan kotáchrién tjan kíxin tí jehe ch'án.

²⁰ A ntá tí sín nchat'á t'etoan la ko tí sín táda t'etoan a mé nixjehé kaín tí chojni tsíkochjina kíxin chrókuanchia sín kíxin chrókuítóhe ch'án tí ch'ín Barrabás sáchrókjui, a ntá ch'ín Jesús mé chrók'uen. ²¹ A ntá tí ch'ín gobernador mé nixjehé ch'án sín ínaá kjuanchankí ch'án kíxin:

—¿Nkexro tí yaá sín tjejó ntihi tjinkáonrá ts'atjánta? —ichro ch'án.

Ntá kjuátehe sín ntáchro sín kíxin:

—Ch'ín Barrabás mé chrók'uatjánta ch'án —ichro sín.

²² A ntá ch'ín Pilato mé kjuanchankí ch'án kíxin:

—¿A ntá nkehe sit'aha tí ch'ín Jesús tí ch'ín ncheck'inrá Cristo? —ichro ch'án.

Ntá kaín sín kjuátehe sín kíxin:

—¡Tsjak'enkáni ch'án ntacruz! —ichro sín.

²³ Ntá ch'ín Pilato kjuanchankí ch'án ntáchro ch'án kíxin:

—¿Xá nkehe tí kjuúch'e tí ch'ín i kíxin? —ichro ch'án.

Ntá qantsí má itsen k'uixite sín, k'óyako sín, ntáchro sín kíxin:

—¡Tsjak'enkáni ch'án ntacruz! —ichro sín.

²⁴ Ntá ch'ín Pilato k'uíkon ch'án kíxin í kohya tsjitoxínhin sín tsjenkayáxin sín la qantsí má k'uixité sín, nínkaon sín, la ntá kjuanchia ch'án xrakao sín inta, la nkayakon kaín tí sín tsíkójkotsé ntaha k'onti ch'án tja ch'án. La ntáchro ch'án kíxin:

—Janhan tsámáhya jie tí its'en tí nkexro í chóntahya jie. Jahará xikaha tjinkáonrá tsonhen —ichro ch'án.

²⁵ Ntá kaín sín kjuátehe sín kíxin:

—Jeheni la ko xjeenni mé yámáni tí jie tí its'en tí nkexro i —ichro sín.

²⁶ Ntá ch'ín Pilato kuítóhe ch'án kíxin sáchrókjui tí ch'ín Barrabás. Ntá tuénxín k'uētoan ch'án kíxin tsjate sín tí ch'ín Jesús la ntá kjuínchek'áyéhé ch'án tí sín tsjak'enkāni sín ch'án ntacruz.

²⁷ A ntá tí sín soldado a mé sákjuíko sín tí ch'ín Jesús tí palacio kuénte tí ch'ín gobernador. Ntaha kójnkotséxin kaín tí sín soldado romano la k'uántatjen sín tí jehe ch'án. ²⁸ Ntá kuakitsjehe sín tí iké ch'án la ntá kjuínchek'inkáya sín ch'án ijnko ka kjátse tié. ²⁹ La kjuak'enkaya sín kja ch'án ijnko corona tsíkjich'éna sín ntach'i la ko kjuanjon sín ijnko nta vara kíxin tjenkáya tja ch'án chjina. La ntá k'uéjóxin toch'in sín nkayakon ch'án la kjuanoá sín ch'án, ntáchro sín kíxin:

—Jnkochríxín tsjak'é tsétuēnhen tí sín judío —ichro sín.

³⁰ La ko kjaxin ntaté sín kujikite sín nkayakon ch'án la ko kuákja sín tí nta tjexraá ch'án la t'íchjéxin sín kja ch'án. ³¹ Ntá kjuixin kjuanoá sín ch'án na ntá kuakitsjehe sín ch'án tí ka kjátse tié ntá kjuínchek'inkáya sín tí iké ch'án xráxín. Ntá sákjuíko sín ch'án kíxin tsjak'enkāni sín ch'án ntacruz.

Kjuák'enkáni ch'ín Jesús ntacruz

(Mr. 15.21-32; Lc. 23.26-43; Jn. 19.17-27)

³² A ntá sákjuíxin sín ntiha la xéta sín ijnko ch'ín kjuixin ch'án chjasin Cirene, mé it'in ch'án Simón. Ntá k'uētuēnhen sín ch'án kíxin tsámá ch'án tí ntacruz tsjak'enkáni ch'ín Jesús.

³³ Ntá kjuúji sín ijnko tjo it'in Gólgota na mé nkívee sín t'axrjexín Nta Hueso Kja Chojni Tsík'en. ³⁴ Ntá chjéhe sín ch'ín Jesús xranvino tsík'ixinkíkjanxín xroqan tsjá kjánchó jehe ch'án k'uíhya ch'án.

³⁵ A ntá tí sín soldado kjuixin kjuak'enkaní sín ch'án tí ntacruz ntá tí iké ch'án kjuich'exín sín suerte kíxin nkexro tsakja. Mé xíkaha xiteyá tí nkehe nixja tí sín k'uéchrónka itén Dios ósé, ntáchro kíxin: "Nchónhya suerte kjuich'exín sín tí kaná."[†] ³⁶ Ntá tí sín soldado ntaha k'uéjonta sín t'ayakonhen sín ch'án. ³⁷ Ntá kjuak'enkaní sín tí ikja tí ntacruz ijnko ntachiso ntáchro kíxin: "Ch'ín Jesús mé tí ch'ín Rey t'etueñhen tí sín judío."

³⁸ Kjaxin yaá tí síchee k'uéjóyáni sín ntacruz ijnko la nó tja chjina la í jnko la nó tja kjon.

³⁹ Ntá tí sín tinkák'atsínska mé kjuanoá sín ch'án tinkátjíá kja sín ⁴⁰ la ntáchro sín kíxin:

—Jaha ntáchrua kíxin chrók'oxíka tí ninko a ntá iní koá yaon la ó chrókjuixin chrókjuich'éna ínaá,[‡] ichrua. Méxra ijie jahvá nchekaá əsán. Tí chaxín jaha Xjeen Dios la jahvá tjasinkajinxíán tí ntacruz méhe —ichro sín.

⁴¹ La ntá kjaxin tí sín ncháat'á t'etqan la ko tí sín maestro tjako tí ley la ko tí sín fariseo la ko tí sín k'uetoan kuente ninko kjuanoá sín ch'án, ikjo sín kichó sín kíxin:

⁴² —Jehe ch'án mé kjuínchekaá ch'án ókjé chojni ntá jehe ch'án xitjahya sinchekaá əsén ch'án. Kja tí chaxín jehe ch'án tí Rey kuente Israel ntá jehó ch'án chrókjuinkajinxín ch'án əsén ch'án tí ntacruz kíxin ntá kjaxinni chrókuitekaonni tí jehe ch'án. ⁴³ Jehe ch'án tsintáchro ch'án kíxin Dios tjinkitsa tí jehe ch'án la ntá tsotsjeheni á chaxin tjinkaon Dios sinchekaá tí jehe ch'án kíxin tsintáchro ch'án kíxin Xjeen Dios tí jehe ch'án —ichro sín.

⁴⁴ Kjaxin tí síchee sínkáni ntacruz k'uántaxínhin sín ch'án.

Ik'uén ch'ín Jesús

(Mr. 15.33-41; Lc. 23.44-49; Jn. 19.28-30)

⁴⁵ Ntá chonkíxín hasta las tres kónjín mé k'uíxín tie chjasintajni. ⁴⁶ Ntá tí hora a ch'ín Jesús itsen k'uèya ch'án, ntáchro ch'án kíxin:

—Elí, Elí, ¿lama sabactani? —mé tíhi t'axrjexín kíxin: It'eni, It'eni, ¿nkekuénté kuitohéni?[§] —mé xíkaha ichro ch'án.

⁴⁷ Ntá iso sín tjejóntaxín kuínhin sín ntá ntáchro sín kíxin:

—Tí ch'ín a mé t'íyéhe tí ch'ín profeta Elías —ichro sín.

⁴⁸ Ntá ijnko ch'ín kuinká ch'án sákjuíkakja ch'án ijnko ka ntá chr'ánkí ch'án xranvino isán ntá tí ka a kjuak'ekjen ch'án ijnko nta kjínjin ntá kjuínchechrín ch'án kíxin chrók'ui ch'ín Jesús.

⁴⁹ Ntá í so sín ntáchro sín kíxin:

—Nté títóhé ch'án. Tsotsjeheni á tsí ch'ín Elías sinchekaá tí jehe ch'án —ichro sín.

⁵⁰ Ntá ch'ín Jesús itsen k'uíyato ch'án ínaá, ntá kjuixin ik'uén ch'án. ⁵¹ Mé ntá tuénxín k'uichje tí ka tjenkákuénxín nkaxenhen ninko. Mé k'uichje tí ka k'óna yaá tí kjuankíxíñ noi hasta nonte. La ko kuínkí nonte la ko tí tjo la kjaxin xitjehé. ⁵² La ko ó xitjehé tí tóye tsíxrvá chojni la ko ó xechón itsjé tí sín k'uékinkáchónki Dios. ⁵³ Kaín tí sín a mé k'uaxrjexín sín tí tóye, la tió kjuixin xechón ch'ín Jesús ntá k'uíxenhen sín tí chjasin tjoá mé chjasin Jerusalén la ntaha itsjé chojni k'uíkon kíxin xíxechón tí sín a.

⁵⁴ Ntá tí ch'ín capitán la ko tí sín k'uéjóko ch'án, mé tí sín t'ayakonhen ch'ín Jesús, na ntá k'uíkon sín kuínkí nonte la kaín tí í so nkehe la ntá imá chrakon sín, la ntáchro sín kíxin:

—Chaxín tí nkexro a mé Xjeen Dios.

⁵⁵ Ntá ntiha nchónhya chojni chjin ijkín tjejó sín, tjejótsjehe sín. Jehe sín k'uékinkáchréhe sín ch'ín Jesús tí kjuixín ch'án estado Galilea kíxin mé ntiha kjuankíxíñ sín k'uékjinkitsa sín ch'án. ⁵⁶ Ntaha kjaxin tjen tjan María Magdalena la ko tjan María, ñné tí ch'ín Jacobo, la ko ch'ín José la ko tí ñné tí xjeen tí ch'ín Zebedeo.

† 27:35 Salmo 22.18 ‡ 27:40 Juan 2.19 § 27:46 Salmo 22.1

*Ntá xrává ch'ín Jesús**(Mr. 15.42-47; Lc. 23.50-56; Jn. 19.38-42)*

⁵⁷ Ntá tí ó ntá kóntó ikui ijnko ch'ín it'in José, mé ijnko ch'ín rico. Chjasén ch'án mé Arimatea la jehe ch'án kjaxin k'uéchréhe ch'án tí ch'ín Jesús. ⁵⁸ Ntá tí ch'ín José sákjuítsjehe ch'án ch'ín Pilato kjuíkjanchia ch'án tí cuérpoé tí nkexro Jesús. Ntá ch'ín Pilato mé kjuanjon ch'án kjuachaxin. ⁵⁹ Ntá ch'ín José mé kuákja ch'án tí cuerpo ntá kjuínchek'isimá ch'án ijnko ka tjóá. ⁶⁰ Na ntá kjuak'enkaya ch'án ijnko tòye nixin kuénte ch'án kíxin senó tsíkjich'eña ch'án. Ntá ijnko xro jié k'uíkjèxín ch'án tí ntója tí tjo, ntá kjuixin ntá sákjuí ch'án. ⁶¹ Ntaha kjuák'e tí tjan María Magdalena la ko í jnko tjan María tjejótjaxin sín ntoí chok'èxin tjen tòye.

Tí sín soldado k'uáyakonhen tí tòye xrává ch'ín Jesús

⁶² A ntá tí yaon ó kjuixin kjuasiyóxin sín nkehe kuénte tí yaon t'ok'éhe sín, la ntá tí sín nchat'á t'etoan la ko tí sín fariseo sákjuítsjehe sín tí ch'ín Pilato ⁶³ la ntá ntáchro sín kíxin:

—Ó xraxinkaonni kíxin tió naxa kjuák'echón tí nkexro kjuich'ia la tsíntáchro ch'án kíxin ts'atsínka iní yaon ntá tsozechón ch'án ínaá, tsíchro ch'án. ⁶⁴ Méxra tsétueñhén tí sín soldado kíxin ts'ayakonhen sín tí tòye tsoxétajia tí níxin yaon. Tí náhí, la kjá tie itsi tí sín k'uájiko ch'án la tseé sín tí cuerpo kuénte ch'án la ntá chr'éxín tsochénka sín chojni kíxin ó xíxechón tí nkexro a, mé xikaha sich'ia sín. La ntá tí xikaha sich'e sín antsí má sich'ia sín que tí xrankíxixín —mé xikaha ichro sín.

⁶⁵ Ntá ntáchro ch'ín Pilato kíxin:

—Ntihi tjejó soldado. Sátsjirá la ts'ayakonhenrá jína tí tòye éxí tjinkáonrá —ichro ch'án.

⁶⁶ Na ntá sákjui sín la kjuak'e sín ijnko sello chrítaón tí xro tjejkjèxin tí tòye la kuítóhe sín tí sín soldado ntahó kíxin ts'ayakonhen sín.

28

*Ó xechón ch'ín Jesús**(Mr. 16.1-8; Lc. 24.1-12; Jn. 20.1-10)*

¹ Ntá ó k'uátsínka tí yaon t'ok'éhe sín. Ntá chjino t'inkaséyan tí yaon xrankíxixín semana, la ntá tjan María Magdalena la ko tí í jnko tjan María sákjuítsjehe sín tí tsíkjixravá Jesús.

² Ntá xrínahya kuínkí nonte imá tjián kíxin ijnko ángel kuénte Inchéni k'uínkajinxin nkaya nkajní la kjuíji ch'án tí tsíxravá Jesús la kjuakjìin ch'án tí xro a tjejkjèxin tòye la ntá chrítaón tí xro a kjuák'ekjen ch'án. ³ Tí ángel la imá tjakini tsjehe éxí ijnko xrohi la tí iké ch'án la imá tjóá tsjehe éxí chrinta. ⁴ Tí sín soldado mé k'uíkon sín xikaha la ntá síxranka sín chrakon sín la éxí tsík'en sín xikaha k'uéjó sín. ⁵ La ntá tí ángel mé ntáche ch'án tí chojni chjin kíxin:

—Chrakonhyará. Janhan ó nöna kíxin xrítjéyará tí nkexro Jesús mé tí nkexro tsíkjak'enkáni ntacruz. ⁶ Kjánchó í kohya ch'án ntihi ó tsíxechón ch'án ínaá éxí chrónka ch'án senó. Xrákirá tsjehérá tí tsíkjak'e sín ch'án, í kohya ch'án. ⁷ Ntá sájtirá tjoka tjíchenkará tí sín k'uájiko ch'án kíxin: “Tí nkexro la ó tsíxechón. Ó kuítónxin ch'án ntja sátsji ch'án estado Galilea. Ntiha ts'ikonrá ch'án”, mé xikaha tsochronkará. Kaín tíha mé tjonkará —mé xikaha chrónka tí ch'ín ángel.

⁸ A ntá tí chojni chjin tjoka sákjuíxín sín tí tsíxravá tí nkexro Jesús, la chrakon sín la ko chéhé sín la sákjuíchénka sín tí sín k'uék'ajiko ch'ín Jesús. ⁹ Ntá xrínahya titaya k'uíkuén sín kíxin itjen tí ch'ín Jesús la nixjehé sín ch'án. Ntá kóchjinehe sín ch'án la kjúa sín toté ch'án, kuítekaon sín ch'án. ¹⁰ La ntáchro ch'án kíxin:

—Chrakonhyará sájtirá tjíchenkará tí sín kíchó ni kíxin sáchrókjui sín estado Galilea la ntaha ts'ikon sín tí janhan —mé xikaha ichro ch'ín Jesús.

Tí nkehe chrónka tí sín soldado

¹¹ Tió sátsíkji tí chojni chjin la nta iso tí sín soldado k'uáyakonhen tí tsíxravá ch'ín Jesús mé sákjuí sín chjasin Jerusalén la chénka sín tí nchat'á t'etoan kaín tí nkehe tsíkónhen

tí k'uéjó sín ntiha. ¹² Ntá tí sín ncháñ'a t'etqan kjuníxjehé sín tí sín táda la ntá jnkokoá kjuenkayáxin sín ntá chjéhe sín nchónhya chichaon tí sín soldado. ¹³ La ntáchro sín kixin:

—Chrónkará kixin tí tie naxa tjejochrinrá ikui tí sín k'uék'ajiko tí nkexro Jesús, mé kueé sín cuerpo kuente ch'án, ichrorá. ¹⁴ A ntá tí chrókónohe tí ch'ín gobernador tíha la ntá jeheni tsonixjeheni ch'án kixin tsóninkakuanhyará ch'án —mé xikaha ichro tí sín ncháñ'á.

¹⁵ La ntá tí sín soldado k'uáyéhé sín tí chichaon la sákjuí sín la xikaha kjuich'e sín éxi k'uítuenhen sín. La mé xikaha chrónkaxín tí sín judío, la hasta tí yaon ijie la xikahó ichro sín, chrónkaxín sín.

*Ch'ín Jesús k'uétuenhen ch'án tí sín k'uék'ajiko ch'án tí xra sich'e sín
(Mr. 16.14-18; Lc. 24.36-49; Jn. 20.19-23)*

¹⁶ A ntá tí tejno sín k'uék'ajiko ch'ín Jesús sákjuí sín ijkno jna estado Galilea kixin xikaha tsík'etqan ch'ín Jesús. ¹⁷ Ntá k'uíkon sín ch'ín Jesús la ntá kuinkáchónki sín ch'án kjónté iso sín naxa kjuenkayáxin á chaxín jehe ch'án o náhí. ¹⁸ Ntá ch'ín Jesús kóchjinehe tí jehe sín la ntáchro ch'án kixin:

—Dios mé chjìna kaín xín kjuachaxin nkaya nkajní la ko chjasintajni. ¹⁹ Méxra sájtirá kaín xín nación la tjákokérá chojni kixin tsitekaon sín tí janhan. Tíkitexínrá sín kjuachaxiéñ ihnié It'eni la ko ihnié tí Xjeen la ko Nchákuén Dios. ²⁰ Tjákokérá sín kixin sinchexiteyá sín kaín xín nkehe kuétuñhanrá. Ijie la ó nohará kixin tsjak'é ts'ejokoará jnkochríxín hasta tsjeje chjasintajni. Mé xikaha tsónhen. Amén —ichro ch'ín Jesús.

Tí tan jína chrónka ch'ín Marcos

*Nteje mé kjuakoxin ch'ín Juan Bautista
(Mt. 3.1-12; Lc. 3.1-9, 15-17; Jn. 1.19-28)*

1 Xikihi mé xranskixixín tí tan jína kuènte Jesucristo mé tí Xjeen Dios.

2 Ósé mé kjuák'e ch'ín Isaías mé ijnko nkexro tsíchr'án Dios chrónka itén ch'án k'uékjin ch'án nkexrí nixjehé Dios tí Xjeen ch'án ntáchro kíxin:

Janhan tsochr'an ijnko nkexro tsochrónka tan kuéntana tsitónxin ntja, kíxin tsjasiyóxin ch'án ntja kuéntá.*

3 Ntá tsinhin sín itén ijnko nkexro tsjak'e nteje ts'ëya tsontáchro kíxin:

“Tóxakonhanrá ncheyóxinrá ntja tsixin Ìnchéni, takitjehérá ijnko ntja ntoí.”†

4 Tíha mé xíteyá ikui ch'ín Juan Bautista, mé xikaha kjuák'e ch'án nteje kuíkite ch'án chojni. Kjuakohé ch'án chojni ntiha kíxin chrókuinkí sín tí nkehe tjenkayáxin sín chrókuítuhe sín tí ijié sín ntá chrókuikite sín kíxin xikaha mé chrókuìin ijié sín. **5** Itsjé chojni kuixin estado Judea la ko tí chjasin Jerusalén ikui sín tí kjuák'e ch'ín Juan kuínhin sín tí nkehe kjuako ch'án ntá chrónka sín tí jie yámá sín ntá ch'ín Juan mé kuíkitexín sín ch'án ntári Jordán.

6 Tí ké ch'ín Juan mé tsík'óna kaxrée kocamello la ko tí nkehe chr'ínkat'óxin ch'án mé tsík'óna tjoa. A ntá tí nkehe kjóne ch'án mé kochjoá la ko tsjen kotsjenta tónoxín nteje.

7 Mé kjuák'ekjakohe ch'án chojni ntáchro ch'án kíxin:

—Iton tí janhan mé tsichréhe ijnko nkexro qantsí má chónta kjuachaxin, a ntá janhan la kánhyó. Méxra chrókusuàna chrókuasintanká tí correa tí tókaté ch'án. **8** Janhan mé inta ó kuíkitexínrá. Ntá jehe ch'án mé tsíkítexínrá ch'án tí Nchakuen Dios —ichro ch'ín Juan.

*Ch'ín Juan kuíkite ch'án tí ch'ín Jesús
(Mt. 3.13-17; Lc. 3.21-22)*

9 Ntá tí yaon a ch'ín Jesús, k'uaxrjexín ch'án chjasin Nazaret estado Galilea. Na ntá ch'ín Juan mé kuíkitexín ch'án tí ntári Jordán. **10** Tió k'uaxrjenkíxín ch'ín Jesús tí inta, ntá xrínahya titaya k'uíkuèn ch'án na ó xitjehé nkajní la ntá tí Nchakuen Dios éxí kontóá k'uínkajinxin ntiha ntá kjuák'e chrítaón kja ch'án. **11** Ntá xrínahya kuínhin sín nixja Dios nkaya nkajní, ntáchro kíxin:

—Janhan mé xjanna imá tjuaha tí jaha. Imá chàna kíxin nchexiteyàna tí jaha —mé xikaha kuínhin sín.

*Ch'ín Tsochren chrókuachroe tí ch'ín Jesús kíxin chrókuasin ch'án jie
(Mt. 4.1-11; Lc. 4.1-13)*

12 Ntá tí Nchakuen Dios mé sákjuíko tí ch'ín Jesús nteje. **13** Kjuák'e ch'án cuarenta yaon tí nteje la ko ntiha mé k'uixin ko jiehe ntá ch'ín Tsochren a na mé tjinkaon chrókuachroe ch'án. La ntá tí sín ángel kui k'uàyakonhen tí jehe ch'án.

*Ch'ín Jesús kjuankixixín kjuako ch'án estado Galilea
(Mt. 4.12-17; Lc. 4.14-15)*

14 Kjuixin kjuák'echjina ch'ín Juan ntoechiso ntá ch'ín Jesús na mé sákjuí ch'án nó estado Galilea sákjuíkohé ch'án sín ntiha tí tan jína kuènte Dios. **15** Ntá ntáchro ch'án kíxin:

—Ó kjuixraká tí yaon, la ó tsi tí kjuachaxin kuènte Dios ts'ëtoan ch'án. Chrókuítohérá tí nkehe jínahya k'uékjenkayáxinrá a ntá chrókuítékáonrá tí tan tsaáxinrá —mé xikaha kjuako ch'ín Jesús.

* **1:2** Malaquías 3.1 † **1:3** Isaías 40.3

*Ch'ín Jesús k'uíyehé noó tí sín itsé koche
(Mt. 4.18-22; Lc. 5.1-11)*

¹⁶ Ch'ín Jesús tjetji ch'án chrínta ntayaon Galilea ntá xrínahya k'uíkon ch'án tí ch'ín Simón la ko tí kichó ch'án mé it'in Andrés, mé koche xritsé sín, ntá tinkák'e sin tí nchísén chrínkí ntá. ¹⁷ Ntá ntáchro tí ch'ín Jesús kíxin:

—Chrémérá tí janhan, ntá tsotjähará xrä tsjéyará chojni —ichro ch'án.

¹⁸ Ntá tuénxín kuítuhe sín tí nchísén k'uétséya sín koche ntá sákjuiko sín ch'án.

¹⁹ Ntá kjínhya kjuíji ch'ín Jesús ntá k'uíkon ch'án tí yaá xjeen ch'ín Zebedeo. Ijnko mé it'in Jacobo. A ntá tí í jnko la mé it'in Juan. Jehe sín la ko tí it'é sín tjejóxenhen sín tí ntabárco tjejótjorité sín tí nchísén tséya sín tí koche. ²⁰ Na ntá ch'ín Jesús mé k'uíyehé tí jehe sín kíxin kjaxin tsochréhe sín ch'án. A ntá tuénxín kuítuhe sin tí it'é sín ch'ín Zebedeo kuítoko ch'an tí ntabárco la ko tí sín tjinkitsa ch'án ch'e xrä. A ntá jehe sín sákjuiko sín ch'ín Jesús.

*Ijnko chojni chóntha ijnko nchakuen tí jínahya
(Lc. 4.31-37)*

²¹ Ntá kjuíji sín tí chjasin it'in Capernaum. Na ntá tí yaon t'ok'éhe sín mé k'uíxenhen ch'ín Jesús tí njinko Israel. Na ntá ntaha mé kjuankíx ch'án kjuako ch'án. ²² A ntá tí chojni siín ntiha mé chrakon sín kuínhin sín tí nkehe kjuako ch'án kíxin kjuakoxín ch'án kíxin chóntha ch'án kjuachaxin, la jehya éxi tí sín maestro tjako tí ley, ichro sín. ²³ Ntá tí njinko Israel chjasin ntiha itjen ijnko chojni chóntha ijnko nchakuen tí jínahya k'uíyato ntáchro kíxin:

²⁴ —¿Nkekuénté tjiaté tí jeheni kaín ni? Jaha Jesús kjuíxian Nazaret. ¿Á k'uinka kíxin sinchek'itjáyanni? Janhan mé ó kjuátsoan tí jaha, la ko nòna kíxin jaha tí nkexro tjóá kuénte Dios —mé xíkaha ichro tí nchakuen tí jínahya.

²⁵ Ntá ch'ín Jesús mé k'uétuénenhen tí nchakuen tí jínahya ntáchro ch'án kíxin:

—Tániá, t'axrjéxian tí jehe ch'án —mé xíkaha ichro ch'ín Jesús.

²⁶ A ntá tí nchakuen tí jínahya mé kjuínchek'aniáte tí ch'ín a la ko k'uíyatoxín tsen ntá k'uaxrjexín tí ch'ín a. ²⁷ A ntá kaín sín chrakon sín ntá kjuanchankíhi sín kichó sín, ntáchro sín kíxin:

—¿Xá nkexro tíha kíxin tjako ch'án nkehe nixin? Jehe ch'án chóntha kjuachaxin kíxin t'etueñhen ch'án tí nchakuen tí jínahya la titekakonhen —mé xíkaha ichro sín.

²⁸ A ntá imá tjoka k'uíxikónhe kaín xín sín estado Galilea kíxin nkexrí tí kjuachaxin chóntha tí ch'ín Jesús a.

*Ch'ín Jesús kjuínchekitohe jína tí ich'ee tí ch'ín Simón Pedro
(Mt. 8.14-15; Lc. 4.38-39)*

²⁹ Ntá tí ch'ín Jesús mé k'uaxrjexín ch'án tí njinko, a ntá tuénxín sákjuiko ch'án ch'ín Jacobo la ko ch'ín Juan, sákjuí sin ntøe ch'ín Simón la ko ch'ín Andrés. ³⁰ Ntá tí ich'ee ch'ín Simón na tjetsínska tjan, níhi tjan kíxin chóntha tjan sóa. Ntá chénka sín tí ch'ín Jesús.

³¹ Ntá kóchjina ch'án tí tjetsínska tjan ntá itsé ch'án tja tjan k'uíinkatjen tjan. Ntá tuénxín kjuìlinhin tjan tí sóa chóntha tjan. Ntá kjuanjón tjan nkehe sine sín.

*Ch'ín Jesús kjuínchekitohe jína nchónhya chojni níhi
(Mt. 8.16-17; Lc. 4.40-41)*

³² A ntá tió kjuiáton yaon tió k'uíxin tie kuijkohe sín tí ch'in Jesús kaín tí sín níhi la ko tí sín chóntha nchakuen jínahya; ³³ na ntá kuenté chjasin kójnkotsé sín k'uíxintankí sin ntója tí nchia a. ³⁴ Ntá kjuínchekitohe ch'án jína kaín tí chojni níhi chóntha nchónhya clase chin la ko kuakitsje ch'án kaín tí nchakuen tí jínahya. Na í kjuanjónhyá ch'án kjuachaxin kíxin tsonixja tí nchakuen tí jínahya kíxin ó kjuátsoan tíha nkexro tí jehe ch'án.

*Ch'ín Jesús mé kjuako ch'án estado Galilea
(Lc. 4.42-44)*

³⁵ Ntá naxaq sítié k'uàya ch'ín Jesús k'uaxrjexín ch'án tí chjasin a sákjuí ch'án nteje kíxin ntiha nixjéexín ch'án It'é ch'án tjen nkaya nkajní. ³⁶ Ntá ch'ín Simón la ko tí sín xriko ch'án mé sákjuikjeyá sín ch'án. ³⁷ Ntá k'uitja sín ch'án ntá chénka sín kíxin:

—Kaín sín xritjeyá sín tí jaha —ichro sín.

³⁸ Ntá ntáchro ch'ín Jesús kíxin:

—Sátsjini ókjé chjasin chjinaxón kíxin ntaha kjaxin tsjákohá sín tí tan jína, kíxin xíkaha mé tí k'uaxrjexian chjasin ntiha.

³⁹ Ntá nkuíxín estado Galilea sákjuí ch'án kuinkákjako ch'án jnkojnko ninko la ko kuakitsje ch'án tí nchäkuen tí jínahya chónta sín.

Ch'ín Jesús kjuínchekitóhe jína ijnko ch'ín chónta chinlepra

(Mt. 8.1-4; Lc. 5.12-16)

⁴⁰ Ntá kui ijnko ch'ín chónta chinlepra kjuák'exín toch'in ch'án nkayakon ch'ín Jesús ntá chrónóehé ch'án ntáchro ch'án kíxin:

—Tí tjinkávan jaha la jína chrókjuínchekitohéni jína —ichro ch'án.

⁴¹ Ntá ch'ín Jesús na imá kujkonóehé ch'án tí ch'ín a na ntá kjuentoá tja ch'án kjuak'e tja ch'án chrítaón tí ch'ín níhi a ntá ntáchro ch'án kíxin:

—Méxrä xíkaha tjinkávan. Ntá jie sintakitoha jína —ichro ch'án.

⁴² A ntá xíkaha ntáchro ch'án ntá tuénxín kjuìnlin tí chinlepra ntá kuítóhe ch'án jína. ⁴³ Ntá k'uetuenhen ch'ín Jesús tí ch'ín a kíxin tjoka sátsji ch'án, ntáchro ch'án kíxin:

⁴⁴ —Ninkexró chenkahya ntihi; jehó sájtja tjákhé tí ch'ín ncháñt'a kíxin ó kjuìnlinhan tí chinlepra la ko tjánjuan tí nkehe tsík'etqan ch'ín Moisés[‡] kíxin tsqonoexín kaín xín chojni kíxin ó kuítóha jína —ichro ch'án.

⁴⁵ A ntá tí ch'ín tsíkitóhe jína, a ntá sákjuí ch'án kjuankíxin ch'án chénka ch'án kaín xín chojni kíxin nkexrí kuítóhe ch'án jína. Méxrä xitjahya ts'ixenhen ch'ín Jesús noxín nijnko chjasin na ntá k'uaxrjenta ch'án tí kohya chojni. Ntá kjónté la kjuitsjehe sín ch'án kjuixin sín nkuíxín chjasin.

2

Ch'ín Jesús mé kjuínchekitóhe jína ijnko chojni tsík'en toté

(Mt. 9.1-8; Lc. 5.17-26)

¹ Ntá ó k'uátsínska iso yaon ntá ch'ín Jesús mé xíkjan ch'án chjasin Capernaum. Ntá k'uíxikónohe chojni kíxin ijnko nchia ntiha kjuák'e ch'án. ² Ntá tuénxín nchónhya chojni kóchjina ntá kjuachahya tí nchia k'uíxinenhen sín la ko kjaxin kjuachahya tí ntója nchia chrók'uíxintankí sín. A ntá ch'ín Jesús kjuako tí tan jína kuénte Dios. ³ Ntá kui noó sín tinkátsénki sín ijnko ch'ín tsík'en toté ch'án. ⁴ Kjánchó xitjahya kóchjina sín tí tjen ch'ín Jesús kíxin nchónhya chojni siín. La ntá k'uítóten sín tí chrítaón nchia a ntá k'óxrat'o sín. Na ntá ijnko hno kjuák'ete sín tí kania tjenkáya tí sinníhi a ntá kjuinkajin sín ntoí tí tjen ch'ín Jesús a. ⁵ Tió k'uíkon ch'ín Jesús tí nkehe kjuich'e sín ntá ó nohe ch'án kíxin chaxín imá tinkáchónki sín tí jehe ch'án. Ntá nixjehé ch'án tí sinníhi ntáche ch'án kíxin:

—Xjéenni, ó kjuixin kjuìnlinhan tí jie chonta —mé xíkaha ichro ch'án.

⁶ Na ntá iso tí sín maestro tjako tí ley tjejótjaxin sín ntiha na ntá jehó sín mé kjo sín asén sín kíxin: ⁷ “¿Nkekuénté xíkaha nixja tí ch'ín i ncheyóhe ch'án asén ch'án Dios? Kíxin ninkexró xitjahya tsjatsìin ijié kíxin jehó Dios mé chónta kjuachaxin tsjatsen ijié chojni”, mé xíkaha ikjo sín asén sín. ⁸ Ntá ch'ín Jesús la ó nohe ch'án nkehe tjenkayáxin sín. Ntá ntáchro ch'án kíxin:

—¿Nkekuénté kíxin xíkaha tjenkayáxinrá? ⁹ ¿Nkehe qantsí má xrähya chróntátjan ch'án?

Á qantsí xrähya chróntátjan ch'án kíxin ó kjuixin kjuìnlinhan ch'án tí jie yámá ch'án, o á qantsí xrähya chróntátjan ch'án kíxin chrók'uinkatjen ch'án chrókjuenájín ch'án kaniée ch'án

ntá sáchrókjui ch'án? ¹⁰ Méxra jie tsjákoxian kíxin tí Xjeen Dios K'óna Chojni mé ntihi chjasintajni chónta kjuachaxin tsjakjlinhin ijié chojni —ichro ch'án.

Ntá ntáche ch'án tí ch'ín xitjahya tji kíxin:

¹¹ —Jaha tétuanhán t'inkatjen, tjenáján kaniaa na sátja ntoa —ichro ch'án.

¹² A ntá tí sinníhi na tuénxín k'uínkatjen ch'án kjuák'exín toté ch'án na kjuenájín ch'án kaniee ch'án na kuámá ch'án k'uaxrjexín ch'án nchia sákjuí ch'án. Na ntá kaín tí sín siín a tsjehe sín nkexrí kónhen na chrakon sín la ko kjuanchehe sín Dios kjuasáyé. Ntá ntáchro sín kíxin:

—K'uíkonhyéni tí nkehe i —ichro sín.

Ch'ín Jesú斯 k'uíyéhe ch'ín Leví

(Mt. 9.9-13; Lc. 5.27-32)

¹³ A ntá chr'éxín ch'ín Jesú斯 mé sáxíkji ch'án inaá chrínta ntayaon. Ntá kaín xín chojni kóchjina sín tí tjen ch'án ntá kjuako ch'án. ¹⁴ Ntá k'uátsinka ch'án k'uíkon ch'án tí ch'ín Leví xjeen ch'ín Alfeo tjetjaxin ch'án tjenchekjènki ch'án. Ntá ch'ín Jesú斯 mé k'uíyéhe ch'án, ntáchro ch'án kíxin:

—Chréhé tí janhan —ichro ch'án.

Ntá ch'ín Leví mé tuénxín k'uínkatjen ch'án chréhé ch'án tí ch'ín Jesú斯.

¹⁵ A ntá ch'ín Jesú斯 kjuák'e ch'án ntoe tí ch'ín Leví, la ntá kjuanjon sín nkehe sine ch'án la ko kjaxin k'uéjó nchónhya tí sín nchekjènki la ko kjaxin í so chojni chónta jie. Mé kaín tí sín a mé tjejótjaxin sín tjejóneko tí ch'ín Jesú斯 la ko tí sín k'uájiko ch'án, kíxin nchónhya chojni chréhé sín tí jehe ch'án. ¹⁶ Na ntá tí sín maestro tjako tí ley la ko tí sín fariseo k'uíkon sín kíxin ch'ín Jesú斯 tjejóneko kaín ti sín nchekjènki la ko tí í so sín chónta jie, a ntá ntáche sín tí sín k'uájiko ch'án kíxin:

—¿Nkekuénté kíxin tí maestro kuéntará neko ch'án la ko t'ikao ch'án tí sín nchekjènki la ko tí í so sín chónta jie? —ichro sín.

¹⁷ Na ntá ch'ín Jesú斯 kuínhin ch'án nkehe tí tjo sín a. Ntá nixjéhe ch'án tí sín a ntáchro ch'án kíxin:

—Tí sín néhya t'ichjánxienhya sín nkexro sich'e xroqan. Náhí. Jehó tí sín níhi mé t'ichjánxinhin sín nkexro sich'ehe sín xroqan. Janhan na k'uinkahya ntihi kíxin chrók'uíyahá chojni jína tjejó sín. Náhí. Kuinka kíxin ts'íyahá chojni chónta jie —ichro ch'án.

Tjanchankíhi sín tí ch'ín Jesú斯 kíxin á chrókjónehya sín tió tsonixjéhe sín Dios

(Mt. 9.14-17; Lc. 5.33-39)

¹⁸ Ijnko yaon na mé kaín xín tí sín k'uék'ajiko ch'ín Juan Bautista la ko tí sín fariseo a mé kjónehya sín kuenté yaon kíxin mé xíkahaa ts'áyéhe sín kjuaxróxin, ichro sín. A ntá kui iso chojni nixjéhe sín tí ch'ín Jesú斯 ntáchro sín kíxin:

—¿Nkekuénté kíxin tí sín k'uék'ajiko sín tí ch'ín Juan la ko tí sín fariseo la nehya sín jie, a ntá tí sín xriko la ine sín? —ichro sín.

¹⁹ Ntá kjuátehe ch'ín Jesú斯 ntáchro ch'án kíxin:

—¿Xá chrókjónehya tí chojni tsík'íyéhe sín kóchjina ijnko kia tsotéhe chojni tí naxa tjejóko sín tí nkexro tsotéhe? Tí naxa tjen tí nkexro tsotéhe la xitjahya kíxin chrókjónehya sín. ²⁰ A ntá itsi ijnko yaon itsi chojni sátsjiko sín tí ch'ín tsíkótehe, ntá tí yaon la chaxín sinehya sín.

²¹ 'Ninkexró chrókjua'eniéhe ijnko ka ó ntaxis it'ó ka níxin kíxin ntá chrókjuixéhe tí ka níxin ntá qantsí má chrók'uichje tí ka ntaxis a. ²² La ko kjaxin ninkexró chrókuikia xran vino níxin ijnko tjuaxran ó ntaxis; kíxin tí xran vino níxin la chrókótséchje tí tjuaxran ntaxis ntá chrók'uitjáyan tí xran la ko tí tjoq. Méxra tí xran vino níxin chrókuikia ijnko tjuaxran níxin —mé xíkahaa ichro ch'ín Jesú斯.

Tí sín k'uájiko ch'ín Jesú斯 mé ik'uín sín iso neno noatrigo ijnko yaon t'ok'éhe sín

(Mt. 12.1-8; Lc. 6.1-5)

²³ Ijnko yaon t'ok'éhe sín na ch'ín Jesús la ko tí sín k'uájiko ch'án mé k'uátsínka sín ijkno nonte siín noatrigo. Na ntá tí sín k'uájiko ch'án kjuankíxin sín ik'uín sín iso noatrigo. ²⁴ Na ntá iso tí sín fariseo kjuanchankíhi sín tí ch'ín Jesús a kíxin:

—¿Nkekueñte kíxin tí sín xrikoa tjejóch'e sín xra ijie? Na mé kohya kjuachaxin tsónhen xra tí yaon t'ok'éheni —ichro sín.

²⁵ Ntá kjuátehe ch'án ntáchro ch'án kíxin:

—¿Á kjuinchekuáxinyará jahará tí xroon chrónka nkehe kjuich'e ch'ín David la ko tí sín k'uájiko ch'án tí k'uén sín kjinta? ²⁶ A ntá jehe ch'án k'uíxenhen ch'án ntóe Dios tió kjuák'e ncháñt'á Abiatar k'uetoan, a ntá kjóne ch'án tí niotja tsíkóyaon kjónté jehó tí sín ncháñt'á mé k'uéchóntha kjuachaxin sine sín la kjaxin chjéhe ch'án tí sín k'uájiko ch'án* —ichro ch'ín Jesús.

²⁷ Kjaxin ntáchro ch'ín Jesús kíxin:

—K'óna tí yaon ts'ok'éhe chojni kíxin t'ichjánxín sín, la jehya kíxin chrókjuikosáyehe tí yaon a. ²⁸ A ntá tí Xjeen Dios K'óna Chojni mé chóntha kjuachaxin ts'etoan nkehe tsónhen tí yaon t'ok'éheni —ichro ch'án.

3

Ijnko chojni tsíxámá tja

(Mt. 12.9-14; Lc. 6.6-11)

¹ Ntá ch'ín Jesús k'uíxenhen ch'án ijkno níjko Israel ínaá. Na mé ntiha tjen ijkno ch'ín tsíxámá ijkno tja ch'án. ² Na ntá kóchjina iso chojni tsáyehe sín ch'ín Jesús ts'ikon sín kíxin á sinchekitohe ch'án jína tí ch'ín tsíxámá tja tí yaon t'ok'éhe sín kíxin mé jína tsjanchia sín jie, ichro sín. ³ Ntá ch'ín Jesús mé ntáche ch'án tí ch'ín tsíxámá tja a kíxin:

—T'inkatjen, tjak'e jnkosiné ntihi —ichro ch'án.

⁴ A ntá kjuanchankíhi ch'ín Jesús tí sín siín ntiha kíxin:

—¿Nkehe siín kjuachaxin tsónhen tí yaon t'ok'éheni? ¿Á chrókjuich'eni tí jína ní o á chrókjuich'eni tí jínahya? ¿Á chrókjuinchekitohechojni jína ní o á chrók'oyánni chojni? —ichro ch'án.

A ntá jehe sín la táníkoá sín. ⁵ Na ntá ch'ín Jesús la nínsaon ch'án komá ch'án tí jehe sín la ko t'avá ch'án kíxin tjinkakonhya sín tsíkonóehé sín chojni. Na ntá k'uetoenhen ch'án tí ch'ín a kíxin:

—Tjéntoá tjá —ichro ch'án.

A ntá kjuéntoá ch'án tja ch'án la ó kuítóhe tja ch'án jína. ⁶ Na ntá tí sín fariseo a k'uaxrjexín sín níjko sákjuí sín k'uító sín tí sín kuénte ch'ín Herodes ntá kjuenkayáxinko kíchó sín kíxin nkexrí chrók'oyán sín tí ch'ín Jesús.

Nchónhyá chojni siín chrínta ntayaon

⁷ Ntá ch'ín Jesús la ko tí sín k'uájiko ch'án sákjuí sín chrínta ntayaon a. A ntá nchónhyá chojni kjuíjichréhe sín tsíkixín sín nó estado Galilea la ko kjaxin tsíkixín sín nó estado Judea ⁸ la ko chjasin Jerusalén la ko estado Idumea la ko ikjé sín kuixín sín nó téhe ntárijo Jordán la ko iso sín tsíkixín sín nó chjasin Tiro la ko nó chjasin Sidón. Na mé kaín sín tsíkinhin sín kíxin nkexrí tí kjuaxroan jíe kjuasin ch'ín Jesús ntá kuichréhe sín ch'án kíxin chrók'uikon sín tíha kjaxin. ⁹ Ntá k'uetoenhen ch'án tí sín k'uájiko ch'án a kíxin ntahó chrókjuak'echonhen sín ijkno ntabárco. A ntá tí imá chrók'uixitja sín ch'án ntá chrók'uixenhen ch'án tí ntabárco, a ntá ntiha chrókjuak'e ch'án tsochrónka ch'án. ¹⁰ Kíxin itsjé chojni tsíkjinchechitohe ch'án jína, na ntá kaín xín tí sín níhi k'uixitja sín ch'án kíxin tjinkaon sín chrókuákoxín sín ch'án. ¹¹ Kjaxin tí sín chóntha nchákuén tí jínahya na mé tió k'uíkon sín tí ch'ín Jesús ntá k'uéjoxin sín toch'in sín nkayakon ch'án. Ntá k'oyako tí nchákuén tí jínahya a ntáchro kíxin:

* **2:26** 1 Samuel 21.1-6; Levítico 24.5-9

—Jaha mé tí Xjeen Dios.

¹² A ntá ch'ín Jesú斯 ntáche ch'án tí nchäkuen tí jínahya kíxin kohya kjuachaxin tsochrónka kíxin nkexro tí jehe ch'án.

*Ch'ín Jesú斯 kjueyá ch'án teyó sín ts'ajiko ch'án
(Mt. 10.1-4; Lc. 6.12-16)*

¹³ A ntá chr'éxín chrìin ch'ín Jesú斯 ijkno jna, a ntá ntiha k'uíyehé ch'án tí sín tjinkaon ch'án chrók'uajiko ch'án ntá kóchjinehe sín ch'án. ¹⁴ Ntá kjueyá ch'án teyó tí sín ts'ajiko ch'án kíxin ts'etueñhen ch'án sín sátsji sín tsjako sín tí tan jína. ¹⁵ Kjuanjon ch'án kjuachaxin sinchekitohe sín chojni níhi jína la ko tsakitsje sín nchäkuen tí jínahya chóntha chojni. ¹⁶ A ntá tí sín i mé tí teyó sín tsíkjayá ch'án mé it'in sín xikihi: Simón na mé kjuínchek'in ch'án Pedro; ¹⁷ la ko Jacobo la ko kícho ch'án Juan mé xjeen ch'ín Zebedeo. Kjaxin kjuínchek'in ch'án sín Boanerges mé t'axrjexín kíxin Xjeen Sítjonta. ¹⁸ La ko Andrés la ko Felipe la ko Bartolomé la ko Mateo la ko Tomás la ko Jacobo, it'é mé it'in Alfeo, la ko Tadeo la ko í jnko Simón tíhi mé kuènte tí sín cananista, ¹⁹ la ko Judas Iscariote, mé kjuínchekji tí ch'ín Jesú斯 chr'éxín.

Ntáchro sín kíxin ch'ín Jesú斯 chóntha kjuachaxin kuènte tí Jínahya

(Mt. 12.22-32; Lc. 11.14-23; 12.10)

Na ntá chr'éxín ch'ín Jesú斯 la ko tí sín k'uájiko ch'án k'uíxenhen sín ijkno nchia. ²⁰ A ntá ínaá kójnkotsé nchónhya chojni, a ntá xitjahya sine sín. ²¹ Ntá konohe tí sín naxa kjéhya ch'ín Jesú斯 ntá ikui sín sátsjiko sín ch'án kíxin ntáchro sín kíxin ó tsík'ixikján ch'án.

²² Kjaxin tí sín tjako ti ley kuixin sín Jerusalén, ntáchro sín kíxin:

—Tí ch'ín i chóntha ch'án tí ch'ín Beelzebú, mé ch'ín Tsochren, mé tí nkexro t'etueñhen kaín tí nchäkuen tí jínahya ntá xikaha tjacha ch'án takitsje ch'án nchäkuen tí jínahya a —ichro sín.

²³ Ntá ch'ín Jesú斯 k'uíyehé ch'án tí sín ntá kjuíncheyóexin ch'án ntáchro ch'án kíxin:

—¿Nkexrí kixin jnkokón ch'ín Tsochren chrókuakitsje asén? ²⁴ A ntá tí sín t'etoan ijkno nación tjanjonko kíchó la tsjachahya ts'etooan. ²⁵ La ko kjaxin tí sín jnkokoqá ntóe jnkokoáhya tjenkayáxin sín ntá xitjahya ts'ejóko kíchó sín. ²⁶ A ntá tí chaxín ch'ín Tsochren jnkokónhya tjenkayáxin tjanjonko kíchó la ntá ts'itjáyan kjuachaxin kuènte.

²⁷ Ninkexró tsjacha ts'ixenhen ntóe ijkno chojni jiehe kíxin ts'axrjehe tí nkehe chóntha ch'án. Náhí. T'ichjánxín saoxín sinchenteto ch'án tí ch'ín jiehe kíxin jína tseéhe ch'án nkehe chóntha tí ch'ín a.

²⁸ Ijkno nkehe chaxín tsotjónkará kíxin tió tsoxraxinkaon ijkno chojni tí jie chóntha la ko tsochronóehé Dios la ntá tsjakjìlinhin ch'án kaín tí jie la ko kaín tí nkehe jínahya tsíntáchro sín. ²⁹ A ntá tí nkexro ts'ántaxínhín tí Nchakuen Dios na mé xitjahya tsjín tí jie na mé jnkochríxín tsochóntha sín tí jie a —ichro ch'án.

³⁰ Mé xikaha ichro ch'án kíxin tí sín a tsíntáchro sín kíxin ijkno nchäkuen tí jínahya mé chóntha tí jehe ch'án.

Tí ìné la ko kíchó ch'ín Jesú斯

(Mt. 12.46-50; Lc. 8.19-21)

³¹ A ntá kui ìné ch'ín Jesú斯 la ko kíchó ch'án tjejó sín ntója ó na ntá k'uétueñhen sín ijkno chojni tsjik'íyehé ch'án. ³² A ntá tí sín tjejótjaxin tí tjen ch'ín Jesú斯 ntiha chénka sín ch'án kíxin:

—Íná la ko kíchuá tjejó sín ntója xritjeyá sín ti jaha. —ichro sín.

³³ Ntá ntáchro ch'án kíxin:

—¿Xá nkexro tí nana la ko nkexro tí kíchiná? —ichro ch'án.

³⁴ Ntá komá ch'án tí chojni tjejótjaxin tí tjen ch'án ntá ntáchro ch'án kíxin:

—Jahará mé nana la ko kíchiná. ³⁵ Kaín tí sín nchexiteyá tí nkehe tjinkaon Dios na mé tí sín a mé kíchiná la ko nana —ichro ch'án.

4

*Kjuíncheyóexin ch'án éxí ijnko chojni t'enka nonte
(Mt. 13.1-9; Lc. 8.4-8)*

¹ Ch'ín Jesús mé kjuankíxin ch'án kjuakoxín ch'án chrínta ntayaon ínaá. A ntá ntiha mé kójnkotsé nchónhya chojni tí tjen ch'án. Ntá ijnko ntabárco tjenkátaón ntä k'uit'ótjen ch'án, a ntá ntaha kjuák'e ch'án kjuakoxín ch'án. Ntá kaín tí sín tsíkójkotsé mé kuítóhe sín chrínta ntayaon k'uéjókinhin sín. ² Nchónhya nkehe kjuako ch'án kjuíncheyóexin ch'án. Ntá ntáchro ch'án kíxin:

³ —Tinhínrá tíhi: Ijnko chojni sákjuík'enka nontee. ⁴ Mé xíkaha sákjuík'enka ch'án iso tí noatriga a. Ntá iso noa la tsík'ánotjen ntäa ntá kui koxroxé k'uinká va tí noa. ⁵ A ntá iso noa na mé k'uítji chrík'a xro tí kohya itsjé nche ntá tjoka k'uayan kíxin tjínhya chóntha nche. ⁶ A ntá tió kjuiton yaon la ntá tí ka la chján; la ko chóntahya nuèe a ntá xámá. ⁷ A ntá í so noa kjuitsínkak'á tí siín kach'i la ntá tí kach'i k'uánkí la ntá tí noa í k'ónahya kíxin sítja tí kach'i. ⁸ A ntá íso tí noa k'uítji nche jína la ntá k'uayan la ko k'uánkí nteto la ko k'óna jína. A ntá ijnko noa la mé k'óna treinta neno noa. A ntá í jnko la mé k'óna sesenta neno noa, a ntá í jnko la k'óna ijnko ciento neno noa —ichro ch'án.

⁹ Ntá ntáchro ch'án kíxin:

—Tí nkexro tjinkaon chrókuinhin la chrókuinhin —ichro ch'án.

*Ch'ín Jesús chronkaxín nkexrí t'axrjexín tí nkehe ntáchro ch'án
(Mt. 13.10-17; Lc. 8.9-10)*

¹⁰ A ntá chr'éxín, tió kuítóhe ch'ín Jesús jehó ch'án, a ntá tí sín tjejó chjinaxón tí tjen ch'án la ko tí teyó sín k'uajiko ch'án mé kjuanchankíhi sín ch'án kíxin nkexrí t'axrjexín tí nkehe kjuíncheyóexin ch'án. ¹¹ Ntá ntáchro ch'án kíxin:

—A ntá jahará la Dios mé sintanohará tí nkehe tienxínhya chojni kuénte tí kjuachaxin kuénte Dios, a ntá tí sín titekakonhya la ó kjuintayóaxuán kaín nkehe kuínhin sín. ¹² Kíxin kjónté ts'ikon sín la éxí k'uíkonhya sín, la ko kjónté tsinhin sín la tsienxínhya sín kíxin ntá chrók'uixitoxínhya tí tjenkayáxin sín a la ko chrókjuílinhyá tí ijié sín* —ichro ch'án.

*Ch'ín Jesús chrónkaxín nkexrí t'axrjexín tí nkexro sákjuík'enka
(Mt. 13.18-23; Lc. 8.11-15)*

¹³ Ntá ntáche ch'án sín kíxin:

—¿Á kiénxinyará jahará nkexrí t'axrjexín tí nkehe kjuintayóaxian ní? ¿A ntá nkexrí chrókiénxirá tí í so nkehe naxa sintayóaxian? ¹⁴ A ntá tí nkexro sákjuík'enka tí tje a mé yóhe ijnko nkexro sákjuíkjako itén Dios. ¹⁵ A ntá iso chojni la éxí tí tje kjuitsínkak'á xro: mé kuínhin sín itén Dios ntá tjoka kóxrjínhin sín kuítekaon sín. ¹⁶ Kjánchó njinkahya chóntha nuèe, a ntá séhya kuítóhe; a ntá itsi tí kjuaxróxinhya tsónhen sín, o tsochónkíhi sín chojni kíxin tí itén Dios kuítekaon sín ntá tsítóhe sín tí tinkáchónki sín Dios. ¹⁸ A ntá í so chojni la éxí yóhe tí tje k'uínka chrík'a kach'i na mé kuínhin sín itén Dios ¹⁹ kjánchó tóxakonhen sín tí nkehe siín chjasintajni la ko tí nkehe tjete tóxrjínhin sín la ko tjinkaon sín tsochóntha sín kaín xín nkehe. Kaín tíha mé t'inkákonhen tí itén Dios kuínhin sín a, la tí chojni xíkaha la xitjahya sich'ehe sín xrä Dios. ²⁰ A ntá í so chojni kuínhin tí itén Dios na kuinkáchónki sín la ntá xíkaha jína ch'ehe sín Dios xrä. La iso sín la éxí yóhe tí tje k'uínka tí nonte jína k'óna treinta neno noa la ko iso sín la yóhe tí tje k'óna sesenta neno noa la ko iso sín la yóhe tí tje k'óna ciento neno noa —mé xíkaha ichro ch'ín Jesús.

*Ch'ín Jesús mé kjuíncheyóexin éxí ijnko xrohi tjeche
(Lc. 8.16-18)*

²¹ Kjaxin ntáchro ch'ín Jesús kíxin:

* **4:12** Isaías 6.9-10

—¿Á chrókuik̄onni xrohi tjeche chrókjuak' emá chrínkí ntacajón o chrínkí cama? Kjá náhí. Tí xrohi la noi chrókjuak' e ts'inkaséyanxín. ²² Mé xikaha kaín tí nkehe tjejómá jie ts̄onoxín chr'éxin la ko kaín tí nkehe ninkexró noehya jie la ts̄onoxín chr'éxin. ²³ A ntá tí nkexro tjinkaon chrókuinhin la chrókuinhin tíhi —ichro ch'án.

²⁴ Kjaxin ntáchro ch'án kixin:

—Chrókjuenk̄ayáxrá jína tí nkehe tjejótinhinrá. Tí nkehe tjáchoayará jahará la Dios la kjaxin tíha tsjáchoayá ch'án tí nkehe ts'ayéhérá jahará, a ntá antsí má ts'ayéhéra tí jahará tjejontinhinrá. ²⁵ A ntá tí nkexro chóntha nkehe la antsí má ts'ayéhé sín. A ntá tí nkexro chónthaya la kjónté tí ntsí chóntha la ts'axrjehe —ichro ch'án.

Ch'ín Jesús mé kjuíncheyóexin ch'án éxi ijk̄o tje ts'ayan ts'ánki

²⁶ Kjaxin ntáchro ch'ín Jesús kixin:

—Tí kjuachaxin t'etoan Dios tóyóhē ijk̄o chojni sátsjik'enk̄a nonte. ²⁷ Ntá sákjuík'ajua ch'án tí tie la ko k'uáya ch'án tí nchítjen. A ntá xikahó k'uátsínska iso yaon la ko iso tie, a ntá tí tje la k'uayan la k'uánkí. A ntá tí nkexro k'uenk̄a la noehya ch'án nkexrí kónhen tíha. ²⁸ A ntá tí nche mé kjuich'e xra jehó. Senó k'uayan tí chaon tí ka, a ntá kjuintqa, a ntá chr'éxin icha tí noa tsjinjin; ²⁹ a ntá tió tsicha tí noa, a ntá tsakjinjin sín tí noa kixin ó kjuixraká tí yaon tsotjá sín.

Ch'ín Jesús kjuíncheyóexin ch'án éxi ijk̄o tje it'in mostaza

(Mt. 13.31-32; Lc. 13.18-19)

³⁰ Kjaxin ntáchro ch'ín Jesús kixin:

—¿Nkehe chrókoyóhē tí kjuachaxin t'etoan Dios, nkehe chrókoyóexin tíha? ³¹ Mé éxi yóhē tí tje it'in mostaza tsík'inka nonte. Tíha mé ijk̄o tje imá ntsí, a ntá tí í so tje siún chjasintajni la kénhyó. ³² A ntá jnkonaá tsík'inka tí tje la tsík'ayan tsík'ánkí imá ihyé, a ntá tí í so nta la kánhyó. A ntá kjaxin tí chaon tí nta tsík'ánkí imá ihyé, a ntá kjónté koxroxé xritjaka la jína ts'ok'heva chrínkí tí ts'van chaon tí nta.

Nkehe tí xra kjuich'e tí nkehe kjuíncheyóexin ch'ín Jesús

(Mt. 13.34-35)

³³ Mé xikaha ch'ín Jesús kjuakohé ch'án tí jehe sín, kjuíncheyóexin ch'án nchónhya nkehe éxi tí nkehe a kixin chrókjuacha chrókienxín sín tíha. ³⁴ Kaínxín nkehe kjuakohé ch'án tí jehe sín la kjuíncheyóexin ch'án. A ntá jehó tí sín k'uájiko ch'án la chrónka ch'án nkexrí t'axrjexín kaín tí nkehe kjuíncheyóexin ch'án.

Ch'ín Jesús k'uétuenhen ch'án tí xrínto la ko tí ntá síchríca kixin ts'ixita

(Mt. 8.23-27; Lc. 8.22-25)

³⁵ A ntá tí yaon a la ntá ó kóntó ntá ntáche ch'ín Jesús tí sín k'uájiko ch'án a kixin:

—Sátsjini tóhe tí ntayaon —ichro ch'án.

³⁶ Ntá kuítóhe sín kaín tí chojni a ntá sákjuíko sín tí ch'ín Jesús naxa tjenkáya ch'án tí ntabárco la ko kjaxin í so ntabárco sákjuí koí. ³⁷ Ntá xrínahya tjan chjéhe xrínto la ntá síchríca ntá t'ixenhen tí ntabárco, ó mero tsokaón ntá tí ntabárco. ³⁸ A ntá ch'ín Jesús na mé tjejua ch'án tí tjar'i nótón tí tjejó sín nkaxenhen tí ntabárco a tcekjón ch'án ijk̄o ka. Na ntá kjuínchekjaya sín ch'án ntáchro sín kixin:

—¡Maestro! ¿Á ntosán kixin ts'itjáyanni, ts'aniánkíni ntá ní? —ichro sín.

³⁹ A ntá ch'ín Jesús k'uáya ch'án, k'uétuenhen ch'án tí xrínto la ko tí ntá kixin ts'ixita, ntáchro ch'án kixin:

—Tániá, tjak'eta —ichro ch'án.

Na ntá tí xrínto la ko tí ntá k'uíxratá. ⁴⁰ Ntá kjuanchankíhi ch'án tí sín k'uájiko ch'án ntáchro ch'án kixin:

—¿Nkeuénché kixin imá chrakonrá? ¿Á naxa tinkachónkihyará Dios? —ichro ch'án.

⁴¹ Ntá imá chrakon sín ntá kjo sín kichó sín kixin:

—¿Xá nkexro tíhi? Kjónté xrinto la ko ntayaon la mé kjuínchexiteyéhe ch'án —ichro sín.

5

Ijnko chojni chóntha nchónhya nchakuen tí jínahya nonte Gadara (Mt. 8.28-34; Lc. 8.26-39)

¹ Ntá tió k'uátoye sín tí ntayaon, a ntá kjuíji sín tí nonte Gadara. ² Ntá k'uínkajinxin ch'ín Jesús tí ntabárco a. Ntá xrínahya xeta ch'án ijnko ch'ín kuixin nó tsíkjixravá chojni mé chóntha ch'án ijnko nchakuen tí jínahya. ³ Tí ch'ín a mé kjuák'e ch'án tí tsíkjixravá chojni. Ninkexró tjachahya sinchenteto ch'án kjónté cadena tjachahya. ⁴ Nchónhya veces kjuínchentetoxín sín ch'án cadena toté ch'án la ko itja ch'án, la kjónté kóchríton ch'án kjuínchekuen ch'án tí cadena. Kohya ninkexro tjacha ts'etuénhen tí jehe ch'án. ⁵ K'uék'aji ch'án nchakotjin la ko tie t'íyato ch'án nó jna la ko tí tsíkjixravá chojni la ko chjéhe asén ch'án xro. ⁶ Na ntá k'uíkon ch'án kíxin kui ch'ín Jesús kjónté ikjín la kuinká ch'án kjuíji ch'án kjuák'lexín toch'in ch'án nkayakon ch'ín Jesús a ⁷ k'óyako ch'án ntáchro ch'án kíxin:

—¿Nkekuénté tjiaté jaha tí jeheni, jaha Jesús Xjeen Dios tjen nkaya nkajní? Dios nchenoheni kíxin xrjanóqha nchekjasótehyani —ichro ch'án.

⁸ Mé xíkaha ichro ch'án kíxin tsíntáchro ch'ín Jesús kíxin:

—Jaha nchakuen tí jínahya, ttohé tí ch'ín i —ichro ch'án.

⁹ Ntá ch'ín Jesús mé kjuanchankíhi ch'án tí ch'ín a kíxin:

—¿Nkexrí it'ian? —ichro ch'án.

Ntá kjuáthe ch'án ntáchro ch'án kíxin:

—Legión mé it'inni kíxin nchónhyani —ichro ch'án.

¹⁰ Ntá imá chrónóehe ch'án tí ch'ín Jesús kíxin tsochr'ánhya ch'án ókjé tí nchakuen tí jínahya. ¹¹ Na ntá siín nchónhya cochíno xrine va chjinaxón tí jna ntiha. ¹² A ntá chrónoa tí nchakuen tí jínahya ntáchro kíxin:

—Tétuénhenni sátsjini tí siín tí cochíno, ttohé ts'ixenhenni tí jehe va —ichro tí nchakuen tí jínahya a.

¹³ Ntá ch'ín Jesús mé kjuanjon ch'án kjuachaxin. Ntá kaín xín tí nchakuen tí jínahya a mé k'uaxrjexín tí ch'ín a sákjuí kjuík'ixenhen tí cochíno a. Na ntá kaín xín tí ko a mé chjina iyó mil va siín va xrine va. Na mé kaín xín va k'uínkajinxin va ntiha kjuítsínkayá va tsaka ntá kjuítsínkankí va ntayaon ntá kjuínhin va nta.

¹⁴ Na ntá tí chojni t'ayakonhen tí cochíno a na mé kuinká sín kíxin chrakon sín na ntá sákjuí chrónka sín chjasén sín la ko nontee chojni. Na ntá itsjé chojni mé kuitsjehe sín nkehe tí tsíkónhen ntiha. ¹⁵ Ntá kjuíji sín tí tjen ch'ín Jesús a na k'uíkon sín kíxin itjen tí ch'ín k'uéchóntha tí nchónhya nchakuen tí jínahya senó la ó jína tjen ch'án tjetjaqxin ch'án tjenkáya ch'án iké ch'án, na ntá chrakon sín. ¹⁶ A ntá tí sín tsík'ikon mé chrónka sín nkexrí k'uék'aji tí ch'ín k'uéchóntha tí nchakuen tí jínahya la ko nkexrí kónhen tí cochíno a. ¹⁷ Ntá kjuankíxin sín chrónóehe sín tí ch'ín Jesús a kíxin sáchrókjuixin ch'án ntiha.

¹⁸ A ntá ó ts'it'ótjen ch'ín Jesús tí ntabárco na ntá tí ch'ín k'uéchóntha nchakuen tí jínahya na mé chrónoa ch'án kíxin kjaxin ch'án sáchrókjuiko sín ch'án, ichro ch'án. ¹⁹ Ntá ch'ín Jesús kjuanjonhya ch'án kjuachaxin sátsjiko sín ch'án. Náhí. K'uetoan ch'án kíxin:

—Sájtia ntoa tjíchenka tí sín naxa kjéhyá tí jaha kíxin nkexrí kaín tí kjuaxroan jié kjuasin Dios kjuínchekitoha jína kikonóqha ch'án tí jaha —ichro ch'án.

²⁰ Na ntá tí ch'ín a sákjuí ch'án kjuankíxin chrónka ch'án kaín tí chjasin kuénte Decápolis kíxin nkexrí kaín tí nkehe kjuích'e ch'ín Jesús kjuínchekitohe ch'án jína. A ntá kaín tí sín kuínhin na chrakon sín.

Tí xjeen ch'ín Jairo la ko tí tjan kuákóxin iké ch'ín Jesús (Mt. 9.18-26; Lc. 8.40-56)

²¹ Ntá tió xíkjankao ch'ín Jesús tí ntabárco tóhe tí ntayaon ínaá ntá kóchjina nchónhya chojni ntá ntahó chrínta nta kuitohe ch'án ínaá. ²² Na ntá ikui ijnko ch'ín t'etoan kuénte

ninko mé it'in ch'án Jairo. A ntá tió k'uíkon ch'án kíxin itjen ch'ín Jesús ntá kjuák'exín toch'in ch'án chrínkí toté ch'ín Jesús a ²³ imá chrónóhe ch'án kíxin:

—Tí ijnko xjanna chjin ó tjet'en xjan. Xrjanóha chrókujiñi chrókuak'étja itjá chrítaón kja xjan ntá chrókuitohe xjan jína —ichro ch'án.

²⁴ Ntá ch'ín Jesús sákjuiko tí ch'ín a. Na nchónhya chojni chréhé sín tinkák'ixitja sín ch'án ínaá. ²⁵ A ntá kjaxin tjenkákjan sín ijnko chojni chjin níhi tjan, ó chóntha teyó nánó sítji tjan jni. ²⁶ Imá tjote tjan kíxin nchónhya chojni kjuanjon xroqan kónhen tjan na ó kjuixin kjuéhe tjan kaín xín nkehe k'uéchóntha tjan. Ó jehí titóehya tjan jína la íchá ntsí tinkákótao tjan. ²⁷ A ntá tió kuínhin tjan chrónka chojni nkehe tí kjuaxroan kjuasin ch'ín Jesús ntá kui tjan kjuák'enkákjan tí chojni kóchjina nóton ch'ín Jesús ntá kuákóxín tjan tí ké ch'án, ²⁸ ntáchro tjan kíxin kjonté iké ch'án ó chrókuakóxín tjan na ó tihó mé chrókuitohe tjan jína, ichro tjan. ²⁹ Ntá tuénxín tí jni na mé ó kjuixié tjan la ko kónuhe tjan kíxin ó kjuixin kuítóhe tjan jína ti chin k'uéchóntha tjan. ³⁰ Ntá ch'ín Jesús na ó kónuhe ch'án kíxin kjuachaxién ch'án mé kuítóexín ijnko chojni jína ntá kuinkátjíá ch'án kjuanchankíhi ch'án tí chojni siín a kíxin:

—¿Nkexro kuákóxín tí kaná? —ichro ch'án.

³¹ Ntá kjuátehe tí sín k'uajiko ch'án a ntáchro sín kíxin:

—Ó noha kíxin nchónhya chojni sítja, ¿ntá nkekuénté kíxin naxa tjanchankiá kíxin nkexro tí kuákóxian? —ichro sín.

³² Ntá kuinkátjíá ch'án tsjehe ch'án nkuíxín kíxin tsongohe ch'án nkexro tí kuákóxín tí ké ch'án. ³³ Ntá tí tjan a na mé chrakon tjan síxrànkä tjan ó nohe tjan kíxin ó kuítóhe tjan jína ntá xrakoa tjan kjuák'exín toch'in tjan nkayakon ch'ín Jesús ntá ntoá chrónka tjan kaín nkehe kónhen tjan. ³⁴ Ntá ntáchro ch'ín Jesús kíxin:

—Xjeenni, kaín asán kuinkachónkia tí janhan ntá kuítóha jína. Ijie la kjuaxróxin sátsjia ntq'a la ó kuítóha jína a —ichro ch'án.

³⁵ Na ntá naxa tjenixja ch'án ntá ó kui chojni kuijin sín ntøe tí ch'ín t'etøan tí ninko. Ntá chénka sín ch'án kíxin:

—Xjajan na ó kjuixin k'uén. ¿Nkekuénté naxa chjehé xrä tí Maestro a? —ichro sín.

³⁶ Ntá ch'ín Jesús na ántosén ch'án tí chrónka sín ntá nixjehé ch'án tí ch'ín t'etøan tí ninko ntáchro ch'án kíxin:

—Chrakonhya jaha, jehó tsinkachónke tí janhan —ichro ch'án.

³⁷ Ntá kjuanjonhya ch'án kjuachaxin kíxin sátsji kaín sín, na ó jehó ch'ín Pedro la ko ch'ín Jacobo la ko ch'ín Juan mé kíchó ch'in Jacobo, sátsji sín. ³⁸ Na ntá tió kjuíji sín tí ntøe tí ch'ín t'etøan tí ninko na k'uíkon sín kíxin imá sítjité sín tsjánkamä sín tí xjan a. ³⁹ Ntá k'uíxenhen ch'ín Jesús nchia kjuanchankí ch'án kíxin:

—¿Nkekuénté ánta tjasítérá tsjánkamära tí xjan a? Tí xjan na tsík'enhya xjan na tjejua xjan —ichro ch'án.

⁴⁰ A ntá kjuanoá sín ch'án. Ntá k'uetoan ch'án kíxin kaín sín sátsji sín ntøja. Ntá kjuíko ch'án tí it'é la ko tí iné xjan la ko tí iyá sín xriko ch'án ntá k'uíxenko sín ch'án tí tjen tí xjan a. ⁴¹ Itsé ch'án tja xjan ntá nkívee xjan mé nixjexín ch'án ntáchro ch'án kíxin:

—Talita, cumi —mé t'axrjexín kíxin: Lonchí, tétuanhán kíxin t'aya.

⁴² A ntá tí xjan a ó chóntha tjan teyó nánó na mé tuénxín k'uínkatjen tjan ó jína tji tjan. Ntá kaín tí chojni siín ntiha la chrakon sín k'uíkon sín xikaha. ⁴³ Ntá fuerte k'uetoan ch'ín Jesús kíxin chróchenkahya sín ninkexró. La kjaxin k'uetoan ch'án kíxin tsjanjon sín nkehe sine tjan.

¹ A ntá chr'éxín k'uaxrjexín ch'án chjasin ntiha. Ntá jehe ch'án la ko tí sín k'uájiko ch'án na mé sákjuí sín Nazaret tí chjasin tsík'ánkíxín ch'án. ² Na ntá tió kui tí yaon t'ok'éhe sín ntá kjuankíxín ch'án kjuakoxín ch'án tí ninko ntiha. Na ntá nchónhya chojni kuínhin sín ntá chrakon sín ntáchro sín kíxín:

—¿Nketí tsíxrakhe tí ch'ín i kaín tíhi? ¿Nketí kuixín tí kjuaxrexinkaon chóntha ch'án la ko tí kjuaxroan tjasin ch'án? ³ ¿Á jehya ch'án tí ch'ín ch'eña nta na mé xjeen tí tjan María, la tí kichó ch'án a na mé ch'ín Jacobo, la ch'ín José, la ch'ín Judas, la ch'ín Simón? ¿A kjaxinhya ntihi tjejókoní tí kichó ch'án chjin? —ichro sín.

Méxra tahya sín kuentá nkerí ch'e ch'án. ⁴ Na ntá ntáchro ch'ín Jesús kíxín:

—Kaín chojni tjikosáyehe sín ijnko nkexro chrónka iten Dios. Ntá tí chjasén ch'án la ko kaín tí sín kjéhya ch'án la ko tí sín ntœ ch'án na mé tjikosáyehya sín ch'án —ichro ch'án.

⁵ Méxra ninkehó kjuaxroan xitjahya kjuasin ch'án ntiha, la jehó kjuak'etja tja ch'án chrítaón ikja iso chojni níhi kjuínchekítóhe ch'án sín jína. ⁶ Ntá chrakon ch'án kíxín xíkaha kuitekakuenhya sín ch'án. Na ntá k'uáji ch'án tí chjasin ntsíntsí chjinaxón ntiha kjuako ch'án.

Ch'ín Jesús mé ichr'án tí teyó sín kíxín sátsji sín tsjikjako sín itén Dios

(Mt. 10.5-15; Lc. 9.1-6)

⁷ Na ntá k'uíyéhe ch'ín Jesús tí teyó sín k'uajiko ch'án a. Ntá kjuankíxín k'uetuñhen ch'án kíxín yoyó yoyó sín sátsji sín la ko kjaxin kjuanjon ch'án kjuachaxin kíxín tsakitsje sín nchakuen tí jinahya chóntha chojni. ⁸ La ko k'uetoan ch'án kíxín ninkehó tsjikohya sín kuente ntja. Jehó tí nta tixín sín mé tsjiko sín. Na mé tsjikohya sín kabolsa la ko tsjikohya sín nkehe sine sín la ko tsjikohya sín chichaon. ⁹ Na ko tokate ó tsjanka sín la ko tsjiko sín jehó tí ka tjejóya sín ó. ¹⁰ Kjaxin ntáchro ch'án kíxín:

—A ntá tí ts'ixenhenrá ijnko nchia a ntá ntaha tsjanjon sín kjuachaxin na ntahó chökuitohará. A ntá tsjixinjian tí xrä ntá sátsjixinrá ntiha. ¹¹ Na ntá tí tsjasánrá ijnko chjasin ntá tsochrohya sín tsjanjon sín kjuachaxin ts'ejókoará sín ntiha na ko tsotjinkakonhya sín tsinhin sín tí nkehe chrókjukohérá sín na ntá t'axrjéxínrá tí chjasin a ntá ts'oxènjinrá tí nche chóntha totará kíxín xíkaha tsjákoxínrá kíxín ntoáhya kjuich'e tí jehe sín. A ntá chaxín ntáxrjan kíxín tí yaon tsitoexín ijié chojni ntá antsí má tsjasóte tí chojni tí chjasin a, a ntá tí sín chjasin Sodoma la ko Gomorra la kánhyó tsjasóte sín.

¹² Na ntá sákjuí sín kuinkákjakhe sín tí chojni a kíxín mé chrókjuitóxínhin sín ntie sín.

¹³ La ko kjaxin kuakitsje sín itsjé tí nchakuen tí jinahya chóntha chojni. Na ko aceite mé kuíkite sín itsjé chojni níhi a la ntá kuítóhe sín jína.

Ik'uén ch'ín Juan Bautista

(Mt. 14.1-12; Lc. 9.7-9)

¹⁴ Na ntá tí ch'ín rey Herodes mé kuínhin ch'án nkehe tí kjuaxroan kjuasin ch'ín Jesús. Na ntáchro ch'ín Herodes kíxín:

—Kjá tí ch'ín Juan Bautista mé ó tsíxechón ch'án ínaá kíxín xíkaha tí kjuachaxin chóntha tí ch'in a —ichro ch'ín Herodes a.

¹⁵ A ntá iso sín ntáchro sín kíxín:

—Kjá ch'ín Elías k'uéchrónka itén Dios —ichro sín.

A ntá í so sín mé ntáchro sín kíxín:

—Kjá ijnko nkexro yóhe tí sín k'uékjako itén Dios ósé —ichro sín.

¹⁶ Ntá kuínhin ch'ín Herodes tíha ntá ntáchro ch'án kíxín:

—Kjá ó jehe tí ch'ín Juan tí kuétoan chrínjin kja ch'án, mé ó tsíxechón ch'án jie —ichro ch'án.

¹⁷ Méxra tí ch'ín Herodes mé tsík'etoan ch'án kíxín tsontetoxín tí ch'ín Juan cadena tsjak'echjina ch'án kíxín xíkaha tsíkjanchia tí tjan Herodías. A ntá tí tjan Herodías k'uéchjién tí ch'ín Felipe. A ntá tí savé ch'án Herodes mé kuákja tí tjan a kíxín ts'óna ichjién ch'án. ¹⁸ A ntá tí ch'ín Juan tsíntáche ch'án tí ch'ín Herodes kíxín:

—Kohya kjuachaxin tsochonta tí ichjién tí kíchuá —ichro ch'án.

¹⁹ Mé xíkaha tí tjan Herodías mé imá kónínkakonhen tjan tí ch'ín Juan ntá chrók'óyán tjan ch'án, kjánchó xitjahya ²⁰ kíxin tí ch'ín Herodes mé chrakonhen ch'án tí ch'ín Juan kíxin ó nohe ch'án kíxin tí ch'ín a mé ijinco nkexro jína la ko tjóá qasén la méxra kuítolahya ch'án kíxin jehe tjan chrók'óyán tjan ch'án. ²¹ A ntá kénhyó kienxín ch'án la kjonté kóxrjínhin ch'án tí nkehe kuínhin ch'án kjuako ch'ín Juan. ²¹ A ntá tí tjan Herodías mé kjuacha tjan tí yaon kia tsíkxitoxjhínhin nánó tí ch'ín Herodes a kíxin tsík'iyehé ch'án tí síxréé la ko tí sín k'ueteuenhen tí sín soldado la ko tí sín t'etqan estado Galilea kíxin itsi sín ntoi ch'án kíxin siín kia. ²² A ntá tí xjeen tí tjan Herodías mé k'uixenhen tí tjejó sín, a ntá ité tjan, la kóxrjínhin ch'in Herodes la ko kaín tí sín tjejóneko ch'án ntiha. Na ntá tí ch'ín rey ntáche ch'án tí tjan tjarisoá a kíxin:

—Tjanchana tí nkehe tjinkávan na tsotjähá —ichro ch'án.

²³ Ntá kjuínchenohe ch'án Dios ntáchro ch'án kíxin tsjanjon ch'án tí nkehe tsjanchia tjan kjonté jnkosiné tí chjasin t'etqan ch'án. ²⁴ Ntá jehe tjan na mé kuínhin tjan ntá sákjuí tjan chénka tjan iné tjan kíxin tsintáchro ch'ín Herodes kíxin tí ichrén nkehe chrókjuanchia tjan chrókjuanjon ch'án. Ntá kjuanchankí tjan kíxin:

—¿Nkehe tí chrókjuanchiani? —ichro tjan.

Ntá tí iné tjan mé ntáchro kíxin:

—Ijie la itja tjanchia tí kja tí ch'ín Juan Bautista, ichrua —ichro tjan.

²⁵ A ntá tí tjarisoá ikjan tjan tjoka k'uixenhen tjan tí tjen tí ch'ín rey, ntá ntáchro tjan kíxin:

—A ntá ijie tjinkaonni ijinco plato tsjak'enkáya ikja ch'ín Juan Bautista tsochjehéni —ichro tjan.

²⁶ Na ntá tí ch'ín rey la mé imá k'uává ch'án kíxin xíkaha kjuanchia tjan kjánchó tsíkjinchenohe ch'án Dios la ko tsíkinhin kaín tí sín tsík'iyehé ch'án, la ntá xitjahya tsontáchro ch'án "Náhí" tí nkehe kjuanchia tjan. ²⁷ Na ntá tuénxín k'ueteuenhen ch'án ijinco ch'ín soldado kíxin tsíkqao ch'án tí kja ch'ín Juan a. ²⁸ Ntá tí ch'ín soldado mé sákjuí ntoi ch'án, ntá kóchrínjin ch'án ikja tí ch'ín Juan a. Ntá ijinco plato kjuíkoyá ch'án tí kja ch'án a ntá chjéhe ch'án tí tjan tjarisoá a. Ntá jehe tjan sákjuíkénhen tjan iné tjan.

²⁹ Na ntá kuínhin kaín tí sín k'uék'ajiko ch'ín Juan kíxin xíkaha tsíkónhen. Na ntá sákjuíkakja sín tí cuérpoe ch'án ntá kjuíkao sín ntá sákjuíkjává sín.

Ch'ín Jesú斯 mé kjuanjon nkehe kjóne in'ó mil chojni

(Mt. 14.13-21; Lc. 9.10-17; Jn. 6.1-14)

³⁰ A ntá chréxín tí sín k'uájiko ch'ín Jesú斯 a na mé ó kjan sín tí tjen ch'án ínaá, chrónka sín nkexrí tí xrä kjuích'e sín na ko nkexrí kjuako sín. ³¹ A ntá ntáchro ch'ín Jesú斯 kíxin:

—Ts'axrjentani sátsjini nteje tí kohya chojni ntá ts'ok'áhará ntsí —ichro ch'án.

Mé xíkaha ntáchro ch'án kíxin sásítjí la ko síti nchónhya chojni na ntá xrakahya ts'ejó sín sine sín. ³² Na ntá ch'ín Jesú斯 la ko tí sín k'uájiko ch'án jehó sín k'uit'ótjen sín ijinco ntabárco sákjuí sín ijinco nonte jehó tjen. ³³ Na ntá itsjé chojni k'uíkon sín kíxin sákjuí sín la ko kjuátsoan sín kíxin ch'ín Jesú斯. Ntá xrákuaxjín sín chjasén sín kuinká sín na ntá senó kjuíji sín tí chrínta ntayaon tí tsjiji ch'ín Jesú斯. ³⁴ Ntá k'uínkajinxín ch'án tí ntabárco, a ntá k'uíkon ch'án kíxin nchónhya chojni siín ntiha ntá kuikonóehe ch'án tí jehe sín na mé éxi yóhe kolélo tjejó sín chóntahya va nkexro ts'ayakonhen va. Ntá kjuankíxin ch'án kjuákohe ch'án sín nchónhya nkehe a. ³⁵ Na ntá ó kóntó na ntá tí sín k'uájiko ch'ín Jesú斯 a mé kóchjina sín tí tjen ch'án ntáchro sín kíxin:

—Ntá ó kóntó la kohya ninkexró tjejó ntihi ³⁶ na ntá jaha chrókuítihé sín kíxin sátsji sín tí chjasin chjinaxón a tsjik'ena sín nkehe kíxin chóntahya sín nkehe sine sín —ichro sín.

³⁷ A ntá ch'ín Jesú斯 kjuátehe ch'án ntáchro ch'án kíxin:

—Chjéhé sín nkehe sine sín —ichro ch'án.

Ntá kjuátehe sín ntáchro sín kíxin:

—¿Á tsjik'énani iyó ciento denario niqtja tsochjéheni sin sine sín ní? —ichro sín.

³⁸ Ntá ch'ín Jesús mé kjuanchankíhi ch'án sín kíxin:

—¿Nkekjaín niqtja chontará? Sátjítsjehérá —ichro ch'án.

Ntá sákjuítsjehe sín na ntá chrónka sín kíxin:

—In'ó niqtja la ko yaá koche mé siín —ichro sín.

³⁹ Na ntá k'uetoan ch'án kíxin kaín xín sín chrók'uxitjaxin sín tí chrítaón tí ka yoa a.

⁴⁰ Na ntá xíkaha kójnkojé sín ciento sín la ko cincuenta sín k'uítjaxin sín. ⁴¹ Na ntá ch'ín Jesús kuákja ch'án tí in'ó niqtja na ko tí yaá koche ntá konta ch'án nkajní ntá kjuanchia ch'án kjuasáyé Dios. Na ntá kóchrít'ó ch'án tot'ó tí niqtja a ntá chjéhe ch'án tí sín k'uájiko ch'án kíxin ts'óxikayéhe sín sine sín siín a la ko kjaxin kóchrít'ó ch'án tí yaá koche ntá k'óxikayéhe sín kíxin sine sín kaín sín. ⁴² Ntá kaín xín sín kjóne sín kókjéhe sín. ⁴³ A ntá kjuixin kjóne sín ntá tí sín k'uájiko ch'ín Jesús na mé kjuínchekaón sín teyó ntaxra tot'ó tí niqtja la ko tí koche tsíxehe. ⁴⁴ A ntá tí sín kjóne na mé in'ó mil chojni ntoa.

Ch'ín Jesús mé tjitaón ntayaon

(Mt. 14.22-27; Jn. 6.16-21)

⁴⁵ A ntá tuénxín k'uetuñhen ch'ín Jesús tí sín k'uájiko ch'án kíxin ts'it'ótjen sín tí ntabárco a ts'atoyé sín ntayaon sátsji sín nó chjasin Betsaida, ichro ch'án. Na ntá jehe ch'án na mé naxaq kuítuhe ch'án nixjéhe ch'án kaín tí sín siín a. ⁴⁶ Kjuixin nixjéhe ch'án sín na ntá jehe ch'án chrín ch'án ijnko jnä tsonixjéexín ch'án Dios. ⁴⁷ A ntá tió k'uixin tie ntá tí ntabárco na mé ó kjuíji jnkosiné ntayaon, a ntá jehe ch'án jehó ch'án kjuíji ch'án chrínta ntayaon. ⁴⁸ Ntá kotohé ch'án k'uíkon ch'án kíxin imá xrä tjiko sín tí ntabárco a kíxin tí xrínto imá chjéhe. Nantóye a mé sákjuíchréhe ch'án sín. Totó ch'án mé sákjuítónxin ch'án tí ntayaon na ntá kóchjinehe ch'án tí tjejó sín chrók'uátsinké ch'án sáchrókjui ch'án. ⁴⁹ A ntá tí k'uíkon sín kjuítaón ch'án ntä, ntá kjuenkayáxin sín kíxin kjuacha sín, ichro sín, ntá k'óyako sín ⁵⁰ kíxin kaín sín k'uíkon sín ch'án la chrakon sín. Na ntá jehe ch'án mé tuénxín nixja ch'án ntáchro ch'án kíxin:

—Chrakonhyará. Janhan tíhi —ichro ch'án.

⁵¹ Ntá k'uít'ótjen ch'án tí ntabárco tí tjejó sín, a ntá tí xrínto la ó k'uíxratá. Ntá imá chrakon sín kíxin xíkaha kónhen ⁵² kíxin kienxínya sín tí kjuaxroan kjuich'e ch'án kuénte tí niqtja kíxin naxaq kénhya qasén sín kuinkáchónki sín ch'án.

Ch'ín Jesús mé kjuínchekitóhe jína tí chojni níhi tí nonte Genesaret

(Mt. 14.34-36)

⁵³ Ntá tió k'uátøyé sín tí ntayaon ntá kjuíji sín tí nonte Genesaret ntá kjuak'echroe sín tí ntabárco a tí chrínta ntä. ⁵⁴ Na ntá tió k'uínkajinxin sín tí ntabárco, a ntá tí sín siín ntiha tjoka kjuátsaan sín tí ch'ín Jesús. ⁵⁵ Ntá sákjuí sín nkuíxín chjinaxón ntiha kjuankíxin sín kuíkao sín tí sinníhi tinkátsénkí sín kuíkao sín tí tjen ch'ín Jesús. ⁵⁶ La ko kaín nketí kjuíji ch'án, a chjasin ntsí, a chjasin hyé, a nontee sín ó kjuíjiko sín tí sinníhi a chrínta ntä. Na ntá chrónóhe sín tí ch'ín Jesús kíxin kjónté chrínta iké ch'án ó chrókuákoxín sín, ichro sín. Na kaín xín tí sín kuákoxín iké ch'án mé kuítuhe sín jína.

Tí nkehe nchekjita asén chojni

(Mt. 15.1-20)

¹ A ntá iso sín fariseo la ko iso sín tjako tí ley kuixin sín chjasin Jerusalén ntá kóchjinehe sín tí ch'ín Jesús. ² Tí sín a, tió k'uíkon sín kíxin iso sín k'uájiko ch'ín Jesús mé k'óntihya sín tja sín na kjónté ine sín mé t'axrjexín kíxin kjuínchexiteyáhya sín tí ley, ntá kjonta tí sín a.

³ (Mé xíkaha kjuich'e sín kíxin tí sín fariseo la ko kaín tí sín judío mé kuinkáchónki sín éxi k'uékjich'e tí sín tada ósé kíxin ná t'ontó itja sín ntá sine sín. ⁴ Na ko tí tsokjanxin sín ntasin ná t'onti sín ntá sine sín. Na ko kjaxin itsjé í so nkehe tinkáchónki sín, éxi tjonemá sín tí

vaso t'iyá sín nkehe la ko tí nchésen la ko tí chí chjáyan nkehe ne sín la ko tí kàmé sín nchetjóá sín.) ⁵ Méxra tí sín fariseo la ko tí sín maestro tjako tí ley a na mé kjuanchankíhi sín tí ch'ín Jesús kíxin:

—¿Nkekuènté kíxin tí sín xrikoa la nchexiteyáhya sín tí nkehe k'uékinkáchónki tí sín táda k'uéjó ósé? Na mé tí sín xrikoa t'óntihya sín tja sín ntá kjónté ine sín —ichro sín.

⁶ Kjuátuhe ch'ín Jesús ntáchro ch'án kíxin:

—Ntoá tsíchrónka ch'ín Isaías ósé k'uéchrónka iten Dios tsíntáchro ch'án kíxin ntoáhya tsjenkayáxinrá tí jahará kíxin xíkihi tsíkjín ch'án ntáchro ch'án kíxin:

Tí chojni tí chjasin i ir'va ó xraxinkakonxín sín tí janhan,
a ntá tí əsén sín ikjín kuítuhe sín tí janhan

⁷ Méxra ó chónkó tóchjina sín xraxinkaon sín tí janhan,

kíxin tí nkehe tjako sín la tí nkehe tsík'etqan chojni ó.*

Mé xíkaha ichro itén Dios. ⁸ Ntá jahará kuitohérá tí nkehe tsík'etqan Dios ntá chréhérá tí nkehe ch'e chojni, a la mé tjonemárá nchésen, la ko tí vaso t'iárá nkehe, la ko kjaxin í so nkehe yóhé tinkachónkirá —ichro ch'án.

⁹ Kjaxin ntáchro ch'án kíxin:

—Jahará chréhérá tí nkehe k'uékjich'e chojni ntá xíkaha titohérá ntáha tí nkehe tsík'etqan Dios. ¹⁰ Tsíntáchro ch'ín Moisés kíxin: “Tsochontehérá kjuasáyé it'ará la ko inárá”, la ko “A ntá tí nkexro t'ántaxínhin it'é o iné la chrók'óyán sín.”[†] ¹¹ A ntá jahará ntáchrorá kíxin ó nchoxon kíxin ijnko nkexro tsochénka it'é la ko iné kíxin: “It'eni, Inéni, chrokjuahya tsjinkitsani tí jaha kíxin kaín tí nkehe chontani mé k'óna Corbán” (mé t'axrjexín kíxin kaín tí chichaon k'uáyéh Dios). ¹² A ntá xíkaha jnkoyín nkexro tsontáchro ch'án tíhi ntá jahará tsontáchrorá kíxin í t'ichjánxínhya tsjinkitsa ch'án tí it'é ch'án la ko tí iné ch'án. ¹³ A ntá tí xíkaha la titohérá tí nkehe tsík'etqan Dios éxí sínkíhyá, a ntá ókjé nkehe ich'erá, ntá tánkíhará chojni. Mé xíkaha ich'erá nchónhyá nkehe tóyóhé tíha —ichro ch'ín Jesús.

¹⁴ Na ntá k'uíyéhе ch'ín Jesús tí chojni ínaá ntáchro ch'án kíxin:

—Tinhínrá kaín rá tí nkehe ntáxrjan la ko tiénxinrá. ¹⁵ Tí nkehe ine chojni la jehya jie tíha. Tí nkehe t'axrjeníxin əsén chojni mé jie tíha. ¹⁶ Tí tjinkáonrá chrókuinhínrá la chrókuinhínrá —ichro ch'án.

¹⁷ A ntá tió kuítuhe ch'án kaín tí sín tsíkóchjina a na ntá jehe ch'án la ko tí sín k'uájiko ch'án mé k'uíxenhen sín nchia. Na ntá kjuanchankíhi sín ch'án kíxin nkexrí t'axrjexín tí nkehe kjuako ch'án a. ¹⁸ Na ntá ntáchro ch'ín Jesús kíxin:

—¿Á kjaxinrá tiénxinyará? ¿Á noahyará kíxin tí nkehe ineni na jehya jie ¹⁹ kíxin jehya əsénni sásjí? Tí nkehe ineni na sájtí nkaya tseeni na ko xik'axrje ínaá —ichro ch'án.

Mé t'axrjexín kíxin tí nkehe sineni la jehya jie.

²⁰ Ntá ntáchro ch'ín Jesús kíxin:

—A ntá tí nkehe t'axrjeníxin chojni na mé jie táha. ²¹ Nkaya əsánrá mé t'axrjeníxin tí jínahya tjenkayáxinrá, la ko tí tjachehe kíchuárá, la ko tí tjinkáonrá tsochontará chojni chjin ókjé, la ko tí t'oyán kíchuárá ²² la ko tí chrókuéerá, la ko tí tjaké əsánrá tí nkehe chonta ókjé sín, la ko tí jínahya ch'ehérá kíchuárá, la ko tí kjuach'ia xríkoará la ko tí jínahya tjenkayáxinrá, la ko tí chjinoxínhanrá, la ko tí ch'énará kjuach'ia, la ko tí kjuahnke chontará, na kó ti chontahyará kjuaxrexinkaon jína. ²³ Kaín tí nkehe jínahya a mé t'axrjeníxin chojni, la mé tjasixín sín jie.

*Ijnko tjan tsíkjixin kjín mé kuítekaon tjan tí ch'ín Jesús
(Mt. 15.21-28)*

²⁴ Ntá ch'ín Jesús mé sákjuíxín ch'án ntiha ntá sákjuí ch'án nó chjasin Tiro la ko chjasin Sidón. Ntá k'uíxenhen ch'án ijnko nchia kíxin tjinkakonhyá ch'án kíxin chrókónohe chojni

* ^{7:7} Isaías 29.13 † ^{7:10} Éxodo 20.12; 21.17

kixin ntaha tjen ch'án. Kjánchó xitjahya kjuák'emá ch'án ntiha. ²⁵ Na ntá ijnko iné ijnko tjan tjarisoá chóntha ijnko nchakuen tí jínahya mé kuínhin nkehe tí xrä ch'e ch'ín Jesús kixin tjasin ch'án kjuaxroan, ntá tuénxín kui tjan kjuák'exín toch'in tjan chrínkí toté ch'ín Jesús. ²⁶ Na mé jehe tjan tsíkjixín kjín, na mé tsíkjixín tjan nó nación Sirofenicia. Na ntá jehe tjan a mé kui tjan chrónóehé tjan tí ch'ín Jesús kixin chrókuakitsje ch'án tí nchakuen tí jínahya chóntha xjeen tjan.

²⁷ Ntá ntáchro ch'ín Jesús kjuátēhe ch'án kixin:

—Títóhé senó chrókjóne tí xjan. Jehya tí jína chrókuakítsjaha xjan tí niotja ntá chrótjaha konia chrókjóne va —ichro ch'án.

²⁸ Ntá jehe tjan kjuátēhe tjan ntáchro tjan kixin:

—Chaxín xíkaha, Ìnchéni. Kjánchó kjónté tí konia tjejoyánkí mesa ine tí tot'ó niotja tóxènjin tí chánjan —ichro tjan.

²⁹ Ntá ntáchro ch'ín Jesús kixin:

—Táha la chaxín ntoá ntáchrula. Sátjia kixin tí nchakuen tí jínahya ó k'uaxrjexín tí xjaan —ichro ch'án.

³⁰ A ntá tió kjuúji tjan ntœe tjan, na ntá k'uíkon tjan kixin tí xjeen tjan na mé ó ntoá tjetsíkaták'á xjan tí cama kixin ó tsík'axrje tí nchakuen tí jínahya a.

Ch'ín Jesús mé kjuínchekitohe jína ijnko ch'ín tienhya la ko nixjahya

³¹ Ntá ch'ín Jesús mé ó k'uaxrjexín ch'án ínaá nō chjasin Tiro ntá k'uátsínska ch'án chjasin Sidón la ko k'uátsínska ch'án tí estado Decápolis ntá kjuúji ch'án nō ntayaon Galilea.

³² Ntá kuikqo sín ijnko ch'ín tienhya na ko ntoáhya nixja ch'án. Ntá chrónóehé sín tí ch'ín Jesús a kixin tsjak'etja tja ch'án chrítaón kja tí ch'ín a kixin tsitohe ch'án jína. ³³ Na ntá ch'ín Jesús k'uaxrjentako ch'án tí ch'ín tienhya, k'uaxrjenta sín tí kohya chojni. Na ntá tí dedo tja ch'án mé chráxenhen ch'ín Jesús tatsjon tí ch'ín tienhya. La ko kjaxin tí dedo tja ch'án mé kuikjite ch'án ntaté ch'án ntá kjuínchekákoxín ch'án nejen tí ch'ín nixjahya a.

³⁴ Ntá konta ch'án nkajní k'uáváxin ch'án na ntá nixjehé ch'án tí ch'ín tienhya a, ntáchro ch'án kixin:

—Efata —mé t'axrjexín nkívée sín kixin: ¡Tsoxitjehé!

³⁵ Na ntá tuénxín xítjehé tatsjon tí ch'ín tienhya ntá kuínhin ch'án la ko kuítjehé jína tí nejen ch'án, ntá jína nixja ch'án. ³⁶ Ntá ch'ín Jesús k'uetoan ch'án kixin ninkexró tsochenkahya sín. Ntá kjónté imá k'uetoan ch'án ntá ántosén sín kjónté íchá xrichronka sín. ³⁷ Na mé imá chrakon sín ntá ntáchro sín kixin:

—Kaín nkehe ch'e ch'án la jína. Tí chojni tienhya la tinhin sín la ko tí chojni nixjahya la nixja sín —ichro sín.

8

Ch'ín Jesús mé kjuanjon nkehe kjóne noó mil chojni

(Mt. 15.32-39)

¹ A ntá ijnko yaon nchónhya chojni k'uíxikóchjina ínaá. A ntá chóntahya sín nkehe sine sín. Na ntá ch'ín Jesús mé k'uíyehé ch'án tí sín k'uájiko ch'án, a ntá ntáchro ch'án kixin:

² —Imá tikonóahá kaín tí sín i kixin ó ní yaon tjékian sín ntihi ntá chóntahya sín nkehe sine sín. ³ Ntá chrókuétuanhya sín sáchrókjui sín ntœe sín tí naxa nehya sín kixin ntja ó chrókótienxin sín kixin iso sín la imá kjín tsíkjixín sín —ichro ch'ín Jesús.

⁴ Na ntá kjuátēhe tí sín k'uájiko ch'án ntáchro sín kixin:

—¿Nkekjaín niotja chontará jahará? —ichro ch'án.

Ntá jehe sín kjuátēhe sín ntáchro sín kixin:

—Yato niotja chóntani —ichro sín.

⁶ Na ntá ch'ín Jesúś k'uētuēnhen ch'án kaín xín sín kíxin ts'ixitjaxin sín nonte. Ntá kuákja ch'án tí yato niotja ntá kjuanchehe ch'án kjuasáyé Dios ntá kóchrít'q ch'án tí niotja a. Ntá chjéhe ch'án tí sín k'uájiko ch'án kíxin jehe sín ts'óxíkayéhe sín tsakja kaín xín tí sín siín a. ⁷ Na ko iso koche ntsíntsí chóntha sín. Ntá ch'ín Jesúś kjuanchia ch'án kjuasáya ntá k'uētqan ch'án ts'óxíkayéhe sín kjaxin. ⁸ Na mé kaín xín sín kjóne sín na kókjehé sín. Ntá chr'éxín naxaq kjuinchekaon sín yato ntaxra tí tot'q tí nkehe tsíxehé. ⁹ Na mé chjina noó mil chojni kjóne sín. Ntá ch'ín Jesúś mé nixjéhe ch'án sín sákjuí sín ¹⁰ ntá tuénxín jehe ch'án la ko tí sín k'uájiko ch'án na mé k'uít'ótjen sín tí ntabárco a sákjuí sín nó tí nonte Dalmanuta.

Tí sín fariseo tjanchia sín ijnko kjuaxroan jié

(Mt. 16.1-4; Lc. 12.54-56)

¹¹ Na ntá kui iso sín fariseo kjuankíxin sín tjo sín tí ch'ín Jesúś kjuanchehe sín ch'án kíxin chrókjuakoxin ch'án ijnko kjuaxroan jié kuénte nkaya nkajní kíxin tjinkaon sín chrókjuachaxin sín ch'án. ¹² A ntá ch'ín Jesúś na mé k'uáváxin ch'án ikjín kjanxin asén ch'án ntá ntáchro ch'án kíxin:

—¿Nkekuénté kíxin tí chojni i na mé tjanchia sín ijnko kjuaxroan jié? Ijie la ninkehó kjuaxroan tsjákoxinhya —ichro ch'án.

¹³ Na ntá kuítqhe ch'án tí sín a, ntá xík'it'ótjen ch'án tí ntabárco ntá sákjuí ch'án í jnko tóhe ntayaon ínaá.

Tí xroan nchek'ánkí tí niotjé tí sín fariseo

(Mt. 16.5-12)

¹⁴ Ntá k'uítjáyehen sín tsíkjikohya sín nkehe sine sín. Jehó jnkokoá niotja chóntha sín nkaxenhen tí ntabárco a. ¹⁵ Ntá ch'ín Jesúś k'uētuēnhen ch'án tí jehe sín kíxin:

—Chrókóxakonhanrá kíxin tí xroan nchek'ánkí niotjé tí sín fariseo la ko niotjé tí ch'ín Herodes a —ichro ch'án.

¹⁶ Ntá tí sín xriko ch'án mé kjo sín kíchó sín kíxin:

—Mé xíkaha ichro ch'án kíxin tsíkjikohyan niotja.

¹⁷ Ntá kónohe ch'ín Jesúś kíxin nkehe tí kjo sín kíchó sín ntá ntáchro ch'án kíxin:

—¿Nkekuénté tjórá kíxin chontahyará niotja? ¿Á naxaq tiénxinhyará la ko naxaq noah-yará? ¿Á kénhya asánrá tinkachónkirá Dios? ¹⁸ ¿Á t'ikonxinhyará ikonrá la ko á tiénxinhyará tátsjinrá? ¿Á xráxinkákonhyará? ¹⁹ Tió kóchrít'vá tí n'ó niotja kjóne in'ó mil chojni na ¿nkekjaín ntaxra tí tot'q niotja naxaq kjuenájinrá? —ichro ch'án.

Ntá jehe sín kjuátehe sín ntáchro sín kíxin:

—Teyó ntaxra tí nkehe kjuenájinni —ichro sín.

²⁰ Xintáchro ch'ín Jesúś ínaá kíxin:

—Na ko tí kóchrít'vá tí yato niotja kjóne noó mil chojni na ¿nkekjaín ntaxra tí tot'q niotja kjuenájinrá? —ichro ch'ín Jesúś.

Ntá ntáchro sín kíxin:

—Yato ntaxra —ichro sín.

²¹ Ntá ch'ín Jesúś ntáchro ch'án kíxin:

—Kjónté xíkaha la, ¿á naxaq tiénxinhyará? —ichro ch'án.

Ch'ín Jesúś mé kjuínchekitohe jína ijnko ch'ín t'ikonhyá tí chjasin Betsaida

²² A ntá chr'éxín kjuíji sín chjasin Betsaida, a ntá ikui iso sín kuikqo ijnko ch'ín t'ikonhyá. Ntá chrónóehe sín tí ch'ín Jesúś kíxin chrókjuinchekitohe ch'án jína tí ch'ín a.

²³ Ntá ch'ín Jesúś mé itsé ch'án tja tí ch'ín t'ikonhyá a ntá k'uaxrjentako ch'án ikon tí chjasin a. Na ntá kuikitehe ch'án ntaté ch'án ikon tí ch'ín t'ikonhyá a la ko kjuak'etja tja ch'án ntá kjuanchankíhi ch'án kíxin:

—¿Á ó t'ikuan ntsí? —ichro ch'án.

²⁴ Ntá ntáchro tí ch'ín t'ikonhyá kíxin:

—T'ikanni chojni, kjánchó éxi nta tsjehe itji —ichro ch'án.

²⁵ Ntá ch'ín Jesús mé xíkjak'etja tja ch'án ínaá tí kon tí ch'ín t'ikonyha a. A ntá tí ch'ín k'uíkonhyá kuítóhe ch'án jína la jína t'ikon ch'án kaín nkehe. ²⁶ Na ntá ch'ín Jesús mé k'uétenhen ch'án tí ch'ín k'uék'ikonyha kíxin sátsji ch'án ntoe ch'án ntáchro ch'án kíxin:
—Chrók'uíxenhya chjasin la ko ninkexró chróchenkahya ntiha —ichro ch'án.

*Ch'ín Pedro chrónka ch'án kíxin ch'ín Jesús mé tí nkexro Cristo
(Mt. 16.13-20; Lc. 9.18-21)*

²⁷ A ntá tí ch'ín Jesús la ko tí sín k'uájiko ch'án sákjuí sín tí chjasin ntsí chjino Cesarea de Filipo. A ntá tí ntia mé kjuanchankíhi ch'ín Jesús tí sín k'uájiko ch'án kíxin:
—¿Nkehe ntáchro chojni kíxin nkexro tí janhan? —ichro ch'án.

²⁸ Ntá ntáchro sín kíxin:
—Iso sín mé ntáchro sín kíxin jaha mé ch'ín Juan Bautista, ichro sín. A ntá í so sín na mé ntáchro sín kíxin jaha mé ch'ín Elías, ichro sín. A ntá í so sín mé ntáchro sín kíxin jaha mé ijnko tí sín tsíchrónka itén Dios ósé —ichro sín.

²⁹ Ntá kjuanchankíhi ch'án sín ínaá kíxin:

—¿A ntá jahará nkechrorá kíxin nkexro tí janhan? —ichro ch'án.

Ntá kjuátehe ch'ín Pedro ntáchro ch'án kíxin:

—Jaha mé tí Cristo, ichroni —mé chro ch'án.

³⁰ Ntá k'uetoan ch'ín Jesús kíxin tsochenkahya sín ninkexró.

*Ch'ín Jesús chrónka ch'án kíxin ts'en ch'án
(Mt. 16.21-28; Lc. 9.22-27)*

³¹ Na ntá kjuankíxin kjuako ch'ín Jesús kíxin tí Xjeen Dios K'óna Chojni mé t'ichjánxiñ kíxin imá tsjasóte ch'án la ko tsotjinkakonyha kaín tí sín táda kuénte ninko la ko tí sín t'etoan kuénte tí sín nchat'á la ko tí sín maestro tjako tí ley. A ntá tí sín a mé ts'oyán sín ch'án. Kjánchó tí níxín yaon na ó tsozechón ch'án ínaá. ³² Kaín tíha mé ntoá chrónka ch'án. A ntá ch'ín Pedro mé kuakitsjenta ch'án tí ch'ín Jesús chrókjuentuéhe ch'án. ³³ Na ntá kuinkátjíá ch'ín Jesús komá ch'án kaín tí sín k'uájiko ch'án a. Ntá kjuentuéhe ch'án tí ch'ín Pedro a ntáchro ch'án kíxin:

—¡Sátjia ntáha, Satanás! Jaha la tjenkayáxinhya éxi tjenkayáxin Dios. Náhí. Jaha tjenkayáxian éxi tjenkayáxin chojni ó —ichro ch'án.

³⁴ Ntá ch'ín Jesús mé k'uíyehé ch'án tí sín k'uájiko ch'án la ko tí sín tsíkóchjina a. Ntá ntáchro ch'án kíxin:

—Tí jnkójínrá tjinkáonrá tsochréhérá tí janhan na t'ichjánxiñ tsitohérá kaín tí nkehe tjaké ásanrá na ntá tsamárá tí ntacruz kuéntará, a ntá tsochréhérá tí janhan. ³⁵ A ntá tí nkexro tjinkaon jehó sinchekaá ásén mé ts'itjáyan. A ntá tí nkexro sinchek'itjáyanxiñ ásén kíxin tinkáchónki tí janhan la ko chrónkaxín tí tan tsjanjon kjuachón mé tsaá. ³⁶ ¿A ntá nkehe tsónhen tí chrókjuaacha ijkno chojni chróchóntha kaín nkehe siín chjasintajni, a ntá kjuachón chrókjuechek'itjáyan? ³⁷ ¿Nkehe chrókjuenkä chojni kíxin chróchóntha tí kjuachón? ³⁸ A ntá jnkójín nkexro tsosuèhe kíxin tinkáchónki tí janhan la ko tí tan kuéntana nkayakon tí chojni jínahya chóntha jie la kjaxin tí Xjeen Dios K'óna Chojni tsosuèhe ch'án tsontáchro ch'án kíxin chóxin ch'án tí jehe sín tió tsokjan ch'án tsíkao ch'án tí kjuachaxin jié kuénte It'é la ko tsíkao tí sín ángel.

9

¹ Na ko kjaxin chrónka ch'ín Jesús kíxin:

—Chaxín ntáxrjan kíxin isorá tjejorá ntihi la naxaq ts'énhyará ts'ikonyiará itsi tí kjuachaxin ts'etoan Dios —ichro ch'án.

*Ch'ín Jesús mé k'uíxitoxín nkexrí tsjehe ch'án
(Mt. 17.1-13; Lc. 9.28-36)*

² Ntá k'uátsínska injon yaon ntá ch'ín Jesús mé sákjuiko ch'án ch'ín Pedro la ko ch'ín Jacobo la ko ch'ín Juan sákjuí sín jehó sín ijkno jná noi. Ntá ntiha mé xrínahya k'uíxitoxín

ókjé nkexrí tsjehe ch'án k'uíkon tí jehe sín. ³ A ntá iké ch'án tsík'óna imá tjákini la ko imá tjóá éxí chrinta tsjehe, a ntá ntihi chjasintajni kohya ninkexró chrókjuen tí ka chrókuitohe imá tjóá xíkaha. ⁴ Na ntá titàyá k'uíkuèn sín ntiha itjen tí ch'ín Elías la ko tí ch'ín Moisés tjejótjo sín tí ch'ín Jesús. ⁵ A ntá ch'ín Pedro mé ntáche ch'án tí ch'ín Jesús kíxin:

—Maestro, jína kíxin tjejóni ntihi. Chrókjuich'énani iní nchia la mé ijkno kuéntá la ko ijkno kuénte ch'ín Moisés la ko ijkno kuénte ch'ín Elías.

⁶ Mé xíkaha ichro ch'án kíxin kaín sín la imá chrakon sín la tí ch'ín Pedro la mé í noehya ch'án nkehe tsixro ch'án. ⁷ Na ntá xrínahya ikui ijkno tjuí kjuák'etja chrítaón kaín xín tí tjejó sín. Na ntá chríkjan tí tjuí kuínhin sín itén ijkno nkexro nixja na mé ntáchro kíxin:

—Tí nkexro i mé xjanna. Imá tjuahá ch'án. Chrókuinhínrá tí nkehe tjako ch'án.

⁸ Na ntá tió tsjehe sín nkuíxín tí tjejó sín la í kohya tí iyó sín a. Jehó tí ch'ín Jesús tjejóko sín.

⁹ A ntá tí ó k'uínkajinxin sín tí jnä ntá k'uetoan ch'ín Jesús kíxin tsochenahya sín ninkexró tí nkehe k'uíkon sín hasta tsozechónjian tí Xjeen Dios K'óna Chojni. ¹⁰ Ntá ninkexró chenahya sín tí nkehe k'uíkon sín. Na ntá jehó sín mé tjejótjo sín kíxin nkehe t'axrjexín tí nkehe chrónka ch'án kíxin tsozechón ch'án ínaá. ¹¹ Na ntá kjuanchankíhi sín tí ch'ín Jesús ntáchro sín kíxin:

—¿Nkeuènte kíxin ntáchro tí sín tjako tí ley kíxin sáoxín itsi tí ch'ín Elías la ntá chr'éxín itsi tí nkexro tsaáxinni? —ichro sín.

¹² Ntá ntáchro ch'ín Jesús kíxin:

—Chaxín sáoxín itsi ch'ín Elías la ntá tsjasiyóxin ch'án kaín xín nkehe. ¿A ntá nkehe ntáchro xroon itén Dios kíxin nkehe tsónhen tí Xjeen Dios K'óna Chojni? Na mé ntáchro kíxin t'ichjánxin tsjasóte la ko tsotjinkakonhya sín. ¹³ Kjánchó ó xrjanka kíxin chaxín ó tsíki ch'ín Elías, ntá kjuínchekjasóte sín ch'án éxí kóxrjínhin sín éxí nixja tí xroon itén Dios kíxin xíkaha tsónhen —mé xíkaha chrónka ch'ín Jesús.

*Ch'ín Jesús mé kjuínchekitóhe jína ijkno xjan chónta ijkno nchákuén tí jínahya
(Mt. 17.14-21; Lc. 9.37-43)*

¹⁴ A ntá tió ikjan sín tí kuítohe tí í so sín k'uájiko ch'án ntá k'uíkon sín kíxin nchónhya chojni tsík'ántatjen tí jehe sín. Kjáxin ntaha siín tí sín tjako tí ley ikjo tí jehe sín. ¹⁵ A ntá tuénxín tió k'uíkon sín tí ch'ín Jesús na ntá kaín sín kóchéhé sín tinká sín sákuíchréhé sín ch'án, tsonixjéhé sín ch'án. ¹⁶ Ntá ch'ín Jesús kjuanchankíhi ch'án sín ntáchro ch'án kíxin:

—¿Nkehe tí tjórá tí sín i? —ichro ch'án.

¹⁷ Ntá tjen ijkno ch'án tjenkákjan sín ntiha kjuátóhe ch'án kíxin:

—Maestro, ntihi kjuíkian ijkno xjanna chónta nchákuén tí jínahya na mé nchenixjahya xjan. ¹⁸ Kjónté nkerí tjen xjan la tí nchákuén tí jínahya mé tjáka xjan nonte, ntá ntálóxrjo sítixin ir'va xjan na netaón xjan neno xjan na méxra tjiehýa xjan. Ntá xrjanóahá tí sín xrikoa kíxin chrókuakitsje sín tí nchákuén tí jínahya a. Kjánchó kjuachahya sín —ichro ch'án.

¹⁹ Ntá ch'ín Jesús kjuátóhe ch'án ntáchro ch'án kíxin:

—Jahará chojni kénhya asánrá tinkachónkirá Dios. ¿Xá hasta nkesá tjinkáonrá náxa ts'ejóni? ¿Xá hasta nkesá tsjácha tsjak'é tsjákokhará? Xrákóará ntihi tí xjan méhé —ichro ch'án.

²⁰ Na ntá kóchjinako sín tí xjan a. Na ntá tí nchákuén tí jínahya mé k'uíkon tí ch'ín Jesús ntá kjuínchek'aniáte tí xjan a kjuítsínka xjan nonte la kjaminkítáón xjan nonte la sítji ntálóxrjo ir'va xjan. ²¹ Ntá ch'ín Jesús mé kjuanchankíhi tí it'é tí xjan a ntáchro ch'án kíxin:

—¿Á ósé xíkaha tónhen xjan? —ichro ch'án.

Ntá ntáchro tí it'é tí xjan kíxin:

—Desde nax̄a xjanntsí xjan. ²² A ntá jinkoyaxón tí nchakuen tí jínahya a mé tjákáte xjan xrohi la ko tjákánkí xjan inta kíxin tjinkaon chrók'óyán tí xjan a. A ntá jaha ¿á tsjácha tsjinkitsani? La tikonóehéni tsjinkitsani —ichro ch'án.

²³ Ntá ntáchro ch'ín Jesús kíxin:

—¿Nkekuénté tjanchankína kíxin á tsjácha? Tí tsitekávan la kaín nkehe la jína tsónhen, kíxin tí nkexro tsitekaon Dios la jína tsónhen kaín nkehe —ichro ch'án.

²⁴ Ntá tuénxín itsen kjuátehe tí it'é xjan, ntáchro ch'án kíxin:

—Ó titekaonni. Tsjinkitsani kíxin antsí má tsitekaonni tí jaha —ichro ch'án.

²⁵ Ntá k'uíkon ch'ín Jesús kíxin itsjé chojni kóchjina. Ntá nixjehé ch'án tí nchakuen tí jínahya chónta tí xjan a ntáchro ch'án kíxin:

—Jaha la ijkno nchakuen tí jínahya nchenixjahya chojni la ko nchekíenya chojni. Ijje la tétuñhan kíxin t'axrjéxian tí xjan na ko tsitohé xjan la í tsokjanhya ínaá —ichro ch'án.

²⁶ Ntá tí nchakuen tí jínahya a na mé k'óyato la ko kjuínchek'aniáte tí xjan a ínaá, ntá k'uaxrjexín ntiha. Na éxi tsík'en xjan xíkaha tsjehe xjan. Ntá itsjé sín ntáchro sín kíxin ó tsíkixin tsík'en xjan, ichro sín. ²⁷ Na ntá ch'ín Jesús mé tséhe tja tí xjan kjuínchek'inkatjen ch'án xjan.

²⁸ Ntá ch'ín Jesús la ko tí sín k'uájiko ch'án k'uíxenhen sín ijkno nchia. Ntá jehe sín kjuanchankíhi sín ch'án kíxin:

—¿Nkekuénté kíxin kjuachahyani kuakitsjeni tí nchakuen tí jínahya a? —ichro sín.

²⁹ Ntá ntáchro ch'án kíxin:

—Tíhi la t'ichjánxín kíxin nchónhya tsochronóehérá T'aná la ko sintehyará —ichro ch'án.

Yóxin chrónka ch'ín Jesús kíxin its'en ch'án

(Mt. 17.22-23; Lc. 9.43-45)

³⁰ A ntá tió sákjuíxin sín ntiha ntá k'uátsínska sín estado Galilea. A ntá ch'ín Jesús tjinkakonhya ch'án kíxin ninkexró ntiha tsongohe sín ³¹ kíxin tinkákjakohé ch'án tí sín k'uájiko ch'án a. Na mé chrónka ch'án ntáchro ch'án kíxin:

—Tí Xjeen Dios K'óna Chojni mé tsotsé sín ch'án la ko tsjikaán sín ch'án na ko ts'óyán sín ch'án. Kjánchó tí yaon níxin na ó tsozechón ch'án ínaá —ichro ch'án.

³² Ntá jehe sín mé kíenxínya sín nkehe tí ntáchro ch'án la chrakon sín chrókjuchankíhi sín ch'án nkexrí t'axrjexín tíha.

¿Nkexro tí imá tjetoan?

(Mt. 18.1-5; Lc. 9.46-48)

³³ Ntá kjuíji sín chjasin Capernaum; a ntá tí tjejó sín tí nchia ntiha ntá ch'ín Jesús mé kjuanchankíhi ch'án sín ntáchro ch'án kíxin:

—¿Nkehe tí tinkakjórá kíchuárá tí kuini ntja? —ichro ch'án.

³⁴ Ntá jehe sín la táníkoá sín kíxin tí ntja kui sín tinkákjo kíchó sín kíxin nkexro tí imá ts'etoan. ³⁵ Ntá ch'ín Jesús mé kjuák'etjaxin ch'án ntá k'uíyehe ch'án tí teyó sín k'uájiko ch'án, a ntá ntáche ch'án sín kíxin:

—Tí jinkoyána tjinakonrá chrók'etjetoanrá má ntá t'ichjánxín kíxin tsjixixín tsochréhérá kaín sín, ts'ítuanhanrá la ko tsjinkitsará kaín xín sín —ichro ch'án.

³⁶ Ntá tséhe ch'án tja ijkno chánjan kjuak'e ch'án jnkosiné tí tjejó tí jehe sín a, ntá kjóa ch'án tí xjan a. Ntá ntáchro ch'án kíxin:

³⁷ —Tí jinkoyín nkexro chrók'uáyéhé ijkno chánjan kíxin tinkáchónki sín tí janhan la mé xíkaha chrók'uáyéhé sín tí janhan la ko kjaxin éxi chrók'uáyéhé sín tí nkexro ichr'ánná —ichro ch'án.

Tí nkexro nínkakuenhyani tí jeheni la tjinkitsa tí jeheni

(Lc. 9.49-50; Mt. 10.42)

³⁸ A ntá ch'ín Juan mé ntáchro ch'án kíxin:

—Maestro, k'uíkonné ijnko chojni na mé kjuachaxin ihniá mé takitsjexín ch'án nchakuen tí jínahya chóntha chojni. Ntá k'uéetuénhenni ch'án kíxin xíkahya chrókjuch'e ch'án kíxin xrikohyani ch'án —ichro ch'án.

³⁹ Ntá ntáchro ch'ín Jesús kíxin:

—Nté títóhé ch'án kíxin ninkexró tjasixín kjuaxroan kjuachaxin nína la tuénxín chrókjucha chrók'uántaxina sín. ⁴⁰ Tí nkexro ninkakuenhyani la mé tjinkitsa tí jeheni.

⁴¹ A ntá jnkójín nkexro tsotjáhará kjónté ijnko vaso inta tsjanjonxín sín nína kíxin jahará la tinkachónkirá Cristo, ntaxrjan kíxin chaxín ts'áyéhe sín nkehe.

Tí chojni tjasin jie mé tsjasóte sín

(Mt. 18.6-9; Lc. 17.1-2)

⁴² A ntá jnkójín nkexro chrókjuchroe ijnko xjan kíxin chrókjusin xjan jie tió tinkáchónki xjan tí janhan la íchá jína chrókjucheteyá sín ch'án ijnko xro jié tsík'óna xrochre la chrókjukákánkí sín ch'án ntayaon. ⁴³ A ntá tí itjá tjásixián jie na mé íchá chrókjína chrókochrínjian kíxin kjónté jnkokoá tjá mé tsochontaxián kjuachón. A ntá tí yói tjá la tíha mé sáchrókjuíxian tí siín xrohi xitjahya ts'anka, ⁴⁴ tí siín kosinto t'enhya la ko síche xrohi ts'ankahya. ⁴⁵ A ntá kjaxin tí totá tjásixián jie na íchá jína chrókochrínjian kíxin kjónté jnkokoá totá mé tsochontaxián kjuachón. A ntá tí yói totá la tíha sáchrókjuíxian tí siín xrohi xitjahya ts'anka, ⁴⁶ tí siín kosinto t'enhya la ko síche xrohi ts'ankahya. ⁴⁷ A ntá tí ikuan tjásixián jie na íchá jína chrókuakitsjenkiá tí kuan a kíxin kjónté jnkokoá kuan mé sáchrókjuia tí tjen Dios t'etoan. A ntá tí yói kuan la tíha mé sáchrókjuíxian tí síche xrohi ⁴⁸ tí siín kosinto t'enhya la ko siín xrohi ts'ankahya.

⁴⁹ A ntá kaín nkexro t'ichjánxín tsjasóte. A ntá kaín nkehe ts'áyéhe Dios chóntha xíjnta.

⁵⁰ Tí xíjnta la jína. A ntá tí chrók'uankehe tí jní la ntá xitjahya chrókójní ínaá. Jahará mé chrókóyóhará éxi xíjnta kíxin kjuaxróxin chrók'uejokoárá kíchuárá —ichro ch'án.

10

Tjako ch'ín Jesús kíxin chrókjukéhya kíchó sín

(Mt. 19.1-12; Lc. 16.18)

¹ Na ntá ch'ín Jesús mé k'uaxrjexín ch'án chjasin Capernaum sákjuí ch'án nó estado Judea la ko nó tóhe ntarío Jordán. Ntá nchónhya chojni kójkotsé sín tí tjen ch'án ntiha. Ntá kjuákohé ch'án tí jehe sín kíxin xíkahya kuènhen ch'án. ² Ntá iso sín fariseo mé kóchjinehe sín ch'án kjuanchankíhi sín ch'án nkehe, chrókjuchaxín sín ch'án. Ntáchro sín kíxin:

—¿Á siín kjuachaxin tsjákéhe chojni ntoa ichjién? —ichro sín.

³ Ntá kjuátēhe ch'án ntáchro ch'án kíxin:

—¿Nkehe tí k'uétuanhánrá tí ch'ín Moisés? —ichro ch'án.

⁴ Ntá ntáchro sín kíxin:

—Ch'ín Moisés kjuanjon ch'án kjuachaxin kíxin ts'óna ijnko xroon tsakja tí ichjién kíxin ts'itjíexín kíchó sín —ichro sín.

⁵ Ntá ch'ín Jesús ntáchro ch'án kíxin:

—Ntá jahará icha qasánrá títekákonhyará ntá k'uetoan ch'án ts'óna tí xroon a. ⁶ Kjánchó tí xránkixixín tió kjuich'eña Dios kaín xín nkehe la kjuich'eña ch'án ijnko chojni ntoa la ko ijnko chojni chjin.* ⁷ Méxrä tí chojni ntoa tsítóhe ch'án tí it'é ch'án la ko iné ch'án kíxin tsakja ch'án ichjién ch'án ⁸ ntá yói sín ts'óna sín éxi jnkokoá chojni. Méxrä jehya yaá chojni. Náhí, jnkokoá.† ⁹ Na mé xíkahya tí kjuachaxin kuénte Dios kójnkojéxin sín ntá jehe sín chrók'uitjéhya kíchó sín —ichro ch'án.

¹⁰ A ntá tjejó sín nchia ntá tí sín k'uájiko ch'án a mé kjuanchankíhi sín ch'án ínaá kíxin á xitjahya ts'itjíhi kíchó sín. ¹¹ Na ntá ntáchro ch'ín Jesús kíxin:

* **10:6** Génesis 1.27; 5.2 † **10:8** Génesis 2.24

—Tí jnkojín nkexro tsjákehe ichjién ntá tsakja ch'án í jnko chjin na mé xíkaha tsjáchehe ch'án tí tjan tsíkotéhe ch'án sáoxín. ¹² La ko kjaxin tí chojni chjin tsíkjakéhe xì tsakja tjan í jnko chojni ntoa na mé xíkaha kjaxin tjan tjasin tjan jié —ichro ch'án.

Ch'ín Jesú斯 kjuíncheyaon ch'án xjan

(Mt. 19.13-15; Lc. 18.15-17)

¹³ Ntá kjuikao sín xjan kíxin tjinkaon sín tsjak'etja tja ch'ín Jesú斯 tí xjan a. Ntá tí sín k'uájiko ch'án mé kóninkakonhen sín tí sin kjuikao xjan. ¹⁴ Ntá k'uíkon ch'ín Jesú斯 ntá kóninkaon ch'án ntáchro ch'án kíxin:

—Nté titohérá tí xjan tsroxrakoa tí tjén janhan la t'inkakuènhyará xjan kíxin tí sín kuénte kjuachaxin kuénte Dios la mé tóyóhe éxí tí xjan a. ¹⁵ Ntá chaxín ntáxrjan kíxin tí nkexro ts'ónahya éxí ijkko chánjan xitjaha ts'ejo sín tí ts'etoan Dios tí kjuachaxin kuénte ch'án —ichro ch'án.

¹⁶ Ntá kjóa ch'án tí xjan a kjuak'etja tja ch'án xjan la kjuíncheyaon ch'án.

Ijkko ch'ín ntasoá rico nixjehé ch'án tí ch'ín Jesú斯

(Mt. 19.16-30; Lc. 18.18-30)

¹⁷ A ntá tió sákjuí ch'ín Jesú斯 ínaá ntá xrakoa ijkko ch'ín tinká ch'án kjuák'exín toch'in ch'án nkayakon tí ch'ín Jesú斯 kjuanchankí ch'án kíxin:

—Jaha, maestro jína. ¿Nkexrí chrókjuich'eni kíxin chrók'uitjani kjuachón jnkochríxín? —ichro ch'án.

¹⁸ Ntá ntáche ch'ín Jesú斯 tí jehe ch'án kíxin:

—¿Nkekuénté ntáchrúa kíxin jína tí janhan? Jehó jnkokoá nkexro mé jína la tíha mé Dios. ¹⁹ Ntá jaha ó noha kíxin nkexrí k'uetoan Dios kíxin: “Chrókjuacheéhya kíchuá la chrók'oyánya chojni la chrókueéhya la chrókjontahya kíchuá la chrókjuich'iahya la ko chróchontehé kjuasáya it'á la ko iná”[‡] —ichro ch'án.

²⁰ A ntá jehe ch'án kjuátehe ch'án ntáchro ch'án kíxin:

—Maestro, kaín tíha kjuínchexiteyáni desde ntasoáni —ichro ch'án.

²¹ Ntá ch'ín Jesú斯 mé komá ch'án la ko tjuéhe ch'án tí ch'ín a. Ntá ntáchro ch'án kíxin:

—Naxa t'itjáyan jnkokoá nkehe chrókjuich'e. Sátjia nchekjia kaín tí nkehe chonta. A ntá tí chichaon sinchekjixián tí nkehe chonta la mé nchekitonhén tí chojni nòa, a ntá tí nkehe tjete tsochonta nkaya nkajní. A ntá tió tsjixin tsjánjuan kaín ntá tsjihá tamá tí ntacruz kuénta la chréhé tí janhan —ichro ch'án.

²² Ntá tió kuínhin ch'án xíkaha ntá k'uává ch'án sákjuí ch'án, kíxin imá tsjé nkehe chónata ch'án.

²³ Ntá ch'ín Jesú斯 komá ch'án tí sín siín ntiha ntáche ch'án tí sín siín k'uájiko ch'án kíxin:

—Imá xrä ijkko chojni chónata imá tsjé nkehe ts'ixenhen sín tí tjen Dios t'etoan —ichro ch'án.

²⁴ Ntá tóxakonhen tí sín k'uájiko ch'án kíxin xíkaha ntáchro ch'án. Ntá chrónka ch'án ínaá kíxin:

—Tí sín tjekonhen tí nkehe chónata sín na imá xrä ts'ixenhen sín tí tjen Dios t'etoan.

²⁵ Antsí xrahya chrók'uátsínka ijkko kocamello ijkko tjar'in ntachica tjexrja. A ntá antsí má xrä ijkko ch'ín chónata itsjé nkehe chrók'uixenhen ch'án tí tjen Dios t'etoan —ichro ch'án.

²⁶ Ntá jehe sín kuínhin sín xíkaha ntá imá chrakon sín. Ntá tjanckankíhi kíchó sín kíxin:

—Tí xíkaha la, ¿xá nkexro chrókjuacha chrókuaá? —ichro sín.

²⁷ Ntá komá ch'ín Jesú斯 tí jehe sín ntáchro ch'án kíxin:

—A ntá chojni ó tsjachahya sich'e tíha, a ntá Dios jína sich'e kaín nkehe, kixin Dios la kohya nkehe tsjachahya sich'e —ichro ch'án.

²⁸ Ntá ch'ín Pedro ntáchro ch'án kíxin:

—Inchéni, kaín ni mé kuítóheni kaín nkehe chóntani ntá chréheni tí jaha —ichro ch'án.

[‡] **10:19** Éxodo 20.12-16; Deuteronomio 5.16-20

²⁹ Ntá kjuátehe ch'ín Jesús ntáchro ch'ín kíxin:

—Chaxín ntáxrjan kíxin jnkojín nkexro tsítóhe ntoe sín la o tí kichó ntoa o tí kichó chjin la o it'e o ìné sín o ichjién sín o xjeen sín o nontee kíxin tinkáchónki sín tí janhan la ko tjinkaon sín chrókuako sín tí tan tsjanjon kjuachón ³⁰ na mé ntihi chjasintajni tsochónta sín ciento veces nchónhya ntoe sín la ko éxi kichó sín la ko éxi ìné sín la ko éxi xjeen sín ts'ikon sín itsjé chojni kjé la ko éxi nontee sín xikaha ts'ikon sín itsjé nonte. Kjónté tsjasóte sín ntihi chjasintajni ntá chr'éxín tsochónta sín tí kjuachón jnkokhríxín. ³¹ A ntá itsjé tí sín t'etoan ijie mé tsjixixín tsochréhe sín. A ntá itsjé tí sín t'ítuenhen ijie, na mé tí sín a mé ts'etoan sín tí ntiha.

Níxin chronka ch'ín Jesús kíxin its'en ch'án

(Mt. 20.17-19; Lc. 18.31-34)

³² Ntá tjejótji sín chriin sín tí ntia sátsji chjasin Jerusalén. Ntá ch'ín Jesús mé tjetaón ch'án ntia ntá tí sín k'uájiko ch'án mé tóxakonhen sín chrakon sín chréhe sín. Ntá k'uíyehé ch'án jehó tí teyó sín ínaá ntá kjuankíxin ch'án chénka ch'án sín nkexrí tí nkehe tsonhen ch'án. ³³ Ntá ntáchro ch'án kíxin:

—Ijie sátsjini Jerusalén. Na ntá tí Xjeen Dios K'óna Chojni mé tsotsé sín ch'án tsjikéhen sín tí sín nchat'á t'etoan la ko tí sín tjako tí ley. Ntá ts'etoan sín kíxin its'en ch'án. Ntá sinchek'áyéhe sín ch'án tí sín jehya judío. ³⁴ Ntá jehe sín la tsjanoá sín tí jehe ch'án la ko ntaté sín tsikite sín ch'án la ko tsjate sín ch'án ntá ts'oyán sín ch'án. Kjánchó tí yaon níxin mé tsozechón ch'án ínaá —mé xikaha ichro ch'ín Jesús.

Ch'ín Jacobo la ko ch'ín Juan tjanchia sín nkehe

(Mt. 20.20-28)

³⁵ A ntá tí ch'ín Jacobo la ko ch'ín Juan mé xjeen ch'ín Zebedeo mé kóchjinehe sín tí ch'ín Jesús ntá ntáchro sín kíxin:

—Maestro, tjanchahani ijnko xrä —ichro sín.

³⁶ Ntá kjuanchankí ch'ín Jesús ntáchro ch'án kíxin:

—¿Nkehe tí xrä tjinkáonrá chrókuít'ahará? —ichro ch'án.

³⁷ Ntá ntáchro sín kíxin:

—Tió tsétoanxián tí kjuachaxián jié na tjinkaonni kíxin ijnkonni chrókuak'eni itjá chjina a í jnkonni chrókuak'eni itjá kjon —ichro sín.

³⁸ Ntá ntáche ch'ín Jesús tí jehe sín kíxin:

—Jahará la noahyará nkehe tí tjanchanará. ¿Á chrókuachará chrók'uirá tí nkehe itsjá its'ia janhan la ko á chrókuachará chrókuikiterá éxi tsikite janhan? —ichro ch'án.

³⁹ Ntá jehe sín kjuátehe sín ntáchro sín kíxin:

—Kja tsjachani —ichro sín.

Ntá ntáche ch'ín Jesús tí jehe sín kíxin:

—Chaxín its'irá éxi tí nkehe tsjá its'ia la ko tsikiterá éxi tsikite janhan. ⁴⁰ Kjánchó janhan xitjahya tsjánjuan kjuachaxin kíxin ijnkorá chrókuak'erá tjaná chjina la í jnkorá chrókuak'erá tjaná kjon kíxin janhan na tónahya tocar tsjánjuan tíha kíxin tí sín a la xráxín ó tsíkónoxín —ichro ch'án.

⁴¹ A ntá tió kuínhin tí ite sín xikaha tsíntáchro tí sín a ntá kjuankíxin kóninkakonhen sín tí ch'ín Jacobo la ko tí ch'ín Juan. ⁴² Ntá k'uíyehé ch'ín Jesús kaín tí jehe sín ntá ntáche ch'án sín kíxin:

—Ó nohará kíxin tí sín t'etoan chjasintajni la imá t'etueñhen sín kaín chojni la ko tí sín imá tjetoan mé imá nchehnkehe qasén sín kíxin ihyé sín ts'etoan sín. ⁴³ Kjánchó jahará la xikahya chrókuich'erá. Náhí. Tí jnkojínrá tjinkáonrá chrókuétóanrá la chrókuínkitsará tí í so sín. ⁴⁴ A ntá tió jnkojínrá qantsí chrókuétóanrá mé t'ichjánxín senó chrókuákoxínrá chrókuich'eherá kíchuárá xrä. ⁴⁵ Kíxin tí Xjeen Dios K'óna Chojni mé kuihya ch'án kíxin chojni chrókuich'ehe ch'án xrä. Náhí. Ikui ch'án kíxin sich'ehe ch'án sín xrä la ko ts'enyákonhen nchónhya chojni kíxin tsaáxin sín ch'án —ichro ch'án.

*Ch'ín Bartimeo k'uék'ik'onhyá ch'án ntá ch'ín Jesús kjuínchekitohe ch'án jína
(Mt. 20.29-34; Lc. 18.35-43)*

⁴⁶ Ntá kjuíji sín chjasin Jericó. Ntá ch'ín Jesús la ko tí sín k'uájiko ch'án la ko nchónhya chojni k'uaxrjexín sín tí chjasin ntiha. Ntá ntiha tjen ijkno ch'ín t'ik'onhyá mé it'in ch'án Bartimeo ntá it'é ch'án mé it'in Timeo. Tjetjaxín ch'án chrínta ntja tjanchak'á ch'án.

⁴⁷ Ntá kuínhin tí ch'ín t'ik'onhyá kíxin ó kuichjina ch'ín Jesús, mé tí nkexro kjuixín chjasin Nazaret, ntá tí ch'ín t'ik'onhyá kjuankíxin t'èya ch'án ntáchro ch'án kíxin:

—Jaha Jesús, tsík'axrjeníxian ch'ín David tikonóehéni —ichro ch'án.

⁴⁸ Ntá nchónhya sín k'uëtuënen sín ch'án kíxin tsotání ch'án. Ntá íchá antsí má tsen t'èya ch'án ntáchro ch'án kíxin:

—Jaha, tsík'axrjeníxian ch'ín David tikonóehéni —ichro ch'án.

⁴⁹ Ntá ntahó kjuák'e ch'ín Jesús. Ntá k'uëtoan ch'án kíxin:

—T'iyehérá tí ch'ín a —ichro ch'án.

Ntá k'uíyehé sín tí ch'ín t'ik'onhyá ntá chénka sín ch'án kíxin:

—Tócháha la t'inkatjen kíxin tjet'iyaha ch'án. —ichro sín.

⁵⁰ Ntá kjuák'e ch'án tí ka titsáte ch'án ntá chrika k'uïnkatjen ch'án kóchjinehe ch'án tí tjen ch'ín Jesús. ⁵¹ Ntá ch'ín Jesús kjuanchankíhi ch'án tí ch'ín a kíxin:

—¿Xá nkehe tjinkávan chrókjuit'ahá? —ichro ch'án.

Ntá kjuátëhe tí ch'ín t'ik'onhyá ntáchro ch'án kíxin:

—Maestro, tjinkaonni kíxin chrók'uikonni —ichro ch'án.

⁵² Ntá ntáche ch'ín Jesús tí ch'ín a kíxin:

—Ijie la jína sátsjia. Ó kuítøha jína kíxin kuítekávan tí janhan —ichro ch'án.

Ntá tuénxín tí ch'ín t'ik'onhyá la ó k'uíkon ch'án ntá chréhe ch'án tí ch'ín Jesús.

11

*Ntá ch'ín Jesús k'uíxenhen ch'án chjasin Jerusalén
(Mt. 21.1-11; Lc. 19.28-40; Jn. 12.12-19)*

¹ Ntá tió kjuíji chjina sín chjasin Jerusalén chjinaxón tí chjasin Betfagé la ko chjasin Betania chok'èxin tí jnä Olivo ntá k'uëtuënen ch'ín Jesús iyó tí sín k'uájiko ch'án, ² ntáchro ch'án kíxin:

—Sátjirá tí chjasin ntsí chok'èxin ntiha. Ntá ikon chjasin ts'ikonrá kíxin ntaha tjechroé ijkno kolócho naxä ninkexró tjiták'áhya va. Ntá tjasíntänkehérá va ntá tsjíkoanará va ntihi. ³ A ntá tí jnkojín chojni tsjanchankíhará sín kíxin nkekuénté xíkaha ch'erá ntá tsontáchororá kíxin: “Tí Maestro mé t'ichjánxihin va ntá tió tsoxéhe va la tsjikaáni va”, ichrorá —ichro ch'án.

⁴ Ntá jehe sín mé sákjuí sín k'uitja sín tí kolócho tjechroé va chjinaxón ntója nchia ntá kjuasintankehe sín va. ⁵ Ntá iso tí chojni tjejó ntiha kjuanchankí sín kíxin:

—¿Nkekuénté xíkaha ch'erá tjasíntänkehérá tí kolócho a? —mé chro sín.

⁶ Ntá kjuátëexín sín éxí k'uëtoan ch'ín Jesús. Ntá kjuanjon sín kjuachaxin sátsjiko sín va. ⁷ Ntá tí kolócho mé kjuikohe sín ch'ín Jesús. Na ntá iké sín kjuínchekamá sín va, ntá kjuák'ekjen ch'ín Jesús. ⁸ Ntá itsjé chojni kuakitsje sín iké sín la kjuentoá sín tinkák'ikjínxin sín ka tí ntja ts'atsínkaxín ch'án. Ntá iso sín la mé tóchrínjin sín chaon nta itsá kayoa ntá xrákäo sín tinkát'itjí sín ntja.

⁹ A ntá tí sín tsítaón ntja la ko tí sín chréhe iton kjuankíxin sín itsje sín chéhe sín ntáchro sín kíxin:

—Tsjancheheni kjuasáyé Dios. Jína tí nkexro kuixín kjuachaxin ihnjé Ìnchéni. ¹⁰ Jína tí kjuächaxiéñ Dios itsi mé ts'etüenhen tí nkexro k'uaxrjeníxín it'éni David. Ntá tsjancheheni kjuasáyé Dios tjen nkaya nkajní —ichro sín.

¹¹ Ntá k'uíxenhen ch'ín Jesús chjasin Jerusalén la ko kjaxin k'uíxenhen ch'án tí ninko jié tsjehe ch'án nkuíxín tí nkaxenhen. Ntá ó kóntó ntá ch'ín Jesús sákjuíko ch'án tí teyó sín k'uájiko ch'án sákjuí sín chjasin Betania.

*Ch'ín Jesús kóníkkakonhen ch'án ijnko nta t'óna to higo tsík'ónahya to
(Mt. 21.18-19)*

¹² A ntá tí kóyáon ntá kjánxín sín chjasin Betania ntá ch'ín Jesús mé k'uén ch'án kjinta.

¹³ Ntá k'uíkon ch'án kjín kíxin itjen ijnko nta t'óna to higo itsá kayoa. Ntá sákjuítsjehe ch'án tí nta kíxin ákué tsahya to. Ntá k'uíkon ch'án kjín jehó ka itsa tí nta a kíxin jehya tí yaon ts'óna to. ¹⁴ Ntá nixjehé ch'ín Jesús tí nta t'óna to higo k'uéetuénenhen ch'án tí nta kíxin:

—Í ninkexró sinehya tí to ts'óna tí jaha ínaá —ichro ch'án.

A ntá tí sín k'uájiko ch'án mé kuínhin sín xíkaha.

*Ch'ín Jesús kjuíncchetjóá ch'án ninko
(Mt. 21.12-17; Lc. 19.45-48; Jn. 2.13-22)*

¹⁵ Ntá kjuíji sín chjasin Jerusalén. Ntá k'uíxenhen ch'ín Jesús nkaxenhen ninko a. Ntá kjuankíxin ch'án k'uinkité ch'án tí sín nchekjixín nkehe ntiha la ko tí sín t'ena nkehe ntiha. A ntá kótéka ch'án tí mesa tjinkítóxíxín sín chichaon la ko tí sillá tjejókjen tí sín nchekji kontóá ¹⁶ la ko kjuanjonhya ch'án kjuachaxin kíxin tsamá sín nkehe ts'ajixenhen sín ninko. ¹⁷ Ntá kjuáqohé ch'án sín ntáchro ch'án kíxin:

—Ntáchro xroon itén Dios kíxin: “Tí ntóna i mé it'in nchia tsonixjanaxín chojni nkuíxín nación”, a ntá jahará tsíkjich'énará itjueé xíchee* —ichro ch'án.

¹⁸ Ntá tí sín ncháñt'á t'etoan la ko tí sín maestro tjako tí ley na mé kuínhin sín tíha, ntá kjueyá sín nkexrí chrók'óyán sín ch'án, kjánchó chrakon sín kíxin kóxrjínhin tí chojni tí nkehe kjuako ch'án. ¹⁹ Kjánchó ntá ó kóntó ntá k'uaxrjexín ch'án tí chjasin a sákjuí ch'án.

*Ó tsíxámá tí nta t'óna to higo
(Mt. 21.20-22)*

²⁰ A ntá tí nchítjen k'uátsínka sín tí tjen tí nta t'óna to higo ntá k'uíkon sín kíxin ó tsíxámáxin nuéé tí nta. ²¹ A ntá ch'ín Pedro xráxinkaon ch'án ntáche ch'án tí ch'ín Jesús kíxin:

—Maestro, tsjehé tí nta t'óna to higo kóníkkakonhén jna na ó tsíxámá nta —ichro ch'án.

²² Ntá kjuátuhe ch'ín Jesús ntáchro ch'án kíxin:

—Tinkachónkirá Dios. ²³ Chaxín ntáxrjan kíxin jnkojínrá chróntácherá tí jná i kíxin: “Sátjixián ntihi tjíkjíankiá ntayaon”, a ntá tí kaín qasánrá chrókuinkachónkirá Dios kíxin chróxiteyá tí nkehe tsontáchrórá, ntá xíkaha chaxín tsonhen. ²⁴ Mé xíkaha ntáxrjan kíxin kaín tí nkehe tsjanchehérá Dios tí tsítekáonrá kíxin chaxín ts'ayéhérá ntá xíkaha tsonhen tsoxiteyá. ²⁵ A ntá tió tjejonixjehérá Dios ntá jnkojín nkexro naxá ninkákonhénrá, la chrók'uitjáyanhanrá tíha kíxin It'ará tjen nkaya nkajní kjaxin chrókjuinchek'itjáyan ch'án tí jie chontará. ²⁶ A ntá tí sinchek'itjáyanhyára tí ijié chojni ntá It'ará tjen nkaya nkajní la kjaxin sinchek'itjáyanhyára ch'án tí jie chontará.

*Tjanchankíhi sín tí ch'ín Jesús nkehe tí kjuachaxin chónta ch'án
(Mt. 21.23-27; Lc. 20.1-8)*

²⁷ Ntá xíkjan sín chjasin Jerusalén ínaá. Ntá xritjak'e ch'án nkaxenhen ninko ntá kóchjina tí sín ncháñt'á t'etoan la ko tí sín tjako tí ley la ko tí sín tada t'etoan ninko

²⁸ kjuanchankíhi sín ch'án kíxin:

—¿Nkehe tí kjuachaxin chonta jaha kíxin xíkaha ch'e? ¿Nkexro tjáha tí kjuachaxin kíxin xíkaha kjuich'e? —ichro sín.

²⁹ Ntá kjuátuhe ch'ín Jesús ntáchro ch'án kíxin:

* **11:17** Isaías 56.7; Jeremías 7.11

—Ntá kjaxin janhan tsjánchánkhárá ijnko nkehe, siná á chrókjuáteherá, ntá tsotjónkará nkehe tí kjuachaxin chonta janhan kíxin xíkaha it'a. ³⁰ ¿A ntá nkexro k'ueteuenhen ch'ín Juan kíxin tsikite ch'án chojni? ¿Á Dios ní o á chojni ó? A ntá jie la tjáteherá —ichro ch'án.

³¹ Ntá kjuankíxin jehó sín tjo sín kichó sín kíxin:

—Tí tsontáchroni kíxin Dios tsík'etuuenhen tí ch'ín Juan ntá tsjanchankí tí ch'ín a kíxin nkekuénté kuítakuenhyani ch'án. ³² ¿Á chróntáchroni kíxin chojni ó tsík'etuuenhen ch'án? —ichro sín.

Kjánchó chrakonhen sín tí chojni chjasin kíxin kaín sín kuítekaon sín kíxin ch'ín Juan mé k'uénixja ch'án itén Dios. ³³ Ntá ntáche sín tí ch'ín Jesús kíxin:

—Noehyani —ichro sín.

Ntá ntáchro ch'ín Jesús kíxin:

—La ko kjaxin janhan tsorxraqahya nkexro kjuanjon kjuachaxin kíxin xíkaha t'a —ichro ch'án.

12

Ch'ín Jesús mé kjuíncheyóexin ch'án éxi chojni ch'ehya xra jína

(Mt. 21.33-46; Lc. 20.9-19)

¹ Ntá ch'ín Jesús kjuíncheyóexin ch'án ínaá ntáchro ch'án kíxin:

—Itjen ijnko ch'ín k'uénkaxin ch'án itsjé ntanòa t'óna to uva nontee ch'án la ko kjuich'ena ch'án corral la ko kjuich'ena ch'án ijnko tòye ts'énaya sín to uva. A ntá kjuich'ena ch'án ijnko tjet'o noi kíxin ts'it'ótjen ch'án tsokotohe ch'án.

'A ntá kjuínchekjen ch'án tí nonte iso chojni ch'e xra. Ntá sákjuí ch'án kjín. ² Ntá tí kjuixraká tí yaon ts'óna to ntá k'ueteuenhen ch'án ijnko tí nkexro ch'ehe ch'án xra kíxin sátsjikjanchehe ch'án tí sín ch'e xra jnkosiné tí to tsakja ch'án. ³ Ntá tí sín ch'e xra mé tsé sín tí ch'ín a, kjuate sín ch'án ntá ninkehó chjéhya sín ch'án ntá sákjuí ch'án. ⁴ A ntá tí ìnché tí nonte mé xíchr'án ch'án tí í jnko nkexro ch'ehe ch'án xra. Ntá kjuíji ch'án ntiha ntá chjéhe sín ch'án xro kjuíncheníhi sín kja ch'án la ko k'uántaxínhin sín ch'án. ⁵ Ntá tí ìnché tí nonte a xíchr'án ch'án í jnko chojni sákjuitsjehe ntiha. Ntá kjuíji ch'án ntiha ntá k'óyán sín ch'án. Ntá chr'éxin tí ìnché mé xíchr'án ch'án í so nkexro ch'ehe ch'án xra sákjuitsjehe sín, kjánchó iso sín k'uékon sín la í so sín la k'óyán sín.

⁶ 'Ntá jehe ch'án chónta ch'án jnkokoáxon xjeen ch'án na imá tjuèhe ch'án tí xjan a. Ntá kjuixixín chr'án ch'án tí xjan sákjuí xjan kíxin kjuenkayáxin ch'án kíxin: "Tsochónthehe sín kjuasáyé tí xjananna", ichro ch'án. ⁷ A ntá tí sín ch'e xra a tjo sín kichó sín kíxin: "Tí ch'ín i mé ts'ayéhe kaín nkehe siín ntihi. A ntá jie ts'ayánni ch'án, a ntá jeheni ts'ayéheni kaín tí nkehe a", ichro sín. ⁸ Ntá xíkaha itsé sín ch'án k'óyán sín ch'án ntá kuakitsjexín sín ntge ch'án tí nontee ch'án.

⁹ A ntá kjuanchankí ch'ín Jesús ntáchro ch'án kíxin:

—¿A ntá nkehe chrókjuich'e tí ìnché tí nonte a? Chrókui ch'án chrók'óyán ch'án tí sín ch'e xra, a ntá chróchjéhe ch'án ókjé chojni.*

¹⁰ '¿Á kjuínchekuáxinyará jahará tí xroon itén Dios? Ntáchro xíkihi:
Tí xro náxrjónhya kuítuenta tí sín ch'éná tjet'o,
mé jie k'óna tí xro tjetean.

¹¹ Mé xíkaha kjuich'é Ìnchéni Dios,

na ntá tíha mé ijnko nkehe kjuachrakon k'uíkonnit —ichro ch'ín Jesús.

¹² Ntá chrótsé sín tí ch'ín Jesús chrókjuak'echjina sín ch'án kíxin kíenxín sín kíxin kaín tí ntáchro ch'án la jehe ch'án k'uántaxínhin tí jehe sín. Kjánchó chrakon sín kíxin nchónhya chojni kóchjina ntá kuítuhe sín ch'án ntá sákjuí sín.

* **12:9** Isaías 5.1-7 † **12:11** Salmo 118.22-23

¿Á jína chrókjuenkehe sín gobierno?
(Mt. 22.15-22; Lc. 20.20-26)

¹³ A ntá ichr'án sín iso tí sín fariseo la ko iso tí sín kuènte ch'ín Herodes kíxin tsjanchankíhi sín ch'án iso nkehe kíxin tí ntoáhya chrókjuatehe ch'án ntá jína chrók'ueka sín ch'án jię. ¹⁴ Ntá kjuíji sín tí tjen ch'ín Jesús ntáchro sín kíxin:

—Maestro, ó noheni kíxin tí nkehe chrónka la chaxín tíha la ko jehya nkexrí tsjehe chojni tjenkayáxián kíxin á jína sín, la ko ntoá tjákua ntie Dios. ¿Á jína chrókjuenkeheni tí gobierno tí chichaon tjanchia? ¿Á chrókjuenkeheni sín ní o náhí? —ichro sín.

¹⁵ Ntá ch'ín Jesús kjuátsoan ch'án kíxin jehya jína tjenkayáxin sín ntáchro ch'án kíxin:

—Jehya jína kíxin tjáchaxinráni. Xrákoará ijnko tí chichaon tjanchia sín tsotsjáha —ichro ch'án.

¹⁶ Ntá xráko sín ijnko tí chichaon tsotsjehe ch'án. A ntá kjuanchankí ch'án kíxin:

—¿Nkexro tí tsík'axrjexín tjenkáni tí chichaon i la ko nkexro ihnié chóntha? —ichro ch'án. Ntá jehe sín kjuátehe sín kíxin:

—Tí ch'ín t'etqan mé tjenkáni ch'án —ichro sín.

¹⁷ Ntá kjuátehe ch'ín Jesús ntáchro ch'án kíxin:

—Chróchjehérá tí ch'ín gobierno t'etqan tí nkehe kuènte ch'án; a ntá tí nkehe kuènte Dios la chróchjehérá Dios —ichro ch'án.

Ntá chrakon sín kíxin xikaha kjuátehe ch'án.

Kjuanchankí sín kíxin á chaxín tsoxechón chojni
(Mt. 22.23-33; Lc. 20.27-40)

¹⁸ A ntá iso sín saduceo kuitsjehe sín tí ch'ín Jesús. A ntá tí sín saduceo mé ntáchro sín kíxin chaxínhyá tsoxechón chojni tsík'en mé xikaha chrókjuachaxin sín tí ch'ín Jesús ntáchro sín kíxin:

¹⁹ —Maestro, ch'ín Moisés mé tsíkjin ch'án xroon ntáchro kíxin tí ts'en ijnko savé chojni la ko naxaq tjen tí ichjién ch'án na ko tsíkjich'énahya sín xjeen sín ntá tí kichó tí nkexro tsík'en mé chrókuakja tí tjan k'án a ntá tí xjeen sín mé ts'óna éxí xjeen tí nkexro tsík'en.‡

²⁰ Kjánchó k'uéjó yato sín jnkokoá kichó sín. Ntá tí ch'ín sao mé kuákja ch'án ichjién ch'án. Ntá ik'uén ch'án, kjánchó ninkehó xjan tsíkjich'énahya sín. ²¹ Ntá tí ch'ín tsoyo yóxin kuákja ch'án tí tjan k'án ntá k'uén ch'án koí ch'án. Ntá kjaxin tsíkjich'énahya sín xjan. A ntá tí ch'ín níxín kuákja ch'án tí jehe tjan ntá xikaha kónhen ínaá. ²² Ntá kayatoé sín k'uéchonta sín tjan la ko kaín sín ik'uén sín la ko ninkehó xjan kjuich'énahya sín kaín sín. Ntá kjuixixín ntá k'uén tjan kjaxin tjan. ²³ Ntá tió tsoxechón kaín xín chojni la, ¿Ntá nkexro ts'óna xì tjan kíxin kayatoé sín tsíkótehe tjan? —ichro sín.

²⁴ Ntá kjuátehe ch'ín Jesús ntáchro ch'án kíxin:

—Ntoáhya tjenkayáxinrá kíxin tiénxinyará nkehe ntáchro tí xroon itén Dios la ko chonhyará tí kjuachaxiéñ Dios. ²⁵ A ntá tió tsoxechón tí chojni tsík'en la tsotéehya sín la ko tsjanjonhyá sín xjeen sín kíxin tsotéhe sín kíxin tí sín tsík'en la éxí sín ángel ts'ejó sín nkaya nkajní. ²⁶ A ntá tí tsoxechón tí sín tsík'en, ¿á kjuinchekuáxinyará tí xroon tsíkjin ch'ín Moisés chrónka nkexrí k'uénixjeexín Dios ijnko nta yoa tjeche ntáchro ch'án xikihi: “Janhan mé tí Dios tinkáchónki ch'ín Abraham la ko ch'ín Isaac la ko ch'ín Jacob”?§ ²⁷ Méxra tí Dios i la jehya tinkáchónki tí sín tsík'en. Náhí. Jehe ch'án mé Dios tinkáchónki tí sín tjejóchón. Ntá jahará la imá tiénxinyará kíxin xikaha ichrorá tjanchankírá —ichro ch'án.

Tí nkehe antsí imá tjetoan tsík'etqan Dios
(Mt. 22.34-40)

‡ 12:19 Deuteronomio 25.5 § 12:26 Éxodo 3.6

28 Ntá kui ijnko ch'ín tjako tí ley kjuák'ekinhin ch'án nkexrí kjuachaxín sín ch'ín Jesús. Ntá kuínhin ch'án kíxin imá jína kjuátehe ch'ín Jesús. Ntá kjuanchankí ch'án ntáchro ch'án kíxin:

—¿Nkehe tí antsí tjetoan tsík'etqoan Dios? —ichro ch'án.

29 Ntá kjuátehe ch'ín Jesús ntáchro ch'án kíxin:

—Tí nkehe antsí tjetoan tsík'etqoan Dios mé tíhi: “Tinhínrá kaín rá chojni Israel kíxin Inchéni Dios la mé jnkokoá la kohya í jnko nkexro. **30** Ntá kaín asánrá la ko kaín kjuaxrexinkaon kuéntará la ko kaín fuerza kuéntará chrótjuèxínrá.”* Mé xíkaha tí nkehe antsí tjetoan tsík'etqoan Dios. **31** A ntá tí nkehe yóxin tsík'etqoan Dios la mé tóyóhē na mé ntáchro xíkihí: “Chrótjuèhérá kíchuárá exí tjuèxínrá asánrá,”† la kohya í jnko nkehe antsí má tjetoan tsík'etqoan ch'án —ichro ch'ín Jesús.

32 A ntá kjuátehe tí ch'ín tjako níjno a ntáchro ch'án kíxin:

—Ntoá ntáchrúa tíha, Maestro kíxin chaxín itjen jnkokoáxón Dios la ko kohya í jnko Dios.‡ **33** Noheni kíxin kaín asénni la ko kaín kjuaxrexinkaon kuénténi la ko kaín fuerza kuénténi chrótjuèxínni Dios la ko chrótjuèheni kíchó ni exí tjuèxínni asénni.§ Tíha mé antsí má sínkí. A ntá kaín tí ko chrók'óyánni chrókjuanjonni chróchjánxin chrítaón altar la kánhyó tjetoan tíha —ichro ch'án.

34 A ntá tió k'uíkon ch'ín Jesús kíxin jína kjuenkayáxin ch'án kjuátehe ch'án ntá ntáchro ch'án kíxin:

—Jaha la kjínya tjen tí kjuachaxin kuénte Dios —ichro ch'án.

Ntá kóxakonhen sín ntá ninkexró kjuanchankiéhya sín ch'án í so nkehe.

¿Xá nkexro It'é tí Cristo?

(Mt. 22.41-46; Lc. 20.41-44)

35 Ntá ch'ín Jesús kjuák'ekjako ch'án tí níjno jié. Ntá kjuanchankí ch'án ntáchro ch'án kíxin:

—¿Nkexrí kíxin tí sín tjako tí ley mé ntáchro sín kíxin tí Cristo mé ts'axrjeníxin tí ch'ín David? **36** A ntá tí Nchäkuen Dios mé kjuínkitsa tí ch'ín David ntáchro ch'án kíxin:

Inchéni Dios ntáche tí Inchéni kíxin:

“Tjak'e tjaná chjina ntihó tsétoan,

tsjixinjian kaín xín tí sín nínkakonhan la tsjachahya sín ts'etqoan sín kíxin jahvá mé tsétoan”*

37 ¿Xá nkexrí kíxin Cristo chrók'óna xjeen ch'ín David kíxin jehe ch'ín David ntáchro ch'án kíxin Inché ch'án tí Cristo a? —ichro ch'án.

Ntá itsjé chojni k'uéjókinhin sín kóxrjíñin sín tí nkehe kjuako ch'án.

Ch'ín Jesús chrónka nkexrí ch'e tí sín tjako tí ley

(Mt. 23.1-36; Lc. 11.37-54; 20.45-47)

38 Ntá ch'ín Jesús kjuako ch'án ntáchro ch'án kíxin:

—Tankíehyará tí sín tjako tí ley. Jehe sín mé tóxrjíñin sín chrók'uinkáya sín ka kjíjin la ko tjinkaon sín kíxin kaín tí chojni tsoxeta sín ntja mé tsjikosáyehe sín. **39** Jehe sín xritjeyá sín tí nta antsí náxrjón ts'ejóyá sín tí nkaxenhen níjno. La ko kjaxin tió sátsji sín tí sine sín xritjeyá sín tí nta antsí náxrjón ts'ejókjen sín sine sín. **40** La ko takitsje sín ntøe chojni k'án. La ko ch'iyexín sín chojni kíxin isé nixjehé sín Dios kíxin chrókuinhin chojni chróntáchro sín kíxin imá jína tí jehe sín. Tí sín a mé antsí má tsjasóte sín —ichro ch'án.

Tí ofrenda kjuanjon ijnko tjan k'án

(Lc. 21.1-4)

41 A ntá jnkonaá mé ch'ín Jesús tjetjaxín ch'án nkaxenhen níjno chók'èxin tjen tí ntacajón tjetóxroyéya ofrenda. Ntá tjetsjehe ch'án kíxin nchónhya chojni tinkáki sín

* **12:30** Deuteronomio 6.4-5 † **12:31** Levítico 19.18 ‡ **12:32** Deuteronomio 4.35 § **12:33** Oseas 6.6 * **12:36** Salmo 110.1

chr'áxenhen sín chichaon tí ntacajón. La ko kjaxin nchónhya tí sín rico chr'áxenhen sín nchónhya chichaon tí ntacajón a. ⁴² Ntá kjaxin ntiha mé kjui ijnko tjan k'án nòa tjan ntá chr'áxenhen tjan tí ntacajón yaá chichaon kánhyó tjete sínkí. ⁴³ Ntá ch'ín Jesús k'uíyehé ch'án tí sín k'uájiko ch'án ntáchro ch'án kíxin:

—Chaxín ntáxrjan kíxin tí tjan k'án nòa tjan antsí tjete k'uíkon Dios tí chichaon chr'áxenhen tjan tí ntacajón, a ntá tí sín í so la kánhyó ⁴⁴ kíxin kaín sín la ó chichaon xéhé sín kjuanjon sín. Ntá jehe tjan la kjónté nòa tjan la kjuanjon tjan kaín tí chichaon k'uéchonta tjan chrók'uíte nkehe chrókjóne tjan —ichro ch'án.

13

Ch'ín Jesús chrónka kíxin tsoxíka njinko

(Mt. 24.1-2; Lc. 21.5-6)

¹ A ntá tió k'uaxrjexín ch'ín Jesús tí njinko jié ntá ijnko tí sín k'uájiko ch'án ntáchro ch'án kíxin:

—Maestro, kjuánchí náxrjón tí xro la ko tí nchia tsík'óna —ichro ch'án.

² Ntá kjuátēhe ch'ín Jesús ntáchro ch'án kíxin:

—¿Á tsjehé jaha tí nchia jié tsík'óna ní? Tsjixraká tí yaon la í ninkehó xro ts'ejókjenhya kichó, la kaín tíha la tsoxika —ichro ch'án.

Tí nkehe tsionhen chjina tí tsjixixín

(Mt. 24.3-28; Lc. 21.7-24; 17.22-24)

³ A ntá sákjuí sín chrítaón tí jnä Olivo chók'èxin tjen tí njinko a. Ntiha kjuák'etjaxin ch'ín Jesús. Ntá ntiha ch'ín Pedro, la ko ch'ín Jacobo, la ko ch'ín Juan, la ko ch'ín Andrés kjuanchankíhi sín ch'án nkehe, ntáchro sín kíxin:

⁴ —Tjinkaonni tsochronka nkesá tsionhen tíha la ko nkexrí tsionoexínni nkesá tsoxiteyá kaín tíha —ichro sín.

⁵ Ntá ch'ín Jesús kjuátehe ch'án ntáchro ch'án kíxin:

—Tóxakonhanrá títóéhyará kíxin ninkexró chrókjuit'ayahyará. ⁶ Nchónhya chojni tsi tsontáchro sín kíxin jehe sín mé Cristo. Ntá xikaha sich'iyehe sín nchónhya chojni.

⁷ 'A ntá tió tsinhínrá kíxin tjanjonko kichó sín la t'óyán kichó sín la chrakonhyará tóxakuanhyará ó jehí tsionhen tíha. Kjónté xikaha naxa tsjejehya chjasintajni. ⁸ Ijnko nación tsjanjonko í jnko nación. La ntiha la ntaha la tsinkí nonte la ko itsjé chjasin na tsokjinta la ko ts'ixité sín tsioníkaon sín. Tíha na ntá xrankíxión tí kjuatjoté.

⁹ Tóxakonhanrá jahará kíxin mé tsjikaánrá sín nkayakon tí sín t'etoan ntá tí nkaxenhen njinko ntiha mé tsjatiaxínrá sín. Jahará t'ichjánxín tsochjinará tí tjejó tí sín gobernador la ko tí sín rey kíxin tinkachónkirá tí janhan; ntá tsjachará tsochronkárá nkexrí tinkachónkirá tí janhan nkayakon tí jehe sín. ¹⁰ Tí naxa ts'itjáyanhya chjasintajni la mé t'ichjánxín tsinhin chojni kaín xín nación tí tan jína tsaáxin sín. ¹¹ Tió sátsjikoará sín tsjikaánrá sín tí tjejó tí sín t'etoan, la tóxakuanhyará nkehe tsjateherá la ko nkehe tsjenkayáxinrrá. Náhí. Chronkárá tí nkehe kjuanjon Dios tsontáchrórá tí hora a, kíxin jahyará tsionixjará. Náhí. Nchákuén Dios mé tsionixja. ¹² Iso chojni kjónté naxa kjéhya sín tsjikaán tí kichó sín kíxin its'en. La ko kjaxin xikaha iso chojni tsjikaán tí xjeen sín la ko kjaxin iso sín tsioníkakonhen sín tí it'é la ko iné la tsjikaán sín kíxin its'en. ¹³ Kaínxín chojni chjasintajni tsioníkakonhanrá sín kíxin tinkachónkirá tí janhan. A ntá tí sín tsítóehya tinkáchónki sín tí janhan hasta tsjixixín ná mé tsaá sín.

¹⁴ 'Tsjixraká ijnko yaon ts'ikonrá tsjak'e tí nkehe jínahya tí chrókjua'ehya éxi tsíntáchro profeta Daniel* —ntá tí chojni sinchekuáxin tí xroon i mé chrókuienxín sín tíha—, a ntá tí chojni tjejó estado Judea ts'ikon sín xikaha la sátsji sín tsochriún sín jnä tsjík'ejómá sín.

¹⁵ A ntá tí sín tjejó chrítaón nchia la í chrók'uínkajinhyá sín, chrók'uixenhyá sín nkaxenhen

* **13:14** Daniel 9.27; 11.31; 12.11

nchia chrókuakitsje sín ichréñ nkehe chóntha sín. ¹⁶ Ntá tí sín tjejó nontee sín la í chrókjanhya sín naxa chrókuakja sín iké sín. ¹⁷ Ntá nòa tí chojni chjin ts'ejoyá tí yaon a la ko tí sín tjejónchekakí xjeen. ¹⁸ Chrókuanchehérá Dios kixin jehya nchakuen kin chrókónhen tíha. ¹⁹ A ntá tí yaon a mé imá kjuaxróxinha ts'ejó chojni kixin ninkehó yaon kuènhyá xikaha desde ti kjuankíxín Dios kjuich'eña ch'án chjasintajni la ko kjá xikahya tsónhen chr'éxín ínaá. ²⁰ A ntá tí chrókuanjon Ínchéni Dios kjuachaxin kixin isé chrókónhen tíha, ntá ninkexró chrókuacha chrókuá. A ntá náhí la kuikonóehe ch'án tí sín tsíkjeyá ch'án ntá k'uetoan ch'án kixin tjoka ts'atsínska tí kjuachrakon a.

²¹ A ntá jnkojín nkexro tsontáchro kixin: "Tsjehé, ntihi itjen tí Cristo", o tsontáchro sín kixin: "Tsjehé, ntiha tjen ch'án", la títekákuènhyará sín. ²² Na mé itsi iso sín tsontáchro sín kixin Cristo tí jehe sín la ko kjaxin itsi iso sín ntoáhya tsjako sín la ko tsjasin sín kjuaxroan jié tjinkaon sín chrókuich'iyexín sín chojni, kjonté tí sín tsíkjeyá Dios. ²³ A ntá jahará chrokóxakonhanrá kaín tíha. Tjétjónkará senó kixin tsónohará kixin xikaha tsónhen.

*Itsi tí Xjeen Dios K'óna Chojni
(Mt. 24.29-35, 42-44; Lc. 21.25-36)*

²⁴ Ntá ts'atsínska tí kjuachrakon la ntá tí yaon la ts'inkaséyanhya, a ntá tí nitjó la tsjanjonhya xrohi. ²⁵ A ntá tí konotsé la ts'anótjénxín nkajní la ko tí kjuachaxin siín nkaya nkajní la kjaxin tsinkí. ²⁶ Ntá ts'ikon sín tí Xjeen Dios K'óna Chojni itsi chríkjan tuij tsikao tí kjuachaxin jié. ²⁷ Ntá tsochr'án ch'án tí sín ángel sátsji sín kuenté chjasintajni tsikjenájín sín kaín chojni tsíkjeyá ch'án.

²⁸ 'Chrókiéxnirá tí nkehe sintayóaxian. Éxí yóhe tí nta t'óna to higo tió sít'ayan kahnte ntá nohará kixin ts'ixenhen nchakuen sóa ²⁹ mé xikaha tió ts'ikorá xikaha tsónhen kaín tíha ntá tsónoaxínrá kixin ó kuichjina tí tsjeje chjasintajni. ³⁰ Chaxín ntáxrjan kixin kaín tíha tsónhen tí naxa t'enhya tí chojni siín chjasintajni. ³¹ A ntá tí nkajní la ko tí chjasintajni mé ts'itjáyan. A ntá tí nkehe ntáxrjan la ts'itjáyanhya, tsoxiteyá tíha.

³² A ntá tí yaon la tí hora tsoxiteyá tíha la ninkexró noehya. Kjaxin noehya tí sín ángel tjejó nkaya nkajní la ko kjaxin tí Xjeen Dios K'óna Chojni la noehya. Ó jehó It'eni mé nohe.

³³ 'Méxra chrók'uejotsjehérá, chrók'uejochonhénráschrónixjehérá Dios kixin noahyará nkesá la ko nkehora tsónhen tíha. ³⁴ Éxí yóhe ijnko chojni sátsji kjín, a ntá tí naxa sátxínhya ch'án ntoe ch'án la senó tsochjéhe ch'án xra tí sín ch'ehe ch'án xra ts'ayakonhen sín ntoe ch'án, la jnkojko sín ts'ayéhe sín jnkojko xra kuente sín. La ko ts'etuenhen ch'án ijnko ch'ín tsjak'e ts'ayakonhen ch'án tí ntója nchia. ³⁵ Méxra jahará chrók'uejotsjehérá kixin noahyará nkesá tsokjan tí ìnché tí nchia a, a ijnko tsontanonte o á ijnko k'áxrótjen o á ijnko tjetee tsje cochíká o á ijnko ts'inkaséyan. ³⁶ Ntá xrínahya tsi ch'án ts'itjaxín ch'án kixin tjejochrinrá. ³⁷ Mé xikaha tjonkará la ko xikaha ntátjan kaín chojni kixin chrók'uejotsjehe sín —ichro ch'án.

14

*Tjoyá sín kixin nkexrí tsotsé sín tí ch'ín Jesú
(Mt. 26.1-5; Lc. 22.1-2; Jn. 11.45-53)*

¹ Naxa t'itjáyan iyó yaon ntá tsjasin sín tí kia pascua, la ko sine sín tí niotja tsíkjikohya tí xroqan nchek'ánki niotja.

Ntá tí sín nchátlá t'etqan la ko tí sín maestro tjako tí ley mé kjueyá sín kixin nkexrí sich'iyeha sín tí ch'ín Jesú kixin tsotsé sín ch'án a ntá ts'oyán sín ch'án. ² Ntá ntáchro sín kixin:

—Kjánchó jehya yaon kia chrókónhen tíha kixin chrók'uixitéhya chojni chrókóninkaon sín —ichro sín.

*Ijnko tjan kui^kitexín aceite náxrjón xraxé ikja ch'ín Jesús
(Mt. 26.6-13; Jn. 12.1-8)*

³ A ntá ch'ín Jesús kjuák'e ch'án chjasin Betania ntœe ch'ín Simón, tí ch'ín k'uéchónta chinlepra. A ntá tí tjene ch'ín Jesús ntá xríahya ikui ijnko tjan kui^kao tjan ijnko xro mé tjiá tí aceite xraxé itsjo nardo, imá tjete tsík'ite. Ntá tí tjan a mé kuakitjehé tjan tí xro a ntá kui^kite tjan kja ch'ín Jesús tí aceite a. ⁴ A ntá iso tí sín tjejó ntiha kóninkakonhen sín tjan ntáchro sín kíxin:

—¿Nkekuénte kjuínchexénen tjan tí aceite náxrjón xraxé? ⁵ Íchá jína chrókóxi^xín iní ciento chichaon denario tí aceite a ntá tí chichaon a mé chrókuⁱtónhen tí chojni nòa —mé xikaha ichro sín k'uántaxính^jín sín tjan.

⁶ Ntá ntáchro ch'ín Jesús kíxin:

—Nté titohérá tjan; ¿nkekuénte t'antaxínhínrá tjan? Ó nchoxon tí nkehe kjuich'ena tjan.

⁷ A ntá tí chojni nòa la ó xráxín ts'ejókoará sín la jína tsjínkitsará sín jnkojín yaon. Ntá janhan la jnkochríxíhyá ts'ejóni. ⁸ Ntá jehe tjan kjuich'e tjan kaín nkehe tjinkaon tjan tsjanjon tjan. Ó senó kjuíncheka tjan xroan cuerpo kuéntana kíxin tsoxravána. ⁹ Chaxín ntáxrján kíxin ti tsjako sín tí tan jína tsaáxin chojni nkuíxín chjasintajni ntá tsochronka sín kíxin xikaha kjuich'e tí jehe tjan, a ntá xikaha tsoxraxinkakonxín sín tjan kíxin xikaha kjuich'e tjan —ichro ch'án.

*Ch'ín Judas kjuincheckji ch'án tí ch'ín Jesús
(Mt. 26.14-16; Lc. 22.3-6)*

¹⁰ A ntá ch'ín Judas Iscariote mé ijnko teyóxin sín k'uájiko ch'ín Jesús a mé sákjuítsjehe ch'án tí sín nchat'á t'etoan kíxin tsochrónka ch'án nkexrí tsotsé sín tí ch'ín Jesús. ¹¹ A ntá jehe sín la chéhé sín kuínhin sín ntá ntáchro sín kíxin chaxín tsjanjon sín chichaon ts'ayéhé tí ch'ín Judas. Ntá kjuankíxin ch'án k jueyá ch'án nkexrí tsochrónka ch'án kíxin tsotsé sín tí ch'ín Jesús.

Kjóneko sín tí ch'ín Jesús

(Mt. 26.17-29; Lc. 22.7-23; Jn. 13.2-30; 1 Co. 11.23-26)

¹² A ntá kui tí yaon xrankíxíñ kia sine sín niotja tsíkjikohya tí xroan ncheck'ánki nio tió ts'oyán sín tí kolélo kuénte kia pascua. A ntá tí sín k'uájiko ch'ín Jesús mé kjuanchankíhi sín ch'án kíxin:

—¿Nketí tjinkávan sátsjini sincheyaxíxinni kíxin sineni kuénte tí kia pascua? —ichro sín.

¹³ Ntá k'uëtuénen ch'án iyó tí sín k'uájiko ch'án ntáchro ch'án kíxin:

—Sátjirá chjasin Jerusalén ntá ntiha tsoxetará ijnko ch'ín yámá tóa tjiá ntá. Tí ch'ín a tsochréhérá. ¹⁴ A ntá tí nchia ts'ixenhen ch'án la tsjanchankíhírá tí ìnché nchia, tsontáchrórá kíxin: “K'uëtoan tí Maestro kíxin: ¿Nketí tjen tí cuarto sinexíñko ch'án tí sín xriko ch'án tí kia pascua a?”, xikaha mé tsixrorá. ¹⁵ Ntá tsjakohará ch'án ijnko cuarto jié, yóxin piso mé chóntha kaín nkehe t'ichjánxín. Mé ntaha mé sincheyaxíxínrá tí nkehe sineni —ichro ch'án.

¹⁶ Ntá jehe sín la sákjuí sín chjasin Jerusalén na ntá éxí chrónka ch'ín Jesús mé xikaha k'uitja sín. Ntá tí cuarto a mé kjuíncheyaxíxín sín tí nkehe sine sín kuénte tí kia pascua.

¹⁷ A ntá ó kóntó ntá ó kjuíji ch'ín Jesús la ko tí teyó sín k'uájiko ch'án tí nchia ntiha. ¹⁸ Ntá k'uéjó sín, a ntá tió tjejóne sín ntá ntáchro ch'ín Jesús kíxin:

—Chaxín ntáxrján kíxin ijnko tí jahará tjejóne jnkokoá ntihi mé sinchekjiráni —ichro ch'án.

¹⁹ Ntá jehe sín mé kjuankíxin k'uává sín. Ntá kjuankíxin sín jnkojnko kjuanchankíhi sín tí jehe ch'án kíxin:

—¿Á janhan ní? —ichro sín.

²⁰ Ntá kjuátehe ch'ín Jesús ntáchro ch'án kíxin:

—Jehe ch'án mé ijnko tí teyóxinrá, mé tí nkexro tjenekian jnkokoá plato ntihi. ²¹ Chaxín tí Xjeen Dios K'óna Chojni mé tsöñhen éxí nixja xroon itén Dios. Kjánchó nòa tí ch'ín sinchekji ch'án. Íchá jína tí ch'ín a la chrókokjéhya ch'án —mé xíkaha ichro ch'án.

²² A ntá nachrohe tjejóne sín na ch'ín Jesús kuákja ch'án ijnko niotja, ntá kjuanchia ch'án kjuasáyé Dios. Ntá kjuixin ntá kóchrít'q ch'án tí niotja ntá kjuanon ch'án k'uáyéhe sín. Ntá ntáchro ch'án kíxin:

—Interá, tíhi mé cuerpo kuéntana —ichro ch'án.

²³ Na ntá kjaxin kuákja ch'án ijnko vaso na ntá kjuanchia ch'án kjuasáyé Dios ntá chjéhe ch'án sín ik'uí sín kaín sín tí nkehe tjiá. ²⁴ Ntá ntáchro ch'án kíxin:

—Tíhi mé jnina mé chrónkaxín kíxin chaxín tsoxiteyá tí nkehe nixin tsöñhen na mé ts'itjí kíxin tsaáxin nchónhya chojni. ²⁵ Chaxín ntáxrjan kíxin ts'ihya janhan tí inté to uva ínaá tí naxq tsjixrakáhya tí yaon itsi kjuachaxin kuénte Dios, a ntá ti yaon a xik'ía inté to uva nixin —mé xíkaha ichro ch'ín Jesús.

Ntá ch'ín Jesús chrónka ch'án kíxin ch'ín Pedro sinchemá ch'án kíxin chónhya tí jehe ch'án (Mt. 26.30-35; Lc. 22.31-34; Jn. 13.36-38)

²⁶ Ntá kjuixin itsje sín ijnko himno kuénte Dios ntá sákjuí sín tí jnq Olivo. ²⁷ Ntá ch'ín Jesús ntáchro ch'án kíxin:

—Ijie tie kaín rá tsochrakonrá ntá tsitonará. Ntá tsoxiteyá éxí ntáchro xroon iten Dios kíxin: “Ts'oyán sín tí nkexro t'ayakonhen tí kolélo ntá tsokohya nkexro ts'ayakonhen va, a ntá tsjichroe va.”* ²⁸ A ntá tió tsozechónna ntá sátsjia estado Galilea ntá ntiha tsoxetani —ichro ch'án.

²⁹ Ntá ntáchro ch'ín Pedro kíxin:

—Kjónté kaín sín tsítøha sín ntá janhan la náhí —ichro ch'án.

³⁰ Ntá ntáchro ch'ín Jesús kíxin:

—Chaxín ntáxrjan kíxin ijie tie tí naxq tsjehya kochíntoa yáya, la jaha mé sinchemána níya kíxin chonhyana, tsixrua —ichro ch'án.

³¹ Ntá itsen kjuátehe ch'ín Pedro ntáchro ch'án kíxin:

—Kjónté koína its'en la sintamáhya tí jaha —ichro ch'án.

La ko xíkaha ntáchro sín kaín sín.

Ch'ín Jesús nixjeexín ch'án Dios tí Huerto Getsemaní

(Mt. 26.36-46; Lc. 22.39-46)

³² Ntá kjuíji sín ijnko nonte mé it'in Getsemaní. Ntá k'uëtuënen ch'ín Jesús tí sín k'uájiko ch'án kíxin:

—Tjejorá ntihyó nachrohe janhan tsonixjähä Dios —ichro ch'án.

³³ Ntá sákjuíko ch'án tí ch'ín Pedro la ko tí ch'ín Jacobo la ko tí ch'ín Juan. Ntá kjuankíxin imá k'uává qasén ch'án kóxakonhen ch'án. ³⁴ Ntá ntáche ch'án sín kíxin:

—Imá t'avá qasenná éxí chrók'uén xíkaha. Ijie la ntihyó titohará tjejotsjehérá —ichro ch'án.

³⁵ Ntá sákjuí ch'án ijnko kjínhya ntá kjuák'exín toch'in ch'án. Ntá kjuankíxin chrónóhe ch'án Dios kíxin chrókjuanon ch'án kjuachaxin kíxin chrókjuasótehya ch'án tí nkehe chrókónen ch'án tí yaon a. ³⁶ A ntá ntáchro ch'án kíxin:

—It'éni jaha. Jaha mé chonta kaín xín kjuachaxin na ntá chrónóhanni tsjakjínhínni kaín tí jínahya tsöñhenni tsjasóteni jie. Jehya kíxin chrókónen éxí tjinkaonni jeheni. Náhí. Éxí tjinkávan jaha —ichro ch'án.

³⁷ Ntá kjan ch'án ntá k'uitjaxín ch'án tí sín kuítøhe la tjejójua sín. Ntá ntáche ch'án tí ch'ín Pedro kíxin:

—Simón, tjechrian jaha. ¿Xá xitjahya chrókjuak'etsjehé ijnko hora? ³⁸ Ijie la tjejotsjehérá la ko chronóhérá Dios kíxin titøehya ch'án tí Jínahya chrókjuichroerá. Tí qasánra ntáchro kíxin chrókjuinchexiteyará tí jína kjánchó tí cuéporá la tsjachahya —ichro ch'án.

* **14:27** Zacarías 13.7

³⁹ Ntá sákjuí ch'án ínaá chrónóhe ch'án Dios. Ntá ó jehe xíkahó xínixja ch'án. ⁴⁰ Ntá ikjan ch'án la ó tjejójua sín ínaá kíxin kuijhi sín kotáchrin. Ntá í noehya sín nkexrí chrókuatéhe sín. ⁴¹ Ntá níxin sáxíkji ch'án ntá kjan ch'án ntá ntáchro ch'án kíxin:

—A ntá jie tjejochrinrá t'ok'áhará. Ntá ó tjen. A ntá jie kjuixraká tí hora kíxin tí Xjeen Dios K'óna Chojni ts'áyéhe tí sín chóna jie sinchekjasóte sín ch'án. ⁴² Ntá t'ayará sátsjini kíxin ó kjui tí nkexro sinchekjina.

Sákjuíko sín tí ch'ín Jesús tsjak'echjina ch'án

(Mt. 26.47-56; Lc. 22.47-53; Jn. 18.2-11)

⁴³ Naxá tjenixja ch'ín Jesús ntá xrínahya kjuíji ch'ín Judas, mé ijkno tí teyóxin sín k'uájiko ch'ín Jesú. Nchónhy chojni kjuikao ch'án kjuíjiko sín chica espada la ko inta. Na mé kjuachaxién tí sín nchat'á t'etqan la ko tí sín maestro tjako tí ley la ko tí sín táda t'etqan ninko mé kjuixín sín.

⁴⁴ A ntá tí ch'ín Judas mé tí ch'ín sinchekji tsíntáchro ch'án kíxin:

—Tí ch'ín sinekian kochító mé jehe tíha la itserá ch'án sátkoará ch'án —ichro ch'án.

⁴⁵ Ntá kjui sín ntá tuénxín kóchjinehe ch'ín Judas tí ch'ín Jesús ntá ntáchro ch'án kíxin:

—Maestro, Maestro —ichro ch'án.

Na ntá kjóneko ch'án kochító. ⁴⁶ A ntá tí sin kjuíji mé tsé sín tí ch'ín Jesús, sákjuíko sín ch'án.

⁴⁷ A ntá ijkno ch'ín tjetaxín ntiha mé kuakitsje ch'án chica espada kóchrínjin ch'án tatsjon tí ch'ín ch'ehe tí nchat'á t'etqan xra. ⁴⁸ Ntá ch'ín Jesús mé ntáche ch'án tí sín a kíxin:

—¿Nkekuénté kíxin éxí chrótserá xíchee mé xíkaha k'uinkakoará chica espada la ko inta kíxin tsotseráni? ⁴⁹ Kaín yaon kjuak'é nkaxenhen ninko kjuákokará, ¿ntá nkekuénté tsehyaráni? Kjánchó t'ichjánxín xíkaha tsonhen kíxin tsoxiteyá tí nkehe nixja xroon itén Dios —ichro ch'án.

⁵⁰ Ntá kaín tí sín k'uájiko ch'án na mé kuítóhe sín ch'án jehó ch'án ntá sákjuí sín.

Ijko ch'ín ntasoá sákjuixín ch'án ntiha

⁵¹ A ntá ijkno ch'ín ntasoá mé kjaxin tinkáchréhe ch'án ntiha, a ntá jehó ijkno kamantá tjetsáte ch'án, ntá kjaxin itsé sín ch'án. ⁵² Kjánchó tí ké ch'án ó tsitsé sín ntá kjónté tjóchín ch'án sákjuí ch'án.

Ch'ín Jesús kóchjina ch'án tí tjejó tí sín t'etqan

(Mt. 26.57-68; Lc. 22.54-55, 63-71; Jn. 18.12-14, 19-24)

⁵³ Ntá sákjuíko sín tí ch'ín Jesús tí ntoe tí nchat'á imá t'etqan. Ntaha mé tsíkójkotsé kaín tí sín nchat'á t'etqan la ko tí sín táda t'etqan ninko la ko tí sín maestro tjako tí ley. ⁵⁴ Ntá ch'ín Pedro la ikjín tjechréhe ch'án ntá kjuíji ch'án tí ntasin ntoe tí nchat'á imá t'etqan a. Ntaha síche xrohi. A ntá ntiha tjejótjaxín tí sín policía tjejóchjíxrohe sín, ntá kjaxin ch'án ntahó kuítóhe ch'án tjechjíxrohe ch'án.

⁵⁵ Ntá tí sín t'etuenhen tí sín nchat'á la ko kaín tí sín t'etqan kjueyá sín chojni kíxin tsochrónka sín nkehe tí jie chóna ch'ín Jesús kíxin jína chrók'óyán sín ch'án. Kjánchó ninkexró k'uitjahya sín tsjinkitsa tsochrónka. ⁵⁶ Kjánchó itsjé sín ntáchro sín kjuach'ia ó t'eka sín ch'án jie kíxin jnkokónhyá tí nkehe ntáchro sín. ⁵⁷ Ntá k'uinkatjen iso sín ntá chaxínhyá tí jie kjuanchia sín. Ntá ntáchro sín kíxin:

⁵⁸ —Jeheni ó kuínhinni kíxin ntáchro ch'án kíxin ts'óxíka ch'án tí ninko tsíkjich'énaxín chojni tja ntá iní yaon koá la ó tsjak'e ch'án í jnko ninko jehya chojni sich'éna[†] —ichro sín.

⁵⁹ Kjónté xíkaha la jnkokónhyá tí nkehe chrónka sín.

⁶⁰ Ntá tí ch'ín t'etuenhen tí sín nchat'á k'uinkatjen ch'án tí tjejó kaín sín ntá kjuan-chankíhi ch'án tí ch'ín Jesús kíxin:

[†] 14:58 Juan 2.19

—¿Á ninkehó tjateehya jaha? ¿Á chaxín tí jié t'eka sín tí jaha? —ichro ch'án.

⁶¹ Ntá ch'ín Jesús tání ch'án la ninkehó tjateehya ch'án. Ntá xíkanchankí tí ncháñt'á t'etqoan ntáchro ch'án kíxin:

—¿Á jaha tí Cristo Xjeen Dios imá tjóá? —ichro ch'án.

⁶² Ntá ntáchro ch'ín Jesús kíxin:

—Chaxín janhan tíha. Ntá chr'éxín ts'ikonrá kíxin tí Xjeen Dios K'óna Chojni mé tsjak'etjaxín ch'án tí tja chjina kjuachaxin kuènte Dios la ko itjui mé ts'inkajinxín ch'án nkaya nkajní —ichro ch'án.

⁶³ A ntá tí ncháñt'á t'etqoan kótséchje ch'án tí iké ch'án kjuakoxín ch'án kíxin imá nínkaon ch'án ntáchro ch'án kíxin:

—T'ichjánxínhyá í so chojni tsochrónka nkehe. ⁶⁴ Jahará ó kuínhínrá kíxin k'uántaxínhín ch'án Dios. ¿Ntá nkehe tsixrorá? —ichro ch'án.

Ntá kaín sín kjuátuhe sín kíxin chrók'uen ch'án.

⁶⁵ Ntá ikjé sín la kjuankíxin sín kuikite sín ch'án ntate sín. Na iso sín na k'uíkjehé sín ikon ch'án na ntá kjuate sín ch'án na ko kjuanchankíhi sín ch'án kíxin:

—Tónoha kíxin nkexro kjuatia —ichro sín.

A ntá tí sín policía kuènte njinko chjéhe sín nkayakon ch'án.

Ch'ín Pedro kjuúncemá ch'án kíxin chónhya ch'án tí ch'ín Jesús

(Mt. 26.69-75; Lc. 22.56-62; Jn. 18.15-18, 25-27)

⁶⁶ Ntá tí ntasín nonte itjen ch'ín Pedro. Ntá ikui ijinko tjan ch'ehe tjan xrä tí ncháñt'á t'etqoan. ⁶⁷ Ntá k'uíkon tjan kíxin tjechjíxröhe ch'ín Pedro. Ntá komá tjan ch'án ntáchro tjan kíxin:

—Jaha la kjaxin xrikoa tí ch'ín Jesús kjuixín chjasin Nazaret —ichro tjan.

⁶⁸ Ntá ch'ín Pedro kjuúncemá ch'án ntáchro ch'án kíxin:

—Chonhya ch'án la ko nonahya tí nkehe ntáchrúa —ichro ch'án.

Ntá k'uaxrjexín ch'án ntiha sákjui ch'án ntója. Ntá xrínahya itsje ijinko kochíntoa. ⁶⁹ Ntá tí tjan a mé k'uíkon tjan tí jehe ch'án ntá chénka tí sín síntaxín ntaha kíxin:

—A ntá tí ch'ín i mé jnkoyín tí sín a —ichro tjan.

⁷⁰ Kjánchó kjuúncemá ch'án ínaá. Ntá antsí chr'éxín tí sín k'uéjóntaxín ntáche sín tí ch'ín Pedro kíxin:

—Chaxín kjaxian jaha tsíkjíxian estado Galilea kíxin tjatsóanxínni kíxin nixja jaha éxi nixja tí jehe sín —ichro sín.

⁷¹ Ntá ch'ín Pedro kjuankíxin ch'án kjuúchenohe ch'án Dios ntáchro ch'án kíxin:

—Chonhya tí ch'ín ntáchrórá jahará —ichro ch'án.

⁷² Ntá yóxin itsje kochíntoa. Ntá ch'ín Pedro mé xraxinkaon ch'án kíxin nkexrí ó chrónka ch'ín Jesús kíxin: “Naxá tsotsjehya kochíntoa yáya mé ó tsjixin sinchemána níya kíxin chonhyana.”[‡] Ntá xraxinkaon ch'án tíha la ntá kjuankíxin ch'án tsjánka ch'án kíxin ntoáhya kjuich'e ch'án kjuúncemá ch'án tí ch'ín Jesús.

15

Ch'ín Jesús nkayakon tí ch'ín Pilato

(Mt. 27.1-2, 11-14; Lc. 23.1-5; Jn. 18.28-38)

¹ A ntá ó k'uínkaséyan ntá tí sín ncháñt'á t'etqoan kójkotséko sín tí sín táda la ko tí sín tjako tí ley la ko kaín tí sín t'etqoan kuènte njinko mé kójkotsé sín ikjo kichó sín. Ntá kjuixin ntá kjuúncenteto sín tí ch'ín Jesús ntá kjuíkaán sín ch'án tí tjen tí ch'ín Pilato. ² Ntá tí ch'ín Pilato mé kjuanchankí ch'án ntáchro ch'án kíxin:

—¿Á jaha tí Rey kuènte tí sín judío? —ichro ch'án.

Ntá kjuátuhe ch'ín Jesús ntáchro ch'án kíxin:

—Kjaxian jaha ntáchrúa —ichro ch'án.

³ A ntá tí sín nchatl'a t'etqan mé k'ueka sín ch'án nchónhya jie. ⁴ Ntá ch'ín Pilato xíkanchankí ch'án ínaá ntáchró ch'án kíxin:

—Jaha, nkekuénté tjateehya ninkehó? Tsjehé kíxin nchónhya jie t'eka sín tí jaha —ichro ch'án.

⁵ A ntá ch'ín Jesús la ninkehó kjuáteehya ch'án. Ntá ch'ín Pilato la í noehya ch'án nkehe tsjenkayáxin ch'án.

*K'uáyéh ch'ín Jesús kíxin sinchekjasóte sín ch'án ntá its'en ch'án
(Mt. 27.15-31; Lc. 23.13-25; Jn. 18.38—19.16)*

⁶ A ntá ch'ín Pilato mé kuénen ch'án kíxin tí kia a tsjanjon ch'án kjuachaxin kíxin sátsji ijnko chojni tjechjina, éxi tjinkaon tsjanchia sín tsíkójkotsé tí kia a. ⁷ A ntá ntiha tjechjina ijnko ch'ín mé it'in Barrabás, la ko í so sín kuítekakuenhyá sín tí síxréé ntá k'oyán sín chojni. ⁸ Ntá kui nchónhya chojni kjuankíxin sín kjuanchehe sín tí ch'ín Pilato kíxin chrókjuch'e ch'án éxi kaín nánó xíkaha. ⁹ Ntá kjuátchéhe ch'ín Pilato kíxin:

—¿Á tjinkáonrá tsítóhá sátsji tí ch'ín Rey t'etueñhen tí sín judío? —ichro ch'án.

¹⁰ Mé xíkaha ichro ch'án kíxin jehe ch'án la ó nohe ch'án kíxin kjuachjinoxínhin xriko tí sín nchatl'a t'etqan, a ntá tsé sín tí ch'ín Jesús kjuíkénen sín ch'án. ¹¹ A ntá tí sín nchatl'a t'etqan a mé kjuínchekónikaon sín kaín tí chojni siín, ntáche sín kíxin íchá jína chrókjuchia sín kíxin chrók'uatjánta ch'án tí ch'ín Barrabás. ¹² Ntá ch'ín Pilato kjuanchankí ch'án ntáchró ch'án kíxin:

—A ntá tí ch'ín tíkítexínrá kíxin ch'ín Rey t'etueñhen tí sín judío la ¿nkehe tjinkáonrá sit'ahá ch'án? —ichro ch'án.

¹³ Ntá jehe sín kjuátchéhe sín k'oyako sín kjuanchia sín kíxin:

—¡Tjakénkania ch'án ntacruz!

¹⁴ Ntá ch'ín Pilato mé kjuanchankíhi ch'án tí jehe sín kíxin:

—¿Xá nkehe tí jínahya kjuich'e ch'án? —ichro ch'án.

Kjánchó qantsí má itsen k'oyako sín kjuanchia sín kíxin:

—¡Tjakénkania ch'án ntacruz! —ichro sín.

¹⁵ Ntá ch'ín Pilato mé tjinkaon ch'án sinchexiteyá ch'án tí nkehe kjuanchia tí sín k'uixité ntá kuítóhe ch'án kíxin sátsji tí ch'ín Barrabás. Ntá k'uetqan ch'án kíxin tsjate sín tí ch'ín Jesús. Ntá kjuixin ntá kjuanjon ch'án kjuachaxin kíxin tí sín soldado sátsjiko sín ch'án tsjak'enkani sín ch'án ntacruz.

¹⁶ Ntá tí sín soldado a mé sákjuíko sín ch'án tí ntásin tí palacio. Ntaha kójnkotséxin kaín tí sín soldado. ¹⁷ Ntá ntiha kuakitsje sín iké ch'án ntá kjuínchek'inkáya sín ch'án ijnko ka kjátse tié la ko kjuak'enkaya sín kja ch'án ijnko corona tsík'óna ntach'i. ¹⁸ Ntá kjuankíxin k'uixité sín ntáchró sín kíxin:

—Jnkochríxín tsjak'e tsétueñhén tí sín judío —ichro sín.

¹⁹ Na ntá ntavara chjéhe sín ikja ch'án na ko ntaté sín kuikite sín ch'án. K'uéjóxin toch'in sín nkayakon ch'án kjuich'eyáxixín sín éxi imá chrókjukosáyehe sín ch'án. ²⁰ Ntá tió kjuixin xíkaha kjuich'ehe sín ch'án kjuanoá sín ch'án ntá kuakitsjehe sín ch'án tí ka kjátse tié tsíkjincheck'inkáya sín ch'án ntá kjuínchek'inkáya sín ch'án iké ch'án xráxín ínaá. Ntá kuakitsjexín sín ch'án ntiha sákjuíko sín ch'án kíxin ntá tsjak'enkani sín ch'án ntacruz.

*Ntá kjuak'enkani sín ch'ín Jesús ntacruz
(Mt. 27.32-44; Lc. 23.26-43; Jn. 19.17-27)*

²¹ A ntá ijnko ch'ín tsíkjixín chjasin Cirene, mé it'in ch'án Simón, mé xjeen ch'án mé tí ch'ín Alejandro la ko tí ch'ín Rufo, mé tsíkjixín ch'án nontee ch'án, ntá k'uátsíka ch'án ntiha. Ntá tí sín soldado a mé k'uetueñhen sín ch'án kíxin tsoschréhe ch'án tsamá ch'án tí ntacruz tsjak'enkáni ch'ín Jesús.

²² A ntá sákjuiko sín tí ch'ín Jesús ijkno tjo it'in Gólgota, na mé nkívee sín t'axrjexín kíxin Tjo Calavera. ²³ Ntá ntiha chjéhe sín ch'án xranvino tsík'ixinkíkjanxín xroan mirra chrók'ui ch'án, kjánchó k'uíhya ch'án. ²⁴ Ntá tí sín soldado kjuak'enkani sín ch'án tí ntacruz a. Kjuixin ntá kjuich'exín sín suerte tí ké ch'án kíxin tsonohe sín nkexéhe tí ka sátsjiko sín jnkojnko sín.

²⁵ A ntá ó las nueve nchítjen tí kjuak'enkani sín ch'án tí ntacruz a. ²⁶ Ntá ikja tí ntacruz kjuak'enkani sín ijkno ntachiso ntsí tsíkjin sín nixja nkekuente kjuínchekjasóte sín ch'án na mé ntáchro kíxin: "Jehe ch'án mé Rey kuente tí sín judío". ²⁷ Na ko kjaxin k'uéjóyáni sín ntacruz yaá tí sichee la ijkno la nánko chjina la í jnko la nó kjon tí tjen ch'ín Jesús. ²⁸ Na mé xikaha xiteyá éxí nixja xroon itén Dios ntáchro kíxin: "Éxí yóhe ijkno chojni kjuasin jie mé k'uíkon sín ch'án"*.

²⁹ Ntá tí sín k'uatsínka ntiha mé kjuanoá sín ch'án la ko k'uántaxínhín sín ch'án tinkátjíá kja sín ntáchro sín kíxin:

—Kjá na ntáchrúa kíxin chrók'oxíka tí njnko, a ntá iní yaon koá la ó chrókjuixin chrókjuich'éna ínaá,† ichrúa. ³⁰ Nchekaá əsán jahvá tjasinkajinxian tí ntacruz méhe —ichro sín.

³¹ Ntá tí sín ncháñt'á t'etqan la ko tí sín tjako tí ley mé kjuanoá sín ch'án ikjo sín kichó sín kíxin;

—Ó kjuínchekaá ch'án chojni ókjé ntá jehe ch'án mé xitjahya sinchekaá ch'án əsén ch'án. ³² A ntá chaxín jehe ch'án tí Cristo tí Rey kuente tí nación Israel ntá chrók'uikonni kíxin jehó ch'án chrókjuinkajinxin ch'án əsén ch'án tí ntacruz ntá kjaxin chrókuitekaoni ch'án —ichro sín.

Kjónté tí yaá sín kjaxin tjejóyáni ntacruz mé k'uántaxínhín sín ch'án.

Ntá k'uén ch'ín Jesús

(Mt. 27.45-56; Lc. 23.44-49; Jn. 19.28-30)

³³ A ntá tió kui chonkíxin mé k'uíxin tie kuenté chjasintajni, kóxrjenhen tí sítié hasta las tres kónjín ³⁴ ntá tí hora a mé itsen k'uèya ch'ín Jesús ntáchro ch'án kíxin:

—Eloi, Eloi, ¿lama sabactani? —tí nkívee sín mé t'axrjexín kíxin: It'eni, It'eni, ¿nkekuénté kuitohéni?,‡ mé xikaha ichro ch'án.

³⁵ Ntá iso sín siín ntiha kuínhin sín, ntá ntáchro sín kíxin:

—Tinhínrá kíxin t'iyéhe ch'án tí ch'ín Elías tí ch'ín k'uéchrónka itén Dios ósé —ichro sín.

³⁶ Ntá ijkno tí jehe sín siín ntiha kuinká ch'án kuákja ch'án ijkno ka ntá kjuínchekjataxín ch'án vino náxrjónhya ntá kjuak'ekjen ch'án ijkno nta kjínjin ntá kjuínchecjhina ch'án tí tjen ir'va ch'ín Jesús chrók'ui ch'án tí vino náxrjónhya. Ntáchro tí ch'ín a kíxin:

—Tsítóheni tsotsjeheni á chaxín tsi tí ch'ín Elías tsjinkajin tí jehe ch'án —ichro ch'án.

³⁷ Ntá ch'ín Jesús itsen k'uíyato ch'án ntá kjuixin k'uén ch'án. ³⁸ A ntá tí ka tjenkákuénxín nkaxenhen njnko mé yaá k'óna k'uichje kjuankíxixín noi la hasta nonte k'uichje. ³⁹ Ntá tí ch'ín capitán romano mé tjen ch'án chok'èxin tí tjen ch'ín Jesús ntá k'uíkon ch'án kíxin xikaha ó kjuixin k'uén ch'án ntá ntáchro ch'án kíxin:

—Chaxín tí nkexro i la Xjeen Dios —ichro ch'án.

⁴⁰ Kjaxin ntiha k'uejó iso chojni chjin, ikjín k'uéjó sín tsjehe sín. Tjejóko sín tjan María Magdalena la ko í jnko tjan María na mé ijkno xjeen tjan it'in Jacobo na mé tí ch'ín tsoyo, ichro sín, la ko í jnko mé it'in José. La ko kjaxin ntaha kjuak'e tí tjan Salomé. ⁴¹ A ntá tí chojni chjin i mé kuinkáchréhe sín tí ch'ín Jesús ntá kjuikao sín ch'án kíxin k'uékjinkitsa sín ch'án tí k'uékjak'e ch'án estado Galilea la ko kjaxin í so chojni chjin ínaá chréhe sín ch'án sákjuiko sín ch'án chjasin Jerusalén.

Ntá xrává ch'ín Jesús

(Mt. 27.57-61; Lc. 23.50-56; Jn. 19.38-42)

* ^{15:28} Isaías 58.12 † ^{15:29} Marcos 14.58; Juan 2.19 ‡ ^{15:34} Salmo 22.1

⁴² A ntá ó kóntó tí yaon a mé tí yaon t'óyaxínhin sín kíxin tí xranksíxíñin tí yaon t'ok'éhe sín, ⁴³ mé kui ijkno ch'ín it'in José chjasén ch'án mé Arimatea. Jehe ch'án mé koí ch'án t'etóan ch'án tí xra kuénte tí sítreé. Kjáxin jehe ch'án tjechónhen ch'án itsi tí kjuachaxin kuénte Dios. Chrakonhyá ch'án sákjuí ch'án ntoi ch'ín Pilato kjuíkanchia ch'án tí cuerpo kuénte ch'ín Jesús. ⁴⁴ Ntá ch'ín Pilato chrakon ch'án kíxin ó tsíkjixin tsík'en ch'ín Jesús, ntá k'uíyehé ch'án tí ch'ín capitán a kjuanchankíhi ch'án kíxin á chaxín xikaha kónhen. ⁴⁵ Ntá chrónka tí ch'ín capitán kíxin chaxín ó kjuixin k'uén ch'án. Ntá kuínhin ch'ín Pilato xikaha ntá kjuanon ch'án kjuachaxin kíxin tsjikakja ch'ín José tí cuerpo kuénte ch'ín Jesús. ⁴⁶ Ntá ch'ín José mé k'uena ch'án ijkno ka sábana náxrjón. Ntá kjuinkajin ch'án tí cuerpo kuénte ch'ín Jesús, a ntá jehe tí ka a mé kjuínchek'isimá ch'án tí cuerpo kuénte ch'án. Ntá kjuak'enkaya ch'án ijkno tóye tsíxrayá itjo. Ntá ijkno xro jié mé k'uíkjèxin ch'án tí ntója tí tóye. ⁴⁷ A ntá tí tjan María Magdalena la ko tí tjan María iné ch'ín José mé k'uikon sín nketí xravá ch'án.

16

Ó xechón ch'ín Jesús (Mt. 28.1-10; Lc. 24.1-12; Jn. 20.1-10)

¹ A ntá tió k'uátsinka tí yaon t'ok'éhe sín ntá tí tjan María Magdalena la ko tí tjan María iné ch'ín Jacobo la ko tí tjan Salomé mé k'uena sín xroan xraxé sátsjiko sín sincheka sín tí cuerpo kuénte ch'ín Jesús. ² Ntá imá nchítjen tí yaon xranksíxíñin tí semana mé kjuíji sín tí tóye tsíxrvá ch'án, na mé ó kjuítón yaon. ³ A ntá jehe sín mé tinkákjo kichó sín kíxin:

—¿Xá nkexro tí chrókuakjinhinni tí xro tjekjèxin tí tóye? —ichro sín.

⁴ A ntá xrínahya k'uíkon sín kíxin ó tsíkjixin tsíkjìn tí xro jié tjekjèxin tí tóye kíxin í tjenhya éxi k'uékjak'e senó. ⁵ Ntá kjuíji sín ikon tí tóye ntá k'uíkon sín kíxin tjetjaxin ijkno ch'ín ntasoá tí tja sín chjina tjenkáya ch'án ka kjínjin tjóá ntá imá chrakon sín k'uíkon sín. ⁶ Ntá ntáchro ch'án kíxin:

—Chrakonhyará. Ó nóna kíxin xritjéyará jahará tí ch'ín Jesús tsíkjixin chjasin Nazaret kjuák'enkáni ch'án ntacruz. Ntá ó tsíxechón ch'án í kohya ch'án ntihi. Tsjehérá tí tsíjak'e sín ch'án. ⁷ Ntá sájtirá tjíchenkará tí sín k'uék'ajiko ch'án la ko tí ch'ín Pedro kíxin tí ch'ín Jesús senó sátsji ch'án estado Galilea ntá ntaha tsoxetará ch'án éxi tsíchrónka ch'án —mé xikaha chrónka tí ntasoá a.

⁸ Ntá tí chojni chjin a mé sákjuíxin sín tí tsíxrvá tí ch'ín Jesús imá síxrànkä sín chrakon sín. Ntá naxa chenkahya sín ninkexró kíxin chrakon sín.

Ch'ín Jesús titàya xeta tí tjan María Magdalena (Jn. 20.11-18)

⁹ Tió tsíkjixin tsíxechón ch'ín Jesús nchítjen tí yaon xranksíxíñin semana ntá titàya xeta ch'án sáoxín tí tjan María Magdalena na mé jehe tjan tsíkakitsjexín ch'án yato nchákuén tí jinahya. ¹⁰ Ntá sákjuíchenka tjan tí sín k'uék'ajiko tí jehe ch'án t'ává sín tsjánka sín. ¹¹ A ntá tió kuínhin sín kíxin tjechón tí ch'ín Jesús kíxin xikaha tsík'ikon tjan la kjónté kuítekakonhyá sín.

Iyó sín k'uék'ajiko ch'ín Jesús titàya k'uíkuén sín tí jehe ch'án (Lc. 24.13-35)

¹² A ntá chr'éxín ntá iyó tí sín a titàya k'uíkuén sín tí ch'ín Jesús, ókjé nkexrí tsjehe ch'án. Tí sín a mé tjejótji sín ntja sátsji sín ijkno nonte. ¹³ A ntá jehe sín sákjuíchenka sín tí sín í so a; la kjónté xikaha la kuítekakonhyá sín.*

Ch'ín Jesús k'uétuenhen ch'án tí sín k'uék'ajiko ch'án tí xra sich'e sín (Mt. 28.16-20; Lc. 24.36-49; Jn. 20.19-23)

* 16:13 Lucas 24.13-35

¹⁴ A ntá tió kjuixixín la titàya k'uíkon tí tejnko sín tí jehe ch'án tí tjejóne sín. Ntá nixjéhe ch'án sín kíxin nkekuénté icha asén sín tsíkitekakuenhya sín tí sín tsík'ikon kíxin tsíxechón ch'án. ¹⁵ Ntá ntáche ch'án sín kíxin:

—Sátjirá kuenté chjasintajni tjákokhérá kaín xín chojni tí tan jína tsaáxin sín. ¹⁶ Tí nkexro tsitekaon la tsikite la mé tsaá. A ntá tí nkexro tsitekakonhya na mé tsjasóte. ¹⁷ Ntá tí sín tsinkáchónki tí janhan mé tsjasin sín kjuaxroan kíxin kjuachaxin njina tsakitsjexín sín tí nchákuén sín la kohya nkehe tsonhen sín la ko kjónté chrók'ui sín ijnko ntá chóntha veneno la kohya nkehe tsonhen sín. Kjáxin ts'ejotja tja sín chojni níhi la tsitohe sín jína.

*Ch'ín Jesús ch'ílin ch'án nkaya nkajní
(Lc. 24.50-53)*

¹⁹ Ntá ó kjuixin nixjéhe Ínchéni Jesús tí jehe sín ntá sákjuí ch'án nkaya nkajní. A ntá ntiha kjuák'etjaxin ch'án tí tja chjina Dios. ²⁰ A ntá jehe sín sákjuí sín nkuíxín sákjuíkako sín tí tan jína tsaáxin chojni. A ntá jehe Ínchéni mé kjuínkitsa ch'án tí sín a la ko kjuachaxiéen ch'án mé kjuasixín sín kjuaxroan kíxin tíha mé tsongoexín tí sín tjejótinhin kíxin chaxín nkehe kuénte Dios kjuako sín. Amén.

Tí tan jína chrónka ch'ín Lucas

Tíhi mé xrankíxixín tí xroon i

¹ Nchónhya chojni tjinkaon chrókjin sín ntoá kaín xín nkehe nkexrí kónhen k'uátsínka Ìnchéni tí k'uéjóni. ² Éxí kjuakohéni tí sín tsík'ikonxín kon sín tí xrankíxixín nkehe k'uátsínka ch'án la ntá k'uáyéhé sín tí xrä sákjuíchronka sín tí tan jína ³ a ntá janhan kjaxian kjuánchánkiá jína kaín nkehe k'uátsínka tí xrankíxixín. Ntá nòna jína ikjian kaín tíha éxí tsíkónhen ntá tsochr'anhan jaha Teófilo kíxin imá tjuah ⁴ kíxin ntá jaha tsonoha jína tí nkehe chaxín tsíkjakoha sín.

Ijko ángel mé chrónka kíxin tsokjíhi Juan Bautista

⁵ A ntá tí ch'ín rey Herodes k'uetoan ch'án tí estado Judea la ko ntiha kjuák'e ijko ncháñt'á mé it'in Zacarías. Jehe ch'án mé kuènte tí sín tsík'axrjeníxín tí ch'ín Abías.* ⁶ A ntá ichjién ch'án mé it'in Elisabet. Jehe tjan mé tsík'axrjeníxín tjan tí ncháñt'á Aarón. ⁶ Yói sín na mé jína sín kíxin éxi tjinkaon Dios la mé kjuúncexiteyéhé sín kaín nkehe k'uetoan ch'án. Méxrä ninkexró chrók'uekahya jie tí jehe sín. ⁷ A ntá jehe sín chóntahya sín xjeen sín kíxin ó jehí tsíkitoenhya tjan Elisabet kíxin sich'eña tjan xjan la ko ntá jie la ó tada ch'án la ko ó nána tjan.

⁸ A ntá ijko yaon tónhen tocar ch'ín Zacarías la ko tí í so sín tjejóko ch'án sich'e sín xrä ncháñt'á kuènte Dios. ⁹ A ntá xíkaha kuènen tí sín ncháñt'á a ntá jie ch'ín Zacarías mé kónhen tocar ts'ixenhen ch'án tí cuarto tjóá kuènte níñko tsjak'e ch'án chjinco chrítaón tí altar kuènte Dios. ¹⁰ Ntá kjuák'e ch'án ntiha kjuak'e ch'án tí chjinco la nachrohe kaín tí chojni k'uéjó sín ntója nixjehé sín Dios. ¹¹ Ntá xrínahya k'uíkon ch'ín Zacarías ijko ángel kuènte Dios tjexín toté ch'án nánko chjina tí altar tjak'ejxín sín chjinco. ¹² A ntá tió k'uíkon ch'ín Zacarías tí ángel la imá kóxakonhen ch'án la ko imá chrakon ch'án. ¹³ A ntá ntáchro tí ch'ín ángel kíxin:

—Zacarías, chrakonhya jaha. Ó kuínhin Dios tí nkehe tjanchehé ch'án la ntá ichjián Elisabet sich'eña tjan ijko xjan ntoa na mé sincheck'ian xjan Juan. ¹⁴ Jaha la tsocháha má la ko itsjé chojni tsochéhé sín kíxin tsokjíhi xjan ¹⁵ kíxin imá tjetooan tsjak'e tí xjaan éxi tóxrjínhín Dios. Ninkehó xran vino la ko ninkehó í jnko xran ts'ihya ch'án. Tsochóntha ch'án kjuachaxin kuènte Nchákuén Dios kjónté naxä tokjehya ch'án. ¹⁶ Jehe ch'án mé tsjakohé ch'án tí chojni nación Israel a ntá itsjé sín tsokjan sín tsinkáchónki sín Ìnché sín Dios. ¹⁷ Jehe ch'ín Juan tsítaón ch'án ntja tsixín Ìnchéni. Éxí k'uéjkako ch'ín Elías ósé mé tsjako ch'án la ko tsochóntha ch'án kjuachaxin éxi k'uéchóntha ch'ín Elías kíxin tí sín it'é xjan la mé jína ts'ejóko xjeen sín la ko kjaxin tí sín titekakonhya mé tsitekaon sín. Mé xíkaha tsonixjehé ch'án chojni kíxin ó itsi Ìnchéni la chrókuinkáchónki sín tí jehe ch'án.

¹⁸ A ntá tí ch'ín Zacarías kjuanchankíhi ch'án tí ch'ín ángel ntáchro ch'án kíxin:

—¿Nkexrí chrókónona kíxin chaxín chrókónhen tíhi? Janhan la ó tädana la ko tí chjin chonta la kjaxin ó nána tjan —ichro ch'án.

¹⁹ Ntá kjuátehe tí ch'ín ángel ntáchro ch'án kíxin:

—Janhan mé Gabriel la mé t'aha xrä Dios. A ntá jehe ch'án mé k'uetuanna k'uinka tsonixjaha tsoxrjanka tí nkehe jína tsonhen. ²⁰ A ntá jie kuítekákonhya tí nkehe xrijanca a ntá tsonósian jaha xitjahya tsonixja jaha tsoxitjajia tí yaon tsokjíhi tí xjaan. Mé xíkaha tsoxitheyá kaín tíha —ichro ch'án.

²¹ A ntá tí í so sín ntiha k'uéjochónhen sín ntója níñko kíxin ts'axrje ch'ín Zacarías, ntá kóxakonhen sín kíxin imá sé kóxrjenhen ch'án nkaxenhen níñko. ²² Ntá tió k'uaxrjexín

* ^{1:5} 1 Crónicas 24.10

ch'ín Zacarías tí nkaxenhen ninko la í xitjahya nixja ch'án. Ntá kónohe sín kíxín ichrén kjuaxroan kuènte Dios tsík'ikon ch'án tí nkaxenhen ninko. Ntá itja ch'án ó tjakoxin ch'án tí nkehe chróntáchro ch'án kíxín í xitjahya nixja ch'án.

²³ A ntá tió kjuixin tí yaon kjuich'e ch'ín Zacarías xra ninko ntá sákjuí ch'án ntoe ch'án. ²⁴ A ntá chr'éxin ntá kjuák'eyá tí ichjién ch'án Elisabet. Ntá ntoe tjan ó kuítóhe tjan in'ó nitjó kjuenkayáxin tjan kíxín: ²⁵ “Mé xíkaha ijnko kjuaxroan kjuanjón Inchéni kíxín chrók'uántaxiéñhyani chojni kíxín ó tsochóntani xjeenni jie chrókjuikosáyeheni sín”, ichro tjan.

Ijnko ángel chrónka kíxín tsokjíhi Jesús

²⁶ A ntá k'uátsínska injon nitjó ntá Dios k'uëtuéñhen tí ch'ín ángel Gabriel kíxín sátsji ch'án ijnko chjasin estado Galilea mé it'in Nazaret, ²⁷ sátsji nixjehé ch'án ijnko tjan tjarisoá naxqá kuákjahya tjan chojni ntoa mé it'in tjan María. Jehe tjan mé tsíkjatehe tjan kíxín tsotehe tjan ijnko ch'ín mé it'in José, mé tsík'axrjeníxin ch'án tí ch'ín rey David. ²⁸ A ntá tí ch'ín ángel k'uíxenhen tí tjen tjan ntá ntáchro ch'án kíxín:

—K'uinka nixjáha jaha kíxín Dios kjuínkitsa tí jaha. Inchéni Dios tjekoa tí jaha. A ntá jaha imá kjuíntayavan ch'án ntá tí so chojni chjin la kénhyó —ichro ch'án.

²⁹ Kjánchó tió k'uíkon tjan tí ch'ín ángel na mé kóxakonhen tjan kjuenkayáxin tjan kíxín nkekuènte xíkaha nixjehéni ch'án, ichro tjan. ³⁰ A ntá ntáchro tí ch'ín ángel kíxín:

—Chrakonhya, María. Dios la imá tjetjinkitsa tí jaha. ³¹ A ntá jie la tsjak'èyá jaha, tsochonta ijnko xjan ntoa la ko sínchek'ian xjan Jesús. ³² Imá ts'etqan ch'án la ko its'in ch'án Xjeen Dios nkaya nkajní. Inchéni Dios mé tsjanjon ch'án kjuachaxin ts'etqan ch'án éxi ijnko rey éxi k'uëtoan ch'ín David, tí nkexro ts'axrjeníxin ch'án. ³³ Jnkochríxín tsjak'e ch'án ts'etueñhen ch'án tí sín nación Israel, la mé tsjejehya tí kjuachaxin ts'etqan ch'án —ichro tí ch'ín ángel.

³⁴ Ntá kjuanchankíhi tjan María tí ch'ín ángel kíxín:

—¿Nkekuènte kíxín xíkaha chrókónhen kíxín janhan la naxqá chontahya chojni ntoa? —ichro tjan.

³⁵ Ntá kjuatéhe tí ch'ín ángel, ntáchro ch'án kíxín:

—Tí Nchäkuen Dios mé ts'inkajin éxi ijnko tjuí la ko tí kjuachaxin kuènte Dios mé tsjak'etja tí jaha, a ntá ts'óna tí xjan. Mé xíkaha tí xjan tsokjíhi la mé tjóá xjan la mé its'in xjan Xjeen Dios. ³⁶ La ko kjaxin tjan Elisabet kjéhya jaha kjónté ó nána tjan la mé tjeýá tjan. Senó la k'uéchontahya tjan xjan, a ntá jie la ó injon nitjó tjeýá tjan. ³⁷ Kíxín tí kjuachaxién Dios la tsjacha tsonhen kaín xín nkehe —ichro tí ch'ín ángel.

³⁸ Ntá ntáchro tjan María kíxín:

—Janhan mé t'ahá Inchéni Dios xra. Ó nchoxon tí nkehe k'uëtoan ch'án sintaxiteyáha ch'án éxi chrónka jaha —ichro tjan.

A ntá kjuixin chrónka tí ch'ín ángel ntá sákjuí ch'án.

Tjan María sákjuitsjehe tí tjan Elisabet

³⁹ A ntá ijnko yaon tí tjan María tjián sákjuí tjan ijnko chjasin tjen tí jná estado Judea.

⁴⁰ Ntá kjuíji tjan tí chjasin ntiha ntá k'uíxenhen tjan ntoe ch'ín Zacarías la ntá nixjehé tjan tí tjan Elisabet. ⁴¹ A ntá tió kuínhin tjan Elisabet nixja tjan María ntá chrika tí xjan nkaya tséé tjan Elisabet. Ntá qntsí k'uáyéhé tjan kjuachaxién Nchäkuen Dios ⁴² ntá itsen nixja tjan ntáchro tjan kíxín:

—Dios imá kjuíntayavan la ntá tí í so chojni chjin la kénhyó la ko kjaxin kjuíncheyaon ch'án tí xjan. ⁴³ ¿Xá nkexro tí janhan kíxín kjuínixjana iné Inchéni? ⁴⁴ Tió kuínhán nixjana ntá tí xjan la chrika xjan nkaya tséa kíxín chéhé xjan kjuíha. ⁴⁵ Ntá jaha la cháha kíxín kuítekávan kíxín Inchéni Dios sinchexiteyá tí nkehe ntáchro ch'án —ichro tjan.

⁴⁶ Ntá ntáchro tjan María kíxín:

Asenná imá tjikosáyehe Ìnchéni Dios

⁴⁷ la ko chéhe asenná kíxin Dios sinchekaáni ch'án.

⁴⁸ Kíxin Dios ikuá kuentá ijkno tí chojni chjin nòé ch'exón xra kuènte ch'án.

A ntá ijie la ko jnkochríxín tsontáchro chojni kíxin náxrjón tjèn janhan, tsixro sín.

⁴⁹ Kíxin Dios chóna kaín kjuachaxin ntá janhan mé kjuasixínna ch'án ijkno kjuaxroan jié;

imá tjóá tí ihnié ch'án.

⁵⁰ Jnkochríxín tsíkonóehe ch'án kaín tí sín tjikosáyehe sín ch'án.

⁵¹ Tsíkjasin ch'án itsjé kjuaxroan jié;

kuakitsjehe ch'án tí kjuachaxin chóna tí sín nccheinke.

⁵² Kuakitsjehe ch'án tí kjuachaxin chóna tí sín t'etoan,

A ntá tí sín nòa k'uék'etuñhya senó la mé jie chjéhe ch'án kjuachaxin ts'etoan sín.

⁵³ A ntá tí sín t'enxín kjinta la kjuanjon ch'án kaín nkehe tsicháxín sín, a ntá tí sín rico xraxín jehó tja sín sákjuí sín.

⁵⁴ Kjuinkitsa ch'án tí sín nación Israel kíxin tjejóch'ehe sín ch'án xra;

k'uitjáyenhya ch'án tí jehe sín kuiikonóehe ch'án sín,

⁵⁵ éxi k'uéchenka ch'án tí sín k'uaxrjeníxinni k'uéjó sín ósé,

na mé tí ch'ín Abraham la ko kaín tí sín naxa ts'axrjeníxin ch'án —mé xíkaha ichro tjan María.

⁵⁶ A ntá tjan María kuítøeko tjan tí tjan Elisabet iní nitjó la ntá chr'éxín xíkjan tjan ntøe tjan.

Kokjíhi ch'ín Juan Bautista

⁵⁷ Ntá xétxa tí yaon sinchekokjíhi tjan Elisabet tí xjeen tjan, a ntá kjuinchekokjíhi tjan ijkno xjan ntøa. ⁵⁸ A ntá tí sín chjinaxón ntøe la ko tí sín kjéhya tjan mé kjuíjitsjehe sín kíxin tsochéheko sín tjan kíxin kuínhin sín kíxin Dios imá tsíkikonóehe tí jehe tjan. ⁵⁹ Ntá tí yaon jnixin ikui sín sincheka sín xjan tí xroye kuènte tí sín judío. Ntá chrókjuinchek'in sín xjan Zacarías éxi it'in it'é. ⁶⁰ Kjánchó ntáchro iné xjan kíxin:

—Nahí. T'ichjánxín its'in xjan Juan —ichro tjan.

⁶¹ Ntá ntáchro sín kíxin:

—¿Nkekuénte kíxin xíkaha chrók'uin xjan? Kohya nkexro naxa kjéhya xíkaha it'in —ichro sín.

⁶² A ntá kaín tí sín kjéhya kjuakoxin sín tja sín kjuanchankíhi sín tí it'é xjan kíxin nkexri tjinkaon ch'án chrók'uin tí xjan. ⁶³ A ntá tí it'é xjan mé kjuanchia ch'án ijkno ntachiso ntsí tsokjin ch'án ntá kjin ch'án kíxin: "Ihnijé xjan mé Juan." A ntá kaín tí sín tjejó sín ntiha la chrakon sín kuínhin sín xíkaha kónhen. ⁶⁴ A ntá xrínahya ch'ín Zacarías kjuankíxin ch'án nixja ch'án inaá kjuanchehe ch'án Dios kjuasaya. ⁶⁵ A ntá kaín tí sín chjinaxón ntøe sín mé chrakon sín. La ntá nkuíxín tí jná kuènte estado Judea mé kjo sín kichó sín chrónka sín kíxin xíkaha tsíkónen. ⁶⁶ A ntá kaín tí sín kuínhin mé kjuenkayáxin sín kjuanchankíhi sín kichó sín kíxin:

—Xá nkehe tí xra tsíkitonhen tí xjan i? —ichro sín.

Kíxin chaxín Ìnchéni Dios tsíkjincleyaon ch'án tí xjan.

Tí ch'ín Zacarías itsje ch'án

⁶⁷ A ntá it'é tí xjan mé ch'ín Zacarías, mé qantsí k'uáyéhe ch'án kjuachaxin kuènte Nchákuén Dios ntá xíkaha nixja ch'án itén Dios ntáchro ch'án kíxin:

⁶⁸ Imá jína Ìnchéni, na mé tí Dios kuènte tí nación Israel,

kíxin ikui ch'án tí tjejóni kjuinchekaá ch'án nación kuénteni.

⁶⁹ La ko kjuanjon ch'án ijkno nkexro t'etoan sinchekaáni ch'án

na mé ijkno nkexro k'uaxrjeníxin tí ch'ín David, tí nkexro k'uékjich'ehe Dios xra.

⁷⁰ Éxi k'uéchronaxín tí sín kjuayá Dios k'uéchrónka itén Dios ósé,

71 k'uéchronka Dios kíxin sinchekaáni ch'án kíxin ntá tsjachahya kaín tí sín nínkakonhenni,
 72 tsikonóehé ch'án tí sín k'uaxrjeníxinni ósé,
 ts'itjáyenhya ch'án tí nkehe tsíchronka ch'án tsoxiteyá.
 73 Tíhi mé tsíkjo Dios tí ch'ín Abraham ósé kíxin nkehe chaxín tsoxiteyá chr'éxín
 74 kíxin sinchekaáni ch'án kíxin kohya nkehe sich'heni tí sín nínkakonhenni kíxin jína
 sich'heni ch'án xrä tsochrakonhyani,
 75 la ntá jína ts'ejóni sinchetjóáni ch'án kaín yaon tí naxa tjejóchónni.
 76 A ntá jaha xjeenni mé tsontáchro Dios kíxin jaha ijkno nkexro tsochrónka itén Dios tjen
 nkaya nkajní.

Jaha tsítónxian ntja tsixin Ínchéni la ko jaha tsjásiyóxian ntja tsixin ch'án.

77 Jaha tsjákohé tí chojni chjasintajni nkexrí tsjlin tí jié chóntha sín, ntá tsaá sín.

78 A ntá Dios mé tjuéheni ch'án la ko kuíkonóeheni ch'án, kíxin nkajní kuixin ijkno xrohi
 nixin ts'inkaséyanxín tí yaon nixin.

79 Tíha mé tsikao tí xrohi ts'inkaséyenxín tí sín tjejó sítié la ko tí sín chrók'uitjáyan, la ko
 ts'ikonxínni tí ntja tsjanjon kjuaxróxin.

Na mé kaín tíhi chrónka tí ch'ín Zácarías.

80 A ntá tinkák'ánkí tí xjan a la ko Dios kjuínchek'ánkí tí kjuaxrexinkaon kuénte
 xjan kíxin qantsí tsongohe xjan nkexrí tjen Dios. A ntá kjuák'e xjan nteje k'uánkí xjan
 kjuixrakája tí yaon kjuankíxin kjuakohe ch'án tí chojni nación Israel.

2

Kokjíhi ch'ín Jesús (Mt.1.18-25)

1 A ntá tí yaon a na mé tí ch'ín imá t'etoan mé it'in Augusto César na mé k'uetoan
 ch'án kíxin ts'íníxín ihnié kaín xín chojni siín tí chjasin t'etoan ch'án kíxin tsongohe ch'án
 nkekjaín chojni siín. 2 Tí xrankíxín k'uíníxín ihnié sín tió Cirenio mé k'uégobernador
 k'uetoan estado Siria. 3 Kaínxín chojni t'ichjánxín sátsji sín chjasén sín kíxin ntaha ts'íníxín
 ihnié sín. 4 Mé xikaha ch'ín José kjaxin k'uaxrjexín ch'án tí chjasin Nazaret estado Galilea
 ntá sákjuí ch'án tí estado Judea na mé sákjuí ch'án chjasin Belén tí tsíkokjíexín tí ch'ín rey
 David kíxin jehe ch'ín José mé tsík'axrjeníxín ch'án tí ch'ín David. 5 Sákjuí ch'án chjasin
 Belén sákjuíko ch'án tí tjan María kíxin ntihá ts'íníxíko ihnié ch'án tjan kíxin jehe tjan
 tsíkjatehe kíxin tsotéhe ch'án. A ntá jehe tjan na mé ó tjejá tjan. 6 A ntá xikaha kónhen
 nachrohe k'uéjó sín chjasin Belén, ntá kjuixraká tí yaon tsokjíhi xjeen tjan María. 7 A ntá
 ntihá kokjíexín tí xjeen tjan sao. Ntá kjuínchek'ísímá tjan xjan ka, a ntá kjuák'enkaya tjan
 ijkno nta neyá iko kíxin jehe sín la k'uitjahya sín nchia xranka ts'ok'èxín sín mé kjónté
 ntihá k'uéjó sín.

Tí sín ángel la ko tí sín k'uáyakonhen kolélo

8 Kjaxin chjinaxón tí chjasin Belén tjejó iso chojni nteje ó la ntá ntahó titohé sín tí tie
 a kíxin t'ayakonhen sín kolélo. 9 A ntá titàya k'uíkuèn sín ijkno ángel kuénte Dios la ko
 nkuíxín tí tjejó sín la k'uíñkaséyan kíxin tí kjuachaxin jié kuénte Dios kuíkao ch'án. Ntá
 jehe sín la imá chrakon sín. 10 A ntá tí ch'ín ángel ntáchro kíxin:

—Chrakonhyará jahará. Ijie k'uinka tsotjónkará nkehe jína nixin kíxin tsochéhé kaín
 xín chojni 11 kíxin ijie tí chjasén ch'ín David kokjíexín tí nkexro tsaáxinrá jahará na mé
 Ínchéni Cristo tíha. 12 Ntá tsongoaxínrá jahará kíxin tí xjan a kíxin ika tjechr'ísímá xjan la
 ko ijkno nta neyá iko mé tjetsínkayá xjan —mé xikaha chrónka tí ch'ín ángel.

13 A ntá titàya k'uíkuèn sín kíxin nchónhya sín ángel kuixin nkaya nkajní tjejóko tí ch'in
 ángel tjejótsje sín tjanchehe sín Dios kjuasáya, ntáchro sín kíxin:

14 Kjuasáyé Dios tjen nkaya nkajní kíxin imá chóntha
 ch'án kjuachaxin. Ntá chjasintajni ts'ixin

kjuaxróxin tí tjejó tí sín sinchexiteyéhé ch'án.

Mé xíkaha ichro sín.

¹⁵ A ntá tí sín ángel xíkjan sín nkaya nkajní, a ntá tí sín t'ayakonhen kolélo ikjo sín kichó sín ntáchro sín kíxín:

—Intá sátsjini tí chjasin Belén tsjitsjeheni tí nkehe tsíkónhen kíxín Inchéni k'uetoan kui tí nkexro kjuínchenoheni —ichro sín.

¹⁶ Ntá tjan sákjuí sín ntiha la k'uitja sín tí tjan María la ko tí ch'ín José la ko tí xjan a tjetsínkayá nta neyá iko. ¹⁷ A ntá tió k'uíkon sín xíkaha ntá chrónka sín tí nkehe tsíchrónka tí ángel kíxín nkexrí tjen tí xjan a. ¹⁸ Ntá chrakon kaín tí sín kuínhin kíxín xíkaha chrónka tí sín k'uáyakonhen kolélo. ¹⁹ Kjánchó tí tjan María la asén tjan ó xraxinkakonxín tjan kaín tíha. ²⁰ A ntá tí sín k'uáyakonhen kolélo la sákjuí sín ntja kuinkákjanchehe sín Dios kjuasáya kíxín kaín tí nkehe tsíkinhin sín la ko k'uíkon sín kíxín ó xiteyá kaín nkehe éxi tsíchrónka tí ángel.

Sákjuiko sín tí xjan Jesús tí ninko Jerusalén

²¹ A ntá tió xétja tí ijní yaon ntá kjuíncheka sín xjan xroye kuènte tí sín israelita ntá kjuínchek'in sín xjan Jesús éxi tsíntáchro tí ch'ín ángel chénka tí tjan María tí naxa kjuák'eyáhya tjan.

²² A ntá tió kuítuhe tjan María jína éxi chrónka ley kuènte Moisés * ntá sákjuiko sín tí xjan tí chjasin Jerusalén kíxín tsochjéhe sín Dios kjuasáya. ²³ Éxi ntáchro tí xroon ley kuènté Inchéni Dios kíxín: “A ntá kaín xjan ntoa tsokjíhi saoxín la mé tsochjéhe sín Dios tí xjan a sich'ehe xjan xrá Dios.”† ²⁴ Ntá xíkaha sákjuí sín kíxín ntaha tsjanjon sín iko ts'enxín ntiha tsochjéxín sín Dios kjuasáyé éxi t'etoan tí ley kuènte ch'án na mé yaá kontóá najni ó yaá kontóá nteje chrókjuanjon sín.

²⁵ A ntá tí yaon a kjuák'e chjasin Jerusalén ijkno ch'án ó táda ch'án mé it'in ch'án Simeón. Jehe ch'án ijkno chojni jína la ko jnkochríxín xraxinkaon ch'án Dios la ko kjuák'echónhen ch'án kíxín itsi tí nkexro tsaáxin tí nación Israel. Tí Nchákuén Dios tjeko tí ch'ín Simeón ²⁶ tsíkjinchenohe ch'án kíxín naxa ts'enhya ch'án ts'ikonjia ch'án tí nkexro Cristo, na mé tí nkexro tsochr'án Inchéni Dios. ²⁷ A ntá tí Nchákuén Dios kjuínchexraxinkaon tí ch'ín a kíxín sátsjí ch'án ninko. A ntá tió kui tí iné la ko it'é xjan Jesús k'uíxenko sín xjan nkaxenhen ninko kíxín sinchexiteyéhé sín tí nkehe t'etoan tí ley ²⁸ ntá ch'ín Simeón kuakja ch'án tí xjan a kjóa ch'án ntá kjuanchehe ch'án Dios kjuasáya ntáchro ch'án kíxín:

²⁹ Ijie jaha Inchéni Dios, tsjánjuan kjuachaxin kíxín kjuaxróxin its'én janhan kíxín jaha ó kjuínchexiteyá tí nkehe tsíntáchrua

³⁰ kíxín ó k'uíkonxin kuān tí nkexro tsaáxinni,

³¹ mé xíkaha kjuich'e kíxín ts'ikon kaín xín chojni.

³² Jehe ch'án mé tí xrohi ts'inkaséyanxín ntje tí sín jehya kuènte Israel, la ko jehe ch'án tsjikosáyehe ch'án tí chjasín kuéntá Israel, mé ichro ch'ín Simeón.

³³ Ntá ch'ín José la ko tí iné ch'ín Jesús la chrakon sín kíxín xíkaha kuínhin sín ntáchro ch'ín Simeón kíxín nkexrí tjen tí xjan. ³⁴ Ntá ch'ín Simeón kjuíncheyaon ch'án sín ntá chénka ch'án tí tjan María mé tí iné xjan Jesús kíxín:

—Tí xjan i tsíkikao itsjé xrá la itsjé tí sín Israel tsitekakuenhya sín xjan la tsítuhe sín la ko itsjé sín tsitekaon sín qantsí tsonsohe sín la ko nchónhya chojni tsotjinkakonhya tsinhin sín tí nkehe tsjako ch'án. ³⁵ Mé xíkaha tsonsoxín nkexrí tjenkayáxin jnkojnko asén chojni. Kjánchó kaín tíha tsoyóhe éxi ijkno chica espada chróchr'áte asán na mé tsoxakonhan la ko ts'avá má —ichro ch'án nixjehé ch'án tí tjan María.

* ^{2:22} Levítico 12.1-8 † ^{2:23} Éxodo 13.2,12

³⁶ Kjäxin ntaha kjuák'e iinko tjan chrónka itén Dios mé it'in tjan Ana, it'é mé it'in Fanuel, la mé tsík'axrjeníxin ch'án tí ch'ín Aser. Jehe tjan la ó nána tjan. Tí naxá k'uétjarisoá tjan la kótehe tjan. Ntá yatokoá nánó kjuák'eko tí xìi tjan ³⁷ ntá jie ochenta y cuatro nánó tsíkók'án tjan. Kuítøehya tjan tí xrä kuénte ninko la mé ntahó tjen tjan ch'ehe tjan Ìnchéni Dios xrä nchakotjin la ko tie la jnkoyaxón nehya tjan kíxin jína tsonixjehé tjan Dios. ³⁸ Ntá kóchjina tí tjan Ana tí yaon, q ntá kjuixin kjuanchehe tjan kjuasáyé Dios ntá kjuankíxin chrónka tjan nkexrí tjen tí xjan Jesús nixjehé tjan kaín tí sín tjejochónhen kíxin itsi nkexro sinchekaá tí chjasin Jerusalén.

Ntá kjan sín chjasin Nazaret

³⁹ Na ntá tió kjuixin kjuinchexiteyá sín kaín nkehe t'etoan tí ley kuénte Dios ntá kjan sín estado Galilea na mé chjasén sín chaxín Nazaret. ⁴⁰ A ntá tí xjan a mé k'uánkí xjan la ko tsànká xjan la ko imá kónohe xjan kíxin Dios imá tjinkitsa tjencheayaon xjan.

Tí xjan Jesús kjuák'e xjan tí ninko Jerusalén

⁴¹ Tí it'é la ko iné tí xjan Jesús xraxín k'uékji sín kaín nánó tí chjasin Jerusalén kíxin tí kia pascua. ⁴² A ntá tió xetjehe ch'ín Jesús tí teyó nánó, ntá sákjuí sín kaín sín tí chjasin Jerusalén kíxin xikaha kuénen sín kíxin tí kia a. ⁴³ A ntá kjanxiín sín ntiha sáchrókjui sín chjasén sín tió k'uátsínska kia la tí xjan Jesús ó tsíkitøhe xjan Jerusalén ntahó, kjánchó iné xjan la ko ch'ín José xraxinkakonhya sín kíxin kohya tí xjan. ⁴⁴ Jehe sín mé kjuenkayáxin sín kíxin ách'e tí sín kuichréhe mé kuiqao sín xjan la ntá xikaha chjina iinko yaon ó tjejóyá sín ntja tsíki sín. A ntá kjueyá sín xjan tí tjejó tí sín kjéhya la ko tí sín chóxin sín ⁴⁵ kjánchó k'uitjahya sín xjan. Ntá kjan sín tí chjasin Jerusalén kíxin tsjeyá sín xjan ntiha.

⁴⁶ Ntá k'uátsínska iní yaon ntá k'uitja sín xjan la mé nkaxenhen ninko ntiha tjetjaxin xjan jnkosiné tí tjejó tí sín maestro tjako tí ley la tjetinhin xjan tí nkehe ntáchro sín la ko tjetjanchankíhi xjan tí jehe sín. ⁴⁷ Ntá kaín tí sín tjejóntaxín tjejótinhin sín mé chrakon sín kíxin xikaha imá nohe xjan la ko xikaha tjatehe xjan kaín nkehe tjanckankíhi sín xjan.

⁴⁸ Ntá tió k'uíkon iné la ko it'é la chrakon sín. Ntá ntáchro iné kíxin:

—Xjeenni, ¿nkekuénte xikaha kjuich'e? It'á la ko janhan imá kóxakonhenni kjueyáni tí jaha —ichro tjan.

⁴⁹ Ntá ntáchro ch'ín Jesús kíxin:

—¿Nkekuénte tjeýá tí jeheni? ¿Á noahya jaha kíxin tóxakonhenni kíxin tí xrä kuénte It'éni? —ichro ch'án.

⁵⁰ Kjánchó kienxínya sín nkexrí t'axrjexín tí nkehe ntáchro ch'án.

⁵¹ Ntá kjan sín chjasin Nazaret. A ntá ntiha naxá kuítekakonhen xjan tí jehe sín. A ntá tí iné la ntá asén tjan xraxín ó nohe kíxin xikaha kónhen. ⁵² La ko naxá k'uánkí xjan kónteto xjan la ko k'uánkí tí kjuaxrexinkaon kuénte xjan la ko Dios kóxrjínhin nkexrí kjuinchexiteyá xjan la ko kjäxin kaín chojni kóxrjínhin sín kíxin jína tjen xjan.

3

Ch'ín Juan Bautista kjuák'e nteje kjuako itén Dios

(Mt. 3:1-12; Mr. 1:1-8; Jn. 1:19-28)

¹ A ntá quince nánó k'uék'etoan ch'ín Tiberio tí xrä gobierno, la ko tí ch'ín Poncio Pilato k'uégobernador tí estado Judea, la ko tí ch'ín Herodes k'uégobernador tí estado Galilea, la ko tí kichó ch'án Felipe mé k'uégobernador estado Iturea la ko estado Traconite, la ko ch'ín Lisanias k'uégobernador tí estado Abilinia. ² A ntá ch'ín Anás la ko ch'ín Caifás k'uéchónita sín xrä ncháta t'etoan. A ntá Dios mé kjuanjon kjuachaxin k'uáyéhe ch'ín Juan itjen ch'án nteje tsochrónka ch'án itén Dios. Ntá jehe ch'án it'é ch'án Zacarías. ³ Ch'ín Juan k'uátsínska ch'án kaín tí chjasin chjino tí ntarió Jordán kjuakohé ch'án chojni ntiha kíxin chrókjuiñki sín tí nkehe tjenkayáxin sín chrókuítøhe sín tí ijíe sín ntá chrókuikite sín kíxin xikaha mé

chrókjuìn ijié sín. ⁴ Mé xíkaha kónhen éxí k'uéchronka la ko tsíkjín ch'ín Isaías, mé tí nkexro k'uéchronka itén Dios ósé kíxin:

Tsinhin sín itén ijnko nkexro tsjak'e nteje ts'èya tsontáchro kíxin:

“Tóxakonhanrá ncheyóxinrá ntja tsixin Ìnchéni

Takítjehérá ijnko ntja ntoí.

⁵ Kaínxín tsáka mé tsøyóxin,
la ko kaín xín jnä la ko kaín xín itjo tsitohe yóxin,
la ko tí ntja tsíxréya mé tsoxrentoá,
la ko kaín tí ntja yóxinhya la mé tsøyóxin;

⁶ Xíkaha mé kaín xín chojni chjasintajni mé ts'ikon sín kíxin Dios mé chrókuaáxin sín.”*
Mé xíkaha ichro itén Dios.

⁷ A ntá tió kjuíji chojni ntiha kíxin ch'ín Juan chrókuikite ch'án sín ntá ntáche ch'án tí jehe sín kíxin:

—Jahará tsík'axrjeníxinrá konche. ¿Xá nkexro kjuíntanohará kíxin chrókuinkeherá tí kjuánkaon kuénte Dios ó tsí? ⁸ T'ichjánxín kíxin chrók'uejorá jnkójina chrókjuákoxínrá kíxin chaxín kjuitoxínhínrá tí nkehe tjenkayáxinrá. Jahará nccheinkerá ntáchrórá kíxin k'uaxrjeníxinrá ch'ín Abraham. Janhan ntáxrjan kíxin kjónté tí xro i la Dios tsjacha chrókjuich'ena ch'án chojni k'uaxrjeníxin ch'ín Abraham. ⁹ Kíxin tí chica hacha ó tjechónhen tsochrínjinxín tí nta. A ntá kaín xín nta t'ónahya to jína mé tsochrínjin kíxin tsoche —ichro ch'án.

¹⁰ A ntá tí chojni mé kjuanchankíhi sín ch'án kíxin:

—A ntá tí xíkaha, ¿a ntá jeheni nkehe tí chrókjuich'eni? —ichro sín.

¹¹ Ntá kjuátuhe ch'ín Juan kíxin:

—Tí nkexro chóntha yaá camisa la chrókjuinchekitonhen tí nkexro chóntahya. La ko tí nkexro chóntha nkehe sine chróchjéhe sín tí nkexro chóntahya nkehe sine —ichro ch'án.

¹² Kjaxin ikui iso tí sín nchekjènki kíxin chrókuikite sín. Ntá kjuanchankíhi sín tí ch'ín Juan kíxin:

—Maestro, ¿nkehe chrókjuich'eni jeheni? —ichro sín.

¹³ Ntá ntáchró ch'ín Juan kíxin:

—Jehó éxí tí tsík'ítuanhanrá chrókjuinchekjènkirá —ichro ch'án.

¹⁴ Kjaxin iso sín soldado kjuanchankíhi sín ch'án kíxin:

—¿Kjaxin jeheni nkehe chrókjuich'eni? —ichro sín.

Ntá kjuátuhe ch'án kíxin:

—Teéhyará ninkexró tí chichákøen sín la ko ninkexró sìch'enéhyará kjuach'ia la ko kjónté tí chichaon tjachará ó la kjuaxróxin chrók'uejorá —ichro ch'án.

¹⁵ Kaín tí chojni chjasin k'uéjochónhen sín tóxakonhen asén sín tjinkaon sín tsonohe sín kíxin á tí ch'ín Juan mé tí Cristo. ¹⁶ Kjánchó chénka ch'ín Juan kaín tí sín tjejó a kíxin:

—Janhan mé inta tíkítexián chojni. A ntá tí nkexro itsi chr'éxín mé tsíkitexínrá tí Nchákuén Dios la ko xrohi. Antsí t'etqan ch'án a ntá janhan la kánhyó. Méxra chrókósuna chrókjuasintánkahá ch'án tí correá tí tokaté ch'án. ¹⁷ Jehe ch'án la ó tjaxeraá ch'án pala sinchetjuáxin ch'án noatrigo kíxin tí ntachjiji trigo la ókjé tsjejo ch'án a ntá tí noatrigo la tsjenájín ch'án la ts'enkachjina ch'án. A ntá tí ntachjiji trigo la tsjakaxín ch'án ijnko xrohi ts'ankahya jnkochríxín —mé xíkaha ichro ch'ín Juan.

¹⁸ Mé xíkaha chronkaxín ch'án la ko itsjé í so nkehe kjuínchexraxinkaon ch'án chojni mé xíkaha kjuákoexín ch'án sín tí tan jína. ¹⁹ Kjaxin kjuentuéhe ch'án tí ch'ín Herodes kíxin chóntha ch'án tí tjan Herodías, mé tí ichjién kíchó ch'án Felipe, la ko kjuentuéhe ch'án tí ch'ín Herodes kíxin tí í so nkehe jínahya tsíkjich'e ch'án. ²⁰ Kjánchó ch'ín Herodes ántosén ch'án kjónté kuínhin ch'án la kjuínchek'ánkí ch'án tí ijié ch'án ínaá kíxin kjuák'echjina ch'án tí ch'ín Juan tí ntøechiso.

* ^{3:6} 3.4-6 Isaías 40.3-5

*Kuíkite ch'ín Jesús
(Mt. 3.13-17; Mr. 1.9-11)*

²¹ A ntá naxaq kuènhyá tíha naxaq kjuák'e ch'ín Juan kuíkite ch'án chojni ntá kjaxin ch'ín Jesús mé kuíkite ch'án. A ntá tjenixjehé ch'án Dios ntá xitjehé nkajní ²² ntá k'uínkajin Nchäkuén Dios éxi ijkó kontóá tsjehe la kjuák'e chrítaón kja ch'án. Ntá xrínahya kuínhin sín itén nkexro nkaya nkajní ntáchro kíxin:

—Jaha mé xjanna la tjuaha tí jaha. Imá chàna kíxin nchexiteyána tí jaha.

*Tí sín tsík'axrjeníxin ch'ín Jesucristo
(Mt. 1.1-17)*

²³ Ch'ín Jesús k'uéchóntha ch'án chjino treinta nánó tió kjuankíxin kjuako ch'án. Ntá kjuenkayáxin sín kíxin it'é la mé ch'ín José. Ntá it'é tí ch'ín José la mé ch'ín Elí. ²⁴ A ntá it'é tí ch'ín Elí la mé ch'ín Matat; a ntá it'é tí ch'ín Matat la mé ch'ín Leví, a ntá it'é tí ch'ín Leví la mé ch'ín Melqui; a ntá it'é tí ch'ín Melqui la mé ch'ín Jana; a ntá it'é tí ch'ín Jana la mé ch'ín José. ²⁵ A ntá it'é tí ch'ín José la mé ch'ín Matatías, a ntá it'é tí ch'ín Matatías la mé ch'ín Amós, a ntá it'é tí ch'ín Amós la mé ch'ín Nahum, a ntá it'é tí ch'ín Nahum la mé ch'ín Esli; a ntá it'é ch'ín Esli la mé ch'ín Nagai, ²⁶ a ntá it'é tí ch'ín Nagai la mé ch'ín Maat, a ntá it'é tí ch'ín Maat la mé ch'ín Matatias, a ntá it'é tí ch'ín Matatías la mé ch'ín Semei, a ntá it'é tí ch'ín Semei na mé ch'ín José, a ntá it'é tí ch'ín José na mé ch'ín Judá, ²⁷ a ntá it'é tí ch'ín Judá na mé ch'ín Joana, a ntá it'é tí ch'ín Joana la mé ch'ín Resa, a ntá it'é tí ch'ín Resa na mé ch'ín Zorobabel, a ntá it'é tí ch'ín Zorobabel na mé ch'ín Salatiel, a ntá it'é tí ch'ín Salatiel na mé ch'ín Neri, ²⁸ a ntá it'é tí ch'ín Neri na mé ch'ín Melqui, a ntá it'é tí ch'ín Melqui na mé ch'ín Adi, a ntá it'é tí ch'ín Adi na mé ch'ín Cosam, a ntá it'é tí ch'ín Cosam na mé ch'ín Elmodam, a ntá it'é tí ch'ín Elmodam na mé ch'ín Er, ²⁹ a ntá it'é tí ch'ín Er na mé ch'ín Josué, a ntá it'é tí ch'ín Josué na mé ch'ín Eliezer, a ntá it'é tí ch'ín Eliezer na mé ch'ín Jorim, a ntá it'é tí ch'ín Jorim na mé ch'ín Matat, ³⁰ a ntá it'é tí ch'ín Matat la mé ch'ín Leví, a ntá it'é tí ch'ín Leví na mé ch'ín Simeón, a ntá it'é tí ch'ín Simeón na mé ch'ín Judá, a ntá it'é tí ch'ín Judá na mé ch'ín José, a ntá it'é tí ch'ín José na mé ch'ín Jonán, a ntá it'é tí ch'ín Jonán na mé ch'ín Eliaquim, ³¹ a ntá it'é tí ch'ín Eliaquim na mé ch'ín Melea, a ntá it'é tí ch'ín Melea na mé ch'ín Mainán, a ntá it'é tí ch'ín Mainán na mé ch'ín Matata, a ntá it'é tí ch'ín Matata na mé ch'ín Natán, ³² a ntá it'é tí ch'ín Natán na mé ch'ín David, a ntá it'é tí ch'ín David na mé ch'ín Isaí, a ntá it'é tí ch'ín Isaí na mé ch'ín Obed, a ntá it'é tí ch'ín Obed na mé ch'ín Booz, a ntá it'é tí ch'ín Booz na mé ch'ín Salmón, a ntá it'é tí ch'ín Salmón na mé ch'ín Naasón, ³³ a ntá it'é tí ch'ín Naasón na mé ch'ín Aminadab, a ntá it'é tí ch'ín Aminadab na mé ch'ín Aram, a ntá it'é tí ch'ín Aram na mé ch'ín Esrom, a ntá it'é tí ch'ín Esrom na mé ch'ín Fares, a ntá it'é tí ch'ín Fares na mé ch'ín Judá, ³⁴ a ntá it'é tí ch'ín Judá na mé ch'ín Jacob, a ntá it'é tí ch'ín Jacob na mé ch'ín Isaac, a ntá it'é tí ch'ín Isaac na mé ch'ín Abraham, a ntá it'é tí ch'ín Abraham na mé ch'ín Taré, a ntá it'é tí ch'ín Taré na mé ch'ín Nacor, ³⁵ a ntá it'é tí ch'ín Nacor na mé ch'ín Serug, a ntá it'é tí ch'ín Serug na mé ch'ín Ragau, a ntá it'é tí ch'ín Ragau na mé ch'ín Peleg, a ntá it'é tí ch'ín Peleg na mé ch'ín Heber, a ntá it'é tí ch'ín Heber na mé ch'ín Sala, ³⁶ a ntá it'é tí ch'ín Sala na mé ch'ín Cainán, a ntá it'é tí ch'ín Cainán na mé ch'ín Arfaxad, a ntá it'é tí ch'ín Arfaxad na mé ch'ín Sem, a ntá it'é tí ch'ín Sem na mé ch'ín Noé, a ntá it'é tí ch'ín Noé na mé ch'ín Lamec, ³⁷ a ntá it'é tí ch'ín Lemec na mé ch'ín Matusalén, a ntá it'é tí ch'ín Matusalén na mé ch'ín Enoc, a ntá it'é tí ch'ín Enoc na mé ch'ín Jared, a ntá it'é tí ch'ín Jared na mé ch'ín Mahalaleel, a ntá it'é tí ch'ín Mahalaleel na mé ch'ín Cainán, ³⁸ a ntá it'é tí ch'ín Cainán na mé ch'ín Enós, a ntá it'é tí ch'ín Enós na mé ch'ín Set, a ntá it'é tí ch'ín Set na mé ch'ín Adán, a ntá Dios mé xjeen ch'ín Adán.

¹ A ntá ch'ín Jesú imá chóntha ch'án kjuachaxién Nchakuen Dios ntá kjanxin ch'án tí ntarió Jordán. Ntá tí Nchakuen Dios sákjuiko ch'án nteje. ² Ntaha kjuák'e ch'án cuarenta yaon na ntá tí ch'ín Tsochren tjinkaon chrókjuachroe tí jehe ch'án. Kjónehya ch'án ninkehó tí cuarenta yaon a, a ntá chr'éxin ntá xríñahya ik'uén ch'án kjinta. ³ Ntá ntáchro tí ch'ín Tsochren kixin:

—Tí chaxín jaha Xjeen Dios la ntáche tí xro i kixin chrók'óna niotja.

⁴ A ntá kjuátuhe ch'ín Jesú ntáchro ch'án kixin:

—Náhí. Ntáchro xroon itén Dios kixin: “Jehya niotja ó chrók'uejóchónxin chojni. Náhí. Kaín tí tan nixja Dios tjejóchónxin chojni”* —ichro ch'án.

⁵ Ntá sákjuiko ch'ín Tsochren tí ch'ín Jesú ijnko jna imá noi ntá kjuako tí Jínahya kaín tí nación siín chjasintajni. ⁶ Ntá ntáchro tí ch'ín Tsochren kixin:

—Janhan tsotjaha kaín tí kjuachaxin la ko kaín tí nkehe tjete chóntha kaín tí nación a. Janhan na k'uayáhkaín tíha la ntá jie tsotjaha tí nkexro tjinkavant tsotjaha. ⁷ Tí tsjak'éxian tóch'ian tsjíkosayana tí janhan ntá kaín tí nkehe la ts'óna kuéntá —ichro ch'án.

⁸ Ntá kjuátuhe ch'ín Jesú ntáchro ch'án kixin:

—Sátjia Satanás, kixin xroon itén Dios ntáchro kixin “Chrókjuíkosáyehé Inchéni Dios la jehó ch'án chrókjuich'ehé xra”† —ichro ch'án.

⁹ A ntá ch'ín Tsochren mé sákjuiko ch'ín Jesú tí chjasin Jerusalén la sákjuiko ch'án tí chrítaón tí kja ninko, a ntá ntáchro ch'án kixin:

—Tí chaxín Xjeen Dios jaha la titohé t'anótjenxian tí noi ntihi ¹⁰ kixin ntáchro xroon itén Dios kixin:

Dios mé ts'etueñhen tí sín ángel kuénte ch'án kixin ts'ayakonhan sín.‡

¹¹ Tsotsé sín itjá

kixin tsotéhya totá ts'itja xro tí ts'anótjen§

—mé xikaha ichro ch'ín Tsochren.

¹² Ntá kjuátuhe ch'ín Jesú ntáchro ch'án kixin:

—Náhí. Kjaxin ntáchro xroon itén Dios kixin: “Chjiníhya chrókjuásixián kjuaxroan kjuachaxin kuénte Inchéni Dios”* —ichro ch'ín Jesú.

¹³ Mé xikaha tió kjuachahya tí ch'ín Tsochren kaín nkehe chrók'uetueñhen tí ch'ín Jesú ntá k'uaxrjenta ch'án iso yaon.

Ch'ín Jesú kjuankixin ch'án tí xra kuénte ch'án estado Galilea

(Mt. 4.12-17; Mr. 1.14-15)

¹⁴ Ntá ch'ín Jesú xíkjan ch'án estado Galilea ínaá na imá chóntha ch'án kjuachaxin kuénte Nchakuen Dios. Ntá tjejótjo sín nkuíxín ntiha kixin nkexro tí jehe ch'án. ¹⁵ Kjuakoxin ch'án tí ninkoe sín kaín chjasin la ko kaín xín chojni kjuanchia sín kjuasáya kixin kóxrjinhín sín tí kjuako ch'án.

Ch'ín Jesú kjuák'e ch'án chjasin Nazaret

(Mt. 13.53-58; Mr. 6.1-6)

¹⁶ Ntá ch'ín Jesú sákjuí ch'án chjasin Nazaret na mé tí chjasin tsík'ánkixin ch'án. Ntá tí yaon t'ok'ehé sín mé k'uíxenhen ch'án ijnko ninko Israel kixin xikaha kuénen ch'án. Ntá kjuák'exín toté ch'án kixin sinchekuáxin ch'án tí xroon itén Dios. ¹⁷ Chjéhe sín ch'án tí xroon kuénte tí profeta Isaías. Ntá kuakitjehé ch'án tí xroon ntá k'uitja ch'án nketí nixja xikihi:

¹⁸ Tí Nchakuen It'eni Dios tjetjinkitsana má,

kixin kjueyána ch'án kixin tsroxrjanka tí tan jína kuénte Dios tsjakohá tí sín nòa.

K'uetuanna ch'án kixin sintakítoha jína tí sín t'avá qasén kixin chontahya sín nkerí tsaáxin sín,

* 4:4 Deuteronomio 8.8

† 4:8 Deuteronomio 6.13

‡ 4:10 Salmo 91.11

§ 4:11 Salmo 91.12

* 4:12

Deuteronomio 6.16

la ko tsjakohá tí sín tjejóchjina kíxin nkexrí tsaá sín,
la ko sintak'ikuán tí sín t'ikonhyá,

la ko sintakaá kaín tí sín tjejótjasóte kohya nkehe tsaáxin sín,

19 la ko tsqxrjanca kíxin ó kjuixraká tí yaon kíxin tí nkexro tsitekaon la tsaá sín.[†]

20 A ntá ch'ín Jesús kjuixin kjuínchekuáxin ch'án tí xroon, a ntá chjéhe ch'án tí ch'ín tjinkitsa tí xrä ninko ntá kjuák'etjaxin ch'án. Ntá kaín tí sín tsíkójkotsé ntiha ninko naxa tjejókomá sín tí jehe ch'án. **21** Ntá kjuankíxin chronkaxín ch'án ntáchro ch'án kíxin:

—Ntá ijie la ó xiteyá tí nkehe kjuintakuáxian tí xroon itén Dios kuínhínrá —ichro ch'án.

22 Ntá kaín sín kóxrjínhín sín tí kjuako ch'ín Jesús la ko chrakon sín kíxin náxrjón tí nkehe nixja ch'án. Ntá kjuanchankíhi sín kíchó sín ntáchro sín kíxin:

—¿A jehya xjeen ch'ín José tíhi? —ichro sín.

23 Ntá kjuátehe ch'ín Jesús ntáchro ch'án kíxin:

—Kjá tsontáchrará kíxin janhan ijnko chojni ch'e xroan chrókjuitakitoha jína asenná senó, la ko tsontáchrará kíxin tí nkehe kuínhínrá kjuít'a tí chjasin Capernaum xíkaha chrókjuit'a ntihi chjasenná, tsixrorá —ichro ch'án.

24 Naxa tjenixja ch'án ntáchro ch'án kíxin:

—Ijnko nkehe chaxín tsotjonkará kíxin tí sín chjasén ijnko nkexro chrónka itén Dios la mé xráxín chóntheya sín kjuasáyé tí nkexro a. **25** Chaxín ntáxrjan kíxin k'uéjó itsjé chojni chjin tsíkók'án tí nación Israel tió kjuák'e ch'ín Elías tí nkexro k'uéchrónka itén Dios la ntá í k'uániáhya chrin iní nánó ko t'o la ko imá kókjinta nkuíxín chjasin ntiha. **26** Kjánchó Dios la k'uëtuënhya ch'ín Elías sáchrókjuitsjehe ch'án nijnko chojni chjin tsíkók'án tí nación Israel. Náhí. Dios k'uëtuënen ch'án kíxin sátsjitsjehe ch'án ijnko chojni chjin tsíkók'án itjen chjasin Sarepta chjino chjasin Sidón.[‡] **27** Kjáxin nación Israel k'uéjó nchónhya chojni chóntha chinlepra tió kjuák'e ch'ín Eliseo chrónka ch'án itén Dios, kjánchó nijnko sín kuítöehya sín jína la mé jehó ch'ín Naamán kjuixin ch'án nación Siria mé kuítóhe ch'án jína[§] —mé xíkaha ichro ch'án.

28 A ntá tió kuínhin sín xíkaha ntáchro ch'ín Jesús la ntá kaín tí chojni k'uéjóxenhen ninko la mé imá kóninkaon sín. **29** K'uínkatjen sín itsé sín ch'án sákjuíko sín ch'án tí ikon chjasin la sákjuíko sín ch'án chrítaón tí tjo tí tjen tí chjasin a chrókjuinche'ánótjenxin sín ch'án tí tjo a. **30** A ntá ch'ín Jesús k'uátsínka jnkosiné tí siín tí jehe sín la sákjuí ch'án.

Ijnko chojni chóntha ijnko nchákuén tí jínahya

(Mr. 1.21-28)

31 A ntá ch'ín Jesús sákjuí ch'án tí chjasin Capernaum na mé ijnko chjasin estado Galilea, na ntá ntaha kjuankíxin ch'án kjuákohé ch'án chojni tí yaon t'ok'éhe sín. **32** Chrakon sín kíxin nkexrí kjuako ch'án kíxin kjuákoxin ch'án kíxin chóntha ch'án kjuachaxin.

33 A ntá nkaxenhen ninko kjuák'e ijnko ch'ín chóntha ijnko nchákuén tí jínahya k'óyakoxín itén tí ch'ín a, ntáchro kíxin:

34 —Títóhéri; ¿nkekuénte tjáaté tí jeheni kaín ni, jaha Jesús kjuíxian chjasin Nazaret? ¿Á k'uinka kíxin sínchek'itjáyanni? Ó tjátsoan tí jaha la ko nòna kíxin jaha mé tí nkexro tjóá kuénte Dios —ichro tí nchákuén tí jínahya.

35 Ntá ch'ín Jesús jiehe k'uëtuënen tí nchákuén tí jínahya ntáchro ch'án kíxin:

—Tánia. T'axrjéxian tí ch'ín a —ichro ch'án.

A ntá tí nchákuén tí jínahya kjuáka tí ch'ín a kjuítsínka ch'án nonte jnkosiné tí siín sín la k'uaxrje tí nchákuén tí jínahya la kohya ninkehó kónhen tí ch'ín kjuítsínka. **36** A ntá kaín sín chrakon sín itjo sín kíchó sín kíxin:

[†] **4:19** 4.18-19 Isaías 61.1-2 [‡] **4:26** 4.25,26 1 Reyes 17.9;18.1 [§] **4:27** 2 Reyes 5.1-14

—¿Xá nkexrí kíxin xíkaha nixja tí ch'ín i? Jehe ch'án chóntha kjuachaxin kíxin k'uētuēnhen ch'án tí nchäkuen tí jínahya k'uaxrjexín tí nkexro i —ichro sín.

³⁷ A ntá nkuíxín ntiha ikjo sín kíchó sín kíxin nkerí kjuaxroan kjuich'e ch'ín Jesús.

*Ch'ín Jesús kjuínchekitohe jína tí tjan ich'ee ch'ín Simón Pedro
(Mt. 8.14-15; Mr. 1.29-31)*

³⁸ Ntá ch'ín Jesús k'uaxrjexín ch'án tí ninko la ntá k'uíxenhen ch'án ntœ ch'ín Simón. A ntá tí tjan ich'ee ch'ín Simón mé níhi tjan chóntha tjan ijnko sóa jíé ntá chronóehe sín ch'án kíxin chrókjuinchekitohe ch'án tjan jína. ³⁹ Ntá k'uísén ch'ín Jesús tí tjen tjan ntá k'uētuēnhen ch'án tí sóa a ntá kjuin. Ntá tuénxín k'uàya tjan la ntá kjuanjon tjan nkehe sine sín.

*Ch'ín Jesús kjuínchekitohe ch'án jína itsjé chojni níhi
(Mt. 8.16-17; Mr. 1.32-34)*

⁴⁰ A ntá kuétaón yaon ntá kaín tí sín chóntha sín sinníhi chóntha sín nchónhya clase chin mé kuikao sín tí tjen ch'ín Jesús. Ntá kjuak'etja tja ch'án jnkojko tí jehe sín a ntá xíkaha kuítotohe sín jína. ⁴¹ La ko nchónhya chojni níhi chóntha nchäkuen tí jínahya la mé k'uaxrje tí nchäkuen tí jínahya la k'óyako la ko ntáchro kíxin:

—Jaha mé Xjeen Dios —mé ichro tí nchäkuen tí jínahya.

Kjánchó ch'ín Jesús k'uētuēnhen ch'án tí nchäkuen tí jínahya la kjuanjonhya ch'án kjuachaxin kíxin tsonixja kíxin ó nohe tí nchäkuen tí jínahya kíxin jehe ch'án na mé tí nkexro Cristo.

*Ch'ín Jesús kjuako ch'án tí estado Galilea
(Mr. 1.35-39)*

⁴² A ntá tí kóyaon k'uínkaséyan ntá ch'ín Jesús k'uaxrjenta ch'án chjasin sákjuí ch'án nteje. A ntá kaín tí chojni kjuíkjeyá sín ch'án la k'uitja sín tí tjen ch'án. Tjinkaon sín chrókjuinchexrjenen sín ch'án kíxin sáchrókjuihya ch'án ókjé. ⁴³ Kjánchó kjuátēhe ch'ín Jesús ntáchro ch'án kíxin:

—T'ichjánxiñ kíxin sátsjia kaín chjasin ókjé tsorxjanka tí tan jína kuénte Dios kíxin nkexrí tí kjuachaxin t'etqan Dios, kíxin xrä ó mé k'uinka —ichro ch'án.

⁴⁴ A ntá xíkaha k'uájkako ch'ín Jesús kaín tí ninko Israel tí estado Galilea.

5

*Kjuaxroan itsé sín koche
(Mt. 4.18-22; Mr. 1.16-20)*

¹ Ntá ijnko yaon kjuák'e ch'ín Jesús chrínta ntayaon Genesaret ntá kóchjina nchónhya chojni na mé k'uíxitja kíchó sín kíxin tjinkaon sín chrókuinhin sín itén Dios. ² Ntá k'uíkon ch'ín Jesús kíxin tjejó iyó ntabárcó jehó chjino chrínta ntayaon. A ntá tí sín itsé koche mé tsík'axrjexín sín ntiha la k'uéjó sín tjentoá sín la ko tjejótjoneñma sín tí nchísén tséya sín koche. ³ Ntá ch'ín Jesús k'uit'ótjen ch'án ijnko tí ntabárcó ntiha na mé ntabárcó kuénte ch'ín Simón na ntá chronóehe ch'án tí ch'ín Simón kíxin sátsjiko ch'án ntabárcó ijnko chrínta ntá kjínya. Ntá ntahó kjuák'enkáya ch'ín Jesús tí nta kjuák'etjaxin ch'án kjuakohe ch'án nchónhya chojni siín chrínta ntá. ⁴ A ntá tió kjuixin nixja ch'án ntá ntáche ch'án tí ch'ín Simón kíxin:

—Tjíko ntabárcó tí tjiá ntá ninka ntá itérá tí nchísén tseyará koche —ichro ch'án.

⁵ Ntá kjuátēhe ch'ín Simón ntáchro ch'án kíxin:

—Maestro, kjuich'eni xrä kuenté tie la tséhyani ninkehó koche. Kjánchó tí jaha xíkaha kuétuēnhénni la mé tsochr'ánni tí nchísén ínaá —ichro ch'án.

⁶ Na ntá xíkaha kjuich'e sín la ntá nchónhya koche tsítsé tí nchísén la ntá tí nchísén kjuankíxin tinkák'ichje. ⁷ Ntá k'uèyaxin sín tja sín kíxin chróxrakoa tí sín ch'eko sín xrä tjejóxenhen tí í jnko ntabárcó kíxin tsjinkitsa sín. Ntá xrákao sín ntabárcó kuénte sín ntá

kjuínchekaón sín yóí tí ntabárco ntá chrókuachahya tí ntabárco na tjinkaon chrók'uániánki ntá. ⁸ Ntá xíkaha k'uíkon ch'ín Simón Pedro ntá kjuák'exín toch'in ch'án nkayakon ch'ín Jesús ntá ntáchro ch'án kixin:

—Títóhéní Inchéni kixin jeheni ijkno chojni chóntha jie —ichro ch'án.

⁹ Mé xíkaha ichro ch'ín Simón kixin chrakon ch'án la ko kjaxin chrakon tí so sín tjejóko ch'án kixin xíkaha kónhen xrenájín nchónhya kache. ¹⁰ La ko ch'ín Jacobo la ko ch'ín Juan, xjeen ch'ín Zebedeo, na mé jnkokoá ch'eko sín xra ch'ín Simón, la kjaxin chrakon sín. Kjánchó ntáche ch'ín Jesús tí ch'ín Simón kixin:

—Chrakonhyá. Senó la kache k'uétsé la nta jie la náhí la mé chojni tsjeyá —ichro ch'án.

¹¹ Ntá tió kjuíjiko sín tí ntabárco tí chrínta ntá la kuítóhe sín kaín nkehe kuénte sín ntá chréhé sín sákuíko sín tí ch'ín Jesús.

Ch'ín Jesús kjuínchekitohe ch'án jína ijkno chojni chóntha chinlepra

(Mt. 8.1-4; Mr. 1.40-45)

¹² Kjuák'e ch'ín Jesús ijkno tí chjasin, ntá kui ijkno chojni níhi chóntha chinlepra. A ntá tió k'uíkon ch'án tí ch'ín Jesús ntá kjuák'exín toch'in ch'án chronóehe ch'án jnkojina ntáchro ch'án kixin:

—Inchéni, tí tjinkávan jaha la jína chrókuínchekitohe jína —ichro ch'án.

¹³ Ntá ch'ín Jesús kjuéntoá tja ch'án ntá kjuak'etja tja ch'án chrítaón tí sinníhi ntáchro ch'án kixin:

—Méxra xíkaha tjinkávan. Ntá jie sintakitoha jína —ichro ch'án.

Ntá xíkaha ichro ch'án ntá tí chinlepra tuénxín kjuílinhin tí sinníhi. ¹⁴ A ntá k'uétuénen ch'ín Jesús tí ch'ín a kixin chróchenkahya ch'án ninkexró. Ntáchro ch'án kixin:

—Sátjia tjítsjehé tí nchat'á la tsjánjuan tí nkehe tsík'etoan ch'ín Moisés ts'áyéhe Dios* kixin ntá tsongoexín kaín xín chojni kixin ó kuítóha jína —ichro ch'án.

¹⁵ Kjánchó antsí k'uíxikónahe sín nkexrí tí kjuaxroan kjuasin ch'ín Jesús, ntá nchónhya chojni k'uíxikóchjinehe sín ch'án kixin tsinhin sín nkehe tsjako ch'án, la ko tsitogexín sín jína tí chin chóntha sín. ¹⁶ Kjánchó ch'ín Jesús la k'uaxrjenta ch'án tí kohya chojni la ntaha nixjeexín ch'án Dios.

Ch'ín Jesús kjuínchekitohe ch'án jína ijkno ch'ín tsík'en toté

(Mt. 9.1-8; Mr. 2.1-12)

¹⁷ A ntá ijkno yaon kjuák'ekjako ch'ín Jesús na ntá ntiha k'uéjótjaxin iso sín fariseo la ko iso tí sín tjako tí ley, tsíkjixin sín kaín tí chjasin ntsí estado Galilea la ko kaín tí chjasin ntsí estado Judea la ko tí chjasin Jerusalén. Ntá tí kjuachaxin kuénte Dios kjuakoxin ch'án kixin sinchekitohe ch'án chojni jína. ¹⁸ Ntá kui iso chojni tinkátsénki sín ijkno ch'ín tsík'en tote tjenkáya ijkno kania. Ntá tjinkaon sín chrók'uixenko sín ch'án tí nchia kixin chrókuak'e ch'án tí tjen ch'ín Jesús tjetjako ch'án. ¹⁹ Kjánchó xitjahya ts'ixenhen sín kixin nchónhya chojni sínchenen nchia. Ntá k'uít'ótjen sín tí chrítaón nchia, ntá kjuakjìn sín iso teja la ko tí nta sít'ó ntá ntiha kjuinkajinxin sín tí ch'ín níhi tjenkáya kania ntoí tí tjen ch'ín Jesús. ²⁰ Na ntá tió k'uíkon ch'ín Jesús kixin imá tinkáchónki sín ch'án ntá nixjehe ch'án tí ch'ín níhi, ntáchro ch'án kixin:

—Jaha, ó kjuixin kjuílinhan tí jie chonta —ichro ch'án.

²¹ A ntá tí sín maestro tjako tí ley la ko tí sín fariseo kjuankíxin sín kjo sín asén sín kixin: “¿Xá nkexro tíhi ch'ia ch'án ncheyóhe ch'án asén ch'án Dios? Ninkexró xitjahya tsjakjìn ijié kixin jehó Dios mé chóntha kjuachaxin tsjatsen ijié chojni”, mé xíkaha kjuenkayáxin sín.

²² Ntá ch'ín Jesús la ó nohe ch'án tí nkehe tjenkayáxin sín ntá ntáchro ch'án kixin:

—¿Nkekuénte kixin xíkaha tjenkayáxinrá? ²³ ¿Nkehe antsí xrahya chróntátjan ch'án? Á antsí xrahya chróntátjan ch'án kixin ó kjuixin kjuílinhin ch'án tí ijié yámá ch'án, o

* **5:14** Levítico 14.4-8

á antsí xrahya chróntátjan ch'án kíxin chrók'uínkatjen ch'án sáchrókjui ch'án? ²⁴ Méxra ijie tsjákoxiān kíxin tí Xjeen Dios K'óna Chojni mé chóntha kjuachaxin ntihi chjasintajni tsjakjìlinhin ijéj chojni —ichro ch'án.

Ntá k'uētueñhen ch'án tí ch'ín tsík'en tote ntáchro ch'án kíxin:

—Jaha tétuñhan t'inkatjen tjatsíyan kañia la sájtia ntøa —ichro ch'án.

²⁵ Ntá tuénxín k'uínkatjen tí ch'ín tsík'en tote nkayakon kaín tí sín siín a la kuákja ch'án kaniee ch'án k'uékjak'eták'á ch'án ntá sákjuí ch'án ntøe ch'án la kjuanchehe ch'án Dios kjuasáya. ²⁶ Ntá kaín sín imá chrakon sín la kjuanchehe sín Dios kjuasáya kjónté chrakon sín la ntáchro sín kíxin:

—Ijie mé k'uíkonni antsí má kjuaxroan jié —ichro sín.

*Ch'ín Jesús k'uíyéhe ch'án tí ch'ín Levi
(Mt. 9.9-13; Mr. 2.13-17)*

²⁷ Ntá chr'éxín ntá ch'ín Jesús k'uaxrjexín ch'án nchia ntá k'uíkon ch'án ijkno ch'ín nchekjènki mé it'in ch'án Leví tjetjaxín ch'án tjech'e ch'án xra nkaxenhen tí nchia ntsí tí xenkaxín chichaon a. Ntá ntáchro ch'án kíxin:

—Chrhéhé tí janhan —ichro ch'án.

²⁸ Ntá ch'ín Leví mé tuénxín k'uínkatjen ch'án la ntá kuítøhe ch'án kaín xín nkehe ntá chréhé ch'án tí ch'ín Jesús.

²⁹ Ntá chr'éxín ch'ín Leví chóntha ch'án ijkno kia jié ntøe ch'án kjuikosáyehe ch'án tí ch'ín Jesús. Kjäxin k'uéjó itsjé tí sín nchekjènki la ko itsjé í so chojni chóntha jié k'uéjótjaxinko sín tí ch'ín Jesús chjino tí mesa a. ³⁰ A ntá tí sín fariseo la ko tí sín maestro tjako tí ley la mé kjuankíxín sín tjonta sín tí sín k'uájiko ch'ín Jesús ntáchro sín kíxin:

—¿Nkekuénte ntekoará la ko t'ikoará tí sín nchekjènki la ko tí sín chóntha jié? —ichro sín.

³¹ A ntá kjuátøhe ch'ín Jesús ntáchro ch'án kíxin:

—Tí chojni níehya t'ichjánxienhya sín nkexro sich'e xroan. Náhí. Jehó tí sín níhi mé t'ichjánxinhin sín nkexro sich'ehe sín xroan. ³² Janhan la k'uinkahya ntihi kíxin chrók'uíyahá tí sín jína tjejó. Náhí. Janhan k'uinka kíxin ts'íyahá tí sín chóntha jié kíxin chrókuítøhe sín tí ijé sín ntá chrókjuinkí sín tí tjenkayáxin sín —ichro ch'án.

*Tjanchankíhi sín tí ch'ín Jesús kíxin á chrókjónehyá sín tió tsonixjéhe sín Dios
(Mt. 9.14-17; Mr. 2.18-22)*

³³ A ntá kjuanchankíhi sín tí ch'ín Jesús kíxin:

—¿Nkekuénte kíxin tí sín k'uék'ajiko ch'ín Juan jnkoyaxón nehya sín na nixjéhe sín Dios, la ko kjäxin xíkaha ch'e tí sín xriko tí sín fariseo, a ntá tí sín xriko la ine sín la ko it'i sín? —ichro sín.

³⁴ Ntá kjuátøhe ch'ín Jesús kíxin:

—Xá chrókjuachará chrókuétueñhenrá kaín tí sín tsík'íyéhe sín tsíkóchjina tí tjejó tí sín tsíkótehe kíxin chrókjónehyá sín tí naxa tjejóko sín tí ch'ín tsíkótehe? ³⁵ Kjánchó tsjixraká tí yaon itsi chojni tsotsé sín tí ch'ín tsíkótehe sátsjiko sín ch'án. Ntá tí sín tsíkóchjina la ts'ává sín la í sinehya sín —ichro ch'án.

³⁶ Kjäxin kjuíncheyóexin ch'án ntáchro ch'án kíxin:

—Ninkexró chrókuaté ijkno camisa nixin ntá chrókjuak'eniéhe ijkno camisa ntaxin kíxin xíkaha chrókjuich'e sín ntá chrók'uitjáyan tí camisa nixin la ko kjäxin tí t'o ka k'uaxrjexín tí camisa nixin tsøyóehya tí camisa ntaxin. ³⁷ Kjäxin chrókuíkjahyará xranvino nixin ijkno tjuaxran ntaxin kíxin tí xíkaha chrókjuich'erá la chrók'uichje tí tjuaxran ntaxin ntá chrók'uitjáyan tí xran la ko chrók'uitjáyan tí tjuaxran. ³⁸ A ntá tí xranvino nixin chrókuikia ijkno tjuaxran nixin kíxin yói la chrók'uitjáyanhya. ³⁹ La ko kjäxin ninkexró tió tsík'i tí xran ntaxin naxa chrókóxrjínhin chrók'ui xran nixin. Náhí. Tsontáchro ch'án kíxin íchá jína tí xran ntaxin, tsixro ch'án —mé xíkaha ichro ch'ín Jesús.

6

*Tí sín k'uájiko ch'ín Jesús mé k'uín sín iso noatrido ijnko yaon t'ok'éhe tí sín israelita
(Mt. 12.1-8; Mr. 2.23-28)*

¹ Ijnko yaon t'ok'éhe sín la ch'ín Jesús k'uátsínska ch'án iso nonte t'óna noatrido. Na ntá tí sín k'uájiko ch'án mé ik'uín sín iso noatrido la kjuankíxín sín nkaya tja sín ó k'óntajinyá sín tí noa ntá kjóne sín. ² Ntá iso tí sín fariseo kjuanchankí sín kíxin:

—¿Nkekuénte kíxin tjejoch'erá xra jie? La mé kohya kjuachaxin ts'onhen xra tí yaon t'ok'éheni —ichro sín.

³ Ntá kjuátehe ch'ín Jesús kíxin:

—¿Jahará á kjuinchekuáxinhárá tí xroon chrónka nkehe kjuich'e ch'ín David la ko tí sín k'uájiko ch'án tió k'uén sín kjinta? ⁴ Na mé jehe ch'án mé k'uíxenhen ch'án ntœ Dios la kjóne ch'án tí niotja tsíkóyaon, la ko kjaxin chjéhe ch'án tí niotja tí sín k'uájiko ch'án kjónté jehó siín kjuachaxin sine tí sín nchat'á* —ichro ch'ín Jesús.

⁵ Kjaxin ntáchro ch'án kíxin:

—A ntá tí Xjeen Dios K'óna Chojni mé chónta kjuachaxin ts'etqan nkexrí ts'onhen tí yaon t'ok'éheni —ichro ch'án.

*Ch'ín Jesús kjuinchekitóhe jína ijnko ch'ín tsíxámá tja
(Mt. 12.9-14; Mr. 3.1-6)*

⁶ A ntá í jnko yaon t'ok'éhe chojni ntá k'uíxenhen ch'ín Jesús ijnko ninko Israel la ntá kjuankíxín kjuako ch'án. A ntá ntaha kjuák'e ijnko ch'ín tsíxámá tja ch'án chjina. ⁷ Na ntá tí sín tjako tí ley la ko tí sín fariseo tjejó sín tsáyehe sín tí ch'ín Jesús chrók'uikon sín á sinchekitohe ch'án chojni jína tí yaon t'ok'éhe sín kíxin ntá chrók'ueka sín ch'án jie.

⁸ Kjánchó jehe ch'án ó nohe ch'án nkehe tjenkayáxin asén sín ntá nixjehé ch'án tí ch'ín tsíxámá tja ntáchro ch'án kíxin:

—T'ínkajen, tjak'e jnkosiné ntihi —ichro ch'án.

Ntá k'uínkajen tí ch'ín a kjuák'exín tote ch'án. ⁹ Ntá nixjehé ch'ín Jesús tí í so sín ntáchro ch'án kíxin:

—Tsjánchánkíhárá ijnko xra. Tí yaon t'ok'éheni la, ¿á jína chrókjuich'eni ijnko nkehe jína ní o á chrókjuich'eni ijnko nkehe jínahya? ¿Á chrókjuinchekitóheni chojni jína ní o á chrók'oyánni chojni? —ichro ch'án.

¹⁰ Ntá ch'ín Jesús komá ch'án kaín tí chojni siín ntiha ntá nixjehé ch'án tí ch'ín níhi ntáchro ch'án kíxin:

—Tjéntoá tjá —ichro ch'án.

A ntá tí ch'ín a xíkaha kjuich'e ch'án ntá kuítóhe tja ch'án jína. ¹¹ Kjánchó tí sín fariseo tjejó mé kóninkaon sín mé ntá kjo sín kichó sín kíxin tjinkaon sín chrók'oyán sín tí ch'ín Jesús.

*Ch'ín Jesús kjueyá ch'án tí teyó sín ts'ajiko ch'án
(Mt. 10.1-4; Mr. 3.13-19)*

¹² A ntá ijnko yaon ch'ín Jesús sákjui ch'án ijnko jnä kíxin ntaha tsonixjéexín ch'án Dios la ntá ntahó kjuák'e ch'án kuenté tie tjenixjehé ch'án Dios. ¹³ A ntá tí k'uínkaséyan a na mé k'uíyehé ch'án tí sín chréhé sín ch'án ntá kjueyá ch'án teyó sín kíxin ts'óna sín apóstol ts'ajiko sín ch'án. ¹⁴ A ntá tí sín í mé xíkihi it'in sín. Na mé ch'ín Simón la ntá ch'ín Jesús kjuinchek'in ihnié ch'án Pedro kjaxin; la ko kichó ch'án ch'ín Andrés; la ko ch'ín Jacobo la ko ch'ín Juan, la ko ch'ín Felipe, la ko ch'ín Bartolomé, ¹⁵ la ko ch'ín Mateo, la ko ch'ín Tomás, la ko ch'ín Jacobo la mé it'é mé it'in Alfeo; la ko í jnko ch'ín Simón na mé tí ch'ín a mé k'uék'aji tí partido cananista; ¹⁶ la ko ch'ín Judas la kichó ch'án mé it'in Jacobo; la ko ch'ín Judas Iscariote tí ch'ín kjuinchekji tí ch'ín Jesús.

* **6:4** 6.3-4 1 Samuel 21.6; Levítico 24.5-9

*Ch'ín Jesúś kjuakohé ch'an nchónhya chojni
(Mt. 4.23-25)*

¹⁷ Ntá ch'ín Jesúś la ko tí jehe sín k'uínkajinxín sín tí jnä ntá k'uéjó sín nonte yóxin jehe ch'án la ko tí sín kjueyá ch'án. Kjáxin k'uíxikóchjina nchónhya chojni kjuixín nkuíxín estado Judea la ko chjasin Jerusalén la ko tí chrínta ntayaon tí siín tí chjasin Tiro la ko tí chjasin Sidón. Ó kjui sín kíxin tsinhin sín tí nkehe tsjako ch'ín Jesúś la ko tsitohe sín jína. ¹⁸ A ntá tí sín kjuaxróxinhya k'uéjó k'uéchénta sín nchakuen jínahya na mé kuítóhe sín jína kjáxin. ¹⁹ Kaín chojni tjinkaon chrókuákoxín sín tí ch'ín Jesúś kíxin kjuínchekitóhe ch'án jína kaín xín chojni kíxin jehe ch'án chóntha ch'án kjuachaxin jié.

*Tí kjuachéhé la ko tí kjuaxróxinhya
(Mt. 5.1-12)*

²⁰ Ntá komá ch'ín Jesúś tí sín k'uájiko ch'án ntá ntáchro ch'án kíxin:
—Náxrjón tjejorá jahará nòará kíxin chontará kjuächaxiéen Dios.

²¹ Náxrjón tjejorá jahará t'énxinrá kjinta ijie kíxin chr'éxiñ sinterá jína.
'Náxrjón tjejorá jahará tsjankará ijie kíxin chr'éxiñ tsjanorá.

²² Náxrjón tjejorá jahará nínkakonhanrá chojni la ko ts'inkítíárá sín sátsjirá ókjé, la ko t'ántaxínhanrá sín la ko t'ákjenxín sín ihniárá éxi ijnko nkehe jínahya kíxin tinkachónkirá tí Xjeen Dios K'óna Chojni. ²³ Tsocháhárá má la ko imá tsochontará kjuachéhé tí yaon a kíxin ts'ayéhérá nkehe kuénte nkaya nkajní. A ntá xíkaha tí t'áchríi tí sín jínahya ch'e la mé ósé kjuate sín tí sín k'uéchrónka itén Dios.

²⁴ A ntá jahará rícorá kjuaxróxinhya ts'ejorá chr'éxiñ kíxin ó kjuixin k'uayéhérá kaín nkehe.

²⁵ A ntá jahará kjónterá jína, kjuaxróxinhya ts'ejorá chr'éxiñ kíxin ts'énxinrá kjinta.

'A ntá jahará tjanorá jie, kjuaxróxinhya ts'ejorá chr'éxiñ kíxin ts'avará la ko tsotsjankará.

²⁶ Kjuaxróxinhya ts'ejorá tió kaín chojni tsjikosáyahará sín kíxin xíkaha tí t'áchríi sín kjuikosáyehe tí sín ntoáhya k'uéchronka itén Dios ósé.

*Tsotjuéheni tí sín nínkakonhenni
(Mt. 5.38-48; 7.12)*

²⁷ A ntá jahará tjejotinhínrá mé tjéxrjanka kíxin chrótjuéhérá tí sín nínkakonhanrá la ko jína chrókjúnkitsará tí sín tjinkakonhya tí jahará. ²⁸ Jína nixjehérá tí sín t'ántaxínhanrá la ko tjanchehérá Dios kíxin tsjinkitsa ch'án tí sín chónkíhará sín. ²⁹ Tí chjéhe ijnko nkexro ijnko tuqanrá chrókjóka tí í jnko nánko kíxin chróchjéhe sín tíha kjáxin. La ko tí siín ijnko nkexro tjinkaon sín tsakitsjaha sín tí chamara tjín t'inkayate na mé titohé kíxin kjáxin sátsjiko sín camisá kjáxin. ³⁰ Tí jnkojín nkexro tjanchara nkehe chonta la chjehé sín. A ntá tí tsakja sín nkehe kuéntá la tjanchehýa sín kíxin naxá ts'ókjanhan sín. ³¹ Méxra chrókjúkosáyehérá kíchuárá éxi yóhé nkexrí tjinkáonrá chrókjúkosáyahará tí jehe sín kjáxin.

³² Tí jehó tjuéhérá tí nkexro tjuáhará la tí xíkaha la kohya ninkehó tsjachahyará. Kjónté tí sín jínahya tjasin jie la xíkaha ch'e sín. ³³ A ntá tí tjíkosáyehérá jehó tí sín tjíkosáyahará la kohya ninkehó tsjachahyará xíkaha. Kjónté tí sín jínahya tjasin jie mé kjáxin xíkaha ch'e sín. ³⁴ La ko tí nchekjenrá chichaon jehó tí sín tjenkayáxinrá kíxin ts'ókjanhanrá sín tí chichaon, la tí xíkaha kohya ninkehó tsjachahyará. Kjónté tí sín jínahya tjasin jie xíkaha ch'e sín nchekjen kíchó sín chichaon la ko chónhen sín kíxin tsokjan tí chichakoen sín ínaá. ³⁵ Kjánchó jahará chrótjuéhérá tí sín nínkakonhanrá la ko jína chrókjúich'ehlerá sín xra la ko chrókjúinchekjenrá sín chichaon la chróchoénhyará kíxin chrókján tí chichakoonrá ínaá. Mé xíkaha chrókjúich'erá la imá tsjachará la ko ts'ónará xjeen Dios nkaya nkajní kíxin jehe ch'án ch'ehe ch'án jína tí sín chónthýa ch'án kjuasáya

la ko tí sín jínahya. ³⁶ Chrókuikonóehérá kíchuárá éxí yóhe It'árá nkaya nkajní tíkonóehe ch'án chojni.

*Chrók'uántaxíenhyani kíchó ni
(Mt. 7.1-5)*

³⁷ 'Chrókuékahyará jie ókjé chojni kíxin ntá Dios chrókuanchahya ch'án jie tí jahará. Chrókuétuanhyará kíxin chrókuasóte í jnko chojni kíxin Dios kjaxin chrókuinchekjasótiahyará ch'án tí jahará. Chrók'uitjáyanhanrá ichrén jie kjuasinhanrá í jnko chojni kíxin ntá Dios chrókuinchek'itjáyanhanrá ch'án tí jie kjuásinrá. ³⁸ Chjehérá í so sín tí nkehe ts'ayéhe sín kíxin ntá Dios tsotjáhará ch'án nkehe jína kjaxin, tjetóxin ijnko medida jína chrókuajanjon ch'án, icha tsík'enka ch'án kíxin tsík'ótsjéyehe ch'án tí nkehe tsíkjachroayá ch'án tjetóxin tsjanjon ch'án. Dios tsotjáhará xíkaha yóhe éxí tsíchjehérá í so chojni.

³⁹ Ntá kjuíncheyóexin ch'ín Jesús ntáchro ch'án kíxin:

—¿Xá á chrókójína ijnko chojni t'ikonyha chrókuiko í jnko chojni t'ikonyha? Tí xíkaha la yói sín chrók'uanótjenyá sín ichrén tóye. ⁴⁰ Ijnko nkexro xrakohé la noehya éxí tí nkexro tjako. Kjánchó tió tsjixin tsoxrakohé ch'án ntá tsongohe ch'án éxí nohe tí nkexro kjuakohé ch'án.

⁴¹ ¿A ntá nkekuénté tsjehé tí chjinínó ntsí tjenkánki ikon tí kíchuá, tí naxá ántosán tí nta jie tjenkánki ikuan? ⁴² ¿Mé xíkaha nkexrí kíxin chróntáche kíchuá kíxin chrókuítóhe ch'án kíxin chrókuakitsjenkií ch'án tí chjinínó ntsí tjenkánki ikon ch'án tí naxá ántosán tí nta jie tjenkánki ikuan? Jaha la ntoáhya tjenkayáxian ch'ia jaha. Senó chrókuakitsjenkiá tí nta jie tjenkánki ikuan kíxin ntá chrók'uikan chrókuakitsjenkiá chjinínó ntsí tjenkánki ikon tí kíchuá.

*Tí nta mé tjatsoanxínni tí to tsík'óna
(Mt. 7.17-20; 12.34-35)*

⁴³ Kohya nta jína chrók'óna to jínahya, la ko kjaxin kohya nta jínahya chrók'óna to jína.

⁴⁴ Jnkojnkó tí nta mé tjatsoanxínni tí to t'óna. Tí ntach'i xitjahya tsjakjinjinni to higo la ko xitjahya ts'inni to uva. ⁴⁵ Ijnko chojni jína la jína nixja ch'án kíxin jína əsén ch'án. A ntá ijnko chojni jínahya la mé nixja tí nkehe jínahya kíxin jínahya əsén ch'án. Kíxin éxí tjenkayáxian əsén mé xíkaha nixja ir'va.

*Ch'ín Jesús kjuíncheyóexin éxí yaá nkexro kjuich'éna nchia
(Mt. 7.24-27)*

⁴⁶ ¿Nkekuénte ntáchrórá kíxin janhan Ìnchárá, la ntá tahyará kuenté tí nkehe tétuanhanrá? ⁴⁷ Méxra kaín tí nkexro tóchjina tinhin tí nkehe ntáxrjan la ko titekaon sín la mé tsontáxrjan nkexro tí tóyóhe sín. ⁴⁸ Na mé jehe sín tóyóhe ijnko nkexro kjuich'éna nchia la senó k'óxraya ch'án tóye nínpa kíxin ntá sich'éna ch'án nchia chrítaón tí tjo a. A ntá tió k'uánkí tí ntarío la ikui tí ntä k'uíntate tí nchia, kjónté xíkaha la k'uátjoákohya la ní kuínkíha tí nchia a kíxin jína tsík'óna chrítaón tjo tkekjen. ⁴⁹ A ntá tí nkexro tinhin tí nkehe ntáxrjan la ntá tahya sín kuenté la mé tóyóhe ijnko nkexro kjuich'éna nchia chrítaón nche la kohya tjo chrínkí. A ntá tió k'uánkí tí ntarío la ikui tí ntä k'uíntate tí nchia la ntá k'uátjoáko ntä tí nchia la ntá kuenté tí nchia la k'uítjáyan —mé ichro ch'ín Jesús.

7

*Ch'ín Jesús kjuínchekitohe jína ijnko ch'ín ch'ehe ijnko soldado romano xra
(Mt. 8.5-13)*

¹ Ntá ch'ín Jesús kjuixin nixjehé ch'án tí chojni a ntá sákjuí ch'án chjasin Capernaum.

² Ntaha kjuák'e ijnko capitán romano la mé chóntha ch'án ijnko nkexro ch'ehe ch'án xra imá tjuéhe ch'án la ntá jie níhi tí ch'ín a tjet'en ch'án. ³ A ntá tió kuínhin tí ch'ín capitán itjo sín nkexrí tjen ch'ín Jesús ntá ichr'án ch'án iso sín táda judío tsjijitsjehe sín tí ch'ín

Jesús tsochronóehé sín ch'án kíxin chrókjuji ch'án chrókjuinchekitohé ch'án jína tí ch'ín ch'ehe ch'án xra. ⁴Ntá kjuíji sín kóchjinehe sín tí ch'ín Jesús kjuankíxin chrónóehé sín ch'án ntáchro sín kíxin:

—Imá jína tí ch'ín capitán la mé tjinkaon ch'án chrókjuinkitsa ch'án ⁵kíxin tjuèhe ch'án tí nación kuénteni la ko jehe ch'án kjuínkitsa ch'án la ko k'uetoan kíxin ts'óna ijkno njinko kuénteni —ichro sín.

⁶ Ntá ch'ín Jesús sákjuiko sín ch'án. Ntá ó kjuíjichjina sín chjino tí nchia la mé tí ch'ín capitán k'uetoenhen ch'án iso chojni chóxin ch'án tsontáche sín tí ch'ín Jesús kíxin:

—Tadá. Tjinkakonhya ch'án chrótjáha ch'án xra kíxin jehe ch'án la jehya chojni jína la ko chrókósueehé kíxin chrók'uixenhen ntoi ch'án. ⁷Mé xíkaha chrókósueehé ch'án chrókjuji ch'án chrókjueyá ch'án tí jaha. Méxra tí kjuachaxin chrónixja ó chrókuitoexín jína tí ch'ín ch'ehe ch'án xra. ⁸Kíxin jehe ch'án kjaxin t'ítuenhen ch'án la ko kjaxin chóntha ch'án soldado t'etuenhen ch'án ínaá. Tió t'etuenhen ch'án ijkno sín kíxin sátsji la mé sátsji la ko tió t'etuenhen ch'án í jnko sín kíxin xráko la mé xráko la ko tió t'etuenhen ch'án í jnko sín kíxin sich'e ijkno xra la mé nchexiteyá ch'án —mé xíkaha ichro tí sín kui.

⁹ Ntá ó kuínhin ch'ín Jesús xíkaha ntá chrakon ch'án kíxin xíkaha tjenkayáxin tí ch'ín a, a ntá nkátjíá ch'án komá ch'án tí chojni chréhe ntáchro ch'án kíxin:

—Ntáxrjan kíxin naxa k'uítjahya njnko nkexro israelita xíkaha tinkáchónki éxí tí ch'ín i —ichro ch'án.

¹⁰A ntá ó kjan nchia tí sín tsík'ítuenhen la ó k'uíkon sín kíxin ó tsíkitohe jína tí ch'ín níhi.

Ch'ín Jesús kjuínchexechón tí xjeen ijkno tjan k'án chjasin Naín

¹¹ Ntá chr'éxín ntá sákjui ch'ín Jesús ijkno chjasin it'in Naín la ko sákjuíko ch'án tí sín k'uájiko ch'án la ko nchónhya í so chojni. ¹²Tió kjuíjichjina sín tí chjasin a la k'uíkon sín nchónhya chojni sákjuíkjava sín ijkno chojni tsík'en na mé tí jnkokoá xjeen ijkno tjan k'án. Itsjé chojni chjasin ntiha sákjuíkotoxín sín tjan. ¹³Ntá tió k'uíkon Inchéni tí tjan a ntá kuikonóehé ch'án tjan ntáchro ch'án kíxin:

—Tsjankahya —ichro ch'án.

¹⁴ Ntá ch'ín Jesús kóchjinehe ch'án tí sín tinkátsénkí tí nkexro tsík'en la kjuak'etja tja ch'án tí nkehe tinkátsénkia sín tí ch'ín tsík'en. A ntá tí sín kuámá nta k'uéjochónhen sín. Ntá ch'ín Jesús nixjehé ch'án tí ch'ín tsík'en ntáchro ch'án kíxin:

—Ntásoá. Tétuanhan t'aya —ichro ch'án.

¹⁵ Ntá tí ch'ín tsík'en tuénxín kjuák'etjaxin ch'án la ko kjuankíxin nixja ch'án. Ntá ch'ín Jesús kjuínchek'áyéehé ch'án iné tí ch'ín ntásoá la sákjuíko. ¹⁶A ntá tió k'uíkon sín xíkaha kónhen la kaín sín imá chrakon sín la ko kjuankíxin kjuanchehe sín Dios kjuasáya ntáchro sín kíxin:

—Dios mé ichr'án ijkno chojni imá t'etuoan chrónka itén Dios ts'ejókoni —ichro sín.

Kjaxin ntáchro sín kíxin:

—Ó kui Dios tsjinkitsa ch'án chjasén ch'án —ichro sín.

¹⁷A ntá nkuíxín estado Judea la ko kaín tí chjasin chjinaxón mé kuínhin sín kíxin nkehe tí kjuaxroan kjuich'e ch'ín Jesús.

Tí sín ichr'án ch'ín Juan Bautista

(Mt. 11.2-19)

¹⁸A ntá tí sín k'uájiko ch'ín Juan mé chénka sín ch'án kaín tí nkehe tsíkónhen. Ntá k'uíyéehé ch'án iyó tí sín k'uájiko ch'án ¹⁹k'uetoenhen ch'án sín sátsjitsjehe sín tí ch'ín Jesús tsikjanchankíhi sín ch'án kíxin á jehe ch'án tí nkexro tsi o á tsochónhen sín í jnko nkexro, tsixro sín. ²⁰A ntá tí sín ichr'án ch'ín Juan mé kóchjina sín tí tjen ch'ín Jesús ntáchro sín kíxin:

—Ch'ín Juan Bautista k'uetoan ch'án kuini tsikjanchankíhani kíxin á jaha tí nkexro tsi ní o á tsochónhenni í jnko nkexro —ichro sín.

²¹ A ntá tí yaon kjuíji sín na mé ch'ín Jesús kjuínchekitohe ch'án itsjé chojni jína la mé kjuatsen ch'án kaín tí chin chóntha sín la ko kuakitsje ch'án tí nchäkuen jínahya chóntha sín la ko kjuínchek'ikon ch'án itsjé chojni t'ikonhya. ²² A ntá kjuátehe ch'ín Jesús ntáchro ch'án kíxin:

—Sátjírá tjíchenkará tí ch'ín Juan kaín nkehe k'uíkonrá la ko kaín nkehe kuínhínrá kíxin tí sín k'uíkonhya la ó t'ikon sín jie, la ko tí sín k'uékjhya la ó tji sín jie, la ko tí sín k'uéchóntha chinlepra la ó kuítohe sín jína, la ko tí sín kíenhya la ntá jie la ó tinhin sín, la ko tí chojni tsík'en la ó síxechón sín jie, la ko tí sín nòa síxrakohe sín tí tan jína tsaáxin sín. ²³ Ntá náxrjón tjen tí nkexro kohya nkehe t'inkákonhen tí tinkáchónki sín tí janhan —mé ichro ch'án.

²⁴ Tió sátsíki tí sín ichr'án ch'ín Juan ntá kjuankíxin nixjehé ch'ín Jesús tí sín k'uéjó ntiha kíxin nkexrí tjen ch'ín Juan ntáchro ch'án kíxin:

—Tió sákjuítsjehérá ch'ín Juan nteje, ¿nkexrí k'uíkonrá tí jehe ch'án? ¿Á k'uíkonrá ch'án éxi ijkno tji nchexrayehe xrínto? ²⁵ Tí náhí, ¿la ntá nkehe k'uíkonrá? ¿Á k'uíkonrá ch'án éxi ijkno nkexro tsík'itsa jína? Jahará ó nohará kíxin chojni tsík'itsa jína la ko chóntha kaín nkehe náxrjón la mé ntøe rey tjejó sín. ²⁶ ¿A ntá nkexrí k'uíkonrá ch'án? ¿Á k'uíkonrá ch'án éxi ijkno nkexro chrónka itén Dios? Na mé xríjanka kíxin chaxín xíkaha jehe ch'án na mé antsí t'etoan ch'án la ntá tí sín k'uéchrónka itén Dios ósé la kánhyó. ²⁷ Ch'ín Juan mé tí nkexro kui éxi chrónka tí xroon itén Dios ósé ntáchro kíxin:

Janhan mé tsochr'an ijkno nkexro tsochrónka itan kuéntana tsitónxin ntia, kíxin tsjasiyóxin ch'án ntia kuénta.*

Mé xíkaha chrónka tí xroon itén Dios. ²⁸ Ntá ijkno nkehe chaxín tsotjonkará kíxin kaín tí nkexro k'uéjó senó k'uéchrónka itén Dios la kánhyó tjetooan sín la antsí tjetooan tí ch'ín Juan Bautista. Kjánchó ijkno nkexro kjónté tjetuanhya la tí ts'ayéhe sín tí kjuachaxién Dios nkaya nkajní la antsí tjetooan sín a ntá jehe ch'ín Juan la kánhyó —ichro ch'ín Jesús.

²⁹ A ntá tió kuínhin sín tíhi la ntá kaín tí chojni la ko tí sín nchekjénki tsíkikite ch'ín Juan la ó kjuátsaan sín kíxin Dios la jína ch'án. ³⁰ Kjánchó tí sín fariseo la ko tí maestro tjako tí ley tsíkikitehya ch'ín Juan la mé tjinkakonhya sín tí nkehe tjinkaon Dios chrókjuiñtsa tí jehe sín. ³¹ Ntá ntáchro Ínchéni kíxin:

—¿Nkexrí chrókjuiñtayóaxian tí chojni tjejó jie? ¿Nkehe chrókoyóhe sín? ³² Tóyóhe sín tí chánjan tjejótjaxin sín tí ntasin tsítán sín la t'íyehé kíchó sín ntáchro sín kíxin: “Kjuínchentáchroni flauta la tēhyará la ko tsjeni isón kuénte chojni tsík'en la tsjankahyará.” ³³ Kíxin ó kui ch'ín Juan Bautista la kjónehya ch'án niotja la ko k'uíhya ch'án vino la ntá jahará ntáchrórá kíxin ijkno nchäkuen tí jínahya chóntha ch'án. ³⁴ A ntá kjaxin ikui tí Xjeen Dios K'óna Chojni la kjóne ch'án la ko ik'ui ch'án la ntáchrórá kíxin imá kjóne ch'án la ko imá ik'ui ch'án vino la ko t'ito ch'án tí sín tjasin jie la ko tí sín nchekjénki. ³⁵ A ntá tí xjeen Dios mé tjakoxin sín kaín tí nkehe tjinkaon Dios.

Ch'ín Jesús mé kjuák'e ch'án ntøe ijkno ch'ín fariseo it'in Simón

³⁶ Ijkno ch'ín fariseo mé chronóehé ch'án tí ch'ín Jesús kíxin tsiji ch'án ntøe ch'án sineko sín ch'án. Ntá sákjui ch'án ntøe tí ch'ín a, a ntá ntiha kjuák'etjaxin ch'án tí tjen mesa. ³⁷ A ntá itjen ijkno tjan nchónhya jie chóntha tjan. Itjen tjan tí chjasin ntiha la ntá kónoha tjan kíxin tsíkiji ch'ín Jesús ntøe tí ch'ín fariseo la ko ntaha sineko sín ch'án. Ntá kui tjan ntiha kuíkao tjan ijkno xro tjeté tsíkaón aceite xraxé náxrjón. ³⁸ Ntá tsjánka tjan kóchjina tjan toté ch'ín Jesús ntá ntakon tjan kjuátanxín toté ch'án la ko kaxihi tjan kjuínchexámáxin tjan toté ch'án la ko kjóneko kochíto toté ch'án la ko kjuíncheka tjan toté ch'án tí aceite xraxé náxrjón. ³⁹ A ntá tió k'uíkon tí ch'ín fariseo tsík'íyehé tí ch'ín Jesús ntá kjo ch'án ásén ch'án kíxin: “Tí chrókóchaxín tí nkexro i ijkno ch'ín chrónka itén Dios ntá chrókónhe ch'án kíxin nkexrí xéhe tí tjan tjetákoxin ch'án kíxin ijkno tjan jínahya tíha”, ichro ch'án. ⁴⁰ Ntá ch'ín Jesús ntáche ch'án tí ch'ín fariseo kíxin:

* 7:27 Malaquías 3.1

—Simón, janhan chonta ijnko nkehe tsonixjaha —ichro ch'án.

Ntá kjuát̄ehe tí ch'ín fariseo ntáchro ch'án kíxin:

—Chrónka, Maestro —ichro ch'án.

⁴¹ Ntá ntáchro ch'ín Jesús kíxin:

—K'uéjó yaá chojni ntoa síkéhe sín chichaon ijnko ch'ín ncheckjen chojni chichaon. Ijnko la síká ch'án quinientos denario. A ntá tí í jnko a la síká ch'án cincuenta denario.

⁴² A ntá kjuachahya sín k'ókjchen sín tí chichaon tí ch'ín síkéhe sín ntá kuíkonóehe ch'án sín ntá k'óxíka ch'án tí cuenta síká yói sín. A ntá jie chrónka jaha kíxin nkexro tí yói sín qantsí chrótjuéhe tí nkexro kuíkonóehe ch'án —ichro ch'ín Jesús.

⁴³ Ntá kjuát̄ehe tí ch'ín Simón ntáchro ch'án kíxin:

—Janhan ntáxrjan tí nkexro kuíkonóehe má —ichro ch'án.

Ntá ntáchro ch'ín Jesús kíxin:

—Ntoá tjenkayáxian —ichro ch'án.

⁴⁴ Ntá ch'ín Jesús komá ch'án tí tjan a ntá ntáche ch'án tí ch'ín Simón kíxin:

—¿Á t'ikuan tí tjan a ní? Janhan na mé k'uíxanhān nt̄oa la ntá jaha la kjuánjonhya nt̄a chrók'ontia totená. Kjánchó jehe tjan ti nt̄akon tjan kjuínchek'óntixín tjan totená la ko kax̄ihi tjan kjuínchexámáxin tjan. ⁴⁵ A ntá jaha la kjóntekoahyana kochítō. Kjánchó jehe tjan nax̄a kuít̄ehya tjan neko kochítō totená. ⁴⁶ Jaha la kuíkítexinhya aceite kja. A ntá jehe tjan kuíkite tjan aceite xraxé náxrjón totená. ⁴⁷ Mé xíkaha ntáxrjan kíxin imá tjuana tjan kíxin kaín tí nchónhya jie kjuasin tjan la mé kjuìlinhin tjan. A ntá ijnko nkexro kjuìlinhin intsíkoá jie la mé xíkaha intsíkoá tjakoxín kíxin tjuana sín —ichro ch'án.

⁴⁸ Ntá nixjehé ch'án tí tjan a ntáchro ch'án kíxin:

—Ó kjuìlinhan tí jie chonta —ichro ch'án.

⁴⁹ A ntá kaín tí sín tsíkóchjina sín k'uéjótjaxín sín tí tjen ch'án mé kjuankíxin kjo sín kíchó sín ntáchro sín kíxin:

—Xá nkexro tíhi kíxin tjakjìlinhin ch'án ijié chojni?

⁵⁰ A ntá ch'ín Jesús ntáche ch'án tí tjan a kíxin:

—Ó kuaá jaha kíxin kuítekávan tí janhan. A ntá jie kjuaxróxin sátsjia nt̄oa —ichro ch'án.

8

Iso chojni chjin kjuínk̄itsa tí xra kjuích'e ch'ín Jesús

¹ A ntá chr'éxín ntá ch'ín Jesús k'uáji ch'án itsjé chjasin hyé la ko chjasin ntsíntsí kjuako ch'án la ko chrónka ch'án tí tan jína kíxin nkexrí tí kjuachaxin t'etoan Dios. A ntá tí teyó sín mé k'uájiko ch'án. ² Kjaxin chréhé iso chojni chjin tsíkjinchekitohe ch'án jína tsíkakitsje ch'án tí nchakuen tí jínahya k'uéchóntha sín la ko tsíkjatsen ch'án tí chin k'uéchóntha sín. Ijnko tjan mé it'in María la ko kjaxin tikitexín tjan Magdalena na mé tsík'axrje yato nchakuen tí jínahya k'uéchóntha tjan, ³ la ko í jnko tjan it'in tjan Juana ne mé xìi mé it'in ch'án Chuza. Jehe ch'án mé ch'ehe ch'án xra tí ch'ín Herodes t'etoan ch'án, la ko í jnko tjan mé it'in tjan Susana, la ko itsjé í so sín k'uéjó sín. A ntá kaín sín kjuanjon sín tí nkehe k'uéchóntha sín kjuínk̄itsa sín tí ch'ín Jesús la ko tí sín k'uájiko ch'án.

Ch'ín Jesús kjuíncheyóexin ch'án éxi ijnko ch'ín k'uénk̄a nonte

(Mt. 13.1-9; Mr. 4.1-9)

⁴ Ntá nchónhya chojni kójnkotsé sín kjuítsjehe sín tí ch'ín Jesús, k'uaxrjexín sín kaín tí chjasin ntiha. A ntá ch'ín Jesús kjuíncheyóexin ch'án ntáchro ch'án kíxin:

⁵ —Éxi ijnko ch'ín sákjuík'énk̄a noatrido nontee ch'án. Mé xíkaha sákjuí ch'án ik'ue ch'án tí noatrido a. Ntá iso noa la k'uanótjen chrínta nt̄ia ntá nkaxénjin chojni tí noa a la ko kjaxin tí koxroxé k'uink̄a va. ⁶ A ntá í so la k'uítji chrík'á xro ntá k'uayan la xámá kíxin kánhyó siín tjo. ⁷ A ntá í so la kjuítsíkák'á kach'í ntá k'uánkí kach'í la ntá í xitjahya

k'uánkí tí no a kíxin tsíkjate tí kach'í. ⁸ A ntá í so la mé tsík'itjí nche jína. A ntá tió k'uánkí la k'óna jína la mé jnkojnko noatje k'óna ciento neno noa —mé xíkaha ichro ch'án.

Na ntá kjuixin kjuako ch'ín Jesús kaín tíha ntá itsen ntáchro ch'án kíxin:
—Tí tjinkáonrá chrókuinhínrá la tinhínrá —ichro ch'án.

*Ch'ín Jesús chronkaxín nkekuénte kjuíncheyóexin ch'án
(Mt. 13.10-17; Mr. 4.10-12)*

⁹ Ntá tí sín k'uájiko ch'án kjuanchankíhi sín ch'án kíxin nkexrí t'axrjexín tí nkehe kjuíncheyóexin ch'án. ¹⁰ Ntá ntáchro ch'án kíxin:

—Dios mé tsjinkitsa kíxin tsonohará tí nkehe noehya í so chojni nkexrí t'etoan Dios. Kjánchó tí í so sín tjákohá sín kjuintayóaxoán kíxin ntá k'uíkon sín la kjónté tsjátsoanhya sín la ko kuínhin sín na kjónté náxá tienxínhyá sín.

*Ch'ín Jesús chronkaxín nkexrí t'axrjexín tí ch'ín k'uénka nonte
(Mt. 13.18-23; Mr. 4.13-20)*

¹¹ 'Ntá tsóxrjanca nkexrí t'axrjexín tí nkehe kjuintayóaxoán. Tí noatje mé tí itén Dios.

¹² A ntá tí noa k'uanótjen chrínta ntja la mé tóyóhé tí sín kuínhin tí tan a. A ntá ó kui ch'ín Tsochren ntá kjuínchek'itjáyan ch'án kaín tí itén Dios kuínhin sín chrókuaáxin sín kíxin ntá chrókuitekakonhyá sín tí nkehe chrókuaáxin sín. ¹³ A ntá tí noa kjuítsínkak'á xro la éxi yóhé tí chojni kuínhin itén Dios la tjoka kóxrjínhín sín kuinkáchónki sín. Na ntá itsi tí kjuaxróxinhya, a ntá tsítuhe sín tí itén Dios kuínhin sín kíxin náxá níñkahya chóntha nué. ¹⁴ A ntá tí noa kjuítsínkak'á kach'í na mé éxi yóhé ijkno chojni kuínhin tí tan jína kjánchó tjitoxienhyá ntie sín kíxin tóxakonhen sín tí xra chóntha sín la ko tjinkaon sín tsochóntha sín itsjé nkehe la ko kaín tí nkehe tóxrjínhín sín mé t'inkákonhen kíxin xíkaha la xitjahya sich'ehe sín xra Dios. ¹⁵ A ntá tí noa k'uínka nonte jína na mé éxi yóhé tí chojni kuínhin tí itén Dios a ntá kaín asén sín kuítekaon sín la ntá kuítøehya sín tí tan, a ntá xíkaha la jína ch'ehe sín Dios xra.

*Ch'ín Jesús mé kjuíncheyóexin éxi ijkno xrohi tjeche
(Mr. 4.21-25)*

¹⁶ 'Nijnko nkexro chrókjuinchek'ákjen xrohi chrókjuák'ema nkaxenhen chi o chrókjuák'ema chrínkí cama. Náhí. Noi chrókjuak'e xrohi kíxin ntá tí sín ts'ixenhen nchia ts'ikonxín sín tí t'inkaséyan. ¹⁷ Kohya nkehe chrók'uejómá a ntá chr'éxín chrókónoxíhyá; la ko kohya nkehe mó chrókónoehyani chr'éxín kíxin kaín nkehe la tsónoxíxin ti xrohi a. ¹⁸ A ntá chrókuinhínrá jína kíxin tí tjen ijkno nkexro chóntha nkehe la mé ts'ayéhe ch'án má. A ntá tí nkexro chóntahya nkehe la mé ts'axrjehe ch'án kjónté tí nkehe ntsí tónhen ch'án kíxin chóntha ch'án.

*Tí iné la ko tí kíchó ch'ín Jesús
(Mt. 12.46-50; Mr. 3.31-35)*

¹⁹ A ntá kjuíji iné la ko kíchó ch'ín Jesús tí tjen ch'án. Ntá xitjahya tsóchjinehe sín ch'án kíxin nchónhyá chojni siín. ²⁰ A ntá ijkno sín ntiha tsíkjichenka ch'ín Jesús kíxin:

—Iná la ko kíchuá tjejó sín ntója la tjinkaon sín chrók'uikon sín tí jaha —ichro sín.

²¹ Kjánchó kjuátøehe ch'án ntáchro ch'án kíxin:

—Tí sín tinhin itén Dios la ko titekaon sín na mé t'íkuān tí jehe sín éxi nañá la ko kíchiná —ichro ch'án.

*Ch'ín Jesús k'uétuenhen tí xrínto la ko tí ntá kíxin ts'ixita
(Mt. 8.23-27; Mr. 4.35-41)*

²² Ntá ijkno yaon k'uíxenhen ch'ín Jesús ijkno ntabárcó la koí tí sín k'uájiko ch'án. Ntá ntáchro ch'án kíxin:

—Sátsjini tóhø ntayaon —ichro ch'án.

Ntá sákjuí sín. ²³ Ntá nachrohe tjejót'atoyé sín a ntá ch'ín Jesús mé kjuák'ejua ch'án. A ntá xrínahya tjian chjéhe xrínto chrítaón ntá ntá xrankíxin sítkia ntá tí ntabárcó ntá

chrakon sín kíxin ts'aniankí ntä tí ntabárcö. ²⁴ Ntá kjuínchekjayéhe sín tí ch'ín Jesús, ntáchro sín kíxin:

—Maestro, Maestro. Tjejót'aniankíni ntä —ichro sín.

Ntá ch'ín Jesús k'uáya ch'án ntá k'uetuñhen ch'án tí xrínto la ko tí ntä kíxin ts'ixita, a ntá náxrjón k'uixita tí ntä la ko tí xrínto. ²⁵ Ntá ntáche ch'án tí sín k'uájiko ch'án kíxin:

—¿Á naxä tinkachónkihyará Dios? —ichro ch'án.

Kjánchó jehe sín mé chrakon sín itjo sín kíchó sín kíxin:

—¿Xá nkexro tíhi kíxin t'etuñhen ch'án xrínto la ko tí ntä la titekakonhen ch'án?

Ijnko ch'ín nonte Gadara chóntha nchakuen tí jínahya

(Mt. 8.28-34; Mr. 5.1-20)

²⁶ Ntá kjuíji sín tí nonte Gadara, na mé tóhe ntayaon ntoí chók'èxin estado Galilea.

²⁷ Ntá k'uinkajinxin ch'ín Jesús tí ntabárcö ntá kóchjina ijnko ch'ín chjasin ntiha. Ntá ó má sé chóntha ch'án nchakuen tí jínahya. Na ntá ni ké ch'án t'inkáyahya ch'án, la ko jehya ntœ ch'án k'uékjak'e ch'án na mé tjen ch'án tí panteón. ²⁸ Tió k'uíkon ch'án tí ch'ín Jesús ntá kjuák'exín toch'in ch'án nkayakon tí ch'ín Jesús, ntá k'óyako ch'án ntáchro ch'án kíxin:

—¿Nkekuénte tjiaté tí jeheni, jaha Jesús Xjeen Dios itjen nkaya nkajní? Chronóahani nchekjasótehyani —ichro ch'án.

²⁹ Xikaha ntáchro ch'án kíxin ch'ín Jesús tsík'etuñhen tí nchakuen tí jínahya kíxin ts'axrjexín tí jehe ch'án. Nchónhya veces tí nchakuen tí jínahya k'uék'etuñhen tí jehe ch'án; a ntá tí chojni k'uétsé sín ch'án k'uékjincenteto sín tja ch'án la ko toté ch'án la mé cadena tsíkóntetoxín ch'án kíxin tjinkaon sín chrókjuak'e ch'án. Kjánchó k'uékóchrínjin ch'án tí nkehe tsíkóntetoxín ch'án kíxin nchakuen tí jínahya tjinkaon sáchrókjuiko ch'án nteje. ³⁰ Ntá ch'ín Jesús kjuanchankíhi ch'án tí ch'ín a kíxin:

—¿Nkexrí it'ian? —ichro ch'án.

Ntá kjuátuhe ch'án ntáchro ch'án kíxin:

—Legión mé it'inni —ichro ch'án.

Ntáchro ch'án xikaha kíxin nchónhya nchakuen tí jínahya chóntha ch'án. ³¹ A ntá kaín tí nchakuen tí jínahya chronóehé tí ch'ín Jesús kíxin chrók'uetoanhya ch'án kíxin chrókjuitsíkayá tí tóye njinka. ³² A ntá ntiha tí jnä siín nchónhya cochíno xrine va. A ntá tí nchakuen tí jínahya chronóehé tí ch'ín Jesús kíxin chrókjuanon ch'án kjuachaxin chrók'uixenhen tí cochíno a. A ntá kjuanon ch'án kjuachaxin. ³³ A ntá tí nchakuen tí jínahya k'uaxrjexín tí ch'ín a, a ntá k'uixenhen tí cochíno a. A ntá kaín tí cochíno kuinká va sákuí va nó nkaya tsaka k'uánótjenkí va ntä kjuinhin va ntä.

³⁴ A ntá tí sín sít'ayakonhen tí cochíno k'uíkon sín kíxin xikaha kónhen ntá chrakon sín kuinká sín sákuíchronka sín tí chjasén sín la ko tí rancho. ³⁵ A ntá tí chojni k'uaxrjexín sín chjasin sákuitsjehé sín nkehe tí tsíkónhen. A ntá kjuíji sín ntiha tí tjen ch'ín Jesús ntá k'uíkon sín kíxin ntaha tjen tí ch'ín tsík'axrjexín tí nchakuen tí jínahya. Ntaha tjetjaxin ch'án chrínkí toté tí ch'ín Jesús, ó tsík'inkáya ch'án iké ch'án kíxin ó jína tjen ch'án, a ntá chrakon sín tí k'uíkon sín xikaha. ³⁶ A ntá tí jehe sín tsík'ikon sín kíxin xikaha kónhen la chrónka sín kíxin nkexrí kuítuhe jína tí ch'ín k'uéchonta tí nchakuen tí jínahya. ³⁷ A ntá kaín tí chojni chjasin Gadara kjuankíxin chronóehé sín tí ch'ín Jesús kíxin sáchrókjuixin ch'án ntiha kíxin imá chrakon sín. A ntá tí ch'ín Jesús k'uít'otjen ch'án tí ntabárcö sákuíxin ch'án ntiha. ³⁸ A ntá tí ch'ín tsík'axrjexín tí nchakuen tí jínahya chronóehé ch'án tí ch'ín Jesús kíxin á chrókjuanonhyá ch'án kjuachaxin sáchrókjuui ch'án koí ch'án. Kjánchó ch'ín Jesús k'uetuñhen ch'án kíxin tsitóhe ch'án ntáchro ch'án kíxin:

³⁹ —Titoha satjia ntä la ko chrónka nkexrí ti kjuachaxin jié kuénte Dios kuítaxián jína jaha —ichro ch'án.

A ntá sákuí tí ch'ín a chrónka ch'án nkuíxín tí chjasén ch'án kíxin ijnko kjuaxroan jié kjuich'e ch'ín Jesús kjuínchekitohe ch'án jína.

*Tí xjeen ch'ín Jairo la ko tí tjan kuákóxín iké ch'ín Jesús
(Mt. 9.18-26; Mr. 5.21-43)*

⁴⁰ Tió ch'ín Jesús kjan ch'án tí í jnko chrínta ntá ntá nchónhya chojni siín ntiha la chéhe sín kjuíji ch'án ntiha, kíxin kaín sín tjejóchónhen sín ch'án. ⁴¹ Ntá kui ijnko ch'ín it'in Jairo na mé ijnko ch'ín t'etqan kuènte ninko. A ntá kjuák'exín toch'in ch'án tqe tí ch'ín Jesús chronóqe ch'án kíxin sáchrókjui ch'ín Jesús ntqe ch'án ⁴² kíxin chóntha ch'án jnkokoáxon xjeen ch'án chjin chóntha teyó nánó la ó mero tjet'en tjan. A ntá sákjuí ch'ín Jesús la ntá nchónhya chojni chréhe k'uixitja kíchó sín.

⁴³ Ntá siín sín ntiha. Na mé ntiha tjenkákjan ijnko chojni chjin níhi tjan sítji tjan jni na mé chóntha tjan teyó nánó titqehya tjan jína. A ntá kaín nkehe k'uéchóntha tjan kjuenkehe tjan tí sín ch'e xroqan la ko nijnko sín kjuachahya sín kjuinchekitohe sín tjan jína. ⁴⁴ A ntá jehe tjan kóchjina tjan nóton tí ch'ín Jesús na ntá kuákóxín tjan tí iké ch'án, a ntá tuénxín tí jni la í kjuíhya tjan.

⁴⁵ Ntá kjuanchankí ch'ín Jesús kíxin:

—¿Nkexro tí kuákóxínna? —ichro ch'án.

A ntá kaín sín ntáchro sín kíxin ninkexró, ichro sín. A ntá ch'ín Pedro la ko tí sín k'uéjóko ch'án ntáchro sín kíxin:

—Maestro, nchónhya chojni siín la ko tótéka sín la ntáhi ntáha, ¿ntá nkekuènte kíxin naxa tjanchankiá kíxin nkexro tí kuákóxian? —ichro sín.

⁴⁶ Kjánchó ntáchro ch'ín Jesús kíxin:

—Jnkojín nkexro kuákóxínna kíxin kónona kíxin kjuachaxin kuéntaná kuítqexín ijnko chojni jína —ichro ch'án.

⁴⁷ A ntá tió k'uíkon tjan kíxin ó kónoxín ntá kóchjina tjan chrakon tjan kjuák'exín tjan toch'in tjan chrínkí toté tí ch'ín Jesús. Ntá chrónka tjan nkayakon kaín xín chojni kíxin nkekuènte kuákóxín tjan iké ch'án la ko nkexrí kuítqexín tjan jína xíkaha.

⁴⁸ Ntá ntáchro ch'án kíxin:

—Jaha, xjeenni, ó kuitqha jína kíxin kuítékavan tí janhan. Kjuaxróxin sátjia —ichro ch'án.

⁴⁹ Naxa tjejótjo sín ntiha ntá xríñahya ikui ijnko nkexro kjuixín ntqe tí ch'ín t'etqan kuènte ninko, a ntá chénka ch'án tí ch'ín t'etqan kíxin:

—Xjaan na mé ó kjuixin k'uén. Áxri í chjéehya xra tí maestro —ichro ch'án.

⁵⁰ A ntá tió kuínhin ch'ín Jesús la kjuátqhe ch'án ntáchro ch'án kíxin:

—Chrakonhyá. Títekávan tí janhan la tsitohe xjaan jína —ichro ch'án. A ntá sákjuí sín.

⁵¹ A ntá tí kjuújik'ixenhen sín nchia ntá kuitqehya ch'ín Jesús kíxin ókjé nkexro chrók'uixenko ch'án nchia. Jehó ch'ín Pedro la ko ch'ín Jacobo la ko ch'ín Juan la ko tí it'é la ko tí lné tí xjachjin chrók'uixenhen sín tí tjen tí xjan a. ⁵² Kaín tí sín tjejó ntaha tsjánkàmá sín tí xjan a. Kjánchó jehe ch'án ntáchro ch'án kíxin:

—Tsjankahyará. Tí xjan la tsík'enhya la tjejua xjan —ichro ch'án.

⁵³ Ntá tjanoá sín ch'án kíxin jehe sín la ó nohe sín kíxin tsík'en xjan. ⁵⁴ A ntá jehe ch'án itsé ch'án tja xjan ntá itsen k'uíyqe ch'án tí xjan ntáchro ch'án kíxin:

—Tjarisoá, t'aya —ichro ch'án.

⁵⁵ Ntá kjan qasén tjan ntá tuénxín k'uínkajen tjan. Ntá k'uetoan ch'ín Jesús kíxin tsjanjon sín nkehe sine tjan. ⁵⁶ Ntá it'é la ko lné xjan la chrakon sín. A ntá ch'ín Jesús k'uetuénhen ch'án sín kíxin ninkexró chróchenkahya sín kíxin xíkaha kónhen.

chojni jína. ² Ntá k'uetqoan ch'án kíxin sátsjikjako sín nkexrí tí kjuachaxin t'etoan Dios la ko sinchekitohe sín chojni jína. ³ La ko k'uetqoan ch'án kíxin:

—Ninkehó nkehe sátsjikohyará ntja sátsjirá, ni tí nta tjixinrá la náhí, ni bolsa la náhí, ni niotja, ni chichaon, la ko tsjikoará jehó tí ka tjejóyará ó. ⁴ A ntá tí tsjasánrā ijnko nchia tsjanjon sín kjuachaxin la ntahó tsitohará la tsjixixín tí xrá ntá sátsjixinrá ntiha. ⁵ A ntá tí tsjasánrā ijnko chjasin la ntá tsjanjonhya sín kjuachaxin tsjákorá ntá t'axrjéxinrá tí chjasén sín ntiha tsotsénkará tí nche chónta totará tsjákoxinrá xikaha kíxin Dios sinchekjasóte tí jehe sín —ichro ch'án.

⁶ Ntá sákjuí sín kaín tí chjasin ntsíntsí sákjuíchronka sín tí tan jína tsaáxin chojni la ko kjuínchekitohe sín chojni jína kaín chjasin.

Ik'uén ch'ín Juan Bautista

(Mt. 14.1-12; Mr. 6.14-29)

⁷ A ntá tí ch'ín Herodes t'etoan kuínhin ch'án kaín tí xrá tjech'e ch'ín Jesús la tóxakonhen ch'án kíxin iso sín ntáchro sín kíxin ch'ín Juan Bautista la ó tsíxechón ch'án, ichro sín. ⁸ A ntá iso sín ntáchro sín kíxin ch'ín Elías tsíxechón ch'án mé tí nkeexo k'uéchronka itén Dios ósé. A ntá í so sín la ntáchro sín kíxin jnkojín tí sín k'uéchronka itén Dios ósé la mé ó tsíxechón, ichro sín. ⁹ Kjánchó ntáchro ch'ín Herodes kíxin:

—Janhan mé kuétoan kóchrínjin sín kja ch'ín Juan. ¿Á chrókóchaxín jehe ch'án kíxin nchónhya kjuaxroan kuinhán tí tjech'e ch'án? —ichro ch'án. A ntá kjaxin jehe ch'án tóxakonhen ch'án sáchrókjuitsjehe ch'án tí ch'ín Jesús.

Ch'ín Jesús kjuanjon nkehe kjóne in'ó mil chojni

(Mt. 14.13-21; Mr. 6.30-44; Jn. 6.1-14)

¹⁰ A ntá tió kjan tí sín k'uájiko ch'ín Jesús ntá chénka sín tí jehe ch'án kaín tí xrá kjuich'e sín. Ntá k'uaxrjentako sín ch'án tí kohya ninkexró chjinaxón chjasin Betsaida. ¹¹ Ntá tió k'uixikónohe chojni kíxin ntaha tjen ch'ín Jesús ntá sákjuíchréhe sín ch'án. A ntá kjuanjon ch'án kjuachaxin ts'ejó sín. Ntá kjuankíxin chrónka ch'án nkexrí tjen tí kjuachaxin t'etoan Dios la ko kjuínchekitohe ch'án chojni jína.

¹² A ntá ó ntá kóntó ntá tí teyó sín k'uájiko ch'ín Jesús kóchjinehe sín ch'án ntáchro sín kíxin:

—Nixjehé tí chojni kíxin sátsji sín tí chjasin ntsí la ko tí ichréne nchia chjinaxón sátsjik'ok'éhe sín la ko sátsjikjeyá sín nkehe sine sín kíxin jaha la ó noha kíxin ntejé tjejóni la kohya nkehe tsochjéheni sín —ichro sín.

¹³ Kjánchó ch'ín Jesús ntáche ch'án sín kíxin:

—Chjehérá sín nkehe sine sín —ichro ch'án.

Ntá kjuátuhe sín ntáchro sín kíxin:

—Chóntahani itsjé nkehe; jehó in'ó niotja la ko yaá koche chóntani. ¿Á tjinkávan sátsjik'enani nkehe sine kaín tí chojni siín? —ichro sín.

¹⁴ Kíxin siín chjina in'ó mil chojni ntoa. A ntá ch'ín Jesús ntáche ch'án tí sín xriko ch'án kíxin:

—Ntácherá sín tsojnkoié sín ts'ixitjaxín sín jnkojnkо cincuenta sín —ichro ch'án.

¹⁵ A ntá xikaha kjuich'e sín k'uetqoan sín, a ntá k'uixitjaxín sín kaín sín. ¹⁶ A ntá ch'ín Jesús kuákja ch'án tí n'ó niotja la ko tí yaá koche. Ntá konta ch'án nkajní kjuanchehe ch'án kjuasayé Dios kíxin kjuanjon tí nkehe sine sín. Ntá kóchrít'ó ch'án tí niotja la ko tí koche la chjéhe ch'án tí sín xriko ch'án. A ntá jehe sín k'óxikayéhe sín chjéhe sín kaín tí chojni siín. ¹⁷ A ntá kaín sín kjóne sín la kókjéhe sín. A ntá chr'éxín kjuenajín sín kaín tí nkehe síxhé mé teyó ntaxra kjuínchekaón sín.

Ch'ín Pedro mé chrónka kíxin ch'ín Jesús mé tí Cristo

(Mt. 16.13-19; Mr. 8.27-29)

18 Ntá ijnko yaon ch'ín Jesús k'uaxrjenta ch'án tjenixjehé ch'án Dios. Ntá tjejóko ch'án tí sín xriko ch'án ntá kjuanchankíhi ch'án tí jehe sín kíxin:

—¿Nkehe ichro tí chojni kíxin nkexro tí janhan? —ichro ch'án.

19 A ntá jehe sín kjuátuhe sín ntáchro sín kíxin:

—Iso sín ntáchro sín kíxin jaha tí Juan Bautista. A ntá í so sín ntáchro sín kíxin jaha la tí ch'ín Elías. A ntá í so sín ntáchro sín kíxin jaha ijnko nkexro k'uéchrónka itén Dios ósé mé ó tsíxechón —ichro sín.

20 A ntá kjuanchankíhi ch'in Jesús tí jehe sín kíxin:

—A ntá jahará, ¿nkechrorá, nkexro tí janhan? —ichro ch'án.

Ntá ntáchro ch'ín Pedro kíxin:

—Jaha tí Cristo ichr'án Dios —ichro ch'án.

Ch'ín Jesús chrónka kíxin its'en ch'án

(Mt. 16.20-28; Mr. 8.30—9.1)

21 Ntá ch'ín Jesús k'uëtuñhen ch'án sín kíxin ninkexró tsochenkahya sín kíxin nkexro tí jehe ch'án. **22** Ntá chénka ch'án sín kíxin:

—Tí Xjeen Dios K'óna Chojni t'ichjánxín tsjasóte nchónhya nkehe tsonhen la ko tsitekakuenhyá tí sín t'etoan kuènte ninko la ko tí sín t'etoan kuènte tí sín nchat'á la ko tí sín maestro tjako tí ley. Ts'oyán sín tí jehe ch'án, kjánchó tí níxin yaon na ó tsozechón ch'án ínaá —ichro ch'án.

23 Ntá chr'éxín chénka ch'án kaín sín kíxin:

—Tí chaxín tsochréhérá tí janhan na t'ichjánxín tsítóhérá kaín tí nkehe tjaké ąsánrá, ntá tsamará tí ntacruz kuèntará jnkojnko yaon, a ntá tsochréhérá tí janhan. **24** Tí nkexro tjinkaon jehó sinchekaá ąsén mé ts'itjáyan. A ntá tí nkexro sinchek'itjáyanxín ąsén kíxin tinkáchónki tí janhan la tsaa. **25** ¿A ntá nkehe tsonhen tí chrókjuacha ijnko chojni chróchóntha kaín nkehe siín chjasintajni a ntá kjuachón chrókjuinchech'itjáyan ch'án? **26** A ntá jnkojín chojni chrókósuhé kíxin tinkáchónki tí janhan la ko tí nkehe tjákua, a ntá kjaxín tí Xjeen Dios K'óna Chojni mé tsosuèhe chróntáchro ch'án kíxin chóxin ch'án tí jehe sín tió tsi ch'án exí ijnko rey tsikao ch'án tí kjuachaxin kuènte It'é ch'án la ko tí sín ángel jína. **27** Tíhi mé ntoá xrjanca kíxin iso chojni tjejó ntihi tjejótinhin sín naxa ts'enhya sín ts'ikon sín kíxin Dios ts'etoan tí kjuachaxin kuènte ch'án.

K'uíxitóxín nkexrí tsjehe ch'ín Jesús

(Mt. 17.1-8; Mr. 9.2-8)

28 A ntá k'uátsinka ijnú yaon tí tsíchronka ch'án tíhi ntá sákjuiko ch'án ch'ín Pedro la ko ch'ín Juan la ko ch'ín Jacobo la chriin sín ijnko jná kíxin tsonixjehé ch'án Dios. **29** Ntá ch'ín Jesús tjenixjehé ch'án Dios ntá k'uíxitóxín nkexrí tsjehe ch'án la ko tí iké ch'án la ko tjákini tsjehe. **30** Ntá xrínahya k'uíkon sín yaá chojni tjejótjo sín tí jehe ch'án na mé jehe sín la tí ch'ín Moisés la ko tí ch'ín Elías. **31** Imá t'inkáséyan jnkontatjen tí tjejó sín tjejótjo sín tí ch'ín Jesús kíxin nkexrí its'en ch'án la ko nkexrí tsjasótexín ch'án tí chjasin Jerusalén. **32** A ntá ch'ín Pedro la ko tí sín tjejóko ch'án la imá kuihi sín kotáchrin; kjónté la k'uéjotsjehe sín k'uikon sín tí kjuachaxin kuènte ch'ín Jesús la ko k'uíkon sín tí yói chojni ntoa tjejóko sín ch'án. **33** A ntá tió sátsji tí yói sín tjejóko ch'ín Jesús ntá ch'ín Pedro ntáche ch'án tí ch'ín Jesús kíxin:

—Maestro, jína kíxin tjejóni ntihi. Chrókjuch'énani iní nchia la mé ijnko kuèntá la ijnko kuènte ch'ín Moisés la ko ijnko kuènte ch'ín Elías —ichro ch'án.

Kjánchó ch'ín Pedro í noehya ch'án nkehe chróntáchro ch'án kíxin chrakon ch'án. **34** A ntá naxa tjenixja ch'án ikui ijnko tjuí kjuák'etja tí jná tjejó sín. Ntá chrakon sín tjejó sín chrínkí tí tjuí. **35** Ntá xrínahya kuínhin sín chríkjan tí tjuí itén nkexro ntáchro kíxin:

—Tíhi mé Xjanca, imá tjuahá ch'án. Tinhínrá tí nkehe tsochronka ch'án la ko tí nkehe tjako ch'án.

36 A ntá tió kjuixin kuínhin sín tí tan nixja ntá k'uíkon sín kíxin jeho ch'ín Jesús tjen. A ntá tí jehe sín la tání sín kíxin xíkaha k'uíkon sín tí yaon a la ninkexró chenkahya sín tí nkehe k'uíkon sín.

Ch'ín Jesús kjuínchekitóhe jína ijnko chánjan chóntha nchakuen tí jínahya

(Mt. 17.14-21; Mr. 9.14-29)

37 A ntá tí yaon chr'éxjn k'uínkajinxjn sín jnä la ntá nchónhya chojni sákjuixinhin sín ntia ch'ín Jesús. **38** A ntá ijnko chojni tjenkákjan ch'án tí chojni kjuíji ntá itsen nixja ch'án ntáchro ch'án kíxin:

—Maestro, chronóahani kíxin chrótsjehé tí xjeenni kíxin jnkokoaxón ó chóntani a ntá níhi xjan. **39** Chóntha xjan nchakuen tí jínahya la ntá nchek'iyato xjan la ko nchek'aniáte xjan nchexrànka xjan kíxin tjotéhe xjan la ko ntalóxrjo sítjixjn ir'va xjan la ko ncheníhi xjan, na mé chrohya tsjìlinhin xjan. **40** A ntá chronóeheni tí sín xríko chrókuakitsje sín tí nchakuen tí jínahya, kjánchó kjuachahya sín —ichro ch'án.

41 Ntá kjuátēhe ch'ín Jesús ntáchro ch'án kíxin:

—Jahará chaxínya chojni tinkáchónki tí janhan. Jehya jína tjenkayáxinrá. ¿Xá hasta nkesá tjinkáonrá ts'ejóni tsjákohará kixin nunca t'itjáhyará? Xrákoá tí xjan ntihi —ichro ch'án.

42 A ntá kóchjina tí chánjan. A ntá tí nchakuen tí jínahya kjuáka xjan nonte la ko kjuínchek'aniáte xjan ínaá. Kjánchó ch'ín Jesús jiehe k'uëtuëhenen tí nchakuen tí jínahya kíxin ts'axrjexín xjan. Ntá k'uaxrje tí nchakuen tí jínahya ntá kuítóhe xjan jína. A ntá ch'ín Jesús kjuínchek'ayéhe tí it'é xjan. **43** A ntá kaín sín chrakon sín kíxin k'uíkon sín tí kjuachaxin jié kuènte Dios.

Ch'ín Jesús chrónka ch'án ínaá kíxin its'en ch'án

(Mt. 17.22-23; Mr. 9.30-32)

Naxa chrakon sín kaín sín kíxin tí kjuaxroan kjuich'e ch'ín Jesús la ntá ntáche ch'án tí sín xríko ch'án kíxin:

44 —Tinhínrá jína tíhi la ko t'itjáyanhyará. Tsotsé sín tí Xjeen Dios K'óna Chojni la ko tsjikaán sín ch'án tí tjejó tí sín t'etqoan —ichro ch'án.

45 Kjánchó jehe sín kienxínya sín tí nkehe ntáchro ch'án kíxin naxa kjuanjonya Dios kjuachaxin kíxin chrókuienxín sín, ntá chrakon sín na kjuanchankiéhya sín ch'án kíxin nkexrí t'axrjexín tí nkehe ntáchro ch'án.

Nkexro tí imá tjetoan ts'etqoan

(Mt. 18.1-5; Mr. 9.33-37)

46 A ntá tí sín k'uájiko ch'ín Jesús kjuankíxin sín itjo sín kíchó sín kíxin nkexro tí jehe sín antsí má tjetoan ts'etqoan. **47** Kjánchó ch'ín Jesús kónohe ch'án nkehe tjenkayáxin asén sín. Ntá kuákja ch'án ijnko chánjan ntá kjuak'e ch'án tí tjen ch'án. **48** ntá ntáche ch'án sín kíxin:

—Tí jnkojín nkexro chrók'uáyéhe tí xjan i kíxin tinkáchónki sín tí janhan mé xíkaha chrók'uáyéhe sín tí janhan. A ntá jnkojín nkexro chrók'uáyéhe tí janhan mé xíkaha chrók'uáyéhe tí nkexro chr'ánna k'uinka. A ntá tí jnkojín nkexro antsí chrókjuinchekhy la mé antsí chrók'uáyéhe kjuachaxin chrók'uëtoan.

Tí nkexro nínkakuenhya tí jeheni la mé tóxrjínhin ch'án tí xra ch'eni

(Mr. 9.38-40)

49 Ntá ntáchro ch'ín Juan kíxin:

—Maestro, k'uíkonni ijnko nkexro kjuachaxin ihniá kuakitsjexín ch'án nchakuen tí jínahya chóntha chojni. A ntá chénkani ch'án kíxin xíkaha chrókjuich'e ch'án kíxin xrikohyani ch'án.

50 Kjánchó ch'ín Jesús ntáchro ch'án kíxin:

—Xíkaha chróntáche ch'án kíxin tí nkexro nínkakuenhya tí jeheni la kjá tóxrjínhin tí xra ch'eni —ichro ch'án.

Ch'ín Jesúś kjuentuéhe ch'án tí ch'ín Jacobo la ko tí ch'ín Juan

⁵¹ A ntá ó kóchjina tí yaon sátsji ch'ín Jesúś nkaya nkajní, na ntá táchó kjuenkayáxin ch'án sátsji ch'án chjasin Jerusalén. ⁵² Ichr'án ch'án chojni kuitónxin ntja a ntá jehe sín sákjuí sín ijkno chjasin ntsí estado Samaria sákjuikjeyá sín nchia ts'ok'èxin sín. ⁵³ Kjánchó tí sín samaritano kjuanjonhya sín kjuachaxin chrók'uejó sín kíxín k'uikon sín kíxín ó xrä ó sátsji ch'án chjasin Jerusalén. ⁵⁴ A ntá tió k'uikon tí sín k'uájiko ch'án la mé ch'ín Jacobo la ko ch'ín Juan la ntáchro sín kíxín:

—Inchéni, ¿á tjinkávan kíxín chrókjuanchiani xrohi chrók'uinkajinxín nkaya nkajní chrókjuinchek'ítjáyan tí jehe sín exí kjuanchia tí ch'ín Elías?* —ichro sín.

⁵⁵ Ntá ch'ín Jesúś kuinkátjíá ch'án komá ch'án tí jehe sín ntá kjuentuéhe ch'án sín ntáchro ch'án kíxín:

—Jahará la kjá noahyará nkexro nchakuen chontará. ⁵⁶ Kíxín tí Xjeen Dios K'óna Chojni kuihya ch'án kíxín chrókjuinchek'ítjáyan ch'án chojni. Náhí. Xrä ó ikui ch'án sinchekaá ch'án chojni —ichro ch'án.

Ntá sákjuí sín í jnko chjasin ntsí.

Tí sín tjinkaon chróchréhe sín tí ch'ín Jesúś

(Mt. 8.19-22)

⁵⁷ A ntá jehe sín sákjuí sín ntja ínaá. Ntá xeta sín ijkno nkexro ntáche ch'án tí ch'ín Jesúś kíxín:

—Inchéni, tjinkaonni chróchréheni tí jaha nketí tjinkávan sátsjia —ichro ch'án.

⁵⁸ Ntá ch'ín Jesúś kjuátēhe ch'án ntáchro ch'án kíxín:

—Tí koxróntá chóntha va itjueé va la ko tí koxroxé chóntha va káké va. A ntá tí Xjeen Dios K'óna Chojni chóntahya nketí ts'ok'èxin ch'án —ichro ch'án.

⁵⁹ A ntá ntáche ch'án í jnko nkexro:

—Chröhé tí janhan —ichro ch'án.

Kjánchó kjuátēhe ch'án kíxín:

—Inchéni, titohéni senó sátsjikjaváni it'éni —ichro ch'án.

⁶⁰ Ntá kjuátēhe ch'ín Jesúś ntáchro ch'án kíxín:

—Titohé kíxín tí chojni tsík'en la jnkokón sín tsík'en tsjavá kíchó sín. A ntá jaha la sátsjikjákua nkexrí tjen tí kjuachaxin t'etqan Dios —ichro ch'án.

⁶¹ Ntá ntáchro í jnko nkexro kíxín:

—Inchéni, tjinkaonni tsochréheni tí jaha. Jehí titohé tsjinixjeheni tí sín siín ntöeni —ichro ch'án.

⁶² Kjánchó ntáchro ch'ín Jesúś kíxín:

—Tí nkexro kjuankíxin tsotsé ch'án arado ntá chrókjan chrókotónhen nóton mé xíkahá xitjahya sich'ehe ch'án Dios xrä.

10

Ch'ín Jesúś k'uëtuñhen setenta chojni sátsjikjako sín

¹ Ntá chr'éxin Inchéni kjueyá ch'án í jnko setenta chojni ntá k'uëtuñhen ch'án sín sátsji sín yoyó sín sátsji sín tsitónxin sín ntja tí kaín chjasin na ko nkuíxín tjinkaon ch'án sáchrókjui ch'án. ² Ntá ntáchro ch'án kíxín:

—Chaxín ntáxrjan kíxín imá tsík'óna, a ntá tí chojni ch'e xrä mé tsjéhya. Chrókjuanchehérá tí Inché nonte kíxín chróchr'án ch'án itsjé chojni chrókjuich'e xrä.

³ Sátjirá jahará. Xráxinkáonrá kíxín tétuñhanrá sátsjirá exí kolélo ts'ejóyakjanrá chríkjan tí kolobo. ⁴ Tsjíkoahyará kabólsá la ko tjoa t'inca chichaon la ko tokate tjíkoahyará la ko tí nixjehérá chojni tí ntja titjohéyará kíxín chrókjuintaxrjanhanrá sín. ⁵ A ntá tió ts'ixenhenrá jnkojín nchia la senó nixjehérá sín ntáchrórá kíxín ts'ayéhé sín kjuaxróxin, tsixrorá. ⁶ A

* 9:54 1 Reyes 18.30-40

ntá tí tjejó sín kjuaxróxin ntiha la nixjehéra sín la ts'áyéhé sín kjuaxróxin. A ntá tí la náhí, a ntá tí kjuaxróxin chrók'uáyéhé sín na sátsíkoará ínaá. ⁷ A ntá tí nchia ntiha chrókjuanjon sín kjuachaxin chrókuitohará, ntaha mé tsjanjon sín nkehe chóntha sín sinterá la ko its'irá, kíxin tí nkexro ch'e xra la siín kjuachaxin tsokenkehe. Tsjíhyará í jnko nchia la ko í jnko nchia. ⁸ A ntá tsjasánrá ijnko chjasin tsjanjon sín kjuachaxin ts'ejorá ntiha ntá interá tí nkehe tsjanjon sín. ⁹ Nchekitohérá chojni níhi jína. Ntá chenkará sín kíxin tí kjuachaxin t'etoan Dios la kjínya tjen tí tjejó sín, ichrorá. ¹⁰ A ntá tió tsjasánrá ijnko chjasin a ntá tsjanjonhya sín kjuachaxin la ntá t'axrjéxinrá ntøe sín sátsjirá tí ntja chjasin ntiha ntá ntáchrórá kíxin ¹¹ kjónté tí nche tsík'ixitja totára tsotsénkará kíxin tsjákoxinrá kíxin tí kjuaxróxinhya ts'áyéhé sín chr'éxín. Kjánchó chrókónohe sín kíxin tí kjuachaxin t'etoan Dios la kjínya tjen tí tjejó sín, ichrorá. ¹² Ntáxrjan kíxin tí yaon tsjejexín chjasintajni la kjuaxróxinhya ts'atsínka tí chjasin a. Antsí náxrjónhya tí nkehe ts'atsínka sín, a ntá tí nkehe ts'atsínka chjasin Sodoma* la kénhyó —ichro ch'án.

Iso chjasin titekakonhya

(Mt. 11.20-24)

¹³ 'Nòará jahará chjasin Corazín. Nòará jahará chjasin Betsaida. Tí chrók'uixin tí kjuaxroan tí chjasin Tiro la ko chjasin Sidón éxí k'uíkonrá jahará, ntá chrókójehe sín la tjoka chrókjuitóxínhin ntje sín, tjoka chrók'uinkáya sín ka tié la ko chrókjuijanjin sín ikja sín nteso, kíxin chrókjuakoxín sín kíxin t'avá sín. ¹⁴ A ntá tí yaon tsitoexín ijié chojni a ntá jahará antsí tsjasótiará, a ntá tí sín kuènte chjasin Tiro la ko chjasin Sidón la kénhyó tsjasóte sín. ¹⁵ A ntá jahará chjasin Capernaum, tjenkayáxinrá kíxin imá nohará a ntá sátsjirá nkaya nkajní, ichrorá. Chaxínya. Jahará la tsjasinkajinrá sátsjirá tí tsjasótexín tí sín tsík'en.

¹⁶ Tí nkexro tinhin tí nkehe ntáchrórá la mé xíkaha tinhin tí nkehe ntáxrjan la ko tí sín titekakonhya sín tí jahará na mé xíkaha titekakonnahya sín tí janhan. A ntá tí nkexro titekakonnahya sín tí janhan xíkaha titekakonhya sín tí nkexro chr'ánná k'uinka.

Ó kjan tí sín setenta sátsíki

¹⁷ A ntá ó kjan tí sín setenta sátsíki la imá chéhé sín ntáchró sín kíxin:

—Inchéni, kjónté tí nchákuén tijínahya titekakonhenni tió t'ákjenxínni ihnjá —ichro sín.

¹⁸ Ntá ntáchró ch'ín Jesú s kíxin:

—Kja chaxín k'uíkuán kíxin ch'ín Tsochren k'uánótjenxín nkajní éxí ijnko kjónkíxín xíkaha kónhen. ¹⁹ Ó tjahárá kjuachaxin kíxin kjónté konche la ko konchja tsinkátjará la ko tsjachahya ninkehó tí kjuachaxin kuènte tí ch'ín Tsochren kíxin ninkehó tsqanhyará.

²⁰ Kjánchó jehya tíha chrókóchàxínrá kíxin tí nchákuén tijínahya kuítækakonhanrá. Náhí. Chrókóchàxínrá kíxin ihnjárá ó ts'íñixín nkaya nkajní —ichro ch'án.

Tí Xjeen Dios nixjehé It'é ch'án

(Mt. 11.25-27; 13.16-17)

²¹ A ntá tuénxín tí Nchákuén Dios kjuínchechéhé tí ch'ín Jesú s ntá ntáchró ch'án kíxin:

—Tjáncháhá kjuasáya It'éni Inché nkaya nkajní la ko chjasintajni kíxin kjuánjonhya kjuachaxin chrók'uitja tí sín imá nohe, a ntá kjuánjuan kjuachaxin kíxin ts'itja tí sín noehya. Mé xíkaha It'éni, jaha kóxrjíhan kíxin xíkaha tsónhen.

²² T'aná mé chjína kaín xín nkehe. Ninkexró noehya nkexro tí Xjeen ch'án. Na mé jehó It'é ch'án mé nohe. La ko ninkexró noehya nkexro tí It'é ch'án. Na mé jehó tí Xjeen ch'án mé nohe ch'án la ko tí sín tsíkjeyá ch'án kíxin tjinkaon ch'án tsónohe sín nkexro It'é ch'án —ichro ch'án.

²³ Ntá komá ch'án tí sín k'uájiko ch'án ntá ntáche ch'án tí jehó sín kíxin:

* **10:12** Génesis 19.24-28 † **10:18** Isaías 14.12

—Chéhé tí sín k'uíkonxín kon sín éxí k'uíkonrá. ²⁴ Ntáxrjan kíxin nchónhya tí sín k'uéchronka itén Dios ósé la ko nchonhya tí sín rey k'uétjinkaon sín chrók'uión sín éxí t'ikonrá, kjánchó k'uíkonhya sín, la ko k'uétjinkaon sín chrókuinhin sín tí nkehe tjejotinhínrá jie, kjánchó í kíenhya sín —ichro ch'án.

Ch'ín Jesús kjuúncheyóexin éxí ijnko samaritano jína

²⁵ Ntá ijnko maestro tjako tí ley k'uínkaten ch'án nixjehé ch'án tí ch'ín Jesús tjinkaon ch'án tsongoexín ch'án á chaxín nohe ch'án tsjatehe ch'án ntá kjuanchankí ch'án kíxin:

—Maestro, ¿nkexrí chrókjuich'eni chrók'uitjani tí kjuachón jnkochríxín? —ichro ch'án.

²⁶ Ntá kjuátuhe ch'ín Jesús ntáchro ch'án kíxin:

—¿Nkexrí nixja tí ley? ¿Nkexrí tiénxian? —ichro ch'án.

²⁷ A ntá tí maestro tjako tí ley mé kjuátuhe ch'án ntáchro ch'án kíxin:

—Chrótjuèheni Ínchéni Dios kaín asénni la ko kaín fuerza chóntani la ko kaín kjuaxrexinkaon kuénteni la ko chrótjuèheni kíchó ni éxí tjuèxínni asénni[‡] —ichro ch'án.

²⁸ Ntá ntáchro ch'ín Jesús kíxin:

—Jína kjuátuhe. A ntá tí jaha xíkaha sich'e la tsochonta kjuachón —ichro ch'án.

²⁹ Ntá tí maestro tjako tí ley mé tjinkaon chrókjuachaxin ch'án tí ch'ín Jesús ntá kjuanchankí ch'án ínaá kíxin:

—¿Xá nkexro tí kíchó ni chrótjuèheni, ichrua? —ichro ch'án.

³⁰ Ntá ch'ín Jesús kjuátuhe ch'án ntáchro ch'án kíxin:

—Ijnko chojni k'uínkajinxin nó ntja kjuixin chjasin Jerusalén sátsji ch'án chjasin Jericó, ntá kuátóhe ntja iso síchee kueéhe sín ch'án kaín nkehe sáchrókjuiko ch'án, la ko iké ch'án tsíkakitsjehe sín ch'án, la tsíkjate sín ch'án, la ntá sátsíki sín tsíkituhe sín ch'án la ó mero tjet'en ch'án. ³¹ Ntá xrínahya k'uátsínska ijnko nchat'á tí ntja ntiha ntá k'uíkon ch'án xíkaha ntá ántosén ch'án k'uátsínské ch'án. ³² A ntá kjaxin ijnko ch'ín levita k'uátsínska chjinaxón ntiha. Ntá k'uíkon ch'án xíkaha ntá ántosén ch'án k'uátsínské ch'án kjaxin. ³³ A ntá ijnko ch'ín kjuixin estado Samaria k'uátsínska tí ntja ntiha ntá k'uíkon ch'án xíkaha tjetsínska tí nkexro ntá kuijkonóehé ch'án. ³⁴ Ntá kóchjinehe ch'án tí nkexro tsíkóníhi ntá kjuich'ehe ch'án xroqan tí síchrist'ó chjéhe ch'án aceite la ko vino la ko kjuíncalentetoxín ch'án ka. Ntá kjuixin ntá kjuínchekiták'á ch'án tí kolóchoe ch'án. Ntá sákjuíko ch'án ijnko nchia t'ok'èxín chojni ntiha la k'uáyakonhen ch'án. ³⁵ Ntá tí kóyáon ntá sátsji tí ch'ín samaritano kuakitsje ch'án iyó tí chichaon la chjéhe ch'án tí ñinché tí nchia ntáchro ch'án kíxin: “T'ayakonhén tí nkexro i, a ntá qantsí má ts'ichjánxihin ch'án la tió tsokjan ntá tsjénqaha ts'ókjanhan kaín tíha,” ichro ch'án. ³⁶ A ntá tí iní nkexro k'uátsínska ntja la, ¿nkexro tjuéhe tí nkexro kjuíncheníhi tí síchee? —mé kjuanchankí ch'ín Jesús.

³⁷ A ntá kjuátuhe tí maestro tjako tí ley kíxin:

—Tí nkexro kuijkonóehé tí jehe ch'án —ichro ch'án.

Ntá ntáchro ch'ín Jesús kíxin:

—Sátjia jaha la xíkaha chrókjuich'e —ichro ch'án.

Ch'ín Jesús sákjuí ch'án ntqe tjan Marta la ko tjan María

³⁸ Naxa tjetji ch'ín Jesús kjuíji ch'án ijnko chjasin ntsí. A ntá ntiha itjen ijnko tjan it'in Marta, a ntá kjuanjon tjan kjuachaxin kuítuhe ch'án ntqe tjan ntiha. ³⁹ A ntá tjan Marta chónta tjan ijnko kíchó tjan it'in María. A ntá jehe tjan kjuák'etjaxin tjan chrínkí toté tí ch'ín Jesús tjetinhin tjan nkehe tí tjechro ch'án. ⁴⁰ A ntá tjan Marta tóxakonhen tjan kíxin nchónhya xra chónta tjan, ntá kóchjinehe tjan tí ch'ín Jesús ntáchro tjan kíxin:

—Ínchéni, ¿á tóxakuanhya kíxin tí tjan kíchó ni kuítoheni tjan, a ntá jehóni tjech'eni kaín xra? Ntáche tjan kíxin tsjinkitsani tjan —ichro tjan.

⁴¹ Kjánchó ch'ín Jesús kjuátuhe ch'án ntáchro ch'án kíxin:

[‡] **10:27** Deuteronomio 6.5; Levítico 19.18

—Marta, Marta, jaha imá tóxakonhan kíxin t'inkákonhen nchónhya xra chonta.
42 Kjánchó jnkokoá nkehe t'ichjánxín. A ntá tjan María kjueyá tjan tí nkehe ąntsí jína la ko ninkexró tsakitsjehya tjan tíha —ichro ch'án.

11

Ch'ín Jesú斯 tjako ch'án nkexrí tsonixjehéni Dios (Mt. 6.9-15; 7.7-11)

1 A ntá jnkonaá ch'ín Jesú斯 tjenixjehé ch'án Dios ijkno lugar tjen. Ntá kjuixin la ijkno tí sín xriko ch'án ntáchro kíxin:

—Ínchéni, tjákokhéni nkexrí tsonixjehéni Dios kixin xíkaha ch'ín Juan kjuakohe ch'án tí sín k'uájiko ch'án.

2 Ntá ch'ín Jesú斯 ntáchro ch'án kíxin:

—Tió nixjehérá Dios ntáchrora kíxin:

It'éni tjen nkaya nkajní, jaha imá tjóá.

Chrókui ti kjuachaxin kuéntá.

Chrókjuch'e tí nkehe tóxrjíhan jaha ntihi chjasintajni éxí tjech'e nkaya nkajní.

3 Ijie tsjánjuan tí niotja t'ichjánxín hinni jnkojno yaon.

4 T'óxíka tí nkehe jínahya kjuich'eni kíxin kjaxin jeheni ts'itjáyenhenni tí nkehe kjuich'eheni chojni.

Titoéhyani jeheni xrahya chrókjuasinni jie. Nchekaáni kaín tí nkehe jínahya chrókónhenni —mé xíkaha ichro ch'ín Jesú斯.

5 Kjaxin ntáchro ch'án kíxin:

—A ntá jnkójínrá chróchontará ijkno chojni choxian, a ntá sáchrókjuia ntøe ch'án k'áxrótjen chróntáche ch'án kíxin: “Amigo, nchekjenni iyá niotja **6** kíxin nantá ó kui ijkno chojni choxinni kuixin ch'án kjín kjuí ch'án ntøeni ntá chóntahyani ninkehó tsochjéheni ch'án.” **7** A ntá tí chrókjuatehe tí nkexro choxian tjen nkaxenhen chróntáchro kíxin: “Chjeéhyani xra. Tí ntója ntøeni méhe t'ikjéhe. A ntá xjeenni tjejót'ok'èkoni xjan. Ntá xitjahya ts'ayani tsotjáhani nkehe”, ichro ch'án. **8** Ntáxrjan kíxin kjónté chrók'uáyahya ch'án chrótjáhya ch'án nkehe kjónté choxian ch'án, kjá ts'ayá ch'án tsotjáha ch'án kaín nkehe t'ichjánxín han kíxin tjinkakonhyá ch'án kíxin naxa chrókjuak'è chrók'uèya jaha. **9** Mé xíkaha ntáxrjan kíxin: Tjanchiará nkehe la Dios tsotjáhará; tjeyará nkehe la ts'itjará; t'inkará puerta la tsoxitjehé. **10** A ntá tí nkexro tjanchia nkehe la ts'ayéhe tí nkehe; la ko tí nkexro tjejá nkehe la ts'itja; la ko tí nkexro t'inka puerta la tsoxitjehé.

11 ’;xá jnkójínrá chontará xjaanrá chrókjuanchahará xjan niotja la ;á chrókjuánjonrá ijkno xro? Q chrókjuanchahará xjan koche la ;á chróchjehérá ijkno konche? **12** Q chrókjuanchahará xjan koja la ;á chrókjuánjonrá ijkno konchiá? **13** A ntá jahará kjónté jínahyará la ó nohará nkehe jína tsochjehérá xjaanrá, la mé ąntsí chrókónohará kíxin It'éni tjen nkaya nkajní tsotjáhará Nchakuen ch'án tí jnkójínrá chrókjuanchehérá ch'án —ichro ch'ín Jesú斯.

Tjanchia sín jie kíxin ch'ín Jesú斯 chónta kjuachaxin tí Jínahya (Mt. 12.22-30; Mr. 3.19-27)

14 Ntá ch'ín Jesú斯 kuakitsje ch'án ijkno nchakuen tí jínahya tsíkjinchénosin ijkno chojni. A ntá tió tsík'axrje tí nchakuen tí jínahya a ntá tí ch'ín xitjahya nixja la jína nixja ch'án. Ntá kaín chojni chrakon sín kíxin xíkaha tsíkjich'e ch'án. **15** A ntá jnkójín tí jehe sín ntáchro sín kíxin:

—Tí ch'ín a mé takitsje ch'án nchakuen tí jínahya kíxin chónta ch'án kjuachaxién tí ch'ín Beelzebú mé tí ch'ín Tsochren, na mé jehe ch'án mé t'etueñhen kaín tí nchakuen tí jínahya —ichro sín.

¹⁶ A ntá iso sín tjinkaon sín chrókjuachaxin sín tí ch'ín Jesús ntá kjuanchehe sín ch'án ijko kjuaxroan náxrjón kuènte nkaya nkajní. ¹⁷ Kjánchó jehe ch'án ó nohe ch'án nkehe tjenkayáxin sín la ntáchro ch'án kíxín:

—Jnkojín gobieno jnkokónhya tjenkayáxin sín ntá tjanjonko kichó sín na mé ts'itjáyan tí kjuachaxin ts'etqanxín sín, la ko tí sín jnkokoá nchia jnkokónhya tjenkayáxin sín xitjahya ts'ejóko kichó sín jnkokoá. ¹⁸ A ntá kjaxin tí ch'ín Tsochren chrókjuánjónko kichó ch'án, ¿la nkexrí chróchóntha ch'án kjuachaxin náxá chrók'uetoan ch'án tí chrók'uaxrje tí jinahya? A ntá jahará ntáchrórá kíxín janhan takítsjé nchakuen tí jinahya kíxín tí kjuachaxién ch'ín Tsochren chonta janhan, ichrorá. ¹⁹ A ntá tí xíkaha la, ¿ntá nkexro chjéhe kjuachaxin tí sín chréhé tí jahará kíxín tsjacha sín tsakitsje sín nchakuen tí jinahya? Jehe sín mé tjakoxín sín kíxín jahará ntoáhya tjenkayáxinrá. ²⁰ A ntá tí kjuachaxién Dios mé takítsjéxian tí nchakuen tí jinahya na mé chrókonoaxínrá kíxín tí kjuachaxién Dios t'etqan ch'án mé ó kui tí tjejorá.

²¹ A ntá ijnko chojni jiehe yamá chica t'ayakonhen ch'án ntøe ch'án kíxín tí nkehe chóntha ch'án ts'itjáyanhya. ²² A ntá itsi ijnko nkexro antsí má tséhe, a ntá tsjanjonko ch'án tí inché nchia, a ntá tsjacha tsakitsjehe tí inché nchia kaín tí chica yamá ch'án kíxín imá jieexín ch'án. A ntá tí ch'ín antsí tséhe mé tsakja ch'án kaín nkehe siín ntiha. ²³ Tí nkexro titekakonhya tí janhan mé nínkakonna ch'án. A ntá tí nkexro tjinkitsahya tí janhan mé t'inkákonhen tí xra t'a —ichro ch'án.

Ijnko tí nchakuen tí jinahya mé tsokjan ínaá

(Mt. 12.43-45)

²⁴ A ntá ijnko nchakuen tí jinahya tsík'axrjexín ijnko chojni na mé ixri tí nonte xámá xritjeyá nketí náxrjón ts'ok'éhe. A ntá tí k'uitjahya ntá tjenkayáxin kíxín: “Áxri tsokjan ntona k'uaxrjéxian.” ²⁵ A ntá tió kjan la éxi ijnko chojni tsík'ánjón ntøe la náxrjón tsjehe tí nkaxenhen nchia. A ntá k'uikon tí jinahya xíkaha tjen nchia ²⁶ a ntá sákjuíkakjín yato nchakuen tí jinahya antsí má jinahya. A ntá antsí má jinahya kónhen tí ch'ín a, a ntá tí senó la kénhyó. Mé xíkaha tsónhen ijnko chojni kénhyá qasén tinkáchónki Dios —ichro ch'án.

Tí kjuachéhé chaxín

²⁷ Ntá ch'ín Jesús tjenixja ch'án chrónka ch'án kaín tíha ntá ijnko chojni chjin tjenkákjan tí jehe sín a itsen nixja tjan ntáchro tjan kíxín:

—Chéhé tí nkexro k'uaxrjeníxín tí jaha kjuíntak'ánkiá —ichro tjan.

²⁸ Ntá jehe ch'án kjuátehe ch'án ntáchro ch'án kíxín:

—Antsí chéhé tí nkexro tinhin tí itén Dios la ko titekaon sín —ichro ch'án.

Tí sín jinahya mé tjanchia sín ijnko kjuaxroan náxrjón

(Mt. 12.38-42; Mr. 8.12)

²⁹ Ntá nchónhya chojni sítójnkotsé sín tí tjen ch'ín Jesús ntá jehe ch'án kjuankíxín nixja ch'án ntáchro ch'án kíxín:

—A ntá tí chojni siín jie la jinahya sín, a ntá tjanchia sín kíxín chrókjuásian ijnko kjuaxroan náxrjón. Kjánchó tsjákokjínhyá ijnko kjuaxroan la jehó tí nkehe tsíkónhen ch'ín Jonás. ³⁰ Ntá éxi yóhe kónhen ch'ín Jonás kónoexín tí sín chjasin Nínive mé xíkaha tsónhen tí Xjeen Dios K'óna Chojni la ts'ikón tjen ch'án kíxín. ³¹ A ntá tí yaon tsitqexín ijjé chojni tjejó jie la mé tí tjan reina k'uetoan kjuixín nó Sur mé ts'inkatjen tjan tsjanchia tjan jie kíxín tí sín tjejó jie. Kíxín jehe tjan imá kjín kjuixín tjan tsinhin tjan nkexrí imá k'uenohe ch'ín Salomón.* A ntá jie itjén janhan antsí chonta kjuachaxin, a ntá ch'ín Salomón la kénhyó. ³² La ko tí sin chjasin Nínive kjaxin ts'inkatjen sín tió tsitqexín ijjé chojni la tsjanchia sín jie kíxín tí sín tjejó jie la ko tsontáchro sín kíxín chrókjuasóte tí chojni tjejó jie kíxín tió kuínhin tí sín Nínive chrónka ch'ín Jonás itén Dios la kjuitóxínhin sín ntje sín. A ntá jie itjén janhan antsí má chonta kjuachaxin, a ntá ch'ín Jonás la kénhyó.

* 11:31 1 Reyes 10.1-10

Xrohi t'inkaséyanxín cuerpo kuènte chojni

(Mt. 5.15; 6.22-23)

³³ 'Nijnko chojni chrokjuinchek'ákjen ijnko xrohi chrókjuak'ema ch'án la ko chrókjuak'ehya ch'án chrínkí ijnko ntacajón. Náhí. Noi chrókjuak'e xrohi chrókjuak'enkáya candelero kíxin ts'ikonxín chojni tí t'inkaséyan.[†] ³⁴ Tí ikonrá mé éxi yóhé ijnko xrohi t'inkaséyanxín tí cuerpo kuèntará. A ntá tí chontará ikonrá jína la ntá kuenté cuerpo kuèntará chóntha xrohi. A ntá tí chontará ikonrá jínahya la ntá kuenté cuerpo kuèntará la sítié tjen. ³⁵ Chrókóxakonhanrá kíxin chrók'uayakonhénrá tí xrohi chontará kíxin chrók'uankahya kíxin chrók'uixitiéhya tí tjejorá. ³⁶ A ntá tí kuenté tí cuerpo kuèntará chróchóntha xrohi la ko nit'ó chrók'uixitiéhya la ntá kuenté la chrók'uikonrá jína la éxi ijnko lámpara kuenté ch'e xra jína.

Ch'ín Jesús chrónka kíxin ntoáhya tjako tí sín fariseo la ko tí sín tjako ley

(Mt. 23.1-36; Mr. 12.38-40; Lc. 20.45-47)

³⁷ A ntá tió kjuixin nixja ch'ín Jesús ntá ijnko ch'ín fariseo chrónoéhe ch'án tí ch'ín Jesús kíxin sátsjiko ch'án ntóe ch'án sineko ch'án. Ntá tió kjuíji sín ntiha la k'uíxenhen sín nchia ntá kjuák'etjaxín ch'ín Jesús chjino tjen tí mesa a. ³⁸ A ntá tí ch'ín fariseo chrakon ch'án k'uikon ch'án kíxin ch'ín Jesús k'óntihya ch'án tja ch'án senó tí sine ch'án éxi tinkáchónki tí jehe sín. ³⁹ Kjánchó Ìnchéni ntáchro ch'án kíxin:

—Jahará fariseorá nchetjóará tí ntója tí vaso la ko tí plato. A ntá nkaxenhen la tsíkaón kjuachée la ko kjuachjinoxínhin. ⁴⁰ Jahará lontirá. ¿A noahyará kíxin tí nkexro kjuich'éna tí ntója la koí tí nkaxenhen kjuich'éna ch'án? ⁴¹ Tí chrókjuinchekítónhénrá chojni nòa kaín əsánrá tí nkehe chontará la ntá chrókóxakuanhyará tí chrók'ónti chojni o náhí.

⁴² 'Nòará jahará fariseorá. Jahará chjehérá Dios ijnko ite parte kaín kaxroan tsjiko tí nkehe sineni. A ntá tathyará kuentá tí nkehe ntóá la ko nkexrí chrótjuéhérá Dios la ko nkexrí chrótjuéhérá kíchuárá. Jína chróchjehérá Dios nkehe la ko chrók'uitjáyanhyará tí chrókjuínkitsará kíchuárá.

⁴³ 'Nòará jahará fariseorá. Tjinkáonrá ts'ejokjenrá tí sillá náxrjón nkaxenhen níinko la ko tjinkáonrá kíxin jnkojína tsonixjahará sín tió tsoxétará sín ntasin.

⁴⁴ 'Nòará jahará maestro tjàkorá tí ley la ko jahará fariseorá. Ntoáhya tjenkayáxinrá ch'iará. Jahará éxi yóhé tòye tsíxrvá chojni tsík'en t'ikonhya chojni la t'atsínsa sín nátaón la noehya sín kíxin tsíxrvá chojni ntiha.

⁴⁵ A ntá kjuát'he ijnko tí maestro tjako tí ley ntáchro ch'án kíxin:

—Maestro, xíkaha ntáchrua la, ¿á kjaxinhya jeheni kaín ni t'ántaxínhínni ní? —ichro sín.

⁴⁶ A ntá ntáchro ch'ín Jesús kíxin:

—Kjaxin nòará tí jahará tjàkorá tí ley. Tétuenhénrá chojni tsamá sín ijnko nkehe imá ye chrókjuachahya chojni chrókuamá. A ntá jahará nijnko dedo tjárá chrókjuínkitsará tí nkehe imá ye yámá sín.

⁴⁷ 'Nòará tí jahará. Ch'énará tjał'qe tí sín k'uéchrónka itén Dios ósé tsík'óyán tí sín k'uaxrjeníxinrá. ⁴⁸ Xíkaha jahará tjákoxinrá kíxin ó nchoxon tí nkehe kjuich'e tí sín k'uaxrjeníxinrá ósé kíxin jehe sín k'óyán sín tí nkexro k'uéchrónka itén Dios ósé. A ntá jahará ch'énará tjał'qe tí tsíxrvá sín.

⁴⁹ 'Mé xíkaha Dios chóntha kjuaxrexinkaon imá jína ntá ntáchro ch'án kíxin tsochr'án ch'án chojni tsochrónka itén ch'án la ko tsochr'án ch'án chojni tsjikjako itén ch'án. A ntá chojni ts'óyán jnkojín tí jehe sín la ko tsochónkíhi tí í so sín, ichro ch'án. ⁵⁰ A ntá Dios mé tsjanchia jie tí chojni siín jie kíxin k'uítji ijnié kaín tí sín k'uéchrónka itén ch'án ósé desde tí xrankíxín k'óna chjasintajni ⁵¹ la mé xrankíxín k'uítji ijnié ch'ín Abel la mé kjuixixín k'óyán sín ch'ín Zácarías k'óyánxin sín ch'án jnkosiné tí tjen tí altar la ko tí níinko. Ntá Dios sinchekjasóte ch'án tí sín siín jie kíxin xíkaha ik'uén kaín tí sín a.

[†] 11:33 Lucas 8.16

⁵² 'Nòará jahará maestro tjàkorá tí ley. Jahará tjinkákonhyará kíxín í so chojni tsönohe sín tí nkehe chaxín la ni jahará tjinkákonhyará sínchexiteyará la ko títóéhyará kíxín í so chojni chrókuinchexiteyá sín —ichro ch'án.

⁵³ A ntá kjuixin nixja ch'ín Jesús kaín tíha ntá tí sín maestro tjako tí ley la ko tí sín fariseo imá kóníkkakonhen sín ch'án ntá kjuankíxín sín kjuanchankíhi sín ch'án nchónhya nkehe

⁵⁴ chrókuachaxín sín ch'án kíxín ách'e ntoáhya chrókuatéhe ch'án ntá chrókuanchia sín jie tí jehe ch'án.

12

Ch'ín Jesús chrónka kíxín ntoáhya ch'e tí sín fariseo

¹ A ntá nchónhya mil chojni kójnoksé sín ntá tinkák'íntate kíchó sín. Ntá ch'ín Jesús saoxín kjuankíxín chénka ch'án tí sín k'uájiko ch'án ntáchro ch'án kíxín:

—Chrókuítékákonhyará tí nkehe ntoáhya tjenkayáxin tí sín fariseo ch'ia sín, na mé éxi yóhe tí xroan nchek'ánkí niotja tí nkehe tjako sín. ² Kohya nkehe mó jie chrókónoxínhyá chr'éxin la ko kohya nkehe tjemá jie chrókónoahya chojni chr'éxin. ³ A ntá kaín nkehe ntáchrorá tí sítié la chr'éxin tsinhin chojni tí nchakotjin; la ko kaín nkehe mó ntáchrorá k'uikjéhérá nchia la chr'éxin ts'èya sín chrítaón nchia tsinhin kaín xín chojni.

Nkexro tí chróchrakonhenni (Mt. 10.26-31)

⁴ 'Jahará chojni chóxin kíchó ni mé tjonkará kíxín chróchrakuenhyará tí chojni t'óyán tí cuerpo, a ntá chr'éxin la kohya nkehe tsjacha sín chrókuich'e sín. ⁵ Kjánchó tjonkará kíxín nkexro chróchrakonhénrá. Chróchrakonhénrá Dios mé tí nkexro tsakitsje kjuachón ntá chóntha kjuachaxin tsochr'án chojni tí siín xrohi tsjasótexín sín. Tí nkexro a mé chróchrakonhénrá ch'án má.

⁶ '¿Á chrókóixihyá in'ó koxroxe yaá chichaon ntsíntsí? Kjánchó Dios la ts'itjáyenhya ch'án nijnko tí jehe va. ⁷ Kjónté tí kaxihí chóntha ikjárá la nohe ch'án nkekjaín ka chontará. Méxrä chrakonhyará tí jahará kíxín antsí má tjete sínkí tí jahará. A ntá kjónté nchónhya koxroxe la kánhyó sínkí tíha.

Chróchrónkani kíxín tinkáchónkini Ìnchéni Jesucristo nkayakon chojni (Mt. 10.32-33; 12.32; 10.19-20)

⁸ 'Ntáxjan kaín tíha kíxín tí nkexro tsochrónka kíxín tinkáchónkina sín nkayakon chojni la kjaxin tí Xjeen Dios K'óna Chojni tsochrónka kíxín chóxin ch'án tí jehe sín nkayakon tí sín ángel kuénte Dios. ⁹ A ntá tí sín sinchemá sín kíxín chónhyana sín nkayakon chojni la ntá kjaxian janhan sintamá kíxín chonhyá tí jehe sín nkayakon tí sín ángel kuénte Dios.

¹⁰ A ntá jnkojín nkexro ts'ántaxíñin sín tí Xjeen Dios K'óna Chojni naxa jína ts'itjáyan tí jie k'uántaxíñin sín. A ntá tí nkexro ts'ántaxíñin tí Nchakuen Dios la xitjahya tsjìn tí jie tí xikaha tsixro sín.

¹¹ 'Tió tsjikoará sín nkaxenhen njinko Israel la ko tí tjejó tí sín t'etóan la ko tí tjejó tí sínreé la tóxakuanhyará nkehe tsjateherá la ko tóxakuanhyará nkehe tsixrorá ¹² kíxín tió tsonixjará la tí Nchakuen Dios sinchexraxinkaonrá nkehe tsixrorá —ichro ch'án.

Tí kjuaxikaon tsochóntha chojni itsjé nkehe

¹³ Ijnko nkexro tjenkákjan tí sin tsíkójnoksé ntáche ch'án tí ch'ín Jesús kíxín:

—Maestro, ntáche tí kíchó ni a kíxín tsjanjon ch'án tí nkehe tónhenni tocar tsíkitóhe it'éni tsakjani —ichro ch'án.

¹⁴ Ntá kjuátóhe ch'ín Jesús ntáchro ch'án kíxín:

—Lontia jaha. ¿Nkekuénte chrókuich'enará juez tí janhan chrók'oxikayahá tí nkehe chrókuakjará jahará? —ichro ch'án.

¹⁵ Kjaxin ntáchro ch'án kíxín:

—Tóxakonhanrá tí chróchontará itsjé nkehe. Jehya tí nchónhya nkehe chróchontará ntá náxrjón chrók'uejorá —ichro ch'án.

¹⁶ Ntá kjuíncheyóexin ch'án ntáchro ch'án kíxin:

—Kjuák'e ijnko chojni rico, a ntá tí nontee ch'án na mé imá k'óna. ¹⁷ A ntá tí ch'ín rico kjuenkayáxin ch'án ntáchro ch'án kíxin: “¿Nkexrí chrókjuit'a jie kíxin chontahya nketí ts'inkachjina tí noa k'ónana?” ichro ch'án. ¹⁸ Ntá kjuenkayáxin ch'án ntáchro ch'án kíxin: “Ó nóna nkehe sit'a jie. Ts'oxíka tí t'inkachjinayá noa chonta ntá sit'ána ijnko antsí jié ts'inkachjinayá kaín nkehe k'ónana jie chonta. ¹⁹ Ntá tsontátjan asenná kíxin: Asénni, nchónhya nkehe chonta jaha tsíchjina tsjacha nchónhya nánó. Ntá jie t'ok'áha la ínte la its'ia la tócháha,” ichro ch'án. ²⁰ Kjánchó ntáche Dios tí jehe ch'án kíxin: “Lontia xikaha ichrua la, kíxin ijie tie itsi nkexro tsjanchia asán. A ntá tí nkehe kjuásichjina la, ¿xá nkexro kuènte tíha?” ichro ch'án. ²¹ Mé xikaha tsónhen tí nkexro chóntha nchónhya nkehe chjasintajni ntihi, a ntá naxa kjueyáhyá ch'án nkehe kuènte nkaya nkajní —mé ichro ch'ín Jesú.

Dios mé t'ayakonhen tí xjeen ch'án

(Mt. 6.25-34)

²² Ntá chr'léxín ntáche ch'ín Jesú sín k'uájiko ch'án kíxin:

—Tjónkará kíxin chrókóxakuanhyará tí nkehe chrókjónterá la ko tí ka chrók'uítsará.

²³ Antsí sínkí tí kjuachón, a ntá tí nkehe chrókjónterá la kánhyó sínkí. La ko antsí sínkí tí cuerpo kuéntará, a ntá kánhyó sínkí tí ka chrók'uítsará. ²⁴ Xráxinkáonrá nkexrí siín tí kontálo. T'enkahya va la ko tjáhya va la ko chóntahya va nketí ts'inkachjinayá va tí noa. Kjánchó Dios la tjanjon nkehe sine va. A ntá jahará la antsí tjetoan, a ntá tí ko xritjaka la kénhyó. ²⁵ ¿Á tjejó jnkojínrá tjenkayáxinrá kíxin tí chrókóxakonhanrá má ntá naxa chrók'uankírá it'ó metro ntetoxinrá ínaá? ²⁶ A ntá xitjahya chrókjuič'erá tíha kjónté ijnko nkehe ntsí, ¿a ntá nkehe tsónhen tóxakonhanrá í so nkehe siín?

²⁷ 'Xráxinkáonrá nkexrí sít'ánkí tí catsjo lirio ch'ehya xrä la ko tjónhya. Ntá kjónté ntáxrjan kíxin tí ch'ín rey Salomón kaín ka náxrjón k'uék'inkáya ch'án naxa kjuíncheyóehya ch'án kíxin antsí náxrjón tí tsjo a. ²⁸ A ntá xikaha Dios mé ncheck'itsa ch'án kaín kayoa kjónté ijie síchón la ntóye tsoche, la mé xikaha tsjanjon ch'án tí nkehe chrok'uítsará jahará. ¿Ntá nkekuénte kíxin naxa titekákonhyará ch'án? ²⁹ ¿Ntá nkekuénte ixrírá tóxakonhanrá xrítjéyará nkehe sinterá la ko nkehe its'irá? ³⁰ A ntá tí chojni chjasintajni xritjeyá sín kaín tí nkehe a. Kjánchó It'ará ó nohe ch'án kíxin t'ichjánxínhanrá kaín tí nkehe a. ³¹ Senó chrókjueyará tí kjuachaxin kuénte Dios, a ntá jehe ch'án mé tsjanjon ch'án kaín nkehe t'ichjánxínhanrá.

Tí nkehe tjete siín nkaya nkajní

(Mt. 6.19-21)

³² 'Chrakonhyará jahará kolélo kuéntana. Kjónté tsjéhyará la It'ará tóxrjínhin ch'án tsotjáhará ch'án tí kjuachaxin kuénte ch'án. ³³ Ncheckjirá kaín nkehe chontará la ntá chjehérá tí chichaon tí sín chóntahya. A ntá xikaha sich'erá la tí tjoq' t'inka chichakoanrá tsontaxinhyá kíxin tí nkehe tjete siín nkaya nkajní tsjejehya la ko ntaha kohya xichée la ko ts'ínya kué la ko ts'itjáyanhyá. ³⁴ A ntá tí nkaya nkajní tsochontará nkehe tjete la ntá tí nkehe tjenkayáxinrá la kjaxin ntaha tjen.

T'ichjánxín listo chrók'uejóchónhenni

³⁵ T'ichjánxín listo ts'ejochonhénrá la ko tsjak'ekoará xrohi tjeche. ³⁶ Listo chrók'uejorá éxi chojni ch'e xrä tjejóchónhen sín tsokjanxín tí lámoe sín tí tsíkótéhe chojni kíxin tió tsi ch'án la ts'èya ch'án, la ntá tsakitjehe sín tí puerta tjoka. ³⁷ Náxrjón tí nkexro ch'e xrä tió chrókjan tí lámoe sín chrók'uikon ch'án kíxin naxa tjejotsjehe sín. Ntá chaxín ntáxrjan kíxin tí ch'ín lamo ts'etqan ch'án kíxin ts'ejotjaxin sín tí tjen mesa

ntiha ntá tsjanjon ch'án nkehe sine sín. ³⁸ Kjónté chrókui ch'án k'áxrótjen o chrókui ch'án nantóye mé xíkaha chrók'uikon ch'án kíxin tjejótsjehe sín la náxrjón tí sín ch'ehe ch'án xra. ³⁹ Chrókónohará tíhi kíxin tí chrókónohe tí inché nchia nke hora chrókui tí xíchee ntá chrókuak'etsjehe ch'án chrókuítóehya ch'án chrók'uixenhen xíchee tí ntge ch'án chrókueé. ⁴⁰ Ntá jahará kjaxinrá xíkaha chrók'uejotsjehérá kíxin titàya tsi tí Xjeen Dios K'óna Chojni.

*Tí nkexro jína ch'e xra la ko tí ch'ín ch'e hya xra jína
(Mt. 24.45-51)*

⁴¹ A ntá ch'ín Pedro kjuanchankí ch'án kíxin:

—Inchéni, ¿á jehóni kaín ni kjuincheyóexian nkehe ntáchrúa o kaín chojni? —ichro ch'án.

⁴² Ntá ntáchró Inchéni kíxin:

—¿Nkexro tí t'etoan tí xra jína, a ntá tí lámoe ts'etuñhen kíxin ts'ayakonhen ch'án tí chojni siín tí nchia ntiha kíxin tsjanjon ch'án nkehe sine sín xintii tí hora a? ⁴³ Náxrjón tjen tí nkexro a tió tsi tí lámoe ts'ikon ch'án kíxin naxa tjech'e tí xra. ⁴⁴ Tíhi mé chaxín tsontáxrjan kíxin tí ch'ín lamo tsochjéhe ch'án kaín xra chóntha ch'án ts'etoan tí ch'ín a. ⁴⁵ A ntá tí ch'ín t'etoan sítóñhen xra tsjenkayáxin kíxin tjokahya tsokjan tí lámoe ch'án, a ntá tsjankíxin ch'án tsónínkakonhen ch'án tsjanjonko ch'án tí i so chojni ch'é xra, tí chojni ntoa la ko tí chojni chjin, a ntá jehe ch'án sine ch'án la its'i ch'án la tsokoan ch'án. ⁴⁶ A ntá tí lamo tsokjan tí yaon tjenkayáxinhya tí ch'ín ch'e xra, na mé ijnko hora noehya ch'án. A ntá imá sinchekjasóte ch'án tí ch'ín kuítóhehe xra la ntá tsjasóteko ch'án tí sín titekakonhya.

⁴⁷ 'A ntá tí nkexro nohe ch'án nkehe tí xra tjinkaon tí lámoe ch'án la tóxakuenhyá ch'án la titekakonhya ch'án la mé tí ch'ín a imá tsjasóte ch'án ts'ekon ch'án. ⁴⁸ A ntá tí nkexro noehya nkehe tí xra tjinkaon tí lámoe ch'án ntá ch'e ch'án nkehe chrókuasótexín ch'án la kjónté kánhyó tsjasóte ch'án ts'ekon ch'án. A ntá tí nkexro k'uáyéhé nchónhya nkehe la antsí tsjé xra ts'áyéhé ch'án sich'e ch'án; la ko antsí tsjé xra tsoxranchehe tí nkexro k'uáyéhé itsjé nkehe.

*Jnkokoáhya tsjenkayáxin chojni kíxin ó kui Inchéni Jesús
(Mt. 10.34-36)*

⁴⁹ 'Janhan k'uinka kíxin sintak'ákjen xrohi chjasintajni. Ách'e ntáxrjan kíxin ó tjechr'ákjen tí xrohi a ntá naxa náhí. ⁵⁰ T'ichjánxín nchónhya tsóna tsjasótena. Tóxakonna tsoxitayája kaín tíha. ⁵¹ ¿Á tjenkayáxinrá kíxin k'uinkakian kjuaxróxin tí chjasintajni ní? Méxra ntáxrjan náhí. Jnkokoáhya tsjenkayáxin chojni xíkaha. ⁵² Kíxin ijie xrankíxixín in'ó chojni naxa kjéhya jnkokoáhya tsjenkayáxin sín. Tí iní tsónínkakonhen tí yaá. Tí yaá tsónínkakonhen tí iní. ⁵³ A ntá tí it'é tsónínkakonhen tí xjeen ntoa, la ko tí xjeen ntoa tsónínkakonhen tí it'é. A ntá tí iné tsónínkakonhen tí xjeen chjin, la ko tí xjeen chjin tsónínkakonhen tí iné. Tí ich'ee tsónínkakonhen tí tikkintee la ko tí tikkintee tsónínkakonhen tí ich'ee tjan.

*Tí nkehe chronkaxín nkehe tsónhen
(Mt. 16.1-4; Mr. 8.11-13)*

⁵⁴ Ch'ín Jesús kjaxin ntáche ch'án tí chojni siín kíxin:

—A ntá ts'ikonrá ts'aya tjuí tí tjiatóxin yaon, a ntá ntáchrórá kíxin ts'aniá chrin, a ntá xíkaha chaxín tsónhen ts'aniá chrin. ⁵⁵ A ntá tí chjéhe xrínto nó sur ntá ntáchrórá kíxin tsosóa, a ntá xíkaha chaxín tsosóa. ⁵⁶ Jahará ntoáhya tjenkayáxinrá. Ó nohará tjenkayáxinrá nkexrí tsónhen nkajní la ko chjasintajni. ¿Ntá nkexrí naxa tiénxinhýará nkehe sítóñhen tí tjejorá jie?

*Chrókóxakonhenni kjuaxróxin chrók'uejókoni tí sín nínkakonhenni
(Mt. 5.25-26)*

⁵⁷ ¿Nkekuènte tjéyáhyará jahará nkehe tí jína? ⁵⁸ Tí jnkojín nkexro tsjanchia jié sájtikoará ch'án nkayakon tí sín t'etoan na tí ntia ó chrónkakjórá ch'án kíxin tsoyóxin ts'ixinhya kjuaníkaon kíxin sátsjikoahyará nkayakon tí ch'ín juez, kíxin tí ch'ín juez chrók'uetoan ch'án kíxin sátsjikoará tí sín comandante. A ntá tí ch'ín comandante chróchr'áxanhanrá ch'án ntoechiso. ⁵⁹ Ntáxrjan kjá ni chrók'uaxrjéxinhayará ntiha tsjenkajiará kaín xín chichaon chonta.

13

T'ichjánxin chrókjunkí chojni tí nkehe tjenkayáxin sín

¹ A ntá tí yaon k'uejó iso sín chénka sín tí ch'ín Jesús kíxin nkexrí kjuich'e ch'ín Pilato k'uetoan its'en iso chojni tsíkjixin estado Galilea k'uítji ijnié sín kójnkojíeko tí ijnié tí ko k'óyán sín kjuanchexín sín kjuasáyé Dios. ² A ntá kjuátehe ch'ín Jesús ntáchro ch'án kíxin:

—¿Á tjenkayáxinrá kíxin xíkaha kónhen tí sín tsíkjixin estado Galilea kíxin qantsí jié chóntha sín, a ntá tí í so sín chjasén sín la á náhí ní? ³ Ntáxrjan tíhi kjá náhí. A ntá jahará tí tjinkíhyará tí tjenkayáxinrá la kaín rá xíkaha its'enrá kjaxin. ⁴ ¿Á tjenkayáxinrá kíxin qantsí má k'uéchóntha jié tí dieciocho chojni ik'uén xrátja sín tí torre Siloé, a ntá tí í so sín chjasín Jerusalén la á náhí ní? ⁵ Ntáxrjan tíhi kjá náhí. A ntá jahará tí tjinkíhyará tí tjenkayáxinrá la kaín rá xíkaha ts'itjáyanrá kjaxin.

Ch'ín Jesús kjuíncheyóexin ch'án éxi ijnko nta to higo t'ónahya to

⁶ A ntá ch'ín Jesús kjuíncheyóexin ch'án ntáchro ch'án kíxin:

—Ijnko chojni chóntha ijnko nta to higo nóntee ch'án. Ntá sákjuítsjehe ch'án á k'óna to. A ntá náhí k'uitjahya ch'án ninkehó to. ⁷ Ntá ntáche ch'án tí nkexro t'ayakonhen tí nonte a kíxin: “Ó ní nánó t'inkatsjahá tí nta la k'uitjahya ninkehó to higo. T'ochrínjian tí nta kíxin tsoxéhe tí nonte a.” ⁸ A ntá tí ch'ín t'ayakonhen nonte kjuátehe ch'án ntáchro ch'án kíxin: “Áxri, títóhé ijie nánó kíxin sintantá nche la ko tsjiko nchekatjehe. ⁹ A ntá tí xíkaha ách'e ts'óna to. A ntá tí náhí na ntá ts'ochrínjian chréxín.”

Ch'ín Jesús kjuínchekitohe jína ijnko tjan níhi tí yaon t'ok'éhe chojni

¹⁰ Ch'ín Jesús kjuák'e ch'án ijnko níjko kjuakoxín ch'án ijnko yaon t'ok'éhe chojni.

¹¹ Ntiha tjen ijnko chojni chjin chóntha dieciocho nánó chonta tjan ijnko nchakuen tí jínahya kjuíncheníhi tjan tjesékoá tjan xitjahya xrentoá tjan. ¹² A ntá ch'ín Jesús k'uíkon ch'án kíxin xíkaha tjen tjan ntá k'uíyehé ch'án tjan ntáchro ch'án kíxin:

—Naná, ó kjuuinhan tí chin chonta —ichro ch'án.

¹³ A ntá jehe ch'án kjuak'etja tja ch'an chrítaón tí jehe tjan a ntá tuénxín xrentoá tjan ntá chjéhe tjan kjuasáyé Dios. ¹⁴ A ntá tí ch'ín t'etoan kuénte níjko kóninkaon ch'án kíxin ch'ín Jesús kjuínchekitohe jína ijnko chojni ijnko yaon t'ok'éhe sín, ntá ntáche ch'án tí chojni a kíxin:

—Siín injon yaon mé chrókónhen xrá chrók'uinkará chrókuitohará jína na jehya tí yaon t'ok'éheni chrókónhen tíha —ichro ch'án.

¹⁵ A ntá Ínchéni kjuátehe ch'án ntáchro ch'án kíxin:

—Ntoáhya tjenkayáxinrá jahará. ¿Á chrókjuasintankéehyará tí koxintqará la o tí kolóchoará chrókjuíkoará va ntá tí yaon t'ok'éheni ní? ¹⁶ A ntá tí tjan mé tsík'axrjeníxín tí ch'ín Abraham na mé ó chóntha dieciocho nánó tsíkjinchenteto ch'ín Tsochren tí jehe tjan, ¿á jehya jína kjaxin chrókjuasintanká tí nkehe tsíkóntetoxín tjan tí yaon t'ok'éheni? —ichro ch'án.

¹⁷ Ntá xíkaha ichro ch'ín Jesús la ntá kaín tí sín kóninkakonhen ch'án la kósuehé sín. A ntá kaín tí chojni siín ntaha chéhé sín k'uíkon sín kaín tí kjuaxroan jié kjuakoxín tí jehe ch'án.

*Kjuíncheyóexin ch'ín Jesús éxí ijkno tje ntsí kuènte nta mostaza
(Mt. 13.31-32; Mr. 4.30-32)*

18 Ntá ntáchro ch'ín Jesús kíxin:

—¿Nkehe tóyóexin tí t'etoan Dios tí kjuachaxin kuènte ch'án la ko nkehe jína chrókuintayóaxian? **19** Éxí yóhe ijkno tje kuènte nta mostaza k'uénkä ijkno chojni nontee ch'án. A ntá tió k'uánkí kóyohé éxí ijkno nta jié. A ntá tí koxroxé xritjaká mé kui va kjuich'eña va káké va chrik'á tí chaon tí nta.

*Ch'ín Jesús kjuíncheyóexin éxí tí xroan t'ánkíxín niotja
(Mt. 13.33)*

20 Ntá ntáchro ch'ín Jesús ínaá kíxin:

—¿Nkehe chrokjuintayóaxian tí t'etoan Dios tí kjuachaxin kuènte ch'án? **21** Éxí yóhe tí xroan ncheck'ánkí niotja kjuinkíkjanxín ijkno chojni chjin iní medida harina. A ntá tí ch'o la k'uánkí.

*Tí puerta tekahya
(Mt. 7.13-14, 21-23)*

22 K'uátsínka ch'ín Jesús kaín chjasin hyé la ko kaín chjasin ntsíntsí nkákjako ch'án tí tan jína kíxin jehe ch'án ó sátsjí ch'án chjasin Jerusalén. **23** A ntá ijkno nkexro kjuanchankí ch'án kíxin:

—Inchéni, ¿á tsjéhya tí sín tsaá? —ichro ch'án.

A ntá jehe ch'án kjuátehe ch'án ntáchro ch'án kíxin:

24 —Tóxakonhanrá t'ixeenxínrá tí puerta tekahya kíxin nchónhya sín tjinkaon sín chrók'uixenhen sín, kjánchó tjachahya sín. **25** A ntá tí inché nchia ts'ikjéhe ch'án tí puerta. A ntá chriéxin jahará ts'ejorá ntója ts'eyará ts'inkará tí puerta tsontáchrórá kíxin: “Tadá, takítjehé nchia”, tsixrorá. Kjánchó jehe ch'án tsjatehe ch'án tsontáchrórá ch'án kíxin: “Nonahya nketí k'uinkaxínrá jahará”, tsixro ch'án. **26** A ntá tsjankíxínrá tsontáchrórá kíxin: “Kjóneni la ko k'uíni jnkokoá la ko jaha kjuákoxian tí ntasíinni”, tsixrorá. **27** A ntá jehe ch'án tsjatehe ch'án tsontáchrórá ch'án kíxin: “Ó ntáxrjan janhan kíxin chonhya tí jahará. Títójérá tí janhan sájtirá ókjé kaín tí jahará jínahya kjuich'erá.” **28** Ntaha tsotsjankará la ko sintetaónrá nénorá tió ts'ikonrá kíxin ch'ín Abraham la ko ch'ín Isaac la ko ch'ín Jacob la ko kaín tí sín k'uéchronkaxín itén Dios mé tjejó sín tí tjen Dios t'etoan ch'án, a ntá jahará la ts'axrjéxinrá ntója ntiha. **29** Tsjixin chojni nó tjiotoxin yaon la ko nó tjiatóxin yaon la ko nó norte la ko nó sur ntá ts'ejótjaxín sín tí tjen Dios t'etoan ch'án la sine sín. **30** A ntá iso tí sín k'uítuenhen senó la mé ts'etoan sín, la ko iso tí sín k'uék'etoan senó la mé ts'ítuenhen sín.

*T'avá ch'ín Jesús
(Mt. 23.37-39)*

31 A ntá tí yaon a ikui iso sín fariseo ntáche sín tí ch'ín Jesús kíxin:

—Sátjíxian ntihi kíxin ch'ín Herodes tjinkaon chrók'óyán ch'án tí jaha —ichro sín.

32 A ntá jehe ch'án kjuátehe ch'án ntáchro ch'án kíxin:

—Sátjirá chenkará tí ch'ín jínahya ch'ia kíxin: “Ijie la ko ntóye tsakítsje nchakuen tí jínahya la ko sintakítihá chojni níhi jína la ntá tí níxín yaon a ntá tsjixinna tí xra kuéntana,” tsixrorá. **33** Kjánchó t'ichjánxín kíxin naxá sájtija tí jie yaon la ko ntóye la ko tí yaon chriéxin kíxin t'ichjánxín kíxin ijkno nkexro chrónka itén Dios chrók'uenxín ch'án chjasin Jerusalén.

34 'Jerusalén, Jerusalén. Jahará t'oyánrá tí sín tjako itén Dios la chjehérá xro tí sín ichr'án ch'án ikui chrókuinkitsará. Imá itsjé veces tjinkávan chrókójnoksérá la chrók'uáyakonhanrá éxí ijkno cochiká mé t'ayakonhen xjéen va chrinkí káneñee va mé xíkaha tjinkávan chrók'uáyakonhanrá tí jahará. Kjánchó jahará la tjinkákonhyará xíkaha.

³⁵ Chrókónohará kíxin Dios la tsítóhe ch'án tí jahará la ts'ik'onhyará tí janhan tsjixrakája tí yaon tsontáchrórá kíxin: “Jína tí nkexro kjuixin kjuachaxin ihnjé Inchéni Dios.”

14

Ch'ín Jesús kjuínchekitohe jína ijnko nkexro tsík'atjoyé kuenté

¹ A ntá tí yaon t'ok'éhe sín sákjuí ch'ín Jesús ntóe ijnko ch'ín fariseo t'etoan kíxin ntaha sineko sín ch'án. A ntá tí í so sín fariseo tinkáchréhe sín tsotsjehe sín nkehe sich'e ch'án.

² A ntá ntiha ntoí chók'èxin tí tjen ch'án itjen ijnko chojni tsík'atjoyé kuenté. ³ A ntá ch'ín Jesús kjuanchankíhi ch'án tí sín maestro tjako tí ley la ko tí sín fariseo kíxin:

—¿A siín kjuachaxin sinchekitoheni jína ijnko chojni níhi tí yaon t'ok'éheni o náhí?
—ichro ch'án.

⁴ A ntá jehe sín la tání sín. A ntá ch'ín Jesús sákjuíko ch'án tí ch'ín níhi la kjuínchekitohe ch'án jína la k'uëtuñhen ch'án kíxin sátsji ch'án. ⁵ A ntá ntáche ch'án tí sín fariseo kíxin:

—Jnkojín tí jahará chontará kolóchoará o koxintqará chrókuitsínkáya va tóye ¿á senóhya chrókuakítsjetaónrá va tóye kjónté yaon t'ok'éheni ní? —ichro ch'án.

⁶ A ntá jehe sín ninkehó kjuátæehya sín kíxin xikaha ichro ch'án.

Tí sín tsík'iyehe sín sátsji sín kia tsíkótehe chojni

⁷ Ntá k'uíkon ch'ín Jesús kíxin tí sín tsíkóchjina tí kia a kjueyá sín sillá náxrjón ts'ejóya sín tí tjen mesa ntá kjuíncheyóexin ch'án ntáchro ch'án kíxin:

⁸ —Tió jnkojín nkexro ts'iyaha sín kíxin tsjasán ijnko kia tsotéhe chojni la tjéyahya tí nta sillá kuénte tí sín t'etoan kíxin ách'e tsi jnkojín nkexro antsí t'etoan ⁹ a ntá tí nkexro k'uýahará yóírá itsi ch'án tsjanchahará ch'án kíxin t'inkátjenxian tí tjen jaha méhe kíxin ntaha tsjak'e í jnko nkexro, tsixro ch'án. Ntá tsosuàha sátsjia tsjak'etjaxian tí sillá kjuixixín. ¹⁰ Íchá jína tió t'iyaha sín chrókuak'etjaxian tí sillá tjetuanhya, kíxin ntá chrókui tí ch'ín tsík'iyehe tsontáchro ch'án kíxin: “Jína tjoni la t'atsíka tjak'etjaxian tí sillá antsí náxrjón”, kíxin ntaha tsjikosáyaha sín nkayakon kaín tí sín ts'ejótjaxinkoa sín ntiha. ¹¹ Kíxin tí nkexro sinchekitoheni qasén kíxin imá chrók'uëtoan ch'án la mé chr'éxín Dios tsjanjonhya kjuachaxin kíxin ts'etoan ch'án. A ntá tí nkexro k'uék'etqanhya la mé chr'éxín Dios tsjanjon kjuachaxin kíxin antsí ts'etoan ch'án.

¹² Kjáxin ntáche ch'án tí nkexro tsík'iyehe ch'án kíxin:

—Tió tsjásian kia it'q yaon la o tsónjin la t'iyehéha sín choxian la ko tí sín kíchuá la ko tí sín náxa kjéhya la ko tí sín rico chjino ntøa, kíxin jehe sín la chr'éxín ts'iyaha sín ínaá la xikahó la ó kjuixin kjan tí k'uýehé sín. ¹³ Íchá jína chrók'uiyehé tí sín nòa la ko tí sín tsíxénká toté sín la ko tí sín xitjahya tji la ko tí sín t'ikonhyá. ¹⁴ Ntá chrókócháha jaha kíxin jehe sín xitjahya ts'iyaha sín tsjasin sín kia. A ntá tió tsozechónjian tí sín jína la mé Dios mé tsjenkáha kíxin kjuíñkítsa tí jehe sín.

Ch'ín Jesús kjuíncheyóexin ch'án éxí ijnko kia jié

¹⁵ A ntá kuínhin ijnko tí sín tjejótjaxin sín chjino tí mesa, a ntá ntáche ch'án tí ch'ín Jesús kíxin:

—Náxrjón tí sín sine niotja tí tjen Dios t'etoan ch'án —ichro ch'án.

¹⁶ Ntá ntáchro ch'ín Jesús kíxin:

—Ijnko chojni kjuasin ijnko kia jié ijnko kónjín la k'uýehé ch'án nchónhya chojni tsi sín tí kia a. ¹⁷ A ntá ó kuichjina tí hora sine sín ntá k'uëtuñhen ch'án ijnko chojni ch'ehe ch'án xrä tsjichenka ch'án kaín tí sín ó tsík'iyehe ch'án kíxin chrókóchjina sín kíxin ó tjejochónhen kaín nkehe sine sín. ¹⁸ Ntá kaín sín kjuankíxin sín chrónòa sín kíxin xitjahya tsjiji sín sine sín. A ntá tí ch'ín saoxín kjuítsjehe ch'án ntáchro ch'án kíxin: “Na ntá k'uénani ijnko nontéeni la t'ichjánxín tsjitsjeheni la xitjahya tsjijini tí t'iyehéni ch'án, ntá chénka ch'án kíxin chrókóninkakuenhyani ch'án”, ichro ch'án. ¹⁹ A ntá í jnko ch'ín ntáchro ch'án kíxin: “Na ntá k'uénani in'ó yunta koxinta, a ntá t'ichjánxín tsotsjeheni á jína ch'e va

xra, ntá chénka ch'án kíxin chrókóníkakuenhyani ch'án", ichro ch'án. ²⁰ A ntá í jnko ch'ín ntáchro kíxin: "Na ntá kóteheni, méxra xitjahya tsjijiñi", ichro ch'án. ²¹ Ntá ó kjan tí ch'ín ch'e xra chénka ch'án tí ch'ín lámo kaín tí nkehe tsíntáchro sín. A ntá tí ch'ín lámo kuínhin ch'án xíkaha la ntá kóninkaon ch'án ntá ntáche ch'án tí ch'ín ch'ehe ch'án xra kíxin: "Tjoka sájtia kaín ntá chjasin i la tsjikoa ntihi tí sín nòa la ko tí sín tsíxénká toté sín la ko tí sín xitjahya tji la ko tí sín t'ikonhya", ichro ch'án. ²² A ntá chr'éxín ntá kjan tí ch'ín ch'e xra chénka ch'án tí lámo kíxin: "Ó kjuínchexiteyáni xíkaha kuétuēnhénni la kjónté naxa xranka chrókui chojni", ichro ch'án. ²³ A ntá tí ch'ín lámo ntáche ch'án tí ch'ín ch'ehe ch'án xra kíxin: "Sájtia kaín ntá jié la ko kaín ntá ntsí la tétuēnhén chojni siín chrókui sín chrók'uixixenhen nchia ntóna naxa xranka. ²⁴ Kíxin ntáxrjan kíxin nijnko tí sín k'uíyáha senó chrókui sín chrókjone sín tí nkehe chrótjähä sín", ichro ch'án.

Ixra tsoschréheni Cristo

²⁵ Nchónhya chojni nkáchréhé sín tí ch'ín Jesús, ntá jehe ch'án kuinkátjíá ch'án kotónhen ch'án ton ch'án ntáchro ch'án kíxin:

²⁶ —A ntá jnkojín chojni tsotjinkaon tsoschréhé tí janhan la antsí má tjetoan chrótjuána sín la kjónté kénhyó chrótjuéhe it'é sín la ko iné sín la ko ichjién sín la ko xjeen sín la ko kichó sín ntoa la ko kichó sín chjin la ko kjónté kénhyó chrótjuéhe qasén sín. A ntá náhí la xitjahya ts'óna discípulo kuéntana jehe sín. ²⁷ Tí nkexro tsamáhya tí ntacruz kuénte sín tsoschréhya sín tí janhan la xitjahya ts'óna discípulo kuéntana. ²⁸ A ntá jnkojín tí jahará chrókjuich'énará ijkno tja't'o nteto, ¿á senóhya chrókjuenkayáxinrá kíxin nkekjáin chichaon ts'ichjánxín ts'ixenhen chrótsehérá á nchoxon chrókjuixín chrók'ónaxín tí tja't'o a? ²⁹ A ntá tió tsjankíxirá sich'énará tí tja't'o ntá chr'éxín xitjahya tsjixin sich'énará, ntá kaín chojni ts'ikon sín tsjanoárá sín ³⁰ tsontáchro sín kíxin jaha kjuankíxian kjuich'éna, a ntá jie xitjahya sinchekjixian ts'óna, tsixro sín. ³¹ A ntá jnkojín tí ch'ín rey t'etoan tsjanjonko í jnko rey t'etoan kjaxin násenó chrókjuenkayáxin ch'án kíxin ite mil soldado chóntha ch'án, á chrókjuacha ch'án chrókjuachaxín ch'án tí kán mil soldado chóntha tí í jnko ch'ín t'etoan. ³² A ntá ti chrókjuachaya ch'án chrókjuanjónko ch'án tí í jnko ch'ín rey, ntá naxa ijkín tjen ch'án la íchá jína chróchr'án ch'án ijkno nkexro tsoschronóhéhe ch'án kíxin chrók'uixinhya kjuáninkaon. ³³ Mé xíkaha jnkojín tí jahará tí tsitoéhyará kaín nkehe ntoáhya tjenkayáxinrá xitjahya ts'óna discípulo kuéntana.

Tí xíjnta tsík'ánkéhé tí jní

(Mt. 5.13; Mr. 9.50)

³⁴ A ntá jína tí xíjnta, kjánchó tí chrók'uánkéhé tí jní la ntá xitjahya chrókójní ínaá. ³⁵ Ntá tí xíkaha la ni tí nche xitjahya tsjiko la chrók'ónahya nkehe la chrok'uitjini ntója. Tí nkexro tjinkaon chrókuinhin la chrókuinhin kaín tíhi —ichro ch'in Jesús.

15

Kjuíncheyóexin ch'ín Jesús éxí ijkno kolélo tsik'itjáyan

(Mt. 18.10-14)

¹ Kaín tí sín nchekjènki la ko tí sín chóntha nchónhya jie kóchjinehe sín tí ch'ín Jesús kíxin tjinkaon sín chrókuinhin sín tí nkehe tjechronka ch'án. ² A ntá tí sín fariseo la ko tí sín maestro tjako tí ley kjuankíxian sín tjonta sín ch'án ntáchro sín kíxin:

—Tí ch'ín i la kjónté tí sín chóntha nchónhya jie la t'ito ch'án la ko neko ch'án —ichro sín.

³ Ntá ch'ín Jesús kjuíncheyóexin ch'án ntáchro ch'án kíxin:

⁴ —A ntá jnkojín tí jahará, tí chontará ijkno ciento kolélo ntá chrók'uitjáyan ijkno va, ¿á chrókuítjöhýará tí noventa y nueve va tí nteje ó, a ntá á chrókjuíkjéyahýará tí ko tsík'itjáyan hasta chrók'uitjájará va ní? ⁵ A ntá tí ts'itjárá va ntá tsamará va tsocháhárá. ⁶ Ntá tió tsokjanrá ntóará ntá ts'iyehérá kaín tí sín choxinrá tjórá jína la ko tí sín chjinaxón ntóará ntá tsontácherá sín kíxin: "Tsoschréheni ts'ejóni jie kíxin ó k'uitjá tí kolélo tsík'itjáyan." ⁷ Na

mé kjaxin xikaha tsotjonkará kixin qantsí tsochéhe kaín tí sín siín nkaya nkajní tió ijkno chojni tsítóhe kaín tí jie tsíkjenkayáxin ch'án. Ntá kánhyó tsochèxin tí sín nkaya nkajní kixin tí noventa y nueve chojni jína t'ichjánxienhya chrókuinkí sín tí nkehe tjenkayáxin sín.

Kjuíncheyóexin ch'án éxí chichaon k'uitjáyan

⁸ A ntá ijkno chojni chjin chónta ite chichaon, a ntá tí chrókuinchek'itjáyan tjan ijkno tí chichaon a la, ¿á chrókuinchek'ákjenhya tjan xrohi kixin chrókjueyáxin tjan la ko chrok'uánjón tjan tí nchia kixin chrótsehe tjan jína hasta chrók'uitjajia tjan? ⁹ A ntá tió chrók'uitja tjan la ts'iyehé tjan kaín tí chojni chjin jína tjo tjan la ko tí sín chjinaxón ntœ tjan la ntá tsontáche tjan sín kixin: "Tsochéheni ts'ejóni kixin ó k'uitjani tí chichaon kjuínchek'itjáyanni." ¹⁰ Ntá kjaxin xikaha tsotjonkará kixin imá tsochéhe kaín tí sín ángel kuente Dios tió ijkno chojni tsítóhe kaín tí jie tsíkjenkayáxin ch'án.

Ch'ín Jesús kjuíncheyóexin ch'án éxí ijkno ch'ín kuicháxinhin chichaon

¹¹ Kjaxin ntáchro ch'ín Jesús kixin:

—Ijkno nkexro chónta yaá xjeen ch'án. ¹² A ntá tí ch'ín tsoyo ntáche ch'án tí it'é ch'án kixin: "It'eni, chjehéni kaín nkehe chróchjehéni." A ntá tí it'é sín k'óchrít'ohé ch'án tí nkehe chónta ch'án. A ntá tí ch'ín tsoyo k'uáyéhe tí nkehe kuente ch'án. ¹³ A ntá kánhyó tsjé yaon chr'éxín tí xjeen ch'án tsoyo kjuínchekji ch'án kaín nkehe tsík'áyéhe ch'án, ntá sákjuiko ch'án tí chichaon sákjuú ch'án ókjé chjasin kjín. A ntá ntiha kjuínchexéhen ch'án kaín chichaon chónta ch'án kixin jehya tí jína kjuich'e ch'án. ¹⁴ A ntá tió kjuixin kjuéhe ch'án tí chichaon kuicháxinhin ch'án ntá xrínahya kókjinta tí chjasin ntiha ntá kohya nkehe sine kaín sín. A ntá jehe ch'án kjuankíxin ch'án t'enxín ch'án kjinta. ¹⁵ Ntá jehe ch'án sákjuíkjayá ch'án xra sich'e ch'án. Ntá chjasin ntaha tjen ijkno ch'ín kjuanchehe ch'án xra. Ntá tí ch'ín a kjuanjon ch'án xra ntá k'uetoan ch'án kixin sátsji ch'án nontee ch'án kixin ntiha ts'ayakonhen ch'án cochíno. ¹⁶ A ntá jehe ch'án t'enxín ch'án kjinta ntá tjinkaon ch'án chrókjóne ch'án tí nkehe ine tí cochíno kixin ninkexró tí ntiha chrohya tsjanjon nkehe sine ch'án. ¹⁷ Ntá jehe ch'án kjuák'e ch'án kjuenkayáxin ch'án kixin: "Nchónhyá chojni siín ntœ t'aná ch'e sín xra la chónta sín nkehe sine sín. Ntá janhan tjét'énxian kjinta ntihi. ¹⁸ Ntá jie tsokjan tí tjen t'aná la ntá tsontáxrjan kixin: It'eni, kjuasinni jie kuítekakuenhya It'eni nkaya nkajní la ko kjuasinhanni jie kuítekakuanhyani tí jaha. ¹⁹ Tósueheni tsontáchrúa kixin xjaan tí jeheni. Ch'énani éxí ijkno chojni t'aha xra", mé xikaha kjuenkayáxin ch'án tsontáchro ch'án. ²⁰ Ntá kuákja ch'án ntja xrakoa ch'án tí ntœ it'é ch'án.

'A ntá kjónté naxa kjín kui ch'án a ntá tí it'é ch'án la ó tsík'ikon ntá kuíkonóhe ch'án tí xjeen ch'án. Ntá kuinká ch'án la kjuíxinhin ch'án ntja la kjóa ch'án la ko kjóneko ch'án kochíto. ²¹ Na ntá ntáchro tí xjeen kixin: "It'eni kjuasinni jie kuítekakuenhyani Dios la ko kjuasinhanni jie kuítekakuanhyani tí jaha. Tósueheni tsontáchrúa kixin xjaan tí jeheni", ichro ch'án. ²² A ntá tí it'é ch'án k'uíyéhe ch'án tí sín ch'ehe ch'án xra ntáchro ch'án kixin: "Xrákoará tí ka qantsí jína nchek'inkáyará ch'án la ko chr'axenhenrá dedo tja ch'án ijkno koch'áninko la ko nchekjankará ch'án totjqa. ²³ La ko tjicakjínrá koxintáxjan tsanká la t'oyánrá va kixin sinekoni ch'án tsjasinhanni ch'án kia. ²⁴ Kixin tí xjanna i la éxí ó tsík'en ch'án xikaha ntá jie la éxí ó xechón ch'án la tsík'itjáyan ch'án la ntá jie la ó kónoxín ch'án ínaá", ichro ch'án. Ntá kjuankíxin sín kjuasin sín kia.

²⁵ A ntá tí xjeen ch'án sao la nonte tjech'e ch'án xra. A ntá tió kjan ch'án kui ch'án chjinaxón nchia ntá kuínhin ch'án siín són la ko ité sín. ²⁶ Ntá k'uíyéhe ch'án ijkno ch'ín ch'e xra ntá kjuanchankíhi ch'án kixin nkekuente xikaha sítónhen. ²⁷ A ntá tí ch'ín a ntáchro ch'án kixin: "Kíchuá la ó tsíkjan. A ntá it'á la k'uetoan k'uén koxintáxjan tsanká kixin jína xikjan ch'án", ichro ch'án. ²⁸ A ntá tí ch'ín sao la kóníkaon ch'án chrohya ch'án ts'ixenhen ch'án nchia. A ntá tí it'é ch'án k'uaxrjexín nchia chronóhe ch'án kixin

chrók'uixenhen nchia. ²⁹ Kjánchó jehe ch'án kjuátehe ch'án ntáche ch'án it'é ch'án kíxin: "Nchónhya nánó t'ahani xra, la xráxín kuítetakonhanni kaín nkehe kuétoan la kjuánjonhya nijnko koténtso chrókjónekoni tí sín chóxinni. ³⁰ A ntá jie ikui tí xjaan i kjuínchek'itjáyan ch'án kaín nkehe chjehé ch'án kjuínchek'itjáyanxín ch'án chojni chjin. A ntá jie ikjan ch'án la naxa t'oyán koxintáxjan tsank'a, ichro ch'án. ³¹ A ntá ntáchro tí it'é ch'án kíxin: "Xjeenni jaha, xráxín tjejóko kichó ni ntihi. Kaínxín nkehe kuéntana la kuénta jaha kjaxin. ¿Nkekuénte ninkávan? ³² A ntá jie la t'ichjánxin tsjasinhinni kíchuá kia tsochéheni kíxin exí tsík'en ch'án la ntá jie la ó tsíxechón, la tsík'itjáyan ch'án xikaha la ntá jie la kónoxín ch'án ínaá."

16

Ch'ín Jesúus kjuíncheyóexin ch'án exí tí ch'ín k'uáyéhe xra la ntá kjuich'ehya xra jína

¹ Kjaxin ntáche ch'ín Jesúus tí sín k'uájiko ch'án kíxin:

—Kjuák'e ijnko ch'ín lamó ricó chóntha ch'án ijnko nkexro chjéhe ch'án kjuachaxin kíxin ts'etoan tsónhen xra. Ntá kui ijnko nkexro chénka tí lamó kíxin: "Tí nkexro t'etoan nchexénen ch'án tí nkehe chonta", ichro ch'án. ² A ntá tí ch'ín lamó k'uíyéhe ch'án tí ch'ín ch'ehe ch'án xra ntáche ch'án kíxin: "¿Á chaxín xikaha ch'e kíxin xikaha ichro sín? A ntá jie tsjánjuan jaha kuentá tí xra kjuich'e kíxin ijie í sich'ehya xra tsétoan ntihi", ichro ch'án. ³ A ntá tí ch'ín t'etoan tónhen xra kjuenkayáxin ch'án kíxin: "¿Nkehe chrókjuit'a jie kíxin tí lamó la í tsjanjonhya ch'án xra sit'a? La ko janhan la chontahya fuérza sit'a xra nontee chojni la ko tósuàna kíxin chrók'uájia chrókjuañchák'a nkehe. ⁴ Ó nóna nkehe sit'a kíxin ntá tsochonta nkexro tsjanjon kjuachaxin tsjak'é ntoe sín tí í tsochontahya xra sit'a", ichro tí ch'ín t'etoan. ⁵ Ntá k'uíyéhe ch'án jnkojnkó jnkojnkó tí sín síkéhe tí lámoe ch'án. A ntá tí ch'ín sao kui ntá tí ch'ín t'etoan mé kjuanchankíhi ch'án kíxin: "¿Nkekjaín tjasikéhé lámoeáni?" ichro ch'án. ⁶ A ntá jehe ch'án kjuátehe ch'án ntáchro ch'án kíxin: "Síkáni ijnko ciento ntabarril aceite", ichro ch'án. A ntá tí ch'ín t'etoan ntáchro ch'án kíxin: "Ntihi tjen xroon tsjénkaxian a. Tjak'e nonte tjoka la ch'eña í jnko xroon la í cincuenta ó ténixián", ichro ch'án. ⁷ Ntá chr'éxin la kjuanchankíhi ch'án í jnko nkexro kíxin: "A ntá jaha, ¿nkekjaín tjasiká?" ichro ch'án. Ntá ntáchro ch'án kíxin: "Ijnko ciento medida noatrigó síkáni", ichro ch'án. A ntá ntáchro tí ch'ín t'etoan kíxin: "Tí xikaha la ntihi tjen tí xroon tsjénkaxian. A ntá jie la ch'eña ochenta ó", ichro ch'án. ⁸ A ntá tí ch'ín lamó kjuátsóan ch'án kíxin kjónté jehya xra jína kjuich'e tí ch'ín t'etoan kjuich'ehe ch'án xra la kjánchó tí kjuich'ia ch'án la qantsí nohe ch'án kjuich'ia ch'án. Méxra tí sín chjasintajni qantsí nohe sín ch'iyehé kichó sín, a ntá tí sin ixri tí t'inkaséyan la xikaha chrókjuenkayáxin sín chrókjuch'ia sín, chrókjuenkayáxin sín tí jína.

⁹ Janhan la tétuanhánrá kíxin chrókuicháñhanrá tí chichaon siín chjasintajni kjónté tjuáhya kíxin tsjínkitsará chojni kíxin ntá itsjórá sín jína. A ntá tió tsjeje kaín chichaon ntá jehe sín ts'ejóchónhen sín nkaya nkajní ts'áyáhará sín jnkochríxín.

¹⁰ Tí nkexro k'uáyakonhen tí nkehe chóntha kjónté tsjéhya la kjaxin chrókjuacha chrók'uáyakonhen itsjé nkehe chróchóntha. A ntá tí nkexro kjuachahya k'uáyakonhen tí nkehe tsjéhya chóntha la kjaxin chrókjuaacha chrók'uáyakonhen tí tsjé nkehe chróchóntha ch'án. ¹¹ Mé xikaha tí xitjahya t'ayakonhénrá tí chichaon kuénte chjasintajni ntiho la, ¿ntá nkexrí chrók'uayéhérá nkehe tjete chaxín kuénte nkaya nkajní? ¹² Mé xikaha tí kjuachahyará k'uáyakonhénrá tí chichaon kuénte ókjé nkexro, ¿ntá nkexro chrótjáhará jahará tí nkehe chaxín tjete chrók'uáyakonhénrá?

¹³ Nijnko nkexro xitjahya sich'ehe yaá lamó xra kíxin ijnko la tsónínkakonhen ch'án la ko tí í jnko tsotjuéhe ch'án, o ijnko la tsitekakonhen ch'án, la tí í jnko la tsitekakuenhya ch'án. Xitjahya chrókjuch'ehe chojni xra Dios tí tjinkaon sín tsochonta sín itsjé chichaon —ichro ch'án.

14 A ntá tí sín fariseo imá kóxrjínhín sín chichaon, ntá kuínhin sín kaín tíha nkerí ichro ch'ín Jesús, ntá kjuanoá sín ch'án. **15** Na ntá ch'ín Jesús ntáche ch'án sín kixin:

—A ntá jahará tjinkáonrá chrók'uejoxínrá jína nkayakon chojni. A ntá Dios la chóxin ch'án asánrá. A ntá tí nkehe imá tóxrjínhín ch'e chojni la Dios la tóxrjíenhya ch'án.

Tí ley la ko tí t'etoan Dios tí kjuachaxin kuénte ch'án

16 'Naxaq kjuakohya ch'ín Juan la k'uékjako sín tí ley kuénte ch'ín Moisés la ko tí nkehe k'uékjin tí sín k'uéchronka itén Dios óse. A ntá kui ch'ín Juan la chrónka ch'án tí tan jína nkexrí ts'etoan Dios tí kjuachaxin kuénte ch'án ntá kaín chojni imá tjinkaon sín chrókjuacha sín chrók'uejó sín tí tjen Dios t'etoan ch'án.

17 'Antsí xrähya chrók'uitjáyan tí nkehe siín nkajní la ko chjasintajni. A ntá xitjahya kixin chróxiteyáhya kjónté ijnko nkehe ntsí t'etoan tí ley.

Ch'ín Jesús tjako ch'án kixin chrókjuákehya kichó chojni

(Mt. 19.1-12; Mr. 10.1-12)

18 A ntá ijnko chojni tsjakehe ichjién la ntá tsakja ch'án í jnko chojni chjin la ijie tíha. A ntá tí ch'ín tsakja ijnko tjan tsíkítískehe la kjaxin ijie tíha.

Tí ch'ín rico la ko tí ch'ín Lázaro

19 'Ntá kjuák'e ijnko ch'án imá rico ch'án la ko k'uítsá ch'án ka imá tjete náxrjón kjátse tié la ko kaín yaon kjuasin ch'án kia. **20** A ntá ntója ntóe ch'án kjuák'etjaxin ijnko ch'ín nòa mé it'in ch'án Lázaro tjanchak'á ch'án la ko níhi ch'án tsíchr'enka kuenté ntóe ch'án.

21 A ntá tí ch'ín nòa la imá kjuak'e asén ch'án chrókjóne ch'án la ko chrókókjexín ch'án tí nkehe tot'q tsjixènjinkíxin mesa kuénte tí ch'ín rico. A ntá tí koniq la kjuamá va tí tosóa chóntha ch'án. **22** A ntá ijnko yaon mé ik'uén tí ch'ín nòa. A ntá tí sín ángel mé sákjuíko ch'án tí náxrjón tjen ch'ín Abraham. La ko kjaxin ik'uén tí ch'ín k'uéríko la sákjuíkjavá sín ch'án. **23** Ntá tjen ch'án tí sátsji tí sín tsík'en tjetjasóte ch'án. Ntá konta ch'án k'uíkon ch'án kixin ijkjín náxrjón tjen ch'ín Abraham tjeko ch'án tí ch'ín Lázaro. **24** Ntá k'uèya tí ch'ín k'uéchóntha tsjé nkehe ntáchro ch'án kixin: "It'éni Abraham, tikonóana téturentí tí ch'ín Lázaro kixin sinchekjataxín ch'án kóhe dedo tja ch'án intaq ntá tsi ch'án tsjak'etak'á ch'án nejen kixin tsroxruéhe kixin tjinahya sóa tí xrohi siín ntihi", ichro ch'án. **25** Kjánchó ntáchro ch'ín Abraham kixin: "Xjeenni, xráxinkávan kixin tió kjuák'e chjasintajni na ó k'uayéhé itsjé nkehe náxrjón. A ntá ch'ín Lázaro mé k'uayéhé ch'án nkehe náxrjónhy. A ntá jie ntihi kjuaxróxin tjen ch'án, a ntá jaha tjetjasótia méhe. **26** A ntá kjaxin jnkosiné tjen tsaka imá jié xitjahya ts'átöye tí sín siín ntihi tsjihya sín tí tjen jaha la ko kjaxin tí sín siín méhe xitjahya ts'átöye sín itsji sín ntihi", mé ichro ch'ín Abraham. **27** A ntá tí ch'ín k'uéríko mé ntáchro ch'án kixin: "Ntá xrjanóaha jaha It'éni Abraham kixin téturentí tí ch'ín Lázaro sátsji ch'án ntóe t'aná **28** kixin ntaha kuítuhe in'ó tí sín kíchiná, ntá chróchenka ch'án sín kixin chrókuihya sín ntihi chrókjuasótehya sín kixin imá náxrjónhy ntihi", mé ichro ch'án.

29 Kjánchó kjuátehe ch'ín Abraham ntáchro ch'án kixin: "Ó chóntha sín tí nkehe tsíkjin ch'ín Moisés la ko tí sín k'uéchronka itén Dios óse a. Chrókuinhin sín tí nkehe tsíntáchro tí sín a", ichro ch'án. **30** Ntá ntáchro tí ch'ín a ínaá kixin: "Náhí, It'éni Abraham. Chrókójina sáchrókjuitsjehe ijnko chojni tsík'en ntá chrókuitekaon sín chrókuítuhe sín ijie sín", ichro ch'án. **31** Ntá ntáchro ch'ín Abraham kixin: "Tí tsitekakonhyá sín tí nkehe tsíntáchro ch'ín Moisés la ko tí nkehe tsíntáchro tí í so sín tsíchronka itén Dios óse, ntá kjaxin tsitekakonhyá sín kjónté chróxechón ijnko chojni tsík'en chrókjuichronka ínaá", ichro ch'án.

Tí kjuaxikaon naxaq tjasin chojni jie

(Mt. 18.6-7, 21-22; Mr. 9.42)

¹ Ch'ín Jesús ntáche ch'án tí sín k'uájiko ch'án kixin:

—Xráxín siín nkehe tsjasixín chojni jie. Kjánchó nòa tí nkexro tjasin tí nkehe tsjasixín chojni jie. ² Íchá jína chrókjuincheteyá sín ch'án ijnko xro tsík'óna xrochre chrókjuikákánki sín ntayaon kíxin tjasin ch'án tí nkehe tjasixín jie ijnko chánjan naxa noehya. ³ Tóxakonhanrá kíxin xikahya chrókjuásinrá nkehe.

'A ntá tí kíchuárá chrókjuasinhánrá ch'án ichréni jie chrónixjehérá ch'án chróchenkará ch'án kíxin jehya jína tí xikaha kjuít'ahará ch'án. A ntá tí chrókuitekaon ch'án chrókuitoxínchin ch'án tí tjenkayáxin ch'án, ntá chrók'uitjáyanhanrá tí nkehe kjuít'ahará ch'án. ⁴ Kjónté chrókjuasinhánrá ch'án jie yato veces jnkokoá yaon la ko yato veces chróntáchro ch'án kíxin í xikahya tsjasin ch'án jie ínaá, la t'ichjánxín ts'itjáyanhanrá tí nkehe kjuít'ahará ch'án tí xikaha ntáchro ch'án.

Tí kjuachaxin chóntani kíxin tinkáchónkini Cristo

⁵ Ijnko yaon tí sín k'uájiko Inchéni ntáche sín ch'án kíxin:

—Tjinkitsani kíxin antsí chrókuinkáchónkini tí jaha —ichro sín.

⁶ A ntá Inchéni ntáchro ch'án kíxin:

—Kjónté intsí chrókuinkachónkirá tí janhan éxi jiéxin ijnko tje ntsí kuente nta mostaza la jína chrókuétuenhénrá tí nta sicómoro kíxin chrók'uaxrjenkíxín tí tjen ntihi sáchrókjui chróxenkaxín jnkosiné ntayaon ntiha, a ntá tí nta la chrókjuinchexiteyá tí xikaha chróntáchrora.

Nkexrí chrókjuinchexiteyá tí nkexro ch'e xra

⁷ Jnkoyín tí jahará tí chróchontará ijnko nkexro t'ahará xra, a ntá tí chrókjánxín ch'án nontaqará kjuinchentá ch'án nche q k'uáyakonhen ch'án tí ko kuéntará, ¿á chróntácherá ch'án kíxin senó chrókjuak'e ch'án chrókjóne ch'án? ⁸ Kjá náhí. Kjá chrókuétuenhénrá ch'án kíxin senó chrókjuinchechján ch'án tí nkehe sinte la ko chrókoyaxínchin ch'án kíxin tsjanjon ch'án nkehe nachrohe chrókjonte la ko chrók'ua. A ntá tsjixin sinte la ntá tsjak'e ch'án sine ch'án la ko its'i ch'án. ⁹ ¿Á chrókjuanchehérá ch'án kjuasáya kíxin kjuinchexiteyá ch'án tí nkehe kuétuenhénrá ch'án? Kjá náhí. ¹⁰ Mé kjaxin xikaha tí jahará tió chrókjuixin kaín tí xra k'uëtuñhanrá Dios chróntáchrohyará kíxin jína kjuich'erá xra kíxin ó jehó tí nkehe k'uítuanhanrá kjuinchexiteyará, tsixrorá.

Ch'ín Jesús kjuínchekitóhe ch'án jína ite chojni chóntha chinlepra

¹¹ Ntá sátsji ch'ín Jesús chjasin Jerusalén ntá k'uátsínka ch'án nò estado Samaria la ko estado Galilea. ¹² Ntá kjuíji ch'án ijnko chjasin ntsí ntá xeta ch'án ite chojni ntoa níhi chóntha sín chinlepra. Kjánchó ikjín tjejóchónhen sín ¹³ ntá itsen k'uíyehé sín ch'án ntáchro sín kíxin:

—Jesús, Maestro, tikonóehéni kaín ni —ichro sín.

¹⁴ Ntá k'uíkon ch'ín Jesús tí jehe sín ikjín tjejó sín ntáche ch'án sín kíxin:

—Sátsjirá tjákokhéra tí sín nchat'á kíxin ó kuítóhará jína, ichrorá.

Nachrohe sákjuí sín tinkákitóhe sín jína. ¹⁵ Ntá ijnko tí jehe sín tió konohe ch'án kíxin kuítóhe ch'án jína ntá kjan ch'án chjéhe ch'án kjuasáya Dios la itsen nixja ch'án.

¹⁶ Kjuák'exín toch'ín ch'án chrínkí toté ch'ín Jesús k'uísén ch'án xrákjanyani ch'án nonte kíxin kjuanchia ch'án kjuasáya. A ntá tí ch'ín a mé tsíkjixín ch'án estado Samaria. ¹⁷ A ntá ch'ín Jesús ntáchro ch'án kíxin:

—¿Xá jehya ite chojni kuítóhe jína? ¿Xá kjá tí sín ina? ¹⁸ ¿Á jehó tí ch'ín i kjónté ikjín tsíkjixín ch'án ikjan ch'án kjuanchehe ch'án kjuasáyé Dios ní? —ichro ch'án.

¹⁹ A ntá ntáche ch'án tí ch'ín a kíxin:

—T'ínkajten sájtia. Kíxin tí kuítékan Dios la kuítóha jína —ichro ch'án.

Itsi tí kjuachaxién Dios (Mt. 24.23-28, 36-41)

20 A ntá tí sín fariseo kjuanchankíhi sín tí ch'ín Jesúś kíxin nkesá tsi tí kjuachaxin kuènte Dios. A ntá jehe ch'án kjuátehe ch'án ntáchro ch'án kíxin:

—A ntá tí tsi kjuachaxin kuènte Dios la me tíha ijkno nkehe xitjahya ts'ikon chojni.

21 Xitjahya tsontáchrórá kíxin: “Ntihi tjen,” o “Ntiha tjen”; kíxin tí kjuachaxin kuènte Dios itjen jnk̄osiné tí tjejorá —ichro ch'án.

22 Ntá ntáche ch'án tí sín k'uájiko ch'án kíxin:

—A ntá itsi tí yaon tsotjinkáonrá jnk̄ojín yaon chrók'uikonrá tí Xjeen Dios K'óna Chojni, ntá íts'ikonhyará ch'án. **23** Tsontáchrō sín kíxin ntihi tjen ch'án, o ntiha tjen ch'án. Kjánchó sáchrókjuihyará la ko chróchréhyará sín. **24** Kíxin éxi ts'ikonrá tsj̄onkíxín ts'inkaséyanxín kuenté nkajní mé xikaha tsónhen tió itsi tí Xjeen Dios K'óna Chojni. **25** T'ichjánxín senó tsjasóte ch'án nchónhya la ko tí sín siín jie tsitekakuenhya sín ch'án. **26** Éxi kónhen tí yaon kjuák'e ch'ín Noé mé xikaha tsónhen tió tsokjan tí Xjeen Dios K'óna Chojni. **27** K'uékjine sín la ko k'uék'i sín la ko kótehe tí xjeen sín. A ntá xrínahya kui tí yaon k'uíxenhen ch'ín Noé tí ntabárco ntá k'uániá chrin, a ntá tí sín kuítuhe ntója la kaín sín k'uitjáyan sín.* **28** Mé kj̄axin xikaha kónhen tí kjuák'e ch'ín Lot k'uékjine sín la ko k'uék'i sín la ko k'uék'ena sín nkehe la ko k'uékjincheckjí sín nkehe la ko k'uék'enka sín nontee sín la ko k'uékjich'ena sín nchia. **29** A ntá tí yaon k'uaxrjexín ch'ín Lot tí chjasin Sodoma, na mé nkajní kuixín xrohi la ko azufre, na mé tíha k'uenxín kaín xín tí sín ntiha.† **30** Mé xikaha tsónhen tí yaon itsi tí Xjeen Dios K'óna Chojni.

31 'A ntá tí yaon i tí tjejó jnk̄ojín nkexro chrítaón nchia tjejót'ok'éhe sín, a ntá ichréne nkehe chóntha sín kuítuhe sín nkaxenhen nchia la í chrók'uinkajinhya sín chrókuakitsje sín tí nkehe chóntha sín, tjoka sáchrókjui sín ókjé. Kj̄axin xikaha jnk̄ojin chojni tjejó sín nontee sín la í chrókjanhya sín ntœ sín. **32** Xráxinkáonrá nkehe kónhen ichjién ch'ín Lot.‡ **33** Tí nkexro tjinkaon kíxin kohya nkehe chrókónhen na mé ts'itjáyan. A ntá tí nkexro chrókjuincheck'itjáyanxín əsén kíxin chróchronka itén Dios la mé tsaá. **34** A ntá tsontáxrjan kíxin tí tie a jnk̄okoá ts'ejójua yaá chojni la ijkno la sátsjí la ko tí i jnk̄o la tsitohe. **35** Yaá chojni chjin its'o sín jnk̄okoá, la ijkno la sátsjí la ko ijkno la tsitohe. **36** Yaá chojni ts'ejóch'e sín xr̄a nonte, la ijkno la sátsjí a ntá ijkno la tsitohe —ichro ch'án.

37 Ntá kuínhin sín tíha ntá kjuanchankíhi sín ch'án kíxin:

—¿Xá nketí tsónhen tíha, Ìnchéni? —ichro sín.

A ntá jehe ch'án kjuátehe ch'án ntáchro ch'án kíxin:

—Tí tjen tí cuerpo kuènte chojni tsík'en la mé ntiha tsojnkotsé tí kontexjuen —ichro ch'án.

18

Ch'ín Jesúś kjuíncheyóexin ch'án éxi ijkno tjan k'án la ko ijkno ch'ín juez

1 A ntá ch'ín Jesúś kjuíncheyóexin ch'án kjuákoxín ch'án kíxin jnkochríxín chrónixjehé chojni Dios la ko chrókóxrjéhya sín. **2** Ntá ntáche ch'án sín kíxin:

—Ijkno chjasin kjuák'e ijkno ch'ín juez kjuikosáyehya ch'án Dios la ko k'uéchónthehya ch'án kjuasáyé ninkexró. **3** Kj̄axin chjasin ntiha kjuák'e ijkno tjan k'án, jnkoyaxón sákjuítsjehé tjan tí ch'ín juez kjuanchia tjan jie ntáchro tjan kíxin chrókuitqexín kíxin ijkno chojni nínkakonhen tjan ntiha. **4** Nchónhya veces tjsjehé tjan tí ch'ín juez la chrohya ch'án chrókjuincheckitqexín ch'án. Ntá chr'éxín kjuenkayáxín ch'án ntáchro ch'án kíxin: “Kjónté í tsjíkosáyàhya Dios la ko ninkexró tsjíkosáyàhya” **5** a ntá tí tjan k'án jnkoyaxón tjan jie, la tsjínk̄itsa tjan tsitqexín tí jie tjan kíxin í jnkoyaxónhya itsi tjan tsochronòa tjan kíxin ó kjuixin kónínk̄avan jie”, ichro ch'án.

6 Ntá ntáchro Ìnchéni kíxin:

* **17:27** 17.26–27 Génesis 6.5–7.24 † **17:29** 17.28–29 Génesis 18.20–19.25 ‡ **17:32** Génesis 19.26

—Mé xíkaha ichro tí ch'ín juez jínahya. ⁷ ¿Xá chrókuinkitsahya Dios tí sín kjueyá ch'án tí chróchronóehé sín ch'án nchakotjin la ko tie? ¿Á tjokahya chrókuuatehé chrókuinkitsa sín ch'án? ⁸ Ntáxrjan kíxin kjá tjoka chrókuinkitsa sín ch'án. A ntá tió itsi tí Xjeen Dios K'óna Chojni, ¿á naxa chrók'uitja ch'án chojni tinkáchónki tí jehe ch'án ntihi chjasintajni? —mé chro ch'án.

Ch'ín Jesús kjuíncheyóexin ch'án éxí ijkno ch'ín fariseo la ko ijkno ch'ín nchekjènki

⁹ Ntá ch'ín Jesús kjuíncheyóexin ch'án nixjehé ch'án iso chojni tjenkayáxin sín kíxin imá jína sín a ntá tí í so sín la náhí, ichro sín. Ntá ntáchro ch'án kíxin:

¹⁰ —Iyó sín ntoa sákjui nkaxenhen níjko kíxin tsonixjehé sín Dios. Ijkno la fariseo la ko ijkno la ch'ín nchekjènki. ¹¹ A ntá tí ch'ín fariseo tjexín ch'án toté ch'án nixjehé ch'án Dios ntáchro ch'án kíxin: “It'eni Dios, kjuasáya tjahá kíxin jeheni la chontahyani jié éxí tí sín í so kíxin teé sín la ko ch'iyehé kichó sín la ko ch'iyehé sín chojni chjin. Kjaxin jeheni la jehya éxí tí ch'ín nchekjènki tjinhin. ¹² Jeheni la nehyani iyó yaon jinkojnko semana la ko kjaxin tjanjonni tí chichaon tjachani tí diezmo kuénta”, ichro ch'án. ¹³ A ntá tí ch'ín nchekjènki la imá kjín kuítóhe ch'án kóxakonhen ch'án chrókonta ch'án nkajní la mé chjéhe ch'án ntakuin ch'án ntáchro ch'án kíxin: “It'eni Dios tikonóehéni tí jeheni kíxin nchónhya jié chontani”, ichro ch'án. ¹⁴ Tjonkará kíxin tí ch'ín nchekjènki tió kjan ch'án ntóe ch'án la Dios kuikónóehé tí jehe ch'án la kjuilinhin ch'án tí jié chonta ch'án, a ntá tí ch'ín fariseo la náhí. Kíxin kaín chojni nccheinkehe əsén kíxin imá jína tí jehe sín la mé imá tsontsí. A ntá tí chojni nccheinkehyá əsén la imá ts'ánki tí kjuaxrexinkaon kuénte sín.

Ch'ín Jesús kjuíncheyaon ch'án chánjan

(Mt. 19.13-15; Mr. 10.13-16)

¹⁵ Kjaxin kjuikao sín chánjan ntsíntsí tí tjen ch'ín Jesús kíxin chrókuincheyaon ch'án xjan. Kjánchó tió k'uíkon tí sín k'uájiko ch'án la í kjuanjonhya sín kjuachaxin kíxin tsqchjinako sín xjan. ¹⁶ A ntá ch'ín Jesús k'uíyehé ch'án sín ntáchro ch'án kíxin:

—Títohérá chánjan méhē xrakoa tí tjén janhan la t'ínkakuénhýará xjan kíxin tí sín kuénte kjuachaxin kuénte Dios la mé tóyóhe tí jehe xjan. ¹⁷ Ntá chaxín ntáxrjan kíxin tí nkexro ts'ónahya éxí ijkno chánjan xitjahya ts'ejo sín tí ts'etoan Dios tí kjuachaxin kuénte ch'án.

Ijkno ch'ín ntasoá ríco kjuínixjehé ch'án tí ch'ín Jesús

(Mt. 19.16-30; Mr. 10.17-31)

¹⁸ Ijkno ch'ín t'etoan kuénte níjko kjuanchankíhi ch'án tí ch'ín Jesús kíxin:

—Jaha la ijkno maestro jína la, ənkehe naxa t'itjáyan chrókuich'eni kíxin chróchontani kjuachón jnkochríxín? —ichro ch'án.

¹⁹ Ntá kjuátēhe ch'ín Jesús ntáchro ch'án kíxin:

—¿Nkekuénte ntáchrúa kíxin jína tí janhan? Jnkokoá nkexro la mé jína la tíha mé Dios. ²⁰ Jaha la ó noha nkehe tí k'uetoan Dios kíxin chrókuacheéhya kíchuará, la ko chrók'oyánya chojni, la ko chrókuéehya, la ko chróntáchrohya ninkehó nkehe chaxínhyá kuénte ókjé chojni, la ko chrókuíkosáyehé it'a la ko iná —ichro ch'án.

²¹ A ntá jehe ch'án kjuátēhe ch'án ntáchro ch'án kíxin:

—Kaín tíha kjuínchexiteyáni desde xjanntsíni —ichro ch'án.

²² A ntá kuínhin ch'ín Jesús kaín tíha ntá jehe ch'án ntáchro ch'án kíxin:

—A ntá jnkokoá nkehe naxa t'itjáyan chrókuich'e, chrókuinchekjia kaín nkehe chonta la chróchjhéhí tí chichaon tí sín nòa. A ntá tí nkehe tjete la tsochonta nkaya nkajní. A ntá tió tsjixin sinchekitonhén sín nkehe, a ntá tsjihá ntá chréhé tí janhan —ichro ch'án.

²³ A ntá tí ch'ín a kuínhin ch'án xíkaha la kóxakonhen ch'án kíxin imá itsjé nkehe chonta ch'án. ²⁴ Tió k'uíkon ch'ín Jesús kíxin kóxakonhen tí ch'ín a la ntá ntáchro ch'án kíxin:

—Imá xra kíxin tí chojni chonta itsjé nkehe chrók'uixenhen sín tí tjen Dios t'etoan.

²⁵ Aantsí xrahya chrók'uatsínska ijkno kocamello ijkno tjar'i ntachica tixerja, a ntá aantsí má xra kíxin chojni chonta itsjé nkehe chrókuak'e tí t'etoan Dios —ichro ch'án.

²⁶ A ntá kuínhin sín kíxin xíkaha ntáchro ch'án ntá ntáchro sín kíxin:
—¿Xá nkexro chrókuacha chrókuua? —ichro sín.

²⁷ Ntá ntáchro ch'ín Jesús kíxin:
—Tí nkehe tsjachahya chojni chrókuinchexiteyá, la Dios la tsjacha ch'án sich'e ch'án kaín tíha —ichro ch'án.

²⁸ A ntá ch'ín Pedro ntáchro ch'án kíxin:

—Inchéni, jeheni la ó kuítóheni kaín nkehe chóntani kíxin tsochréheni tí jaha —ichro ch'án.

²⁹ Ntá kjuátēhe ch'ín Jesús ntáchro ch'án kíxin:

—Ntá chaxín tsotjonkará kíxin jnkójínrá chrókuítóhérá ntoa, la q chrókuítóhérá it'á la ko iná, la q chrókuítóhérá kíchuárá, la q chrókuítóhérá ichjiánrá, la q chrókuítóhérá xjānrá kíxin chrókuich'erá xra kuénte Dios ³⁰ la qantsí nkehe ts'ayéhérá ntihi chjasintajni la ko tí chr'éxín la ts'ayéhérá kjuachón jnkochríxín —ichro ch'án.

Ch'ín Jesús chrónka ch'án ínaá kíxin its'en ch'án

(Mt. 20.17-19; Mr. 10.32-34)

³¹ Ntá ch'ín Jesús k'uíyéhe ch'án jehó tí teyó sín k'uájiko ch'án ntá chrónka ch'án kíxin:

—Ijie sátsjini Jerusalén. A ntá ntaha tsoxiteyá kaín tí nkehe tsíkjín tí sín tsíchronka itén Dios ósé nkexrí tsónhen tí Xjeen Dios K'óna Chojni. ³² Tsjikaán sín ch'án tí tjejó tí sín jehya judío la ko tsjanoá sín ch'án la ko ts'ántaxíñin sín ch'án la ko ntate sín tsíkite sín ch'án.

³³ Tsjate sín ch'án, a ntá chr'éxín la ts'óyán sín ch'án. A ntá níxín yaon tsozechón ch'án —ichro ch'án.

³⁴ A ntá jehe sín la ninkehó kienxínya sín tí nkehe nixja ch'án kíxin tíha ijkno nkehe naxa tsjachahya sín chrókienxín sín.

Ch'ín Jesús kjuínchekitohe ch'án jína ijkno chojni t'ikonhya chjasin Jericó

(Mt. 20.29-34; Mr. 10.46-52)

³⁵ A ntá ch'ín Jesús tió chjina chrók'uixenhen ch'án chjasin Jericó ntá ntiha chrínta ntja tjetjaxín ijkno ch'ín t'ikonhya tjanchak'á ch'án. ³⁶ Ntá xrínahya kuínhin tí ch'ín t'ikonhya kíxin sít'atsínska nchónhya chojni, ntá kjuanchankí ch'án kíxin:

—¿Xa nkerí sítónen? —ichro ch'án.

³⁷ Ntá chénka sín ch'án kíxin ch'ín Jesús tsíkjixín chjasin Nazaret ts'atsínska ch'án ntiha.

³⁸ Ntá k'uèya ch'án ntáchro ch'án kíxin:

—Jaha Jesús tsík'axrjeníxian ch'ín David, tikonóehéni —ichro ch'án.

³⁹ A ntá tí sín tsítaón ntja la k'uëtuénenhen sín ch'án kíxin tsotání ch'án. Kjánchó jehe ch'án qantsí tsen k'uèya ch'án ntáchro ch'án kíxin:

—Jaha tsík'axrjeníxian ch'ín David, tikonóehéni —ichro ch'án.

⁴⁰ A ntá ch'ín Jesús ntá ntahó kjuák'echónhen ch'án ntá k'uëtoan ch'án kíxin tsjikakjín sín tí ch'ín a. Ntá tió kuíkao sín ch'án tí chjinaxón tjen ch'ín Jesús ntá kjuanchankí ch'ín Jesús kíxin:

⁴¹ —¿Nkehe tjinkávan sít'aha? —ichro ch'án.

Ntá kjuátēhe tí ch'ín t'ikonhya ntáchro ch'án kíxin:

—Jaha Inchéni, tjinkaonni chrókuinchek'ikuanni —ichro ch'án.

⁴² Ntá ntáchro ch'ín Jesús kíxin:

—Ó ts'ikuan. Ó kuítóha jína kíxin kuítékanan tí janhan —ichro ch'án.

⁴³ Ntá tuénxín k'uíkon tí ch'ín k'uék'ikonhya, a ntá jehe ch'án chréhe ch'án tí ch'ín Jesús la ko kjuanchehe ch'án kjuasáyé Dios. La ko kaín tí sín k'uíkon kíxin xíkaha kónhen kjuanchehe sín kjuasáyé Dios.

¹ A ntá ch'ín Jesús k'uíxenhen ch'án chjasin Jericó la ntá k'uátsínka ch'án tí chjasin a.

² A ntá ntiha tjen ijnko chojni ríco it'in ch'án Zaquoel, t'etuenhen ch'án tí sín nchekjènki.

³ Tjinkaon ch'án chrókuatsqan ch'án nkexro tí ch'ín Jesús, kjánchó nchónhya chojni siín la xitjahya t'ikon ch'án kíxin intsí ch'án. ⁴ Ntá kuinká ch'án kuítáón ch'án ntja kíxin tjinkaon ch'án chrók'uikon ch'án. Ntá kuátsé ch'án ijnko nta sicómoro chjinaxón tí ts'atsínka ch'ín Jesús. ⁵ A ntá tió k'uatsínka ch'ín Jesús ntiha konta ch'án tí nta ntáchro ch'án kíxin:

—Zaquoel, tjoka tjasinkajián kíxin ntøa ntahó tsitona jie —ichro ch'án.

⁶ Ntá ch'ín Zaquoel la tjoka k'uínkajin ch'án kóchéhé ch'án. ⁷ Ntá kaín sín k'uíkon sín xíkaha ntá kjuankíxin sín tjonta sín tí ch'ín Jesús, ntáchro sín kíxin ntøe ijnko chojni chóntha nchónhya jie tsitohe ch'án. ⁸ Ntá ch'ín Zaquoel kjuák'exín toté ch'án ntáche ch'án Inchéni kíxin:

—Jaha Inchéni, chrókónoha kíxin tsjánjuan jnkosiné tí nkehe chonta sintakitonhan tí sín nòa. A ntá tí jnkojín nkexro kjuít'ayahá kuaáha la noó veces ts'okjanhan sín tí chichaon jie —ichro ch'án.

⁹ A ntá ntáchro ch'ín Jesús kíxin:

—A ntá jie la tsaá chojni tí nchia i kíxin tí ch'ín a mé k'uaxrjeníx ch'ín Abraham. ¹⁰ A ntá tí Xjeen Dios K'óna Chojni mé kuikjeyá la ko sinchekaá tí chojni chóntha jie.

Ch'ín Jesús kjuíncheyóexin ch'án éxí ite chichaon imá tjete sínkí

¹¹ A ntá tí chojni siín ntiha nachrohe tjejótinhin sín nkerí tjechro ch'ín Jesús, a ntá jehe ch'án kjuíncheyóexin ch'án nkehe kíxin ó tjen ch'án chjinaxón chjasin Jerusalén, a ntá jehe sín kjuenkayáxin sín kíxin tí kjuachaxin kuénte Dios la ách'e ó tuénxín tsi, ichro sín.

¹² A ntá ntáchro ch'án kíxin:

—Itjen ijnko nkexro tsík'axrjeníx ijnko nkexro imá k'uék'etqan. Ntá sákjuí ch'án ókjé nación kíxin ts'áyéhé ch'án kjuachaxin ts'óna ch'án rey, a ntá chr'éxín la xíkjan ch'án ínaá.

¹³ A ntá tió chjina sátsji ch'án ntá k'uíyéhé ch'án ite tí sín ch'ehe ch'án xrä ntá chjéhe ch'án jnkojko tí jehe sín jnkojko chichaon imá tjete sínkí. Ntá k'uetoan ch'án kíxin: “Tsjankíxirá ch'ekoará xrä tí chichaon hasta tí tsokjanjian”, ichro ch'án. ¹⁴ A ntá tí sín chjasén ch'án ntiha imá kóninkakonhen sín ch'án, ntá ichr'án sín iso chojni chréhé sín tí sákjuí ch'án tsochenka sín tí sín siín ntiha kíxin tjinkakonhya sín tí nkexro a ts'óna rey ts'etuenhen sín. ¹⁵ Kjónté xíkaha ichro tí sín a la k'uáyéhé ch'án kjuachaxin ts'óna ch'án rey. Ntá kjan ch'án chjasén ch'án. Ntá k'uetoan ch'án xrakoa tí sín ch'ehe ch'án xrä, na mé tí sín tsík'áyéhé tí chichaon, kíxin tsongohe ch'án nkehe tí xrä kjuich'eko sín tí chichaon k'uáyéhé sín. ¹⁶ A ntá tí ch'ín xrankíxín kóchjina la ntáchro ch'án kíxin: “Tí chichakoan la kjuachani ite chichaon ínaá”, ichro ch'án. ¹⁷ A ntá kjuátuhe tí ch'ín rey kíxin: “Ó nchoxon tí xíkaha jaha la ijnko chojni jína ch'e xrä. Jína kjuich'e xrä kjónté jehya xrä jie ntá tsjánjuan kjuachaxin tsétqan ite chjasin”, ichro ch'án. ¹⁸ A ntá kóchjina tí ch'ín ijkno a ínaá ntáchro ch'án kíxin: “Tí chichakoan la kjuachani in'ó chichaon ínaá”, ichro ch'án. ¹⁹ A ntá xíkaha ínaá kjuátuhe tí ch'ín rey kíxin: “Tsjánjuan kjuachaxin tsétqan in'ó chjasin”, ichro ch'án. ²⁰ A ntá kóchjina tí ch'ín níxín ntáchro ch'án kíxin: “Tí chichakoan la tjinhin. K'uánkíntani panítqeni ²¹ kíxin chrakonhanni kíxin jaha la jiha la tjinkávan tsákjá tí nkehe jehya jaha kjuaké la ko tsotja tí nkehe jehya jaha kuénekaxian”, ichro ch'án. ²² A ntá tí rey ntáchro ch'án kíxin: “Jehya chojni jína ch'e xrä jaha. Tí nkehe ntáchrúa tsjáncháxian jie. Jaha la ó noha kíxin jiéna janhan tsákjaá tí nkehe kjuakéhya, ichrua, la ko tsotja tí nkehe kuénekahya. ²³ ¿Ntá nkekuénte kíxin chr'anhyá tí chichaon ijnko banco chrókuich'exín xrä? A ntá tió kjan ntøa la qantsí tsjé chichaon chrók'uayáhá tí chrókuacha kíchó chica”, ichro ch'án. ²⁴ A ntá ntáche ch'án tí sín siín ntiha kíxin: “Takítsjehérá ch'án tí chichaon tsík'áyéhé ch'án la ntá chjehérá tí ch'ín chóntha ite chichaon”, ichro ch'án. ²⁵ A ntá jehe sín ntáchro sín kíxin: “¿Nkekuénte chrók'uayéhé ch'án kíxin ó chóntha ch'án ite chichaon?” ichro sín. ²⁶ A ntá tí ch'ín rey kjuátuhe ch'án ntáchro ch'án kíxin: “Kjónté jnkojín nkexro itsjé

chóntha la ts'áyéhé má. A ntá tí nkexro chóntahya la kjóngté tí ntsí chóntha ch'án la ts'axrjehe ch'án. ²⁷ A ntá tí sín nínkakonna sín tjinkakonhya sín kíxín ts'ónana rey la xrákoará sín ntihi ts'íkonxín kuqan ts'ochrínjinrá kja sín."

Ch'ín Jesú斯 k'uíxenhen ch'án chjasin Jerusalén

(Mt. 21.1-11; Mr. 11.1-11; Jn. 12.12-19)

²⁸ Tió kjuixin ntáchro ch'ín Jesú斯 tíhi ntá chrìin ch'án sátsji ch'án chjasin Jerusalén. ²⁹ A ntá ó kjuíji chjinaxón tí chjasin Bettagé la ko chjasin Betania chjinaxón tí jnä nchek'in sín Olivo, ntá k'ueteuenhen ch'án iyó tí sín k'uájiko ch'án ³⁰ ntáche ch'án sín kíxín:

—Sátjirá tí chjasin ntsí chok'èxin ntihi, a ntá tió tsjasánrá ntiha ts'itjará ijkno kolocho tjechroé va naxä ninkexró tjiták'áhya va. Tjasintankéhérá va la tsjíkuará va ntihi. ³¹ A ntá tí jnkojín nkexro tsjanchankíhará nkekuénte tjasintankéhérá va la ntácherá sín kíxín: “Inchéni ts'ichjánxínhin va”, tsixrorá.

³² A ntá tí sín k'uítuenhen sákjuí sín k'uitja sín éxi ntáchro ch'án. ³³ A ntá tió tjejótjasintankéhe sín va la ntá tí sín inché va kjuanchankíhi sín kíxín:

—¿Nkekuénte tjasintankéhérá tí kolócho? —ichro sín.

³⁴ A ntá jehe sín kjuátehe sín kíxín:

—Inchéni ts'ichjánxínhin va —ichro sín.

³⁵ Ntá sákjuíkohe sín va tí ch'ín Jesú斯, la ntá tí iké sín kjuínchekamá sín va, ntá kjuíták'á ch'ín Jesú斯 tí kolócho a. ³⁶ A ntá tinkákji tí kolócho tjecken ch'án la tinkák'ikjínxin sín tí iké sín ntja kíxín nátaón tí ka ts'atsínska tí kolócho tjecken ch'án. ³⁷ Ntá tió kjuíjichjina sín tí chjinaxón tí t'inkajinxin chojni tí jnä Olivo, a ntá kaín tí sín kuítekaon tí jehe ch'án chréhé sín kjuankíxín sín itsen nixja sín chéhé sín kjuanchehe sín kjuasáyé Dios kíxín kaín tí kjuaxroan k'uíkonxín kon sín. ³⁸ Ntá ntáchro sín kíxín:

—Jína tí nkexro Rey kjuixin kjuachaxin ihnié Dios. Tsjak'e kjuaxróxin nkaya nkajní la ko kjuasáyé Dios tjen nkaya nkajní —ichro sín.

³⁹ A ntá iso tí sín fariseo tjejóyákjan sín í so chojni tjejónchexoan sín ntiha ntáchro sín kíxín:

—Maestro, tétuéñhén tí sín chréhé tí jaha kíxín tsotání sín —ichro sín.

⁴⁰ A ntá ch'ín Jesú斯 kjuátehe ch'án ntáche ch'án sín kíxín:

—A ntá tí sín i tsotání sín la ixro tsotsje —ichro ch'án.

⁴¹ A ntá tió kjuíjichjina ch'án chjasin Jerusalén ntá k'uíkon ch'án tí chjasin la ntá tsjánka ch'án kíxín kuítekakonhya sín ⁴² ntáchro ch'án kíxín:

—Chrókuiéñxinrá la ko chrókónohará nkexrí chrók'uayéxinrá tí kjuaxróxin, kjánchó jahará kuítekákonhyará. A ntá ó kjuixin k'uátsínska tí kjuaxróxin chrók'uikonrá la xitjahya ts'ikonrá jie. ⁴³ A ntá tsi iso yaon jínahya itsi tí sín nínkakonhanrá la sich'eña sín ijkno tjał'o ts'ántatjen tí chjasin tjejorá ntihi ts'inkákonhen kíxín xitjahya ts'axrjéxínrá chjasin ntihi kíxín nkuíxín ts'ejó sín ts'inkákonhanrá sín ⁴⁴ ntá ts'óxíka sín kaín tí tjał'o siín ntihi la ko ts'óyán sín kaín tí chojni siín la ko tsítøehya sín kíxín ninkehó xro naxä ts'ejókjen kíchó, kíxín jahará kjuátsøanhýará kíxín kuitsjehe Dios tí chjasin tjejorá ntihi.

Ch'ín Jesú斯 kjuínchetjóá ch'án nkaxenhen ninko

(Mt. 21.12-17; Mr. 11.15-19; Jn. 2.13-22)

⁴⁵ A ntá ch'ín Jesú斯 k'uíxenhen ch'án tí ninko jie, a ntá kjuankíxín ch'án kuakitsje ch'án tí sín nchekji nkehe la ko tí sín t'ëna nkehe ntihi. ⁴⁶ Ntá ntáchro ch'án kíxín:

—A ntá ntáchro xroon itén Dios chrónka kíxín: “Tí ntøna i mé it'in nchia tsonixjanaxián chojni”, * ichro. A ntá jahará tí nchia i tsíkjich'énará itjuéé xíchée —ichro ch'án.

⁴⁷ A ntá tí ninko ntiha kjuák'e ch'ín Jesú斯 kjuako ch'án kaín yaon. A ntá tí sín nchåt'á t'ëtoan la ko tí maestro tjakó tí ley la ko kjaxin tí sín t'ëtoan tí chjasin ntiha kjueyá sín

* 19:46 Isaías 56.7

nkexrí chrók'óyán sín ch'án. ⁴⁸ Kjánchó k'uitjahya sín nkexrí chrók'óyán sín ch'án kíxin kaín chojni tjejótinhin tí nkehe tjechronka ch'án.

20

Tí kjuachaxin chóntha ch'ín Jesús

(Mt. 21.23-27; Mr. 11.27-33)

¹ A ntá ijnko yaon kjuák'e ch'ín Jesús tí njinko ntiha kjuakohé ch'án chojni tí tan jína tsaáxin sín. A ntá kjui tí sín nchatl'a t'etoan la ko tí sín maestro tjako tí ley la ko kjaxin tí sín t'etoan kuénte njinko. ² Ntá kjuanchankíhi sín ch'án kíxin:

—Chronka nkehe tí kjuachaxin chonta kíxin xikaha ch'e. ¿Nkexro kjuanjon tí kjuachaxin a? —ichro sín.

³ Ntá kjuátēhe ch'ín Jesús ntáchro ch'án kíxin:

—Kjaxin janhan tsjánchánkíhará ijnko nkehe siná nkexrí tsjateherá. ⁴ ¿A ntá nkexro k'uëtuënen tí ch'ín Juan kíxin tsikite ch'án chojni? ¿Á Dios ní o chojni ó? —ichro ch'án.

⁵ Ntá kjuankíxiñ sín tjo sín kíchó sín ntáchro sín kíxin:

—¿Nkehe chrókjuatéheni? A ntá tí tsontáchroni kíxin Dios tsíchr'án tí ch'ín Juan la ntá tsjanchankí ch'án kíxin nkekuénte kuítekakuenhyani ch'án. ⁶ A ntá tí tsontáchroni kíxin chojni ó k'uëtuënen sín ch'án la ntá kaín chojni tsonínkaon sín la ixro ts'óyánxinni sín kíxin tjenkayáxin sín kíxin ch'ín Juan chaxín k'uékjako ch'án itén Dios —mé xikaha ikjo sín.

⁷ Ntá kjuátēhe sín kíxin noehya sín nkexro tsíchr'án tí ch'ín Juan. ⁸ Ntá ntáchro ch'ín Jesús kíxin:

—Kjaxin janhan tsorjankahya nkexro kjuanjon kjuachaxin tjét'a tíhi —ichro ch'án.

Ch'ín Jesús kjuíncheyóexin ch'án éxi tí sín ch'ehya xra jína

(Mt. 21.33-44; Mr. 12.1-11)

⁹ Ntá tuénxíñ kjuankíxiñ ch'ín Jesús nixjehé ch'án chojni kjuíncheyóexin ch'án ntáchro ch'án kíxin:

—Kjuák'e ijnko chojni k'uënkaxin ch'án nta to uva tí nontee ch'án, a ntá chr'éxín kjuínchekjen ch'án tí iso sín ch'e xra. A ntá kjuixin ntá sákjuí ch'án imá sé. ¹⁰ A ntá kui tí yaon tsakjinjin sín to uva. Ntá k'uëtuënen ch'án ijnko nkexro ch'ehe ch'án xra kíxin tsjikjanchehe ch'án tí sín ch'e xra nontee ch'án kíxin tsjanjon sín tí to tónhen ch'án tocar. A ntá jehe sín kjuate sín tí ch'ín a la ntá k'uinkité sín ch'án la ninkehó tsíchjéhya sín ch'án. ¹¹ A ntá tí ch'ín nontee ichr'án ch'án í jnko nkexro ch'ehe ch'án xra. A ntá kjaxin k'uántaxíñ sín ch'án la ko kjuate sín ch'án la ko kjaxin ninkehó tsíchjéhya sín ch'án ínaá. ¹² A ntá tí ch'ín nontee ichr'án ch'án í jnko nkexro. A ntá tí sín ch'e xra kjaxin xikahó tsíkjich'ehe sín ínaá, tsík'inkité sín ch'án.

¹³ 'Ntá tí ch'ín nontee ntáchro ch'án kíxin: "¿Nkexrí chrókjuít'a jie? Tsochr'an tí xjanna imá tjuahá. Ách'e chrókuitekakonhen sín ch'án chróchónthehe sín ch'án kjuasáya", ichro ch'án. ¹⁴ A ntá kjónté kui ch'án la k'uikon tí sín ch'e xra ntá chénka sín kíchó sín kíxin: "Tí ch'ín i mé ts'áyéhé ch'án kaín nkehe kuénte it'é ch'án. Ts'óyánni ch'án kíxin jeheni tsitóekoni kaín tí nkehe a," ichro sín. ¹⁵ A ntá kuakitsjexín sín ch'án tí nonte ntiha la k'óyán sín ch'án.

A ntá kjuanchankí ch'ín Jesús kíxin:

—A ntá tí ìnché nonte la, ¿nkehe chrókjuich'e ch'án kíxin xikaha kónhen tí xjeen ch'án?

¹⁶ Chrókui ch'án chrókjuinchek'itjáyan ch'án tí sín ch'e xra kíxin xikaha kjuich'e sín k'óyán sín tí xjeen ch'án, a ntá chróchjéhe ch'án í so nkexro chrókjuich'e xra tí nonte a —ichro ch'án.

A ntá tió kuínhin sín xikaha ntáchro sín kíxin:

—Kjá Dios la xikaha tjincaon ch'án —ichro sín.

¹⁷ A ntá ch'ín Jesús komá ch'án tí jehe sín ntáchro ch'án kíxin:

—¿A ntá nkehe t'axrjexín tí nkehe ntáchro xroon itén Dios ntáchro xíkihi?*
 Tí xro náxrjónhya kuítuenta sín ch'éna tjał'o, a ntá mé jie k'óna tí xro tjetoan.*
 18 A ntá jnkojín chojni tsjitsínka chrítaón tí xro i tsókuen ch'án. A ntá ts'ánótjen tí xro i tsoxratja ijnko chojni la tsókuen, ts'óna nche.

*Tí xra tsjenkehe sín gobierno
(Mt.21.45-46; 22.15-22; Mr.12.13-17)*

19 A ntá tí nchátl'a t'etoan la ko tí maestro tjako tí ley tjinkaon sín chrótsé sín tí ch'ín Jesús tuénxín tí hora a kíxin ó kónohe sín kíxin jehe sín kuakitsjexín tí nkehe nixja ch'án. Kjánchó xitjahya tsotsé sín ch'án kíxin chrakonhen sín tí chojni siín. 20 Ntá k'uētuéhen sín chojni tsotsáyehe sín ch'án, éxi chojni chóntha kjuasáyé ch'án chróko sín ch'án jnkojína kíxin ách'e ichréñ nkehe ntoáhya tsonixja ch'án. A ntá jína tsjanchaxín sín jię tsjikaán sín ch'án tí tjen tí ch'ín gobernador. 21 Mé xíkaha kjuanchankíhi sín ch'án nkehe, a ntá ntáchro sín kíxin:

—Maestro, ó noheni kíxin kaín nkehe ntáchrúa la ko kaín nkehe tjákua la chaxín ntoá la ko jehya nkexrí tsjehe chojni tjenkayáxián kíxin á jína sín, la ntá ntoá tjákua ntie Dios.

22 A ntá jie la chrónka, ¿á jína chrókjueñkeheni tí gobierno romano o náhí? —ichro sín.

23 A ntá ch'ín Jesús la ó kónohe ch'án kíxin ntoáhya tjenkayáxin sín ntá ntáchro ch'án kíxin:

—¿Nkekuénte chrokjuachaxínráni? 24 Tjákonará ijnko tí chichaon méhe. ¿Nkexro tí tsík'axrjexín tjenkáni tí chichaon i la ko nkexro ihnié chóntha méhe? —ichro ch'án.

Ntá kjuátēhe sín kíxin:

—Tí ch'ín t'etoan mé tjenkáni ch'án —ichro sín.

25 Ntá ntáchro ch'án kíxin:

—Chróchjehérá tí ch'ín gobierno t'etoan tí nkehe kuénte ch'án; a ntá tí nkehe kuénte Dios chróchjehérá Dios —ichro ch'án.

26 A ntá ninkehó kjuachahya sín kjuachaxín sín ch'án tí nkehe ntáchro ch'án nkayakon chojni chjasin ntiha. A ntá chrakon sín kuínhin sín kaín nkehe kjuátēhe ch'án la ntá tí sín kjuanchankí la tání sín kohya nkehe ichro sín.

Kjuanchankí sín kíxin á tsoxechón chojni

(Mt.22.23-33; Mr.12.18-27)

27 A ntá chr'éxín iso tí sín saduceo sákjuítsjehe sín tí ch'ín Jesús. Kjánchó tí sín saduceo titekakonhya sín kíxin tsoxechón chojni tsík'en. Xíkaha ntáche sín tí ch'ín Jesús kíxin:

28 —Maestro, ch'ín Moisés tsíkjin ch'án tí xroon ley ntáchro kíxin tió ts'en ijnko chojni la ntá tsitohe ichjién, tí chóntahya sín xjeen, la t'ichjánxín kíxin kíchó tí ch'ín tsík'en tsotéhe tí tjan k'án kíxin tsochóntha sín xjeen sín éxi xjeen tí ch'ín sao tsík'en ts'ikón sín.† 29 A ntá k'uéjó sín yato sín jnkokóá kíchó sín. A ntá tí ch'ín sao la kótehe ch'án. Ntá k'uén ch'án la chóntahya ch'án ninkehó xjeen ch'án. 30 A ntá tí ch'ín yóxin kíchó ch'án la kótehe tí tjan k'án. Kjáxin k'uén ch'án chóntahya sín xjeen sín. 31 A ntá tí ch'ín níxín xíkótehe jehe tjan ínaá. Kjáxin xíkaha kayatoé sín. Kaín sín k'uén sín ninkehó xjeen sín chóntahya sín. 32 A ntá kjuixixín kjáxin jehe tjan ik'uén tjan. 33 A ntá tió tsoxechón chojni tsík'en, ¿ntá nkexro tí jehe sin ts'óna ichjién tí jehe tjan kíxin yato tí jehe sín kótehe tjan? —ichro sín.

34 Ntá ch'ín Jesús kjuátēhe ch'án ntáchro ch'án kíxin:

—Ntihí chjasintajni tí chojni ntoa la ko ti chojni chjin tótēhe sín takja kíchó sín. 35 A ntá tí sín kuítakaon sín tí janhan ntá tsjacha sín tsoxechón sín ínaá la í tsotéehya sín la koí tsotéehya tí xjeen sín. 36 Kíxin tí sín a la xitjahya ts'en kíxin éxi tí sín ángel ts'ejó sín kíxin xjeen Dios tí jehe sín kíxin Dios kjuíncchexchón ch'án sín. 37 Kjáxin ch'ín Moisés tió chrónka ch'án kuénte tí nta tjeche kjuíncchenheni ch'án kíxin tí sín tsík'en tsoxechón sín. Ntáchro ch'án kíxin Inchéni Dios na mé tí Dios tinkáchónki ch'ín Abraham la ko ch'ín Isaac la ko

* 20:17 Salmo 118.22 † 20:28 Deuteronomio 25.5

ch'ín Jacob.^{‡ 38} Tí Dios i la jehya tinkáchónki tí sín tsík'en. Náhí. Tí Dios i la tinkáchónki tí sín tjejóchón, la Dios la t'íkon ch'án kíxin chojni la síchón —ichro ch'án.

³⁹ A ntá iso tí sín tjako tí ley la ntáchro sín kíxin:

—Jína kjuàkua la ko jína ntáchrua, Maestro — ichro sín.

⁴⁰ A ntá chrakon sín la í ninkehó kjuanchankíehya sín ch'án.

¿Xá nkexro tí it'é tí Cristo?

(Mt. 22.41-46; Mr. 12.35-37)

⁴¹ Ntá ntáchro ch'ín Jesús kíxin:

—¿Nkexrí kíxin ntáchro sín kíxin tí Cristo mé ts'axrjeníxín tí ch'ín David? ⁴² A ntá ch'ín David ikjin ch'án tí libro Salmos la ntáchro ch'án kíxin:

Ìnchéni Dios ntáche tí Ìnchéni kíxin:

“Tjak'e tjaná chjina ntiho tsétoan

⁴³ tsjixinjian kaín xín tí sín nínkakonhan la tsjachahya sin ts'etoan sín kíxin jahvá mé tsétoan.”[§]

⁴⁴ ¿Xá nkexrí kíxin Cristo chrók'óna it'é David, kíxin jehe David kuikítexín ch'án Ìnché ch'án tí Cristo? —ichro ch'ín Jesús.

Ch'ín Jesús kjuanchia ch'án jię tí sín tjako tí ley

(Mt. 23.1-36; Mr. 12.38-40; Lc. 11.37-54)

⁴⁵ Kaín chojni tjejótinhin sín nixjehé ch'ín Jesús tí sín k'uájiko ch'án ntáchro ch'án kíxin:

⁴⁶ —Chrókóxakonhanrá chrókuankíehyará tí sín maestro tjako tí ley. Tóxrjínhin sín chrók'uinkáya sín ka kjínjin la ko tjinkaon sín kíxin kaín chojni chrókjuikosáyehe sín tsoxeta sín ntasin la ko tjeyá sín sillá antsí náxrjón chrók'uejyá sín nkaxenhen ninko la ko tjeyá sín kíxin jína chrók'uejó sín tí sátsji sín kia, ⁴⁷ la ko kjaxin takitsjehe sín ntoe tí chojni chjin k'án. A ntá kjuixin kjuich'iyeha sín chojni ntá náxrjón nixjehé sín Dios. A ntá jehe sín antsí má sinchekjasóte sín Dios kíxin xíkaha kjuich'ia sín.

21

Tí chichaon kjuanjon ijnko tjan k'án nòa

(Mr. 12.41-44)

¹ A ntá tí nkaxenhen ninko ch'ín Jesús k'uíkon ch'án kíxin tí sín ricó kjuikao sín chichaon chr'áxenhen sín tí ntacajón tjetóxroyéya chichaon. ² A ntá kjaxin k'uíkon ch'án ikui ijnko tjan k'án nòa la ntá jehe tjan chr'áxenhen tjan yaá chichaon ntsíntsí. ³ Ntá ntáchro ch'ín Jesús kíxin:

—La chaxín ntáxrjan kíxin tí tjan k'án i nòa tjan kjánchó antsí tjete sínkí tí chichaon kjuanjon tjan kíxin kaín qasén tjan kjuanjon tjan, a ntá tí sín kjuanjon nchónhya la náhí.

⁴ Kíxin kaín tí chichaon kjuanjon sín la chichaon sítcháhe sín. A ntá jehe tjan kjónté nòa tjan na kjuanjon tjan kaín tí chichaon chrókuicháxihin tjan —ichro ch'án.

Ch'ín Jesús ntáchro ch'án kíxin tí ninko ts'itjáyan

(Mt. 24.1-2; Mr. 13.1-2)

⁵ Iso sín tjejótjo sín kíxin nkexrí tsjehe ninko tsík'óna xro náxrjón la ko í so nkehe tsíkjanjon chojni éxí ijnko nkehe chjéhe sín Dios. A ntá ch'ín Jesús ntáchro ch'án kíxin:

⁶ —A ntá tsi ijnko yaon tí ninko tjejokomará ntihi la tsoxíka. A ntá tsókohya ninkehó xro ts'ejókjen kíchó ínaá —ichro ch'án.

Tí nkehe tsónhen tí naxq ts'itjáyanhy chjasintajni

(Mt. 24.3-28; Mr. 13.3-23)

⁷ Ntá kjuanchankíhi sín ch'án kíxin:

—Maestro, ¿nkesá tsənhen tíha? ¿Nkexrí tsənhen tí tsənoexínni tí nkehe tsənhen?
—ichro sín.

⁸ Ntá ntáchro ch'ín Jesús kíxin:

—Chrókóxakonhanrá t̄itoéhyará sit'ayahará chojni. Nchónhya chojni tsi tsontáchro sín kíxin jehe sín tí Cristo, tsixro sín, la ko tsontáchro sín kíxin: “Ijie mé tsoxiteyá tsənhen.” Kjónté xikaha tsontáchro sín la chrókuítekáuenhyará tí jehe sín. ⁹ A ntá tió tsinhínrá tsontáchro chojni kíxin ó siín kjuaníkaon tjanjonko kichó sín, kjónté xikaha naxa chróchrakonhyará kíxin kaín tíha t'ichjánxín ts'atsinka senó tí naxa tsjixixínya ts'itjáyan chjasintajni —ichro ch'án.

¹⁰ Naxa tjechrónka ch'án ntáchro ch'án kíxin:

—Ijnko nación la tsjanjonko í jnko nación la ko ijnko chjasin tsjanjonko í jnko chjasin.

¹¹ Kjáxin imá tjian tsinkí nonte la ko tsokjinta la ko tsóníhi chojni nchónhya chjasin, a ntá nkajní nchónhya kjuachrakon jié ts'ixin ts'ikon chojni.

¹² 'Naxa ts'atsinkahya tíha la tsóníkkakonhanrá sín tsotsérá sín sátsjikoará sín tí njinko tsjanchia sín jie la ko sátsjikoará sín ts'íkjahará la ko sátsjikoará nkayakon tí sín rey la ko tí sín gobernador kíxin tinkachónkirá njina. ¹³ A ntá tí yaon xikaha tsənhen la ts'ixin kjuachaxin kíxin tsochronkará nkexro tinkachónkirá. ¹⁴ Tóxakuanhyará senó nkexrí tsjateherá tí nkehe tsjanchankíhará sín ¹⁵ kíxin janhan la tsjánjuan kjuaxrexinkaon jína tsonixjará kíxin nijnko tí sín nínkakonhanrá xitjahya tsontáchro sín kíxin ntoáhya tí nkehe tsjateherá. ¹⁶ Kíxin kjónté it'ará la ko kíchuárá la ko tí sín kjéhyará la ko tí sín tjórá jína mé sintakjirá sín. Jehe sín ts'óyán sín jnkojínrá. ¹⁷ Kaín chojni chjasintajni tsóníkkakonhanrá sín kíxin tinkachónkirá njina. ¹⁸ Kjánchó xikaha la nijnko kaxihí chóntha kjárá ts'itjáyanhya. ¹⁹ Tí tsitoéhyará tinkachónkirá tí janhan la tsochontará kjuachón jnkochríxín.

²⁰ A ntá tió ts'ikonrá kíxin kuenté chjasin Jerusalén tsík'ántatjen sín soldado ntá tsənoaxínrá kíxin í séhya ts'itjáyan tí chjasin a. ²¹ A ntá tí sín tjejó sín Judea la t'ichjánxín sátsjixín sín ntiha sátsji sín jna. A ntá tí sín siín chjasin Jerusalén kjáxin t'ichjánxín sátsjixín sín ntiha la ko ti sin tjejó sín nontee sín la í xitjahya tsokjan sín chjasin. ²² Kíxin tí yaon ts'ixin tsjasóte chojni tsoxiteyá tsənhen kaín nkehe nixja xroon itén Dios. ²³ Nòa tí chojni chjin tjejoyá tí yaon a la ko tí sín chóntha xjanhnte naxa ncheckakí sín. Kíxin tí yaon a la ts'ixin kjuatjoté tí chjasin la Dios tsjanjon kjuachaxin kíxin imá tsjasóte chojni ntiha. ²⁴ Jnkojínrá ts'énxinrá tí siín kjuaníkaon ntiha la ko jnkojínrá tsotsérá sín sátsjikoará sín sincheckjasótíará kaín tí í so nación. A ntá tí sín jehya judío tsjixín ókjé nación tsinkátja sín chjasin Jerusalén kíxin Dios mé tsjanjon kjuachaxin iso yaon xikaha tsənhen. A ntá chr'éxín tsontáchro ch'án kíxin: “La í kohya nkehe tsənhen.”

A ntá tió itsi ti Xjeen Dios K'óna Chojni

(Mt. 24.29-35, 42-44; Mr. 13.24-37)

²⁵ A ntá tsənoaxínrá nkexrí tsənhen tí yaon la ko nkexrí tsənhen nitjó la ko nkexrí tsənhen konotsé. A ntá chjasintajni tsokohya kjuaxróxin kaín nación la ko tsochrakon chojni kíxin imá tsojná ntayaon. ²⁶ A ntá chojni la tsotinhin sín kíxin tsochrakon sín tsjenkayáxin sín nkehe tsənhen chjasintajni kíxin kaín tí nkehe sínkáni nkajní la tsinkí. ²⁷ Ntá xikaha ts'ikon chojni kíxin itsi tí Xjeen Dios K'óna Chojni itsi ch'án chríkjan ijnko tjuí tsikao ch'án tí kjuachaxin jié kuènte nkaya nkajní. ²⁸ A ntá tió tsoxránkíxín tsənhen kaín tíha chrókócháhará chrókjuaya kjárá ntá chróntáchororá kíxin kjínya tjen tí nkexro tsaaxinrá —ichro ch'án.

²⁹ Kjáxin kjuíncheyóexin ch'án í jnko nkehe ntáchro ch'án kíxin:

—Tjenkayáxinrá nkexrí siín tí nta t'óna to higo la ko kaín tí í so nta. ³⁰ Tió ts'ikonrá kíxin tinkák'ayan kahnte tí nta, ntá tsənoaxínrá kíxin í séhya ts'ixenhen nchákuén chrin.

³¹ Mé kjáxin xikaha tió ts'ikonrá kíxin kaín tí nkehe sítónen, ntá tsənoaxínrá kíxin tí kjuachaxin kuènte Dios la ó chjino tjen.

32 'Mé chaxín ntáxrjan kíxin kaín tí tsonhen senó naxa t'enhya chojni tjejó jie. **33** A ntá tí nkajní la ko tí chjasintajni mé ts'itjáyan. A ntá tí nkehe ntáxrjan la ts'itjáyanhya, tsoxiteyá tíha.

34 'Chrókoxakonhanrá chrókuitoéhyará kíxin chrókjuichròerá kíxin tí imá chrókjónterá la ko tí chrókokoanrá. Kíxin tí xíkaha la ntá titaya tsi tí yaon la chrók'uejochoénhyará. **35** Na mé exí ijnko trampa xrínahya ts'ikjehe mé xíkaha itsi tí yaon a, la ko xíkaha tsonhen kaín chojni siín chjasintajni tí ts'ejóchóenhyá sín. **36** Méxra listo chrók'uejorá la ko chrónixjehérá Dios kaín yaon chronóehérá ch'án kíxin tió tsi kaín tí kjuaxikaon xíkaha la ntá tsjinkitsará ch'án tsaárá kíxin ntá tsjachará tsochjineherá tí tjen tí Xjeen Dios K'óna Chojni —ichro ch'án.

37 Ch'ín Jesús kjuák'ekjakoxín ch'án tí níñko ntiha jnkojnko yaon, a ntá tie la sákjuí ch'án tí jná nchek'in sín Olivo, la ntaha kuítóhe ch'án. **38** A ntá kaín chojni kóchjina sín tí níñko jnkojnko nchítjen kíxin tsinhhín sín tí nkehe tsochronka ch'án.

22

Imó kjuenkayáxin sín nkexrí tsotsé sín tí ch'ín Jesús (Mt. 26.1-5,14-16; Mr. 14.1-2, 10-11; Jn. 11.45-53)

1 Ntá kuichjina tí yaon kia sine sín niotja tjikohya tí xroan t'ánkíxin niotja na mé tí kia nchek'in sín pascua. **2** Ntá tí ncháta' t'etoan la ko tí sín maestro tjako tí ley kjuenkayáxin sín nkexrí chrók'oyán sín tí ch'ín Jesús kíxin chrakonhen sín tí chojni chjasin ntiha.

3 A ntá ch'ín Tsochren k'uíxenhen qasén ch'ín Judas, mé kjaxin it'in ch'án Iscariote, mé jehe ch'án ijnko tí teyó tí sín k'uájiko ch'ín Jesús. **4** Tí ch'ín a mé sákjuítsjehe tí sín ncháta' t'etoan la ko tí sín t'etoan kuénte níñko, ikjo kíchó sín kíxin nkexrí tsjikaán sín tí ch'ín Jesús. **5** Ntá jehe sín kóchéhé sín la ko ntáchro sín kíxin tsjenkehe sín tí ch'ín Judas. **6** Ntá kjuátehe ch'án sinchexiteyá ch'án ntá kjueyá ch'án nkexrí tsotsé sín tí ch'ín Jesús tí kohya chojni.

Kjuixixín kjoneko sín tí ch'ín Jesús (Mt. 26.17-29; Mr. 14.12-25; Jn. 13.21-30; 1 Co. 11.23-26)

7 Ntá ó kui yaon kia sine sín niotja tjikohya tí xroan t'ánkíxin niotja, a ntá t'ichjánxín ts'oyán sín tí kolélo sine sín kuénte tí kia pascua. **8** A ntá ch'ín Jesús k'uétuuenhen ch'án tí ch'ín Pedro la ko tí ch'ín Juan kíxin sátsji sín sincheyaxín sín tí nkehe sine sín kuénte tí kia pascua. **9** Ntá jehe sín kjuanchankíhi sín ch'án kíxin:

—¿Nketí tjinkávan sincheyaxíxinni? —ichro sín.

10 Ntá kjuátehe ch'án kíxin:

—Tiós ts'ixenhenrá chjasin Jerusalén tsoxetará ijnko chojni ntoa yámá ijnko tóá tjiá ntá. Chréhérá ch'án sátsjirá tí nchia ts'ixenhen ch'án. **11** Tsontácherá tí ìnché tí nchia kíxin: "Ntáchro Maestro kíxin: ¿Nketí tjen tí cuarto tsjánjuan kjuachaxin tsoyaxíxsin nkehe ch'án tí sín teyó xriko ch'án tí yaon pascua?" tsixrorá. **12** A ntá jehe ch'án tsjakohará ch'án ijnko cuarto jié tí yóxin piso la ntiha siín nkehe t'ichjánxín, la ntaha sincheyaxíxín sín sineni tsongjín —ichro ch'án.

13 A ntá jehe sín sákjuí sín k'uitja sín kaín nkehe exí tsíchronka ch'ín Jesús. Ntá ntiha kjuíncheyaxíxín sín sine sín kuénte pascua.

14 A ntá kui tí hora, a ntá ch'ín Jesús la ko tí sín k'uájiko ch'án kjuíji sín ntiha k'uéjótjaxín sín tí tjen tí mesa. **15** Ntá ntáchro ch'ín Jesús kíxin:

—Imá tjinkávan kíxin tsjasinni kia sinékianrá tí yaon pascua naxa ts'énhyá janhan.

16 Ntáxrjan kíxin sinéhya janhan xíkaha ínaá tí naxa tsoxiteyáhya tíha tió tsi kjuachaxin kuénte Dios —ichro ch'án.

17 Ntá kuákja ch'án tí nkehe tjiá inté to uva ntá chjéhe ch'án kjuasáya Dios ntá ntáchro ch'án kíxin:

—Tákjárá tíhi la its'irá kaín rá ¹⁸ kíxin ntáxrjan kíxin xík'ikianhyará tí inté to uva tí naxa tihya tí kjuachaxin kuénte Dios —ichro ch'án.

¹⁹ A ntá kjuixin ntá kuákja ch'án tí niotjá ntá kjuanchehe ch'án kjuasáyé Dios, ntá kóchrít'o ch'án chjéhe ch'án tí jehe sín ntáchro ch'án kíxin:

—Tíhi mé cuerpo kuéntana kíxin ts'ényákonhanrá. Mé xíkaha tsoxráxinkákonxínrá tí janhan —ichro ch'án.

²⁰ Kjaxin xíkaha kjuanon ch'án tí nkehe tjiá inté to uva tió kjuixin kjóne sín la ntáchro ch'án kíxin:

—Tí nkehe tjiá tí vaso chronkaxín tí nkehe nixin tsonhen tsoxiteyá kíxin tí jnina ts'itjí tsotjuáxin tí ijiárá.

²¹ Tí nkexro sinchekjina mé tjekjan tí tjen mesa ntihi. ²² Méxra tí Xjeen Dios K'óna Chojni its'en éxi k'uítuenhen; kjánchó nòa tí ch'ín sinchekji ch'án kíxin tsjasóte ch'án —ichro ch'án.

²³ A ntá jehe sín kjuankíxin sín tjanchankíhi kíchó sín:

—¿Xá nkexro sinchekji ch'án? —ichro sín.

Ikjo sín kíxin nkexro tí imá ts'etqan

²⁴ A ntá jehe sín mé tjo sín kíxin nkexro antsí ts'etqan. ²⁵ A ntá ntáchro ch'ín Jesús kíxin:

—Tí sín reyes kuénte tí naciones imá t'etqan sín. A ntá tí chojni mé ntáchro sín kíxin tí sín t'etqan la mé chojni ch'e xra jína. ²⁶ A ntá jahará xíkaha chrókuich'erá. Íchá jína tí nkexro imá t'etqan chrók'óna éxi tí nkexro antsí ntasoá chróchóxin chrók'uítuenhen, na mé tí nkexro t'etqan chrók'óna éxi ijnko nkexro ch'exón xra. ²⁷ ¿A ntá nkexro tí antsí t'etqan, á tí nkexro lámo tjetjaxin tí tjen mesa ntá sine ch'án, o á antsí t'etqan tí nkexro kuikao tí nkehe sine ch'án? Náhí. Tí nkexro tjetjaxin tí tjen mesa mé antsí t'etqan ch'án. Mé xíkaha janhan tjénkakjánrá éxi ijnko nkexro ch'exón xra tí janhan.

²⁸ Juhará xráxín k'uéjontaxínrá k'uíkonrá kaín nkehe náxrónhya kònna. ²⁹ Méxra janhan tsjánjuan kjuachaxin tsetqanrá éxi chjína T'aná tí téqan janhan ³⁰ kíxin sinterá la ko its'irá tí tsjak'e mesa kuéntana tí tsetqan janhan nkaya nkajní la ko tsetqanrá sinchekitoexínrá tí ijié kaín tí sín k'uaxrjeníxin tí teyó xjeen ch'ín Israel.

Ch'ín Jesús chrónka ch'án kíxin ch'ín Pedro sinchemá kíxin chónhya tí jehe ch'án, tsixro ch'án

(Mt. 26.31-35; Mr. 14.27-31; Jn. 13.36-38)

³¹ Ntá ntáchro Ínchéni kíxin:

—Simón, Simón, chrókónoha jaha kíxin ch'ín Tsochren kjuanchia ch'án tí jahará chrók'ótsjéyehe ch'án tí jahará éxi noatrido. ³² Kjánchó janhan xrjanóqha T'aná kíxin jaha chrókuqoéhya tí tinkachónka tí janhan. A ntá jaha kjónté tsjásian jie, a ntá tsokjan ínaá ts'itjáyanhya tinkachónka tí janhan ntá sinchechéhé kíchuárá —ichro ch'án.

³³ A ntá ntáchro ch'ín Simón kíxin:

—Ínchéni, listo tjenni sátsjini ts'ikjéhqoani la jehya ts'ikjéhqeni ó la kjaxin ts'enkoani —ichro ch'án.

³⁴ A ntá kjuátqehe ch'ín Jesús ntáchro ch'án kíxin:

—Pedro, ntáxrjan kíxin ijie jaí naxa tsjehya kochíntoa sinchemána iníya kíxin chonhya tí janhan, tsixrua —ichro ch'án.

Ntá ó kuichjína tí hora xíkaha tsonhen ch'án

³⁵ Ntá ch'ín Jesús kjuanchankíhi ch'án tí jehe sín kíxin:

—Tió kuétuanhánrá sákJúrá kjuíkoahyará kabolsa la ko kjuíkoahyará tí nkehe t'inka chichaon la ko kjuíkoahyará tókqate na, ¿á naxa t'itjáyan ichréñ nkehe ní? —ichro ch'án.

Ntá kjuátqehe tí jehe sín ntáchro sín kíxin:

—Náhí. Ninkehó nkehe t'itjáyanhya —ichro sín.

³⁶ Ntá ntáchro ch'án kíxin:

—A ntá jie tí nkexro chóntha kabolsa la tsakja sátsjiko la ko kjaxin tí nkehe t'inka chichaon. A ntá tí nkexro chóntahya chica espada chrókjuinchekji ch'án tí ka t'inkáya ch'án kixin chrók'uénaxín ch'án ijnko chica. ³⁷ Ntáxrjan kixin t'ichjánxín tsoxiteyá tsóna exí nixja xroon itén Dios ntáchro kixin: “Exí yóhe ijnko chojni kjuasin jie mé xikaha ts'ikon sín ch'án.”* Mé xikaha kaín nkehe chrónka xroon itén Dios kixin tsóna mé t'ichjánxín tsoxiteyá —ichro ch'án.

³⁸ A ntá jehe sín ntáchro sín kixin:

—Inchéni, ntihi tjejó yaá chica espada —ichro sín.

Ntá kjuátehe ch'án kixin:

—Kjónté ó táhó la ó nchoxon —ichro ch'án.

*Ch'ín Jesús nixjeexín ch'án Dios tí Huerto Getsemani
(Mt. 26.36-46; Mr. 14.32-42)*

³⁹ Ntá ch'ín Jesús sákjuixin ch'án chjasin Jerusalén sákjuí ch'án ijna Olivo kixin xikaha kuènhen ch'án k'uékjich'e ch'án la koí tí sín k'uájiko ch'án tinkáchréhe sín. ⁴⁰ Ntá kjuíji sín ntiha ntá ntáchro ch'án kixin:

—Nixjehérá Dios kixin tsjinkitsa ch'án tí jahará kixin tsjásinhyará jie —ichro ch'án.

⁴¹ Ntá ch'ín Jesús k'uaxrjenta ch'án tí jehe sín sákjuí ch'án ijnko kjínxin exí chrók'ue chojni xro. Ntá kjuák'exín toch'in ch'án kixin tsonixjehé ch'án Dios. ⁴² Ntá ntáchro ch'án kixin:

—It'eni, tí tjinkávan chrókjuinchekaáni kaín nkehe náxrjónhya chrók'uatsínkani. Kjánchó jehya exí tjinkaonni jeheni chrókónhenni. Náhí. Exí tjinkávan jaha —ichro ch'án.

⁴³ Ntá xrínahya k'uíkon ch'án itjen ijnko ángel tsíkixín nkaya nkajní kixin tsjinkitsa ch'án. ⁴⁴ A ntá imá tóxakonhen ch'án, a ntá qantsí fuerte nixjehé ch'án Dios, ntá k'uixin ch'án ntachjin exí yóhe jni xikaha k'uítji k'uánótjen nonte.

⁴⁵ Ntá tió kjuixin nixjehé ch'án Dios ntá k'uinkatjen ch'án ntá sákjuí ch'án tí tjejó tí sín k'uájiko ch'án, ntá k'uitjaxín ch'án kixin tjejójua tí jehe sín kixin kjuachahya sín imá t'avá sín. ⁴⁶ A ntá ntáchro ch'án kixin:

—¿Nkekuénte tjejochrinrá? T'ayará. Nixjehérá Dios kixin tsjinkitsará ch'án kixin tsjachroehyará ch'ín Tsochren —ichro ch'án.

*Itsé sín tí ch'ín Jesús
(Mt.26.47-56; Mr. 14.43-50; Jn. 18.2-11)*

⁴⁷ A ntá ch'ín Jesús naxa tjenixa ch'án ntá xrínahya kui nchónhya chojni yámá chica. Tí ch'ín it'in Judas, ijnko tí teyo sín k'uájiko ch'ín Jesús, kuítáón ch'án ntja, ntá kóchjinehe ch'án tí ch'ín Jesús kixin sineko ch'án kochíto. ⁴⁸ A ntá ntáchro ch'ín Jesús kixin:

—Judas, ¿á ijnko kochíto ó sinchekjíxian tí Xjeen Dios K'óna Chojni? —ichro ch'án.

⁴⁹ A ntá tí sín tjejóko ch'ín Jesús tió k'uíkon sín kixin xikaha kónhen ntá kjuanchankíhi sín ch'án kixin:

—Inchéni, ¿á chrókuatéxinni sín chica espada? —ichro sín.

⁵⁰ A ntá ijnko tí jehe sín kjuíncheníhi ch'án ijnko ch'ín ch'ehe xra ncháñt'á t'etqan, kóchrínjin ch'án ntatsjon ch'án chjina.

⁵¹ A ntá ntáchro ch'ín Jesús kixin:

—Táhó, titohé, ó tjen —ichro ch'án.

Ntá ch'ín Jesús itsé ch'án tí ntatsjon tí ch'ín ch'e xra a, ntá kjuínchekitóhe ch'án jína.

⁵² Ntá tuénxín ch'ín Jesús ntáche ch'án tí sín ncháñt'á t'etqan la ko tí sín t'etqan kuénte ninko la ko tí sín táda t'etqan mé tí sín tsíki sátsjiko sín ch'án ntáchro ch'án kixin:

—¿Nkekuénte k'uinkakoará chica espada la ko inta exí chrótserá ijnko xíchee? ⁵³ A ntá kaín yaon kjuak'é janhan k'uejóni kjuákoáxinrá tí ninko ntiha la ninkehó tséhyará

* **22:37** Isaías 53.12

tí janhan. A ntá jie mé tí hora kuèntará ntá kjuacha tí kjuachaxin kuènte sítié —ichro ch'án.

*Ch'ín Pedro kjuínchemá ch'án kíxin chónhya ch'án tí ch'ín Jesús
(Mt. 26.57-58, 69-75; Mr. 14.53-54, 66-72; Jn. 18.12-18, 25-27)*

⁵⁴ Ntá itsé sín tí ch'ín Jesús kjuínchemeteto sín ch'án sákjuíko sín ch'án ntoe ncháñt'á t'etoan. A ntá ch'ín Pedro ijkjín tinkáchréhe ch'án. ⁵⁵ A ntá tí ntásin ntiha kjuaka sín xrohi síxrohe sín. A ntá ch'ín Pedro kjaxin kjuák'entaxín ch'án tí tjejó sín ntiha. ⁵⁶ A ntá ijkjín tachjin ch'e xrä tió k'uíkon tjan kíxin koí ch'ín Pedro tjechjíxrohe ch'án ntiha ntá komá tjan tí jehe ch'án ntá ntáchro tjan kíxin:

—Kjaxin tí ch'ín i xriko tí ch'ín Jesús —ichro tjan.

⁵⁷ Ntá ch'ín Pedro kjuínchemá ch'án ntáchro ch'án kíxin:

—¿Nkekuènte xikaha ichrúa jaha? Ni chonhya tí nkexro a —ichro ch'án.

⁵⁸ A ntá qantsíkoá chr'éxín ikui í jnko chojni k'uíkon tí jehe ch'án ntá ntáchro kíxin:

—Kjaxin jaha xríkoxa tí nkexro a —ichro.

Ntá ch'ín Pedro ntáchro ch'án kíxin:

—Náhí, janhya —ichro ch'án.

⁵⁹ Ntá éxí ijkjín hora chr'éxín ntá nixja í jnko ch'ín chénka tí í so sín kíxin:

—Tí ch'ín i chaxín xriko tí ch'ín Jesús kíxin kjaxin tsíkjixín ch'án estado Galilea —ichro ch'án.

⁶⁰ Ntá ntáchro ch'ín Pedro kíxin:

—Nonahya janhan nkehe tí ntáchrua —ichro ch'án.

Ntá tuénxín naxaq tjenixja ch'án ntá xrínhaya ó tsje kochíntqa. ⁶¹ Ntá Ínchéni kuinkátjíá ch'án komá ch'án tí ch'ín Pedro. Ntá ch'ín Pedro xraxinkaon ch'án kíxin xikaha tsíchronka Ínchéni kíxin: “Naxaq tsotsjehya kochíntqa sinchemána iníya.”[†] ⁶² Ntá ch'ín Pedro sákjuí ch'án ntója, tsjánka ch'án xraxinkaon ch'án tí jie kjuasin ch'án.

Kjuanoá sín tí ch'ín Jesús

(Mt. 26.67-68; Mr. 14.65)

⁶³ Tí sín sákjuíko ch'ín Jesús kjuanoá sín ch'án la ko kjuate sín ch'án. ⁶⁴ K'uikjéhe sín ka kon ch'án ntá kjuate sín ch'án ntá kjuanchankíhi sín ch'án kíxin:

—Ijie la tónoha nkexro kjuatia —ichro sín.

⁶⁵ La ko í so nkehe ntáchro sín k'uántaxínhin sín ch'án.

Ntá sákjuíko sín tí ch'ín Jesús nkayakon tí sín t'etoan

(Mt. 26.59-66; Mr. 14.55-64; Jn. 18.19-24)

⁶⁶ A ntá kóyáon ncháñtjin la kójnkotsé kaín tí sín táda t'etuhenen tí sín judío, la ko tí ncháñt'á t'etoan, la ko tí sín maestro tjako tí ley la sákjuíko sín tí ch'ín Jesús nkayakon tí sín imá t'etoan. Ntá ntiha kjuanchankíexín sín ch'án kíxin:

⁶⁷ —Ijie la chrónka, ¿á jaha tí Cristo? —ichro sín.

Ntá jehe ch'án kjuátehe ch'án kíxin:

—Tí tsontáxrjan kíxin chaxín janhan na tsitekákonhyará. ⁶⁸ A ntá tí chrókjuánchánkíhará ichréñ nkehe la chrókjuátehyará la ko chrók'uatjántahyarána. ⁶⁹ A ntá jie tí Xjéen Dios K'óna Chojni mé tsjak'etjaxin tí tja chjina kuènte Dios chóntha kaín xín kjuachaxin —ichro ch'án.

⁷⁰ A ntá tuénxín kaín sín kjuanchankíhi sín ch'án kíxin:

—¿Á chaxín jaha tí Xjéen Dios? —ichro sín.

A ntá kjuátehe ch'án Jesús ntáchro ch'án kíxin:

—Chaxín janhan xikaha ntáchrórá tí jahará —ichro ch'án.

⁷¹ Ntá kjo sín kíchó sín kíxin:

—¿Nkehe ts_{on}hen naxa chróchrónka í so chojni? Jeheni kaín ni kuínhinni nkehe k'uaxrjexín ir'va ch'án —ichro sín.

23

Sákjuíko sín tí ch'ín Jesús nkayakon tí ch'ín Pilato (Mt. 27.1-2, 11-14; Mr. 15.1-5; Jn. 18.28-38)

¹ Ntá kaín sín k'uinkatjen sín ntá sákjuíko sín tí ch'ín Jesús nkayakon tí ch'ín Pilato. ² A ntá ntiha kjuankíxin sín t'eka sín jié tí jehe ch'án ntáchro sín kíxín:

—K'uitjani tí nkexro i tjachroe ch'án chojni nación kuénténi ntáchro ch'án kíxín chrókjuenqeehyani tí gobierno romano, la ko kjaxin ntáchro ch'án kíxín jehe ch'án mé Cristo ch'án, na mé ijnko rey tíha —ichro sín.

³ A ntá ch'ín Pilato kjuanchankíhi ch'án tí ch'ín Jesús ntáchro ch'án kíxín:

—¿A jaha tí Rey t'etuenhen tí sín judío a ní? —ichro ch'án.

Ntá ch'ín Jesús kjuátehe ch'án ntáchro ch'án kíxín:

—Chaxín xíkaha ntáchrúa jaha —ichro ch'án.

⁴ A ntá ch'ín Pilato ntáche ch'an tí sín ncháñ'á t'etqan la ko tí chojni tsíkikao sín kíxín:

—T'itjáhya nijnko jié chóntha tí nkexro i —ichro ch'án.

⁵ A ntá jehe sín qantsí itsen nixja sín ntáchro sín kíxín:

—Tjachroe ch'án kaín xín chojni estado Judea kíxín tí nkehe tjako ch'án. Kjuankíxin ch'án kjuako ch'án estado Galilea, a ntá jie ó kui ch'án ntihi la xíkaha tjako ch'án —ichro sín.

Sákjuíko sín tí ch'ín Jesús nkayakon tí ch'ín Herodes

⁶ A ntá kuínhin ch'ín Pilato xíkaha ntáchro sín ntá kjuanchankí ch'án á tí ch'ín i la á Galilea tsíkjixin ch'án. ⁷ A ntá kjuátehe sín kíxín ntaha tsíkjixin ch'án, ntá k'uetoan ch'ín Pilato kixin sátsjiko sín ch'án tí tjen ch'ín Herodes kíxín jehe ch'án mé gobernador tí estado Galilea kíxín kjaxin ch'án tjen ch'án chjasin Jerusalén tí yaon a. ⁸ A ntá ch'ín Herodes k'uíkon ch'án kjuúji tí ch'ín Jesús ntá imá kóchéhe ch'án kíxín isé tjinkaon ch'án chrók'uión ch'án tí ch'ín Jesús kíxín tsíkinhin ch'án chrónka chojni nkexrí tjako ch'án, ntá tjinkaon ch'án chrók'uión ch'án ijnko kjuaxroan chrókjuakoxin ch'ín Jesús. ⁹ Nchónhya nkehe kjuanchankíhi ch'án tí ch'ín Jesús, kjánchó ch'ín Jesús ninkehó kjuáteehya ch'án. ¹⁰ Kjaxin ntiha k'uejó tí sín ncháñ'á t'etqan la ko tí sín maestro tjako tí ley la ntá nchónhya jié k'ueka sín ch'án kíxín nínkakonhen sín ch'án.

¹¹ A ntá ch'ín Herodes la ko tí sín soldado kuénte ch'án kjuankíxin sín kjuicosáyehya sín ch'án la ko kjuanoá sín ch'án kjuíchek'inkáya sín ch'án ka tjete náxrjón éxí t'inkáya tí sín rey. A ntá tuénxín ch'ín Herodes k'uetoan ch'án kíxín sátsji ch'án ínaá tí tjen ch'ín Pilato. ¹² A ntá tí yaon a ch'ín Pilato la ko ch'ín Herodes kjuankíxin sín tjuéhe kichó sín kíxín tí senó la k'uéninkakonhen kichó sín.

K'uetoan sín kíxín its'en ch'ín Jesús

(Mt. 27.15-26; Mr. 15.6-15; Jn. 18.39—19.16)

¹³ A ntá ch'ín Pilato k'uíyéhe ch'án tí ncháñ'á t'etqan la ko tí sín gobernador la ko kaín chojni chjasin ntiha kíxín tsojnkotsé sín ¹⁴ ntá ntáche ch'án sín kíxín:

—Jahará kjuíkuñará tí nkexro i ntáchrórá kíxín ntoáhya tjakohé ch'án chojni kíxín chrókóníkkakonhen sín tí gobierno. Kjánchó janhan kjuánchánkíhá ch'án itsjé nkehe kuínhínrá ntá k'uíkonrá kíxín k'uítjahya ninkehó tí jié tékará ch'án. ¹⁵ La ko kjaxin ch'ín Herodes k'uitjahya ch'án tí jié tékará tí ch'ín Jesús ntá chr'án ch'án ínaá ntihi. Ó k'uíkonrá kíxín ninkehó jié chónthaya ch'án chrók'uenxín ch'án. ¹⁶ Sintakjasóte ch'án ntá chr'éxín tsjánjuan kjuachaxin sátsji ch'án —ichro ch'án.

¹⁷ A ntá tí yaon kia a la t'ichjánxín kíxin ch'ín Pilato tsjanjon kjuachaxin sátsji ijkno chojni tjechjina kíxin xíkaha kuènhen sín ósé. ¹⁸ Ntá kaín sín kjuankíxin sín k'óyako sín ntáchro sín kíxin:

—¡Tí nkexro la náhí! ¡Ch'ín Barrabás mé t'atjánta! —ichro sín.

¹⁹ A ntá ch'ín Barrabás tsík'ikjéhe sín ch'án kíxin jehe ch'án la ko í so chojni kóninkakonhen sín tí chjasin ntiha la ko tsík'óyán ch'án chojni. ²⁰ A ntá ch'ín Pilato tjinkaon ch'án chrókjuanjon ch'án kjuachaxin sáchrókjui ch'ín Jesús. A ntá xíkjanchankíhi ch'án tí chojni siín ntiha ínaá. ²¹ Kjánchó jehe sín antsí má tsen k'óyako sín ntáchro sín kíxin:

—¡Tjakékñanirá ch'án ntacruz! ¡Tjakénkñanirá ch'án ntacruz! —ichro sín.

²² Níxin xíkjanchankí ch'ín Pilato ntáchro ch'án kíxin:

—¿Xá nkehe ntoáhya kjuúch'e ch'án? Janhan la k'uítjahya ninkehó jié chóntha ch'án chrók'uenxín ch'án. Sintakjasóte ch'án la ntá chr'éxín tsjánjuan kjuachaxin sátsji ch'án —ichro ch'án.

²³ Kjánchó jehe sín antsí tsen kjuanchia sín ntáchro sín kíxin chrókjuak'enkáni ch'án ntacruz. A ntá k'óyako sín la ko k'óyako tí sín ncháñt'á t'etoan ntá kjuacha sín kjuanchia sín tí nkehe tsonhen. ²⁴ A ntá ch'ín Pilato kjuanjon ch'án kjuachaxin xíkaha tsonhen tí nkehe kjuanchia sín. ²⁵ A ntá kjuanjon ch'ín Pilato kjuachaxin sátsji tí ch'ín Barrabás éxi kjuanchia sín, na mé tí ch'ín k'uikjéhe sín kíxin k'uékje ch'án kjuaníkaon la ko k'uék'óyán ch'án chojni. A ntá ch'ín Pilato kjuanjon ch'án kjuachaxin kíxin sátsjiko sín tí ch'ín Jesús sinchekjasóte sín ch'án éxi tjinkaon sín.

Kjuak'enkáni sín ch'án ijkno ntacruz its'en ch'án

(Mt. 27.32-44; Mr. 15.21-32; Jn. 19.17-27)

²⁶ A ntá tió sákjuíko sín ch'ín Jesús tsjak'enkáni sín ch'án ntacruz, ntá itsé sín ijkno ch'ín tsíkjixín chjasin Cirene it'in ch'án Simón, mé kjuixín ch'án nontéé ch'án, ntá kjuínchekamá sín ch'án tí ntacruz tsjak'enkáni ch'ín Jesús la tinkáchréhe ch'án.

²⁷ Kjáxin chréhe nchónhya chojni ntoa la ko nchónhya chojni chjin chréhe sín tsjánkàma sin ch'án. ²⁸ Kjánchó ch'ín Jesús nkátjíá ch'án komá ch'án tí jehe sín kíxin tsjánka sín ntáchro ch'án kíxin:

—Jahará chojni chjin chjasin Jerusalén, chrótsjankamahyará tí janhan. Chrótsjankará kíxin tí nkehe tsonhanrá jahará la ko xjáanrá. ²⁹ Kíxin itsi yaon tsontáchororá kíxin náxrjón tí sín chóntahya xjan la ko tí sín kjuínchekokjéhya xjan la ko tí sín kjuínchekakíhya ninkehó xjan. ³⁰ Ntá tsjankíxin chojni tsontáche sín tí jna kíxin tsoxrátja sín la ko tsontáche sín tjo kíxin tsjavá sín. ³¹ Kjónté tí nta yoa la ó sítónen kaín tíhi la íchá tió chróxámá tí nta la ɻnkehe tí kaá chrókónhen tí nta tsíxámá? —ichro ch'án.

³² Kjáxin sákjuíko sín iyó sín tsíkjasin jié kíxin ts'óyánko sín ch'ín Jesús. ³³ Ntá tió kjuíji sín tí jna tikitexín sín tí jna Nta Hueso Kja Chojni, na mé ntiha kjuak'enkáni sín ch'ín Jesús tí ntacruz la ko kjáxin tí iyó sín chónta jié, la ijkno la tja ch'án chjina la íjkno la tja ch'án kjon tjejóyáni sín ntacruz kjáxin. ³⁴ Ntá tió kjuixin kjuak'enkáni sín tí ch'ín Jesús tí ntacruz ntá nixjéhe ch'án tí It'é ch'án Dios ntáchro ch'án kíxin:

—It'eni, tóninkákuènhyá sín kíxin tí nkehe kjuúch'eheni sín kíxin noehya sín nkehe tí kjuúch'e sín —ichro ch'án.

A ntá tí sín soldado k'óxikayéhe sín iké ch'án ch'exín sín suerte kíxin tsongoexín sín nkexro tsakja tí ka a. ³⁵ Kaín chojni chjasin ntiha tjejótsjehé sín kíxin xíkaha sítónen la ko kjáxin tí sín t'etoan tjanoá sín tí jehe ch'án ntáchro sín kíxin:

—Kjuínchekaá ch'án ókjé chojni, a ntá jie jehe ch'án chrókjuinchekaá ch'án ɻsén ch'án tí chaxín jehe ch'án tí Cristo tí nkexro tsíkjeyá Dios —ichro sín.

³⁶ La ko kjáxin tí sín soldado kjuanoá sín ch'án kóchjinehe sín ch'án kuikao sín xranvino náxrjónhya chjéhe sín ch'án chrók'ui ch'án, ³⁷ ntáche sín ch'án kíxin:

—Tí jaha chaxín rey kuènte tí sín judío ntá jahvá chrókjuinchekaá ɻsán —ichro sín.

³⁸ Kjäxin ntiha ikja tí ntacruz kjuak'enkani sín ijnko ntachiso ntsí tsíkjin sín nkìva griego la ko nkìva latín la ko nkìva hebreo ntáchro kixin: “Tíha mé Rey kuènte tí sín judío”, ichro.

³⁹ Ijnko tí sín chóna jie tjenkáni ntacruz k'uántaxíñin ch'án tí ch'ín Jesús ntáchro ch'án kixin:

—Tí jaha chaxín Cristo, jahvá chrókuínkajian əsán, ntá tsjixin ntá chrókuínkajian tí jeheni —ichro ch'án.

⁴⁰ A ntá tí ch'ín jnko a k'uëtuéhen tí í jnko ch'ín a kixin tsotání ch'án, ntáchro ch'án kixin:

—Ntáchrohya xikaha. ¿Á chrakuenhyá Dios kixin xikaha ichrua kixin kjäxin jeheni na ó tjejótjasóteni? ⁴¹ Yóini na nchoxon tjejótjasóteni tjejótjenkani tí jie kjuasinni. A ntá tí nkexro i ninkehó nkehe jinahya kjuich'e ch'án, la ntá koí ch'án tjetjasóte ch'án —ichro tí ch'ín a.

⁴² Ntá ntáchro ch'án kixin:

—Jesús, xráxinkávan tí janhan tió ts'ayéhé kjuachaxin tsétoan jaha —ichro ch'án.

⁴³ Ntá kjuátēhe ch'ín Jesús ntáchro ch'án kixin:

—Chaxín ntáxrjan kixin ijie jaí ts'ejóko kichó ni nkaya nkajní —ichro ch'án.

Ntá ó k'uén ch'ín Jesús

(Mt. 27.45-56; Mr. 15.33-41; Jn. 19.28-30)

⁴⁴ Ntá ó chjina chonkixin. A ntá k'uíxín tie kuenté chjasintajni hasta las tres kónjín.

⁴⁵ Ik'uén yaon, la ko tí ka t'inkákuènxín nkaxenhen ninko k'uichje jnkosiné. ⁴⁶ Ntá ch'ín Jesús k'uèya ch'án itsen ntáchro ch'án kixin:

—It'eni tjen nkaya nkajní, jaha ts'ayéhé əsénni —ichro ch'án.

Xikaha ichro ch'án ntá k'uén ch'án.

⁴⁷ A ntá k'uíkon tí ch'ín capitán romano kaín xikaha kónhen ntá kjuanchehe ch'án kjuasáyé Dios ntáchro ch'án kixin:

—Chaxín tí nkexro la jína la ninkehó jie chontahya —ichro ch'án.

⁴⁸ A ntá kaín tí chojni tsíkójkotsé ntiha k'uíkon sín xikaha kónhen ntá sákjuíxín sín ntiha chrakon sín tjate sín ntakuin sín kixin xikaha kónhen. ⁴⁹ A ntá kaín tí sín chóxin ch'ín Jesús la ko kjäxin tí chojni chjin k'uékinkáchónki sín ch'án tsíkjixín sín estado Galilea ikjín tjejó sín tjejótsjehe sín nkerí sítónhen.

Sákjuíkvá sín tí ch'ín Jesús

(Mt. 27.57-61; Mr. 15.42-47; Jn. 19.38-42)

⁵⁰ A ntá ntiha tjen ijnko ch'ín it'in José, chjasén ch'án mé Arimatea estado Judea. Kjäxin jehe ch'án ijnko tí sín imá t'etqan kuènte tí sín judío, jehe ch'án mé ijnko nkexro jína.

⁵¹ Jehe ch'án kjuák'echónhen ch'án itsi tí kjuachaxin kuènte Dios. Méxra kóxrjienhyá ch'án nkexrí kjuich'e tí sín í so t'etqan. ⁵² Méxra sákjuítsjehe ch'án tí ch'ín Pilato kjuíkjanchia ch'án tí cuerpo kuènte ch'ín Jesús. A ntá ch'ín Pilato kjuanon ch'án kjuachaxin. ⁵³ Ntá sákjuí sín tsjinkajinxín sín ch'án ntacruz. Ntá kjuixin kjuinkajin sín ch'án ntá kjuínchek'ísimá sín ch'án ijnko ka jie, ntá sákjuíko sín tsoxrvá ch'án ijnko toye xráxín tsíkjich'éna ch'ín José jehó tjo la ko naxa ninkexró tsíxrváhyá ntiha. ⁵⁴ Kaín tíha kónhen tí yaon viernes kónjín. Tí yaon mé tjejóyaxíñin sín kixin í séhya tsoxrankíxín tí yaon t'ok'éhe sín sábado kixin kohya kjuachaxin sich'e sín ninkehó xra.

⁵⁵ A ntá tí chojni chjin nkáchréhe kjuíkoxín ch'ín Jesús estado Galilea kjäxin sákjuíko sín sákjuítsjehe sín tí toye tsoxrvá ch'án la ko k'uíkon sín jína nkexrí kjuak'e sín tí cuerpo kuènte ch'án. ⁵⁶ A ntá tió kjan sín tí nchia tjejó sín k'óyaxíñin sín kjueyá sín xroan xraxé náxrjón itsa ntoé ch'án kixin xikaha k'uékinkáchónki tí sín judío. A ntá k'ok'éhe sín tí yaon sábado éxí t'etqan tí ley.

24

Ó xechón ch'ín Jesús

(Mt. 28.1-10; Mr. 16.1-8; Jn. 20.1-10)

¹ Tí yaon domingo, mé tí yaon xrankíxixín semana tí chojni chjin na xíkjan sín ínaá tí tsíxrvá ch'ín Jesús sákjuíko sín xroan xraxé tsík'lena sín. La ko í so chojni chjin sákjuíkotoxin sín. ² Ntá ó kjuíji sín ntiha k'uíkon sín tí xro tsíkjèxín tí tóye la í xíkahya tjen tí sákjuí sín. ³ Ntá k'uíxhenen sín tóye ntá k'uitjahya sín cuerpo kuénte Inchéni Jesús. ⁴ Ntá chrakon sín ntá noehya sín nkehe sich'e sín. Ntá xrínahya k'uíkon sín iyó chojni ntoa tjejóxin toté chjinaxón tí tjejó sín, la iké sín la tjákini tsjehe. ⁵ A ntá tí chojni chjin kjuínchek'isén kja sín tjejótsjehe sín nonte kíxin imá chrakon sín, a ntá tí chojni ntoa ntáchro sín kíxin:

—¿Nkeuènte xrítjeyárá tí nkexro tjechón tí siín tí sín tsík'en? ⁶ Tjenhya ch'án ntihi la ó xechón ch'án. Xráxinkáonrá nkehe ntáchro ch'án tí kjuák'e ch'án estado Galilea ⁷ ntáchro ch'án kíxin jehe ch'án tí Xjeen Dios K'óna Chojni t'ichjánxín tsotsé tí sín chóntha jié tsjak'enkani sín ch'án ntacruz la ko tí níxin yaon tsozechón ch'án ínaá —ichro sín.

⁸ A ntá tí sýchjin xráxinkaon sín kíxin nkexrí tsíchronka ch'ín Jesús, ⁹ a ntá tió kjánxin sín tí tsíxrvá ch'án ntá chénka sín tí tejnto sín k'uék'ajiko ch'án la ko kaín tí í so sín. ¹⁰ A ntá tí sín sákjuíchenka tí sín apóstol la mé tjan María Magdalena la ko tjan Juana la ko tjan María iné ch'ín Jacobo la ko tí í so chojni chjin. ¹¹ A ntá tí sín apóstol kuínhin sín éxi ijnko nkehe chaxínhyá tí nkehe chrónka tí jehe sín ntá kuítekakonhyá sín.

¹² Kjánchó ch'ín Pedro k'uaxrjexín ch'án nchia tinká ch'án sákjuítsjehe ch'án tí tsíkjixrvá ch'ín Jesús. Ntá kjuíji ch'án k'uíkon ch'án tí nkaxenhen tóye k'uíkon ch'án kíxin jehó tí ka tsík'isimá ch'án ntaha tjen. Ntá kjan ch'án tí nchia tjen ch'án chrakon ch'án kíxin xíkahya tsíkónen.

Tí ntia Emaús sákjuí sín la kjuújichréhe Inchéni

(Mr. 16.12-13)

¹³ A ntá tí yaon a iyó sín sákjuí sín ijkno chjasin ntsí it'in Emaús, mé kjínxin tejnko kilómetro tí chjasin Jerusalén. ¹⁴ Tinkákjo sín kichó sín kíxin kaín tí nkehe tsíkónhen tí chjasin Jerusalén. ¹⁵ A ntá nachrohe nixja sín tinkákjo sín, a ntá ch'ín Jesús kóchjinehe ch'án tí jehe sín sákjuíko sín ch'án. ¹⁶ Kjónté k'uíkon sín ch'án la kjuanchonhyá Dios kjuachaxin kíxin chrókjuatsoan sín tí jehe ch'án. ¹⁷ A ntá ch'ín Jesús kjuanchankíhi ch'án sín ntáchro ch'án kíxin:

—¿Nkehe tí tinkakjórá tí k'uinkará ntia? ¿Nkeuènte kíxin t'avará? —ichro ch'án.

¹⁸ A ntá ijkno tí jehe sín mé it'in Cleofas, mé kjuátēhe ch'án kíxin:

—Kaín chojni ó nohe sín nkehe tí tsíkónhen chjasin Jerusalén. A ntá jaha kjaxin kjuák'e ntiha la ¿á jahvá noahya nkehe tí tsíkónhen tí yaon a ní? —ichro ch'án.

¹⁹ A ntá jehe ch'án kjuanchankíhi ch'án tí jehe sín kíxin:

—¿Xá nkehe tsíkónhen? —ichro ch'án.

Ntá chénka sín ch'án kíxin:

—Tí nkehe tsíkónhen ch'ín Jesús tsíkjixín ch'án chjasin Nazaret. Jehe ch'án na ijkno nkexro k'uéchronka itén Dios, na mé kjuakoxin ch'án kjuachaxin kuénte nkaya nkajní kaín tí nkehe k'uékjich'e ch'án la ko kaín nkehe k'uéntáchro ch'án mé xíkahya k'uíkon Dios la ko k'uíkon tí chojni. ²⁰ A ntá tí ncháta t'etqan la ko tí sín gobierno kjuínchek'ayéhe sín ch'án kíxin its'en ch'án la tsjak'enkani sín ch'án ntacruz. ²¹ A ntá jeheni k'uejochónhenni kíxin jehe ch'án chrókjuinchekaá ch'án tí sín Israel. A ntá jie ó chóntha iní yaon xíkahya kónhen. ²² A ntá iso chojni chjin kjaxin k'uékinkáchónki sín ch'án kjuínchek'ayéhe sín tí jeheni kíxin jehe sín tsíkjitsjehe sín tí tsíxrvá ch'án imá nchítjén ²³ la mé tsík'itjahya sín tí cuerpo kuénte ch'án, ntá kjan sín chrónka sín kíxin tsík'ikón sín iyó sín ángel chrónka sín kíxin ch'ín Jesús la tjechón ch'án, ichro sín. ²⁴ Ntá tuénxín iyó tí sín k'uájikoni kjaxin

sákjuitsjehe sín tí tsíxrvá ch'án la kuik'itja sín éxí chrónka tí chojni chjin, kjánchó ch'ín Jesús la k'uíkonhya sín —ichro tí yaá sín a.

²⁵ Ntá kjuátehe ch'ín Jesús ntáchro ch'án kixin:

—Lontirá jahará la tjokahya kuítekáonrá tí nkehe k'uéchronka tí sín profeta k'uéjósé. ²⁶ ¿Xá t'ichjánxihya chrókjuasóte Cristo senó ntá chrók'uáyéhé ch'án tí kjuachaxin chrók'uetoan ch'án? —ichro ch'án.

²⁷ Ntá kjuankixin ch'án chronkaxín ch'án nkexrí t'axrjexín kaín tí nkehe nixja xroon itén Dios kixin nkehe tsonhen tí jehe ch'án la mé kjuankixixín ch'án chronkaxín ch'án tí nkehe tsíkjín ch'ín Moisés la ko kjuintaxín chronkaxín ch'án tí nkehe tsíkjín tí í so sín profeta.

²⁸ Ntá kjuíji sín tí chjasin ntsí a, a ntá ch'ín Jesús tsjehe ch'án éxí naxa sáchrókui ch'án kjín. ²⁹ A ntá jehe sín mé chronóéhé sín ch'án kixin ntahó chrókuitóhe ch'án, ntáchro sín kixin:

—Titoha ts'ejóni ntihi kixin ntá ó kóntó la ó ts'ixitie —ichro sín.

Ntá ch'ín Jesús la k'uíxenhen ch'án nchia kixin tsitoeko sín ch'án. ³⁰ A ntá tjejótjaxinko sín ch'án tí tjen tí ntamesa, ntá ntiha xranjon nkehe sine sín, ntá kuákja ch'án tí niotja la kjuanchehe ch'án kjuasáyé Dios la kóchrít'ó ch'án kuákja tí jehe sín. ³¹ Ntá tuénxín xraxinkaon sín ntá kjuátsóan sín tí jehe ch'án. Ntá tuénxín k'uitjáyankoá ch'án. ³² Ntá jehe sín itjo sín kichó sín ntáchro sín kixin:

—¿Á chaxínhyá chéhé əsénni tí kuikäoni ch'án ntja kixin chronkaxín ch'án nkexrí t'axrjexín tí itén Dios tsíkjín sín ósé? —ichro sín.

³³ Ntá tuénxín k'uínkatjen sín kjan sín chjasin Jerusalén. A ntá ntaha k'uitja sín tí tejnko sín jnkokoá tjejó sín la ko tí í so sín. ³⁴ A ntá tí sín ntiha chrónka sín kixin:

—Chaxín tjechón Inchéni la mé ch'ín Simón tsík'ikon ch'án tí jehe ch'án —ichro sín.

³⁵ Ntá jehe sín kjaxin chrónka sín nkehe tsíkónhen tí ntja sákjuí sín kixin nkexrí kjuátsóanxín sín tí ch'ín Jesús tí kóchrít'ó ch'án niotja kjuanjon ch'án.

Titaya k'uíkuén sín ikui ch'ín Jesús

(Mt. 28.16-20; Mr. 16.14-18; Jn. 20.19-23)

³⁶ A ntá jehe sín naxa tjejótjo sín kaín tí nkehe tsíkónhen, a ntá xrínahya ch'ín Jesús kjuák'e jnkosiné tí tjejó sín, nixjehé ch'án tí jehe sín ntáchro ch'án kixin:

—¿Á kjuaxróxin tjejorá? —ichro ch'án.

³⁷ A ntá jehe sín la imá chrakon sín kjuenkayáxin sín kixin k'uíkon sín ijnko xríntoe chojni.

—Ách'e kjuachani —ichro sín.

³⁸ A ntá ntáche ch'ín Jesús tí jehe sín kixin:

—¿Nkekuente chrakonrá? ¿Nkekuente xíkaha tjenkayáxin əsánrá? ³⁹ Tsjehérá tjaná la ko totená kixin chaxín janhan. Itserána la ko komárána, kixin ijnko xríntoe chojni chóntahya nto la ko chóntahya hueso éxí t'ikónrá kixin chonta janhan —ichro ch'án.

⁴⁰ A ntá xíkaha ichro ch'án ntá kjuako ch'án itja ch'án la ko töté ch'án. ⁴¹ Ntá kjónté xíkaha k'uíkon sín la naxa kuítekakonhya sín kixin chéhé sín la ko chrakon sín. A ntá ch'ín Jesús ntáchro ch'án kixin:

—¿Á chontará ichréne nkehe sineni ntihi ní? —ichro ch'án.

⁴² Ntá chjéhe sín ch'án it'ó koché tsíchjántaón xrohi la ko ijnko t'ó katjé kotsjenta tjiá tsjen. ⁴³ A ntá jehe ch'án kuákja ch'án kjóne ch'án k'uíkonxín kon sín. ⁴⁴ Na ntá ntáchro ch'án kixin:

—Kaín tí nkehe k'uátsínka tí janhan mé k'uéntáxrjan tí naxa k'uék'ejóni senó; kixin t'ichjánxín tsoxiteyá kaín tí nkehe chrónka tí ley tsíkjín ch'ín Moisés la ko tí nkehe tsíkjín tí sín profeta la ko tí nkehe ntáchro tí salmo kixin nkexrí tsóna janhan —ichro ch'án.

⁴⁵ Ntá kjuanjon ch'án kjuachaxin kíxin tsienxín sín tí xroon itén Dios tsíkjin sín ósé.
⁴⁶ Ntá chénka ch'án sín kíxin:

—Mé xíkaha nixja tí xroon itén Dios kíxin tí Cristo la t'ichjánxín ts'en, la níxin yaon t'ichjánxín tsozechón ch'án. ⁴⁷ A ntá t'ichjánxín tsjakoxín sín iñnié ch'án tsjankíxín sín chjasin Jerusalén la ko chrókuinhin chojni kuenté chjasintajni kíxin chrókuítóhe sín ijié sín chrókuitekaon sín tí jehe ch'án kíxin jehe ch'án mé chrókuincheyaon tí ijié sín. ⁴⁸ A ntá jahará mé tsochronkaxínrá kíxin xíkaha k'uíkonrá kaín tíha. ⁴⁹ Ntá tsochr'an janhan tí Nchakuen T'aná éxí tsíntáchro ch'án. Kjánchó chjasin Jerusalén ntahó titohará tsoxiteyájia ts'ayéhérrá kjuachaxin tsixín nkaya nkajní.

*Ch'ín Jesús sákjuí ch'án nkaya nkajní
(Mr. 16.19-20)*

⁵⁰ A ntá ch'ín Jesús sákjuíko sín ch'án k'uaxrjexín sín chjasin Jerusalén sákjuí sín chjasin Betania. Ntá kjuàya ch'án tja ch'án kjuíncheyaon ch'án tí jehe sín. ⁵¹ A ntá kjuixin kjuíncheyaon ch'án sín ntá k'uaxrjenta ch'án tí jehe sín ntá sákjuí ch'án nkaya nkajní. ⁵² A ntá jehe sín k'uíkon sín xíkaha, a ntá xraxinkaon sín ch'án, ntá kjan sín chjasin Jerusalén chéhé sín. ⁵³ A ntá kaín yaon tjejó sín nkaxenhen níinko tjanchehe sín Dios kjuasáya. Amén.

Tí tan jína chrónka ch'ín Juan

Tí nkexro chrónkaxín nkexrí tjen Dios mé k'óna ijnko chojni chjasintajni

¹ 12 A ntá tí xránkixixín naxaq k'ónahya tí chjasintajni a na mé xráxín tjen tí nkexro chrónkaxín nkexrí tjen Dios, na mé Cristo tíha, na mé kjuák'eko Dios na mé kjaxin Dios tíha. ² Tí xránkixixín na mé tí nkexro xráxín kjuák'eko Dios ³ la ko kjuachaxin kuénte ch'án na mé k'ónaxín kaín xín nkehe siín jie. A ntá kohya ninkehó nkehe k'ónakoá, na mé kaín xín nkehe siín na mé k'ónaxín tí kjuachaxin kuénte ch'án. ⁴ Jehe ch'án na mé kjuanjon kjuachaxin kaín nkehe síchón siín chjasintajni la ko jehe ch'án mé xrohi t'inkaséyanxínhin jnkojntochojni chjasintajni. ⁵ Tí xrohi a mé t'inkaséyanxín tí sítié a. A ntá tí sítié a mé tjinkaon chrók'ók'anca tí xrohi a, kjánchó kjuachahya k'ók'anca.

⁶ Ntá kjuák'e ijnko chojni k'uétuenhen Dios kui mé it'in ch'án Juan. ⁷ Ikui ch'án kjuák'echrónka ch'án nkexrínchi tjen tí xrohi t'inkaséyanxín chjasintajni kíxin kaín xín chojni chrókuitekaon sín tí tjechrónka ch'án a. ⁸ A ntá tí ch'ín Juan la jehya tí xrohi a. Ó k'uítuenhón ch'án kui ch'án kíxin tsocchrónka ch'án nkerí kuénte tí xrohi a. ⁹ A ntá tí xrohi chaxín t'inkaséyanxín kaín xín chojni na ó tsíki ch'án chjasintajni jie.

¹⁰ Kjuák'e ch'án chjasintajni na mé Dios tsíkjich'éanaxín ch'án chjasintajni tí kjuachaxin kuénte tí nkexro a na kjónté kjuák'e ch'án chjasintajni na naxaq kjuátsqanhyá sín ch'án. ¹¹ Ikui ch'án tí tjejó tí sín judío k'uaxrjeníxín ch'án, kjánchó kuítekakuenhyá sín ch'án. ¹² A ntá tí sín kuítekaon sín ch'án mé k'uáyéhé sín kjuachaxin kíxin ts'óna sín xjeen Dios. ¹³ Ntá yóehya ts'axrjeníxín sín it'é sín chjasintajni ntihyó la ko yóehya ijnko it'é chrókjuenkayáxin ch'án chrókjuich'éna ch'án ijnko xjan. Náhí. Dios mé kjuayá ch'án nkexro ts'óna xjeen ch'án.

¹⁴ A ntá tí nkexro chrónkaxín nkexrí tjen Dios na mé k'óna ijnko chojni chjasintajni kjuák'enkákjanni ch'án na mé imá k'uétjuéhé ch'án chojni chjasintajni la ko imá ntoá chrónka ch'án. Kuayeni k'uíkonni kíxin imá t'etoan ch'án kíxin jehe ch'án mé tí jnkokoáxón Xjeen It'éni tjen nkaya nkajní na mé xikaha imá t'etoan ch'án.

¹⁵ Ch'ín Juan mé chrónka ch'án nkexrí tjen tí nkexro a. Ntáchro ch'án kíxin:

—Senó k'uékjákhárá kíxin chr'éxiñ tsi tí nkexro a, na mé qantsí má t'etoan ch'án, a ntá janhan la náhí kíxin tí janhan naxaq kohvana la tí jehe ch'án la ó xráxín tjen ch'án —mé xikaha chrónka ch'ín Juan.

¹⁶ Kaínni ó k'uáyéheni tí kjuachaxin jié tjetjanjon ch'án la ko qantsí má tjencheayaonni ch'án la ko tjencheayaonni ch'án. ¹⁷ Dios mé tsík'etuenhen ch'ín Moisés kíxin tsokjin ch'án tí ley. A ntá Inchéni Jesucristo mé kjuáqoxín ch'án kíxin nkexrí imá tjuéhé Dios tí chojni chjasintajni. A ntá kaín nkehe chrónka ch'án mé qantsí ntoá. ¹⁸ Kohya ninkexró chjasintajni k'uíkon sín Dios a. A ntá tí jnkokoáxón Xjeen ch'án na mé xráxín jnkokoá tjenkayáxinko It'é ch'án la mé jehé ch'án mé ó kjuínchekónoheni ch'án nkexrí tjen It'é ch'án nkaya nkajní.

*Ch'ín Juan mé chrónka ch'án nkexrínchi tjen ch'ín Jesús
(Mt. 3.11-12; Mr. 1.7-8; Lc. 3.15-17)*

¹⁹ Iso tí sín judío k'uéjó sín chjasin Jerusalén na ntá ichr'án sín iso chojni ncháñt'á la ko iso tí sín levita, ikui sín kuinixjehé sín tí ch'in Juan kjuanchankíhi sín ch'án kíxin:

—¿Nkexro tí jaha? —ichro sín.

²⁰ Ntá kjuínchemáhya ch'án, ntáchro ch'án kíxin:

—Náhí. Jehya janhan tí Cristo —ichro ch'án.

²¹ Ntá xíkjanchankíhi sín ch'án ínaá, ntáchro sín kíxin:

—¿Xá nkexro tí jaha? ¿Á jaha tí profeta Elías? —ichro sín.

Ntá ch'ín Juan la xíkjatehe ch'án ntáchro ch'án kíxin:

—Náhí. Jehya janhan Elías —ichro ch'án.

Ntá xíkjanchankíhi sín ch'án ínaá kíxin:

—¿Á jaha tí nkexro tjejóchónhenni itsi tsochrónka itén Dios? —ichro sín.

Na ntá ntáchro ch'ín Juan ínaá kíxin:

—Náhí. Janhya —ichro ch'án.

²² Ntá kjuanchankíhi sín ch'án ínaá kíxin:

—¿Ntá nkexro jaha? T'ichjánxín tsónoheni tsochénkani tí sín ichr'ánni ikuini. ¿Nkehe tsochrónka kíxin nkexro tí jaha? —ichro sín.

²³ Ntá kjuátehe ch'ín Juan ntáchro ch'án kíxin:

—Janhan mé tí nkexro tsjak'e nteje ts'èya tsorxjanka kíxin: “Takitjehérá ijnko ntia ntoí tsixín Inchéni” —mé xíkaha ichro ch'án kjuáteexín ch'án itén ch'ín Isaías k'uéchrónka xroon itén Dios ósé.*

²⁴ A ntá tí sín fariseo mé tsíchr'án tí jehe sín kuikjanchankíhi sín tí ch'ín Juan. ²⁵ A ntá kjuanchankíhi sín ch'án kíxin:

—Ó ntáchrua kíxin jahya tí Cristo tí nkexro tsaáxin chojni la ko jahya tí Elías, la ko jahya nijnko tí nkexro k'uéchrónka itén Dios ósé. ¿A ntá nkekuénté tíkite chojni tí xíkaha? —mé ichro sín.

²⁶ Ntá ntáchro ch'ín Juan kíxin:

—Janhan na mé inta ó tíkitexián chojni. Ó ntihi tjenkákjan ijnko nkexro naxa tjátsoanhýará. ²⁷ Jehe ch'án mé tsi ch'án nóton tí janhan. A ntá antsí má t'etoan ch'án, a ntá janhan na kénhyó. A ntá tósuàna chrókjuasíntanká tí correa tokaté ch'án —ichro ch'án.

²⁸ Kaín tíha mé tsíkónhen tí chjasin it'in Betábara tí nó tjitoxín yaon tóhe tí ntarío Jordán tí kjuák'e ch'ín Juan kuíkite chojni.

Ch'ín Jesúus na mé éxí yóhe ijnko kolélo kuénte Dios

²⁹ A ntá tí yaon chr'éxín mé k'uíkon ch'ín Juan kíxin ó tjkui ch'ín Jesúus. Ntá nixjehé ch'án tí sín tsíkóchjina ntáchro ch'án kíxin:

—Tsjeherá tí nkexro tjkui mé tí Kolélo kuénte Dios jehe ch'án. Tíha mé tsjinxín ijié chojni chjasintajni. ³⁰ Janhan mé k'uéxrjanka kíxin tí iton tí janhan mé tsichréhé ijnko nkexro antsí t'etoan, a ntá janhan la kénhyó tétoan kíxin naxa kohyana na jehe ch'án la ó xráxín tjen ch'án. ³¹ Kjaxin janhan naxa chonhya nkexro tíha. A ntá xra ó k'uinka kjuak'é kuíkitexián chojni inta kíxin tí chojni nación Israel mé chrókjuátsqanxín sín ch'án —ichro ch'ín Juan

³² Kjuintaxín ntáchro ch'ín Juan kíxin:

—Ó k'uíkuán kíxin tí Nchákuén Dios mé k'uínkajinxín nkaya nkajní na éxí yóhe ijnko kontóá k'uínkajin la ko kjuák'e va ntoí tí tjen ch'án. ³³ A ntá janhan kjaxin naxa chonhya nkexro tíha. A ntá tí nkexro k'uétuánnna kíxin tsjak'é tsíkitexián chojni inta mé tsíchrónka ch'án kíxin tí Nchákuén Dios mé ts'inkajin tsjak'e ntoí tí tjen ijnko chojni na mé tsjatsqanxián janhan kíxin tí nkexro a mé tsíkitexín ch'án Nchákuén Dios chojni. ³⁴ A ntá janhan jie mé ó k'uíkonxín kuán kíxin xíkaha kónhen tí jehe ch'án, a ntá xrjankaxián kíxin táha mé Xjeen Dios tíha —mé xíkaha chrónka ch'án.

Tí sín saoxín kjueyá ch'ín Jesúus

³⁵ Tí yaon chr'éxín kjuák'e ch'ín Juan la ko iyó tí sín k'uájiko ch'án, ³⁶ a ntá xrínahya k'uíkon ch'án k'uátsínska ch'ín Jesúus. Ntá ntáchro ch'ín Juan kíxin:

—Tsjeherá tí nkexro i mé tí Kolélo kuénte Dios —ichro ch'án.

³⁷ Ntá kuínhin tí yóí sín k'uájiko ch'ín Juan na ntá sákjuíchréhé sín tí ch'ín Jesúus. ³⁸ Ntá kuinkatjá ch'ín Jesúus k'uíkon ch'án kíxin tinkáchréhé sín ntá kjuanchankíhi ch'án sín kíxin:

* ^{1:23} Isaías 40.3

—¿Xá nkehe xritjéyará? —ichro ch'án.

Ntá ntáchro sín kíxin:

—Maestro, ¿xá nketí nchia itjen? —ichro sín.

³⁹ Ntá kjuátehe ch'án ntáchro ch'án kíxin:

—Intá sátsjini ts'ikonrá nketí —ichro ch'án.

Ntá kuinkáchréhe sín ch'án k'uíkon sín nketí nchia kjuák'e ch'án ntá k'uéjóko sín ch'án kuenté tí kónjín kíxin kjuíji sín ntiha como las cuatro kónjín.

⁴⁰ A ntá yói sín tsíkinhin sín tí chrónka ch'ín Juan ntá sákjuíchréhe sín tí ch'ín Jesús na mé ijnko mé it'in Andrés. Jehe ch'án chónta ch'án ijnko savé mé it'in Simón Pedro. ⁴¹ Na ntá tuénxín tí ch'ín Andrés sákjuíkjayá ch'án tí savé ch'án Simón. Ntá chénka ch'án tí savé ch'án kíxin:

—Ó k'uitjani tí nkexro Mesías —ichro ch'án. Tíha mé t'axrjexín kíxin Cristo.

⁴² A ntá ch'ín Andrés mé kuiqao ch'án tí savé ch'án Simón tí tjen ch'ín Jesús. Ntá ch'ín Jesús mé komá ch'án tí ch'ín Simón ntáchro ch'án kíxin:

—Jaha mé Simón, it'á mé it'in Jonás. Ntá jie sintak'ian Cefas —ichro ch'án. A ntá tí palabra Cefas la ko tí palabra Pedro na mé yói mé t'axrjexín kíxin ixro tíha.

Ch'ín Jesús mé kjueyá ch'án tí ch'ín Felipe la ko tí ch'ín Natanael

⁴³ A ntá tí yaon chr'éxín mé sáchrókjui ch'ín Jesús tí estado Galilea. Ntá k'uitja ch'án tí ch'ín Felipe, na ntá ntáche ch'án kíxin:

—Chréhé tí janhan —ichro ch'án.

⁴⁴ A ntá tí ch'ín Felipe mé chjasén ch'án mé it'ín Betsaida tí chjasén ch'ín Andrés la ko ch'ín Pedro. ⁴⁵ Ntá tí ch'ín Felipe mé sákjuíkjayá ch'án tí ch'ín Natanael na ntá chénka ch'án kíxin:

—Ó k'uitjani tí nkexro tsí éxi k'uéchrónka tí ch'ín Moisés tí tsíkjin ch'án tí xroon chrónka tí nkehe k'uetoan Dios. Kjáxin tí sín k'uéchrónka tí itén Dios chr'éxín mé k'uéchrónka sín kíxin itsi tí nkexro a. Na ntá ó k'uitjani ch'án na mé jehe ch'án mé it'in Jesús, la it'é mé it'in José, la mé chjasén ch'án mé Nazaret —ichro ch'ín Felipe.

⁴⁶ A ntá ntáchro ch'ín Natanael kíxin:

—¿Xá kjuánchí má chrókójina tí nkehe chrók'uaxrjexín tí chjasin Nazaret a? —ichro ch'án.

Ntá kjuátehe ch'ín Felipe ntáchro ch'án kíxin:

—Xrákiá ts'ikuan —ichro ch'án.

⁴⁷ Na ntá k'uíkon ch'ín Jesús kíxin ó kui tinkákóchjina ch'ín Natanael, na ntáchro ch'án kíxin:

—Ó kui ijnko ch'ín chaxín israelita la kohya nijnko kjuach'ia xriko ch'án —ichro ch'án.

⁴⁸ Na ntá ntáchro ch'ín Natanael kjuanchankíhi ch'án tí ch'ín Jesús kíxin:

—¿Nkexrí kíxin tjátsoanna? —ichro ch'án.

Ntá kjuátehe ch'ín Jesús ntáchro ch'án kíxin:

—Naxa nixjáahya tí ch'ín Felipe mé k'uíkuān tí jaha tjenkankiá tí nta t'óna to higo —ichro ch'án.

⁴⁹ Na ntá ntáchro ch'ín Natanael kíxin:

—Maestro, jaha la chaxín tí Xjeen Dios tjen nkaya nkajní tsétueñhén tí nación Israel —ichro ch'án.

⁵⁰ Ntá kjuátehe ch'ín Jesús ntáchro ch'án kíxin:

—Jehya tí nkehe ntáxrjan k'uíkuān tjenkankiá nta t'óna to higo, jehya táhó tsítekákonxian. Náhí. Chr'éxín xiki í jnko kjuaxroan qantsí má jié ts'ikuan, a ntá tíhi la kénhyó —ichro ch'án.

⁵¹ Kjáxin ntáchro ch'ín Jesús kíxin:

—Ijnko nkehe ntoá tsoxrjanka kíxin tsoxitjehé tí nkajní ts'ikonrá itsi itsjé tí sín ángel kuente Dios mé ts'it'ótjen la ko ts'inkajin tí tjén janhan mé tí Xjeen Dios K'óna Chojni —ichro ch'án.

2

Chjasin Caná estado Galilea kótehe ijnko chojni

¹ A ntá iní yaon chr'éxin ntá kótehe ijnko ch'ín chjasin Caná estado Galilea. Mé koí tí iné ch'ín Jesús tsík'íyehé sín tjan la ntiha tjen tjan koí. ² Kjaxin tsík'íyehé sín tí ch'ín Jesús la ko tí sín k'uájiko ch'án kíxin sátsji sín tí tsík'íyehé sín ntiha. ³ Ntá ó tsík'ankehē sín tí xranvino ik'uí sín na ntá tí iné ch'ín Jesús mé ntáche tjan tí jehe ch'án kíxin:

—Ó tsík'ánka xranvino its'i sín —ichro tjan.

⁴ Ntá ntáchro ch'ín Jesús kíxin:

—Naná, ¿nkehe tsónhen ch'rónka? Naxa kjuixrakáhya tí yaon tsjásian kjuaxroan —ichro ch'án.

⁵ A ntá tí iné ch'án na mé ntáche tjan tí sín ch'e xra kíxin:

—Tí chrén nkehe chrók'uetuñhanrá ch'án chrókjuiñchexiteyará —ichro tjan.

⁶ A ntá siín ntiha injon ch'i tsík'óna xro na mé tíha tjiá ntá t'onti sín kíxin xíkaha mé ts'axrjehe tí jié chóna sín koí, mé xíkaha kuinkáchónki tí sín judío. Na mé jnkojnko ch'i mé tjacha tikia ochenta litro la 9 ciento litro ntá. ⁷ Ntá k'uetuñhen ch'ín Jesús tí sín ch'e xra kíxin:

—Tíkjará ntá kaín tí ch'i a tsokaón —ichro ch'án.

Ntá kjuínchexiteyá sín kjuínchekaón sín ntá jnkojnko tí ch'i a. ⁸ A ntá ntáche ch'ín Jesús tí jehe sín ínaá kíxin:

—Tákjá intsí ntá tjiá ch'i tjikuehé tí ch'ín t'etoan tí kia a —ichro ch'án.

Ntá xíkaha kjuich'e sín kjuínchexiteyá sín. ⁹ A ntá tí ch'ín t'etoan tí kia a mé tsjexín ch'án tí ntá tsík'óna xranvino kjónté noehya ch'án nketí kuixín tí xran a. Jehó tí sín ch'e xra kuikao sín mé nohe sín kíxin jehe sín mé tsíkakitsje sín ntá. Ntá tí ch'ín t'etoan mé k'uíyehé ch'án tí ch'ín tsíkótehe. ¹⁰ Ntáche ch'án kíxin:

—Xráxín tí sín tjasin kia la senó tí xranvino náxrjón tjanjon sín na tió chrók'uihya tí sín tsíkóchjina na ntá tjanjon sín tí xranvino náxrjónhyá. A ntá jaha la náhí. Senó kjuakéchjina tí xranvino qantsí má náxrjón, a ntá tí jie tjetjánjuan jaha —ichro ch'án.

¹¹ Tí kjuaxroan a kjuich'e ch'ín Jesús chjasin Caná estado Galilea mé tí kjuaxroan saoxín kjuasin ch'án mé kjuakoxín ch'án nkekri imá jié tí kjuachaxin kuente ch'án, a ntá tí sín k'uájiko ch'án mé kuítekaon sín tí jehe ch'án.

¹² Ntá ó k'uátsinka kia, a ntá sákjuí ch'án chjasin Capernaum, sákjuíko ch'án iné ch'án la ko kíchó ch'án la ko tí sín k'uájiko ch'án, kóxrjenhen sín ntiha iso yaon.

Ch'ín Jesús mé kjuínchetjóá ch'án tí ninko jié

(Mt. 21.12-13; Mr. 11.15-18; Lc. 19.45-46)

¹³ A ntá ó kuichjina tí yaon kia kuente pascua kuente tí sín judío. Ntá ch'ín Jesús sákjui ch'án chjasin Jerusalén. ¹⁴ Ntá nkaxenhen tí ninko jié ntiha k'uíkon ch'án tí sín ncheckjixin koxinta la ko kolélo la ko kontóá. La ko ntiha kjaxin tjejótjaxin tí sín tjinkíxixín chichaon.

¹⁵ Ntá ch'ín Jesús mé kuákja ch'án ihno tsíxehé sín ntiha, kjuich'ena ch'án ijnko chikoté, ntá kuakitsjexín ch'án sín nkaxenhen ninko kaín xín sín la ko tí kolélo la ko tí koxinta. Na ntá tí ntamesa tjinkítóxixín sín tí chichaon mé kóteka ch'án tsíkjaminkí xènjin tí chichaon a. ¹⁶ Ntá k'uetuñhen ch'án tí sín ncheckjí tí kontóá a kíxin:

—Takítsjerá kaín tí nkehe a. Ch'enahyará ijnko ntasin tí ntøe T'aná ntihi —ichro ch'án.

¹⁷ Ntá xráxinkaon tí sín k'uájiko ch'án ti nkehe tsíkjin sín ósé kíxin: “Éxí xrohi k'uákjen asenná níñkaván kíxin tí ntøa tjikosáyehya sín.” *

¹⁸ Ntá tí sín judío mé kjuanchankíhi sín ch'án kíxin:

—¿Xá nkerí kjuaxroan tsjásixián tsjákoxian nketí kjuachaxin chonta kíxin xíkaha kjuich'e tíhi? —ichro sín.

¹⁹ Ntá kjuátehe ch'ín Jesús kíxin:

* 2:17 Salmo 69.9

—Tí ts'oxíkará tí n̄inko i ntá iníkoá yaon la ó sít'ána n̄ixin tsjak'e ínaá —ichro ch'án.

²⁰ Na ntá ntáchro tí sín judío a kíxín:

—Cuarenta y seis nánó k'uéjó sín kjuich'éna sín tí n̄inko i, a ntá jaha ntáchrúa kíxín iní yaon koá sich'éna ínaá, ichrúa —ichro sín.

²¹ Kjánchó kienxínhyá sín kíxin tí n̄inko ntáchro ch'ín Jesús la tí cuerpo kuènte ch'án.

²² Ntá tió kjuixin xechón ch'án ntá xráxinkaon tí sín k'uájiko ch'án kíxin xíkaha tsíchrónka ch'án, ntá kuítekaon sín tí xroon itén Dios tsíkjín sín ósé la ko tí nkehe tsíchrónka ch'án.

Ch'ín Jesús mé nkehe tónhen əsén kaín xín chojni

²³ Tió kjuák'e ch'ín Jesús chjasin Jerusalén tí kia pascua, a ntá itsjé chojni kuinkáchónki sín tí jehe ch'án kíxin ó k'uíkon sín tí kjuaxroan kjuasin ch'án. ²⁴ Kjánchó ch'ín Jesús la kuítekakuenhyá ch'án tí jehe sín kíxin jehe ch'án la ó nohe ch'án jína nkexrí tónhen əsén jnkojnkó chojni ²⁵ a ntá t'ichjánxienhyá ch'án kíxin ninkexró chróchenka ch'án nkexrí tjenkayáxin chojni kíxin ó kónohe ch'án kaín nkehe tónhen əsén kaín xín chojni.

3

Ch'ín Nicodemo kuinixjehe ch'án tí ch'ín Jesús

¹ Kjuák'e ijnko ch'án kuènte tí sín fariseo a mé it'in ch'án Nicodemo. Jehe ch'án mé ijnko nkexro imá tjetoan kuènte tí sín Israel. ² A ntá ijnko tie kjuíchréhe ch'án tí ch'ín Jesús a nixjehe ch'án ntáchro ch'án kíxin:

—Maestro, kónoheni kíxin It'éni tjen nkaya nkajní mé tsíchr'án k'uinka tsjákokhéni kíxin tí jehya Dios chrókuak'ekoa la xitjahya chrókuásian kjuaxroan jié —ichro ch'án.

³ Ntá kjuátehe ch'ín Jesús ntáchro ch'án kíxin:

—A ntá tsotjonka ijnko nkehe imá tjetoan. Tí nkexro tsokjéhya n̄ixien mé xitjahya ts'ikon tí kjuachaxin ts'etqan Dios —ichro ch'án.

⁴ A ntá ch'ín Nicodemo kjuanchankí ch'án ntáchro ch'án kíxin:

—Ó tálana, ¿nkexrí chrókokjína n̄ixien? ¿Á chrók'uíxanhān tsée n̄aná ínaá ntá chrókokjína n̄ixien ní? —ichro ch'án.

⁵ Ntá kjuátehe ch'ín Jesús ntáchro kíxin:

—Ntá tsotjonka ijnko nkehe imá tjetoan. Jehó tí sín tsíkokjíexín ntá la ko kjaxin tsíkokjíexín Nchákuén Dios mé ts'ayéhé sín tí kjuachaxin kuènte Dios. ⁶ Tió ijnko xjan ts'axrjeníxin chojni na mé tí xjan mé chojni ó. A ntá tí Nchákuén Dios tsokjíexín n̄ixien ijnko chojni na ntá ts'ayéhé sín tí Nchákuén Dios a. ⁷ Chrakonhyá tí nkehe xrjanka kíxin “Kaín chojni t'ichjánxín tsokjíhi n̄ixien.” ⁸ Éxi yóhe tí tinhín tí chjéhe xrjinto ntá noahya nketí kuixín tí xrjinto la ko noahya nketí sátsji na mé kjaxin xíkaha kónhen kaín tí nkexro tsíkokjíexín Nchákuén Dios —ichro ch'án.

⁹ Ntá xíkjanchankí ch'ín Nicodemo ínaá kíxin:

—¿Nkekuénté kíxin xíkaha chrókónhen? —ichro ch'án.

¹⁰ Ntá kjuátehe ch'ín Jesús ntáchro ch'án kíxin:

—Jaha ijnko maestro imá t'etqan tí nación Israel ntá naxa tiénxinhyá tí nkehe ní?

¹¹ Chaxín tjétjonka tí nkehe nóna la ko tí nkehe k'uíkuan ntá títekákonnahya jaha. ¹² Tí nkehe tjétjonka la kuènte chjasintajni ó ntá kjónté la títekákonnahya jaha. ¿Ntá nkexrí chrókuítekávan tí chrótjonka nkehe kuènte nkaya nkajní? ¹³ Kohya í jnko nkexro k'uit'ótjen chjasin nkaya nkajní. Jehó tí Xjeen Dios K'óna Chojni mé kjuák'e chjasin nkaya nkajní la ko ntiha kuixín ch'án. ¹⁴ Éxi yóhe ch'ín Moisés tió k'uixin sín tí nteje, a ntá Dios mé k'uetoan kíxin sinchekjanoya ch'án ijnko konche tsjak'enkāni ch'án ijnko nta, ntá xíkaha kjuich'e ch'án kjuak'enkāni ch'án tí konche tí nta a komá sín tí konche ntá kuaá sín k'uénhyá sín, * mé xíkaha tsónhen tí Xjeen Dios K'óna Chojni mé t'ichjánxín kíxin

* **3:14** Números 21.9

tsjak'enkáni ch'án ijkno ntacruz ¹⁵ kíxin mé xíkaha kaín nkexro tsinkáchónki tí jehe ch'án mé tsaá sín tsochónta sín kjuachón jnkochríxín.

Dios imá tjuèhe ch'án tí chojni chjasintajni

¹⁶ 'Kixin Dios mé imá tjuèhe ch'án chojni chjasintajni ntá kjuanjon ch'án jnkokoáxon Xjeen ch'án, kíxin ntá jnkojnko chojni tsinkáchónki tí Xjeen ch'án mé ts'itjáyanhya sín tsochónta sín kjuachón jnkochríxín. ¹⁷ Chr'ánhya Dios tí Xjeen ch'án chjasintajni kíxin sinchekjasóte chojni kíxin tí jie kjuasin sín. Náhí. Ó jehí ichr'án ch'án tí Xjeen ch'án chjasintajni kíxin sinchekaá chojni.

¹⁸ 'Na mé tí sín tsitekaon tí Xjeen Dios la tsjasótehya sín. A ntá tí sín titekakuenhya sín na mé ó kjuixin kjuínchekitqexín Dios tí ijíe sín tsjasóte sín kíxin titekakuenhya sín tí jnkokoáxon Xjeen Dios. ¹⁹ Na mé xíkaha Dios sinchekjasóte sín jnkochríxín kíxin ó kui tí nkexro t'inkaséyanxín chjasintajni na kjónté ntá qantsí má tóxrjínhin sín tí sítié a. A ntá tí t'inkaséyan la náhí kíxin naxa tóxrjínhin sín tí nkehe jínahya tjejóch'e sín. ²⁰ Kaín tí sín tjejóch'e nkehe jínahya na mé tóxrjéñhya sín t'inkaséyan chrókóchjinehya sín kíxin tsónoxínhya tí nkehe jínahya tjejóch'e sín. ²¹ A ntá tí sín tjejóch'e sín tí jína a na mé chéhe sín tóchjinehe sín tí t'inkaséyan kuénte Dios kíxin tsónoxín tí nkehe ch'e sín kíxin ntá kaín xín chojni mé tsjatsoan sín kíxin tjejóch'e sín tí nkehe tóxrjínhin Dios.

Ch'ín Juan Bautista chrónka ínaá kuénte ch'ín Jesús

²² Na ntá chr'éxín ch'ín Jesús la ko tí sín k'uájiko ch'án na sákjuí sín estado Judea. Ntaha k'uéjóko sín ch'án kuíkite ch'án chojni. ²³ Kjaxin ch'ín Juan kjuák'e ch'án chjasin Enón chjino tí chjasin Salim na mé ntiha kjuák'e kuíkite ch'án chojni kíxin ntiha mé yeé ntá siín. Na ntá nkáki sín kuíkite sín. ²⁴ Mé xíkaha kónhen naxa kjuák'echjinahya ch'ín Juan.

²⁵ Ntá tí sín k'uájiko ch'ín Juan la ko tí sín judío mé kjuachaxin kichó sín kíxin nkexrí íchá jína chrókótjuáxin chojni, ichro sín. ²⁶ A ntá tí sín k'uájiko ch'ín Juan sákjuítsjehe sín ch'án chénka sín ch'án kíxin:

—Maestro, tí ch'ín kjuák'ekoa tóhe ntarío Jordán, na mé tí nkexro tsíchronka kuénte ch'án, la mé itjen ch'án tikite ch'án chojni la ko kaín xín chojni mé tjichréhe sín ch'án —ichro sín.

²⁷ Na ntá ntáchro ch'ín Juan kixin:

—Tí chrókjuanjonhya Dios kjuachaxin ntá chrokjuahya chrók'uáyéhe chojni. ²⁸ Ó kuínhínrá ntoá k'uéxrjanka senó kíxin janhya tí Cristo. Náhí. Janhan ó kuítuannuá kuítónxián ntja tsóxrjanka kíxin ó tsi ch'án. ²⁹ Éxí yóhé ijkno ch'ín tsotéhe na mé jehe ch'án mé ts'áyéhe ch'án tí ichjién ch'án. A ntá tí ch'ín chóxin ch'án mé chéhe asén ch'án tjetinhin ch'án tjenixja tí ch'ín ts'áyéhe ichjién a. Mé xíkaha janhan imá chàna kíxin xíkaha sítónhen kíxin itsjé chojni sítóchjinehe sín tí ch'ín Jesús tsinhin sín nkehe tí tjenixja ch'án. ³⁰ A ntá jehe ch'án t'ichjánxin qantsí ts'etqan ch'án. A ntá janhan la kénhyó —mé chro ch'ín Juan.

Tí nkexro kuixín nkaya nkajní

³¹ Tí nkexro kuixín nkaya nkajní mé kaín nkehe t'etuenhen ch'án. A ntá ijkno chojni kuénte chjasintajni ó mé chrónka kuénte chjasintajni ó. A ntá tí nkexro kuixín nkaya nkajní mé kaín nkehe t'etuenhen ch'án. ³² Jehe ch'án mé chrónka ch'án tí nkehe tsík'ikon ch'án la ko tí nkehe tsíkinhin ch'án. Kjáñchó kohya chojni titekaon sín tí nkehe chrónka ch'án. ³³ A ntá jnkójn nkexro titekaon sín tí nkehe chrónka ch'án na mé xíkaha tjakoxin ch'án jie kíxin chaxin ntoá chrónka Dios ³⁴ kíxin tí nkexro ichr'án Dios mé nixja itén Dios kíxin jehya intsíkoá tí Nchákuén Dios k'uáyéhe ch'án. Náhí. ³⁵ It'éni Dios mé tjuèhe ch'án tí Xjeen ch'án na mé xíkaha ó tsíchjéhe ch'án kjuachaxin kíxin kaín xín nkehe ts'etuenhen ch'án. ³⁶ A ntá tí nkexro tsitekaon tí Xjeen Dios mé xíkaha tsochónta sín tí kjuachón

jnkochríxín. A ntá tí sín titekakuenhya sín tí Xjeen Dios mé tsochóntahya sín tí kjuachón jnkochríxín xíkaha. Tí sín a mé Dios sinchekjasóte sín jnkochríxín.

4

Ch'ín Jesús ikjo ch'án ijnko tjan samaritana

¹ A ntá tí sín fariseo mé kónohe sín kíxin qantsí tsjé chojni chréhé sín tí ch'ín Jesús kuíkíte ch'án sín na ntá tí chojni chréhé sín tí ch'ín Juan la kánhyó tsjé sín. ² Kjánchó jehya ch'ín Jesús kuíkíte ch'án chojni. Méxrä tí sín k'uájiko ch'án mé kuíkíte sín chojni. ³ A ntá tió kónohe ch'ín Jesús kíxin xíkaha tsíkinhin tí sín fariseo ntá k'uaxrjexín ch'án tí estado Judea xíkjan ch'án estado Galilea ínaá.

⁴ Ntá t'ichjánxín ts'átsinka ch'án estado Samaria. ⁵ A ntá kjuíji ch'án ijnko chjasin mé it'in Sicar kuènte estado Samaria, mé chjino tí nonte tsíkjinchekitonhen ch'ín Jacob tí xjeen ch'án José. ⁶ La ó chjino tjen tí tòye takitsje chojni inta mé it'in Ínté Jacob. Na ntá ó chonkíxin kjui sín ntiha. Méxrä tí ch'ín Jesús la imá kóxrjé ch'án kíxin imá kjín tí ntia kjuixin ch'án ntá kjuák'etjaxin ch'án chrínta tí tòye takitsje sín inta. ⁷⁻⁸ Ntahó kuítóhe ch'án. A ntá tí sín k'uájiko ch'án sákjuí sín tí chjasin chjinaxón sákjuík'lena sín nkehe sineko sín ch'án. Ntá séhyó ikui ijnko tjan kuènte estado Samaria ikui tjan tsakitsje tjan inta. Ntá ntáchro tí ch'ín Jesús kíxin:

—Chjina intsí ntá its'ia —ichro ch'án.

⁹ A ntá tí tjan samaritana mé kjuanchankíhi tjan tí ch'ín Jesús kíxin:

—¿Nkekuènté kíxin jaha ijnko chojni judío mé chrókjuanchana ntá kíxin janhan ijnko chojni samaritana? —mé chro tí tjan a.

(Mé xíkaha kjuanchankí tjan kíxin tí sín judío mé ninkehó t'ikonya tí sín samaritano.)

¹⁰ Na ntá ntáchro ch'ín Jesús kíxin:

—Chrókónoha tí nkehe tjanjon Dios la ko chrókjuatsoan jaha nkexro tí tjetjanchaha ntá ntá chrókjuanchana ntá, ntá chrótjaha tí ntá tjechón chaxín —ichro ch'ín Jesús.

¹¹ Na ntá ntáchro tí tjan a kíxin:

—¿Ntá nkexrí kíxin xraahya jaha ninkehó nkehe tsakítsjeyá ntá kíxin tí tòye i la imá njinka? ¿Ntá nkexrí tsochjína tí ntá tjechón tjimé? ¹² Tí nkexro k'uaxrjeníxinni mé Jacob mé kuítóheni tí tòye tjiá ntá ntihi la ko kjaxin ik'uí ch'án tí ntá la ko kjaxin ik'uí tí xjeen ch'án la ko tí iko kuènte ch'án. ¿A ntá xá jaha la xá qantsí má tjetoan jaha, a ntá jehe ch'án la kénhyó ní? —mé kjuanchankíhi tjan tí ch'ín Jesús.

¹³ Na ntá kjuátuhe ch'ín Jesús ntáchro ch'án kíxin:

—Tí sín it'i sín tí ntá ntihi tí tòye i nántaxón its'en sín ntá ínaá. ¹⁴ A ntá tí sín its'i sín tí ntá sintakitonhan sín mé í ts'enhya sín ntá ínaá. Tí ntá sintakitonhan sín mé ts'óna éxí yóhe ijnko ntá ts'axrje nkaya qasén sín mé tsinkákjanjon tí kjuachón tsochón sín jnkochríxín —ichro ch'án.

¹⁵ Ntá ntáchro tí tjan a ínaá kíxin:

—Chjina tí ntá, a ntá ts'énhyana ntá ínaá la ko ts'inkahya ntihi tsakítsje ntá —ichro tjan.

¹⁶ Ntá k'uetoan ch'ín Jesús kíxin:

—Sátjia tjík'iyéhé xiá ntá ts'inkará ntihi ínaá —ichro ch'án.

¹⁷ Ntá ntáchro tjan kíxin:

—Chontahya xiná —ichro tjan.

Ntá ntáchro ch'ín Jesús kíxin:

—Chaxín ntáchrúa kíxin chontahya jaha xiá. ¹⁸ K'uéchonta jaha in'ó xiá, a ntá tí ch'ín chonta jie jehya xiá. Na mé chaxín tí nkehe ntáchrúa kíxin chontahya xiá chaxín —ichro ch'án.

¹⁹ Na ntá kuínhin tjan tíha ntá ntáchro tjan kíxin:

—Tíkuñ kíxin jaha ijnko nkexro chrónka itén Dios. ²⁰ A ntá tí sín k'uaxrjeníxinni k'uixin ósé mé k'uxrinxakonxín sín Dios tí jnä ntihi. Kjánchó jahará chojni judío mé ntáchrórá kíxin tí njinko jié chjasin Jerusalén kaín ni chróxraxinkakonxínni Dios —ichro tjan.

²¹ Ntá ch'ín Jesús ntáche ch'án tjan kíxin:

—Títekávan kíxin tjetsi tí hora a tsoxráxinkákonxínyará It'eni Dios tí jnä ntihi la ko tsoxráxinkákonxínyará ch'án chjasin Jerusalén kjaxin. ²² Jahará chojni samaritano chonhyará tí nkexro xráxinkáonrá. Ntá kaín ni chojnini judío mé chóxinni tí nkexro xráxinkaonni. Méxra tí nkexro tsjakjlinhin chojni tí jie yámá sín mé ts'axrjeníxín sín judío. ²³ Ntá tjetsi tí hora a na mé tí jie ó kui tí hora a na tí sín chaxín tjinkaon sín chróxraxinkaon sín It'eni la mé asén sín ó tsoxraxinkakonxín sín It'eni Dios. Dios mé tóxrjinhij ch'án kíxin chojni xikaha chrókjuich'e sín chróxraxinkakonxín sín ch'án. ²⁴ Jehe Dios na mé nchakuen ó, a ntá tí sín chróxraxinkaon sín ch'án na mé t'ichjánxín kíxin asén sín ó tsoxraxinkakonxín sín ch'án —mé xikaha chrónka ch'ín Jesús.

²⁵ A ntá ntáchró tí tjan a kíxin:

—Ó nóna kíxin itsi tí nkexro Mesías, tí nkexro a mé Cristo. Tió tsi ch'án ntá tsjakohéni ch'án kaín xín nkehe —ichro tjan.

²⁶ Ntá ntáchró ch'ín Jesús kíxin:

—Tí nkexro a la mé janhan tjétjuá jie —ichro ch'án.

²⁷ Na ntá tí sín k'uájiko ch'án mé kjaxin sín tí chjasin a, ntá chrakon sín k'uikon sín kíxin tjenixjehé ch'án ijnko chojni chjin. Kjánchó nijnko sín kjuanchankíehya sín ch'án kíxin nkehe tjinkaon ch'án na nkekuénté nixjehé ch'án tí tjan a. ²⁸ A ntá tí tjan mé kjuak'e tjan tí tóa nonte ntá sákjuí tjan tí chjasin ntaha ntáche tjan tí sín ntaha kíxin:

²⁹ —Intárá sátsjitsjeheni ijnko ch'ín chrónka ch'án kaín xín nkehe kjuit'a tí senó a. ¿Xá chrókójehya tí nkexro i Cristo? —ichro tjan.

³⁰ Na ntá tí chojni a mé xrákuaxin sín tí chjasin a ntá kuitsjehe sín tí ch'ín Jesús. ³¹ Naxa tihya sín nachrohe tí sín k'uájiko ch'án mé chrónóehé sín ch'án ntáchró sín kíxin:

—Maestro, kjaxian chrókjonte nkehe —ichro sín.

³² Kjánchó ntáchró ch'án kíxin:

—Ó chonta janhan nkehe siné. Jahará la kjá naxa noahyará —ichro ch'án.

³³ A ntá tí sín k'uájiko ch'án mé kjuanchankíhi sín kíchó sín kíxin:

—¿Xá jnkojín sín tsíkikao sín nkehe kjóne ch'án? —ichro sín.

³⁴ Kjánchó ntáchró ch'ín Jesús kíxin:

—Éxi yóhé chrókjone nkehe mé tí sit'a tí xra la ko tsjixinna tí xra kuénte tí nkexro chr'anna k'uinka. ³⁵ Ntáchrórá kíxin: “Noó nitjó naxa t'itjáyan tsochónhenni ntá tsotjáni noatrigo”, ichrorá. Kjánchó ntáxrajan kíxin chrótsjehérá tí no a kíxin ó tsicha la ko ó tinkáxamá kíxin ó jína chrótjáni. ³⁶ Tí sín ch'e xra tjá sín mé tsoxenkehe sín. A ntá tí nkehe tjá sín mé ts'ayéhé kjuachón jnkokchríxín. Ntá tí sín k'uenká sín nonte la ko tí sín tjá sín jnkokón tsochéhé sín. ³⁷ Mé xikaha tsoxiteyá tí nkehe ntáchró sín kíxin: “Ijnko nkexro mé t'enka noa, a ntá ókjé sín tsotjá sín tí noa a”, ichro sín. ³⁸ A ntá janhan ichr'an tí jahará tsotjará ijnko nonte tsík'énkahyará. Na mé ókjé sín kjuich'e sín xra ntá jahará tsjachará tí xra kjuich'e tí sín a —ichro ch'án.

³⁹ A ntá itsjé tí sín samaritano kuénte tí chjasin ntiha mé kjuankíxín kuinkáchónki sín tí jehe ch'án kíxin xikaha chrónka tjan kíxin jehe ch'án ó chrónka ch'án kaín xín nkehe kjuich'e tjan tí senó a. ⁴⁰ A ntá tió kuínhin sín tí nkehe chrónka tjan ntá kui sín tí tjen ch'ín Jesús ntá chrónóehé sín ch'án kíxin tsitohe ch'án ntiha. Ntá kuítohe ch'án ntiha iyó yaon.

⁴¹ Ntá itsjé sín kjaxin kuinkáchónki sín ch'án kíxin tí nkehe kuínhin sín nixja ch'án. ⁴² Ntá ntáche sín tí tjan a kíxin:

—Ntá jie jehya jehó tí nkehe ch̄ronka kuítekaonni. Náhí. Tí jie ó kuínhinni nixja ch'án ntá kónoheni kíxin jehe ch'án chaxín tí nkexro Cristo sinchekaá tí chojni chjasintajni —ichro sín.

Ch'ín Jesúus kjuínchekitóhe jína ijnko xjeen ijnko ch'ín ch'ehe xra gobierno

⁴³ A ntá k'uátsínka iyó yaon ntá ch'ín Jesúus k'uaxrjexín ch'án estado Samaria ntá sákjuí ch'án nó estado Galilea. ⁴⁴ A ntá jehe ch'án tsíntáchro ch'án kíxin tí nkexro ch̄ronka itén Dios la tí chjasén sín mé tjikosáyehya sín ch'án. ⁴⁵ Kjánchó tió kjuíji ch'án tí estado Galilea na mé k'uáyéhé sín ch'án la ko kjuikosáyeha sín ch'án jína kíxin kjaxin sín sátsíkji sín tí kia pascua chjasin Jerusalén tsík'ikon sín kaín tí kjuaxroan kjuasixín ch'án tí kia ntihá.

⁴⁶ Ntá xíkjan ch'ín Jesúus ínaá chjasin Caná, estado Galilea, na mé ntihá tsíkjinchekjaminca ch'án tí ntá tí xranvino a. Ntaha mé kjuák'e ijnko ch'ín ch'ehe xra gobierno. A ntá níhi tí xjeen ch'án ntoa itjen chjasin Capernaum. ⁴⁷ Ntá kuínhin tí ch'ín ch'ehe xra gobierno kíxin itjen ch'ín Jesúus tí estado Galilea tsíkixín ch'án estado Judea ntá sákjuíchréhé ch'án chrónóéhé ch'án tí ch'ín Jesúus kíxin sáchrókjui ch'ín Jesúus ntoe ch'án sinchekitóhe jína tí xjeen ch'án ó tjet'en xjan. ⁴⁸ Ntá ntáchro ch'ín Jesúus kíxin:

—Kja tí jahará tí chrók'uikonhyará kjuaxroan chrókjuásian la chrókuinkachónkihyará tí janhan —ichro ch'án.

⁴⁹ Ntá chrónòa tí ch'ín ch'ehe xra gobierno ntáchro ch'án kíxin:

—¿Á chrókójinahya sáchrókjui ntona jaí kíxin xjanna ó tjet'en? —ichro tí ch'ín a.

⁵⁰ Ntá kjuátēhe ch'ín Jesúus ntáchro ch'án kíxin:

—Ikjan sájtja ntoa kíxin tí xjaan na ó jína tjen jie —ichro ch'án.

Ntá kuítekaon ch'án nkerí ichro ch'ín Jesúus ntá sákjuí ch'án. ⁵¹ A ntá kjuíji ch'án chjino ntoe ch'án ntá xrínahya tí sín ch'ehe sín ch'án xra kjuíxinhin sín ntia chrónka sín kíxin:

—Xjaan la ó jína tjen —ichro sín.

⁵² Ntá kjuanchankíhi ch'án sín kíxin nkehora kjuankíxin kuítóhe xjan jína, na ntá chrónka sín kíxin:

—Ijna la una kónjín mé kjuìn tí sóa —ichro sín.

⁵³ Ntá kónohe tí it'é xjan kíxin xíkahá tí hora tsíntáchro ch'ín Jesúus kíxin tí xjeen ch'án na ó jína tjen. A ntá jehe ch'án la ko kaín tí sín siín ntoe ch'án mé kuinkáchónki sín tí ch'ín Jesúus.

⁵⁴ Tíha mé tí yóxin kjuaxroan kjuasin ch'ín Jesúus tió kuixín ch'án estado Judea ikjan ch'án estado Galilea.

5

Ch'ín Jesúus kjuínchekitóhe jína ijnko ch'ín tsík'en tote chjasin Betesda

¹ Ntá chr'éxín tí sín judío mé kjuasin sín ijnko kia na ntá ch'ín Jesúus xíkjan ch'án chjasin Jerusalén ínaá. ² A ntá ntaha chjino tí ntója t'ixenxín kolélo chjasin mé tjen ijnko pila tóxroyéya ntá mé nkiva hebreo tí ntá mé it'in Betesda. A ntá chrínta tí pila siín in'ó cuarto ntsíntsí. ³ Ntaha tjejótsínka nchónhya chojni níhi, iso sín t'íkonhya la ko iso sín xitjahya tji la ko iso sín tsík'en toté. Tjejóchónhen sín kíxin nkehora tsinkí ntá ⁴ kíxin nántaxón k'uínkajin ijnko ángel kjuíánkí ntá kjuínchekinkí ntá. A ntá tí nkexro senó tsjiánkí ntá mé tsitohe jína kjónté cualquiera chin chóntha. ⁵ A ntá ntaha kjuák'e ijnko ch'ín na mé chóntha ch'án treinta y ocho nánó níhi ch'án. ⁶ A ntá tió k'uíkon ch'ín Jesúus kíxin tjetsínka tí ch'ín a la ko kónohe ch'án kíxin ósé níhi ch'án, ntá kjuanchankí ch'án kíxin:

—¿Á tjinkávan tsitoha jína? —ichro ch'án.

⁷ Ntá ntáchro tí sinníhi kíxin:

—Chóntahyani nínkexró tsjinkitsani tsjiánkini ntá. A ntá tí tjinkaonni chrókjuánkini ntá la ntá ókjé nkexro tjítaón ntia tjiánkí ntá senó —mé chro tí sinníhi.

⁸ A ntá k'uetoan ch'ín Jesúus kíxin:

—Ijie la t'inkatjen, tjatsíyan kaniqa, itjia —ichro ch'án.

⁹ Ntá tuénxín kuítuhe ch'án jína, ntá kjuatsen ch'án kanięe ch'án kjuankíxin itji ch'án. Kjánchó yaon sábado tíha mé tí yaon t'ok'éhe sín. ¹⁰ Mé xikaha tí sín judío ntáche sín tí ch'ín kuítuhe jína kíxin:

—Ijie tí yaon t'ok'éheni ntá kohya kjuachaxin tsamá kaniąa —ichro sín.

¹¹ A ntá ntáchro tí ch'ín a kíxin:

—Tí nkexro kjuínchekitona jína mé k'uetuqanna kíxin tsjatsíyan kaniąana la ko sátsjia —ichro ch'án.

¹² Ntá kjuanchankíhi sín ch'án kíxin:

—¿Nkexhéhe tí nkexro k'uetuqhan kíxin tsjatsíyan kaniąa la ko sátsjia? —ichro sín.

¹³ A ntá tí ch'ín tsíkituhe jína na í kjuátsqanhyá ch'án tí nkexro kjuínchekituhéhe ch'án jína kíxin ntaha la siín nchónhyá chojni, a ntá ntahó k'uítjáyanxín ch'ín Jesús. ¹⁴ A ntá chr'éxín ch'ín Jesús xeta ch'án tí ch'ín a nkaxenhen tí ninko jié ntá ntáchro ch'án kíxin:

—Tsjehé kíxin ijie la ó jína tjen jaha la í tjásinhyá jié ínaá. A ntá tí tsjásian jié ínaá a ntá antsí má jínahya tsónhan —ichro ch'án.

¹⁵ A ntá sákjuí tí ch'ín a ntá chénka ch'án tí sín judío kíxin jehe ch'ín Jesús mé kjuínchekituhéhe ch'án jína. ¹⁶ Mé xikaha tí sín judío kjuankíxin sín chónkíhi sín tí ch'ín Jesús la ko chrók'óyán sín ch'án kíxin kjuínchekituhéhe ch'án chojni jína tí yaon t'ok'éhe sín.

¹⁷ Kjánchó ch'ín Jesús ntáche ch'án tí jehe sín kíxin:

—Méxra T'aná naxaq tjech'e ch'án xra. A ntá janhan kjaxin tjét'a xra —ichro ch'án.

¹⁸ Méxra xikaha tí sín judío antsí tjinkaon sín chrók'óyán sín ch'án kíxin kuítækakuenhyá ch'án tí ley kuente tí yaon t'ok'éhe sín la ko kjaxin ntáchro ch'án kíxin tí It'é ch'án la mé Dios, mé xikaha ncheyóhe ch'án ąsén ch'án Dios.

Tí kjuachaxin chóntha tí Xjeen Dios

¹⁹ Ntá ntáche ch'ín Jesús tí jehe sín kíxin:

—Ijnko nkehe tjetoan tsotjonkará kíxin tí Xjeen Dios nkaya nkajní tí jehó kjuachaxin kuente ó la mé xitjahya sich'e xra. Jehó tí xra t'ikon ch'án tjech'e It'é ch'án mé kjaxin ch'án xikaha ch'e ch'án. ²⁰ A ntá tí It'é mé tjuéhe tí Xjeen ch'án, la ko tjakohé ch'án kaín xín xra ch'e ch'án, la ko antsí tjetoan tí xra naxaq tsjakohé ch'án kíxin ntá tsochrakonrá kíxin ts'ikonrá tí xra sich'e ch'án. ²¹ Tí It'é mé chóntha kjuachaxin nchexechón tí sín tsík'en la ko chjéhe ch'án sín kjuachón. A ntá tí Xjeen kjaxin chóntha kjuachaxin tsochjéhe kjuachón tí nkexro tjinkaon tsochjéhe ch'án. ²² A ntá It'é la í sinchekitoexíhyá ch'án ijié ninkexró. Kaín tí kjuachaxin kuente ch'án chjéhe ch'án tí Xjeen kíxin sinchekitoexín ch'án ijié chojni chjasintajni ²³ kíxin ntá kaín chojni tsjikosáyehe sín tí Xjeen éxi yóhe tjkosáyehe sín tí It'é ch'án. Tí sín tjkosáyehya tí Xjeen xikaha kjaxin tjkosáyehya sín tí It'é kíxin jehe ch'án mé tsíchr'án tí Xjeen.

²⁴ Ijnko nkehe tjetoan tsotjonkará kíxin tí jnkojínrá tjejotinhínrá tí nkehe tjàkua la ko tinkachónkirá tí T'aná, mé tí nkexro ichr'ánnna, na mé xikaha ó chontará tí kjuachón la ko tsjasótiahayará, na mé kuitohérá tí ntja chrók'uénxinrá, la ntá jie kjuankíxinrá tsochontará tí kjuachón jnkochríxín. ²⁵ Ijnko nkehe tjetoan tsotjonkará kíxin ó tsi tí yaon, na mé jie tíha, mé xikaha tsónhen kíxin tí sín tsík'en tsinhin sín tsonixja tí Xjeen Dios. A ntá tí sín tsitekaon sín na mé ts'ejóchón sín. ²⁶ Tí It'é mé chóntha ch'án kjuachaxin tsjanjon ch'án tí kjuachón la ko jehe ch'án mé chjéhe ch'án kjuachaxin tí Xjeen kíxin kjaxin tí Xjeen tsjanjon tí kjuachón ²⁷ la ko kjaxin chjéhe ch'án kjuachaxin tí Xjeen ch'án sinchekitoexín tí ijié chojni chjasintajni kíxin jehe mé tí Xjeen Dios K'óna Chojni. ²⁸ Chrakonhyará tjétjonkará xikaha. Na mé ó tsi tí yaon kíxin kaín tí sín tsík'en mé tsinhin sín tsonixja ch'án. ²⁹ A ntá ts'axrjexín sín tí tòye la tí sín kjuich'e sín xra jína mé tsoxechón sín ntá tsochóntha sín tí kjuachón. A ntá tí sín kjuich'e sín xra jínahya na mé kjaxin tsoxechón sín ntá sátsji sín tsjasóte sín.

Tí kjuachaxin chóntha ch'ín Jesús

³⁰ "Tí jehó kjuachaxin kuénta na xitjahya sit'a ninkehó xra. A ntá jie ntakitoaxián tí ijie exí k'uetuqanna T'aná. A ntá tí nkehe ntakitoaxián la jína ntoá kíxin tjinkakonhya sit'a exí tjinkaván. Náhí. Exí tjinkaon T'aná, tí nkexro ichr'áんな, mé xíkaha tjét'a. ³¹ A ntá tí chróxrjanka kíxin nkexrí imá jína janhan la tíha la ninkehó kjuachaxin chróchontahya. ³² Itjen í jnko nkexro tjechrónka nkexrí tjén janhan a ntá ó nòna kíxin tí nkehe chrónka ch'án la sínkí. ³³ Jahará tsíkéetuqhénrá chojni kjuíkanchankíhi sín tí ch'ín Juan kíxin nkexrínchi tjén janhan. A ntá tí nkehe tsíkjatehe ch'án la chaxín ntoá tiha. ³⁴ Kjánchó chontiaxinhya tí nkehe tsochrónka nijnko chojni chjasintajni nkexrínchi tjén janhan. Jehí ntáxrjan tíha kíxin jahará jína chrókuaárá. ³⁵ Tí ch'ín Juan kjuák'e exí yóhe ijnko xrohi kjuák'eché k'uínkaséyanxín la ko jahará kócháhará xíkaha, kjánchó séhya kóxrjíhanrá tí xrohi a. ³⁶ Kjánchó siín nkehe antsí tjetoan tjakoxín nkexrí tjén janhan, a ntá kánhyó tjetoan tí nkehe tsíchrónka tí ch'in Juan. Tí xra tjét'a, mé tí xra kjuanjon T'aná sit'a tsjixinna tí xra, na mé tíha mé tjakoxín kíxin chaxín T'aná tsíchr'án k'uinka. ³⁷ Kjaxin jehe T'aná, tí nkexro ichr'áんな, mé chrónkaxín ch'án nkexrí tjén janhan. A ntá jahará naxa kiényará tí nkehe nixja ch'án la ko k'uíkonhyará ch'án ³⁸ la ko kjaxin itén ch'án kuítóehya nkaya kjárá kíxin tjinkákonhyará tsítekáonrá tí Xjeen Dios tsíchr'án tsíki. ³⁹ Jahará nchekuáxinrá jína tí xroon tsíkjín tí sín tsíchrónka itén Dios ósé kíxin ntáchrórá kíxin ntaha ts'itjaxínrá tí kjuachón tsochontará jnkochríxín. A ntá tí nkehe tsíkjín sín ósé mé chrónka kuénte janhan. ⁴⁰ Kjánchó jahará tjinkákonhyará tsochjinará tí tjén janhan kíxin chrók'uayéhérá tí kjuachón a.

⁴¹ 'Janhan na tjeyáhya kíxin chojni chrókjuikosáyana sín. ⁴² A ntá janhan ó nòna kíxin jahará la tjuéhyará Dios. ⁴³ Mé k'uinkaxian janhan tí kjuachaxin kuénte T'aná. Kjánchó jahará la títekákonhyará. A ntá tí chrókui í jnko nkexro kjuachaxin chrókuakitsjeníxín asén ó, a ntá tíha mé tjinkáonrá chrókuítekákonhénrá. ⁴⁴ ¿Nkexrí chrókuítekáonrá jahará kíxin tjeyárá kíxin tí chojni chjasintajni chrókjuikosáyahará sín, a ntá tjeyáhyará tí kjuachaxin chrókjuanjon jnkokoá Dios? ⁴⁵ Tsontáchróhyará kíxin janhan tsjanchíá jie tí jahará nkayakon T'aná. Náhí. Ch'ín Moisés mé tsjanchia ch'án jie tí jahará kíxin tsontáchrórá kíxin jehe ch'án kuinkachónkirá. ⁴⁶ Kja tí jahará chrókuítekáonrá nkehe tsintáchró ch'ín Moisés ntá chrókuítekáonrá tí janhan kíxin tí xroon tsíkjín ch'án mé chrónka kuénte tí janhan. ⁴⁷ A ntá tí títekákonhyará tí nkehe tsíkjín ch'án, ¿ntá nkexrí chrókuítekáonnará nkehe ntáxrjan janhan? —ichro ch'án.

6

*Ch'ín Jesús kjuanjon ch'án nkehe kjóne in'ó mil chojni
(Mt. 14.13-21; Mr. 6.30-44; Lc. 9.10-17)*

¹ A ntá chr'éxin ntá sákjuí ch'ín Jesús k'uátöye ch'án tí ntayaon Galilea na mé tí ntayaon Tiberias tíha. ² A ntá nchónhya chojni tinkáchréhé sín kíxin k'uíkon sín tí kjuaxroan jie kjuasin ch'án kjuínchekitohe ch'án jína tí sinníhi. ³ A ntá jehe tí ch'ín Jesús chrìin ch'án ijnko jná na ntá ntaha kjuák'etjaxín ch'án la koí tí sín k'uájiko ch'án a. ⁴ A ntá í séhya ts'ixin tí kia pascua a mé kié tí sín judío a. ⁵ A ntá tí ch'ín Jesús k'uíkon ch'án kíxin nchónhya chojni chrìin sín kjuichréhé sín ch'án ntá kjuanchankíhi ch'án tí ch'ín Felipe kíxin:

—¿Nketí chrók'uénani nkehe sine kaín tí chojni a? —ichro ch'án.

⁶ Mé xíkaha ntáchró ch'án kíxin siná nkehe tsixro ch'ín Felipe. A ntá tí ch'ín Jesús la ó nohe ch'án nkehe tí kjuaxroan tsjasin ch'án. ⁷ Ntá kjuátuhe ch'ín Felipe ntáchró ch'án kíxin:

—Kjónté doscientos chichaon denario chróchontani chrók'uínáxin tí niotja la naxa chrókjuachahaya chrók'uayéhе jnkojnko sín tot'o tí niotja a —ichro ch'án.

⁸ A ntá ch'ín Andrés, ijnko tí sín k'uájiko ch'ín Jesús la sávē mé ch'ín Simón Pedro mé ntáchró ch'án kíxin:

⁹ —Ntihi tjen ijnko xjan ntoa chóntha in'ó niotja tsík'óna noa cebada la ko chóntha ch'án yaá koche. ¿Xá chrókuacha tíhó kíxin nchónhya chojni siín? —ichro ch'án.

¹⁰ A ntá ntáchro ch'ín Jesús kíxin:

—Tétueñhén tí sín siín a kíxin ts'ixitjaxin sín —ichro ch'án.

A ntá nchónhya ika yoa siín na ntá ntaha k'uixitjaxin sín na mé exí in'ó mil chojni k'uixin sín. ¹¹ A ntá ch'ín Jesús kuákja ch'án tí niotja ntá kjuanchehe ch'án Dios kjuasáya ntá chjéhe ch'án tí sín k'uájiko ch'án. A ntá jehe sín k'óxikayéhe sín chjéhe sín kaín tí sín sitjaxin a. Xikaha kjaxin k'óxikayéhe sín tí koche. A ntá kaín sín kjóne sín exí tjinkaon sín.

¹² Kjuxin kjóne sín ntá k'uëtuñhen ch'ín Jesús tí sín k'uájiko ch'án ntáchro ch'án kíxin:

—Tjénajínrá tí nkehe tot'ó sítexhe sín kíxin ts'itjáyanhya ninkehó —ichro ch'án.

¹³ Ntá xikaha jehe sín kjuenájín sín kjuinchekaón sín teyó ntaxra tí tot'ó tí in'ó niotja tsík'óna noa cebada sítexhe sín tí kjuixin tsíkjine sín. ¹⁴ A ntá tí sín kjóne tí niotja k'uíkon sín tí kjuaxroan jié kjuasin ch'ín Jesús ntáchro sín kíxin:

—Jehe ch'án mé chaxín tí nkexro tsíchr'án Dios kíxin itsi tí chjasintajni tsjakohéni ch'án —ichro sín.

¹⁵ Kjánchó ch'ín Jesús mé kónohe ch'án kíxin tjinkaon sín sáchrókuiko sín ch'án chróchr'áxenhen sín ch'án tí xrä rey kíxin chrók'uëtoan ch'án. A ntá jehe ch'án tjinkakonhya ch'án tíha ntá jehó ch'án sáxíkji ch'án nteje ínaá kjuák'e ch'án ntiha.

Éxí ijnko ntia xikaha kjuítaón ch'ín Jesús tí ntayaon

(Mt. 14.22-27; Mr. 6.45-52)

¹⁶ A ntá ó kóntó ntá tí sín k'uájiko ch'ín Jesús k'uínkajinxin sín jná sákuí sín chrínta ntayaon ¹⁷ k'uít'ótjen sin ijnko ntabárco kjuankíxin sín ts'atoyé sín ntayaon sátsji sín chjasin Capernaum. Na ó k'uixin tie na naxa kjanhya ch'ín Jesús. ¹⁸ Ntá kjuankíxin chjéhe xrínto tsanká ntá kjuankíxin tinkákjaminkí ntá. ¹⁹ A ntá tió kjuacha sín á in'ó o injon kilómetro ntá xrínahya k'uíkon sín tí ch'ín Jesús tinkákochjinehe ch'án tí ntabárco, exí ijnko ntia tjetjitaón ch'án tí ntá, ntá k'uíkon sín ntá imá chrakon sín. ²⁰ Kjánchó ntáchro ch'án kíxin:

—Janhan tíha. Chrakonhyará —ichro ch'án.

²¹ Ntá imá chéhé sín k'uít'ótjen ch'án tí ntabárco. Ntá ó tuénxín kjuíji sín tí chjasin sátsji sín.

Tí chojni xritjeyá sín tí ch'ín Jesús

²² A ntá tí yaon chr'éxin na mé tí sín kuítóhe tóhe ntayaon na mé ó nohe sín kíxin jnkokoáxon ntabárco k'uékjak'e ntiha la ko ó nohe sín kíxin ch'ín Jesús kjá ni sátsíkjikohya sín ch'án na mé k'uíkon sín kíxin jehó tí sín k'uájiko ch'án sátsíkji sín. ²³ Kjánchó siín ntabárco tixin chjasin Tiberias tinkákochjinehe tí nó kjónexín sín tí niotja kjuanchaxín ch'ín Jesús kjuasáyé Dios. ²⁴ A ntá tió k'uíkon sín kíxin kohya ch'ín Jesús la ko kjaxin kohya tí sín k'uájiko ch'án, ntá jehe sín mé k'uít'ótjen sín iso ntabárco ntá sákuí sín chjasin Capernaum sákuíkjayá sín tí ch'ín Jesús.

Ìnchéni Jesús mé exí niotja tjanjon kjuachón

²⁵ A ntá tóhe ntayaon xéta sín tí ch'ín Jesús ntá kjuanchankíhi sín ch'án kíxin:

—Maestro, ¿nkesá k'uinka ntihi? —ichro sín.

²⁶ Ntá kjuátuhe ch'ín Jesús ntáchro ch'án kíxin:

—Ó nóna kíxin jahará tjéyará tí janhan kíxin kjónterá niotja kókjahará, la jehya kíxin kiénxinrá tí kjuaxroan kjuásian. ²⁷ Chrókjuich'ehyará tí xrä chrók'uite tí nkehe chrókjónterá tjoka tsjeje ó. Náhí. Chrókjuéyará tí nkehe chrókjuejehya chrókjónterá chrók'uayéxínrá tí kjuachón jnkochríxín. Tí nkehe tjanjon tí Xjeen Dios K'óna Chojni mé chrókjónterá kíxin It'é ch'án mé tjakoxin ch'án kíxin tí Xjeen ch'án mé chóntha kjuachaxiéen tí jehe ch'án —ichro ch'ín Jesús.

²⁸ A ntá kjuanchankíhi sín ch'án kíxin:

—¿Nkexrí chrókjuich'eni chrokjuinchexiteyáni nkexrí tjinkaon Dios? —ichro sín.

²⁹ A ntá kjuátehe ch'ín Jesús ntáchro ch'án kíxin:

—Dios mé tjinkaon ch'án kíxin chrókuinkachónkirá tí nkexro tsíchr'án ch'án —ichro ch'án.

³⁰ Ntá kjuanchankíhi sín ch'án kíxin:

—¿Nkehe tí kjuaxroan chrókjuákoéxianni chrók'uikonni kíxin ntá chrókuitekaonni tí jaha? ¿Nkehe tí xrä ch'e jaha? ³¹ Tí sín tsík'axrjeníxinni k'uéjó sín ósé mé kjóne sín maná k'óna niotja tió k'uíxín sín nteje mé xíkaha tí xroon kuènte Dios tsíkjín ijkno nkexro ósé ntáchro kíxin: “Kjuanjon ch'án tí nkehe kjóne sín mé niotja tsíkixín nkaya nkajní”* —ichro sín.

³² A ntá kjuátehe ch'ín Jesús ntáchro ch'án kíxin:

—Ijkno nkehe tjetoan tjonkará kíxin jehya ch'ín Moisés kjuanjon tí maná k'óna niotja k'uínkajinxín nkaya nkajní. Náhí. T'aná mé tjetjanjon tí niotja chaxín jína k'uínkajinxín nkaya nkajní. ³³ Tí niotja tjanjon Dios mé tí nkexro k'uínkajinxín nkaya nkajní tjejochónxin chojni chjasintajni —ichro ch'án.

³⁴ Na ntá kjuanchia sín kíxin:

—Jaha Ínchéni, jnkochríxín chjehéni tí niotja a —ichro sín.

³⁵ A ntá ntáchro ch'ín Jesús kíxin:

—Janhan mé tí niotja tjanjon kjuachón. Tí sín tóchjina sín tí janhan í ts'enhya sín kjinta, la ko tí sín tsitekaon sín tí janhan í ts'enhya sín nta. ³⁶ Kjánchó éxí k'uétjónkará senó na ó k'uíkonrá tí janhan na kjónté naxqá títekákonhyará. ³⁷ A ntá kaín tí sín chjina T'aná la tsochjina sín tí janhan. A ntá kaín tí sín tjejótóchjinehe sín tí janhan la tsétuanhya sín kíxin sátsji sín. ³⁸ Janhan k'uinkaxian nkaya nkajní jehya tí xrä tóxrjina chrókjuít'a. Náhí. K'uinka kíxin chrókjuít'a tí xrä tóxrjinhin tí nkexro tsíchr'ánna. ³⁹ A ntá T'aná mé tí nkexro tsíchr'ánna mé tjinkaon ch'án kíxin sintak'itjáyanhya ninkexró tí sín chjina ch'án na mé tjinkaon ch'án kíxin janhan mé sintaxechón kaín sín tí yaon tsjixixín. ⁴⁰ Mé xíkaha tjinkaon tí nkexro tsíchr'ánna kíxin kaín tí sín ts'ikon sín tí janhan mé tí Xjeen Dios la ko tsitekaon sín tí janhan chrók'uáyéhe sín kjuachón jnkochríxín. A ntá janhan sintaxechón sín tí yaon tsjixixín —ichro ch'án.

⁴¹ A ntá tí sín judío kjuankíxi sín kjonta sín tí ch'ín Jesús kíxin tsíntáchro ch'án kíxin jehe ch'án mé tí niotja k'uínkajinxín nkaya nkajní. ⁴² Mé ntáchro sín kíxin:

—¿Á jehya tí Jesús, it'é mé it'ín José, na mé chóxinni tí it'é la ko tí iné ch'án? ¿Ntá nkekuénté ntáchro ch'án kíxin nkajní k'uínkajinxín ch'án? —ichro sín.

⁴³ Ntá kjuátehe ch'ín Jesús ntáchro ch'án kíxin:

—Títohérá tjóntahyará tí janhan. ⁴⁴ Kohya nkexro chrókóchjina tí tjén janhan tí chrókjuinkitsahya T'aná. A ntá tí sín tóchjina na mé sintaxechón sín tí yaon tsjixixín. ⁴⁵ Na mé tí sín k'uéchrónka itén Dios ósé mé tsíkjín sín xroon ntáchro kíxin: “Dios mé tsjakohé ch'án kaín chojni.”[†] A ntá kaín tí sín tsíkinhin tí nixja T'aná la ko kjuakohé ch'án sín mé sítóchjina sín tí tjén janhan.

⁴⁶ 'Jehya kíxin itjen ijkno chojni tsík'ikon T'aná. Náhí. Jehó tí nkexro kuixín tí tjen Dios mé tsík'ikon ch'án Dios. ⁴⁷ Chaxín tí nkehe tjéxrjanka kíxin tí sín titekaon sín tí janhan mé ó tsochónka sín kjuachón jnkochríxín. ⁴⁸ Janhan na mé tí niotja tjanjon kjuachón. ⁴⁹ Tí sín k'uaxrjeníxirá k'uéjó ósé kjóne sín tí maná k'óna niotja tió k'uéjó sín nteje, a ntá kjónté ik'uén sín k'uítjáyan sín. ⁵⁰ Tí nkehe xrjanka mé tí niotja k'uínkajinxín nkaya nkajní, a ntá tí sín sine tí niotja a mé ts'enhya sín. ⁵¹ Janhan mé tí niotja tjechón k'uínkajinxín nkaya nkajní. A ntá tí sín sine tí niotja a mé ts'ejochón sín jnkochríxín. Tí niotja tsjánjuan ts'ejochónxin chojni chjasintajni mé ntona tíha —ichro ch'ín Jesús.

⁵² A ntá tí sín judío mé sítjté sín itjo sín kichó sín ntáchro sín kíxin:

* **6:31** Salmo 78.24 † **6:45** Isaías 54.13

—¿Nkexrí chrókjujon ch'án ntœe ch'án chrókjóneni? —ichro sín.

⁵³ A ntá kjuátehe ch'ín Jesús ntáchro ch'án kíxin:

—Ntá tsotjónkará kíxin tí sintehyará ntœe tí Xjeen Dios K'óna Chojni, la ko tí ts'ihyará ijnié ch'án, ntá tsochontahyará kjuachón jahará. ⁵⁴ Tí sinterá ntona la ko it'irá jnina ntá tsochontará kjuachón jnkochríxín la ko janhan mé sintaxechónrá tí yaon tsjixixín.

⁵⁵ Kíxin ntona na mé chaxín nkehe ine chojni la ko jnina na mé chaxín nkehe it'i chojni.

⁵⁶ Tí sín ine ntona la ko it'i sín jnina mé jnkokoá tjenkayáxinkian sín la ko janhan mé xríkjan sín. ⁵⁷ T'aná tsíchr'án ch'án tí janhan mé chóntha kjuachaxin, a ntá janhan mé tjéchonxian tí jehe ch'án. Ntá tí sín sine tí ntona mé ts'ejóchónxin sín tí janhan. ⁵⁸ A ntá tjéníxja kuénte tí niotja k'uínkajinxin nkaya nkajní na mé yóehya tí maná tsík'óna niotja kjóne tí sín tsík'axrjeníxinrá ósé kíxin jehe sín na kjóne sín na kjónté k'uén sín. A ntá tí sinterá tí niotja k'uínkajinxin nkaya nkajní ntá ts'ejochónrá jnkochríxín —mé chro ch'ín Jesús.

⁵⁹ Kaín tíha mé kjuakohe ch'án tí sín tsíkójkotséxin tí njinko Israel chjasin Capernaum.

Tí nkehe chrónka ch'ín Jesús mé tjanjon kjuachón jnkochríxín

⁶⁰ A ntá tió kuínhin sín tí nkehe kjuako ch'ín Jesús ntá itsjé tí sín k'uájiko ch'án ntáchro sín kíxin:

—Imá xrä tí nkehe chrónka ch'án. ¿Xá nkexro chrókuinhin tíha? —ichro sín.

⁶¹ A ntá kónohe ch'ín Jesús kíxin xikaha tóxakonhen sín kíenxínya sín tí nkehe tsíntáchro ch'án ntá kjuanchankíhi ch'án sín kíxin:

—¿Á kjaxinxrá tjinkákonhyará tsinhínrá tíhi? ⁶² ¿Ntá nkexrí tsöñhen chrók'uikonrá kíxin tí Xjeen Dios K'óna Chojni mé sátsji ch'án ínaá tí nó tsíkixin ch'án tí tsíkjak'e ch'án ósé? ⁶³ Tí Nchakuen Dios mé tjanjon tí kjuachón, a ntá tí nto la ninkehó sínkíhya. Na ntá tí nkehe tjétjónkará na mé kuénte tí Nchakuen Dios na mé tjejóchónxin chojni. ⁶⁴ Kjánchó isorá naxá títekákonnahyará —ichro ch'án.

Mé xikaha ichro ch'án kíxin tí xrankíxín ó kónohe ch'án kíxin nkexro tí sín tsitekakuenhyá sín ch'án la ko kónohe ch'án kíxin nkexro sinchekji ch'án. ⁶⁵ A ntá ntáchro ch'án kíxin:

—Méxrä xikaha k'uétjónkará kíxin ninkexró tsöchjina tí tjén janhan tí tsjinkitsahya T'aná —ichro ch'án.

⁶⁶ A ntá kjuixin tíha ntá nchónhyá tí sín k'uék'ajiko ch'ín Jesús ntá xrínahya kuítuhe sín, í chrèhya sín ch'án. ⁶⁷ Ntá kjuanchankíhi ch'án tí teyó sín k'uájiko ch'án ntáchro ch'án kíxin:

—¿Á kjaxinxrá tjinkáonrá xikaha sáchrókjuirá? —ichro ch'án.

⁶⁸ Ntá kjuátehe ch'ín Simón Pedro kíxin:

—Jaha Ínchéni, ¿nkekuénté tjanchankíhíni á sáchrókjui ókjé? Jaha tí tan chrónka a mé tsochóntaxínni kjuachón jnkochríxín ⁶⁹ ntá kuítekaonni ntá ó noheni chaxín kíxin jaha tí Cristo mé Xjeen Dios tjechón —ichro ch'án.

⁷⁰ Ntá kjuátehe ch'ín Jesús ntáchro ch'án kíxin:

—Janhan kjuéyá tí kaín rá teyórá la ko jnkojínrá ntihi mé ts'ónará ijnko jínahya —ichro ch'án.

⁷¹ Tíha mé t'axrjexín tí ntáchro ch'ín Jesús chrónka ch'án kíxin ch'ín Judas Iscariote, tíha it'é mé it'in Simón, mé ijnko tí teyó sín tsíkjeyá ch'án ntá kjónté sinchekji ch'án tí ch'ín Jesús.

7

Tí sín jnkokoá kíchó ch'ín Jesús mé kuítekakuenhyá sín ch'án

¹ Ntá kjuixin tíha ntá k'uájí ch'ín Jesús tí estado Galilea. Chrók'uajihya ch'án tí estado Judea kíxin tí sín judío tjinkaon sín chrók'óyán sín ch'án. ² Kjánchó ó kuichjina tí yaon kia ntá tí sín judío sich'ena sín itsjé its'van tsjasixín sín kia.* ³ A ntá tí sín kíchó ch'ín Jesús

* ^{7:2} Levítico 23.34

ntáche sín ch'án kíxin:

—Chrókuitoahya ntihi. Sáchrókjuia estado Judea kíxin ntá kjaxin tí sín chréhe tí jaha tjejó ntiha chrók'uikon sín tí kjuaxroan tsjásian. ⁴ Kíxin tió tjinkaon ijnko nkexro kíxin chojni tsochóxin sín ch'án ntá móhya chrókjuich'e ch'án xra. A ntá tí chaxín tjetjásian kjuaxroan la jehya mó chrókjuásian kjuaxroan. Náhí. Chrók'uikon kaín xín chojni siín chjasintajni —mé chro sín.

⁵ Xikaha ntáchro tí sín kichó ch'án kjaxin jehe sín titekakuenhya sín tí jehe ch'án. ⁶ A ntá kjuátehe ch'ín Jesús ntáchro ch'án kíxin:

—Naxa kjuixrakáhyá tí hora kuéntana tsjásian kjuaxroan. Ntá jahará la cualquier hora tjinkáonrá jína chrók'uikonrá kjuaxroan. ⁷ Tí sín chjasintajni xitjahya tsóníkkakonhanrá sín tí jahará. Ntá janhan na imá nínkakonna sín kíxin ntátjan sín kíxin jehya jína tí nkehe tjejóch'e sín. ⁸ Jahará la sájtírá tí kia a. A ntá janhan la tjíhya kíxin naxa kjuixrakáhyá tí hora kuéntana —ichro ch'án.

⁹ Mé xikaha ntáchro ch'án ntá kuítohe ch'án estado Galilea.

Itjen ch'ín Jesús tí kia a

¹⁰ A ntá ó kjuixin sátsíkjí tí sín jnkokoá kichó ch'ín Jesús ntá jehe ch'án la kjaxin sákjuí ch'án tí kia a kjánchó noxínhya xritjak'e ch'án. ¹¹ A ntá tí sín judío mé xriteyá sín ch'án tí kia a la ntáchro sín kíxin:

—¿Xá nketí tjen tí ch'ín a? —ichro sín.

¹² A ntá itsjé sín ntiha mé kjo sín kichó sín kíxin nkexrí tjen ch'án. Iso sín ntáchro sín kíxin: “Jína ch'án”; kjánchó í so sín ntáchro sín kíxin: “Jehya chojni jína ch'án, méxra imá ch'iyeho ch'án chojni”, ichro sín.

¹³ Kjánchó noxínhya kjo sín xikaha kíxin chrakonhen sín tí sín judío a.

¹⁴ A ntá ó kjuíji jnkosiné tí kia a ntá k'uíxenhen ch'ín Jesús tí ninko jié ntá kjuankíxin ch'án kjuako ch'án. ¹⁵ A ntá tí sín judío chrakon sín komá sín ch'án ntáchro sín kíxin:

—¿Xá nkexrí nohe tí ch'ín i nchónhya tí nkehe kíxin tsíxrakoehya ch'án? —ichro sín.

¹⁶ Ntá kjuátehe ch'ín Jesús ntáchro ch'án kíxin:

—Tí nkehe tjàkua la jehya kuéntana na mé tí xra kuénte tí nkexro tsíchr'ánnna k'uinka.

¹⁷ Tí jnkojinrá tjinkáonrá chrókjuinchesiteyéhérá éxi tóxrjínhin Dios la tsonohará á chaxín kuénte Dios tí nkehe tjàkua ó á kuéntana tíha. ¹⁸ A ntá tí nkexro tjako tí nkehe t'axrjeníxin kja sín ó mé xikaha ch'e kíxin tjinkaon sín kíxin tí chojni ó mé chróchóntehé sín ch'án kjuasáya. A ntá tí nkexro tjinkaon kíxin tí chojni a mé chrókjuicosáyehe sín tí nkexro tsíchr'án ch'án na mé jehe ch'án mé tjako ch'án tí nkehe chaxín ntoá la ko ninkehó ch'iyahya tí jehe ch'án.

¹⁹ ¿Á jehya ch'ín Moisés tjáhará tí itén Dios chrókuítekáonrá? Kjánchó nijnkorá kuítekáuenhyará tí nkehe tsíkjín ch'án. ¿Méxra nkekuénté tjinkáonrá chrók'oyánrá tí janhan? —ichro ch'án.

²⁰ Ntá kjuátehe tí sín a ntáchro sín kíxin:

—Jaha chonta ijnko nchákuén sín kíxin. ¿Xá nkexro chrók'oyán tí jaha? —ichro sín.

²¹ Ntá kjuátehe ch'ín Jesús ntáchro ch'án kíxin:

—Jnkokoá kjuaxroan kjuásian tí yaon t'ok'éheni ntá chrakonrá. [†] ²² A ntá ch'ín Moisés tsík'etoan kíxin xjaanrá ntoa itsa xjan xroye, (kjánchó jehya ch'ín Moisés kjuankíxin ch'án kjuako ch'án tíha, na mé tí sín tsík'axrjeníxinrá kjuankíxin sín kjuako sín tíha). Mé xikaha nchekará xjan tí xroye a kjónté yaon t'ok'éheni. ²³ A ntá xikaha nchekará xjan xroye tí yaon t'ok'éheni kíxin xikaha chrókjuinchesek'itjáyankíhyará ninkehó tí nkehe k'uetoan ch'ín Moisés, ¿ntá nkekuénté kíxin ninkákonará tí janhan kíxin kjuintakitoha jína ijnko chojni tí yaon t'ok'éheni? ²⁴ Chrókjuanchahyará jié kíxin tí nkehe t'ikonxínrá ikonrá ó. Chrókjuenkayáxinrá tí nkehe jína tóxrjínhin Dios —mé chro ch'ín Jesús.

[†] **7:21** Juan 5.2-9

Ch'ín Jesúš chrónka kíxin nketí k'uaxrjeníxín ch'án

²⁵ A ntá iso sín chjasin Jerusalén kjuankíxin sín kjo sín kichó sín kjuanchankí sín kíxin:
—¿Á jehya tí ch'ín a xritjeyá sín chrók'óyán sín? ²⁶ Ntá jie noxín tjen ch'án nixja ch'án kohya ninkexró nímkakonhen ch'án. Kjá tí síxréé titekaon sín kíxin tí nkexro a chaxín Cristo tíha. ²⁷ Kjánchó ó noheni nketí tsíkjíxín ch'án. A ntá tió tsi tí nkexro Cristo ntá ninkexró tsønoehya nketí tsíxín ch'án —ichro sín.

²⁸ A ntá ch'ín Jesúš kjuák'ekjako ch'án tí níñko jié ntá kuínhin ch'án kíxin xíkaha kjo sín, ntá itsen nixja ch'án ntáchro ch'án kíxin:

—Chaxín choxinrá tí janhan la ko nohará nketí chjasin tsíkjíxian. Kjánchó jehya kíxin k'uinka sintaxiteyá tí nkehe ntáchro qasenná ó. Ó k'uinka kíxin ichr'áんな tí nkexro chaxín tjechón tjen nkaya nkajní. Jahará naxa chonhyará tí nkexro a. ²⁹ Janhan la choxian ch'án kíxin ntaha tsík'inkaxian na mé jehe ch'án mé tsíchr'áんな ch'án —ichro ch'ín Jesúš.

³⁰ Ntá chrótsé sín ch'án chrókjuak'echjína sín ch'án ntá kjónté ninkexró tséhya sín ch'án kíxin naxa kjuanjonhya Dios kjuachaxin chrótsé sín ch'án. ³¹ Kjánchó itsjé chojni kuítekaon sín tí jehe ch'án. A ntá ntáchro sín kíxin:

—A ntá tió chrókui tí Cristo la, ¿á má jié kjuaxroan chrókjuasin ch'án, a ntá tí ch'ín i la kénhyó ní? —ichro sín.

Tí sín fariseo ichr'án sín chojni policía tsotsé sín tí ch'ín Jesúš tsjak'echjína sín ch'án

³² A ntá tí sín fariseo kuínhin sín nkehe tí ntáchro chojni kíxin nkexrí tjen ch'ín Jesúš, ntá jehe sín la ko tí sín ncháñ'á t'etoan k'uëtuëñhen sín iso sín policía kuènte níñko tsotsé sín ch'án tsjak'echjína sín ch'án. ³³ A ntá ntáchro ch'ín Jesúš kíxin:

—Kjaxin í séhya tsjak'é ntihi ts'ejóni ntá sáxikjiya tí tjen tí nkexro ichr'áんな. ³⁴ A ntá jahará tsjéyará tí janhan na ts'itjahyará kíxin xitjahyá tsjasánrá tí tsjak'é janhan —ichro ch'án.

³⁵ A ntá tí sín judío kjuankíxin sín kjuanchankíhi sín kichó sín kíxin:

—¿Ntá nketí nó sátsji ch'án kíxin tsjachahyani ts'itjani ch'án? ¿Xá sátsjichréhe ch'án tí sín judío tjejóyákjan tí sín nixja nkiva griego kíxin ntá tsjakohe ch'án tí sín griego?

³⁶ ¿Nkexrí t'axrjexín tí nkehe ntáchro ch'án kíxin tsjeyáni ch'án na kjónté ts'itjahyani ch'án la tsjachahyani tsjichréheni ch'án tí tsjak'e ch'án? —ichro sín.

Ntarío tjechón

³⁷ A ntá tí yaon tsjixixín tí kia a mé tí yaon jié mé k'uínkaten ch'ín Jesúš, a ntá itsen nixja ch'án ntáchro ch'án kíxin:

—Kja tí jnkojínrá ik'uéñrá ntá xrákirá its'irá ntá. ³⁸ A ntá éxí ntáchro xroon Itén Dios kíxin tí sín titekaon sín tí janhan na mé nkaya qasén sín ts'óna ijiko río ts'axrje intá tjechón —ichro ch'án.

³⁹ Mé xíkaha chrónkaxín ch'ín Jesúš nkexrí tjen tí Nchákuén Dios ts'áyéhe tí sín tsitekaon sín tí jehe ch'án. Kjánchó naxa tihya tí Nchákuén Dios kíxin ch'ín Jesúš naxa sájtihya ch'án nkaya nkajní.

Jnkokoáhya kjuenkayáxin tí chojni

⁴⁰ A ntá iso sín tió kuínhin sín tí nkehe ntáchro ch'ín Jesúš ntá ntáchro sín kíxin:

—Kja chaxín tí ch'ín i mé tí profeta ó tsíkjí —ichro sín.

⁴¹ Ikjé sín ntáchro sín kíxin:

—Jehe ch'án mé tí nkexro Cristo —ichro sín.

A ntá í so sín ntáchro sín kíxin:

—¿Xá nkekuénté chrókjuixín Galilea tí nkexro Cristo? ⁴² Tí xroon tsíkjín sín ósé mé chrónka kíxin tí nkexro Cristo mé ts'axrjeníxín tí sín k'uaxrjeníxín tí ch'ín rey David la ko tsíxín ch'án chjasin Belén mé tí chjasin k'uékjak'e ch'ín David —ichro sín.

⁴³ Mé xíkaha jinkokóáhya kjuenkayáxin sín kaín sín kíxin nkexro tí ch'ín Jesús. ⁴⁴ Iso sín tjinkaon sín sáchrókuiko sín ch'án chrókjuikjehe sín ch'án kjáñchó ninkexró kjuich'ehya xíkaha.

Tí síxreé kuítekakonhyá sín tí ch'ín Jesús

⁴⁵ A ntá tí sín policía kuènte njinko mé kjan sín tí tjejó tí sín fariseo la ko tí sín ncháñt'á t'etoan. Ntá tí sín a mé kjuanchankíhi sín tí sín policía kíxin:

—¿Nkekuénté kjuíkoahyará ch'án? —ichro sín.

⁴⁶ Ntá kjuátēhe tí sín policía kíxin:

—Kohya ninkexró nixja éxí xíkaha nixja tí ch'ín a —ichro sín.

⁴⁷ Ntá ntáche tí sín fariseo tí sín policía kíxin:

—¿Á kjaxinrá kuijohérá kjuít'ayahará ch'án? ⁴⁸ ¿Á kuítekaon tí jehe ch'án jnkoyín tí sín t'etoan kuénténi o tí sín fariseo? ⁴⁹ A ntá tí sín a mé chónhya sín tí ley na mé tsjasóte sín —ichro sín.

⁵⁰ A ntá tí ch'ín Nicodemo, tí ch'ín kjuítsjehe tí ch'ín Jesús ijkno tie senó na mé jehe ch'án fariseo ch'án na ntá ntáche ch'án sín kíxin:

⁵¹ —Tí ley kuénténi la kohya kjuachaxin sinchekjasóteni ijkno chojni tí naxa kíenhyani nkehe nixja ch'án la ko kíenhyani tí jié kjuasin ch'án —ichro ch'án.

⁵² Ntá kjuátēhe sín ntáchro sín kíxin:

—¿Á kjaxian jaha kjuíxian estado Galilea ní? Nchekuáxian tí xroon itén Dios ntá tsqonoha kíxin nijinko sín k'uéchrónka itén Dios tsíkjixinhya sín tí estado Galilea —ichro sín.

Ijkno tjan kjuasin jie chóntha ókjé chojni ntoa

⁵³ Ntá jnkoyinko sín xíka sín sákjuí sín ntóe sín.

8

¹ Ntá ch'ín Jesús mé sákjuí ch'án sín jna Olivo. ² Ntá tí kóyagon nchítjen ikjan ch'án k'uíxhen ch'án sín njinko jié a la ko kaín xín sín chojni mé kóchjinehe sín ch'án. Ntá kjuák'etjaxin ch'án kjuankíxin ch'án kjuako ch'án. ³ Ntá tí sín tjako tí ley la ko tí sín fariseo mé kjuíkao sín ijkno tjachjin kónoxíxin kíxin chóntha tjan ókjé chojni ntoa. Ntá kjuák'e sín tjan jnkosiné sín tjejó ntiha. ⁴ Ntá ntáche sín tí ch'ín Jesús kíxin:

—Maestro, tí tjan i kónoxíxin kíxin kjuasin tjan jié chóntha tjan ókjé chojni ntoa. ⁵ A ntá tí ley tsíkjin ch'ín Moisés mé t'etoan kíxin ixro chrók'óyánxinni sín chojni chjin xíkaha ch'e. ¿A ntá jaha, nkechrua? —ichro sín.

⁶ Mé xíkaha ichro sín kíxin tjinkaon sín kíxin ách'e ntoáhya chrókjuatehe ch'ín Jesús ntá chrókjuanchia sín jié. Ntá ch'ín Jesús mé k'uísén ch'án kjinxin ch'án dedo tja ch'án nonte a. ⁷ Ntá naxa tinkákjanchankíhi sín ch'án. Ntá k'uínkatjen ch'án k'uetoan ch'án kíxin:

—Xá nkexro tí tjejorá ntihi chónthaya ninkehó jié mé sáoxín chróchjéhe sín tjan xro —ichro ch'án.

⁸ Ntá xík'isén ch'án ínaá ijkjin ch'án sín nche ínaá. ⁹ Ntá tí sín a mé kuínhin sín tí nkehe k'uetoan ch'ín Jesús ntá kósuhé sín kíxin koí sín chóntha sín jié, ntá jnkoyinko jnkoyinko sín, sásitji sín na mé sáoxín sín ch'ín qantsí má táda ch'án sákjuí ch'án, ntá kaín sín í so a sákjuí sín kjaxin sín.

Ntá jehó tí ch'ín Jesús la ko tí tjan a kuítuhe sín ntiha. ¹⁰ Ntá xrentoá ch'án la kjuanchankíhi ch'án tjan kíxin:

—¿Nkekjá tí sín kjuanchia jié? ¿Á kohya ninkexró kjuínchekjasótiahya ní? —ichro ch'án.

¹¹ Ntá ntáchro tjan kíxin:

—Náhí, Ìnchéni, ninkexró —ichro tjan.

Ntá ntáchro ch'ín Jesús kíxin:

—Kjaxin janhan sintakjasótiahya. Sátjia la í tjásinha jie ínaá —ichro ch'án.

Ch'ín Jesú斯 mé xrohi t'inkaséyanxín chjasintajni

¹² Ntá ch'ín Jesú斯 xínixjehe ch'án tí sín tsíkóchjina ínaá ntáchro ch'án kíxin:

—Janhan mé xrohi t'inkaséyanxín chjasintajni. Tí tsochréhérá tí janhan ntá ts'ajirá tí t'inkaséyan tsochontaxínrá tí kjuachón a la ko í ts'ajihyará tí sitié a —ichro ch'án.

¹³ Ntá tí sín fariseo ntáchro sín kíxin:

—Jahvá tjechronka nkexrí tjen jaha na mé chaxínya tíha kíxin jahvá tjechronka —ichro sín.

¹⁴ Ntá kjuátēhe ch'ín Jesú斯 ntáchro ch'án kíxin:

—Janhván tjétjonkará nkexrí tjén na kjónté chaxín xrjanca kíxin ó nòna nketí nó k'uinkaxian la ko nòna nketí sátsjiyá. A ntá jahará noahyará nketí k'uinkaxian la ko noahyará nketí sátsjiyá. ¹⁵ Jahará la éxi chojni chjasintajni ó tékará jie. A ntá janhan la tékahya jie ninkexró. ¹⁶ Kjánchó ntoá chrókjuntakitoaxián ijjé chojni kíxin jehya janhván t'a tíha, T'aná tjékian, na mé tí nkexro k'uetuanna k'uinka ntihi na mé jehe ch'án mé tjékian ch'án ntihi ntakitoaxínkian ijjé chojni. ¹⁷ A ntá tí ley tsíkjín ch'in Moisés mé ntáchro kíxin tí tsónoxín iyó sín tsochrónka á chaxín xikaha tsíkónhen ntá chrókuitekaon chojni. ¹⁸ Ntá janhan na mé tjéxrjanca nkexrí tjén janhan la ko kjaxin T'aná mé tí nkexro k'uetuanna k'uinka mé jehe ch'án kjaxin chrónka ch'án nkexrí tjén janhan —ichro ch'án.

¹⁹ Ntá kjuanchankí sín ch'án kíxin:

—¿Nketí tjen It'á? —ichro sín.

Ntá kjuátēhe ch'ín Jesú斯 ntáchro ch'án kíxin:

—Jahará la chonhyará tí janhan la ko kjaxin chonhyará T'aná. Tí chrókóchoxinrá tí janhan ntá kjaxin chrókóchoxinrá tí T'aná —ichro ch'án.

²⁰ Mé xikaha chro ch'ín Jesú斯 tí kjuák'ekjákoxin ch'án tí ninko jié chjino ntacajón tjetóxroyéya chichaon tjanjon sín. Kjánchó ninkexró tséhya sín ch'án kíxin naxa kjuixrakáhyá tí hora tsotsé sín ch'án.

"Xitjahya tsjasánrá tí nó sátsjiyá janhan"

²¹ Ntá ch'ín Jesú斯 ntáche ch'án sín ínaá kíxin:

—Ntá sátsjiyá janhan. Ntá jahará tsjeyárá tí janhan, ntá tió ts'énrá naxa yamará ijjará. Xitjahya tsjasánrá tí nó sátsjiyá janhan —ichro ch'án.

²² Ntá ntáchro tí sín judío ikjo sín kichó sín kíxin:

—¿Á ts'óyán ch'án asén ch'án kíxin xikaha ntáchro ch'án kíxin xitjahya tsijini tí nó sátsji ch'án? —ichro sín.

²³ Ntá ntáche ch'ín Jesú斯 tí jehe sín kíxin:

—Jahará la nonte ntihi k'uaxrjéníxín. A ntá janhan la nkaya nkajní k'uaxrjéníxín. Jahará la kuénte chjasintajni ntihi. A ntá janhan la janhya kuénte chjasintajni. ²⁴ Mé xikaha tjonkará kíxin tió ts'énrá naxa tsochontará ijjará kíxin tí tsítekákonhyará tí janhan, mé tí nkexro xráxín tjen,* ntá kjónté ts'énrá naxa tsochontará tí ijjará —ichro ch'án.

²⁵ Ntá kjuanchankí sín ntáchro sín kíxin:

—¿Nkexro tí jaha? —ichro sín.

Ntá kjuátēhe ch'ín Jesú斯 ntáchro ch'án kíxin:

—Tí xránkixixín kjuankixian tjonkará kíxin nkexro tí janhan. ²⁶ Itsjé nkehe chonta chróntáxrjan kíxin chrókjuntakitoaxián tí jie chontará. Kjánchó tí nkexro k'uetuanna k'uinka na mé tí nkehe chrónka ch'án la chaxín. A ntá jehó tí nkehe kuinhán chrónka ch'án mé tjákoħa tí sín chjasintajni —ichro ch'án.

²⁷ Kjánchó jehe sín mé kíenxínya sín kíxin nixja ch'án kuénte It'é ch'án tjen nkaya nkajní. ²⁸ A ntá ntáchro ch'án kíxin:

—Tió sinchek'it'ótjenrá noi tí Xjeen Dios K'óna Chojni, ntá tsónohará kíxin janhan mé tí nkexro xráxín tjen.[†] Ntá tsónohará kíxin jehya janhan tétoqan tí xra tjét'a. Náhí. Jehó tí

* ^{8:24} Éxodo 3.14 † ^{8:28} Éxodo 3.14

nkehe kjuakona T'aná mé tjétjákua. ²⁹ Tjékian tí nkexro k'uetañna k'uinka kíxin jehí xráxín T'aná la kuítónahya janhván kíxin xráxín ntaxiteyáha tí nkehe tóxrjínhin ch'án —ichro ch'án.

³⁰ Mé xikaha ntáchro ch'án ntá nchónhya chojni kuítekaon sín tí jehe ch'án.

Nkexrí tjejó tí sín xjeen Dios la ko nkexrí tjejó tí sín chrokjuahya tsitohe sín ijié sín

³¹ Ntá nixjehé ch'ín Jesús tí sín judío kuinkáchónki sín ch'án ntáchro ch'án kíxin:

—Tí tsitoéhyará tí tan kjuákohará ntá jahará chaxín discípulo kuéntana ³² la ko tsjátsoanrá tí nkehe chaxín, la ko tí nkehe chaxín mé tsotjáhará kjuachaxin tsaáxinrá, a ntá tsokohya nkehe ts'inkákonhen —ichro ch'án.

³³ Ntá kjuátehe sín ntáchro sín kíxin:

—Jeheni mé tsík'axrjeníxinni ch'ín Abraham na í xráxín kohya nkexro k'uena tí jeheni. ¿Nkekuénté ntáchrúa jaha kíxin ts'ayéhèni kjuachaxin tsaáxinni? —ichro sín.

³⁴ Ntá ntáchro ch'ín Jesús kíxin:

—Tjetooan tí nkehe tjétjonkará kíxin tí sín tjasin jié mé éxí chojni k'uíná chrokjuahya tsitohe sín ijié sín. ³⁵ A ntá ijnko chojni k'uíná la jnkochrixínya tsjak'e ch'án tí ntøe tí nkexro a. A ntá tí xjeen tí nkexro na mé jnkochrixín tsitohe ntiha. ³⁶ Ntá tí tsaáxinrá tí Xjeen Dios ntá chaxín tsochontará kjuachaxin, a ntá tsokohya nkehe ts'inkákonhen. ³⁷ Ó nòna kíxin jahará tsík'axrjeníxinxírá ch'ín Abraham. Kjánchó tjinkáonrá chrók'oyánrá tí janhan kíxin títekákonhyará tí nkehe tjéxrjanka. ³⁸ Janhan xrjanka tí nkehe k'uíkuán kíxin nkexrí tjen T'aná. A ntá jahará tjejonchexiteyéhérá tí nkehe kuínhínrá chrónka it'árá —ichro ch'án.

³⁹ A ntá jehe sín kjuátehe sín ntáchro sín kíxin:

—It'éni mé ch'ín Abraham —ichro sín.

Kjánchó ntáchro ch'ín Jesús kíxin:

—A ntá tí jahará chrókóchaxín xjeen ch'ín Abraham ntá chrókjúich'erá éxí kjuich'e ch'án. ⁴⁰ A ntá tjétjonkará tí tan chaxín kuínhán chrónka Dios na kjónté chrók'oyánrá tí janhan. A ntá ch'ín Abraham xikahya kjuich'e ch'án. ⁴¹ Jahará tjejoch'erá éxí kjuich'e it'árá —ichro ch'án.

Ntá ntáchro sín kíxin:

—Jehya k'ónamá tí jeheni. Náhí. Chóntani jnkokoá It'éni mé Dios —ichro sín.

⁴² Ntá ntáche ch'ín Jesús tí jehe sín kíxin:

—Tí chrókóchaxín kíxin Dios mé It'árá la ntá chrótjuñnará kíxin janhan kjaxin k'uaxrjeníxinxína Dios k'uinkaxian tí tjen ch'án. Jehya kíxin janhván k'uinka. Náhí. Dios mé ichr'ánna k'uinka. ⁴³ ¿Nkekuénté kíxin tiénxinhyará tí nkehe tjónkará? Jehí tjinkákonhyará chrókuinhínrá tí nkehe xrjanka. ⁴⁴ Jahará mé xjeen Tsochren la ko jahará tsík'axrjeníxinxírá ch'án la ko tjinkáonrá sinchexiteyárá tí nkehe tjinkaon ch'án. Tsochren mé xrankíxixín kjuaya ch'án. Nunca k'uénixja ch'án ntoá. Xráxín ch'ia ch'án kíxin xikahó tjenkayáxin ch'án. Jehe ch'án mé it'é kaín tí kjuach'ia. ⁴⁵ A ntá janhan tjétjonkará nkehe ntoá ntá títekákonhyará. ⁴⁶ ¿Á tjejorá jnkójínrá nohará nkerí jié kjuásian janhan? A ntá tí ntáxrjan tí nkehe ntoá, ¿ntá nkekuénté títekákonhyará? ⁴⁷ Tí sín tinkáchónki Dios mé tjinkaon sín chrókuinhin sín itén Dios. A ntá jahará la tinkachónkihyará Dios ntá tjinkákonhyará chrókuinhínrá itén ch'án —ichro ch'ín Jesús.

Cristo la ó xráxín tjen ntá chr'éxín kjuák'e ch'ín Abraham

⁴⁸ A ntá tí sín judío ntáche sín tí ch'ín Jesús kíxin:

—Chaxín ntoá ntáchroni kíxin jaha mé ijnko chojni samaritano la ko chonta ijnko nchákuén tí jínahya —ichro sín.

⁴⁹ Ntá kjuátehe ch'ín Jesús ntáchro ch'án kíxin:

—Janhan chontahya ninkehó nchákuén tí jínahya. Tí xra t'a mé tjikosáyahá T'aná. Ntá jahará mé chontahyará kjuasáyé tí janhan. ⁵⁰ Janhan na tjéyahya nkexro tsjikosáyana.

Kjánchó itjen ijkno nkexro tjinkaon ch'án chrókjuikosáyana chojni, a ntá jehe ch'án mé tsjanchia jie tí sín kuítetakonhyá. ⁵¹ Imá tjetoan tí nkehe tjétjónkará kíxin tí tsítekáonrá tí nkehe tjàkua la í ts'énhyará —ichro ch'án.

⁵² Ntá kjuátehe tí sín judío ntáchro sín kíxin:

—Ntá ó noheni kíxin chaxín chonta ijkno nchákuén tí jínahya. Ch'ín Abraham la ko kaín tí sín k'uéchrónka itén Dios ósé la mé ik'uén sín. Ntá jaha ntáchrúa kíxin tí tsitekaonni tí nkehe tjàkua jaha ntá í ts'enhyani, ichrua. ⁵³ ¿Xá imá tétoan jaha la ntá kánhyó t'etqan it'eni Abraham? Jehe ch'án la ik'uén ch'án la ko kjaxin ik'uén tí sín k'uéchrónka itén Dios ósé. ¿Xá nkexro tí jaha, ichrua? —mé chro sín.

⁵⁴ Ntá kjuátehe ch'ín Jesús ntáchro ch'án kíxin:

—Tí chrókjuíkosáyahá asenná na mé sínkíhya tíha. A ntá T'aná mé tjikosàyana ch'án na ntá jahará ntáchrórá kíxin jehe ch'án mé Dios kuéntará. ⁵⁵ Kjánchó chonhyará ch'án. A ntá janhan choxian ch'án. Tí chróntáxrjan kíxin janhan chonhyá ch'án ntá chrókoyóna tí jahará chrókjuit'ayahará. Kjánchó janhan na choxian ch'án la ko ntaxiteyáhá tí nkehe t'etqan ch'án. ⁵⁶ Ch'ín Abraham tí nkexro tsík'axrjeníxinrá la imá kóchéhé ch'án kíxin ts'ikon ch'án tí yaon ts'inka janhan. Ntá ó kjuixin k'uíkon ch'án ntá kóchéhé ch'án —ichro ch'án.

⁵⁷ A ntá tí sín judío ntáche sín tí ch'ín Jesús kíxin:

—Jaha naxá chontahya cincuenta nánó, ¿na ntá nkekuénté ntáchrúa kíxin ó k'uíkuan tí ch'ín Abraham? —ichro sín.

⁵⁸ Ntá kjuátehe ch'ín Jesús ntáchro ch'án kíxin:

—Imá tjetoan tí nkehe tjétjónkará kíxin naxá kohya ch'ín Abraham mé xráxín itjén janhan —ichro ch'án.

⁵⁹ Ntá kuákja sín xro chróchjéhe sín tí ch'ín Jesús. Kjánchó kjuák'emá ch'án njinko ntá chr'ejín k'uaxrjexín ch'án ntiha. K'uátsínka ch'án jnkosiné tí tjejó sín sákjuí ch'án.

9

Ch'ín Jesús kjuínchekitóhe jína ijkno ch'ín tsíkokjílexín t'ikonhya ch'án

¹ K'uátsínka sín ijkno ntia ntá k'uíkon ch'ín Jesús ntiha tjen ijkno ch'ín tsíkokjílexín t'ikonhya ch'án. ² Ntá tí sín k'uájiko ch'ín Jesús kjuanchankíhi sín ch'án kíxin:

—Maestro, ¿Nkekuénté tsíkokjílexín ch'án t'ikonhya ch'án? ¿Á ijié it'é o ìné ch'án o á ijié ch'án? —ichro sín.

³ Ntá kjuátehe ch'ín Jesús ntáchro ch'án kíxin:

—Jehya ijié ch'án la ko jehya ijié it'é la ko ìné ch'an. Náhí. Jehí xíkaha tsíkónhen ch'án kíxin tí kjuächaxién Dios tsjakoxín kíxin tsitoexín ch'án jína. ⁴ Naxá ncháketjin t'ichjánxiñ sit'a tí xra tjinkaon tí nkexro tsíchr'ánna. Ntá ts'ixin tie ntá kohya ninkexró tsjacha sich'e xra. ⁵ Naxá itjén janhan mé ntihi chjasintajni na mé janhan xrohi t'inkaséyanxín tí chjasintajni —ichro ch'án.

⁶ Ntá ó kjuixin ntáchro ch'án tíha ntá kuikjite ch'án ntaten ch'án intsí nche k'óna nchet'o ntá kuátematóxin ch'án ikon tí ch'ín t'ikonhya. ⁷ Ntá k'uëtuenhen ch'án tí ch'ín t'ikonhya kíxin:

—Sátjia tí pila tjiá ntá it'in Siloé t'ontia kuan —ichro ch'án. (A ntá tí ihnjé Siloé mé t'axrjexín nkívee sín kíxin K'uítuenhen.)

Ntá sákjuí tí ch'ín t'ikonhya k'óni ch'án ikon ch'án ntá kjan ch'án k'uíkon ch'án. ⁸ Ntá tí sín ntoe chjinaxón ntoe ch'án la ko tí sín k'uék'ikón sín kíxin t'ikonhya ch'án mé ntáchro sín kíxin:

—¿Á jehya tí ch'ín i k'uékjak'etjaxín ch'án k'uékjanchak'á ch'án? —ichro sín.

⁹ Iso sín ntáchro sín kíxin:

—Kjá chaxín jehe ch'án —ichro sín.

Ikjé sín ntáchro sín kíxin:

—Náhí, jehya jehe ch'án. Tóyohó ch'án tí ch'ín a —ichro sín.

Kjánchó jehe ch'án kjuátehe ch'án kixin:

—Chaxín janhan —ichro ch'án.

10 Ntá kjuanchankíhi sín ch'án kixin:

—¿Nkexrí kixin jaí t'ikuan jaha? —ichro sín.

11 Ntá kjuátehe ch'án ntáchro ch'án kixin:

—Ijnko ch'ín mé it'in Jesús mé kjuúch'éna ch'án nchet'ó kuátematóxin ch'án kuān la ntá k'uētuānna ch'án kixin satsjia ti pila tjiá ntā nchek'in sín Siloé ts'ontia kuān, ichro ch'án. Ntá sákjuia k'ontia, ntá xrínahya ó k'uíkuān —ichro ch'án.

12 Ntá kjuanchankíhi sín ch'án ntáchro sín kixin:

—¿Nketí tjen tí ch'ín a? —ichro sín.

Ntá kjuátehe ch'an ntachro ch'an kixin:

—Nonahya janhan —ichro ch'an.

Tí sín fariseo tjanchankíhi sín tí ch'ín k'uék'ikonhya kuítøhe jína

13 Ntá tí sín a sákjuíko sín tí ch'ín k'uék'ikonhya sákjuíchréhe sín tí sín fariseo a. **14** A ntá tí yaon t'ok'éhe sín mé tsíkjich'éna ch'ín Jesús tí nchet'ó kjuínchekitoexín jína tí ch'ín k'uék'ikonhya. **15** A ntá tí sín fariseo xíkjanchankíhi sín ch'án ínaá kixin nkexrí kuítøhe ch'án jína t'ikon ch'án jie. Ntá kjuátehe ch'án ntáchro ch'án kixin:

—Kuátematóxin ch'án nchet'ó kuān, ntá k'ontia kuān ntá jie t'íkuān —ichro ch'án.

16 Ntá iso tí sín fariseo ntáchro sín kixin:

—Tí chojni a jehya kuènte Dios kixin chóntahya ch'án kjuasáyé tí yaon t'ok'éheni —ichro sín.

Kjánchó ikjé sín ntáchro sín kixin:

—¿Xá nkexrí chrókjuasin ch'án kjuaxroan jíe tí chóntha ch'án jie? —ichro sín.

Mé xíkaha jnkokónhya kjuenkayáxin tí jehe sín. **17** Ntá xíkjanchankíhi sín tí ch'ín k'uék'ikonhya ínaá kixin:

—¿Ntá jaha nkechrua nkexro tíha tí nkexro kjuíntak'íkuān? —ichro sín.

Ntá kjuátehe ch'án ntáchro ch'án kixin:

—Janhan ntáxrjan kixin jehe ch'án mé ijnko nkexro chrónka itén Dios —ichro ch'án.

18 Kjánchó tí sín judío kuítækakonhya sín kixin chaxín k'uék'ikonhya ch'án ntá jie t'ikon ch'án. Ntá k'uíyéhe sín tí it'é la ko tí ìné tí ch'ín tsíkitøhe jína. **19** Kjuanchankíhi sín ntáchro sín kixin:

—¿A xjaan tíhi tí ntáchrora kixin tí tsíkokjíexín ch'án t'ikonhya ch'án? ¿Ntá nkexrí jie t'ikon ch'án? —ichro sín.

20 Ntá kjuátehe tí it'é la ko tí ìné ch'án ntáchro sín kixin:

—Ó noheni kixin xjeenni ch'án la ko noheni kixin tí kokjíexín ch'án t'ikonhya ch'án.

21 Kjánchó noehyani nkexrí kixin t'ikon ch'án jie la ko noehyani nkexro kjuínchekitohe ch'án jína. Tjanchankíhirá ch'án, ó nteto ch'án, ntá jehe ch'án tsochrónka ch'án kixin nkexrí kuítøhe ch'án jína —ichro sín.

22 Mé xíkaha kjuátehe tí it'é la ko tí ìné ch'án kixin chrakonhen sín tí sín judío kixin ó kjuixin chrónka tí sín judío kixin tsjanjonhya sín kjuachaxin ts'ixenhen ninko tí sín titekaon kixin ch'ín Jesús mé tí nkexro Cristo. **23** Mé xíkaha ntáchro tí it'é la ko tí ìné ch'án kixin chrókjuanchankíhi sín ch'án, ó nteto ch'án, ichro sín.

24 Ntá yóxin xík'íyéhe tí sín judío tí ch'ín k'uék'ikonhya ntá k'uētuéhen sín ch'án kixin:

—Tjetsjehe Dios ntá ntoá chrónka kixin ó noheni kixin tí ch'ín a na chóntha ch'an jie —ichro sín.

25 Ntá tí ch'ín k'uék'ikonhya kjuátehe ch'án kixin:

—Nonahya á chóntha ch'án jie o á chóntahya ch'án jie. Jnkokoá nkehe nòna kixin senó k'uék'íkonhya ntá jie t'íkuān —ichro ch'án.

26 Ntá xíkjanchankíhi sín ch'án ínaá kixin:

—¿Nkexrí kjuich'e ch'án kixin kjuíntak'ikuan ch'án? —ichro sín.

²⁷ Ntá kjuátehe ch'án ntáchro ch'án kixin:

—Ó kjuixin tjonkará kjánchó títekákonhyará. ¿Nkekuénté tjinkáonrá kixin tsotjonkará ínaá? ¿Á kjaxinrá tjinkáonrá tsochréhérá ch'án? —ichro ch'án.

²⁸ Ntá kóninkakonhen sín ch'án la k'uántaxínhin sín ch'án la ko kjuátehe sín kixin:

—Jaha la chréhé tí chojni a. A ntá jeheni na chréheni tí nkehe k'uetoan ch'ín Moisés.

²⁹ Ó noheni kixin Dios k'uénixjehé ch'ín Moisés. A ntá tí ch'ín a la noehyani nketí tsíkjixin ch'án —ichro sín.

³⁰ Ntá kjuátehe tí ch'ín ntáchro kixin:

—Imá ókjé tíha. Tí ch'ín a mé kjuinchek'ikonna. A ntá jahará ntáchrórá kixin noahyará nketí tsíkjixin ch'án. ³¹ Ó noheni kixin tienhya Dios tí nkehe tjanchia tí chojni chóntha jie. Jehó tinhin ch'án tí nkehe tjanchia tí sín titekaon Dios la ko nchexiteyéhé sín tí nkehe tjinkaon ch'án. ³² Nunca kienhyéni kixin ijkno nkexro chrókjuinchek'ikon ijkno chojni tsíkokjílexín t'ikonhyá. ³³ A ntá tí nkexro a tí chrókuixinhya ch'án tí tjen Dios la kjá ninkehó nkehe xitjahya chrókjuich'e ch'án —ichro ch'án.

³⁴ Ntá kjuátehe tí sín fariseo ntáchro sín kixin:

—Jaha la nchónhya jie chonta tió kokjíha. A ntá jie ¿á tjinkávan kixin jaha chrókjuákhéni ní? —ichro sín.

Ntá kótéka sín tí ch'ín a kixin ts'axrjexín ch'án tí níjko a sátsji ch'án.

Ntakótán nchákuén sín

³⁵ Ntá kuínhin ch'ín Jesús kixin xíkaha k'uetuñhen tí sín judío kixin ts'axrjexín níjko tí ch'ín k'uék'ikonhyá. Ntá xeta ch'ín Jesús tí ch'ín a ntá kjuanchankí ch'án kixin:

—¿Á tinkachónkia tí Xjeen Dios K'óna Chojni? —ichro ch'án.

³⁶ Ntá kjuátehe tí ch'ín a ntáchro ch'án kixin:

—Tjákhéni nkexro tíha kixin ntá tsinkáchónkini ch'án.

³⁷ Ntá kjuátehe ch'ín Jesús ntáchro ch'án kixin:

—Ó k'uíkuán jaha. Janhan mé tí nkexro tjetjuá jaha —ichro ch'án.

³⁸ Ntá kjuák'exín toch'in ch'án toté ch'ín Jesús ntáchro ch'án kixin:

—Ijie kuítekávan tí jaha Ínchéni —ichro ch'án.

³⁹ Ntá ntáchro ch'ín Jesús kixin:

—K'uinka ntihi chjasintajni kixin sintakitoaxián ijié chojni kixin ntá tí sín t'ikonhyá la mé ts'ikon sín, a ntá tí sín t'ikon jie la í ts'ikonhyá sín —ichro ch'án.

⁴⁰ A ntá iso tí sín fariseo k'uéjóntaxín kuínhin sín kixin xíkaha ntáchro ch'ín Jesús, ntá kjuanchankíhi sín ch'án kixin:

—¿Xá kjaxin jeheni ntakótáni? —ichro sín.

⁴¹ Ntá kjuátehe ch'ín Jesús ntáchro ch'án kixin:

—A ntá tí jahará tí chaxín chrók'uikonhyará ntá chróchontahyará jie. Kjánchó ntáchrórá kixin t'ikonrá. Méxra chontará jie —ichro ch'án.

10

Ch'ín Jesús ncheyóexín tí t'inkachjina kolélo

¹ Ntá ntáchro ch'ín Jesús kixin:

—Imá tjetoan tí nkehe tjétjónkará kixin tí ts'ixenhen ijkno chojni tí t'inkachjina kolélo ntá jehya puerta tí corral t'ixenxín ch'án na mé ókjé chrok'uixenxín ch'án na mé xíchee tíha la tjinkaon chrókueé. ² A ntá tí nkexro t'ixenxín tí puerta na mé nkexro t'ayakonhen tí kolélo a. ³ La ko tí ch'ín tjet'ayakonhen tí puerta a mé tsakitjehé ch'án tí puerta a kixin ts'ixenhen tí nkexro chaxín t'ayakonhen tí kolélo a. A ntá tí kolélo a mé tsjatsoan va itén ch'án. Ntá t'iyexín ch'án jnkojnko ihnié jnkojnko tí kolélo kuénte ch'án ntá ts'axrjexín

va nt_oe va. ⁴ Ntá t'ikon ch'án kíxin k'uaxrje kaín va ntá kuítónen ch'án va nt_{ia} ntá tinkáchréhe va kíxin tjatsóan va itén ch'án. ⁵ Chrohya va tjichréhe va ijnko chojni ókjé na mé tsinkéhe va tí chojni a kíxin tjatsóanhya va itén ókjé chojni —ichro ch'án.

⁶ Mé xikaha ntáchro ch'ín Jesús kjuíncheyóexin ch'án. Kjánchó tienxínhya sín nkexrí t'axrjexín tíha.

Ch'ín Jesús mé tí pastor jína

⁷ Ntá chrónka ch'ín Jesús ínaá ntáchro ch'án kíxin:

—Ijnko nkehe tjetoan tsotjónkará kíxin janhan la éxi tí puerta t'ixenxín tí kolélo tí t'inkachjina va. ⁸ Kaín tí sín kuitónxin nt_{ia} kui senó mé xíchee la ko chrókueé. La ntá tí kolélo la ántosén va tí nkehe ntáchro tí jehe sín. ⁹ Janhan mé tí puerta a mé t'ixenxínrá tí janhan mé tsaará la mé tsoyóhará tí kolélo siín kjuachaxin ts'axrjexín va tí korré va sátsjikjine va la ko siín kjuachaxin ts'ixenhen va tí ts'inkachjina va ínaá.

¹⁰ A ntá xíchee mé jehó chrókueé la ko tjinkaon chrók'óyán la ko chrókjuinchek'itjáyan kaín nkehe. A ntá janhan k'uinka kíxin tsochontaxinrá kjuachón na mé kjuachón jnkochríxín. ¹¹ Janhan mé ijnko pastor jína a ntá tí pastor jína mé ts'enyákonhen tí kolélo a. ¹² A ntá tí nkexro ch'e xr_a tjinkaon chrókjuacha ó na mé ts'ikon ch'án itsi ijnko kolobo tsít_ohe ch'án tí kolélo sátsji ch'án kíxin jehe ch'án la jehya tí nkexro t'ayakonhen tí kolélo la ko jehya kolélo kuénte ch'án. Ntá tí kolobo mé tsotsé va tí kolélo ntá tsinká va la sátsjichroe va. ¹³ Mé xikaha tí chojni tjinkaon chrókjuacha tí xr_a chrókjuich'e ó la mé sátsji. A ntá tí kolélo la ántosén ch'án kuáhya ch'án kuénte tí jehe va.

¹⁴⁻¹⁵ A ntá janhan mé ijnko pastor jína. Mé xikaha T'aná chóxin ch'án tí janhan la ko kjaxin janhan choxian tí jehe ch'án mé xikaha choxian janhan tí sín éxi kolélo kuént_ana la ko jehe sín mé chóxin sín tí janhan. Ntá ts'enyákonhan tí sín éxi kolélo kuént_ana. ¹⁶ Kjaxin chonta kolélo nax_a jehya korré va ntihi mé kjaxin t'ichjánxín sátsjícacjíán va. A ntá tí tsitekakonna va ntá ts'óna jnkokoá korré va la ko jnkokoá nkexro ts'ayakonhen va.

¹⁷ Tjuana T'aná kíxin kjónté its'én la tsoxechónna ínaá. ¹⁸ Kohya nkexro tsakitsjena tí kjuachón chonta janhan tí chrókjuánjonhya kjuachaxin. Chonta janhan kjuachaxin its'én la ko chonta janhan kjuachaxin tsoxechónna ínaá. Tíhi mé k'uetuanna T'aná —ichro ch'ín Jesús.

¹⁹ Tió kuínhin tí sín judío tí nkehe ntáchro ch'ín Jesús ntá kjuankíxin jnkokoáhya kjuenkayáxin sín. ²⁰ Nchónhya tí jehe sín ntáchro sín kíxin:

—¿Nkekuénté tinhínrá tí nkehe ntáchro ch'án? Jehe ch'án mé chóntha ch'án nchakuen tí jinahya la ko lóco ch'án —ichro sín.

²¹ Ntá ikjé sín ntáchro sín kíxin:

—Xikahya chrónixja ijnko chojni chóntha nchakuen tí jinahya. ¿A ijnko nchakuen tí jinahya la á jína chrókjuinchek'ikón ijnko chojni t'ikónhya? —ichro sín.

Tí sín judío kuítekakuenhya sín tí ch'ín Jesús

²² A ntá tí nchakuen kin tí chjasin Jerusalén k'uixin kia xraxinkakonxín sín tí yaon tsíkjixin tsík'óna ninko. ²³ Ntá ch'ín Jesús itjen ch'án tí ninko tí ntasín kuénte Salomón.

²⁴ Ntá tí sín judío k'uántatjen sín tí ch'ín Jesús kjuanchankíhi sín ch'án kíxin:

—¿Hasta nkesá ts'ejóchónhenni tsinhinni jína? A ntá jie chrónka ntoá kíxin á chaxín jaha tí Cristo —ichro sín.

²⁵ Ntá kjuátehe ch'ín Jesús kíxin:

—Ó tjonkará ntá nax_a títekákonhyará. Kaín tí xr_a tjét'a janhan tí kjuachaxin kuénte T'aná mé tjakoxín nkexro tí janhan. ²⁶ Kjánchó jahará títekákonhyará kíxin jahará la jehya kolélo kuént_ana éxi tjonkará senó. ²⁷ Tí kolélo kuént_ana mé tjatsóan va tí tanná la ko kjaxin janhan tjátsóan tí jehe va la ko jehe va mé chréhe va tí janhan. ²⁸ Janhan mé tja_{ha} va tí kjuachón jnkochríxín la í ts'itjáyanhya va la ko ninkexró tsjachahya tsakitsjexín va

tjaná. ²⁹ Ó kjuanjon T'aná, mé tí nkexro tjetóxin t'etoan, na ninkexró tsjacha tsakitsjexín va tí tja ch'án. ³⁰ Janhan la ko T'aná na mé jnkokoá nkexro tíha —ichro ch'án.

³¹ Ntá tí sín judío kuákja sín xró chróchjéhe sín ch'án ínaá. ³² Ntá kjuátehe ch'ín Jesús ntáchro ch'án kíxin:

—Nchónhya nkehe jína k'uíkonrá kjuákoxian kjuachaxin kuènte T'aná. ¿Ntá nkekuénté chróchjìnará xró? —mé chro ch'án.

³³ Ntá kjuátehe tí sín judío kíxin:

—Jehya tí kjuaxroan jína tjásian chrótjiáxiánni xró. Náhí. Jaha ijkno chojni ó ntá kjuincheyohé əsán Dios na mé tsotjiáxiánni xró —ichro sín.

³⁴ Ntá ntáchro ch'ín Jesús kíxin:

—Ntá ntáchro xroon itén Dios tsíkjin sín ósé kíxin ntáchro Dios kíxin: “Kjaxinrá éxí Dios tí jahará.”* ³⁵ Ntá ó noheni nkehe ntáchro xroon itén Dios na ntá xitjahya tsitekakonhyani tíha. Mé xíkaha ntáchro Dios kíxin éxí Dios jnkojko nkexro k'uáyéhé itén ch'án. ³⁶ A ntá kjueyána Dios ichr'ánnna ch'án chjasintajni, ¿ntá nkekuénté ntáchrórá kíxin k'uántaxíñhan Dios kíxin janhan ntáxrjan kíxin Xjeen Dios tí janhan? ³⁷ Kja tí chrókjuít'ahya tí xrä ich'e T'aná la chrókuítekákonhyará. ³⁸ A ntá kjónté tjét'a tí xrä a kjónté títekákonhyará tí janhan na mé chrókuítekáonrá tí xrä tjét'a chrókónoaxínrá chrókiénxinrá kíxin T'aná la ko janhan mé jnkokoá tjékian ch'án —ichro ch'án.

³⁹ Mé xíkaha chrótsé sín tí ch'ín Jesús ínaá chrók'uikjéhé ch'án ntá kjuachahya sín ntá sákuí ch'án.

⁴⁰ Ntá ch'ín Jesús xíkjan ch'án tí í jnko lado ntarío Jordán ínaá tí k'uékjak'e ch'ín Juan k'uékitexín ch'án chojni senó. ⁴¹ Ntá nchónhya chojni sákuíchréhé sín ch'án ts'ikon sín ch'án ntáchro sín kíxin:

—Chaxín ch'ín Juan kjuasinha ch'án kjuaxroan jié la kjónté ntoá tí nkehe chrónka ch'án kuènte tí ch'ín i —ichro sín.

⁴² Ntá nchónhya sín kuítekaon sín tí ch'ín Jesús tí kjuíji sín ntiha.

11

Ik'uén ch'ín Lázaro

¹ Itjen ijkno ch'ín níhi mé it'in ch'án Lázaro, chjasén ch'án na mé Betania, mé tí chjasén tí tjan María la ko tí kjavé tjan Marta. ² Tí tjan María mé jnkokoá kichó tí ch'ín Lázaro mé tí ch'ín níhi na mé jehe tjan mé tí tjan kuíkitexín aceite xraxé toté Ínchéni la ko kjuínchexámáxin tjan kaxjhi tjan toté ch'án.* ³ A ntá yói tí kichó ch'án chjin ichr'án sín ijkno nkexro tsochénka tí ch'ín Jesús kíxin:

—Ínchéni jaha, tí nkexro choxian tjuéhé la níhi ch'án —ichro ch'án.

⁴ Ntá kuínhin ch'ín Jesús ntá ntáchro ch'án kíxin:

—Tí chin chóntha ch'án jehya kíxin ónaá chrók'uitjáyanxón ch'án tí ts'en ch'án. Náhí. Tíha mé tsjakoxin tí kjuachaxin jié kuènte tí Xjeen Dios —ichro ch'án.

⁵ A ntá tí ch'ín Jesús la imá tjuéhé ch'án tí tjan Marta la ko tí tjan kichó tjan la ko tí ch'ín Lázaro. ⁶ Na ntá tió kuínhin ch'án kíxin níhi ch'ín Lázaro na kjónté kuítuhe ch'án iyó yaon ínaá tí nó kjuák'e ch'án. ⁷ A ntá chr'éxin ntáche ch'án tí sín k'uájiko ch'án kíxin:

—Sátsjini estado Judea ínaá —ichro ch'án.

⁸ Ntá kjuátehe tí sín k'uájiko ch'án kíxin:

—Maestro, naxq séhya tí sín judío ntiha chrótjáha sín xró tjinkaon sín chrók'óyánxian sín xró. ¿Á tjinkávan sátsjia ntiha ínaá? —ichro sín.

⁹ Ntá ntáchro ch'ín Jesús kíxin:

* **10:34** Salmo 82.6 * **11:2** Juan 12.3

—Jnkojnk̄o yaon mé chόnta teyó hora. Tió ixri chojni nchakotjin tsóténkixinhya sín ninkehó kíxin t'inkaséyanxín xrohi chjasintajni a. ¹⁰ Tí sín ixri tie mé tsóténkixin sín nkehe kíxin chόntahya sín xrohi —ichro ch'án.

¹¹ Ntá chr'éxín ntáche ch'ín Jesús tí sín k'uájiko ch'án kíxin:

—Ó k'uájua tí nkexro chóxinni mé ch'ín Lázaro. Ntá sátsjia sintakjayah̄ ch'án —ichro ch'án.

¹² Ntá ntáchro tí sín k'uájiko ch'án kíxin:

—Ìnchéni, tí k'uájua ch'án la mé chrókuitóhe ch'án jína —ichro sín.

¹³ Kjánchó tí nkehe ntáchro ch'ín Jesús mé t'axrjexín kíxin ó tsíkjixin tsík'en tí ch'ín Lázaro. Ntá tí sín k'uájiko ch'án kjuenkayáxin sín kíxin ó jehí tjejua ch'ín Lázaro. ¹⁴ Ntá ntoá chrónka ch'ín Jesús kíxin:

—Ó tsík'en ch'ín Lázaro. ¹⁵ Ntá chàna kíxin kohvana ntiha kíxin mé xíkaha tsítekákonxínrá. A ntá jie intárá sátsjitsjeheni ch'án —ichro ch'án.

¹⁶ Ntá ch'ín Tomás, kjaxin tikitexín sín ch'án ch'ín Nohé, mé ntáche ch'án tí so sín kíxin:

—Sátsjini koíni kaín ni ts'enkaoni Ìnchéni —ichro ch'án.

Ch'ín Jesús ntáchro ch'án kíxin sinchexechón ch'án chojni ínaá

¹⁷ Ntá kjuji ch'ín Jesús kuínhin ch'án kíxin ch'ín Lázaro la ó chόnta noó yaon tsíkjixravá ch'án. ¹⁸ A ntá tí chjasin Betania mé chjinaxón tí chjasin Jerusalén, chόnta iyó kilómetro ko t'o kjínxin. ¹⁹ A ntá itsjé tí sín judío sátsíkjitsjehe sín tí tjan Marta la ko tí tjan María tjejónixjehé sín kíxin kánhyó ts'avá sín kíxin tsík'en tí kichó sín a. ²⁰ Ntá kuínhin tjan Marta kíxin ó kui ch'ín Jesús ntá k'uaxrjexín tjan nchia tsjíxinhin ntja. A ntá tí tjan María kuítóhe tjan nchia. ²¹ Ntá tí tjan Marta ntáche tí ch'ín Jesús kíxin:

—Ìnchéni jaha. Chrókjuak'e ntihi ntá chrók'uenhya kichó ni. ²² Kjánchó ó nòna kíxin Dios tsotjáha kaín nkehe tsjanchehé ch'án —ichro tjan.

²³ Ntá ntáchro ch'ín Jesús kíxin:

—Tsoxechón kíchuá ínaá —ichro ch'án.

²⁴ Ntá ntáchro tjan Marta kíxin:

—Ó nòna kíxin tsoxechón ch'án tió tsoxechón kaín tí sín tsík'en, tí yaon tsjixixín —ichro tjan.

²⁵ Ntá ntáchro ch'ín Jesús kíxin:

—Janhan mé ntáchro tjan Marta xíkaha ntá sákjuík'iyehé tjan kichó tjan María ntá imó chénka tjan kíxin:

²⁷ Ntá ntáchro tjan kíxin:

—Chaxín Ìnchéni titékavan kíxin jaha mé Cristo, mé Xjeen Dios, mé tí nkexro kui chjasintajni —ichro tjan.

Tsjánka ch'ín Jesús tí tsíkjixravá nkexro Lázaro

²⁸ Ó kjuixin ntáchro tjan Marta xíkaha ntá sákjuík'iyehé tjan kichó tjan María ntá imó chénka tjan kíxin:

—Ntiha tjen Maestro t'iayahá ch'án —ichro tjan.

²⁹ Ntá kuínhin tjan María ntá tuénxín k'uínkaten tjan sákjuítsjehe tjan tí ch'ín Jesús.

³⁰ Naxa tsík'ixenhya ch'án chjasin naxa tjen ch'án tí xéta ch'án tjan Marta. ³¹ Ntá tí sín judío tjejónixjehé tjan María kíxin kánhyó ts'avá tjan, mé k'uíkon sín kíxin tjoka k'uaxrjexín tjan nchia, ntá kjuíchréhe sín tjan kjuenkayáxin sín kíxin sátsji tjan tí tsíkjixravá kichó tjan, ntaha tsjitsjánkam̄a tjan ch'án, ichro sín.

³² Ntá tí tjan María mé kjuji tjan tí tjen ch'ín Jesús ntá kjuák'exín toch'in tjan toté ch'án ntáchro tjan kíxin:

—Inchéni jaha, chrókjuak'e jaha ntíhi ntá chrók'uenhya kíchiná —ichro tjan.

³³ Ntá k'uíkon ch'ín Jesús kíxin tsjánka tí tjan María la ko tí sín judío kjuikotoxín tjan ntá imá k'uává ch'án kóxakonhen əsén ch'án. ³⁴ Ntá kjuanchankí ch'án kíxin:

—¿Nketí kjuavárá ch'án? —ichro ch'án.

Ntá ntáchro sín kíxin:

—Inchéni, ¿á sátsjitsjehé? —ichro sín.

³⁵ Ntá tsjánka ch'ín Jesús. ³⁶ Ntá ntáchro tí sín judío kíxin:

—Tsjehérá kíxin imá tjuèhe ch'án tí ch'ín tsík'en —ichro sín.

³⁷ Kjánchó í so sín ntáchro sín kíxin:

—Jehe ch'án mé kjuínchek'íkon tí ch'ín t'íkonhyá. ¿Á xitjahya chrókjuanjon ch'án intsí kjuachaxin chrók'uenhya tí ch'ín Lázaro ní? —ichro sín.

Ó xechón ch'ín Lázaro

³⁸ Ntá imá t'ává əsén ch'ín Jesús kóchjinehe ch'án tí tòye. Tí tòye mé ijnko tjo, a ntá tí ntója tí tjo mé tsík'ikjèxin ijnko xro. ³⁹ Ntá k'uetoan ch'ín Jesús kíxin:

—Tjakjíyan tí xro a —ichro ch'án.

A ntá tí tjan Marta mé kíchó tí nkexro k'uén mé ntáchro tjan kíxin:

—Inchéni, kjá noha kíxin kjá imá xra kíxin ó chóntha noó yaon tsík'en ch'án —ichro tjan.

⁴⁰ Ntá kjuátuhe ch'ín Jesús ntáchro ch'án kíxin:

—Ó tjonka kíxin tsítekávan ntá ts'íkuán tí kjuachaxin jié kuente Dios —ichro ch'án.

⁴¹ Ntá kjuakjìn sín tí xro a. Ntá ch'ín Jesús konta ch'án nkajní ntáchro ch'án kíxin:

—It'eni, tjáncháha kjuasáya kíxin ó kuínhín tí nkehe ntáxrjan. ⁴² Janhan na ó nóna kíxin xráxín tjetinhín tí nkehe ntáxrjan ntá xíkahá ntáxrjan jie kíxin tsinhin tí sín tjejontaxín ntíhi ntá tsitekaon sín kíxin jaha mé kuetoan k'uinka —mé ichro ch'ín Jesús.

⁴³ Ntá kjuixin nixja ch'án tíha ntá itsen k'uèya ch'án kíxin:

—¡Lázaro, t'axrjéxian méhe! —ichro ch'án.

⁴⁴ Ntá tí ch'ín tsík'en k'uaxrjexín ch'án tòye, na tí tja ch'án la ko tí toté ch'án naxa tjejóchróntetoxín ka la ko tí nkayakon ch'án tjejkjèxin ijnko ka. Ntá k'uetoan ch'ín Jesús kíxin:

—Tjasintankará tí ka chróntetoxín ch'án kíxin jína tsji ch'án —ichro ch'án.

Imó kjuenkayáxin sín kíxin nkexrí ts'óyán sín tí ch'ín Jesús

(Mt. 26.1-5; Mr. 14.1-2; Lc. 22.1-2)

⁴⁵ Ntá itsjé tí sín judío sákjuíkotoxín sín tí tjan María mé k'uíkon sín tí kjuaxroan kjuasin ch'ín Jesús ntá kuítekaon sín tí jehe ch'án. ⁴⁶ Kjánchó iso tí jehe sín sákjuítsjehe sín tí sín fariseo kjuichénka sín tí kjuaxroan tsíkjasin ch'ín Jesús. ⁴⁷ Ntá tí sín fariseo la ko tí sín nchat'á t'etoan jnkokoá kójnkotséko sín tí sín əntsí t'etoan, la ntáchro sín kíxin:

—¿Xá nkexrí chrókjuich'eheni tí ch'ín a kíxin jehe ch'án mé tjasin ch'án kjuaxroan jié?

⁴⁸ A ntá tí chrókuítóheni ch'án xíkahó ntá kaín xín chojni chrókuitekaon sín tí jehe ch'án, ntá tsi tí sín romano t'etoan sinchek'itjáyan sín tí ninkoéni la ko tí xra chóntani la ko tí nación kuénténi —ichro sín.

⁴⁹ Ntá ch'ín Caifás mé tí nkexro t'etuenhen tí sín nchat'á tí nánó a ntáche ch'án tí jehe sín kíxin:

—Jahará la noahyará ninkehó tíha ⁵⁰ la ko kjá ní tjenkayáxinhyará kíxin íchá jína kíxin jnkokoá chojni chrók'uenyákonhen chjasénni kíxin ntá chrók'uitjáyanhya kuenté tí nación kuénténi —ichro ch'án.

⁵¹ Kjánchó ch'ín Caifás la jehya jehó ch'án chrókjuenkayáxin ch'án tíha. Náhí. Jehe ch'án mé k'uetoenhen tí sín nchat'á tí nánó, a ntá tí Nchakuen Dios kjuínchekónohe ch'án kíxin ch'ín Jesús mé ts'enyákonhen tí nación judía. ⁵² A ntá jehya tí nación kuénte sín ó chrók'uenyákonhen ch'án. Náhí. Kjaxin kíxin sinchekaá ch'án kaín tí sín ts'óna xjeen Dios

tjejó sín kuenté chjasintajni. ⁵³ A ntá tí yaon a tí sín t'etuēnhen tí sín judío mé kjuankíxin sín kjuenkayáxin sín kíxin chrók'oyán sín tí ch'ín Jesús.

⁵⁴ A ntá ch'ín Jesús la í noxínhya k'uáji tí k'uéjó tí sín judío, na mé k'uaxrjexín ch'án tí estado Judea, sákjuí ch'án chjinaxón nteje, tí tjen ijnko chjasin it'in Efraín. Ntaha kuítøeko ch'án tí sín k'uájiko ch'án.

⁵⁵ Ntá í séhya ntá ts'ixin tí kia pascua mé ijnko kié tí sín judío. Ntá itsjé chojni k'uaxrjexín sín chjasén sín sákjuí sín chjasin Jerusalén kíxin ntaha tsøyaxínhin sín kíxin tsotjóá sín kjónté naxa xrankínhya ts'ixin tí kia pascua. ⁵⁶ Ntaha k'uájikjeyá sín tí ch'ín Jesús k'uéjoxenhen sín tí ninko jié ntá kjuanchankíhi sín kíchó sín kíxin:

—¿Jahará nkechrorá? ¿Á chrókjui ch'án tí kia ní o náhí? —ichro sín.

⁵⁷ A ntá tí sín fariseo la ko tí sín t'etuēnhen tí sín nchat'á na ó k'uetoan sín kíxin tí siín ijnko nkexro nohe nketí tjen ch'ín Jesús chróchrónka sín kíxin ntá jína chrókjuitsé sín ch'án chrókjuiñchenteto sín ch'án la ko chrókjuaq'echjina sín ch'án.

12

Ijnko tjan kjuíncheká tjan aceite xraxé náxrjón toté tí ch'ín Jesús

(Mt. 26.6-13; Mr. 14.3-9)

¹ Naxa t'itjáyan injon yaon ntá ts'ixin tí kia pascua. A ntá ch'ín Jesús sákjuí ch'án chjasin Betania tí tjen ch'ín Lázaro. Tí ch'ín Jesús mé tsíkjinhexechón ch'án. ² Ntá ntiha kjóne sín ijnko kónjín kjuikosáyehe sín tí ch'ín Jesús. A ntá tí tjan Marta mé kjuíncheyaxín tjan. A ntá tí ch'ín Lázaro la ko í so sín k'uéjó sín kjóneko sín tí ch'ín Jesús. ³ Ntá tjan María kuikao tjan it'q litro aceite tsík'óna xroqan nardo imá tjete tsík'enaxín tjan ntá kjuíncheka tjan toté ch'ín Jesús ntá kaxihi tjan kjuínchexámáxin tjan tí toté ch'án. Na mé kuenté nkaxenhen nchia kókaxraxé tí xroqan. ⁴ Ntá ch'ín Judas Iscariote, it'é ch'án mé it'in Simón, jehe ch'án mé ijnko tí sín k'uájiko ch'ín Jesús, na mé tí ch'ín sinchekji tí ch'ín Jesús chr'éxin, mé ntáchro ch'án kíxin:

⁵ —¿Nkekuénté kóxihya tí xroqan xraxé, chrókóxiñin iní ciento chichaon denario kíxin chrókjuiñtsa tí sín nòa? —ichro ch'án.

⁶ Kjánchó ch'ín Judas la jehya ntáchro ch'án xíkaha kíxin chrókjukonóehe ch'án tí sín nòa. Náhí. Ntáchro ch'án tíhi kíxin xráxín chee ch'án kíxin jehe ch'án t'ayakonhen ch'án tí nkehe tjinká chichaon ntá xráxín teé ch'án tí chichaon tsíxrenájín ntiha. ⁷ Ntá ntáchro ch'ín Jesús kíxin:

—Nté titohérá tjan. Tsíkjak'echjina tjan tí xroqan a kíxin tí yaon tsoxravána. ⁸ Tí sín nòa jnkochríxín ts'ejokoará sín. A ntá janhan jnkochrínhya ts'ejóni —ichro ch'án.

Tí sín judío itjo sín nkexrí chrók'oyán sín tí ch'ín Lázaro

⁹ A ntá itsjé tí sín judío k'uixikónohe sín kíxin ch'ín Jesús kjuák'e ch'án tí chjasin Betania, a ntá sákjuí sín ntiha. Jehya kíxin chrókjuitsjehe sín tí ch'ín Jesús ó. Náhí. Kjaxin tjinkaon sín chrókjuitsjehe sín tí ch'ín Lázaro mé tí ch'ín tsíkjinhexechón ch'ín Jesús. ¹⁰ Ntá tí sín nchat'á t'etoan mé kójkotsé sín kjuenkayáxin sín chrók'oyán sín tí ch'ín Lázaro kjaxin ¹¹ kíxin itsjé tí sín judío kuítekaon sín tí ch'ín Jesús kíxin xíkaha kjuínchexechón ch'án tí ch'ín Lázaro ntá k'uaxrjekjanxín sín tí sín nchat'á.

K'uíxenhen ch'ín Jesús chjasin Jerusalén

(Mt. 21.1-11; Mr. 11.1-11; Lc. 19.28-40)

¹² Nchónhya chojni sátsíkjí sín chjasin Jerusalén kíxin tí kia pascua. A ntá tí yaon chr'éxin k'uixikónohe sín kíxin tsjiji ch'ín Jesús tí chjasin ntiha. ¹³ Ntá kóchrínjin sín chaan ntakajni kjuíxinhin sín ntja itsji ch'ín Jesús, itsje sín, ntáchro sín kíxin:

—Tjancheheni Dios kjuasáya. Imá jína tí nkexro kuijin sín kjuachaxién It'eni tjen nkaya nkajní. Imá jína tí ch'ín Rey ts'etuēnhen tí nación Israel —ichro sín itsje sín.

¹⁴ Ntá tsík'itja ch'ín Jesús ijnko kolócho la ntá kjuák'ekjen ch'án, éxi nixja itén Dios kíxin:

¹⁵ Chrakonhyará jahará tjejorá chjasin Jerusalén, tsjehérá ó tjekui tí ch'ín Rey kuéntará, tjekjen ch'án ijnko kolócho.*

¹⁶ A ntá tió kónhen tíha kíenxínhya tí sín k'uájiko ch'ín Jesús kíxin nkekuénté xíkaha kónhen. A ntá chr'éxín tió kjuixin sákjujia ch'án nkaya nkajní ntá xraxinkaon sín kíxin xíkaha tsíkjin tí sín k'uéchrónka itén Dios ósé nkexrí tsónhen ch'án, na ntá xíkaha chaxín xiteyá tí chrónka sín senó kíxin xíkaha tsónhen ch'án.

¹⁷ Mé xíkaha kaín tí sín tsíkójnkotsé tí kjuák'e ch'ín Jesús tió k'uíyehé ch'án tí ch'ín Lázaro kíxin ts'axrjexín ch'án tí tòye tsíkjixravá ch'án ntá xechón ch'án mé tí sín a mé chrónka sín tí nkehe k'uíkon sín. ¹⁸ Mé xíkaha sákjuíxinhin sín tí ntia tsíjin ch'ín Jesús, k'uíxikónohe sín kíxin xíkaha tsíkjasin ch'ín Jesús tí kjuaxroan jié. ¹⁹ Mé xíkaha ntáchro tí sín fariseo itjo sín kichó sín kíxin:

—Tsjehérá kaín rá, ninkehó tsjachahyani sich'eni kíxin kaín xín chojni sákjuíchréhé tí jehe ch'án —ichro sín.

Iso sín nkivee griego tjejá sín tí ch'ín Jesús

²⁰ Iso sín nixja griego k'uéjoyákjan tí sín sákjuí sín tí kia chjasin Jerusalén tsoxraxinkakonxín sín Dios. ²¹ Ntá kóchjinehe sín tí ch'ín Felipe, chjasén ch'án mé Betsaida, estado Galilea, chrónohe sín ch'án kíxin:

—Tjinkaonni chrók'uikonni tí ch'ín Jesús —ichro sín.

²² Ntá ch'ín Felipe sákjuíchenka ch'án tí ch'ín Andrés. Na ntá yói sín sákjuíchenka sín tí ch'ín Jesús. ²³ Ntá ntáchro ch'ín Jesús kíxin:

—Ó kjuixraká tí yaon, a ntá tí Xjeen Dios K'óna Chojni mé sátsji ch'án ts'áyéhé ch'án tí kjuachaxin kuénte It'é. ²⁴ A ntá tsotjonkárá ijnko nkehe chaxín kíxin tí chrókjuítsínkahya ijnko noatrido tí nche chrók'uenhya tí noa a, ntá jnkokoá noa chrókjuak'e. A ntá tí chrók'uen tí noa a ntá chrók'óna nchónhya noa kíxin chrótja sín. ²⁵ A ntá tí nkexro imá tjuéhé asén kíxin kohya nkehe chrók'uatsínska na mé tsochóntahya ch'án kjuachón jnkochríxín. A ntá tí nkexro tjekuénhya asén kjónté chrók'uénxín ntihi chjasintajni tí chrónka ch'án itén Dios na mé chr'éxín tsochónta ch'án kjuachón jnkochríxín. ²⁶ A ntá tí jnkojín nkexro tjinkaon chrókjuich'ena sín xra t'ichjánxín tsochréhé sín tí janhan. A ntá tí tjén janhan na mé kjaxin tjejó tí sín ch'ena sín xra. A ntá jnkojín sín sich'ena sín xra xíkaha na mé T'aná mé tsjikosáyehe tí jehe sín.

Ch'ín Jesús chrónka ch'án kíxin its'en ch'án

²⁷ 'Ntá jie imá tóxakonhen qasenná. ¿Nkehe chróntáxrjan? ¿Á chrókjuáncháha T'aná kíxin sinchekaána ch'án tí nkehe tsona jie o náhí? Kjánchó xra ó k'uinka xíkaha tsóna. ²⁸ Jaha It'ení, tjákoxian tí kjuachaxin kuénte ihnjá —ichro ch'án.

Ntá kuínhin sín nixja ijnko nkexro nkajní ntáchro kíxin:

—Ó kjuixin kjuákoxiān tí kjuachaxin la ko xíkaha xikjákoxiān ínaá.

²⁹ A ntá tí sín tjejóntaxín tsíkinhin sín mé ntáchro sín kíxin kjónta, la ko í so sín ntáchro sín kíxin:

—Ijnko ch'ín ángel nixjehé ch'án —ichro sín.

³⁰ Kjánchó ntáchro ch'ín Jesús kíxin:

—Náhí. Jehya kíxin janhan tí jie chrókuñhan tí nixja ch'án. Náhí. Nixja ch'án kíxin tsinhínrá jahará. ³¹ Ntá jie tsitoexín tí ijé chojni chjasintajni na mé tí nkexro t'etqan chjasintajni mé ts'axrjehe ch'án tí xra t'etqan ch'án. ³² A ntá tió tsjak'énkasia ijnko ntacruz ntá nchónhya sín ts'íkon sín ntá tsitekaon sín tí janhan —ichro ch'án.

³³ Mé xíkaha chrónkaxín ch'án kíxin nkexrí ts'enxín ch'án. ³⁴ A ntá kjuátehe tí sín ntiha ntáchro sín kíxin:

* **12:15** Zacarías 9.9

—Kuínhinni nchekuáxin sín tí xroon tsíkjín sín ósé chrónka kíxín Cristo la jnkochríxín tsjak'e ch'án. ¿Ntá nkekuénté ntáchrúa kíxín tí Xjeen Dios K'óna Chojni t'ichjánxín tsjak'enkáni ch'án ijnko ntacruz? ¿Xá nkexéhe tí Xjeen Dios K'óna Chojni? —ichro sín.

35 Ntá ntáchró ch'ín Jesús kíxín:

—Naxaq tjen tí xrohi tjejókoará, kjánchó í séhya tsjak'e. Chrók'uajirá tí naxaq tjen ti xrohi t'inkaséyanxín ntja. A ntá náhí la ó ts'ixin tie. A ntá tí sín ixri tí sítié a mé noehya sín nketí sátsji sín. **36** Títækáonrá tí xrohi tí naxaq tjen t'inkaséyan kíxín mé ts'ónará chojni kuénte t'inkaséyan —ichro ch'án.

Ntá kjuixin chrónka ch'ín Jesús tíha ntá sákjuí ch'án kjuák'eméhe ch'án tí jehe sín.

Tí sín judío kuítekakonhya sín tí ch'ín Jesús

37 K'uékjasin ch'ín Jesús nchónhya kjuaxroan jié k'uíkonxín kon sín ntá kjónté kuítekakuenhya sín ch'án **38** kíxín mé xíkaha tsoxiteyá tí nkehe tsíntáchró ch'ín Isaías tsíkjín ch'án ósé kíxín:

Ínchéni, kohya nkexro kuítekaon tí nkehe chrónkani.

Kohya nkexro kjuínchenohe Dios tí kjuachaxin jié kuénte ch'án.[†]

39 Méxrä kuítekakuenhya sín tí ch'ín Jesús éxi tsíkjín ch'ín Isaías kjaxin kíxín:

40 Dios kjuínchek'ikonya ch'án sín la ko kjuínchecha ch'án asén sín,

kíxín ntá chrók'uikonhya sín,

la ko chrókienxínya sín,

kíxín ntá chrókóchjinehyá sín tí janhan kíxín chrókjuintakitoħa sín jína.[‡] **41** Xíkaha k'uéchrónka ch'ín Isaías imá ósé kíxín k'uék'ikon ch'án tí kjuachaxin jié kuénte Jesús ntá k'uéchrónka ch'án nkexrí tsjak'e tí ch'ín Jesús.

42 Kjánchó itsjé tí sín judío t'etoan kuítekaon sín tí ch'ín Jesús kjánchó noxínya chrónka sín. Chrakonhen sín tí sín fariseo kíxín chrókóninkaon sín la í chrókjuanjonhya sín kjuachaxin chrók'uixenhen sín tí njinkoe sín judío. **43** Mé xíkaha imá kóxrjinhin sín kíxín chojni chjasintajni chrókjuikosáyehe sín ntá kánhyó kjuayá sín kíxín chrókjuikosáyehe sín Dios.

Tí nkehe ntáchró ch'ín Jesús mé tsitoexíxin ijié chojni

44 Ntá itsen nixja ch'ín Jesús ntáchró ch'án kíxín:

—Tí titækáonrá tí janhan na mé jehya janhván titækáonrá na mé kjaxin titækáonrá T'aná, mé tí nkexro k'uetuqanna k'uinka. **45** Éxi tí t'ikonrá tí janhan mé xíkaha t'ikonrá tí nkexro k'uetuqanna k'uinka. **46** A ntá janhan mé xrohi k'uinka chjasintajni kíxín tí sín titækáon sín tí janhan ts'ejóhya sín tí sítié a. **47** A ntá tí jnkojínrá tinhínrá tí nkehe xrjanca ntá titækáonnahyará la jehya janhan sintakjasótiará kíxín jehya kíxín k'uinka sintakjasóte chojni chjasintajni. Náhí. K'uinka kíxín sintakaá chojni. **48** A ntá tí titækáonhyará tí janhan la ko titækáonhyará tí tan kuéntana la ó siín nkexrí tsitoexíxin ijiará, na mé éxi tí tan xrjanca mé Dios sinchekitoexíxin ijiará tí yaon tsjixixín chjasintajni. **49** Jehya tí nkehe kuéntana tjéxrjanca. Náhí. T'aná na mé tí nkexro k'uetuqanna k'uinka mé k'uetuqanna nkehe tsoxrjanca la ko nkehe tsjákua. **50** A ntá nóna kíxín tí nkehe k'uetoan T'aná mé xranjonxín tí kjuachón jnkochríxín. Mé xíkaha tí nkehe ntáxrjan mé tjéxrjanca kíxín T'aná mé k'uetuqanna.

13

Ch'ín Jesús kjuínchek'onti ch'án tqoté tí sín k'uájiko ch'án

1 A ntá tí yaon xíka tí ntóye tsjasin sín tí kia pascua. A ntá ch'ín Jesús ó nohe ch'án kíxín ó kjuixraká tí hora tsítóhe ch'án chjasintajni sátsjichréhe ch'án It'é ch'án. Xráxín tjuéhe ch'án tí sín kuénte ch'án chjasintajni, a ntá jie tsjakoxin ch'án kíxín imá tjuéhe ch'án tí jehe sín.

[†] **12:38** Isaías 53.1 [‡] **12:40** Isaías 6.10

² A ntá tí ch'ín Tsochren tsík'etueñhen əsén ch'ín Judas Iscariote, it'é mé it'in Simón, kíxin sinchekji ch'án tí ch'ín Jesús. ³ Ntá ch'ín Jesús la ó nohe ch'án kíxin tsíkjixin ch'án tí tjen Dios la ko xikjan ch'án sátsjichréhe ch'án Dios ínaá. La ko ó nohe ch'án kíxin It'é ch'án tsíkjanjon kjuachaxin ts'etueñhen ch'án kaín xín nkehe. ⁴ Ntá naxa tjejóne sín ntá k'uínkatjen ch'ín Jesús kuakitsje ch'án tí ka titsáte ch'án la kuákja ch'án ijkno ka xámáxin chojni t'ónti k'uínkat'óxin ch'án. ⁵ Ntá kuikja ch'án ijkno nkehe ntá, ntá kjuankíxin ch'án kjuínchek'ónti ch'án toté jnkojnko tí sín k'uájiko ch'án la ko kjuínchexámáxin ch'án tí ka k'uínkat'óxin ch'án.

⁶ Na ntá tió kjuíjixraká tí tjen ch'ín Pedro, a ntá ntáchro ch'ín Pedro kíxin:

—Jaha Ìnchéni la, ¿nkekuènté chrókjuiñchek'óntia toténi? —ichro ch'án.

⁷ Ntá kjuátēhe ch'ín Jesús ntáchro ch'án kíxin:

—Jaha la naxa tiénxinha tú nkehe tjét'a janhan. Chr'éxín ntá tsiénxian nkekuènté tjét'a tíha —ichro ch'án.

⁸ Ntá ntáchro ch'ín Pedro kíxin:

—Jaha la sinchek'óntihya toténi —ichro ch'án.

Ntá ntáchro ch'ín Jesús kíxin:

—Tí sintak'óntihya tú jaha la kjá ninkehó tsochontahya tú janhan —ichro ch'án.

⁹ Ntá kjuátēhe ch'ín Simón Pedro ntáchro ch'án kíxin:

—Náhí, Ìnchéni. Jehya tú toténi ó chrókjuiñchek'óntia. Kjaxin itjani la ko ikjani chrókjuiñchek'óntia —ichro ch'án.

¹⁰ Ntá ntáchro ch'ín Jesús ínaá kíxin:

—Tí sín tsíkjixin tsík'ónti la t'ichjánxinha kuenté sín ts'ónti sín ínaá. Náhí. Jehó toté sín ó mé t'ichjánxin naxa ts'ónti kíxin kuenté la ó tjóá. A ntá jahará la ó tjóará, kjónté kénhyará —ichro ch'án.

¹¹ Mé xikaha ntáchro ch'ín Jesús kíxin kénhyá sín tjóá sín kíxin ó nohe ch'án nkexro sinchekji ch'án.

¹² Ntá tió kjuixin kjuínchek'ónti ch'án toté sín kaín sín ntá xík'inkáya ch'án ínaá tú ka kuítsáte ch'án ntá kjuák'etjaxin ch'án tí k'uínkatjenxin ch'án. Ntá ntáchro ch'án kíxin:

—¿Á kiéñxirá tú nkehe kjuít'a? ¹³ Jahará la ntáchrórá kíxin janhan Maestro kuéntará la ko Ìnchárá. Chaxín ntoá ntáchrórá kíxin janhan tíha. ¹⁴ Janhan tú Maestro kuéntará la ko ìnchárá kjuíntak'óntia totárá. A ntá jahará kjaxin xikaha chrókjuiñchek'óntirá toté kíchuárá. ¹⁵ Janhan mé kjuákoxiān kíxin xikaha chrókjuiñch'erá éxí kjuít'a janhan. ¹⁶ Ijkno nkehe chaxín tsotjonkará kíxin tú sín ch'exón xrä mé t'etoanhya sín éxí t'etoan tí lámoe sín, la ko tú sín k'uáyéhe sín ijkno xrä t'etoanhya sín éxí t'etoan tú sín kjuanjon tú xrä a. ¹⁷ Tí chrókiéñxirá nkehe túha la ko chrókjuiñchexiteyará la chrókocháhará má.

¹⁸ Jehya kaín rá xikaha ntáxrjan. Ó nòna kíxin nkexro kjuéyá janhan. Kjánchó t'ichjánxin tsoxiteyá tú nkehe tsíkjin sín ósé ntáchro kíxin: “Ijkno nkexro tjénékian mé tsjanjonkian.”* ¹⁹ Mé xikaha tjétjonkará senó kíxin tió ts'atsínka túha ntá tsítekáonrá kíxin janhan mé tú nkexro xráxín tjen. ²⁰ Ijkno nkehe tjetoan tjétjonkará kíxin tú tsjánjonrá kjuachaxin tsitohe tú chojni ichr'an janhan, mé éxí yóhe chrókjuañjonrá kjuachaxin chrókuitohe tú janhan, a ntá tú tsjánjonrá kjuachaxin tsitona janhan mé éxí yóhe chrókjuañjonrá kjuachaxin chrókuitohe tú nkexro k'uëtuanna k'uinka —ichro ch'ín Jesús.

*Ch'ín Jesús chrónka kíxin ch'ín Judas sinchekji ch'án
(Mt. 26.20-25; Mr. 14.17-21; Lc. 22.21-23)*

²¹ Ntá kjuixin chrónka ch'ín Jesús túha, ntá kóxakonhen əsén ch'án má ntá ntoá chrónka ch'án kíxin:

—Ijkno nkehe tjetoan tsotjonkará kíxin jnkojínrá tjejorá ntihi mé sinchekjiráni —ichro ch'án.

* **13:18** Salmo 41.9

²² Ntá tí sín k'uájiko ch'án kjuanjíxín komáxin la ko í komáxin kíchó sín kíxin noehya sín nkexro tí ntáchro ch'án. ²³ A ntá ijnko ch'ín k'uájiko ch'ín Jesús imá tjuèhe ch'án itjen ch'án chjinaxón tí tjen ch'ín Jesús tjejóne sín. ²⁴ Ntá ch'ín Simón Pedro kjuakœxín seña k'uëtuënen ch'án tí ijnko ch'ín a kíxin:

—Tjanchankihí ch'án nkexro tíha —ichro ch'án.

²⁵ A ntá tí ch'ín a na mé antsí kóchjinehe ch'án tí ch'ín Jesús, ntá kjuanchankí ch'án ntáchro ch'án kíxin:

—Inchéni, ¿nkexro tíha? —ichro ch'án.

²⁶ A ntá kjuátēhe ch'ín Jesús ntáche ch'án tí ch'ín a kíxin:

—Sintakjata it'o niotja, a ntá tí nkexro tsotjähä tí t'o niotja a mé tí nkexro a —ichro ch'án.

A ntá mé xikaha kjuínchekjata ch'ín Jesús it'o niotja ntá chjéhe ch'án tí ch'ín Judas Iscariote, it'é ch'án mé it'in Simón. ²⁷ Ntá k'uáyéhe ch'án tí niotja ntá tuénxín k'uíxenhen asén ch'án tí ch'ín Tsochren. Ntá ntáche ch'ín Jesús tí jehe ch'án kíxin:

—Tí xrä tjinkávan sich'e la jaí tóxakonhan —ichro ch'án.

²⁸ Kjánchó nijnko tí sín tjejóne ntiha kienxínya sín nkekuénté xikaha ntáchro ch'án.

²⁹ Ch'ín Judas la t'ayakonhen ch'án tí nkehe tjinká chichaon ntá iso sín kjuenkayáxin sín kíxin ách'e ch'ín Jesús mé k'uëtuënen ch'án tí ch'ín Judas kíxin ichrén nkehe sátsjik'ena ch'án kuènte tí kia a, o ách'e ichrén nkehe sinchekitonhen ch'án tí sín nòa a. ³⁰ Ntá k'uáyéhe ch'ín Judas tí niotja, a ntá k'uaxrjexín ch'án ntiha. A ntá ó k'uíxin tie.

Ijnko nkehe nixin k'uëtqan ch'ín Jesús

³¹ A ntá ó kjuixin sátsíki ch'ín Judas, ntá ntáchro ch'ín Jesús kíxin:

—A ntá jie tsotonoxín tí kjuachaxin jié kuènte tí Xjeen Dios K'óna Chojni la ko tsjakoxin ch'án tí kjuachaxin jié kuènte Dios. ³² Na mé xikaha tí Xjeen Dios K'óna Chojni mé tsjakoxin tí kjuachaxin jié kuènte Dios. A ntá Dios mé tsjakoxin ch'án tí kjuachaxin kuènte Xjeen ch'án la tjoka tsoxiteyá. ³³ Xjeenni, í séhya naxa tsjak'é janhan ts'ejókoará ntihi. Ntá jahará mé ts'ajikjéyará tí janhan. Ntá éxi yóhé k'uëtjänka tí sín judío mé tjonkará kjaxinrá kíxin: Ninkexró xitjahya tsjiji sín tí sátsjiyá janhan.[†] ³⁴ Ijnko nkehe nixin tétuñhanrá ijie kíxin chrótjuèhérá kíchuárá éxi yóhé tjuñhará mé xikaha chrótjuèhérá kíchuárá. ³⁵ Tí tsotjuèhérá kíchuárá ntá tsongoexín kaín xín chojni siín chjasintajni kíxin tinkachónkirá tí janhan —ichro ch'án.

Chrónka ch'ín Jesús kíxin ch'ín Pedro sinchemá ch'án kíxin chónhya ch'án tí jehe ch'án (Mt. 26.31-35; Mr. 14.27-31; Lc. 22.31-34)

³⁶ Ntá kjuanchankíhi ch'ín Simón Pedro tí ch'ín Jesús kíxin:

—Inchéni, ¿nketí sátsjia? —ichro ch'án.

Ntá kjuátēhe ch'ín Jesús ntáchro ch'án kíxin:

—Tí nó sátsjiyá xitjahya tsochréhérá jaí. Ntá chr'éxín tsjasánchréhérá ntiha —ichro ch'án.

³⁷ A ntá ntáchro ch'ín Pedro kíxin:

—¿Nkekuénté xitjahya tsochráhá tí jaha jaí? Kjónté chrók'uényákonhán —ichro ch'án.

³⁸ Ntá kjuátēhe ch'ín Jesús ntáchro ch'án kíxin:

—¿Á chaxín ts'enyákònna jaha? Ijnko nkehe chaxín tsotjonka kíxin naxa tsotsjehya tí kochínto la ó tsjixin sìnchemána níya kíxin chonhyana, tsixrua.

14

Jesús mé ntia sátsjixinni tí tjen It'eni tjen nkaya nkajni

¹ 'Tóxakuanhyará jahará. Títekáonrá Dios la ko kjaxin títekáonrá tí janhan. ² Ntoe T'aná nchónhya nchia siín ts'ejóni. A ntá tí xikahya chrók'uixin la xikahya chrótjónkará. Méxra

[†] 13:33 Juan 7.33

sátsjiyá sintayóxian tí chrók'uejóni. ³ A ntá tí sátsjiyá sintayóxian, ntá tió tsjixin ntá ts'inka ínaá, ntá sátsjini kíxin jahará kjäxin chrók'uejorá ntiha tí tsjak'é janhan. ⁴ Jahará la ó nohará nketí sátsjiyá la ko ó nohará tí ntja a —ichro ch'án.

⁵ Ntá kjuát̄ehe ch'ín Tomás ntáchro ch'án kíxin:

—Inchéni, noehyani nketí sátsjia jaha. ¿A ntá nkexrí chrókónoheni tí ntja a? —ichro ch'án.

⁶ Ntá kjuát̄ehe ch'ín Jesús ntáchro ch'án kíxin:

—Janhan mé tí ntja la ko janhan mé tí tan chaxín la ko janhan mé tsjánjuan tí kjuachón. Jehó tí nkexro tsitekaon tí janhan mé jína tsjiji tí tjen T'aná. ⁷ Tí chrókjuátsqanrá tí janhan ntá xikaha chrókjuátsqanrá T'aná kjäxin. Na ntá ó choxínrá ch'án jie la ko ó tjejókomará ch'án —ichro ch'án.

⁸ Ntá ntáchro ch'ín Felipe kíxin:

—Inchéni, tijohéni kíxin tschóxinni It'á. Táhó mé tjinkaonni —ichro ch'án.

⁹ Ntá kjuát̄ehe ch'ín Jesús ntáchro ch'án kíxin:

—Felipe, ósé tjejóni, ¿a ntá naxa tjátsoanhya tí janhan ní? A ntá xikaha tí t'ikonrá tí janhan na mé xikaha chrók'uikonrá T'aná. ¿Nkekuénté tjanchàna kíxin chrókuít̄oha chrók'uikonrá tí T'aná? ¹⁰ ¿Á títekákonhya jaha kíxin janhan jnkokoá tjékian T'aná, la ko T'aná tjen tí tjén janhan? Tí nkehe níxja janhan la jehya kuéntana. Náhí. T'aná tjékian janhan mé tjech'e ch'án tí xra kuénte ch'án. ¹¹ Títekáonrá kíxin jnkokoá tjékian T'aná, a ntá T'aná itjen tí tjén janhan. Kjónté kuítekákonhyará xikaha la chrókuít̄ekáonrá kíxin tí kjuaxroan jié kjuákoxiān k'uikonrá. ¹² Ijnko nkehe chaxín tjonkará kíxin tí chaxín tsítekáonrá tí janhan ntá kjaxinrá tsjachará sich'erá xra yóhe tjét'a la ko kjaxin ixra qantsí jié tsjachará sich'erá kíxin janhan la ó sátsjiyá tí tjen T'aná. ¹³ Kaín nkehe tsjanchatóxixínrá tí njina na mé tsjánjuan kíxin xikaha tsjákoxiān tí kjuachaxin kuénte T'aná. ¹⁴ Tí chrén nkehe tsjanchatóxixínrá njina la janhan la tsjánjuan.

Ch'ín Jesús chrónka ch'án kíxin chaxín tsocchr'án ch'án tí Nchakuen Dios

¹⁵ Tí chaxín tjuéhérá tí janhan ntá chrókjuínchexiteyéhérá tí nkehe kuétuñhanrá.

¹⁶ Ntá tsorxjannóha T'aná kíxin tsocchr'án ch'án Nchakuen ch'án kíxin tsjinkitsa tí jahará la ko sinchechéhe asánrá la mé ts'ejokoará jnkochríxín. ¹⁷ Jehe ch'án mé Nchakuen chaxín. Tí sín chjasintajni xitjahya ts'áyéhe sín ch'án kíxin t'ikonhya sín ch'án la ko chónhya sín ch'án. Kjánchó jahará ó choxínrá ch'án kíxin tjejokoará ch'án la ko ts'ejokoará ch'án jnkochríxín. ¹⁸ Janhan na tsitoáhyará nōerá jahórá, na mé tsokjan ínaá kíxin ts'ejóni.

¹⁹ A ntá séhya ntá tí sín chjasintajni ts'ikonhya sin tí janhan ínaá. Kjánchó jahará mé ts'ikonrá tí janhan. Ntá kjaxinrá ts'ejochónrá kíxin janhan na tjechuān. ²⁰ A ntá tí yaon a chrókónohará kíxin T'aná la ko janhan jnkokoá tjékian la ko kjaxin jahará la ko janhan jnkokoá tjejóni. ²¹ Tí nkexro nohe tí nkehe tétoan la ko sinchexiteyéhe sín mé xikaha tsjákoxiān sín kíxin chaxín tjuéhe sín tí janhan. A ntá tí tjuéhe sín tí janhan ntá T'aná mé tsotjuéhe tí jehe sín la ko kjaxin janhan tsotjuāha sín la ko tsjákoxiān nkexrí tjén janhan —ichro ch'ín Jesús.

²² A ntá tí ch'ín Judas, jehya tí ch'ín Iscariote tíha, na mé kjuanchankí ch'án kíxin:

—Inchéni, ¿nkekuénté jehóni tjákoxiān, a ntá tjákoxéxinha tí chojni chjasintajni? —ichro ch'án.

²³ Ntá kjuát̄ehe ch'ín Jesús ntáchro ch'án kíxin:

—Tí nkexro tjuéhe tí janhan mé sinchexiteyéhe tí nkehe tétoan. La ko T'aná mé tsotjuéhe tí jehe sín la ntá T'aná la ko janhan ts'ejókoni sín. ²⁴ A ntá tí sín tjuéhya tí janhan la mé nchexiteyéhya sín tí nkehe tjákua. A ntá tí nkehe tjákua tjejotinhínrá la jehya kuéntana. Náhí. Kuénte T'aná tí nkexro k'uētuñanna k'uinka.

²⁵ Naxa tjejóni la tjétjonkará kaín tíhi. ²⁶ A ntá Nchakuen T'aná tsochr'án ch'án kjuachaxin nina mé tsjinkitsa tí jahará la ko sinchechéhé asánrá la ko tsjakohará kaín nkehe la ko sinchexraxinkaonrá kaín nkehe xrjanca.

²⁷ Kjuaxróxin tsitoha la ko kjuaxróxin kuéntana tsotjahará. Jehya éxí tí kjuaxróxin chrókuanjon tí sín chjasintajni. Náhí. Chrókoxakuenhyá asánrá la ko chróchrakonhyará.

²⁸ Ó kuínhínrá ntáxrjan kixin sátsjiyá la ko tsokjan janhan ts'ejóni ínaá. Tí chaxín tjuéhérá tí janhan ntá chrókocháhará tí kuínhínrá kixin sátsjiyá tí tjen T'aná kixin antsí t'etqan ch'án la kánhyó tétoan janhan. ²⁹ Senó tjétjonkará tíhi kixin tió tsónhen tíha la ts'ikonrá ntá tsítekáonrá jahará.

³⁰ Ntá jie la í séhya tsonixjahará kixin tí jie itsi tí ch'ín Tsochren, mé tí nkexro t'etueñhen tí sín chjasintajni. A ntá jehe ch'án la ninkehó t'etuannhyá tí janhan.

³¹ Kjánchó t'ichjánxín kixin xikaha tsónhen ntá tí sín chjasintajni mé tsónohe sín kixin tjuahá T'aná la ko nchexiteyáha tí nkehe k'uettuanna ch'án. Ntá jie t'inkatjenrá sátsjixínni ntihi.

15

Tí nta t'óna to uva la ko tí chaan nta

¹ Janhan mé exí yóhe ijnko ntanòa tjechón itsa to uva la ko T'aná mé exí yóhe tí nkexro t'ayakonhen tí nta a. ² Tsochrínjin ch'án tí chaan nta t'ónahya to. A ntá tí chaan nta t'óna to mé nchetjuák'á ch'án kixin ntá ts'óna antsí má tsjé to. ³ A ntá jahará la kótjuáxinrá tí tanná k'uétjonkará senó. ⁴ Tí tsitoéhyará tí janhan ntá kjaxin janhan tsitoahya tí jahará. Mé xikaha ijnko chaan nta ts'axrjentehe tsjachahya jehó ts'óna to, la ko xikaha jahórá tsjachahyará sich'erá tí xra kuéntana tí tsitohérrá tí janhan.

⁵ Janhan na mé yóhe tí ntanòa, a ntá jahará la tí chaan tí ntanòa tsík'ayanta. Tí nkexro jnkokoá tjenkayáxinkian mé tsjacha ts'óna nchónhyá to. A ntá tí tsinkáchónkihyá sín tí janhan la ninkehó xra tsjachahya sín sich'e sín. ⁶ A ntá tí nkexro jnkokoáhyá tjenkayáxinkian na mé exí yóhe tí nta ch'ehya xra tsíkóchrínjin sín tsík'itjí sín chrínta tí nonte a tsoxámá ntá tsoxrejo ntá tsoche.

⁷ Ntá tí chaxín tsitoéhyará tsinkachónkirá tí janhan la ko ts'itjáyanhyará tí nkehe kjuákohará ntá tsjanchiará ichréñ nkehe tjinkáonrá la ts'ayéhérá. ⁸ A ntá T'aná la tsochéhé ch'án tí ts'ónará itsjé to. Mé xikaha tsjákoxinrá kixin tinkachónkirá tí janhan. ⁹ Janhan tjuahará tí jahará exí tjuana T'aná. Chrókónohará kixin tjuahará. ¹⁰ Tí tsítekáonrá tí nkehe kuétuñhanrá ntá tsónohará kixin tjuahará exí yóhe kjaxin janhan ntaxiteyá tí nkehe k'uettuanna T'aná ntá kónona janhan kixin tjuana ch'án.

¹¹ Mé xikaha tjónkará kaín tíha kixin ntá exí chàna mé xikaha tsjintaxín tsochéhé asánrá. ¹² Tí nkehe kuétuñhanrá la mé tíhi kixin chrótjuéhérá kíchuárá exí tjuahará xikaha. ¹³ Ninkexró chrókoyóhá exí tí nkexro imá tjuéhe tí sín chóxin ch'án ntá ts'enyákonhen ch'án tí jehe sín. ¹⁴ Jahará la chojni choxian tí tsítekáonrá tí nkehe tétuñhanrá. ¹⁵ Ntáxrjanhyá janhan kixin jahará chojni ch'exón xra kixin tí chojni xikaha ch'exón xra mé noehya sín nkehe tí xra ch'e tí lámoe sín a. Náhí. A ntá jahará la chojni choxian kixin kaín xín nkehe kjuakona T'aná mé kjuákohará. ¹⁶ Jehya kixin jahará kjuéyará tí janhan. Náhí. Janhan mé kjuéyá tí jahará kixin tsotjahará xra, a ntá exí yóhe to xé mé chrók'uaxrje jína tí xra sich'enará kixin chrók'uitjáyanhyá. A ntá T'aná mé tsotjáhará ch'án kaín xín nkehe tsjanchexínrá nina. ¹⁷ Mé xikaha tétuñhanrá kixin tsotjuéhérá kíchuárá.

Tí sín chjasintajni nínkakonhen sín tí ch'ín Jesús la ko tí sín tinkáchónki ch'án

¹⁸ Tí tsónínkakonhanrá tí chojni chjasintajni ntá chrókónohará kixin senó janhan nínkakonna sín. ¹⁹ Tí chrókókuéntará chjasintajni ntá tí sín chjasintajni chrótjuéhérá sín kixin naxa kjéhyará sín. Kjánchó janhan kjuéyá tí jahará kixin chrók'uaxrjékjanxínrá tí

sín siín chjasintajni. A ntá tí sín chjasintajni nínkakonhanrá sín kíxín jahará jahyará kuèntárá chjasintajni. ²⁰ Xráxinkáonrá tí nkehe tsítjonkará kíxín tí sín ch'ehe lámoe sín xrä tjetóxinha ts'etqan sín.* Éxí yóhé chónkina sín mé xíkaha tsochónkíhi sín tí jahará. A ntá tí kuítekaon sín tí nkehe kjuákohä sín ntá kjaxin tsitekaon sín tí nkehe naxa tsjákokhérá sín. ²¹ Mé xíkaha sit'ahará sín kíxín jahará tinkachónkirá tí janhan la ko jehe sín chónhya sín tí nkexro ichr'ánnna k'uinka ntihi.

²² Tí chrók'uinkahya janhan ntihi chrónixjahya sín ntá chrókuamáhyá sín jie. Ntá jie kohya nkerí tsaáxin sín kíxín tí jie tinkákjasin sín. ²³ Tí sín nínkakonna mé xíkaha nínkakonhen sín T'aná. ²⁴ Chróchóntahya sín jie tí chrók'uejókianhya sín ntihi chrókjuásinhya janhan kjuaxroan jie éxí tsíkjasinhya ninkexró senó. Ntá jie ó k'uikon sín kaín tí kjuaxroan, a ntá kjónté nínkakonna sín tí janhan la ko nínkakonhen sín T'aná kjaxin. ²⁵ Mé xíkaha tsónhen kaín tíha kíxín ntá tsoxiteyá tí nkehe ntáchro tí ley kuènte sín kíxín: "Kohya jie kjuásian janhan ntá kjónté kónínkakonna sín."† ²⁶ A ntá tsi tí nkexro tsjinkitsa la ko sinchechéhe asánrá. Tíha mé tí Nchákuén Dios chaxín. Janhan mé tsochr'an ch'án kíxín tí kjuachaxin kuènte T'aná. A ntá jehe ch'án mé tsochrónka nkexrí tjén janhan ²⁷ la ko jahará kjaxinrá tsochrónkará nkexrí tjén janhan kíxín tí xrankíxín la k'uéjóni jnkokoá.

16

¹ 'Kaín tíhi tjétjonkará kíxín chrókuitoéhyará tí nkehe kjuákhárá. ² Tí sín judío tsjanjhya sín kjuachaxin ts'ixenhenrá ninkoé sín la ko tsjixraká tí yaon kíxín tí sín ts'oyán sín tí jahará tsontáchro sín kíxín xíkaha mé tjejoch'e sín xrä kuènte Dios, tsixro sín. ³ Mé xíkaha sich'e sín kíxín chónhya sín T'aná la ko chónhyana sín. ⁴ A ntá tjonkará kaín tíhi kíxín tió tsjixraká tí yaon xíkaha tsónhen ntá tsoxráxinkáonrá kíxín ó k'uétjonkará senó a.

Tí xrä ch'e Nchákuén Dios

"Tí xrankíxín k'uétjonkahyará tíhi kíxín jnkokoá k'uék'ejóni. ⁵ Ntá jie sátsjiyá tí tjen tí nkexro ichr'ánnna k'uinka. Kjánchó nijnkorá tjanchankíhyará nketí sátsjiyá. ⁶ Ntá kjuixin tjonkará tíha ntá imá t'avará kíxín kuínhínrá xíkaha xrjanka. ⁷ A ntá chaxín tí nkehe tjétjonkará kíxín íchá jína sátsjiyá kíxín jahará jína chrók'uejorá. A ntá tí sáchrókjuíhyá ntá chrókuihyá tí nkexro tsjinkitsará. A ntá tí sátsjiyá janhan ntá tsétoan kíxín itsi ch'án ntihi. ⁸ A ntá tió tsi ch'án mé sinchexraxinkaon ch'án tí chojni chjasintajni kíxín jehe sín mé tjasin sín jie, la ko itjen ijkno ntja ntoá chrókuakja sín la ko Dios mé sinchekitqexín tí jie kjuasin sín. ⁹ Xíkaha chóntha sín jie kíxín tinkáchónkihya sín tí janhan. ¹⁰ A ntá tsongohe sín kíxín itjen tí ntja ntoá kíxín sátsjiyá tí tjen T'aná ntá ts'ikonyará tí janhan ínaá, ¹¹ la ko tsongohe sín kíxín Dios sinchekitqexín ijié kíxín ó kjuixin kuitqexín ijié tí nkexro t'etqan chjasintajni kíxín tsjasóte.

¹² 'Naxa chonta janhan itsjé nkehe chrótjonkará, kjánchó chrókjuachahyará chrókiénxinrá jie. ¹³ A ntá tió tsi tí Nchákuén Dios chaxín ntoá ntá jehe tí Nchákuén Dios mé tsjakohará ch'án kaín xín nkehe ntoá. Méxrä jehya tí nkehe kuènte ch'án tsochrónka ch'án na mé tí nkehe tsinhhin ch'án mé tsochrónka ch'án tsjakohará ch'án tí nkehe tsónhen chr'éxin. ¹⁴ Jehe ch'án mé tsjikosayana ch'án kíxín ts'ayéhé ch'án tí nkehe kuéntana ntá tsjakohará ch'án nkehe tíha. ¹⁵ Kaínxín nkehe chonta T'aná na mé kuéntana. Mé xíkaha ntáxrjan kíxín tí Nchákuén Dios chaxín ntoá mé ts'ayéhé ch'án tí nkehe kuéntana ntá tsjakohará ch'án nkehe tíha.

Senó ts'ává sín ntá chr'éxin tsochéhé sín

¹⁶ 'Ntá í séhya la í ts'ikonyará tí janhan. La ko kjaxin séhya xik'ikónrá tí janhan ínaá kíxín sátsjiyá tí tjen T'aná —ichro ch'án.

¹⁷ Ntá iso tí sín k'uájiko ch'án mé kjuanchankíhi sín kichó sín kíxín:

* ^{15:20} Juan 13.16 † ^{15:25} Salmo 35.19; 69.4

—¿Nkexrí t'axrjexín tí nkehe ntáchro ch'án kíxin í séhya ts'ikonyani ch'án la ko kjaxin séhya ntá xik'ikonní ch'án ínaá kíxin sátsjí ch'án tí tjen It'é ch'án? ¹⁸ ¿Nkexrí t'axrjexín tí ntáchro ch'án kíxin “í séhya”? Méxra tienxínhyá nkehe tí ntáchro ch'án —ichro sín.

¹⁹ Ntá kónohe ch'ín Jesús tí nkehe chrókuanchankíhi sín ch'án ntá ntáche ch'án sín kíxin:

—Xíkaha tjonkará kíxin í séhya ts'ikonyará tí janhan la ko kjaxin séhya xik'ikonní tí janhan ínaá. ¿Á tíha mé tjeotjanchankíhírá kíchuárá ní? ²⁰ Tjétjónkará ijkno nkehe chaxín kíxin imá tsotsjankará la ko ts'avará. A ntá tí chojni chjasintajni la tsochéhé sín. A ntá jahará ts'avará la ko sintaníhará kjonté chr'éxín tsocháhará má. ²¹ Éxí yóhē ijkno tjan sinchekokjíhi tjan xjeen tjan mé imá tóxakonhen tjan kíxin ó kjuixraká tsjoté tjan. A ntá tsjixin tsokjíhi xjan ntá í xraxinkakonhyá tjan nkexrí kjoté tjan kíxin chéhé tjan kokjíhi ijkno xjan ntihi chjasintajni. ²² Mé xíkaha jahará ijie t'avará. Ntá xik'íkuán tí jahará ínaá ntá imá tsochéhé asánrá la ko tsokohya ninkexró tsakitsajahará tí kjuachéhé tsochontará.

²³ 'Tió tsi tí yaon a ntá tsjanchankínahyará ninkehó. Chaxín tí nkehe tjétjónkará kíxin T'aná tsotjáhará ch'án kaín nkehe tsjanchatóxixínrá njina. ²⁴ Naxa kjuánchatóxixínyará ninkehó tí njina. Ntá jie tjanchiará la ts'ayéhérá, a ntá tsjintaxín tsocháhará.

Inchéni Jesucristo mé kjuacha ch'án k'uetoan ch'án, ntá chjasintajni la náhí

²⁵ Tí nkehe tjétjónkará mé kjuintayóaxián ó. Ntá tsjixraká tí yaon la í ninkehó sintayóaxián na mé ntoá tsotjonkará nkexrí tjen T'aná. ²⁶ A ntá tí yaon a mé tsjanchaxínrá nkehe njina. Ntá ntáxrjanhyá tíhi kíxin tsonixjayákonhanrá tí tjen T'aná ²⁷ kíxin jehe T'aná mé tjuahará jahará. Na mé tjuahará ch'án kíxin jahará tjuánará tí janhan la ko kíxin kuítekáonrá kíxin janhan k'uinkaxian tí tjen Dios. ²⁸ K'uaxrjéxian tí tjen T'aná k'uinka chjasintajni. Ntá jie la ó tsitohá chjasintajni ntá sátsiyá ínaá tí tjen T'aná —ichro ch'án.

²⁹ Ntá ntáchro tí sín k'uajiko ch'án a kíxin:

—Ntá jie ntoá tjéchronka ninkehó ncheyoyéxinhya. ³⁰ Ntá jie tienxinní kíxin jaha mé noha kaín xín nkehe la ko t'ichjánxínhyá kíxin jnkojín nkexró chrókuanchankíha sín ichréñ nkehe. Méxra xíkaha titekaonni kíxin jaha mé k'uinkaxian tí tjen Dios —ichro sín.

³¹ Ntá kjuátehe ch'ín Jesús ntáchro ch'án kíxin:

—¿Á jie kuítekáonrá ní? ³² Ntá tsi tí yaon na mé jie tíha na ntá tsochrakonrá jnkojnkorá tsoxíkará sátsjirá ntá tsitonará janhván tsjak'é. Kjánchó jehya janhván tjen. T'aná mé tjékjan. ³³ Tjétjónkará kaín tíhi kíxin ntá kjuaxróxin ts'ejó asánrá tinkachónkirá tí janhan. A ntá ntihi chjasintajni kjonté kjuaxróxinhya tjejorá tjeotjasóterá kjánchó chrakonhyará kíxin janhan mé ó kjuixin kjuacha tsétoan. A ntá tí chjasintajni la kjuachahya ts'etoan —ichro ch'án.

17

Ch'ín Jesús chrónóhe ch'án It'é ch'án kíxin chrókuayakonhen tí sín k'uajiko ch'án

¹ Ntá ó kjuixin chrónka ch'ín Jesús kaín tíha ntá konta ch'án nkajní ntáchro ch'án kíxin:

—Jaha It'eni, ó kjuixraká tí yaon a. A ntá jie chróchjehé tí Xjaan qantsí má kjuachaxin kíxin kjaxin tí Xjaan chrókuiskosáyehé tí jaha. ² Jaha tsichjehé kjuachaxin tí Xjaan kíxin ts'etueñhen ch'án kaín xín chojni na ntá jehe ch'án tsochjehé kjuachón jnkochríxín kaín tí sín tsichjehé ch'án. ³ Tí kjuachón jnkochríxín mé t'axrjexín kíxin tsochóxian sín tí jaha tí jnkokoá Dios chaxín tjechón la ko kjaxin tsochóxin sín Jesucristo la mé jaha kuétuñhén ch'án kui ch'án ntihi chjasintajni.

⁴ 'Ó kjuixin kjuíkosáyaha tí jaha ntihi chjasintajni kjuixinna tí xrä chjìna sit'a. ⁵ A ntá jie It'eni, chjìna jaha tí kjuachaxin jié k'uéchonta janhan tí k'uéjóni jnkokoá naxa k'ónahya chjasintajni.

⁶ 'Ó kjuixin kjuákoh̄a tí sín chjìna chjasintajni kíxin nkexro tí jaha. Jaha mé k'uékuéntá sín tí ósé ntá jie chjìna tí janhan la ó kjuákoh̄a sín itán la ntá ijie la ó kuítekaon sín. ⁷ Ntá jie ó kjuátsoan sín kíxin kaín tí kjuachaxin chonta janhan la jaha tsíkjánjuan. ⁸ Kíxin ó kjuixin kjuákoh̄a sín tí tán chjìna jaha, ntá kuítekaon sín, ntá kuíenxín sín kíxin mé chaxín tsík'inkaxian tí tjen jaha, na mé kuítekaon sín kíxin jaha kuétuannna k'uinka.

⁹ Janhan mé xrjanóha kíxin chrók'uayakonhén tí jehe sín. Jehya kíxin xrjanóha kíxin chrók'uayakonhén kaín tí chojni sín chjasintajni. Náhí. Jehó xrjanóha kíxin chrók'uayakonhén tí sín chjìna kíxin kuéntá sín. ¹⁰ A ntá kaín tí nkehe chonta janhan na mé kuéntá jaha la ko kaín tí nkehe kuéntá la mé kuéntana kjaxin. A ntá tí kjuachaxin jié kuéntana mé ts'inkaséyanxín tí jehe sín.

¹¹ A ntá jie tsitonahya janhan ntihi chjasintajni. Kjánchó jehe sín naxa tsitohe sín chjasintajni. A ntá jie tsjasán tí tjen jaha. Jaha It'eni imá jína jaha, t'ayakuensián sín tí kjuachaxin tí iñnjá kíxin ntá jnkokoá chrókjuenkayáxin sín éxi tí jaha la ko janhan jnkokoá tjenkayáxinni. ¹² A ntá tí naxa k'uéjókian tí jehe sín ntihi chjasintajni la k'uayakuànsián sín tí kjuachaxin tí iñnjá chjìna. Nijnko tí jehe sín k'uitjáyanhya sín. A ntá jnkokoá nkexro mé k'uítjáyan mé tí ch'ín xraxín ts'itjáyan kíxin xikaha toxiteyá éxi nixja tí xroon tsíkjín sín.

¹³ 'Ntá jie ó tsjasán tí tjen jaha. A ntá naxa itjén janhan chjasintajni mé ntáxrjan tíhi kíxin ntá tsochéhé sín éxi yóhē imá chàna. ¹⁴ Janhan mé kjuákoh̄a sín itán jaha, a ntá jie tí sín chjasintajni mé nínkakonhen tí jehe sín kíxin jehe sín la jehya kuénte chjasintajni éxi kjaxin janhan na janhyá kuéntana chjasintajni. ¹⁵ Tjáncháhya kíxin chrókuakítsjehé sín chjasintajni. Náhí. Tjáncháhá kíxin chrók'uayakonhén sín kíxin chrókjuich'iyehya sín tí Jínahya. ¹⁶ Jehe sín la jehya kuénte chjasintajni éxi yóhē janhan kjaxin janhyá kuénte chjasintajni. ¹⁷ Nchetjuáxian sín tí kjuachaxin kuéntá kíxin itán jaha mé tí tan chaxín ntoá. ¹⁸ Éxi yóhē jaha kuétuannna k'uinka chjasintajni mé xikaha janhan tétuanhán sín kíxin chrók'uejóyákjan sín tí sín chjasintajni. ¹⁹ Jehó tí xrä kuéntá chrókjuít'a kíxin chrókjuinkitsa tí jehe sín, a ntá jehe sín kjaxin chrókjuich'e sín tí xrä kuéntá kíxin kuínhin sín itán chaxín ntoá.

²⁰ Kjánchó jehya kíxin xrjanóha kíxin chrókjuinkitsa tí jehó sín. Náhí. Kjaxin xrjanóha kíxin chrókjuinkitsa kaín tí sín tsitekaon sín chr'éxin tsinhin sín tí nkehe tsochrónka tí sín a. ²¹ Mé xikaha xrjanóha kíxin kaín tí jehe sín jnkokoá chrókjuenkayáxin sín éxi jaha It'eni la ko janhan jnkokoá tjenkayáxinni mé xikaha xrjanóha kíxin kaín tí jehe sín la ko jaha la ko janhan jnkokoá chrókjuenkayáxinni. A ntá tí sín chjasintajni chrókuitekaon sín kíxin jaha tsíkétuanna k'uinka ntihi. ²² A ntá tí kjuachaxin jié chjìna na mé tjahá tí jehe sín kíxin ntá kaín sín jnkokoá chrókjuenkayáxin sín éxi yóhē jaha la ko janhan jnkokoá tjenkayáxinni. ²³ Janhan la ko jehe sín jnkokoá chrókjuenkayáxinni éxi jaha la ko janhan jnkokoá tjenkayáxinni. Mé xikaha tí sín chjasintajni chrókónohe sín kíxin jaha kuétuannna k'uinka la ko kjaxin chrókónohe sín kíxin jaha tjuéhé tí jehe sín éxi yóhē tjuana tí jaha.

²⁴ 'Jaha It'eni, tí sín kjuánjuan la tjínkavan kíxin tí jehe sín chrók'uejókian sín tí tsjak'é janhan kíxin chrók'uikon sín tí kjuachaxin jié chjìna; kíxin xraxín naxa k'ónahya chjasintajni k'uétjuanna jaha. ²⁵ It'eni jaha, imá jína jaha. Kjónté tí sín chjasintajni naxa chónhya sín tí jaha, ntá janhan na ó xraxín choxian tí jaha la ko kaín tí sín i kjaxin ó nohe sín kíxin jaha kuétuannna k'uinka. ²⁶ Ó kjuákoh̄a sín kíxin nkexro tí jaha la ko xikaha naxa tsjákokha sín, kíxin éxi tjuana jaha mé xikaha chrótjuéhe sín kichó sín la ko janhan chrók'uejókian tí jehe sín —mé xikaha chrónóehe ch'ín Jesú斯 tí It'é ch'án.

18

*Ch'ín Jesú斯 sákjuiko sín ch'án tsjak'echjina ch'án
(Mt. 26.47-56; Mr. 14.43-50; Lc. 22.47-53)*

¹ Ó kjuixin ntáchro ch'ín Jesús kaín tíha ntá jehe ch'án la ko tí sín k'uájiko ch'án k'uaxrjexín sín ntiha k'uatòye sín tí tsaka Cedrón. Ntaha tjen ijkno nonte siín nchónhya nta k'uíxenhen ch'ín Jesús la ko tí sín k'uájiko ch'án. ² Kjaxin ch'ín Judas tí ch'ín sinchekji tí ch'ín Jesús mé nohe ch'án kíxin ntaha tjen tí huerto a kíxin ntaha jnkoyaxón kójnkotséko ch'ín Jesús tí sín k'uájiko ch'án a. ³ A ntá ch'ín Judas ó kjuikqo ch'án nchónhya sín soldado la ko iso sín policía kuénte njinko tsík'etueñhen tí sín nchát'á t'etoan la ko tí sin fariseo. Ntá kjui sín kaín sín xraá sín chica la ko kjuikqo sín xrohi t'inkaséyanxín tí kjuixin sín. ⁴ A ntá ch'ín Jesús ó nohe ch'án kaín xín nkehe ts'atsínka ch'án, ntá sákjuí ch'án kjuanchankíhi ch'án sín ntáchro ch'án kíxin:

—¿Nkexro xritjéyará? —ichro ch'án.

⁵ Ntá kjuátehe sín ntáchro sín kíxin:

—Tjeyáni tí ch'ín Jesús tsíkjixín chjasin Nazaret —ichro sín.

Ntá kjuátehe ch'ín Jesús ntáchro ch'án kíxin:

—Janhan tíha —ichro ch'án.

A ntá ch'ín Judas tí ch'ín tsíkjinchekji tí ch'ín Jesús mé koí tjenkákjan ch'án tí jehe sín ntiha. ⁶ A ntá tió kjuátehe ch'ín Jesús kíxin jehe ch'án tíha, ntá jehe sín xráchonka sín kjuítísinka sín nonte. ⁷ Ntá xíkjanchankí ch'ín Jesús ínaá ntáchro ch'án kíxin:

—¿Nkexro xritjéyará? —ichro ch'án.

Ntá xíntáchro sín kíxin:

—Tjeyáni tí ch'ín Jesús tsíkjixín chjasin Nazaret —ichro sín.

⁸ Ntá ntáchro ch'ín Jesús kíxin:

—Ó kjuixin tjonkárá kíxin janhan tíha. Tí xritjéyará tí janhan ntá títohérá sátsji tí í so sín xríkjan —ichro ch'án.

⁹ Mé xíkaha ntáchro ch'ín Jesús kíxin ntá tsoxiteyá tí nkehe tsíntáchro ch'án kíxin: “Tí sín kjujon T'aná la ninkexró kjuintak'itjáyanhy.”* ¹⁰ Ntá ch'ín Simón Pedro kuakitsje ch'án tí chica espada chrinkatoxin ch'án kóchrínjin ch'án tatsuon chjina ijkno ch'ín it'in Malco, mé ijkno ch'ín ch'ehe nchát'á t'etoan xra. ¹¹ Kjánchó ch'ín Jesús ntáche ch'án tí ch'ín Pedro kíxin:

—Chr'axenhén tjoe chica espada méhé. Kjá ntáchrua kíxin tsjasótehyana, kjá ichrua. Kjánchó T'aná kjujon kjuachaxin kíxin nchónhya tsjasótena —ichro ch'án.

Ch'ín Jesús kjuák'e nkayakon tí ch'ín t'etueñhen tí sín nchát'á

(Mt. 26.57-58; Mr. 14.53-54; Lc. 22.54)

¹² A ntá tí sín soldado la ko tí ch'ín comandante t'etueñhen sín la ko tí sín policía judío kuénte njinko mé itsé sín tí ch'ín Jesús kjuíncuenteto sín ch'án. ¹³ A ntá sákjuíko sín ch'án ntoe ch'ín Anás ich'ee tí ch'ín Caifás mé tí nkexro tsík'ayéhe xra nchát'á t'etoan tí nánó a. ¹⁴ A ntá tí ch'ín Caifás, jehe ch'án na mé tí nkexro tsíntáche tí sín judío kíxin íchá jína kíxin jnkokoá chojni chrók'uenyákonhen kaín tí sín chjasén ch'án.†

Ch'ín Pedro kjuínchemá ch'án kíxin chóxin ch'án tí ch'ín Jesús

(Mt. 26.69-70; Mr. 14.66-68; Lc. 22.55-57)

¹⁵ Ch'ín Simón Pedro la ko í jinko ch'ín k'uék'ajiko ch'ín Jesús mé kuinkáchréhe sín ch'án. Tí ch'ín ijkno a mé chóxin ch'án tí nchát'á t'etoan. Ntá k'uíxenko ch'án tí ch'ín Jesús tí ntasin ntoe tí nchát'á t'etoan. ¹⁶ Kjánchó ch'ín Pedro kuítuhe ch'án ntója ntasin ó. Ntá tí ch'ín ijkno a chóxin tí nchát'á t'etoan mé k'uaxrje ch'án ntasin nixjehé ch'án tí tjan t'ayakonhen tí ntója ntasin chrónóehé ch'án tjan ntá xranjon kjuachaxin ntá k'uíxenhen ch'ín Pedro kjaxin. ¹⁷ Na ntá tí tjan t'ayakonhen tí ntója ntasin kjuanchankíhi tjan tí ch'ín Pedro kíxin:

—¿Á jahya kjaxin xríkua tí ch'ín a? —ichro tjan.

Ntá kjuátehe ch'ín Pedro kíxin:

* **18:9** Juan 17.12 † **18:14** Juan 11.49-50

—Náhí, janhya —ichro ch'án.

¹⁸ Ntá imá kin ntá tí sín ch'exón xra la ko tí sín policía kjuaka sín xrohi ntaha tjejóxin toté sín tjejóchjixrohe sín. La ko koí ch'ín Pedro tjechjixrohe ch'án ntiha.

Tí nchá^tá t'etoan mé kjuanchankíhi ch'án tí ch'ín Jesús

(Mt. 26.59-66; Mr. 14.55-64; Lc. 22.66-71)

¹⁹ Ntá tí nchá^tá t'etoan kjuankíxin kjuanchankíhi ch'án tí ch'ín Jesús kíxin nkexro tí sín k'uájiko ch'án la ko nkehe tí kjuá^kohé ch'án sín. ²⁰ Ntá kjuá^tehé ch'ín Jesús ntáchro ch'án kíxin:

—Noxín kjuak'é kjuàkua, la ntá kaín xín chojni kuínhin sín. Xráxín k'uékjákoxian kaín xín tí njinko ntsí la ko tí njinko jié tójkotséxin kaín xín sín judío. Ninkehó nkehe kjuákohya imó. ²¹ ¿Nkekuénté tjanchankína tí janhan xíkaha? Chrókjuanchankíhi tí sín kuínhin kíxin nkexrí kjuá^kohá sín. Jehe sín mé nohe sín nkehe kjuá^kohá sín —ichro ch'án.

²² Kjuixin ntáchro ch'ín Jesús tíhi ntá ijkno ch'ín policía kuènte njinko mé tjentaxín ch'án ntiha chjéhe ch'án nkayakon tí ch'ín Jesús ntáchro ch'án kíxin:

—¿Á xíkaha jiehe tsjá^tehé tí nchá^tá t'etoan ní? —ichro ch'án.

²³ Ntá kjuá^tehé ch'ín Jesús ntáchro ch'án kíxin:

—Tí ntoáhya tí nkehe xrjanca ntá chronka nkehe tí ntoáhya. A ntá tí ntoá tí nkehe xrjanca, ¿ntá nkekuénté kíxin tjiatena? —ichro ch'án.

²⁴ Ntá k'uetoan ch'ín Anás kíxin tjechróntetoxinhín ch'ín Jesús sátsji ch'án tí tjen ch'ín Caifás tí nchá^tá t'etoan.

Ch'ín Pedro xíkjinchemá ch'án ínaá kíxin chóxin ch'án tí ch'ín Jesús

(Mt. 26.71-75; Mr. 14.69-72; Lc. 22.58-62)

²⁵ Ntá ch'ín Simón Pedro mé naxqá tjemexín toté ch'án tjechjixrohe ch'án. Ntá kjuanchankíhi sín ch'án kíxin:

—¿Á kjaxinhya jaha xríkoá tí nkexro i ní? —ichro sín.

Ntá ch'ín Pedro kjuinchemá ch'án ínaá ntáchro ch'án kíxin:

—Náhí, janhya —ichro ch'án.

²⁶ A ntá ijkno ch'ín ch'ehe tí nchá^tá t'etoan xra, na mé tí ch'ín a mé naxqá kjéhya ch'án tí ch'ín tsíkochríñjin ch'ín Pedro ntatsjon, na mé kjuanchankí ch'án kíxin:

—¿Á jehya jaha tí k'uíkuān tjeckoá ch'án tí huerto ní? —ichro ch'án.

²⁷ Ntá ch'ín Pedro xíkjinchemá ch'án ínaá kíxin jehya ch'án, ichro ch'án. Ntá xrinahya tuénxín itsje ijkno kochíntqa.

Ch'ín Jesús kjuák'e nkayakon tí ch'ín Pilato

(Mt. 27.1-2, 11-14; Mr. 15.1-5; Lc. 23.1-5)

²⁸ Ntá k'uaxrjexín sín ntoe ch'ín Caifás, sákjuíko sín ch'ín Jesús tí palacio t'etoanxín tí ch'ín gobernador. Ntá ó kjuankíxin k'uínkaséyan kjuíji sín ntiha. A ntá tí sín judío la mé í k'uíxenhya sín tí palacio kíxin tí xíkaha chrók'uixenhen sín tí nchia a la chrókuamá sín tí jie siín ntiha la í xitjahya sine sín tí kia pascua, ichro sín. ²⁹ A ntá ch'ín Pilato k'uaxrjexín ch'án tí nchia t'etoanxín ch'án kjuanchankíhi ch'án sín kíxin:

—¿Nkehe tí jie chóntha tí nkexro i? —ichro ch'án.

³⁰ Ntá kjuá^tehé sín ntáchro sín kíxin:

—Tí chróchóntahya ch'án jie jié la chrókjui^koahyani ch'án —ichro sín.

³¹ Ntá k'uetoan ch'ín Pilato kíxin:

—Sátjíkoará ch'án nchekitqexínrá nkerí jie chóntha ch'án kíxin éxí ntáchro tí ley kuéntará —ichro ch'án.

Ntá kjuá^tehé tí sín judío ntáchro sín kíxin:

—Jeheni chojni judíoni la chóntahyani kjuachaxin ts'óyánni ninkexró —ichro sín.

³² Mé xíkaha tsoxiteyá tí nkehe tsíntachro ch'ín Jesús kíxin nkexrí ts'enxín ch'án. ³³ Ntá ch'ín Pilato xík'ixenhen ch'án tí nchia t'etoanxín ch'án ntá k'uýehe ch'án tí ch'ín Jesús kjuanchankíhi ch'án kíxin:

—¿Á jaha tí nkekro Rey t'etueñhen tí sín judío ní? —ichro ch'án.

³⁴ Ntá ntáchro ch'ín Jesús kjuanchankí ch'án kíxin:

—Tí nkehe tjanchankiná, ¿á jahyá kjuenkayáxian xíkaha, o á í jnko nkekro kjuanchia jie kíxin tí janhan? —ichro ch'án.

³⁵ Ntá kjuátehe ch'ín Pilato ntáchro ch'án kíxin:

—¿Á kjanhya janhan tí judío kíxin? Tí sín chjasán la ko tí sín nchat'á t'etoan mé kjuikaán sín tí jaha. ¿Xá nkehe kjuich'e kíxin? —ichro ch'án.

³⁶ Ntá kjuátehe ch'ín Jesús ntáchro ch'án kíxin:

—Tí kjuachaxin chonta janhan jehya kíxin chjasintajni chrókuétoan. Náhí. Tí chrókuétoan chjasintajni ntá tí sín xríkjan chrókjuanonko sín tí sín judío kíxin chrótséhyana sín la chrókjuikánhyana sín ntihi. Kjánchó tí kjuachaxin chonta janhan jehya kíxin chjasintajni chrókuétoan —ichro ch'án.

³⁷ Ntá ntáchro ch'ín Pilato kíxin:

—¿Á jaha chaxín ijnko rey? —ichro ch'án.

Ntá kjuátehe ch'ín Jesús ntáchro ch'án kíxin:

—Janhan tí rey exí ntáchrúa jaha. Tí xra ó kokjìna la ko tí xra ó k'uinka chjasintajni kíxin tsorxjanka nkehe tí chaxín ntoá. Kaín tí sín titekaon tí nkehe chaxín ntoá mé tjejótinhin sín tí nkehe tjàkua —ichro ch'án.

³⁸ Ntá ntáchro ch'ín Pilato kíxin:

—¿Xá nkehe tí nkehe chaxín ntoá, ichrúa? —ichro ch'án.

Ch'ín Pilato kjuanjon kjuachaxin kíxin its'en ch'ín Jesús

(Mt. 27.15-31; Mr. 15.6-20; Lc. 23.13-25)

Ntá kjuixin kjuanchankí ch'ín Pilato tíha ntá k'uaxrjexín ch'án ntiha ntá sákjuí ch'án tí tjejó tí sin judío nixjehé ch'án sín ntáchro ch'án kíxin:

—K'uítjáhya ninkehó jie chónta tí nkekro i. ³⁹ Kjánchó jahará la ó kuánhanrá kíxin tí kia pascua tsjánjuan kjuachaxin kíxin ts'atjánta ijnko nkekro tjechjina. ¿Á tjinkáonrá kíxin ts'atjánta tí ch'ín Rey t'etueñhen tí sín judío? —ichro ch'án.

⁴⁰ Ntá kaín sín k'óyako sín kjuanchia sín kíxin:

—Tí ch'ín a la náhí. T'atjánta tí ch'ín Barrabás —ichro sín.

Kjánchó tí ch'ín Barrabás mé ijnko chojni chee tíha.

19

¹ Ntá ch'ín Pilato mé k'uetóan ch'án kíxin tsjate sín tí ch'ín Jesús. ² Ntá tí sín soldado kjuich'éna sín ntach'iij nko corona ntá kjuak'enkaya sín ikja tí ch'ín Jesús. La ko kjuínchek'inkaya sín ch'án ijnko ka kjátse tié kíxin jehe sín tsjikosáyehe sín ch'án exí ijnko rey, kjánchó chaxínhyá tíha. ³ Ntá kóchjinehe sín tí tjen ch'án ntáchro sín kíxin:

—Isé tsjak'e tséetuénhén tí sín judío —ichro sín.

Kjánchó chaxínhyá tíha kjuanoá sín ch'án. La ntá tuénxín itja sín kjuatexín sín nkayakon ch'án.

⁴ Ntá ch'ín Pilato k'uaxrjexín ch'án tí nchia t'etoanxín ch'án ínaá nixjehé ch'án tí sín tsíkójnoksé ntáchro ch'án kíxin:

—Tsjehérá tsakítsjexián ch'án ntihi kíxin tsónohará kíxin k'uítjáhya janhan ninkehó jie chónta ch'án —ichro ch'ín Pilato.

⁵ Ntá k'uaxrjexín ch'ín Jesús ntiha tjenkáya kja ch'án tí corona tsík'óna ntach'iij la ko tjenkáya ch'án tí ka kjátse tié. Ntá ntáchro ch'ín Pilato kíxin:

—Tsjehérá, ntihi tjen ch'án —ichro ch'án.

⁶ A ntá tió k'uíkon tí sín nchāt'á t'etoan la ko tí sín policía kuènte ninko ntá kjuankíxin sín t'óyako sín ntáchro sín kíxin:

—¡Tjakénkanirá ch'án ntacruz! ¡Tjakénkanirá ch'an ntacruz! —ichro sín.

Ntá ntáchro ch'ín Pilato kíxin:

—Jahará tjíkoará ch'án tjaké nkānirá ch'án ntacruz kíxin janhan k'uítjáhya ninkehó jié chóntha tí jehe ch'án —ichro ch'án.

⁷ Ntá kjuátēhe tí sín judío kíxin:

—Jeheni chojni judío mé chóntani ijkno ley t'etoan kíxin chrók'uen ch'án kíxin ncheyóhe ch'án asén ch'án kíxin Xjeen Dios tí jehe ch'án —ichro sín.

⁸ Ntá tió kuínhin ch'ín Pilato tíha ntá antsí chrakon ch'án⁹ ntá xík'ixenhen ch'án tí nchia t'etoanxín ch'án ínaá kjuanchankíhi ch'án tí ch'ín Jesú s kíxin:

—¿Nketí k'uinkaxian jaha? —ichro ch'án.

Ntá ch'ín Jesú s ninkehó kjuátēehya ch'án.

¹⁰ Ntá ntáchro ch'ín Pilato kíxin:

—¿Jaha nkekuénté tjátēehya nkehe tjánchánkíha? ¿Á noahya jaha kíxin chonta janhan kjuachaxin tsétoan tsjak'enkania ntacruz la ko kjaxin chonta janhan kjuachaxin tsontáxrjan kíxin sátsjia kohya nkehe tsonhan? —ichro ch'án.

¹¹ Ntá kjuátēhe ch'ín Jesú s ntáchro ch'án kíxin:

—Ninkehó kjuachaxin chróchontahya jaha chrókuétōan chrók'uén o sáchrókjuia tí Dios chrótjáhya tí kjuachaxin. A ntá tí chojni kjuikaána tí tjen jaha la antsí jié chóntha sín, a ntá jaha la kánhyó —ichro ch'án.

¹² Ntá kuínhin ch'ín Pilato tíhi ntá kjuankíxin ch'án kjueyá ch'án nkexrí chrók'uētoan ch'án kíxin sáchrókjuí ch'ín Jesú s kohya nkehe chrókónhen ch'án. Kjánchó tí sín judío k'óyako sín ntáchro sín kíxin:

—Kja tí tsitohé sátsji ch'án kohya nkehe tsonhen ch'án ntá jaha jnkokoáhya tjenkayáxinkoa tí ch'ín t'etueñhen tí nación kuénténi. Tí nkexro ch'éna asén ch'án éxi ijkno rey mé nínkakonhen ch'án tí ch'ín t'etueñhenni —ichro sín.

¹³ Ntá kuínhin ch'ín Pilato tíhi ntá k'uētoan ch'án kíxin tsakitsje sín tí ch'ín Jesú s ntója ntá ch'ín Pilato kjuák'etjaxin ch'án tí silla nchekitoexín ch'án jié, mé nkiva hebreo mé it'in Gabata, mé t'axrjexín kíxin tja't'o noi jehó xro tsík'óna. ¹⁴ Na mé ó chjina chonkíxin ntá tí tsonjín la mé ó tsjasin sín tí kia pascua. Ntá ch'ín Pilato ntáche ch'án tí sín judío kíxin:

—Ntihi itjen tí ch'ín rey kuéntará —ichro ch'án.

¹⁵ Kjánchó jehe sín k'óyako sín ntáchro sín kíxin:

—¡Its'en ch'án! ¡Its'en ch'án! ¡Tsjak'enkaní ch'án ntacruz! —ichro sín.

Ntá ntáchro ch'ín Pilato kíxin:

—¿Á tjinkáonrá kíxin janhan chrókjuakénkānia ijkno ntacruz tí ch'ín rey kuéntará ní? —ichro ch'án.

Kjánchó tí sín nchāt'á t'etoan mé kjuátēhe sín kíxin:

—Náhí. Chóntahyani í jnko rey, jehó tí ch'ín César —ichro sín.

¹⁶ Ntá ch'ín Pilato kjuanjón ch'án kjuachaxin sátsjiko sín tí ch'ín Jesú s tsjak'enkaní sín ch'án ntacruz. Ntá sákuíko sín ch'án.

Kjuák'enkaní ch'ín Jesú s ntacruz

(Mt. 27.32-44; Mr. 15.21-32; Lc. 23.26-43)

¹⁷ Ntá sákuíko sín tí ch'ín Jesú s kuámá ch'án tí ntacruz tsjak'enkaní ch'án. Ntá kjuíjiko sín ch'án ijkno tjo tijkítexín sín Hueso Kja Chojni. A ntá nkiva hebreo mé tijkítexín sín Gólgota. ¹⁸ Ntaha mé kjuák'enkaní sín ch'án tí ntacruz. Ntá kjaxin yaá sín nánánko k'uéjó jnkojnkó sín ntá jnkosiné kjuák'e ch'ín Jesú s. ¹⁹ Ntá k'uētoan ch'ín Pilato kíxin tsokjin sín ijkno ntachiso tsjak'enkaní sín ikja tí ntacruz ntáchro kíxin: “Ch'ín Jesú s kjuixín ch'án chjasin Nazaret, mé tí ch'ín Rey kuénte tí sín judío”, tsixro. ²⁰ A ntá itsjé tí sín judío mé kjuínchekuáxin sín tí letra tsík'óna kíxin chjino tí chjasin Jerusalén tsíkjak'enkaní sín ch'ín

Jesús ntacruz la ko iní nkìva tsíkjìn sín, na mé ijkìva la hebreo, la ijkìva la griego, la ijkìva la latín. ²¹ Ntá tí sín nchàt'á t'etoan kuènte tí sín judío mé ntáche sín tí ch'ín Pilato kíxin:

—Chrókjinhya jaha xikaha kíxin jehe ch'án mé tí “Ch'ín Rey kuènte tí sín judío.” Náhí. Íchá jína chrókjian jaha kíxin “Jehe ch'án ntáchro ch'án kíxin jehe ch'án mé tí ch'ín Rey kuènte tí sín judío” —ichro sín.

²² Kjánchó kjuátuhe ch'ín Pilato kíxin:

—Tí letra kuétoan k'óna la ó k'óna, kjónté xikahó tsitohe —ichro ch'án.

²³ Ntá tí sín soldado tió tsíkjixin tsíkjak'enkáni sín tí ch'ín Jesús tí ntacruz ntá kuákja sín tí ké ch'án la k'óxikayéhe sín jnkojnko ka kuákja sín kanoé sín. La ko kjaxin kuákja sín tí ka kjínjin k'uék'inkaya ch'án. Tí ka mé tsíxronhya ka la me jnkokoá ka tíha. ²⁴ Ntá tí sín soldado kjo sín kíchó sín ntáchro sín kíxin:

—Tsótséchjehani tí ké ch'án. Íchá jína sich'exínni suerte ntá tsotsjeheni siná nkexro ts'ayéhe tí ka.

Mé xikaha xiteyá éxí ntáchro xroon itén Dios tsíkjìn sín ósé ntáchro kíxin: “Kjuich'exín sín suerte ntá k'óxikayéhe sín kaná.”* Mé xikaha kjuich'e tí sín soldado.

²⁵ A ntá chjino tí ntacruz kjuák'enkáni ch'ín Jesús mé kjuák'e tí iné ch'án la ko tí tjan kíchó tjan mé tjan María ichjién ch'ín Cleofas, la ko tí tjan María Magdalena. ²⁶ A ntá tió k'uíkon ch'ín Jesús kíxin itjen tí iné ch'án la ko chjino tjen tí ch'ín antsí tjuéhé ch'án k'uék'ajiko ch'án, ntá nixjehé ch'án tí iné ch'án, ntáchro ch'án kíxin:

—Naná, tsjehé kíxin ntaha tjen xjajan —ichro ch'án.

²⁷ Ntá nixjehé ch'ín Jesús tí ch'ín a ntáchro ch'án kíxin:

—Tsjehé kíxin ntaha itjen iná —ichro ch'án.

A ntá tí ch'ín a mé k'uáyéhe ch'án tí tjan a sákjuíko ch'án tjan ntøe ch'án k'óna éxí iné ch'án xikaha.

Ik'uén ch'ín Jesús

(Mt. 27.45-56; Mr. 15.33-41; Lc. 23.44-49)

²⁸ Ntá ó nohe ch'ín Jesús kíxin kaín xrà ó kjuixin xiteyá ntá tjinkaon ch'án kíxin tsoxiteyá kaín nkehe ntáchro tí xroon tsíkjìn sín ósé ntá xikaha ntáchro ch'án kíxin:

—Ik'uén ntä.

²⁹ Ntá ntiha tjen ijkìva nchésen tsíkaón xranvino sán ntá kjuínchekjataxín sín ijkìva ka tí xranvino, a ntá tí ka a kjuák'ekjen sín ijkìva nta kjínjin, ntá kjuínchecrìin sín tí tjen ir'va ch'án. ³⁰ Ntá ik'uí ch'ín Jesús tí xranvino sán ntá ntáchro ch'án kíxin:

—Ó kjuixin xiteyá kaín xín nkehe —ichro ch'án.

Ntá k'uísén kja ch'án ntá ó kjuixin k'uén ch'án.

Ijkìva soldado chr'áte ch'án chica yo tí chjia ch'ín Jesús

³¹ A ntá xikaha yaon ntóye mé tí yaon kia pascua ntá tí sín judío tjinkakonhya sín kíxin tí cuerpo kuènte tí sín tsík'en naxa ts'ejoyáni tí ntacruz tí yaon t'ok'ehé sín kíxin tí yaon pascua mé ijkìva yaon imá jié, ichro sín. Mé xikaha kjuanchehe sín tí ch'ín Pilato kíxin ts'etoan ch'án kíxin tsochjenjin toté tí sín tjejoyáni tí ntacruz la ko ts'inkajin tí cuerpo kuènte tí sín tsík'en. ³² Ntá tí sín soldado sákjuí sín k'óchjenjin sín tí toté tí ch'ín saoxín tjen la ko k'óchjenjin sín tí toté tí ch'ín tjen nánko a tjejoyáni sín tí ntacruz tí tjen ch'ín Jesús. ³³ Ntá kjuíji sín tí tjen ch'ín Jesús ntá k'uíkon sín kíxin ó tsíkjixin tsík'en ch'án, ntá í k'óchjenjinhyá sín toté ch'án.

³⁴ A ntá ijkìva ch'ín soldado mé chr'áte ch'án chica yo tí chjia tí ch'ín Jesús ntá tuénxín k'uaxrje jni la ko intä. ³⁵ A ntá janhan mé tjékjian tí xroon i mé kjuak'ë ntiha k'uíkuän kíxin xikaha kónhen ntá ntoá tjejrjanca kíxin jahará kjaxinrá chrókuítækáonrá. ³⁶ Mé xikaha kónhen tíha kíxin tsoxiteyá tí nkehe ntáchro xroon itén Dios tsíkjìn sín ntáchro kíxin:

* **19:24** Salmo 22.18

“K'óchjenjinha sín ninkehó huésoe ch'án.”[†] ³⁷ Kjaxin itjen í jnko nketí nixja tí xroon itén Dios tsíkjín sín ósé ntáchro kíxin: “Tsokomá sín tí nkexro tsíchr'áte sín chica.”[‡]

Xravá ch'ín Jesús

(Mt. 27.57-61; Mr. 15.42-47; Lc. 23.50-56)

³⁸ Ntá ó kjuixin kónhen kaín tíha ntá ch'ín José, mé ijnko ch'ín kjuixin chjasin Arimatea, mé kjuanchehe ch'án tí ch'ín Pilato kjuachaxin kíxin tsjinkajinxín ch'án tí ntacruz tí cuerpo kuénte ch'ín Jesús sátsjiko ch'án tsjavá ch'án. Jehe ch'án imó kuinkáchónki ch'án tí ch'ín Jesús kíxin chrakonhén ch'án tí sín judío. Ntá ch'ín Pilato mé kjuanjon ch'án kjuachaxin ntá sákjuíko ch'ín José tí cuerpo kuénte ch'ín Jesús. ³⁹ Kjaxin ch'ín Nicodemo, tí ch'ín kjuínixjehé tí ch'ín Jesús ijnko tie a mé kjui ch'án kjuikao ch'án treinta kilo xroan xraxé tjiko xroan mirra la ko xroan áloes. ⁴⁰ Mé xíkaha ch'ín José la ko ch'ín Nicodemo k'uáyéhé sín tí cuerpo kuénte ch'ín Jesús kjuínchek'ísímá sín ijnko ka kjínjin tsíka tí xroan xraxé a kíxin xíkaha k'uékinkáchónki tí sín judío k'uékjavá sín chojni tsík'en. ⁴¹ Tí kjuák'enkáni ch'ín Jesús ntacruz ntá chjinaxón ntiha tjen ijnko huerto itjen ijnko tòye nixin naxa ninkexró tsíxraváhya ntiha. ⁴² Ntaha kjuavá sín tí ch'ín Jesús kíxin chjinaxón tjen tí tòye a la ko í séhya tsoxrankíxin tí yaon t'ok'éhe tí sín judío.

20

La ntá ó tsíxechón ch'ín Jesús

(Mt. 28.1-10; Mr. 16.1-8; Lc. 24.1-12)

¹ A ntá tí yaon xrankíxixín semana ntá tí tjan María Magdalena naxa sítié sákjuí tjan tí tjen tí tòye, ntá k'uíkon tjan kíxin ó tsíkjìn tí xro tsík'ikjèxin tí tòye a. ² Ntá kuinká tjan sákjuí tjan tí tjen tí ch'ín Simón Pedro la ko tí ch'ín i jnko, mé tí nkexro imá k'uétjuéhe ch'ín Jesús, ntá ntáchro tjan kíxin:

—Ó tsíkakitsjexín sín tòye tí cuerpo kuénte Inchéni ntá noehyani nketí tsíkjak'e sín —ichro tjan.

³ Ntá ch'ín Pedro la ko tí ch'ín i jnko mé kuínhin sín xíkaha ntá sákjuí sín tí tjen tí tòye a.

⁴ Ntá yói sín kuinká sín sákjuíko kíchó sín. Kjánchó tí ch'ín i jnko antsí tjan kuinká ch'án ntá kánhyó tjan kuinká ch'ín Pedro, ntá tí ch'ín i jnko senó ch'án kjuíji ch'án tí tjen tí tòye a. ⁵ K'uísén ch'án tsjehe ch'án nkaxenhen tí tòye a. A tí ka tsík'ísímá ch'ín Jesús mé naxa tjejó k'uíkon ch'án, kjánchó jehe ch'án k'uíxenhya ch'án tí tòye a. ⁶ Ntá kjónté chr'éxín kjuíji ch'ín Simón Pedro ntá k'uíxenhen ch'án tí tòye a. Ntá kjaxin k'uíkon ch'án kíxin tjejó tí ka tsík'ísímá ch'ín Jesús ⁷ la ko k'uíkon ch'án tí ka tsík'ísímá ikja ch'án na mé tí ka tsíxrèya ka la ókjé tjen ka, a ntá tí i so ka na mé ókjé tjejó ka kjaxin. ⁸ Na ntá tí ch'ín i jnko k'uék'ajiko ch'ín Jesús, mé tí ch'ín tsíkjiji senó na kjaxin k'uíxenhen ch'án tí tòye ntá k'uíkon ch'án tí nkehe tsíkónhen ntá kuítekaon ch'án. ⁹ Kíxin naxa k'uékienxínya sín tí nkehe k'uéchrónka xroon itén Dios kíxin t'ichjánxín tsoxechón tí ch'ín Jesús. ¹⁰ A ntá tí sín sátsíkjitsjehé tòye la xíkjan sín ntøe sín.

Titaya k'uíkuèn tjan María Magdalena tí ch'ín Jesús

(Mr. 16.9-11)

¹¹ Ntá tjan María mé ntahó kuítuhe tjan ntója tí tòye tsjánka tjan. Naxa tsjánka tjan k'uísén tjan tsjehe tjan nkaxenhen tí tòye ¹² ntá xrínahya k'uíkon tjan yaá sín ángel tjejóyá sín ka tjoá tjejótjaxín sín tí tsíkjak'e tí cuerpo kuénte ch'ín Jesús na mé ijnko ch'ín ángel na mé tjen ch'án tí tsíkjak'e ikja ch'ín Jesús la ko tí i jnko a itjen ch'án tí tsík'ejó toté ch'án. ¹³ A ntá tí sín ángel mé kjuanchankí sín kíxin:

—Naná, ¿kuénte tsjánka? —ichro sín.

Ntá kjuátuhe tjan ntáchro tjan kíxin:

—Sátsíkjiko sín Inchéni, ntá nonahya nketí tsíkjak'e sín ch'án —ichro tjan.

¹⁴ Kjuixin ntáchro tjan tíha ntá kuinkátjíá tjan ntá k'uíkon tjan kíxin itjen ch'ín Jesús, kjánchó kjuátsoanhya tjan kíxin jehe ch'án. ¹⁵ Ntá ch'ín Jesús kjuanchankíhi ch'án tjan ntáchro ch'án kíxin:

—Naná, ¿nkekuénté tsjanka? ¿Nkexro tjéyá? —ichro ch'án.

À ntá jehe tjan kjuenkayáxin tjan kíxin jehe ch'án mé t'ayakonhen ch'án tí huerto, à ntá ntáchro tjan kíxin:

—Kja tí jaha sákjuíko ch'án ntá jie chrónka nketí sákjuíko ch'án kíxin janhan sátsjikian ch'án jie —ichro tjan.

¹⁶ Ntá ch'ín Jesús mé nixjehé ch'án tjan ntáchro ch'án kíxin:

—¡María! —ichro ch'án.

Ntá kuinkátjíá tjan ntá nixjaxin tjan nkiva hebreo ntáchro tjan kíxin:

—¡Raboni! —ichro tjan. Tíha mé t'axrjexín kíxin Maestro.

¹⁷ Ntá ntáchro ch'ín Jesús kíxin:

—Tatiántana kíxin naxa sájtíhya janhan tí tjen T'aná. Sátjia tjítsjehé tí sín kíchiná chénka sín kíxin sátsjiyá tí tjen T'aná na mé kjaxin It'ará tí jahará na mé Dios kuéntana la ko kjaxin Dios kuéntará —ichro ch'án.

¹⁸ Ntá tí tjan María Magdalena sákjuichénka tjan tí sín k'uék'ajiko ch'ín Jesús chrónka tjan kíxin xíkaha tsík'ikon tjan Ìnchéni. La ko kjaxin chrónka tjan kíxin xíkaha tsíntáchro ch'án.

Tí sín k'uék'ajiko ch'ín Jesús titaya k'uíkuén sín ch'án

(Mt. 28.16-20; Mr. 16.14-18; Lc. 24.36-49)

¹⁹ À ntá ó kónjín tí yaon a mé tí yaon xrankíxíñí semana, à ntá tí sín k'uék'ajiko ch'ín Jesús jnkokoá kójnkotsé sín nkaxenhen nchia tsík'ikjehe sín ntója nchia jína kíxin chrakonhen sín tí sín judío. Ntá xrínahya titaya kónohe sín k'uíkon sín kíxin jnkosiné tí tjejó sín itjen ch'ín Jesús, ntá nixjehé ch'án kjuajna tí sín k'uék'ajiko ch'án ntáchro ch'án kíxin:

—Jína tjejorá —ichro ch'án.

²⁰ Ntá kjuixin ntáchro ch'án tíhi ntá kjuako ch'án itja ch'án la ko chjia ch'án. Ntá kóchéhe tí sín k'uék'ajiko ch'án kíxin k'uíkon sín Ìnchéni. ²¹ Ntá ntáchro ch'ín Jesús ínaá kíxin:

—Kjuaxróxin ts'ejorá. Yóhé T'aná k'uetuanna k'uinka, à ntá jie la janhan tétuanhán tí jahará —ichro ch'án.

²² Ntá k'uánote ch'án tí jehe sín ntáchro ch'án kíxin:

—T'ayéhérá Nchäkuén Dios. ²³ Tí ts'itjáyanhanrá tí jie kjuasin jnkoyín chojni ntá xíkaha tsjìlin tí ijié sín. Ntá tí ts'itjáyanhyará tí jie kjuasin jnkoyín chojni ntá naxa kjuinhya tí ijié sín —ichro ch'án.

Ch'ín Tomás k'uíkon ch'án kíxin tsítechón Ìnchéni

²⁴ À ntá tí ch'ín Tomás, ijnko tí teyóxin sín k'uék'ajiko ch'ín Jesús mé kjaxin tikitexín sín ch'ín Nohé mé kohya ch'án tí kui ch'ín Jesús. ²⁵ Ntá chr'éxín tí í so sín k'uék'ajiko ch'ín Jesús ntáche sín ch'án kíxin:

—Ó k'uíkonni Ìnchéni —ichro sín.

Kjánchó ntáchro ch'ín Tomás kíxin:

—Tí ts'íkonhya janhan tí tsíkjatexín chica clavo itja ch'án la ko tsochr'ánxianhya dedo tjaná ntiha la ko tí tsochr'ánxianhya tjaná tí chjia ch'án, ¿na mé nkexrí chrókuítékavan? —ichro ch'án.

²⁶ À ntá tí k'uátsínska ijnko semana ntá jnkokoá kójnkotsé sín nkaxenhen nchia la ko kjaxin kjuák'eko sín ch'ín Tomás. Tsík'ikjehe sín ntója nchia jína ntá xrínahya titaya kónohe sín k'uíkon sín kíxin jnkosiné tí tjejó sín itjen ch'ín Jesús, ntá nixjehé ch'án tí jehe sín k'uék'ajiko ch'án ntáchro ch'án kíxin:

—Kjuaxróxin ts'ejorá —ichro ch'án.

²⁷ Ntá ntáche ch'án tí ch'ín Tomás kíxin:

—Chr'axéhén dedo tjá tí tsíkjatexín chica clavo tjaná la ko xráko a tjá chr'axéhén chjíana. Chróntáchrohya kíxin chaxínhya. Tsítekávan kíxin chaxín —ichro ch'án.

²⁸ Ntá kjuát̄ehe ch'ín Tomás ntáchro ch'án kíxin:

—¡Inchéni jaha la ko Dios kuént̄ana! —ichro ch'án.

²⁹ Ntá ntáche ch'ín Jesúz tí ch'ín Tomás kíxin:

—Jaha Tomás k'uíkonjian ntá kuítekávan. Ntá qantsí náxrjón tjejó tí sín kjónté k'uíkonhya la titekaon sín —ichro ch'án.

Tíhi mé chrónka nkekuénte tsíkjín ch'ín Juan tí xroon i

³⁰ Ch'ín Jesúz kjuasin ch'án itsjé í so kjuaxroan náxrjón k'uíkon tí sín k'uájiko ch'án kjónté chrónkahya tí xroon i kíxin xikaha kónhen. ³¹ Tí nkehe chrónka tí xroon i ikjian janhan kíxin chrókuítekáonrá jahará kíxin Jesúz mé tí Cristo, mé tí Xjeen Dios kíxin ntá kaín ni chróchóntani kjuachón jnkochríxín kíxin chrókuitekaonni ch'án.

21

Yato tí sín k'uék'ajiko ch'ín Jesúz xríñahya titàya k'uíkon sín ch'án

¹ A ntá chr'éxín tí sín k'uék'ajiko ch'ín Jesúz titàya xík'ikon sín tí jehe ch'án ínaá chrínta ntayaon Tiberias. Mé xikaha kónhen ² kíxin jnkokoá k'uéjó sín ch'ín Simón Pedro la ko ch'ín Tomás, me tí ch'ín tijkátexín sín ch'ín Nohé, la ko ch'ín Natanael kuijin ch'án chjasin Caná estado Galilea, la ko tí yaá xjeen ch'ín Zebedeo la ko tí yaá sín ínaá k'uék'ajiko ch'ín Jesúz. ³ Ntá ntáchro ch'ín Simón Pedro kíxin:

—Sátsjítse koche —ichro ch'án.

Ntá kjuát̄ehe sín kíxin:

—Koíni sátsjikoani —ichro sín.

Ntá sákjuí sín k'uít'ótjen sín ijnko ntabárco. Kjánchó ninkehó koche tséhya sín kuenté tie. ⁴ A ntá ó chjina ts'inkaséyan ntá xríñahya titàya k'uíkon sín itjen ch'ín Jesúz chrínta ntayaon, kjánchó kjuátsqanhyá tí sín k'uék'ajiko ch'án kíxin jehe ch'án. ⁵ Ntá kjuanchankíhi ch'án sín kíxin:

—Jahará ntasoá, ¿á naxá ninkehó koche tsehyará? —ichro ch'án.

Ntá kjuát̄ehe sín ntáchro sín kíxin:

—Naxá ninkehó ko tséhyani —ichro sín.

⁶ Ntá ch'ín Jesúz ntáche ch'án sín kíxin:

—Itérá tí nchísén tí nánko chjia chjina tí ntabárco la tsotserá va —ichro ch'án.

Ntá xikaha kjuich'e sín k'ue sín nchísén ntá í tjachahya sín tsakitsjenkíxín sín ntá tí nchísén kíxin nchónhya koche tjinká. ⁷ A ntá tí ch'ín qantsí tjuéhe ch'ín Jesúz mé ntáche ch'án tí ch'ín Pedro kíxin:

—¡Inchéni tí méhe! —ichro ch'án.

Ntá kuínhin ch'ín Simón Pedro kíxin Inchéni tíha ntá k'uinkáya ch'án iké ch'án ínaá (kíxin tsíkakitsje ch'án iké ch'án) ntá kjuiánkí ch'án ntá. ⁸ Tí í so sín k'uék'ajiko ch'ín Jesúz mé kjuiji sín tí chrínta ntayaon kjuíkao sín tí ntabárco tinkánkákjentóxín tí nchísén tjinká koche chrítaón ntá kíxin ijnko ciento metro kjínxin tí chrínta ntá k'uéjó sín. ⁹ Ntá kjuiji sín chrínta ntá ntá k'uínkajinxin sín tí ntabárco ntá k'uíkon sín tjeche xrohi sítènki xrinta ntá chrítaón tí xrinta tjekjen ijnko koche la ko nánko siín niqtja. ¹⁰ Ntá kjuanchia ch'ín Jesúz ntáchro ch'an kíxin:

—Xrákoará iso koche tsítserá nantá —ichro ch'án.

¹¹ Ntá ch'ín Simón Pedro k'uít'ótjen ch'án tí ntabárco kuákja ch'án tí nchísén kuinkánkákjen ch'án xrákao ch'án tí nchísén tjinká koche iye na mé ijnko ciento cincuenta y tres va. Ntá kjónté nchónhya va la k'uichjehya tí nchísén a. ¹² Ntá ntáchro ch'ín Jesúz kíxin:

—Xrákirá, interá —ichro ch'án.

A ntá nijnko tí sín k'uék'ajiko ch'án chrókjuanchankíhi sín ch'án kíxin nkexro tí jehe ch'án kíxin ó kjuátsoan sín kíxin Inchéni tíha. ¹³ Ntá kóchjina ch'ín Jesús kuákja ch'án tí niotja chjéhe ch'án tí jehe sín la ko xíkaha xíkjanjon ch'án tí koche.

¹⁴ Tíhi mé níxin k'uíkon tí sín k'uék'ajiko ch'ín Jesús kíxin tsíxechón ch'án.*

Ch'ín Jesús itjo ch'án tí ch'ín Simón Pedro

¹⁵ Kjuixin kjóne sín ntá kjuanchankíhi ch'ín Jesús tí ch'ín Simón Pedro kíxin:

—Jaha Simón, xjeen Jonás, ¿á antsí tjuana jaha, a ntá tí so la kánhyó? —ichro ch'án.
Ntá kjuátehe ch'ín Pedro ntáchro ch'án kíxin:

—Jeén, Inchéni, ó noha kíxin tjínkávan tí jaha —ichro ch'án.

Ntá ntáchro ch'ín Jesús kíxin:

—Ntá xíkaha la t'ayakonhén tí kolélo kuéntana —ichro ch'án.

¹⁶ Ntá yóxin kjuanchankí ch'ín Jesús ínaá kixin:

—Jaha Simón, xjeen Jonás, ¿á tjuana jaha? —ichro ch'án.

Ntá kjuátehe ch'ín Pedro ntáchro ch'án kíxin:

—Jeén, Inchéni, ó noha kíxin tjínkávan tí jaha —ichro ch'án.

Ntá ntáchro ch'ín Jesús kíxin:

—Ntá xíkaha la t'ayakonhén tí kolélo kuéntana —ichro ch'án.

¹⁷ Ntá níxin kjuanchankí ch'ín Jesús kíxin:

—Jaha Simón, xjeen Jonás, ¿á tjinkávan tí janhan? —ichro ch'án.

A ntá k'uává ch'ín Pedro kíxin níxin kjuanchankí ch'ín Jesús kíxin á tjinkaon ch'án tí jehe ch'án ntá ntáchro ch'án kíxin:

—Jaha Inchéni, ó noha kaín xín nkehe. Ó noha kíxin tjínkávan tí jaha —ichro ch'án.

Ntá ntáchro ch'ín Jesús kíxin:

—Ntá xíkaha t'ayakonhén tí kolélo kuéntana. ¹⁸ Ntá ijnko nkehe chaxín tjétjonka kíxin tí naxa k'uéntasoyá jaha k'uék'inkaya ká jahvá la ko k'uékjia tí k'uékóxrjíhan jaha. A ntá tió tsotáda jaha ntá tsjéntoá tjá ntá í jnko nkexro sintak'inkaya ka la ko sátsjikoa sín tí tóxrjíanhya sáchrókjuia —ichro ch'án.

¹⁹ A ntá tíhi mé chrónkaxín ch'ín Jesús kíxin nkexrí ts'enxín ch'ín Pedro na mé t'axrjexín nkexrí tsochjéhe ch'án Dios kjuasáya. Ntá kjuixin ntáchro ch'ín Jesús kíxin:

—Chröhé tí janhan —ichro ch'án.

Nkehe tsónhen tí ch'ín antsí tjuèhe ch'ín Jesús

²⁰ Ntá kuinkátjíá ch'ín Pedro ntá k'uíkon ch'án kíxin tinkáchréhe tí ch'ín antsí tjuèhe ch'ín Jesús, na mé tí nkexro kjuák'e chjinaxón tí kjuák'e ch'ín Jesús tí kjóne sín tsíkjanckankíhi ch'án tí ch'ín Jesús kíxin nkexro sinchekji ch'án. ^{† 21} Ntá ch'ín Pedro k'uíkon ch'án kíxin tinkáchréhe tí ch'ín a ntá kjuanchankíhi ch'án tí ch'ín Jesús kíxin:

—Inchéni, ¿a ntá tí ch'ín i la nkehe tsónhen ch'án a? —ichro ch'án.

²² Ntá kjuátehe ch'ín Jesús kíxin:

—Tí tjínkávan naxa chrókjuak'echón ch'án tí chrókjan la jaha la chrókjuiatéhya tíha. Ntá jaha la chröhé tí janhan —ichro ch'án.

²³ Ntá kjuankíxi kjo tí sín k'uék'ajiko ch'ín Jesús kíxin ts'enhya tí ch'ín a. Ntá jehya kíxin ntáchro ch'ín Jesús kíxin chrók'uenhya tí ch'ín a. Náhí. Ó jehí ntáchro ch'án kíxin tí tjinkaon ch'án naxa chrókjuak'echón tí ch'ín a tí chrókjan ch'án chrókui ch'án chrókjuiatéhya tí ch'ín Pedro chrókjuanchankí ch'án nkehe tsónhen í jnko chojni.

²⁴ A ntá tí nkexro a mé tí nkexro chrónka kíxin chaxín kónhen kaín tíha la ko ikjin ch'án tí xroon i. Ntá ó noheni kíxin tí nkehe tsíkjin ch'án la chaxín ntoá tíha.

* ^{21:14} Juan 20.19,26 † ^{21:20} Juan 13.25

25 Naxaq siín nchónhya nkehe kjuakoxin ch'ín Jesús kjinhya janhan. Tí chrók'óna jnkojnko jnkojnko tíha ntáxrjan kíxin kjá chrókjuachahya tí chjasintajni chrók'uinka kaín tí xroon chrók'óna xíkaha. Amén. Ó tjen.

Tí xra kjuich'e tí sín kjueyá ch'ín Jesús

Itsi Nchakuen Dios

¹ Tjuáha jaha Teófilo na tí libro sáoxín mé kjiān kaín nkehe kjuako ch'ín Jesús la ko tí xra kjuich'e ch'án tí xrankíxixín ² hasta tí yaon sákjuí ch'án nkaya nkajní. A ntá ti naxa sákjuíhya ch'án nkajní la kjueyá ch'an tí sín sich'ehe ch'án xra la ntá tí Nchakuen Dios mé kjuík'itsa ch'án ntá nixjehe ch'án sín la k'uētuēnhen ch'án sín kixin tsonohe sín nkehe tí xra chrók'juich'e sín. ³ Tió kjuixin k'uén ch'án ntá kónoxín kixin tjechón ch'án, k'uíkon tí jehe sín la ko cuarenta yaon mé k'uíkon sín ch'án jnkoyaxón. Itsjé nkehe kjuakoxín ch'án kixin tsonoexín sín kixin chaxín tjechón ch'án la ko kjuako ch'án nkexrí tí kjuachaxin kuénte Dios.

⁴ Ti naxa kójnkotséko ch'án tí sín k'uájiko ch'án la jehe ch'án mé k'uētuēnhen ch'án sín kixin naxa sátsjixinhya sín tí chjasin Jerusalén. Chrónka ch'án kixin:

—Chróchonhérá ntihó chrók'uayéhérá tí nkehe tsjanjon T'aná, me tí nkehe kuinhínrá xrijanca janhan. ⁵ A ntá chaxín ch'ín Juan inta ó kuikitexín ch'án chojni. A ntá ijie kánhyó itsjé yaon ntá jahará la Nchakuen Dios la tsiktitaxínrá.

Sákjuí ch'ín Jesús nkaya nkajní

⁶ Ntá ti naxa kójnkotséko sín ch'ín Jesús, kjuanchankíhi sín ch'án kixin:

—Jaha Inchéni, ¿á tsjánjonhya kjuachaxin jaí ts'etqoanni chjasénni Israel ínaá? —ichro sín.

⁷ Ntá kjuátehe ch'ín Jesús kixin:

—Náhí. Chontahyará kjuachaxin tsonohará nkesá tsonhen tíha. Jehó T'aná chóntha kjuachaxin ts'etqoan tíha. ⁸ Ntá itsi tí Nchakuen Dios ntá ts'ayéhérá kjuachaxin sátsjichronkará nkehe tí xra kjuít'a, mé sátsjirá tsjákokhérrá kaín sín chjasin Jerusalén, la ko estado Judea, la ko estado Samaria, la ko kuenté chjasintajni.

⁹ Ntá kjuixin nixja ch'ín Jesús ntá xrínahya tinkák'it'ótjen ch'án sákjuí ch'án la tjejótsjehe sín. Sákjuí ch'án hasta kjuák'enkákjan ch'án ijkno tjuí. Ntá í t'ikonhya sín nkerí kjuíji ch'án. ¹⁰ Ntá naxa tjejókonta sín tí sákjuí ch'ín Jesús nkajní, a ntá xrínahya titaya k'uíkuén sín yaá chojni ntoa tjejóyá sín ka tjóá tjejó sín chjinaxón tí tjejó tí jehe sín. ¹¹ Ntá tí sín a mé ntáchro sín kixin:

—Jahará chojni kjuíxirá estado Galilea, ¿nkehe tsonhen naxa kontará nkajní? Xíkaha tjejokontará sákjuí Jesús la ko mé xíkaha xiki ch'án ínaá —ichro sín.

Xreyá ch'ín Matías tsjiatéhe lüké ch'ín Judas

¹² Na ntá kjanxín sín tí jná it'in Olivo na ikjan sín chjasin Jerusalén. Tíha a mé kjínyo tjen kixin ó xíkahó k'uetoan tí ley sátsji sín tí yaon t'ok'éhe sín. ¹³ Na ntá kjuíji sín tí chjasin ntihá ntá k'uít'ótjen sín tí yóxin piso tí nchia tsíkjen sín k'uék'ejó sín. Mé ntihá tjen ch'ín Pedro, la ko ch'ín Jacobo, la ko ch'ín Juan, la ko ch'ín Andrés, la ko ch'ín Felipe, la ko ch'ín Tomás, la ko ch'ín Bartolomé, la ko ch'ín Mateo. La kjaxin ch'ín Jacobo, mé it'é ch'án it'in Alfeo, la ko ch'ín Simón, mé tí ch'ín a mé kuénte tí partido cananista, la ko kjaxin ch'ín Judas, sávé ch'án mé it'in Jacobo. ¹⁴ Kaín sín kójnkotsé sín ntihá tsonixjehé sín Dios la ko k'uéjoko sín tí kichó tí ch'ín Jesús la ko tí tjan María, iné ch'án, la ko iso chojni chjin.

¹⁵ Ntá tí yaon a tí ch'ín Pedro k'uínkatjen ch'án kjuák'exín toté ch'án jnkosiné tí tjejó tí sín tinkáchónki Inchéni mé ijkno ciento ikán chojni mé tsíkójnksé ntihá. Ntá ntáchro ch'án kixin:

¹⁶ —Kíkhóni, t'ichjánxín tsoxiteyá éxi nixja xroon itén Dios éxi tsínixja ch'ín David tsíchrónka Nchakuen Dios nkehe sich'e ch'ín Judas. Tí ch'ín Judas mé kjuíkao ch'án tí sín tsotsé ch'ín Jesús. ¹⁷ Jehe ch'án mé kjaxin k'uék'ajikoni la jnkokón xra k'uáyekoni ch'án.

¹⁸ A ntá jehe ch'án mé sákjuúk'enaxín ch'án ijnko nonte tí chichaon kjuacha ch'án kíxin tí jie kjuasin ch'án. Ntá k'uánótjen ch'án la ikja ch'án k'uitja nonte la xitjéhe tsée ch'án k'uaxrje kaín sintanóe ch'án. ¹⁹ Ntá xikaha kónohe kaín tí sín chjasin Jerusalén ntá tí nonte kjuinchek'in sín nkívee sín Acéldama mé t'axrjexín kíxin ijnko nonte siín ijni. ²⁰ Tí xroon Salmo mé nixja xikihí:

Tsitohe ntoé ch'án a,
la kohya nkexro ts'ejó ntiha.
La ko kjaxin ntáchro kíxin:

Í jnko nkexro ts'áyéhe tí xrä kuènte ch'án.*
Mé xikaha tsíkjin ch'ín David.

²¹ Tí tjejóni ntihi la siín chojni ó k'uajikoni xráxín tí k'uék'ajikoni Ìnchéni Jesús ²² desde k'uíkonni nkexrí kuikite ch'ín Juan tí jehe ch'án la ko hasta k'uíkonni sákjuí ch'án nkaya nkajní. Ntá ijie t'ichjánxín tsoxreyá jnkoyín tí sín a tsojnkotsékoní sín kíxin kjaxin tsochrónka sín kíxin chaxín xechón Ìnchéni Jesús —mé xikaha chrónka ch'ín Pedro.

²³ Ntá kjuenkayáxin sín tsonoxín yaá chojni mé tí ch'ín José, t'ikon ch'án Barsabás la ko Justo, la ko kjaxin í jnko ch'án it'in Matías. ²⁴ Ntá nixjéhe sín Dios la ntáchro sín kíxin:

—Ìnchéni jaha mé choxian əsén kaín chojni. Tjákhéni nkexro tsonhen tocar xrä tí yaá tí nkexro í kónoxín ²⁵ tsjiatéhe xrä apóstol kuènte ch'ín Judas. A ntá tí ch'ín Judas mé kuítøhe ch'án tí xrä kíxin kjuasin ch'án ijie la ntá ijie sákjuí ch'án tjetjasóte ch'án —ichro sín.

²⁶ Ntá kjuich'e sín suerte ntá xrínahya kónhen tocar tí ch'ín Matías, ntá tuénxín tí hora a kuákja ch'án xrä k'uéjóko ch'án tí tejnko tí sín kjueyá Ìnchéni.

2

Ó kui Nchakuen Dios

¹ Ntá ó kui tí yaon kia Pentecostés ntá kaín tí sín tinkáchónki Jesús mé kórnkotsé sín jnkokoá tjejó sín. ² Xrínahya kuínhin sín ijnko tóvéntó kuixín nkajní. Tí tóvéntó mé éxi ijnko xrínto fuerte chjéhe. Kuenté tí nchia tjejóxenhen sín mé kóvéntó kjaxin. ³ Ntá xrínahya k'uíkon sín nkehe éxi xrohi nene tsjehe. Ntá tíha xikayehe la k'uéjóken jnkojnko kja tí jehe sín. ⁴ Na ntá kaín sín k'uáyéhe sín tí Nchakuen Dios ntá kjuankíxín sín nixja sín í jnko nkiva kíxin Nchakuen Dios kjuinkitsa sín nixja sín.

⁵ A nta tí yaon a la tí chjasin Jerusalén k'uéjó chojni judío tjinkaon sín sinchexiteyéhe sín tí nkehe tinkáchónki sín, mé tsíkjixín sín nkúixín chjasintajni. ⁶ A ntá jehe sín mé tsíkinhin sín tí tóvéntó ntá tsíkochjina nchónhya chojni. Ntá í noehya sín nkehe chrókjuenkayáxin sín kíxin jnkojnko tí jehe sín mé kuínhin sín kíxin nixja tí sín a jnkojnko nkívee sín. ⁷ Ntá síxrànkä sín, chrakon sín ntá jehe sín mé tjo sín kichó sín kíxin:

—¿Á jehya kaín tí sín tjejónixja mé tsíkjixín sín estado Galilea? ⁸ La ənkekuénté tjejótinhinni kíxin nixja sín jnkojnko nkíveeni? ⁹ Kíxin ntihi mé siín chojni tsíkjixín chjasin Partia, la ko Media, la ko Elam, la ko Mesopotamia, la ko Judea, la ko Capadocia, la ko Ponto, la ko Asia, ¹⁰ la ko Frigia, la ko Panfilia, la ko Egipto la ko nkuíxín Africa əntsí nó ntaha Cirene. La ko kjaxin chojni romano tjejó ntihi. Iso tí sín a mé chaxín tsíkokjíexín judío, la í so la tinkáchónki sín Dios éxi tí sín judío xikaha. ¹¹ La kjaxin siín chojni tsíkjixín Creta, la ko Arabia. Mé xikaha kaín ni tsíkjixinni tí chjasin a mé tsíkinhinni tjejónixja tí sín a tí kjuaxroan kuènte Dios jnkojnko nkíveeni —mé xikaha ichro sín.

¹² Ntá tóxakonhen kaín sín la chrakon sín ntá kjuanchankíhi kichó sín kíxin:

—Nkehe t'axrjexín kaín tíha? —ichro sín.

¹³ A ntá iso sín kjuanoá sín ntáchro sín kíxin:

—Tsékoan tí sín a —ichro sín.

* ^{1:20} Salmos 69.25; 109.8

A ntá ch'ín Pedro chénka tí sín siún

¹⁴ Ntá jehe ch'ín Pedro mé k'uíncatjen ch'án, kjuák'exín töté ch'án la ko tí tejnko sín apóstol mé k'uíncatjen sín la ntá ch'ín Pedro mé itsen nixja ch'án. Ntáchro ch'án kíxin:

—Jahará chojni judío la ko jahará tjejorá chjasin Jerusalén. Kaínrá tjejorá tinhínrá tí nkehe tsōxrjānka. ¹⁵ Tí sín tjejó ntihi la jehya tsékoan sín éxi ntáchrora, kíxin na ntá las nueve nchítjen la kohya nkexro tsékoan. ¹⁶ Tíhi mé tsíchrónka ch'ín profeta Joel:

¹⁷ Ntáchro Dios kíxin: Itsi ijnko yaon tsjixixín
ntá tsochr'an Nchäkuenná ntá ts'áyéhé chojni.

Ntá tí xjaanrá ntoa la ko tí xjaanrá chjin mé tsonixja tan kuéntana.

La ko tí sín ntasoá mé titaya ts'íkuén sín tí nkehe tsjákohá sín.

La ko tí sín ó tada la kotáchríen sín ts'íkonxín sín kíxin nkexrí tjinkaon Dios.

¹⁸ Tí yaon tsónhen kaín tíha la tsochr'an tí Nchäkuenná ts'áyéhé kaín tí sínntoa ch'ena xra
la ko tí sícjin kjaxin

la tsochrónka sín tanná.

¹⁹ Ntá janhan mé tsjákoxiān ijnko kjuachrakon nkajní.

A ntá chjasintajni tsjákoxiān kjuaxroan:

mé ts'ixin ijni la ko xrohi la ko itjui tsík'óna ihnchi.

²⁰ Mé tí yaon la ts'inkaséyanxínhy, ts'óna ts'ixin tie.

A ntá tí nitjó mé ts'óna ijni.

Xikaha senó tsónhen ntá itsi Ínchéni.

Tíhi mé ijnko yaon imá jié la imá náxrjón.

²¹ A ntá kaín tí nkexro tsjanchehe ihnjé Ínchéni kíxin tsjinkitsa sín mé tsaá sín.*

Mé xikaha tsíchrónka ch'ín Joel.

²² 'Jahará chojni israelita tinhínrá tí nkehe tsōxrjānka. Tí ch'ín Jesús tsíkjixín chjasin Nazaret mé Dios kjuákoxián ch'án kíxin tsíchr'án ch'án kíxin kjuasin ch'án itsjé kjuaxroan jié k'uíkonrá la ko kjuako ch'án kíxin Dios tsíchjéhe ch'án kjuachaxin kíxin tjinkaon ch'án chrók'uikonrá. Jahará ó jína nohará kaín tíha. ²³ Kjónté xikaha k'uíkonrá la jahará itsérá ch'án éxi tsíkjenkayáxin Dios ósé. A ntá jahará kjuinchek'ayéhérá ch'án tí sín jínahya, a ntá tí sín jínahya mé k'óyán sín ch'án, kjuák'enkaní sín ch'án ijnko ntacruz. ²⁴ Kjánchó Dios la kjuínchexechón ch'án ínaá la kjuatsen ch'án tí kjuatjoté kuénte kjuach'én kíxin ntá ti kjuach'én xitjahya ts'etuenhen tí jehe ch'án. ²⁵ A ntá ósé tí ch'ín rey David tsíchrónka ch'án kuénte Jesús ntáchro ch'án kíxin:

Jaha Ínchéni t'íkuān kíxin jnkochríxín tjétaón ntia tí xritjak'é janhan.

Jaha mé itjen tjaná chjina kíxin chrókohya jié chrókjuásian.

²⁶ Méxra imá chéhé əsenná. Ir'və tsjexiān tí nkehe náxrjón.

Ó nóna kíxin kohya nkehe ts'atsínska kjónté its'én.

²⁷ Ó nóna kíxin tí jaha tsítóéhya əsenná chríkjan tí siín chojni tsík'en.

Tsjánjonhyá kjuachaxin kíxin tsōxíka ntona kíxin janhan mé ijnko nkexro t'aha xra jína tjuéhe.

²⁸ Jaha mé kjuákona tí ntia tsjanjon kjuachón. Jaha mé nchechàna kíxin t'ayakonna.†

Mé xikaha tsíkjín ch'ín David.

²⁹ 'Kíchóni títójérá tsontáxrjān kíxin ch'ín David, tí nkexro k'uaxrjeníxinni mé tsík'én ch'án la ko tsíkjixravá ch'án. Ntá naxqá noheni nketí tsíxravá ch'án. ³⁰ A ntá ch'ín David mé ijnko nkexro tsíchrónka itén Dios la ó nohe ch'án kíxin chaxín Dios chrónka kíxin ijnko nkexro ts'axrjeníxin ch'án mé ts'óna rey mé ts'etoan éxi jehe ch'án k'uetean ch'án. ³¹ Mé xikaha ch'ín David la ósé ó nohe ch'án nkehe tsónhen la mé chrónka ch'án kíxin tsōxechón Cristo la ko ntáchro ch'án kíxin tí əsén ch'án tsítóéhya tí siín tí sín tsík'en la ts'itjáyanhyá tí cuerpo kuénte ch'án. ³² Méxra Dios kjuínchexechón tí ch'ín Jesús, mé k'uíkonni kaín ni la

* ^{2:21} 2.17-21 Joel 2.28-32 † ^{2:28} 2.25-28 Salmo 16.8-11

mé chrónkani kíxin chaxín tíha. ³³ Ntá ijie Jesús mé sákju^íko ch'án Dios la nàndo itja chjina Dios mé tjen ch'án. Ntá tsíntáchro It'é ch'án Dios kíxin tsochr'án ch'án tí Nchakuen ch'án. Ntá jie ó kui la ó k'uíkonrá la ko kuínhínrá nkehe kónhen. ³⁴ Tí ch'ín David la jehya jehe ch'án sákju^í nkaya nkajní, kíxin jehe David ntáchro ch'án kíxin:

Ìnchéni Dios mé ntáche tí Ìnchéni kíxin:

“Tjak'e tjaná chjina ntihó tsétoan,

³⁵ tsixinjian kaín xín tí sín nínkakonhan la tsjachahya sín ts'etoan sín kíxin jahvá mé tsétoan.”[‡]

Mé xíkaha tsíkjín ch'ín David.

³⁶ 'Ntá kaín rá chojni israelita chrókónohará chaxín kíxin jehe tí ch'ín Jesús ó kjuakénkanirá tí ntacruz la Dios mé kjuich'éna Ìnchárá ijie, mé tí Cristo —mé xíkaha chrónka ch'ín Pedro.

³⁷ Ntá ti kuínhin sín tíha ntá imá kóxakonhen asén sín. La ntá kjuanchankíhi sín ch'ín Pedro la ko tí í so sín kjueyá ch'ín Jesús. Ntáchro sín kíxin:

—Kichóni, a ntá jie la ¿nkexrí chrókjuich'eni?

³⁸ Ntá kjuátehe ch'ín Pedro ntáchro ch'án kíxin:

—Chrókuítóhérá tí ijiárá la chróxráxinkáonrá Dios. Ntá chrókuikitaxínrá ihnié Jesucristo ntá Dios mé tsjakjìlinhanrá tí ijiárá ntá jehe ch'án tsjanjon ch'án Nchakuen ch'án ts'ayéhérá. ³⁹ Dios mé sinchekítóhérá ch'án tí Nchakuen ch'án ts'ayéhérá jahará la ko xjaanrá la ko kjaxin tsochjéhe ch'án Nchakuen ch'án kaín xín tí sín tjejó ikjín. Mé jehe ch'án tsochjéhe ch'án Nchakuen ch'án jnkojniko tí nkexro tsjeyá ch'án.

⁴⁰ Mé xíkaha ntáchro ch'ín Pedro la ko í so nkehe ntáchro ch'án. Nta nixjehé ch'án sín ínaá, ntáchro ch'án kíxin:

—Chrókuítóhérá tí jínahya tjenkayáxin tí chojni siín chjasintajni kíxin jahará me jína chrókuaárá.

⁴¹ Ntá kaín tí sín kuítekaon tí nkehe chrónka ch'án la ntá kuíkite sín la tí yaon a kóchjina iní mil chojni kjuankíxin tinkáchónki Ìnchéni Jesús la k'uíto tí sín ó xráxín siín. ⁴² Ntá kaín sín mé jína k'uéj'ejó sín mé kuítekaon sín tí nkehe kjuako tí sín kjueyá Jesús la kjuinkitsa sín kjuanjon sín tí nkehe chrókjóne tí í so sín la ko chjéhe sín Dios kjuasáya la ko kójnkotsé sín kíxin sine sín niotjá xraxinkakonxín sín kíxin ik'uén Ìnchéni.

Mé xíkaha k'uéjó tí sín xrankíxín tinkáchónki Ìnchéni

⁴³ La ntá kaín tí í so sín mé chrakon sín kíxin tí sín tsíkjeyá Jesús kjuasin sín itsjé kjuaxroan. ⁴⁴ La kaín tí sín tinkáchónki Jesús mé jnkokojá k'uéjó sín la jnkokojá chóntha sín tí nkehe sine sín. ⁴⁵ Kjuinchekji sín tí nkehe chóntha sín ntá k'óxikayéhe sín tí chichaon la chjéhe sín tí sín chontahya. ⁴⁶ Jnkojniko yaon kójnkotsé sín tí njinko la ntá jnkojniko ntoe sín kjóneko kichó sín. La ko kjóne sín niotjá kíxin xraxinkakonxín sín kíxin ik'uén Ìnchéni la ko kjuaxróxin k'uéjó sín la kohya nkexro kjuinchehnke. ⁴⁷ Kjuanchehe sín kjuasáyé Dios. Ntá kaín chojni k'uéchóntehe sín kjuasáya. A ntá jnkojniko yaon Ìnchéni mé kjueyá iso chojni kíxin tsotsjé tí sín tsaá.

3

Kuítohe jína ijno nkexro xitjahya tji

¹ Ijnko yaon tí ch'ín Pedro la ko ch'ín Juan mé chriùn sín sákju^í sín tí tjen tí njinko. Mé kjuíji sín las tres kónjín, tí hora mé nixjehé sín Dios. ² Kaín yaon kjuák'e ntiha ijno ch'ín tsíkokjíexín xitjahya tji. Sátsíkjiko sín ch'án tí njinko la tsíkjak'etjaxin sín ch'án tí ntója puerta mé it'in Ntója Náxrjón. Ntaha tjetjanchak'éhe ch'án chichaon tí sín sít'ixenhen ntiha. ³ Ntá xrínahya k'uíkon tí ch'ín xitjahya tji kjuíji tí ch'ín Pedro la ko ch'ín Juan

ts'ixenhen sín n̄inko, a ntá kjuanchak'éhe ch'án sín chichaon. ⁴ Na ntá ch'ín Pedro la ko ch'ín Juan mé komá sín tí ch'ín a la ntá ntáchro ch'ín Pedro kíxin:

—Tsjehé ntihi.

⁵ A ntá tí ch'ín a tjetsjehe ch'án jína kíxin ách'e ichrén nkehe tsjanjon tí sín a, ichro ch'án.

⁶ A ntá ch'ín Pedro ntáchro kíxin:

—Na chontahya plata ni oro kjánchó tí nkehe chonta la tsotjahá. Mé kjuachaxin ihnijé Jesucristo, tí nkexro tsíkjin chjasin Nazaret, la t'inkatjen itjia —mé xikaha ichro ch'ín Pedro.

⁷ Ntá ch'ín Pedro mé itsé ch'án tí tja chjina tí ch'ín xitjahya tji ntá k'uínkatjen ch'án. Ntá xrínahya ó kósóji tí nta ntoá toté ch'án. ⁸ Ntá tí ch'ín xitjahya tji la chrika ch'án la kjuák'exín toté ch'án ntá kjuankíxin ch'án itji ch'án. Ntá k'uíxenko sín ch'án nkaxenhen ninko. Tjetji ch'án la ko chrika ch'án la chjéhe ch'án kjuasáya Dios. ⁹ Na ntá kaín tí chojni siín tí chjasin ntiha la k'uíkon sín kíxin ó tji ch'án la ko chjéhe ch'án kjuasáya Dios. ¹⁰ Ntá chrakon sín kíxin xikaha tsíkónhen kíxin tsíkjatsóan sín kíxin jehe tí nkexro kjuák'etjaxin kjuanchak'á ch'án chichaon ntója n̄inko it'in Ntója Náxrjón.

Nixjehé ch'ín Pedro tí chojni siín tí ntásin Salomón

¹¹ Na tí ch'ín xitjahya tji la mé titóehya ch'án tí ch'ín Pedro la ko ch'ín Juan. Ntá kaín xín tí sín siín ntiha chrakon sín kuinká sín sákjuítsjehe sín tí ntásin kuénte n̄inko it'in ntásin Salomón kíxin ntaha tjejó tí sín a. ¹² Ntá tí k'uíkon ch'ín Pedro xikaha la ntáche ch'án sín kíxin:

—Jahará chojni israelita, ¿nkekuénte chrakonrá jahará la ko nkekuénte komáráni? ¿Á tjenkayáinxrá kíxin jehóni kjuínchekitóheni jína tí ch'ín i kíxin jehóni chontani kjuachaxin la ko kíxin imá tinkáchónkini Dios? ¹³ Náhí. Tí Dios k'uékinkáchónki ch'ín Abraham, la ko Isaac, la ko Jacob mé imá chjéhe ch'án kjuachaxin tí Xjeen ch'án Jesú. Kjánchó jahará tsíkijkenhenrá ch'án tí sín t'etoan. Ntá tí ch'ín Pilato mé tjinkaon ch'án chrók'uátjánta ch'án tí ch'ín Jesú kjánchó jahará la tjinkákonhyará xikaha. ¹⁴ A ntá jahará chrókjuanchiará chrókuítóhe sáchrókjui tí nkexro tjóá jína asén. A ntá náhí. A ntá jahará mé tjinkáonrá sátsji ijnko chojni chóntha nchónhya jíe. ¹⁵ A ntá jahará tsík'oyánrá tí nkexro tjanjon kjuachón. A ntá Dios mé kjuínchexechón tí jehe ch'án la mé xikaha k'uíkonni la chrónkani. ¹⁶ Tí kjuächaxién ihnijé Jesú mé tinkáchónkini la ntá tíha mé kuítóexín jína tí nkexro k'uíkonrá la ko choxinrá. Tí ch'ín a mé kuítekaon ch'án ntá kuítóhe ch'án jína. Mé xikaha ó k'uíkonrá kaín rá.

¹⁷ 'Kíchóni ó nöna kíxin tió jahará la ko tí sín t'etoan k'oyánrá Jesú la ni kónoahyará nkehe kjuich'erá. ¹⁸ Ntá ó xiteyá tí nkehe tsíntáchro Dios tsínxjaxin tí sín tsíchrónka itén ch'án kíxin tí Cristo t'ichjánxín tsjasóte ch'án. ¹⁹ Méxra tsítohérá ijíará ntá xráxinkáonrá Dios ntá jehe ch'án mé ts'óxíka ijíará ntá Inchéni mé sinchekitohará ch'án jína. ²⁰ Ntá jehe ch'án mé tsochr'án Jesucristo ínaá la xra ó tsi kíxin tsaáxinrá. ²¹ Na ntá ijie la Jesucristo la nkaya nkajní ntahó tsitohe ch'án hasta tsjasiyóxinjian Dios kaín nkehe exí tsíntáchro ch'án tsínxjaxin ch'án tí sín tsíchrónka itén ch'án ósé. ²² A ntá senó tí ch'ín Moisés tsíchénda tí sín tsík'axrjeníxinni kíxin: "Inchéni Dios mé tsochr'án ijnko nkexro ts'axrjeníxinrá tsochrónka itén ch'án exí tsíchr'án ch'án tí janhan. T'ichjánxín tinhínrá kaín tí nkehe tsontáchro ch'án. ²³ A ntá tí chojni titekakonhyá tí nixja tí nkexro a la ts'itjáyan sín la tsitohe sín tí nación Israel,"* mé xikaha tsíchrónka ch'ín Moisés.

²⁴ 'Kaínxín tí sín tsíchrónka itén Dios kjuankíxín ch'ín Samuel la ko kaín tí sín kui chr'éxín mé chrónka sín kíxin kaín tíha tsónhen xikaha tí yaon i. ²⁵ Mé tí nkehe tsíntáchro Dios tsínxjaxin ch'án tí sín tsíchrónka itén ch'án kíxin xikaha chrók'uayéhérá jahará tí nkehe chrókjuanjon ch'án kíxin chrók'uejorá jína. Dios tsíkjich'éna ch'án ijnko pacto mé nixjehé ch'án tí sín tsík'axjeníxinrá mé tsíntáche ch'án tí ch'ín Abraham kíxin: "Kaínxín

* **3:23** 3.22-23 Deuteronomio 18.15,19

chojni chjasintajni mé tsoyaonxín sín kíxin ijinco nkexro ts'axrjeníxín tí jaha.”[†] ²⁶ Dios kjuínchexechón ch'án tí Xjeen ch'án la sáoxín ichr'án ch'án tí tjejorá jahará israelitará kíxin chrókjuintayaonrá ch'án kíxin jnkojnko tí jahará chrókuítohérá tí nkehe jinahya ich'erá —ichro tí ch'ín Pedro.

4

Tí ch'ín Pedro la ko ch'ín Juan nkayakon tí sín t'etoan

¹ Ch'ín Pedro la ko ch'ín Juan la náxá tjejónixjehé sín tí sín tsíkójkotsé ntá xrínahya ikui tí sín nchájt'á la ko tí ch'ín t'etueñhen tí sín soldado kuénte tí njinko la ko tí sín saduceo. ² Imá kóníkaon sín kíxin ch'ín Pedro la ko ch'ín Juan kjuákohe sín tí sín tsíkójkotsé nkexrí tsoxechón chojni tsík'en kíxin xikaha xechón ch'ín Jesús. ³ Ntá kuínhin sín xikaha ntá itsé sín tí sín a ntá sákjuíko sín, chr'áxenhen sín ntøechiso. Ntahó k'uéjó sín hasta kóyáon kíxin ó ntá kóntó. ⁴ A ntá nchónhya tí sín tsíkinhin tí tan a la kuítekaon sín. Ntá kjuixraká tí número tí chojni ntoa mé in'ó mil chojni ntoa ó.

⁵ A ntá tí yaon chr'éxín kójnkotsé tí chjasin Jerusalén tí sín t'etoan kuénte tí sín judío la ko tí sín tjako tí ley. ⁶ Mé kjaxin ntaha tjen ch'ín Anás, mé jehe ch'an mé tí nchájt'á imá t'etoan, la ko ch'ín Caifás, la ko kjaxin ch'ín Juan, la ko ch'ín Alejandro, la ko kaín tí chojni kjéhya tí nchájt'á t'etoan. ⁷ Ntá k'uetoan sín kíxin síxrakoa ch'ín Pedro la ko ch'ín Juan. Ntá k'uéjó sín jnkosiné la ntá kjuanchankíhi sín ntáchro sín kíxin:

—¿Nkexro kjuanjon kjuachaxin o nkexro kjuachaxin ihnié kíxin xikaha ich'erá tí nkehe?

⁸ Ntá ch'ín Pedro imá chóntha ch'án kjuachaxin kuénte Nchákuén Dios ntá kjuátehe ch'án ntáchro ch'án kíxin:

—Jahará chojni t'etoan kuénte chjasin la ko jahará sín táda kuénte chjasin Israel, ⁹ jahará mé tjanchankírá kíxin nkexrí kuítóhe ijinco chojni níhi jína kíxin tjinkáonrá tsonohará. ¹⁰ Ntá tinhínrá jína tí nkehe tsochrónkaxínni kíxin kaín rá chojni chjasin Israel tsonohará kíxin tí ch'ín i itjen ntihi mé kuítóhe ch'án jína kjuachaxién ihnié Jesucristo, tí nkexro tsíkjixín chjasin Nazaret. A ntá jahará mé tsíkjakénkanirá ch'án tí ntacruz la ntá Dios kjuínchexechón ch'án ínaá. ¹¹ Tí ch'ín Jesús i mé tí xro náxrónhya kuítóentará tió kjuich'énará tjet'o ntá mé jie k'óna tí xro tjetooan.* ¹² Kohya í jnko nkexro chóntha kjuachaxin chrókuaáxinni kíxin kohya í jnko ihnié chojni ntihi chjasintajni chrókuinkáchónkini chrókuaáni —mé xikaha ichro ch'ín Pedro.

¹³ Tí síxreé mé k'uíkon sín kíxin ch'ín Pedro la ko ch'ín Juan mé nixja sín kaín asén sín la ntá kónohe sín kíxin tí sín a mé noehya sín xroon la tjetuanhya sín. Ntá chrakon tí sín t'etoan ntá kjuátsoan sín kíxin tí sín a mé tsík'ajiko ch'ín Jesús. ¹⁴ A ntá tí ch'ín tsíkitóhe jína mé ntiha tjejóko sín ch'án. Méxra xitjahya tsjanchia sín jié tsjasóte tí sín a. ¹⁵ Ntá tí síxreé a mé k'uetoan sín kíxin tí sín a ts'axrje sín ntója ntá jehó sín k'uéjóxenhen sín nchia ikjo sín kíchó sín. ¹⁶ Ntá ntáchro sín kíxin:

—¿Nkehe chrókjuich'eheni tí sín a? Kaínxín tí chojni ntihi chjasin Jerusalén mé ó k'uíkon sín kíxin kjuínkitsa Dios tí sín a ntá kjuasin sín ijinco kjuaxroan jié ntá xitjahya tsontáchroni kíxin chaxínya tíha. ¹⁷ I tjinkakonhyani kíxin náxá tsochrónka sín tíha kíxin náxá tsinhin chojni. Méxra ts'etoanni kíxin í tsochénkahya sín ninkexró tí ihnié Jesús.

¹⁸ Na ntá k'uíyehé sín tí sín a ínaá ntá k'uetoñhen sín kíxin ninkehó chrónixja sín la ko chrókjuako sín ihnié Jesús, ichro sín. ¹⁹ A ntá ch'ín Pedro la ko ch'ín Juan kjuátehe sín ntáchro sín kíxin:

—Tjenkayáxinrá jahará, ¿á chrókóxrjíñin Dios chrókjuintaxiteyáharáni jahará o chrókjuinchexiteyéheni tí jehe ch'an? ²⁰ A ntá jeheni la xitjahya tsítóheni tsochrónkani tí nkehe ó k'uíkonni la ko tí nkehe kuínhinni —ichro sín.

* 3:25 Génesis 22.18 * 4:11 Salmo 118.22

²¹ A ntá kjónté xíkaha kuínhin tí síxréé la jiehe k'uetoan sín ntá kjuanjon sín kjuachaxin kixin sátsji tí sín a kixin k'uitjahya sín nkexrí sinchekjasóte sín tí sín a kixin kaín tí sín chjasin ntiha chjéhe sín Dios kjuasáya kixin tí kjuaxroan kjuich'e sín. ²² Na mé tí ch'ín kuítuhe jína kixin tí kjuaxroan mé chjina k'uaxitjehe ch'án cuarenta nánó a.

Tí sín tinkáchónki Jesús tjanchia sín kixin tsochrakonhya sín

²³ Ntá tí ch'ín Pedro la ko ch'ín Juan tsíxranjon kjuachaxin sátsji sín na ntá sákjuí sín tí tsíkójkotsé iso tí sín chóxin sín. Ntá chrónka sín kaín nkehe k'uetoan tí sín nchátl'á t'etoan la ko tí sín táda. ²⁴ Ntá kjuixin kuínhin tí sín tsíkójkotsé na ntá kaín sín nixjehé sín Dios la ntáchro sín kixin:

—Inchéni, jaha mé kjuich'eña nkajní la ko chjasintajni la ko tí ntayaon la ko kaín xín tí nkehe siín. ²⁵ Jaha mé kjuachaxién Nchákuán nixjaxian ch'ín David tí nkexro kjuít'aha xra. Ntáchro ch'án kixin:

¿Nkekuente kixin kóníkaon kaín tí chojni nación ókjé?

A ntá tí chojni israelita mé tjenkayáxin nkehe ninkehó sínkíhya.

²⁶ Tí sín rey siín chjasintajni la ko kaín tí sín tí chjasin kójnkotsé sín

nínkakonhen sín Inchéni la ko Cristo.[†]

Mé xíkaha tsíkjín ch'ín David ósé.

²⁷ 'Mé xíkaha chaxín ch'ín Herodes, la ko ch'ín Poncio Pilato, la ko kjaxin tí chojni tsíkjixín ókjé, la ko tí sín israelita mé tsíkójkotsé sín tí chjasin ntihi kixin kóníkakonhen sín tí Xjaan Jesús chóntahya jie, mé tí nkexro tsíkjeyá jaha sit'aha xra. ²⁸ Mé xíkaha kjuinchexiteyá sín tí nkehe ósé tsíkjenkayáxian kixin t'ichjánxín xíkaha tsónhen. ²⁹ A ntá Inchéni, tsjehé kixin imá jiehe k'uetoan tí sín a. La ntá jaha tsínkitsa tí sín sit'aha xra tsochrakonhya sín tsochrónka sín itán. ³⁰ La ko tí kjuachaxián sinchekitoexín jína tí chojni níhi la ko tsjákoxian kjuaxroan kjuachaxién ihnjé tí nkexro Jesús t'aha xra —mé xíkaha nixjehé sín Dios nkaya nkajní.

³¹ A ntá tí kjuixin nixjehé sín Dios a ntá tí tjejó sín mé kuínkí nonte. La ntá kaín sín antsí k'uáyéhé sín Nchákuén Dios ntá kaín əsén sín kjuankíxin sín chrónka sín itén Dios.

Tí kaín nkehe siín la kaín sín mé kuénte sín

³² La kaín tí sín kuinkáchónki sín Jesús mé jnkokoá kjuenkayáxin sín. Kohya nkexro ntáchro kixin jehó kuénte tí nkehe siín. Náhí. Kaín sín mé kuénte sín. ³³ Tí sín tsíkjeyá Jesús mé kaín əsén sín chrónkaxín sín kixin nkexrí xechón Inchéni Jesús. Ntá Dios antsí kjuincheyá kaín sín. ³⁴ Kohya ninkexró nójaxinhya tjejó ntiha kixin kaín tí sín chóntha nontee sín o ntœe sín kjuinchekji sín. Na ntá tsíkjikao sín tí chichaon ³⁵ chjéhe sín tí sín kjueyá Jesús. A ntá tí sín k'óxikayéhe sín tí chichaon, kuákja tí sín nòa. ³⁶ Mé xíkaha kjuich'e ijnko ch'ín levita it'in José. Jehe ch'án la tsíkjixín ch'án nonte Chipre jnkosiné ntayaon. Tí sín kjueyá Jesús mé kjuinchek'in sín ch'án Bernabé, mé t'axrjexín kixin tí ch'ín nchechéhé əsén chojni. ³⁷ Jehe ch'án a mé kjuinchekji ch'án ijnko nontee ch'án ntá kjuikao ch'án tí chichaon kjuinchek'áyéhé ch'án tí sín kjueyá Jesús.

5

Ijie kjuasin ch'ín Ananías la ko tjan Safira

¹ A ntá í jnko ch'án mé it'in Ananías, a ntá ichjién ch'án mé it'in Safira, mé jehe sín mé kjuinchekji sín ijnko nontee sín. ² A ntá tí ch'ín a kjuenkayáxinko ichjién ch'án ntá kuakitsjentehe sín iso tí chichaon. Ntá í so mé sákjuiko ch'án la chjéhe ch'án tí sín kjueyá Jesús la kjuanjon ch'án éxí kaín. ³ Ntá ntáchro ch'ín Pedro kixin:

—Ananías, ¿kuénté chjehé kjuachaxin tí Tsochren kixin k'uetuñhen əsán? Ntá kjuich'iyehé tí Nchákuén Dios kixin kjuinchemá iso chichaon kjuinchekjixián nontaa.

[†] 4:26 4.25-26 Salmo 2.1-2

⁴ ¿Á jehya nontaa tíha? Ntá tió kjuincheckjia la, tí chichaon la, ¿á jehya kuénta? ¿Kuénte kjuenkayáxian sîch'e tíha? Kjuich'iyehé Dios, jehya chojni kjuich'iyehé.

⁵ Na ntá kuínhin tí ch'ín Ananías ntá kjuitsínka ch'án ntá ik'uén ch'án. La ko kaín xín tí sín ntiha kónohe sín nkehe kónhen tí ch'ín a la imá chrakon sín. ⁶ Na ntá ikjui iso sín ntasoá la ntá kjuincheck'ísimá sín ika tí cuerpo kuénte ch'án la ntá sákjuíko sín, sákjuíkjává sín.

⁷ Ntá k'uátsínka iní hora ntá kjuíji ichjién ch'ín Ananías k'uíxenhen tjan tí nchia ntaha a. La noehya tjan nkehe tsíkónhen tí ntiha. ⁸ Ntá ch'ín Pedro mé kjuanchankíhi tí tjan a, ntáchro ch'án kíxin:

—Chronka, ¿á chaxín xíkahó kóxiñin tí nonte ó kjuincheckjirá? —ichro ch'án.

Ntá kjuát̄ehe tjan kíxin:

—Chaxín xíkahó kóxiñin.

⁹ Ntá ntáchro ch'ín Pedro kíxin:

—¿Nkekuénte jnkokoá kjuenkayáxinrá kjuich'iyehérá Nchakuen Ínchéni? Kjá ntáchrará kohya nkehe chrókónhanrá. Ntihi ó kui tí sín ntasoá sákjuíkjává sín xía na ntá jaí sátsjiko sín tí jaha —mé xíkahá ichro ch'ín Pedro.

¹⁰ Ntá tuénxín kjuitsínka tjan Safira toté tí itjen ch'ín Pedro ntá ik'uén tjan. Ntá k'uíxenhen tí sín ntasoá tí nchia a ntá k'uíkon sín kíxin tsíkixin tsík'en tjan. La ntá sákjuíko sín tí cuerpo kuénte tjan la kjuavá sín tjan tí chjinaxón tsíxravá tí xìi tjan. ¹¹ Na kaín tí sín kuénte njinko la ko tí so sín kuínhin tí xíkahá tsíkónhen, mé imá chrakon sín.

Itsé kjuaxroan kjuakoxín sín

¹² A ntá tí sín kjueyá Jesús mé kjuakoxín sín nchónhya kjuaxroan tí siín chojni ntiha la ko kaín sín mé kójnoksé sín tí ntásin it'in Salomón. ¹³ Chrakon iso sín k'uítóhya tí jehe sín la kjónté la kaín chojni tjikosáyehe tí jehe sín. ¹⁴ La ntá xrínahya nchónhya chojni ntoa la ko chojni chjin kjuankíxin tinkáchónki sín Ínchéni. ¹⁵ Ntá itsé chojni mé kuakitsje sín tí chojni níhi k'uejo sín ntja. Tjejóták'á sín chrítaón cama la ko kania kíxin ts'atsínka ch'ín Pedro ntá kjónté its'ueen ch'án ó ts'atsínka tí tjejó sín mé chrókuitqexín sín jína. ¹⁶ Kjaxin tí chjasin chjino mé kjuixín nchónhya chojni ikjui sín chjasin Jerusalén la kjuíkao sín tí chojni níhi la ko tí chojni chónta nchakuen tí jínahya. La kaín sín a mé kuítóhe sín jína.

Ch'ín Pedro la ko ch'ín Juan mé chónkíhi sín

¹⁷ Na ntá tí sín nchat'á t'etoan la ko tí sín kuénte tí sín saduceo mé imá kóchjinoxín sín. ¹⁸ Na ntá itsé sín tí sín kjueyá Jesús la chr'áxenhen sín ntoechiso. ¹⁹ A ntá ijinko ángel kuénte Ínchéni ikui tí tie a kuakitjehé ch'án ntója ntoechiso ntá kuakitsje ch'án tí sín a. La ntá k'uétuēnhen ch'án sín kíxin:

²⁰ —Sátjirá njinko la tsjákohérá kaín tí sín ntiha tí tan nixin tsjanjon kjuachón.

²¹ Kjuixin kuínhin sín ntá sákjuí sín ntá tí k'uíkaséyan k'uíxenhen sín tí njinko kjuako sín.

A ntá tí nchat'á t'etoan la ko tí sín k'uéjóko ch'án mé k'uíyehé sín tsojnkotsé kaín tí síxréé, mé tí sín t'etoan kuénte Israel. Na ntá k'uétuēnhen sín kíxin tsoxrakoa tí sín tjejóchjina tsíkjeyá Ínchéni. ²² A ntá kjuíji tí sín policía tí ntoechiso a ntá k'uitjahya sín tí sín a. La ntá ikjan sín la ²³ ntáchro sín kíxin:

—Kjuíjini ntiha la k'uíkonni tsíkjehe jína ntoechiso a la k'uéjó tí sín soldado a ntója. Ntá kuakitjehéni ntoechiso la k'uitjahyani ninkexró tí nkaxenhen —ichro sín.

²⁴ Ntá kaín tí nchat'á t'etoan la ko tí ch'ín k'uétuēnhen tí policía kuénte njinko la ko i so tí sín nchat'á t'etoan mé kuínhin sín ntá ntáchro sín kíxin xá nkexrí chrókónhen chrók'uitjáyan tí xra kuénte tí sín a. ²⁵ Na ntá tuénxín kjuíji ijinko nkekro ntáchro kíxin:

—Tí sín k'uejochjinará jahará mé ó nkaxenhen njinko ntaha tjejó sín tjejótjakohé sín chojni —ichro ch'án.

²⁶ La ntá tí ch'ín k'uétuēnhen tí sín policía mé sákjuíko ch'án tí sín policía la kjuíkakjín tí sín tjako. Ninkehó kjuich'ehya tí sín policía tí sín tjako kíxin chrakon sín kíxin ách'e tí

sín siín ntiha mé tsjak'e sín xro, ichro sín. ²⁷ Na ntá tió kjuíkao sín tí sín a la k'uejó sín nkayakon tí sín t'etoan ntá tí nchat'á t'etoan ntáchro ch'án kíxin:

²⁸ —Jeheni kjuanjonhyani kjuachaxin kíxin tsjákorá ihnié tí nkexro a. A ntá nkehe kjuich'erá jahará? Kuenté chjasin Jerusalén tsíkjákorá. La tjinkáonrá tsékaráni jie kíxin jeheni tsík'oyánni tí ch'ín a —ichro ch'án.

²⁹ A ntá ch'ín Pedro la ko tí iso sín kjueyá Jesús ntáchro sín kíxin:

—A ntá jeheni t'ichjánxín sinchexiteyéheni Dios senó. A ntá chr'éxín sinchexiteyéheni chojni. ³⁰ Tí Dios tsíkinkáchónki tí sín tsík'axjeníxinni ósé mé kjuinchexechón Jesús, ti nkexro a mé kjuakénkanirá tí ntacruz tsík'oyánrás. ³¹ Ntá ijie tjeko ch'án Dios nkaya nkajní la nánko itja chjina Dios mé tjen ch'án la Dios kjuich'éna ch'án ijkno nkexro t'etoan kíxin sinchekaá ch'án chojni kíxin tí nación Israel chrókjan chrókuinkáchónki sín Dios ntá chrók'uitjáyan tí jie chóntha sín. ³² La ko kjaxin jeheni chrónkani kaín tí nkehe k'uíkonni kjuachaxién Nchákuén Dios. Tí Nchákuén ch'án mé chjéhe Dios kaín tí nkexro chaxín sinchexiteyéhe tí jehe ch'án.

³³ La ntá tí sín t'etoan a mé kuínhin sín tíha ntá kóníkaon sín la ko tjinkaon sín chrók'oyán sín tí sín a. ³⁴ Na ntá tjen ijkno chojni fariseo mé ijkno sítreé it'in ch'án Gamaliel. Jehe ch'án mé ijkno maestro kjuako tí ley la kaín chojni chjasin ntiha chónthe ch'án kjuasáya. Mé k'uíkatjen ch'án kjuák'lexín toté ch'án la nixja ch'án k'uetoan ch'án kíxin tí sín tsík'jeyá Ínchéni mé ts'axrje sín ntója intsi, ichro ch'án. ³⁵ Na ntá nixjehé ch'án kaín tí sítreé ntáchro ch'án kíxin:

—Jahará chojni israelita, tóxakonhanrá kíxin kohya nkehe chrókjuich'ehlerá tí sín a. ³⁶ Xráxinkáonrá kíxin senó kjuák'e ijkno ch'ín it'in Teudas la tónhen qasén ch'án kíxin imá t'etoan ch'án. Ntá itsjé sín mé noó ciento chojni kjuíchréhe ch'án. Na ntá ókjé chojni k'oyán sín tí ch'ín a la ntá kaín tí sín kuinkáchréhe tí jehe ch'án mé xíka sín sákjuí sín ntá ntahó kjuèxín tí xra k'uékjich'e sín. ³⁷ Ntá chr'éxín tió xrenájín kaín ihnié chojni k'uéjó na ntá ikjui í jkno ch'ín mé it'in ch'án Judas la kjuixín ch'án estado Galilea. Ntá itsjé chojni kjuíchréhe ch'án. La ntá kjaxin k'oyán sín ch'án la ntá kaín xín tí sín kjuíchréhe ch'án xíka sín sákjuí sín ínaá. ³⁸ Méxra títójherá tjiatéhyará tí jehe sín a. A ntá tí tjejoch'e sín xra kuénte chojni ó la kjaxin ts'itjáyan. ³⁹ A ntá tí chaxín tjako sín kjuachaxién Dios ntá tsjachahyará sinchek'itjáyanrá tíha. Méxra títójherá sín kíxin tsjánjonkohyará Dios.

⁴⁰ Na ntá kaín tí sítreé mé kuítekaon sín la ntá k'uíyehé sín tí sín kjueyá Jesús. La ntá kjuate sín la xík'etuñhen sín kíxin í tsonixjahya sín ihnié Jesús la ntá kjuanjon sín kjuachaxin kíxin sátsji sín. ⁴¹ Ntá tí sín kjueyá Jesús mé k'uaxrjexín sín tí tjejó tí sín t'etoan kjónté xíkaha kónhen sín la chéhe sín kíxin Dios kjuanjon kjuachaxin kjuasóte sín kíxin tí kjuako sín ihnié Jesús. ⁴² Kuítóehya sín tsjako sín kuénte Jesucristo kaín yaon tí nkaxenhen ninko la ko tí jnkojnko ntoi chojni.

6

Kjueyá sín yato chojni tsjinkitsa

¹ Na ntá tí yaon a tjoka sítinkákótsjé tí sín tinkáchónki Ínchéni. A ntá tí sín nixja nkiva griego mé kóníkkakonhen sín tí sín nixja nkiva hebreo. Ntáchro sín kíxin tí sín chjin k'án kuénte sín la kánhyó jína k'uáyehé tí nkehe sítikayehé sine sín jnkojnko yaon, ichro sín.

² Na ntá tí teyó tí sín tsík'jeyá Jesús mé k'uíyehé sín kaín tí sín tinkáchónki Ínchéni. Ntá nixjehé sín, ntáchro sín kíxin:

—Jeheni la jehya jína tsítóheni tí xra tjakoni itén Dios, kíxin ntá sit'aharáni xra ts'óxíkayeheni tí nkehe sine sín k'án. ³ Méxra jahará kíchó ni tsjéyará yato chojni ntoi tí tjejorá, tí chojni jína choxinrá la ko nohe sín la ko antsí chóntha sín Nchákuén Dios mé tí sín a sinchek'ayéheni tí xra a. ⁴ A ntá jeheni la tsonixjeheni Dios la ko tsinkákjakoni itén ch'án —mé xíkaha ichro sín.

⁵ La ntá kaín sín mé kuínhin sín xíkaha ntá jnkokoá kjuenkayáxin sín. La ntá kjueyá sín ch'ín Esteban, mé ijnko nkexro imá tinkáchónki Ìnchéni la ko ąntsí chónta ch'án tí Nchakuen Dios. La kjaxin kjueyá sín ch'ín Felipe, la ko ch'ín Prócoro, la ko ch'ín Nicanor, la ko ch'ín Timón, la ko ch'ín Parmenas la ko ch'ín Nicolás. Jehe ch'án mé tsíkjixin ch'án chjasin Antioquia la ósé mé tsíkinkáchónki ch'án ti nkehe tinkáchónki tí sín judío. ⁶ Ntá kjuixin kjueyá sín tí sín a ntá kjuikao sín ti tjejó tí sín tsíkjeyá Ìnchéni. La ntá tí sín a mé nixjehé sín Dios la ko k'uejotja tja sín chrítaón tí ikja tí sín tsíkónoxín.

⁷ Tí itén Dios sítinkákji la tinkákotsjé tí sín tinkáchónki Ìnchéni chjasin Jerusalén. Kjaxin itsjé tí sín nchäťá judío kjuankíxin sín tinkáchónki sín Ìnchéni.

A ntá itsé sín ch'ín Esteban

⁸ Tí ch'ín Esteban mé ijnko nkexro k'uéchóntha kjuachaxin kíxin Dios tsíkjincyeaon ch'án la nchónhya kjuaxroan kjuakoxin ch'án tí siín chojni. ⁹ A ntá iso sín tsíkjixin tí njinko judío kuènte tí sín senó k'uejó esclavo sín tsíkjixin sín chjasin Cirene, la ko Alejandría, la ko Cilicia, la ko estado Asia, mé kjuankíxin sín ikjo sín ch'ín Esteban. ¹⁰ Kjónté xíkaha la kjuachahya sín kíxin Nchakuen Dios mé kjuinkitsa tí ch'ín Esteban nixja ch'án. ¹¹ Na ntá jehe sín mé kjuenkehé sín ókjé chojni kíxin tsocchrónka sín kíxin kuínhin sín k'uántaxínhin ch'án ch'ín Moisés la ko Dios, ichro sín. ¹² Mé xíkaha k'uíxité kaín chojni la ko tí sín t'etoan kuènte njinko la ko tí sín tjako tí ley. La ntá itsé sín tí ch'ín Esteban la tinkánkákjen sín ch'án sákjuiko sín ch'án tí siín tí síxréé a. ¹³ Kjaxin kjueyá sín chojni tsocchrónka kíxin ntoáhya kjuako ch'ín Esteban la ntáchro tí sín a kíxin:

—Tí ch'ín a mé titoehyá ch'án t'ántaxínhin ch'án tí njinko kuénténi la ko tí ley. ¹⁴ Ó kuínhinni kíxin chrónka ch'án kíxin tí ch'ín Jesús, tí ch'ín tsíkjixin chjasin Nazaret, mé sinchek'itjáyan ch'án tí njinkoeni ntihi la ko tsjitóxínhin ch'án tí nkehe tinkáchónkini mé tí nkehe tsík'etoan ch'ín Moisés —mé xíkaha ichro sín.

¹⁵ Ntá tí síxréé la ko kaín tí sín sítjaxin ntiha la komá sín tí ch'ín Esteban la mé k'uíkon sín kíxin tí kàré ch'án mé éxi ijnko ángel mé xíkaha tsjehe tí jehe ch'án.

7

Tí nkehe kjuátehe ch'ín Esteban

¹ A ntá tí sín nchäťá t'etoan kjuanchankíhi sín tí ch'ín Esteban kíxin:

—¿Á chaxín kaín tíhi tsíntáchrua?

² Na ntá jehe ch'án kjuátehe ch'án ntáchro ch'án kíxin:

—Kaínrá kíchó ni Israel la ko sín táda tinhínrá tí nkehe tsontáxrjan. Dios kuénteni chónta kjuachaxin mé kjuakohé ch'ín Abraham tí nkexro k'uaxrjeníxinni tió kjuák'e ch'án nación Mesopotamia tí naxqá sátihya ch'án tsjak'e ch'án nonte Harán. ³ Dios tsíntáchro kíxin: “Títohé chjasán la ko kaín tí nkexro kjéhya. Na ntá sátiya tí nonte tsjákhá jaha.”*

⁴ Na ntá ch'ín Abraham k'uaxrjexín ch'án tí nonte Caldea. Ntá sákjuí ch'án kjuák'e ch'án tí nonte Harán. Na ntá kjuixin ik'uén it'é ch'án na ntá Dios kjuikao tí jehe ch'án tí nonte tjejorá ijie. ⁵ Kjánchó ch'ín Abraham la kuákjahya ch'án nít'q nonte hasta ni tí tsjak'e toté ch'án la chóntahya ch'án. ⁶ A ntá chrónka Dios kíxin chaxín chr'éxín tió tsjixin ts'en ch'ín Abraham la tí sín ts'axrjeníxín ch'án mé ts'ayéhe sín tíha. Kjónté naxqá kohya nijnko xjeen ch'án la mé xíkaha ntáchro Ìnchéni. ⁷ Kjaxin tsíntáchro Dios kíxin tí sín ts'axrjeníxín ch'ín Abraham la ts'ejó sín ókjé nonte, la ko sich'exón sín xrä la ko náxrjónhya ts'ejó sín noó ciento nánó. ⁸ La kjaxin xíntáchro Dios ínaá kíxin: “Ntá chr'éxín janhan sintakjasóte tí sín kjuínchekjasóte xjaan. La ntá tí xjaan mé tsokjan sín ntihi ntá tsoxraxinkakonxín sín tí janhan,” mé xíkaha ichro Dios. ⁹ Na ntá Dios mé tsíkjo ch'ín Abraham kíxin kaín tí chojni ntoa ts'axrjeníxín ch'án mé itsa sín xroye. Na ntá xíkaha tió kokjíhi xjeen ch'an Isaac ntá

* **7:3** Génesis 12.1

ch'ín Abraham mé chjéhe ch'án xjan xroye tió xétjehe xjan ijní yaon. Ntá kjaxin xikaha kjuich'e ch'ín Isaac tió chóntha ch'án xjeen ch'án Jacob, la ntá ch'ín Jacob la xikaha kjuich'e ch'án ínaá. Ntá tí sín a mé k'óna it'é tí teyó tribu tsík'axrjeníxin tí sín Israel.

⁹ Tí xjeen ch'ín Jacob mé tí sín k'uaxrjeníxinni ósé la jehe sín k'uéchjinoxínhin sín tí kichó sín José ntá kjuinchekji sín ch'án la tí sín k'uena la sákjuíko sín ch'án nó nación Egipto, kjánchó Dios mé kjuinkitsa tí jehe ch'án. ¹⁰ Dios mé kjuinchekaá ch'án tí náxrjónhya k'uékjak'e ch'án. La ko Dios kjuanjon kjuachaxin kixin imá tsongohe ch'án. Na ntá k'uíkon ch'ín Faraón tí rey kuénte nación Egipto a xikaha tí xraxjina kjuich'e ch'ín José ntá kjuanjon ch'án kjuachaxin kixin ts'etqan ch'ín José tí nación Egipto la ko tí ntqe ch'án.

¹¹ Na ntá kókjinta xrínahya la náxrjónhya k'uejó tí sín nación Egipto la ko nonte Canaán la tí sín tsík'axrjeníxinni la k'uitjahya sín nkehe sine sín. ¹² A ntá tsíkinhin ch'ín Jacob kixin tí nación Egipto mé sítóxi noa trigo ntá k'uetuénhen ch'án tí sín xjeen ch'án kixin sátsji sín ntiha tsjik'ena sín noa, la jehe tí sín a mé tí sín tsík'axrjeníxinni. Tíha mé tí saoxín sákjuí sín. ¹³ Ntá tí yóxin sákjuí sín ntiha ntá ch'ín José kjuinchenohe ch'án sín kixin tí sín a la savé ch'án. La ntá kjuakohé ch'án tí ch'ín Faraón tí sín naxa kjéhya ch'án. ¹⁴ La ntá k'uetqan tí ch'ín José kixin sátsjikakjín sín it'é ch'án Jacob la ko kaín tí sín kjéhya ch'án, mé ijnko setenta y cinco chojni kjéhya ch'án. ¹⁵ Mé xikaha kónhen la tí ch'ín Jacob mé sákjuí ch'án la kjuák'e ch'án nación Egipto ntá chr'éxín ntiha mé k'uénxin ch'án. La ntá chr'éxín kjaxin tí sín tsík'axrjeníxinni k'uénxin sín ntiha. ¹⁶ Ntá chr'éxín kuakitsjexín sín tóye tí huésoé tí ch'ín Jacob la sákjuíko sín tí nonte Siquem, la ntá ntiha mé kjuavá sín tí nonte tsík'ena ch'ín Abraham mé tsík'enehe ch'án tí xjeen ch'ín Hamor chjasin Siquem.

¹⁷ La ntá ó kuichjina tsoxitayá tí nkehe tsíntáchro Dios tsíkjo ch'ín Abraham ntá tí sín Israel imá kótsjé sín nación Egipto. ¹⁸ A ntá xrínahya í jnko ch'ín rey kjuankixin k'uetqan nación Egipto la k'uéchónhya ch'án tí ch'ín José. ¹⁹ La ntá tí ch'ín rey kjuich'iyehe ch'án tí sín naxa kjéhyani la ko kjuinchekjasóte ch'án sín. La tsík'etqan ch'án kixin tí xjan ntoa na ntá kokjíhi mé tsjik'itjí sín xjan kixin its'en xjan. ²⁰ Na ntá tí yaon a tsíkokjíhi ch'ín Moisés ntá imá kóxrjinhin Dios tí xjan a. It'é la ko iné xjan mé k'uéchóntha sín xjan iní nitjó koá ntqe sín. ²¹ Ntá chrokjuahya tsjak'ema sín xjan la ntá kjuíjkája sín xjan. La ntá xjeen tí ch'ín rey kuénte Egipto mé kjuíkakja tjan xjan la sákjuíko tjan ntqe tjan la kjuinchek'ánki tjan xjan éxí xjeen tjan xikaha. ²² La ntá tí ch'ín Moisés mé k'uitja ch'án kaín nkehe nohe tí sín Egipto a la imá tjetoan tí nkehe k'uéntáchro ch'án la ko tí nkehe k'uékjich'e ch'án.

²³ La ntá tió chóntha tí ch'ín Moisés cuarenta nánó ntá tjinkaon ch'án tsjitsjehe ch'án tí sín israelita naxa kjéhya ch'án. ²⁴ Ntaha mé k'uíkon ch'án kixin jnko chojni Egipto kjuate ijnko chojni naxa kjéhya tí jehe ch'án. Ntá chrókjuinkitsa ch'án tí sín naxa kjéhya ch'án ntá k'oyán ch'án tí ch'ín Egipto a. ²⁵ Kjuenkayáxin ch'án kixin tí sín naxa kjéhya ch'án, mé tí sín israelita, mé tsongoexín sín kixin Dios mé tsíchr'án tí jehe ch'án sinchekaá sín ch'án. Kjánchó tí sín a kjuátsoanhya sín. ²⁶ La ntá í jnko yaon tí ch'ín Moisés k'uíkon ch'án kixin yaá sín israelita tjanjonko kichó sín. La ntá tjinkaon ch'án chrókjuít'oxin ch'án kixin chrokjuanjonyha sín. La ntáchro ch'án kixin: "Jahará jnkokqá kíchuárá la, ¿nkekuénté tjánjonrá?". ²⁷ A ntá tí nkexro chóntha tí jie mé kóninkaon ch'án la kótéka ch'án tí ch'ín Moisés. Ntá ntáchro ch'án kixin: "¿Nkexro kjuanjon kjuachaxin kixin jaha k'óna juez kuénteni? ²⁸ ¿Á tjinkávan ts'oyánni kjaxinni éxí k'oyán tí ch'ín Egipto ijna ní?" ²⁹ A ntá kuínhin tí ch'ín Moisés tíha ntá tjoka sákjuí ch'án. Sákjuí ch'án tí nación Madián ntá ntiha kjuák'e ch'án éxí ijnko chojni tsíkjixin ókjé. Ntá ntaha tsíkotéhe ch'án la ko kjuich'eña ch'án yaá xjan ntoa.

³⁰ Na ntá k'uátsinka cuarenta nánó ntá tí ntéjé chjino jnq it'in Sinaí mé xrínahya k'uíkon ch'án ijnko ángel tjenkákjan tí xrohi chrikjan tí ntayoia tjeche. ³¹ Ntá tí ch'ín Moisés la chrakon ch'án kixin xikaha k'uíkon ch'án la ntá kochjinehe ch'án kixin chrótsjehe ch'án la ntá kuínhin ch'án itén Inchéni ntáchro kixin: ³² "Janhan mé Dios tinkáchónki tí sín

tsík'axrjeníxian mé Abraham, la ko Isaac, la ko Jacob," mé xíkaha ichro Dios. Ntá tí ch'ín Moisés la kjuankíxin chrakon ch'án la síxrànkä ch'án ntá í tjinkakonhya ch'án tsotsjehe ch'án. ³³ Na ntá ntáchro Ìnchéni kíxin: "Takítsje tokatá kíxin tí nonte tinkatja la nonte tjóá chóntahya jie. ³⁴ Ó k'uíkuñ kíxin tí sín kuéntana mé imá tjeotjasóte sín nación Egipto. La ó kuinhan kíxin t'lèya sín. La ntá ijie ó k'uinka kíxin tsjinkitsa sín. Méxra xrákiá jaha tsétuanhan jaha sátsjia nación Egipto,"[†] ichro Dios.

³⁵ Tí sín israelita mé kjuanoá sín tí ch'ín Moisés. Tsíntáchro sín kíxin: "¿Nkexro kjuanjon kjuachaxin kíxin jaha k'óna juez?" ichro sín. Kjánchó Dios ichr'án ch'án tí ch'ín Moisés kíxin ts'letoan ch'án la ko sinchekaá ch'án tí sín israelita kjuachaxin tí ángel k'uíkon ch'án chríkjan tí nta. ³⁶ Ntá tí ch'ín Moisés kuakitsjexín ch'án Egipto tí sín tsík'axrjeníxinni ósé. La imá itsjé kjuaxroan kjuasin ch'án la itsjé kjuakoxin ch'án tí nación Egipto, la ko tí Ntayaon Kjátse, la ko tí nteje k'uáji sín cuarenta nánó. ³⁷ Jehe tí ch'ín Moisés a mé chénka tí sín israelita kíxin: "Dios mé tsochr'án ijuko chojni tsoníxja itén Dios ts'axrjeníxin tí sín kíchuárá exí ichr'án ch'án tí janhan. Títekákonhérá tí jehe ch'án."[‡] ³⁸ Tí ch'ín Moisés mé kjuák'eko ch'án tí chojni tí k'uéjó sín tí nteje. Nta ijuko ángel mé nixjehé ch'án tí jná Sinaí la ko tí sín k'uaxrjeníxinni mé k'uáyéhé sin tí tan tjanjon kjuachón, ntá tí tan mé k'uátsínka tí jeheni ijie.

³⁹ A ntá tí sín k'uaxrjeníxinni ósé mé tjinkakonhya sín kíxin chrókuitekaon sín la kjuanoá sín tí ch'ín Moisés la ko tjinkaon ínaá chrókjan sín nación Egipto. ⁴⁰ A ntá ntáche sín ch'ín Aarón kíxin: "Tjinkaonni sich'eña ijuko dios kíxin tsinkáchónkini kíxin í noehyani nkehe kónhen tí ch'ín Moisés, tí nkexro kjuinkitsa k'uaxrjexínni nación Egipto."[§] ⁴¹ Ntá kjuínchekjanoya sín ijuko koxintáxjan la ntá k'óyán sín iko kjokehé tí nkehe tsíkjanoya a la imá kóchéhé sín k'uíkon sín tí nkehe tsík'ónaxín tja chojni. ⁴² A ntá Dios mé kuítóhe tí jehe sín kíxin tsinkáchónki sín tí konotsé siín nkajní. Tíhi mé tsíkjin ijuko nkexro k'uéchrónka itén Dios ntáchro xíkihi:

Jahará chojni Israel, ¿á k'oyánrá tí iko kjókanará tí janhan
tí cuarenta nánó k'uejorá nteje ní?

⁴³ Kja náhí, jehó tí nkehe kjuich'énará mé kjókehérá tí ko a. Kjuíkoará tí níinkoe tí dios Moloc

la ko kjaxin kjuíkoará tí konotsé kuénte dios Renfán.

A ntá tí nkehe tsíkjich'énará jahará mé xráxinkákonxírrá exí Dios kuéntará.

Méxra janhan tsakitsjexírrá tí tjejorá la tsétuanhánrrá sátsjirá chjasin Babilonia.*

Mé xíkaha ntáchro Dios ósé.

⁴⁴ Naxá k'uéjó tí sín k'uaxrjeníxinni tí nteje la chónta sín ijuko níinko kamantá chónta tí ley tsík'letoan Dios. Tíhi kjuich'eña sín exí tsík'etuñhen Dios tí ch'ín Moisés sich'eña ch'án kaín nkehe k'uíkon ch'án. ⁴⁵ Ntá tí sín tsík'axrjeníxinni mé k'uáyéhé sín tí níinko kuítóñhen sín. Ntá tí sín kjuíkao ch'ín Josué mé kjuíkao sín tí níinko tió kjuacha sín k'uáyéhé sín í jnko nonte kuénte í so chojni kuakitsje Dios, kíxin ts'áyéhé tí jehe sín. Mé xíkaha kónhen hasta tí yaon kjuankíxin k'uétoan ch'ín David. ⁴⁶ Imá kjuíncheyaon Dios tí ch'ín rey David la ntá tí ch'ín David mé tjinkaon ch'án sich'eña ch'án ijuko níinko kuénte Dios mé tí Dios k'uékinkáchónki ch'ín Jacob. ⁴⁷ Kjánchó jehe ch'án kjuich'énahya ch'án tí níinko a. Tí ch'ín Salomón mé kjuich'eña. ⁴⁸ Kjánchó Dios nkaya nkajni chrohyia tsjak'exenhen ijuko nchia tsíkjich'énará chojni itja. Ntáchro ijuko ch'ín nixja itén Dios kíxin:

⁴⁹ Janhan Dios nkaya nkajní itjén tétoanxián ntá chjasintajni tjekjen totená.

¿Xá nkexéhé tí nchia chrókjuich'énará?

¿Xá nketí chrókjuak'é chrók'ók'ánavián?

⁵⁰ ¿Xá jehya tjaná kjuít'ánavián kaín tí nkehe ní?[†]

† 7:34 7.30-34 Éxodo 3.1-10 ‡ 7:37 Deuteronomio 18.15,18 § 7:40 Éxodo 32.1 * 7:43 7.42-43 Amós 5.25-27

† 7:50 7.49-50 Isaías 66.1-2

Mé xikaha ichro Dios.

⁵¹ A ntá jahará la icha asánrá xráxín títekákonhyará. Jahará tinhínrá kjánchó ich'erá exí chojni chónhya Dios. Xráxín tjánjonkoárá Nchákuén Dios. Jahará mé tóyohárá tí sín tsík'axrjeníxirá ósé. ⁵² Tí sín tsík'axrjeníxirá kjuínchekjasóte kaín tí sín tsíchrónka itén Dios. K'óyán sín tí sín k'uéchrónka kíxin itsi tí nkexro chóntahya jié. A ntá ó kui tí nkexro a ntá jahará kjuínchekjirá ch'án ntá k'óyán sín ch'án. ⁵³ Jahará k'uayéhérá tí nkehe k'uetóan Dios senó, mé tí nkehe chrónka tí ángel, la kjónté xikaha kuítækákonhyará —ichro ch'ín Esteban.

Ik'uén ch'ín Esteban

⁵⁴ Ntá tí kuínhin tí jehe sín tí nkehe ntáchro tí ch'ín Esteban ntá imá kóníkaon sín la netaón neno sín kíxin nínkakonhen sín ch'án. ⁵⁵ A ntá ch'ín Esteban antsí chóntha ch'án Nchákuén Dios la konta ch'án nkajní k'uíkon ch'án kjuacháxién Dios la ko k'uíkon ch'án kíxin ch'ín Jesús tjexín toté ch'án nánko tja chjina Dios. ⁵⁶ Ntá ntáchro ch'ín Esteban kíxin:

—Tsjehérá kíxin k'uíkuān kíxin xitjehe nkajní la ntaha itjen tí Xjeen Dios K'óna Chojni nánko tja chjina Dios.

⁵⁷ A ntá jehe sín la k'uikjehe sín ntatsjon sín la itsen k'uíxité sín ntá sákjuí sín k'uíxitja sín ch'án ⁵⁸ sákjuíko sín ch'án ikon chjasin ntá ixro chjéhe sín ch'án. La tí sín tjanchia jié mé kuakitsje sín iké sín la k'uejo sín toté ijnko ch'ín ntasoá it'in Saulo kíxin ts'ayakonhen ch'án tí ka a. ⁵⁹ La it'e sín xro ntá ch'ín Esteban mé chrónóhe ch'án Inchéni la ntáchro ch'án kíxin:

—Inchéni Jesús takjá nchákuenná.

⁶⁰ Ntá tuénxín kjuák'exín toch'in ch'án la k'uèya ch'án itsen ntáchro ch'án kíxin:

—Inchéni jaha mé tahya kuentá tí jié kjuasin sín.

Mé xikaha ichro ch'án ntá ik'uén ch'án.

8

Ch'ín Saulo chrók'óyán ch'án tí sín tinkáchónki Jesús

¹ La tí ch'ín Saulo mé jnkokón kjuenkayáxinko ch'án tí sín k'óyán tí ch'ín Esteban.

A ntá tí yaon a na mé kjuankíxin sín ts'óyán sín tí sín tinkáchónki Jesús chjasin Jerusalén. La kaín xín tí sín na ntá kjuankíxin tinkáchónki Cristo mé xíkayéhe sín sákjuí sín nkuíxín estado Judea la ko estado Samaria. A ntá jehó tí sín tsíkjeyá Jesús mé kuítuhe sín ntiha.

² Na iso sín imá tinkáchónki Dios mé kjuavá sín ch'ín Esteban la ko tsjánkàmá sín ch'án la ko t'avéhe sín ch'án. ³ A ntá tí ch'ín Saulo la kjuankíxin kóníkkakonhen ch'án tí sín tinkáchónki Cristo. K'uíxenhen ch'án jnkojnkó jnkojnkó ntøe sín la itsé ch'án tí sín ntoa la ko tí chojni chjin. La ntá kuinkánkákjen ch'án sín sákjuíko ch'án sín kíxin ts'ejóchjina sín.

Kjuako sín itan jína tí estado Samaria

⁴ A ntá tí sín sákjuíxín chjasin Jerusalén mé xritjako sín nkexrí tí tan tsaáxinni nkuíxín tí sákjuí sín. ⁵ La ijnko ch'ín it'in Felipe mé sákjuí ch'án ijnko chjasin estado Samaria la kjuankíxin ch'án chrónka ch'án itan kuénte Cristo. ⁶ Na ntá nchónhya chojni kójnkotsé ntiha la kaín sín kuínhin sín jína tí nkehe ntáchro ch'ín Felipe kíxin ó k'uíkon sín tí kjuaxroan kjuákoxin ch'án. ⁷ Itsjé chojni chóntha nchákuén tí jínahya mé kuítuhe sín jína la tí nchákuén tí jínahya k'óyako k'uaxrjexín tí jehe sín. La nchónhya tí sín chóntha chin xitjahya itji la ko tí sín sítéxénká toté mé kuítuhe sín jína. ⁸ A ntá imá kóchéhé kaín tí sín siín chjasin ntiha.

⁹ Tí chjasin a mé kjuák'e ijnko ch'ín it'in Simón mé ijnko ch'ín ósé mé k'uékjinhexroān ch'án. K'uékjich'yehe ch'án tí sín estado Samaria ntáchro ch'án kíxin ijnko chojni imá tjetoan tí jehe ch'án. ¹⁰ La kaín tí sín ntiha k'uejó sín kuínhin sín jína, mé tí chánjan ntsíntsí hasta tí chojni imá táda la k'uéntáchro sín kíxin:

—Tí ch'ín i imá chóntha ch'án tí kjuachaxin kuènte Dios —ichro sín.

¹¹ K'uékitekakonhen sín ch'án kíxin k'uékjinchenxroan ch'án k'uékjich'iyexín ch'án sín itsjé nánó. ¹² Ntá tió kuítekaon sín tí tan jína kjuako ch'ín Felipe kuènte tí kjuachaxin kuènte Dios la ko Jesucristo la ntá chojni ntoa la ko chojni chjin mé kuíkite sín. ¹³ A ntá kjaxin tí ch'ín Simón, mé kuítekaon ch'án la kuíkite ch'án, koí ch'án. Ntá kjuankíxin k'uájiko ch'án tí ch'ín Felipe la imá chrakon ch'án kíxin k'uíkon ch'án tí kjuaxroan jié kjuasin tí ch'ín Felipe.

¹⁴ A ntá tí sín apóstol, mé tí sín tsíkitohe chjasin Jerusalén, kuínhin sín kíxin itsjé tí sín estado Samaria ó kuítekaon sín itén Dios. Ntá k'uëtuënen sín ch'ín Pedro la ko ch'ín Juan sátsji sín ntiha. ¹⁵ Ntá tió kjuíji sín ntá kjuanchehe sín Dios kíxin tí sín ntiha tinkáchónki Cristo chrók'uáyéhé sín Nchäkuen Dios ¹⁶ kíxin nijnko tí jehe sín ntiha naxa tsík'ayéhya sín Nchäkuen Dios. Jehó tsíkikitexín sín ihnié Inchéni Jesús. ¹⁷ Ntá tí ch'ín Pedro la ko tí ch'ín Juan mé k'uejotja itja sín chrítaón kja tí sín a la ntá ó k'uáyéhé sín Nchäkuen Dios.

¹⁸ Na ntá tí ch'ín Simón mé k'uíkon ch'án kíxin tí sín apóstol k'uejotja itja sín chrítaón kja tí sín a ntá k'uáyéhé tí sín a Nchäkuen Dios. La ntá xróxin ch'án chichaon ¹⁹ la ntáchro ch'án kíxin:

—Chjehéni jeheni tí kjuachaxin kíxin kjaxin jeheni chrókjuak'etja itjani chrítaón ikja jnkojín chojni ntá chrók'uáyéhé sín Nchäkuen Dios —ichro ch'án.

²⁰ Ntá ntáchro ch'ín Pedro kíxin:

—Jaha la ko tí chichäkoán ts'itjáyankoa kíxin tjenkayáxian kíxin chrók'uëna tí kjuachaxin kuènte Dios. ²¹ Jaha chontahya kjuachaxin ts'ixenhen tí xrä a kíxin ó nohe Dios kíxin jaha la tjuáhya asán. ²² Méxrä tsitohé tí ijiá la chrónóhé Dios kíxin ách'e tsjakjìnhán ch'án tí jie tjenkayáxian. ²³ Ó t'íkuän kíxin imá chjinoxínhin asán la ko nchónhya jie chonta —ichro ch'ín Pedro.

²⁴ La ntá ch'ín Simón kjuátëhe ch'án ntáchro ch'án kíxin:

—Nixjehérá Inchéni kíxin tí janhan kíxin chrókónnahya tí janhan éxi tí ntáchrora —ichro ch'án.

²⁵ Ntá kjuixin chrónka tí sín apóstol tí tan kuènte Dios ntiha ntá sákjuí sín kjuako sín tí tan tsjanjon kjuachón nchónhya ti chjasin ntsíntsí estado Samaria. Ntá ikjan sín chjasin Jerusalén.

Tí ch'ín Felipe la ko tí ch'ín tsíkjixín nación Etiopía

²⁶ A ntá kjuixin tíha ntá ijnko ángel kuènte Inchéni mé ntáche tí ch'ín Felipe kíxin:

—T'ínkajtjen sájtia nó sur tsoxeta tí ntja t'inkajinxín chjasin Jerusalén hasta chjasin Gaza —ichro tí ch'ín ángel.

Na ntá tí ntja a mé ijnko ntja t'atsínka nó nteje. ²⁷ Na ntá tí ch'ín Felipe k'uínkatjen sákjuí tí ntja. La ntiha xrínahya xeta ch'án ijnko chojni tsíkjixín nó nación Etiopía. Jehe ch'án mé ijnko chojni eunuco mé tja ch'án siín chichäkoen tí tjan reina Candace t'ëtuënen tí nación Etiopía. Jehe ch'án sátsíkji ch'án chjasin Jerusalén xraxinkakonxín ch'án Dios.

²⁸ A ntá tí ch'ín a la xíkjan ch'án ínaá chjasén ch'án. Kjuák'exenhen ch'án ijnko carro la tjenchekuáxin ch'án ijnko xroon tsíkjín ch'ín Isaías, ijnko nkexro k'uéchrónka itén Dios.

²⁹ La ntá tí Nchäkuen Dios mé k'uëtuënen tí ch'ín Felipe ntáchro kíxin:

—Sájtia tóchjina antsí tí tjen tí carro.

³⁰ Ntá kóchjinehe tí ch'ín Felipe tí tjen tí carro a, la ntá kuínhin ch'án kíxin tjenchekuáxin ti ch'ín a tí xroon tsíkjín ch'ín Isaías. La ntá kjuanchankíhi ch'án kíxin:

—¿Á tiénxian tí nkehe tjenchekuáxian méhé?

³¹ La ntá kjuátëhe tí ch'ín a ntáchro ch'án kíxin:

—¿Nkexrí chrókuijanxian kíxin kohya nkexro tsjinkitsana tsochrónkaxín nkexrí t'axrjexín tíha? —ichro ch'án.

Ntá kjuanchia ch'án kíxin tí ch'ín Felipe ts'it'ótjen la tsjak'etjaxín chjinaxón ti tjen ch'án.

³² Na tí xroon itén Dios tjenchekuáxin ch'án mé tíhi:
Jehe ch'án mé sákjuiko sín éxí ijnko kolélo kjuiko sín ts'óyán sín.
La éxí ijnko kolélo tsjánkahya tió kjínhin sín kaxrēe va
mé xikaha jehe ch'án ninkehó xítjéehya ir'va ch'án.

³³ K'uíkon sín ch'án éxí ijnko chojni chónta jié la ntoáhya kjuínchekjasóte sín ch'án.
Kohya nkexro tsjacha tsochrónka kuènte tí sín chrók'uaxrjeníxin ch'án
kíxin jehe ch'án la k'uenxín ch'án chjasintajni.*
Mé xikaha chrónka tí xroon itén Dios.

³⁴ A ntá tí ch'ín eunuco mé kjuanchankíhi ch'án tí ch'ín Felipe ntáchro ch'án kíxin:
—Tsotsenkávan chronka nkexro tsonhen tíha. ¿Á jehe ch'án tsønhen tíha o á ókjé
nkexro ní? —mé xikaha kjuanchankí ch'án.

³⁵ La ntá tí ch'ín Felipe kjuankíxin chrónka ch'án kuènte tí nkehe tjenchekuáxin tí ch'ín
a la chrónka ch'án tí tan jína kuènte Jesús. ³⁶ A ntá xrínahya kjuíji sín tí tjiá ntá, ntá ntáchro
tí ch'ín eunuco kíxin:

—Tsjehé tjiá ntá. ¿Á xitjahya chrókuíkitena? —ichro ch'án.

³⁷ Na ntá ntáchro tí ch'ín Felipe kíxin:

—Ti kuítekávan kaín ąsán la kjá jína tsikitia.

La ntá kjuátehe tí ch'ín a, ntáchro ch'án kíxin:

—Títekávan kíxin tí Jesucristo la Xjeen Dios —ichro ch'án.

³⁸ La ntá tí ch'ín tsíkjixín Etiopía a k'uetoan ch'án tsochónhen tí carro a la ntá yói sín mé
tí ch'ín Felipe la ko tí ch'ín tsíkjixín Etiopía mé k'uínkajin sín ntá kjuiánkí sín ntá la tí ch'ín
Felipe kuíkite ch'án tí ch'ín a. ³⁹ La ntá kjuixin k'uaxrjenkí sín ntá la ntá tí Nchakuen
Inchéni sátsíkjiko tí ch'ín Felipe ókjé. A ntá k'uíkonhya kíchó sín ínaá. Ntá kjónté xikaha la tí
ch'ín eunuco sákjuí ch'án la ąntsí chéhé ąsén ch'án. ⁴⁰ A ntá tí ch'ín Felipe xrínahya kjuíji
chjasin Azoto. Ntá nkák'atsínska ch'án la chjasin la í chjasin la chrónka ch'án itén Inchéni
kíxin nkexrí tsaáxin sín hasta kjuíji ch'án chjasin Cesarea a.

9

Tí nkehe kónhen ch'ín Saulo (Hch. 22.6-16; 26.12-18)

¹ A ntá tí ch'ín Saulo la imá tjinkaon ch'án chrók'óyán ch'án tí sín tinkáchónki Inchéni
Jesús. Méxra sákjuitsjehe ch'án tí ch'ín nchat'á t'etoan. ² Ntá kjuanchia ch'án ijnko xroon
kíxin ts'áyéhe ch'án kjuachaxin kíxin sátsji ch'án tí ninko chjasin Damasco tsjeyá ch'án tí
sín kuákja ntia nixin mé tí sín ntoa la ko tí sichtjin la tsotsé ch'án sín la ntá sátsjiko ch'án sín
chjasin Jerusalén. ³ La ntá kjuíji ch'án chjinaxón chjasin Damasco, a ntá xrínahya titaya
ikui ijnko xrohi t'inkaséyan kujixin nkaya nkajní k'uuantatjen ch'án a. ⁴ A ntá ch'ín Saulo
mé kjuítsínska ch'án nonte, a ntá kuínhin ch'án nixja ijnko nkexro kíxin:

—Saulo, Saulo, ¿nkekuénte ninkákonna xritjéyá tí janhan?

⁵ A ntá ch'ín Saulo kjuanchankí ch'án kíxin:

—¿Xá nkexro jaha?

Ntá tí tan mé kjuátehe, ntáchro kíxin:

—Janhan mé Jesús, mé tí nkexro xritjéyá jaha. ⁶ T'aya sájtja. T'ixenhen tí chjasin
Damasco, ntá ntiha mé tsinhín nkehe sicht'e —ichro tí ch'ín Jesús a.

⁷ La ntá sín k'uájiko ch'ín Saulo la imá chrakon sín. Kuínhin sín tí itén tí nkexro kjánchó
k'uíkonhya sín ninkexró. ⁸ La ntá tuénxín k'uáya ch'ín Saulo ntá kuakitjenki ch'án ikon
ch'án kjánchó t'ikonya ch'án. A ntá sín xriko ch'án tinkátséhe sín itja ch'án sákjuiko
sín ch'án chjasin Damasco. ⁹ A ntá ntiha kjuák'e ch'án la iní yaon k'uíkonhya ch'án la ko
kjaxin kjónehya ch'án la ko ninkehó k'uíhya ch'án.

* ^{8:33} 8.32-33 Isaías 53.7-8

10 A ntá chjasin Damasco mé kjuák'e ijkno ch'ín tinkáchónki Ìnchéni it'in Ananías. La ntá titàya k'uikuèn ch'án Ìnchéni ntáchro kíxin:

—Ananías.

A ntá ch'ín Ananías mé kjuátehe ch'án kíxin:

—Ntihi tjenni, Ìnchéni.

11 Ntá ntáchro Ìnchéni kíxin:

—T'inkatjen sájtia tí ntja it'in Ntja Ntoí. Ntá tió tsjasán ntøe ch'ín Judas tjançankíhí sín á ntahya itjen ijkno ch'ín tsíkjixin chjasin Tarso me it'in ch'án Saulo. Jehe ch'án mé tjechrónóana ch'án. **12** A ntá titàya k'uikuèn ch'án kíxin tsjiji ijkno ch'ín it'in Ananías ts'ixenhen ch'án tsjak'etja tja ch'án chrítaón kja tí jehe ch'án kíxin xik'ikon ch'án ínaá —ichro Ìnchéni.

13 Ntá kuínhin ch'ín Ananías tíha ntá ntáchro ch'án kíxin:

—Ìnchéni náhí, tsjihyani kíxin ó kuínhinni chrónka nchónhya chojni kíxin nkexrí xéhe tí ch'ín a. Imá tsjé nkehe jehya jína kjuich'ehe ch'án tí sín kuítekaon tí jaha chjasin Jerusalén.

14 A ntá jie la ó kjui ch'án ntihi kíxin tsík'ayéhé ch'án kjuachaxin kuénte nchåt'a t'etqan kíxin tsotsé ch'án kaín tí sín tinkáchónki ihnjá.

15 Kjánchó Ìnchéni ntáchro kíxin:

—Sájtia. Janhan kjuéyá tí ch'ín a kíxin tsjako ch'án tanná. Tsjakohé ch'án tí sín ókjé nación la ko tí sín rey la ko kjaxin tí sín israelita. **16** Janhan tsjákohá ch'án kíxin nchónhya tsjasóte ch'án kíxin tsinkáchónkina ch'án.

17 A ntá ch'ín Ananías sákjuí ch'án tí nchia itjen ch'ín Saulo la ntá k'uíxenhen ch'án. La ntá kjuak'etja tja ch'án chrítaón ikja tí ch'ín Saulo la ntáchro ch'án kíxin:

—Kichóni Saulo, Ìnchéni Jesús, tí nkexro k'uíkuán tí ntja k'uinkaxian, mé k'uëtuanna kjuha kíxin sintak'ikuán ínaá la ko ts'ayéhé Nchåkuen ch'án —ichro tí ch'ín Ananías a.

18 Ntá tuénxin k'uanotjenxin ikon ch'ín Saulo ijkno nkehe éxi kjoe koche xikaha. Ntá xik'ikon ch'án ínaá. La ntá k'uíntatjen ch'án la ko kuíkite ch'án. **19** La ntá chr'éxin ntá kjóne ch'án la ntá ikjan əsén ch'án ínaá. Ntá kuítøhe ch'án iso yaon k'uéjoko ch'án tí sín tinkáchónki Ìnchéni chjasin Damasco.

Kjuako ch'ín Saulo chjasin Damasco

20 Na ntá kjuankíxin ch'ín Saulo kjuakoxin ch'án iso nñjko Israel kíxin Jesúus mé Xjœen Dios. **21** La kaín tí sín tjejótinhin imá chrakon sín la ntáchro sín kíxin:

—¿Á jehya tí ch'ín i tjinkaon sinchek'itjáyan ch'án kaín tí chojni tinkáchónki Jesúus chjasin Jerusalén? ¿Á jehya tí xrä a kjuixin ch'án ntihi kíxin tsotsé ch'án sín la sátsjiko ch'án sín tí tjejó tí sín nchåt'a t'etqan? —ichro sín.

22 Kjánchó əntsí má fuerte kjuako ch'ín Saulo kíxin chaxín tí ch'ín Jesúus mé tí Cristo. La tí sín judío k'uéjó chjasin Damasco kjuachahya kjuachaxin sín ch'án.

Kjuachahya tí sín judío chrótsé sín tí ch'ín Saulo

23 Na ntá ó k'uátsína nchónhya yaon ntá tí sín judío kjuenkayáxin sín nkexrí chrók'oyán sín tí ch'ín Saulo. **24** A ntá ó kuínhin ch'án nkehe kjuenkayáxin sín. A ntá nchåkotjin la ko tie tjejóchónhen tí sín chrók'oyán tí jehe ch'án tí ntója ts'axrjexin ch'án chjasin. **25** A ntá tí sín tinkáchónki Ìnchéni mé kjuak'enkaya sín tí ch'ín Saulo ijkno ntaxra jié ijkno tie. Ntá kjuinkajinxin sín tí ntaxra tjenkaya tí ch'ín Saulo nóton tí tjet'o tsík'antatjen tí chjasin a. Ntá kuaá ch'án.

Ch'ín Saulo sákjuí chjasin Jerusalén

26 Ntá tí kjuíji ch'ín Saulo chjasin Jerusalén ntá tjinkaon ch'án chrókójnokséko ch'án tí sín tinkáchónki Ìnchéni. Kjánchó kaín sín chrakonhen sín ch'án kíxin kuítekakonhya sín kíxin á chrókóchaxin kjaxin ch'án tinkáchónki ch'án Ìnchéni. **27** A ntá ch'ín Bernabé mé sákjuiko ch'án tí ch'ín Saulo ti tjejó tí sín apóstol la ntá chrónka ch'án kíxin ch'ín Saulo mé

tsík'ikon ch'án Ìnchéni tí nt̄ia sákjuí ch'án ntá Ìnchéni mé nixjehé ch'án. Méxra chjasin Damasco k'uékjako ch'án ihnié Ìnchéni la chrakonhya ch'án. ²⁸ Méxra ch'ín Saulo kuítóhe ch'án chjasin Jerusalén la ko k'uájiko ch'án tí sín a. La chrakonhya ch'án kjuako ch'án kjuachaxién ihnié Ìnchéni Jesús. ²⁹ La ikjo ch'án tí sín judío nixja nkìva griego. A ntá jehe sín la tjinkaon sín chrók'óyán sín tí jehe ch'án. ³⁰ A ntá tí sín kíchó ni tinkáchónki Cristo mé tsíkinhin sín nkehe chrókónhen ch'án la ntá sákjuíko sín ch'án tí chjasin Cesarea la k'uëtuenhen sín ch'án sátsji ch'án chjasin Tarso.

³¹ Na ntá tí sín tinkáchónki Ìnchéni kuenté estado Judea, la ko estado Galilea, la ko estado Samaria la kjuaxróxin k'uéjó sín la qantsí má tinkáchónki sín Ìnchéni. K'uéchonta sín kjuasayé Ìnchéni la ko tí Nchakuen Dios kjuinkitsa sín la ntá qantsí má sítinkákótsjé sín.

Ch'ín Eneas kuítóhe ch'án jína

³² Na ntá tí ch'ín Pedro xrítsjehe ch'án kaín tí sín tinkáchónki Ìnchéni. Kjaxin sákjuítsjehe ch'án tí sín kíchó ni tjejó chjasin Lida. ³³ Ntiha mé k'uitja ch'án ijkno ch'ín it'in Eneas. Ijní nánó tjetsíkaták'á ch'án cama kíxin tsík'en tqeté ch'án. ³⁴ Na ntá ntáchro ch'ín Pedro kíxin:

—Eneas, Jesucristo mé sintakitoha jína ijie. T'inkatjen tjatsìyan camá —ichro ch'án.

Na ntá ch'ín Eneas tuénxín k'uíntatjen ch'án. ³⁵ La kaín tí sín siín chjasin Lida la ko chjasin Sarón k'uíkon sín kíxin kuítóhe ch'án jína la ntá kjaxin sín kuinkáchónki sín Ìnchéni.

Ó xechón tjan Dorcas

³⁶ A ntá tí yaon a mé kjuák'e ijkno tjan chjasin Jope tinkáchónki tjan Ìnchéni mé it'in tjan Tabita. Ntá nkìva griego la mé t'axrjexín kíxin Dorcas. A ntá tí tjan a mé jína kjuúch'e tjan tí k'uékjak'e tjan la kjuinkitsa tjan tí chojni nòa. ³⁷ Ntá ijkno yaon imá kóníhi tjan ntá ik'uén tjan. La ntá kjuinchek'onti sín cuérpoé tjan la ntá tí yóxin piso noi kjuák'e sín tjan. ³⁸ Tí chjasin Jope mé chjino tí chjasin Lida la mé ntiha kjuák'e ch'ín Pedro. A ntá tí sín tinkáchónki Ìnchéni mé nohe sín kíxin ntiha tjen ch'án. Ntá ichr'án sín iyó chojni tsontáche sín ch'án kíxin tjoka itsji ch'án í sinchexrjenhyá ch'án, tsixro sín.

³⁹ Na ntá sákjuíko sín ch'ín Pedro. Ntá kjuúji sín ntiha ntá tuénxín sákjuíko sín ch'án tí tjen tí cuérpoé tí tjan tsík'en. La ntaha tjejó kaín chojni chjin k'án imá tsjánka sín. La kjuako sín tí iké sín tsíkjón tí tjan Dorcas tí naxa kjuák'e tjan. ⁴⁰ A ntá k'uëtoan ch'ín Pedro kíxin kaín sín ts'axrje sín ntója. Na ntá kjuák'exín toch'in ch'án nixjehé ch'án Dios. Ntá komá ch'án tí tjan tsík'en ntá ntáchro ch'án kíxin:

—Tabita, t'áya.

Ntá kuakitjenki tjan ikon tjan ntá k'uíxon tjan kíxin ntaha itjen ch'ín Pedro ntá k'uàya tjan, kjuák'etjaxin tjan. ⁴¹ A ntá itsé ch'án itja tjan la k'uíntatjen tjan. La ntá k'uíyehe ch'án kaín tí sín tinkáchónki Ìnchéni la ko kjaxin kaín chojni chjin k'án kíxin ntá ts'ikón sín kíxin ó xíxechón tjan. ⁴² Na ntá kaín sín siín chjasin Jope mé kónóhe sín tí kjuaxroan kjuúch'e ch'ín Pedro ntá itsjé sín kuinkáchónki Ìnchéni. ⁴³ A ntá ch'ín Pedro kuítóhe ch'án itsjé yaon tí chjasin a la kjuák'e ch'án ntøe ch'ín Simón, ijkno ch'ín nchentá tjoé iko.

10

Ch'ín Pedro la ko ch'ín Cornelio

¹ Chjasin Cesarea kjuák'e ijkno ch'ín it'in ch'án Cornelio. Jehe ch'án mé capitán k'uëtuenhen tí sín soldado italiano. ² Tí ch'ín a la imá jína ch'án la kaín tí sín kjéhya ch'án mé imá xraxinkaon sín Dios. Kjaxin kjuanjón ch'án nchónhya chichaon kíxin tjinkaon ch'án tsjinkitsa tí sín judío la ko xráxín nixjehé ch'án Dios. ³ La ntá ijkno yaon las tres kónjín titaya k'uíkuèn ch'án ijkno ángel kuénte Dios k'uíxenhen tí tjen ch'án ntáchro kíxin:
—Cornelio.

⁴ A ntá tí ch'ín Cornelio komá ch'án tí ángel la chrakon ch'án kjuanchankíhi ch'án kíxin:

—¿Nkehe tjinkávan jaha? —ichro ch'án.

Ntá ntáchro tí ángel kíxin:

—Dios kóxrjinhín kíxin tí nixjehé ch'án la ko tí jína ch'e tjínkitsa tí sín nòa. ⁵ Ntá jaha téetuēnhén jnkojín chojni sátsji chjasin Jope kíxin tsjikakjín sín ch'ín Simón kjaxin it'in ch'án Pedro. ⁶ Itjen ch'án ntøe ijkno ch'ín kjaxin it'in Simón. Tí ch'ín a mé nchentá tjoé iko. Mé tjen ntøe ch'án chjinaxón tí ntayaon a.

⁷ Ntá tió sákui tí ángel nixjehé ch'ín Cornelio la ntá jehe ch'an k'uíyehé ch'án yaá sín ch'ehe ch'án xrä la ko ijkno ch'ín soldado kjaxin xraxinkaon Dios, la chónthehe sín kjuasáya kíchó sín. ⁸ Ntá kjuixin chénka ch'án kaín sín tí nkehe k'uíkon ch'án ntá k'uetoēhen ch'án sín sátsji sín chjasin Jope.

⁹ Í jnko yaon chr'éxín chjina chonkíxin tjejóyá sín ntia chjino chjasin Jope ntá ch'ín Pedro mé k'uit'ótjen ch'án chrítaón nchia kíxin ntaha nixjexín ch'án Dios. ¹⁰ Ntá imá k'uén ch'án kjinta la tjinkaon ch'án chrókjóne ch'án. Nachrohe tsochján tí nkehe sine ch'án la ntá titayá k'uíkuén ch'án nkehe ¹¹ mé k'uíkon ch'án kíxin xitjehé nkaya nkajní ntá ntiha k'uínkajinxin ijkno ka jié. Kanoé punté tí ka tjejóte. ¹² Tí nkaxenhen tí ka a tjinká ko noó toté la ko konche la ko kaín ko xritjaká. ¹³ Ntá kuínhin ch'án nixja ijkno nkexro ntáchro ch'án kíxin:

—Pedro, t'aya, t'oyán tí ko a ntá inte.

¹⁴ Ntá ch'ín Pedro kjuátehe ch'án kíxin:

—Nahí, Inchéni. Nunca nehyani tí nkehe tjuáhya.

¹⁵ Ntá kjuátehe tí tan ínaá ntáchro kíxin:

—Tí nkehe ó kjuíncchetjóá Dios. La ntáchrohya kíxin tjuáhya —ichro ch'án.

¹⁶ Xikaha kónhen iní veces ntá tuénxín sákui tí ka nkaya nkajní. ¹⁷ Ntá ch'ín Pedro naxa tjenkayáxin ch'án nkehe t'axrjexín tí k'uíkon ch'án la xrínahya ó kui tí sín ichr'án ch'ín Cornelio ntója nchia. Ó tsíkjanchankí sín nketí tjen ntøe ch'ín Simón. ¹⁸ Ntá kjuanchankí sín itsen kíxin:

—¿Á ntihi tjen ch'ín Simón kjaxin it'in ch'án Pedro?

¹⁹ Naxa tjenkayáxin tí ch'ín Pedro tí nkehe k'uíkon ch'án ntá Nchákuén Dios chrónka kíxin:

—Tsjehe ó kui iní sín xritjeyá tí jaha. ²⁰ T'aya t'inkajián sátkikoá sín a. Tóxakuanhya jaha, janhan mé kuétuanhán sín ikui sín —ichro Nchákuén Dios.

²¹ Ntá k'uínkajin tí ch'ín Pedro tí tjejó tí sín a ntá ntáchro ch'án kíxin:

—Janhan tí nkexro xritjeyará. ¿Nkehe tí tsónhen tjinkáonrá?

²² Ntá kjuátehe sín ntáchro sín kíxin:

—K'uetoan tí ch'ín capitán Cornelio ikuini ntihi. Jehe ch'án me ijkno chojni imá jína la ko xraxinkaon ch'án Dios. Kaín tí sín judío tjikosáyehe ch'án la ko tjuéhe sín ch'án. Ijkno ángel kuénte Dios mé nixjehé ch'án chénka ch'án kíxin chrók'uíyehé ch'án tí jaha kíxin chrókjua ntøe ch'án la ntá chrókuinhin ch'án tí nkehe tsontáchrue —mé xikaha chrónka sín.

²³ Na ntá tí ch'ín Pedro kjuajon kjuachaxin kíxin ntahó chrók'ok'éhe sín ti tie a. Ntá kóyaon ntá sákuijko ch'án sín. Kjaxin iso sín tinkáchónki Inchéni tjejó chjasin Jope mé sákuijko toxin sín.

²⁴ Na ntá í jnko yaon a kjuíji sín chjasin Cesarea. Ntiha chónhen tí ch'ín Cornelio la ko kjaxin kaín sín kjéhya ch'án la ko tí sín chóxin ch'án. K'uíyehé ch'án tí jehe sín kíxin tsinhin sín. ²⁵ Ntá tió kjuíji tí ch'ín Pedro ntøe tí ch'ín Cornelio ntá k'uaxrjexín ch'án nchia nixjehé kíchó sín. Ntá kjuák'ejexín toch'in tí ch'ín Cornelio nkayakon tí ch'ín Pedro la kjuikosáyehe ch'án. ²⁶ A ntá tí ch'ín Pedro kjuínchek'inkatjen ch'án tí ch'ín a la ntáchro ch'án kíxin:

—T'inkatjen. Tjak'exián totá. Janhan mé ijkno chojni éxi tí jaha.

²⁷ A ntá kjuixin ikjo sín la ntá k'uíxenhen sín ntøe ch'án la ntá k'uíkon tí ch'ín Pedro kíxin nchónhya chojni tsíkjnkotsé ntiha. ²⁸ Ntá ntáchro ch'án kíxin:

—Jahará nohará kíxin tí jeheni judíoni chóntahyani kjuachaxin tsojnkotsékoní chojni ókjé la ko chóntahyani kjuachaxin ts'ixenhenni ntøe chojni ókjé. Kjánchó Dios kjuakona kíxin xitjahya tsontáxrjan kíxin tjuáhya nijnko chojni. ²⁹ Méxra tió k'uíyanará la tjoka k'uinka. Tjinkavan chrókónona kíxin nkekuènte k'uíyanará.

³⁰ Ntá kjuatéhe ch'ín Cornelio ntáchro ch'án kíxin:

—K'uátsínska tí noó yaon ntá tí hora kjuák'eni ntihi ntøeni kjónehyani la nixjehéni Dios. Ntá xrínahya k'uíkonni ijkno chojni chóntha iké tjákini. ³¹ La ntáchro ch'án kíxin: “Cornelio, ó kuínhin Dios tí nkehe nixjehé ch'án la ó nohe ch'án kíxin imá tjinkitsa jaha tí chojni nòa. ³² Méxra tétuéñhén chojni sátsji chjasin Jope kíxin tsjikakjín sín tí ch'ín Simón mé kjaxin it'in ch'án Pedro. Itjen ch'án ntøe ijkno ch'ín mé kjaxin it'in Simón nchentá ch'án tjoé iko. Chjino tí ntayaon a itjen ntøe ch'án,” ichro tí ángel. ³³ Méxra xikaha tjoka ichr'ánni sín tsíkjayá sín tí jaha. Jína k'uinka ntøeni. Ntá ijie ó nohe Dios kíxin kaín ni tjinkaonni tsinhinni nkehe tí k'uëtuñhan ñinchéni tsochronka tsinhinni.

Ch'ín Pedro kjuakohe ch'ín Cornelio ntøe ch'án

³⁴ Ntá ntáchro ch'ín Pedro kíxin:

—Ijie ó t'íkuán kíxin jnkokón t'íkon Dios kaín xín chojni. ³⁵ Tí nkexro kaín nación titekaon la chónthehe kjuasáyé Dios la mé tóxrjinhín ch'án. ³⁶ Dios mé nixjehé ch'án tí sín k'uaxrjeníxin tí sín Israel la kuínhin sín tí tan tjanjon kjuaxróxin chrónka ñinchéni Jesucristo. Jehe ch'án mé ñinché ch'án kaín nkehe. ³⁷ Jahará ó nohará jína kaín tí nkehe tsíkónen nkuíxín tí tjejó tí sín judío mé kjuankíxin estado Galilea tió kjuixin kjuako ch'ín Juan kíxin t'ichjánxín tsikite chojni. ³⁸ Jahará ó nohará kíxin Dios kjuanjon kjuachaxién ch'án la ko Nchakuen ch'án k'uáyéhe tí ch'ín Jesús tí nkexro tsíkjixín chjasin Nazaret. Ó nohará kíxin tí ch'ín Jesús mé k'uáji ch'án ntiha la tí nkehe jína kjuich'e ch'án kíxin kjuinchekitohe ch'án jína kaín chojni tjasótexín kaín tí kjuachaxién tí jinahya. Mé xikaha jína kjuich'e ch'án kíxin Dios tjeko tí jehe ch'án. ³⁹ A ntá jeheni mé chaxín k'uíkonni kaín tí nkehe kjuich'e tí ch'ín Jesús tí estado Judea la ko tí chjasin Jerusalén. A ntá chr'éxín kjuak'enkani sín ch'án ijkno ntacruz la k'óyán sín ch'án. ⁴⁰ A ntá Dios kjuinchexechón ch'án tí níxín yaon la kjuanjon ch'án kjuachaxin kíxin k'uíkonni ch'án ínaá. ⁴¹ Jehya kíxin kaín chojni chrók'uikon sín ch'án. Náhí. Jehó tí sín tsíkjayá Dios kíxin ts'íkon chaxín xechón ch'án. Jeheni kjónekoni ch'án la ko k'uíkäoni ch'án tió xíxechón ch'án ínaá. ⁴² K'uetoan ch'án kíxin jeheni tsjakoheni chojni la tsochrónkani kíxin jehe ch'án mé tí nkexro juez sinchekitoexín ijié tí sín tjejóchón la ko tí sín ó tsík'en. ⁴³ Kaín tí sín k'uéchrónka itén Dios mé chrónka sín kíxin jnkojnko tí sín tinkáchónki Jesús mé ts'óxíka ch'án ijié sín —ichro ch'ín Pedro.

Tí sín jehya judío k'uáyéhe sín Nchakuen Dios

⁴⁴ Naxa tjenixja ch'ín Pedro ntá kaín tí sín tjejótinhin tí nkehe kjuako ch'án k'uáyéhe sín tí Nchakuen Dios. ⁴⁵ Ntá tí sín judío kjuikotoxin ch'ín Pedro la chrakon sín kíxin Dios mé kjuanjon Nchakuen ch'án, kjaxin k'uáyéhe tí sín jehya judío. ⁴⁶ Méxra kuínhin sín nixja sín jnkojnko nkiva ókjé la ko kuínhin sín tjanchehe sín Dios kjuasáya. ⁴⁷ Ntá ntáchro ch'ín Pedro kíxin:

—Jehe sín ó k'uáyéhe sín tí Nchakuen Dios xikaha jeheni. Ntá chrókjuanjonni kjuachaxin kíxin tsikite sín —ichro ch'án.

⁴⁸ La ntá k'uetoan ch'ín Pedro kíxin tsikite kaín sín kjuachaxién ihnié Jesucristo. Ntá tí sín kuíkite mé kjuanchia sín kíxin chrókuitohe tí ch'ín Pedro ntiha iso yaon.

¹ Na ntá tí sín tsíkjeyá Ìnchéni la ko kaín tí sín tinkáchónki Ìnchéni k'uéjó estado Judea mé kuínhin sín kíxin tí sín jehya judío ó tinkáchónki sín itén Dios. ² Na ntá ch'ín Pedro ikjan ch'án chjasin Jerusalén. La ntá iso tí sín judío tinkáchónki sín Ìnchéni tjonta sín ch'án. ³ Kjuanchankíhi sín ch'án ntáchro sín kíxin:

—¿Nkekuénté kjuitsjehé tí sín jehya judío, la ko kjóntekoa tí jehe sín? —mé xíkaha kjuanchankí sín.

⁴ Ntá tí ch'ín Pedro kjuankíxin ch'án chrónka ch'án desde tí xranksixín kaín nkehe tsíkónhen ch'án. Ntáchro ch'án kíxin:

⁵ —Janhan mé kjuak'é chjasin Jope kjuak'énixjahá Dios. La ntá titaya k'uíkuén ijnko ka jié k'uínkajinxin nkaya nkajní. Kanoé punté tí ka tjejóte la kjuák'e chjino tí tjén. ⁶ Ntá tsjahá jína tí nkehe la k'uíkuán kíxin tí nkaxenhen tí ka tjinká ko noó toté la ko iko nteje la ko konche la ko iko xritjaká. ⁷ La kjaxin kuinhán itén ijnko nkexro nixjana ntáchro ch'án kíxin: “Pedro, t'aya t'oyán tí ko a ntá inte.” ⁸ A ntá kjuátahá kíxin: “Nahí, Ìnchéni. Nunca nehyani tí nkehe tjuáhya.” ⁹ A ntá kjuátahé tí tan kuixin nkaya nkajní a ínaá chrónka kíxin: “Tí nkehe a mé ó kjuinchetjóá Dios. La ntáchrohya kíxin tjuáhya,” ichro ch'án. ¹⁰ Xíkaha kónhen iní veces. Ntá sákjuí kaín tí nkehe a nkaya nkajní ínaá. ¹¹ Ntá xrínahya tuénxín kjuiji iní chojni ntoa tí nchía tjejóni. Tsíkjixín sín chjasin Cesarea xritjeyá sín tí janhan. ¹² Tí Nchákuén Dios mé k'uetoan kíxin sáchrókjuikian sín la chrókoxakonahya. Kjaxin sákjuikian injon tí sín kichó ni tjejó i. Kaínni k'uíxenhenni ntóe tí ch'ín a. ¹³ A ntá tí ch'ín ntóe ntiha mé chrónka ch'án kíxin k'uíkon ch'án ijnko ángel tjexín toté la nixja ntáchro kíxin: “Tétuénhén chojni sátsji chjasin Jope kíxin tsíkakjín sín ijnko ch'ín it'in Simón la ko kjaxin it'in ch'án Pedro. ¹⁴ Jehe ch'án mé tsonixjaha ch'án tsochrónka ch'án nkexrí tsaá jaha la ko kaín tí sín kjéhya.” ¹⁵ Ntá kjuankíxian nixjaha sín na ntá ó kui tí Nchákuén Dios k'uáyéhé sín exí k'uáyéheni tí senó a. ¹⁶ Na ntá xraxinkaonni tí nkehe k'uénixja Ìnchéni. K'uéntáchro ch'án kíxin: “A ntá chaxín ch'ín Juan inta ó kuíkitexín ch'án chojni, a ntá ijie jahará tsikitaxínrá tí Nchákuén Dios.” ¹⁷ Exí xíkaha jeheni tió kjuankíxin kuinkáchónkini Ìnchéni Jesucristo ntá kjuanjón Dios Nchákuén ch'án k'uáyéheni mé xíkaha ijie la kjuanjón Dios tí Nchákuén ch'án k'uáyéhé tí jehe sín kjaxin. ¿Xá nkexro tí janhan kíxin chrókjuánjonkian Dios? —ichro ch'ín Pedro.

¹⁸ A ntá tí sín kichó ni tjejó chjasin Jerusalén kuínhin tí nkehe tsíkónhen ntá tání sín ntá kjuanchehe sín kjuasáyé Dios. Ntáchro sín kíxin:

—Kjuanjón Dios kjuachaxin kjaxin kíxin tí sín jehya judío ts'áyéhé sín kjuachaxin kíxin tsinkáchónki sín Dios la ko tsakja sín kjuachón jnkochríxín —mé xíkaha ichro sín.

Tí níjko chjasin Antioquia

¹⁹ Ti kjuixin k'uen ch'ín Esteban ntá kjuankíxin sín chónkíhi sín tí sín tinkáchónki Ìnchéni. Ntá iso sín sákjuí sín estado Fenicia la ko Chipre jnkosiné ntayaon la ko sákjuí sín chjasin Antioquia. Kjuakohe sín tí sín judío nkexrí tjen tí tan jína. A ntá tí sín jehya judío la nahí. ²⁰ A ntá í so sín tinkáchónki Ìnchéni tsíkjixín chjasin Chipre la ko tsíkjixín sín Cirene sákjuí sín chjasin Antioquia. Tió kjuiji sín ntiha mé kjuakohe sín tí sín jehya judío nkexrí tjen tí tan jína kuénte Ìnchéni Jesucristo. ²¹ Tí kjuachaxin kuénte Ìnchéni mé chóntha tí jehe sín; méxra nchónhya sín ntiha mé kuítuhe sín tí nkehe k'uékinkáchónki sín ntá kuítekaon sín Ìnchéni Jesús.

²² Tí sín tinkáchónki Ìnchéni chjasin Jerusalén mé kuínhin sín nkehe tsíkónhen chjasin Antioquia. Ntá ichr'án sín ch'ín Bernabé sákjuí ch'án ntiha. ²³ Ntá tió kjuiji ch'án ntiha ntá k'uíkon ch'án kíxin Dios imá kjuinkitsa tí sín ntiha kjaxin. Ntá imá kóchéhe asén ch'án. Ntá nixjehé ch'án sín kíxin kaín asén sín ts'ejó sín tsinkáchónki sín Ìnchéni. ²⁴ Ch'ín Bernabé la ijnko chojni imá jína asén la antsí chóntha ch'án Nchákuén Dios la jína tinkáchónki ch'án; méxra kóchjina nchónhya sín kuinkáchónki sín Ìnchéni.

²⁵ Kjuixin tíha q̄ ntá ch'ín Bernabé sákjuí ch'án chjasin Tarso sákjuík jeyá ch'an tí ch'ín Saulo. ²⁶ Ntá tió k'uitja ch'án ntá sákjuíko ch'án chjasin Antioquía. Ntá k'uejóko sín tí sín tinkáchónki Ínchéni ntiha kuenté ijnko nánó la kjuakohé sín itsjé chojni. Ntiha chjasin Antioquía kjuankíxin sín kuikítexín sín tí sín tinkáchónki Cristo mé ihnié cristiano.

²⁷ A ntá iso sín chrónka itén Dios sákjuíxín sín chjasin Jerusalén la kjuíji sín chjasin Antioquía. ²⁸ Ijnko ch'ín it'in Agabo k'uinkatjen ch'án kjuák' exín tqeté ch'an tí tsíkójnkotsé tí sín tinkáchónki Jesúz la kjuachaxién Nchakuen Dios chrónka ch'án kíxin tsokjinta nkuíxín ntiha. Tí nkehe chrónka ch'án mé chaxín kónhen tió kjuák'e ch'ín Claudio k'uetoan ch'án. ²⁹ A ntá tí sín tinkáchónki Ínchéni chjasin Antioquía kjuenkayáxin sín kíxin jehe sín tsjinkitsa sín tí sín kíchó sín tinkáchónki Ínchéni estado Judea. La jnkojntko sín kjuanjon sín tí nkehe chónta sín. ³⁰ Mé xikaha kjuenájín sín chichaon sákjuíko ch'ín Bernabé la ko ch'ín Saulo chjéhe sín tí sín t'ayakonhen njinko estado Judea.

12

Ik'uén ch'ín Jacobo la ko kjuák'echjina ch'ín Pedro

¹ A ntá tí yaon a tí ch'ín rey Herodes mé ntá kjuankíxin ch'án kónínkakonhen ch'án tí sín tinkáchónki Jesúz. ² La k'uetoan ch'án kíxin tí ch'ín Jacobo ts'enxín ijnko chica espada tjate. Jehe ch'án mé kíchó ch'án tí ch'ín Juan a. ³ Ntá k'uíkon ch'ín Herodes kíxin imá kóchéhé tí sín judío kíxin xikaha kónhen la ntá kjaxin itsé ch'án tí ch'ín Pedro. Tíha mé kónhen tí yaon kia pascua tió kjóne sín niotja chontahya tí xroqan nchek'ánki niotja. ⁴ Kjuixin itsé ch'ín Herodes tí ch'ín Pedro ntá chr'áxenhen ch'án ntóechiso. Ntá ntiha mé tjejóntha noó grupo soldado la mé noó soldado jnkojntko grupo. Kjuenkayáxin ch'ín Herodes kíxin tsjixin ts'átsinka tí kia pascua ntá sátsjiko ch'án tí ch'ín Pedro tí siín tí sín israelita kíxin ts'íkon kuenté chjasin ntiha kíxin nkexrí its'en ch'án. ⁵ Méxra ch'ín Pedro naxa tjechjina ch'án la ntaha sínta sín ch'án, la ntá kaín tí sín tinkáchónki Ínchéni la tjejónixjehé sín Dios kaín asén sín kíxin tsjinkitsa Dios tí ch'ín Pedro.

Dios kjuinkitsa ch'ín Pedro k'uaxrjexín ch'án ntóechiso

⁶ Tí tie a mé kjuenkayáxin ch'ín Herodes kíxin tsøyaqon ntá tsakitsje ch'án ch'ín Pedro sátsjiko ch'án tí siín tí sín chjasin. A ntá ch'ín Pedro tjejua ch'án la nánánko tí jehe ch'án tjejó yaá soldado la chróntetoxín tja ch'án yaá chica cadena. Ntá í so sín soldado a tjejóntha sín ntója ntóechiso. ⁷ A ntá xrinahya tuénxín ikui ijnko ángel kuente Ínchéni, a ntá tí nkaxenhen ntóechiso imá k'uinkaséyan ijkoyé ntiha. Kjuak'etja itja tí ángel tí chjia ch'ín Pedro kjuinkchekjayehe ch'án. Ntá k'uetoan tí ángel ntáchro kíxin:

—Tjoka t'aya.

La ntá tí chica cadena tjejóchróntetoxín itja ch'ín Pedro mé k'uánótjen. ⁸ Ntá xik'etoan tí ángel ntáchro kíxin:

—T'inkaya iká la tjanka tókata.

Ntá kuitkaon ch'ín Pedro la kjatee xik'etoan tí ángel ntáchro kíxin:

—T'ítsate iká ntá chréhé sátsjini —ichro ch'án.

⁹ Ntá ch'ín Pedro chréhé ch'án iton tí ángel a ntá noehya ch'án á chaxín xikaha kónhen tí nkehe kjuich'e tí ángel o náhí. Ntáchro ch'án kíxin ách'e ijnko nkehe k'uíkonxón ch'án.

¹⁰ Ntá kjuixin k'uátsinka sín tí tjejó tí soldado saoxín la kjuixin xik'atsinka sín tí tjejó tí soldado a yóxin. La ntá kjuíji sín ijnko puerta chica ijié chjinaxón ntja. La ntá tí puerta chica la jehó xitjehé. Ntá k'uaxrje sín tjejótji sín ijnko ntja la ntá xrinahya tí ángel ó sákjuí la ntá jehó ch'ín Pedro kuitohe ch'án. ¹¹ A ntá tí ch'ín Pedro konohe ch'án kíxin chaxín kónhen tíha. Ntá ntáchro ch'án kíxin:

—Ntá ó noheni kíxin chaxín Ínchéni tsíchr'án tí ángel kuente ch'án kíxin sinchekaáni kíxin ts'oyáñhyani ch'ín Herodes la ko tsøenhyani kaín tí nkehe tjinkaon tí sín judío —ichro ch'án.

¹² Ntá ó nohe ch'án kaín nkehe kónhen ch'án ntá sákjuí ch'án ntoe ijkno tjan María, ìné ch'ín Juan kjaxin tikitexín sín Marcos. Ntaha tsíkójkotsé itsjé sín tinkáchónki Inchéni tjejónixjehe sín Dios. ¹³ La ntá t'inka ch'án tí puerta chjinaxón ntia la nixja ch'án. La ntá ijkno tjan it'in Rode k'uaxrje tjan kjuitsjehe tjan kixin nkexro tíha. ¹⁴ A ntá tió kjuátsoan tjan itén ch'ín Pedro ntá k'uitjáyehen tjan kuakitjehya tjan tí ntója a kixin imá kóchéhe tjan. Kuinká tjan sákjuíchrónka tjan kixin ntója puerta ntiha itjen ch'ín Pedro. ¹⁵ Ntá ntáchro sín kixin:

—Lontia.

La naxa chrónka tjan kixin chaxín jehe ch'án ntá xíntáchro sín kixin:

—Jehya jehe ch'án. Kjá tí xríntoe ch'án.

¹⁶ A ntá ch'ín Pedro naxa t'inka ch'án tí ntója puerta la ntá tió kuakitjehé sín la k'uíkon sín ch'án ntá chrakon sín. ¹⁷ A ntá kjuakoxin ch'ín Pedro itja ch'án kixin tsotání sín ntá chrónka ch'án kixin Inchéni mé kuakitsjexín ch'án ntóechiso. Ntá k'uetoan ch'án ntáchro ch'án kixin:

—Chenkará ch'ín Jacobo la ko kaín kichó ni nkehe k'uátsínska janhan —ichro ch'án ntá sákjuí ch'án ókjé.

¹⁸ Ntá tí kóyaon a imá kóxakonhen tí sín soldado a kixin noehya sín nketí sátsíkji ch'ín Pedro. ¹⁹ La ntá k'uetoan ch'ín Herodes kixin sátsjikjeyá sín ch'án, kjanchó k'uitjahya sín ch'án. A ntá tí sín soldado kuamá sín tíha ntá k'uetoan ch'ín Herodes kixin its'en sín. Na ntá kjuixin tíha ntá ch'ín Herodes k'uaxrjexín ch'án estado Judea ntá sákjuí ch'án chjasin Cesarea la ntiha kjuák'e ch'án.

Ik'uén ch'ín Herodes

²⁰ A ntá ch'ín Herodes mé nínkakonhen ch'án tí sín chjasin Tiro la ko chjasin Sidón. Ntá jehe sín jnkokoá kjuenkayáxin sín kixin sátsjitsjehe sín ch'án. Ntaha itjen ijkno ch'ín it'in Blasto k'uáyakonhen ch'án ntoe ch'ín Herodes ntá kjuanchehe sín ch'án kixin tsonixjayákonhen sín ch'án tí ch'ín t'etoan. Kjuanchia sín kixin chrókónímkakuenhya sín ch'ín Herodes kixin naxa tsochr'án ch'án tí nkehe sine sín kixin chjasén ch'án sítixin tí nkehe ine sín. ²¹ Ntá ch'ín Herodes k'uíyehe ch'án sín kixin tsojkotsé sín ijkno yaon. Ntá jehe ch'án k'uítsá ch'án ka náxrjón kuente chojni t'etoan la kjuák'enkáya ch'án ijkno sillá kuente chojni t'etoan. La ntá kjuankixin ch'án nixjehé ch'án tí sín tsíkójkotsé. ²² A ntá tí sín a kjuankixin k'uéya sín, ntáchro sín kixin:

—Jehya chojni tjenixja. Dios tjenixja —ichro sín.

²³ A ntá tuénxín ijkno ángel kuente Inchéni kjuíncheníhi ch'ín Herodes kixin kjuíncheyóhe ch'án qasén ch'án Dios. La ntá kosintqo kjóne nkaya tsee ch'án ntá k'uén ch'án.

²⁴ La ntá itsjé chojni tinkáki nhin itén Dios la nkuíxín tinkákotsjé tí sín tinkáchónki Inchéni.

²⁵ La ntá tí ch'ín Bernabé la ko tí ch'ín Saulo ó kjuixinhin sín ixra kuente sín chjasin Jerusalén la ntá sáxíkji sín chjasin Antioquia la sákjuíko sín ch'ín Juan mé kjaxin tikitexín sín ch'án Marcos.

13

Ch'ín Saulo la ko ch'ín Bernabé sákjuíkako sín

¹ A ntá tí ninko chjasin Antioquia la siín iso sín nixja sín itén Dios la kjuakohé sín chojni. Tí sín tjako mé ch'ín Bernabé la ko ch'ín Simón, kjaxin it'in ch'án Negro, la ko ch'ín Lucio, chjasen ch'án mé Cirene, la ko ch'ín Manaén, ijkno ch'ín tsík'ánkiko ch'ín Herodes tí ch'ín t'etoan estado Galilea, la ko ch'ín Saulo. ² Ijkno yaon la tjejótójkotsé sín xraxinkaon sín Dios la kjónehya sín. Ntá Nchakuen Dios mé ntáche ch'án sín kixin:

—Tsakitsjekjan ch'ín Bernabé la ko ch'ín Saulo kixin ó kjuéyá sín tsjánjuan ijkno xra sich'e sín.

³ Ntá nixjehé sín Dios la kjónehya sín la ntá kjuixin ntá k'uejotja tja sín chrítaón ikja tí sín a la nixja sín jnkojnkó sín kíxín ó sátsji sín.

Ch'ín Pablo la ko ch'ín Bernabé tjako sín nonte Chipre

⁴ A ntá tí Nchakuen Dios ichr'án ch'ín Bernabé la ko ch'ín Saulo sákjuí sín chjasin Seleucia. Ntá ntaha k'uíxenhen sín ijkno ntabárco sákjuí sín ijkno nonte it'in Chipre. ⁵ Ntá kjuíji sín ijkno puerto it'in Salamina. Ntaha kjuakoxin sín itén Dios tí njinko kuènte tí sín judío. Kjaxin kjuíjiko sín ch'ín Juan kíxín tsjinkitsa ch'án. ⁶ La ntá sákjuí sín nkuíxín nonte Chipre hasta kjuíji sín chjasin Pafos. Ntaha xéta sín ijkno ch'ín nchexroan me ijkno ch'ín judío it'in Barjesús. Jehe ch'án kjuich'ia ch'án ntáchro ch'án kíxín kjaxin ch'án nixja ch'án itén Dios. ⁷ A ntá tí ch'ín nchexroan a mé kjuák'eko ch'án tí ch'ín gobernador Sergio Paulo. A ntá tí ch'ín gobernador mé imá jína kjuenkayáxin ch'án. K'uíyehé ch'án tí ch'ín Bernabé la ko tí ch'ín Saulo kíxín jehe ch'án tjinkaon ch'án tsinhin ch'án itén Dios. ⁸ A ntá tí ch'ín nchexroan, nkiva griego mé tikitekxín sín ch'án Elimas, mé nínkakonhen ch'án tí sín tjako a kíxín tjinkakonhyá ch'án kíxín tí ch'ín t'etoan chrókuitekaon ch'án Inchéni. ⁹ A ntá tí ch'ín Saulo, kjaxin tikitekxín sín ch'án Pablo, imá chóntha ch'án Nchakuen Dios. La ntá komá ch'án tí ch'ín nchexroan. ¹⁰ Ntáchro ch'án kíxín:

—Jaha mé chojni ch'ia, jínahya, xjeen Diablo la nínkakonhén kaín nkehe jína. ¿Nkekuènte kíxín ch'éna jínahya tí ntja ntoá kuènte Inchéni? ¹¹ A ntá ijie la Inchéni sintakjasótia. Tsitoha ntakótán iso yaon la ts'ikonya tí xrohi kuènte yaon —ichro ch'ín Pablo.

Ntá tuénxín tí ch'ín Elimas la k'uíxitie tjen ch'án. La ntá kjueyá ch'án ijkno nkexro tsinkátséhe tja ch'án sátsjiko ch'án kíxín t'ikonya ch'án. ¹² A ntá xikaha mé k'uíkon tí ch'ín gobernador nkehe kónhen la ntá kjuankíxín tinkáchónki ch'án Inchéni kíxín k'uíkon ch'án tí kjuachaxin kuènte Inchéni.

Ch'ín Pablo la ko ch'ín Bernabé tjejó chjasin Antioquía estado Pisidia

¹³ Ntá tí ch'ín Pablo la ko tí sín xriko ch'án sákjuíxín sín chjasin Pafos. K'uíxenhen sín ntabárco sákjuí sín kjuíji sín chjasin Perge estado Panfilia. Ntá ntaha ch'ín Juan* kuítóhe tí jehe sín ntá kjan ch'án chjasin Jerusalén. ¹⁴ Ntá sákjuíxín ch'ín Pablo la ko ch'ín Bernabé chjasin Perge kjuíji sín chjasin Antioquía chjinaxón Pisidia. A ntá tí yaon t'ok'éhe sín ntá k'uíxenhen sín njinko Israel na ntaha k'uéjotjaxin sín. ¹⁵ Ntá kjuixin kjuinchekuáxin sín tí xroon kuènte ley la ko tí nkehe tsíkjín sín k'uéchrónka itén Dios ntá tí sín t'etoan kuènte njinko mé k'uíyehé sín tí sín a ntá ntáchro sín kíxín:

—Kichóni tí chonta nkehe tsochronka kíxín antsí má tsochéheni la chronka jie tsinhinni —ichro sín.

¹⁶ Ntá ch'ín Pablo k'uínkatjen ntá kjuakoxin itja ch'án kíxín tsotání sín. Ntá ntáchro ch'án kíxín:

—Chrókuinhínrá jahará chojni israelita la ko kjaxin chrókuinhínrá jahará tsíkjíxinxí chjasin ókjé tí chaxín tjinkáonrá nchexiteyéhérá Dios. ¹⁷ Tí Dios tinkáchónki tí sín chjasin Israel mé kjueyá ch'án tí sín tsík'axrjeníxinni. Ntá chr'éxin Dios kjuanjon kjuachaxin kíxín chrókótsjé tí jehe sín tí naxa k'uéjó sín chjasin Egipto. Éxí chojni tsíkjíxín ókjé k'uéjó sín a ntá chr'éxin ntá kjuachaxién Dios kjuinkitsa sín k'uaxrjexín sín tí nonte ntiha ína. ¹⁸ Dios kjuinkitsa sín tí cuarenta nánó k'uéjó sín tí nteje. ¹⁹ Ntá chr'éxin kjuinchek'itjáyan ch'án yato nación k'uék'ejó nonte Canaán, kíxín tí sín tsík'axrjeníxinni chrók'uáyéhe tí nonte a. ²⁰ Ntá kaín sín k'uéjó sín ntiha ijkno cuatrocientos cincuenta nánó. K'uék'etoan tí sín juez hasta ikjui tí ch'ín Samuel ijkno ch'ín k'uéchrónka itén Dios. ²¹ Ntá kjuanchia tí sín israelita ijkno ch'ín rey ts'etuhen sín. Ntá kjueyá Dios tí ch'ín Saúl la k'uetoan ch'án cuarenta nánó. Jehe ch'án it'é ch'án mé ch'ín Cis la k'uaxrjeníxín ch'án ch'ín Benjamín. ²² Ntá chr'éxin Dios kuakitsjehe ch'ín Saul tí xrä kjuák'e ch'án ntá k'uáyéhe ch'ín David

* **13:13** Hechos 12.25

tí xrə rey. Ntá ntáchro Dios kíxin: “Ó k'uítjá ch'ín David, it'é ch'án mé Isaí. Jehe ch'án mé ijnko chojni nchechàna mé sinchexiteyàna ch'án kaín nkehe tjíñkaván”. ²³ Ijnko tí chojni k'uaxrjeníxin tí ch'ín David mé Jesús. Tíha la Dios tsíchr'án ch'án kíxin sinchekaá tí sín israelita. Mé xikaha tsíntáchro ch'án. ²⁴ Naxə tjakohya ch'ín Jesús ntá ch'ín Juan kjuako ch'án tí tan kuínhin tí sín israelita la ntáchro ch'án kíxin chrókjan sín chróxraxinkaon sín Dios ntá chrokuike sín. ²⁵ Ntá chjina its'en ch'ín Juan ntá ntáchro ch'án kíxin: “Janhan na jehya tí nkexro tjenkayáxinrá. Náhí. Chr'éxín na itsi í jnko nkexro la chrókósuaña chrókjuasintanká tí correá tokaté ch'án kíxin antsí mé t'etoan tí jehe ch'án la kánhyó t'etoan tí janhan,” mé xikaha tsíntáchro ch'ín Juan.

²⁶ Jahará kichó ni tsík'axrjeníxinrá ch'ín Abraham tinhínrá la ko kaín rá chojni tsíkjixín ikjín nchexiteyéhérá Dios, tinhínrá tí tán tsaaixinrá. ²⁷ Méxra tí sín k'uék'ejó sín chjasin Jerusalén la ko tí sín t'etoan ntiha mé kónoehya sín nkexro tí ch'ín Jesús la ko kuienxínhyá sín tí nkehe tsíkjín sín k'uéchrónka itén Dios senó tió kjuínchekuáxin sín tí xroon tí nkaxenhen njnko jnkojnkó tí yaon t'ok'éhe sín. Mé xikaha jehe sín tió kjuínchekjasóte sín tí ch'ín Jesús la kjuínchexiteyá sín éxí nixja tí xroon a. ²⁸ Ntá k'uítjahya sín ninkehó jie kíxin chrók'uen ch'án ntá kjónté kjuanchehe sín tí ch'ín Pilato kíxin ts'etoan ch'án kíxin its'en ch'án. ²⁹ A ntá ó xiteyá tí nkehe tsíkjín sín ósé kuénte ch'án. Ntá kjuixin k'uén ch'án ntá kjuinkajinxín sín tí cuerpo kuénte ch'án tí ntacruz ntá kjuavá sín ch'án. ³⁰ A ntá Dios kjuínchexechón tí jehe ch'án ínaá. ³¹ A ntá nchónhyá yaon k'uíkon sín ch'ín Jesús tí sín k'uék'ajiko ch'án tió sákjuixin sín estado Galilea la sákjuí sín chjasin Jerusalén. A ntá ijie tí sín a mé tjejónixja sín nkexrí kjuako ch'ín Jesús, tjakohe sín kaín chojni.

³² A ntá jie jeheni tjakoni tí tan jína, mé tí nkehe tsíkjanjon Dios tsík'ayéhe tí sín tsík'axrjeníxinni ósé. ³³ Mé xikaha xiteyá k'uáyéheni tí jeheni tsík'axrjeníxinni tí sín a. A ntá Dios kuénte tí sín a mé kjuínchexechón tí ch'ín Jesús éxí nixja tí xroon yóxin Salmo, ntáchro kíxin: “Jaha mé xjanna. Janhan mé tjahá kjuachón jie.”[†] ³⁴ Ntá tsíntáchro Dios kíxin sinchexechón ch'án tí ch'ín Jesús kíxin tsoxíkahya cuérpoé ch'án. Mé xikaha chrónka tí xroon itén Dios. Ntáchro kíxin: “Janhan mé sintaxiteyá tí nkehe chaxín tjan̄ka ch'ín David.”[‡] ³⁵ La ko í jnko Salmo mé ntáchro xikihi: “Jaha tsjánjonhyá kjuachaxin kíxin tsoxíka tí cuérpoé tí nkexro tjóá kjuít'aha xra.”[§] ³⁶ A ntá ch'ín David kjuínchexiteyá ch'án éxí tsík'etoan Dios tí kjuák'e ch'án ntá kjónté chr'éxín ik'uén ch'án ntá xrvá ch'án xikaha k'uéxrvá tí sín tsík'axrjeníxinni la ntá kjónté la xíka ntøe ch'án. ³⁷ A ntá tí cuérpoé tí nkexro kjuínchexechón Dios la kótjehya. ³⁸ Méxra kichó ni t'ichjánxín tsñohará kíxin nkexrí tsjlin ijiárá kíxin Jesús mé k'uenyákonhánrá. ³⁹ A ntá kaín nkexro tinkáchónki Jesús mé ó kjuínchetjóá ch'án qasén sín. A ntá tí ley k'uetoan ch'ín Moisés kjuachahya kótjuáxin ti jie. ⁴⁰ Chrókóxakonhanrá kíxin chrókuànyará xikaha éxí tsíkjín sín ósé xikihi:

⁴¹ Tsjehérá jahara chojni titekakonhya. Ijie la tsochrakonrá kíxin nkehe tsñohen kíxin janhan Dios tsjákoxiān ijnko nkehe jié ijnko yaon kjánchó tsítekákonhyará kjónté ókjé nkexro chróchrónka.*

⁴² A ntá ch'ín Pablo la ko tí nkexro k'uajiko ch'án k'uaxrjexín sín nkaxenhen tí njnko, a ntá chrónòa tí sín jehya sín judío tsíkokjíexín, kjuanchia sín kíxin í jnko semana tí yaon t'ok'éhe sín la ínaá tsochrónka ch'án éxí tí kjuako ch'án. ⁴³ Ntá tí kjuixin xikaxín sín tí kójnkotsé sín tí njnko ntá nchónhyá tí sín judío, la ko tí sín jehya sín judío, mé tí sín na ntá kuinkáchónki sín éxí tí sín judío la xraxinkaon sín Dios, la mé imá kóxrjínhín sín tí nkehe kjuako ch'ín Pablo la ko ch'ín Bernabé la ntá sákjuíchréhe sín. A ntá jehe sín mé k'uetoan sín kíxin antsí jína chrókuinkáchónki sín tí Dios tjuéhe kaín chojni.

⁴⁴ A ntá í jnko semana kjuèxin, tí yaon t'ok'éhe sín la kójnkotsé kaín tí sín siín tí chjasin ntiha kíxin tjinkaon sín tsinhin sín itén Dios. ⁴⁵ A ntá k'uíkon tí sín judío a kíxin nchónhyá chojni tsíkójnkotsé, ntá imá kóchjinoxín sín, ntá kjuankíxin sín k'uántaxín sín tí ch'ín

* ^{13:33} Salmo 2.7 † ^{13:34} Isaías 55.3 § ^{13:35} Salmo 16.10 * ^{13:41} Habacuc 1.5

Pablo. ⁴⁶ A ntá ch'ín Pablo la ko ch'ín Bernabé la íchá ąntsí má chrakonhyá sín nixja sín ntáchro sín kíxin:

—T'ichjánxín senó jahará judíorá chrókuinhínrá itén Dios. Kjánchó tjinkákonhyárá tsinhínrá tí nkehe jína tsjanjon kjuachón jnkochríxín. A ntá ijie la tsitohárá tí jahara judíorá la ntá jeheni la sátsjini tsjakohéni tí sín jehya judío ⁴⁷ xikaha tsík'etoan Ínchéni. Ntáchro ch'án kíxin:

Janhan ichr'an tí jahará éxí xrohi ts'inkaséyanxín kaín nación kíxin sátsjikoará tí tan tsjanjon kjuachón tsaáxin chojni hasta tí ąntsí má kjín kjuèxin chjasintajni.[†]

Mé xikaha k'uetoan Dios.

⁴⁸ A ntá kuúnhin tí sín jehya sín judío tíha la kjuankíxín kóchéhé sín la ntáchro sín kíxin tí tan kuénte Ínchéni la nkehe jína, ichro sín.

La ntá kjuankíxín kuinkáchónki kaín tí sín tsíkitoenxín sín kíxin tsochónta sín kjuachón jnkochríxín. ⁴⁹ Ntá xikaha xrankíxín xrako tí itén Ínchéni nkuíxín tí chjasin ntiha. ⁵⁰ A ntá tí sín judío nixjéhe sín iso chojni chjin jína tjetoan la ko tí chojni ntoa t'etoan tí chjasin ntiha la ntá kjuínchekónkaon tí sín a la ntá kjuankíxín sín chrók'óyán sín tí ch'ín Pablo la ko tí ch'ín Bernabé ntá sákjuúxín sín chjasin ntiha. ⁵¹ A ntá jehe sín la kótsjénka sín tokaté sín kíxin tsoxénjin tí nche chónta toté sín. Tíha mé kjuakoxín sín kíxin ntoáhya kjuenkayáxin tí sín a. A ntá sákjuú tí jehe sín chjasin Iconio. ⁵² Ntá tí sín tinkáchónki Ínchéni la imá chéhé sín kíxin ąntsí chónta sín Nchakuen Dios.

14

Ch'ín Pablo la ko ch'ín Bernabé tjejó chjasin Iconio

¹ Ntá kjuúji ch'ín Pablo la ko ch'ín Bernabé tí chjasin Iconio. Ntá k'uíxenhen sín níngoe tí sín judío ntá jína kjuako sín. La ntá nchónhyá tí sín judío la ko tí sín jehya judío mé kuítekaon sín tí nkehe kjuako sín. ² A ntá iso tí sín judío kuítekakonhyá la ntá kjuankíxín nchekónkaon sín tí chojni jehya judío kíxin tsonínkakonhen sín tí sín tjako. ³ A ntá tí sín tjako la isé kuítuhe sín ntiha la chrakonhyá sín nixja sín la ko tinkáchónki sín Ínchéni Jesús. La ntá Ínchéni kjaxin kóxrjínhin ch'án tí nkehe nixja sín kíxin nkexrí tjuéheni Dios la kjuanjon ch'án kjuachaxin tsjasin sín kjuaxroan. ⁴ A ntá tí sín tjejó chjasin ntiha la jnkokónhyá kjuenkayáxin sín. Iso sín kuítekakonhen sín tí sín judío la í so sín kuítekakonhen sín tí sín tsíkjeyá Ínchéni. ⁵ A ntá tí sín judío la ko tí sín jehya judío mé kjuenkayáxinko sín tí sín t'etoan kíxin sinchechrakon sín tí sín tsíkjeyá Ínchéni la ko tsochjéhe sín xro. ⁶ La ntá tí ch'ín Pablo la ko tí ch'ín Bernabé kónohe sín nkehe kjuenkayáxin tí sín a ntá sákjuú sín chjasin Listra la ko chjasin Derbe estado Licaonia la nkuíxín ntiha. ⁷ La kjaxin ntaha kjuako sín tí tan jína kuénte Ínchéni.

Chéhe sín xro ch'ín Pablo chjasin Listra

⁸ Ntá tí chjasin Listra itjen ijnko ch'ín xitjahya tji. Nunca xitjahya k'uáji ch'án kíxin tsíkokjéxín ch'án xitjahya itji ch'án. ⁹ Méxra ó tjetjaxinkoá ch'án ntá kuúnhin ch'án nkehe tí tjako ch'ín Pablo. Ntá ch'ín Pablo komá ch'án tí ch'ín a ntá kónohe ch'án kíxin tí ch'ín ąntsí tinkáchónki ch'án Ínchéni kíxin tsitohé ch'án jína. ¹⁰ Ntá jehe ch'án itsen ntáche ch'án tí ch'ín a kíxin:

—T'inkatjen, ntoá tjak'exián totá —ichro ch'án.

Ntá tuénxín k'uínatjen ch'án, chrika ch'án, kjuák'exín ch'án toté ch'án ntá ó jína tji ch'án. ¹¹ Ntá kaín tí sín chjasin ntiha k'uíkon sín nkehe kjuich'e ch'ín Pablo, ntá kaín sín k'uíyexin sín nkívee sín Licaonia ntáchro sín kíxin:

—Dios tsík'óna chojni mé tsíkixín nkajní tjejókoni ntihi —ichro sín.

[†] 13:47 Isaías 42.6; 49.6

¹² La ntá kjuínchek'in sín ch'ín Bernabé mé tí dios Júpiter a ntá ch'ín Pablo mé tí dios Mercurio kíxin imá nixja ch'án. ¹³ Ntá tí ch'ín nchat'á kuènte tí dios Júpiter mé chóntha ch'án njinko tí t'ixenxínni ikon chjasin ntá kjuíkao ch'án koxinta tjeteyá tsjo. A ntá jehe ch'án la ko kaín tí chojni la chréhe sín kíxin tjinkaon sín chrókjuikosáyehe sín tí sín tjako la ko tjinkaon sín chrók'óyán sín tí koxinta chrók'uáyéhe tí sín a. ¹⁴ A ntá tí sín apóstol mé ch'ín Pablo la ko ch'ín Bernabé mé kónohe sín tíha ntá kjuankíxin sín kótséchje sín iké sín la sákjuíkjiakjan sín tí chojni siín ntiha la t'óyako sín ntáchro sín kíxin:

¹⁵ —¿Kuènté kíxin tjejoch'erá xíkaha? Jeheni chojni éxí tí jahará. Tí xrä ó kuini kíxin tsochrónkani itén Dios kíxin tsítóhéra kaín tí nkehe ninkehó sínkíhya la ntá chrókjanrá chrókuinkachónkirá Dios tjechón. Jehe ch'án mé kjuich'éna ch'án nkajní la ko chjasintajni la ko tí ntayaon la ko kaín tí nkehe siín. ¹⁶ Ntá ósé mé kuítóhe Dios chojni kíxin jehó ts'aji sín ntje sín. ¹⁷ Kjónté la Dios tjakoxín ch'án kíxin jehe ch'án t'etoan ch'án kíxin kjuich'éna ch'án kaín nkehe. Jehe ch'án mé t'etoan kíxin ts'aniá chrin ntá ts'enkäni la jína ts'óneheni, la jehe ch'án tjanjon ch'án nkehe kíxin jnkochríxín ts'ixin nkehe sineni, la ko jehe ch'án mé nchechéheni ch'án —mé xíkaha ichro ch'ín Pablo.

¹⁸ Kjónté xíkaha ichro tí sín tjako la naxa tjinkaon tí chojni chrokjuikosáyehe sín chrók'óyán sín koxinta chrókjokéhe sín tí sín tjako.

¹⁹ A ntá ikui iso tí sín judío kjuixin sín chjasin Antioquia la ko chjasin Iconio. Nixjehé sín tí sín ntiha kíxin tsítóhe sín tí nkehe jehya jína tjako tí sín a ntá kóninkaon sín ntá kjuankíxin chjéhe sín xrä tí ch'ín Pablo. La ntá ách'e ó kjuixin tsík'en ch'án ntá kuinkánkájen sín ch'án sákjuíko sín ch'án ikon chjasin. ²⁰ Ntá tí sín tinkáchónki Ínchéni mé kójnkotsé sín k'uántatjen sín tí ch'ín Pablo ntá k'uáya ch'án xíkjan ch'án tí chjasin ntiha ínaá. Ntá tí yaon chr'éxín ntá sákjuíko ch'án tí ch'ín Bernabé chjasin Derbe.

²¹ A ntá ó kjuixin chrónka sín tí tan jína la ko kjuacha sín itsjé chojni kuinkáchónki Ínchéni ntiha ntá kjan sín chjasin Listra la ko chjasin Iconio la ko chjasin Antioquia.

²² Nkuíxín tí chjasin k'uátsínska sín mé kjuínchechéhe sín tí sín kuinkáchónki Ínchéni. K'uetoan sín kíxin naxa jína chrókuinkáchónki sín Ínchéni la ntáchro sín kíxin tí ts'ixenhenni tí kjuachaxin kuènte Dios t'ichjánxín tsjasóteni. ²³ A ntá ntiha kjueyá sín chojni jnkojnko njinko kíxin ts'etuenhen sín tí sín tinkáchónki Jesús kíxin jína ts'ejó sín. Ntá nixjehé sín Dios tí naxa kjónehya sín la ntá ntáche sín Ínchéni kíxin ts'ayakonhen ch'án tí sín ó kuinkáchónki tí jehe ch'án.

Ch'ín Pablo la ko ch'ín Bernabé ikjan sín chjasin Antioquia estado Siria

²⁴ Ntá chr'éxín k'uátsínska sín estado Pisidia la ntá kjuíji sín estado Panfilia. ²⁵ Ntá chjasin Perge kjuako sín tí tan kuènte Ínchéni la ntá kjuixin ntá sákjuí sín chjasin Atalia.

²⁶ Ntá ntiha k'uíxenxín sín ntabárco ntá sákjuí sín chjasin Antioquia tí chjasin k'uénixjehé chojni Dios k'uékjanchia sín kíxin Dios tsjinkitsa tí sín a sich'e sín tí xrä. La ntá ó kjuixin xiteyá. ²⁷ Ntá tió kjuíji sín chjasin Antioquia ntá kójnkotsé kaín tí sín tinkáchónki Jesús. Ntá kjuankíxin chrónka ch'ín Pablo nkexrí kjuínkitsa Dios tí jehe sín la ko nkexrí kjuanjon Dios kjuachaxin tsjakohé sín tí chojni jehya judío kíxin kjaxin sín tsitekaon sín Ínchéni.

²⁸ A ntá tí ch'ín Pablo la ko tí ch'ín Bernabé itsjé yaon k'uéjoko sín tí sín tinkáchónki Ínchéni ntiha.

15

Kójnkotsé sín chjasin Jerusalén

¹ A ntá iso chojni tsíkixín sín estado Judea ntá kjuíji sín chjasin Antioquia. Ntá kjuankíxin sín kjuakohé sín tí sín kíchó ni kíxin xitjahya tsaáxin sín tí chontahya sín tí xroye tsík'etuoan ch'ín Moisés. ² Ntá tí ch'ín Pablo la ko tí ch'ín Bernabé la ko tí sín judío kjuankíxin kjuanjonkoxín sín kíchó sín. Ntá áxri ntá kónoxín kíxin tí ch'ín Pablo la ko tí

ch'ín Bernabé la ko í so chojni la sátsji sín chjasin Jerusalén. Ntaha tsonixjehé sín tí sín apóstol la ko tí sín t'etoan ninko kíxin nkexrí tsónhen tí xroye tsík'etoan ch'ín Moisés.

³ Tí sín tinkáchónki Ínchéni chjasin Antioquía mé ichr'án sín tí sín a ntá k'uátsínska sín estado Fenicia la ko estado Samaria la tinkáchrónka sín kíxin nkexrí tí sín ókjé jehya sín judío kjuitoxinhin tí k'uékjenkayáxin sín ntá kuákja sín ntje Dios. Ntá kaín tí sín kichó ni imá kóchéhe sín tí kuínhin sín xíkaha.

⁴ La ntá kjuíji ch'ín Pablo la ko ch'ín Bernabé chjasin Jerusalén ntá tí sín tinkáchónki Ínchéni la ko tí sín apóstol la ko tí sín t'etoan kuènte ninko mé kjuanjon sín kjuachaxin ts'ejó tí sín a. Ntá chrónka sín kíxin Dios imá kjuínkitsa tí jehe sín. ⁵ Ntá iso tí sín fariseo ó tsíkitekaon Ínchéni mé k'uínkatjen sín ntá ntáchro sín kíxin:

—T'ichjánxín itsa xroye tí sín jehya judío tinkáchónki Ínchéni la ko t'ichjánxín ts'ítuenhen sín sinchexiteyéhe sín kaín tí ley —ichro sín.

⁶ Na ntá kaín tí sín apóstol la ko tí sín t'etoan ninko mé kójnkotsé sín kjuenkayáxin sín nkexrí tsónhen kíxin xíkaha ichro tí sín judío. ⁷ Ntá imá nixjehé kichó sín ntá k'uínkatjen ch'ín Pedro ntáchro ch'án kíxin:

—Jahará kichó ni ó nohará nkexrí kíxin senó Dios tsíkjeyá tí jeheni kíxin tsjakohéni kaín tí sín jehya judío kíxin tsinhin sín tí tán jína kuènte Cristo kíxin kjaxin jehe sín tsitekaon sín. ⁸ Dios mé ó nohe ch'án nkexéhe kaín əsén chojni. Kjuakoxin ch'án kíxin k'uáyéhe ch'án tí sín jehya judío kíxin chjéhe ch'án sín Nchakuen ch'án éxí tí xíkaha k'uáyéheni tí jeheni. ⁹ Dios la t'ikon kaín chojni jnkokón éxí tí jeheni. Ntá kjuíncchetjóá ch'án əsén sín kíxin ó tinkáchónki sín Ínchéni. ¹⁰ Méxra ənkekuénté títekákonhyará tí nkehe kjuich'e Dios la ntá tétuéñhénrá chojni sinchexiteyá sín kaín tí nkehe ixra tsitekaon sín? Ni jeheni la ko ni tí sín tsík'axrjeníxinni kjuachahya sín kjuínchexiteyá sín tíha. ¹¹ Náhí. Ó noheni kíxin kjuasáyé Ínchéni Jesús mé kuaáxinni la ko kjaxin xíkaha kuaáxin tí jehe sín kuítekaon —mé xíkaha ichro ch'ín Pedro.

¹² Ntá kaín tí sín tsíkójkotsé tání sín kuínhin sín nkexrí chrónka tí ch'ín Bernabé la ko tí ch'ín Pablo kíxin Dios kjuínkitsa sín kjuasin sín itsjé kjuaxroan k'uíkon tí sín jehya sín judío. ¹³ Kjuixin nixja ch'ín Pablo la ko ch'ín Bernabé ntá kjuankíxin nixja ch'ín Jacobo, ntáchro ch'án kíxin:

—Kichóni, tinhínrá tí nkehe tsoxrjanca. ¹⁴ Ch'ín Simón Pedro chrónka nkexrí kjuakoxin Dios kíxin tjuéhe ch'án tí chojni jehya judío la nkexrí kjueyá Dios iso tí sín kíxin tsinkáchónki sín tí jehe ch'án. ¹⁵ Mé xíkaha chaxín chrónka tí xroon tsíkjin tí sín k'uéchrónka itén Dios kíxin:

¹⁶ Janhan mé tsokjan chr'éxín.

Tió ts'inka ntá sit'ána nixin tí nchia tsík'oya kuènte David la janhan la tsjínkitsa sín ts'etoan sín.

¹⁷ Kíxin kjaxin kaín xín chojni mé tsjeyá sín Ínchéni la ko kjaxin kaín xín tí sín ókjé nación mé tí sín kótjuáxin nina mé tsinkáchónkina sín.

¹⁸ Ínchéni mé kjuakoxin kaín tíha tí osé la tsíkjanjon ch'án tí tan kuènte ch'án.*

Mé xíkaha ichro itén Dios

¹⁹ 'Méxra ntárxjan kíxin tí sín jehya judío la t'ichjánxinhya sinchexiteyá sín kuenté tí ley kíxin ó kuítuhe sín tí nkehe kuinkáchónki sín senó kíxin jína chrókjueyá sín Dios.

²⁰ Méxra tsochr'énhenni sín ijnko xroon la jehó ts'etueñhenni sín kíxin chrókjónehya sín tí nto tsíkjokehé chojni tí nkehe tsíkjanoya la ko chróchontahya sín chojni chjin ókjé la ko chrókjónehya sín tí nto kuènte ko tsíchrínjinha ikja va la ko chrókjónehya sín ijnié va. ²¹ A ntá jnkojnko chjasin siín nkexro chrónkaxín tí ley kuènte ch'ín Moisés nchekuáxin sín tí nkaxenhen ninko jnkojnko tí yaon t'ok'éhe sín —ichro ch'ín Jacobo.

* ^{15:18} 15.16-18 Amós 9.11-12

²² Ntá kaín tí sín tsíkjayá Ìnchéni la ko tí sín t'etoan kuènte njinko la ko kaín tí í so sín tinkáchónki Ìnchéni kjueyá sín iso chojni tsochr'án sín chjasin Antioquía, mé kjueyá sín ch'ín Judas, tikitexín sín ch'án Barsabás, la ko ch'ín Silas sátsjiko sín ch'ín Pablo la ko ch'ín Bernabé. Tí sín a mé sín tjetoan ntiha. ²³ Ntá ichr'án sín tí xroon sákjuíko tí sín a ntáchro kíxin:

"Jeheni chojni tsíkjayá Ìnchéni la ko chojni t'etoan kuènte njinko ntihi la nixjaharáni tí jahará, kichó ni jehya judío, tjejorá chjasin Antioquía la ko estado Siria la ko estado Cilicia. ²⁴ Ó noheni kíxin iso chojni tsíkixín chjasénni kjónté k'uéchontahya sín kjuachaxin la kjuínchexakonhanrá sín kíxin ntáchro sín kíxin t'ichjánxín itsará tí xroye tsík'etoan ch'ín Moisés. ²⁵ Ntá jnkokoá kjuenkayáxinni tsjeyáni nkexro tjejó ntihi kíxin sáchrókjuitsjehe tí jahará la chrókjuijiko sín ch'ín Bernabé la ko ch'ín Pablo kíxin imá tjuéheni sín. ²⁶ Tí sín a mé ántosén sín kjónté chrók'uenxín sín kíxin tí tinkáchónki sín Ìnchéni Jesucristo. ²⁷ Méxra tsochr'ánni ch'ín Judas la ko ch'ín Silas tsjiji sín kíxin jehe sín mé tsonixjahará sín tsochrónkaxín sín kaín tíha. ²⁸ Jína kíxin Nchákuén Dios mé kjuínkitsani kjuenkayáxinni kíxin jehya chrók'uétuñhanhráni ijnko nkehe imá xra. Náhí. Jehó tí nkehe kánhyó xra t'ichjánxín sinchexiteyárá mé t'etoanni: ²⁹ chrókjóntehyará tí iko tsíkjokehé chojni tí nkehe tsíkjanoya la ko kjaxin chrókjóntehyará ijnié tí ko a la ko chrókjóntehyará tí nto kuènte tí ko tsíchrínjhya kja la ko kjaxin ninkexró chrókuakjahya í jnko chojni chjin ókjé. Ntá tí sinchexiteyárá kaín tí nkehe t'etoanni la jína ts'ejorá." Mé xikaha nixja tí xroon.

³⁰ Ntá kjuixin nixja sín ntá tí sín a sákjuí sín chjasin Antioquía. Ntá tió kjuíji sín ntiha ntá kójnoksé tí sín tinkáchónki Jesús ntá kjuanjon sín tí xroon a. ³¹ Ntá tió kjuínchekuáxin tí sín kichó ni tí xroon a ntá imá kóchéhé sín kíxin xikaha chrónka tí xroon a. ³² Ntá tí ch'ín Judas la ko tí ch'ín Silas kjaxin sín ó nohe sín tsochrónkaxín sín itén Dios la nixja sín jína la imá kjuínchechéhé sín tí sín kichó ni kíxin tí nkehe nixja sín. ³³ Ntá ntahó k'uéjó sín iso yaqon, ntá tió sátsji sín ntá kaín tí sín tinkáchónki Ìnchéni nixjehé sín jína ntá ó xíkjan sín ínaá tí tsíkixín sín tí tjejó tí sín tsíchr'án sín. ³⁴ Kjánchó ch'ín Silas kjuenkayáxin ch'án kíxin ntahó chrókuitohe ch'án. ³⁵ A ntá ch'ín Pablo la ko ch'ín Bernabé kuítóhe sín chjasin Antioquía. Jehe sín la ko í so chojni mé kjuako sín la ko chrónkaxín sín itén Ìnchéni.

Ch'ín Pablo kjuankíxin tí yóxin viaje

³⁶ A ntá chr'éxín ch'ín Pablo nixjehé ch'án ch'ín Bernabé. Ntáchro ch'án kíxin:

—Sátsjitsjeheni tí sín kichó ni kaín tí chjasin kjuakoxínni itén Ìnchéni ósé. Tsjitsjeheni nkexrí tjejó sín ntiha —ichro ch'án.

³⁷ A ntá ch'ín Bernabé la tjinkaon ch'án kíxin kjaxin sáchrókjuiko sín ch'ín Juan kjaxin tikitexín sín ch'án Marcos. ³⁸ A ntá ch'ín Pablo kóxrjíenhya sátsjiko sín tí ch'ín Marcos a kíxin jehe ch'án kuítóhe ch'án sín estado Panfilia la kjuínkitsahya ch'án kíxin naxá tsonhen tí xra.[†] ³⁹ Méxra jnkokoáhya kjuenkayáxin sín la ntá xikayéhe sín la ókjé sákjuí sín. Ch'ín Bernabé sákjuíko ch'án tí ch'ín Marcos la k'uíxenhen sín ijnko ntabárco sákjuí sín nonte Chipre. ⁴⁰ A ntá tí ch'ín Pablo la jehó ch'án mé kjueyá ch'án tí ch'ín Silas ntá chr'éxín sákjuí sín. Tí sín kichó ni ntiha kjuanchehe sín Dios kíxin jína ts'ayakonhen sín ch'án la ntá sákjuí sín. ⁴¹ Ntá k'uátsinka sín estado Siria la ko estado Cilicia la kjuínchechéhé sín asén tí sín tinkáchónki Ìnchéni njinko ntiha.

16

Ch'ín Timoteo sákjuíko ch'án ch'ín Pablo la ko ch'ín Silas

¹ Ntá kjuíji ch'ín Pablo chjasin Derbe la ko chjasin Listra. Ntá ntaha itjen ijnko ch'ín tinkáchónki Jesús it'in ch'án Timoteo. Jehe ch'án mé xjeen ijnko tjan judía tinkáchónki Ìnchéni. A ntá it'é ch'án mé ijnko ch'ín griego. ² Ntá tí sín kichó ni tjejó chjasin Listra la

[†] 15:38 Hechos 13.13

ko chjasin Iconio mé nixja sín kíxin jína tí ch'ín Timoteo. ³ A ntá ch'ín Pablo mé tjinkaon ch'án sáchrókjuiko ch'án tí ch'ín Timoteo. Ntá senó k'uetoan ch'án chrókua tí ch'ín Timoteo a tí xroye kíxin tsóníkkonhyá tí sín judío tí chjasin sátsji sín kíxin ó nohe tí sín a kíxin it'é ch'ín Timoteo la mé griego. ⁴ Ntá sákjuí sín la kaín tí chjasin k'uátsínska sín la nixjehe sín tí sín kíchó ni la chrónkaxín sín tí nkehe tsík'etoan tí sín apóstol la ko tí sín t'etoan kuénte ninko chjasin Jerusalén. ⁵ Ntá tí chojni tinkáchónki Inchéni mé antsí má ntoá k'uéjó sín la ko jnkojnko yaon sítinkákótsjé sín.

Xrínahya titàya k'uíkuèn ch'ín Pablo ijkno chojni estado Macedonia

⁶ Ntá Nchákuén Dios kjuanjonhyá kjuachaxin kíxin sátsjikjako sín itén Dios estado Asia ntá k'uátsínska sín nó estado Frigia la ko estado Galacia. ⁷ Ntá tió kjuíji sín estado Misia ntá kjuenkayáxin sín sáchrókjui sín nó estado Bitinia. Ntá Nchákuén Jesús kjuanjonhyá kjuachaxin kíxin sátsji sín nó ntiha. ⁸ Méxra k'uátsínska sín ikjín tí estado Misia la ntá kjuíji sín chjasin Troas chrínta ntayaon. ⁹ Ntá ijkno tie xrínahya titàya k'uíkuèn ch'ín Pablo ijkno ch'ín estado Macedonia kjuák'exín toté ch'án chrónòa ch'án kíxin: "T'átsínska Macedonia tsjínkitsani," ichro ch'án. ¹⁰ Méxra tíha tsík'ikon ch'ín Pablo la ntá tuénxín kóyaxínhinni kíxin sátsjini estado Macedonia kíxin kónoexínni kíxin Dios kjueyáni kíxin ntiha tsjakoni tí tan jína tsaáxin chojni. [Janhan tí ch'ín Lucas ikjinni tí xroon i k'uéjókotoxiñni kíchó ni ntiha.]

Ch'ín Pablo la ko ch'ín Silas, k'uéjó sín chjasin Filipos

¹¹ Ntá ntaha chjasin Troas k'uíxenxínni ijkno ntabárco ntá sákjuíni ntoí ijkno nonte ntsí tinkátaón ntá it'in Samotracia. Ntá tí yaon chr'éxín kjuíjini chjasin Neápolis. ¹² Ntá ntiha sákjuíxinni la kjuíjini chjasin Filipos. Tí chjasin a mé k'uéchóntha tí sín romano ósé ntá ijkno chjasin antsí má tjetoan tí it'ó tí estado Macedonia. Ntaha mé k'uéjóni iso yaon. ¹³ Ntá tí yaon t'ok'éhe sín ntá k'uaxrjexínni tí chjasin Filipos ntá sákjuíni ijkno chrínta ntarío mé ntiha kuénen sín tsojnkotsé sín tsonixjehe sín Dios. Mé ntaha k'uéjótjaxínni la kjuankíxinni kjuakoheni iso chojni chjin tsíkójnkotsé ntiha. ¹⁴ Ntá ijkno tí jehe sín mé ijkno tjan it'in tjan Lidia la tsíkjixín tjan chjasin Tiatira. Jehe tjan mé nchekji tjan ika náxrjón kjátse tié. Ntá jehe tjan xraxinkaon tjan Dios la jína tjetinhin tjan la Inchéni mé kjuínkitsa əsén tjan kíxin tsinhin tjan jína tí nkehe kjuako ch'ín Pablo. ¹⁵ Ntá jehe tjan la ko kaín tí sín tjejó ntøe tjan mé kuíkite sín. Ntá chrónóehe tjan tí ch'ín Pablo ntáchro tjan kíxin:

—Tí chaxín tjátsøan kíxin chaxín tinkáchónkini Inchéni la jína chrókuitøha ntóéni ntihi —ichro tjan.

Ntá kjónté kuítóheni ntiha.

¹⁶ Ntá ijkno yaon sákjuíni tí nó kuénen sín nixjeexín sín Dios ntá ó xétani ijkno tjan tjarisoá chóntha nchákuén tí jínahya tónoexín tjan. Ó tsík'íná tjan la nchónhya chichaon tacha tí ñché tjan kíxin xíkaha tónohe tjan. ¹⁷ A ntá tí tjan tjarisoá a kjuankíxín tjan tinkáchréhe tjan tí ch'ín Pablo la ko tí jeheni ntá t'èya tjan ntáchro tjan kíxin:

—Tí sín i ch'ehe sín xra Dios nkaya nkajni la tjako sín ijkno ntia jína tsaáxin chojni.

¹⁸ Mé xíkaha kjuich'e tjan itsjé yaon. Ntá kóchjinhín ch'ín Pablo la nkájtíá ch'án nixjehe ch'án tí nchákuén tí jínahya chóntha tí jehe tjan, ntáchro ch'án kíxin:

—Kjuachaxiéñ ihnié Jesucristo tétuñhán kíxin ts'axrjéxian tí jehe tjan —ichro ch'án.

Ntá tuénxín ó k'uaxrjexín tí nchákuén tí jínahya tí jehe tjan.

¹⁹ Na ntá tí ñché tjan a mé k'uíkon sín nkehe kónhen tjan la ó nohe sín kíxin í tsjachahya sín chichaon kuénte tì xra ch'e tjan. Ntá kóníñkaon sín ntá itsé sín tí ch'ín Pablo la ko ch'ín Silas la kuinkánkjen sín sákjuíko sín tí tjejó tí síxréé ntasin tjetoan. ²⁰ Ntá kjuíkaán sín ntaha ti tjejó tí sín juez la ntáchro sín kíxin:

—Tí sín i mé sín judío la imá sítjité sín chjasénni. ²¹ Tjako sín tí nkehe kuénhyan i tsónoheni la tóxrjéñhyani sich'eni kíxin jeheni mé chojni romanoni.

²² Kaín tí sín ntiha kóníkkakonhen sín tí jehe sín. Ntá tí sín juez mé k'uetoan ts'axrjehe sín iké sín ntá ts'ekonxín sín nta sé. ²³ Ntá tió kjuixin k'uékon sín nchónhya ntá chr'áxenhen tí sín a ntøechiso ntá k'uëtuënenhen sín tí ch'ín t'ayakonhen ntøechiso kíxin jína chrók'uayakonhen sín tí sín a. ²⁴ Ntá tí ch'ín t'ayakonhen ntøechiso mé k'uáyéhe ch'án kjuachaxin ntá chr'áxenhen ch'án tí sín a ijkno cuarto chriká ntøechiso kíxin ts'axrjehya sín. Ntá chr'áxenhen ch'án toté sín tí nta tjejóxrja la ko chica ye.

²⁵ A ntá tió k'áxrótjen la ch'ín Pablo la ko ch'ín Silas mé nixjéhe sín Dios la ko itsje sín himno kuénte Dios. La tí sín í so tjejóchjina mé tjejótinhin sín kíxin xikaha tjejóch'e sín tjejótsje sín. ²⁶ Ntá xrínahya tjian kuinkí nonte la kjuínchekinkí kuenté tí xránkixín ntøechiso ntá tuénxín kaín tí ntója puerta mé xítjéhe la ko k'uánótjen tí chica cadena tsíchróntetoxín kaín tí sín tjejóchjina. ²⁷ Ntá tí ch'ín t'ayakonhen ntøechiso mé k'uáya ch'án. Ntá k'uíkon ch'án kíxin síxitjéhe tí ntója puerta ntøechiso a. Ntá kuakitsje ch'án chica espada ntá chrók'oyán ch'án asén ch'án kíxin kjuenkayáxin ch'án kíxin ó kjuixin tsíkinká kaín tí sín síchjina, ichro ch'án. ²⁸ Ntá ch'ín Pablo k'uëya ch'án itsen ntáchro ch'án kíxin:

—Náhí kohya nkehe ch'ehé asán kíxin kaín ni naxa tjejóni ntihyo —ichro ch'án.

²⁹ Ntá tí ch'ín t'ayakonhen ntøechiso kjuanchia kíxin ts'ákjen xrohi ntá k'uíxenhen ch'án kuinká ch'án la síxranka ch'án chrakon ch'án ntá kjuítsíka ch'án toté tí ch'ín Pablo la ko tí ch'ín Silas. ³⁰ Ntá tuénxín kuakitsjexín ch'án sín ntiha ntá kjuanchankíhi ch'án sín kíxin:
—¿Nkexrí chrókjuit'a kíxin chrókuaána? —ichro ch'án.

³¹ Ntá kjuátehe sin ntáchro sín kíxin:

—Títekávan Ínchéni Jesucristo la tsaá jaha la ko tí sín tjejó ntøa.

³² Ntá kjuakohé sín tí jehe ch'án a la ko kaín tí sín tjejó ntøe ch'án ti tan kuénte Ínchéni.

³³ Na kjónté sitié la tí hora a sákjuiko ch'án sín kjuínchek'ijmá ch'án tí tsíchrít'ó sín. Ntá tuénxín jehe ch'án la ko kaín xín sín tjejó ntøe ch'án mé kuíkite sín. ³⁴ Na ntá chr'éxín tí jehe ch'án sákjuiko sín ntøe ch'án. Ntá ntiha kjuanjon ch'án nkehe sine sín. Imá chéhe ch'án la ko kaín tí sín ntøe ch'án kíxin ó kuítekaon sín Dios.

³⁵ Ntá kóyaon nchítjen ntá tí sín juez k'uëtuënenhen sín tí sín policía sátsjitsjehe sín tí ch'ín t'ayakonhen ntøechiso kíxin chrókjuanjon ch'án kjuachaxin ts'axrje ch'ín Pablo la ko ch'ín Silas. ³⁶ Ntá tí ch'ín t'ayakonhen ntøechiso mé chénka ch'án tí ch'ín Pablo tí nkehe chrónka sín ntáchro ch'án kíxin:

—Tí sín juez a mé tsík'etoan sín kíxin tsjánjuan kjuachaxin kíxin sátsjirá. Méxra sájtirá kjuaxróxin —mé xikaha ichro tí ch'ín a.

³⁷ Ntá ch'ín Pablo ntáche ch'án tí sín policía kíxin:

—A ntá jeheni kjónté chojni romanoni mé kjuateni sín nkayakon nchónhya chojni. Jehya kíxin chrókjuanchia sín nke jié chóntani. Náhí. Kjónté la chr'áxenhenni sín ntøechiso. A ntá ijie la ¿á imó chrókuakitsjeni sín ní? Náhí. Tsijija ti jehe sín tsakitsjeni sín —ichro ch'án.

³⁸ Ntá tí sín policía mé sákjuíchénka sín tí sín juez nkehe ntáchro tí sín tjejóchjina. Ntá imá chrakon sín kíxin kuínhin sín kíxin tí sín a mé chojni romano. ³⁹ A ntá sákjuí tí sín juez ntá chrónòehé sín tí ch'ín Pablo la ko ch'ín Silas kíxin tsóníkkakonhya sín kíxin xikaha kónhen sín ntá k'uaxrjexín sín ntiha ntá chrónòa tí sín a sájtixin sín tí chjasin ntiha. ⁴⁰ Ntá ch'ín Pablo la ko ch'ín Silas tió k'uaxrjexín sín tí ntøechiso ntá kjuíji sín ntøe tí tjan Lidia. Ntá tió kjuixin sákjuítsjehe sín tí sín kichó ni la kjuínchekhé sín ntá sákjuíxín sín ntiha.

17

Kóníkaon tí chojni chjasin Tesalónica

¹ Ntá ch'ín Pablo la ko ch'ín Silas la k'uátsínka sín chjasin Anfípolis la ko chjasin Apolonia ntá kjuíji sín chjasin Tesalónica. Ntaha itjen ijkno njinko judío. ² A ntá ch'ín Pablo sákjuí ch'an njinko éxi kuénenhen ch'án la jnkognko yaon t'ok'éhe sín chjina iní semana ikjo ch'án tí jehe sín la chrónkaxín ch'án nkexrí ntáchro xroon itén Dios. ³ Kjuako ch'án

kixin tí nkexro Cristo mé t'ichjánxín its'en la ko chr'éxin tsozechón ch'án ínaá. Ntáchro ch'án kixin:

—Tí ch'ín Jesú a mé jeheni chrónkaxíni kixin tsinhínrá jahará mé Cristo tíha.

⁴ A ntá iso tí sín judío kuítekaon sín ntá k'uíto sín tí ch'ín Pablo la ko tí ch'ín Silas. Ntá kjaxin kuítekaon itsjé tí sín griego xraxinkaon Dios a la ko kjaxin nchónhya chojni chjin tjetoan kuítekaon. ⁵ A ntá iso tí sín judío tinkáchónkiha Ìnchéni mé imá kóchjio sín ntá kójnokséko sín iso chojni jínahya ch'e, ch'ehya sín xra, ixri ntja. Ntá kaín sín k'uixité sín la kjuínchexakonhen sín tí sín siín chjasén sín. Ntá itsjé sín k'uixenhen sín ntœe ijnko ch'ín it'in Jasón kjueyá sín ch'ín Pablo la ko ch'ín Silas kixin tjinkaon sín sáchrókuíkohe sín tí sín a tí sín t'etoan. ⁶ A ntá k'uitjahya sín tí sín a ntá kjónté itsé sín tí ch'ín Jasón la ko í so tí sín tinkáchónki Ìnchéni ntá kuinkánkákjen sín sákjuíko sín tí siín tí síxreé tí chjasin ntiha. Ntaha nínkaon sín k'uèya sín ntáchro sín kixin:

—Tí sín i mé kjuínchexakonhen chojni kuenté chjasintajni. La ntá ó kjui sín chjasénni ntihi kjaxin. ⁷ La ntá tí ch'ín Jasón a mé kjuanjon ch'án kjuachaxin kixin tí sín a mé ts'ejo sín ntœe ch'án. Kaín sín titekakonhya sín tí ley kuènte tí ch'ín romano t'etoan. Ntáchro sín kixin itjen í jnko nkexro antsí má t'etoan, ntá tíha mé Jesú —ichro sín.

⁸ Ntá tió kuínhin kaín tí sín tsíkójnoksé la ko tí síxreé ntá k'uixité sín kóninkaon sín. ⁹ Ntá ch'ín Jasón la ko tí sín tjejóko ch'án kjuenkä sín ntá tí síxreé kuítóhe sákjuí sín.

Ch'ín Pablo la ko ch'ín Silas sákjuí sín chjasin Berea

¹⁰ Ntá tuénxín tí tie a tí sín kichó ni mé ichr'án sín ch'ín Pablo la ko ch'ín Silas kixin sátsji sín chjasin Berea. Ntá tió kjuíji sín ntaha k'uixenhen sín tí njinkoé tí sín judío. ¹¹ A ntá tí sín judío ntiha la antsí má jína əsén sín, ntá tí sín chjasin Tesalónica la náhi. Antsí má kóxrjinhín sín tsinhin sín tí itén Dios la jnkojnko yaon kjuínchekuáxin sín tí xroon chóntha itén Dios kixin tsonohe sín á chaxín ntoá xikaha tí ntáchro tí sín a. ¹² Méxrä nchónhya tí jehe sín kuítekaon sín la ko kjaxin nchónhya tí chojni chjin griego tjetoan mé kuítekaon la ko kjaxin tí chojni ntoa. ¹³ A ntá tí sín judío chjasin Tesalónica konohe sín kixin ch'ín Pablo mé kjuakoxin itén Dios chjasin Berea ínaá. Ntá sákjuí sín ntiha a ntá kjuínchekónikaon tí sín a. ¹⁴ A ntá tí sín kichó ni tinkáchónki Ìnchéni ichr'án sín tí ch'ín Pablo sátsji nó chrínta ntayaon. A ntá ch'ín Silas la ko ch'ín Timoteo naxa kuítóhe sín tí chjasin Berea. ¹⁵ Ntá iso tí sín ntiha sákjuíko sín tí ch'ín Pablo la kjuíji sín tí chjasin Atenas. Ntá kjan sín chjasén sín kixin k'uetoan ch'ín Pablo kixin tsochrónka sín kixin tjoka chrókoxakonhen tí ch'ín Silas la ko tí ch'ín Timoteo tsiji sín ntiha tsoxéta sín ch'án.

Ch'ín Pablo itjen chjasin Atenas

¹⁶ Ntá nachrohe kjuák'echónhen ch'ín Pablo kixin itsji tí ch'ín Silas la ko tí ch'ín Timoteo chjasin Atenas ntá imá k'uává əsén ch'án kixin k'uíkon ch'án kixin tí chjasin ntiha siín nchónhya tí nkehe tsíkjanya. ¹⁷ Ntá tí njinko ntiha kjuakohé ch'án iso sín judío la ko iso tí chojni xraxinkaon Dios. La kaín yaon ntasin kjuák'e ch'án kjuakoxin ch'án tí chojni siín ntiha. ¹⁸ La iso tí sín kjuínchekuáxin tí xroon kuènte tí chojni it'in epicúreo la ko iso tí sín kjuínchekuáxin tí xroon kuènte tí chojni it'in estoico kjuankixin nixjehé sín tí ch'ín Pablo. Iso sín ntáchro sín kixin:

—¿Nkekuénté kixin ánta tjenixja tí nkexro a?

La í so sín ntáchro sín kixin:

—Méxrä tjenixja ch'án kuènte í jnko dios.

Mé xikaha ichro sín kixin kjuako ch'ín Pablo tí tán jína kuènte Jesú la ko kjuako ch'án kixin Jesú kjónté k'uén ntá xechón. ¹⁹ Ntá sákjuíko sín ch'ín Pablo ijnko tjo it'in Areópago. Ntiha mé kuènen sín tójnoksé sín kixin tjenkayáxixín sín. Ntá nixjehé sín tí ch'ín Pablo, ntáchro sín kixin:

—Tjinkaonni tsochrónka tí nkehe nixin kjuíko. ²⁰ Itsjé tí nkehe ókjé tjetjàkua la tjinkaonni tsotonheni nkehe t'axrjexín kaín tíha —ichro sín.

²¹ Ntá kaín tí sín chjasin Atenas la ko tí sín tsíkjixín ókjé tjejó ntiha mé tóxrjéñhya sín í jnko xra, jehí tóxrjíñhín sín chrókuinhin sín la ko chrónixja sín ijnko nkehe nixin.

²² Ntá ch'ín Pablo k'uínkatjen ch'án kjuák'exín toté ch'án tí siín tí jehe sín chrítaón tí Tjo Areópago. Ntá ntáchro ch'án kíxin:

—Jahará tjejorá chjasin Atenas tinhínrá. Janhan ó k'uíkuan kíxin jahará la itsjé dios tinkachónkirá. ²³ Ntá tí kjuak'é ntiha k'uájia la k'uíkuan itsjé tí nketí tjásixínrá culto ntá k'uitja ijnko altar ts'íníxín kíxin: “Ntihi xraxinkakonxínni ijnko Dios naxa chónhyani”. Méxra tí Dios xráxinkáonrá kjónté naxa chonhyará mé tí Dios a mé tjákohará.

²⁴ Tí Dios mé kjuich'eña ch'án chjasintajni la ko kaín nkehe siín chjasintajni. Jehe ch'án mé ñinché nkajní la ko chjasintajni. La tjexenhya ch'án ijnko ninko tsíkjich'énaxín chojni tja. ²⁵ La t'ichjánxienhya ch'án kíxin chojni chrókuinkitsa tí jehe ch'án kíxin jehe ch'án mé chjéhe kjuachón kaín chojni la ko tjanjon ch'án xrínto la ko kaín nkehe siín.

²⁶ 'Kaín tí nación k'uaxrjeníxín jnkokoá chojni kíxin chrók'uejó sín nkuíxín chjasintajni. Kjixin chrónka Dios nkesá la ko nketí ts'ejó chojni. ²⁷ Méxra jeheni t'ichjánxín tsjeyáni Dios kíxin ntá tsienxínni nkexrí ts'itjani ch'án. Jehya imá ikjín itjen ch'án, chjino tí tjejóni itjen ch'án. ²⁸ Jehe ch'án tjejóchónxínni ch'án la ko nchekinkíni ch'án la jehe ch'án t'ayakonhenni ch'án. Mé xíkaha tsíntáchro jnko ch'ín chjasánrá ósé kíxin: “Jeheni mé naxa kjéhya Dios.” ²⁹ Jheni mé naxa kjéhyani Dios méxra xitjahya tsjenkayáxinni kíxin sich'énani Dios chica oro o chica plata o xro kíxin exí tsíkjenkayáxin chojni kíxin sich'eña sín dios kuente sín. ³⁰ Senó Dios kónínkakonhya ch'án kíxin ó nohe ch'án kíxin naxa chónhya sín ch'án. Ntá ije t'etuenhen Dios kaín xín chojni siín chjasintajni tsokjan sín la tsinkáchónki sín tí jehe ch'án. ³¹ Dios tsíkjeyá ijnko yaon sinchekitqexín ijié chojni chjasintajni. Tsíkjeyá ch'án ijnko chojni la kjuakoxín kaín kjuachaxin kíxin tí nkexro kjónté tsík'en la xechón ínaá —ichro ch'ín Pablo.

³² Na ntá tió kuínhin sín kíxin nkexrí tsozechón chojni tsík'en ntá iso sín kjuanoá sín ch'án. Ntá í so sín ntáchro sín kíxin:

—Chr'éxín tsinhinni ínaá tí nkehe ntáchrua —ichro sín.

³³ Ntá ch'ín Pablo kuítuhe ch'án tí jehe sín. ³⁴ Na ntá iso sín kjuíchréhe sín ch'ín Pablo la kjuankíxin tinkáchónki sín Inchéni. Ijnko tí sín tinkáchónki a mé it'in ch'án Dionisio mé ijnko tí síxreé kjuínchekitqexín ijié chojni chrítaón tí Tjo Areópago la ko ijnko tjan tinkáchónki tjan mé it'in tjan Dámaris la ko í so sín kjaxin kjuankíxin sín tinkáchónki sín Inchéni.

18

Sákjuí ch'ín Pablo chjasin Corinto

¹ Ntá kjuixin tíha ntá ch'ín Pablo sákjuíxín ch'án chjasin Atenas la sákjuí ch'án chjasin Corinto. ² Ntiha mé xéta ch'án ijnko ch'ín judío it'in Aquila. Jehe ch'án mé tsíkjixín ch'án estado Ponto la séhya jehe ch'án la ko ichjíen ch'án Priscila mé kjuixin sín nación Italia kíxin t'ichjánxín ts'axrjexín sín ntiha kíxin tí ch'ín t'etoan mé it'in Claudio k'uetoan ch'án kíxin kaín tí sín judío mé ts'axrjexín sín tí chjasin Roma. Ntá ch'ín Pablo mé kjuínxjehé ch'án sín. ³ Jnkokón xra ch'e sín la ko jehe ch'án, ch'eña sín kamantá t'óna nchia. Méxra ntá ntahó kuítöeko kichó sín kíxin jnkokoá sich'e sín tí xra a. ⁴ Ntá jnkojnko tí yaon t'ok'ehé sín sákjuí ch'ín Pablo tí ninko nixjehe ch'án tí sín judío la ko tí sín jehya judío kíxin tjinkaon ch'án kíxin kaín tí chojni chrókuitekaon sín.

⁵ Ntá tió ch'ín Silas la ko ch'ín Timoteo kjuixín sín estado Macedonia ntá ch'ín Pablo kjuák'e xra ó kjuako ch'án itén Dios kíxin tsongohe tí sín judío kíxin Jesús mé tí nkexro Cristo. ⁶ Ntá tí sín judío mé kjuankíxin kónínkakonhen sín tí ch'ín Pablo la imá k'uántaxíñhín sín ch'án. Ntá jehe ch'án k'ótsjènka ch'án iké ch'án kíxin kjuakoxín ch'án kíxin xíkaha tsjasóte sín. Ntá ntáchro ch'án kíxin:

—A ntá ijie la jahará kjuéyará tí jie ts'itjáyanxínrá. A ntá janhan la í chontahya jie kíxin ó kjuákhárá tí tán jína, a ntá kuítékákonhyará. A ntá ijie la íchá jína sátsjia tsjákohá tí sín jehya judío —ichro ch'án.

⁷ Ntá k'uaxrjexín ch'án ninko ntá sákjuí ch'án ntoi ejnko chojni mé it'in Justo mé jehe ch'án xraxinkaon ch'án Dios. Ntöe ch'án mé chjinaxón ninko. ⁸ Ntá ch'ín Crispo, ejnko nkexro t'etoan kuénte ninko, la ko kaín tí sín tjejó ntoi ch'án, mé kjuankíxin sín kuítekaon sín Ínchéni. Kjáxin itsjé tí sín tjejó chjasin Corinto mé kuínhin sín tí tan la ntá kjuankíxin sín kuítekaon sín Ínchéni la kuíkite sín. ⁹ Ntá ejnko tie titàya k'uíkuén ch'ín Pablo Ínchéni nixjehé ch'án ntáchro kíxin:

—Chrakonhya tjákua itan kuéntana. Titoéhya tsochronka ¹⁰ kíxin janhan tjejóko kíchó ni kíxin ninkexró kohya nkehe sit'aha. Kíxin janhan la chonta itsjé chojni tí chjasin ntihi tinkáchónki tí janhan.

¹¹ Méxra ch'ín Pablo mé kuítóhe ch'án ejnko nánó ko t'o ntiha chjasin Corinto, kjuakohe ch'án sín itén Dios.

¹² A ntá tí yaon k'uetoan ch'ín Galión estado Acaya, ntá itsjé tí sín judío kónínkakonhen sín tí ch'ín Pablo. Ntá itsé sín ch'án sákjuíko sín ch'án tí tjejó tí sín t'etoan. ¹³ A ntá ntáche sín tí ch'ín t'etoan kíxin:

—A ntá tí nkexro i ixri ch'án tjachroe ch'án chojni kíxin ókjé nkexrí chrókuinkáchónki sín Dios la ko tsitekakonhya sín tí nkehe t'etoan tí ley.

¹⁴ Na ntá tjinkaon ch'ín Pablo chrónixja, ntá ch'ín Galión ntáche ch'án tí sín judío kíxin:

—Tí chaxín ejnko jie jié kjuasín tí ch'ín i ntá kjónté chrókuinhán tí nkehe ntáchrórá jahará judíorá. ¹⁵ A ntá jehí tjanjonxínrá tí nkehe nixjará la ko ihnjé chojni la ko tí ley tinkachónkirá. Méxra jahórá chrókuinchekitoexínrá tíha kíxin janhan tjinkakonhya ts'óna juez sintakitoaxian kuénte tí nkehe a —ichro ch'án.

¹⁶ Ntá k'uetoan ch'án kíxin sátsjixín sín ntiha. ¹⁷ Ntá tí sín griego la kónínkakon sín la itsé sín tí ch'ín Sóstenes tí ch'ín t'etoan kuénte tí ninko judío, la ntahó kjuatexín sín ch'án. Jehe ch'ín Galión a la mé kjónté k'uíkon ch'án la ántosén ch'án.

Ch'ín Pablo xíkjan ch'án chjasin Antioquía ntá sákjuí ch'án níxin viaje

¹⁸ A ntá ch'ín Pablo kuítóhe ch'án chjasin Corinto itsjé yaon ntá nixjehé ch'án tí sín kíchó ni ntiha ntá k'uíxenhen ch'án ntabárco sákjuí ch'án nó estado Siria a sákjuíko ch'án tjan Priscila la ko ch'ín Aquila. Ntá kjuíji sín chjasin Cencrea la ntá naxá k'uíxenhya ch'án ntabárco ínaá la ikjín ch'án mòloé kíxin xíkaha kjuakoxín ch'án kíxin kjuínchexiteyá ch'án tí nkehe chrónka ch'án. ¹⁹ Ntá tió kjuíji sín tí chjasin Éfeso ntá kuítóhe ch'ín Pablo tí tjan Priscila a la ko tí ch'ín Aquila. Ntá sákjuí ch'án ejnko ninko la ikjo ch'án tí sín judío tsíkójnktosé ntiha. ²⁰ Ntá jehe sín chrónia sín kíxin chrókuitóhe ch'án isé ntiha, kjánchó jehe ch'án la chrohya ch'án. ²¹ Ntá tuénxín nixjehé ch'án sín ntáchro ch'án kíxin:

—T'ichjánxín tsjak'é chjasin Jerusalén tí yaon kia itsi. Kjánchó tsokjan ínaá tsotsjahá tí jahará tí naxá tjinkaon Dios —ichro ch'án.

Ntá kuítóhe ch'án sín ntá k'uíxenhen ch'án ntabárco sákjuíxín ch'án chjasin Éfeso. ²² Ntá tió kjuíji ch'án chjasin Cesarea ntá sákjuí ch'án chjasin Jerusalén na ntá sákjuíxjehé ch'án tí sín tinkáchónki Ínchéni ntiha. Ntá tuénxín xíkjan ch'án chjasin Antioquía. ²³ Ntá kuítóhe ch'án ntiha itsjé yaon ntá xíkji ch'án ínaá ntá xík'atsínka ch'án itsjé chjasin estado Galacia la ko estado Frigia la kjuínchexhé ch'án kaín tí sín tinkáchónki Ínchéni.

Ch'ín Apolos kjuako ch'án chjasin Éfeso

²⁴ Ntá tí yaon a mé ejnko ch'ín judío it'in Apolos ikui chjasin Éfeso mé tsíkjixín ch'án chjasin Alejandría. Jehe ch'án mé ejnko nkexro qantsí nohe chrónka kíxin chóxin ch'án xroon itén Dios. ²⁵ Jehe ch'án ó xrakohé ch'án ntje Ínchéni ntá imá tóxrjinhán ch'án nixja ch'án la ko tsjako jína kuénte ch'ín Jesús. Kjánchó jehó nohe ch'án nkexrí kuíkite chojni

ch'ín Juan. ²⁶ A ntá ch'ín Apolos kjuák'e ch'án kjuako ch'án tí ninko la chrakonhya ch'án. Ntá tió kuínhin tí tjan Priscila la ko tí ch'ín Aquila tí kjuako ch'án ntá k'uaxrjentako sín ch'án la kjuakohe sín ch'án tí nkehe naxq̄ noehya ch'án kuènte ntje Dios. ²⁷ Ntá tjinkaon ch'ín Apolos sátsji ch'án estado Acaya. Ntá tí sín kichó ni kjuinkitsa sín ch'án la ikjin sín ijkno xroon chréhen sín tí sín tinkáchónki Ìnchéni tjejó ntiha kixin jína tsjanjon sín kjuachaxin tsjak'e ch'án. Ntá tió kjuíji ch'án estado Acaya ntá kjuinkitsa ch'án kjuakohe ch'án tí sín tsíkinkitsa Dios tsíkitekaon sín ch'án. ²⁸ Ntá kjuakoexín ch'án kaín chojni kixin ntoáhya ch'e tí sín judío, la xitjahya tsontáchro sín náhi. Kjuakohe ch'án sín kixin tí xroon itén Dios chrónka kixin Jesús mé tí nkexro Cristo.

19

Kjuák'e ch'ín Pablo chjasin Éfeso

¹ Ntá naxq̄ itjen ch'ín Apolos tí chjasin Corinto ntá ch'ín Pablo k'uatsínska ch'án nchónhya chjasin chrík'a jna la ntá kjuíji ch'án chjasin Éfeso la ntaha xéta ch'án nchónhya chojni tinkáchónki ntje Dios. ² Ntá kjuanchankíhi ch'án sín kixin:

—¿Á k'uayéhérá Nchakuen Dios tió kuinkachónkirá Ìnchéni? —ichro ch'án.

Ntá kjuátēhe sín kixin:

—Náhi, kienhyani á tjen Nchakuen Dios —ichro sín.

³ Ntá kjuanchankí ch'ín Pablo kixin:

—¿Nkexro kjuachaxién kuikitiará? —ichro ch'án.

Ntá kjuátēhe sín kixin:

—Éxi kjuako ch'ín Juan kuíkiteni —ichro sín.

⁴ Ntá ntáchro ch'ín Pablo kixin:

—Ch'ín Juan mé kuikite ch'án chojni kixin chrókjan sín chrókuinkáchónki sín Dios la ko kjuako ch'án kixin chrókuitekaon sín tí nkexro itsi chréxin. Tíha mé Jesús, tí Cristo —ichro ch'án.

⁵ Ntá kuínhin sín xikaha ntá kuikite sín kjuachaxién ihnjé Ìnchéni Jesús. ⁶ A ntá ch'ín Pablo kjuák'etja itja ch'án chrítaón ikja sín ntá ikui Nchakuen Dios k'uayéhe sín ntá kjuankixín sín nixja sín itsjé nkiva ókjé la ko kjuankixín sín kjuako sín tí nkehe kjuanjón Dios. ⁷ Kaín tí sín ntoa tinkáchónki mé chjina teyó sín.

⁸ A ntá chjina iní nitjó, la ch'ín Pablo k'uékji ch'án ninko la kjuako ch'án kaín asén ch'án. Nixjehé ch'án chojni la chrónka ch'án nkexrí tjen tí kjuachaxin kuènte Dios. ⁹ A ntá iso sín la kjonté la imá icha asén sín tjinkakonhya sín tsinkáchónki Ìnchéni. Ntá imá t'ántaxínhin sín tí tan jína kuènte Ìnchéni nkayakon chojni. Ntá tí ch'ín Pablo k'uaxrjentako ch'án tí sín tinkáchónki Ìnchéni ntá ijkno escuela it'in Tiranno ntaha kjuakoexín ch'án kaín yaon.

¹⁰ Mé xikaha kjuák'e ch'án kjuako ch'án iyó nánó, ntá kaín tí sín k'uéjó ntiha estado Asia mé kuínhin sín itén Ìnchéni Jesús, mé tí sín judío la ko kjaxin tí sín jehya judío. ¹¹ Ntá Dios antsí má kjuakoexín kjuaxroan jié kixin tí nixja ch'ín Pablo. ¹² Ntá itsjé chojni kjuikao sín pañitoé sín la ko iké sín kuákoxin ch'ín Pablo ntá sákjuíko sín kjuínchekakoxin sín tí sín níhi ntá kuítóhe sín jína la ko kjaxin nchakuen tí jínahya k'uaxrjexín tí jehe sín.

¹³ A ntá iso tí sín judío ixri sín ntáchro sín tónohe sín tsakitsje sín nchakuen tí jínahya ch'iyehe sín chojni mé tjinkaon sín tí kjuachaxién ihnjé Jesús. La ntá ntáche sín tí nchakuen tí jínahya kixin:

—Kjuachaxién ihnjé tí Jesús tjako tí ch'ín Pablo t'etoanxínni kixin jaha nchakuen jínahya sájtixian ntihi —ichro sín.

¹⁴ Mé xikaha k'uékjich'e tí yato xjeen ijkno ch'ín judío it'in Esceva mé ijkno nchat'á t'etoan. ¹⁵ Ntá ijkno yaon nixjehé sín nchakuen tí jínahya. Ntá tí nchakuen tí jínahya kjuátēhe ntáchro kixin:

—Chóxinni nkexro ch'ín Jesús la ko ó noheni nkexro ch'ín Pablo. A ntá jahará, ¿la nkexro tí jahará? —ichro tí nchäkuen tí jínahya.

¹⁶ Ntá tí ch'ín chóntha tí nchäkuen tí jínahya kjaminkitaón ch'án tí jehe sín a la ntá imá tséhe ch'án kjuacha ch'án kjuíñcheníhi ch'án kaín sín la imá kjoté sín. Ntá k'uaxrjexín sín ntøe sín tjóchín sín la ko síchrít'ø cuérpoé sín. ¹⁷ Ntá kaín tí sín judío la ko tí sín jehya judío tjejó chjasin Éfeso mé kuínhin sín tí nkehe tsíkónhen la imá chrakon sín. Imá jié tí kjuachaxin iñnjé Inchéni Jesús, ichro sín.

¹⁸ Kjaxin itsjé tí sín tinkáchónki Inchéni mé kjuíchrónka sín kíxin tí ósé k'uékjich'e sín nchónhya nkehe jínahya. ¹⁹ Itsjé tí sín k'uékjich'e nkehe jínahya k'uékjinhexroqan sín la kuikao sín libro k'uékjich'exín sín xra ntá kjuaka sín tí libro a la k'uíkon nchónhya chojni. Ntá kuákjaxin sín cuenta nkekjaín k'uíte tí libro a ntá kónhe sín cincuenta mil peso k'uíte tí libro a kjuaka sín. ²⁰ Ntá tí itén Inchéni sítinkák'ánkí la tjäkoxin kíxin chaxín chóntha kjuachaxin.

²¹ Ntá kjuixin tíha ntá ch'ín Pablo mé kjuenkayáxin ch'án chrókjuitsjehe ch'án tí sín nó Macedonia la ko Acaya ntá ntaha sáchrókjuixin ch'án chjasin Jerusalén. Ntá kjaxin ntáchro ch'án kíxin tsjixin sátsji ch'án chjasin Jerusalén ntá kjaxin t'ichjánxin sátsji ch'án chjasin Roma. ²² Ntá ichr'án ch'án iyó tí sín tjinkitsa ch'án sátsji sín estado Macedonia, mé ch'ín Timoteo la ko ch'ín Erasto, ntá nachrohe jehe ch'án naxa kuítøhe ch'án estado Asia iso yaon.

Kóninkaon k'uíxité chojni chjasin Éfeso

²³ Ntá itsjé chojni chjasin Éfeso kóninkaon sín la k'uíxité sín kíxin kóxrjéñhya sín tí itén Inchéni. ²⁴ Kíxin ntiha mé itjen ijnko ch'ín it'in ch'án Demetrio. Kjuích'ena ch'án nkehe chica plata tsjehe éxi ninko kuènte tí dios Diana la nchónhya chichaon kjuacha ch'án la ko tí sín kjuich'eko ch'án xra. ²⁵ Ntá kójnkotséko sín í so sín jnkokón tí xra ch'e sín. Ntá ntáchro ch'án kíxin:

—Jahará nohará kíxin tí xra ch'eni la tjachani jína la náxrjón tjejóni. ²⁶ Kjánchó ó k'uíkonrá la ko ó kuínhínrá tí nkehe xritjako ch'ín Pablo. Tjako ch'án kíxin tí nkehe tsíkjanoya mé jehya Dios. Kjánchó jehya chjasin Éfeso ó. Náhí, nkuíxín estado Asia kuítekaon chojni. ²⁷ Imá tóxakonhenni kíxin tí xra ch'eni ts'itjáyan la kjaxin tóxakonhenni tsontáchro sín kíxin chónkó tí ninkoe tí dios Diana imá jié la ko ts'itjáyan tí kjuachaxin kuènte tjan. Ntá í tsitekakonhya sín tí kjuachaxin kuènte tjan nkuíxín estado Asia la ko kuenté chjasintajni —ichro ch'ín Demetrio.

²⁸ Ntá tí kuínhin sín xíkaha la imá kóninkaon sín ntá k'uëya sín ntáchro sín kíxin:

—Ts'itjáyanhya tí dios Diana kuènte sín Éfeso.

²⁹ Ntá imá tóxakonhen tí sín chjasin Éfeso la í noehya sín nkehe chrókjuch'e sín kíxin kóninkakonhen sín tí ch'ín Gayo la ko tí ch'ín Aristarco mé iyó sín tsíkjaxin sín Macedonia. Ntá kuinkánkákjen sín kuikao sín tí nchia jié tójkotséxin sín xráxín. ³⁰ Ntá ch'ín Pablo tjinkaon ch'án chrók'uixenhen ch'án tí nchia kíxin tsonixjehé ch'án sín, a ntá tí sín tinkáchónki Inchéni mé chrohya sín kíxin ts'ixenhen ch'án tí nchia a. ³¹ Kjaxin iso tí sítreé kuènte tí estado Asia mé chóxin sín ch'ín Pablo, ntá k'uëtoan sín kíxin tsochénka chojni tí ch'ín Pablo kíxin chrókjuiatéhya ch'án tí siín sín ntiha. ³² A ntá iso tí sín tsíkójnktosé ntáchro sín ijnko nkehe, la í so sín ntáchro sín ókjé nkehe kíxin níñkaon sín. La itsjé sín la í noehya sín nkehe xra tsíkójnktosé sín kíxin níñkaon sín. ³³ La iso sín judío chénka sín ijnko ch'ín it'in Alejandro nkerí xra kjuixin sín kíxin tsonixja ch'án. Ntá kjuák'e ch'án jnkosiné ntá kjuakoxin ch'án itja ch'án kíxin tsotání sín ntá tsonixjaxin ch'án tí sín judío tsinhin kaín chojni. ³⁴ Ntá tió kjuátsoan tí sín tsíkójnktosé kíxin kjaxin tí ch'ín a mé judío ch'án ntá kaín sín k'óyako sín chjina iyó hora ntáchro sín kíxin:

—Ts'itjáyanhya tí dios Diana kuènte tí sín chjasin Éfeso —ichro sín.

³⁵ Ntá tí ch'ín secretario kuènte tí chjasin ntiha mé k'uetoan ch'án tsotání sín. Ntá ntáchro ch'án kíxin:

—Chojni chjasén Éfeso tinhínrá. Kuenté chjasintajni nohe sín kíxin tí sín chjasin ntihi mé t'ayakonhen sín tí njinko kuènte tí dios Diana. Tí retrato kuènte tjan mé tsíkixín nkaya nkajní. ³⁶ Kohya nkexro tsontáchro kíxin chaxínya tíha. Méxra tánírá. Tjenkayáxinrá jína nkehe chrókjuch'erá. ³⁷ Jahará kjuíkoárá tí sín a ntihi la kjánchó k'uántaxíenhya sín tí ninkoeni la ko k'uántaxíenhya sín tí tjan santo kuénteni. ³⁸ Méxra ch'ín Demetrio la ko tí sín ch'eko ch'án xrá la tí tjanchia sín jié jnkojín nkexro la siín juez sinchekitoexín. Méxra tsochrónka sín tí tjen tí ch'ín juez kíxin jnkojnk sín la chrókuitoexín tí jié chónta sín. ³⁹ Ntá tí siín ijnko nkehe tsjanchiará ntá t'ichjánxín tsojnkotsérá la ntoá chrókuitoexín. ⁴⁰ Tóxakonhenni kíxin kjá tí sín t'etoan ts'ekani sín jié kíxin jehya jína k'uíxiténi kóninkaonni. Noehyani nkehe tsjateheni kíxin tí tsjanchankí sín nkekuénte k'uíxiténi, tsixro sín.

⁴¹ La ntá k'uetoan ch'án kíxin sátsji sín kíxin ó kjuixin tí kójnkotsé sín.

20

Sátsji ch'ín Pablo estado Macedonia la ko estado Grecia

¹ Ntá ti kjuixin k'uíxité sín, a ntá ch'ín Pablo k'uíyehé kaín tí sín tinkáchónki Ìnchéni ntiha ntá kjuako ch'án iso kjuaxrexinkaon jína, ntá nixjehé kíchó sín ntá sáxíkji ch'án nó estado Macedonia. ² Ntá nkuíxín k'uatsínka ch'án la kjuínchechhé ch'án tí sín tinkáchónki Ìnchéni kíxin tí nkehe nixja ch'án. Ntá chr'éxín kjuíji ch'án estado Grecia. ³ Ntiha kuítóhe ch'án iní nitjó ntá chrók'uixenhen ch'án ijnko ntabárcó ntá sáchrókui ch'án estado Siria. Ntá kónohe ch'án kíxin iso sín judío nínkakonhen sín tí jehe ch'án a ntá kjuenkayáxin ch'án tsokjanxín ch'án toté ch'án ínaá ts'atsínka ch'án Macedonia. ⁴ Ntá tí sín sákjuíko ch'ín Pablo mé tí ch'ín Sópater mé jehe ch'án tsíkjixín ch'án chjasin Berea, la ko kjaxin ch'ín Aristarco, la ko ch'ín Segundo. Jehe sín mé tsíkjixín sín chjasin Tesalónica, la ko ch'ín Gayo tsíkjixín ch'án chjasin Derbe, la ko kjaxin sákjuíko ch'án ch'ín Timoteo, la ko ch'ín Tíquico, la ko ch'ín Trófimo, mé tsíkjixín sín estado Asia. ⁵ Ntá tí sín kíchó ni a mé kuítónxin sín ntja ntá tjejóchónhen sín tí jeheni chjasin Troas. ⁶ Kjuixin k'uátsínka tí kia tió kjóne sín niotja chóntahya tí xroan t'ánkíxín niotja, ntá k'uíxenhenni ijnko ntabárcó k'uaxrjexínni Filipos ntá k'uátsínka in'ó yaon ntá kjuíjini chjasin Troas ntá ntiha xétani tí sín kuítónxin sín ntja. A ntá ntiha kuítóheni yato yaon.

Ch'ín Pablo sákjuí chjasin Troas

⁷ Ntá tí yaon xrankíxín semana ntá kójnkotséni kíxin tsochrít'o niotja tsoxraxinkakonxínni Ìnchéni. Ntá ch'ín Pablo nixjehé ch'án kaín tí sín tinkáchónki Ìnchéni la tjinkaon ch'án sátsjixin ch'án ntiha tí yaon chr'éxín, ntá antsí má sé tí nkehe chrónka ch'án la naxa tjenixja ch'án k'áxrótjen. ⁸ Tí tsíkójnkotsé sín a mé ijnko piso noi la ntiha mé síche nchónhya xrohi. ⁹ Ntá ntiha itjen ijnko ch'ín ntasoá it'in ch'án Eutico mé tjetjaxin ch'án chrítaón ventana. Ntá tí ch'ín Pablo imá sé nixja ch'án ntá tí ch'ín ntasoá mé tsíkihi ch'án kotáchrin. A ntá xrínahya tsík'ajua ch'án ntá tsík'anótjenxín ch'án tí ventana tí níxín piso ntiha ntá sákjuíkјatseen sín ch'án la ó tsíkjixin tsík'en ch'án. ¹⁰ Ntá ch'ín Pablo k'uinkajin ch'án ntá kjuítsínkatak'á ch'án chrítaón tí ch'ín tsík'anótjen a la kjóa ch'án. Ntá ntáche ch'án tí sín kíchó ni kíxin:

—Chrakonhyará tsík'enhya ch'án, tjechón ch'án —ichro ch'an.

¹¹ Ntá ch'ín Pablo k'uit'ótjen ch'án ínaá tí k'uinkajinxín ch'án kíxin ntiha ts'óxikayehé ch'án niotja sine sín tsoxraxinkakonxín sín Ìnchéni. Ntá naxa tjenixja ch'án hasta k'uinkaséyan a ntá sákjuí ch'án. ¹² Ntá tí ch'ín ntasoá tsík'anótjen sákjuiko sín la tjechón ch'án kohya nkehe xéhe ch'án ntá kaín sín imá kóchéhé sín.

Sákjuíxín ch'ín Pablo chjasin Troas kjuíji ch'án chjasin Miletó

¹³ Jeheni mé kuítónxinni nt̄ia saoxín la k'uíxenhenni ijnko ntabárco sákuíni nó chjasin Asón kíxin ntiha tsoxetani ch'ín Pablo exí tsíntáchro ch'án kíxin tjinkaon ch'án sátsjixín ch'án toté ch'án ntiha. ¹⁴ Ntá ó xetani tí jehe ch'án chjasin Asón ntá k'uíxenhen ch'án tí ntabárco kjaxin ch'án ntá sákuíkoni ch'án nó chjasin Mitilene. ¹⁵ Ntá tí sákjuiximí ntiha ntá tí yaon chr'éxín ntá k'uátsínkani estado Quío ntá tí yaon chr'éxín kjuíjini chjasin Samos. Ntá ínaá k'uíxenhenni tí ntabárco ntá sákuíni chjasin Trogilio ntá ntiha k'ok'éheni. Ntá xík'ixenhenni ntabárco ínaá ntá tí yaon chr'éxín kjuíjini chjasin Mileto. ¹⁶ Mé xikaha kjuích'eni kíxin ch'ín Pablo í tjinkakonhya ch'án chrókjuak'e ch'án isé estado Asia la í tjinkakonhya ch'án chrókjan chjasin Éfeso kíxin tjinkaon ch'án tjoka chrókuiji ch'án chjasin Jerusalén kíxin ntiha chrókjuak'e ch'án tí yaon Pentecostés, ichro ch'án.

Nixjehé ch'ín Pablo tí sín t'etuenhen ninko chjasin Éfeso

¹⁷ Tí itjen ch'ín Pablo tí chjasin Mileto k'uíyehé ch'án tí sín t'etuenhen tí ninko chjasin Éfeso. ¹⁸ Ntá tió kui sín ntá ntáchro ch'án kíxin:

—Tí jahará la ó nohará nkexrí kjuak'é la ko kjuàkua desde tí yaon xrankíxíñ k'uinka estado Asia. ¹⁹ Ó nohará kíxin kaín tí yaon k'uéjóni la kaín əsenná kjuít'ahá xra Închéni la kjuíntahnkehya. Imá tsjanka kíxin nchónhya kjuasótena kíxin tjinkaon tí sín judío chrók'óyánnna sín. ²⁰ Janhan la kuitoahya kjuàkua kaín tí nkehe jína t'ichjánxín tsonohará. Mé xikaha kjuàkua tió kójnoksérá la ko xikaha kjuíkjàkuaxian jnkojnko ntoará. ²¹ Kjuákohá kaín chojni judío la ko kaín chojni jehya judío kíxin t'ichjánxín tsítóhe sín tí jie tjasin sín la ko tsitekaon sín Dios la ko Închéni Jesucristo. ²² Ntá ijie sátsiyá chjasin Jerusalén kíxin Nchakuen Dios k'uetuanna la í nonahya nkehe tsonna ntiha. ²³ Ntá jehó nòna kíxin kaín chjasin ts'atsínka la chrónka Nchakuen Dios kíxin tsjak'echjinana la ko tsjasótena. ²⁴ Kaín tíha la tóxakonahya. Kjónté chrókjuasótexián la ninkehó sínkíhyana la janhan la chàna kíxin tí xra chonta la chrókjuíntaxíñ la chrókjuíntaxiteyá tí xra chjina Închéni Jesús kíxin tsjákua tí tan jína nkexrí tjuéhe Dios chojni.

²⁵ 'Ntá jie ó nòna kíxin tí jahará kjuákohará kjuachaxin kuènte Dios la nijnkorá ts'ikonyará tí janhan ínaá. ²⁶ Méxra tinhínrá ijie kíxin í jehya jiéna kíxin jnkojínrá chrók'uitjáyanrá. ²⁷ Kíxin ó kjuàkua kaín tí nkehe tjinkaon Dios kíxin tsonohará la í t'itjáyanhyá ninkehó. ²⁸ Méxra xráxinkáonrá ts'ejorá jnkojína la ts'ayakonhénrá kaín tí sín tinkáchónki Închéni kíxin Nchakuen Dios mé tjáhará tí xra pastor kíxin ts'ayakonhénrá tí sín kuènte tí ninkoe ch'án k'uénaxín ch'án tí ijnié ch'án. ²⁹ Ó nòna tió sátsjia ntá itsji í so chojni éxí kolóbo jiéhe tsotjinkaon sincheck'itjáyan tí sín tinkáchónki Închéni. ³⁰ La ntá kjónté jahará la isorá tjejorá ntihi tsjankíxínrá tsjákorá kjuach'ia chrínkí chrókjuákhérá kíchuárá tí nkehe chaxín. A ntá tí sín tinkáchónki tsjichréhe sín tí nkehe ntoáhya. ³¹ Méxra chróxráxinkáonrá kíxin chjina iní nánó kjuak'é kjuákohará nchakotjin la ko tie la kuitoahya kjuíntaxraxinkávan hasta kjuíncheníhi əsenná nixjahará jnkojnko tí jahará.

³² 'A nta jie la jahará kíchó ni tjetjáncháha Dios kíxin t'ayakuanxínrá ch'án tí itén ch'án kíxin tjuahará ch'án. Jehe ch'án imá chónta kjuachaxin tsjinkitsará ntá ts'ayéhérá kaín tí nkehe tjinkaon ch'án tsochjéhe ch'án kaín tí chojni tsíkótjoá. ³³ Janhan mé kjuakéhya əsenná chichakoén chojni o iké jnkojín chojni. ³⁴ Náhí. Jahará ó nohará jína kíxin janhan na mé tjaná kjuít'axián xra kjuácha k'uénaxín tí nkehe t'ichjánxínna la ko kjaxin tí nkehe t'ichjánxínna tí chojni k'uejókian. ³⁵ Méxra kjuàkuaxínrá xikaha sikh'erá xra kíxin jína tsjinkitsará tí chojni chóntahya. Xráxinkáonrá kíxin tsíntáchro Închéni Jesús kíxin: "Antsí tsochéheni kíxin tí nkehe chrókjuanjonni, a ntá kánhyó tsochéheni kíxin tí nkehe chrók'uáyéheni."

³⁶ Ntá kjuixin ntáchro ch'ín Pablo xikaha ntá jehe ch'an la ko kaín sin k'uéjoxin toch'in sín ntá nixjehé sín Dios. ³⁷ Ntá kaín sín tsjánka sín la ko kjóa sín ch'án la ko tséhe sín

tja ch'an. ³⁸ Imá k'uává sín kíxin chrónka ch'án kíxin í ts'ikonyha sín ch'án ínaá. Ntá sákjuíkotoxín sín ch'án nó tí tjen tí ntabárco sátsjiko ch'án.

21

Sákjuí tí ch'ín Pablo nó chjasin Jerusalén

¹ A ntá tió kuítóheni tí sín kíchó ni ntá k'uíxenheni ntabárco la ntá tuénxín sákjuíni estado Cos. Ntá tí yaon chr'éxin sákjuíni chjasin Rodas, ntá ntiha sákjuíni chjasin Pátara.

² Tí chjasin Pátara la mé ntiha k'uitjani ijnko ntabárco sátsji nó estado Fenicia. Ntá k'uíxenheni tí ntabárco a ntá sákjuíni. ³ Ntá tió k'uátsínkani la k'uíkonni tí nonte Chipre itjani ikjon kuítóhe ntá k'uátsínkani estado Siria. Ntá tí ntabárco la ts'atsínska tsítóhe tí nkehe tjinká tí puerto chjasin Tiro, la jeheni la nachrohe sákjuíni tí chjasin a. ⁴ Ntá ntiha k'uitjani tí sín tinkáchónki Ínchéni a ntá ntiha kuítóhekoni sín yato yaon. A ntá jehe sín mé kjuínchenohe sín Nchakuen Dios chénka sín tí ch'ín Pablo kíxin sáchrókjuihyá ch'án chjasin Jerusalén. ⁵ Ntá kjuixin k'uátsínska tí yato yaon a ntá sákjuíxinni ntiha. La kaín tí sín tinkáchónki Ínchéni la ko ichjién sín la ko xjeen sín sákjuíkotoxínni tí k'uaxrjentani ikon chjasin ntá sákjuíni chrínta ntayaon. K'uéjoxínni toch'inni nixjeheni Dios ⁶ ntá tuénxín nixjeheni sín jnkojína ntá tséhe tja kíchó ni. Ntá k'uíxenheni tí ntabárco, a ntá jehe sín ikjan sín ntøe sín.

⁷ Ntahó chjasin Tiro kjuixixín tí k'uíxenheni tí ntabárco ntá kjuíjini chjasin Tolemaida. Ntiha kjuínixjeheni tí sín kíchó ni tinkáchónki Ínchéni. Ntá ntiha k'uéjókoni sín ijnko yaon. ⁸ Ntá tí yaon chr'éxin sákjuíxinni ntiha ntá kjuíjini chjasin Cesarea. Ntá ntiha sákjuíni ntøe ch'ín Felipe, ijnko ch'ín kjaxin tjako itén Ínchéni. Jehe ch'án mé ijnko tí sín yatoxin tjinkitsa tí sín kjueyá Ínchéni. A ntá jeheni mé kuítóheni ntiha. ⁹ Tí ch'ín Felipe a mé chóntha ch'án noó xjeen ch'án chjin naqá tótéehya sín. Tí xjeen ch'án a mé chrónkaxín sín tí itén Dios. ¹⁰ Ntá ntaha k'uéjókoni sín itsjé yaon ntá ikjui ijnko ch'ín nixja itén Dios it'in Agabo, tsíkjixín ch'án estado Judea. ¹¹ Ikjui ch'án kjuinixjehé ch'án tí jeheni la ntá kuákja ch'án tí tjoaq t'ínkat'óxin ch'ín Pablo na ntá kjuíncientetoxín toté ch'án la ko itja ch'án ntá ntáchro ch'án kíxin:

—Tí Nchakuen Dios mé ntáchro kíxin mé xíkaha chjasin Jerusalén tí sín judío sinchento sín ìnché tí tjoaq sinchek'áyéhe sín ch'án tí sín jehya judío —ichro ch'án.

¹² Ntá kjuixin kuínhinni tíha ntá jeheni la ko tí sín chjasin Cesarea chrónóeheni tí ch'ín Pablo kíxin sáchrókjuihyá ch'án tí chjasin Jerusalén. ¹³ Ntá kjuátehe ch'ín Pablo kíxin:

—¿Nkekuénté tsjankará la ko nkekuénté nchek'áváráni? Janhan na chrakonhya kjónté jehya tí sinchentetona sín ó. Náhí. Kjónté kjaxin chrók'uénxiān chjasin Jerusalén tí tinkachónkia Ínchéni —ichro ch'án.

¹⁴ Ntá kjuachahyani nixjeheni ch'án ntá kuítóheni ch'án. Ntáchroni kíxin:

—Tí nkehe tjinkaon Ínchéni mé tsønhen —ichroni.

¹⁵ Ntá kjuixin tíha ntá kóyaxínhinni ntá sákjuíni nó chjasin Jerusalén. ¹⁶ Ntá sákjuíkoni iso tí sín tinkáchónki Ínchéni tsíkjixín chjasin Cesarea. Sákjuíkoni sín ntøe ijnko ch'ín tsíkjixín Chipre it'in ch'án Mnasón. Jehe ch'án mé ósé tinkáchónki ch'án Ínchéni. Ntá kjuanjon ch'án nketí kuítóheni.

Ch'ín Pablo sákjuítsjehe tí ch'ín Jacobo

¹⁷ Tió kjuíjini chjasin Jerusalén ntá tí sín kíchó ni tinkáchónki Ínchéni mé kjuanjon sín kjuachaxin k'uéjóni la chéhé sín. ¹⁸ Ntá tí yaon chr'éxin ch'ín Pablo sákjuíkoni ch'án kjuítsjeheni ch'ín Jacobo la ntaha tjejó kaín tí sín t'etqan kuénte ninko. ¹⁹ Ntá ch'ín Pablo kjuixin nixjehé ch'án sín ntá tuénxín chrónka ch'án kaín tí xra kjuich'e Dios tió kjuakohe ch'án tí sín jehya sín judío. ²⁰ Tió kuínhin sín ntá kjuanchehe sín kjuasáyé Dios, a ntá ntáche sín ch'ín Pablo kíxin:

—Kíchóni, jaha k'uíkuan kíxin siín itsjé mil sín judío ó kuinkáchónki sín Jesús kjánchó kaín sín ntáchro sín kíxin t'ichjánxín tsítóehyani tí ley. ²¹ Ntá tsíkinhin sín kíxin jaha mé tsíkjákhé tí sín judío tjejó chjasin ókjé kíxin t'ichjánxienhya sinchexiteyéhé sín tí nkehe k'uetgoan ch'ín Moisés. La kjaxin kuínhin sín kíxin jaha tsíkjákhé sín kíxin tí xjeen sín t'ichjánxienhya itsa sín tí xroye la ko t'ichjánxienhya tinkáchónki sín éxi k'uékinkáchónkini ósé. ²² ¿Ntá nkehe chrókjuich'eni? Kíxin tió tsínhin sín kíxin kjuihá la tsojnkotsé nchónhya sín. ²³ Méxra íchá jína jaha sinchexiteyá tíhi. Ntihi tjejó noó sín t'ichjánxín sinchexiteyá sín tí nkehe chénka sín Dios. ²⁴ Jaha sáchrókjuíko sín la chrókótjóá jaha la ko jehe sín. La ko kjaxin chrókjuènka tsokjín sín ntá tsonoexín tí sín judío kíxin chaxínhya tí nkehe tsíkinhin sín la ko tsonoexín sín kíxin kjaxian jaha nchexiteyéhé tí ley. ²⁵ A ntá tí sín jehya judío tsíkitekaon Ínchéni la ijkinni ijnko xroon ó chr'énhenni sín. K'uëtuënhenni sín kíxin sinehya sín tí nto tsíkjokehé chojni tí nkehe tsíkjanoya, la ko kjaxin sinehya sín jni, la ko sinehya sín tí nto tsíchríñjinhya isin va, la ko chróchontahya sín í jnko chojni chjin ókjé —ichro sín.

Tséxin sín tí ch'ín Pablo tí njinko

²⁶ Ntá ch'ín Pablo sákjuíko ch'án tí noó sín la ntá tí yaon chr'éxiñ kjuínchetjóá asén sín. Ntá kjuixin ntá k'uíxenhen ch'án tí njinko kíxin tsochrónka ch'án kíxin ó kjuixin kjuínchexiteyá ch'an tí nkehe k'uítuenhen ch'án. Tíhi mé t'axrjexín kíxin jnkojnko sín tsíkqao sín nkehe tsjanjon sín.

²⁷ Ó chjina chróxétja tí yato yaon ntá iso tí sín judío tsíkjixín estado Asia mé tsík'ikon sín ch'ín Pablo nkaxenhen tí njinko. Ntá kjuínchekónkaon sín kaín chojni chjasin ntiha ntá itsé sín tí ch'ín Pablo. ²⁸ Ntá k'uëya sín ntáchro sín kíxin:

—Kaínrá chojni chjasin Israel tsjínkitsaráni kíxin tsotséni tí ch'ín i. Jehe ch'án mé ixri nkuíxín xritjáköhé ch'án chojni nkehe jehya jína kuénte chjasénni, la ko titekakonhya ch'án tí ley kuénte Moisés, la ko titekakonhya ch'án njinkoeni. A ntá ijie la tsík'ixenko ch'án iso sín griego la kjuínchekjita sín nkaxenhen tí njinko tjóá —ichro sín.

²⁹ Mé xikaha ichro sín kíxin tsík'ikon sín senó kíxin chjasén sín mé xriko ch'ín Pablo tí ch'ín Trófimo tsíkjixín chjasín Éfeso. Kjuénkayáxin sín kíxin ch'ín Pablo la kjá tsíkjiko ch'án tí ch'ín a nkaxenhen njinko.

³⁰ Ntá kuenté tí chjasin a kóninkaon sín la ntá kaín tí chojni kuinká sín ikui sín ntá itsé sín tí ch'ín Pablo. Ntá kuinkánkakjenxín sín ch'án nkaxenhen njinko la kuakitsje sín ch'án ntója ntá tuénxín k'uíkjehe sín tí puerta njinko. ³¹ Ntá tjinkaon sín chrók'oyán sín ch'án ntá ijnko ch'ín comandante k'uëtuënen itsjé tí sín soldado romano kuínhin ch'án kíxin kuenté tí chjasin Jerusalén k'uixité nínkaon sín. ³² Ntá tí ch'ín comandante sákjuíko ch'án iso sín soldado la ko tí sín k'uëtuënen tí soldado a la kuinká sín sákjuí sín tí siín tí chojni. Ntá tió k'uíkon tí sín a kíxin ó kjuíji tí ch'ín comandante la ko tí sín soldado a ntá kuítóhe sín, í kjuatehya sín ch'ín Pablo. ³³ Ntá tí ch'ín comandante kóchjina ch'án la itsé ch'án tí ch'ín Pablo. Ntá k'uetgoan ch'án kíxin tí sín soldado sinchentetoxín sín tí ch'ín Pablo yaá chica cadena. Ntá chréxiñ kjuanchankíhi ch'án sín kíxin nkexro tí jehe ch'ín Pablo la ko nkehe tí kjuich'e ch'án. ³⁴ A ntá tí chojni tsíkójnksé la ijnko sín k'oyako ijnko nkehe la í so sín la ókjé nkehe. A ntá tí ch'ín comandante la tienxínhya ch'án nkekuénte xikaha kjuich'e sín kíxin k'uixité sín. Ntá k'uetgoan ch'án kíxin tí sín soldado sátsjiko sín tí ch'ín Pablo tí cuartel siín tí sín soldado. ³⁵ La ntá tió kjuíjiko sín ch'án tí t'it'ótjenxín sín tí nchia a ntá t'ichjánxín kuámá sín tí ch'ín Pablo kíxin tí chojni tjinkaon sín chrókjuate sín ch'án kíxin nínkaon sín. ³⁶ Kaín tí chojni chréhe nóton t'ëya sín ntáchro sín kíxin:

—Chrók'uen ch'án —ichro sín.

Ch'ín Pablo chrónka nkayakon chojni kíxin chóntahya ch'án jie

³⁷ Ntá tió sáchrókjuíko sín ch'ín Pablo tí nkaxenhen tí cuartel kuénte tí sín soldado a ntá kjuanchankíhi ch'ín Pablo tí ch'ín comandante ntáchro ch'án kíxin:

—¿Á jína tsonixjahani jaha intsí? —ichro ch'án.

Ntá kjuátēhe tí ch'ín comandante ntáchro ch'án kíxin:

—Jaha la á noha nixja griego? ³⁸ Méxra ¿á jehya jaha tí chojni tsíkjixín Egipto kjuíncheníkaon chojni la ko sákjuíko nteje tí noó mil chojni tsíkjaya? —ichro ch'án.

³⁹ Ntá kjuátēhe ch'ín Pablo ntáchro ch'án kíxin:

—Náhí, janhan mé ijnko chojni judío. Tsíkokjínaíxíán chjasin Tarso, estado Cilicia. Janhan me ijnko chojni tsíkjixín ijnko chjasin imá tjetoan. A ntá ijie xrjanñóaha kíxin tsjánjuan kjuachaxin tsonixjáha tí chojni —ichro ch'án.

⁴⁰ Ntá tí ch'ín comandante kjuanjón kjuachaxin ntá ch'ín Pablo kjuák'exín toté ch'án tí tjen escalera ntá tja ch'án ó kjuakoxín ch'án kíxin tsotání sín. Ntá tání sín ntá kjuankíxín nixjaxín ch'án nkiva hebreo. Ntáchro ch'án kíxin:

22

¹ —Jahará kíchó ni la ko chojni it'é xjan tinhínrá nkehe tí tsorxjanka kíxin chontahya jie —ichro ch'án.

² Ntá kuínhin sín kíxin nixjaxín ch'án nkiva hebreo ntá antsí má tání sín. Ntá ntáchro ch'ín Pablo ínaá kíxin:

³ —Janhan mé ijnko chojni judío tsíkokjínaíxíán chjasin Tarso estado Cilicia. K'uankíxiān ntihi chjasin Jerusalén la kjuintakuáxian tí nkehe kjuako tí ch'ín Gamaliel la títekaván tí ley tsíkinkáchónkí tí sín tsík'axrjeníxinni ósé. Tjínkaván chrókjuít'aha Dios xrä kaín asenná éxí tjinkáonrá jahará ch'erá tí yaon ijie. ⁴ Ti senó k'uéninkakonhán chrók'oyán tí sín tinkáchónki Ínchéni kjuintanteto chojni ntoa la ko chojni chjin kíxin chrók'uejóchjina sín. ⁵ A ntá tí sín nchat'á t'etqan la ko kaín tí sín tada t'ayakonhen ninko la mé nohe sín kaín tíha kíxin jehe sín mé kjuanjón sín xroon ts'ayéhe tí sín kíchó ni júdío tjejó chjasin Damasco. Ntá sákjuia nó ntiha kíxin chrókjuíkjeyá tí sín tinkáchónki Ínchéni kíxin chrótse sín ntá chrókjuíkian sín ntihi Jerusalén chrokjuasóte sín.

Ch'ín Pablo chrónka nkexrí kjuankíxín tinkáchónkí ch'án Ínchéni (Hch. 9.1–9; 26.12–18)

⁶ A ntá tió kjuasán chjina chjasin Damasco chjina chonkíxín ntá xrínahya k'uinkáséyan jnkontatjén tí tjén ijnko xrohi imá t'inkaséyan kuixín nkajní. ⁷ Ntá kjuachr'ítsinka nonte ntá tuénxín kuinhán itén ijnko nkexro nixjana ntáchro kíxin: “Saulo, Saulo, ¿nkekuénté ninkáronna xrítjeyá tí janhan?” ⁸ Ntá kjuánchánkiá kíxin: “¿Xá nkexro jaha?” Ntá kjuátēhe ch'án ntáchro ch'án kíxin: “Janhan mé tí nkexro Jesús tsíkjixín chjasin Nazaret, mé tí nkexro xrítjeyá.” ⁹ La ntá tí sín k'uájikian mé k'uíkon sín tí xrohi la chrakon sín kjánchez kuienhyá sín itén tí nkexro nixjana. ¹⁰ Ntá kjuánchánkiá kíxin: “¿Xá nkehe tsonhen tjinkávan sit'aha jaha?” Ntá kjuátēhe ch'án ntáchro kíxin: “T'ayá sájtia t'ixenhen chjasin Damasco ntá ntiha tsocchrónka sín kaín nkehe sich'e.” ¹¹ Ntá tí xrohi a mé k'uíxenka ikuān ntá í xitjahya t'íkuān. Ntá tí sín chríkjan mé kuinkátséna sín sákjuíkian sín chjasin Damasco.

¹² Ntá ntaha kjuák'e ijnko ch'ín it'in Ananías ijnko chojni jína kjuínchexiteyéhe ch'án tí ley kuénte ch'ín Moisés. Kaín tí sín judío siín chjasin Damasco tjikosáyehé sín tí jehe ch'án.

¹³ Ntá ch'ín Ananías mé kuitsjehe ch'án tí janhan ntá tió kui ch'án ntáchro ch'án kíxin: “Kíchóni Saulo, ijie la ts'ayéhé kjuachaxin ts'íkuān ínaá.” Ntá ó jína t'íkuān. ¹⁴ Ntá tuénxín ntáchro ch'án ínaá kíxin: “Tí Dios kuinkáchónki tí sín tsík'axrjeníxinni la ó tsíkjeyá ch'án tí jaha kíxin tsonoha nkehe tjinkaon ch'án la ko kíxin ts'íkuān tí nkexro jína la ko tsinhín tan k'uaxrjexín ir'va ch'án. ¹⁵ Jaha mé tsocchrónka tí nkehe k'uíkuān la ko tí nkehe kuínhín tsinhín kaín tí chojni chjasintajni. ¹⁶ A ntá jie la í choénya má. T'ayá la tsikitaxián ihnié Ínchéni kíxin mé ts'ímáxin ijíá,” ichro ch'ín Ananías.

Pablo chrónka kíxin Dios ichr'án ch'án tsjakohé tí sín jehya sín judío

¹⁷ 'Na ntá tió xíkjan chjasin Jerusalén ntá sákjuia ninko tsonixjahá Dios ntá titaya k'uíkuèn ¹⁸ Inchéni ntáchro ch'án kixin: "Tjoka ts'axrjéxian chjasin Jerusalén kixin tsitekakuenhya sín tí nkehe tjákua mé tí tan kuéntana." ¹⁹ Ntá janhan ntátjan ch'án kixin: "Inchéni, jehe sín ó nohe sín kixin senó k'uék'atsinka kaín tí ninko la k'uétse tí sín tinkáchónki tí jaha la sákjuíkjan sín ntöechiso k'uékon sín. ²⁰ Tió k'óyán sín tí ch'ín Esteban tí nkexro k'uékjit'aha xrä, k'uénixja tí tan kuénta ntá janhan kjaxin tjéntaxián ntiha la janhan ntáxrjan kixin ó nchoxon its'en ch'án la k'uáyakonhan tí iké tí sín kjuàya." ²¹ Ntá Inchéni xínixja ínaá, ntáchro ch'án kixin: "Tétuñhan jaha kixin sátsjia chjasin kjín kixin tsjákohé tí chojni jehya judío."

Ntá tí ch'ín comandante k'uáyéhe tí ch'ín Pablo kixin tsjasóte ch'án

²² Ntá tí sín tsíkójkotsé mé kuínhin sín kaín tíha ntá kjuankixin k'uèya sín ntáchro sín kixin:

—Its'en ch'án, í tsjak'echónhya ch'án —ichro sín.

²³ Naxaq t'ixratáhya sín t'óyako sín ntá totsjénka sín iké sín la ko kuákja sín nche it'e sín.

²⁴ Ntá tí ch'ín comandante mé k'uëtuñhen ch'án tí sín soldado a kixin sátsjiko sín ch'ín Pablo nkaxenhen tí cuartel kuénte sín. Ntá ntiha k'uëtoan ch'án kixin tsjatexín sín ch'án chikoté ntá tsongoexín tí ch'ín comandante nkekuénte imá t'óyako sín nínkakonhen sín tí jehe ch'án. ²⁵ Ntá kjuixin kjuíncinento sín ch'án kixin tsjate sín ch'án ntá nixjehe ch'ín Pablo ijnko ch'ín capitán itjen ntiha ntáchro ch'án kixin:

—¿Á chontará kjuachaxin tsjaterá ijnko chojni romano, kixin naxaq kjuéyahará nkerí jie chonta? —ichro ch'án.

²⁶ Tió kjuixin kuínhin tí ch'ín capitán ntá sákjuíchénka ch'án tí ch'ín comandante ntáchro ch'án kixin:

—¿Nkehe sijch'e jaha kixin tí nkexro i mé ijnko chojni romano?

²⁷ Ntá tí ch'ín comandante mé kóchjinehe ch'án tí ch'ín Pablo la kjuanchankí ch'án, ntáchro ch'án kixin:

—¿Á jaha chaxín chojni romano? —ichro ch'án.

Ntá kjuátehe ch'ín Pablo kixin chaxín jehe ch'án.

²⁸ Ntá ntáchro tí ch'ín comandante kixin:

—¿A ntá nkexrí kixin janhan nchónhya chichaon kjuéenkä kixin ts'ónana chojni romano?

A ntá ntáchro ch'ín Pablo kixin:

—Janhan na chojni ntiha tsíkokjínaxián.

²⁹ Na ntá tí sín soldado chrókjuate ch'ín Pablo mé kuínhin sín kixin ch'ín Pablo ijnko chojni romano ntá kuítuhe sín ch'án sákjuí sín ókjé. Ntá tí ch'ín comandante a mé kónohe ch'án kixin tí ch'ín Pablo a mé ijnko chojni romano ch'án chaxín. Ntá chrakon ch'án kixin tsíkjincinento ch'án.

Ch'ín Pablo nixjehe ch'án tí sín t'ëtoan kuénte tí sín judío

³⁰ A ntá tí kóyáon ntá tí ch'ín comandante a mé tjinkaon ch'án tsongohe ch'án nkehe tí jie chrók'ueka tí sín judío tí ch'ín Pablo. Ntá kjuasintankä ch'án chica cadena tsíchróntetoxín tja tí ch'ín Pablo ntá k'uëtoan ch'án kixin tsojnkotsé kaín tí ncháñt'á t'ëtoan la ko tí sín t'ëtoan kuénte sín judío, a ntá kuakitsje ch'án tí ch'ín Pablo la kjuak'e ch'án jnkosiné tí siín tí jehe sín.

23

¹ Ntá ch'ín Pablo komá tí sín t'ëtoan kuénte sín judío ntá ntáchro ch'án kixin:

—Kichóni, tí k'uékjak'é hasta ijie la Dios tjetsjehe kixin ijnko kjuaxrexinkaon jína chonta —ichro ch'án.

² Ntá tí ch'ín Ananías tí ch'ín ncháñt'á t'ëtoan mé k'uëtuñhen ch'án tí sín chjino tjejó tí tjen ch'ín Pablo tsochjéhe sín ir'va ch'án. ³ Ntá kjuátehe ch'ín Pablo kixin:

—Dios mé sinchekjasóte ti jaha kíxin ntoáhya kjuich'e. Tjetjaxian méhe kíxin tsjéyá nkehe tí jie chonta éxí nixja tí ley. A ntá ¿nkekuénte kuítekákonhya tí ley, la kuétoan kíxin ts'ékonna? —ichro ch'án.

⁴ A ntá tí sín siín ntiha ntáchro sín kíxin:

—¿Á xikaha ts'antaxínhín tí nchat'á t'etoan kuénte Dios?

⁵ Ntá kjuátuhe ch'ín Pablo ntáchro ch'án kíxin:

—Kichóni, kjuatsoanhya janhan kíxin jehe ch'án mé tí nchat'á t'etoan. Ntáchro tí xroon itén Dios kíxin: “Chrók'uantaxíenhya tí chojni t'etuenhen chjasán”* —ichro ch'án.

⁶ Ntá ch'ín Pablo mé kónohe ch'án kíxin iso chojni siín ntiha mé chojni kuénte partido saduceo, ntá í so sín a mé kuénte partido fariseo. Ntá itsen k'uèya ch'ín Pablo, ntáchro ch'án kíxin:

—Kichóni, janhan mé ijnko chojni fariseo la tí sín kjéhyana mé fariseo kjaxin. Jahará mé tjéyará nkehe tí jie chonta kíxin janhan mé tinkachónkia kíxin tsozechón chojni tsík'en.

⁷ Ntá kjuixin ntáchro ch'án tíha ntá tí sín fariseo la ko tí sín saduceo mé kjuankíxin sín ikjo kichó sín ntá xikaha jnkokónhya kjuenkayáxin tí sín tsíkójnoksé ntiha. ⁸ Kíxin tí sín saduceo a mé ntáchro sín kíxin tsozechónhya chojni tsík'en la ko kjaxin kohya sín ángel la ko kohya nchakuen. A ntá tí sín fariseo la titekaon sín kaín tí nkehe a. ⁹ Ntá kaín sín k'uèya sín la ntá iso tí sín maestro tjako ley kuénte sín fariseo mé k'uinkatjen sín ntáchro sín kíxin:

—Tí ch'ín i, kohya ninkehó nkehe jínahya kjuich'e ch'án. Ách'e ijnko nchakuen chojni o ijnko ángel mé nixjehé ch'án —ichro tí sín fariseo.

¹⁰ Ntá imá sítjité sín nínkaon sín. Ntá tí ch'ín comandante a mé tóxakonhen ch'án kíxin chrókjuinchekuen sín tí ch'ín Pablo ntá k'uëtuñhen ch'án tí sín soldado a kíxin sátsjikajín sín ch'án la tsíkao sín ch'án ínaá tí cuartel kuénte tí sín soldado.

¹¹ A ntá tí tie a na ntá xríñahya titaya k'uíkuén ch'ín Pablo Ìnchéni nixja ch'án, ntáchro kíxin:

—Chrakonhya Pablo kíxin éxí chroñka tanná chjasin Jerusalén la mé xikaha tsochroñka chjasin Roma.

Kjuenkayáxin sín chrók'óyán sín tí ch'ín Pablo

¹² Ntá tí yaon chr'éxin a ntá iso tí sín judío a mé kjuenkayáxin sín kíxin ts'óyán sín tí ch'ín Pablo. Ntá k'uákjenxiñ sín ihnié Dios chaxín tsoxiteyá la sinehya sín la ko ts'ihya sín ninkehó tí naxa ts'óyánya sín ch'án. ¹³ Chjina cuarenta sín kjuenkayáxin sín kíxin xikaha sich'e sín. ¹⁴ Ntá sákjuíchenka sín tí sín nchat'á t'etoan la ko tí sín t'etuenhen kuénte tí sín judío la ntáche sín kíxin:

—K'uákjenxiñnni ihnié Dios kíxin chaxín tsoxiteyá kíxin í sinehyani ninkehó tí naxa ts'óyánya sín ch'ín Pablo. ¹⁵ Méxra ntá jahará la ko í so ti sín t'etuenhen tí sín judío tsontácherá tí ch'ín comandante a kíxin tsíkao sín tí ch'ín Pablo ntihi tí tjejorá ntóye nchítjen kíxin antsí má tsjanchankíhírá ch'án nkehe siná á chaxín tí jie t'íká ch'án. A ntá jeheni senó ts'ejóchónhenni tí tsíjixin ch'án ntá ts'óyánni ch'án kíxin í tsjihya ch'án ntihi —ichro sín.

¹⁶ Ntá tí xjeen tí kja've tí ch'ín Pablo a mé tsíkinhin ch'án nkehe tí tjo tí sín a. Ntá sákjuí ch'án k'uíxenhen ch'án cuartel kuénte tí sín soldado kíxin tsochrónka ch'án nkehe tí tjo sín kuínhin ch'án. ¹⁷ La ntá ch'ín Pablo mé k'uíyehé ch'án ijnko tí sín capitán la ntáchro ch'án kíxin:

—Sátsjikoa tí ch'ín ntasoá ti tjen tí ch'ín comandante kíxin tjinkaon ch'án tsochrónka ch'án nkehe —ichro ch'án.

¹⁸ Ntá tí ch'ín capitán a mé sákjuíko ch'án ti tjen tí ch'ín comandante ntá ntáchro tí ch'ín capitán a kíxin:

* ^{23:5} Éxodo 22.28

—A ntá tí ch'ín Pablo tjechjina mé k'uíyéheni ch'án kíxin tsjikäoni tí ch'ín ntasoá ntihi kíxin tjinkaon ch'án tsonixjaha jaha —ichro ch'án.

¹⁹ Ntá tí ch'ín comandante a mé tséhe ch'án itja tí ch'ín ntasoá a ntá k'uaxrjentako ch'án jehó ch'án ntá kjuanchankíhi ch'án kíxin:

—¿Nkehe tí tjinkávan tsöchronka? —ichro ch'án.

²⁰ Ntá ntáchro tí ch'ín ntasoá a kíxin:

—Iso tí sín judío mé kjuenkayáxin sín kíxin tsjanchaha sín kíxin ntóye nchítjen sátsjikoa ch'ín Pablo tí tsojnkotsé tí sín judío t'etoan. Sit'ayaha sín tsontáchro sín kíxin tjinkaon sín tsjanchankíhi sín ch'ín Pablo tí nkehe qantsí má xra. ²¹ A ntá jaha la chrókuítekákonhya kíxin chjina cuarenta chojni tjejóchónhen sín imó la k'uákjenxín sín ihnié Dios kíxin sinehya sín la ko ts'ihya sín ninkehó tsjixinjian its'en ch'ín Pablo. Ntá ijie tjejóchónhen sín tsonohe sín nkehe tsixrua jaha —ichro ch'án.

²² A ntá tí ch'ín comandante a mé nixjehé ch'án tí tí ch'ín ntasoá la k'uetoan ch'án kíxin:

—Tsochenkahya ninkexró kíxin xíkaha kjuíchronka —ichro ch'án.

Ichr'án sín tí ch'ín Pablo tí itjen tí ch'ín gobernador Félix

²³ Ntá tí ch'ín comandante a mé k'uíyéhé ch'án yaá tí sín capitán a ntá k'uetoan ch'án kíxin tsoyaxínhin sín sátsjiko sín iyó ciento sín soldado sátsjixín toté la ko setenta tí sín tsjiták'á kokate la ko iyó ciento soldado sátsjiko chica lanza, ntá las nueve tie sátsji sín chjasin Cesarea, ichro ch'án. ²⁴ La ko k'uítuenhen sín sinchekamá sín kokate tsjiták'á ch'ín Pablo la ts'ayakonhen sín ch'án jína kíxin kohya nkehe tsónhen kíxin tsjiji ch'án tí tjen ch'ín Félix, tí ch'ín gobernador. ²⁵ Ntá tí ch'ín comandante ijkjin ch'án ijkno xroon a, ntáchro kíxin:

²⁶ “Janhan mé tí ch'ín Claudio Lisias chr'anhan ijkno xroon kíxin jaha ch'ín Félix ijkno gobernador jína, nixjaha. ²⁷ Tí sín judío a mé itsé sín tí ch'ín i kíxin chrók'óyán sín ch'án. Ntá tió kónona kíxin ijkno chojni romano tí jehe ch'án la ntá sákjuíkian sín soldado kjuintakaá ch'án. ²⁸ Tjínkávan tsónona nkekuente kíxin nínkakonhen sín ch'án. Ntá sákjuíkian ch'án tí tsíkójkotsé tí sín judío. ²⁹ Ntá kónoxín kíxin nínkakuenxín sín ch'án kíxin tí ley kuente sín kjuínchexiteyáhya ch'án, ichro sín. Jehya jie jié tsíkjasin ch'án kíxin chrók'óyán sín ch'án o chrókjuak'echjina sín ch'án. ³⁰ Ntá ó kujinhan kíxin tí sín judío a mé chrók'óyán sín ch'án. Ntá méxra jie ichr'an ch'án tí tjen jaha la ko kjaxin kjuáncháha tí sín a kíxin chrókjuiji sín tí tjen jaha chrókjuá sín kíxin nkekuente nínkakonhen sín ch'án. Kjuasáyá. Ó tjen.”

³¹ Ntá tí sín soldado a mé kjuínchexiteyá sín éxi k'uítuenhen sín a ntá sákjuíko sín tí ch'ín Pablo tí tie a chjasin Antípatris. ³² Ntá tí yaon chr'éxín tí sín soldado xrixín toté ó a mé xíkjan sín tí cuartel kuente sín. Ntá tí sín k'uéjokjen kokate a mé naxa sákjuíko sín tí ch'ín Pablo. ³³ Ntá tió kjuíji sín tí chjasin Cesarea ntá tí sín soldado a mé kjuanjon sín tí xroon a chjéhe sín tí ch'ín gobernador la ko kjaxin kjuínchek'áyéhé sín ch'án tí ch'ín Pablo. ³⁴ Ntá kjuixin kjuínchekuáxin tí ch'ín gobernador a tí xroon ntá kjuanchankí ch'án nketí chjasén ch'ín Pablo. La ntá kónohe ch'án kíxin estado Cilicia tsíkjixín tí ch'ín a. ³⁵ Ntá ntáchro ch'án kíxin:

—Ntá tsínhan nkehe tsixro tí sín itsji ts'eka jie.

Ntá k'uetoenhen ch'án tí sín soldado a kíxin ts'ayakonhen sín tí ch'ín Pablo tí nchia kuente ch'ín Herodes.

24

Ch'ín Pablo nixjehé ch'án ch'ín Félix chrónka ch'án kíxin kjuasinhya ch'án jie

¹ Ntá k'uátsínka in'ó yaon, ntá ch'ín Ananías, tí nchátlá imá t'etoan, kjuíji ch'án chjasin Cesarea. Kjaxin kujqao ch'án iso tí sín t'etoan kuente ninko a la ko ijkno ch'ín abogado it'in Tértulo. Tí ch'ín a mé tsonixjehé tí ch'ín gobernador kíxin tsjanchia sín jie kuente ch'ín

Pablo. ² Ntá tió kuikao tí sín soldado tí ch'ín Pablo ntiha ntá tí ch'ín Tértulo kjuankíxin ch'án nixjehé ch'án tí ch'ín Félix ntáchro ch'án kíxin:

—Kjuasáyá jaha gobernador kíxin imá kjuinkitsa kíxin kjuaxróxin tjejóni la kjuasáyá kíxin imá noha kjuincheyóxian tí nación kuénteni. ³ Kjuasáyá jaha Félix. Imá jína jaha kíxin k'uáyéheni kaín tíha. ⁴ Tjínkakonhyá sintak'itjáyanhan nchónhya tiempo la xrjanóha kíxin chrókuak'é chrókuinhín intsikoá tí nkehe tsorxjanka. ⁵ A ntá ijie ó k'uitjani kíxin tí ch'ín i mé exí ijnko chin t'óxíka kuenté chjasintajni kíxin ch'iyeho ch'án tí sín judío ntá xíka sín. Jehe ch'án mé t'etqan ch'án tí sín tinkáchónki tí ch'ín tsíkjixin chjasin Nazaret. ⁶ Jehe ch'án mé kjaxin chrókuinchekjita ch'án tí ninko. A ntá itséni ch'án ntá chrókuinchekitoexínni tí ijié ch'án exí t'etqan tí ley kuénteni. ⁷ A ntá tí ch'ín comandante Lisias kjuixrónkáxin ch'án kuikao ch'án nchónhya sín soldado la kuakitsje sín tí ch'ín Pablo. ⁸ Ntá k'uetoan ch'án kíxin tí sín tjanchia jié chrókuitsjehe sín tí jaha kíxin jaha chrókuanchankíhí ch'án kíxin chrókónoha jína nkexhéhí tí jié chrókuinchekjasótexín sín ch'án —ichro tí ch'ín Tértulo.

⁹ Ntá ntáchro kaín tí sín judío siín ntiha kíxin:

—Kaín tíha la chaxín —ichro sín.

¹⁰ Ntá tí ch'ín gobernador a mé kjuakoxín tja ch'án kíxin tsonixja tí ch'ín Pablo a. Ntá ntáchro ch'ín Pablo kíxin:

—Chéheni kíxin tsonixjahani tsochrónkani kíxin kohya jié kjuasinni kíxin ó noheni kíxin jaha la juez kuénte tí nación ntihi la nchónhya nánó tétoan. ¹¹ Jaha la kjaxin ó chrókónoha kíxin na ntá teyó yaon kjuíjini chjasin Jerusalén kíxin ntaha tsoxráxinkakonxínni Dios. ¹² Kónoxínhya kíxin nijnko nkexro chrókuachaxínni, la ko kjuinchexakuenhyani ninkexró ninko la ko ni tí ninko ntsí la ko ninketó chjasin. ¹³ Tí sín i la xitjahya tsontáchro sín kíxin xíkaha tí jié kjuasinni. ¹⁴ Janhan chaxín xrjanca kíxin t'ahá xra tí Dios k'uékinkáchónki tí sín tsík'axrjenínni mé yóhe tí ntja nixin. A ntá jehe sín ntáchro sín kíxin ókjé nkehe tinkáchónkini. Kjánchó janhan mé tinkachónkia kaín tí nkehe tsíkjin sín tí xroon kuénte ley la ko tinkachónkia kaín tí nkehe k'uénixja tí sín k'uéchrónka itén Dios. ¹⁵ Kjaxin tinkachónkia tí Dios tinkáchónki tí jehe sín kíxin tjéchonhán kíxin Dios sinchexechón kaín chojni jína la ko kaín chojni jínahya kjaxin. ¹⁶ Méxra tóxakonna kíxin tjóá chrókuak'é kíxin chrókuanchahya Dios jié la ko kjaxin chojni chrókuanchahya jié.

¹⁷ 'Nta kjuixin k'uatsínka iso nánó ixrini ókjé ntá kjuíjini chjasénni kíxin tsjanjonni chichaon la ko kjaxin tsochjéheni Dios nkehe. ¹⁸ Méxra mé xíkaha tjenni nkaxenhen ninko nta iso sín judío tsíkjixin estado Asia ó xetani ntiha. Ntá kjuinchetjóáni asénni la tsjéhya chojni k'uíkon la kohya chojni kjuánjónkoni. ¹⁹ A ntá tí sín a mé t'ichjánxín chrókui sín ntihi kíxin chrókuanchia sín jié tí nínkakonna sín. ²⁰ A ntá tí náhí la tí sín tjejó ntihi chróchrónka sín kíxin nkehe tí jié k'uitjaxín sín tió kjuák'eni tí tjejó tí sín t'etqan kuénte tí sín judío. ²¹ Kjá tí tsontáchro sín kíxin náxrónhya ijnko nkehe itsen k'uèya ntáxrjan kíxin: “Ijie sinchekitoexinrá jiéna kíxin sinchekjasótenará kíxin janhan tinkachónkia kíxin tsozechón chojni tsik'en” —ichro ch'án.

²² Ntá kjuixin kuínhin tí ch'ín Félix, la jehe ch'án jína konohe ch'án kíxin nkexrí tí ntja nixin. Ntá kjuinchekitoexínhya ch'án ijié ch'ín Pablo. Ntáchro ch'án kíxin:

—Tsjijia tí ch'ín comandante Lisias ntá tsochrónka ch'án nkekuénte tí jié tjanchiará ntá tsónóna —ichro ch'án.

²³ Ntá k'uetoenhen ch'án ijnko ch'ín capitán kíxin ts'ayakonhen ch'án ch'ín Pablo kjánchó tsítóhe sín ch'án intsí la ko tsítóhe sín ts'ixenhen tí sín chóxin ch'án, tsjitsjehe sín ch'án.

²⁴ Ntá iso yaon chr'éxín ntá kjuíjiko ch'ín Félix tjan Drusila ichjién ch'án, mé ijnko tjan judía. Ntá k'uetoan ch'án kíxin tsjik'íyehé sín tí ch'ín Pablo kíxin tsochrónka ch'án nkexrí tinkáchónki chojni Jesucristo. ²⁵ A ntá ch'ín Pablo mé kjuako ch'án kíxin nkexrí ts'ejo chojni jína la ko nkexrí ts'etuenhen chojni asén sín kíxin ch'ehya sín tí jínahya la ko

nkexrí Dios sinchekitoexín ijié chojni tí tsjixixín. Ntá ch'ín Félix kuínhin ch'án xíkaha ntá chrakon ch'án, ntáchro ch'án kíxin:

—A ntá jie la sájtia. Ntá ts'íyáha tió chonta tiempo —ichro ch'án.

²⁶ A nta ch'ín Félix tjechónhen ch'án kíxin kjá ch'ín Pablo tsjanjon ch'án chichaon ntá tsjanjon ch'án kjuachaxin sátsji ch'án. Ntá jnkoyaxón k'uýehe ch'án tí ch'ín Pablo kíxin tsonixjehé ch'án. ²⁷ Ntá xíkahó kónhen hasta k'uátsínka iyó nánó ntá tí ch'ín Félix kuítóhe ch'án tí xra gobernador la ntá í jnko ch'ín it'in Porcio Festo mé k'uíxenhen ch'án tí xra a ínaá. A ntá ch'ín Félix mé kuítóhe ch'án tí ch'ín Pablo tjechjina ch'án kíxin tjinkaon ch'án chrókuinchexiteyá ch'án tí nkehe tjinkaon tí sín judío.

25

Ch'ín Pablo nkayakon tí ch'ín Festo

¹ Ntá tí ch'ín Festo kjuúji ch'án ntiha kíxin ts'ixenhen ch'án tí xra gobernador. Ntá iní yaon chr'éxín ntá sákjuixin ch'án chjasin Cesarea la kjuúji ch'án chjasin Jerusalén.

² Ntiha tí sín nchat'a t'etoan la ko tí sín judío imá tjetoan mé kjuanchia sín kíxin tsjasóte ch'ín Pablo. ³ Kjuanchia sín kíxin xra ó chrók'uetoan ch'án kíxin chrókjui ch'ín Pablo ntiha chjasin Jerusalén. Kíxin jehe sín ó tsíkjenkayáxin sín kíxin tsochr'án sín iso chojni tsochónhen tí ntja ts'óyán sín tí ch'ín Pablo. ⁴ Kjánchó ch'ín Festo kjuátóhe ch'an ntáchro ch'án kíxin ó tsíkjenkayáxin ch'án kíxin í séhya tsjak'e ch'án ntiha. Méxra tí ch'ín Pablo la tjechjina ch'án chjasin Cesarea la xitjahya ts'etoan ch'án kíxin tsjixrakoa. ⁵ Ntá ntáchro ch'án kíxin:

—Tí chojni tjetoan kuéntará sáchrókjuikian ntiha chjasin Cesarea. A ntá tí chaxín tsíkjasin ch'án jie ntá ntiha la jína tsjanchia sín jie —ichro tí ch'ín Festo.

⁶ Ntá ch'ín Festo kjuák'e ch'án chjasin Jerusalén chjina ijní o ite yaon ntá ikjan ch'án chjasin Cesarea ínaa. Ntá tí yaon chr'éxín a kjuák'etjaxin ch'án tí tjet'etoanxín ch'án ntá k'uetoan ch'án kíxin tsjikakjín sín tí ch'ín Pablo. ⁷ Ntá tió k'uíxenhen ch'ín Pablo ntiha ntá tí sín judío kuixin Jerusalén kóchjinehe sín ch'án ntá kjuanchia sín nchónhyá jie imá hyé. Kjánchó ijnko nkehe chaxínhyá t'eka sín ch'án jie. ⁸ A ntá tí ch'ín Pablo a chrónka ch'án kíxin kjuasinhya ch'án jie. Ntáchro ch'án kíxin:

—Ninkehó jie kjuasinhya mé ninkexró kjuánjónkohyani la ko kjaxin jehya chrókuitekakonhyani tí ley kuénte tí sín judío la ko jehya chrókuitekakonhyani tí njinko la ko jehya chrókuitekakonhyani tí ch'ín gobernador romano.

⁹ A ntá ch'ín Festo tjinkaon ch'án kíxin tsónínkakuenhyá ch'án tí sín judío ntá kjuanchankíhi ch'án tí ch'ín Pablo ntáchro ch'án kíxin:

—¿Á tjinkávan sátsjia chjasin Jerusalén kíxin ntaha janhan chrókjuintakitoaxián nkehe tí jie chonta jaha? —ichro ch'án.

¹⁰ Ntá kjuátóhe ch'ín Pablo kíxin:

—Náhí, jeheni ó ntihi tjenni tí t'etoanxín tí sín gobierno romano la jína chrókjuinchekitoexián ijiéni kíxin jaha la ó noha kíxin ninkehó jie kjuich'ehyani tí sín judío. ¹¹ Kja tí chaxín kjuásian ichréni jie jie chrók'uénxián la chrakonhyana kjónté chrók'uén. A ntá ti chaxínhyá xíkaha t'ekana sín jie la ninkexró chóntahya kjuachaxin chrók'uetoan sáchrókjuikoni tí jehe sín. A ntá tjánchíá kíxin jehe tí ch'ín imá t'etoan mé sinchekitoexín tí jie —ichro ch'án.

¹² Ntá ch'ín Festo mé kjuanchankíhi ch'án iso tí sín tjinkitsa ch'án ntáchro ch'án kíxin:

—Jaha mé tjanchia kíxin tí ch'ín imá t'etoan sinchekitoexín ch'án ijiá. Méxra tétuñhan sátsjia tí tjen tí ch'ín a —ichro ch'án.

Ch'ín Pablo nkayakon tí ch'ín rey Agripa

¹³ Ntá k'uátsínska iso yaon ntá tí ch'ín rey Agripa la ko tjan Berenice kjuúji sín chjasin Cesarea kíxin tsonixjehé sín tí ch'ín Festo. ¹⁴ Ntá ntiha mé kuítóhe sín itsjé yaon ntá ch'ín Festo a mé chénka ch'án tí ch'ín rey nkehe kuénte tí ch'ín Pablo. Ntáchro ch'án kíxin:

—Ntihi itjen ijnko ch'ín tjechjina tsíkítóhe ch'ín Félix. ¹⁵ A ntá tió kjuak'é chjasin Jerusalén ntá tí sín ncháñt'á t'etoan la ko tí sín t'etuéhen tí sín judío a mé kjuíjitsjehe sín tí janhan ntá kjuanchia sín jie kuénte ch'ín Pablo. Kjuanchia sín kíxin chrók'oyánni tí jehe ch'án. ¹⁶ Ntá janhan kjuátahá kíxin: Jeheni chojni t'etoan kuénte sín romano mé kuéñhyani ts'etoanni its'en ninkexró tí naxá tsochjinahya tí ch'ín kjuasin jie kíxin tsontáchro ch'án á chaxín tí jie tjanchia sín o náhi. ¹⁷ Ntá ti sín judío kui ntihi ntá chuáñhya má. Kjónté tí yaon chr'éxín kjuak'etjaxian tí ntakitoexián ijié chojni la kuétoan kíxin síxrakoa tí ch'ín Pablo. ¹⁸ A ntá tí sín kóchjina kohya ninkehó ichro sín kuénte ti jehe ch'án exí kjuenkayáxian janhan chróntáchro sín. ¹⁹ Jehó nínkakuenxín sín ch'án kíxin tí nkehe tinkáchónki ch'án la ko nínkakuenxín sín ch'án kíxin tí nkexro it'in Jesús mé ik'uén ch'án ntá jie ntáchro ch'ín Pablo kíxin tjechón ch'án ínaá. ²⁰ Janhan la nonahya nkexrí tsitoexín tí ijié ch'án ntá kjuánchánkíha tí ch'ín Pablo á tjinkaon ch'án sátsji ch'án chjasin Jerusalén kíxin ntaha tsitoexin tí jie ch'án. ²¹ A ntá jehe ch'án tsíkjanchia ch'án kíxin tí ch'ín imá t'etoan mé chrókjuinchekitóexín ch'án ijié ch'án. Ntá kuétoan janhan kíxin naxá ntihyó tsjak'echjina ch'án tsononajia janhan nkesá tsétuáñhan ch'án sátsji ch'án ntiha —ichro ch'án.

²² A ntá ch'ín Agripa ntáche ch'an tí ch'ín Festo kíxin:

—Kjaxian janhan tjínkávan tsinháñ tí nkehe tsochrónka tí ch'ín a.

Ntá kjuátahé ch'ín Festo ntáchro ch'án kíxin:

—Ntóye tsinhín nkehe tsochrónka ch'án.

²³ Ntá tí yaon chr'éxín tí ch'ín Agripa la ko tí tjan Berenice kjuúji sín la k'uíxenhen sín la ko tí sín soldado t'etoan tsíkjikao sín, la ko k'uíxenko sín iso chojni tjetoan kuénte chjasin ntiha. Ntá k'uetoan ch'ín Festo kíxin tsjixrakoa tí ch'ín Pablo. ²⁴ Ntá ntáchro ch'ín Festo kíxin:

—Jaha ch'ín rey Agripa tinhín la ko tinhínrá kaín rá tsíkójkotsérá ntihi. Tsjehérá tí ch'ín Pablo itjen ntihi. Kaín tí sín judío k'ueka sín ch'án jie tí chjasin Jerusalén la ko kjaxin chjasin Cesarea ntihi la kuítóehya sín, tjanchana sín kíxin chrók'uen ch'án.

²⁵ A ntá tónhenni kíxin kohya jie jie kjuasin ch'án kíxin chrók'uen ch'án. Kjánchó jehe ch'án mé tsíkjanchia ch'án kíxin tí ch'ín imá t'etoan chrókjuinchekitóexín ijié ch'án. Ntá kjuenkayáxian kíxin tsétuáñhan ch'án sátsji ch'án ntiha. ²⁶ Nonahya nkehe chaxín tsokjian ts'áyéhé tí ch'ín t'etoan. Ntá jie kuétoan kjuíkakjín sín ch'án kjuikao sín ch'án tí tjejóni ntihi kíxin tjetoan kíxin jaha ch'ín Agripa la ko kaín rá tjejorá ntihi tsjanchankíhírá ch'án kíxin mé tsónóna janhan nkehe tsokjian. ²⁷ Méxrä náxrjónhya chróchr'an ijnko tí chojni tjechjina naxá nonahya nkehe tí jie t'eka sín ch'án.

26

Ch'ín Pablo nkayakon tí ch'ín rey Agripa chrónka ch'án tí jie t'eka sín ch'án

¹ Ntá tí ch'ín rey Agripa a mé ntáche ch'án tí ch'ín Pablo kíxin:

—Ó nchoxon jahvá tsochrónka —ichro ch'án.

Ntá tí ch'ín Pablo mé kjuaya tja ch'án ntá kjuankíxin nixja ch'án, ntáchro ch'án xíkihi:

² —Chàna kíxin tsonixja nkayakuan tí jaha rey Agripa tsoxrjanka kaín tí jie t'ekana tí sín judío. ³ Ó noheni kíxin jaha la ó noha jína kuénte tí ley la ko tí nkehe tinkáchónki tí sín judío, la ko jaha noha nkehe tí kjuachaxín sín kíchó sín. Méxrä xrjannóha kíxin tjak'etinhín jína.

Chrónka ch'ín Pablo nkexrí kjuák'e ch'án tí ósé

⁴ 'Kaín tí sín judío la ó nohe sín nkexrí k'uékjak'é tí chjasenná la ko chjasin Jerusalén tí naxa k'uéntasoána. ⁵ Kjaxin jehe sín la ó nohe sín la kjá jína chróchrónka sín kíxín tí naxa k'uéntasoána la k'uéfariseona. A ntá tí sín fariseo a mé antsí má kjuínchexiteyéhe sín tí ley kuénte tí nkehe tinkáchónkini. ⁶ Ntá ijie sinchekitoexián jienna kíxín nínkaon tí sín judío a kíxín tjéchonhan kíxín Dios mé sinchexechón chojni ínaá xíkaha tsíchrónka ch'án tí sín tsík'axrjeníxinni. ⁷ Tí teyó tribu tsík'axrjeníxin ch'ín Israel mé tjejóchónhen sín kíxín ts'ikon sín tsoxiteyá tí nkehe tsíchrónka Dios. Méxra xraxinkaon sín Dios nchakotjin la ko tie. Méxra mé xíkaha tjéchonhan, jaha rey Agripa, la mé xíkaha nínkakonna tí sín judío ijie. ⁸ ¿Á títekákonhyará jahará kíxín Dios sinchexechón chojni tsík'en?

Ch'ín Pablo k'uéníkakonhen ch'án tí chojni tinkáchónki Ínchéni

⁹ 'Janhan mé kjaxin k'uékjenkayáxian nchónhya nkehe k'uéníkakonhan tí sín tinkáchónki Jesús tí nkexro tsíkjixín chjasin Nazaret. ¹⁰ Mé xíkaha kjaxin k'uékjít'a chjasin Jerusalén. Tí sín nchat'á t'etoan mé kjuanjon sín kjuachaxin kíxín janhan tsochr'áxanhán ntóechiso nchónhya tí sín tinkáchónki Ínchéni. Ntá tió k'oyán sín tí sín a mé janhan la ntáxrjan kíxín ó nchoxon xíkaha kónhen. ¹¹ Nchónhya veces kjuintakjasóte tí sín tinkáchónki Ínchéni kíxín chrókuítóhe sín tí nkehe tinkáchónki sín. Mé xíkaha k'uékjít'a kaín xín níngo kíxín imá k'uéníkakonhan tí jehe sín la xíkaha k'uájichráhá sín kjónté sátsíki sín chjasin ókjé.

Chrónka ch'ín Pablo nkexrí kuinkáchónki ch'án Ínchéni (Hch. 9.1—19; 22.6—16)

¹² 'Méxra xrä ó sákjuia janhan chjasin Damasco. Tí sín nchat'á t'etoan mé ó kjuanjon sín kjuachaxin kíxín xíkaha t'ahá sín xrä. ¹³ A ntá tí ntja a jaha rey chrókónoha kíxín chonkíxin k'uíkuán éxí ijnko xrohi t'inkaséyan kuixín nkaya nkajní antsí má fuerte la kánhyó fuerte tí xrohi kuénte yaon la tí t'inkaséyan mé k'uantatjen tí janhan la ko tí sín xríkjan. ¹⁴ Ntá kaín ni kjuítsíkani nonte ntá xrínahya kuiñhan nixja ijnko nkexro mé nkiva hebreo nixjaxín ch'án. Ntáchro tí nkexro a kíxín: "Saulo, Saulo, ¿nkekuénte nínkakónna xrítjeyá tí janhan? Jahvá ncheckjasóte ásán kíxín tjanjonkoa tí janhan. Éxí yóhe ijnko koxinta kóninkaon va tí chriáte sín va chica yo mé xíkaha jaha." ¹⁵ Ntá kjuánchánkiá kíxín: "¿Xá nkexro jaha?" Ntá tí nkexro me kjuátuhe kíxín: "Janhan mé Jesús mé tí nkexro chréhé jaha. ¹⁶ Ijie t'ayá jaha, tjak'exián totá. Janhan kjuánjuan kjuachaxin kíxín k'uíkuán tí janhan ijie kíxín jaha sich'ena xrä. Janhan kjuéyá tí jaha kíxín tsochénka chojni kíxín k'uíkuán tí janhan la ko tsochronka tí nkehe tsjákokáhá ínaá tí xík'ikuan tí janhan ínaá. ¹⁷ Janhan ts'ayakonhan kíxín kohya nkehe sit'aha tí sín judío la ko tí sín jehya judío. A ntá jie tétoan satsjia. ¹⁸ Méxra tétoan satsjia tí tjejó tí jehe sín kíxín takitjenkia ikon sín kíxín í ts'ajihya sín ntja sítié la ts'aji sín ntja t'inkaséyan la ko tsochóntahya tí jínahya kjuachaxién ts'etueñhen tí jehe sín. Jehe sín mé tsinkáchónki sín tí janhan. Ntá janhan ts'ayáhá sín la tsjiin ijié sín la ko tsitonhen sín tí nkehe ts'ayéhá kaín tí sín tsíkjinchetjóá Dios," ichro Ínchéni.

Ch'ín Pablo kuítekaon ch'án tí nkehe tsík'ikon ch'án

¹⁹ 'Mé xíkaha jaha rey Agripa kjuintaxiteyáhá tí nkehe k'uíkuán kuixín nkaya nkajni. ²⁰ Sáoxín kjuákokáhá tí sín siín chjasin Damasco, la ntá chr'éxín chjasin Jerusalén, la ko kuenté tí estado Judea ntá kjaxin kjuákokáhá tí sín jehya judío. Kjuákokáhá sín kíxín chrókuítóhe sín ijié sín, la chrókjan sín chrókuinkáchónki sín Dios, la ko chrókjuákokoxín sín xrä jína kíxín chaxín ó kjuitoxínhin sín tí nkehe tinkáchónki sín. ²¹ Mé xíkaha tí xrä tséxinna tí sín judío a nkaxenhen níngo la tjinkaon sín chrók'oyánna sín. ²² Ntá kjuasáyé Dios kjuíkitsana la ntoá itjén ijie tjákohá kaín chojni ntsíntsí la ko chojni ihyé la ninkehó k'untaxíanhya kuénte tí nkehe tsíchrónka tí sín tsíchrónka itén Dios la ko tí nkehe tsíchrónka ch'ín Moisés tsónhen, ²³ kíxín t'ichjánxín its'en Cristo la ko tsoxechón

ch'án ínaá. Tí itén ch'án éxí ijkno xrohi ts'inkaséyanxín tí sín siín ntihi la ko tí sín siín í so nación kíxin tsaáxin sín.

Ch'ín Pablo nixjehe ch'án ch'ín Agripa kíxin chrókuinkáchónki ch'án Inchéni

²⁴ Mé xikaha ichro ch'ín Pablo kíxin kohya jie kjuasin ch'án ntá tí ch'ín Festo mé itsen k'uèya ch'án kíxin:

—Pablo jaha la kjá tsík'ixikján. Imá tsíkjincokuáxian mé xikaha tsíkólókoxián —ichro ch'án.

²⁵ Ntá kjuátehe ch'ín Pablo kíxin:

—Jehya tsík'ixikjánna. Jaha Festo imá tjuaha. A ntá tí nkehe ntáxrjan la ijkno nkehe jína la ijkno nkehe chaxín. ²⁶ Ntihi itjen tí ch'ín rey Agripa. Jehe ch'án mé jína nohe ch'án kaín tí nkehe a. Méxra tjenixjaha ch'án jnkójína kíxin ó nòna kíxin jehe ch'án ó nohe ch'án kaín nkehe kónhen kíxin jehya ijkno nkehe imó kónhen tíha. ²⁷ Jaha, rey Agripa, ¿á títekávan tí nkehe tsíkjako tí sín tsíchrónka itén Dios ósé? Janhan la ó nòna kíxin títekávan jaha.

²⁸ Ntá kjuátehe ch'ín Agripa ntáchro ch'án kíxin:

—Ó qantsíkoá chrokjuacha chrókuachròena kíxin chrók'ónana cristiano —ichro ch'án.

²⁹ Ntá ntáchro ch'ín Pablo kíxin:

—Ntáxrjan kíxin á isé tsoxrjanka o á séhya la Dios mé tjinkaon kíxin jehya jahvá chrókuinkachónkia ch'an. Náhí. Kjaxin tjinkaon ch'án kíxin kaín nkexro tjejótinhin chrók'óna sín éxí tí janhan kjàñchó xikahya chróchónta sín cadena.

³⁰ Ntá kjuixin nixja ch'ín Pablo ntá k'uínkatjen tí ch'ín rey, la ko kjaxin tí ch'ín gobernador, la ko kjaxin tí tjan Berenice, la ko kaín xín tí chojni tjejótjaxin ntiha. ³¹ Ntá kaín sín k'uaxrjenta sín la ikjo sín kichó sín. Ntáchro sín kíxin:

—Kohya jie tsíkjasin tí ch'ín a kíxin chrók'uenxín ch'án la ko chrókuak'echjinaxín ch'án ntoechiso.

³² Ntá tí ch'ín Agripa ntáche ch'án tí ch'ín Festo kíxin:

—Ó nchoxon chrókuánjuan kjuachaxin sáchrókjui tí ch'ín a tí jehe ch'án chrókuanchahya ch'án kíxin tí ch'ín imá t'etoan sinchekitoexín ijé ch'án —mé xikaha ichro tí ch'ín Agripa.

27

Ch'ín Pablo sákjuí ch'án chjasin Roma

¹ Ntá k'uetoan sín sátsjini nación Italia. Tí ch'ín Pablo la ko í so sín tjejóchjina a mé k'uayéhe ijkno ch'ín capitán mé it'in Julio. Jehe ch'án me ijkno policía kuente tí ch'ín t'etoan Augusto César. ² Ntá k'uíxenhenni ijkno ntabárco tsíkjixin nó puerto Adramitio, la ó chjina sátsji tí puerto nó estado Asia. Kjaxin tjejókoni tí ch'ín Aristarco tsíkjixin chjasin Tesalónica nó estado Macedonia. ³ A ntá tí yaon chr'éxin mé kjuíjini ti puerto chjasin Sidón. Ntá ch'ín Julio mé ikjo jnkójína ch'ín Pablo ntá chjéhe ch'án kjuachaxin kíxin sátsjitsjehe ch'án tí chojni chóxin ch'án ntiha kíxin tsjinkitsa sín ch'án. ⁴ Ntá chr'éxin sákjuíxinni chjasin Sidón. Ntá kjuíjini ijkno isla it'in Chipre la nó tja kjonni kuítuhe tíha la imá chjéhe xrinto. ⁵ Ntá k'uatoyni tí ntayaon chjinaxón chjasin Cilicia la ko Panfilia la ntá kjuíjini chjasin Mira estado Licia.

⁶ A ntá ntiha tí ch'ín capitán, tí ch'ín k'uetoenhen tí sín soldado a, mé k'uitja ch'án ijkno ntabárco tsíkjixin nó chjasin Alejandría sátsji nó nación Italia. Ntá ntáchro ch'án kíxin tíha sátsjikoni kíxin tsijiji ntiha. ⁷ Nchónhya yaon kjuíjinni kíxin imá iyó la imá xrä kjuíjini chjino chjasin Gnido. Ntá naxa chjéhe xrinto tsankä ntá k'uátsínkani chjinaxón Salmón ntá kuinkatjáxinni chjino tí isla Creta. ⁸ Ntá xikahó imá xrä k'uátsínkani chjinó chrínta ntá kjuíjini ijkno chjasin it'in Puertos Jína chjino chjasin Lasea.

⁹ Ntá k'uítjáyannkí nchónhya yaon, ntá ó kjuixraká tí yaon xitjahya sátsjiko sín ntabárco chrítaón ntayaon kíxin ó kóchjina tí nchákuén kin. Méxra ch'ín Pablo nixjéhe tí sín a.

¹⁰ Ntáchro ch'án kíxin:

—Tinhínrá tí nkehe tsqxrjanka. T'íkuñ kíxin nchónhya kjuachrakon tsonhen. Sinchek'itjáyanni tí ntabárco a la ko tí nkehe tjinká la kjaxin jeheni chrók'uitjáyanni —ichro ch'án.

¹¹ A ntá tí ch'ín capitán kuénte tí sín soldado a mé ąntsí má tjinkaon ch'án chrókuinhin tí nkehe chrónka tí ch'ín tjiko ntabárco la ko tí nkehe chrónka tí ìnché tí ntabárco a ntá tí nkehe ntáchro ch'ín Pablo la náhí. ¹² Jehya jína kíxin tí puerto ntahó chrók'uejóni ntá chrók'uatsínkajia tí nchákuén kin, ichro sín. Kaín sín kjuenkayáxin sín kíxin íchá jína sátsjixínni ntiha kíxin ákué xitjahya chrókjuijini chjasin Fenice, ijnko puerto estado Creta nó chók'á noroeste la ko suroeste, la ntaha chrók'uejóni ntá chrók'uatsínkajia tí nchákuén kin.

Tí xrínto chjéhe chrítaón ntayaon

¹³ Ntá kjuankíxin chjeho xrínto kjuixín nó sur kjáñchó kánhyó fuerte ntá kjuenkayáxin sín kíxin kjá jína sátsjini.

Ntá sákuixínni ntiha kjáñchó kjónté naxa sákuíni chjinaxón tí chrínta ti isla Creta a.

¹⁴ A ntá chr'éxín ijkui ijnko xrínto kjuixín noroeste k'uíntaté tí ntabárco. ¹⁵ La kjuankíxin xrínto sákuíko tí ntabárco kíxin tsjachahyani sátsjini tí sítjixín tí xrínto a. Ntá t'ichjánxín kuítóheni sákuíko xrínto tí ntabárco tjejóxenhenni. ¹⁶ Ntá k'uátsínkani chjino ijnko isla ntsí it'in Claudia kíxin ntiha mé kánhyó tjiān chjéhe xrínto. Ntá imá xrä k'uítjíanní tí ntabárco ntsí t'etenixín nótton ntabárco jié. ¹⁷ Ntá kjuixin kjuínchek'it'ótjen sín tí ntabárco ntsí ntá imá chrakon sín ntá kjuínchenteto sín tí ntabárco jié kíxin kohya nkehe tsonhen. Kjaxin tóxakonhen sín chrakon sín tsíkjine nchesen tí ntabárco tí tsjiji sín tí it'in Sirte. Ntá kuakjinjin sín tí ka chóntha ntabárco ntá kuítóhe sín sátsjiko xrínto. ¹⁸ Ntá tí yaon chr'éxín ntá naxa imá tjiān chjéhe xrínto. Ntá ik'ue sín tí nkehe sítjinká tí ntabárco a chrínta ntayaon kíxin kánhyó tsoye. ¹⁹ A ntá tí yaon níxin a mé itjani ó kuakitsjexínni tí nkehe kuénte tí ntabárco. ²⁰ Isé k'uíkonhyani yaon la k'uíkonhyani konotsé kíxin imá tjiān chjéhe xrínto la ko kjaxin ó k'uitjáyenhenni kaín tí tjenkayáxinni kíxin naxa chrókuaáni.

²¹ Ntá ó k'uátsínska itsjé yaon kjónehyani ntá k'uíncatjen ch'ín Pablo nixjéhe ch'án kaín tí sín tjejóxenhen ntabárco a ntáchro ch'án kíxin:

—Chrókuítekáonrá tí nkehe xríjanka kíxin chrókuitóheni tí estado Creta ntá chrók'uitjáyenyani tí nkehe tjinká tí ntabárco a. ²² A ntá ijie la tóxakuanhyará kíxin kohya nijnko tí jahará its'enrá kíxin kjónté tí ntabárco la ts'itjáyan. ²³ Ntá tí tie a mé k'uíkuán ijkui ángel tsíchr'án Dios tinkachónkia la ko t'ahá xrä. ²⁴ A ntá tí ángel mé chrónka kíxin: "Chrakonhyo jaha Pablo. T'ichjánxín tsjasán tí tjen tí ch'ín César t'etjóan la kjaxin Dios la tsjinkitsa jaha la ko tí sín tjejóko kíxin ts'enhyá sín." ²⁵ Méxra chróchrakonhyará jahará kíxin tí Dios tinkachónkia la chaxín nchexiteyá tíha, éxi tsíntáchro tí ángel. ²⁶ Kjónté ó jehí t'ichjánxín sátsjikoni xrínto ijkui nonte jnkosiné ntayaon —ichro ch'án.

²⁷ Kjuixin k'uátsínska iyó semana ntá ijkui tie ntá kjuíjini ijkui ntayaon it'in Adria ntá sákuíko tí ntabárco ijkui lado la í jnko lado ti xrínto. Ntá chjino k'áxrótjen ntá tí sín tjiko ntabárco mé ó kónohe sín kíxin ó chjina kjuixraká sin ijkui nonte xámá. ²⁸ Ntá kjuáchroa sín tí nkekjaín níñkaxín tí ntá mé chóntha treinta y seis metro níñkaxín. Ntá sákuíni kjínya la ó xíkjachroa sín la veintisiete metro ó níñkaxín. ²⁹ Imá chrakon sín kíxin ts'itjáton tí ntabárco itjo ntá kjuinkajin sín noó chica gancho tí nótton tí ntabárco a kíxin ntahó tsochónhen tí ntabárco hasta chrók'uinkaséyan. ³⁰ Ntá tí sín tjiko ntabárco kjuenkayáxin sín sáchrókjui sín ntá kjuankíxin kjuinkajin sín tí ntabárco ntsí chrítaón ntá éxi tjinkaon sín chrókjuijajin sín tí gancho chóntha tí kja ntabárco. ³¹ A ntá ch'ín Pablo ntáche tí ch'ín capitán la ko kaín tí sín soldado kíxin:

—A ntá tí tsitoehya tí sín i ntihi nkaxenhen ntabárco ntá xitjahya tsaará —ichro ch'án.

³² Ntá tí sín soldado a mé kóchrínjint' o sín tí hnq̄ kuénte ntabárco ntsí tsít̄ohe sín tsjankí nt̄a.

³³ Ntá chjina t'inkaséyan a ntá ch'ín Pablo nixjehé ch'án kaín tí sín siín ntiha ntáchro ch'an kíxin chrókjóné sín ichrén nkehe. Ntáchro ch'án kíxin:

—Ó k'uátsínka iyó semana k'uejóchrinhyará la ko kjóngtehyará. ³⁴ Tinhínrá t'ichjánxín chrókjónterá ichrén nkehe tí tjinkáonrá tsaárá kíxin ntihi la kohya nkexro ts'itjáyan la nijnko tí kaxihi chóntha kjará ts'itjáyan.

³⁵ Ntá xíkaha ichro ch'ín Pablo ntá kuákja ch'án ijnko niotja a la ntiha tí tjejó kaín sín ntá kjuanchia ch'án kjuasáyé Dios ntá kóchrít' o ch'án ntá kjuankíxín kjóne ch'án. ³⁶ Ntá kóchhé sín kaín sín kjuankíxín kjóne sín kjaxin. ³⁷ Kaínni tsík'ixenhenni ntabárco mé iyó ciento setenta y seis chojni. ³⁸ Ntá kjuixin kjóne sín la kókjehé sín ntá ik'ue sín tí noa trigo a tjinká tí ntabárco a chrinkí tí ntayaon a kíxin kánhyó tsøyé tí ntabárco a.

Tíntabárco kjuixin k'uániánkí nta

³⁹ A ntá ó k'uíkaséyan, a ntá tí sín tjiko ntabárco la kjuátsohanhyá sín tí nonte ntá k'uíkon sín ijnko chrínta nt̄a. Ntáchro sín kíxin ákué tsjachahya sín sátsjiko sín tí ntabárco ntiha.

⁴⁰ Ntá kóchrínjint' o sín tí hnq̄ síchroéxin tí gancho kíxin ntahó tsít̄ohe chrínkí ntayaon. Ntá kjuíncientá sín tí nkehe tjikoxín sín tí ntabárco a. Ntá kjuínchek'it'ótjen sín tí ka tjiko nkayakon tí ntabárco. A ntá tí ntabárco kjuankíxín sákjuí chrínta nt̄a. ⁴¹ Xrínahya kjuíji ntabárco tí iyó kójnkojíéxin ntayaon ntá ntiha kjuíkjat' o tí kja tí ntabárco tí nchesen siín ntiha. Ntá í xitjahya nchekinkí ninkehó, a ntá nóton tí ntabárco kjuankíxín síxíka kíxin imá sítji chjéhe nt̄a a. ⁴² Ntá tí sín soldado a mé tjinkaon sín chrók'oyán sín tí sín tjejóchjina kíxin tjinkakonhyá sín kíxin ninkexró sáchrókjui ókjé. ⁴³ A ntá tí ch'ín t'etuenhen tí sín soldado a mé tjinkakonhyá ch'án kíxin its'en ch'ín Pablo ntá kjuanjonhyá ch'án kjuachaxin. Íchá k'uetoan ch'án kíxin tí sín jína tjitaón nt̄a la senó sátsji sín kíxin tsjiji nonte xámá ⁴⁴ la ko tí sín noehya tsjitaón nt̄a a mé sátsjiko sín ti ntatabla o it' o tí ntabárco. Ntá xíkaha kaín ni kjuíjini tí nonte xámá la ó kuaáni.

28

Itjen ch'ín Pablo tí isla Malta

¹ Ntá tió tjejóni kaín ni kuaáni ntá kónoheni kíxin tí isla la mé nchek'in sín Malta. ² A ntá tí sín chjasin ntiha mé imá jína kjuínk̄tsa sín kaín ni la kjuaka sín ijnko xrohi jié kíxin imá kin kíxin sít'aniá chrin. Ntá k'uèya sín kíxin tsochjinani kaín ni tsochjíxroheni. ³ A ntá ch'ín Pablo mé sákjuíkakja ch'án í so njo tsíxámá ntá kjuasinkáte ch'án tí xrohi a. Ntá xrínahya k'uaxrjenkíxín ijnko konche tí xrohi a kíxin imá sóa ntá xrínahya k'uísímá itja ch'ín Pablo. ⁴ Ntá tí sín chjasin ntiha mé k'uíkon sín tí konche kjítjánkítjen itja ch'án ntá ikjo sín kíchó sín. Ntáchro sín kíxin:

—Kjá tí ch'ín a la ijnko chojni tsíkjaya a kíxin kjónté kuaá ch'án k'uénxinha ch'án ntayaon la Dios la í tjinkakonhyá kíxin naxq̄ tsjak'echón ch'án.

⁵ A ntá jehe ch'án kótsjénka ch'án itja ch'án chrítaón tí xrohi kíxin ntiha ts'anótjen tí konche, ntá jehe ch'an la kohya nkehe kónhen ch'án. ⁶ Ntá kaín sín tjejóchónhen sín kíxin ách'e ts'atjoyé itja ch'án o ách'e its'en ch'án. Ntá kjuixin k'uéjóchónhen sín isé la k'uíkon sín kíxin kohya nkehe kónhen ch'án ntá kjuitóxin sín tí nkehe kjuenkayáxin sín la ntáchro sín kíxin jehe ch'án mé ijnko dios tíha, ichro sín.

⁷ Ntá chjino tí k'uéjóni a mé itjen nontee ijnko ch'ín t'etq̄an kuénte isla me it'in Publio. Mé jína kjuanjon ch'án kjuachaxin k'uejóni nt̄oe ch'án la kjuanjon ch'an nkehe kjóneni iní yaon. ⁸ Ntá it'é tí ch'ín Publio a mé tjetsíka ch'án kíxin níhi ch'án chóntha ch'án sóa la ko chinjní. Ntá ch'ín Pablo sákjuítsjehe ch'án la kjuixin nixjehé ch'án Dios, ntá kjuák'etja itja ch'án tí ch'ín a ntá kuítóhe ch'án jína. ⁹ Mé xíkaha kjaxin kóchjina í so sín níhi siín tí

isla ntá kaín sín kuít_ohe sín jína. ¹⁰ Na ntá imá kjuikosáyehe sín ch'án. A ntá chr'éx_{in} tió kjuixin k'uíxenhenni ntabárco ínaá ntá kjuanjon sín kaín nkehe t'ichjánx_{ih}hinni sátsjikoni.

Kjuíji ch'ín Pablo chjasin Roma

¹¹ Ntá k'uátsínka iní nitjó tjejóni tí isla ntá k'uíxenhenni ijkno ntabárco mé ntahó tsíkit_ohe k'uátsinkajia tí nchakuen kin. Tí ntabárco a mé tsíkjix_{in} chjasin Alejandría la ko mé chóna nkehe tsíkjanoya chóna ihnjé dios Cástor la ko Pólux. ¹² Ntá sákjuíni ntá kjuíjini puerto chjasin Siracusa la ntaha kuít_oheni iní yaon. ¹³ Ntá xík'ixenheni tí ntabárco la k'uatsíkani chjinaxón tjen ijkno nonte ntá kjuíjini chjasin Regio. Ntá tí yaon chr'éx_{in} a ntá kjuankíxin chjéhe xrint_o kjuix_{in} nó sur, ntá yaon yóxin ntá kjuíjini chjasin Puteoli. ¹⁴ Ntá ntiha xetani iso kíchó ni, a ntá tjinkaon sín ts'ejókoni sín ntiha. Ntá k'uéjókoni sín ijkno semana ntá chr'éx_{in} sákjuíni chjasin Roma. ¹⁵ Ntá tí sín kíchó ni chjasin Roma la ó nohe sín kíxin tsijini. Ntá iso sín la xetani sín ntia chjasin Foro Apio la ko í so sín xetani sín chjasin Tres Tabernas. Tió tí ch'ín Pablo k'uíkon tí jehe sín a kjuanchia ch'án kjuasáya Dios la imá kóchéhe ch'án. ¹⁶ Ntá tió kjuíji sín chjasin Roma ntá tí ch'ín capitán kjuikénhen tí sín tjejóchjina, k'uáyéhe ti ch'ín jefe ts'ayakonhen ch'án. A ntá ch'ín Pablo la kuít_ohe ch'án ókjé kjuák'e ch'an la ijkno soldado a k'uáyakonhen tí jehe ch'án.

Ch'ín Pablo kjuako chjasin Roma

¹⁷ Ntá k'uátsínka iní yaon ntá tí ch'ín Pablo a mé k'uíyéhe ch'án kaín tí sín judío tjetoan kuènte chjasin Roma. Ntá tió kjuixin kójnkotsé kaín sín ntá ntáchro ch'án kíxin:

—Kíchóni, kohya ninkehó jie kjuásian kíxin chrókóninkakonna tí sín judío la jehya kíxin nink_{aq}konxiān tí nkehe k'uékinkáchónki tí sín tsík'axrjeníxinni. A ntá kjónté itséna sín kjuak'echjina sín tí janhan chjasin Jerusalén la ko kjuínchekjasótena tí sín romano a. ¹⁸ Ntá k'uitjahya sín ninkehó jie chonta. Ntá tjinkaon sín chrók'uatjántana sín kíxin k'uitjahya sín ninkehó jie chrók'uénxiān. ¹⁹ A ntá tí sín judío a mé imá kóníkaon sín tjanchia sín jie. Ntá t'ichjánx_{in} tsjanchiani kíxin tí ch'ín César mé chrókjuinchekitqexín ch'án nkehe tí jie chóntani, kjónté chóntahyani ninkehó jie ts'leka tí sín tí nación kuénteni. ²⁰ Méxra k'uíyáhará kíxin tjinkaonni ts'íkuān tí jahará la ko tsonixjáharáni kíxin tinkáchónkini tí nkexro tjejóchónhen kaín tí sín israelita mé xíkaha t'ikonrá kíxin tjechrontetoxínni cadena ntihi.

²¹ Ntá ntáchro sín kíxin:

—K'uáyéhyani ninkehó xroon chrókjuixin Judea kuènte tí jaha la ko kuihya nijnko tí sín kíchó ni judío chróntáchro sín ichréñ nkehe jínahya tsíkjich'e. ²² Tjinkaonni chrókuinhinni nkexrí tjenkayáxian kíxin ó noheni kíxin itsjé chjasin t'ántaxính_{in} sín tí nkehe níxín tjàkua —mé xíkaha ichro sín.

²³ Ntá chr'éx_{in} kjueyá sín ijkno yaon tsinhhin sín nkehe tsochrónka ch'ín Pablo. Ntá kójnkotsé nchónhya chojni tí nchia kjuák'e ch'án. Kuenté yaon chrónka ch'án nkexrí tí kjuachaxin kuènte Dios. Nixjéhe ch'án sín kíxin chrókuitekaon sín tí nkehe kjuako ch'ín Jesúz, la chrónkaxín ch'án kíxin nkexrí nixja tí ley kuènte ch'ín Moisés la ko tí tsíkjin tí sín profeta ósé. ²⁴ Ntá iso tí sín mé kuitekaon sín tí nkehe ntáchro ch'ín Pablo. A ntá í so sín na kuítekakonhya sín. ²⁵ Ntá jnkokoáhya kjuenkayáxin tí jehe sín la iso sín tjinkaon sín kíxin sáchrókui sín, ntá ch'ín Pablo mé ntáchro ch'án kíxin:

—Ntoá nixja tí nkehe chénka Nchakuen Dios tí sín tsík'axrjeníxinni ósé chrónkaxín ch'ín profeta Isaías ntáchro kíxin:

²⁶ Sátjia nixjéhe tí chojni a

kíxin jehe sín kjónté tjejótinhin sín la tienxínya sín,
la kjónté tjejótsjehé sín la t'ikonhya sín.

²⁷ A ntá asén tí chojni tí chjasin i la tsík'óna imá cha
la ntatsjon sín la tsíchr'áto

la ikon sín la tsíchr'áto
kíxin t'ikonxínya sín

kíxin tinhín sín la tjinkakonhya sín chrókuienxín sín,
la tjinkakonhya chrókuienxín əsén sín.

Í tjinkakonhya sín chrókjan sín chrókuinkáchónki sín tí janhan kíxin ntá janhan
chrókjuntakitoḥa sín jína.*

Mé xikaha tsíkjin ch'ín Isaías. ²⁸ Méxra chrókónohará jahará kíxin ijie tí sín jehya judío me
ts'ayéhé sín tí nkehe tsjanjon Dios tsaáxin sín kíxin jehe sín mé tsinhhin sín.

²⁹ Ntá xikaha ichro ch'ín Pablo ntá tí sín judío sákuí sín la tinkákjo sín kichó sín.

³⁰ A ntá ch'ín Pablo kuítqhe ch'án tí nchia tsíkjen ch'án iyó nánó. La kjuanjon ch'án
kjuachaxin k'uéjó tí sín kjuíjitsjehe ch'án. ³¹ La kjuako ch'án tí kjuachaxin kuènte Dios la
ko kjuako ch'án kuènte Inchéni Jesucristo. La kohya ninkexró k'uínkákonhen tió kjuako
ch'án. Ó tjen.

* ^{28:27} 28.26-27 Isaias 6.9-10

Tí xroon ikjin ch'ín Pablo chr'éhen ch'án tí sín romanos

Ch'ín Pablo ikjin xroon k'uáyéhe tí níñko chjasin Roma

¹ Janhan Pablo mé t'ahá xra Jesucristo mé kjian tí xroon i. Kjueyána Dios kíxín sit'aha ch'án xra tsjákua tí tan jína tsaáxinni.

² Tíha mé tsíntáchro Dios senó kíxín tsoxiteyá éxí nixja tí xroon nixjaxin tí sín tsíchronka itén ch'án ósé. ³ Tí tan a mé chrónka nkexrí tjen Închéni Jesucristo Xjeen Dios. Jehe ch'án mé tsík'óna ch'án chojni k'uaxrjeníxin ch'án tí sín tsík'axrjeníxin tí rey David. ⁴ Tí kjuachaxin jié mé kjuakoxin kíxín jehe ch'án mé chaxín Xjeen Dios kíxín ó xechón ch'án la chóntha ch'án Nchákuén Dios imá tjetoan. ⁵ Kjuasáyé Jesucristo k'uáyéheni kjuachaxin kíxín sich'eheni ch'án xra sátsjichronkaxínni itén ch'án kíxín kaín xín chojni chónhya ch'án kuenté chjasintajni chrókuitekaon sín ch'án la ko chrótjuéhe sín ch'án. ⁶ Jahará k'uék'ejorá éxí tjejó tí jehe sín, a ntá jie la kjueyára Dios kíxín chrókuítékanra Jesucristo.

⁷ Janhan ikjian tí xroon chr'anhánrá kaín rá tjejorá chjasin Roma. Tjuàhará Dios la kjueyára ch'án kíxín tjóá chrók'uejorá. Kjuasáyé It'eni Dios la ko Închéni Jesucristo kíxín kjuanjon ch'án kjuaxróxin k'uayéhérá.

Ch'ín Pablo tjinkaon chrókjuitsjehe ch'án chjasin Roma

⁸ Xrankíxín kjuachaxién Jesucristo tjánchàxian Dios kjuasáya kíxín jahará ó kuítékanra ch'án la ko nkuíxín chjasintajni nixja sín nkexrí tinkachónkirá ch'án. ⁹ Dios, tí nkexro t'ahá xra kaín asenná xrjanka tí tan jína kuènte Xjeen ch'án, mé nohe ch'án kíxín xráxín xráxinkavan tí jahará tió nixjaha ch'án. ¹⁰ Xráxín tjáncháhá Dios kíxín tí chrókjuanjon ch'án kjuachaxin la chrókjusántsjahárá. ¹¹ Kíxín tjínkavan chrókjusántsjahárá tí jahará kíxín chrókjuiñksa tí jahará kíxín chrók'uitjará jína nkexrí chrók'uejorá ntoá. ¹² Me xíkaha tsócháhárá la ko tsóchàna kíxín jnkokoá tinkáchónkini Închéni, jahará la ko janhan.

¹³ Kíchóni, tjínkavan chrókónohará kíxín nchónhya veces tjínkavan chrókjusántsjahárá kjánchó naxá xitjahya tsjasán. Tjínkavan chrókjusán kíxín chrókjuit'a xra kuènte Închéni kíxín chrókjuachani nchónhya chojni chrókuinkáchónki Dios éxí kjuit'a xra í so chjasin naxá chónhya sín Dios. ¹⁴ T'ichjánxín tsjákoha kaín chojni, á chojni griego o á chojni jehya griego o á chojni nohe o á chojni noehya. ¹⁵ Mé xíkaha xra ó tjéchonhán chrókjusán chrókjukohará tí tan tsaáxinrá tí jahará tjejorá chjasin Roma.

Tí kjuachaxin kuènte tí tan jína

¹⁶ Tósuanahya xrjanka tí evangelio kíxín táha ijnko tan jína kíxín chóntha kjuachaxin kuènte Dios chrókuaáxin kaín xín tí chojni chrókuitekaon, mé saoxín tí sín judío la ko kjaxin tí sín jehya judío. ¹⁷ Kíxín tí tan jína kuènte Dios tjákuexin tí jeheni kíxín chrókótjuáxin ijíeni kíxín tinkáchónkini ch'án la jehó ch'án tinkáchónkini. Exí ntáchro xroon itén Dios kíxín: "Tí nkexro kótjóá kíxín kuítekaon sín Dios mé táchó ts'ejochónxin sín."*

Tí jie tjasin chojni

¹⁸ Dios tjen nkaya nkajní mé tsonínkakonhen ch'án tí sín jínahya tjasin jie, mé sinchek-jasóte sín ch'án. Tí jie jínahya tjasin sín mé t'inkákonhen kíxín chrókónohe sín tí nkehe jína chaxín. ¹⁹ Jehe sín ó nohe sín jína nkexrí tjen Dios kíxín jehe ch'án kjuakuexin ch'án tí jehe sín. ²⁰ Tí kjuachaxin kuènte Dios kjónté t'ikonyani la kjánchó noexínni kíxín tí nkehe kjuich'ena ch'án. Kíxín tí naxá k'ónahya chjasintajni kónoxín kíxín jehó ch'án mé Dios t'etqan la ko chóntha ch'án kjuachaxin jnkochríxín. La ntá tí sín jínahya xitjahya tsontáchro

* ^{1:17} Habacuc 2.4

sín kíxin k'uénoehya sín. ²¹ Kjónté nohe sín kíxin xíkaha itjen Dios la tjikosáyehya sín ch'án la ko ni tjanchehyla sín ch'án kjuasáya. Tjenkayáxin sín tí nkehe ninkehó sínkíhya kíxin jínahya əsén sín la tí sítié ó kuítuhe sín. ²² Kjónté ntáchro sín kíxin imá nohe sín kjánchó imá lontí sín kíxin əntsí kjuasin sín jie. ²³ A ntá ó kjuixin kjuinkí sín tí nkehe tinkáchónki sín la ko kuítekakonhyá sín tí kjuachaxién Dios itjen jnkochríxín, t'enhya. A ntá ijie tinkáchónki sín tí nkehe tsíkjanoya tóyóhé chojni it'en. Kjáxin tinkáchónki sín koxroxé tsíkjanoya la ko konche la ko iko chóntha noó toté.

²⁴ A ntá xíkaha Dios kuítuhe ch'án tí jehe sín kíxin chrókjuich'e sín tí nkehe jínahya tjenkayáxin sín ntá xíkaha ch'e sín ijnko nkehe chrókósúèxin sín ch'ehe kíchó sín ²⁵ kíxin kuítekakonhyá sín tí nkehe chaxín kuénte Dios, a ntá tí nkehe jínahya mé kjueyá sín. Kjuich'eña sín dios kuénte sín tí nkehe tsíkjich'eña Dios. A ntá tí nkexro kjuich'eña tí nkehe la titekakonhyá sín. Jehe ch'án mé chrókjuancheheni ch'án kjuasáya jnkochríxín kíxin jehe ch'án mé kaín tí nkehe siín mé kuénte ch'án. Amén.

²⁶ La ntá xíkaha kjuich'e sín ntá Dios kuítuhe ch'án tí jehe sín kíxin chrókjuich'e sín tí nkehe chrókósúèxin sín chrókjuich'e sín. Kjónté tí chojni chjin la kuítuhe sín tí ichjin sín la ntá kjuich'eña sín əsén sín chojni ntoa. ²⁷ A ntá kjáxin xíkaha tí chojni ntoa kuítuhe sín chróchóntha sín chojni chjin la tjinkaon sín tí nkehe ntoáhya. La ntá ch'e sín nkehe chrókósúèxin sín ch'ehe kíchó sín jnkokón ntoa sín. Mé xíkaha mé tí cuerpo kuénte sín mé tsjasótexín sín tí jie kjuasin sín.

²⁸ Tjinkakonhyá sín tsoxraxinkaon sín Dios ntá jehe ch'án mé kuítuhe ch'án tí jehe sín kíxin xíkaha tsjenkayáxin sín tí nkehe jínahya kíxin sich'e sín tí nkehe chrókjuich'ehya sín. ²⁹ Nchónhya jie chóntha sín mé tí nkehe ntoáhya ch'e sín, la tjinkaon sín chrókuakja sín í jnko chojni chjin ókjé, la ko tí nkehe jínahya ch'e sín, la ko tjinkaon sín jehó sín chróchóntha sín itsjé nkehe, la ko imá tjasin sín jie, la ko jehe sín chjinoxín sín, la ko tjinkaon sín chrók'óyán sín kíchó sín, la ko itje sín kjuaníkaon, la ko ch'ia sín la ko jínahya sín xriko sín kjuach'ia. ³⁰ T'ántaxínhin sín kíchó sín la ko nínkakonhen sín Dios, la ko jehó sín chrók'uetoan sín, la ko nccheinke sín, la ko jehó sín ch'eña sín nkehe jínahya tjasixín chojni jie, la ko tjikosáyehya sín it'é sín la ko iné sín. ³¹ Tienxínhya sín la nchexiteyáhya sín nkehe nixja sín, la ko tjuéhya sín kíchó sín, la ko tjinkakonhyá sín sinchek'itjáyehen sín ichréen jie kjuasinhin kíchó sín, la ko tikonóehya kíchó sín. ³² Jehe sín ó nohe sín jína kíxin nkexrí k'uetoan Dios la jehe sín ó nohe sín kíxin tí jie kjuasin sín chrók'uenxín sín, la kjónté xíkaha ó nohe sín, la naxa tjasin sín jie la kjáxin chéhé sín chrók'uikon sín ókjé nkexro chrókjuasin jie xíkaha.

2

Dios nchekitqexín ch'án tí jie tjasin chojni

¹ Mé xíkaha jahará xitjahya tsontáchrórá kíxin chontahyará jie a ntá tékará jie tí í so sín tjasin jie. A ntá tí xíkaha ch'erá la jahará xrítjéyárá nkexrí chrókjuasótexínrá kjáxin kíxin jahará jnkokón jie tjásinrá. ² Ó noheni kíxin ntoá sinchekitqexín Dios tí jie kjuasin chojni kíxin sinchekjasóte ch'án tí sín xíkaha tjasin jie. ³ A ntá jahará la tékará jie í so chojni ntá jahará kjáxin la xíkaha jnkokón jie tjásinrá. ¿Á tjenkayáxinrá kíxin tsjachará tsinkehérá tí sinchekjasótíará Dios ní? ⁴ ¿Á kjoniehérá tí kjuaxróxin tsjéjehya tjanjon Dios kíxin tjechónhen ch'án naxa nínkakuanhyará ch'án? A ntá jahará la kuiénxinhyará kíxin Dios tjuáhará kíxin tjinkaon ch'án chrókuitohérá tí nkehe jínahya tjenkayáxinrá. ⁵ Kjánchó jahará imá icha əsánrá, tjinkákonhyará chrókuitohérá tí nkehe jínahya tjenkayáxinrá, a ntá əntsí má nchek'ánkírá tí nkehe jínahya tsjasótexínrá tí yaon tsjixixín tió tsotonoxín kíxin sinchekjasóte Dios chojni. ⁶ Jehe ch'án mé tsjenkehé ch'án jnkojnko chojni nkehe tí xra tsíkjich'e sín. ⁷ Tsjanjon ch'án kjuachón ts'áyéhé tí sín tneyá sín tí nkehe náxrjón la ko tí kjuachaxin ts'itjáyanhyá la ko xráxín kjuich'e xra jína. ⁸ A ntá tsóninkaon Dios

sinchekjasóte ch'án kaín tí sín nchehnke la ko tí sín tjinkakonhya chrókjuich'e sín tí nkehe jína. A ntá náhí, la íchá má kóxrjínhín sín kjuúch'e sín tí nkehe jínahya. ⁹ Mé xíkaha tsjasóte sín la ko kjuaxróxinha tsónhen kaín tí sín kjuúch'e tí nkehe jínahya, mé senó tí sín judío la ko kjaxin tí sín jehya judío. ¹⁰ A ntá Dios mé tsjanjon kjuachaxin la ko tsjanjon ch'án kjuaxróxin la ko tsjikosáyehe ch'án kaín tí sín kjuúnchexiteyéhe ch'án kjuúch'e tí nkehe jína, mé senó tí sín judío la ko kjaxin tí sín jehya judío.

¹¹ Dios la t'ikon kíxin kaín chojni la jnkokón sínkí. ¹² Kaín tí sín tjasin jie kíxin noehya sín tí ley tsíkjín ch'ín Moisés la kjónté chónhya sín tí ley la its'en sín. A ntá tí sín ó nohe tí ley tsíkjín ch'ín Moisés ntá tjasin sín jie, la tí ley a mé tsjanchia jie tsjasótexín sín. ¹³ Jehya tí sín ó chrókuinhón tí ley la ó chrókótjuáxin ijié sín. Náhí. Tí sín sinchexiteyéhe sín tí nkehe k'uetoan Dios mé tsotjuáxin ijié sín. ¹⁴ A ntá tí sín jehya judío chóntahya sín tí ley t'etuēnhen sín la ntá tió jehó sín chrókjuinchexiteyéhe sín éxí nixja tí ley la jehí jehó sín t'etuēnhen asén sín. ¹⁵ Kíxin tí kjuúnchexiteyá sín ch'e sín tí nkehe jína mé tjákoxin sín kíxin asén sín xraxinkakonxín sín tí nkehe ntoá la ko asén sín tjanchankíhi sín á jína tjejó sín o náhí. ¹⁶ Itsí tí yaon la Dios mé sinchekitoexín kjuachaxin Ìnchéni Jesucristo kaín nkehe imó kjuúch'e chojni éxí nixja tí tan jína tjákua janhan.

Tí sín judío la ko tí ley tsíkjín ch'ín Moisés

¹⁷ A ntá jahará ntáchrórá kíxin jahará judíorá la tinkachónkirá tí ley tsíkjín ch'ín Moisés la ko nchehnkerá kíxin tinkachónkirá Dios. ¹⁸ Ó nohará tí nkehe tjinkaon Dios la ko tí ley ó kjuákoħará kíxin chrókjuéyárá tí nkehe jína. ¹⁹ Ihnkerá kíxin nohará tsjákhérá tí sín t'ikonhya la ko jahará mé xrohi ts'inkáséyanxín sín ixri sítié, ichrorá. ²⁰ Ntáchrórá kíxin nohará tsjákhérá tí sín noehya la ko tsjínkitsará tí sín tienxínhya kíxin jahará chontará tí ley chrónka kjuaxrexinkaon jína la ko tí nkehe chaxín, ichrorá. ²¹ Juhará tjákhérá í so chojni, a ntá jahará, ¿nkekuénté tjákoéhyará asánrá xíkaha? Juhará tjákhérá chojni kíxin chrókueéhya sín, a ntá jahará la, ¿nkekuénté teerá? ²² Ntáchrórá kíxin xitjahya tsochóntha chojni yaá chojni chjin, a ntá jahará la, ¿nkekuénté xíkaha ch'erá? Ntáchrórá kíxin titekákonhyará tí nkehe tsíkjano, kjánchó jahará, ¿nkekuénté teerá tí nkehe tjete siín nkaxenhen níñko? ²³ Nchehnkerá kíxin chontará tí ley, a ntá jahará chontahyará kjuasáyé Dios kíxin kjuúnchexiteyéhyará éxí k'uetoan tí ley. ²⁴ Ntoá ntáchró tí xroon itén Dios kíxin: "Tí sín jehya judío la t'ántaxínhín sín Dios kíxin tí ijiárá."

²⁵ A ntá tí chaxín kjuúnchexiteyará tí ley tsíkjín ch'ín Moisés la ntá jehya chónkó tsíkará xroye. A ntá tí kjuúnchexiteyéhyará tí ley la éxí tsíkahyará ninkehó xroye. ²⁶ A ntá tí sín tsíkahya xroye kjánchó titekaon sín nkexrí t'etoan tí ley la tjejó sín éxí ó tsíka sín xroye kjónté chaxínhya chóntha sín. ²⁷ A ntá tí nkexro kuáhya xroye tí cuerpo chóntha kjánchó nchexiteyéhe tí ley, mé jehe sín tsjanchia sín jie tí jahará kíxin jahará kuítækákonhyará kjónté chontará tí xroon nixja tí ley la ko kjónté ó tsíkará xroye. ²⁸ A ntá tí xíkaha la chaxínhya judío jahará kíxin ó ntója ó chontará xroye la chaxínhya tsíkará xroye kíxin chrítaón cuérporá ó, chontará. ²⁹ A ntá tí chojni chaxín judío la t'ichjánxín chróchóntha sín xroye nkaya asén sín. Jehya tí ley chrók'uetoan xíkaha chrókonhen. Náhí. Táha la Nchákuén Dios. Jehya kíxin chojni chrókóxrjínhín kíxin ó nchoxon. Náhí. Dios mé tsoxrjínhín kíxin nchoxon tíha.

3

¹ ¿A ntá nkehe tsónhen kíxin ntáchró sín kíxin judío sín la ko nkehe tsónhen kíxin tsíka sín xroye? ² Chaxín xíkaha jína kíxin Dios kjuanjon tí itén ch'án saoxín k'uayéhe tí sín judío kíxin chrókjuinchexiteyá sín. ³ A ntá ¿nkehe tsónhen tí jnkojín tí jehe sín chrókjuinchexiteyá sín? Kjónté xíkaha chrókjuich'e sín la, ¿á chrókuítóhe Dios chrókjuinchexiteyá sín ch'án tí nkehe tsíntáchró ch'an? ⁴ Kjá náhí. Dios la sinchexiteyá kaín nkehe tsíntáchró ch'án kjónté kaín chojni chrókjuich'ia. Ntáchró xroon itén Dios kíxin:

Tsontáchro chojni kíxin ntoá tí nkehe ntáchroa.

Tíha mé tsjachaxian tí tsjanchia sín jie.*

⁵ Tí jie chóntani mé tjakoxin kíxin Dios mé nohe nkexrí sinchekitgxín ch'án ijié chojni. ¿A ntá nkehe chróchroni? ¿Á ntoáhya chrókjuich'e Dios kíxin chrókjuinchekjasóteni ní? (A ntá janhan nixja éxi nixja chojni ó.) ⁶ Kjá náhí. A ntá tí jehya ijnko nkexro jína tí jehe ch'án, ¿ntá nkexrí chrókjuinchekitgxín ch'án ijié chojni chjasintajni?

⁷ A ntá tí chrókjuinkitsa tí kjuach'ia kuéntana kíxin chrókónoaxínrá tí nkehe chaxín kuénte Dios, ¿a ntá nkekuénté ts'ékaráni jie kíxin janhan mé ijnko chojni chóntha jie? ⁸ Tí xikaha la, ¿á chrókjuich'eni tí nkehe jínahya kíxin ntá chrókui tí nkehe jína? Mé xikaha ichro iso chojni t'ekani jie kíxin xikaha tjakoni, ichro sín. Tí sín a chrókjuasóte sín kíxin xikaha ichro sín.

Kaínni chóntani jie

⁹ ¿Ntá nkexrí? Jeheni judíoni la, ¿á antsí má tjetoanni, a ntá tí sín í so la, á náhí? Kjá náhí. Kíxin kaín ni chojni judíoni la ko tí sín jehya judío mé kaín ni kjuínchexiteyéheni tí jie kjuasinni. ¹⁰ Ntáchro tí xroon itén Dios kíxin:

Kohya ninkexró chrókjuich'e tí nkehe jína, la kohya nijnko chojni.

¹¹ Kohya ninkexró tienxín,

Kohya ninkexró chrókjueyá Dios.

¹² Kaín chojni k'uék'aji sín tí ntja jínahya la ko kaín chojni jnkokón k'uáji sín ntoáhya, kohya ninkexró chrókjuich'e tí nkehe jína la kohya nijnko chojni.†

¹³ Tí isin chojni la éxi tóye tsíxrankehe tsíxrvá chojni

kíxin tí nejen chojni ch'iyaxín.

La tí veneno kuénte konche chóntha ir'va chojni.‡

¹⁴ Tí ir'va chojni tsíkaón nkehe jínahya la ko kjuaníkaon.§

¹⁵ Xritinká sín kíxin tjinkaon sín chrók'óyán sín chojni.

¹⁶ Tí ntja k'uáji sín tió xikaha kjuich'e sín mé kjuínchek'itjáyan sín kaín kjuaxróxin k'uéchonta ókjé chojni.

¹⁷ Chónhyá sín tí ntja tjanjon kjuaxróxin*

¹⁸ Kíxin kjuenkayáxinhya sín chróchrakonhen sín Dios.†

Mé xikaha ntáchro itén Dios.

¹⁹ Ó noheni kíxin kaín tí nkehe nixja tí xroon chóntha tí ley mé k'uétuénhen kaín tí sín tinkáchónki tí ley kíxin ntá kaín chojni chjasintajni chrótáni sín kíxin kaín chojni tsjasóte kíxin Dios mé sinchekitgxín ijié kaín chojni. ²⁰ Kíxin ninkexró chrókjuacha chrókótjuáxin ijié sín kíxin chrókjuinchexiteyéhe sín tí nkehe t'etóan tí ley. Tí ley la jehó ch'e xra tsongoexínni kíxin chóntani jie.

Tsaáxinni kíxin tinkáchónkini Cristo

²¹ A ntá jehya tí ley chrókuaáxinni. La ntá ó kónoxín nkexrí Dios tsaáxinní la kjaxin tí xroon chóntha ley la ko tí nkehe nixja tí sín profeta la ó nixja xikaha. ²² Tsotjuáxin ijiéni kíxin titekaonni Jesucristo kíxin kaín chojni chrókuaáxin tí tsitekaon sín tí jehe ch'án kíxin t'ikon ch'án kíxin jnkokón tsjehe kaín chojni. ²³ Kíxin kaín xín chojni kjuasin jie la k'uáyehya sín tí kjuachaxin chrókuaáxin sín. ²⁴ A ntá kjuasáyé Dios kíxin k'uenyákonheni Cristo Jesús la kótjuáxin ijiéni. ²⁵ Dios mé ichr'án ch'án Cristo, kuámá ijiéni, k'uenyákonheni ch'án kíxin chrókuinkáchónkini ch'án ntá chrókuaáxinni. Mé xikaha kjuich'e Dios kíxin kjuakoxin ch'án kíxin ntoá kjuenkayáxin ch'án kíxin kóníkkakonhyá ch'án kjónté nchónhyá jie tsíkjasinni senó. ²⁶ Xikaha kónhen kjuakoxin Dios kíxin jína ch'án ijie la naxa tjechónhen ch'án sinchetjóá ch'án ijié tí sín kuítekaon Jesús.

* ^{3:4} Salmo 51.4 † ^{3:12} 3.10-12 Salmo 14.1-3, Salmo 53.1-3 ‡ ^{3:13} Salmi 5.9, 140.3 § ^{3:14} Salmo 10.7

* ^{3:17} Isaías 59.7-8 † ^{3:18} Salmo 36.1

27 A ntá ¿nkekuénté chrókjuinchehnkeni? Xitjahya sinchehnke chojni nkayakon Dios kixin jehya kixin kjuínchexiteyéheni tí nkehe k'uetoan tí ley ntá chrókuaáxinni. Náhí. Kixin Închéni kuítekaonni ntá kuaáni. **28** Mé xikaha ó noheni kixin tsotjuáxin ijíéni tí tsitekaonni Dios kixin Dios tahya cuenta á kjuínchexiteyéheni tí nkehe k'uetoan tí ley.

29 ¿Xá Dios mé kuénte tí sín judío ó? ¿Á kjaxinhya Dios kuénte tí sín jehya judío? Kjá kjaxin Dios mé kuénte tí sín jehya judío. **30** Kixin kohya í jinko Dios la jehe ch'án sinchetjóá ch'án ijíéni kixin tinkáchónkini ch'an la tahya ch'an cuenta á chóntani xroye o náhí. **31** A ntá tí tinkáchónkini Închéni, la ¿á í chrókjuinchexiteyáhyani tí ley? Kjá náhí. Íchá antsí má jína chrókjuinchexiteyéheni tí ley.

4

Tí kjuakoxin ch'ín Abraham

1 ¿Nkehe tsixroni kixin nkehe k'uitja ch'ín Abraham, tí nkexro k'uaxrjeníxinni ósé? **2** Ntá ch'ín Abraham tí chrókótjuáxin ijíé ch'án kixin tí xra kjuich'e ch'án ntá chrókóhnke ch'án, kjonté jehya nkayakon Dios. **3** A ntá ntáchro xroon itén Dios kixin: "Ch'ín Abraham kuítekaon Dios ntá táchó kuaáxin ch'án la ko kótjuáxin ijíé ch'án."* **4** Jnkojín chojni kjuich'e xra la jehya k'uáyéhekoá ch'án tí chichaon. Náhí. Táha la tí xra kjuich'e ch'án mé kjuacha ch'án. **5** A ntá kjonté jnkojín chojni kjuich'ehya ninkehó xra ntá chrókuitekaon ch'án Dios a ntá Dios la sinchetjóá ch'án kjonté tí nkexro chóntha jie, kixin tí kuítekaon ch'án Dios la táchó mé kuaáxin ch'án. **6** Mé kjaxin tsíntáchro ch'ín David kixin náxrjón tí nkexro kótjóá kixin Dios kuáhya kuentá nkerí jie tsíkjasin ch'án. **7** Ntáchro ch'ín David kixin: Náxrjón tjejó tí nkexro kjuíncheyaon Dios kjonté jínahya kjuich'e sín la kjuakjìn ch'án ijíé sín.

8 Náxrjón tjejó tí nkexro kixin Închéni kuáhya ch'án kuentá tí jie k'uéchonta sín.†

9 ¿Á jehó tí sín ikuá xroye la náxrjón tjejó sín o á kjaxin náxrjón tjejó tí sín chóntahya xroye? Ó chrónkani kixin Dios la kuikonóhe tí ch'ín Abraham kixin kuítekaon tí jehe ch'án la táchó mé kótjuáxin ijíé ch'án.‡ **10** ¿A ntá nkesá tsíkjincheyaon Dios tí ch'ín Abraham? ¿Á ó tsíka ch'án xroye o naxa náhí? Kjá naxa náhí. Senó tsíkjincheyaon Dios tí jehe ch'án. **11** Ntá chr'éxín ch'ín Abraham ikuá ch'án tí xroye éxi ijinko sello kjuakoxin Dios kixin ó kótjuáxin ch'án kixin kuinkáchónki ch'án Dios. Kixin ntá xikaha ts'óna ch'ín Abraham xjeen kaín chojni tinkáchónki Dios, kjonté chojni tsíkahya xroye. Ntá kjaxin jehe sín la Dios sinchetjóá ijíé sín. **12** La ko jehe ch'ín Abraham mé ts'axrjeníxín ch'án kaín tí sín tsíka xroye kixin ntá chrókunkáchónki sín éxi kuinkáchónki tí jehe ch'án kjonté naxa tsíkahya ch'án xroye.

Tí nkehe tsíntáchro Dios la tsoxiteyá kixin tinkáchónki sín tí jehe ch'án

13 Dios tsíntáche ch'ín Abraham kixin jehe ch'án la ko tí sín ts'axrjeníxín ch'án ts'áyéhe sín chjasintajni ts'ejo sín. A ntá tí nkehe ts'áyéhe ch'ín Abraham la jehya kixin kuítekaon ch'án tí ley. Náhí. Ts'áyéhe ch'án tíha kixin kuítekaon ch'án Dios la ntá Dios mé kjuínchetjóá ijíé ch'án. **14** A ntá tí jehó tí sín tsíkjinchexiteyéhe tí ley ó chrók'uáyéhe sín tí nkehe chrókuanjon Dios, a ntá tí nkehe tinkáchónkini la ó chrókóchónkó xikaha la ko tí nkehe tsíntáchro Dios la kjá ninkehó sínkhya tí xikaha. **15** Kixin tí ley la tjikao kixin tsjasótexín chojni, a ntá tí chrókókohya ley la chrókókohya nkehe chrókuanchia jie.

16 Méxra tí nkehe tsíntáchro Dios la kjuasáyé ch'án tsjanjon ch'án kixin kuinkáchónki ch'ín Abraham tí jehe ch'án la ntá Dios sinchekitonhen tíha kaín tí sín tsík'axrjeníxín ch'án. Jehya jehó tí sín tinkáchónki tí ley chrók'uáyéhe sín tí nkehe tsjanjon Dios. Náhí. Kjaxin tí sín tsitekaon éxi kuítekaon ch'ín Abraham mé ts'áyéhe sín tíha. A ntá jehe ch'án mé k'óna ch'án it'é kaín ni. **17** Éxi nixja xroon itén Dios kixin: "Janhan kjuánjuan

* 4:3 Génesis 15.6 † 4:8 4.7-8 Salmo 32.1-2 ‡ 4:9 Génesis 15.6

kjuachaxin kíxin jaha ts'óna it'é nchónhya chojni chjasintajni."§ Mé xíkaha tjetsjehe Dios kíxin jína kuítekaon ch'ín Abraham tí jehe ch'án. Tí Dios a mé sinchexechón tí chojni tsík'en la ko t'etqan ch'án kíxin ts'óna tí nkehe naxa kohya.

¹⁸ Kjónté k'uéchontahya ch'ín Abraham xjeen ch'án la kuítekaon ch'án la chónhen ch'án kíxin ts'óna ch'án it'é nchónhya chojni éxi tsíchronka Dios kíxin xíkaha nchónhya chojni ts'axrjeníxin ch'án. ¹⁹ Ch'ín Abraham k'uéchonta ch'án chjina ijkno ciento nánó la kjáñchó k'uítjáyenhya ch'án tinkáchónki ch'án Dios, kjónté jehe ch'án la ko tjan Sara mero its'en sín la ko ó má tada nána sín kíxin naxa chróchonta sín xjeen sín. ²⁰ Ch'ín Abraham la kóxakuenhyá ch'án la ko chrakonhyá ch'án kíxin tí nkehe tsjanjon Dios. Náhí. Íchá antsí má kuinkáchónki ch'án Dios la ko kjuanchehe ch'án kjuasáyé Dios. ²¹ Ó nohe ch'ín Abraham kíxin Dios chónka kjuachaxin sinchexiteyá kaín nkehe tsíntáchro ch'án. ²² Dios k'uíkon kíxin jehe ch'ín Abraham kuítekaon ch'án ntá Dios kjuíncchetjóá ijié ch'án.

²³ La jehya kíxin tsík'óna tí xroon kíxin tí ch'ín Abraham ó. ²⁴ Náhí. Tsíkjin sín xroon kíxin kjaxin jeheni chrókótjuáxin ijiéni kíxin tsitekaonni Dios. Tíhi mé tí nkexro kjuínchexechón Ínchéni Jesucristo. ²⁵ Jehe ch'án mé k'uenyákonhenni ch'án kíxin tí jie chóntani. Ntá xechón ch'án ínaá kíxin tsotjuáxin ijiéni kíxin ó kuítekaonni tí jehe ch'án.

5

Kótjuáxin tí jie chóntani

¹ Kótjuáxin tí jie chóntani kíxin tinkáchónkini Cristo la kjuaxróxin ts'ejókoni Dios kíxin k'uenyákonhenni Ínchéni Jesucristo. ² Kjuasáyé Cristo kíxin jína tsochjineheni Dios kíxin tinkáchónkini ch'án ntá ts'ayéhenei kjuachaxin kuénte ch'án. Ntá tí kjuachaxin la jína tsjinkitsa kíxin jína ts'ejóni la ko tsochéhenei ts'ejóchónhenni kíxin ntá tsjintaxin ts'ayéhenei tí kjuachaxin jie kuénte Dios. ³ Kjaxin jehya táhó. Náhí. Kjaxin tsochéhenei kjónté nchónhya nkehe tsonhenni kíxin ó noheni kíxin xíkaha tsonhenni kíxin ntá ts'itjani tsonínkakonhyani. ⁴ A ntá tí xíkaha jína chrók'uejóni ntá tsjachani kíxin jína ts'ejóchónhenni. ⁵ A ntá tí tjejóchónhenni la tósuhéyani kíxin Dios imá tjuéheni ch'án la tí Nchákuén ch'án kjuanjon ch'án mé nchechéhé asénni.

⁶ Tí jehóni xitjahya chrókuaáni. A ntá tió ikui Cristo la k'uenyákonhenni ch'án kíxin tí jie chóntani. ⁷ Kjá ninkexro chróntáchro chrók'uenyákonhen sín í jnko chojni kjónté ijkno chojni imá jína tjuéhe kichó. Kohya nkexro xíkaha chrókjuich'e. ⁸ A ntá Dios mé kjuakoxin kíxin imá tjuéheni ch'án kíxin kjónté naxa chóntani jie la Cristo k'uenyákonhenni. ⁹ A ntá Dios mé kjuíncchetjuáxin ch'án ijiéni kíxin Cristo k'uenyákonhenni ch'án ntá ó noheni kíxin jehe ch'án tsaáxinni ch'án kaín tí nkehe chrókjuasótexínni. ¹⁰ Kjónté naxa k'uénínkakonhenni Dios la jehe ch'án mé kjuanjon ch'án kjuaxróxin kíxin k'uenyákonhenni tí Xjeen ch'án. A ntá chaxín tsaáxinni ch'án kíxin tjechón ch'án la ntá ijie kjuaxróxin tjejókoni ch'án. ¹¹ La jehya chrókótihó. Kjaxin tsochéhenei kíxin tinkáchónkini Dios kíxin kjuasáyé Ínchéni Jesucristo kíxin Cristo chóntaxínni kjuaxróxin tí tjen Dios.

Adán la ko Cristo

¹² Mé xíkaha ó jnko nkexro kjuasin jie ntá k'uíxin jie kuenté chjasintajni. Mé xíkaha kjuankíxin k'uén chojni ntá kaín chojni kjuankíxin k'uén kíxin kaín sín kjuasin sín jie. ¹³ Kíxin ósé la k'uékohya ley ntá ó xráxín k'uíxin jie chjasintajni kjáñchó naxa kohya ley chrókjuanchia jie chrókjuasótexín sín. ¹⁴ Desde kjuák'e ch'ín Adán hasta kjuák'e ch'ín Moisés la k'uéchonta kjuachaxin tí kjuach'én kíxin tí jie kjuasin sín mé k'uenxín sín. Kjáñchó tí jie kjuasin sín la yóehya tí nkehe kjuich'e ch'ín Adán, kuítekakonhyá ch'án tí nkehe k'uetoan Dios. Ntá ch'ín Adán yóhē tsotsjehe éxi tí nkexro tsi chr'éxi.

¹⁵ Ntá tí jie kjuasin ch'ín Adán la xitjahya chrókoyóhē tí nkehe tsjanjon Dios kíxin tí jie kjuasin jnkokoá chojni la ntá nchónhya chojni k'uenxín. A ntá tí tsaáxinni la kjuasáyé

Dios ichr'án jnkokoá nkexro mé Jesucristo la antsí má jína tíha kíxin tsaáxin nchónhya chojni. ¹⁶ A ntá tí jie kjuasin jnkokoá chojni la tóyóehya tí nkehe tsjanjon Dios tsaáxinni. Kíxin tí jie kjuankíxin kjuasótexín chojni kíxin kjuasin jnkokoá chojni jie. A ntá tí tsaáxinni la kjuasáyé Dios sinchekaáni ch'án la ko nchetjóá ch'án tí jie chóntani kjónté nchónhya jie kjuasin chojni. ¹⁷ Tí kjuach'en la k'uéchonta kjuachaxin kíxin tí jie kjuankíxixín kjuasin jnkokoá chojni. A ntá kjuasáyé Dios kjuinchetjóá ch'án tí jie chóntani la ntá antsí tsochóntani kjuachaxin ts'ejóni jína kíxin k'uénayákonhenni jnkokoá nkexro, mé Cristo tíha.

¹⁸ A ntá tí jie kjuasin ch'ín Adán la ntá kaín chojni kjuasin sín jie chrokjuasótexín sín. A ntá ijie la Cristo mé kótjuáxin ijié kaín chojni kíxin tí jína ch'án k'uénayákonhenni ch'án. ¹⁹ Mé xikaha kuítekakonhya jnkokoá chojni, mé Adán tíha, ntá nchónhya chojni kjuasin jie. A ntá jnkokoá nkexro jína kuítekaon kjuakoxin, mé Cristo tíha, a ntá nchónhya chojni tsaáxin tí jehe ch'án kjónté k'uéchonta sín jie.

²⁰ Ikui tí ley kuínhin sín ntá kónoxín kíxin íchá antsí kjuasin sín jie. A ntá antsí k'uíxin jie la kjónté xikaha la antsí má kuíkonóeheni Dios kíxin jehe ch'án tsjinkitsani ch'án tsaáxinni. ²¹ Mé xikaha tí jie k'uíxin k'uéchonta kjuachaxin kjuikao kjuach'en chrók'uénxínni. A ntá kjuasáyé Dios kjaxin antsí má chóntha ch'án kjuachaxin sinchetjóá ch'án tí ijiéni la ko tsjanjon ch'án kjuachón jnkochrixín kíxin Ínchéni Jesucristo ikui ch'án k'uénayákonhenni ch'án, tsaáxinni.

6

Ó k'uén tí jie ntá Cristo kjuinchexechónni

¹ A ntá ijie ¿nkehe tsixroni? ¿A naxa chrókjuasinni jie kíxin ntá Dios naxa chrókjuakoxin ch'án kíxin chrókuikonóeheni ch'án? ² Kjá náhí. A ntá jeheni la exí chojni tsík'en chrokjuahya tsjasin jie. ¿A ntá nkekuente naxa chrókjuasinni jie ínaá? ³ ¿Á noahyará jahará kíxin tí kuíkiteni kíxin tinkáchónkini Cristo la yóhę k'uénkoni ch'án? ⁴ Tí kuíkiteni la exí yóhę xrvákoni Cristo la ko tsík'enkoni ch'án kíxin ntá ó xechónni ntá chrók'uajini ijnko ntja nixin mé xikaha Cristo xechónxin ch'án tí kjuachaxin jie chóntha tí It'é ch'án.

⁵ Kíxin tí chaxín k'uénxínni exí ik'uén tí jehe ch'án la ntá kjaxin tsoxechónni exí xechón tí jehe ch'án. ⁶ Ó noheni kíxin nkexrí k'uejóni senó mé táha mé k'uénxín Cristo kjuák'enkánixín ch'án ntacruz kíxin ntá chrók'uitjáyanxín kaín tí jie k'uékjasinni kíxin ijie í chrókjuinchexiteyehani tí jie. ⁷ Tí nkexro ó k'uén la ntá ó kuítohe tí jie. ⁸ A ntá jeheni tí k'uénxínni Cristo la ó noheni kíxin ts'ejókoni tí jehe ch'án. ⁹ Kíxin ó noheni kíxin Cristo jnkokoá vez xechón ch'án a ntá í ts'enhya ch'án ínaá kíxin tí kjuach'en í chóntahya kjuachaxin kíxin naxa ts'óyán tí jehe ch'án. ¹⁰ Tí ik'uén Cristo la ó naá ik'uén ch'án kíxin k'uénayákonhenni ch'án kíxin tí ijiéni. Ntá xechón ch'án ijie kíxin tsjak'eko ch'án Dios. ¹¹ A ntá kjaxin jahará chrókjuenkayáxinrá kíxin ik'uénrā, xitjahya tsjásinrá jie kíxin ntá ijie la xíxechonrá chrókjuich'eherá xra Dios kíxin tinkachónkirá Cristo Jesús, mé Ínchéni tíha.

¹² Méxra chrókuijóehyará kíxin chrókjan tí jie chrók'uetuénhen tí cuérporá ínaá kíxin tí jie chrók'uetóan kíxin chrókjuinchexiteyehérá tí nkehe tjenkayáxinrá. ¹³ Tjánjonhyará tí cuérporá kíxin chrók'óna nkehe chrókjuásixínrá jie. A ntá íchá jína chróchjehérá asánrá Dios exí ijnko chojni tsík'en ó xíxechón ínaá. Chjehérá Dios tí cuérporá ts'óna ijnko nkehe sich'exín ch'án xra jína. ¹⁴ Kíxin tí jie la í chóntahya kjuachaxin ts'etuénhen tí jahará. Jehya tí ley ts'etuénhen ijie. Náhí, jehó kjuasáyé Dios.

Kjuincheyóexin ch'in Pablo nkexrí tí chojni ch'exón xra

¹⁵ A ntá ijie ¿nkexrí? ¿A chrókjuasinni jie kíxin í t'etuénhyani tí ley? Kjá náhí. Kjuasáyé Dios tsaáxinni la kjá í chrókjuasinhani jie. ¹⁶ Jahará ó nohará jína kíxin tí sich'eheni ijnko lámō xra la tsitekakonhenni ch'án la tí xikaha la t'ichjánxín ch'eheni xra tí lámō la t'ichjánxín sinchexiteyeheni ch'án. Mé xikaha tónhen tí naxa sinchexiteyeheni tí jie

la táha mé ts'enxínni. A ntá tí tsitekaonni Dios la mé chrók'uejóni jnkójína. ¹⁷ Jahará la ósé k'uékjásinrá jie, a ntá ijie kjuasáyé Dios kuikónóhará ch'án kíxin kaín əsánrá kuítekáonrá tí nkehe xrakohará. ¹⁸ A ntá ó kuitohérá tí k'uékjinchexiteyéhérá tí jie. A ntá ijie ó kjuánjonrá əsánrá kíxin sich'erá xra jína kuènte Inchéni. ¹⁹ A ntá jie nixja éxí ijkno chojni ó kíxin jahará la tiénxinhýará jína tí nkehe i. A ntá xikaha tí senó kjuinchenxiteyéhérá tí nkehe ntoáhya la ko jínahya kíxin sich'erá tí nkehe jínahya. A ntá ijie la xikaha chrókjuánjonrá tí cuérpo kuéntará kíxin chrókjuich'exínrá tí xra jína éxí tjinkaon Dios kíxin ntá jehe ch'án chrókjuinchetjóará ch'án.

²⁰ A ntá tí jahará tió naxa kjuinchenxiteyéhérá tí jie la ntá xitjahya sich'erá tí xra jína ntoá. ²¹ ¿A ntá nkehe chrókjuachará kíxin xikaha kjuich'erá tí nkehe chrókósuàxinrá ó? Ntá xikaha kjuéyárá tí nkehe ts'enxínrá ó. ²² Na ntá ijie ó kjuin tnehe k'uék'etuñhanrá k'uékjasinxínrá jie. A ntá ijie ch'ehérá xra Dios. Táha la tsjinkitsa kíxin ts'ejoxiñrá jína kíxin ntá tsjixixín tsotjuáxinrá ts'ayéhérá kjuachón jnkochríxín. ²³ A ntá tí chrókjuasinni jie la chrókjuachani kíxin éxí chrók'uenni ó. A ntá tí nkehe chrókjuinchekitonhenni Dios la kjuachón jnkochríxín kíxin tinkáchónkini Inchéni Cristo Jesús.

7

Kjuíncheyóexin ch'ín Pablo kuènte tí sín tsíkótehe

¹ Kíchóni, jahará ó choxinrá tí ley la ó nohará kíxin tí ley chóntha kjuachaxin ts'etuñhen tí chojni naxa tjejochón ó. ² Tíha mé ts'axrjexín éxí ijkno chojni chjin tsíkótehe la tí xii tjan chóntha kjuachaxin ts'etuñhen tjan kíxin naxa tjechón ch'án. A ntá tió tsík'en tí xii la ntá tí tjachjin la ó kuítóhe tí k'uék'etuñhen ch'án tjan. ³ A ntá tí jehe tjan chrókuakja í jnko chojni ntoa tí naxa tjechón xii tjan la ó chrókjuasin tjan jie. A ntá tió tsík'en xii tjan la jehe tjan la ó kuítóhe tí k'uék'etuñhen ch'án tjan la jína tsotehe tjan í jnko chojni ntoa la jehya jie tíha.

⁴ Mé xikaha jahará kíchó ni mé k'uenyákonhenni Cristo la ntá jahará la éxí tsík'enrá kíxin í t'etuñhyará tí ley la éxí chrókuákjárá í jnko xiará la mé xikaha tinkachónkirá Cristo. Cristo mé xechón ch'án ínaá kíxin ntá jína chrókjuich'eheni xra Dios. ⁵ Tió naxa k'uékjasinni jie a ntá tí ley chrókjuich'e xra kíxin chrókjuasinhyani jie, a ntá íchá əntsí má kjuasixínni jie tí cuerpo kuénténi, la táha mé kjuixín tí ts'enxínni. ⁶ A ntá ijie la éxí yóhe ik'uénni, a ntá tí ley chónthaya kjuachaxin naxa ts'etuñhenni. A ntá ijie í kohya nkehe t'inkákonhen kíxin jína sich'eheni xra Dios kíxin k'ónani ijkno chojni nixin kíxin tí Nchákuén Dios k'uáyéhenni. A ntá í t'etuñhyani tí ley ntaxin tsík'óna.

Tíjie naxa chonta

⁷ A ntá tí xikaha la, ¿nkehe chróchroni? Kíxin tí ley la, ¿á jie táha ní? Kjá náhí. Kjánchó janhan chrókónonahya nkehe tí jie tí chrókohya tí ley chróchrónka. Chrókónonahya kíxin tí nkehe ókjé chrókjuakéhya əsenná tí chróchrónkahya tí ley kíxin chrókjuakéhya əsenná tí nkehe ókjé. ⁸ A ntá tió kónona tí ley a ntá tí jie əntsí kjuacha k'uetoan. La ntá k'uixín kaín nkehe ntáchro əsenná. A ntá tí chrókohya ley la chrókónoxínya tí jie chrók'uenxián. ⁹ A ntá tí ósé la nonahya nkehe tí ley. A ntá tió nóna nkehe tí ley, a ntá əntsí kjuásian jie la ntá ó nóna kíxin tí jie kjuásian me ts'enxián. ¹⁰ Mé xikaha kónhen kíxin tí ley chrókjuajon kjuachón ntá kjuikao tí ts'enxínni. ¹¹ Ntá tí jie mé kjuacha k'uetoan kíxin sintaxiteyáhya tí ley. A ntá tí ley mé kjuanchia jie ts'enxián.

¹² Mé xikaha tí ley la chaxín jína la ko tí nkehe t'etoan Dios la kjaxin jína. ¹³ Mé xikaha ti nkehe jína la ¿á táha chrók'uénxián? Kjá náhí. Tí jie kjuásian mé ts'enxián. Mé xikaha kjuakoxín tí nkehe jie kíxin tsqoxín tí jie kíxin tí ley la jína. Mé xikaha kjuakoxín tí ley kíxin tí jie tjasin chojni mé imá jínahya tíha.

¹⁴ Ó noheni kíxin tí ley la kuénte Dios tíha. A ntá janhan la kjuintaxiteyáha tí ntáchro əsenná kíxin tí jie kjuacha k'uetoanna. ¹⁵ A ntá tí janhan la tí nkehe tjét'a la kjaxin

naxa tianxínha kíxin janhan la t'ahya tí nkehe tjínkaván chrókjuit'a, a ntá ije mé it'a tí nkehe tóxrjínaha chrókjuit'a. ¹⁶ A ntá tí nkehe tjínkakonhyá chrókjuit'a la tíha me it'a la mé xíkaha tjátsoanxián kíxin tí ley la jína. ¹⁷ A ntá jehya janhan it'a tíha. Náhí tí jié chonta mé ch'e tíha. ¹⁸ Kíxin janhan ó nóna kíxin tí ntáchro asenná la kohya nkehe jína chrókjuit'a. Tjínkaván chrókjuitaxiteyá tí nkehe jína kjánchó tjachahya sit'a tíha. ¹⁹ T'ahya tí nkehe jína chrókjuit'a. Tí nkehe jínahya tjínkakonhyá chrókjuit'a mé it'a. ²⁰ A ntá tí it'a tí nkehe jínahya tjínkakonhyá chrókjuit'a la ntá jehya janhan it'a tíha. Náhí. Tí jié chonta mé ich'e tíha.

²¹ Tónona tíhi. Tí tjínkaván chrókjuit'a tí nkehe jína la mé íchá qantsí it'a janhan tí nkehe jínahya. ²² Kjónté xíkaha la tóxrjínna chrókjuitaxiteyáha tí ley kuénte Dios. ²³ T'íkuán kíxin tí nkehe ntáchro asenná mé t'inkákonhen tí nkehe tjínkaván chrókjuit'a. A ntá tí jié chonta mé exí tjéchjinaxián tíha.

²⁴ Nòa tí janhan. ¿Xá nkexro chrókjuatseen tí jié chóntha tí cuerpo kuéntana chrók'uénxián? ²⁵ Kjuasáya tjahá Dios kíxin ikui Ínchéni Jesucristo kuaáxinni. Mé xíkaha tí janhan la it'ona tjenkayáxian kíxin chrókjuitaxiteyáha Dios a ntá tí t'ona mé ntáchro asenná chrókjuitaxiteyáha tí nkehe kuénte tí jié.

8

Tjejóchónxinni Nchakuen Dios

¹ A ntá ije tí sín tinkáchónki Cristo Jesús la kohya jié chrókjuasótexín sín. Jehe sín í tjinkakonhyá nchexiteyá sín xíkaha ntáchro asén sín. Jehó tjinkaon sín sinchexiteyéhe sín Nchakuen Dios. ² Kíxin tí nkehe t'etqan Nchakuen Dios mé tjanjon kjuachón kíxin tinkáchónkini Cristo Jesús. Tíha mé kjuatsen tí nkehe kuénte jié chrók'uénxiinni. ³ A ntá Dios kjuich'e tí nkehe kjuachahya kjuich'e tí ley kuénte ch'ín Moisés kíxin jeheni kjuachahyani chrókjuinchexiteyéheni tíha. A ntá Dios mé ichr'án ch'án Xjeen ch'án k'óna exí chojni. La xra ó kui ch'án k'uénxíkonhen ch'án tí ijiéni kaín ni ntihi chjasintajni la kjuatsen ch'án tí jié chrók'uitjáyanxinni. ⁴ Mé xíkaha kónhen kíxin ntá jeheni jína chrókjuinchexiteyéheni tí nkehe t'etqan tí ley la chrókjuinchexiteyéhyani tí nkehe ntáchro asénni ó. Náhí. Chrókjuinchexiteyéheni tí nkehe ntáchro Nchakuen Dios.

⁵ A ntá tí sín tjinkaon nchexiteyéhe tí nkehe ntáchro asén sín ntá táchro tjenkayáxin sín. A ntá tí sín tjinkaon nchexiteyéhe Nchakuen Dios la ntá xritjeyá sín tí nkehe kuénte Nchakuen Dios. ⁶ A ntá tí sín tóxakonhen tí nkehe ntáchro asén sín la táchro ts'enxín sín. A ntá tí sín tóxakonhen tí nkehe kuénte Nchakuen Dios la tsochontaxín sín kjuachón la ko kjuaxróxin. ⁷ A ntá tí sín imá tóxrjínjin tí nkehe ntáchro asén sín ó la mé nínkakonhen sín Dios kíxin tjinkakonhyá sín la ko titekakonhyá sín tí ley. ⁸ Tí sín tóxrjínjin sín tí nkehe ntáchro asén sín ó la xitjahya sinchechéhe sín Dios.

⁹ A ntá jahará la nchexiteyéhyará tí nkehe ntáchro asánrá. Náhí. Jahará nchexiteyéhéra Nchakuen Dios tí chaxín chontará Nchakuen Dios. A ntá tí nkexro chontahya Nchakuen Cristo la í tinkáchónkiha sín Cristo. ¹⁰ A ntá tí Cristo tjejókoará tí jahará la tí asánrá la tjechón kíxin Dios kujikonóahará, kjuinchetjóá ch'án tí ijiárá, kjánchó tí cuerpo la exí tsik'en kíxin tí jie chontará. ¹¹ A ntá jahará ó chontará Nchakuen Dios, tí nkexro kjuinchexechón Cristo Jesús. Tí Dios a mé kjuinchexechón Cristo la ntá kjaxin tsochjéhe ch'án kjuachón nixin tí cuerpo kuéntará kjónté chóntha jié kíxin tí Nchakuen Dios chontará jahará.

¹² Mé xíkaha kíchó ni, ó chontani nkehe sinchexiteyéheni, kjánchó í chrókjuenkayáxinhani tí nkehe ntáchro asénni. ¹³ A ntá jahará tí chrók'uejorá exí ntáchro asánrá la tíha la mé chrók'uénxiínrá. A ntá jahará ó chontará Nchakuen Dios ntá chrók'uen tí nkehe ntaxis kjuenkayáxinxírá la ntá jehó Nchakuen Dios chrók'uejochonxínrá.

¹⁴ Kaín tí nkexro t'etuēnhen Nchakuen Dios la mé ó k'óna xjeen Dios. ¹⁵ Ntá Nchakuen Dios ó k'uayéhérá jahará la jehya tí nchakuen tí nkehe k'uék'etuānhanrá ósé kíxin chróchrakonrá. Náhí. Ntá tí Nchakuen chóntani la k'ónaxínni xjeen Dios. A ntá tí Nchakuen ch'án nchexraxinkaonni tsontáchroni kíxin: "It'eni Dios kuéntá tí jeheni." ¹⁶ Tí Nchakuen Dios tónoexín nchakuenni kíxin k'ónani xjeen Dios. ¹⁷ A ntá ó k'ónani xjeen ch'án la kjaxin tsjanjon ch'án tí nkehe ts'áyéheni exí tsintáchro ch'án ósé. Mé ts'áyékonni Cristo tí nkehe tsjanjon Dios. Tí chaxín tsjasóteni exí Cristo kjuasóte ntá chr'éxints'ejókoni ch'án kjuaxróxin.

Tí kjuachaxin jié itsi chr'éxin

¹⁸ A ntá ijie la tóxakuenhyani kjónté nkehe ts'atsíkani tsjasótexínni kíxin tíha la ninkehó sínkíhya kíxin tíha la xitjahya tóyohé tí nkehe ts'áyéheni chr'éxin kíxin antsí má jína náxrjón tíha. ¹⁹ Tí nkehe tsík'óna tjejóchónhen kíxin ts'íkon tí sín tsík'óna xjeen Dios. ²⁰ Kjónté kaín nkehe tsík'óna siín la ts'ítjáyan tíha la jehya kíxin xikaha tjinkaon tí nkehe tsík'óna. Náhí. Jehí xikaha tsík'etoan Dios. Ntá tjejóchónhen kaín nkehe tsíkjich'ena Dios ²¹ kíxin chróchóntha kjuachaxin chrók'uitjáyanhya. Ntá náxrjón ts'ixin kaín nkehe exí náxrjón ts'ejo tí sín tsík'óna xjeen Dios. ²² Ó noheni kíxin kaín tí nkehe kjuich'ena Dios la naxa tsjasóte exí yohé tjotéxin ijnko chojni nchekokjíhi xjeen. ²³ A ntá jehya jehó tí nkehe tsík'óna t'íkon chojni chrókjoté. Náhí. Kjaxin jeheni tjasóteni kjónté chóntani Nchakuen Dios kíxin tí Nchakuen Dios la mé tí nkehe xrankíxíñ kuákjani la naxa ts'áyéheni ínaá tí nkehe naxa tsjanjon Dios. Tjejótjasóteni la ko tjejóchónhenni kíxin tsjintaxín ts'ónani xjeen Dios la ko ts'áyéheni tí cuerpo chónhya ts'en. ²⁴ Mé ó kuaáxinni la naxa tjejóchónhenni tí nkehe t'íkonhyani. Tí k'uíkonnénti nkehe tjejóchónhenni ntá t'ichjánxinhya chrók'uejóchónheni. Tí nkehe ó t'íkonni la t'ichjánxinhya chrók'uejóchónhenni naxa chrók'uikonnénti ínaá. ²⁵ A ntá tí chónhenni tí nkehe naxa t'íkonhyani la ntá t'ichjánxín tsónínkakonhyani tsochónhenni.

²⁶ Mé kjaxin xikaha tí Nchakuen Dios tjinkitsani tí noehyani nkexri tsonixjeheni Dios kíxin chaxín noehyani tsonixjeheni ch'án exí chrónixjani. A ntá tí Nchakuen Dios tjinkitsa nixjaxin ch'án tí jeheni kjónté noehyani nkexri tsochrónóaxinni exí tjinkaon ch'án. ²⁷ Dios mé nohe ch'án nkehe tónhen asénni la nohe ch'án nkehe ichro tí Nchakuen ch'án kíxin tí Nchakuen ch'án mé chrónóaxin exí tjinkaon Dios la nixjaxin ch'án tí sín tinkáchónki Dios.

²⁸ Ó noheni kíxin Dios la k'uetoan kaín nkehe chrók'uaxrje jína kíxin tí sín tjuéhe ch'án kíxin tsíkjeyá ch'án sín kíxin xikaha tjinkaon ch'án. ²⁹ Tí sín tsíkjeyá Dios ósé la ntá tsík'iyehé ch'án kíxin ts'óna sín exí tí Xjeen ch'án kíxin ntá tí Xjeen ch'án mé ts'etuēnhen nchónhya tí sín kíchó ch'án. ³⁰ Mé xikaha tí sín tsíkjeyá Dios ósé mé kjaxin k'uíyehé ch'án sín la ko tí sín k'uíyehé ch'án la kjuinchetjóá ch'án ijié sín la ntá tí sín kjuinchetjóá ch'án ijié la kjuanjon ch'án kjuachaxin kuénte ch'án tsochóntha sín.

³¹ ¿A ntá nkehe chróchroni tí xikaha? Tí Dios tjuéhe tí jeheni, ¿a ntá nkexro chrókjuacha chrókónínkakonhen tí jeheni? ³² Kíxin Dios la kjiakuéhnya tí Xjeen ch'án. Kjuanjon ch'án k'uenyákonhenni kaín ni, a ntá tí ó kjuanjon ch'án Xjeen ch'án la kjá kaín nkehe chrókjuanjon ch'án. ³³ ¿Nkexro chrókjuacha chrókjuanchia jié chrókónínkakonhen tí sín kjueyá Dios? Kíxin Dios la ó kjuinchetjóá ijié tí sín a. ³⁴ ¿Nkexro chrókjuinchekjasóte tí jehe sín? Kíxin Cristo la ó k'uenyákonhen sín la kjaxin xechón ch'án ínaá la itjen ch'án tí tja chjina Dios tjen nkaya nkajní la tjechronða ch'án kíxin kaín tí jeheni. ³⁵ ¿Xá nkexro chrókuakitsjeheni tí tjuéheni Cristo? Kjónté ichré nkehe chrókónhenni la ko chrókónínkakonhen chojni tí jeheni la ko kjónté chrók'uenxínni kjinta la ko chróchóntahyani ikéni o kjónté tí kjuaxikaon chrók'uenxínni la chrókuítøehya ch'án tí jeheni. ³⁶ Exí ntáchro xroon itén Dios kíxin:

Tí tinkáchónkini tí jaha la siín kjuaxikaon kaín yaon chrók'uenxínni.

Chrók'óyánni sín éxí t'óyán sín kolélo tí matanza.*

³⁷ Kaín tíha la qantsí chrókuachaxienni kíxin kjuachaxién tí nkexro tjuèheni. ³⁸ Ó noheni kíxin ninkehó nkehe tsjachahya tsakitsjeheni tí tjuèheni Dios. Kjónté tí its'enni, o kjónté tí tjejóchónni, o kjónté tí sín ángel, o tí kjuachaxién tí jinahya, o kjónté tí nkehe sítónhen ijie, o tí nkehe tsónhen chr'éxin, ³⁹ o kjónté tí nkehe siín nkaya nkajní, o tí nkehe imá njinka siín chjasintajni, o í jnko nkehe kjuich'eña Dios. Mé kohya nijnko tí nkehe a tsjacha tsakitsjeheni tí tjuèheni Dios kjuakoxin tí jehe ch'án kíxin k'uenyákonhenni Închéni Jesucristo.

9

Dios kjueyá tí sín Israel

¹ Ntoá xrjanca kíxin janhan ijnko chojni tinkáchónki Cristo la t'ayahya. Tí nkehe tjenkayáxian la Nchakuen Dios nchexraxinkaonna kíxin chaxín. ² Imá t'avá asenná la ko náxrjónhya tjèn ³ kíxin tjinkavan kjónté chrók'uitjáyanxina tí tinkachónki Cristo kíxin ntá jína chrókuinkáchónki Cristo tí sín kíchiná naxa kjéhyana. ⁴ Jehe sín mé tsík'axrjeníxin sín tí sín Israel la Dios k'uáyéh sín éxí xjeen ch'án la ko Dios chónchtehe tí jehe sín la kjuanjon kjuachaxién ch'án la kjaxin k'uáyéh sín tí nkehe k'uetoan Dios la ko ti ley tsíkjin ch'ín Moisés la ko k'uáyéh sín kjuachaxin ts'etoan sín kíxin nkehe tí xra tsónhen nkaxenhen njinko la ko k'uáyéh sín tí nkehe tsíntáchro Dios. ⁵ Tsík'axrjeníxin sín tí sín tsík'axrjeníxinni ósé la kjaxin Cristo tsík'axrjeníxin tí sín israelita tió k'óna ch'án chojni. Jehe ch'án mé Dios kuente kaín nkehe la tinkáchónkini ch'án jnkochríxín. Amén.

⁶ A ntá tí nkehe chrókuakja tí sín Israel kjuanjon Dios la jehya kíxin chróxitayáhya tíha. Náhí. Kíxin jehya kaín tí sín tsík'axrjeníxin tí sín israelita mé chrók'óna sín chojni chjasin Israel. ⁷ Kíxin kénhya tí sín k'uaxrjeníxin ch'ín Abraham chrók'óna xjeen ch'án. Dios mé tsíntáche ch'ín Abraham kíxin: "Tí sín ts'óna kjéhyá jaha mé ts'axrjeníxin sín ti ch'ín Isaac."* ⁸ Tíhi mé tienxínni kíxin ninkexró xitjahya ts'óna xjeen Dios kíxin tí tsík'axrjeníxin sín chojni ó. Náhí. Jehó tí sín tinkáchónki tí nkehe tsíchenka Dios tí ch'ín Abraham mé jehe sín mé chaxín tsík'axrjeníxin sín ch'án. ⁹ Tí nkehe tsíchenka Dios tí ch'ín Abraham mé tihí: "Itsi ijnko yaon mé tjan Sich'eña tjan ijnko xjan."†

¹⁰ A ntá jehya táchó. Náhí. Kjaxin tí yaá chánjan tsíkjich'eña tjan Rebeca mé chóntha jnkokoá it'é xjan mé it'in Isaac, mé tsík'axrjeníxinni ch'án. ¹¹ A ntá tí xjan la naxa kokjéhya xjan la ninkehó nkehe jína o jinahya kjuich'e xjan. Ntá kjuakoxin Dios kíxin chóntha ch'án kjuachaxin éxí tsíkjenkayáxin ch'án tsjeyá ch'án nkexro ts'iyehé ch'án la tahya ch'án kuentá nkehe tí xra kjuich'e sín. ¹² Ntá kjónté la ntá chenka ch'án tí tjan Rebeca kíxin: "Tí ch'ín sao mé sich'ehe xra tí ch'ín tsoyo."‡ ¹³ Mé kjaxin xikaha ichro xroon itén Dios kíxin: "Tjuahä Jacob, a ntá Esaú la náhí."§

¹⁴ ¿A ntá nkehe chróchroni? ¿Á ntoáhya tjenkayáxin Dios? Kjá náhí. ¹⁵ Kíxin tsíntáche Dios tí ch'ín Moisés kíxin: "Tsotjuahä tí nkexro tjinkavan tsotjuahä la ko tsíkonóahä tí nkexro tjinkavan tsíkonóahä."* ¹⁶ Jehya éxí tjinkaon chojni o jehya kíxin tí nkehe ch'e chojni. Náhí. Ó jehí Dios tsíkikonóehé ti jehe sín. ¹⁷ Tí ntáchro xroon itén Dios mé nixjehé Dios tí ch'ín rey Egipto kíxin: "Kjuánjuan kjuachaxin kíxin jaha k'óna rey kíxin tjinkavan chrókuákojan kjuachaxin kuéntana kíxin ntá kuenté chjasintajni chrókónhe la chrókuitekaon tí njina."† ¹⁸ Mé xikaha tí tjinkaon Dios tsíkonóehé ch'án chojni la tsíkonóehé ch'án, a ntá tí nkexro tjinkakonhya ch'án tsíkonóehé ch'án la tsíkonóehya ch'án.

¹⁹ A ntá tsontáchrora kíxin: "A ntá tí xikaha la, ¿nkekuénté t'eka Dios chojni jie? ¿Nkexro chrókuacha chrókuanchonko tí nkehe t'etoan Dios?" ²⁰ ¿Xá nkexro tí jahará

* **8:36** Salmo 44.22 * **9:7** Génesis 21.12 † **9:9** Génesis 18.10 ‡ **9:12** Génesis 25.23 § **9:13** Malaquías 1.2-3

* **9:15** Éxodo 33.19 † **9:17** Éxodo 9.16

kíxin chróntácherá Dios xíkaha? ¿Á ti chí tsík'óna nchetje chróntáche tí ìnché chí kíxin: “¿Nkekuénté xíkaha kjuich'énani?” chróchro. ²¹ A ntá kjaxin tí nkexro ch'énna chí mé chóntha kjuachaxin tjinkaon sich'énna ch'án tí nkehe tóxrjínhín ch'án sich'énna ch'án, tí tjinkaon ch'án nchetje sich'énna ch'án nkehe imá náxrjón o tjinkaon ch'án sich'énna ch'án nkehe náxrjónhya.

²² Tjinkaon Dios chrókjuakoxín ch'án tí kjuachaxin kuènte ch'án chrókjuinchekjasóte ch'án chojni la kjónté xíkaha kónhen la kjuacha ch'án kóninkakonhyá ch'án la kuikonóehé ch'án tí sín chrókjuinchekjasóte ch'án kíxin chrókjuinchek'itjáyan ch'án sín. ²³ Mé xíkaha kjuich'e ch'án kjuakoxín ch'án tí kjuachaxin imá jié chóntha ch'án kíxin jehe ch'án kuikonóehéni ch'án kíxin xíkaha tsíkjenkayáxin ch'án ósé kíxin náxrjón chrók'uejókoni tí jehe ch'án. ²⁴ Mé xíkaha Dios tsíkjeyá ch'án iso tí sín judío la ko iso tí sín jehya judío. ²⁵ Mé xíkaha ntáchro tí xroon tsíkjín ch'ín Oseas kíxin:

Tí sín jehya chjasenná la mé sintak'ian chjasenná.

La tí sín k'uétjuahya mé tsotjuahá sín ijie.‡

²⁶ Tí chjasin ntiha tsíntáchro ch'án kíxin: “Jahará jehya chjasenná”, a ntá ijie sintak'ian xjeen Dios tjechón.§

Mé xíkaha ichro itén Dios. ²⁷ Kjaxin nixja ch'ín Isaías kuènte tí sín israelita tsíntáchro ch'án kíxin: “Nchónhya chojni ts'axrjeníxín tí sín Israel exí tí nchónhya nchesen siín ntayaon kjánchó tsjéhya tí jehe sín tsjacha sín tsaa sín. ²⁸ Ntá tjoka tsónhen tí nkehe tsíntáchro Ìnchéni sinchexiteyá ch'án.”* ²⁹ Ntá kjaxin ch'ín Isaías tsíntáchro ch'án ósé kíxin:

Tí Ìnchéni chóntha kaín kjuachaxin kuitøehya chrók'uitjáyan kaín tí sín k'uaxrjeníxín Israel exí k'uítjáyan tí sín chjasin Sodoma la ko Gomorra.†

Tí sín judío la ko tí tanjína

³⁰ ¿Ntá nkehe tsixroni? Tí sín jehya judío kjueyáhya sín Dios sinchetjóá ijié sín ntá kjónté la k'uitja sín kíxin tsotjóá ijié sín kíxin tinkáchónki sín Cristo. ³¹ A ntá tí sín israelita chrókjuinchexiteyéhe sín ley kíxin chrókótjuáxin ijié sín kjánchó kjuachahaya sín kjuinchenxiteyéhe sín tíha. ³² ¿A ntá nkekuénté kíxin xíkaha k'uitjahya sín nkexrí chrókuinkáchónki sín Dios? Kíxin kjueyáhya sín nkexrí chrókjuinchetjóá ch'án ijié sín kíxin tinkáchónki sín ch'án. Jehó tí xra kjúich'e sín chrókuaáxin sín, ichro sín. La méxra xíkaha tjen tí xro kóténkíxín sín. ³³ Mé xíkaha chronkaxín xroon itén Dios kíxin: Mé xíkaha kjuaké tí xro chjasin Jerusalén mé tí xro tsóténkíxín sín la ko tí tjo ts'ánótjenxín sín. A ntá tí sín chrókuitekaon tí jehe la chrókósuhya sín.‡

10

¹ Kíchóni, kaín əsenná níxjaha Dios kíxin tjínkaván kíxin tí sín israelita chrókuaá sín. ² Janhan ntáxrjan kíxin tí sín israelita imá tjinkaon sín chrókjuich'ehe sín xra Dios kjánchó chaxínhya kíxin jehe sín la tienxínhya sín. ³ Kjaxin noehya sín kíxin nkexrí chrókjuinchetjóá Dios tí ijié sín. A ntá jehó sín xritjeyá sín nkexrí chrókótjóá sín la tjinkakonhyá sín chrókjuinchexiteyéhe sín Dios. ⁴ A ntá Cristo mé kjuinchenxiteyá kaín nixja tí ley. A ntá ijie kaín tí sín kuítekaon tí jehe ch'án mé sinchetjóá ch'án ijié sín.

⁵ A ntá tí chrókótjóá ijié sín kíxin tí ley la ch'ín Moisés mé tsíkjín ch'án xíkihi: “Tí nkexro chrókjuinchexiteyéhe kaín tí ley la táhó chrókuaáxin sín.”* ⁶ A ntá tí chrókjuinchetjóá Dios tí ijiéni kíxin tí tinkáchónkini ch'án ó mé ntáchro xíkihi: “Ntáchrohyará kíxin, ¿Xá nkexro sáchrókjui nkaya nkajní? (Tí xíkaha la t'axrjexín kíxin naxa chrókui Cristo.) ⁷ La ko ntáchrohyará kíxin: ¿Xá nkexro chrók'uinkajin tí imá ninka?” (Mé t'axrjexín tíha kíxin chrókjuíkakjín sín Cristo chrók'uaxrjetaón ch'án kíxin itjen ch'án tí siín tí sín tsík'en, ichro

‡ 9:25 Oseas 2.23 § 9:26 Oseas 1.10 * 9:28 Isaías 10.22-23 † 9:29 Isaías 1.9 ‡ 9:33 Salmo 118.22 * 10:5 Levítico 18.5

sín.) ⁸ ¿A ntá nkehe ichro? Ntáchro kíxin: “Itén Dios la chjinaxón tjen tí tjedorá kíxin ó nohará la ko xraxinkaon əsánrá.”[†] Tí tan a mé tí nkehe tinkáchónkini kjuakoni. ⁹ Tí ir'va tsontáchroxian kíxin choxian Jesucristo mé Ìnchéni la ko tí əsán tsitekaon kíxin Dios kjuínchexechón ch'án ntá kjaxian tsaá. ¹⁰ A ntá tí əsán tsitekaon la nta Dios sinchetjóá ch'án tí jaha la ko tí ir'va tsontáchroxian kíxin choxian Jesucristo ntá sinchekaá ch'án tí jaha.

¹¹ Ntáchro xroon itén Dios kíxin: “A ntá tí sín chrókuitekaon tí jehe ch'án la chrókósuhya sín.”[‡] ¹² Dios la t'ikon jnkokón tsjehe kaín chojni á tí sín judío ə á tí sín jehya judío. Tí Ìnchéni la mé Ìnchéni kaín chojni la tsjanjon ch'án kaín nkehe t'ichjánxinhin kaín tí sín tjanchehe ch'án nkehe. ¹³ Mé xikaha ntáchro xroon itén Dios kíxin: “Kaín tí sín tjancharaxín nkehe ihnié Ìnchéni la tsaá sín.”[§] ¹⁴ ¿A ntá nkexrí chrókuanchehe sín ch'án kíxin chrókuinkitsa ch'án sín tí naxqá kuítekakonhya sín ch'án? ¿A ntá nkexrí chrókuitekaon sín tí jehe ch'án tí naxqá kuíenhya sín nkexro tí jehe ch'án? ¿A ntá nkexrí chrókuinhin sín tí kohya nkexro tsjakohé sín tí itan a? ¹⁵ ¿La nkexrí chrókuichronka sín tí tan tí kohya nkexro ichr'án sín sátsji? Éxí ntáchro xroon chónta itén Dios kíxin: “Náxrjón tí sín xrichronka itan jína.”*

¹⁶ Kjánchó kénhyá sín titekaon sín tí itan tsaáxinni. Tsíntáchro ch'ín Isaías kíxin: “Ìnchéni əxá nkexro ó kuítekaon tí tan xrichronkani?”[†] ¹⁷ Méxra t'ichjánxín tsinhin sín, ə ntá chrókuitekaon sín, ə ntá tí tan tsinhin sín mé itén Cristo.

¹⁸ A ntá tjánchánkia kíxin: ¿Á kuíenhya sín tí tan? Kjá ó kuínhin sín. Ntáchro xroon itén Dios kíxin:

A ntá tí nkehe kjuako sín la ó kuínhin chojni kuenté chjasintajni.
Tí nkehe nixja sín la ó kjuixraká hasta kjuèxin chjasintajni.”[‡]

¹⁹ Ntá tjánchánkia ínaá: ¿Xá tí sín Israel la naxqá kienxínya sín ní? Senó ntáchro ch'ín Moisés kíxin:

Ijnko chjasin jehya chjasin kuéntana la tsóninkákonhénrá sín
kíxin ijnko chjasin tjinkakonhya tsinhin la tsóninkákonhénrá sín.[§]

²⁰ Ntá ntáchro ch'ín Isaías kíxin:

Tí sín xritjeyáhya tí janhan la mé tí sín a mé k'uitja sín tí janhan.

La ko kjuákuaxiān tí sín kjuanchankíhya kíxin nkexro tí janhan.*

²¹ La ko nixja ch'ín Isaías kuénte tí sín israelita kíxin: “Kuenté yaon k'uíyáha ijnko chjasin siín chojni titekakonhya sín la ko jiéhe sín.”†

11

Tí sín Israel tsíkjeyá Dios

¹ A ntá ijie tjánchánkiá kíxin: ¿Dios la á kuítuhe ch'án tí sín Israel? Kjá náhí, kíxin janhan kjaxian israelitana la t'ikiníxina ch'ín Abraham la ko k'uaxrjeníxina ch'ín Benjamín.

² Kíxin ósé tsíkjeyá Dios tí sín israelita kíxin ts'óna sín chjasén ch'án. A ntá ijie la kjá sinchek'itjáyanhya ch'án sín. ¿Á noahyará jahará nkexrí nixja xroon itén Dios tí chrónka ch'ín profeta Elías nkexrí nixjehe ch'án Dios tjanchia ch'án jie kuénte tí sín Israel? Mé ntáchro xikihi: ³ ‘Ìnchéni, jehe sín k'óyán sín tí sín chrónka itán la ko k'óxíka sín tí altar kuéntá ntá jehóni kuítoheni tjechónni la tjinkaon sín kjaxin chrók'óyán sín tí jeheni.’*

⁴ A ntá Dios kjuátehe ch'án kíxin: “Naxqá kuítuhe yato mil chojni kuítekaon sín tí janhan kjuíxienhya sín toch'in sín tí nkehe tsíkjano Baal.”[†] ⁵ Ntá kjaxin xikaha ijie naxqá kuítuhe iso tí sín naxqá tinkáchónki Dios. Kjuasáyé Dios kíxin kuíkonóhe ch'án tí sín la tsíkjeyá ch'án kíxin tsaá iso ti jehe sín. ⁶ Mé xikaha kjuasáyé Dios sinchekaá ch'án tí jehe sín kíxin

† 10:8 Deuteronomio 30.12-14 ‡ 10:11 Isaías 28.16 § 10:13 Joel 2.32 * 10:15 Isaías 53.1 † 10:16 Isaías 53.1 ‡ 10:18 Salmo 19.4 § 10:19 Deuteronomio 32.21 * 10:20 Isaías 65.1 † 10:21 Isaías 65.2 * 11:3 1 Reyes 19.10, 14 † 11:4 1 Reyes 19.18

jehya tí xra kjuich'e sín chrókuaáxin sín. Náhí. Kjuasáyé Dios mé sinchekaá sín ch'án. Kixin tí xra chrókjuich'e sín ntá chrókuaáxin sín la jehya kjuasáyé Dios tí xikaha.

⁷ A ntá tí xikaha la, ¿nkexrí? Tí sín israelita la k'uitjahya sín tí nkehe xritjeyá sín. A ntá tí sín kjueyá Dios la k'uitja sín. A ntá tí sín í so a la icha aasén sín la kuítekakonhya sín.

⁸ Éxí ntáchro xroon itén Dios kixin: "Dios kjuanjonhya kjuachaxin chrókienxín tí sín a la ko mé kjaxin xikaha naxá sítonhen tí yaon ijie. La kjuanjonhya ch'án kjuachaxin kixin chrók'uikon sín la ko chrókienxín sín."[‡] ⁹ Kjaxin tsíntáchro ch'ín David kixin:

Tí kia tjasin sín mé tjasixín sín jie,
tsjasótexín sín.

¹⁰ Tí ikon sín ts'ikonxínya sín kixin ts'óna sín ntakótán
ntá tí jie kuènte sín mé jnkochríxín yámá sín. §

Tsaá tí sín jehya sín judío

¹¹ A ntá ijie tjáñchánkiá: Tí sín judío la tí kjuasin sín jie la ¿á ó naá kuítexón Dios tí jehe sín? Kjá náhí. Tió kuítekakonhya tí sín judío a ntá tí sín jehya judío la mé kjuacha sín kuaá sín. A ntá tí sín israelita la kórínskaon sín kixin kjuachahya sín. ¹² A ntá tí jie kjuasin tí sín judío, a ntá kuítuhe Dios tí jehe sín, a ntá tí sín jehya judío aantsí k'uitja sín nkexrí tsinkáchónki sín Dios. A ntá tí nkehe ntoáhya kjuich'e tí sín judío ntá tí sín jehya judío kjuacha sín kuaá sín. A ntá tí chrókjan tí sín judío chrókuitekaon sín Cristo la aantsí má náxrjón tíha.

¹³ Chonta iso nkehe chrókuinhínrá jahará jehya judíorá kixin Dios mé chr'ánna kixin tsjakoha tí sín jehya judío la aantsí tjetoan tí xra kuènte Ínchéni chrókjuit'a. ¹⁴ Tjinkavan kixin tí sín chjasenná chrókóchjinoxínhin sín kixin jahará tinkachónkirá Dios kixin ntá chrókjuacha chrókuaá iso tí jehe sín. ¹⁵ Kuítuhe Dios tí sín judío, a ntá iso tí sín jehya judío k'uitja sín tí kjuaxróxin kuènte Dios. A ntá tí chrókuitekaon tí sín judío kjaxin la yóhe éxí chróxechón chojni tsík'en tí jehe sín. ¹⁶ Tí chrókjuinchetjóá Dios tí niotja xrankíxíxín chrók'óna tí ich'o la ntá kuenté tí ch'o chrókjuinchetjóá ch'án. A ntá kjaxin tí chrókjuinchetjóá ch'án tí nuéé ijkno nta la kjaxin kaín tí chaon tí nta chrókjuinchetjóá ch'án.

¹⁷ Ntá isó tí sín judío la éxí iso chaon tí nta olivo mé xikaha tsíchrinjin la ntá jahará la éxí ijkno chaon nta olivo nteje tsík'óna injerto mé xikaha ts'ejóchónxin tí nta chaon tí tronco tí nta olivo jína xráxín tjechón. ¹⁸ Ntáchrohyará kixin tí chaon tí nta la aantsí jína. Ichá jína tsontáchrórá kixin jehya tí nta t'etueñhen ti nuéé nta. Náhí. Tí nuéé mé tsjinkitsa tí nta mé xikaha tí jahará.

¹⁹ Ntá jahará tsontáchrórá kixin: "A ntá tí chaon tí nta la tsíchrinjin kixin ntá jeheni tsitoheni lüké tí nta chaon tsíchrinjin". ²⁰ Tíha la chaxín. Kjánchó chrínjin kixin kuítekakonhya Dios. A ntá jahará la tjejorá ntiha kixin tinkachónkirá Dios. A ntá chrokjuinchehnkehýará. Ichá jína chróchrakonrá. ²¹ Kixin Dios la kujkonóehya ch'án tí nta chaon kuènte tí nta tronco la ntá mé xikaha kjaxin tí jahará la tsíkonóahyará ch'án.

²² Tsjehérá kixin Dios la imá jína kjánchó kjaxin sinchekjasóte ch'án tí sín titekakonhya. A ntá jína ch'án la kjuinkitsa ch'án tí jahará. Kjánchó chrók'uejorá jnkójína éxí tjinkaon tí jehe ch'án. A ntá tí náhí la chaxín jahará la tsítóhará ch'án. ²³ A ntá tí sín judío tsítóhe sín tí nkehe ntoáhya k'uékjich'e sín ntá jehe ch'án kjónté senó kóchrínjin ch'án la ntá ijie sinchetséxin ch'án tí tronco ínaá kixin jehe ch'án la imá chóntha ch'án kjuachaxin kixin xikaha sich'e ch'án. ²⁴ A ntá jahará jehya judíorá mé tsíkóchrínjrá ch'án nta olivo nteje. A ntá aantsí má xra tsotséxin tí nta olivo jína. A ntá tí sín judío la nta chaon kuènte tí tronco nta olivo jína la aantsí xrähya tsjatsueñhen tsotséxin kichó ínaá kixin ó nta chaon kuènte.

‡ 11:8 Deuteronomio 29.4; Isaías 29.10 § 11:10 Salmo 69.22-23

Tí tsjixixín ntá tsaáxin tí sín Israel

²⁵ Kíchóni, tjínk̄van tsonohará tí nkehe jehó Dios nohe kíxin sinchehnkehýará jahórá kíxin ó nohará. Mé tí sín Israel tsitekakonhya sín hasta ts'ixenjian kaín tí sín jehya judío tsitekaon. ²⁶ Tió xíkaha tsonhen ntá kaín tí sín Israel tsaá sín kíxin tí xroon itén Dios ntáchro kíxin:

Tí nkexro sinchekaáni mé tsixin ch'án chjasin Jerusalén
la tsjatsen ch'án ti jie kuènte tí sín tsík'axrjeníxin ch'ín Jacob.

²⁷ Tíhi mé kjuachaxin níxin kuéntana ts'ayéhé tí jehe sín
kíxin janhan mé kjuatslyan ijié sín.*

²⁸ Xíkaha kíxin tí tan níxin tsaáxinni ntá tí sín judío mé tsoníkakonhen sín Dios kíxin ntá jahará ts'ayéhérá tí nkehe kuénte Dios. Kjánchó Dios naq̄a tjuèhe tí jehe sín judío kíxin jehe ch'án tsík'jeyá ch'án tí sín tsík'axrjeníxin tí jehe sín. ²⁹ Kíxin tí kaín nkehe kjuanjon Dios la tsakitsjehya ch'án la ko tsítœhyá ch'án tí sín tsík'íyehe ch'án. ³⁰ Senó la jahará k'uékítekákonhyará Dios a ntá ijie la tí sín judío titekakonhya sín. A ntá jahará la kjónté la kuíkonóahará Dios. ³¹ Mé xíkaha jehe sín kuítekakonhya sín Dios la ntá kjónté xíkaha la jehe ch'án tsíkonóéhé tí jehe sín éxi kuíkonóahará ch'án. ³² Kíxin Dios la kuítóhe ch'án kaín chojni kíxin chrókjuasin sín jié kíxin ntá tsjakoxin ch'án tí kjuachaxin kuénte ch'án kíxin sinchetjóá ch'án kaín sín kjónté chojni chóntha jie.

³³ A ntá tí kjuachaxin kuénte Dios la imá jié la ko imá nohe ch'án. Ninkexró tsjachahya tsochronkaxín nkexrí tjenkayáxin ch'án la ko ninkexró tsjachahya tsienxín tí ntja kuénte ch'án. ³⁴ Ntáchro xroon itén Dios kíxin: “¿Xá nkexro chrókienxín nkexrí tjenkayáxin Ínchéni la xá nkexro chrókjuinkitsa chrókjuakóhe tí jehe ch'án? ³⁵ ¿Xá nkexro kjuanjon nkehe senó k'uayéhé Dios a ntá ijie tjinkaon chrók'uayéhé ínaá?”† ³⁶ Kíxin kaín nkehe la tixin tí tjen Dios kíxin kaín nkehe la kjuich'ena ch'án kíxin jehe ch'án chóntha ch'án. Mé xíkaha tjancheheni kjuasáyé Dios jnkochríxín. Amén.

12

Chjehérá cuérporá Dios kíxin sinchetjóá ch'án

¹ Mé xíkaha kíchó ni, xrjanóahará kíxin Dios ó kuíkonóahará ch'án ntá jahará chróchjehérá cuérporá Dios éxi ijnko nkehe tjechón kíxin jehe ch'án ó kjuíntatjórá ch'án la mé xíkaha chrókóxrjíñin ch'án. Tíhi mé ijnko nkehe ntoá t'ichjánxín chróchjéheni ch'án. ² Chrokóxrjíñhyará tí nkehe siín chjasintajni. Náhí. Chrókónixin tí nkehe tjenkayáxinrá kíxin jína chrókjuenkayáxinrá. Xíkaha ntá chrókónohará kíxin nkexrí tjinkaon Dios kíxin ntoá chrók'uejorá éxi tóxrjíñin ch'án.

³ Kjuasáyé Dios kjuanjon ch'án tí xra tjét'aha ch'án. Mé xíkaha nixjahará kaín rá kíxin chrókjuenkayáxinyará kíxin imá tjetoanrá. Náhí. Chrókjuenkayáxinrá jína éxi tí kjuachaxin tjáhará Dios éxi nkexrí tinkachónkirá ch'án. ⁴ Mé xíkaha ijnko cuerpo la nchónhya parte chóntha. A ntá tí parte la jehya jnkokón xra chrókjuich'e. ⁵ Mé kjaxin xíkaha tí jeheni kjónté nchónhyani la ts'ónani jnkokoá cuerpo kuénte Cristo. Mé xíkaha jnkokoá chrókjuenkayáxinni kíxin ó k'ónani jnkokoá cuerpo.

⁶ Dios kjuanjon nchónhya clase xra éxi tjinkaon ch'án chróchjéhe ch'án jnkojnko chojni tí xra. Ntá t'ichjánxín jína sich'eni tí xra kjuanjon ch'án. A ntá tí kjuanjon ch'án kjuachaxin kíxin tsochronkaxíni tí tan kuénte ch'án ntá t'ichjánxín sich'eni tí xra éxi titekaonni ch'án. ⁷ A ntá tí kjuanjon ch'án xra tsjinkitsani í jnko nkexro ntá t'ichjánxín jína sich'eni tí xra a. A ntá tí nkexro tsík'ayéhé kjuachaxin tsjako la t'ichjánxín jehó tí xra a chrókjuako. ⁸ Tí nkexro tsík'ayéhé kjuachaxin nchexraxinkaon í jnko nkexro la kaín asén chrókjuich'e ch'án tí xra a. A ntá tí nkexro tsjanjon ichréne nkehe la chrókójiehyá

* **11:27** Salmo 14.7, Isaías 59.20 † **11:35** Isaías 40.13-14

chrókjujon ch'án. A ntá tí nkexro t'etoan la jína chrókjuich'e ch'án xrä la ko tí nkexro chrókjuinkitsa tí sín chóntahya la kjuaxróxin chrókjuinkitsa sín.

Tí nkehe chrókjuich'e tí sín tinkáchónki Cristo

⁹ Kaín asará chrótjuèherá kíchuárá. Chrókuítjhérá tí nkehe jínahya tjenkayáxinrá la chrókjuenkayáxinrá tí nkehe jína. ¹⁰ Chrótjuèherá kíchuárá la ko chaxín chrókjuíkosáyehérá kíchuárá.

¹¹ Chrókósáhyará la chrókjuich'eherá Ínchéni xrä kaín asará.

¹² Chrókocháhará kíxin tjejóchonhénrá la chrókóninkákonhyará kjónté chrókjuasótiará. Chrókuítjohará chrónixjehérá Dios.

¹³ Chrókjuinkitsará tí sín tinkáchónki Ínchéni tí chóntahya sín nkehe sine sín. Chjehérá kjuachaxin ts'ejó tí sín tsijjinixjáhará sín.

¹⁴ Nixjehérá Dios la tsjanchehérá ch'án kíxin sincheyaon ch'án tí sín chonkíhará. Tjanchehérá Dios tsjinkitsa tí jehe sín la jehya kíxin chrókóninkákonhénrá sín.

¹⁵ Tócháhakoárá tí sín tjejóchhé sín la ko tí tjejótsjánka sín la koírá chrótsjankará.

¹⁶ Kjuaxróxin chrók'uejorá. Chrókjuinchehnkehýará. Náhí. Chrókoyohará éxí tí sín nòa. Chrókjuinchehnkehýará kíxin nohará.

¹⁷ Chrókjuich'ehýará jínahya tí sín kjuít'ahará ichrén nkehe jínahya. Náhí. Ichá jína chrókjuákoinxinrá nkehe jína kíxin chrók'uikon kaín chojni. ¹⁸ Chrókjuéyará jnkójina chrók'uéjórá. Exí nkexrí chrókjuachará la kjuaxróxin chrók'uejorá kaín rá. ¹⁹ Tjuahará kíchó ni, la chrókjuinchejkjasótehyará jahórá tí sín ichrén nkehe kjuít'ahará. Náhí. Titohérá kíxin Dios sinchekjasóte tí sín a. Ntáchro xroon itén Dios kíxin: "Ixrä kuéntana sintakitoaxián tíha. Janhan tsjénkaha tí sín a, ichro Ínchéni."* ²⁰ Kjaxin ntáchro xroon itén Dios kíxin: "Tí sín nínkakonhan t'enxín sín kjinta la chróchjehé sín nkehe chrókjone sín la tí t'enxín sín ntä la kjaxin chróchjehé sín nkehe chrók'ui sín. Mé xikaha chrókjuich'e kíxin chrókósuéhë sín kíxin tí nkehe kjuich'e sín."† ²¹ Chrókuítjohará kíxin chrókjuacha tí nkehe jínahya chrók'uetuñhanrá. Náhí. Chrókjuich'erá tí nkehe jína kíxin chrókjuachahya tí nkehe jínahya chrók'uetóan.

13

¹ Kaín chojni t'ichjánxín sinchexiteyéhë sín tí gobierno kíxin tí kjuachaxin chóntha sín la Dios tsíkjanjon kíxin kohya nijnko gobierno chrók'uejó tí jehya kjuachaxién Dios. ² Mé xikaha tí sín tjanjonko tí sín t'etoan la kjaxin nínkakonhen sín tí nkehe k'uetóan Dios. A ntá tí sín xikaha ch'e la mé jehe sín tjejá sín jie tsjasótexín sín. ³ A ntá tí sín gobierno t'etoan la sinchekjasótehya sín tí nkexro titekaon ch'e nkehe jína. Náhí. Tsónínkakonhen sín tí nkexro ch'e tí jínahya. Tí tjinkáonrá tsónínkakuanhyará sín la chrók'uejorá jnkójina. Chrókjuincheiteyéhérá sín kíxin chrókóninkakuanhyará sín. ⁴ Kíxin Dios k'uetóan tí xrä tjejóch'e sín kíxin ntá jahará la jína chrók'uejorá. A ntá tí chrókjuich'erá nkehe jínahya la chróchrankonrá kíxin jehya chónkó tjejó tí gobierno. Náhí. Chóntha sín kjuachaxin sinchekjasótiará sín kíxin jehé sín la Dios k'uetóan tjejó sín tí xrä a kíxin sinchekjasóte sín tí sín jínahya tjenkayáxin. ⁵ Mé xikaha t'ichjánxín sinchexiteyéhérá tí gobierno la jehya jehí kíxin chrókjuinchejkjasótiyahýará sín. Náhí. Ó jehí jahará chróxráxinkáonrá kíxin t'ichjánxín sinchexiteyéhérá sín. ⁶ La kjaxin jehya táchó. Náhí. T'ichjánxín chrókjuenkehérá gobierno tí chichaon kuénte tí xrä ch'erá tjanchia sín kíxin tí gobierno la Dios k'uetóan tjejó sín t'etoan sín.

⁷ Kjaxin chrókjuenkehérá kaín chojni tjasikéhérá. Tí nkexro síká kuénte xrä la chrókjuenkä sín kuénte tí xrä, la tí nkexro síká ichrén nkehe nchekji ntá tíha kjaxin chrókjuenkä sín, la kjaxin chrókjuíkosáyehérá tí sín t'etoan. ⁸ Kjaxin chrókjuasikéhýará ninkexró. T'ichjánxín chrótjuèherá kíchuárá kíxin tí nkexro tjuéhe kíchó la mé xikaha

* **12:19** Deuteronomio 32.35 † **12:20** Proverbios 25.21-22

kjuínchexiteyá tí nkehe k'uetóan tí ley. ⁹ Kíxin ntáchro tí mandamiento kíxin: “Tjakéhya əsánrá í jnko chojni chjin la ko t'oyáñhyará kíchuárá la ko teehyará la nixjahyará kjuach'ia kuènte í jnko chojni. La ko tjaké hya əsánrá nkehe ókjé.”* Kaín tíha la ko í so nkehe t'etoan Dios mé tienxínni t'axrjexín kíxin: “Chrótjuéheni kíchó ni éxi tjuéxín əsénni.” ¹⁰ Tí chojni tjuéhe kíchó la ninkehó nkehe jínahya sich'ehe kíchó. Mé xíkaha chrótjuéhe kíchuárá la mé xíkaha mé chróxiteyá jína tí nkehe nixja tí ley.

¹¹ Kaín tíha chrókónoheni tí tjejóni kíxin ó kui tí hora chrók'uejótsjeheni chrók'uajuhayani. Tí nkexro tsaáxinni la í séhya itsi ch'án ijie, a ntá tí kjuankíxinni kuítekaonni itén ch'án la ísé tsixin ch'án. ¹² A ntá tí tie la í séhya tsjak'e kíxin ó tsi tí t'inkáséyan la chrókuítóheni tí nkehe ch'eni kuènte sítié la chróchóntani kjuachaxin kuènte Nchákuén Dios kíxin tsjinkitsa ts'ajini tí t'inkáséyan, éxi ijkno soldado t'inkáyate ch'án ka tsík'óna chica kíxin kohya nkehe tsonhen ch'án. ¹³ Chrók'uejóni jnkójina éxi nkexrí chrók'uajini chaxín ntoá tí t'inkáséyan a. Chrókjuasihyani kia chrókjuanjónxin chojni la ko chrókókoanhayani la ko chrókjuenkayáxinhayani chróchóntani nchónhyia chojni chjin la ko chrókjuenkayáxinhayani tí nkehe ntáchro əsénni la ko chrókjueyáhyani kjuanínkaon la ko chrókóchjinoxíenhyani. ¹⁴ A ntá jahará tákjárá tí kjuachaxin kuènte Ínchéni Jesucristo tsjinkitsará la tíha mé éxi chrók'uínkayárá nkehe tsík'óna chica kíxin kohya nkehe chrókónhanrá. La ko chrókjuenkayáxinhayára tí nkehe ntoáhya tjenkayáxin chojni jínahya.

14

Tjóntahyará kíchuárá

¹ A ntá kjónté ijkno chojni kánhyó tinkáchónki Ínchéni la chrók'uejokoará ch'án la ko chrókjóntahyará ch'án kjónté kánhyó nohe ch'án. ² A ntá iso sín chaxín nohe sín la tjinkaon sín chrókjóne sín kaín nkehe. A ntá tí sín kánhyó tinkáchónki sín Ínchéni ntá tjinkaon sín chrókjónehyá sín nto, ntá kayoa ó chrókjóne sín. ³ Tí nkexro chrókjóne kaín nkehe chrókjonehyá tí nkexro tjinkaon chrókjónehyá nkehe. A ntá tí sín chrókjónehyá nkehe chrókjontahya sín tí sín chrókjóne sín kaín nkehe kíxin kjónté xíkaha la Dios tsakja tí jehe sín. ⁴ ¿Xá nkexro jaha kíxin chrókjonta tí nkexro ch'ehe xra í jnko nkexro? Tíha la xra kuènte tí lámoé ch'án tsontáchro á jína kjuich'e ch'án xra o náhí. A ntá kjá tsjak'e ch'án jína kíxin Ínchéni chóntha ch'án kjuachaxin tsjinkitsa ch'án tsjak'e tí ch'ín a jína.

⁵ Iso sín tjenkayáxin sín kíxin imá tjetooan ijkno yaon a ntá í jnko yaon la náhí. La í so sín ntáchro sín kíxin kaín yaon la ó jnkokón. Ntá jnkojnko sín la jehó sín chrókjuenkayáxin sín kíxin nkehe tí chaxín titekaon sín. ⁶ Tí sín xraxinkaon tí yaon la tjikosáyehe sín Ínchéni la kjaxin tí sín tinkáchónkiha sín xíkaha la tjikosáyehe sín Ínchéni kjónté xraxinkakonhya sín tí yaon. Kjaxin tí sín ine kaín nkehe la ine sín kíxin xíkaha tjikosáyehe sín Ínchéni la kjaxin tjanchehe sín kjuasáyé Dios. A ntá kjaxin tí sín nehya kaín nkehe la xíkaha mé tjikosáyehe sín Ínchéni la kjaxin tjanchehe sín kjuasáyé Dios.

⁷ Nijnko tí jeheni tjejóni kíxin jehóni chrók'uetóanni la ko jehya jehí chrók'uenni. ⁸ Tí tjejóni la tjejóni kíxin sich'eheni xra Ínchéni la kjónté its'enni la kuènte ch'án tí jeheni. Méxra kjónté chrók'uejóchónni o kjónté chrók'uenni la kuènte ch'án tí jeheni. ⁹ Méxra xíkaha ntá Cristo la ik'uén ch'án la ko xechón ch'án ínaá kíxin k'óna ch'án Ínché tí sín tsík'en la ko tí sín tjejochón.

¹⁰ A ntá jahará la, ¿nkekuènte tjóntará tí kíchuárá o nkekuènte chontehyará kaín sín kjuasáya? Kíxin kaín ni tsochjinani tí tjen Dios kíxin tsontáchro ch'án á jína xra kjuich'ení o náhí. ¹¹ Ntáchro xroon itén Dios kíxin:

Méxra janhan takjénxian əsenná, ichro Ínchéni, kíxin tí tjèn la ts'ejóxin toch'in kaín chojni

* **13:9** Éxodo 20.13-15, 17; Deuteronomio 5.17-19, 21; Levítico 19.18

kíxin kaín chojni la tsjanchia sín kjuasáya kíxin janhan mé Dios kuènte sín.*

¹² Mé xíkaha jnkojnconi chrókónoheni kíxin tsochenkani Dios nkexrí kjuich'eni.

Tjachruehyará kíchuárá

¹³ Méxra chrókjontahyará kíchuárá. Íchá jína kíxin ninkehó nkehe chrókjuich'ehyará kíxin ntá tí sín kíchó ni chrókjuasinxinha sín jie kíxin tí chrókjuasin sín jie ntá xíkaha chrók'uitjáyanxín tí tinkáchónki sín Închéni. ¹⁴ Janhan tinkachónkia Închéni Jesú la ntá xíkaha ó nòná kíxin kohya ninkehó nkehe jehí tjuáhya. A ntá ijkno nkexro tjenkayáxin kíxin jehya nkehe jína tíha ntá chaxín tjuáhya tí nkehe kíxin xíkaha tjenkayáxin ch'án. ¹⁵ Tí tjenkayáxin tí kíchuá kíxin tí nkehe inte la ntoáhya a ntá tí xíkaha ch'e la tjuéhya tí kíchuá. Kíxin jehya tí nkehe chrókjonte ó chrókjuincheck'itjáyanxián tí kíchuá kíxin Cristo k'uenyákonhen ch'án kjaxin. ¹⁶ Chrókjuich'ehyará nkehe jínahya kíxin ntá xíkaha chrók'uántaxíñin sín tí nkehe jína tinkachónkirá. ¹⁷ Kíxin tí kjuachaxién Dios la jehya tí nkehe chrokjóneni o tí nkehe chrok'uini. Náhí. Tí tjen tí kjuachaxién Dios la chrók'uejóni jnkójina la ko kjuaxróxin chrók'uejóni la ko chrókóchéheni kíxin chóntani Nchákuén Dios. ¹⁸ Tí nkexro ch'ehe Cristo xrá mé chrókjuinchéhé Dios la ko chrókjuinchéhé chojni.

¹⁹ Mé xíkaha chrókjueyáni kaín tí nkehe tjikao kjuaxróxin kíxin ntá tsjinkitsani tí sín kíchó ni kíxin ntá kjaxin sín antsí chrókuinkáchónki sín Închéni. ²⁰ Chrókjuincheck'itjáyanhyará tí xrá kuènte Dios kíxin tí nkehe chrókjónterá ó kíxin kaín nkehe chrókjónterá la ó tsíkjinchetjóá Dios. Tí jínahya la tí chrókjóneni ókjé nkehe ntá xíkaha la í so chojni chrók'uitjáyanxín tí nkehe tinkáchónki sín. ²¹ Ntá íchá jína chrókjóntehyará into la ko chrók'uihyará vino la ko ninkehó nkehe chrókjuich'ehyará tí xíkaha chrókjuasixín jie kíchuárá. ²² Tí nkehe tinkachónkirá la jahórá chrókónohará kíxin Dios la tjetsjehé ch'án. A ntá jína tsjak'e tí nkexro tí chrókjuasixinha ch'án jie tí nkehe tjenkayáxin ch'án. ²³ A ntá tí nkexro ine nkehe la tjenkayáxin sín kíxin tsjasixín sín jie ntá chaxín xíkaha yámá sín jie kíxin kénhyá asén sín kjóne sín tí nkehe. La tió kénhyá asén sín tjenkayáxin sín la ó kjuasin sín jie.

15

Nchechéhérá kíchuárá la jehya jahórá

¹ Tí antsí tinkáchónkini Închéni ntá chrókjuinkitsani tí sín kánhyó tinkáchónki tí jehe ch'án la chrókjuich'ehyani tí nkehe chrókóchexinni jehóni. ² Kjaxin kaín ni chrókjuinchéheni kíchó ni kíxin chrók'uejó sín jína la ko kíxin antsí chrókuinkáchónki sín Închéni. ³ Kíxin kjaxin Cristo kjuich'ehya ch'án tí nkehe chrókóchexin ch'án jehó ch'án. Náhí. Kjuínchexiteyá ch'án éxí ntáchro xroon itén Dios kíxin: "K'uinka kjuasótexinna kaín tí kjuanínkaon chónta tí sín nínkakonhen Dios."* ⁴ Kaín nkehe chrónka xroon itén Dios senó la tsíkjin sín ósé kíxin chrókónoheni kíxin ntá chrók'uejóchónhenni la chrókóníkkakonhyani kíxin tíha mé nchechéheni. ⁵ Dios, mé tí nkexro tjinkitsani la ko nchechéheni, la kjaxin tsjinkitsa ch'án tí jahará kíxin ts'ejorá jnkójina la ko jnkokón tsjenkayáxinkoárá kíchuárá kíxin xíkaha kjuakoxín Cristo Jesús. ⁶ Kíxin kaín ni jnkokoá chrók'uákjenxínni Dios la chrókjuancheheni kjuasáyé ch'án mé jehe ch'án mé It'é Închéni Jesucristo.

Tí tan jína xrakohé tí sín jehya judío

⁷ Chrókjuánjonrá kjuachaxin ts'ejó í so chojni la chrótjuéherá sín kíxin éxí Cristo tsík'ayéhé ch'án tí jahará mé xíkaha tsjikosáyehérá Dios. ⁸ Janhan jína chróntáxrjan kíxin Cristo ikui sich'ehe xrá tí sín judío kíxin tsoxiteyá tí nkehe tsíchenka Dios tí sín tsík'axrjeníxinni ósé kíxin xíkaha tsjakoxín kíxin Dios la jína ch'án la sinchexiteyá ch'án tí nkehe tsíntáchro ch'án. ⁹ La kjaxin ikui ch'án kíxin kjónté tí sín judío la

* 14:11 Isaías 45.23 * 15:3 Salmo 69.9

chrokjuanchehe sín kjuasáyé Dios kíxin kuïkonóhē ch'án sín éxí chrónka tí xroon itén Dios kíxin:

Janhan la ko tí sín tjejó ókjé nación mé tsjancheheni kjuasáyé Dios la ko tsotsjeni himno kíxin ts'ákjenxinni ihnié ch'án.[†]

10 Kjaxin ntáchro í jnko parte xroon itén Dios ínaá kíxin:

Tsocháhakoará kaín tí sín kuènté Dios.[‡]

11 Kjaxin ntáchro xroon itén Dios ínaá kíxin:

Tjanchehérá kjuasáyé ìnhéni Dios kaín rá kjónté jehya judiorá mé kaín chojni chrókjuanchehe sín kjuasáyé Dios.[§]

12 Kjaxin ch'ín Isaías tsíkjín kíxin:

Ts'axrjeníxín ch'ín Isaí ijnko nkexro la ts'etuñhen ch'án kaín tí sín jehya judío, a ntá tí sín a mé tsinkáchónki sín tí nkexro a.*

Mé xikaha ichro itén Dios.

13 Dios mé tjetjanjon ch'án kjuachaxin tjejóchónhenni la jehe ch'án nchechéhenni ch'án la tjanjon ch'án kjuaxróxin ts'ejóni kíxin titekaonni tí jehe ch'án kíxin ntá ts'ánkí tí kjuachéhē tjejóchónhenni kjuachaxién Nchakuen ch'án.

14 Kichóni, chaxín tónora kíxin jahará la jína tjejorá la kaín xín kjuaxrexinkaon jína tjenkayáxinrá la nohará tsjínkitsará chénkará kíchuárá. **15** La kjónté xikaha la chrakonhya ikjian tí xroon i chr'anhnáxraxjanka kaín tí nkehe kíxin chrók'uitjáyanhyará chróxráxinkáonrá kaín nkehe. Mé xikaha it'qá tí xrä kíxin kjuasáyé Dios kjuanjon ch'án tí xrä. **16** Kíxin sit'ahá Jesucristo xrä tsotjanka tí sín jehya judío tí itén Dios. Tí xrä mé tjàkua tí tan jína tsaáxin chojni kíxin ntá janhan tsjánjuan tí sín jehya judío ts'ayéhē Dios éxí ijnko nkehe tsöxrjínhin ch'án kíxin Nchakuen ch'án kótjuáxin sín.

17 Janhan mé ijnko chojni tinkáchónki Cristo Jesús la mé xikaha siín kjuachaxin tsöchàna kíxin t'ahá xrä Dios. **18** Chrokjuahya tsöhnke tsontáxrjan í jnko nkehe. Jehó tsöxrjanka nkexrí tí kjuachaxin kjuanjon Cristo chjína kíxin tsotjanka tí sín jehya judío tí itén ch'án kíxin tsitekaon sín Dios. Ntá xikaha kuítekaon sín kíxin tí itan kjuàkua la ko tí nkehe jína kjuít'a. **19** Kíxin tí kjuachaxién Dios mé kjuákoxián tí kjuásian kjuaxroan la ko kjuákoxián tí kjuachaxin kuénte Nchakuen Dios. Mé xikaha kjuntaxíxín kjuàkua tí tan jína tsaáxin chojni Cristo xrankíxín chjasin Jerusalén la nkuíxín chjinaxón ntiha la hasta estado Ilírico. **20** Mé xikaha tjínkavan tsjíjkákua tí tan tsaáxinni tí chjasin naxa tienhyé sín ihnié Cristo kíxin tí janhan tjínkakonhya tsjíxrónkáxián tí xrä kuénte í jnko chojni xráxín tjech'e xrä. **21** Ichá jína éxí ntáchro xroon itén Dios kíxin: Chrókuinhin tí sín naxa kienhyé sín tí tan kuénte ti jehe ch'án.

La ko chrókienxín tí sín naxa kienhyé tí tan kuénte ch'án.[†]

Ch'ín Pablo tjenkayáxin ch'án sátsji ch'án chjasin Roma

22 Nchónhya veces tjínkavan chrókjuasántsjahá tí jahará kjánchó naxa xitjahya kjuasán ntiha. **23** Kjánchó ijie la ó kjuixinna tí xrä nkuíxín tí tjén ntihi. Ntá itsjé nánó tjínkavan chrókjuasántsjahá tí jahará **24** a ntá ijie ts'atsínka tsonixjähárá tí sátsja nación España. Ntá tsöchàna ts'íkuán tí jahará ntá tsjixin ntá chr'éxín tjínkavan kíxin jahará tsjínkitsará tí sátsja. **25** A ntá ijie la sátsjiya chjasin Jerusalén, sátsjíkian tí nkehe tsjinkitsa tí sín kichó ni ntiha. **26** Kíxin tí sín estado Macedonia la ko estado Acaya kjuenkayáxin sín tsjejo sín chichaon kíxin tsöchr'énhen sín tí sín kichó ni ntiha tsochjéhe tí sín nòa tjejó chjasin Jerusalén. **27** Jehe sín kóxrjínhin sich'e sín xikaha kíxin tí sín judío tinkáchónki Cristo kjuinkitsa tí jehe sín tsongohe sín itén Dios. Ntá ijie la jehe sín chrókjuinkitsa sín ínaá chrókuanjon sín iso tí nkehe chónta sín chrók'uayéhē tí sín judío tinkáchónki Ìnhéni. **28** A

† **15:9** 2 Samuel 22.50; Salmo 18.49 ‡ **15:10** Deuteronomio 32.43 § **15:11** Salmo 117.1 * **15:12** Isaías 11.10

† **15:21** Isaías 52.15

ntá tió tsjixin tí xrə la ts'áyéhé sín tí chichaon la ntá janhan sátsjia España la ts'atsíkua tsonixjahará. ²⁹ Ó nóna kíxin tió sátsjia la Cristo mé imá sincheyaon ch'án tí janhan la ko tí jahará.

³⁰ Kíchóni kjuasáyé Ìnchéni Jesucristo la ko tí Nchäkuen ch'án tjanjon kjuachaxin tsotjuéheni kíchó ni mé xrjanóahará kíxin jnkokoá chrókjuenkayáxinni kíxin tí xrə tjét'á la ko chrónixjehérá Dios kíxin tí janhan. ³¹ Tjanchehérá Dios kíxin tsjinkitsa ch'án tí janhan kíxin kohya nkehe tsonna kíxin kaín tí sín titekakonhya Dios siín chjasin Judea. La ko tjanchiará kíxin jína sátsjíkian tí nkehe tsjinkitsa tí sín kíchó ni tjejó chjasin Jerusalén kíxin jína chrók'uáyéhé sín. ³² Ntá tí tjinkaon Dios la tsochàna tsjasán ti tjejorá jahará la ko kjuaxróxin tsjak'é tí tsjasántsjahará. ³³ Dios tjanjon kjuaxróxin ts'ejokoará kaín rá. Amén.

16

Ch'ín Pablo nixjehé ch'án tí sín chóxin ch'án

¹ Tétuñhanrá tsjinkitsará tí tjan kíchó ni Febe ch'e tjan xrə níñko chjasin Cencrea ² mé tjánjonrá kjuachaxin tsjak'e tjan kjuachaxién ihnjé Ìnchéni éxí ch'ehlerá í so sín kíchó ni tinkáchónki Ìnchéni. Tsjinkitsará tjan ichrén nkehe t'ichjánxihin tjan kíxin jehe tjan kjaxin kjuinkitsa tjan nchónhya chojni la kjaxin kjuinkitsa tjan tí janhan.

³ Nixjehérá tjan Priscila la ko ch'ín Aquila. Jehe sín jnkokoá kjuich'ekoni xrə kíxin kjaxin sín mé ch'ehe sín Cristo xrə. ⁴ Jehe sín chrók'uenxín sín kíxin kjuinkitsana sín tí janhan mé xíkaha tjahá sín kjuasáya la jehya janhván, kjaxin kaín sín kíchó ni níñkoé tí sín jehya judío. ⁵ Nixjehérá kjaxin kaín kíchó ni tóchjina ntøe tjan Priscila la ko ch'ín Aquila. Nixjehérá tí ch'ín choxian jína Epeneto mé jehe ch'án la saoxín kuítekaon ch'án Cristo estado Acaya. ⁶ Nixjehérá tjan María kíxin kjaxin tjan kjuich'e tjan xrə tí tjejorá ntiha. ⁷ Kjaxin nixjehérá tí sín tsíkjixín chjasenná mé ch'ín Andrónico la ko ch'ín Junias. Tí k'uíkjéna ntøechiso la kjaxin tí jehe sín k'uikjehé sín. Kjaxin kaín tí í so sín apóstol la tjikosáyehé sín tí sín a. Jehe sín senó kuinkáchónki sín Cristo ntá chr'éxín janhan.

⁸ Nixjehérá ch'ín Amplias kíxin jehe ch'án mé ijnko nkexro choxian la ko tjuahá tinkáchónki Ìnchéni. ⁹ Nixjehérá ch'ín Urbano kíxin jnkokoá kjuít'akian ch'án xrə kuènte Jesucristo la ko nixjehérá tí ch'ín choxian Estaquis. ¹⁰ Nixjehérá ch'ín Apeles. Jehe ch'án la kjonté nchónhya nkehe kónhen ch'án kjuasóte ch'án kíxin tinkáchónki ch'án Cristo. Kjaxin nixjehérá tí sín kjéhya ch'ín Aristóbulo. ¹¹ Kjaxin nixjehérá tí ch'ín kjéhyana Herodión la ko kjaxin nixjehérá kaín tí sín kjéhya ch'ín Narciso kíxin kjaxin sín tinkáchónki sín Ìnchéni. ¹² Nixjehérá tjan Trifena la ko tjan Trifosa. Kjaxin jehe sín kjuich'e sín xrə kuènte Ìnchéni la ko nixjehérá kjaxin tí tjan kíchó ni Pérsida. Kjaxin kjuinkitsa tjan kjuich'e tjan xrə kuènte Ìnchéni. ¹³ Kjaxin nixjehérá ch'ín Rufo, ijnko chojni tsíkjeyá Ìnchéni la ko nixjehérá tí lné ch'án kjaxin kíxin kjaxin tjan kjuinkitsa tjan tí janhan la éxí nñaná k'uíkuān tí jehe tjan. ¹⁴ Kjaxin nixjehérá ch'ín Asíncrito la ko ch'ín Flegonte la ko ch'ín Hermas la ko ch'ín Patrobas la ko ch'ín Hermes la ko tí í so sín kíchó ni tjejóko tí jehe sín ntiha. ¹⁵ Nixjehérá kjaxin ch'ín Filólogo la ko tjan Julia la ko ch'ín Nero la ko tí tjan kíchó ch'án la ko ch'ín Olimpas la ko kaín tí sín kíchó ni tinkáchónki Ìnchéni tjejóko sín ntiha.

¹⁶ Kjaxin tséhérá tja kíchuárá kjuachaxin ihnjé Ìnchéni. Kaín tí sín níñko kuènte Cristo ntihi xraxinkaon sín tí jahará la nixjahará sín.

¹⁷ Kíchóni, xrjanóahará kíxin chrótsjehérá nkexro tí sín tjixrónkáxin chrók'óxíka tí sín jnkokoá tinkáchónki Ìnchéni. Jehe sín titekakonhya sín tí itén Dios kjuákhárá k'uitjará. Tí xíkaha ch'e sín la chrók'uaxrjekjanxínrá ntiha. ¹⁸ Tí nkexro xíkaha ch'e la jehya Ìnchéni Jesucristo ch'ehe xrə. Náhí. Jehí tjinkaon sín chrókjuixrónkáxin sín la nixja sín tí nkehe náxrjón ó la xíkaha ch'iyehé sín əsén tí chojni naxa noehya. ¹⁹ Kaín chojni

ó nohe kíxin jahará la ó kuítekáonrá Ìnchéni. Mé xíkaha chàna tí janhan la tjínkaván chrókoxakonhanrá chrókjuch'erá xra jína. Jehya kíxin chrókjuch'erá nkehe jínahya. ²⁰ Tí Dios tjanjon kjuaxróxin mé tjoka tsinkátja Satanás, í ts'etuənhya. A ntá Ìnchéni Jesucristo mé sintayaonrá ch'án.

²¹ Ch'ín Timoteo nixjahará ch'án. Jehe ch'án jnkokón ch'ekoni xra. La kjaxin ch'ín Lucio la ko ch'ín Jasón la ko ch'ín Sosípater, tí sín chjasenná, mé nixjahará sín.

²² Janhan Tercio ikjian tí xroon i k'uetoan ch'ín Pablo la kjaxin nixjahará kjuachaxién Ìnchéni.

²³ Ch'ín Gayo nixjahará ch'án. Jehe ch'án kjuanjon kjuachaxin kjuak'é janhan ntøe ch'án la ko kaín tí sín kuènte ninko tójnkotsé ntøe ch'án. La ko nixjahará ch'ín Erasto. Jehe ch'án mé tesorero kuènte chjasin la ko tí ch'ín kichó ni Cuarto kjaxin nixjahará ch'án.

²⁴ Ìnchéni Jesucristo sincheyaon ch'án kaín tí jahará. Amén.

²⁵ Ntá ijie tsjancheheni kjuasáyé Dios kíxin jehe ch'án tjinkitsa ch'án kíxin jína chrók'uejorá éxí chrónka tí tan jína tsaáxinni la ko éxí kjuakoni kuènte Jesucristo. Tíha mé chaxín chrónka éxí Dios k'uetoan nchenoheni ch'án tí nkehe ninkexró k'uénoehya desde k'óna chjasintajni. ²⁶ A ntá ijie kaín ni tsongoexínni nkexrí nixja xroon ikjin tí sín profeta kíxin nkexrí k'uetoan Dios itjen jnkochríxín. Ntá kaín nkehe k'uénoehya ninkexró a ntá tsochóxin kuenté chjasintajni kíxin tsinkáchónki sín la ko tsitekaon sín Dios.

²⁷ Itjen jnkokoá Dios la jehó ch'án imá nohe ch'án la jehó ch'án mé tjancheheni kjuasáya kíxin tinkáchónkini Ìnchéni Jesucristo jnkochríxín. Amén. Ó tjen.

Tí xroon saoxín ikjin ch'ín Pablo chr'éhen ch'án tí sín tinkáchónki Cristo siín chjasin Corinto

Ch'ín Pablo mé ikjin ch'án xroon ichr'án ch'án tí ninko chjasin Corinto

¹ Janhan Pablo mé kjueyána Dios tjinkaon ch'án kixin kjuachaxin kuente Ìnchéni Jesucristo mé chrókuit'ahq ch'án xra. Janhan la ko kichó ni Sóstenes mé ² ikjinni tí xroon i chr'áhanráni tí jahará tójkotsérá ninko chjasin Corinto. Ó kjuíncchetjóará Ìnchéni Jesucristo na mé kjueyará Dios tí jahará kixin chrók'uaxrjekjanxínrá tí sín tjasin jie kixin tjinkaon ch'án tí jahará kixin tjoá chrók'uejorá la ko xikaha kjueyá ch'án kaín xín tí sín tjanchehe sín ìnchéni Jesucristo kixin chrókjuinkitsa ch'án sín, tíha mé Ìnché sín la ko Ìnchéni. ³ Kjuasáyé It'eni Dios la ko Ìnchéni Jesucristo chrókjuintayaonrá ch'án la ko chrótjáhará ch'án kjuaxróxin.

Ìnchéni Cristo mé tjencheyaon tí sín ntiha

⁴ Jnkochríxín tjáncháhá Dios kjuasáya kixin sintayaonrá ch'án tí jahará kixin tinkachónkirá Ìnchéni Cristo Jesús. ⁵ Na mé Dios tjáhará kjuachaxin kuente ch'án ntá xikaha qantsí jína nohará chronkaxínrá kixin nkexrí tinkachónkirá Ìnchéni la ko kjaxin qantsí jína tiénxinrá kaín nkehe chaxín ntoá. ⁶ Tí nkehe kuínhínrá kixin nkexrí tjen Cristo na ntá jie jahará tjákoxinrá. ⁷ Ntá jahará ó chontará kaín xín tí kjuachaxin kuente Nchakuen Dios, la í ninkehó t'itjáyankíhya tí kjuachaxin kuente ch'án k'uayéhérá nachrohe tjejochonhénrá tsokjan Ìnchéni Jesucristo. ⁸ Ntá Ìnchéni ts'ayakonhanrá ch'án kixin tsitoéhyará tí tinkachónkirá ch'án hasta tsjixraká tí yaon tsjixixín. Ntá ninkexró ts'ekahyará jie kixin ntoáhya tjejoch'erá, tsixro sín, tí yaon tsokjan ch'án. ⁹ Ó noheni kixin Dios chaxín sinchexiteyá ch'án tí nkehe ntáchró ch'án kixin jehe ch'án mé tsíkjeyará ch'án kixin chrókuinkachónkirá tí Xjeen ch'án Jesucristo, mé Ìnchéni tíha.

Jnkokoáhya kjuenkayáxin tí sín tinkáchónki Cristo ntiha chjasin Corinto

¹⁰ Kichóni, xrjanóaxínrá tí kjuachaxin ihnié Ìnchéni Jesucristo kixin jnkokoá chrókjuenkayáxinrá la ko chrók'uaxrjentahyará ókjé na mé jnkokoá chrókjuenkayáxinkoárá kíchuárá. ¹¹ Kichóni, ó kuinháñan tí nkehe chrónka tí sín kjéhya ch'ín Cloé kixin siín kjuaníkaon tí tjejorá tójkotsérá ntiha. ¹² Na mé ntáxrjan kixin isorá ntáchrórá kixin jahará chréhérá tí janhan Pablo, la ko í sorá ntáchrórá kixin jahará chréhérá tí ch'ín Apolos, la ko í sorá ntáchrórá kixin jahará chréhérá tí ch'ín Pedro, la ko í sorá ntáchrórá kixin chréhérá Cristo. ¹³ ¿Xá nkekjaín Cristo siín kixin? ¿Á jehya jnkokoá Cristo tinkáchónkini? ¿Á janhan Pablo k'uényákonhanrá ní? ¿Á kuíkitexínrá tí nina ní? ¹⁴ Tjáncháhá Dios kjuasáya kixin nijnko tí jahará kuíkitiahyará ntiha. Jehó ch'ín Crispo la ko ch'ín Gayo mé kuíkite janhan. ¹⁵ Na mé nijnkorá xitjahya tsontáchrórá kixin nina kuíkitexínrá. ¹⁶ Kjaxin jehó kuíkite tí ch'ín Estéfanos la ko tí sín kjéhya ch'án. Xráxinkakonhya á kuíkite í so sín o náhí. ¹⁷ Kixin tí xra chjína Cristo jehya kixin chrókuíkite chojni. Náhí. Tí xra chjína Ìnchéni kixin tsóxrjankaxián tí tan tsaáxinni. Tjinkakonhya kixin chrókjuákoxian palabra náxrjón noi kixin xikaha chrókjuàkua ntá chrókjuintamá tí kjuachaxin jié kónoxín tí k'uénxin Ìnchéni Jesús tí ntacruz, kjuák'enkáni ch'án, k'uenyákonhenni ch'án.

Cristo mé tjákoxin tí kjuachaxién Dios la ko tjákoxin ch'án kixin imá nohe Dios

¹⁸ Chronkaxínni kixin k'uenyákonhenni Cristo tí ntacruz. A ntá tí tsinhin tí sín xráxín ts'itjáyan ntá ts'ikon sín tíha éxí nkehe chónkó. A ntá kaín ni chojni kuaáni mé t'ikonnéi

kixin kjuachaxin jié tíha. ¹⁹ Mé xikaha ntáchro xroon itén Dios tsíkjin sín ósé kixin Dios mé sinchek'itjáyan tí nkehe tjenkayáxin tí sín imá nohe, la ko tsítøenta ch'án tí nkehe ntáchro tí sín imá tienxín sín.*

²⁰ ¿Mé nkehe tsonhen ntáchro sín kixin imá nohe sín la ko nkehe tsonhen tjako sín la ko nkehe tsonhen tí imá nohe sín nixja sín? Táha la nkehe siín chjasintajni ó. A ntá Dios mé t'ikon ch'án kixin lontí sín kixin xikaha ichro sín. ²¹ Kixin Dios antsí nohe ntá xikaha kuítøehya ch'án kixin kjuachaxin kuénte sín ó chrókjuacha sín chróchóixín sín ch'án. Ntá kóxrjinhín Dios chrókjueyá ch'án chrókjuinchekaá ch'án tí sín kuítekaon tí tan tsaáxinni mé tí nkehe ó chónkó, ichro tí sín ókjé.

²² Tí sín judío mé tjinkaon sín chrók'uikon sín kjuaxroan jié, ichro sín. A ntá tí sín nkiva griego mé xritjeyá sín kixin antsí chrókónohe sín, ichro sín. ²³ A ntá jeheni kaín ni tinkáchónkini Cristo la tjinkakonhyani chrókónoheni kaín tíha la mé jehó Cristo tjakoxinni. Chrónkani kixin ijkno ntacruz kjuák'enkáni ch'án, k'uénxin ch'án. A ntá tí sín judío ntáchro sín kixin ijkno nkehe chrókósuhéni chrókuinkáchónkini tíha, ichro sín. A ntá tí sín jehya judío ntáchro sín kixin chojni lontí tí jeheni kixin xikaha tinkáchónkini, ichro sín. ²⁴ A ntá tí sín kjueyá Dios, kjónté judío sín na o griego sín, la kaín ni ntáchroni kixin Cristo mé k'uenyákonhenni ch'án. Mé xikaha tjakoxín Dios tí kjuachaxin jié la ko tí kjuaxrexinkaon jína kuénte ch'án. ²⁵ Ntá jehe sín ntáchro sín kixin éxi ijkno nkehe chónkó tí nkehe kjuenkayáxin Dios, na kjónté xikaha la antsí tjetóxin nohe Dios. A ntá tí sín imá nohe ntihi chjasintajni tsjachahya sín sincheyóhe sín ch'án. La ko kjaxin ntáchro sín kixin jiéhya tí kjuachaxin chóntha Dios. A ntá tí sín antsí má chóntha kjuachaxin ntihi chjasintajni kjónté la tóyóehya sín Dios kixin antsí chóntha ch'án kjuachaxin t'etoan ch'án. ²⁶ Kichóni, xráxinkáonrá nkexrí k'uéjorá ntá kjónté kjueyará Dios tí jahará. Na mé tsjéhyará imá kónohará éxi t'ikon tí sín chjasintajni la kjónté kjueyará Dios tí jahará. La ko tsjéhyará imá kuétoanrá la ko tsjéhyará k'uaxrjeníxirá tí sín imá k'uék'etoan. ²⁷ Ntá kjónté Dios mé kjueyá iso tí sín noehya éxi t'ikon tí sín chjasintajni kixin xikaha tjinkaon ch'án chrókjuincheshuèhe ch'án tí sín imá nohe ntihi chjasintajni. La ko kjaxin kjueyá Dios iso tí sín chóntahya kjuachaxin éxi t'ikon tí sín chjasintajni kixin xikaha tjinkaon ch'án chrókjuincheshuèhe ch'án tí sín imá chóntha kjuachaxin ntihi chjasintajni. ²⁸ Dios mé kjueyá ch'án iso tí sín t'etoanhya la ko iso tí sín ninkehó sínkíhya tónhen sín ntihi chjasintajni kixin jehe ch'án mé chrókjuinchek'itjáyan ch'án kjuachaxién tí sín jehó chrók'uetoan. ²⁹ Méxra xikaha ninkexró tsjachahya sinchehnke tí tjen Dios. ³⁰ A ntá tí kjuachaxin kuénte Dios mé tinkachónkirá Cristo Jesús, a ntá chóntaxínni Cristo kjuaxrexinkaon jína, la ko tí kjuachaxin kuénte ch'án kóxíka tí jié kuénteni, la ko tí kjuachaxin kuénte ch'án sinchethjuáxinni ch'án, la ko tí ijnié ch'án k'uénaxínni ch'án. ³¹ Mé xikaha éxi chrónka tí xroon tsíkjin sín ósé ntáchro kixin: "Tí nkexro tjinkaon chrókjuinchehnke ch'án la chrókjuinchehnkehya ch'án la jehó chrókjuakoxín ch'án kixin imá t'etoan tí kjuachaxin kuénte Dios."†

2

Ch'ín Pablo mé tjako ch'án kixin Jesucristo kjuák'enkáni ch'án ntacruz

¹ Kichóni, tió kjuasán ntiha chjasánrá níxjáhará chrókjuákohará nkexrí tjen Dios la jehya ijkno tan tienxínya chojni la ko jehya itan imá noi chrókjuákoáxinrá. ² Kixin tió k'uéjóni jnkokoá ntiha kjuenkayáxinya janhan kixin í so nkehe chrók'uitja chróxrjanca la jehó tjinkaván chróxrjanca kixin Jesucristo la kjuák'enkáni ch'án tí ntacruz. ³ K'uéjóni jnkokoá ntiha la ntá jahará ó nohará kixin janhan kjuak'é éxi chrókjuachahya kixin síxrànkana, chràkonna. ⁴ Tí kjuankíxian níxjáhará la ko xrjankaxián tí tan tsaáxín chojni, la tjinkakonhyá chrókjuächruàxínrá tí nkehe náxrjón nixja chojni tsíkonohe má. Náhí. Tió kjuákohará kónoxín kixin tjékian Nchakuen Dios la ko kónoxín tí kjuachaxin jié kuénte

* ^{1:19} Isaías 29.14 † ^{1:31} Jeremías 9.23

ch'án,⁵ kíxin jehya kjuaxrexinkaon kuènte chojni tsíkónohe má chrókuinkachónkirá. Náhí. Tí kjuachaxin kuènte Dios mé chrókuinkachónkirá.

Nchakuen Dios mé tsöchóxixínni ch'án

⁶ Kjánchó tió tjákhǿq tí sín chaxín ó nohe sín tinkáchónki Inchéni mé xrjanka tí kjuaxrexinkaon antsí noi. Na mé jehya tí nkehe nohe tí sín chjasintajni, la ko jehya tí nkehe nohe tí sín t'etqan chjasintajni, na mé tí kjuachaxin kuènte sín la tjoka ts'itjayan.

⁷ Jeheni mé antsí chrónkani tí nkehe jehó Dios nohe, na mé tí nkehe tsíkjenkayáxin ch'án naxaq k'ónahya chjasintajni kíxin nkexrí tsaáxinni. ⁸ Nijnko tí sín t'etqan chjasintajni kienxínhya sín tí nkehe tsíkjenkayáxin Dios. ⁹ A ntá tí chrókienxín sín tíha la ntá chrókuak'enkānihya sín Inchéni tjetoan tí ntacruz. ⁹ Éxi ntáchro xroon itén Dios tsíkjin sín ósé kíxin:

Naxaq k'uíkonhya chojni la ko naxaq kienhya chojni,
la ko naxaq kjuenkayáxinhya chojni

kíxin nkexrí siín kaín xín nkehe kjuich'eña Dios ts'ayéhé tí sín tjuèhe ch'án.*

¹⁰ A ntá Dios mé nchenoexínni kaín tíha kíxin chóntani Nchakuen ch'án. Na mé tí Nchakuen Dios mé tjetsjehe kíxin nkexrí siín kaín xín nkehe la ko kjaxin nkexrí tjen tí nkehe tjenkayáxin Dios.

¹¹ Na mé ninkexró mé noehya nkexrí tjenkayáxin asén chojni. Na mé jnkojnko chojni mé nohe kíxin nkexrí tónhen asén. Méxra xíkaha kjaxin kohya nkexro nohe nkexrí tjenkayáxin Dios la jehó tí Nchakuen ch'án mé nohe. ¹² A ntá jehya tí nchakuen chojni chjasintajni k'uayéhëni. Náhí. Tí Nchakuen kuixin tí tjen Dios mé k'uayéhëni kíxin ntá tsonoexínni kíxin kaín xín nkehe kjuinchekitonhënni Dios. ¹³ Kjaxin jeheni chrónkani tíhi, a ntá jehya chronkaxínni tí nkehe tsíkónohe chojni ó. Náhí. Tí Nchakuen Dios mé nchenoexínni nkexrí tsjakoxéxínni tí sín chóntha Nchakuen ch'án.

¹⁴ Kjánchó tí sín naxaq chóntahya Nchakuen Dios mé xitjahya ts'ayéhé sín tí nkehe tjanjon Nchakuen Dios. Na mé éxi lóco t'ikón sín kaín tíha kíxin jehó tí sín chóntha Nchakuen Dios mé tsjacha sín tsienxín sín tíha. ¹⁵ A ntá tí nkexro chóntha Nchakuen Dios mé chrókuacha chrókónohe nkexrí siín kaín xín nkehe. Kjánchó tí nkexró chóntahya Nchakuen Dios tsjachahya tsjanchia jie tí jehe ch'án. ¹⁶ Méxra ntáchro xroon itén Dios kíxin: ¿Xá ninkexró chrókónohe kíxin nkexrí tjenkayáxin Inchéni kíxin chrókuacha sín chrókuakohé sín ch'án ínaá?† Kjánchó jeheni la ó chóntani tí kjuaxrexinkaon kuènte Cristo.

3

Tí sín jnkokoá kjuich'ehe sín Dios xra

¹ Mé xíkaha, kíchó ni, kjuachahya janhan chróníxjáhará éxi chojni t'etueñhen asén sín Nchakuen Dios. Náhí. Éxi chojni naxaq nchexiteyéhé sín tí nkehe ntáchro asén sín, na mé éxi xjan ntsíntsí na ntá kjuankíxin kuinkáchónki Cristo mé xíkaha tí jahará. ² Janhan na kjuákoáxinrá nkehe xrahya éxi yóhé ijkno xjanhnte tí jahará naxaq nchekakí iné tsjen kíxin naxaq xitjahya sine nkehe cha. Mé xíkaha tí jahará naxaq xitjahya sinterá nkehe cha ³ kíxin naxaq éxi chojni ó nchexiteyéhérá tí nkehe ntáchro asánrá kíxin tí naxaq siín kjuachjinoxínhin la ko siín kjuaníkaon la ko jnkokoáhya tjenkayáxinrá, la mé tjejoch'erá éxi ch'e kaín xín chojni chjasintajni. ⁴ Isorá ntáchrórá kíxin chréhérá tí janhan Pablo, la ko í sorá ntáchrórá kíxin chréhérá tí ch'ín Apolos. Na mé éxi chojni chjasintajni ó tjenkayáxinrá.

⁵ ¿Xá nkexro tí Pablo la ko nkexro tí Apolos? A ntá jeheni ó jehí ijkno chojni kjuich'ehe Dios xra, a ntá jahará kuinkachónkirá Inchéni kíxin janhan kjuákohará. Jnkojnconi kjuich'eni tí xra kjuanjon Inchéni. ⁶ Janhan kuènkä, a ntá ch'ín Apolos inta kjuáka ch'án,

* **2:9** Isaías 64.4 † **2:16** Isaías 40.13

q ntá Dios la mé kjuínchek'ánkí ch'án tí nkehe a. ⁷ Méxra tí nkexro k'uénkaxin la ko tí nkexro tjáka ntá la kánhyó tjetoan kíxin Dios mé chóntha kaín kjuachaxin la jehe ch'án nchek'ánkí kaín nkehe siín. ⁸ A ntá tí sín t'enka la ko tí sín tjáka ntá la ó jnkokón ch'e sín xra, a ntá Dios mé tsjenkehe sín jnkojnkó tí xra kjuich'e sín. ⁹ Méxra jeheni mé jnkokoá ch'eheni Dios xra, a ntá jahará mé éxi tí nontee Dios, ntaha ch'e ch'án xra, la ko kjaxin jahará mé tí nchia tjech'eña ch'án. ¹⁰ Janhan mé tí maestro ch'eña nchia kíxin Dios kjuanjón kjuachaxin tsjaké tí xro xrankíxixín, a ntá í jnko nkexro sich'eña nchia chrítaón tí xro a. A ntá jnkojnkó nkexro t'ichjánxín ntoá chrókjuch'eña sín nchia chrítaón tí xro a, ¹¹ kíxin kohya ninkexró tsjacha tsjak'e í jnko xro xrankíxixín tí nchia a kíxin táha la ó tsíkjixin tsík'óna, kíxin Jesucristo tíha. ¹² A ntá chrítaón tíha mé tsjacha sich'eña chojni nchia tsík'óna chica oro, la ko chica plata, la ko xro náxrjón tjete, la ko inta tabla, la ko kanjí, la ko ntaxro. ¹³ Na mé tsónoxín nkehe tí xra kjuich'e jnkojnkó chojni tió tsi tí yaon tsjixixín. Kíxin tí yaon a mé tsi xrohi. A ntá tí xrohi mé tsjakoxín nkexéhe tí xra tsoche la ko nkexéhe tí xra tsochehya. ¹⁴ A ntá tí jnkojín chojni kjuich'eña ijkno nchia tsochehya la mé tsjacha ch'án tí xra kjuich'e ch'án. ¹⁵ A ntá tí chróche tí nchia kjuich'eña ijkno chojni, ntá chrók'uitjáyan kuenté. A ntá tí nkexro kjuich'eña nchia la tsaá éxi yóhe chrókuinkéhe ch'án xrohi.

¹⁶ ¿Á noahyará kíxin jahará kaín rá na mé ijkno níngoe Dios la ko Nchakuen Dios mé chóntha qasánrá? ¹⁷ A ntá jnkojín nkexro tjinkaon ts'óxíka tí níngoe Dios na mé Dios mé sinchek'ítjáyan tí nkexro xikaha sich'e kíxin tí níngoe Dios la tjóá tíha. A ntá tí níngko a mé jahará tíha.

¹⁸ Ninkexró chrókjuenkayáxin kíxin imá nohe. Tí jnkojínrá tónhen qasánrá kíxin imá nohará éxi nohe chojni chjasintajni ó, na ntá chrókjanrá chrók'ónará éxi chojni noehya kíxin ntá chrók'uitjárá chrók'ónará ijkno chojni chaxín nohe. ¹⁹ Tí nkehe nohe tí chojni chjasintajni la mé ijkno nkehe lontí t'ikon Dios. A ntá ntáchro tí xroon itén Dios tsíkjin sín ósé kíxin: "Tí nkehe tsík'ítjá sín ch'iyaxín sín la tíha mé tsokjan ts'enxín sín."* ²⁰ La ko kjaxin ntáchro xroon itén Dios kíxin: "Inchéni la ó nohe ch'án kíxin kaín nkehe tjenkayáxin tí sín ntáchro sín kíxin imá nohe sín la mé ijkno kjuaxrexinkaon lontí tíha, ichro Dios."† ²¹ Méxra chrókjuiñchehnkehýará jahará kíxin chréhérá ijkno chojni imá nohe, kíxin kaín xín nkehe siín la kuéntará jahará, ²² mé janhan Pablo, la ko ch'ín Apolos, la ko ch'ín Pedro, la ko tí chjasintajni, la ko tí kjuachón, la ko tí kjuach'én, la ko tí nkehe sítónhen jie, la ko tí nkehe tsonhen chr'éxín, la kaín la kuéntará tí jahará. ²³ A ntá jahará la Cristo mé t'ayakonhanrá. Kíxin Cristo la jehe ch'án la mé kuénte Dios.

4

Tí xra kjuich'e tí sín kjueyá Ínchéni

¹ Juhará chrók'uitjónra tí jeheni éxi chojni ch'ehó Cristo xra k'uáyéheni tí xra tjakoni tí nkehe kuénte Dios ninkexró k'uénoehya. ² A ntá ijkno chojni k'uáyéhe xra ts'etóan chrókjukoxín kíxin jína ch'án la ko jína ch'e ch'án xra. ³ A ntá janhan tóxakonnahya tí nkehe chróntáchrórá jahará chrókjuchiará jie tí janhan kíxin tí xra t'ahá Dios, la ko kjaxin tóxakonnahya tí nkehe chróntáchro í so chojni chjasintajni, chrókjuchia sín jie tí janhan. Kjáxin janhan la tékahya jie qasenná. ⁴ Kjánchó janhan tjenkayáinxhya kíxin chonta jie. Kjánchó jehya xikaha tsontáxrjan kíxin Dios t'ikon kíxin chontahya jie janhan. Náhí. Jehe Ínchéni mé tsotsjehe ch'án nkehe tí jie chonta janhan. ⁵ Méxra náxa kjuixrakáhya yaon chrókjuiñchekitoexínrá ichréen jie. Chonhénrá tí tsi Ínchéni kíxin jehe ch'án mé sinchenoxín ch'án kaín tí nkehe símá ti sítié, la ko sinchenoxín ch'án kaín xín nkehe imó tjenkayáxixín qasén chojni. A ntá Dios mé tsjanjon ch'án tí nkehe tsjacha jnkojnkó chojni.

* **3:19** Job 5.13 † **3:20** Salmo 94.11

⁶ Kíchóni, nixjahará tí nkehe i kíxin jína chrók'uejorá jahará ntá xíkaha kíjuntayóaxian éxí ch'ín Apolos la ko éxí janhan kíxin chrók'uitjará kíxin chrókjuenkayáxinrá jehó tí nkehe tsíkjín sín ósé, kíxin nijnko nkexro chrókjuinchehnkehya kíxin chréhé sín ijnko chojni, a ntá tsochóntehya sín kjuasáyé tí í jnko chojni. ⁷ ¿Méxra nkexro ntáchro kíxin jahará antsí tjetoanrá? ¿Xá nkehe chontará naxá kjuanjonhyá Dios kíxin? Tí kjuanjon Dios kaín nkehe chontará, ¿ntá nkekuénte nchehnkerá kíxin jahórá tsíkjeyará tíha?

⁸ Jahará tónhanrá kíxin imá rícorá. Na mé chaxín chontará kaín xín nkehe tjenkayáxinrá. Ntá jie tónhen asánrá éxí ijnko rey, la í t'ichjánxianhyará ninkehó tí jeheni kíxin naxá chrókjuinkitsani. Tí chrókóchaxín chrók'ónará ijnko rey chaxín ntá kjaxinni chróchontani kjuachaxin chrók'uetoanni. ⁹ Ntá tónhen asenná kíxin jeheni chojni kjueyá Ínchéni mé kjuanjon Dios kíxin jeheni chrókjuixixín chrók'uejóni éxí chojni kujtonhenni kíxin noxín chrók'uenni ts'ikon kaín xín chojni chjasintajni la ko ts'ikon tí sín ángel kjaxin. ¹⁰ A ntá jeheni tinkáchónkini Cristo, a ntá xíkaha t'ikon sín tí jeheni éxí chojni lonti. A ntá t'ikon sín tí jahará éxí imá nohará. Jeheni la éxí chóntahyani kjuachaxin, a ntá jahará la éxí imá chontará kjuachaxin. Jeheni la tjikosáyehyani sín. A ntá jahará la imá tjikosáyahará sín. ¹¹ A ntá kjónté naxá jie jeheni t'enxínni kjinta, la ko t'enxínni ntá, la ko chóntahyani ikéni, la ko nínkakonhenni chojni, la ko chóntahyani nkerí ts'ejóni. ¹² La ko tóxrjéni kíxin itjani ch'exínni xrá. A ntá tió t'ántaxínhenni sín la tjancheheni Dios kíxin sincheyaon ch'án tí jehe sín. La ko tió chónkíhi sín tí jeheni la tónínkakuénhyani sín. ¹³ Tió t'ántaxínhenni sín la jnkojína tjiatéheni tí jehe sín. T'ikon sín tí jeheni éxí chjinínó ntihi chjasintajni, na mé éxí ijnko nkehe ninkehó sínkíhyá la ko mé xíkaha naxá sítónhen tí yaon jie.

¹⁴ Ikjian tíhi na jehya kíxin chrókjuintasuàhará. Náhí. Tjinkavan chrókjuintaxráxinkáonrá kíxin éxí xjanna t'íkuán tí jahará, tjuáhará. ¹⁵ Kjónté chróchontará ite mil chojni chrókjuákohará nkexrí tjen Cristo la chontahyará itsjé it'árá. Ntá janhan mé k'óna it'árá tí jahará tió kuítekáonrá Cristo Jesús kíxin kjuákohará tí tan jína tsaaixinni. ¹⁶ Mé xíkaha xrjanóáhará kíxin chrókjuákoxínrá éxí tí janhan.

¹⁷ Méxra kuétuñhan tí ch'ín Timoteo kíxin tsjiji ch'án ntiha. Na mé éxí xjanna t'íkuán tí jehe ch'án, tjuaha ch'án, kíxin kjuákoha ch'án ntá kuítekaon ch'án Ínchéni ntá xráxín jína ch'e ch'án xrá. Ntá tsjiji ch'án sintaxraxinkáonrá ch'án nkexrí tjákoxíqan tí ntje Cristo éxí xráxín tjákua kaín xín ninko t'atsínka tí janhan. ¹⁸ Ntá iso tí jahará imá ihnkerá kíxin tjenkayáxinrá kíxin chaxínya chrókjuasántsahará. ¹⁹ A ntá tjoka chrókjuasántsahará tí chaxín xíkaha tjinkaon Ínchéni. A ntá jehya jehó tí nkehe nixja tí sín xriko kjuahnke mé chrókuñhan. Náhí. Na mé ts'íkuán á chaxín chóntha sín kjuachaxin kíxin xíkaha nixja sín. ²⁰ A ntá tí kjuachaxién Dios la jehya tí nkehe tsonixjani ó. Náhí. Tí tjákoxínni la tí kjuachaxién Dios. ²¹ ¿Nkehe tjinkáonrá tí jahará, kíxin á chrókjuasán chrókjuintakjasótiará? o ¿á tjinkáonrá kíxin jnkojína chrókjuasán?

5

Tsitqexín ijnko jie tjachéhé kíchó chojni

¹ ¿Á chaxín tsík'ikon sín kíxin tí tjejorá ntiha la ijnkorá mé chontará nájoanrá éxí ichjiánrá? Tíha mé ijnko jie jié, la mé kjónté tí sín chónhya Dios la xíkaha ch'e sín. ² A ntá kjónté xíkaha tsíkónhen la imá ihnkerá. Íchá jína imá chrók'uavárá. A ntá tí xíkaha ch'e ijnko chojni ntá chrókuétuñhénrá ch'án sáchrókui ch'án, chrók'uejokoahyará ch'án ntiha. ³ A ntá ntáxrjan janhan kjónté tjenhya cuerpo kuéntana tí tjejorá ntiha la tí tjenkayáxian la ntaha tjén éxí chrókjuak'él janhan, ntá t'akjénxian ihnje Ínchéni Jesucristo la ntáxrjan kíxin ó kjuixin kjuenkayáxian kíxin nkexrí chrókjuasóte tí ch'ín xíkaha tsíkjich'e. ⁴ Tió tsojnkotsérá kaín rá ntiha la éxí koyá tsjak'él ntiha la kjánchó nchákuenná ó la ko koí tí kjuachaxién Ínchéni Jesús ts'ejókoará ntiha. ⁵ A ntá tí ch'ín a la nchek'ayéhérá

tí ch'ín Tsochren kíxin tsjasóte tí cuerpo kuènte ch'án. Ntá tió tsokjan Ìnchéni mé tsaá ąsén ch'án.

⁶ Jahará chrókjuinchehnkehyará kíxin tí nkehe tsíkónhen ntiha. ¿Á noahyará nkehe ntáchro sín, kíxin tí ch'o a mé tjiko intsíkoá tí xroqan nchek'ánkí niotja, ntá kjónté la tsosán kaín tí ch'o? ⁷ Méxrä chrókuakítsjerá ntója kaín tí xroqan ntaxin nchek'ánkí niotja, kíxin ntá jahará ts'ejorá éxí niotja tsík'óna ch'o nixin tsíkjkohya xroqan nchek'ánkí niotja. Éxí niotja ine sín tí yaon pascua, mé jahará tíha. Kíxin jehe Cristo, éxí ijkno kolélo t'óyán sín tí yaon pascua, mé k'uenyákonhenni ch'án. ⁸ A ntá chrókjuasinni tí kia a la kaín ąsénni chróxraxinkaonni, tíha la éxí tí niotja chóntahya xroqan nchek'ánkíxín. La jehya kíxin chrókjuasinni tí kia naxa chróchóntani kjuaníkaon kíxin táha la yóhe tí xroqan ntaxin nchek'ánkí tí niotja a.

⁹ A ntá ijkno xroon chr'anhanrá k'uéntáxrjan kíxin ninkehó chrók'uítokyará tí sín tjasin jie chóntha chojni chjin ókjé. ¹⁰ Ntá jehya kíxin kuétuanhánrá kíxin chrók'uítokyará tí sín chjasintajni tjasin jie chóntha chojni chjin ókjé, la ko tí sín tjinkaon jehó sín tsochóntha itsjé nkehe, la ko tí chojni teé, la ko tí sín tinkáchónki tí nkehe tsíkjanoya. Náhí. Tí xíkaha chrókjuich'erá la t'ichjánxiñ chrók'uaxrjéxinrá tí chjasintajni. ¹¹ Méxrä ó kuétuanhánrá kíxin chrók'uítokyará ninkehó jnkojín chojni ntáchro sín kíxin kíchó ni tí jehe sín, ntá naxa tjasin sín tí jie chóntha sín chojni chjin ókjé, la ko tjinkaon sin jehó sín tsochóntha sin itsjé nkehe, la ko tí sín naxa tinkáchónki sín nkehe tsíkjanoya, la ko tí sín naxa tinkáchónki kjuach'ia, la ko tí sín tókoan, la ko tí sín teé chichaon, la mé tí chojni xíkaha ch'e la chrókjóntekoahyará sín. ¹² Jehya xrana chrókjuintakitoaxián tí ijié tí sín jehya kuènte ninko ntiha. A ntá tí xra kuéntará jahará kíxin chrókjuinchekeitoxínrá tí ijié tí sín kíchó ni tójkotsé ninko ntiha. ¹³ A ntá Dios mé sinchekeitoxín ch'án ijié tí sín jehya kuènte ninko. Méxrä, takítsjekjanxiñrá tí ch'ín jinahya kjuasin jie tí tjejorá ntiha.

6

Chrókjuikjanchahya sín jie nkayakon tí ch'ín juez tinkáchónkihya Ìnchéni

¹ A ntá jnkojínrá chrókjuánjónkoará kíchuárá chrókjuíkjanchahyará jie nkayakon tí ch'ín juez tinkáchónkihya Ìnchéni. Ichá jína chrókjuírá chróchenkará tí sín tinkáchónki Dios. ² ¿Á noahyará kíxin tí sín tinkáchónki Ìnchéni mé sinchekeitoxín sín ijié kaín xín chojni chjasintajni? A ntá xíkaha sinchekeitoxínrá ijié kaín xín chojni chjasintajni, ¿ntá nkekuènte tsjachahyará sinchekeitoxínrá kjónté ijkno jie ntsí? ³ ¿Á noahyará jahará kíxin kjónté tí sín ángel tsotsjeheni nkehe tí xra kjuich'e sín? A ntá ijkno nkehe intsí ntihyó, la ¿á xitjahya chrókjuásiyóxinrá? ⁴ A ntá xíkaha chrókjuánjónkoará kíchuárá, ¿ntá nkekuènte tjíkjanchiará jie nkayakon tí sín tilkiníxinya kuènte ninko? ⁵ Ntáxrjan xíkaha kíxin chrókjuintasuàhará. ¿Xá kohya ninkexró kíchó ni ntiha chóntha kjuaxrexinkaon jína tsjacha sincheyóxinhin ijié kíchó ni? ⁶ Juhará jnkokoá kíchuárá ntá tjanjónrá, la ko kjaxin sájtíkjanchiará jie nkayakon tí ch'ín juez tinkáchónkihya Ìnchéni.

⁷ Kjónté ijkno jie ntsí ntá imá tjanjónkoáxinrá kíchuárá; tíha mé t'óna ijkno jie jié. Ichá jína chrókóninkákonhyará kíxin tí nkehe jinahya kjuít'ahará sín. Ichá jína chrókuijtóherá sín kjónté tsaáhará sín. ⁸ Kjánchó kjaxin jahará ntoáhya tjejoch'erá kíxin kjónté jnkokoá kíchuárá la téeherá sín.

⁹ ¿Á noahyará kíxin tí sín jinahya ch'e la ts'áyéhya sín kjuachaxin kuènte Dios? Chrókuijtóhyará chrókuit'áyahará sín, chrókónohará kíxin tí sín tjasinko jie tí chojni chjin ókjé, la ko tí sín tinkáchónki sín nkehe tsíkjanoya, la ko tí sín tjachéhé kíchó sín, la ko tí chojni t'o chjin, t'o ntoa, la ko tí sín jnkokón ntoa sín tóxrjínhin kíchó sín, ¹⁰ la ko tí xíchée, la ko tí sín tjinkaon sín jehó sín tsochóntha sín itsjé nkehe, la ko tí sín tókoan, la ko tí sín ch'éna kjuach'ia, la ko tí sín ixri ch'ia sín kíxin tsjacha sín chichaon, na mé

ts'áyèhya sín kjuachaxin kuènte Dios. ¹¹ Xíkaha k'uéjórá isorá senó. Ntá jie ó k'uíjmárá, kjuíncchetjóará Dios, ntá ó xíka ijiárá kjuachaxin ihnjé Inchéni Jesucristo la ko kjuachaxin kuènte Nchäkuen Dios.

Tí cuerpo ó tsíkótjóá

¹² Siín kjuachaxin kaín nkehe chrókjuit'a, kjánchó iso nkehe la ó chónkó. Siín kjuachaxin kaín nkehe chrókjuit'a, kjánchó chrókuítqahya ninkehó nkehe chrók'uetuanna. ¹³ Chaxín tí nkehe ntáchro sín kíxin ó k'óna tí nkehe sineni kíxin tséeni ó sátsji, la ko ó tsík'óna tséeni kíxin ts'inka nkehe sineni. Kjánchó Dios mé sinchek'itjáyan yói tíha. A ntá k'ónahya tí cuerpo kuénteni kíxin chrókjusixínni jie. Náhí. Tí cuerpo kuénteni mé k'óna kíxin tsochjéxínni Inchéni kjuasáya, la ko jehe Inchéni mé ts'ayakonhen ch'án tí cuerpo kuénteni. ¹⁴ Méxrä Dios mé kjuínchexechón Inchéni, mé xíkaha sinchexechónxinni ch'án tí kjuachaxin kuénte ch'án.

¹⁵ ¿Á noahyará kíxin jnkojnko cuerpo kuéntará mé it'ó tí cuerpo kuénte Cristo? ¿Á chrókjuit'a janhan kíxin it'ó tí cuerpo kuénte Cristo chrók'óna it'ó cuerpo kuénte ijkno chojni chjin ch'iyeha nchónhya chojni ntoa? Méxrä kjá náhí. ¹⁶ ¿Á noahyará kíxin tió ijkno chojni ntoa chrókuakja ijkno chojni chjin chóntha nchónhya chojni ntoa, ntá tí jehe sín yói sín chrók'óna sín jnkokoá cuerpo? Kíxin ntáchro xroon itén Dios kíxin: "Yói sín la ts'óna sín jnkokoá chojni."* ¹⁷ A ntá tí jnkojín chojni tinkáchónki Inchéni, ntá jehe la ko Inchéni mé ts'óna jnkokoá.

¹⁸ Méxrä chrókuítqahérá chróchontahyará chojni chjin ókjé. Tí í so jie tjasin chojni na mé jehya tí cuerpo kuénte sín nchekjasóte sín. A ntá tí sín tjasinko jie chojni chjin ókjé la mé nchekjasóte sín tí cuerpo kuénte sín. ¹⁹ ¿Á noahyará kíxin jnkojnko cuerpo kuéntará mé exí ijkno níjko itjen Nchäkuen Dios kjuanjon ch'án k'uayéhérá, la ko chontará tí Nchakuen ch'án tjóá? Jahará la jehya Inché tí cuerpo kuéntará ²⁰ kíxin jahará la tjete k'uénaxínrá Dios. Méxrä chjeéxinrá kjuasáyé Dios tí cuerpo kuéntará la ko tí nchakónrá kíxin yói la kuénte Dios.

7

Chenka ch'án tí sín tsíkótjéhe kíxin nkexrí chrók'uejó sín

¹ A ntá jie tsjatahá tí nkehe tsíkjirá kjuanchankinára, na mé ntáxrjan kíxin chaxín chrókjína kíxin tí chojni ntoa chrókuakjahya ichjién. ² Kjánchó tí xíkaha imá tjinkaon sín tsochóntha sín itsjé chojni chjin tsjasinko sín jie, la íchá jína jnkojnko chojni ntoa chróchóntha jnkojnko ichjién kuénte la ko jnkojnko chojni chjin chróchóntha jnkojnko xii kuénte. ³ Tí chojni ntoa la ko tí chojni chjin chrókjuchexiteyéhe sín kichó sín. ⁴ Tí chojni chjin jehya Inché tí cuerpo kuénte tjan, na mé kuénte xii tjan. Ntá kjaxin xíkaha tí chojni ntoa la jehya Inché tí cuerpo kuénte ch'án, na mé kuénte ichjién ch'án. ⁵ Chrókjucheniéhyará kíchuárá, jehí jnkokoá chrókjuenkayáxínrá yóírá kíxin tsochontherá iso yaon kíxin ntá kaín asánrá chrónixjehérá Dios. Ntá tsjixin ntá chrókóchjineherá kíchuárá ínaá kíxin chrókuítqéhyará kíxin ch'ín Tsochren chrókjuchacha chrókjuchroerá ch'án chrókjuaásinrá jie.

⁶ Kaín tíhi tjonkará kíxin tsjona hará kíxin siín kjuachaxin xíkaha na kjánchó jehya kíxin xíkaha tétuñhanrá. ⁷ A ntá janhan ntáxrjan kíxin chrókjína kíxin kaín rá chojni ntoará chrókóyóhará exí tí janhan. Kjánchó Dios chjéhe kjuachaxin jnkojnko chojni, la iso la ijkno nkehe tjenkayáxin, la í so la í jnko nkehe tjenkayáxin.

⁸ A ntá tí sín naxa tótqehya la ko tí chojni tsíkók'án na ntátjan sín kíxin chrókjína kíxin xíkahó chrók'uejó sín chrókótqehya sín exí tí janhan xíkaha. ⁹ Kjánchó tí chrókjuchahaya

* ^{6:16} Génesis 2.24

sín tí tjak'e əsén kíchó sín, naxa chrókjuasin sín jie, ntá íchá jína chrókótehe sín kíxin jehya jína kíxin jnkochríxín chrókjuak'ó əsén sín.

¹⁰ A ntá jahará ó tsíkjixin tsíkótahará, la tétuñhanrá tíhi: a ntá jehya kíxin kjuachaxin kuéntana tétoanxínrá. Náhí. Kjuachaxin kuénte Ínchéni mé tétoanxínrá kíxin tí chojni chjin chrókjuákehya xii. ¹¹ A ntá tí chrókjuákehé ijnko chojni chjin tí xii, ntá xikahó chrókuitohe tjan jehó tjan la ko chrókójína chrókóyóxin, chrókjuñinhín tí kjuaníkaon kíxin tí kjuákehé kíchó sín. Kjáxin xikaha tí chojni ntoa la chrókjuákehya tí ichjién.

¹² A ntá tí nkehe tétuñhan tí so sín jaí la kuéntana janhvàn, jehya kuénte Ínchéni, kíxin tí tjen ijnko ch'ín kíchó ni chóntha ch'án ichjién ch'án tinkáchónkihya Ínchéni, na kjónté naxa tjinkaon tjan chrókjuak'eko tjan tí jehe ch'án la chrókjuákehya ch'án tí jehe tjan. ¹³ La ko tí tjen ijnko tjan kíchó ni chóntha xii tjan tinkáchónkihya Ínchéni, ntá kjónté naxa tjinkaon ch'án chrókjuak'eko ch'án tí jehe tjan, ntá chrókjuákehya tjan tí jehe ch'án. ¹⁴ Kíxin tí xii tjan tinkáchónkihya Ínchéni ntá jie ó kótjóá ch'án kíxin tí ichjién mé tinkáchónki Dios, la ko tí ijnko tjan tinkáchónkihya Ínchéni ntá jie ó kótjóá tjan kíxin tí xii tjan mé tinkáchónki Dios. A ntá tí xikahya, la tí xjeen sín chrókótjuáhya, na ntá jie la mé ó kótjóá tí xjeen sín. ¹⁵ A ntá tí ch'ín ntoa o tí tjachjin tinkáchónkihya Ínchéni tjinkaon chrókjuákehé kíchó sín, la ája nohe sín tjákehé kíchó sín, kíxin Dios tjinkaon kíxin kjuaxróxin chrók'uejorá. ¹⁶ Jahará chojni chjinrás, ¿nkexrí chrókónohará kíxin nkexrí chrókuaá xiará? La ko jahará chojni ntoará, ¿nkexrí chrókónohará kíxin nkexrí chrókuaá ichjiánrá?

¹⁷ A ntá jnkojnko chojni chrók'uejó sín éxi tsíkjanjon Ínchéni kjuachaxin tsík'áyéhe sín, la ko éxi tí k'uéjó sín tió k'uíyéhe sín Dios, kjánchó chrókuítóehya sín tí jehe ch'án. Mé xikaha tétuñhan kaín tí ninko. ¹⁸ Tí chrók'uíyéhe Dios ijnko ch'ín chóntha xroye, ntá xikahó chrókuitohe ch'án. A ntá tí chrók'uíyéhe Dios ijnko ch'ín chontahya tí xroye a, ntá kjónté chrókuahya ch'án tí xroye a. ¹⁹ Na mé tjetuanhya á chóntha chojni tí xroye o á chontahya chojni tí xroye. Na mé tí nkehe tjetoan kíxin chrókjuinchexiteyéheni tí nkehe k'uetoan Dios. ²⁰ Chrók'uejóni jnkojnkoní éxi k'uéjóni tí k'uíyéheni Dios. ²¹ A ntá tió Dios k'uíyáha jaha, kjónté jaha ijnko chojni ch'exón xra, ntá chrókoxakuanhya kjónté xikahó tjech'e xra. Kjánchó tí chrók'uitjá tí tsaáxian la chrókuákjá tíha. ²² Kíxin tí nkexro kjuich'exón xra tió k'uíyéhe Ínchéni kíxin tsinkáchónki ch'án, la mé jie chóntha ch'án tí kjuachaxin tjanjon Ínchéni. Kjáxin tí nkexro k'uítuenhya tió k'uíyéhe Ínchéni la mé jie mé ch'ehe ch'án xra Cristo. ²³ Dios imá tjete k'uénaxín ch'án tí jahará. Méxra chrókjuánjonhyará kjuachaxin kíxin ókjé chojni chrók'óna ìnchárá. ²⁴ Méxra kíchó ni, éxi k'uejorá tió k'uíyahará Dios kíxin tsinkachónkirá ch'án, la xikahó naxa chrók'uejorá jie kíxin chontará Ínchéni tsjinkitsa.

²⁵ A ntá tí chojni naxa tótehyá sin na mé janhan chontahya nkehe kuénte Ínchéni chrókuétuñhan sín. Kjánchó tsoxrjanka tí nkehe tjenkayáxian janhvàn, a ntá chrókuítékaónrá tí janhan kíxin kuikonóana Ínchéni. ²⁶ Mé xikaha tóonna kíxin chrókójína kíxin jnkojnko chojni chrókuitohe sín éxi tjejó sín chrókótehyá sín, kíxin ijie la kjuaxróxinha tjejóni. ²⁷ A ntá tí chontará ichjiánrá ntá chrókjuákehéhyará tjan. A ntá tí chontahyará ichjiánrá ntá íchá jína chrókjuéyáhyará. ²⁸ Kjánchó tí chrókótahará la jehya jie tíha, la ko tí chrókótehe ijnko tjan tjarisoá la kjáxin jehya jie. A ntá tí sín tsíkótéhe la tsochóntha sín kjuaxikaon, mé xikaha janhan chrókjuñktsa sín kíxin chróchontahya sín kjuaxikaon.

²⁹ Mé xikaha tjétjónkará kíchó ni kíxin tsjéhyá yaon naxa t'itjáyan tsokjan Ínchéni. Mé xikaha tí chojni ntoa chóntha ichjién sín, la qantsi tjetoan sáoxín chróxraxinkaon sín Ínchéni, la ntá chréxín chrótjuéhe sín ichjién sín. ³⁰ A ntá tí sín tsjánka la chrók'uejó sín éxi chrótsjánkahya sín. La ko tí sín chéhe la chrók'uejó sín éxi chéhyá sín. La ko tí sín t'ena nkehe la chrók'uejó sín éxi chontahya sín tí nkehe tsík'ena sín. ³¹ La ko tí sín kjuacha nkehe

siín chjasintajni la chrók'uejó sín éxí ninkehó chróchóntahya sín, kíxin kaín nkehe t'ikonni chjasintajni ntihí mé tjoka tsjeje.

³² Tjínkakonhyá kíxin jahará chrókoxakonhanrá. Tí ch'ín ntoa chóntahya ichjin antsí má tóxakonhen tí xra kuénte Ínchéni chrókjuinchexiteyéhe ch'án tí nkehe tóxrjínhín Ínchéni.

³³ A ntá tí ch'ín tsíkótehe antsí tóxakonhen tí nkehe siín chjasintajni kíxin xíkaha mé sinchechéhe ch'án ichjién ch'án. ³⁴ Ókjé tjenkayáxin tí tjan tsíkótehe la ko tí tjan tsíkóteehya kíxin tí tjan tsíkóteehya la antsí má tóxakonhen tjan tí xra kuénte Ínchéni kíxin tjinkaon tjan kíxin Dios sinchetjóá tí cuerpo kuénte tjan la ko tí asén tjan. A ntá tí tjan tsíkótehe mé tóxakonhen tjan tí nkehe siín chjasintajni kíxin xíkaha sinchechéhe tjan xíi tjan.

³⁵ Tjétjónkará tíhi kíxin tjínkaván kíxin jína chrók'uejorá, jehya kíxin xíkaha chrókuétuñhanrá. Náhí. Tjínkaván kíxin kjuasáya chrók'uejorá jnkójína la jehó Ínchéni chrókjuich'eherá xra.

³⁶ A ntá jnkójínrá tjenkayáxinrá kíxin chrókótehe ijkno xjaanrá chjin kíxin ó tsícha tjan, la ntá tí xíkaha la ó nchoxon tsotéhe tjan na mé jehya jie. ³⁷ A ntá jnkójínrá tjinkáonrá kaín asánrá kíxin chrókóteehya xjaanrá chjin la kjaxin tjan xíkaha tjenkayáxin tjan la antsí jína tíha. ³⁸ Mé xíkaha tí titohérá xjaanrá chjin kíxin tsotéhe tjan la ó nchoxon. La ko kjaxin tí tjinkakonhyá tjan kíxin chrókótehe tjan na mé antsí jína tíha.

³⁹ Tí tjan tsíkótehe mé k'uítuenxín tjan kjuachaxin tí ley kíxin tsjak'eko tjan tí xíi tí naxá tjechón ch'án. A ntá tí chrók'uen ch'án ntá tsochónta tjan kjuachaxin tsotéhe tjan ínaá tí nkexro tsoxrjínhín tjan, kjánchó jehó ijkno nkexro tinkáchónki Ínchéni mé chrókótehe tjan. ⁴⁰ Kjánchó antsí chrókóchéhe tjan tí jehó tjan chrókuitohe tjan, tí í chrókóteehya tjan. Méxra xíkaha tjenkayáxian janhan la ko kjaxin tónna janhan kíxin chonta janhan tí kjuachaxin kuénte Nchákuén Dios.

8

Tí nkehe ine sín tjokehé sín tí nkehe tsíkjanoya

¹ A ntá jie tsóxrjanka kuénte ti ko its'en tjokehé sín tí nkehe tsíkjanoya. Na mé chaxín kaín ni noheni tíha. Ntá chrókoxakonhenni kíxin tí chrók'uitjani má ntá chrókóhnkeni má. Antsí tjetoan chrótjuéheni kíchó ni kíxin xíkaha antsí chrókuinkáchónki Ínchéni. ² Tí jnkójín nkexro ntáchro kíxin nohe ch'án, na mé chaxínhyá tíha la naxá t'itjáyan tí nkehe chrókónohe ch'án. ³ A ntá jnkójín nkexro tsotjuéhe Dios la Dios tsochóxin tí jehe ch'án.

⁴ A ntá tí chrókjóneni nto tsíkótehe sín tí nkehe tsíkjanoya, la ó noheni jína kíxin tí nkehe tsíkjanoya la t'etuñhya ninkehó ntihí chjasintajni, la ko ó noheni kíxin jnkokoá Dios tjen. ⁵ A ntá siín nkehe ncheck'in sín díos nkaya nkajní la ko chjasintajni na, kjánchó tí xíkaha la kjá chrók'uixin itsé díos la ko itsé ñinché sín. ⁶ A ntá jeheni chóntani jnkokoá Dios na mé It'eni tíha, la jehe ch'án mé kjuich'éna ch'án kaín xín nkehe la ko tjejóni kíxin chrókjuinchexiteyéheni ch'án. La ko kjaxin itjen jnkokoá Ínchéni Jesucristo, na mé kaín xín nkehe siín la kjuich'éna ch'án la ko kjaxin tí jeheni tsíkjich'éna ch'án.

⁷ Kjánchó kénhya chojni nohe sín tíha. Na mé iso sín ó kuénen sín kuinkáchónki sín tí nkehe tsíkjanoya, a ntá jie tió ine sín tí nkehe tsíkótehe chojni tí nkehe tsíkjanoya na mé tjenkayáxin sín kíxin ó tsík'áyéhe ijkno dios, kíxin naxá noehya sín má, ntá ntáchro sín kíxin ó kuámá sín tí jie kuénte tí nkehe tsíkjanoya. ⁸ Ó noheni chaxín kíxin jehya kíxin chrókoxrjínhín Dios tí jeheni kíxin tí nkehe jína chrókjóneni. Náhí. Jehya kíxin chrók'uejoxinni jína kíxin tí nkehe chrókjóneni na ko tí nkehe chrókjónehyani. ⁹ Méxra titohéyará kíxin tí kjuachaxin chontará sinterá kaín xín nkehe mé xíkaha chrókjuachroe ijkno chojni kíchó ni naxá noehya jína tinkáchónki Ínchéni ntá tíha chrókjuasixín sín jie. ¹⁰ A ntá tí chrók'uikon sín kíxin jahará ó nohará jína ntá ts'ejorá sinterá nkehe

nkaxenhen ijnko ninkoe nkehe tsíkjanoya, ntá tí chojni kichó ni naxa noehya jína ntá chrók'uikon sín xikaha ntá kjaxin jehe sín tsotjinkaon sín sine sín tí nkehe tsíkjokehe chojni ijnko dios chaxínhya. ¹¹ A ntá jahará ó nohará jína ntá xikaha tjejoch'erá itsará sincbek'itjáyanrá tí kichó ni naxa noehya jína tinkáchónki Ínchéni kíxin Cristo k'uenyákonhen tí jehe ch'án kjaxin. ¹² Méxrä tí xikaha chrókjuich'erá la chrókjuásinhínrá jie tí sín kichó ni naxa tinkáchónkiha sín Ínchéni jína, na mé xikaha kjaxin chrókjuásinrrá jie chrókuitekáuenhyará Cristo. ¹³ Méxrä tí xikaha chrókjuasixín jie ijnko kichó ni kíxin tí nkehe chrókjóneni, ntá íchá jína chrókjónehyani nto ínaá kíxin xikahya ntá chrókjuichroexín tí sín kichó ni ntá chrókjuasixín sín jie.

9

Tí kjuachaxin chóntha ijnko apóstol

¹ Chaxín janhan la kohya nkexro t'etuanna kíxin janhan la chonta kjuachaxin kíxin ijnko apóstol tsíkjeyá Ínchéni kíxin janhan k'uíkuan ch'án. Jahará mé tjákoxinrá tí xra kjuít'a kuente Ínchéni. ² Iso sín ntáchro sín kíxin tjátsoanhyana sín kíxin ijnko apóstol tsíkjeyá Ínchéni. Ntá jahará kaín rá mé chrókjuátsoanrrá tí janhan kíxin tí kuítekáonrá kuinkachónkirá Ínchéni mé xikaha tjákoxinrá kíxin chaxín janhan tsíkjeyána ch'án.

³ Méxrä janhan jína chrókjuatähä tí sín xritjontana, chróntáxrjan kíxin: ⁴ Janhan chonta kaín kjuachaxin chrók'uayáhá nkehe chrókjonè la ko chrók'uia. ⁵ Kjaxin chonta kjuachaxin chróchonta ijnko chojni chjin tinkáchónki Ínchéni chrók'uajikian éxí chóntha tí í so sín tsíkjeyá Ínchéni, la ko tí sín kichó Ínchéni, la ko éxí chóntha ch'ín Pedro. ⁶ ¿Á tjenkayáxinrá kíxin ch'ín Bernabé la ko janhan jehóni chóntahyani kjuachaxin tsítoheni tí xra sich'exínni tjani? ⁷ ¿Nkexro ch'e xra soldado ntá chichakoen ch'án ó chrókuicháxin? Nkexro k'uénkä nta to uva ntá kjónehyá ch'án to? ¿La ko nkexro t'ayakonhen kolélo ntá k'uíhya tí tsjen t'énen sín va? ⁸ Ntáchrohyará kíxin janhvàn kjuenkayáxian tíha kíxin kjaxin xroon tsíkjin ch'ín Moisés xikaha nixja. ⁹ Méxrä kjaxin ntáchro tí xroon tsíkjin ch'ín Moisés ósé kíxin: "Chrókjuéjóyahará kampoxa ir'va koxinta tí tsinkátja va noatrigó tió tsónkéhe sín noa."* Tíha mé t'axrjexín kíxin jehya koxinta ó tóxakonhen Dios. ¹⁰ Náhí. Tóxakonhen ch'án kíxin tí jeheni. Méxrä xikaha nixja tí xroon kíxin chrók'uejóxinni jína. A ntá tí nkexro kjuíncalentá nche la ko tí nkexro tsónkéhe noa, yói sín la chróchónhen sín chrók'uáyéhe sín tí nkehe k'óna. ¹¹ A ntá tí k'uénkäni tí itén Dios asánrá, la kjá chróchontani kjuachaxin chrókjuanchaharáni ichréñ nkehe t'ichjánxinhinni. ¹² A ntá tí xikaha í so sín chóntha sín tí kjuachaxin tjanchia sín nkehe ts'áyéhe sín, ntá jeheni antsí má chontani kjuachaxin chrók'uáyéheni nkehe.

Kjónté chóntani kjuachaxin xikaha la kjuanchahyani nkehe, kjónté kánhyó náxrjón k'uéjóni kíxin tjinkakonhyani chrókjuanchiani nkehe chrók'uichjánxinhinni kíxin ách'e xikaha ntá chrók'uinkákonhen tí itén Cristo chrókjuakoni. ¹³ Jahará ó nohará kíxin tí sín ch'e xra kúente ninko mé ntaha xránjon nkehe ine sín. La ko tí sín t'óyánxin sín ko tí altar tsochjéhe sín Dios kjaxin ine sín tí ntøe tí ko t'óyánxin sín ntiha. ¹⁴ Méxrä xikaha kjaxin k'uetøan Ínchéni kíxin tí sín ch'e tí xra ó chrónka sín tí tan tsaáxinni na mé tí xra a chrók'uaxrjeníxín tí nkehe chrókjón sín. ¹⁵ Kjónté janhan siín kjuachaxin xikaha chrókjuít'a, la xikahya kjuit'a la ko kjaxin xikahya ikjian tí xroon i kíxin jahará chróchjinará ichréñ nkehe. Náhí. Kjónté chrók'uénxian kjinta chrókjuáncháhyará nkehe kíxin tjinkakonhyá kíxin ninkexró chrókuakitsjena tí kjuachéhe chonta.

¹⁶ Jehya kíxin chrokjuintahnke chrókjuákua tí tan tsaáxinni. Náhí. Janhan na ó jehí sit'a tí xra a. Nòa tí janhan tí chrókjuákohya tí tan jína chrókuaáxin chojni. ¹⁷ A ntá tí janhván tjinkavan chrókjuákua la xikahó chrókjuacha janhan. A ntá tí tjàkua itén Dios kíxin xikaha

* 9:9 Deuteronomio 25.4

kuítuanna ntá xíkahó ntaxiteyá tí xrə chjìna Dios. ¹⁸ ¿A ntá nkehe chrókjuacha janhan? Tíha mé chrókjuacha janhan kíxin chrókochàna má kíxin chrókjuàkuá títan tsaáxinni la ninkehó chrókjuánchàhya chrókjuacha la ntá tí xíkahá la chrókuákjaáhya tí kjuachaxin tí chrókjuàkuá.

¹⁹ Méxrə kohya nkexro t'etuənna. Kjánchó ó jehí chrókjuit'ahá kaín xín chojni xrə kíxin xíkahá əntsí tsjé chojni chrókjuacha janhan kíxin chrókuitekaon sín Cristo. ²⁰ Ti tjèn tí siín tí sín judío ntayóhá éxí jehe sín xíkahá janhan kíxin xíkahá chrókjuacha jnkoyín sín chrókuitekaon sín. Na mé t'axrjexín kíxin títchrókjuacha iso ti sín nchexiteyéhé tí ley k'uetoan ch'ín Moisés, la t'ichjánxín kíxin kjaxin janhan chrókjuintaxiteyá tí ley kjónté janhan la xíkahá t'etuanna tí ley. ²¹ A ntá tí chrókjuacha jnkoyín tít sín nchexiteyéhya tí nkehe k'uetoan ch'ín Moisés la ntayóhá éxí títjehe sín xíkahá janhan kjaxin, kjónté chaxín t'etuanna tít nkehe k'uetoan Dios méxrə ntaxiteyá tít nkehe k'uetoan Cristo. ²² Tió tjèn tí siín tí sín tienxínhyá jína, ntá kjaxin janhan t'óna éxí títjehe sín kíxin xíkahá chrókjuacha jnkoyín títjehe sín chrókuitekaon sín. Méxrə ntayóhá éxí kaín xín chojni xíkahá janhan kíxin xíkahá chrókjuacha janhan kíxin chrókuaá iso títjehe sín. ²³ Mé xíkahá kaín tihá tjét'a kíxin chrókuinhin sín tí tan chrókuaáxin sín la ko kjaxinna əntsí má chrókjuintayaonna Dios.

²⁴ Jahará ó nohará kíxin tió itsjé sín tsinkáko kíchó sín la kjánchó ójnkó nkexro tsjacha tí tsitonhen nkehe. A ntá jahará xíkahá chrókuinkará kíxin chrók'uayéhérá tít nkehe chrókuitonhánrá. ²⁵ Tí sín tinkáko kíchó sín na mé jína t'ayakonhen sín əsén sín, titóhe sín kaín xín nkehe chrókjuich'ehe sín daño kíxin tjinkaon sín chrókjuacha sín, chrók'uayéhé sín kjónté ijkno corona tsík'óna kayoa ó tjoka tsoxámá. Kjánchó jeheni ch'eni xrə kuénte Ínchéni kíxin ntá ts'ayéhēni ijkno nkehe chónhyá tsoxámá. ²⁶ A ntá janhan jehya éxí ijkno chojni t'ikonhyá chrókuinka. Jehya éxí xrjnto ó chrókjuánjonkian. ²⁷ Náhí. Janhan tjánjonkian tít cuerpo kuéntana, tétuənhan kíxin jína chrókjuinchexiteyána kíxin tóxakonna kíxin chrókjuásian ichréntie ntá janhan chrókjuachahya kjónté senó kjuákohá itsjé chojni.

10

Tí nkehe t'etoan ch'án kuénte tít nkehe tsíkjanoya

¹ Tjinkávan janhan kíxin chrókónohará kíchó ni kíxin tít sín k'uaxrjeníxinni ósé, kaín sín k'uixinkánki sín chrínkí títjui, la ko kaín sín k'uátøyé sín Ntayaon Kjátse, ² la ko kaín sín k'uéchréhé sín ch'ín Moisés éxí yóhe chrókuikite sín kíxin jnkokoá k'uéjó sín títjén títjui la ko títntayaon la ko kjuínchexiteyéhe sín ch'án kíxin jehe ch'án k'uék'etoan ch'án. ³ La ko kaín sín kjóne sín jnkokón nkehe kuijin nkaya nkajní ⁴ la ko kaín sín ik'ui sín jnkokón nkehe kjuanjon Dios kíxin ik'ui sín ntá k'uaxrjexín ijkno tjo kjuíncheyána Dios, na mé títjo a la mé t'axrjexín kíxin Cristo tihá. ⁵ Kjánchó itsjé títjehe sín kjuínchecchéhya sín Dios, méxrə kóninkaon ch'án la títnteje ó k'uénxin tít sín a.

⁶ Kaínxín tihá kónhen kíxin chróxraxinkakonxínni jeheni, chróntáchrohya əsénni chrókjuich'ení tít nkehe jínahya éxí kjuich'e títjehe sín. ⁷ Méxrə chrókuinkachónkihyará jahará nkehe tsíkjanoya éxí k'uékinkáchónki iso títjehe sín, éxí ntáchro tít xroon itén Dios tsíkjin sín ósé kíxin: "Kaín sín k'uéjótjaxin sín kjóne sín la ko ik'ui sín, ntá kjuixin la k'uínkatjen sín la ité sín".* ⁸ Méxrə chrókjuasinkohyani jie chojni chjin ókjé éxí kjuich'e iso jehe sín ntá ik'uén sín, ventitres mil sín, jnkokoá yaon.† ⁹ Kjaxin chrókjuinchekóninkakonhyani Ínchéni éxí kjuich'e sín ntá ik'uén sín kíxin kjónehe sín konche,‡ ¹⁰ la ko chrók'uántaxiéñhyani Dios éxí k'uántaxíñhín títjehe sín ntá tít ángel kuénte kjuach'én mé kui k'óyán sín.§

¹¹ Kaín tihá kónhen tít sín k'uaxrjeníxinni ósé kíxin chrókónoexínni la ko k'óna xroon chrónka xíkahá kíxin nchexraxinkaonni tít jeheni tjejóni jie kíxin í séhya tsjixixín tsjeje

* **10:7** Éxodo 32.6 † **10:8** Números 25.6-9 ‡ **10:9** Números 21.5-6 § **10:10** Números 16.41-49

chjasintajni. ¹² A ntá tí nkexro ntáchro kíxin ntoá tjen na chrókóxakonhen kíxin chrókjuichroehya. ¹³ Jahará naxa k'uatsíkahyará ninkehó nkehe tí chrókjuachahya chojni chrókónhen. Méxra jahará chróraxinkáonrá Dios kíxin jehe ch'án chrókuítöehya ch'án tí jahará kíxin chrók'uatsíkará nkehe imá xra chrókjuachahyará. Méxra tí itsi ichré nkehe tsónhanrá la Dios tsjinkitsará ch'án kíxin chrókjuachará chrók'uatsíkará tí nkehe chrókónhanrá.

¹⁴ Méxra tjuahará jahará kíchó ni, la ntá ntáxrjan kíxin chrókuitohérá tí nkehe tsíkjanoya. ¹⁵ Nixjahará jahará kíxin jahará chojni ó tienxín. Méxra jahórá chrokjuenkayáxinrá kíxin á jína tí nkehe ntáxrjan. ¹⁶ Tí tjanchiani kjuasáya kíxin tí nkehe it'ini na mé kaín ni jnkokoá tjakoxínni tí ijníé Cristo ó k'uítji. La ko tió tóchrít'oni tí niotja ineni, na mé kaín ni jnkokoá tjakoxínni tí cuerpo kuènte Cristo. ¹⁷ Kjónté nchónhyani jeheni la kaín ni na jnkokoá niotja ineni kíxin kaín ni jnkokoá k'ónani cuerpo kuènte Cristo.

¹⁸ Chrókónohará nkexrí ch'e tí sín chjasin Israel, na mé ine sín tí ko tsíkjokehé sín Dios ntá xíkaha tjakoxín sín kíxin xíkaha tinkáchónki sín. ¹⁹ Ntáxrjanhya kíxin tí nkehe tsíkjanoya la chóntha kjuachaxin, la ko ntáxrjanhya kíxin tí nto tsíkjokehé sín tí nkehe tsíkjanoya la antsí chóntha kjuachaxin. ²⁰ Náhí. Ntáxrjan kíxin tí nkehe tjanjon tí sín chónhya Dios na mé tjokehé sín tí nchákuén tí jínahya la jehya Dios tjokehé sín tíha. Méxra janhan tjínkakonhya kíxin xíkaha chrókjuich'erá jahará chróraxinkáonrá tí nchákuén tí jínahya. ²¹ Tí its'ini tí nkehe xraxinkakonxíni ijníé Închéni ntá kjaxin tí chrók'uini tí nkehe xraxinkakonxín sín tí nchákuén tí jínahya la jehya jína tí xíkaha chrókjuich'eni chrók'uini. Tí sineni tí nkehe xraxinkakonxíni tí cuerpo kuènte Închéni ntá kjaxin tí chrókjóneni tí nkehe xraxinkakonxín sín tí nchákuén tí jínahya la jehya jína tí xíkaha chrókjuich'eni chrókjóneni tí nkehe. ²² ¿A jína chrókjuinchekóninkaonni Închéni ní? ¿Á jeheni antsí chontani kjuachaxin la ntá jehe ch'án la náhí ní?

Chóntani kaín kjuachaxin kaín xín nkehe na kjónté antsí tjetoan tsotjuéheni kíchó ni

²³ Siín kjuachaxin ichré nkehe chrókjuich'eni. Kjánchó jehya kíxin kaín nkehe la jína. Siín kjuachaxin ichré nkehe chrókjuich'eni na kjánchó kénhya nkehe chrókjuinkitsa chrókónoheni tí nkehe kuènte Dios. ²⁴ Chrókjuéyahará tí nkehe chrók'uejoxínrá jína jahórá. Náhí. Kjaxin chrókjuéyará tí nkehe chrók'uejoxin jína í so chojni.

²⁵ Chrókjónterá kaín nto sítóxin la chrókjuanchankíhyará ninkehó kíxin tí xíkaha ntá ntoáhya chrókjuenkayáxinrá, ²⁶ kíxin kuente chjasintajni la kaín xín nkehe siín la kuente Închéni.

²⁷ A ntá jnkojín chojni tinkáchónkiha Închéni chrók'uýahará sín kíxin chrókjóntekoará sín la ko tjinkáonrá sáchrókjuirá ntaha la ntá ó nchoxon chrókjónterá tí nkehe tjáhará sín la chrókóxakuanhyará chrókjuanchankíhyará ninkehó. ²⁸ Kjánchó tí chróntáchro jnkojín sín kíxin tí nto la ó tsíkjokehé sín ijnko nkehe tsíkjanoya, ichro sín, ntá tí xíkaha la chrókjóntehyará jahará, chrókóxakuhanrá kíxin ntoáhya chrókjuenkayáxin tí nkexro chrónka xíkaha. ²⁹ Méxra ntáxrjan tíhi kíxin tjínkakonhya kíxin ntoáhya chrókjuenkayáxin chojni ókjé, jehya kíxin ntoáhya chrókjuenkayáxinrá jahará.

Kjánchó isorá tsjanchankinára kíxin nkekuente chrókóxakonhanrá nkehe chrókjuenkayáxin ókjé chojni kíxin tí kjuachaxin chontará. ³⁰ Tí tjáncháhá Dios kjuasáya kíxin tí nkehe iné, ¿ntá nkekuente kíxin chrókjontana chojni kíxin kuente kjoné? ³¹ Tí chrókjónterá nkehe la ko chrók'uirá nkehe la ko ichréen xra chrókjuich'erá la chrókjuáxínrá kíxin Dios kjuinkitsará. ³² Ch'ehyará ninkehó nkehe chrókjuichroexin í so chojni kjónté judío sín la kjónté jehya judío sín la o tí chojni níjkoe Dios. ³³ Janhan mé tjéyá kíxin kaín xín xra tjét'q chrókóxrjínhin kaín xín chojni, na mé jehya kíxin tjéyá kíxin janhvàn chrókjuak'é jína. Náhí. Kjaxin tjínkaván kíxin chrókuaáxin í so chojni.

11

¹ Chrókuákoxiñrá jahará éxí kjuákoxiñ janhan kíxin janhan mé kjuákoxiñ éxí kjuákoxiñ Cristo.

Jína chrók'uejó tí chojni chjin tió tójnkotsé chojni

² Kichóni, chàna kíxin xráxín xráxinkáonrá tí janhan la ko nchexiteyéhérá tí nkehe kjuákokohárá. ³ A ntá tjíñkavan kíxin chrókiénxinrá kíxin Cristo t'etuenhen jnkojnko chojni ntoa, la ko kjaxin xíkaha jnkojnko chojni ntoa mé t'etuenhen tí ichjién, la ko kjaxin xíkaha Dios mé t'etuenhen Cristo. ⁴ A ntá tí jnkojín chojni ntoa xrasixín kachjinke ch'án tí tjenixjehe ch'án Dios, o xrasixín ch'án kachjinke ch'án tí tjechronka ch'án iten Dios, mé xíkaha tjákoxin ch'án kíxin chóntehya ch'án kjuasáyé tí Ínchéni t'etuenhen ch'án. ⁵ A ntá ijnko chojni chjin tjochín kja tjan tí tjenixjehe tjan Dios la o tjochín kja tjan tí tjechronka tjan iten Dios, mé xíkaha tjákoxin tjan kíxin chóntehya tjan kjuasáyé tí xii tjan. Mé tóyóhé éxí tsíkjín tjan xíkaha. ⁶ A ntá tí chojni chjin tjinkakonhya kíxin chrók'uiáxin kja tjan nkehe mé chrókjín tjan. Kjánchó tí chrókósuehe tjan chrókjín tjan, ntá chrók'uiáxin kja tjan tóté tió tójnkotsérá. ⁷ Kíxin tí chojni ntoa chrókuasinha ch'án kachjinke ch'án kíxin jehe ch'án mé éxí retratoé Dios la ko t'inkaséyanxín ch'án tí kjuachaxin kuènte Dios. A ntá tí chojni chjin mé t'inkaséyanxín tjan tí kjuachaxin kuènte tí xii tjan. ⁸ Kíxin tí chojni ntoa saoxín k'óna mé k'uaxrjeníxinha ch'án chojni chjin. Náhí. Tí chojni chjin mé k'uaxrjeníxín tí chojni ntoa. ⁹ Chaxín k'ónahya tí chojni ntoa kíxin jehó tsjak'e ch'án. Náhí. Tí chojni chjin mé k'óna kíxin tsjak'ekotoxin ch'án. ¹⁰ Ntá t'ichjánxín kíxin tí chojni chjin ts'iáxin kja sín tóté chrókuákoxin sín kíxin t'ítuenhen sín kíxin xíkaha ts'ikon tí sín ángel. ¹¹ Kjánchó kaín ni tinkáchónkini Cristo t'ichjánxín kíxin tí chojni ntoa chrókuinkitsa tí chojni chjin la ko tí chojni chjin chrókuinkitsa tí chojni ntoa. ¹² Kíxin chaxín tí chojni chjin na tí chojni ntoa k'uaxrjeníxín. A ntá jie tí chojni chjin na mé t'axrjeníxín tí chojni ntoa. A ntá kaín ni k'uaxrjeníxinni Dios.

¹³ Jahará nkechrorá, ¿á ó nchoxon kíxin ijkno chojni chjin tjochín kja tjan chrónixjehe tjan Dios? ¹⁴ Jahórá chrókónohará kíxin chrókósuehe tí chojni ntoa chóntha kaxíhi kjínjin. ¹⁵ A ntá tí chojni chjin chóntha kaxíhi kjínjin la mé ntoá tíha kíxin ó kuituqxin tjan kíxin tsochóntha tjan kaxíhi tjan kjínjin kíxin tsotjochíxinha kja tjan. ¹⁶ A ntá tí tjen jnkojín nkexro titekakonhya tíha xíkaha ntá chrókónohará kíxin jeheni la ko kaín xín tí sín ninkoe Dios la xíkahó kuènhenni.

Ntoáhya kjóne sín tí niotja xraxinkakonxín sín Ínchéni

¹⁷ Méxra tí nkehe tjékjian la mé ijkno nkehe tóxrínnahya tjejoch'erá. Tió tójnkotsérá ntiha la ijkno nkehe jína chrókuich'erá. A ntá náhí la ijkno nkehe jínahya tjejoch'erá. ¹⁸ Na mé saoxín na mé ntáchro sín kíxin tió tójnkotsérá la jnkokoáhya tjenkayáxinrá. Ntáxrjan kíxin ách'e chaxín xíkaha tjejorá. ¹⁹ ¿Xá t'ichjánxín kíxin chrók'uaxrjentará kíxin chrókónoexínni kíxin nkexro chaxín tinkáchónki Ínchéni la ko nkexro tí náhí? ²⁰ Méxra tí xíkaha jnkokoáhya tjenkayáxinrá ntá tió tójnkotsérá chrókjónterá niotja la chaxínhyá xraxinkákonxínrá Ínchéni tí xíkaha. ²¹ Kíxin tió sinterá la senó isorá tjejontará tí nkehe tsíkjasánkoará, la isorá la kjónté naxa t'lénxinrá kjinta, la í sorá la tsíkókoanrá. ²² ¿Á chontahyará nchia ntgará? Ntahó chrókjóntexínrá la ko chrók'uíxinrá nkehe. Mé xíkaha chontahyará kjuasáyé tí ninkoe Dios la ko nchesuèhérá tí sín nòa chontahya ninkehó. ¿Nkehe tsontáxrjan kíxin jína tjejoch'erá? Kjá náhí. Jehya jína tjejoch'erá.

Jína chróxraxinkakonxínni Ínchéni

(Mt. 26.26-29; Mr. 14.22-25; Lc. 22.14-20)

²³ Kíxin Ínchéni mé chjína ch'án tí nkehe kjuákokohará: kíxin tí tie tsíkoxi ch'án na mé jehe ch'án kuákja ch'án tí niotja ²⁴ ntá kjuixin kjuanchia ch'án kjuasáya ntá kóchrít'o ch'án tí niotja ntá ntáchro ch'án kíxin: "Tíhi mé ntona xránjon its'en kíxin jína ts'ejóxin

tí jahará. Méxra xikaha sich'erá kíxin tsoxraxinkákonxínrá tí janhan", ichro ch'án. ²⁵ La ko kjaxin xikaha tió kjuixin kjóne sín ntá kuákja ch'án tí vaso la ntáchro ch'án kíxin: "Tíhí mé tjakoxín kíxin chaxín tsoxiteyá ijnko nkehe nixin kuénte Dios kíxin ts'ítji jnina. Tió its'irá tíhí mé tsoxraxinkákonxínrá tí janhan", mé chro ch'án. ²⁶ Kíxin tí interá tí niotja la it'irá tí inté to uva mé xikaha tjejotjákoxínrá kíxin xikaha k'uénxin Ìnchéni. Mé xikaha tsjákoxínrá tsjixrakájia yaon tsokjan ch'án.

Ntoá chrókjóneni tí niotja kuénte Ìnchéni

²⁷ A ntá jnkoyín nkexro chjini chrókjóne sín tí niotja la ko chrók'ui sín tí inté to uva xraxinkakonxínni Ìnchéni, mé xikaha chrókjua sin sín jie chrókjuikosáyehya sín tí cuerpo la ko tí ijnjé Ìnchéni. ²⁸ Méxra jnkoynkoni chrókjuenkayáxinni senó kíxin á chóntahyani jie na ntá chrókjóneni tí niotja la ko chrók'uini tí inté to uva. ²⁹ A ntá tí xikaha chjini chrókjóneni la ko chjini chrók'uini la chaxínhyá chróxraxinkakonxínni tí cuerpo kuénte Ìnchéni la mé tí xikaha chrókjuich'eni la chrókjua sótexínni tíha. ³⁰ Mé xikaha itsjérá níhará la ko itsjérá tsankahyará la ko jnkoyínrá k'uénrás. ³¹ A ntá tí chrókjua tsoanní nkexrí tjen asénni jeheni ntá Ìnchéni t'ichjánxienhyá chrókjuincheckjasóteni ch'án. ³² A ntá kjónté chrókjuincheckjasóteni Ìnchéni ntá chrók'uitjani chrókjuincheckjasóteni ch'án, ntá chrókjua sótehyani exí tsjasóte tí í so chojni chjasintajni.

³³ Méxra kíchó ni, tió tójkotsérá sinterá la chróchonhénrá chrókui tí í so sín ntá chrókjóntekoará sín jnkokoá. ³⁴ A ntá tí nkexro ik'uén kjinta la íchá jína senó chrókjónexín nkehe ntóe ó kíxin ntá chrókjuincheckjasótehyará Dios kíxin xikaha ntoáhya tójkotsérá. A ntá tí í so nkehe la tsjásiyóxian janhan tió tsjasántsahará.

12

Nchakuen Dios mé chjéhe kjuachaxin jnkoynkchojni

¹ Kíchóni, tjíkaván kíxin ts'onohará jína kíxin nkexrí siín tí kjuachaxin tjanjon Nchakuen Dios t'áyéhe jnkoynkchojni.

² Jahará ó nohará jína kíxin tió naxá kuinkachónkehyará Ìnchéni na mé kuinkachréhérá tí nkehe tsíkjanoya nixjahya. ³ Méxra chrókónohará kíxin nijnko nkexro nixjaxín kjuachaxin Nchakuen Dios tsjacha ts'ántaxínhin Jesú, la ko nijnko nkexro tsjacha tsontáchro sín kíxin Jesú mé Ìnché sín tí nixjaxínhya sín tí kjuachaxin Nchakuen Dios.

⁴ A ntá nchónhyá xrá kuénte kjuachaxin Nchakuen Dios siín la kjánchó jnkokoá Nchakuen Dios mé tjetjanjon. ⁵ La ko siín nchónhyá nkexrí sich'eheni xrá Ìnchéni, kjánchó Ìnchéni la ójnkó nkexro tíha. ⁶ La ko nchónhyá nkehe t'axrjexín tí xrá ch'e jnkoynkchojni la kjánchó jnkokoá Dios tjetjanjon tí kjuachaxin ch'exínni xrá kaín ni. ⁷ Jnkoynkchojni mé kujtonhen kíxin chrókjukoxín kjuachaxin kuénte Nchakuen Dios kíxin xikaha chrókjunkitsa kíchó. ⁸ Iso chojni mé ts'áyéhe kjuachaxin tsonixja sín kjuaxrexinkaon jína kíxin tjinkitsa Nchakuen Dios, la ko í so chojni ts'áyéhe kjuachaxin tsochrónka ijnko nkehe kuénte Dios noehya tí í so sín kíxin Nchakuen Dios mé tjinkitsa sín tsonixja sín. ⁹ La ko í so chojni mé ts'áyéhe kjuachaxin antsí tsinkáchónki Dios kíxin Nchakuen Dios mé tjinkitsa. La ko í so chojni mé ts'áyéhe kjuachaxin sinchekitohe chojni jína. ¹⁰ La ko í so chojni mé ts'áyéhe kjuachaxin tsjasin sín kjuaxroan, la ko í so chojni mé ts'áyéhe kjuachaxin kíxin Dios sinchenohe sín ijnko nkehe tsochenka sín tí í so kíchó ni, la ko í so chojni mé ts'áyéhe kjuachaxin tsjatsqanxín á kjuachaxin kuénte Nchakuen Dios o á kjuachaxin kuénte ijnko nchakuen jínahya chronkaxín ijnko chojni, la ko í so chojni mé ts'áyéhe kjuachaxin kíxin ijnko nkiva ókjé naxá k'uitjahya sín tsonixjaxín sín ijnko nkehe kuénte Dios, la ko í so chojni mé ts'áyéhe kjuachaxin tsochronkaxín nkexrí t'axrjexín tí nkehe ókjé nkiva tsíchronka tí í jnko chojni. ¹¹ Kjánchó kaín tíha jnkokoá Nchakuen

Dios mé tjinkitsa, na mé k'uáyéhé jnkojnkó chojni jnkojnkó kjuachaxín éxí tjinkaon tí Nchákuén Dios nkerí xrà chrókjuich'e sín.

Kaínni k'ónani jnkokoá cuerpo kuènte Cristo

¹² Cristo la éxí yóhé ijnko cuerpo chóntha nchónhya parte. A ntá ijnko cuerpo la jnkokoá kjánchó nchónhya parte chóntha. Kjónté nchónhya parte chóntha tí cuerpo la tí cuerpo la ójnko. Mé xíkahá Ínchéni Cristo la ójnko tí jehe ch'án. ¹³ Kaínni kjónté chojni judío la kjónté chojni jehya judío, la kjónté chojni ch'exón xrà, la kjónté chojni t'ítuenhya, kaín ni na mé jnkokoáxón Nchákuén Dios kuíkitexínni, na kaín ni k'ónani jnkokoá cuerpo kuènte Cristo, na mé éxí jnkokoá nkehe ik'uíni kaín ni na mé k'uáyéheni tí jnkokoá Nchákuén Dios.

¹⁴ Kixin tí cuerpo kuénteni la jehya jnkokoá parte chóntha. Náhí. Itsjé parte chóntha tí cuerpo. ¹⁵ Tí chróntáchro tí toteni kixin: "Jehya itja tí jeheni na mé jehya jeheni kuénte tí cuerpo", na mé chaxínhya tíha kixin ó jehe cuerpo kuénte. ¹⁶ Kjaxin tí chróntáchro ijnko ntatsjoni kixin: "Jehya ikon tí jeheni na mé jehya jeheni kuénte tí cuerpo a", na mé chaxínhya tíha kixin ó jehe cuerpo kuénte. ¹⁷ Tí chaxín kuenté cuerpo kuénteni chrók'óna ikonni, ¿ntá nkexrí chrókuinhinni? A ntá tí chaxín kuenté cuerpo kuénteni chrók'óna ntatsjoni, ¿ntá nkexrí chrókókaxraxéheni? ¹⁸ A ntá Dios kjuanjon ch'án kjuachaxín nkexrí ch'e xrà jnkojnkó nkehe kuénte cuerpo kuénteni kixin jehe ch'án nkexrí tjinkaon ch'án kóxrjínhin ch'án. ¹⁹ A ntá tí chrók'óna jnkokoá nkehe tíha, ¿a ntá nkexrí chrókjuak'e tí cuerpo a? ²⁰ Kjánchó jie nchónhya parte chóntha tí cuerpo kuénteni la ó jnkokoá tíha.

²¹ Tí ikonni la mé xitjahya tsontáche tí tjani kixin: "T'ichjánxienhyani tí jaha", la ko kjaxin tí kjani xitjahya tsontáche tí totenti kixin: "T'ichjánxinnahya tí jaha." ²² Náhí. Tí nkehe kuénte tí cuerpo tónhenni kixin tjetuanhya na mé kjónté antsí má t'ichjánxin ²³ la ko íso nkehe kuénte tí cuerpo la kánhyó chóntheleni kjuasáya na kjánchó antsí nchek'ítsáni ka. La ko tí nkehe náxrjónhya la antsí tóxakonhenni kixin tsonoxínhya. ²⁴ A ntá tí nkehe náxrjón na mé t'ichjánxienhyani ka ts'ítsá. Mé xíkahá Dios kjuincheyóxin kaín tí nkehe kuénte tí cuerpo kuénteni la ko jehe ch'án antsí chjéhe ch'án kjuasáya tí nkehe chrókjuikosáyehyani jeheni ²⁵ kixin ninkehó xitjahya chróxikayéhe tí cuerpo kixin kaín tí nkehe la jnkokón tjinkitsa kíchó. ²⁶ Tió tsíkóníhi ijnko parte kuénte tí cuerpo la kaín tí í so parte la kjaxin tjoté; la ko tió tijkosáyehé sín ijnko parte la kuenté tsochéhe.

²⁷ A ntá jahará na mé kuénte tí cuerpo kuénte Cristo la ko jnkojnkóra mé ijnko parte kuénte tí cuerpo kuénte ch'án. ²⁸ Méxrà Dios kjueyá ch'án chojni sich'ehe ch'án xrà kuénte ninko, na mé saoxín kjueyá ch'án tí sín apóstol; la ko yóxin kjueyá ch'án iso chojni chjéhe ch'án kjuachaxín tsochrónka sín ijnko nkehe kjuínchenohe sín ch'án. La ko níxín kjueyá Dios iso chojni chjéhe ch'án kjuachaxín tsjako sín itén ch'án, la ko kjaxin kjueyá ch'án iso chojni chjéhe ch'án kjuachaxín tsjasin sín kjuaxroan, la ko kjaxin kjueyá ch'án í so chojni chjéhe ch'án kjuachaxín sinchekitohe chojni níhi jína, la ko kjaxin kjueyá ch'án í so kjojni chjéhe ch'án kjuachaxín antsí tjinkitsa kíchó, la ko kjaxin kjueyá ch'án í so chojni chjéhe ch'án kjuachaxín ts'etoan xrà kuénte ch'án, la ko kjaxin kjueyá ch'án í so chojni chjéhe ch'án kjuachaxín tsonixjaxin sín í jnko nkiva. ²⁹ Kénya chojni tsík'óna apóstol, la ko kénhyá chojni chóntha kjuachaxín sinchenohe sín Dios ijnko nkehe tsochrónka sín, la ko kénhyá chojni chóntha kjuachaxín tsjako sín itén Dios, la ko kénhyá chojni chóntha kjuachaxín tsjasin sín kjuaxroan, ³⁰ la ko kénhyá chojni chóntha kjuachaxín sinchekitohe sín chojni jína, la ko kénhyá chojni chóntha kjuachaxín tsonixjaxin sín ijnko nkiva ókjé, la ko kénhyá chojni chóntha kjuachaxín tsochronkaxín sín nkexrí t'axrjexín tí nkehe chrónka tí sín nixjaxin ijnko nkiva ókjé. Chaxín kjá náhí. ³¹ Méxrà tjéyará tí kjuachaxín antsí jína chrótjáhará Dios. Ntá jie tsjákhárá ijnko ntia antsí jína chrók'uejorá.

¹ Tí chróníx̄ja nkívēe chojni ó la ko kjaxin chróníx̄ja éxí nixja tí sín ángel, ntá nax̄a chrótjuahya kichó ni la ó chónkó tíha la mé éxí chrókóyòna chica tsjánka ó la ko éxí ijnko chica platillo nchevékjan sín ó, kixin ninkehó són chontahya. ² La ko tí chrónix̄ja itén Dios, la ko tí chrókianxian kaín nkehe kuènte Dios nax̄a noehya chojni, la ko tí chrókónona kaín nkehe, la ko antsí chrókuinkachónkia Dios ntá chrókjuacha chróntátjan ijnko jn̄a sáchrókjui ókjé, kjónté tí xikaha ntá nax̄a chrótjuahya kichó ni, ntá ninkehó sínkíhya tí janhan. ³ Tí chrókjuintakitonhan tí sín nòa kaín nkehe chonta, la ko tí chrókjuánjuan kjuachaxin kixin chróchena kuenténa, kjónté tí xikaha ntá nax̄a chrótjuahya kichó ni la ntá ninkehó sínkíhya tíha.

⁴ Tí tjuèheni kichó ni na ts'ejóchónhenni kichó ni, tsonínkakuenhyani kichó ni, la ko sinchejína qasénni, la ko tsochjinoxíenhyani, la ko sinchehnkehelyani, la ko tsohnkehelyani, ⁵ la ko ch'ehyani ninkehó nkehe náxrjónhya, la ko tneyáhyani nkehe kuènteni ó, la ko tsonínkakonhyani tjoka, la ko tsochóntahyani kjuanínkaon isé, ⁶ la ko kjaxin tsochéhyani tió í jnko chojni tjasin jie. Náhí. Chrókóchéheni tió ijnko nkehe jína sítónhen. ⁷ Tí tjuèheni kichó ni la kjónté kaín nkehe chrókjuasótexínni la chrókuitekaonni kixin jína sín la ko nax̄a chrok'uejóchónhenni chrókóninkakonhyani.

⁸ Tí tjuèheni kichó ni la jnkochríxín tsjak'e ts'itjáyanhya. A ntá itsi ijnko yaon í t'ichjánxinhya tsochrónka chojni itén Dios, la ko tsokohya kjuachaxin tsonixjaxin chojni ókjé nkiva, la ko tsokohya kjuachaxin tsongohe chojni má. ⁹ Nax̄a t'itjáyan tí nkehe chrókónoheni la ko nax̄a t'itjáyan tí nkehe chróchronkaxínni. ¹⁰ A ntá tió tsongoheni kaín xín nkehe ntá tí nkehe ntoáhya k'uénoheni la mé ts'itjáyan.

¹¹ Tió nax̄a chánjan janhan k'uéníx̄ja éxí chánjan la ko k'uékjenkayáxian éxí chánjan. Ntá kóntetona ntá kuitohá tí nkehe kuènte chánjan. ¹² Méxra éxí ijnko xrosentá t'ikonxínhya jína jie, ntá tsi ijnko yaon chrléxín ntá ts'ikonxínni jína kaín nkehe. Ijie nax̄a t'itjáyan tí nkehe chrókónona; ntá tsi ijnko yaon tsongona jína kaín xín nkehe éxí xikaha kjaxin Dios chóxin ch'án tí janhan. ¹³ Méxra, iní nkehe tjejó jnkochríxín, la mé ts'ejó chojni tsinkáchónki Dios, la ko ts'ejó chojni tsochónhen sín, la ko ts'ejó chojni tsotjuèhe kichó. A ntá iní nkehe siín, la kjánchó antsí má t'ichjánxín tsotjuèheni kichó ni.

14

Tí nixjaxin chojni ókjé nkiva

¹ Chrókóxakonhanrá kixin chrótjuèhérala kichuárá la ko kjaxin chrókjuéyará kixin Nchäkuen Dios chrótjáhará kjuachaxin. Kjánchó antsí chrótjinkáonrá tí kjuachaxin tsochronkará ijnko nkehe kuènte Dios. ² Méxra, tí nkexro nixjaxin ijnko nkiva ókjé mé nixjehé sín Dios ó la ntá chojni la náhí, kixin kohya ninkexró tienxín tí nkehe nixja sín la mé nchäkuen sín ó mé chronkaxín sín ijnko nkehe kuènte Dios noehya tí í so sín. ³ A ntá tí nkexro chronkaxín ijnko nkiva tienxín tí í so sín ijnko nkehe kuènte Dios mé nixjehé chojni ntá xikaha tjinkitsa tí í so sín kixin antsí chrók'uitja sín nkehe kuènte Dios la ko chrókóchéhe sín. ⁴ A ntá tí nkexro nixjaxin ijnko nkiva ókjé la mé tjinkitsa jehó ch'án antsí tsongohe tí kjuachaxin kuènte Dios. A ntá tí nkexro chronkaxín ijnko nkehe kjuínchenohe Dios mé tsjinkitsa tí sín kuènte njnko kixin antsí chrók'uitja sín nkehe kuènte Dios.

⁵ Tjinkavan kixin kaín rá chróchontará kjuachaxin chrónixjaxinrā ijnko nkiva ókjé. Kjánchó antsí tjetean chróchontará kjuachaxin chróchronkará ijnko nkehe kjuínchenohará Dios. A ntá kánhyó tjetean chrónixjaxinrā ókjé nkiva tí noahyará tsoschronkaxinrā nkexrī t'axrjexín tí nkehe chróchronkará kixin chrókuinhin kaín tí sín tinkáchónki Ínchéni kixin antsí chrók'uitja sín nkehe kuènte Dios. ⁶ A ntá kichó ni, tí chrókjuasántsjahárá chrónixjaáxinrā ijnko nkiva ókjé la ó chónkó tíha. Íchá jína chrónixjaáxinrā ijnko nkiva tiénxinrā chróxrjankaxián ijnko nkehe kjuínchenóna Dios

la chróxrjankaxián ijnko nkehe kuènte Dios naxa noahyará, la chróxrjankaxián ijnko nkehe tjinkaon Dios chrókónohará, la chrókuakoáxinrá ókjé nkehe nixin.

⁷ Kixin kjaxin tí ison flauta la ko tí isón arpa, tí jnkokónhya chróntáchro jnkojnko són, ntá chrókuachahyani chrókuatsoanni nkehe tí ntáchro tí són a. ⁸ La ko éxi yóhe tí siín guerra, tjanjonko kichó sín, la ntá ntoáhya chrók'uánoa sín tí chica trompeta, ntá kohya nkexro chrókoyaxínhin sín sáchrókuikjanjonko kichó sín. ⁹ Kjaxin xikaha tí jahará tí nixahyará ijnko tan tienxín sín, ¿ntá nkexrí chrókónohe sín nkehe tí ntáchorrá? Mé xikaha tjejonixjará éxi chjéhe xrínto ó. ¹⁰ Chaxín siín itsjé nkìva chjasintajni la ko kaín nkìva la siín chojni tienxín sín. ¹¹ Kjánchó tí chrókiqxinhya janhan tí nkehe tsontáchro ijnko nkexro, ntá tí nkexro a ts'ikon tí janhan éxi ijnko nkexro tsíkjixín ókjé la ko kjaxin janhan ts'líuan tí jehe ch'án éxi ijnko nkexro tsíkjixín ókjé. ¹² Méxra jahará imá tjinkáonrá chrók'uayéhérá ijnko xrä kuènte Nchakuen Dios, ntá chrókójína chrókuéyará tí xrä chrókuinkitsa tí í so sín kuènte ninko kixin antsí chrók'uitja sín ijnko nkehe kuènte Dios.

¹³ Méxra tí nkexro nixjaxin ijnko nkìva ókjé la chrókuanchehe Dios kixin chrókuinkitsa chróchronkaxín ch'án nkexrí t'axrjexín tí tan a. ¹⁴ Kixin tí tsonixjaxian Dios ijnko nkìva ókjé, ntá tí nchakuenná ó mé tjenixjehé Dios, la ntá tí kjuaxrexinkaon kuéntana la ókjé tjen. ¹⁵ A ntá tí xikaha, ¿nkehe chrók'uit'a? Íchá jína chrónixjaxian Dios tí nchakuenná la chrókiqxian janhan, la ko tió chrótsje janhan himno la chrótsjexian nchakuenná la ko chrókiqxian janhan. ¹⁶ Kixin tí tsochjeéxinrá kjuasáya Dios nchakuánrá ó ntá tjejótinhin í so chojni, ¿ntá nkexrí kixin tí sín naxa kienxínhyá sín tí nkehe nixjehérá Dios chróntáchro sín "Amén, ó nchoxon"? ¹⁷ Kjónté imá náxrjón tí chrókuanchehérá Dios kjuasáya la ntá chrókienxínhyá tí sín tjejótinhin, ntá chrokjuinkitsahya kixin chrók'uitja sín nkehe kuènte Dios. ¹⁸ Tjáncháhá Dios kjuasáya kixin antsí chonta janhan kjuachaxin tsonixjaxian ókjé nkìva, la ntá jahará la kánhyó nixjará xikaha. ¹⁹ Kjánchó tió tójkotsé chojni kichó ni la mé ntáxrjan kixin antsí tjinkaván chrónixja janhan kjónté in'ó palabra ó tienxín sín kixin xikaha chrókuáxián sín, la ntá kánhyó chrókójína kjónté ite mil palabra chrónixjaxian ijnko nkìva ókjé tienxínhyá chojni.

²⁰ Kichóni, chrókjuenkayáxinhyárá éxi chánjan. Kjánchó chrók'uejorá éxi chánjan naxa noehya nkehe jinahya. A ntá chrókjuenkayáxinrá éxi chojni nteto. ²¹ Tí xroon tsíkjín sín ósé nkexrí k'uetoan Dios mé ntáchro kixin: "Janhan tsoníjaxian ókjé nkìva la ko itén chojni ókjé kixin tsinhin tí nación Israel na kjónté tsitekakonhya sín, xikaha ichro Inchéni."* ²² A ntá tí kjuachaxin tsonixjaxin chojni ókjé nkìva mé xránjon kixin chrókuakoxin chojni chrókuinhin tí sín tinkáchónkihya Inchéni, jehya kixin t'ichjánxín chrókuinhin tí sín tinkáchónki Inchéni. A ntá tí kjuachaxin tsochronka chojni ijnko nkehe kjuínchenohe sín Dios mé xránjon kixin chrókuakoxin chojni chrókuinhin tí sín tinkáchónki Inchéni, jehya kixin chrókuinhin tí sin tinkáchónkihya Inchéni. ²³ A ntá tió tójkotsérá kaín rá tinkachónkirá Inchéni, a ntá kaín rá chrónixjaxinrá ókjé nkìva, ntá tí chrók'uixenhen nchia ijnko chojni naxa kuénhya sín xikaha, o chrók'uixenhen nchia ijnko chojni naxa tinkáchónkihya Inchéni ntá chrókuinhin sín xikaha la kjá tsontáchro sín kixin ó k'uixikjánrá. ²⁴ Kjánchó tí chróchónkará kaín rá ijnko nkehe kjuínchenohará Dios ntá chrók'uixenhen nchia ijnko nkexro tinkáchónkihya Inchéni, o chrók'uixenhen ijnko chojni naxa tienhyé, ntá chrókuinhin sín nkehe tjejonixjará kaín rá ntá chróxraxinkaon sín tí jié chóntha sín ntá chrókuítóhe sín kaín jié chóntha sín. ²⁵ Ntá tsonoxín tí nkehe mó tjenkayáxin sín nkaya asén sín ntá ts'ejóxin toch'in sín tsoxraxinkaon sín Dios la ko tsontáchro sín kixin chaxín tjejókoará Dios.

Ntoá chrókuich'eni kaín xín nkehe tió tójkotséni

* **14:21** Isaías 28.11-12

²⁶ A ntá kíchó ni, ¿nkehe chrókónhen? Tió tójnkotsérá na mé isorá chrótsjerá salmo, la ko isorá chrókjuákorá, la ko isorá chróchronkará ijnko nkehe kjuínchenohará Dios, la ko isorá chrónixjaxinrá ijnko nkìva ókjé, la ko isorá chróchronkaxinrá nkexrí t'axrjexín tí nkehe nixjaxin tí í so sín ókjé nkìva. Kjánchó kaín tíha tsonhen kíxin tí sín kuènte ninko chrók'uitja sín nkehe kuènte Dios. ²⁷ A ntá tí chrónixjaxin sín ijnko nkìva ókjé na mé yaá o iy'a chojni chrónixja sín la ko chrók'uíxinkí chojni tsonixja, la ko t'ichjánxin kíxin jnkojín nkexro nohe tsochronkaxín nkexrí t'axrjexín tí nkehe nixja sín. ²⁸ A ntá tí kohya ninkexro tí ninko ntaha tsjacha tsochronkaxín nkexrí t'axrjexín tí nkehe chrónixja sín, ntá chrónixjaxinhyá sín ókjé nkìva tí tjejótójkotsé sín, na mé chrónixjehé sín əsén sín ó la ko chrónixjehé sín Dios ó. ²⁹ Tjánjonrá kjuachaxin kíxin tsonixja yaá o y'a chojni k'uayéhē sín kjuachaxin tsochronka sín nkehe kjuínchenohe sín Dios. A ntá tí sín tjejótinhin mé chrókjuenkayáxin sín á ó nchoxón tí nkehe kuínhin sín. ³⁰ A ntá tí xrínahya chrókjuinchenohe Dios ijnko nkehe ijnko nkexro tjetjaxin ntá chróchronka ch'án tíha. A ntá tí nkexro senó kjuankíxin chrónka nkehe la chróchónhen ch'án chrónixjahy ch'án. ³¹ Ó nchoxon jnkojkorá chróchronkará nkehe tjáhará Dios kíxin xíkaha kaín rá chrók'uitjárá la ko chrókocháhará. ³² A ntá tí nkexro k'uayéhē kjuachaxin tsochronka nkehe kjuínchenohe Dios kjaxin t'ichjánxin chróchónhen tsochronkaxín í jnko nkexro. ³³ Kíxin Dios tjanjon tí kjuaxróxin, a ntá tjinkakonhya ch'án kíxin yóxinha chrók'uejóni.

Tió tójnkotsé chojni kíchó ni tinkáchónki Închéni ³⁴ chrónixjahy tí chojni chjin jnkosiné servicio. Kohya kjuachaxin xíkaha, na mé chrókjuinchexiteyéhē sín tí sín ntoa exí t'etoan tí ley kuènte Dios. ³⁵ Tí tjinkaon sín tsongohe sín nkehe na mé chrókjuanchankíhi sín xì sín tió tiji sín ntøe sín. Náxrjónhya chrónixja ijnko chojni chjin nkehe jnkosiné servicio.

³⁶ Chrókónohará kíxin tí itén Dios xrankixixínya tí tjejorá la ko jehya jahórá k'uayéhérá tíha. ³⁷ A ntá tí tjen jnkojín nkexro tjenkayáxin kíxin nixja itén Dios o tjenkayáxin kíxin tí Nchakuen Dios tjinkitsa tí jehe ch'án ntá chrókonohe ch'án kíxin tí nkehe tjékjian mé ijnko nkehe tsík'etoan Închéni. ³⁸ A ntá tí nkexro titekakonhya tíhi na ntá jahará chrókuitekákuéhyará ch'án kjaxin.

³⁹ Méxra kíchó ni, chrókjuéyárá kíxin chrók'uayéhérá kjuachaxin chróchronkará nkehe kjuínchenohará Dios la ko chrókuitohérá tsonixjaxin chojni ókjé nkìva. ⁴⁰ Kjánchó kaín xín nkehe la jnkojína la ko kjuasáya chrókónhen.

15

Tsíxechón Cristo

¹ A ntá jie kíchó ni, tjinkaván chróxraxinkáonrá nkehe tí tan kuaáxinrá kjuákohará. Tíha mé kuítekáonrá, la mé tíha mé tjejóxinrá jína. ² Kjaxin tí nkehe kjuákohará mé kuaáxinrá, tí titoéhyará tí nkehe kjuákohará; tí la náhí la chónkó kuinkachónkirá tí nkehe kjuàkua.

³ Sæoxín, kjuákohará tí nkehe k'uayáhá kíxin Cristo k'uenyákonhen ijiéni, na mé xíkaha kjuínchexiteyá ch'án tí nkehe ntáchro tí xroon itén Dios ⁴ la ko tsíkjavá sín ch'án la ko tsíxechón ch'án tí níxin yaon exí ntáchro tí xroon itén Dios. ⁵ Ntá k'uíkon ch'ín Pedro tí jehe ch'án, ntá chr'éxín ínaá tí teyó sín k'uék'ajiko ch'án k'uíkon sín tí jehe ch'án. ⁶ A ntá chr'éxín chjina quinientos chojni kíchó ni jnkokoá k'uéjó sín k'uíkon sín ch'án. A ntá jie itsjé tí sín a naxa tjejó sín, a ntá jnkojín sín na ó tsík'en sín. ⁷ Chr'éxín k'uíkon ch'ín Jacobo tí jehe ch'án, la ko k'uíkon kaín tí í so sín apóstol ínaá.

⁸ A ntá kjuixixín janhan k'uíkuan Închéni exí ijnko xjan naxa xetjahya yaon chrókokjíhi. ⁹ Kjánchó janhan kánhyó tjetoan la mé tóyóehya tí í so sín tsíkjeyá Închéni la ko tósuàna chrók'óna ijnko nkexro ch'ehe xra Închéni kíxin janhan mé k'uéninkakonhan tí sín ninkoe Dios. ¹⁰ Kjónté jinahya kjuit'a la kjuasáyé Dios la ko kjuachaxin kuènte ch'án mé kjuitóxínhin tí kjuenkayáxian, na mé chónkóhya kuíkonóana ch'án, kíxin tjetóxin kjuit'a xra la kaín sín la kánhyó. Kjánchó jehya janhan kjuit'a xra. Náhí. Dios kjuínkitsana ch'án

kjuit'a xra. ¹¹ Kjánchó tjetuanhya á janhan ə á jehe sín kjuako sín, kíxin xíkaha tí itan kjuakoni, a ntá kuítekáonrá.

Tsoxechón tí sín tsík'en

¹² A ntá tí tjakoni kíxin Cristo la xechón, ¿ntá nkekuénte ntáchrórá jnkójínrá kíxin tsoxechónhya chojni tsík'en? ¹³ Tí chrókóchaxín tí nkehe ntáchrórá kíxin tsoxechónhya chojni tsík'en, ntá kjaxin chróxechónhya Cristo. ¹⁴ A ntá tí chaxínhya xechón Cristo, ntá chónkó tí nkehe tjakoni la ko ninkehó sínkíhya la ko chónkó tí nkehe kuítekáonrá. ¹⁵ A ntá tí chaxínhya xíkaha tsíkónhen, la jeheni la ijkno chojni ntoáhya chrónka kuénté Dios, kíxin ó chrónkani kíxin Dios kjuínchexchón Cristo. A ntá tí chrókóchaxínhya kíxin chróxechón Cristo, ntá kjaxin chrókóchaxínhya kíxin chróxechón chojni tsík'en ¹⁶ kíxin tí chróxechónhya tí chojni tsík'en, ntá kjaxin Cristo chróxechónhya ch'án. ¹⁷ A ntá tí Cristo chróxechónhya ch'án ntá chrókóchónkó tí kuítekáonrá tí jehe ch'án kíxin naxa chrókjuìnhya tí ijiárá. ¹⁸ La ko tí chrókóchaxín tíha ntá chrók'uitjáyan tí sín kuítekaon Cristo ik'uén sín. ¹⁹ Méxra tí chrókuinkáchónkini Cristo kíxin chrókjuinkitsa ch'án tí jeheni chjasintajni ntihyó, ntá kohya chojni chrókóyóhe tí jeheni, imá chrókónðéni chrók'uejóni kaín ni.

²⁰ Kjánchó náhí, la chaxín ó xechón Cristo. Jehe ch'án éxí tí nkehe tsík'óna sáoxín kíxin jehe ch'án sáoxín xechón ch'án. ²¹ Méxra jnkokoá chojni ntoa kjuankíxin kjuasin jie, ntá kjuankíxin k'uén kaín xín chojni chjasintajni, la ko kjaxin jnkokoá chojni ntoa xechón, ntá xíkaha tsoxechón kaín chojni tsík'en. ²² Kíxin tí jie kjuasin ch'ín Adán ntá kaín xín chojni sít'enxín sín. A ntá Cristo la kaín ni tsochontaxínni kjuachón. ²³ Jnkojnconi éxí tsonhenni tocar, na mé sáoxín xechón Cristo, a ntá chréxín tió tsokjan ch'án ntá tsoxechónni kaín ni kuítekaonni tí jehe ch'án. ²⁴ A ntá ó tsi yaon tsjixixín ntá sinchek'itjáyan Cristo kaín xín nkehe t'etoan la ko kaín xín kjuachaxin ókjé, ntá tsjanjon ch'án tí xra t'etoan kíxin ts'ayéhé It'é ch'án Dios. ²⁵ Na mé t'ichjánxin ts'etoan Cristo tsjixrakájia tí yaon tsjachahya tí sín nínkakonhen ch'án. ²⁶ A ntá tí nkehe tsjixixín ts'itjáyan la mé tí kjuach'en. ²⁷ A ntá Dios kjuanjon kjuachaxin kíxin kaín nkehe siín mé chrók'uëtuenhen Cristo.* Kjánchó tió xíkaha ntáchró tí xroon itén Dios tsíkjin sín ósé kíxin kaín xín nkehe mé ts'etuenhen ch'án, ntá ó noheni jína kíxin jehya kíxin Dios la chrók'uëtuenhen ch'án ínaá. Náhí. Jehe ch'án mé chjéhe Xjeen ch'án kaín kjuachaxin ts'etuenhen ch'án kaín xín nkehe. ²⁸ A ntá tió tsjixin tsjacha Cristo ts'etuenhen ch'án kaín xín nkehe, ntá Cristo, mé tí Xjeen Dios, la kjaxin sinchexiteyéhé ch'án It'é ch'án Dios kíxin ntá Dios mé ts'etuenhen ch'án kaín xín nkehe.

²⁹ A ntá í jnko nkehe, la iso sín tikiteyákonhen tí sín tsík'en. ¿Nkekuénte xíkaha ch'e sín tí titekakonhya sín kíxin tí sín tsík'en tsoxechón sín ínaá?

³⁰ A ntá tí xíkaha, ¿nkekuénte kíxin kaín yaon kjuaxróxinhya tjejóni nínkakonhenni chojni? ³¹ A ntá kíchó ni, kaín yaon siín kjuachrakon chrók'uén janhan. Chaxín tíhi, kjánchó chàna kíxin jahará kjaxinrá tinkachónkirá Ínchéni Jesucristo. ³² Kjónté kónínkakonna chojni chjasin Éfeso éxí iko jiehe la kjónté kjuak'é ntiha, ¿la ntá nkehe chrókjuacha tí janhan tí chrókóchaxínhya chróxechón chojni tsík'en? Tí xíkaha la ó nchoxon tí nkehe ntáchró tí sín titekakonhya Ínchéni kíxin chrókjóne sín la ko chrók'ui sín kíxin ijie la o ntóye chrók'uen sín.

³³ Chrókuitóéhyará chrokjuit'ayahará sín. Éxí ntáchró sín kíxin: "Tí chrók'uejókotoxiñni chojni jínahya ntá chrók'uitjáyan tí nkehe jína tjenkayáxinni." ³⁴ Chrókjanrá ntia jína ntoá la chrókjuásinhyará jie. Méxra isorá naxa chonhyará Dios. Na mé ntáxrjan tíhi kíxin chrókósuhará.

Nkexrí tsoxechón tí sín tsík'en

³⁵ Kjá jnkójínrá tsjanchankinará kíxin: "¿Nkexrí tsoxechón tí sín tsík'en la ko nkexrí tsotsjehe tí cuerpo tsochonta sín?" ³⁶ Lontirá tjanchankinará xíkaha. Tí noatje t'enkaní

* ^{15:27} Salmo 8.6

nonte t'ichjánxín its'en ts'itjáyan kíxin tsjak'echón tí nkehe ts'ayan. ³⁷ Tí nkehe t'enkaní la jehya tí ka a. Náhí. Tí nkehe t'enkaní la noatrigo o í jnko tje. ³⁸ Kjánchó Dios kjuanjón kjuachaxin kíxin jnkojnkó nta ts'óna éxí tjinkaon ch'án, la ko jnkojnkó nta tsochónta tje kuénte. ³⁹ A ntá jehya kaín tí cuerpo la jnkokon. Náhí. Ijnko la cuerpo kuénte chojni, la ko í jnko la cuerpo kuénte ko, la ko í jnko la cuerpo kuénte koxroxé, la ko í jnko la cuerpo kuénte koché. ⁴⁰ Na mé kjaxin xikaha siín cuerpo kuénte tí sín ángel tjejó nkaya nkajní la ko siín cuerpo kuénte chojni tjejó chjasintajni. A ntá tí cuerpo kuénte tí sín ángel la náxrjón tsjehe la ko kjaxin tí cuerpo kuénte tí chojni la náxrjón tsjehe, kjánchó ókjé nkexrí tsjehe. ⁴¹ Ókjé nkexrí t'inkaséyanxín tí yaon la ko ókjé nkexrí t'inkaséyanxín tí nitjó la ko kjaxin konotsé la ókjé nkexrí t'inkaséyanxín la ko kjonté itsjé konotsé la ókjé t'inkaséyanxín jnkojnkó. ⁴² Kjaxin xikaha tsónhen tí chojni tsík'en tsozechón sín. Tí nkehe tsoxrvá la mé ijnko nkehe tsotje, a ntá tí nkehe tsozechón la mé ijnko nkehe ts'itjáyanhya. ⁴³ Tí nkehe tsoxrvá la ijnko nkehe náxrjónhya tíha, la ntá tí nkehe tsozechón la ijnko nkehe imá náxrjón. Tí nkehe tsoxrvá la ijnko nkehe chontahya kjuachaxin, la ntá tí nkehe tsozechón la ijnko nkehe tsochónta kjuachaxin. ⁴⁴ Tí nkehe tsoxrvá la mé cuerpo kuénte chojni chjasintajni ó. La ntá tí nkehe tsozechón la mé cuerpo antsí tsochónta kjuachaxin kuénte Nchakuen Dios. A ntá tí chontani cuerpo kuénte chojni chjasintajni ó na mé kjaxin tsochontani cuerpo antsí tsochónta kjuachaxin kuénte Nchakuen Dios.

⁴⁵ A ntá éxí ntáchro tí xroon itén Dios kíxin: "Tí chojni ntoa k'óna saoxín mé ch'ín Adán tíha mé k'uáyéhé ch'án kjuachón ó."[†] A ntá tí ó kjuixixín ikui í jnko ch'ín éxí yóhé Adán, kjánchó jehe ch'án mé chonta ch'án nchakuen tjanjon kjuachón. ⁴⁶ Kjánchó jehya saoxín k'óna tí cuerpo antsí chonta kjuachaxin kuénte Nchakuen Dios. Náhí. Saoxín k'óna cuerpo kuénte chojni chjasintajni ó, la ntá chr'éxín k'óna cuerpo antsí chonta kjuachaxin kuénte Nchakuen Dios. ⁴⁷ Tí nkexro k'óna saoxín la k'óna nche na mé kjuák'e ch'án chjasintajni ó. A ntá tí nkexro k'óna yóxin na mé nkaya nkajní kuixín ch'án. ⁴⁸ Tí cuerpo siín chjasintajni mé yóhé tí cuerpo k'uéchonta tí nkexro tsík'óna nche. A ntá tí cuerpo siín nkaya nkajní mé yóhé tí cuerpo chonta tí nkexro kuixín nkaya nkajní. ⁴⁹ Éxí senó tóyohéni tí nkexro k'óna nche, ntá xikaha chr'éxín tsoyohéni tí nkexro kuixín nkaya nkajní.

⁵⁰ Ntá tsotjonkará nkehe, kichó ni. Tí cuerpo k'óna nto la ko hueso chontani jie xitjahya sátsjikoni tí tjen Dios t'etoan ch'án. Na mé tí nkehe tsjeje xitjahya ts'áyéhé tí nkehe tsjejehya. ⁵¹ A ntá tsotjonkará ijnko nkehe ninkexró noehya, kíxin kénhyani its'enni. Kjánchó kaín ni ts'ixitóxihin tí cuerpo chontani. ⁵² A ntá xrinahya titayá tjejóni ntá éxí chróchr'áton konni la ko chrókuakitjenkini konni xikaha tió tsjixixín tsinhinni tsontáchro trompeta, la ntá kaín chojni tsík'en tsozechón, í ts'enhya sín, la ko kjaxin jeheni kaín ni ts'ixitóxihin tí cuerpo chontani. ⁵³ A ntá tí cuerpo chontani la tsjeje, ntá t'ichjánxín ts'inkaya nkehe chónhya ts'en. ⁵⁴ A ntá tió tí cuerpo chontani la tsjeje, na mé t'ichjánxín ts'inkaya tí nkehe chónhya tsjeje, la ko tió tí cuerpo chontani la ts'en, na mé t'ichjánxín ts'inkaya tí nkehe chónhya ts'en. Ntá tí xikaha na ntá tsoxitayá éxí nixja tí xroon itén Dios ntáchro kíxin: "Tsjachahya tí kjuach'én la mé tsjacha tí kjuachón."[‡] ⁵⁵ "Jaha kjuach'én, ¿kjá tí kjuachaxin kuénta kíxin chrókuacha jaha? Jaha kjuach'én, ¿kjá tí kjuachaxin kuénta kíxin chrók'oyánni?"[§] ⁵⁶ Tí jie tjasinni mé kuixín tí ts'enni. A ntá tí ley k'uetoan ósé antsí k'uixixín jie. ⁵⁷ A ntá tjancheheni Dios kjuasáya kíxin ichr'án ch'án Inchéni Jesucristo kíxin táha mé tsaáxinni.

⁵⁸ A ntá jahará kichó ni, imá tjuahará. Chrókuetoéhyará tinkachónkirá Inchéni. Jnkochríxín chrókjuich'ehérá Inchéni xra antsí jína kíxin ó nohará jahará kíxin tí xra ch'eheni Inchéni jehya chónkó tíha.

[†] 15:45 Génesis 2.7 [‡] 15:54 Isaías 25.8 [§] 15:55 Oseas 13.14

16

Tí ofrenda tjenájín sín tsochr'éhen sín tí sín tjejó chjasin Jerusalén

¹ A ntá tí chichaon tjénájínrá kíxin tsjínkitsará tí sín kíchó ni tinkáchónki Ínchéni na mé chrókjuich'erá éxí kuétuanhan tí sín ninko estado Galacia. ² Jnkojniko domingo jnkojnikorá chrókuakitsjentehérá nkerí síká chichaon kjuachará tí semana kjuich'erá xrà kíxin t'ichjánxinhya chrókjuasánjia janhan ntá chrókjuénájínrá chichaon. ³ A ntá tió tsjasán janhan tsétuanhán tí sín tsjéyárá kíxin sátsji sín chjasin Jerusalén, na ntá tsokjian xroon tsjikoxín sín tí chichaon tsíkjénájínrá tsjikaán tí sín kíchó ni ntiha. ⁴ A ntá tí chrókójina kjaxin janhan sáchrókjuiyá, a ntá sáchrókjuíkian tí jehe sín kjaxin.

Tjenkayáxin ch'ín Pablo nkexrí sátsji ch'án

⁵ Tí sátsjia la t'ichjánxín ts'atsinka janhan estado Macedonia ntá chr'éxín tsjasán ntiha chjasin Corinto. ⁶ Ách'e ntahó chrókuitona chrók'uatsínkajia nchakuen kin. A ntá jahará chrókjuíntsará tí janhan tió sátsjia ókjé chr'éxín. ⁷ Méxra tjínkakonhya chrók'uatsíndoá chrótsjahará ó. Náhí. Tjínkaván chrókuitona iso yaon tí tjejorá ntiha tí Ínchéni chrókjuanjon kjuachaxin. ⁸ Kjánchó tsitoná chjasin Éfeso tsjixrakájia yaon Pentecostés, ⁹ kíxin ntihi qantsí chonta kjuachaxin chrókjuít'a xrà kuente Ínchéni la ko jína chrókónhen tí xrà kjónté nchónhya chojni nínkakonna.

¹⁰ A ntá tí tsjiji ch'ín Timoteo ntiha la qantsí jína chrónixjehérá ch'án kíxin kjuaxróxin chrók'uejokoará ch'án kíxin jehe ch'án kjaxin ch'ehe Ínchéni xrà éxí janhan. ¹¹ Kaín tí jahará chróchontehérá ch'án kjuasáya. Tjínkitsará ch'án kíxin jína itsi ch'án ntihi tsitsjehe ch'án tí janhan kíxin tjéchonhan chrókui ch'án la ko tí í so sín kíchó ni.

¹² A ntá tí kíchó ni Apolos la imá xrjanóah ch'án kíxin kjaxin chrókjujiko ch'án tí í so kíchó ni, kjánchó tjinkakonhya ch'án jie. Chr'éxín tsjiji ch'án tió ts'íranka.

Kjuixixín nixja ch'ín Pablo

¹³ Chrókjuenkayáxinrá la ko chrók'uejotsjehérá. Chróchrakonhyará la ko chrókuitóéhyará tí tinkachónkirá Ínchéni. ¹⁴ Kaín nkehe chrókjuich'erá la koí chrótjuéhérá kíchuárá.

¹⁵ Na ntá kíchó ni, ó nohará kíxin tí sín kjéhya ch'ín Estéfanas sáoxín kuinkáchónki sín tí tan tsaáxin chojni tí estado Acaya, la ko jehe sín kuákja sín xrà a tjinkitsa sín tí sín kíchó ni tinkáchónki Ínchéni. ¹⁶ Tjínkaván kíxin chrókjuinchexiteyéhérá tí sín tjinkitsa éxí tí jehe sín la ko kaín tí sín ch'e xra. ¹⁷ Chàna kíxin ó kui ch'ín Estéfanas la ko ch'ín Fortunato la ko ch'ín Acaico, kíxin jahará kjónté tjejohyará. ¹⁸ A ntá jehe sín kjuínchechéhé sín əsenná éxí kjuínchecháhará sín. Chróchontehérá kjuasáyé chojni xíkaha.

¹⁹ Tí sín tójkotsé estado Asia xraxinkaon sín tí jahará. Kjaxin ch'ín Aquila la ko tjan Priscila la ko tí sín tójkotsé ntøe sín ima xraxinkaon sín tí jahará kíxin tinkachónkirá Ínchéni. ²⁰ Kaín tí sín kíchó ni ntihi xraxinkaon sín tí jahará. Nixjehérá kíchuárá kaín rá tsehérá tja kíchuárá jnkojína.

²¹ Janhan Pablo xráxinkaván tí jahará ikjian xroon chr'anhná la tjaná kjinxian tí letra i.

²² Tí nkexro tjuéhya Ínchéni Jesucristo la tsjasóte. A ntá jeheni, la Ínchéni xrákiá.

²³ A ntá kjuasáyé Ínchéni Jesucristo mé sintayaonrá ch'án. ²⁴ Tjuahará kaín rá kíxin kaín ni tinkáchónkini Cristo Jesús. Amén. Ó tjen.

Tí xroon yóxin ikjin ch'ín Pablo chr'énen ch'án tí ninko chjasin Corinto

¹ Janhan Pablo mé kjueyána Dios kíxin sít'ahq Ínchéni Jesucristo xra, la ko kíchó ni Timoteo ikjinni tí xroon i chr'áñhanráni tí jahará níñkoe Dios chjasin Corinto la ko kaín tí í so kíchó ni tinkáchónki Ínchéni tjejorá nkuíxín estado Acaya. ² Kjuasáyé It'eni Dios la ko Ínchéni Jesucristo chrókjuintayaonrá ch'án la ko chrótjáhará ch'án kjuaxróxin.

Tí kjuasóte ch'ín Pablo

³ Tjancheheni kjuasáyé Dios It'é Ínchéni Jesucristo. Jehe It'eni mé tikonóeheni ch'án la ko xráxín nchechéheni ch'án. ⁴ Jehe ch'án mé nchechéhé ch'án kaín tí jeheni tió tsí ijnko kjuaxróxinhya kíxin ntá tsjachani sinchechéheni í so chojni kjuaxróxinhya ts'atsínska sín éxi yóhē jehe ch'án kjuínchechéhé ch'án tí jeheni. ⁵ Mé xíkaha tjejótjasóteni éxi yóhē kjuasóte Cristo ntá kjaxin jehe ch'án imá sinchechéheni ch'án kíxin tinkáchónkini ch'án. ⁶ Tjejótjasóteni kíxin tí jahará chrókóchàxínrá la ko chrókuaáxinrá. A ntá Dios nchechéhé tí jeheni kíxin kjaxin jahará chrókócháhará kíxin ntá chrókjuachará kjónté chrókjuasóterá éxi tjasóteni jeheni. ⁷ Na mé ó noheni kíxin chaxín ntoá tinkachónkirá Ínchéni kíxin ó noheni kíxin jnkokón tjejótjasóteni kaín ni ntá kjaxin jnkokón sinchechéhé Dios tí jeheni kaín ni.

⁸ Kíchóni, tjinkaonni kíxin chrókónohará kíxin nkexrí imá kjuasóteni tí k'uéjóni tí estado Asia. Imá náxrjónhya kjuasóteni la chrókjuachahyani, la k'uitjáyenhenni tí tjenkayáxinni kíxin chrók'uaxrjexínni ntiha naxa chrók'uejóchónni. ⁹ Ó kónoheni kíxin chrók'uenxínni ntiha. Mé xíkaha kónhenni kíxin chrókónoexínni kíxin tí jehóni la chrókjuachahyani tíha. Náhí. Chrókuinkáchónkini Dios, mé tí nkexro nchexeción chojni tsík'en. ¹⁰ Jehe Dios mé kjuínchekaáni ch'án la ko naxa sinchekaáni ch'án kíxin tí nchónhya nkehe chrók'uenxínni. Méxra ó noheni kíxin chaxín jehe ch'án sinchekaáni ch'án ¹¹ tí tjinkitsaráni tjanchehérá Dios kíxin tsjinkitsani ch'án. A ntá tí tsjé chojni chrókjuanchehe Dios kíxin tsjinkitsani ch'án ntá chr'éxin itsjé chojni tsjanchehe sín ch'án kjuasáyé kíxin xíkaha jehe ch'án kjuinkitsani ch'án.

Nkekuénte sákjuíhyá ch'ín Pablo tí chjasin Corinto

¹² Chéheni kíxin noheni kíxin ntoá k'uéjóni ntiha chjasintajni kjuich'iyehyani chojni, mé xíkaha k'uéjókoaráni. Ntá jehya kjuachaxin kuénteni kjuachaxínni xíkaha. Náhí. Kjuachaxin kuénte Dios mé kjuinkitsani kíxin xíkaha k'uéjóni. ¹³ Tió chr'áñhanráni xroon, kjinhyani nkehe chrókiénxinhayará. Náhí. Jehó tí nkehe chrókjuinchekuáxinrá chrókiénxinxínrá. Tjéchonhán kíxin chrókiénxinxínrá jína. ¹⁴ A ntá ó tinkakiénxinxínrá ntsí kíxin tió tsokjan Ínchéni Jesús tsocháhará kíxin xíkaha kjuakoharáni jeheni la ko kjaxin tsochéheni kíxin jahará kuítekáonrá.

¹⁵ Mé xíkaha kjuenkayáxian kíxin saoxín chrókjuasántsjahará tí jahará kíxin chrókócháhará kíxin yáya chrókjuasántsjahará. ¹⁶ Kjuenkayáxian janhan chrókjuasántsjahará saoxín tió sáchrókjuia estado Macedonia la ko chrókjuasántsjahará ínaá tió chrókjánxiān ntiha. Mé xíkaha chrókjuinkitsarána tió sáchrókjuiyá janhan estado Judea. ¹⁷ ¿Á tjenkayáxinxínrá kíxin ntoáhya kjuenkayáxian chrókjuasán ntiha ní? ¿Á tjenkayáxinxínrá kíxin iyó nkehe kjuenkayáxian kíxin jnkokoá chróntáxrjan kíxin chrókjuasán la ko chrókjuasánhyá? ¹⁸ Méxra tjetsjehe Dios kíxin xíkahya kjuátēheni tí jahará kíxin chrókjuijini la ko chrókjuijihyani. ¹⁹ Kíxin Cristo Jesús mé Xjeen Dios, na mé tí nkexro kjuakoxín ch'ín Silvano la ko ch'ín Timoteo la ko kjuakoxiān janhan tí k'uéjóni ntiha, mé xíkahya k'uéchronka ch'án, kjuich'iayahya ch'án ninkehó. Náhí. Kaín nkehe tjakoni kuénte

Cristo la chaxín tíha. ²⁰ Kíxin kaín nkehe tsíchronka Dios la mé jehe Cristo kjuínchexiteyá ch'án. Mé xíkaha tió tjancheheni Dios kjuasáya la mé ntáchroni “Amén, ó nchoxon” kíxin tí kjuachaxin kuènte Cristo Jesús. ²¹ A ntá Dios mé kjuink̄tsa ch'án tí jeheni la ko tí jahará kíxin kaín ni ntoá chrókuinkáchónkini Cristo la ko jehe ch'án mé kjueyáni ch'án. ²² Kjaxin jehe ch'án tsíkjinchekani ch'án xroye, na mé kjuanjon ch'án Nchakuen ch'án tsochóntha asénni senó kíxin tsongoexínni kíxin chaxín ts'áyéheni nkehe chr'éxín.

²³ A ntá tí naxa kjuasánya janhan chjasánrá Corinto éxí kjuenkayáxian la tjetsjehe Dios kíxin tjínk̄akonhya kíxin chrókóxakonhanrá tí chrókjuéntuahará tí jahará ínaá. ²⁴ Jehya kíxin chrókuétuanhánrá kíxin nkexrí chrókuinkachónkirá Ìnchéni kíxin ó nòna kíxin ntoá tinkachónkirá ch'án. Ó jehí tjinkaonni chrókjuinkitsaráni kíxin antsí má chrókócháhará.

2

¹ Mé xíkaha kjuenkayáxian kíxin chrókjuasánya janhan ntiha ínaá tí naxa xrásinrá kjuaníkaon. ² A ntá tí naxa chrókjuintak'ávárá, ¿a ntá nkexro chrókjuinchéchàna ínaá tí chrókjuinchéchànahyará jahará kíxin janhan kjuintak'ávárá? ³ Mé xíkaha ikjian tí xroon chr'anhanrá senó kíxin tjínk̄akonhya chrókjuasán chrókjuinchekóxakonnará ínaá. Náhí. Jähará chrókjuinchéchànará. Méxra ó nòna kíxin tí chrókóchàna janhan ntá chrókócháhará kaín rá. ⁴ Kjánchó tió ikjian tí xroon a chr'anhanrá senó la imá kóxakonhen asenná tsjanka kjaxin. Kjánchó jehya kíxin ikjian tí xroon a chr'anhanrá kíxin chrókjuintak'ávárá. Náhí. Ikjian tí xroon chr'anhanrá kíxin chrókónoaxínrá kíxin imá tjuahará tí jahará.

Ch'ín Pablo chrókjuinchek'itjáyehen ch'án tí jie kjuasin tí nkexro a

⁵ A ntá tí nkexro kjuínchexakonna la jehya janhvàn kóxakonna. Náhí. Kaínrá kóxakonhanrá. Kjánchó tjínk̄akonhya tjetóxin tsontáxrjan tíha. ⁶ Na mé itsjé tí jahará nixjehérá ch'án kóyakoterá ch'án kíxin chrókjuasinya ch'án jie xíkaha la tähó la ó tjen. ⁷ Ntá jie chrók'uitjáyanhanrá tí jie kjuasin ch'án, chrókjuinkitsará ch'án, kíxin tí náhí la ts'itjáyanxín ch'án tí kjuancheníhi. ⁸ Méxra xrjanóahará kíxin chrókjuákoxínrá ínaá kíxin chaxín tjuéhérá ch'án. ⁹ Mé xíkaha senó ikjian xroon chr'anhanrá kuènte tí kjuaníkaon chontará kíxin tsnonaxian á chrókjuinchexiteyànará kaín nkehe chrókuétuanhánrá. ¹⁰ A ntá tí sinchek'itjáyehen ch'án ijk̄o chojni ichrén jie kjuasin ch'án ntá janhan kjaxian sintak'itjáyanhan ch'án tí jie kjuasin ch'án. Méxra tí chaxín k'ué ichrén jie chrókjuintak'itjáyanhan ijk̄o chojni la ó kjuixin kjuintak'itjáyanhan ch'án tí jie a kíxin chrók'uejorá jnk̄ojína. Kjaxin xíkaha tjetsjehe Cristo, ¹¹ kíxin ntá tí ch'ín Tsochren na tsjachahya ch'án tsjachroe ch'án tí jeheni, kíxin ó noheni nkexrí ch'ia tí ch'ín Jínahya.

Kóxakonhen ch'ín Pablo tí kjuák'e ch'án chjasin Troas

¹² A ntá tió kjuasán tí chjasin Troas chrókjuàkua tí tan jína kuènte Cristo la antsí xránjon kjuachaxin kíxin chrókónen xrà kuènte Ìnchéni. ¹³ Kjánchó náxrjónhya tjen asenná kíxin k'uitjahya tí kichó ni Tito. Ntá tuénxín níxjahá tí jehe sín tjejó ntiha ntá sákjuia tí estado Macedonia.

Ntá ó tsjacha sín tsochóntha sín kjuachaxin kuènte Cristo

¹⁴ Kjuasáyé Dios kíxin xráxín jehe ch'án tjink̄tsani ch'án ntá tjachani kíxin chóntani tí kjuachaxin kuènte Cristo Jesús. Ntá kaín nketí sáchrókjuini mé tjakoxinni tí tan kuènte ch'án éxi ijk̄o nkehe xraxé náxrjón chrókóxrjinh̄in kaín xín chojni. ¹⁵ Kaínni la éxi yóhe tí xraxé náxrjón kuènte chjinc̄o chrókjuanjon Cristo chrók'uayéhe Dios kíxin tíha mé chrókónoexín tí sín tsaá la ko kjaxin chrókónoexín tí sín ts'itjáyan. ¹⁶ Tí sín ts'itjáyan mé tókaxraxéhe sín éxi ts'enxín sín tí xraxé a. A ntá tí sín tsaá mé tóxrjinh̄in sín kíxin ijk̄o nkehe tsjanjon kjuachón tíha. ¿Xá nkexro chrókjuacha chrókjuich'e tíha? ¹⁷ A ntá jeheni mé xrinchekjihyani nkexrí nixja itén Dios éxi ch'e nchónhya chojni chrókjuacha

sín chichaon. Náhí. Kaín əsénni tjakoni itén Dios kíxin kjueyáni ch'án sich'heni Cristo xra, la ko tjetsjehe ch'án tí xra tjejóch'eni.

3

Tí pacto nixin

¹ A ntá xikaha ntáchroni, ¿á tjenkayáxinrá kíxin kjuankíxinni tsochronkani ínaá kíxin jína tí jeheni, o á t'ichjánxín kíxin chrókjuijkoní xroon kíxin tsønoaxínrá kíxin jína tjakoni? ¿Xá t'ichjánxín kíxin chrókjuchaharáni ijnko xroon tsochrónka kíxin jína tjakoni? ¿Xá t'ichjánxín kíxin chrókjuchaharáni ijnko xroon tsochrónka kíxin jína tí jeheni éxi ch'e í so sín? ² Náhí. T'ichjánxíenhyani nijnko xroon kíxin jahará mé éxi yóhé ijnko xroon tsíkjinni xrikoni chróchóxin la ko chrókjuchekuáxin kaín xín chojni tsønoexín sín kíxin jeheni mé ch'heni Cristo xra. ³ T'ikon sín noxín kíxin tí jahará mé éxi yóhé ijnko xroon tsíkjin Inchéni Cristo xrikoni ncukeuáxin chojni. Kjánchó jehya ntahni tsíkjinxín ch'án. Náhí. Kjuanjon ch'án Nchakuen ch'án tjechón chontará la kjaxin jehya xrotabla tsíkjin ch'án. Náhí. Táha la əsén chojni.

⁴ Ntá ó noheni chaxín tíhi kíxin tinkáchónkini Dios kíxin tjinkitsani Cristo. ⁵ Jehya kíxin ó jehí chróchóntani kjuachaxin kíxin chrókjuijcheni xra. Náhí. Kaín tí xra ch'eni na Dios tjetjanjon kjuachaxin. ⁶ Jehe ch'án mé kjuanjon ch'án kjuachaxin kíxin chrókjuijcheni ch'án xra tsochenkani chojni tí tan nixin kui. Tíha jehya ijnko nkehe tsíkjin chojni chrókjuchexiteyéheni. Náhí. Tíha mé kjuachaxin kjuanjon Nchakuen Dios kíxin sinchexiteyéheni ch'án. Kíxin tí ley ntáchro kíxin its'en chojni. Kjánchó tí Nchakuen Dios la mé tjanjon kjuachón.

⁷ Tí ley tsík'óna letra xrotabla mé imá kuikao t'inkaséyan la mé kjuachahya tí sín israelita chrókomá sín ikon ch'ín Moisés kíxin imá tjákini tsjehe ikon ch'án.* Kjánchó tí t'inkaséyan kjuankíxin ó tinkák'anka. Méxra tí xikaha tí ley tjanjon kjuach'én mé kuikao ijnko t'inkaséyan imá náxrjón. ⁸ ¿á chrókjehya kíxin əntsí má t'inkaséyan kuikao tí tan nixin kui kíxin kjuachaxin Nchakuen Dios? ⁹ Méxra xikaha tí ley k'uéchonta kjuachaxin jié kjónté ntáchro kíxin its'en chojni, a ntá əntsí má jína tí tan chrónka Dios kíxin tsotjuáxin tí jie chóntani. ¹⁰ Méxra tí kjuachaxin k'uéchonta tí ley k'uék'etqan ósé la ninkehó tóyóehya tí kjuachaxin jié tjen jie. ¹¹ A ntá tí k'uéchonta kjuachaxin tí nkehe séhyó ntá tinkákje, a ntá əntsí má chóntha kjuachaxin tí nkehe tsjak'e jnkochrixín.

¹² Mé xikaha tí nkehe tsjejehya tjejóchónhenni ntá chrakonhyani chronkaxínni kaín tíha. ¹³ Ch'ehyani éxi kjuich'e ch'ín Moisés k'uikjèxin ch'án ka ikon ch'án kíxin tsønoehya tí sín israelita kíxin ó tinkákjeje tí t'inkaséyan chóntha ch'án. ¹⁴ Kjánchó jehe sín naxa kienxínya sín la ko naxa xikaha tjejó sín ijie tió ncukeuáxin sín tí nkehe k'uítuenhen sín ósé kíxin tí ka naxa t'inkákonhen tí chrókienxín sín kíxin naxa kjuinhya tí ka. A ntá tí chrókuinkáchónki sín Cristo la ntá jehe ch'án chrókjuijcheni tí ka a. ¹⁵ A ntá kjónté jie tió ncukeuáxin sín tí xroon tsíkjin ch'ín Moisés la tjejó sín éxi naxa t'inkákonhen tí ka a kíxin tienxínya sín. ¹⁶ A ntá tió ijnko chojni tsjankíxin tsinkáchónki Inchéni ntá tí ka t'inkákonhen la tsjlin. ¹⁷ A ntá Inchéni mé Nchakuen Dios tíha. A ntá tí tjen Nchakuen kuénte Inchéni Dios la ntihá kohya nkehe ts'inkákonhen. ¹⁸ A ntá jeheni kaín ni kohya nkehe t'inkákonhen ikonni la mé tjejóni éxi xrosentä tjákini tí kjuachaxin kuénte Inchéni, na mé tinkák'ixitóxín tí kjuaxrexinkaon kuénténi kíxin əntsí chrókoyóhenni éxi tí jehe ch'án kíxin əntsí tsochóntani tí kjuachaxin kuénte ch'án, kíxin Inchéni, na tí Nchakuen a, mé xikaha ch'e xra.

* **3:7** Éxodo 34.29-35

4

¹ Méxra xikaha chrókóxrjéhyani chrókjuich'eni tí xrä kjuanjon Dios kixin jehe ch'án kuikonóeheni ch'án. ² Ó kuítóheni kaín nkehe imó la ko kaín nkehe chrókósùèxinni, la ko ch'iyehyani kíchó ni, la ko tjitoxiénhyani itén Dios. Náhí. Jehí tí nkehe ntoá chrónkani. ³ A ntá xikaha chrókónoexín kaín xín chojni kixin ntoá tjejóni éxi tjinkaon Dios. ⁴ A ntá jeheni mé tjakoni tí itan tsaáxinni, kjánchó iso sín kjónté xikaha tinhin sín mé tienxínhyá sín kixin xráxín jehe sín la ts'itjáyan sín. ⁵ A ntá jehe sín kuítekakonhyá sín, a ntá tí dios kuénte chjasintajni mé kjuínchek'íkonhyá sín kixin chrókienxínhyá sín, kixin ntá chrók'uikonhyá sín tí t'inkaséyan kuénte tí tan kuénte Cristo, mé tí nkexro chóntha kjuachaxin, a ntá jehe ch'án la mé yóhé éxi tsjehe Dios. ⁶ Tió tjakoni na mé jehya tjakoni kixin jeheni chrókuitekáonrá. Náhí. Chronkaxínni kixin chrókuitekáonrá Jesucristo mé Inchéni la ko chrónkani kixin jeheni mé t'aharáni xra tsjinkitsani tí jahará kixin tjuahará Jesús. ⁷ Na mé jehe Dios k'uetoan kixin tí xrohi ts'inkaséyanxín tí sítié a na mé kjaxin jehe ch'án kjuanjon ch'án xrohi ts'inkaséyanxín nkaya asénni kixin chrókjuachani chrókónoheni nkexrí tjen tí kjuachaxin jié kuénte Dios t'inkaséyanxín Inchéni Jesucristo.

Nkexrí chrók'uejóni kixin tinkáchónkini Inchéni

⁸ A ntá tí cuerpo kuénteni la yóhé ijnko chí tsík'óna nchetje tjinká nkehe tjete, mé xikaha ts'ikon sín kixin tí kjuachaxin jié chóntani la kuixin tí tjen Dios kixin jehya kuénteni tíha. ⁹ Chóntani nchónhyá kjuaxikaon la kjónté tsjachahya tí kjuaxikaon a. Imá tóxakonhenni la kjónté titóehyani tinkáchónkini ch'án. ¹⁰ Kjónté chónkíhi sín tí jeheni kjánchó Dios la kuítóehya ch'án tí jeheni. Kjónté k'uékonni kjuítsínkani kjánchó kjuínchek'itjáyanhyani sín. ¹¹ Kjónté nketí sájtini xráxín chrók'uenxínni éxi k'uénxin Inchéni Jesús, kixin xikaha tjaqoxínni tí kjuachón chóntha ch'án. ¹² Méxra jeheni naxa tjejochónni la xráxín siín kjuaxikaon kixin chrók'uenxínni kixin tinkáchónkini Jesús kixin kjaxin xikaha chrókjuakoxínni tí kjuachón chóntha ch'án kjónté chrók'uen tí cuerpo chóntani. ¹³ Kjónté xikaha chrók'uenxínni, a ntá jahará tsochontará kjuachón.

¹⁴ Éxi ntáchro tí xroon itén Dios tsíkjin sín ósé kixin: "Kuítekan ntá xikaha xrjanka."* A ntá kjaxin jeheni kuítekaonni ntá xikaha chrónkani. ¹⁵ A ntá ó noheni kixin Dios mé tí nkexro kjuínchexechón tí Inchéni Jesús kjaxin sinchexechón ch'án tí jeheni koíni. A ntá jehe ch'án tsjiko ch'án tí jeheni la ko tí jahará kjaxinrá tí tjen Dios. ¹⁶ Kaín tíha kónhen kixin jahará jína chrók'uejoxinrá. La ko kjaxin xikaha nchónhyará chrók'uayéhérá tí kjuasáyé Dios, ntá qantsí tsjé chojni ts'ejóni tsjancheheni Dios kjuasáyé kixin tí kjuachaxin jié chóntha ch'án.

¹⁷ Méxra chrókóxrjéhyani kjónté tinkákjeje tí cuerpo chóntani kixin ó noheni kixin jnkojnjko yaon Inchéni mé tjenchek'ánki ch'án tí kjuaxrexinkaon kuénteni. ¹⁸ A ntá tí nkehe tjasótexínni tí tjejóni ntihi jie mé tíha la tjoka ts'atsínska la ts'áyèxinni ijnko nkehe imá jie la ko í tsjejehya tíha. ¹⁹ Ntá chrókomáhyani tí nkehe siín chjasintajni ntihyó. Náhí. Chrókjueyáni tí nkehe naxa t'íkonhyéni kixin tí nkehe t'íkonxínni ikonni na mé nkehe chóxin tsjeje. A ntá tí nkehe t'íkonhyani mé nkehe tsjejehya.

5

²⁰ A ntá ó noheni kixin tió tsjeje tí cuerpo chóntani na mé yóhé éxi ijnko nchia tjoka tsjeje, a ntá Dios mé kjuich'eña jnkojnjko nchia nixin ts'itjáyanhyá jnkochríxín nkaya nkajní kixin jehya tja chojni kjuich'énaxín tíha. ²¹ Tí naxa chóntani cuerpoéni ntihi la náxrjónhyá tjejóni tjinkaonni tí ókjé cuerpo tsochóntani nkaya nkajní ²² kixin táha ts'inkáyani éxi ijnko ka, ntá xitjahya chrókótjochínni. ²³ Tí naxa tjejochónxinni tí cuerpo chóntani jie la náxrjónhyá tjejóni tjasóteni. Tjinkakonhyani xikahó chrókuitjóekoni tí cuerpoéni ntaxin, na mé tjinkaonni kixin tí cuerpoéni ntaxin chrókónixin ó. Ntá chrók'uitjáyan tí

* 4:13 Salmo 116.10

chrók'uenxínni la ntá chrókuakjani tí kjuachón nixin. ⁵ Dios mé kjuenkayáxin ch'án kíxin xíkaha sinchekitonhenni ch'án ntá kjuínchekitonhenni ch'án tí Nchákuén ch'án kíxin ntá chrókónoexínni kíxin chaxín ts'ayéheni tí nkehe tsjanjon ch'án.

⁶ Mé xíkaha xráxín ó noheni kíxin tí naxa tjejóni ntihi naxa chóntani cuerpoéni ntá naxa tjejókohyani Inchéni. ⁷ A ntá jeheni tjejóni tinkáchónkini ch'án kjónté t'ikohyani ch'án. ⁸ Kjánchó jeheni na imá chéheni tjinkaonni chrókuítóheni tí cuerpoéni chóntani jie kíxin sáchrókjuini tí tjen Inchéni, chrók'uejókoni ch'án ntiha. ⁹ Méxra xíkaha tjinkaonni chrókjuinchechéheni Inchéni kjónté naxa chróchóntani cuerpoéni ntihi la o í chróchóntahyani, la naxa chrókuinkáchónkini ch'án. ¹⁰ Kíxin kaín ni t'ichjánxín tsochjineheni Cristo tí tjen ch'án t'etóan ch'án kíxin nkehe ts'ayéheni jnkojnconi kíxin nkerí xra kjuich'eni á jína o náhí tí naxa k'uéchóntani cuerpoéni ntihi chjasintajni.

Tí tan tjanjon kjuaxróxin

¹¹ Méxra xíkaha noheni chróchrakonhenni tí kjuachaxin jié kuente Inchéni ntá tóxakonhenni tjákohéni chojni kíxin chrókuinkáchónkini sín ch'án. Ó nohe Dios kíxin nkexrí tjejóni la ko tjinkaonni kíxin kjaxinrá chrókónohará. ¹² Jehya kíxin chrótjónkará ínaá kíxin jína ch'eni xra. Náhí. Jehí ntáchroni kíxin síl nkehe chrókóchaxinrá kíxin tí jeheni ntoá chrónkani kíxin chrókónohará nkexrí chrókjuáteherá tí sín imá nccheinke sín kíxin imá náxrjón nixja sín a ntá xraxinkakonhya sín tí jié chóna əsén sín. ¹³ A ntá tí lóconi na mé tíha kíxin tjinkaonni chrókjuch'eheni Dios xra. A ntá tí jehya lóco tí jeheni la mé jehí tjinkaonni chrókjuinkitsani tí jahará. ¹⁴ Kíxin Cristo la imá tjuéhe kaín xín chojni ntá t'etuenhenni ch'án kíxin ó noheni jína kíxin jehó ch'án k'uenyákonhenni ch'án tí ijjéni kaín ni kíxin exí kjaxinni ik'uénni kaín ni kíxin jehe ch'án k'uenyákonhenni ch'án. ¹⁵ Mé xíkaha Cristo mé k'uenyákonhen ch'án kaín ni. Na ntá jeheni tjejochónni mé tjejochónxinni ch'án la jehya tí kjuaxrexinkaon kuénteni chrókjuincheleyéheni. Náhí. Chrókjuínchexiteyéheni ch'án kíxin k'uenyákonhenni ch'án la ko xechón ch'án ínaá kíxin tsaáxinni ch'án. ¹⁶ A ntá jie jeheni tjenkayáxinyani exí tjenkayáxin chojni chjasintajni ó. Kjánchó senó k'uéchóxinni Cristo kíxin nkexrí kjuák'e ch'án chjasintajni ó, a ntá jie la xíkahya t'ikonní ch'án. ¹⁷ Méxra tí nkexro tinkáchónkini Cristo mé k'óna ijnko chojni nixin. A ntá kaín nkehe ntaxis la ó kjuixin k'uátsínska la ntá jie la kaín nkehe ó k'óna nixin.

¹⁸ Kaín tíha mé tí xra kjuich'e Dios. Jehe ch'án mé kjuanjon ch'án kjuaxróxin kíxin jína chrók'uejókoni ch'án kíxin k'uenyákonhenni Cristo. Ntá jie jeheni k'uáyéheni tí xra tsochénkani í so chojni kíxin kjuaxróxin chrók'uejóko sín ch'án. ¹⁹ A ntá ó noheni kíxin Dios ichr'án Cristo k'uenyákonhenni ch'án, ntá xíkaha Dios tjinkaon kíxin kjuaxróxin chrók'uejóko ch'án tí sín chjasintajni, la ko jehe ch'án tahya ch'án kuentá kaín tí jié chóna chojni, a ntá jeheni k'uáyéheni tí xra tsjakoni itén ch'án. ²⁰ Ntá jeheni kjuachaxin kuénte Cristo chronkaxínni kíxin Dios chrónóaxinrá ch'án tí jeheni. Mé xíkaha tí kjuachaxin kuénte Cristo chrónóaxinráni kíxin kjuaxróxin chrók'uejokoará Dios. ²¹ A ntá Cristo la ninkehó jié kjuasinhya ch'án, ntá ijjéni k'uénxin ch'án. Kjánchó Dios k'uíkon kíxin exí tí jehe Cristo chóna ch'án jie, kjuenkayákonhen ch'án kaín tí jié k'uéchóntani.

6

¹ Ntá kaín ni jnkokoá ch'eheni Dios xra, ntá chrónóaharáni kíxin chrókuítóéhyará tí kjuasayé Dios kjuakuaxinrá ch'án. ² Kíxin ntáchro xroon itén Dios kíxin: A ntá tí yaon kóxrjínhin Dios kuínhin ch'án tí nkehe chronóa chojni; Tí yaon tsaáxin chojni mé kjuínkitsa ch'án tí jehe sín.*

A ntá jie ó kui tí yaon kjueyá Dios. A ntá jie ó kui tí yaon tsaáxin chojni.

³ Ch'ehyani ninkehó nkehe jínahya kíxin ntá chrók'uántaxínhin sín tí xra tjejoch'eni. ⁴ Náhí. Kaín nkehe ch'eni tjakoxínni kíxin ch'eheni Dios xra. Na mé

* ^{6:2} Isaías 49.8

tjachani tónínkakonhyani kjónté nchónhya nkehe tjasótexínni, la kjónté ichrén nkehe t'ichjánxinhinni, la kjónté ichrén kjuaxikaon siín. ⁵ Na mé k'uékonni, la k'uéjochjinani, la nchónhya k'uíxite chojni kóninkakonhenni sín, la ko tí xrä kjuich'eni la imá xrä. Kjaxin k'uájuahyani la ko kjónehyani. ⁶ Tjakoxinni kíxin tjóá tjenkayáxinni, la ko tjakoxinni kíxin ó noheni tí nkehe chaxín, la ko tjakoxinni kíxin tónínkakonhyani, la ko tjakoxinni kíxin ch'eni tí jína. La ko chóntani Nchakuen Dios, la ko kaín asénni tjuéheni kichó ni, ⁷ la ko chrónkani tí tan ntoá kuènte Dios, la ko tjakoxinni kíxin chóntani tí kjuachaxin kuènte ch'án. Ntoá tjejóni ntá xikaha tsjachani ntá kohya nkehe tsónhenni. ⁸ Iso sín náxrjón nixjehé sín tí jeheni la ko iso sín náxrjónhya nixjehé sín, la ko iso sín jína nixja sín nkexrí tjejóni la ko iso sín t'ántaxínhinni sín. Iso sín t'íkon sín tí jeheni éxí chojni ch'ia la ko iso sín ntáchro sín kíxin jeheni chojni ntoá chrónka. ⁹ Iso sín ntáchro sín kíxin chónhya sín tí jeheni kjónté chóxinni sín. Iso sín tjinkaon chrók'oyánni sín la kjónté naxa tjejóchónni. Kjuateni sín na kjónté k'óyanhyani sín. ¹⁰ T'aváni la kjónté xraxinkaonni kíxin Ìnchéni t'ayakonhenni la chéheni. Éxí nòani jeheni na kjónté chénkani itsjé chojni tí itén Dios tsaáxin sín éxí chróchjéheni sín ijkno nkehe imá tjete xikaha. Éxí chóntahyani ninkehó nkehe la kjónté la kaín nkehe chóntani.

¹¹ Kichóni tjejorá chjasin Corinto, ntoá chrónkani nixjaharáni la ninkehó t'ayahyaráni la mé kaín asénni tjuahará. ¹² Jehya jeheni chrók'uitjáyan kíxin chrótjuahará. Náhí. Jahórá t'itjáyan kíxin chrótjuéhérá tí jeheni. ¹³ Janhan xrjanóahará éxí ijkno it'é xjan chrónóhe tí xjeen ch'án kíxin kjaxinrá kaín asánrá chrótjuéhérá tí jeheni éxí tjuéheni tí jahará.

Jeheni mé éxí ninkoe Dios tjechón

¹⁴ Chrók'uitohyará tí sín tinkáchónkiha Ìnchéni kíxin tíha mé éxí yóhe ijkno yunta, jnkokónhya koxinta. ¿La ko nkexrí chrókóyóhe ijkno chojni ó kótjóá la ko ijkno chojni naxa náhí? ¿La ko nkexrí chrókóyóhe tí t'inkáséyan la ko tí sítié? ¹⁵ Xitjahya chrók'uixin kjuaxróxin tí tjen Cristo la ko tí Tsochren. Xitjahya ts'ejóko kichó ijkno chojni tinkáchónki Cristo la ko ijkno chojni tinkáchónkiha. ¹⁶ Xitjahya chrók'uito tí ninkoe Dios la ko tí nkehe tsíkjanoya. Kíxin jeheni mé tí ninkoe Dios tjechón, kíxin jehe ch'án tsíntáchro ch'án kíxin:

Ntaha tsjak'é la ko xrítjak'é tí tjejó tí jehe sín,
a ntá janhan mé ts'óna Dios kuènte sín
la ko jehe sín mé ts'óna chjasin kuéntana.[†]

¹⁷ Méxrä xikaha kjaxin ntáchro Ìnchéni kíxin:
T'axrjekjanxínrá tí jehe sín na ókjé tjejorá;
tsehyará tí nkehe tjuáhya.

A ntá janhan mé ts'ayáha tí jahará.[‡]

¹⁸ Ntá janhan mé ts'óna It'árá,
a ntá jahará ts'ónará xjanña ntoa la ko xjanña chjin,
ichro Ìnchéni Dios chónta kaín kjuachaxin.[§]

7

¹ Mé xixaha kichó ni, tí nkehe i mé tsíntáchro Dios tsjanjon ch'án. Méxrä t'ichjánxín kíxin tjóá chrók'uejóni, chrókuítoheni kaín nkehe chrókjuinchekjita tí cuérpoéni la ko tí asénni. Ntá chrókóxakonhenni chróchrakonhenni Dios la t'ichjánxín chrókjuancheheni ch'án chrókjuinchetjóáni ch'án kíxin jehó ch'án chrókuinkáchónkini.

Tí sín Corinto kjuítioxinhin sín ntie sín

² Chrókjuánjonrá kjuachaxin kaín asánrá chrókuinhínrá tí nkehe chróchronkani. Ninkehó jie chóntehyani ninkexró, la ko kjuich'iyehyani ninkexró. ³ Jehya ntáchroni tíhi

[†] 6:16 Levítico 26.12, Ezequiel 37.27 [‡] 6:17 Isaías 52.11 [§] 6:18 Oseas 1.10

kixin chrókuékará jie. Náhí. Ó nohará kixin ósé chrónkani kixin kaín əsénni tjuèheni tí jahará kixin jnkokoá chrók'uejóni la ko jnkokoá chrók'uenni.⁴ Janhan la imá tjíkosáyahará tí jahará la ko imá chàna kixin jína tjejorá. Kjónté kaín nkexrí tjejótjasóteni na imá chàna.

⁵ A ntá tió kjuíjini estado Macedonia la xitjahya chrók'ok'éheni kixin nkuíxín siín chojni nínkakonhenni la ko kóxakonhen əsénni.⁶ Kjánchó Dios na mé tí nkexro nchechéhe əsén kaín tí sín tsíkóxrjé mé kjuínchechéhe ch'án əsénni kixin ó kjuíji ch'ín Tito.⁷ Ntá jehya kixin tí kjuíji ch'án ó chrókóchexinni. Náhí. Chéheni kixin jahará kjuínchechéhérá ch'án. Chrónka ch'án kixin imá tjinkáonrá chrók'uíkonrá tí janhan la ko chrónka ch'án kixin tóxakonhanrá kixin tí jie kjuásinrá la ko kjaxin tóxakonhanrá chrókjuich'erá tí nkehe kuétuanhanrá. Mé kuiñhan kaín tíha ntá əntsí má kóchàna.

⁸ Kjuíntak'ávárá kixin tí xroon kjian chr'anhánrá la kjónté la ntá jie í tóxakonnaya. Na mé senó kóxakonna ntá k'uíkuān kixin tí xroon kjuíntaxakonhanrá kjánchó kánhyó isé tíha.⁹ Ntá jie chàna, kjánchó jehya kixin tí nkehe kjuíntak'ávárá. Náhí. Chàna kixin tí kjuat'ává a ntá ikjanrá kuinkachónkirá Dios. Kjuachará kjónté tí kjuat'ává ntá kjanrá kuinkachónkirá Dios la kóxrjínhin ch'án. Méxra xikaha jeheni la ninkehó nkehe jinahya kjuít'aharáni.¹⁰ A ntá tí kjuat'ává kjuacha chojni ntá sinchechéhe sín Dios kixin kjuítóxínhin sín tí nkehe tjenkayáxin sín la ntá xikaha mé tsaáxin sín ntá í ts'áváhya sín chr'éxín. A ntá tí sín kuitóehya tí nkehe kuénte chjasintajni mé t'ává sín kixin táchó ts'enxín sín.¹¹ A ntá jahará kjuachará k'uátsíkará tí kjuat'ává exí kóxrjínhin Dios, a ntá jie kónohará kixin jína tjejorá, la ó ntoá tjenkayáxinrá, ntá jie chrónkaxínrá nkexrí k'uékjich'erá. Tí nkehe kuinhínrá ntá kjuinchekónikaonrá la ko kjaxin kjuínchechrakonrá. Ntá chr'éxín ntá tjinkáonrá chrók'uíkonrá tí janhan. Ntá kjuinchekjasóterá tí nkexro kjuasin jie. Kaín tíha kjuákoxinrá kixin chontahyará ninkehó jie tí nkehe tsíkónhen.¹² A ntá tí nkehe kjian la jehya kixin kjuenkayáxian janhan kuénte tí ch'ín kjuasin jie, la ko jehya kixin kjuenkayáxian janhan kuénte tí ch'ín k'uává ó. Náhí. Ichá jína kixin jahará chrókjuákoxinrá nkayakon Dios kixin imá tóxakonhanrá kixin jeheni xikaha k'uetoanni.¹³ Mé xikaha kjuich'erá ntá kóchéheni.

Kjánchó əntsí má kóchéheni kixin k'uíkonni kixin kóchéhe ch'ín Tito kixin jahará kaín rá kjuínkitsará kixin kjuaxróxin kjuák'e ch'án ntiha.¹⁴ Janhan k'uétjanka tí ch'ín Tito kixin chàna kixin tí jahará la jehya kjuach'ia tíha la kósuànahya. Náhí. Kaín nkehe k'uétjonkárá la chaxín la ko kjaxin kaín nkehe k'uéntátjan ch'ín Tito la chaxín kixin chéheni kixin kuítekáonrá.¹⁵ A ntá jie əntsí tjuahará ch'án kixin xráxinkaon ch'án kixin nkexrí jína kuítekáonrá la ko nkexrí imá kjuíkosáyehérá ch'án kjuánjonrá kjuachaxin kuítóhe ch'án ntiha.¹⁶ Ntá imá chàna kixin ó nòna kixin jahará sinchexiteyànará.

8

Antsí má chrókjuínkitsa sín kichó sín

¹ Ntá jie kichó ni, tjinkaonni chrókónohará kixin nkexrí tí sín tinkáchónki Închéni tójkotsé sín estado Macedonia kjuákoxin sín nkexrí tí kjuasáyé Dios.² Kjónté nchónhya nkehe tsíkónhen sín la kjónté la kóchéhe sín; la ko kjónté nòa sín la əntsí má kjuínkitsa sín tí sín í so exí chojni chónta itsjé chichaon xikaha kjuich'e sín.³ Chaxín k'uíkuān kixin kjuanjon sín exí tí nkehe chónta sín la ko əntsí má xikajan sín ínaá kixin xikaha kjuenkayáxin sín.⁴ Nchónhya chrónóehé sín tí jeheni kixin chrókjuanjonni kjuachaxin kixin chrókjuinkitsa sín tí sín kichó ni tinkáchónki Dios.⁵ Na mé əntsí má kjuanjon sín la xikaha kjuenkayáxinni kixin xikaha chrókjuanjon sín, na mé senó kuinkáchónki sín Închéni, ntá kjuixin ntá kjuínchexiteyéhe sín tí jeheni exí tóxrjínhin Dios.⁶ Méxra chrónóehéni tí ch'ín Tito kixin chrókjuenájín ch'án chichaon tí tójkotsérá ntiha exí kjuankixin ch'án senó.⁷ A ntá jahará la tjákoxinrá jína kixin əntsí tinkachónkirá Închéni, la ko əntsí k'uitjará chrónkaxínrá itén Dios, la ko əntsí k'uitjará nkehe kuénte Dios,

la ko ąntsí chontará kjuachéhe, la ko ąntsí tjuèhérá tí jeheni. Méxra xíkaha ąntsí chrókjuákoxinrá tí xra jína chrókjuínktsará tí sín kichó ni.

⁸ Jehya ntáxrjan tíhi kíxin chrókuétuñhanrá xíkaha. Náhí. Jehí tjínk̄avan chrókónohará nkexri jína kjuích'e tí so sín kíxin kjaxinrá chrókjuákoxinrá kíxin tjuèhérá kíchuárá. ⁹ Kíxin ó nohará nkexrí tí kjuasáyé Ínchéni Jesucristo kíxin k'uéríko ch'án la ntá kónòa ch'án kíxin imá tjuèhe ch'án tí jahará kíxin tí kónóaxin ch'án mé jahará kóríkoxinrá.

¹⁰ Méxra tsotjonkará tí nkehe tjenkayáxian janhan kuénte tí xra i kíxin jahará tí nánó k'uátsíka kjuankíxirá kjuínktsará kjuánjonrá nkehe, la mé jehya kíxin ó jehí kjuínktsará sín. Náhí. Kjaxin imá kócháhará kíxin kjuínktsará sín. ¹¹ A ntá jie chrókjuintaxín chrókjuánjonrá éxi tí chrókjuachará chrókjuánjonrá éxi xrankíxixín tsíkjateherá tsjínktsará tsjánjonrá nkehe. ¹² Mé xíkaha tí chaxín tjinkaon jnkojín chojni chrókjuanjon sín nkehe, ntá tsoxrjínhin Dios tí tjanjon sín tí nkehe chóntha sín. Dios la tjanchahya ch'án tí nkehe chóntahya chojni.

¹³ Jehya kíxin xíkaha tí í so sín chrók'uejó sín jína kíxin tí nkehe kjuínktsará sín la ntá jahará chrók'uitjáyan nkehe t'ichjánxínhanrá. Náhí. ¹⁴ Chrókójína chrókoyóhe chróchontará nkehe jnkokón. A ntá jie jahará chontará tí nkehe chóntahya tí í so sín. A ntá í jnko yaon jehe sín tsochóntha sín tí nkehe tsochontahyará. Chrókjuínktsará tí sín chóntahya kíxin chróchontará nkehe jnkokón. ¹⁵ Éxi ntáchro xroon itén Dios kíxin: "Tí sín kjuenájín sín nchónhya la mé xéhya sín ninkehó, la ko tí sín kjuenájín sín tsjéhya na mé kjónté tsjéhya la kjuacha tí nkehe kuicháxinhin kjuenájín sín."*

Ch'ín Tito la ko tí sín k'uájiko ch'án

¹⁶ A ntá kjuasáyé Dios kíxin kjuínchexraxinkaon ch'án tí ch'ín Tito ntá kóxakonhen ch'án éxi tóxakonna kíxin tí jahará. ¹⁷ Ntá kóxrjínhin ch'án tí nkehe k'uëtuënhenni ch'án, la ntá kjaxin jehe ch'án kóxakonhen ch'án kíxin á jína tjejorá, ntá jehe ch'án tjinkaon ch'án chrókjuijitsjehe ch'án tí jahará.

¹⁸ Kjaxin k'uëtoanni sátsjikotoxin tí ch'ín Tito í jnko kichó ni, na mé kaín chjasin tí sín tinkáchónki Ínchéni mé chóxin sín ch'án kíxin tí xra jína tjech'e ch'án tjako ch'án tí tan tsaáxinni. ¹⁹ La ko kjaxin tí sín kaín tí ninko ntihi kjueyá sín tí nkexro kichó ni kíxin sátsjikotoxin ch'án tí jeheni tí xra sátsjikoni tí chichaon tsjikéhenni tí sín nòa. Na mé tí xra ch'eni kíxin xíkaha tsjikosáyeheni Ínchéni la ko xíkaha tjakoxtinni kíxin tjinkaonni chrókjunktsani sín. ²⁰ Tjinkaonni kíxin tsokohya nkexro chrók'uántaxínhinni kíxin tí chichaon xrenájín kjuíjikoni. ²¹ Méxra tjinkaonni chrókjuich'ení tí nkehe ntoá, jehya jehó tí nkehe chrókoxrjínhin Ínchéni. Náhí. Kjaxin tjinkaonni kíxin chrók'uikon chojni kíxin jína tjejoch'eni.

²² La ko kjaxin k'uëtuënhenni sín sátsjikotoxin sín í jnko kichó ni, na mé ijnko nkexro nchónhya nkexrí kjuákoxin ch'án kíxin chéhé ch'án chrókjuínktsa ch'án kíxin itsjé xra kjuích'e ch'án. A ntá jie ąntsí má chrókjuich'e ch'án xra kíxin chóxin ch'án tí jahará. ²³ A ntá jnkojín sín tsjanchankí sín kíxin nkehe tí xra ch'e ch'ín Tito la mé chenkará sín kíxin jehe ch'án mé tjinktsa ch'án tí janhan kíxin xíkaha tjinktsa ch'án tí jahará. A ntá tí tsjanchankí sín kíxin nkehe tí xra ch'e tí í so kichó ni ntá chenkará sín kíxin tí sín kaín ninko k'uëtoan sín kíxin sátsji sín ntiha kíxin mé xíkaha tsjikosáyehi sín Cristo. ²⁴ Méxra chrókjuákoxinrá kíxin chaxín tjuèhérá kíchuárá kíxin tsongohe tí sín kichó ni í so ninko la ko kjaxin tsongohe sín kíxin chaxín chéheni kíxin tí jahará.

9

Tí chichaon xrenájín tsjinktsa tí sín kichó ni

* ^{8:15} Éxodo 16.18

¹ A ntá tí xrenájín chichaon kíxin tsjínkitsará tí sín kíchó ni tinkáchónki Inchéni, la t'ichjánxienhya tsokjian xroon tsochr'anhánrá ² kíxin xráxín kónòna kíxin jahará tjinkáonrá chrókuínkitsará, na mé xíkaha chàna la tjanca tí sín tjejó estado Macedonia kíxin jahará chojni estado Acaya desde tí nánó k'uátsinka xráxín tjejorá tjinkáonrá chrókuínkitsará. A ntá antsí tsjé sín estado Macedonia tjincaon sín chrókuínkitsa sín kíxin jahará xíkaha kjuákoxinrá nkexrí tjinkáonrá chrókuínkitsará. ³ A ntá ichr'an tí sín kíchó ni kíxin tjinkaván kíxin tsontáchrohya sín kíxin chaxínhyá tí nkehe jína ntátjan sín senó. Mé xíkaha jahará chrókóyaxínhanrá chrókuínkitsará tí sín kíchó ni éxi ntátjan sín senó. ⁴ Kíxin tí chrókuasánkian iso tí sín Macedonia ntá tí chrókónoxín kíxin náxa kohya nkehe tsjánjonrá ntá chrókósuehéní tí jeheni kíxin imá choxinni kíchó ni la ko kjá chrókósuhárá kjaxinrá. ⁵ Méxra xíkaha tóna kíxin t'ichjánxín tsontátjan tí sín kíchó ni kíxin sátsji sín tsitónxin sín ntja tsjijitsjehe sín tí jahará senó tsjinkitsa sín kíxin tsjenajínrá tí chichaon tsintáchorrá senó kíxin chrókuánjonrá. A ntá chrókóyaxínhanrá kíxin chrókuánjonrá tí chichaon éxi ijnko nkehe chaxín tjinkáonrá chrókuánjonrá la jehya éxi ijnko nkehe chrókuanchaharáni afuerza.

⁶ Xráxinkáonrá kíxin tí nkexro k'uénka tsjéhya na mé tsjéhya tsotjá. A ntá tí nkexro k'uénka itsjé mé tsotjá itsjé. ⁷ Méxra jnkojnko chojni chrókuanjon tí nkehe kjuenkayáxixín sín asén sín. Na mé tjinakonhya Dios kíxin kénhyá asénni chróchjéheni ch'án nkehe, kíxin Dios mé tjuéhe ch'án tí nkexro chéhé tjanjon nkehe. ⁸ A ntá Dios chónata kaín kjuachaxin jié ntá tsotjáhará ch'án kaín nkehe t'ichjánxínhanrá kíxin tsochontará nkehe tsochjehérá í so chojni chontahya kíxin xíkaha sich'erá kaín xra jína. ⁹ Éxi ntáchro tí xroon itén Dios kíxin:

Tí nkexro t'óxikayehe ch'án itsjé nkehe nchekitonhen ch'án tí sín nòa na mé nunca tsjejehya tí xra jína ch'e ch'án.*

¹⁰ Dios mé tjanjon noatje kíxin ts'inka la ko jehe ch'án mé tjanjon nkehe sineni, la ntá kjaxin tsotjáhará ch'án kaín nkehe t'ichjánxínhanrá la ko jehe ch'án sinchek'ánkí ch'án tí nkehe ts'ènkárá la ko jehe ch'án sinchek'ánkí ch'án tí xra jína tjejoch'erá. ¹¹ A ntá tsochontará kaín nkehe tjeté kíxin ntá antsí tsjachará tsjínkitsará tí í so sín kíchó ni. A ntá xíkaha tsjijikenhenni sín tí nkehe tsochjehérá tí sín kíchó ni ntá tsjanchehe sín Dios kjuasáya. ¹² Kíxin xíkaha chrókuínkitsará tí sín kíchó ni na jehya kíxin chrók'uáyéhe sín tí nkehe t'ichjánxínhanrá sín ó, la mé kjaxin chróchjéhe sín Dios kjuasáya. ¹³ Mé xíkaha tsjanchehe sín Dios kjuasáya kíxin tí nkehe kjuánjonrá kjuákoxinrá kíxin nchexiteyéhérá tí tan kuénte Cristo. Kjaxin tsjikosáyehe sín Dios kíxin tí í so nkehe kjuánjonrá k'uáyéhe sín la ko tí nkehe k'uáyéhe í so chojni. ¹⁴ La ko jehe sín tsjanchehe sín Dios kíxin tsjinkitsa ch'án tí jahará kíxin jehe sín tjuahará sín kíxin t'ikon sín kíxin tjákoxinrá kíxin tí kjuasáyé Dios chontará. ¹⁵ Tjancheheni Dios kjuasáya kíxin kjuínchekítónhenni ch'án ijnko nkehe imá jié tsaáxinni la tsjachahyani tsochronkaxínni kaín tíha.

10

Kjuachaxin chónata ch'ín Pablo kíxin tsík'óna ch'án apóstol

¹ Janhan Pablo tió xrjanóahará nkehe la jnkojína xrjanóahará la mé tjakoxian éxi toxrjínhan Cristo. Ntáchrará kíxin tió tjen tí tjejorá ntiha la tósuàna, a ntá tí kjín tjen la imá jiéna, ichrorá. ² Méxra xrjanóahará kíxin tí tsjasántsjahará tjinkáonhya kíxin chrókuínchekónkáonráni kíxin ntá tsónínkáonhánrá jnkojínrá kíxin tsékaráni jié kíxin ixria éxi chojni chjasintajni ó, tsixrorá. A ntá xra ó tsjasán tsjentuáhá tí jehe sín. ³ Chaxín tjejóni éxi chojni ó, na kjánchó tió tjanjónni la tjanjónhyani éxi tjanjón chojni chjasintajni. ⁴ Kíxin tí nkehe xraáni tjanjónxinni jehya nkehe kuénte chjasintajni. Náhí. Táha la kjuachaxin kuénte Dios la tíha mé tsjacha sinchek'itjáyan kaín kjuachaxin kuénte tí Jínahya. ⁵ Na mé tsjachani sinchek'itjáyanne tí nkehe ntoáhya tjenkayáxin

* **9:9** Salmo 112.9

chojni la ko kaín nkehe nccheinkekexín sín t'inkákonhen kíxin chrókóchóxin chojni Dios. A ntá kjuachaxin kuénte Cristo tjakoheni kaín chojni kíxin ntá tsítohe sín kaín nkehe ntoáhya tjenkayáxin sín, a ntá chrókuitekakonhen sín tí jehe ch'án ⁶ la ko tjejóchónhenni sinchekjasóteni kaín tí sín ntiha náxa tjinkakonhyá sín chrókjuinchexiteyá sín tí tsjixin tsónoheni kíxin á chaxín tsjachará sínchexiteyára jína.

⁷ A ntá jahará tékaráni jie kíxin tí nkehe t'ikonrá ó. A ntá tí nkexro tjenkayáxin kíxin chaxín ch'ehe Cristo xrä la mé kjaxin chrókjuátsoan kíxin kjaxinni jeheni la ch'eheni Cristo xrä. ⁸ A ntá tí chrókjuintahnkena ntsí kíxin tí kjuachaxin chonta janhan ntá chrókósúànahya kíxin Ìnchéni kjuanjon tí kjuachaxin kíxin chrókjuinkitsa tí jahará kíxin antsí chrók'uitjará kuénte Dios, la mé jehya kíxin chrókjuintak'itjáyanrá. ⁹ Tjinkakonhyá kíxin chrókjuintachrakonxínrá tí xroon chr'anhnárá. ¹⁰ Kíxin ntáchro sín kíxin ixrä la ko jiehe tí nkehe ikjian janhan, a ntá tí chrókjuak'é ntiha la jienahya la ko kánhyó chonta janhan kjuachaxin tí nixja janhan. ¹¹ Kjanchó tí nkexro xikaha ntáchro chrókonohe ch'án kíxin jnkokón nixja janhan éxi nixja tí xroon tsíkjian kjónté ikjín tjèn la ko kjónté tí chrók'uejóni ntiha.

¹² Tjinkakonhyani chrókjuenkayáxinni kíxin chrókoyóhení tí í so sín ntáchro sín kíxin jína tí jehe sín. Jehe sín mé lontí sín kíxin ncheyóhé sín asén sín í so chojni. ¹³ A ntá jeheni la chrókjuinchehnkexínyani ijkno xrä jehya xrä kuénteni. Dios mé kjuako nkéti sich'eni xrä la kjuanjon ch'án kjuachaxin kíxin kjuíjini kjuich'eni xrä tí tjejorá chjasin Corinto. ¹⁴ Jehya kíxin chróchóntahyani kjuachaxin chrók'uetuñhanrná. Tí chaxín jehya jeheni saoxín kjuíjini tí tjejorá ntá xikaha chróchóntahyani kjuachaxin. Ntá náhí, kíxin jeheni saoxín kjuíjini ntiha kjuakoharáni itan kuénte Cristo. ¹⁵ Chrókjuinchehnkexínyani ijkno xrä kjuich'e ókjé chojni éxi xrä chrókjuich'eni jeheni. Náhí. Tjinkaonni kíxin antsí chrók'uitjará tsinkachónkirá Ìnchéni ntá xikaha la antsí chrókjuinkitsani tí jahará kíxin jehó tí xrä k'uayéhení tjejoch'eni. ¹⁶ Kjaxin tjinkaonni chrókjuakoni tí itén Ìnchéni chrókuaáxin chojni í so chjasin sáchrókjuini la ko kjaxin chrókjuinchehnkexínyani tí xrä chrókjuich'e ókjé chojni.

¹⁷ A ntá jnkojín sín tjinkaon sín chrókjuinchehnke sín ntá jehó chróntáchro sín kíxin kjuachaxin Ìnchéni mé chóntha sín.* ¹⁸ Kíxin tóxrjéñhya Dios ijkno nkexro jehó chróntáchro kíxin jína ch'án. Náhí. Ìnchéni mé tsontáchro ch'án nkexro chaxín jína.

11

Ch'in Pablo la ko tí sín chaxínya apóstol

¹ Tjinkaván chrókuinhínrá ntsí tí lontina. ¿Á chrókjuachará chrókuinhínrá nkehe tsontáxrjan? ² Janhan tjinkakonhyá kíxin í jnko nkexro chrókuinkachónkirá. Kjaxin xikaha tjinkakonhyá Dios. Ó ikjuá Cristo kíxin chrókuakja ch'án tí jahará. Tjinkaván chrókjuánjuan tí jahará chrókuakja tí jehe ch'án éxi yóhé ijkno tjan tjarisoá chrókótéhe jnkokoá xii. ³ Tóxakonna kíxin éxi tí konche tí kjuach'ia xriko ntá kjuich'iyehé tjan Eva, ntá xikaha kjaxinrá jahará tsítóhérá sit'ayahará ókjé chojni ntá tsítóhérá tí nkexrí kaín asánrá tinkachónkirá Cristo. ⁴ A ntá jahará cháhará tjánjonrá kjuachaxin tji ókjé chojni ntiha chronkaxín sín í jnko Jesús ókjé jehya éxi tí chronkaxínni jeheni, la ko kjaxin cháhará k'uayéhérá ókjé nchákuén jehya tí Nchákuén Dios k'uayéhérá sao, la ko cháhará chrókuítekáonrá ijkno nkehe ókjé chrókuaáxinrá jehya éxi tí nkehe kuítekáonrá senó. ⁵ Ó nóna kíxin chaxínya ninkehó sínkíhyana janhan, a ntá antsí sínkí tí sín chréhérá jahará, ichrorá. ⁶ Kjónté kánhyó náxrjón níxja janhan la jehya kíxin kánhyó chrókónóna chrókjuàkua. A ntá tjákoáxinrá jahará tíhi kíxin kaín nkehe t'a.

* **10:17** Jeremías 9.24

⁷ ¿Á ntoáhya kjuít'a janhan xrjankaxián tí tan tsaáxinni kíxín ninkehó kjúancháhya chrókjuacha la ko éxí ijnko chojni nòé kjuak'é janhan kíxín tjínkaván chrókjuíñktsará chrók'uitjará? ⁸ Tí sín í so njinko kjuíñktsana sín kjuanjon sín chichaon k'uayáhá kíxín tsjak'é tsjákokhárá jahará. ⁹ Tí kjuak'é tí tjejorá jahará la kjónté t'itjáyan nkehe la ninkexró kjúancháhya nkehe. Jehó tí sín kíchó ni kjuixín estado Macedonia kjuikao sín tí nkehe t'ichjánxínna. Méxrä tjínkakonhyá kíxín chrótjahará xrä tí jahará la ko xikaha naxa tjét'a jie. ¹⁰ Xikaha chaxín choxian tí tan chaxín ntoá kuènte Cristo, a ntá kohya ninkexró nkuíxín estado Acaya tsjacha tsakitsjena tí kjuachéhé chonta. ¹¹ ¿Nkekuènte xikaha ntáxrjan? ¿Á xikaha ntáxrjan kíxín tjuahyará tí jahará ní? Náhí. Dios la ó nohe kíxín imá tjuahará.

¹² Kjánchó ó jehí tsjintaxín xikaha sit'a kíxín tjínkakonhyá tsjánjuan kjuachaxin kíxín nccheinkejín tí sín ixri ntáchro kíxín jnkokón kjuachaxin chónta tí nkehe tjákua la ko tí nkehe tjako sín. ¹³ Kjánchó jehe sín ijnko apóstol chaxínya mé ch'ia sín ncheyóhó sín éxí chojni kjueyá Cristo. ¹⁴ Jehya ijnko kjuachrakon tíha kíxín kjaxin ch'ín Tsochren kjaxin xikaha ncheyóhé ch'án éxí ijnko ángel kuènte tí t'inkaséyan. ¹⁵ Méxrä xikaha kjaxin kuènen tí sín ch'ehe tí Jínahya xrä mé ncheyóhé sín tí sín jína. Ntá tsjixixín mé tsjasótexín sín tí xrä jínahya kjuich'e sín.

Kjuasóte ch'ín Pablo kíxín apóstol tí jehe ch'án

¹⁶ Ntáxrjan ínaá kíxín nijnkorá chrókjuenkayáxinrá kíxín lócona. Kjánchó tí xikaha tjenkayáxinrá la títóhérá tsonixja janhan éxí lócona kíxín kjaxinna jína chrókjuíñtahnke ntsí. ¹⁷ Tí xikaha ntahnkexián la jehya kjuachaxin kuènte Ínchéni ntáxrjanxián tíha. Náhí. Jehí éxí ijnko chojni lóco nixja. ¹⁸ A ntá nciónhyá chojni siín nccheinkejín sín tí nkehe nohe sín a ntá jie la kjaxin janhan sintahnke. ¹⁹ Kíxín jahará ntáchrórá kíxín imá nohará ntá cháhará tjejó tí sín lóco. ²⁰ Kíxín tjánjonrá kjuachaxin t'etuñhanrá sín la nchexiteyéhérá sín la ko takitsjahará sín tí nkehe chontará la ko ch'éna asén sín éxí inché sín tí jahará, la ntá kjonihyará sín la ko tjate sín nkaya ikonrá. ²¹ Kjónté chrókósuna tsontáxrjan kíxín jeheni la kánhyó jiehe k'uëtuanhanráni.

Kjánchó tí nkehe nccheinkejín sín la janhan ntahnkexián kjaxinna, kjónté ntáxrjan tíhi éxí ijnko chojni lóco. ²² ¿Á chojni hebreo jehe sín? Kjaxin janhan. ¿Á chojni israelita jehe sín? Kjaxin janhan. ¿Á k'uaxrjeníxín sín ch'ín Abraham? Kjaxin janhan k'uaxrjeníxian ch'án. ²³ Ch'ehe sín Cristo xrä kjánchó janhan la antsí má la jehe sín la kénhyó, kjónté ntáxrjan tíhi éxí ijnko chojni lóco. Janhan la antsí má kjuít'a xrä a ntá jehe sín la kénhyó, la ko antsí má kjuak'échjina ntöechiso a ntá jehe sín la kénhyó, la ko antsí má kjuatena chojni a ntá jehe sín la kénhyó, la ko nciónhyá veces k'uixin kjuaxikaon kíxín chrók'uén. ²⁴ In'ó veces tí sín judío kjuatena sín la ko treinta y nueve tí kjuatjoté. ²⁵ Níya kjuatexínna sín inta la ko í jnko vez kjuak'e sín xrö. Níya k'uániánkí ntabárcö ntä ntá ijnko yaon la ko ijnko tie tjénkaván ntayaon. ²⁶ K'uájia má, k'uíkuán kjuaxikaon chrók'uénxian tí ntarió la ko chrók'óyánnna tí xíchee la ko chrók'óyánnna tí sín chjasenná la ko tí sín tsikjixín ókjé. K'uíkuán kjuaxikaon tí chjasin jié la ko tí nteje la ko tí ntayaon la ko chrók'óyánnna tí sín chaxínya tinkáchónki Ínchéni. ²⁷ Kóxrjéna kíxín tí xrä kjuít'a la ko itsjé nkehe náxrjónhyá kònna. Itsjé tie kjuak'échrinhyá jína la ko itsjé yaon ik'uén kjinta la ko ik'uén ntä la ko itsjé yaon kjónéhya ninkehó la ko kókinna la ko chontahya kaná.

²⁸ Kjónté kaín tíha la ko í so nkehe kònna la mé jnkojnko yaon imá tóxakonna kíxín kaín tí sín tójnkotsé sín kaín tí njinko. ²⁹ ¿Á tjen jnkójnrá níhará? A ntá tí xikaha la koína éxí nína. ¿Á tjen jnkójnrá kjuásinrá jie? A ntá tí xikaha la kjaxin tóxakonna. ³⁰ Tí chrókjuíñtahnkeján nkehe la mé tjínkaván kíxín jehó chrókjuákoxián kíxín kánhyó jiéna. ³¹ Dios, Ité Ínchéni Jesucristo, na mé tí nkexro chróxraxinkaonni jnkochríxín mé ó nohe ch'án kíxín chaxín tí nkehe ntáxrjan. ³² Ntá tí kjuak'é chjasin Damasco la mé tí ch'ín

gobernador kjuich'ehe ch'ín rey Aretas xra mé k'uētuēnhen ch'án tí sín soldado kíxin tsochónhen sín tí ntója tí chjasin kíxin chrótséna sín chrókjuak'échjina. ³³ Kjánchó siín nkexro k'uinkajinxinna ijnko ntaxra ijnko ventana tí tjat'q k'uantatjen chjasin la mé xikaha kuaána, tséhyana sín.*

12

Tí nkehe k'uíkon ch'ín Pablo

¹ Ninkehó tsjachahya tí nkehe tsōxrjanka kuéntana ó. Íchá jína tsōxrjanka tí nkehe k'uikuān la ko tí nkehe kjuínchenóna Ínchéni. ² Choxian ijnko nkexro tinkáchónki Cristo. A ntá k'uátsínska catorce nánó sátsíkjí ch'án tí níxín nkajní. Nonahya á sátsíkjiko ch'án cuerpo kuénte ch'án q'asén ch'án ó. Jehó Dios mé nohe. ³ Méxra ó nóna kíxin xikaha sátsíkjí ch'án la ntá nonahya á koí cuerpo kuénte ch'án q'asén ch'án ó. Jehó Dios mé nohe. ⁴ A ntá sátsíkjí ch'án nkajní. La ntá tí palabra kuínhin ch'án la kohya kjuachaxin nijnko chojni tsochronka. ⁵ Jína chrókjuintahnkexián kíxin xikaha kónhen tí nkexro a. A ntá tí chrókjuintahnkexián kíxin kjuachaxin kuéntana la jehya jína tíha. Íchá jína chrókjuácoxian kíxin janhván la chontahya kjuachaxin. ⁶ Tí chrókjuintahnkexián tí nkehe kònna la chrókólócohyana kíxin chaxín tí nkehe chróxrjanka. Kjánchó xikahya t'a kíxin tjínkakonhya kíxin xikaha chrókjuenkayáxin chojni kíxin qantsí jína janhan. Náhí. Tjínkaván kíxin tí xra t'ikon sín la ko tí nkehe tinhin sín mé chrókjuenkayáxixín sín kíxin á jína tí janhan, tsixro sín.

⁷ Méxra chrókjuintahnkexinhyana ntá xikaha xránjon kjuachaxin kíxin chrók'uayáha ijnko kjuatjoté éxí ijnko ch'i kuikjiáte cuerpo kuéntana mé ijnko nkehe tsík'etuēnhen ch'ín Tsochren ikui kjuínchekjoténa. ⁸ Iní veces xrjanóqha Ínchéni kíxin chrókjuatsen ch'án tí kjuatjoté chonta. ⁹ Kjánchó ntáchro Ínchéni kíxin jehó tí kjuachaxién ch'án chrókjuachaxián janhan. Kíxin tí kjuachaxién ch'án qantsí tsjakqexín chojni fuértehyá. Méxra ntá chàna kíxin fuértehyana kíxin ntá xikaha tsjákoxián tí kjuachaxin kuénte Cristo. ¹⁰ Méxra chàna kjónté fuértehyana la ko kjónté t'ántaxina sín la ko kjónté t'ichjánxinna nkehe la ko kjónté chónkina sín chrók'óyánnna sín la ko kjónté siín kjuaxikaon chrókjuasótexinna kíxin tí tinkachónkia Cristo. Chàna kíxin fuértehyana na mé fuérte janhan kíxin Cristo tinkachónkia.

Tóxakonhen ch'ín Pablo kíxin tí sín tjejó ninko chjasin Corinto

¹¹ ¿Á lócona kíxin xikaha xrjanka? Kjánchó jahará kuítekákonhyará ntá xikaha xrjanka. Jahará chróchrónkará xikaha kíxin jína janhan. Jehya kíxin kánhyó sínkína la ntá tí sín chréhérá la qantsí sínkí sín. Náhí. Kjónté janhan la chaxín ninkehó sínkíhyana. ¹² Kjuásian itsjé kjuaxroan jié la jína kjuak'é kónínkakonhya kjuákoxián kíxin chaxín janhan ijnko nkexro tsíkjeyá Ínchéni. ¹³ ¿Xá k'uikuān tí jahará éxí kánhyó sínkírá q'ntá tí i so ninko la qantsí sínkí sín kíxin tí kjuasán janhan la ninkehó xra tjaáhyará? A ntá tí xikaha ntoáhya kjuít'la tóninkákonhyará.

¹⁴ A ntá ijie ó yaxinna tí níxín vez chrókjuasántsjahará la ko tjaáhyará ninkehó xra. Janhan la tjéyahya tí nkehe chontará. Tí nkehe tjéyahya janhan la mé jahará kíxin jahará éxí yóhe xjanna t'íkuān. Méxra tí sín it'é xjan chrókjuenájín sín chichaon chrók'uayakuenxín sín xjeen sín. Jehya xra kuénte tí xjan chrókjuenájín xjan chichaon chrók'uayakuenxín sín tí it'é xjan. ¹⁵ Tóxakonnahya kjónté chrókjuintakjeje kaín nkehe chonta janhan q'kjónté chrók'uénxian kíxin tí jahará la jína chrók'uejorá. A ntá janhan imá tjuahará la kjánchó éxí tóna janhan kíxin jahará kánhyó tjuéherá tí janhan.

¹⁶ Méxra kjónté janhan tjaáhyará ninkehó xra la kjónté xikaha ntáchrórá kíxin kjuít'ayahará, ichrorá. ¹⁷ ¿Xá kjuít'ayahará kíxin jnkójín sín ichr'an kjuíjitsjehe sín tí

* 11:33 Hechos 9.23-25

jahará? ¹⁸ Kjuáncháha tí ch'ín Tito kíxin tsijjitsjehe ch'án tí jahará la ko kjaxin kuétuñhan tí í jnko kichó ni sátsjikotoxín ch'án. ¿Á kjuít'ayahará ch'ín Tito ní? ¿Á chaxínhyá jína k'uéjóni yóíni ntihá kíxin jnkokón Nchakuen Dios chóntani?

¹⁹ ¿Á tjenkayáxinrá kíxin xikaha kjuáteheni kíxin chóntani jie ní? Kjánchó xikahya. Dios tjetsjehe kíxin nixjani éxí chojni tinkáchónki Cristo. Kichóni tjuahará la kaín tihá ntáxrjan kíxin tjinkaván kíxin antsí chrókuinkachónkirá Ínchéni. ²⁰ Tóxakonna kíxin tió tsjasántsjahará la tsoxrjínnahya nkexrí tjejorá la ko kjaxinrá tsoxrjánhyará tí nkehe tsontáxrjan. Tóxakonna kíxin naxa ts'ixin kjuaníkaon la ko naxa ts'ixin kjuachjinoxínhin la ko tsoninkákonhénrá kíchuárá la ko chrókuetoanrá jahórá la ko naxa tsinkachónkirá kjuach'ia la ko naxa ts'ántaxínhrá kíchuárá la ko naxa chontará kjuahnke la ko jnkokoáhya tsjenkayáxinrá. ²¹ Tóxakonna kíxin tió tsjasántsjahará ínaá la tí Dios kuéntana mé sinchesuána tí tjejorá la ntá imá tsotsjanka kíxin itsjérá tsíkjásinrá jie tí ósé la naxa titoéhyará tí nkehe tjuáhya ch'erá la ko naxa titoéhyará chontará chojni chjin ókjé tjásinkoará jie la ko titoéhyará kaín tí so nkehe jínahya k'uékjich'erá ósé.

13

Nchexraxinkaon ch'án sín la ko tsjixixín nixja ch'án

¹ A ntá jie la níyaxín tsjasántsjahará. A ntá tí kaín nkehe tjinkáonrá tsonóna la mé chróchrónka yaá o iy'á chojni tsík'ikonxín kon sín tí nkehe tsíkónhen. ² Nixjahá tí sín tsíkjasin jie ósé, la ko nixjahará kaín rá kíxin kjónté ikjín tjen la ínaá nixjahará éxí nixja tí kjuak'é k'uéjóni tí iyó kjuasántsjahará kíxin tió tsjasán ínaá la í tsíkonóáhya tí sín kjuasin jie. ³ Jahará tjinkáonrá tsinhínrá á chaxín níjaxian kjuachaxin kuénte Cristo. Jehya kíxin Cristo tsjachahya tsjakoxín ch'án tí kjuachaxien ch'án tí tjejorá ntihá. Náhí. Chaxín tjakoxín ch'án tí kjuachaxin chóntha ch'án tí tjejorá ntihá. ⁴ Chaxín tí k'uénxin ch'án tí ntacruz la mé éxí chóntahya ch'án kjuachaxin. Kjánchó ijie tjechónxin ch'án tí kjuachaxin kuénte Dios. Kjaxinni jeheni éxí kjuák'e ch'án k'uéchóntahyani kjuachaxin la ntá ijie tinkáchónkini tí jehe ch'án la tjejóchónxinni tí kjuachaxin kuénte Dios kíxin jína tsjinkitsani tí jahará.

⁵ Jahará chrókjuenkayáxinrá á nchoxon tjejorá, á kaín asánrá tinkachónkirá Ínchéni. ¿Á noahyará kíxin tjejokoará Jesucristo? A ntá jahará tsonohará á chaxín tinkachónkirá o náhí. ⁶ Kjaxin tjinkaván chrókónohará kíxin jeheni la jehya chojni chaxínhyá tinkáchónki Ínchéni. ⁷ Nixjehéni Dios kíxin chrókuítóehya ch'án tí jahará kíxin ninkehó nkehe jínahya chrókjuich'erá. Jehya kíxin chrókjuakoxínni kíxin jína tí jeheni. Náhí. Jehí tjinkaonni kíxin jahará chrókjuich'erá nkehe jína. Ántosénni kjónté tsontáchro sín kíxin chóntani jie. ⁸ Ninkehó nkehe chrókjuich'eni kíxin chrókjuinchek'itjáyanni tí nkehe chaxín. Kaín nkehe ch'eni la tijkosáyeheni tí nkehe chaxín. ⁹ Méxra chrókóchéháne tí t'ichjánxínhyá imá chrók'uetoanni, tí chaxín jína chrók'uejorá. Ntá naxa tsonixjehéni Dios kíxin chrókjuixraká chrók'uejorá ntoá. ¹⁰ Mé xikaha ikjian tíhi senó naxa tsjasántsjahará ntihá kíxin ntá tió tsjasán la ts'ichjánxínhyá naxa sinchekóninkáonrána tsoníxjaxian tí kjuachaxin chonta janhan. Kíxin Ínchéni mé chjína tí kjuachaxin jehya kíxin chrókjuintak'itjáyanrá. Náhí. Kjuanjon ch'án tíha kíxin jahará antsí chrókuinkachónkirá Ínchéni.

¹¹ Na ntá kichó ni, chrókócháhará. Tjeyará kíxin jína chrók'uejorá. Chrókjuinchechéhérá kíchuárá la jnkokoá chrókjuenkayáxinrá la ko kjuaxróxin chrók'uejorá. Kíxin Dios mé ts'ejokoará ch'án. ¹² Nixjehérá kíchuárá jnkójína la tsehérá tja kíchuárá. ¹³ A ntá kaín tí sín tinkáchónki Ínchéni ntihí mé xraxinkaon sín tí jahará.

¹⁴ Kjuasáyé Ínchéni Jesucristo la Dios tjuahará la ko tí Nchakuen Dios tjejókoará tjinkitsará kaín rá. Amén. Ó tjen.

Tí xroon ijin ch'ín Pablo k'uáyéhé tí sín Galacia

Ch'ín Pablo ijin xroon k'uáyéhé tí ninko chjasin Galacia

¹ Janhan Pablo mé tsíkjeyána Ínchéni tsjákua itén ch'án. Janhan la jehya chojni kjueyána la ko jehya chojni ichr'áんな. Náhí. Kjueyána Jesucristo la ko It'eni Dios, mé tí nkexro kjuínchexechón Jesús. ² Janhan la ko kaín tí sín kíchó ni tjejókoni ntihi ijin ijin tí xroon ts'áyéhé tí ninko siín estado Galacia. ³ Tjancheheni It'eni Dios la ko Ínchéni Jesucristo kjuasáyé ch'án chrókuincheayaonrá ch'án la ko chrók'uayéhéra tí kjuaxróxin kuénte ch'án. ⁴ Jesucristo mé k'uenyákonhen ch'án ijiéni ntá kuaáxinni la mé ijie tsjachahya tí nkehe jínahya siín chjasintajni tsjachroeni mé xíkaha tjinkaon It'eni Dios. ⁵ Tjáncháhá Dios kjuasáya jnkochríxín mé xíkaha tsoxiteyá. Amén.

Kohya ijin tan tsaáxinni

⁶ Janhan tóxakonna kíxin jahará imá tjoka tinkakítohérá Dios kjueyárá kjuasáyé Cristo. Jahará la tjoka ó kjuankíxinrá chréhéra ókjé tan chrókuaáxinrá. ⁷ A ntá chaxínya xíkaha. Kohya ijin tan tsaáxinni. Jehí iso chojni tjinkaon nchexakonhanrá la ko tjinkaon sín chrókuitóxinhin sín tí tan chrókuaáxinni kuénte Cristo. ⁸ A ntá tí jnkojín nkexro chrókuákohará ókjé tan chrókuaáxinrá yóehya tí nkehe ó kjuakoni la tí xíkaha la Dios mé sinchekjasóte tí sín kíxin xíkaha sich'e sín, kjónté á janhan o ijinco ángel chrókuixín nkaya nkajní. ⁹ Senó xrjanka la ínaá tsoxrjanka kíxin jnkojín nkexro chrókuako ijin tan ókjé tsaáxinrá yóehya tí tan ó kuítekáonrá la mé Dios sinchekjasóte tí jehe sín.

¹⁰ Janhan la tjéyahya kíxin chrókóxrjínhin chojni tí xrä t'a. Náhí. Tjínkavan kíxin Dios mé chrókóxrjínhin tíha. Tí chrókótjínkavan chrókóxrjínhin chojni ó a ntá xíkaha la jehya ijinco nkexro ch'ehe xrä Cristo.

Ch'ín Pablo k'óna ijinchojni tjako itén Dios

¹¹ Jahará kíchó ni chrókónohará kíxin tí tan tjákua tsaáxinni mé jehya ijinco nkehe kjuenkayáxin chojni ó. ¹² Jehya chojni chjína tí tan la jehya chojni kjuakona. Náhí. Jesucristo mé kjuakona.

¹³ Jahará la kjá ó kuinhínrá nkexrí k'uékjak'é tió naxq k'uéchráhá tí sín judío. Ó nohará kíxin k'uéchonkíhá tí sín tinkáchónki Ínchéni la ko tjínkavan chrókuintak'itjáyan sín.* ¹⁴ Tí naxq k'uék'ájikian tí sín judío la antsí má k'uénóna. A ntá kaín tí sín chjasenná jnkokón nánó k'uéchontakian sín la kánhyó k'uénohe sín. Antsí má k'uékítekávan tí nkehe k'uék'etoan tí sín tsík'axrjeníxinni. ¹⁵ Kjánchó Dios kjueyána kjónté naxq tókjínahya la kjuasáyé ch'án kjueyána ch'án kíxin xíkaha kóxrjínhin ch'án. ¹⁶ Kjuínchenóna ch'án nkexrí tjen tí Xjeen ch'án kíxin tsjákhá tí sín jehya judío tí tan tsaáxinni. Tió kjueyána Dios la ninkexró kjuakonahya. ¹⁷ La ko kjaxin kjuítsjáhya janhan tí sín tsík'óna apóstol siín chjasin Jerusalén. Náhí. Janhván tuénxín sákjuia chjasin Arabia, a ntá chr'éxín ikjan tí chjasin Damasco.

¹⁸ Á ntá iní nánó chr'éxín na ntá sákjuiyá chjasin Jerusalén kíxin tsochoxian ch'ín Pedro la ntá ntiha mé kjuák'ekjan ch'án quince yaon. ¹⁹ Kjánchó k'uíkohnya tí í so sín apóstol. Jehó k'uíkuán ch'ín Jacobo kíchó Ínchéni. ²⁰ Ó tjetsjehe Dios kíxin tí nkehe ikjan la mé chaxín tíha.

²¹ A ntá chr'éxín ntá sákjuia nó estado Siria la ko Cilicia. ²² A ntá tí sín kíchó ni tinkáchónki Cristo tjejó estado Judea la naxq tjatsoanhyaná sín. ²³ A ntá ó kuínhón sín kíxin tí nkexro k'uéchréhá sín chrók'óyán sín la ntá ijie mé tjako tí tan chrókuincheek'itjáyan ch'án. ²⁴ A ntá ijie tjanchia sín kjuasáya kíxin janhan ó tinkachónka Ínchéni.

* ^{1:13} Hechos 8.3; 22.4-5; 26.9-11

2

Tí iso sín k'jueyá Jesús k'uáyéhé sín ch'ín Pablo

¹ La ntá catorce nánó chr'éxin ntá sákjuiyá chjasin Jerusalén ínaá la sákjuíkian ch'ín Bernabé la ko k'jaxin ch'ín Tito. ² Sákjuiyá ntiha kíxín Dios k'juiñchenóna kíxín sáchrók'juiyá. Ntiha chjasin Jerusalén la kójnkotsékoni tí sín t'etq'an n'inko ntiha la ntá xrjan'kaxián nkexrí tí tan tsaáxinni tjákoħa tí sín jehya judío. Mé xikaha k'juit'a kíxín janhan tjinkaván jnkokoá chrók'juenkayáxinni kíxín ntá tí xra k'juit'a la jehya chrók'ochónkó. ³ A ntá kjónté tí ch'ín Tito k'juiak'ekian ch'án la jehe ch'án mé griego ch'án la k'uetoñhya sín kíxín chrókua ch'án xroye. ⁴ Á ntá iso tí sín kíchó ni chaxínya tinkáchónki Ìnchéni k'uéjókoní sín la jehe sín imó tsík'ixenhen sín kíxín tsáyeheni sín kíxín tsotsjehe sín nkexrí kíxín tí sín kuénte Cristo chóntha k'juačaxin. ⁵ A ntá jehe sín tjinkaon sín kíxín chrók'juinchexiteyéhení ínaá tí nkehe k'uék'etq'an tí ley. ⁶ A ntá tahaní kuenté nkehe tí tjejóchro sín kíxín jehí tjinkaonni kíxín tí tan tsaáxinni la ntoá chrókuinkachónkirá jahará.

⁶ A ntá tí sín kónoxín t'etq'an k'juačonahya sín ninkehó. A ntá jeheni la tahaní kuentá á chojni t'etq'an o náhi kíxín Dios la jnkokón t'ikon ch'án kaín chojni. ⁷ A ntá k'juačsoan sín kíxín Dios ó chjína tí xra tjákoħa tí sín jehya judío tí tan jína éxi yóhé tsíchjéhe Dios xra ch'ín Pedro tjákoħe ch'án tí sín judío. ⁸ Tí Dios tsík'etueñhen ch'ín Pedro ts'óna apóstol tsjákoħe ch'án tí sín judío la ko k'jaxin tsík'etueñna ch'án ts'óna apóstol tsjákoħa tí sín jehya judío.

⁹ Méxra ch'ín Jacobo la ko ch'ín Pedro la ko ch'ín Juan, mé tí sín t'etq'an kuénte n'inko, mé k'juačsoan sín kíxín Dios tsíkjanjon tí k'juačaxin. Ntá kóchhéhe sín kíxín jnkokón ch'eni xra la itsé sín tjani la ko itsé sín itja ch'ín Bernabé. Ntá k'juenkayáxinkoni sín kíxín jeheni la tsjákoħeni tí sín jehya judío la jehe sín nachrohe tsjákoħe sín tí sín judío. ¹⁰ Jehó k'uetoñan sín kíxín tsoraxinkaonni la ko tsotjuēheni tí sín nòa la xráxín tóxakonhenni sinchexiteyáni tíha.

Ch'ín Pablo k'juentuéhe ch'án tí ch'ín Pedro chjasin Antioquia

¹¹ A ntá tió k'juiji ch'ín Pedro chjasin Antioquia la k'juentuáħa ch'án kíxín ntoáhya k'juiħe ch'án. ¹² Senó k'uékjineko ch'án iso chojni kjónté jehya sín judío. Ntá ikui iso sín k'uiħixn tí tjen ch'ín Jacobo. A ntá k'juankíxín k'uaxrjenta ch'án la k'uiħoħe kjónekohya ch'án tí sín jehya judío a. Xikaha k'juiħe ch'án kíxín chrakonħen tí sín kui kíxín tí sín neko ch'án naxxā tsíkahya sín xroye. ¹³ Tí iso sín kíchó ni judío k'jaxin k'uiħekakonħen sín tí ch'ín Pedro kjónté ntoáhya k'juenkayáxin ch'án. K'jaxin ch'ín Bernabé la k'juacha k'juačhoe sín ch'án kíxín tí nkehe ntoáhya k'juiħe sín. ¹⁴ A ntá tió k'uíkuān kíxín tí nkehe k'juačoħin sín la tóyóħehya tí chrónka tí tan jína tsaáxinni tjako sín la ntá níxjaħa tí ch'ín Pedro nkayakon kaín tí sín tsík'ónkotsé. Ntáxrjan kíxín: "Jaha mé ijnko chojni judío la kjónté itjen éxi jehya ijnko chojni judío. ¿A ntá kuénte tētuēħen tí sín jehya judío kíxín chrók'uejó sín éxi chrók'óħe tí sín judío?"

Tí sín judío la ko tí sín jehya judío la jnkokón tsaá sín kíxín chóntha sín fe

¹⁵ Jeheni la k'uaxrjeníxinni chojni judío desde tí kokjíexinni la jeheni na chónthayani jie éxi tí i so chojni chónhya Dios. ¹⁶ Kjónté xikaha la ó noheni kíxín tsotjuáxinhya ijié chojni tí nkehe tsík'etq'an ch'ín Moisés. Jehó tí sín tinkáchónki Jesucristo mé tsotjóá ijié sín. Méxra k'jaxinni tinkáchónkini Jesucristo kíxín tjinkaonni sinchetjóá ch'án ijiéni kíxín titekaonni ch'án. Méxra ninkexró tsjachahya tsotjuáxin ijié sín kíxín chrók'juinchexiteyéh sín tí nkehe t'etq'an tí ley.

¹⁷ Tí tjinkaonni tinkáchónkini Cristo kíxín tsotjuáxin ijiéni, a ntá jeheni k'jaxin xraxinkaonni kíxín ó k'juasinni jie. A ntá i jehya Cristo k'uetoñan kíxín chrók'juasinni jie. Kjá chaxín náhi. ¹⁸ Tí k'uiħoħeni tí ley la ntá naxxā chrók'janni chrókuinkachónkini tí ley ínaá la tíha la ó jie kuénteni tíha. ¹⁹ A ntá tí ley la k'juanchia jie k'uénxian. A ntá ijie la tjéchuān kíxín tinkachónkia Dios. ²⁰ Janhan la ó tsík'en kíxín ó k'uénkian Cristo. A ntá ijie la janhya tjéchuān. Cristo mé tjeħonxian tí janhan. La ntá jie la tjéħonxian tí cuerpo chonta

kíxin tinkachónkia tí Xjeen Dios kíxin jehe ch'án la tjuana ch'án la k'uenyákonhenni ch'án.
 21 Tjínkakonhya tsjanoá tí kjuasáyé Dios. Tí chrókótjuáxin ijié chojni tí ley tsík'etoan ch'ín Moisés, a ntá ó chónkó ik'uén Cristo tí xíkaha.

3

Tí ley o tífe

1 Jähará kíchó ni gálatas imá lontirá. ¿Nkexro kjuít'ayahará? Kíxin tí nkehe kjuákohará mé kuinhínrá kíxin Cristo k'uenxín tí ntacruz k'uenyákonhenni ch'án. 2 Jnkokoá nkehe tjínkavan chrókjuateherá. ¿Á k'uayèxínrá Nchákuén Dios kíxin kuítekáonrá tí nkehe tsík'etoan ch'ín Moisés o á k'uayèxínrá Nchákuén Dios kíxin kuítekáonrá tí tan chrónkani kuinhínrá? 3 Imá lontirá jähará. Tí kjuankíxínrá la kuítekáonrá kjuachaxién Nchákuén Dios. A ntá jie la tjinkáonrá jahórá sínchekjintaxínrá tí xra. 4 ¿Á chónkó kaín tí nkehe tsík'atsíkará? Kjá chrókjuinkitsa chrókjuich'e xra tíha. Jehya chónkó tí nkehe kjuasótiaxínrá. 5 ¿Nkekuénté kjuanjon Dios tí Nchákuén ch'án la ko kjuasin ch'án kjuaxroan k'uíkonrá? Jehya k'uayèxínrá tíha kíxin kuítekáonrá tí nkehe tsík'etoan tí ley. Náhí. K'uayèxínrá tí nkehe kíxin kuinkachónkirá tí tan kuinhínrá.

6 Ch'ín Abraham kuítekaon tí nkehe k'uetoan Dios ntá Dios k'uíkon kíxin jína ch'án. 7 Méxra chrókónohará jähará kíxin tí sín chaxín tikiníxín sín ch'ín Abraham a mé tí sín a chaxín tinkáchónki Dios. 8 Tí xroon itén Dios mé chrónka kíxin tí sín jehya judío mé sinchetjóá Dios ijié sín kíxin tsinkáchónki sín ch'án. Mé xíkaha Dios mé chénka ch'ín Abraham ósé tí tan jína, ntáchro ch'án kíxin: "Ijnkó nkexro ts'axrjeníxín tí jaha mé tsoyaonxín kaín nación."* 9 Mé xíkaha kjaxin kaín sín tinkáchónki Dios mé tsoyaon sín jnkokón éxí kóyaon ch'ín Abraham kíxin kuítekaon ch'án.

10 Kaín sín jehó tinkáchónki tí nkehe tsík'etoan ch'ín Moisés la tsjasóte sín kíxin ntáchro xroon itén Dios kíxin: "Tsjasóte kaín tí sín tsjachahya sinchexiteyéhé tí nkehe tsík'etoan tí xroon chóntha ley."† 11 Ntá ó ntoá ntáchro kíxin kohya nkexro tsotjuáxin ijié sín tí tsitekaon sín tí ley. Xroon itén Dios ntáchro kíxin: "Tí nkexro tsíkótjóá la tjejóchónxin sín kíxin tinkáchónki sín Dios."‡ 12 Ntá tí chrókuinkáchónkini tí ley tsík'etoan ch'ín Moisés la chrókuinkáchónkiyani Cristo. Ntáchro xroon itén Dios kíxin: "Tí nkexro sinchexiteyá tí ley la táchro chrók'uejóchónxin sín."§

13 A ntá Cristo kjuatsen ch'án kaín tí chrókjuasótexinni tí ley. Tí náhí la chrókjuasóteni kíxin chrókjuachahyani sinchexiteyéheni tí ley. Jehe ch'án kjuenka ch'án tí ijiéni kíxin k'uenyákonhenni ch'án. Ntáchro xroon itén Dios kíxin: "Kaín tí chojni chóntha jie ts'ejótjan sín ijnko nta ntá its'en la mé xíkaha k'uayéhé sín tí kjuanínkaon kuénte Dios."* Mé xíkaha k'uíkon sín tí ch'ín Jesús. 14 Mé xíkaha kónhen kíxin ntá tí nkehe chénka Dios tí ch'ín Abraham senó mé ts'ayéhé tí sín jehya judío kíxin kjuachaxién Cristo Jesús. Ntá xíkaha kaín ni ts'ayéheni tí Nchákuén Dios kíxin tinkáchónkini ch'án mé xíkaha tsíntáchro ch'án.

Tí ley la ko tí nkehe kjuanjon Dios

15 Kíchóni, tíhi mé sintayóaxian kuénte chojni ó. Tió ijnko chojni ch'éna ijnko xroon tsochónta firma kuénte sín la ntá xitjahya ts'óxíka í jnko nkexro la xitjahya í jnko nkexro sich'éna í so nkehe. 16 A ntá Dios mé tsíkjo ch'án tí ch'ín Abraham kíxin tsjanjon ch'án nkehe ts'ayéhé tí nkexro ts'axrjeníxín ch'án. Tí xroon itén Dios ntáchrohya kíxin kaín nkexro ts'axrjeníxín ch'ín Abraham chrók'uayéhé tíha. Náhí. Ntáchro kíxin ts'ayéhé jnkokoá nkexro ts'axrjeníxín ch'án la mé Cristo tíha.† 17 Méxra xrjanka tíhi. Dios chénka tí ch'ín Abraham ijnko nkehe chaxín la tsoxiteyá tíha kíxin éxí yóhé ijnko xroon chóntha firma tíha. A ntá cuatrocientos treinta nánó chr'éxín la ntá ikui tí ley k'uéchrónka ch'ín Moisés. La ntá kjónté xíkaha la xitjahya tsoxíka tí nkehe tsíchrónka Dios o tsontáchro

* 3:8 Génesis 12.3 † 3:10 Deuteronomio 27.26 ‡ 3:11 Habacuc 2.4 § 3:12 Levítico 18.5 * 3:13 Deuteronomio 21.23 † 3:16 Génesis 12.7

chojni kixin tjetoanhya tí nkehe tsíntáchro ch'án.[‡] **18** Tí chrókjuanjon Dios nkehe kixin chrókuinchexiteyáni tí nkehe k'uetoan tí ley la ntá tí nkehe tsíntáchro Dios senó mé chróxiteyáhya. A ntá Dios mé tsíchénka ch'ín Abraham kixin sinchekeitonhen ch'ín Abraham ti nkehe kjuasáyé ch'án.

19 ¿A ntá xikaha la nkehe tsónhen tí ley tsík'etoan ch'ín Moisés? Chr'éxín kjuanjon Dios tí ley kixin tsonoexínni nkehe tí jie tjasinni. K'uetoan Dios sinchexiteyéhe chojni tí nkehe tsík'etoan ch'ín Moisés tsijia tí nkexro ts'axrjeníxin ch'ín Abraham, mé tí nkexro kjuayá Dios kixin xikaha tsoxiteyá tí nkehe chrónka ch'án. A ntá tí ley mé chrónka tí sín ángel ntá k'uayéhe ch'ín Moisés la ó chrónkaxón ch'án. **20** A ntá tí nixjehé Dios tí ch'ín Abraham la jehó ch'án la ko jehó Dios la méxra t'ichjánxihya í jnko nkexro.

Tí xra kuente tí ley

21 ¿A ntá á chrók'uaxrjexín kixin tí ley tsík'etoan ch'ín Moisés chrókjuanjonko tí nkehe tsjanjon Dios? Kjá náhí. Tí chrók'uixin ijnko ley chrókjuanjon kjuachón la ntá chrókotjuáxin ijiéni tí chrókuitekaonni tí nkehe t'etoan tí ley. **22** A ntá tsíntáchro xroon itén Dios kixin tí jie mé t'etuñhen kaín xín chojni kixin ntá tí sín chrókuinkáchónki Jesucristo ntá chrók'uayéhe sín tí nkehe tsíchrónka Dios.

23 A ntá tí naxa kuihyá Cristo la ntá tí ley la k'uetoñhen kaín ni la k'uejóchónhenni kixin chrókónoxín tí nkehe chrókuinkáchónkini. **24** Tí ley la exí ijnko maestro kuente chánjan k'uetoan. A ntá jie ikui Cristo la jehe ch'án mé kótjuáxinni ch'án kixin titekaonni ch'án. **25** A ntá ijie ó titekaonni Cristo la í nchexiteyéhyani kaín tí nkehe t'etoan tí ley.

26 A ntá jahará ó k'ónará xjeen Dios kixin ó tinkachónkirá Jesucristo. **27** Kaínrá kuíkitiñaxírra kjuachaxién Cristo mé xikaha jehe ch'án kótjuáxinx ch'án. **28** A ntá jehya tjetoan á chojni judío o á chojni jehya judío o á chojni ch'exón xra o á chojni t'etoan o á chojni ntoa o á chojni chjin. Kaínri la ó k'ónani jnkokoá kixin tinkachónkini Cristo. **29** A ntá tí tinkachónkini Cristo chaxín la ntá tí xikaha ó chaxín tsík'axrjeníxinni ch'ín Abraham la ts'ayéheni tí nkehe tsíchrónka Dios.

4

1 Mé xikaha ntáxrjan tíhi. A ntá ijnko chánjan tió chrók'uen tí it'é ntá chrókuitoeko tí nkehe kuente tí it'é la jehe ch'án la tóyohó ijnko nkexro ch'exón xra kixin tí jehe la xitjahya t'etoan xra kjonté chaxín kuente ch'án kaín tí nkehe a. **2** Siín nkexro t'ayakonhen ch'án la t'etoan tí xra kuente ch'án tsjixrakája tí yaon tsíntáchro tí it'é. **3** Mé xikaha kónhen tí jeheni. Kixin tí naxa k'uéchánjanni la kuítekaonni kaín tí nkehe kuente chjasintajni. **4** A ntá ó kjuixraká tí yaon ntá Dios ichr'án tí Xjeen ch'án ikui ch'án k'uaxrjeníxin ch'án ijnko chojni chjin. La kjuinchexiteyá ch'án kaín tí nkehe tsík'etoan tí ley kuente Moisés. **5** Ikui ch'án xikaha kixin tsaáxinni ch'án kjonté senó k'uék'etuñhenni tí ley. A ntá jie la chrók'uayéhe Dios tí jeheni exí xjeen ch'án.

6 A ntá kjuakoxin Dios kixin jeheni mé xjeen ch'án mé ichr'án Dios tí Nchakuen Xjeen ch'án tsochóna asénni la tí Nchakuen ch'án mé t'èyaxín: "It'eni jaha mé kuénta tí jeheni."

7 Méxra xikaha jahará la jehya ijnko nkexro ch'exón xra. Náhí. Jahará mé xjeen Dios. Jahará mé xjeen ch'án la jehe ch'án tjinkaon sincheikitonhanrá tí nkehe kuente ch'án kixin tinkachónkirá Cristo.

Ch'ín Pablo tóxakonhen ch'án kixin tí sín tinkachónki Inchéni

8 Ósé la jahará k'uéchonhyará Dios la kjuinchexiteyéherá tí dios chaxínhyá. **9** A ntá ijie la ó choxírra Dios, o íchá jina chróntáchroni kixin Dios la ó chóxin ch'án tí jahará. A ntá jehya jina kixin naxa chrókuinkachónkirá ínaá tí nkehe chontahya kjuachaxin la ko tí nkehe chónkó kixin tí xikaha naxa chrókjuinchexiteyéherá tí nkehe tinkachónki chojni. **10** A ntá

[‡] 3:17 Éxodo 12.40

jahará la tjásinrá kia ichréntí yaon la ko tí nitjó la ko tí yaon kia tí nánó. ¹¹ Imá tóxakonna kíxin á chónkó tí xra kjuit'a kjuakohárá.

¹² Kíchóni, xrjanoahará kíxin chrókoyóhárá éxí tí janhan kíxin janhan mé tóyóhe éxí k'uejorá senó kíxin t'etuenhyani tí ley. Janhan la tékahará ninkehó jie. ¹³ Ó nohará kíxin tió saoxín kjuakohárá tí tan tsaáxinni la k'uétsankahyana kíxin k'uénina k'uéchonta ijkno chin k'uékjinchekjoténa. ¹⁴ Kjónté xikaha k'uénina la jahará kjuanoáhyará tí janhan la k'uéchontará kjuasáya tí janhan. A ntá jahará la jína kjuanjonrá kjuachaxin kjuak'ntiha. Éxí chrók'uayéhérá ijkno ángel kuènte Dios o éxí chrók'uayéhérá jehe Ìnchéni Jesucristo mé xikaha kjuak'ntiha. ¹⁵ ¿Nkehe kónhen tí kjuachéhe k'uéchontará? Kíxin ntáxrjan kíxin jína tí jahará kíxin tjinkáonrá kjónté ikonrá chrókuakítsjerá chróchjínará tí janhan. ¹⁶ A ntá ijie la, ¿á ninkákònnará jehó kíxin kuinhínrá tí nkehe ntoá xrjanka?

¹⁷ Tí sín í so a la imá tjinkaon sín tí jahará. Kjánchó ntoáhya tí nkehe tjenkayáxin sín kíxin jehe sín tjinkaon sín kíxin chrókuitohérá tí jeheni kíxin ntá tjinkaon sín kíxin jahará chróchréhérá tí jehe sín. ¹⁸ Jína chrókótjinkáonrá tí í so sín kjánchó ntoá chrókuenkayáxinrá kíxin jehya tí chrókjuak'ntiha ó chrókuítekáonrá jína. ¹⁹ T'ikonni tí jahará éxí xjeenni. Ijie la imá kjuíncheníhi asenná kíxin tóxakonna tí jahará. Éxí yóhe ijkno iné xjan tsjoté tjan tió sinchekokjíhi tjan xjeen tjan mé xikaha janhan la naxaq tsjasótena kíxin tjinkavan kíxin Cristo chrókjuinchetjóá tí jahará. ²⁰ Chrókójína ijie naxaq chrókjuak'ntiha ntá ókjé nkexrí chrónixjahará ntá ijie la nonahya nkehe tí tjenkayáxinrá.

Kjuíncheyóexín ch'ín Pablo tí tjan Agar la ko tí tjan Sara

²¹ A ntá jie ch^ronkkará nkehe. Juhará naxaq tjinkáonrá chrókjuinchexiteyéhérá tí ley tsík'etoan ch'ín Moisés la ¿á kuiényará nkehe chro tí ley? ²² Ntáchro kíxin ch'ín Abraham mé chóntha ch'án yaá xjeen ch'án la ijkno mé xjeen tjan ch'exón xra la tí í jkno mé xjeen ichjién ch'án mé ijkno tjan t'ítuenhya.* ²³ Tí xjeen tjan ch'exón xra kokjíhi ch'án éxí tokjíhi chojni ó. A ntá tí xjeen tjan t'ítuenhya la mé ó kokjíhi ch'án kíxin tsoxiteyá tí nkehe tsíntáchro Dios. ²⁴ Tíhi mé ntayóaxián. Tí yaá chojni chjin mé tóyóexín tí yaá nkehe tsík'etoan Dios. Tí tjan Agar mé tóyóexín tí ley xránjonxín ijna Sinaí. La ntá tí sín titekaon tíha mé éxí chojni ch'exón xra tí jehe sín kíxin t'ítuenhen sín. ²⁵ Mé xikaha tí tjan Agar mé tóyóexín tí jna Sinaí nación Arabia la tíha tóyóexín tí chjasin Jerusalén kíxin tí chjasin la ko tí sín tjejó ntiha la mé t'ítuenhen sín la ko kaín xjeen sín. ²⁶ A ntá tí chjasin Jerusalén itjen nkaya nkajní la mé t'ítuenhya. Náhí. Mé jeheni la kuénteni tíha. ²⁷ Ntáchro xroon itén Dios kíxin:

Jaha chojni chjin chontahya chánjan kjónté chrokócháha.

Jaha k'uíkonhya ninkehó kjuatjoté kíxin kjuinchekokjíehya xjan la kjónté chrokócháha.

Tí tjan kuítsínehe na mé nchónhya inté tjan ts'ikon tjan,

a ntá tí tjan kjuak'eko xì tjan la kánhyó ts'ikon.[†]

²⁸ Kíchóni jeheni la éxí yóheni ch'ín Isaac kíxin kaín ni la xjeen Dios kíxin xikaha tsíntáchro ch'án. ²⁹ A ntá éxí senó tí xjan kokjíhi éxí tokjíhi chojni ó la jehe ch'án k'uéchónkíhi ch'án tí xjan kokjíexín kjuachaxien Nchakuen Dios. Mé xikaha kjaxin sitónhen jie. ³⁰ A ntá ntáchro tí xroon itén Dios kíxin: "Tétuenhén tí tjan ch'exón xra sátsji tjan la ko tí xjeen tjan kíxin tí xjeen tjan la ts'áyéhya ch'án tí nkehe tsitónhen tí xjeen tí tjan t'ítuenhya."‡ ³¹ Méxra kíchó ni, kaín ni la jehya xjeen ijkno tjan ch'exón xra. Náhí. Jeheni mé xjeen tí tjan t'ítuenhya.

5

Jína chrók'uejorá kíxin kuaáxinr

* **4:22** Génesis 16.15; 21.2 † **4:27** Isaías 54.1 ‡ **4:30** Génesis 21.10

¹ Cristo mé kuaáxinni la ntá ó tí ley la t'etuenhyani. Méxra jína chrók'uayakonhénrá tí nkehe kuaáxinrá la í chrókjanhyará chrók'ónará chojni t'ítuenhen ínaá.

² Tinhínrá, janhan Pablo mé ntáxrjan kíxin tí chrókuará tí xroye a ntá ó chónkó chrókuinkachónkirá Cristo. ³ Tjínkaván tsroxrjanka ínaá kíxin tí jnkojín nkexro itsa tí xroye la jehe ch'án mé t'ichjánxín sinchexiteyéhé ch'án kaín tí ley tsíkjín ch'ín Moisés. ⁴ A nta jahará la xritjéyárá tsotjuáxin ijírá kíxin sinchexiteyéhérá tí ley la ntá ó kuitohérá Cristo la ko ó kuitohérá tí kjuasáyé Dios tjuahará. ⁵ A ntá jeheni la tinkáchónkini Cristo la chóntani Nchákuén Dios la ntá tjejóchónhenni kíxin tsjintaxín tsotjóá ijíeni. ⁶ Jeheni mé tinkáchónkini Jesucristo la ntá kánhyó tjetoan tí xroye. Antsí tjetoan chrókuinkáchónkini Inchéni la ntá tí tinkáchónkini Inchéni la chrótjuéheni kíchó ni.

⁷ Jahará la jína kjuankíxinrá tinkachónkirá Inchéni. ¿A ntá nkexro k'uetoan kíxin chrókuitohérá tí nkehe chaxín? ⁸ Jehya nkehe kuénte Dios tí tjejoch'erá méhé. Méxra jehe ch'án la kjueyárá ch'án. ⁹ Ntáchro sín kíxin tí ch'o t'óna niotja tsjiko intsíkáo tí xroqan ncheck'ánkí niotja, a ntá ts'ánkí kaín tí ch'o. ¹⁰ A ntá janhan tinkachónkia Inchéni la ko ó nóna kíxin jahará kjaxin tinkachónkirá ch'án la kjá í chrókjuenkayáxinhárá í jnko nkehe. A ntá Dios mé sinchekjasóte ch'án tí nkexro ixri tjixrónkáxin kíxin Dios la chrakuenhyá ch'án ninkexró.

¹¹ Kíchóni, tí naxá chrókuétoan chrókua chojni xroye la ntá tí sín judío chrókóníkakonnahya sín. Tí xikaha la chrók'uántaxiénya sín tí tan jína chrónka nkexrí k'uénxín Cristo tí ntacruz. ¹² Méxra tí sín ntaxakonhanrá la t'etoan sín itsará xroye la íchá jína naá chrók'uátsínkó chrókóchrít'ó sín kaín.

¹³ Jahará kíchó ni, la Dios mé kjueyáni kíxin tsaáni kjánchó chóntahyani kjuachaxin ch'ení tí nkehe jínahya. Náhí. Chrókjuinkitsani kíchó ni la ko chrótjuéheni kíchó ni. ¹⁴ Mé xikaha tí ley mé t'axrjexín kíxin: "Chrótjuéhérá kíchuárá exí tjuéxinrá əsánrá."* ¹⁵ A ntá tí chrókjóngehérá kíchuárá la ko chrókjónterá kíchuárá la ntá chrókoxakonhanrá kíxin tí xikaha la chrókjuincheck'itjáyanrá kíchuárá.

Tí jie chrókjuasin chojni la ko tí nkehe t'etoan Nchákuén Dios

¹⁶ A ntá ntáxrjan kíxin chrók'uejorá exí tjinkaon Nchákuén Dios, a ntá chrókjuéyahará tí nkehe jínahya chrókjuenkayáxinxará. ¹⁷ A ntá tí nkehe jínahya tjenkayáxinxará la tjanjonko Nchákuén Dios kíxin Nchákuén Dios la tjanjonko tí nkehe jínahya la tí iyó nkehe tjenkayáxinxará la tjanjonko kíchó. Méxra jahará la xitjahya ch'erá tí nkehe tjinkáonrá chrókjuich'erá. ¹⁸ A ntá tí Nchákuén Dios tjetjinkitsará, a ntá jehya tí ley t'etuerhanrá jie.

¹⁹ Xrahya ts'ikonni tí jie tjasin chojni jínahya tjenkayáxin. Mé tíha la tí sín tjasinko jie chojni chjin ókjé, la ko tí chojni ch'e tí nkehe jínahya, la ko tí chojni náxrjónhya tjenkayáxin, ²⁰ la ko tí chojni tinkáchónki nkehe tsíkjanoja, la ko tí chojni nchexroqan, la ko tí chojni nínkaon, la ko tí chojni itje kjuaníkaon, la ko tí chojni chjio, la ko tí chojni xráhyá tóníkaon, la ko tí chojni tjinkaon jehó tsochóntha itsjé nkehe, la ko tí chojni tjinkaon ts'axrjenta, la ko tí chojni t'óxika kíchó, ²¹ la ko tí chojni chjinoxínhin, la ko tí chojni tjaya, la ko tí chojni tókoan, la ko tí chojni kóchjinka, la í so nkehe tóyóhé xikaha. Na mé exí yóhé senó mé k'uétjonkará la ko ijie la xikaha tjétjonkará ínaá kíxin tí nkexro xikaha tinkákjasin jie mé xitjahya ts'áyéhé sín tí kjuachaxin kuénte Dios.

²² A ntá tió chóntani Nchákuén Dios ntá tsotjuéheni kíchó ni, la ko tsochéheni, la ko kjuaxróxin ts'ejóni, la ko tsochónhenni tsóníkakonhyani, la ko jnkojína ts'ejókoni kíchó ni, la ko nchexiteyáni jnkojína. ²³ La ko tsohnkehenni, la ko ts'etuenhenni əsénni kíxin tsjasinhyani jie. Kohya nijnko ley chrókjuinchekjasóteni kíxin tí jína chrók'uejóni xikaha. ²⁴ Mé tí chojni tinkáchónki Jesucristo la kaín jie k'uéchonta sín la ko tí jínahya

* **5:14** Levítico 19.18

k'uékjenkayáxin sín la ó kjuenká Ìnchéni kjuák'enkáni ch'án ntacruz. ²⁵ A ntá tí tjejókoní Nchäkuen Dios t'ichjánxín tsítóheni kíxin Nchäkuen Dios ts'etuēnhenni.

²⁶ Méxrä chrókjuinchehnkehysi la ko chrókjuachaxínyani kíchó ni la ko chrókochjinoxíenhyani.

6

Tjínkitsará kíchuárá

¹ Kíchóni, a ntá tí chrók'uíkonrá jnkójín nkexro kjuasin ichréni jie a ntá tí jahará tí chaxín chontará Nchäkuen Dios la chrókjuéntuéhérá sín la chrókjuinkitsará sín. A ntá jnkójina chrónixjehérá sín, a ntá jahará la chrókoxakonhanrá kíxin xíkahya chrókónhanrá chrókjuásinrá jie kjaxin. ² Tsjínkitsará kíchuárá kíxin jóhya tsamárá tí nkehe ye. Kíxin tí xíkahá la ó chrókjuinchexiteyáni tí nkehe t'etoan Cristo.

³ Ntá jnkójín nkexro ntáchro kíxin imá tjetean tí jehe ch'án la chaxínyha tíha la jehó ch'iyeha asén. ⁴ Jnkójko chojni chróxraxinkaon á nchoxon tjenkayáxin la chrókonohe kíxin ó nchoxon la jehya jehó chrókjuikosáyehe asén. Náhí. Chrókjuikosáyehe í so chojni.

⁵ Kíxin jnkójko chojni yámá tí jie kuénte.

⁶ Tí nkexro xrakohe tí tan jína la chrókjuinkitsa sín chrókjuanon sín nkehe chrók'uáyéhe tí nkexro tjako.

⁷ Sich'iyéhyará asánrá. Kohya ninkexró tsjacha tsjanoá Dios. Tí nkehe ts'enka chojni la mé xíkahó tsotjá. ⁸ Tí t'enka chojni tí nkehe jínahya tjenkayáxin sín la tí nkehe jínahya tsjacha sín mé ts'enxín sín. A ntá tí nkexro ts'enka tí nkehe tjinkaon Nchäkuen Dios la Nchäkuen Dios mé tsjanjon tí kjuachón jnkochríxín ts'áyéhe sín. ⁹ Mé xíkahá chrókoxrjéhyani chrókjuich'eni kaín nkehe jína kíxin tí tsorxjéhyani la ntá chaxín tsjixraká tí yaon tsjachani ts'áyéheni tí nkehe jína. ¹⁰ Méxrä xíkahá xráxín chrókjuich'eni nkehe jína la antsí t'ichjánxín chrókjuinkitsani tí sín kíchó ni tinkáchónki Ìnchéni.

Ch'in Pablo nchexraxinkaon tí sín ntihá la ko kjuixixín nixja ch'án

¹¹ Tsjehérá kíxin imá ihyé tí letra tjékjinian tjaná. ¹² Tí sín tjinkaon ts'etuānhanrá kíxin chrókuará xroye la jehí tjinkaon sín tsjikosáyehe sín chojni la tjinkakonhyá sín kíxin chrókjuasótexín sín tí ntacruz kuénte Cristo. ¹³ Kjónté tí sín tsíka xroye la nchexiteyáhya sín kaín tí nkehe t'etoan tí ley. A ntá tjinkaon sín kíxin chrókuará xroye kíxin ntá kjaxin sín tsohnke sín kíxin tsontáchro sín kíxin jahará kjaxinrá tjinkáonrá tsochontará xroye tí cuerpo kuéntará. ¹⁴ A ntá janhan mé tóxrjínahya sintahnke ninkehó. Ichá jína chróntáxrjan kíxin Cristo k'uenyákonhenni. A ntá xíkahá k'uenxín Cristo tí ntacruz la ntá tí nkehe k'uék'etoan kuénte chjasintajni la kjaxin k'uitjáyan la ko janhan kjaxin kuijohá tí nkehe kuénte chjasintajni. ¹⁵ La ntá ninkehó sínkíhya á tsíka chojni xroye o náhí. Tí nkehe sínkí la chrók'ónani ijnko chojni nixin. ¹⁶ A ntá tí sín ts'áyéhe kjuaxróxin kíxin kuijkonóhe Dios tí jehe sín la mé kaín tí sín kuítekaon tí nkehe t'etoan ch'án mé kaín tí sín chaxín tsík'óna xjeen ch'án.

¹⁷ A ntá ijie la tjínkakonhyá kíxin chrók'uekana jie ninkexró. Janhan mé chaxín chonta tí tsíkjatsoenxín tsíchrít'o cuerpo kuéntana kíxin kjuasótexinna kíxin kjuit'ahá xrä Ìnchéni Jesús.

¹⁸ Kíchóni tjáncháhá Ìnchéni Jesucristo kíxin kjuasáyé ch'án chrókjuincheyaon ch'án kaín rá. Mé xíkahá tsoxiteyá. Amén. Ó tjen.

Tí xroon chr'énhen ch'ín Pablo tí sín tjejó chjasin Éfeso

Ch'in Pablo ikjin xroon k'uáyéhe tí níñko chjasin Éfeso

¹ Janhan Pablo tsíkjeyána Jesucristo kíxin xíkaha tjinkaon Dios tsjákua itén ch'án. Janhan mé ikjian tí xroon chr'anhánrá tí jahará tjejorá chjasin Éfeso tinkachónkirá Dios la ko títekáonrá Cristo Jesús. ² Tjétjáncháha It'éni Dios la ko Ìnchéni Jesucristo kíxin kjuasáyé ch'án chrókjuintayaonrá ch'án la ko chrótjáhará ch'án kjuaxróxin.

Ts'áyéhèni tí nkehe jína kuènte Cristo

³ Chjéheni kjuasáya Dios mé It'é Ìnchéni Jesucristo. Jeheni mé tinkáchónkini Jesucristo la mé xíkaha jehe ch'án mé kjuínchyaonni ch'án kíxin kaín nkehe jína tixin nkaya nkajní kjuanjon ch'án. ⁴ Dios mé kjueyá ch'án tí jeheni kíxin chrókuinkáchónkini Cristo tí náxa t'ónahya chjasintajni. Tjinkaon ch'án kíxin chrók'uejóni tí tjen ch'án ntá kjuínchetjóáni ch'án kíxin kaín jié kjuatseenhenni ch'án. ⁵ Imá tjuèhe Dios tí jeheni ntá tsíkjeyáni ch'án kíxin ts'ónani xjeen ch'án kíxin kuinkáchónkini Jesucristo. Mé xíkaha tsíkjenkayáxin ch'án kíxin xíkaha kóxrjinhín ch'án. ⁶ Méxra imá tjancheheni kjuasáya Dios kíxin kjuínchyaonni ch'án kíxin ó tinkáchónkini tí Xjeen ch'án, imá tjuèhe ch'án. ⁷ Imá tjuèhe Dios tí jeheni la xíkaha kuaáxinni ijnié tí Xjeen ch'án k'uítji la xíkaha tsjìlxín kaín ijiéni. ⁸ Dios kjuakoxín ch'án kíxin imá tjuèheni ch'án. Kjuanjon ch'án kaín kjuachaxin kíxin chrókuienxínni jína la ko kjuanjon ch'án kjuaxrexinkaon jína. ⁹ Dios kjuíncchenoheni tí nkehe jehó ch'án tjenkayáxin ch'án, mé tí nkehe tóxrjinhín ch'án tsoxiteyá. ¹⁰ Tí nkehe tsíkjenkayáxin ch'án la tsoxiteyá tí yaon tsíchrónka ch'án. La ntá jehe ch'án tsjanjon kjuachaxin kíxin Jesucristo ts'etuenhen ch'án kaín xín nkehe siín nkaya nkajní la ko chjasintajni.

¹¹ Dios kjueyáni kíxin chrókuinkáchónkini Cristo la ntá xíkaha chrók'uáyéhèni tí nkehe tsík'áyéhe ch'án. Kaín tíha la mé xíkaha tsønhen éxi tóxrjinhín Dios. ¹² Mé xíkaha kjuich'e ch'án kíxin ntá jeheni kuítekaonni Cristo sàoxín chrók'uejóni chrókjuancheheni kjuasáya Dios kíxin tí kjuachaxin jié chóntha ch'án. ¹³ A ntá kjaxin jahará ó kuinhínrá tí tan jína ntoá chrónka nkexrí tsaáxinni, a ntá ó kuinkachónkirá Cristo. La ntá jnkokoá k'uáyéhèni Nchakuen Dios k'ónani xjeen ch'án kíxin tinkáchónkini ch'án. Mé xíkaha ó xiteyá tí nkehe tsíntácro ch'án. ¹⁴ Tí Nchakuen Dios kuitonhenni mé kjuíncchenoexínni Dios kíxin tsakjani kaín nkehe tsjanjon ch'án tió tsaáxin kaín ni tinkáchónkini ch'án. Ntá xíkaha kaín ni tsjancheheni kjuasáyé ch'án kíxin tí kjuachaxin jié chóntha ch'án.

Ch'in Pablo kjuanchehe Dios kíxin antsí chrókónohe tí sín tinkáchónki Ìnchéni

¹⁵ Méxra ó kuinhán kíxin imá tinkachónkirá Ìnchéni Jesúus la ko imá tjuèhéra kaín tí í so sín tinkáchónki Dios. ¹⁶ Ntá janhan nunca tituahya nixjahá Dios tjáncháha kjuasáya kíxin ó tinkachónkirá ch'án. ¹⁷ Tjéníxjahá Dios, mé jehe ch'án mé ichr'án Ìnchéni Jesucristo, mé It'éni imá tjetoan la tjétjáncháha ch'án kíxin tsotjáhará ch'án kjuaxrexinkaon jína kuènte Nchakuen ch'án kíxin ntá antsí chrókuienxínrá jína tí nkehe kuènte ch'án kíxin ntá antsí má chróchoxínrá ch'án. ¹⁸ Kjaxin tjétjáncháha Dios kíxin tsjinkitsa ch'án tsjanjon ch'án ijkno kjuaxrexinkaon jína kíxin ntá tsønihará ts'ejochonhénrás kíxin xíkaha kjueyára ch'án. La ko tsønihará kíxin imá tjetoan tí nkehe sinchekitonhenni ch'án kíxin jeheni mé tinkáchónkini ch'án. ¹⁹ La ko kjaxin tjétjáncháha Dios tsjinkitsará ch'án tsønihará kíxin tí kjuachaxién ch'án mé nchexraxinkaon tí sín tinkáchónki ch'án. Jnkokón tí kjuachaxin chóntani la ko tí kjuachaxin imá jié kjuakoxín ch'án ²⁰ tió kjuínchexechón ch'án Cristo. Ntá Cristo sákui kjuák'etjaxin ch'án tja chjina tí It'é ch'án itjen nkaya nkajní. ²¹ Mé xíkaha

kjuanjon Dios kjuachaxin kíxin Cristo ts'etueñhen ch'án kaín xín gobierno la ko kaín tí sín t'etoan. Ijie tjet'etueñhen ch'án kaín xín nkehe siín chjasintajni la ko chr'éxín ts'etuoan ch'án kjaxin. ²² Cristo k'uáyéhé ch'án kjuachaxin ts'etueñhen kaín xín nkehe siín. Jehe ch'án mé ts'etueñhen kaín tí sín k'óna ninkoé ch'án. ²³ Tí ninko mé éxi tí cuerpo kuènte ch'án la jehó ch'án mé t'etueñhen ch'án. Jehó ch'án mé kuènte ch'án kaín xín nkehe siín.

2

Kuaáxinni kjuachaxién Dios

¹ La ntá ijie Dios mé kjuínchekitonhanrá tí kjuachón jnkochríxín kíxin tinkachónkirá Cristo. Senó la jahará la éxi tsík'enrá kíxin tí jínahya k'uékjich'erá la ko tí jie k'uékjásinrá. ² Mé xíkaha k'uéchréhérá éxi sítónhen chjasintajni. K'uékjinchexiteyéhérá éxi tóxrínhín tí nchäkuen jínahya t'etueñhen tí xrínto la ko t'etueñhen kaín xín tí chojni titekakuenhyá Dios. ³ Kaínni xíkaha k'uék'ejóni tí ósé a naxa kjuínchexiteyéheni tí nkehe ntáchro asénni la ko kjuínchexiteyáni tí kjuaxrexinkaon jínahya k'uéchontani. A ntá tí naxa xíkahó chrókjuich'eni la Dios imá chrókjuinchekjasóteni éxi tsjasóte tí í so sín. ⁴ A ntá Dios mé imá kujikonóheni ch'án la ko imá tjuéheni ch'án. ⁵ La ntá kjuanjon ch'án tí kjuachón éxi chóntha Cristo. Jeheni la éxi chojni tsík'en k'uék'ejóni xíkaha kíxin tí jie k'uékjasinni. A ntá jie kjuasáyé Dios tsaáxinrá ch'án. ⁶ Dios mé kjuínchexechón Cristo Jesús la ko kjaxin jeheni tsoxechónni kíxin ts'ejókoni ch'án nkaya nkajní. ⁷ Mé xíkaha kjuích'e ch'án kjuákoxín ch'án la naxa tjetjakoxín ch'án kíxin tjuéheni ch'án la ko kjuínkitsani ch'án kíxin tinkáchónkini Cristo Jesús. ⁸ Kjuasáyé Dios kíxin kuaáxinrá ch'án kíxin tinkachónkirá ch'án kíxin táha la jehya jahórá k'uitjará tíha. Náhí. Táha la mé kjuasáyé Dios kíxin tjáhará ch'án. ⁹ Kíxin jehya ichrén nkehe jína kjuích'eni kíxin chrókjuinchehnkexínni. ¹⁰ Dios mé kjuích'ena tí jeheni ntá chr'éxín kjuínkitsa ch'án kíxin tsinkáchónkini Cristo Jesús, kíxin ntá chrókjuich'eni tí xra jína kíxin xíkaha tsíkjenkayáxin ch'án tí senó a.

Kjuaxróxin tjejóni kíxin tinkáchónkini Cristo

¹¹ Méxra jahará la jehya chojni judíorá. Mé tí sín judío ntak'inrá sín chojni chónthaya tí xroye tí jahará. A ntá tí sín judío, mé tí sín itsa sín xroye cuerpo kuènte sín, mé ncheck'in sín asén sín tí chojni chóntha xroye. ¹² Xráxinkáonrá kíxin tí senó la k'úechonhyará Cristo. Jahará la jehya kuènte tí nación Israel la xíkaha k'uéchonhyará tí nkehe tsík'etoan Dios la ko tí nkehe tsíntáchro ch'án tsjanjon ch'án. Mé xíkaha k'uék'ejorá la k'uéchonhyará Dios la k'uéchoénhyará kíxin chrókuaárá. ¹³ La ntá ijie la ó tinkachónkirá Cristo Jesús. Jahará tí ósé imá ikjín k'uék'ejorá. La ntá jie la ó kóchjineherá ch'án kíxin k'uenyákonhánrá ch'án, k'uítji ijnié ch'án. ¹⁴ Jehe Cristo mé tjejóxinni kjuaxróxin. La ntá tí sín judío la tí sín jehya sín judío ntá jie jnkokoá chrókjuenkayáxin sín kíxin k'óna éxi jnkokoá chjasin. Cristo k'óxíka ch'án tí kjuanínkaon éxi ijkó tjet'o k'uinkákonhen. ¹⁵ Jehe ch'án kjuasóte ch'án, la kjuatsen ch'án tí ley. Tí iyó chjasin k'uéjó kjuích'ena ch'án jnkokoá chjasin nixin kíxin tinkáchónki sín ch'án. Mé xíkaha kjuanjon ch'án kjuaxróxin. ¹⁶ Mé xíkaha k'uenyákonhenni ch'án k'uenxín ch'án tí ntacruz la kjuakjín ch'án tí kjuanínkaon k'uék'ixin tí iyó chjasin k'uékjanjón sín kíxin ntá kjuaxróxin ts'ejóko sín Dios la kaín sín jnkokoá k'óna éxi jnkokoá cuerpo kuènte ch'án.

¹⁷ Cristo mé ikui la kjuakohe ch'án kaín chojni tí tan jína kíxin kjuaxróxin ts'ejóni kaín ni, mé tí jahará kjónté k'uék'ejorá ikjín tí tjen Dios la ko kjaxin tí sín chjinaxón k'uéjó. ¹⁸ A ntá kjuachaxin kuènte Cristo la kaín ni kjónté jeheni o í so chojni mé tsochjineheni It'éni Dios kíxin jnkokoá k'uáyéheni Nchäkuen ch'án. ¹⁹ A ntá jahará la í tóyóahyará chojni tsíkjixín ókjé la ko jahará la jehya ókjé chjasin tjejorá. Kaínni la chónthaya kjuachaxin kíxin kaín ni la tinkáchónkini Dios la kaín ni la k'ónani chojni kjéhya ch'án. ²⁰ Jahará la mé tsík'ónará ijkó nchia tjet'o jié k'óna chrítaón tí xro k'uejo tí sín kjueyá Jesús la ko tí sín tsíchr'án Dios chrónka itén ch'án ósé. La ntá Jesucristo mé tí xro imá t'etuoan kuènte tí

tjat'o a. ²¹ Tí xranksíxín mé Cristo la chrítaón k'óna kuenté nchia la tinkák'ánkí tí nchia kixin jína tsjak'e, ntá tsjixraká kixin ts'óna ijnko ninko tjóá kuènte Ìnchéni. ²² Mé xikaha jahará tinkachónkirá Cristo la tsojnoksérá kaín rá ts'óna éxí ijnko nchia kuènte Dios la ntaha tsjak'exenhen tí Nchakuen ch'án.

3

Ch'in Pablo k'uayéhe ch'án tí xra tsjakohé ch'án tí sín jehya judío tí tan jína

¹ Mé xikaha janhan Pablo mé tjéchjinaxián tí tjàku itén Cristo Jesú kixin jína ts'ejorá kjónté jehya chojni judío tí jahará. ² Chrókónohará kixin kjuasáyé Dios kjuanjon ch'án tí xra k'uayáha kixin tsjákohará. ³ Dios mé kjuakoxin tí nkehe tjenkayáxin ch'án ninkexró noehya mé kjuínchenóna tíha la ntá xikaha ikjian ijkno xroon kánhyó tsjé nixja k'uayéhérá. ⁴ Tió sínchekuáinxrá tíha ntá tsjonochará kixin ó nòná tí nkehe kuènte Cristo ninkexró k'uénoehya. ⁵ Tí nkehe la ninkexró k'uénoehya tí ósé a. A ntá jie kjuachaxin kuènte Nchakuen Dios la Dios kjuínchenoexín tí sín kjueyá Jesú ch'ehe ch'án xra la ko tí sín chrónka itén ch'án. ⁶ Tí nkehe ninkexró k'uénoehya la tíhi: Kuínhin tí sín jehya judío tí tan jína kixin nkexrí tsaáxin sín la ntá tí sín jehya judío la ó jnkokón ts'áyéhe sín nkehe jína éxí ts'áyéhe tí sín judío. La ntá jnkokoá ts'óna sín tí cuerpo kuènte Cristo la jnkokón ts'áyéhe sín kaín tí nkehe tsíchrónka Dios sinchexiteyá Cristo Jesú.

⁷ Janhan k'uékitekakonhya, a ntá jie kjuasáyé Dios kjuanjon ch'án tí xra i sit'a kixin tsjàku itén ch'án kixin tí kjuachaxin kuènte ch'án. ⁸ Janhan mé kánhyó tjetoan kixin janhan la imá intsína la kaín tí í so sín tsíkjinchetjóá Dios la antsí tjetoan sín. Kjónté la Dios mé kjuínchekitonna tí xra imá tjetoan kixin tsotjanka tí sín jehya sín judío tí tan jína nkexrí imá tjetoan tí nkehe kuènte Cristo. ⁹ La k'uayáha tí xra tsotjanka kaín xín chojni nkexrí tsíkjenkayáxin Dios tí ósé kixin nijnko nkexro k'uénoehya tíha. Mé jehe ch'án mé kjuich'eña ch'án kaín xín nkehe. ¹⁰ Mé xikaha kónhen kixin ntá tí sín kuènte ninko tsjakuexin sín kaín xín tí sín t'etqan nkaya nkajní kixin tsjonohe sín kixin xikaha kaín nkehe jína tsíkjenkayáxin Dios. ¹¹ Kaín tíha kjuich'e Dios éxí tsíkjenkayáxin ch'án ntá Ìnchéni Jesucristo la ó kjuínchexiteyá tíha. ¹² Kjuasáyé Cristo ntá ó chóntani kjuachaxin tsochjineheni Dios kixin tinkachónkini ch'án. ¹³ Méxra xrijanóghará kixin chrókujoéhyará chrókuinkachónkirá ch'án kjónté tjétjasóténa kixin kaín tíha kónhen kixin jahará chrók'uejoxinrá jína.

Cristo imá tjuéheni

¹⁴ Méxra xikaha tjak'éxian tóch'ian nkayakon It'é Ìnchéni Jesucristo. ¹⁵ Mé tsík'áyéhe ihnié Dios kaín xín chojni tinkachónki ch'án mé tí sín siín nkaya nkajní la ko tí sín siín chjasintajni. ¹⁶ Tjáncháhá It'éni kixin tsjanjon kjuachaxin kuènte ch'án ts'ayéhérá kjuachaxién Nchakuen ch'án ¹⁷ kixin Cristo chróchonta asánrá kixin tinkachónkirá ch'án la ntá ntoá chrók'uejorá éxí ijnko nta tsíkji nuèe ninka la chrótjuéhéral kíchuárá. ¹⁸ Ntá jahará la ko tí í so sín tinkachónki Ìnchéni mé chrókuiénxinrá nkexrí tonxín la ko kjínxin la ko ninkaxín la ko ntetoxín kixin nkexrí tjuéheni Cristo. ¹⁹ Tjáncháhá Dios kixin antsí chrókónohará nkexrí imá tjuéhe ch'án tí jeheni mé antsí má tjuéheni ch'án la tsjachahyani tienxínni kaín tíha. A ntá tí jehe ch'án chrókjuinkitsani ch'án la antsí chrókuienxínni tí kjuachaxin kuènte ch'án.

²⁰ Ijie la chjéheni kjuasáya Dios kixin jehe ch'án chónta kjuachaxin tsjanjon ch'án antsí má tsjé nkehe que tí nkehe kjuanchiani o tí nkehe kjuenkayáxinni. Mé tsjanjon ch'án kaín tíhi kjuachaxin kuènte ch'án mé tsjinkitsa tí jeheni. ²¹ Kjuasáyé Dios itjen jnkochríxín kixin Cristo Jesú kjuínchekaá ch'án tí ninko, mé xikaha ó xiteyá jnkochríxín. Amén.

4

Jína chrók'uejókoni kíchó ni kixin chóntani Nchakuen Dios

¹ Janhan mé tjéchjinaxián tí xra kuènte Inchéni. Méxra xrijanóahará kíxin jína chrók'uejorá kíxin xikaha Dios tsíkjayá tí jahará. ² Méxra chrókjuiñchehnkehýará la ko chrókójahýará la ko chrókójinárá chrókóninkákonhyará la ko chrótjuèhérá kíchuárá. ³ Méxra jína chrók'uejokoará kíchuárá kíxin chrókjuiñktsa Nchakuen Dios kjuaxróxin chrók'uejorá la ko jnkokoá chrókjuenkayáxinrá. ⁴ Itjen jnkokoá cuerpo la ko itjen jnkokoá Nchakuen Dios la ko Dios k'uýehe kaín ni kíxin jnkokoá nkehe ts'ejóchónhenni. ⁵ Chóntani jnkokoá Inchéni la ko jnkokoá nkehe tinkáchónkini la ko ó jnkokoá vez kuíkiteni. ⁶ Itjen jnkokoá Dios la jehe mé It'é kaín chojni. Jehe ch'án mé t'ayakonhen ch'án kaín nkehe la ko t'etuënen ch'án kaín nkehe.

⁷ Jnkojnkoní k'uáyéhení kjuachaxin sich'eheni Dios xra kíxin xikaha kjuanjon Cristo. ⁸ Méxra xikaha nixja xroon itén Dios kíxin:

"Jehe ch'án sákjuí ch'án nkaya nkajní la ko sákjuiko ch'án tí sín tjejóchjina, la ntá kjuínchekitonhen ch'án chojni jnkojnko kjuachaxin kuènte ch'án."*

⁹ ¿Ntá nkexrí t'axrjexín kíxin sákjuí ch'án? Tíhi mé t'axrjexín kíxin jehe ch'án mé senó k'uínkajinxin ch'án nkaya nkajní la kjuák'e ch'án chjasintajni. ¹⁰ Jehe ch'án mé k'uínkajinxin ntíha mé ntá jie sáxíkji ch'án tí nkajní imá noi. La ntá tjet'etuënen ch'án kaín xín nkehe. ¹¹ Jehe ch'án mé kjuínchekitonhen ch'án ijkno kjuachaxin jnkojnko chojni. Kjueyá ch'án iso chojni k'óna apóstol la ko í so sín tsochrónka sín tí nkehe kjuínchenohe sín Dios la ko í so sín tsochrónka sín tí tan tsaáxinni. La ko kjueyá ch'án í so sín ts'óna pastor la ko í so sín tsjako sín itén ch'án. ¹² Mé xikaha tí xra k'uáyéhe tí sín kjueyá ch'án kíxin sich'ehe sín ch'án xra kíxin ntá ts'ánkí tí sín k'óna tí cuerpo kuènte Cristo. ¹³ Ntá xikaha kaín ni jnkokoá tsinkáchónkini tí Xjeen Dios la ko tsochóxinni ch'án jína kíxin ntá xikaha ts'ónani chojni ntoá nchexiteyá la ko chrókónohení éxí nkexrí tjinkaon Cristo. ¹⁴ Méxra chrók'ónahyani éxí xjan ntsíntsí. Tí xjanntsí la xrahyá tsjinkí kjuaxrexinkaon éxí ijkno nkehe sákjuiko xrinto xikaha kíxin sich'yehe sín chojni ijkno nkehe nixin la xrahyá titekaon sín. Tí chojni ch'ia tjinkaon sín tsjachroeni sín í jkno ntia ntoáhya kíxin chrok'uitjáyenhenni Cristo ntá chrókjuaasinni jie. ¹⁵ A ntá íchá jína chrónixjani tí nkehe chaxín ntoá la kaín əsénni chrótjuèhení kíchó ni ntá xikaha chrókónohení kíxin xikaha tjinkaon Cristo. Jehe ch'án mé tí kja t'etuënen tí cuerpo kuènte ch'án. ¹⁶ A ntá kjuachaxién Cristo kuenté tí cuerpo, tí ch'e xra jnkokón la tjinkitsa kuenté. Ntá jnkojnkoní jína ch'eni xra la mé xikaha ts'ánkí tí xra kuènte ch'án la mé jína chrótjuèhení kíchó ni.

Tí kjuachaxin nixin kuènte Cristo

¹⁷ Tíhi mé ntáxrjan la ko tétuñhanrá kjuachaxién ihnié Inchéni. Ijie la chrók'uejohyará éxí ch'e tí sín chónhya Dios. Kaín nkehe tjenkayáxin sín la ntoáhya tíha. ¹⁸ Tí nkehe tjenkayáxin sín la sítié la chónhya sín tí kjuachón tjanjon Dios kíxin tienxínya sín kíxin chrohya tsitekaon sín Dios. ¹⁹ Ó tsíkjinchek'itjáyan sín tí kjuaxrexinkaon kuènte sín la í tósuehya sín chrókjuaasín sín jie. Imá tóxrjinhín sín chrókjui'h'e sín kaín nkehe jínahya. ²⁰ A ntá jahará xikaha xrakohará tí nkehe kjuako Cristo, ²¹ tí chaxín kuinhínrá kuènte ch'án la ko tsíxrakohará tí nkehe chaxín ntoá kuènte ch'án. ²² Méxra titohérá tí kjuaxrexinkaon ntaxin k'uékjenkayáxinrá ósé k'uék'ejorá mé ijkno nkehe jínahya naxa t'ayahará. ²³ Jahará t'ichjánxín kíxin chrókónixin tí kjuaxrexinkaon kuéntará la ko tí nchakuanrá. ²⁴ Méxra chrókuákjárá tí kjuaxrexinkaon nixin kjuich'éna Dios xikaha tjinkaon ch'án la ntá chrókjuaáxoxinrá ijkno ntia jína ntoá.

²⁵ Méxra chrókuitohérá tí kjuach'ia. Méxra jnkojnkorá chrónixjehérá kíchuárá ntoá kíxin kaín ni tsík'ónani jnkokoá cuerpo.

²⁶ Tí chrókóninkáonrá la chrókjuaásinhyará jie la chrókóninkákonhyará kuenté yaon. ²⁷ Chrókuitohérá kíxin Tsochren chrókjuit'ayahará.

* ^{4:8} Salmo 68.18

²⁸ Tí jnkojínrá kuéerá la títóhérá kjuachée. Ichá jína kíxín itjárá chrókjuich' exínrá xra kíxín tsochontará chichaon sínchekitonhénrá jnkojín nkexro t'ichjánxinhin.

²⁹ Nixjahyará tí nkehe náxrjónhya. Nixjará ijnko tan jína kíxín tsjinkitsará ts'ánki kjuaxrexinkaon kuénte kíchuárá la xíkaha tsjinkitsará tísín tjejótinhin. ³⁰ Nchek'áváhyará tí Nchakuen Dios kíxín tíha mé k'uayéxínrá éxí ijnko xroye kíxín tsonoaxínrá kíxín jahará mé tinkachónkirá Dios la ko tsochonhénrá tí yaon itsi ch'án ntá tsjintaxín tsaárá.

³¹ Títóhérá tí kjuanínkaon chontará la ko títóhérá tí nkehe ntoáhya tjenkayáxinrá la ko títóhérá tí kjuangton la ko kaín nkehe jínahya. ³² A ntá chrókójínrá chrókuikonóehérá kíchuárá. Sínchek'itjáyenhénrá ijíé kíchuárá kíxín Dios kjuatseen tí jie chontará kíxín tinkachónkirá Cristo.

5

Jína chrók'uejó tí sín k'óna xjeen Dios

¹ Jahará ó k'óna xjeen Dios la tjuahará ch'án. Méxra chrókóxakonhanrá chrókjuákoxinrá éxí kjuákoxin tí jehé ch'án. ² Chrótjuéhérá kíchuárá éxí Cristo tjuéhe tí jeheni kíxín jehé ch'án la k'uénayákonhenni ch'án, éxí yóhé ijnko kolélo xíkaha kjokehé sín Dios la kóchéhé Dios k'uáyéhé ch'án tí xraxé náxrjón.

³ Ntá jahará mé tsík'ónará chojni kuénte Dios la ntá chrónixjahyará kuénte í jnko chojni chjin ókjé chrókjuásinkoará jie la ko chrókjuenkayáxinhyará ninkehó nkehe náxrjónhya la ko chrókjuakéhya əsánrá tí nchónhya nkehe chróchontará. ⁴ Chrónixjahyará ijnko nkehe náxrjónhya o ijnko nkehe chónkó o ijnko nkehe tjuáhya kíxín jehya kuénte Cristo tíha. Ichá jína antsí má chrókjuancheherá Dios kjuasáya. ⁵ Ó nohará kíxín tí nkexro tjasinko jie í jnko chojni chjin ókjé la ko tí nkexro ch'e tí nkehe tjuáhya la ko tí nkexro tjak'e əsén sín tí itsjé nkehe chróchonta sín la mé tíha ó yóhé tí nkexro tinkáchónki nkehe tsíkjanoya xíkaha. Mé tí nkexro xíkaha ch'e mé tsjachahya ts'ixenhen tí tjet'etoan Cristo la ko Dios. ⁶ Méxra tjánjonhyará kjuachaxin sit'ayahará ninkexró chrónka tí nkehe chónkó. Méxra xíkaha ntá itsi tí kjuanínkaon kuénte Dios la tsjasóte tí sín titekakuenhya sín tí jehé ch'án. ⁷ Méxra chrók'uítóhyará tí sín xíkaha ch'e.

⁸ Senó la k'uék'ajirá ntia sítié. A ntá ijie ó k'ónará chojni kuénte Inchéni la ó xritjejorá tí ntia t'inkaséyan kuénte ch'án. Méxra tjenkayáxinrá jína éxí tí sín xritjejó tí ntia t'inkaséyan.

⁹ Tí t'inkaséyan t'axrjeníxín kaín nkehe jína la ko tí nkehe chaxín la ko tí nkehe ntoá.

¹⁰ Tóxakonhanrá chrókjuich'erá tí nkehe tóxrjínhin Inchéni. ¹¹ Tankiéhyará tí sín ch'e xra náxrjónhya mé tí sín a ch'e xra tí sítié. Ichá jína tsjákoxinrá tí xra tí itjen tí t'inkaséyan.

¹² Chrókósuheni chrónixjani kuénte tí nkehe imó ch'e tí sín jínahya. ¹³ Tí t'inkaséyan mé tsonoxíxín kaín xín nkehe la mé tí xrohi ts'ikonxínni jína kaín nkehe. ¹⁴ Mé xíkaha ntáchro xikihi:

T'aya jaha tjéchrian t'inkatjenxian tí siín tí sín tsík'en.
Cristo mé tjetjoka xrohi.

¹⁵ Méxra imá chrókóxakonhanrá jnkojína chrók'uejorá. Jehya éxí tí sín noehya chrók'uejorá. Náhí. Chrók'uejorá éxí ijnko chojni nohe má. ¹⁶ Chrókóxakonhanrá chrókjuich'erá xra tí jie kíxín itsi ijnko yaon jínahya xitjahya sich'erá xra.

¹⁷ Chrókólontihyará. Chrókóxakonhanrá chrókuiénxinrá tí nkehe tóxrjínhin Inchéni.

¹⁸ Chrókókoanhýará kíxín tíha mé chrók'uitjáyanxínrá. Ichá jína chrókjuánjonrá kjuachaxin

chrók'uetuānhanrá Nchakuen Dios. ¹⁹ Chrónixjexínrá kíchuárá tí salmo la ko tí himno

la ko chrótsjerá la xíkaha kaín əsánrá chrókjuanchehérá kjuasáyé Inchéni. ²⁰ Jnkochríxín

chjehérá kjuasáya It'éni Dios kíxín kaín nkehe kjuanjon ch'án la ko chrókjuanchaxínrá

kjuasáya kjuachaxién ihnié Inchéni Jesucristo.

Jína chrók'uejókoni tí sín kjéhyani kíxín tinkáchónkini Inchéni

21 Títekákonhénrá kíchuárá kíxin ó tinkachónkirá Ìnchéni. **22** Tí chojni chjin chrókjuinchexiteyéhé xì sín éxí nchexiteyéhé sín Ìnchéni. **23** Tí chojni ntoa chóntha kjuachaxin ts'etuēnhen ichjién éxí Cristo mé ikja t'etuēnhen tí njinko. Kjäxin jehe ch'án kjuínchekaá ch'án tí njinko, mé tí cuérpoé ch'án. **24** Méxra éxí tí njinko nchexiteyéhé Cristo mé xíkaha kjäxin tí chojni chjin chrókjuinchexiteyéhé tí xì.

25 Tí chojni ntoa chrótjuèhe tí ichjién kíxin éxí Cristo la tjuèhe tí njinko la k'uenyákonhen ch'án. **26** Mé xíkaha kjuich'e Cristo kíxin sinchetjóá ch'án tí njinko mé kjuínchetjuáxin ch'án tí ntá kuíkitexín sín kjuächaxién itén ch'án. **27** Ntá tsjanjon ch'án tí jeheni éxí ijkno njinko imá jína chóntahya jie la ko chóntahya ninkehó nkehe náxrjónhya, mé ijkno njinko tjóá la ko ntoá. **28** Mé xíkaha tí chojni ntoa chrótjuèhe tí ichjién sín éxí tjuèxín ch'án cuérpoé ch'án. Tí nkexro tjuèhe ichjién mé kjäxin tjuèhe asén ch'án. **29** Kohya ninkexró nínkakonhen tí cuerpo kuénte. Kaín chojni la ine sín la t'ayakonhen sín cuérpoé sín la mé xíkaha Cristo t'ayakonhen tí njinko. **30** Kaínni mé k'ónani cuerpo kuénte ch'án. Jeheni mé ntøe ch'án la ko huésøé ch'án. **31** Ntáchro kíxin: "Méxra ijkno chojni ntoa mé tsítøhe it'é la ko iné kíxin tsakja ichjién la yói sín mé ts'óna éxí jnkokoá chojni."* **32** Tíhi mé ijkno nkehe imá jie tienxínhya ninkexró. Mé janhan xrjanka kuénte Cristo la tíha mé njinkoé ch'án. **33** Méxra kjäxin tjéxrjanka kíxin chojni ntoa t'ichjánxín tsotjuèhe ichjién sín éxí tjuèxín asén sín la tí chojni chjin chróchónthehe sín kjuasáya tí xì.

6

1 Jahará chánjanrá la t'ichjánxín sinchexiteyéhérá it'ará la ko inárá kíxin tjuèherá Ìnchéni kíxin tí xíkaha mé jína. **2** Tí nkehe saoxín tsík'ítuenhenni kíxin chrókuitekaonni ntá chrókuanjon Dios nkehe mé tihí: "Chrókjuíkosáyehérá it'ará la ko inárá **3** kíxin mé náxrjón chrók'uejorá la isé chrók'uejorá ntihi chjasintajni."*

4 Jahará it'é xjan la chrókjuinchekóníkkakonhyará tí xjaanrá. Íchá jína kíxin sinchek'ánkíxirá xjaanrá ijkno kjuaxrexinkaon jína kíxin ts'ánkíxín xjan tsinkáchónki xjan Ìnchéni.

5 Jahará chojni ch'e xrä mé chrókuítækákonhénrá tí lámøárá ntihi chjasintajni la chróchontehérá sín kjuasáya. Sich'eherá sín xrä éxí ch'eherá xrä Ìnchéni Cristo.

6 Chrókjuich'erá xrä jína la jehya kíxin tí tjejó sín tjejotsjehe sín kíxin ntá xíkahó ntá jína chrók'uejoxinrá. Náhí. Éxí ch'eherá xrä Cristo kaín asánrá sich'erá xrä kíxin mé xíkaha tóxrjínhín Dios. **7** Kaín asánrá chrókjuich'erá xrä éxí ch'eherá xrä Ìnchéni la jehya éxí chojni ó chrókjuich'eherá xrä. **8** Ó nohará kíxin jnkojnko nkexro kjónté ch'exón xrä o kjónté chojni t'ítuenhya mé jnkojnko sín ts'áyéhé sín tí nkehe tsjanjon Ìnchéni kíxin nkexrí tí xrä jína kjuich'e sín.

9 Tí jahará chojni lamó mé jnkójna chrókuétuēnhénrá tí sín t'ahará xrä la séchrókóninkákonhénrá sín. Xráxinkáonrá kíxin jahará la ko jehe sín mé jnkokón chrókjuinchexiteyéhérá Ìnchéni itjen nkaya nkajní kíxin kaín chojni la jnkokón t'íkon ch'án.

Tí nkehe tjinkitsa t'ayakonhen tí sín tinkáchónki Ìnchéni

10 A ntá jie kichó ni, nchefuérte asánrá kíxin tjejókoni Ìnchéni la tjetoan tí kjuachaxin kuénte ch'án. **11** Chrókuaáxinrá kaín tí kjuachaxin tsjanjon Dios kíxin ntá xíkahó jína chrók'uejorá la chrókjuit'ayahyará Tsochren. **12** Jehya tjanjónkoni chojni tsík'óna into la ko hueso. Náhí. Jeheni tjanjónkoni kaín tí nchäkuen tí jínahya siín chjasintajni. Tíha mé tjinkaon chrók'uetóan tí chjasintajni sitié. **13** Méxra chrókuákjárá kaín tí kjuachaxin kjuanjon Dios kíxin ntá chrókjuachará tí itsi tí yaon jínahya ntá tí xíkahó chrókjuich'erá

* **5:31** Génesis 2.24 * **6:3** Éxodo 20.12; Deuteronomio 5.16

la chr'éx_{in} la jína chrók'uejorá. ¹⁴ Nchefuérte əsánrá. Jína chrók'uejorá. Chrókuítékáonrá tí itan chaxín kíxin tí nkehe ntoá mé chrók'uayakonhanrá. ¹⁵ Méx_{ra} listo chrók'uejorá sátsjichronkárá tí tan tjanjon kjuaxróxin. ¹⁶ La qantsí tjetoan chrókuinkachónkirá Ìnchéni. Tíha mé chrok'uinkákonhen tí chica flecha tsochr'án Tsochren. ¹⁷ Tí chrókuaáxinrá la táha éxi yóh_e ijnko chica casco t'ayakonhen ikja chojni la tí itén Dios la éxi yóh_e ijnko chica espada mé tjanjon Nch_{aq}kuen Dios. ¹⁸ La ko kjaxin chrókuítqéhyará chrónixjehérá Dios la jnkochríxín chrókjuanchehérá ch'án kaín nkehe t'ichjánxínhanrá la chrokjuan-chatóxixínrá Nch_{aq}kuen ch'án. Chrók'uejotsjehérá la chrókjuanchará kíxin tsjinkitsa Dios kaín tí sín tinkáchónki ch'án. ¹⁹ Chrónóehérá ch'án kíxin kjaxin janhan tsjinkitsana ch'án tsjanjon ch'án tí tan t'ichjánxín tsoníxja janhan kíxin ntá janhan qantsí jína chrónixja kíxin ntá tsinhin sín tí nkehe ninkexró k'uénoehya kíxin nkexrí tjen tí itén ch'án tsaáxin chojni. ²⁰ Dios mé ichr'ánnna tsoxrjanka tí itén ch'án, mé xíkaha tjéchjinaxián ijie. Nixjehérá ch'án kíxin jína tsoxrjankaxián tí itén ch'án la ko ninkexró tsochrakuanhya.

Kjuixixín nixja ch'ín Pablo

²¹ Kíchóni Tíquico, tí nkexro imá tjuèheni la ko xráxín ch'ehe xr_a Ìnchéni mé tsochenkará ch'án tí jahará nkexrí tjén la ko nkexrí tí xr_a tjét'a. ²² Mé xíkaha tétuanh_a ch'án sátsjitsjehe ch'án tí jahará kíxin tsocchrónka ch'án nkexrí tjejóni la xíkaha chrókócháhará.

²³ Tjáncháh_a It'eni Dios la Ìnchéni Jesucristo kíxin tsocchjéhe ch'án kaín kíchó ni kjuaxróxin kíxin tsotjuèhe kíchó sín la ko tsinkáchónki sín ch'án. ²⁴ La ko kjuasáyé tí jehe ch'án sincheyaon ch'án kaín tí sín chaxín tjuèhe Ìnchéni Jesucristo. Mé xíkaha tsoxiteyá. Amén. Ó tjen.

Tí xroon ikjin ch'ín Pablo chr'éhen ch'án tí sín siín chjasin Filpos

Ch'ín Pablo ikjin xroon k'uáyéhe tí ninko chjasin Filpos

¹ Janhan Pablo la ko Timoteo ch'eheni xra Jesucristo, mé ikjinni tí xroon i chr'anhánrá kaín tí jahará kichó ni tinkachónkirá Cristo Jesús tjejorá chjasin Filpos la ko tí sín t'etqan kuènte ninko ntiha. ² Tjanchiani kixin It'éni Dios la ko Inchéni Jesucristo kjuasayé ch'án imá chrókjuincheyaonrá ch'án la ko chrók'uayéhérá kjuaxróxin.

Ch'ín Pablo tjechrónóehe ch'án Dios kixin tí sín tinkáchónki Jesús ntiha

³ A ntá tió xráxinkavan tí jahará la imá tjahá Dios kjuasaya ⁴ la ko níxjahá Dios la imá chàna tjáñcháhá ch'án kixin tsjinkitsa ch'án kaín tí jahará. ⁵ Juhará la kjuinkitsará tió kjuàkua tí tan jína tí sáoxín kuinhínrá itén Dios la naxa tjeotjinkitsará ijie. ⁶ Ó nòna chaxín kixin xikaha Dios ó kjuankíxin ch'án ch'e ch'án xra jína kixin kuítékaonrá mé xikaha naxa tsjintaxín sich'e ch'án tsjixrakájia tí yaon tsokjan Jesucristo. ⁷ Jína kixin tjenkayáxian kuènte kaín tí jahará. Méxra xikaha imá tjuahará. Juhará la ko janhan la jnkokón kjuachaxin k'uáyéheni la kjonté janhan tjéchjina o itjén tí tjejó tí sín t'etqan tjéxrjanca kixin jína tí tan tsaáxinni. ⁸ Dios la ó nohe kixin imá tjinkavan chrók'uíkuān kaín tí jahará kixin éxi tjuáxinrá Cristo. ⁹ Tjáñcháhá Dios kixin tsjinkitsa ch'án tí jahará kixin qantsí má chrótjuéhérá ch'án la ko chrók'uánkí tí kjuaxrexinkaon kuéntará kixin qantsí chrókuiénxinrá kaín nkehe. ¹⁰ La ntá chrókónohará chrókuákjárá tí nkehe jína. A ntá tí xikaha chrókjuich'erá la jína tjóá chrók'uejorá la ko kohya nkehe chrókjuanchia jié tió tsokjan Jesucristo. ¹¹ Méxra jahará chrókjuich'erá xra jína éxi ijkno nkehe jína chrók'óna kixin kjuasayé Jesucristo la ntá xikaha la chrókjuíkosayéhérá Dios.

A ntá janhan la tjéchonxian Cristo

¹² Kichóni tjinkavan tsionohará kixin tí nkehe kjuasótexinna la kjuinkitsa kixin kuínhin chojni tí itén Dios tsaáxinni. ¹³ Kaínxín tí chojni siín palacio la ko kaín tí í so sín mé nohe sín kixin tjéchjinxaián kixin tinkachónkia Jesucristo. ¹⁴ A ntá tí tjéchjina la itsjé tí sín kichó ni qantsí má kóxrjínhin sín tjako sín itén Inchéni la í chrakonhya sín tinkáchónki sín ch'án.

¹⁵ A ntá chaxín iso sín nixja sín itén Cristo kjánchó chjinoxínhin sín kixin tjinkaon sín chrókjuachaxinna sín. A ntá í so sín tjako itén ch'án kixin tjinkaon sín jína chrókjuinkitsana sín. ¹⁶ Kjánchó iso sín tjinkaon sín chrókjuako sín kixin chrókjuacha sín la ntá kénhyá asén sín tjako sín. Mé xikaha ch'e sín kixin tjinkaon sín chrók'uekana sín qantsí má jié kixin naxa tjéchjina. ¹⁷ La í so sín nixja sín kuénte Cristo kixin tjuéhe sín ch'án la ko tjuana sín la ó nohe sín kixin ntihi tjén kixin tsroxrjanca tí itan tsaáxinni. ¹⁸ Kjánchó ántosenná kjonté á chaxín kaín asén sín tjako sín o náhí, la imá chàna kixin chrónka sín tí tan jína kuénte Cristo la qantsí má chéhé asenná.

¹⁹ Ó nòna janhan kixin kjonté kaín nkehe tsónna la kjonté xikaha la tsaáxinná kixin kjuassayará jahará tjejónixjehérá Dios la ko Nchakuen Jesucristo mé tjetjinkitsana.

²⁰ Jína tjéchonhan kixin Dios la tsítóehya tí janhan kixin ichréni nkehe jinahya chrókóna. Tjinkavan tsochonta kjuachaxin kixin jína tsonixja kaín asenná nkayakon chojni. Ntá xikaha senó la xikaha ijie tió ts'ikon chojni tí janhan la tsónoexín sín kixin Cristo imá chóntha kjuachaxin kjonté á naxa tjéchuán o á ó tsík'lena. ²¹ Kixin janhan na Cristo tjéchonxian la ntá kjonté ts'enxián xikaha la mé chrókjuácha. ²² A ntá tí naxa tsjak'é naxa tjéchuán ntá naxa jína sit'ahá Inchéni xra. Nonahya nkehe tí chrókuákjaá, á chrók'uén o á chrókjuak'échuán. ²³ Imá xra chrókjuenkayáxian chrókuákjaá tí yaá nkehe. Janhan na tí chrók'uén la chrókjuak'ékjan Cristo. A ntá janhan la ntáxrjan kixin íchá jína tíha.

²⁴ Kjánchó t'ichjánxín naxaq chrókjuak'é kíxin naxaq chrókjuínk̄itsa tí jahará. ²⁵ Méxrə ó nòna kíxin naxaq tsitona tí tjejorá kíxin chrókjuínk̄itsa ti jahará kíxin ntá qantsí chrókónohará la chrókócháhará kíxin jína chrókuinkachónkirá Închéni. ²⁶ Ntá tió tsjasán janhan ts'ejóni ínaá la imá tsocháhará la tsjanchehéra kjuasáyé Jesucristo.

²⁷ A ntá jahará chrókjuákoxinrá chrók'uejorá jína éxi ntáchro tí tan kjuákoxin Închéni Cristo. Mé xíkaha tí tsjasántsjahárá o náhí la tjínk̄avan chrókuínhān kíxin naxaq imá tinkachónkirá Cristo la ko jnkokoá tjenkayáxinrá la ko jnkokoá tjejoch'erá xra tjàkorá tí itan jína tsaáxinni. ²⁸ Chrókuítóéhyará kíxin tí sín nínkakonhanrá chrókjuintachrakonrá sín. Tí xíkaha chróchrankonhyará la chrókónoexín sín kíxin ts'itjáyan sín, a ntá chrókónoxín kíxin jahará mé chaxín tsaárá. Tíha mé Dios tsjinkitsará. ²⁹ Ó kuitonhanrá tí kjuachaxin kíxin tsinkachónkirá Jesucristo la ko kjaxin kuitonhanrá kjuachaxin tsjasótiaxínrá kíxin jahará mé tinkachónkirá ch'án. ³⁰ Jahará la ko janhan jnkokón ch'eni xra. Jahará ó k'uíkonrá senó nkexrí kjuit'a xra la ó kuinhínrá ijie kíxin naxaq tjét'a xra kjónté nínkakonna sín.

2

Kuítóhe Jesús tí kjuachaxin chrók'uetqan ch'án ntá ijie imá tjetoan ch'án

¹ Tí chaxín tí Cristo nchexraxinkaonrá la tí chaxín Cristo tjuáhará ch'án nchecháhará ch'án la tí chaxín tí Nchákuén ch'án xrikoárá la tí chaxín nohará kíxin tikonóahará ch'án² la nchechánará kíxin jnkokoá chrók'uejokoará kíchuárá la ko jnkokoá chrótjuéhérá kíchuárá la ko jnkokoá chrókjuenkayáxin nchákuánrá la ko jnkokoá xra chrókjuich'erá. ³ Chrókjuenkayáxinhyará chrókuétoanrá la ko chrókjuinchehnkehýará. Náhí. Chrók'ónará chojni t'etqanhyá. Chrók'uikonrá éxi qantsí tjetoan tí í so sín, a ntá kánhyó tjetoan tí jahará. ⁴ Ninkexró chrókjueyá tí nkehe kuénte jehó. Náhí. Chrókjuéyará tí nkehe chrókjunk̄itsa tí í so chojni.

⁵ Jahará chrókjuenkayáxinrá éxi kjuenkayáxin Cristo Jesús. ⁶ Jehe ch'án chóntha ch'án kaín kjuachaxin kuénte Dios la kjónté xíkaha la tjinkakonhya ch'án chrókjuinchehyóhe ch'án éxi Dios. ⁷ A ntá kuítóhe ch'án ntáha tí kjuachaxin k'uéchóntha ch'án la k'óna ch'án ijkno chojni ntoa chjasintajni la ko kjuich'e ch'án xra. ⁸ La éxi ijkno chojni k'uetoanhya kjuák'e ch'án la kjuínchexiteyéhe ch'án Dios kaín qasén ch'án kíxin ik'uén ch'án, mé k'uénxin ch'án tí ntacruz. ⁹ Méxrə Dios imá kjuikosáyehe tí jehe ch'án la ko kjuínchek'in ch'án ijkno ihnié imá tjetoan. ¹⁰ Kíxin ntá tsinhin kaín chojni tí ihnié Jesús ntá ts'ejóxin toch'in sín, mé tí sín siín nkaya nkajní la ko ti sín siín chjasintajni la ko tí chojni siín chrínkí nche. ¹¹ La ko kaín xín chojni tsochrónka sín kíxin Jesucristo mé Înché sín mé xíkaha tsjikosáyehe sín It'éni Dios.

Tí sín tinkáchónki Cristo tóyóhe éxi xrohi t'inkaséyanxín chjasintajni

¹² Jahará kíchó ni imá tjuáhará la xráxín kjuínchexiteyànará tí k'uék'ejóni. A ntá ijie la chrókjuinchehexiteyànará kjónté ijkín tjén. Chrókuítóéhyará tí nkehe tsjanjon kjuachón la chrók'uayakonhénrá jnkójína ¹³ kíxin Dios ntaxraxinkaonrá sich'erá tí nkehe jína tinkaon ch'án.

¹⁴ Kaín xra ch'erá la chrókóninkákuéñhyará kíchuárá la ko chrókjontahyará kíchuárá ¹⁵ kíxin tsókohya ninkexró tsontáchro kíxin jahará la chontará jíe. Kíxin jahará la mé tí xjeen Dios chróchontahyará jíe, la tjejorá tí siín tí sín jínahya tjasin jíe. Na ntá jahará chrók'uinkaséyanxín tí jehe sín éxi tí konotsé t'inkaséyanxín tí chjasintajni sítié. ¹⁶ Méxrə jahará chrók'uayakonhénrá jína tí tan tjanjon kjuachón. Tí xíkaha chrókjuinchehexiteyárá jnkójína ntá tió tsi Cristo tsochéhe qasenná kíxin xíkaha xra tjejoch'erá kíxin ntá tsónona kíxin jehya ó chónkó kjuak'ékjít'a xra. ¹⁷ Kjónté chrók'uénxián la éxi nkehe chrókjuanchatóxixínrá Dios chrók'uikonrá tí janhan. Mé xíkaha chrókjuintaxíñ sín nkehe chróchjehérá ch'án kíxin tinkachónkirá ch'án, la ntá mé janhan mé tsochána la ko

tjínkavan kíxin kaín rá xíkaha chrók'uayéhérá kjuachéhé. ¹⁸ Méxra chrókócháhará jahará kjaxin la chrók'uayéhérá éxí tí kjuachéhé chonta.

Ch'ín Timoteo la ko ch'ín Epaafroditó

¹⁹ Chonhan kíxin tí tsjanjon Închéni Jesús kjuachaxin ntá tjoka tsochr'an ch'ín Timoteo tsijiitsjehe ch'án tí jahará kíxin ntá tsochàna tsinhàn nkexrí tjejorá. ²⁰ Kohya í jnko nkexro chrókjuenkayáxin éxí tí janhan la ko chrókóxakonhen kíxin jahará chrók'uejorá jína. ²¹ Kaín tí í so sín tjejá sín tí nkehe tóxrjinhìn sín ó la jehya tí nkehe tóxrjinhìn Jesucristo. ²² A ntá jahará ó nohará kíxin ch'ín Timoteo ó kjuakoxin ch'án kíxin jína asén ch'án kíxin jehe ch'án kjuit'akian ch'án xrä kjuakoni tí tan jína. Éxí ijkno xjanna xíkaha kjuinkitsana ch'án. ²³ Mé xíkaha tjínkavan tsochr'an ch'án tsijiitsjehe ch'án tí jahará tió tsónona nkexrí tsji tí xrä kuéntana. ²⁴ La ko kjaxin chonhan kíxin Închéni tsjinkitsana kíxin tjoka tsjasán kjaxinna.

²⁵ A ntá kjaxin tónhen asenná kíxin t'ichjánxín tsochr'an kichó ni Epaafroditó tsjiji ch'án tí tjejorá. Jehe ch'án mé jnkokoá ch'ekoni ch'án xrä kjónté nínkakonhenni chojni. Juhará k'uéchr'anrá ch'án ntihí kíxin jehe ch'án tsjinkitsana ch'án kaín nkehe tjínkavan.

²⁶ Imá tóxakonhen ch'án tsijiitsjehe ch'án tí jahará kíxin ó nohe ch'án kíxin tsíkínhínrá kíxin k'uéníhi ch'án. ²⁷ Chaxín k'uéníhi ch'án ó mero chrók'uen ch'án, q ntá Dios kuikónóhehe tí jehe ch'án kjánchó jehya jehó ch'án, kjaxin kuikónóana Dios tí janhan kíxin kánhyó chrók'uavá. ²⁸ Méxra tjínkavan tsochr'an ch'án kíxin ó nóna kíxin tsocháhará ts'ikonrá ch'án ínaá la ko xíkaha janhan í kánhyó chrók'uavá. ²⁹ Imá chrókócháhará chrókjuiji ch'án kíxin jehe ch'án mé ijkno kichó ni tinkáchónki Închéni la ko chrókjukosáyehérá ch'án éxí chrókjukosáyehérá kaín tí í so sín éxí jehe ch'án. ³⁰ Jehe ch'án ó mero chrók'uenxín ch'án tí ch'ehe ch'án xrä Cristo. Mé siín kjuaxikaon chrók'uenxín ch'án kíxin jehe ch'án kjuinkitsana ch'án kíxin jahará xitjahya ts'inkará tsjinkitsará tí janhan.

3

Tí nkehe chaxín sínkí

¹ A ntá ijie, kichó ni, chrókócháhará kíxin jahará la kuénte Închéni. A ntá tí janhan la xrähya tsokjatee tsokjian tí nkehe ó kjian kíxin tíha la chrókjuinkitsa tí jahará.

² Chróchontará cuidado ti sín ch'e jínahya éxí konja la tóchrít'ó sín cuérpoé sín. ³ A ntá tí chojni chaxín chóntha xroye la mé tí jeheni kíxin jeheni chaxín xraxinkakonxínni Dios kjuachaxién Nchakuen ch'án la ko imá chéheni kíxin tinkáchónkini Închéni Jesucristo. Jehya kíxin chrókuinkáchónkini kíxin tí cuérpoéni chrókóchrínjinni. ⁴ A ntá janhan kjaxin jína chróntárxjan kíxin chrókóchrít'ó tí cuérpoé chojni. Ninkexró antsí chróchóntha kjuachaxin kíxin chrókuitekaon tí nkehe a. ⁵ Janhan mé tsíkana xroye tí k'uéchonta ijní yaon la ko janhan mé tikaníxian tí sín israelita la tsík'axrjeníxina tí sín tsík'axrjeníxin ch'ín Benjamín la kjaxin janhan mé hebreo la ko t'aná la naná la hebreo sín. La ko janhan mé tinkachónkia tí ley éxí tinkáchónki tí sín fariseo. ⁶ A ntá imá k'uénínkakonhan k'uéchonkíha tí sín tinkáchónki Jesú la ko imá kjuintaxiteyáha tí ley la kohya ninkexró tsontáchro kíxin chaxínhyá tihá. ⁷ Ntá kaín tíha la tí ósé k'uékjeneckayáxian janhan kíxin sínkí tíha, q ntá ijie la tinkachónkia Cristo la ntá tí nkehe k'uékjeneckayáxian kíxin sínkí tíha. ⁸ La kjaxin kaín xín nkehe t'íkuán éxí chónkó tíha kíxin antsí má tjetoan tsochoxián Închéni Jesucristo. Kaín kjuaxrexinkaon jínahya k'uéchonta la kjuintak'itjáyan kíxin ijie ó tinkachónkia Cristo la kaín xín tí nkehe k'uéchonta la t'íkuán éxí chjiníno ó kíxin ntá xíkaha jína chrókjuak'ékian Cristo. ⁹ Chrókóchàna kíxin jnkokoá chrók'uejókoni ch'án. Tjéyahya kíxin tí ley chrókjuinxín ijíeni tí chrókjuinchexiteyéheni. Náhí. Tinkachónkia Cristo la tsaáxinni kíxin Dios la tsjakjìn tí ijíeni kíxin tinkáchónkini ch'án. ¹⁰ Tí nkehe tjínkavan na tsochoxián Cristo la ko tsochonta tí kjuachaxin kjuakoxin ch'án tió xechón

ch'án la ko tjínk̄avan tsjasótexinna éxí k̄juasóte ch'án la ko kjónté chrók'uénna éxí k'uénxin ch'án ¹¹ k̄ixin ntá tjínk̄avan tsjácha tsoxechónna ínaá.

Ch'ín Pablo tjinkaon chrókjuacha ch'án

¹² Ntáxrjanhya k̄ixin k̄juácha kaín tíha la ko ntáxrjanhya k̄ixin imá ntoá tjén. Kjánchó janhan tjínk̄avan tsjácha kaín tíha k̄ixin Cristo Jesú斯 mé k̄jueyána ch'án senó xikaha.

¹³ Kíchóni, ntáxrjanhya k̄ixin janhván k̄juácha tíha. Náhí. Janhan mé ts'itjáyanna kaín xín tí nkehe ó kuítóhe senó la t'ichjánxín kaín asenná tjichráhá tí nkehe naxqá t'itjáyan tsjácha.

¹⁴ K̄ixin xikaha ntá chrókjuácha chrók'uayáhá kaín tí nkehe jína tsjanjon Dios. Jehe ch'án la sinchexiteyá kaín tíha k̄ixin tinkachónkia Jesucristo.

¹⁵ Kaínni tí tinkachónkini Jesú斯 kaín asénni la méxra xikaha chrókjuenkayáxinni. A ntá tí ókjé nkexrí tjenkayáxinxrá la Dios mé nchexraxinkaonrá ch'án k̄ixin ntoáhya tíha. ¹⁶ A ntá t'ichjánxín chrók'uejóni éxí tí nkehe ó k̄juachani.

¹⁷ Kíchóni, chrók'uejorá éxí k̄juak'ē janhan la ko chrótsjehérá nkexrí tjejó tí so chojni tjejóch'e éxí k̄juakoni k̄ixin xikaha k̄juakoharáni tí jahará. ¹⁸ Nchónhya xrjanxakián senó la ntá xrjanxa ínaá la imá tsjanxa k̄ixin siín nchónhya sín tjejó sín éxí nínkakonhen sín tí Cristo k'uénxin ntacruz. ¹⁹ Tí sín a mé ts'itjáyan sín. Tí dios kuénte sín la mé tí nkehe ntáchro asén sín ó la ko tjinkaon sín chrókjuinchekexín sín tí nkehe chrókósuexin sín. Jehó tjenkayáxin sín tí nkehe siín chjasintajni ó. ²⁰ A ntá jeheni kaín ni la mé chojni kuénte nkajní la tjejóchónhenni k̄ixin ts'inkajinxín nkaya nkajní tí nkexro tsaáxinni, mé Ínchéni Jesucristo. ²¹ Ntá jehe ch'án mé tsjinkí ch'án tí cuerpo náxrjónhya chóntani k̄ixin ntá tí cuerpo chóntani tsoyóhē éxí tí cuerpo náxrjón chóntha ch'án. Tíha mé tsoxiteyá k̄juachaxién ch'án jié k̄ixin ó chóntha ch'án k̄juachaxin ts'etuenhen ch'án kaín xín nkehe.

4

Jnkochríxín chrókócháhará k̄ixin tinkachónkirá Ínchéni

¹ Jahará kíchó ni imá tjuáhará la ko imá tjínk̄avan chrókjuasántsjahárá tí jahará k̄ixin jahará imá nchechànará k̄ixin jahará mé éxí ijk̄o nkehe ó k̄juácha. Méxra jína chrók'uejorá chrókuinkachónkirá Ínchéni k̄ixin tjuáhará kíchó ni.

² Xrjanóahá tjan Evodia la ko tjan Síntique k̄ixin jnkokoá chrókjuenkayáxin sín k̄ixin jehe sín la jnkokoá kíchó sín k̄ixin tinkachónki sín Ínchéni. ³ Jaha la jína k'uéjóni kjuich'eni xra, méxra xrjanóaha tjínk̄itsa tí sín chjin kíchó ni k̄ixin jnkokoá chrókjuenkayáxin sín. Jehe sín kjaxin kjuich'e sín xra tió k̄juakoni tí tan jína tsaáxinni. Koí tí ch'ín Clemente la ko í so sín kjuich'ekoni xra. Tí ihnié sín la ó ts'íni xra ts'íni ihnié chojni tsaá.

⁴ Nchechéhérrá asánrá jnkochríxín k̄ixin tjejókoará Ínchéni. Ínaá kjatee xrjanxa nchechéhérrá asánrá. ⁵ Kaín chojni chrókónohe k̄ixin jahará la chojni jínará. Chróraxinkáonrá k̄ixin í séhya tsokjan Ínchéni.

⁶ Tóxakuanhyará ninkehó. Ichá jína chróchénkará Dios kaín xín nkehe la chrókjuancheherá ch'án kaín nkehe t'ichjánxínhanrá la kjaxin chrókjuancheherá ch'án k̄juasáya. ⁷ A ntá jehe ch'án mé tsotjáhará kjuaxróxin. Jeheni tsjachahyani tienxínni tí kjuaxróxin kuénte ch'án k̄ixin imá ijié tíha. Tí kjuaxróxin mé ts'ayakonhen asánrá la ko ts'ayakonhen tí kjuaxrexinkaon kuéntará k̄ixin jnkokoá tinkachónkirá Cristo Jesú斯.

Tjenkayáxinxrá tí nkehe jína

⁸ Méxra tsjixixín tétuñhanrá kíchó ni. Tjenkayáxinxrá kaín tí nkehe chaxín, la ko kaín tí nkehe k̄juasáya, la ko tí nkehe ntoá la ko tí nkehe jína. Mé xikaha tjenkayáxinxrá kaín xín tí nkehe náxrjón la ko tí nkehe tóxrjínhín Dios.

⁹ Chrókjuich'erá kaín tí nkehe kjuákohará la ko tí nkehe kuínhínrá xrjanxa la ko tí nkehe kuétuñhánrá la ko tí nkehe k'uíkonrá kjuít'a, mé kaín tíha chrókjuinchexiteyárá la ntá tí Dios tjanjon kjuaxróxin mé ts'ejókoará ch'án.

Tí ofrenda kjuanjon tí sín filipenses tsjinkitsa sín tí ch'ín Pablo

¹⁰ Inchéni imá nchechàna kíxin jahará xráxinkáonrá tí janhan ínaá. Ntáxrjanhyá kíxin tsík'itjáyanhanrá tí janhan kíxin jahará xitjahya k'uékjinkitsará tí janhan. ¹¹ Jehya kíxin ntáxrjan tíha kíxin imá t'ichjánxínna kíxin janhan na ó kuànnna kjuaxróxin tjén kjónté tí nkehe chonta ó. ¹² Janhan ó kuànnna tjén kjónté nóana la ko kjaxin ó kuànnna tsochonta itsjé nkehe. Kjónté ichrén nkehe ts'átsinka la ó tsjácha kjónté á kjoné jína o náhí la kjónté á chróchonta ichrén nkehe o á chróchontahya ninkehó la ántosénna. ¹³ Kaín xra tsjácha sit'a kíxin Cristo tsjinkitsana. ¹⁴ Kjánchó jahará jína kjuich'erá kíxin kjuinkitsará kjuánjonrá nkehe t'ichjánxínna.

¹⁵ Tió sákjuíxian estado Macedonia la kjuankíxian kjuàkuá tí tan tsaáxinni ínaá la jahórá tí ninko chjasin Filípos ichr'anrá chichaon k'uayáhá kíxin cháhará kjuákohárá itén Dios. ¹⁶ Kjaxin tió naxq kjuak'é chjasin Tesalónica la jahará ichr'anrá chichaon iso veces kíxin kjuinkitsará tí nkehe k'uichjánxínna ntiha. ¹⁷ La jehya kíxin tjinkaván kíxin jehó nkehe chrók'uayáhá. Náhí. Jehí tjinkaván kíxin jahará antsí má chrókjuich'erá tí nkehe tjinkaon Dios kíxin ntá antsí chrókjuachará. ¹⁸ Ó k'uayáhá kaín nkehe tsíkjánjonrá la antsí itsjé chonta. Ó k'uayáhá tí nkehe tsíchr'anrá mé tí nkehe kuikao ch'ín Epafroditó, la kaín tíha la ó tsjácha. Tíha la éxi yóhé ijnko nkehe xraxé náxrjón chróchjehérá Dios mé éxi ijnko iko chrók'oyánrá imá chrókóxrjinhin ch'án. ¹⁹ Tí Dios kuéntaona mé tsotjáhará kaín xín nkehe naxq t'itjáyan tsákjárá kíxin chóntha ch'án kaín xín nkehe imá náxrjón tjete la tsjanjon ch'án kíxin jahará la tinkachónkirá Cristo Jesús. ²⁰ Kjuasáyé It'éni Dios jnkochríxín. Mé xikaha tsoxiteyá. Amén.

Tsjixixín nixja ch'ín Pablo

²¹ Janhan tjinkaván tsonixjehérá kaín tí sín tinkáchónki Dios la ko Jesucristo ntiha. Tí sín kíchó ni tjejókoni ntihi nixjahará sín. ²² Kjaxin kaín tí sín tinkáchónki Dios la ko tí sín ch'ehe xra tí ch'ín t'etqoan romano mé nixjahará sín. ²³ Tjáncháhá kíxin Inchéni Jesucristo mé chrókjuintayaonrá ch'án kaín rá. Amén. Ó tjen.

Tí xroon tsíkjín ch'ín Pablo chr'éñen ch'án tí sín chjasin Colosas

Ch'ín Pablo ikjin xroon k'uáyéhé tí ninko chjasin Colosas

¹ Janhan Pablo tsíkjeyána Jesucristo t'ahá ch'án xrä kíxin xíkaha tjinkaon Dios, la ko kichó ni Timoteo ² mé ikjinni tí xroon i tsochr'áñharáni tí jahará tsíkjinchetjóárá Dios la ko kuítekáonrá Jesucristo tjejorá chjasin Colosas. Kjuasáyé It'éni Dios chrókjuintayaonrá kíxin kjuaxróxin chrók'uejorá.

Ch'ín Pablo tjanchehe ch'án Dios kjuasáya kíxin kaín tí sín tinkáchónki Cristo

³ Jnkochríxín tjancheheni kjuasáya Dios la ko tjanchari kíxin chrókjunkitsa ch'án tí jahará mé jehe ch'án It'é Ínchéni Jesucristo. ⁴ Ó kuínhinni kíxin jína tinkachónkirá Ínchéni Jesucristo la ko tjuéhérá kaín tí sín ó tsíkjinchetjóá Dios. ⁵ Mé xíkaha tjejochonhénrá kíxin ts'ayéhérá tí nkehe chóntha Dios tjen nkaya nkajní. Jahará la xíkaha tjejochonhénrá kíxin tjejotinhínrá tí tan chaxín kuénte Dios tsaáxinni. ⁶ Tí tan i mé kuínhin chojni la itsjé sín tinkáki tekaon sín la tinkák'ánkí tí kjuachaxin kuénte Dios kuenté chjasintajni. Mé xíkaha kónhen tió kuinhínrá la ko kuítekáonrá kíxin chaxín tjuahará Dios. ⁷ Tíhi mé kjuákoñhará kichó ni Epafras. Jehe ch'án la jnkokoá kjuich'ekoni ch'án xrä kíxin jehe ch'án la jína ch'ehe ch'án xrä Cristo kíxin xíkaha tjinkitsa ch'án tí jahará. ⁸ Jehe ch'án mé kui ch'án ntihi chrónka ch'án nkexrí tjuéhérá kíchuárá kíxin Nchákuén Dios tjinkitsa tí jahará.

⁹ Méxra xíkaha tí yaon tió kuínhinni nkexrí tjejorá la titóehyani tjancheheni Dios kíxin tsjinkitsa tí jahará kíxin tsønohará jína nkexrí tóxrjíñhín ch'án la ko tjanchari kíxin tsjanjon ch'án kjuachaxin kíxin tsiéñxinrá kaín nkehe kuénte ch'án. ¹⁰ Tjancheheni ch'án kíxin jína chrók'uejorá kíxin tinkachónkirá Ínchéni la ko chrókjuitóéhyará chrókjuch'erá exí tóxrjíñhín tí jehe ch'án. Ntá jína chrókjuchará chrókjuch'erá xrä kuénte ch'án la ntá chrókónohará jína nkexrí tjen Dios. ¹¹ Tjanchari kíxin jehe ch'án chrókjunkitsa kíxin chrók'uejorá fuerte kíxin tí kjuachaxin jié kuénte ch'án kíxin ntá chrókjuchará la kjónté ichréñ nkehe chrókónhanrá la chrókóninkákonhyará. ¹² La ko chrókócháhará chróchjehérá kjuasáya It'éni Dios kíxin kjuanjon ch'án kjuachaxin kíxin ts'ayéhëni tí nkehe tí tjen tí t'inkaséyan mé tí nkehe ts'ayéhe kaín tí sín tsíkjinchetjóá tí jehe ch'án. ¹³ Jehe ch'án mé kuakitsjekjanxínni ch'án tí sítié la ntá kjuanjon ch'án kjuachaxin ts'ejóni tí t'etoan tí Xjeen ch'án, tjuéhe ch'án. ¹⁴ Jehe ch'án kjuínchekaáni ch'án kíxin k'uenyákonhenni ch'án la tí ijnié ch'án mé kjuenkä ch'án tí ijíeni.

Kjuaxróxin ts'ejókoni Dios kíxin k'uenyákonhenni Cristo

¹⁵ Exí tsjehe Cristo mé xíkaha tsjehe Dios kjónté xitjahya t'ikonní tí jehe ch'án. Cristo la ó xráxín tjen tí naxä t'ónahya ninkehó. ¹⁶ Kjuächaxién tí jehe ch'án kjuich'énaxín Dios kaín tí nkehe siín nkajní la ko chjasintajni la ko kaín tí nkehe naxä t'ikonhyani la ko tí nkehe ó t'ikonní. Kjaxin kaín tí sín ángel t'etoan la ko chóntha kjuachaxin la mé jehe ch'án kjuich'éná ch'án kíxin sich'ehe sín ch'án xrä. ¹⁷ Cristo la ó xráxín tjen kjónté naxä t'ónahya ninkehó la jehe ch'án t'ayakonhen ch'án kaín nkehe siín kíxin tí kjuachaxin kuénte ch'án. ¹⁸ La kjaxin jehe Cristo mé tí kja t'etueñhen tí cuerpo mé tíha mé tí ninko. Jehe ch'án senó xechón ch'án kíxin jehe ch'án mé ts'etueñhen ch'án kaín nkehe siín. ¹⁹ Dios tjinkaon chróchjéhe ch'án tí Xjeen ch'án kjuachaxin exí tí kjuachaxin chóntha tí jehe ch'án. ²⁰ Kjaxin tjinkaon Dios kíxin kjuächaxién Cristo chrók'uixin kjuaxróxin nkuíxín mé chjasintajni la ko nkaya nkajní. Mé xíkaha tsjasin ch'án kjuaxróxin kíxin jehe ch'án kjuák'enkáni ch'án ntacruz ik'uén ch'án.

²¹ Jahará la ósé ikjín k'uék'ejorá la k'uéninkákonhénrá Dios kíxin tí nkehe jínahya k'uékjich'erá. A ntá jie la kjuaxróxin tjejokoará Dios ²² kíxin k'uenyákonhánrá Cristo, kjuasóte tí cuérpoé ch'án. Mé xíkaha kónhen ch'án kíxin ntá tsjanjon ch'án tí jahará ts'áyéhé Dios kíxin kjuíntatjóará ch'án, a ntá jie la chontahyará ninkehó jie. ²³ Méxra xíkaha chrókuítóéhyará chrókuinkachónkirá Ínchéni la ko chrókuítóéhyará tí nkehe tjejochonhénrá kíxin ó kuinhínrá tí tan tsaáxinni. Tí tan i mé ó chrónka chojni kuenté chjasintajni la ko janhan Pablo kjaxin tjínkitsa xrjanka xíkaha.

Ch'in Pablo ch'e ch'án xrq kuènte ninko

²⁴ Méxra ijie la tjasótexinna kíxin tí jahará la chàna kíxin xíkaha mé tsjintaxín tjasóte janhan kíxin tí nkehe t'itjáyan tí naxa chrókuasóte Cristo kíxin jehe ch'án mé kjuasóteyákonhen ch'án tí njinko mé tí cuérpoé ch'án. ²⁵ Mé xíkaha Dios kjueyána kíxin sit'a xrq kuènte njinko kíxin xíkaha tí xrq k'uetuanna ch'án kíxin ntá jína chrók'uejoxinrá tí jahará kíxin chrókjuintaxín chróxrjankaxián tí itan kuènte Dios. ²⁶ Tí nkehe ninkexró k'uénoehya tjemá ósé nchónhya nánó a ntá ijie kjuínchenohe Dios kaín tí sín tinkáchónki tí jehe ch'án. ²⁷ Dios tjinkaon chrókuinchenohe tí jehe sín tí nkehe tjemá náxrjón tjete ts'áyéhé tí sín jehya judío ijie. Tí nkehe k'uénoehya chojni la mé Cristo tjejókoará la jehe ch'án mé tjanjon kjuachaxin ts'ejochonhénrá ts'ayéhérá tí kjuachaxin jié kuènte ch'án.

²⁸ Jeheni mé chronkaxínni nkehe kuènte Cristo la nchexraxinkaonni kaín chojni la ko tjakoheni sín kíxin chrókuienxín sín jína. Ntá jnkojnko sín chrók'uánkí kjuaxrexinkaon kuènte sín kíxin tinkáchónki sín ch'án. ²⁹ Méxra xíkaha tí xrq it'a la kaín əsenná it'a xrq tí kjuachaxién chjína Cristo.

2

¹ Tjínkaván chrókónohará kíxin nchónhya xrq kjuit'a kíxin chrókjuínkitsa tí jahará la ko kjaxin tí sín tjejó chjasin Laodicea la ko kaín tí í so sín naxa t'ikonhya tí janhan. ² Tjínkaván kíxin jehe sín chrókóchéhé əsén sín la ko jnkokoá chrókjuenkayáxin sín chrótjuéhe sín kichó sín. Mé xíkaha chrók'uánkí kjuaxrexinkaon kuènte sín chrókuienxín sín jína kíxin ntá chrókónohe sín tí nkehe ninkexró k'uénoehya kuènte It'eni Dios, mé Cristo tíha. ³ Jehe ch'án chóntha kaín xín kjuaxrexinkaon kuènte Dios la jehe ch'án mé nohe ch'án kaín nkehe. ⁴ Kaín tíha xrjanka kíxin ntá ninkexró chrókjuit'ayahyará tí jahará kíxin tí náxrjón chrónixja sín ó. ⁵ Kjónté tjenhya tí cuerpo kuéntana tí tjejorá la ntá nchákuenná la mé tjen ntiha kíxin xráxinkaván tí jahará la chàna kíxin t'íkuán kíxin jína tjejorá naxa tinkachónkirá Cristo.

⁶ Méxra xíkaha kuinkachónkirá Ínchéni Jesucristo la mé xíkaha jnkokoá chrókjuenkayáxinkoará tí jehe ch'án. ⁷ Éxí ijkno nta tsíkji nuéé njinka mé xíkaha chrókuinkachónkirá tí jehe ch'án éxí kjuakohárá ch'án la ko chrókjuanchehérá Dios kjuasáya jnkochríxín.

Cristo tjanjon ijkno ntia nixin

⁸ Chrókjuitóéhyará kíxin ninkexró chrókjuit'ayahará kíxin tí nkehe ntoáhya chrókjuakohará sín. A ntá jehe sín chrónkahya sín éxí tjinkaon Cristo. Náhí. Tjako sín tí nkehe tjenkayáxin chojni chjasintajni ó la ko tjako sín tí kjuachaxin kuènte tí nkehe jínahya siín chjasintajni.

⁹ Kaínxín kjuachaxin chóntha Dios mé chóntha Cristo kjónté k'óna ch'án chojni. ¹⁰ La jahará chontará kaín kjuachaxin kuènte Dios kíxin ó tinkachónkirá Cristo. Jehe ch'án t'etueñhen ch'án kaín nkehe siín la ko t'etueñhen ch'án kaín nchákuuen t'etoan.

¹¹ Kjaxin tió kjuankíxinrá tinkachónkirá Cristo ntá jehe ch'án kjuanjon ch'án jiko xroye k'uayéhérá kjánchó jehya tí xroye kuènte tí cuerpo. Náhí. Kjuakjín ch'án tí jie k'uékóxrjíhanrá la kjuíntakaárá ch'án, mé tíha mé tí xroye kjuanjon Cristo. ¹² Tí kuúkiterá jahará mé xíkaha éxí xrvákoárá Cristo. Ntá ó xechón tí jehe ch'án la kjaxinrá xechónrá

kixin ó kuítækáonrá tí kjuachaxin kuènte Dios kixin Cristo la ó xechón ch'án ínaá. ¹³ Jahará ósé la éxí tsík'en əsánrá k'uék'ejorá kixin tí jie k'uéchontará kixin k'uéchonhyará Dios la k'uéchontahyará xroye kuènte ch'án. A ntá ijie la éxí xechónrá kixin Cristo kjuatṣen tí jie chontará. ¹⁴ Mé Dios kjuatṣen ch'án kaín tí nkehe tsík'etoan ch'án ósé kjuachahyani nchexiteyáni la ko kjuatṣen ch'án kaín tí jie k'uéchontani kixin Cristo kjuák'enkáni ch'án tí ntacruz la xikaha kjuatṣenxin ch'án tíha. ¹⁵ Cristo k'uényákonhenni ch'án la ntá kjuachaxin kuènte Dios kjuacha la kjuachahya ninkehó tí kjuachaxin k'uéchonta tí nchäkuén jínahya kixin jehe ch'án kjuíñchesuèhé ch'án tí sín jínahya noxín kixin jehe ch'án mé kjuacha ch'án.

Tjéyárá tí nkehe siín nkaya nkajní

¹⁶ Méxrä ninkexró chrókjontahyará kixin tí nkehe chrókjónterá o tí nkehe chrók'uirá o á tjíkosáyehérá tí yaon kia o tí nitjó nixin o tí yaon t'ok'éheni. ¹⁷ Kaín tí nkehe a la ó tóyóhó tí nkehe itsi. A ntá tí nkehe chaxín la mé Cristo tíha. ¹⁸ Méxrä chrókuítóéhyará kixin ninkexró chróntáchro sín kixin ts'itjáyanrá kixin tinkachónkihyará tí sín ángel, tsixro sín. Tí sín a mé chrónkaxín sín tí nkehe éxí kotáchrién sín t'ikonxín sín la nchehnke sín kixin tí nkehe t'axrjeníxín kja sín ó. ¹⁹ A ntá jehe sín la chaxínya tinkáchónki sín Cristo kixin jehe ch'án mé tí kja t'etueñhen kaín ni la jehe ch'án mé ch'éna ch'án jnkokqá cuerpo kuènte ch'án kaín ni la nchek'ánkí ch'án tí cuerpo kixin jehe ch'án t'ayakonhenni ch'án kixin xikaha tjinkaon Dios.

²⁰ A ntá jahará la ó k'uénkoará Cristo la kuitohérá tí nkehe k'uék'etoan kuènte chjasintajni ó. ¿A ntá nkekuénté naxa tjejorá éxí tí chojni siín chjasintajni chrókuíñchexiteyárá tí nkehe t'etoan sín? ²¹ Mé xikaha t'etoan sín kixin jahará chrótsehyará tíha la chrókjóntehyará tí nkehe la chrókuákjháyará nkehe. ²² Kaín tí nkehe ntáchro sín mé nixja kuènte tí nkehe tsjeje la tíha mé t'axrjeníxín ikja chojni ó. ²³ Chaxín kixin jehe sín ntáchro sín kixin jína xikaha sinchexiteyá sín kixin tinkáchónki sín tí sín ángel la nchehnkehya sín la ko itsjé nkehe ch'ehe sín cuérpoé sín, kjánchó kaín tí nkehe ch'e sín xikaha la chónkó kixin tjinkitsahya kixin chrókuítóhe sín tí nkehe ntoáhya tjenkayáxin sín.

3

¹ A ntá tí jahará la ó tsíxechónkoará Cristo. Méxrä chrókuéyará tí nkehe siín nkaya nkajní kixin Cristo la ntiha tjetjaxin ch'án tí tja chjina Dios. ² Chrókjuenkayáxinrá tí nkehe siín nkaya nkajní. Chrókjuenkayáxinhyará tí nkehe siín chjasintajni. ³ Kixin jahará la ó ik'uenrá la ntá ijie la Cristo la ko Dios chónthehe tí kjuachón kuéntará. ⁴ Jehe Cristo mé chontaxínrá kjuachón jahará la tió tsokjan tí jehe ch'án ntá kjaxinrá ts'ejókoará ch'án ntá ts'íkonrá tí kjuachaxin jie kuènte ch'án.

Tí ntia ntaxin la ko tí ntia nixin

⁵ A ntá chrókuítóhérá kaín tí jie tjenkayáxinrá chjasintajni. Ninkexró chrókjuasinko jie chojni chjin ókjé, la ninkexró chrókjuich'e nkehe jínahya, la ko ninkexró chrókjuich'e ninkehó tí nkehe ntáchro əsén sín, la ko kjaxin chrókoxrjíenhya sín chróchonta sín itsjé nkehe kixin tíha mé yóhe tí chróxraxinkaon sín tí nkehe tsíkjanoya. ⁶ Méxrä tí nkexro titekakonhya tí nkehe t'etoan Dios la tsónínkakonhen Dios tí jehe sín la sinchekjasóte sín ch'án. ⁷ Mé xikaha k'uékjich'erá jahará tí ósé. ⁸ Méxrä ijie chrókuítóhérá kaín tí kjuaníkaon la ko tí nkehe tjak'e əsánrá la ko tí nkehe jínahya la ko tí t'antaxínhínrá kíchuárá la ko tí nkehe jínahya t'axrjexín ir'vará. ⁹ Chrókjuich'iýéhyará kíchuárá kixin ósé xikaha k'uékjich'erá a ntá jie la ó chrókuítóhérá kaín tí nkehe ntaxin k'uékjich'erá. ¹⁰ A ntá jie la ó tsík'ónará ijnko chojni nixin. Dios tinkánchetonrá ch'án kixin ts'ónará éxí tí jehe ch'án kixin jehe ch'án kjuich'éná ch'án tí jahará. Mé xikaha chrókjuixraká chróchoxínrá tí jehe ch'án jína. ¹¹ Jehya tjetoan á chojni judío o náhí o á chojni tsíka xroye o náhí o á chojni

tsíkixín kjín o náhí o á chojni noehya o á chojni ch'exón xra o á chojni t'etqan. Tí nkehe tjetoan la tinkáchónkini Cristo la jehó ch'án t'etueñhen kaín nkehe.

¹² Dios la tjuèhe ch'án tí jahará la tsíkjeýará ch'án kíxin tsinkachónkirá ch'án. A ntá jahará la ó k'ónará ijnko chojni nixin la chrókuikonóehérá kíchuárá la jína chrók'uejorá la ko chrókjuinchehnkehýará la ko chrókójiahýará la ko chrókóninkákonhyará.

¹³ Chrókóninkákuénhyará kíchuárá la chrók'uitjáyanhanrá ichrén jie kjuasinhánrá í jnko chojni kíxin Cristo la k'uitjáyehen ch'án tí jie kjuásinrá la kjaxin jahará la xikaha chrókjuich'erá. ¹⁴ Mé xikaha chrótjuéhérá kíchuárá la jnkokoá chrókjuenkayáxirá.

¹⁵ Tí kjuaxróxin kuénte Cristo mé chrók'ueteñhen əsánrá kíxin xikaha kjuenkayáxin Dios k'uýahará ch'án kíxin chrók'ónará jnkokoá cuerpo kuénte ch'án mé xikaha chrókjuancheherá ch'án kjuasáya.

¹⁶ Tí tan kuénte Cristo jnkochríxín chróchóntha əsánrá. Mé xikaha chrókjuákhérá kíchuárá la chrókjuinchechérá kíchuárá kaín kjuaxrexinkaon jína. Chrótsjerá salmo la ko himno la ko canto kuénte Dios la chrókjuancheherá Dios kjuasáya kaín əsánrá.

¹⁷ Kaín xra chrókjuich'erá la ko tí nkehe chróntáchrórá la kaín táha chrókjuanchaxínrá ihnié Inchéni Jesús la chrókjuanchehérá kjuasáya It'eni Dios kjuchaxién Jesucristo.

Jnkójina chrók'uejóko kíchó tí sín tinkáchónki Cristo

¹⁸ Jahará chojni chjin la chrókjuincheiteyéhérá tí xiyará kíxin mé t'ichjánxín xikaha chrókjuich'erá kíxin tinkachónkirá Inchéni. ¹⁹ Jahará chojni ntoa la chrótjuéhérá tí ichjiánrá la chrókóninkákuénhyará tí jehe tjan. ²⁰ Jahará chánjanrá la chrókjuincheiteyéhérá it'ará la ko inará kaín nkehe chrók'ueteñan sín kíxin xikaha mé tóxrjníhin Inchéni. ²¹ Jahará it'é xjan la chrókjuinchekóninkakonhyará tí xjaanrá kíxin tí xikaha la chrókjuinchechek'áváhyará tí jehe xjan. ²² Jahará chojni ch'exón xra chrókjuincheiteyéhérá tí lámóará ntihi chjasintajni. Jehya kíxin tí tjejotsjehe sín ó chrókjuich'erá xra kíxin ntá jína chrók'uejoxínrá. Náhí. Kaín əsánrá chrókjuich'erá xra kíxin ó nohará kíxin xikaha ch'eherá Inchéni xra. ²³ Kaín nkehe chrókjuich'erá la kaín əsánrá chrókjuich'erá xra éxí chrókjuich'eherá xra Inchéni la jehya kíxin éxí chojni ó chrókjuich'eherá xra. ²⁴ Ó nohará kíxin Inchéni la sintakitonhanrá tí nkehe chóntha ch'án kíxin jahará ch'eherá Cristo xra la jehe ch'án mé chaxín Inchéni. ²⁵ A ntá tí sín ch'e tí jínahya tsjacha sín tí nkehe jínahya kjuich'e sín kíxin Dios la tikonóehya ninkexró ch'e tí nkehe jínahya.

4

¹ Méxra jahará lámorá la jína chrónixjehérá tí sín t'ahará xra. Chróxráxinkáonrá kíxin kjaxinrá jahará chontará ijnko Dios tjen nkaya nkajní.

² Chrókuitjéhyará nixjehérá Dios la ko chrókjuanchehérá ch'án kjuasáya. ³ Kjaxin tjanchehérá ch'án tsjinkitsa tí jeheni kíxin tsjanjon Inchéni kjuachaxin chrókuinhin chojni tsochrónkaxínni tí itén Cristo. Tí xra k'uénoehya ninkexró mé tjéchjinaxián jie.

⁴ Tsjanchehérá Dios kíxin tsjinkitsa ch'án tí janhan kíxin chrókianxián jína chrókjuàkua éxí tjinkaon Dios.

⁵ A ntá jahará la jína chrókjuákhérá itén Dios tí sín naxa tinkáchónkiha Inchéni kíxin kánhyó tiempo siín kíxin tsjákorá. ⁶ Chrónixjehérá sín jnkójina kíxin chrókóxrjníhín sín la chrókónohará chrókjuáteherá nkexrí tsixro jnkojnko chojni.

Kjuxin nixja ch'ín Pablo

⁷ Kíchóni Tíquico, mé ijnko nkexro jína tjinkitsa tí janhan ch'ehe Inchéni xra, mé tsjiji ch'án tsochrónka ch'án nkexrí tjén janhan. ⁸ Méxra kuétuanhan ch'án tsjiji ch'án tí tjejorá kíxin tsjonoħará kíxin nkexrí tjejóni kíxin chrókócháħará. ⁹ Jehe ch'án la ko kjaxin ch'ín Onésimo mé tjuéheni kíchó ni la ko jehe ch'án mé kjaxin jína ch'e ch'án xra, la mé

tsjijitsjehe sín tí jahará. Jehe ch'ín Onésimo mé sín chjasánrá. Jehe sín mé tsochrónka sín kíxin nkehe sítónhen tí tjejóni ntihi.

¹⁰ Ch'ín Aristarco mé jnkokoqá tjechjinakian ch'án ntøechiso mé nixjahará ch'án la ko kjaxin ch'ín Marcos mé tí ch'ín a mé naxa kjéhya ch'án ch'ín Bernabé. Ó nohará chrók'uayakonhénrá tí ch'ín Marcos tí tsjijitsjehe ch'án tí jahará la chjehérá ch'án kjuachaxin tsjak'e ch'án jína. ¹¹ Kjaxin nixjahará ch'ín Jesúś, kjaxin tikitexín sín ch'án Justo. Jehó tí sín a mé sín judío tinkáchónki Cristo, a ntá ijie tjinkitsa sín tí xrä tjét'a la chrónkaxín sín nkehe kuènte tí kjuachaxin kuènte Dios. La tí sín a mé imá kjuínchechàna sín tí janhan. ¹² Ch'ín Epafras nixjahará ch'án. Mé jehe ch'án ch'ehe ch'án xrä Cristo la jehe ch'án mé sín chjasánrá. Jehe ch'án jnkochríxín chrónóehe ch'án Dios tjinkaon ch'án kíxin kaín əsánrá chrókuinkachónkirá Dios éxí tjinkaon ch'án. ¹³ Ó nòna kíxin ch'ín Epafras la tóxakonhen ch'án kíxin tí jahará la ko tí sín tjejó tí chjasin Laodicea la ko Hierápolis. ¹⁴ Ch'ín Lucas, mé tí ch'ín ch'e xroqan, la kjaxin nixjahará ch'án la ko kjaxin ch'ín Demas nixjahará ch'án.

¹⁵ Nixjehérá tí sín kíchó ni tjejó chjasin Laodicea la kjaxin nixjehérá tjan Ninfas la ko tí sín tójnkotsé ntøe tjan. ¹⁶ Tió tsjixin sinchekuáxinrá tí xroon tsíkiji tí tjejorá ntiha la ichr'anrá xroon sátsji sinchekuáxin tí sín tjejó njinko chjasin Laodicea la ko kjaxin sinchekuáxinrá tí xroon tsíkijihi tí jehe sín tió tsíkiji tí xroon tí tjejorá. ¹⁷ Kjaxin chenkará ch'ín Arquipo kíxin chrókuinchexiteyá ch'án jína tí xrä tsíkjanjon Inchéni sich'e ch'án.

¹⁸ Janhan Pablo tjaná kjinxilan tí palabra nixjahará. Jahará chróxráxinkáonrá kíxin janhan la tjéchjina la Dios mé chrókjuintayaonrá. Amén. Ó tjen.

Xroon saoxín ikjin ch'ín Pablo chr'éhen ch'án tí sín tinkáchónki Cristo chjasin Tesalónica

Ch'ín Pablo nixjehé ch'án tí sín Tesalónica

¹ Janhan Pablo la ko ch'ín Silvano la ko ch'ín Timoteo ikjinni tí xroon i chr'anhnárá kíchó ni njinko chjasin Tesalónica kíxin jnkokoá tinkáchónkini It'eni Dios la ko Inchéni Jesucristo. Kjuasáyé It'eni Dios la ko Ichéni chrók'uejorá.

Tí sín ókjé chjasin mé kjuíncheyóhé sín tí sín Tesalónica

² Jnkoyaxón chjéheni Dios kjuasáya la ko t'ákjenxínni tí jahará kaín rá kíxin jehe ch'án mé chrókjuinkitsa ch'lán tí jahará. ³ Tió nixjehéni It'eni Dios xraxinkaonni kíxin kaín asánrá kuítækáonrá Inchéni, a ntá tjejoch'erá xra la ko imá tjuéhérá kíchuárá ntá jnkokoá tjejochonhénrá tsokjan Inchéni Jesucristo. ⁴ Kíchóni jahará, imá tjuahará Dios la ó noheni kíxin jehe ch'án tsíkjeýará ch'án tí jahará. ⁵ Na mé xíkaha tió kjuíjini chjasánrá kjuakoháráni tí tan jína nixin tsaáxinni chrónkani na jehya iténni ó. Náhí. Kjaxin kjuachaxién Nchákuén Dios kjuakoxinni la ko tí Nchákuén Dios mé kjuínchenoheni kíxin tí itan kjuakoni la chaxín ntoá. Jahará la ó nohará jína kíxin nkexrí k'uéjóni tí tjejorá kíxin xíkaha chrók'uejorá chrókjuakoxínrá.

⁶ Mé xíkaha kjuíncheyohérá tí jeheni la ko kjuíncheyohérá tí Inchéni Jesucristo. A ntá tió kuínhínrá tí itén Dios ntá kaín asánrá kuinkachónkirá Inchéni la ko kócháhará kíxin tí Nchákuén Dios mé t'etuēnhen asánrá kjónté nchónhya nkehe k'uatsíkará. ⁷ Mé xíkaha kjuákuexínrá kaín tí sín tinkáchónki Inchéni ntiha estado Macedonia la ko tí sín estado Acaya. ⁸ Jahará kjuákoxínrá tí itén Dios la jehya jehó estado Macedonia la ko tí estado Acaya kjuákoxínrá. Náhí. Na mé kaín chjasin chjinaxón ntiha kuínhin sín kíxin nkexrí tinkachónkirá Dios. A ntá jeheni na í t'ichjánxínhya í jnko nkehe naxá chróchronkani, ⁹ kíxin ijie jehe sín mé tjejóchronka sín kíxin nkexrí kjuíjini chjasánrá a ntá kaín rá kjuánjonrá kjuachaxin k'uéjóni la ko kuítækáonrá tí itén Dios kjuakoháráni la ntá kuijohérá kaín tí nkehe tsíkjanoya kíxin ntá kjuankíxínrá kuinkachónkirá Dios tjechón chaxín. ¹⁰ La ko kjaxin tjejóchronka sín kíxin jahará tjejochonhénrá tsokjanxín nkaya nkajní tí Xjeen Dios na mé Jesús. Ó kjuínchexechón Dios tí Xjeen ch'án Jesús ntá jehe ch'án mé sinchekaáni kíxin chrókjuasótexíhyani tí nkehe jínahya chrókjuasótexínni itsi.

2

Tí xra tsíkjich'e ch'ín Pablo tí chjasin Tesalónica

¹ Kónohará kaín rá kíchó ni kíxin jehya chónkó kjuíjini chjasánrá. ² Ó kónohará kíxin senó tí sín chjasin Filipos k'uékjincheckjasóteni sín la ko k'uék'ántaxínhínni sín. Kjánchó Dios mé kjuínkitsa ntá chrakonhyani kjuakoháráni tí tan tsaáxinni kuénte Dios kjónté imá k'uéníkakonhenni sín. ³ Kónohará kíxin jehya ntoáhya kjuakoháráni la ko jehya ijkno nkehe naxrjónhya kjuakoni la ko kjuít'ayaharáni ninkehó. ⁴ Náhí. Dios mé kjuueyá ch'án tí jeheni kíxin chrókjuakoni tí tan tsaáxinni, mé xíkaha ntoá tjakoni. Jehya kíxin chojni ó nchechéheni. Náhí. Nchechéheni Dios tí nkexro nohe nkehe tónhen asénni. ⁵ Ó nohará kíxin kjuich'iyaxíhyani itan imá náxrjón kíxin xíkaha chrókjuakitsjexínni chichaon chrókjuachani. Náhí. Dios la ó nohe ch'án kíxin xíkahya kjuich'en. ⁶ Tjeyáhyani kíxin chojni chrókjuikosáyeheni sín la á jahará la o í so chojni. Náhí, xíkahya ch'eni, kjónté chóntani kjuachaxin chrók'uetuānhanráni kíxin chrókjuánjonrá nkehe chrók'uáyéheni kíxin jeheni ch'eheni xra Cristo. ⁷ Jnkoyína k'uénixjaharáni k'uék'ejóni. Éxí yóhe ijkno

ìné xjan t'àyakonhen xjeen kíxin ts'ánkí xjan mé xíkaha jeheni k'uàyakonhanráni tí jahará.
⁸ Imá tjuàhará ntá jehya jehó tí itén Dios chrókjuakoharáni. Náhí. Kjónté chrók'uenxínni tí tjakoharáni kíxin xíkaha imá tjuahará. ⁹ Kichóni, chróxraxinkáonrá kíxin tió k'uéjóni chjasánrá la mé nchónhya xrä kjuich'eni nchakotjin la ko tie ntá kjuachani chichaon k'uènaxínni nkehe sineni kíxin tjinkakonhyani kíxin chrótjaharáni xrä chrókjuánjonrá nkehe chrókjoneni nachrohe k'uejóni ntiha kjuakoharáni itén Dios.

¹⁰ Jahará la ó nohará la ko ó nohe Dios kíxin chaxín jína k'uéjókoaráni jahará chojni tinkáchónki Ìnchéni. Nijnko nkekro ts'ekahyani jié kíxin ichréni nkehe jinahya chrókjuich'eni. ¹¹ Jahará ó nohará kíxin kjuakoharáni la ko kjuínchechéheni tí jahará jnkojnkorá éxí ch'e ijkno it'é xjan tjuèhe xjeen ch'án. ¹² La ko k'uëtuñhanráni kíxin jína chrók'uejorá éxí tjinkaon Dios chrók'uéjó tí sín tinkáchónki ch'án kíxin jehe ch'án ó k'uíyahará ch'án kíxin chrók'uayéhérá tí kjuachaxin kuénte ch'án.

¹³ Méxra jnkokchríxín tjancheheni Dios kjuasáya kíxin tió kuinhínrá tí tan jína kuénte ch'án kjuakoharáni na ntá kjuátsqanrá kíxin chaxín tí tan jína kuénte Dios ntá jehya tan kuénte chojni a ntá kaín rá ó kuítækáonrá tí tan a ntá k'uixitóxín ntiará. ¹⁴ Mé xíkaha jahará kichó ni kjuasótiará kóninkakonhanrá tí sín chjasánrá éxí yóhē kónhen tí sín kuénte Dios tinkáchónki Ìnchéni Cristo Jesús tí estado Judea kíxin tió kjuankíxín kuinkáchónki sín Ìnchéni ntá tí sín judío chjasén sín mé kjuankíxín sín kóninkakonhen sín chrók'óyán sín. ¹⁵ A ntá tí sín judío a mé tsík'óyán sín Ìnchéni Jesús la ko tsík'óyán sín tí sín tsíchronka tí itén Dios ósé la xíkaha kjaxin k'uinkíténi sín. A ntá xíkaha kjuich'e sín la kóninkakonhen sín kaín chojni. A ntá Dios la kóxrjéñhya ch'án kíxin xíkaha kjuich'e sín. ¹⁶ A ntá tjinkaonni kíxin chrókjuakoheni tí sín jehya judío tí tan jína chrókuaáxin sín a ntá tí sín judío tjinkakonhyá sín chrókjuakoni. Na mé xíkaha imá ncheck'ánki sín tí jié kuénte sín. A ntá xíkaha kjuich'e sín ntá Dios sincheckjasóte ch'án tí jehe sín.

Ch'ín Pablo tjinkaon ch'án sáchrókjuitsjehe ch'án ínaá tí sín chjasin Tesalónica

¹⁷ Kichóni, tió kuítóheni tí jahará a ntá kjónté ókjé k'uéjóni la k'uéxraxinkaonni kaín asénni tí jahará la ko imá tjinkaonni chrókjuijitsjeheni tí jahará ínaá. ¹⁸ Na mé xíkaha janhan Pablo itsjé veces mé tjíkavan chrókjuasántsjaá tí jahará, a ntá tí ch'ín Tsochren mé k'uínkakònna ntá xitjahya tsjasán. ¹⁹ ¿Nkehe tsónhen tí xrä tjejóch'eni tjejóchóenxinni la ko nkekuénte tjejóchéheni? Jahará mé tsochexínni tió tsi Ìnchéni Jesucristo kíxin kuítækáonrá ch'án. ²⁰ Méxra jahará mé kóchexínni kíxin kuítækáonrá.

3

¹ Ntá imá kóxakonhenni. Ntá kjuenkayáxinni kíxin chrókójína jehóni chrókuitóheni chjasin Atenas ² na ntá ichr'ánni tí kichó ni Timoteo a tsijjitsjehe ch'án tí jahará kíxin kjaxin ixrä kuénte Dios tjech'e ch'án tjejókoni ch'án tjako ch'án tí tan kuénte Cristo tsaáxinni. Ntá ichr'ánni ch'án kíxin sintaxraxinkaonrá ch'án tí itén Ìnchéni la ko sinchechéhe ch'án asánrá ³ kíxin tsóxrjéhyá asánrá má kíxin tí kjuaxróxinhya tjejot'atsínkara. Kíxin xíkaha ó nohará kíxin t'ichjánxín tsásotexínni tí xrä kuénte Ìnchéni. ⁴ Naxa k'uéjóni jnkokoá ntiha la ó tjonkará kíxin kaín ni kjuaxróxinhya tsónhenni tsjasóteni. A ntá jie la ó nohará kíxin chaxín xíkaha kónhen. ⁵ Méxra imá kóxakonna ntá ichr'an kichó ni Timoteo kjuíjitsjehe ch'án nkekri tjejorá, a naxa tinkachónkirá Ìnchéni o ách'e ch'ín Tsochren chrókjuachroerá chrókuitohérá tí ntje Ìnchéni a ntá chrókochónkó kaín tí xrä kjuich'eni kjuakoharáni.

⁶ Na ntá ó kjaxin ch'ín Timoteo chjasánrá Tesalónica chrónka ch'án kíxin jína tjejorá naxa tinkachónkirá Ìnchéni, la ko naxa tjejorá tjuéhérá kíchuárá la ko chrónka ch'án kíxin xraxinkáonrá tí jeheni tjinkáonrá chrókjuijitsjeheni tí jahará. Kjaxin jeheni xíkaha tjinkaonni chrók'uikanni tí jahará. ⁷ Mé xíkaha kichó ni tjejot'atsínkani kjuaxróxinhya ntihi na ntá kjónté kóchéhe asénni kuínhinni kíxin kaín asánrá naxa tinkachónkirá Ìnchéni.

⁸ A ntá kuínhinni xíkaha kíxin jína tjejorá naxa tinkachónkirá Închéni Jesúš a ntá əntsí kóchéheni. ⁹ Ntá imá tsjancheheni Dios kjuasáya kíxin xíkaha imá chéhe əsénni kíxin tí jahará tinkachónkirá ch'án. ¹⁰ Tie la ko nchakotjin chronóəheni Dios kíxin tsjanjon ch'án kjuachaxin tsjijitsjeheni tí jahará ínaá kíxin naxa t'itjáyan iso nkehe chrókuakoháráni naxa chrók'uítjárá nkexrí jína chrókuinkachónkirá Închéni.

¹¹ Tjejótjancheheni T'éni Dios la ko Închéni Jesucristo kíxin chrókuinkitsani ch'án chrókjuijitsjeheni tí jahará ¹² la ko tjancheheni Închéni kíxin chrókuinkitsa ch'án tí jahará kíxin əntsí má chrótjuèhérá kíchuárá la ko chrótjuèhérá kaín xín chojni éxí yóhe tjuàhará. ¹³ Tjancheheni ch'án kíxin sintaxraxinkaonrá ch'án kíxin kaín əsánrá chrókuitekáonrá ch'án kíxin ntá tsochóntahya əsánrá ninkehó jié nkayakon It'éni Dios tió tsokjan Închéni Jesús tsikao ch'án kaín tí sín ó tsikótjóá.

4

Nkexrí tóxrjíñihin Dios chrók'uéjóni

¹ Jahará kichó ni chronóəharáni la ko ntaxraxinkaonráni tí kjuachaxin ihnjé Închéni Jesús kíxin jína chrók'uejorá tinkachónkirá Închéni éxí tjejoch'erá jie kíxin éxí kjuakoháráni. Mé xíkaha jína sinchechérá Dios.

² Ó nohará tí nkehe kjuakuaxinráni kjuachaxin kuénte Închéni Jesús. ³ Tí nkehe tjinkaon Dios kíxin jína tjóá chrók'uejorá la ko chrókuásinkoahyará jié í jnko chojni chjin ókjé. ⁴ Jnkojnkorá chrókónohará chróchontará jnkojnko ichjiánrá la ko jína chrók'uejorá chrótjuèhérá kíchuárá. ⁵ Jehya kíxin chrókuakérá əsánrá tí nkehe jínahya chrókuich'erá éxí ch'e tí chojni chónhya Dios. ⁶ Nijnkorá chrókuich'iyehérá ichjién kíchuárá xíkaha kíxin Închéni mé imá sinchekjasóte ch'án tí chojni xíkaha sich'e mé xíkaha kjuíntaxraxinkaonráni senó. ⁷ Dios mé k'uíyeheni ch'án kíxin jína chrók'uejóni, jehya kíxin naxa chrókuasinri jié. ⁸ A ntá tí sín chónthya kjuasáyé tí nkehe tjakoni na mé jehya kíxin chónthya sín kjuasáyé chojni. Náhí. Chónthya sín kjuasáyé Dios, tí nkexro kjuanjon tí Nchakuen chóntani.

⁹ A ntá tí tjuèhérá kíchuárá la í t'ichjánxínhya naxa chrókjinni tsochronkani kíxin nkexrí chrótjuèhérá kíchuárá kíxin jehe Dios mé tjetjakoohará ch'án nkexrí chrótjuèhérá kíchuárá. ¹⁰ Xráxín xíkaha tjejoch'erá tjuèhérá kaín tí sín kichó ni tjejó estado Macedonia. Kjánchó chronóəharáni kichó ni kíxin əntsí má chrótjuèhérá kíchuárá. ¹¹ Tóxakonhanrá kíxin kjuaxróxin chrók'uejorá. Jnkojnkorá nohará nketí xrə chrókuich'exínrá tjárá éxí k'uētuənhanráni. ¹² Na mé xíkaha chrók'uikon tí sín chónhya Dios ntá chróchóntahará sín kjuasáya la ko chrók'uitjánya ninkehó nkehe chrókuicháxínhanrá.

Itsi Închéni Jesús

¹³ Kichóni, tjínkəvan kíxin chrókónohará nkehe tsñhen tí sín tsík'en. Na mé tjínkəvan kíxin kánhyó chrótsjankàmərā sín chrókoyóəhyará tí sín tinkáchónkiha sín Închéni naxa chóenhya sín kíxin chróxechón sín ínaá. ¹⁴ Kuítekaonni kíxin ik'uén Închéni Jesús la ko xechón ch'án ínaá la ko kjaxin titekaonni kíxin Dios kjuínchexechón Jesús la ko tió tsokjan Jesús ntá sinchexechón Dios kaín xín tí sín tsík'en kuítekaon sín tí jehe ch'án.

¹⁵ Méxrə chénkani ti jahará tí nkehe kjuako Închéni kíxin tí naxa tjejochónni tió tsi ch'án na kjónté naxa tsitónxinyani ntja, naxa tsochónhenni tí sín tsík'en. ¹⁶ Jehe Închéni mé ts'inkajinxín ch'án nkaya nkajní la ko itsen tsonixja ch'án kíxin tí kjuachaxin jié kuénte ch'án la ko ts'èya tí ángel t'etqan la ko tsontáchro tí trompeta kuénte Dios. A ntá kaín tí sín tsík'en kuítekaon sín Închéni Cristo la senó tsoxechón sín. ¹⁷ A ntá chr'éxín kaín xínni tjejochónni la ko kaín xín tí sín tsíxechón mé jnkokoə tsochriinni kíxin tí kjuachaxin jié kuénte Închéni. A ntá xríkjan tjuí tsoxetani ch'án. Mé xíkaha ts'ejókonni ch'án jnkochríxín.

18 Méxra xikaha chrókjuinchechéxínrá kíchuárá tí tan i kíxin xikaha tsónhen tió tsokjan Ínchéni.

5

1 A ntá tí yaon tsónhen tíhi kíchó ni t'ichjánxínhya naxa tsokjinni í jnko nkehe tsinhínrá. **2** Jahará ó nohará jína kíxin titaya itsi tí yaon tsokjan Ínchéni exí yóhe chrókui ijnko xíchee tí tie a. **3** Ts'ejo sí sín kíxin ijie kjuaxróxin tjejó sín kaín sín la ko ninkehó nkehe tsónhen sín. Ntá xrínahya titaya itsi tí kjuaxikaon jié la ko kjuachrakon mé ts'itjáyanxín tí kjuachón chróchonta sín exí yóhe ijnko tjan tjejá xrínahya titaya tsjankíxin ts'ontáki tjan kíxin sinchekokjíhi tjan xjeen tjan na mé jehe tjan xitjahya tsontáchro tjan "Náhí", mé xikaha jehe sín chóntahya sín nkerí tsaáxin sín. **4** Ntá jahará kíchó ni sítiéhya tjejorá ntá chróchrakonhyará tí yaon itsi Ínchéni. Tí náhí chróchrakonrá exí chrókui ijnko xíchee chrókjuintachrakonrá. **5** Ntá jie kaín rá mé tjejorá tí ntia t'inkáséyan. Jeheni la jehya tjejóni tí ntia sítié a. **6** Méxra xikaha chrók'uéjójuahyani exí tjejójua tí sín í so na mé chrók'uejótsjeheni chrókjuenkayáxinni jína. **7** A ntá tí sín t'ajua la tjejójua sín tí sítié ó la ko tí sín tókoan la tókoan sín tí sítié a. **8** A ntá jeheni na tjejóni tí ntia t'inkáséyan t'ichjánxín kíxin jína chrók'uéjóni chrókjuasinyani jié. Chrókuinkáchónkini Ínchéni la ko chrótjuéheni ch'án. Ntá jeheni na Ínchéni ts'ayakonhenni ch'án tsaáxinni ch'án exí tí ch'ín soldado t'inkáya ka tsík'óna chica kíxin kohya nkehe tsónhen ntakuin ch'án. La ko chrók'uéjóchónhenni itsi Ínchéni tsaáxinni ch'án na mé exí tí ch'ín soldado a xrasín ch'án nkehe tsík'óna chica t'ayakonhen kja ch'án kíxin kohya nkehe tsónhen kja ch'án. **9** Kjueyáhya Dios tí jeheni kíxin chrókjuinchekjasóteni ch'án. Náhí. Kjueyá ch'án tí jeheni kíxin chrókuaáxinni Ínchéni Jesucristo. **10** Jehe Jesucristo mé k'uenyákonhenni ch'án kíxin chrók'uéjókoni ch'án jnkochríxín kjónté naxa tjejóchónni o kjónté ó tsík'enni tió tsokjan ch'án. **11** Méxra xikaha chrókjuinchechéhérá kíchuárá la ko chrókjuinkitsará kíchuárá kíxin jína chrók'uéjó sín exí xráxín tjejoch'erá.

Ch'in Pablo mé nchexraxinkaon ch'án tí sín tinkáchónki Cristo

12 Kíchóni chronoàharáni kíxin chróchontehérá kjuasáyé tí sín tjejóch'e sín xra kuènte Dios ntiha tjejótjitaón sín ntia chrónka sín itén Ínchéni. **13** Na mé chróchontehérá sín kjuasáya la ko chrótjuéhérá sín má kíxin tí xra tjejóch'e sín. A ntá jahará kaín rá jnkójina chrók'uejokoará kíchuárá.

14 Méxra tétuñhanráni kíchó ni kíxin chrókjuéntuéhérá tí sín tjinkakonhya sich'e sín xra la ko chrókjuinchechéhérá asén tí sín kóxrjé asén sín la ko chrókjuinkitsará tí sín naxa noehya sín jína la ko chrókóninkákuényará ninkexró.

15 Tóxakonhanrá kíxin chrókjuich'ehyará jínahya tí sín jínahya kjuít'ahará. Ichá jína chrókjuákoxinrá nkehe jína chrókjuich'erá kíxin ts'ikon kaín xín chojni chjasintajni kíxin jína tjejotjenkayáxinrá.

16 Méxra nchechéhérá asánrá jnkochríxín. **17** Chrókuitoéhyará chrónixjehérá Dios jnkochríxín. **18** Kjónté ichréni nkehe chrókónhanrá la chróchjhéhérá Dios kjuasáya kíxin xikaha mé tjinkaon ch'án chrókjuákoxinrá kíxin tinkachónkirá Ínchéni Cristo Jesús.

19 T'ók'ankahyará tí xrohi t'inkáséyanxín Nchäkuen Dios. **20** Chonteherá kjuasáyé nkehe tjakó tí sín kíchó ni chronkaxín sín kjuachaxin kuènte Nchäkuen Dios.

21 Chrótsjehérá jína tí nkehe tjejóch'e sín. A ntá tí jína na chrókuítékáonrá. **22** Chrókuitohéhérá kaín xín nkehe jínahya.

23 Dios mé tjanjon kaín kjuaxróxin ntá tjancheheni ch'án kíxin jehe ch'án sinchetjóará ch'án la ko ts'ayakonhen ch'án nchäkuanrá la ko asánrá la ko cuerpo kuéntará kíxin tsochóntahya ninkehó jié tió tsi Ínchéni Jesucristo. **24** Dios tí nkexro kjueyá tí jahará mé jína ch'án la ko kaín tí nkehe ntáchro ch'án la tsoxiteyá.

Ch'ín Pablo kjuixixín nixjehé ch'án sín la ko tjanchehe ch'án Dios kíxin chrókjuincheyaon tí jehe sín

²⁵ Kíchóni chrónóhérá Dios kíxin tsjinkitsani ch'án kaín ni.

²⁶ La ko nixjehérá kaín xín tí sín kíchó ni ntiha tséhérá tja sín.

²⁷ T'etqanxínni tí kjuachaxin kuènte Ìnchéni kíxin nchekuáxinrá tí xroon chr'anhanrá tsinhin kaín xín tí sín kíchó ni ntiha.

²⁸ Kjuasáyé Ìnchéni Jesucristo sintayaonrá ch'án. Amén. Ó tjen.

Xroon yóxin ikjin ch'ín Pablo chr'éhen ch'án tí sín tinkáchónki Cristo chjasin Tesalónica

Ch'ín Pablo nixjehé ch'án tí sín Tesalónica

¹ Janhan Pablo la ko ch'in Silvano la ko ch'ín Timoteo ikjinni tí xroon i chr'anhánrá kichó ni njinko chjasin Tesalónica kíxin jnkokoá tinkáchónkini It'eni Dios la ko Inchéni Jesucristo. ² Kjuasáyé It'eni Dios la ko Inchéni Jesucristo chrókjuintayaonrá ch'án kíxin kjuaxróxin chrók'uejorá.

Dios sinchekitoexín ch'án tí ijíe chojni tió tsokjan Inchéni Cristo

³ Kichóni chrókjuancheheni Dios kjuasáya jnkochríxín kíxin tí jahará. Na mé jína xikaha chrókjuch'ení kíxin tinkák'ánkí tí tinkachónkirá Inchéni Jesús la ko tinkák'ánkí tí tjuéhérá kíchuárá tjejorá ntiha. ⁴ Ntá chéheni chenkani tí sín kichó ni kaín tí njinkoé Dios kíxin naxa tjákoxinrá kíxin naxa tinkachónkirá Inchéni kjonté siín chojni nínkakonhanrá la ko kjonté t'atsíkará itsjé kjuaxróxinhya. ⁵ Tíha mé tjákoxinrá kíxin tjinkaon Dios tsotsjehe ch'án kíxin á tsjachará ts'ikonrá tí kjuachaxin kuénte ch'án. Méxra xikaha tjejotjasótexínrá jie.

⁶ Méxra ó nchoxon kíxin sinchekjasóte Dios tí sín tjejónchekjasótíará jie. ⁷ Ntá tsjanjon ch'án kjuachaxin kíxin ts'ok'áhará kíxin ó kjuasótíará la ko kjaxin jeheni ts'ok'éheni tí yaon itsi Inchéni Jesús ts'inkajinxin ch'án nkaya nkajní tsikao ch'án kaín tí sín ángel t'etoan kuénte ch'án na mé tsikao ch'án xrohi nene. ⁸ Mé xikaha itsi ch'án kíxin sinchekjasóte ch'án tí sín kuítekakuenhyá Dios la ko kuítekakonhyá tí tan jína kuénte Inchéni Jesucristo chrókuaáxin sín. ⁹ A ntá tí sín kuítekakonhyá mé tsjasóte sín jnkochríxín ts'ítuenhen sín ts'axrjenta sín tí kohya Inchéni, í ts'ikonhyá sín tí kjuachaxin t'etoanxín ch'án. ¹⁰ Xikaha tsónhen tí yaon itsi Inchéni tsjikosáyehe ch'án kaín xín tí sín kjuíchetjóá ch'án la ko kaín tí sín kuinkáchónki sín ch'án la ts'ikon sín tí kjuachaxin jié kuénte ch'án. Mé xikaha kjaxinrá jahará kíxin ó kuítekáonrá tí nkehe kjuakoharáni.

¹¹ Mé xikaha jnkochríxín tjancheheni Dios kíxin jína chrók'uejorá éxi tjinkaon ch'án chrók'uéjó tí sín kjueyá ch'án, la ko tjancheheni Dios kíxin chrótjáhará ch'án kjuachaxin kuénte ch'án kíxin chrókjuiñtsará ch'án kíxin chrókjuchará ch'erá kaín tí xra jína tjinkáonrá chrókjuch'erá kíxin tinkachónkirá ch'án. ¹² Mé xikaha kaín xínrá tsjikosáyehérá tí ihnié Inchéni Jesucristo la ko jehe ch'án mé kjaxin tsjikosáyahará ch'án kíxin tinkachónkirá ch'án. Mé xikaha kjuasáyé Dios la ko Inchéni Jesucristo kíxin kuíkonóhenei ch'án.

2

Tsonoxín ijnko ch'ín jínahya

¹ Kichóni, a ntá tí tsi Inchéni Jesucristo la ko tsojnkotséni tí tjen ch'án jehe ch'án, méxra xikaha chrónóaharáni ² kíxin chrókjuitóxíñhyará tjoka tí nkehe chrókjuenkayáxinrá, la ko ní chróchrakonhyará tí chróntáchro jnkójín nkexro tónohe sín kíxin ó kjuixraká tí yaon itsi Inchéni, la ko chróchrakonhyará xikaha chrókuínhínrá chróchronka ijnko chojni tjako, la ko chróchrakonhyará tí tsochronka sín kíxin ó k'uáyéhé sín ijnko xroon éxi jeheni tsíkjanjoni chrónka kíxin xikaha tsónhen. ³ Titóéhyará kíxin jnkójín nkexro chrókjuit'ayahará xikaha. Naxa tsihya tí yaon ntá senó itsjé chojni tsóníkkakonhen sín Dios, la ko tsonoxín ijnko ch'ín jínahya chóntha jie, na ntá tíha mé tsjasóte jnkochríxín. ⁴ Tsjak'e ch'án tsjanjónko ch'án kaín xín nkehe tinkáchónki chojni, mé tsjak'etjaxin ch'án nkaxenhen tí njinkoé Dios kíxin jehe ch'án mé sich'eña asén ch'án éxi Dios tí jehe ch'án.

⁵ ¿Á xráxinkákonhyará kíxin xíkaha k'uérjanka senó tí naxa k'uéjóni jnkokoá? ⁶ Ntá jahará ó nohará nkehe tí kjuachaxin naxa chónchtehe kíxin naxa tjexrakáhya tí yaon tsōnoxín tí ch'ín jinahya. ⁷ Ntá jie imó ch'e xra tí kjuachaxin jinahya. Kjónté naxa t'itjáyan kíxin sáchrókjui tí nkexro chónchtehe. ⁸ A ntá tí ch'ín jinahya tsōnoxín ch'án. Ntá tió tsi Ínchéni Jesús ntá tí itén ch'án ts'axrjexín ir'va ch'án ó mé ts'enxín tí jinahya a kíxin mé xíkaha sinchek'itjáyanxín ch'án tí jinahya tí kjuachaxin jié tsíkao ch'án. ⁹ Méxra tí ch'ín jinahya mé tsíkao ch'án tí kjuachaxin kuénte ch'ín Tsochren la mé xíkaha tsochonta ch'án kjuachaxin jié tsjakoxín ch'án sich'iyaxín ch'án tsjasin ch'án kjuaxroan ntoáhya. ¹⁰ Mé xíkaha kaín nkehe jinahya sich'iyexín ch'án tí sín xráxín ts'itjáyan sín kíxin chrohya sín chrókuitekaon sín tí tan chaxín ntoá chrókuaáxin sín. ¹¹ Méxra tsítóhe Dios tí jehe sín kíxin tsitekaon sín kaín nkehe chaxínya ¹² kíxin ntá tsjasóte kaín tí sín kuítekakonhyá sín tí tan chaxín chrókuaáxin sín na mé ąntsí kóxrjínhín sín chrókuaáxin sín jié tsjasótexín sín.

Dios mé kueyá tí jehe sín kíxin chrókuaá sín

¹³ Ntá jeheni chrókjuancheheni Dios kjuasáya jnkochríxín kíxin jahará kíchó ni chojni tjuáhará Ínchéni kíxin tí tsíkjeyá Dios tí jahará kíxin senó chrókuaáxinrá tí Nchákuén ch'án tsotjuáxinrá la ko tí itén ch'án chaxín ntoá kuítekáonrá. ¹⁴ Méxra xíkaha k'uíyahará Dios kíxin chrókuaáxinrá tí itén ch'án tjakoni kíxin ntá tsjachará ts'ikonrá tí kjuachaxin jié kuénte Ínchéni Jesucristo.

¹⁵ Mé xíkaha kíchó ni, jína chrók'uejorá chrók'uitjáyanhyará tí nkehe kjuakoharáni tió k'uéjóni jnkokoá la ko tí nkehe chrónka tí xroon ijkinni k'uayéhérá. ¹⁶ Ntá Ínchéni Jesucristo la ko It'eni Dios na mé tí nkexro kjuasáyé ch'án tjuéhe ch'án tí jeheni la ko nchechéhé ch'án ąsénni jnkochríxín la ko kjuasáyé ch'án tjejóchónhenni itsi Ínchéni ¹⁷ na mé sinchechéhé ch'án ąsánrá la ko tsjanjon ch'án kjuachaxin kíxin ntoá chrók'uejorá ntá jína chrónixjará la ko kaín xra jína chrókjuich'erá.

3

Nixjehérá Dios kíxin tsjinkitsa kaín ni

¹ Méxra kjuixixín chrónóaharáni kíchó ni kíxin chrókjuanchehérá Dios kíxin chrókjuinkitsa ch'án tí jeheni kíxin tjoka sáchrókjuikjakoni itén Ínchéni nkuíxín kíxin ntá tsinhin chojni la tsjikosáyehe sín ch'án éxi yóhé kuítekáonrá jahará. ² Kjaxin nixjehérá Dios kíxin chrókjuinkitsani ch'án kíxin kohya nkehe chrókónhenni tí siín chojni jinahya nínkakonhenni kíxin kénhya sín tinkáchónki Ínchéni. ³ Ntá Ínchéni mé chaxín jína ch'án la jehe ch'án tsítóehya ch'án tí jahará naxa tsjinkitsará ch'án kíxin jína ts'ejorá la ts'ayakonhanrá ch'án kíxin kohya nkehe jinahya tsónhanrá. ⁴ Ó noheni kíxin Ínchéni la tsjinkitsa ch'án tí jahará kíxin naxa sich'erá xra éxi k'uetuáhanhanráni. ⁵ Ínchéni tsjinkitsará ch'án tsónohará kíxin Dios la tjuahará ch'án la ko tsjinkitsará ch'án kíxin chrókóninkákonhyará éxi kóníkkakonhyá Cristo.

T'ichjánxín chrókjuich'eni xra

⁶ Kíchóni t'etqanxínni tí kjuachaxin ihnié Ínchéni Jesucristo kíxin chrók'uaxrjekjanxínrá tí sín kíchó ni tjinkakonhyá sich'e xra la ko xrihya sín éxi kjuakoharáni. ⁷ Ó nohará kíxin nkexrí chrók'uejorá chrókjuákoxínrá éxi k'uéjó tí jeheni kíxin tí k'uéjókoaráni la jehya kíxin kjuich'ehyani xra. ⁸ Jehya kíxin kjóneni niotjé jnkoyín nkexro ntá chrókjuenkahyani. Náhi. Kóxakonhenni nchákuotjin la ko tie kjuich'eni xra kíxin ninkehó chóntiaxínhyani tí jahará kíxin chrókjuánjonrá tí nkehe chrókónen. Náhi. ⁹ Kjónté chóntani kjuachaxin chrókjuanchaharáni kíxin chrókjuinkitsará tí jeheni kjánchó jeheni na kjuich'eni xra kjuakoxínni kíxin xíkaha jahará chrókjuich'erá xra. ¹⁰ Kíxin tí naxa k'uéjóni jnkokoá ntiha k'uetoanni kíxin: Tí nkexro tjinkakonhyá ch'e xra la kjaxin

chrókjonehya. ¹¹ Ó kuínhinni kíxin tjejorá jnkojínrá ninkehó xrə ch'ehyará a ntá kjuach'ia ó xríkoará. ¹² A ntá tí kjuachaxién Închéni Jesucristo t'etoanxínni la ko chrónóexinni tí sín a kíxin chrókóninkakonhyá sín chrókjuch'e sín xrə kíxin chrókjucha sín chichaon chrók'uite tí nkehe chrókjone sín.

¹³ Ntá jahará kichó ni, chrókóxrjéhyará chrókjuch'erá tí nkehe jína. ¹⁴ A ntá tí tjen jnkojín nkexro titekakonhyá tí nkehe t'etoanxínni tí xroon i la tsjehérá jína nkexro tíha la ntá chrók'uitohyará ch'án la ntá chrókósuehē ch'án. ¹⁵ Kjánchó jehya kíxin chrókjuañjønkoará ch'án. Náhí. Chrókjuiñchexraxinkáonrá ch'án jnkojína éxí ijnko chojni kichó ni.

Ó kjuixixín nixja ch'ín Pablo

¹⁶ Închéni mé tjanjon tí kjuaxróxin la ko naxa tsotjáhará ch'án kjuaxróxin jnkochríxín kjónté ichréni nkehe chrók'uatsíkará. Jehe ch'án mé t'ayakonhanrá ch'án kaín rá.

¹⁷ Janhan Pablo tjaná mé kjinxiān tí nkehe nixjahará. Mé xikaha chrókjuañtsoanxínrá tí letra kaín carta tsíkjian.

¹⁸ Ntá Închéni Jesucristo mé kjuasáyé sintayaonrá ch'án kaín rá. Amén. Ó tjen.

Tí xroon saoxín ikjin ch'ín Pablo chr'énen ch'án tí ch'ín Timoteo

Ch'ín Pablo nixjehé ch'án tí ch'ín Timoteo

¹ Janhan Pablo kjueyána Jesucristo la ko Dios mé tsík'etuanna mé jehe ch'án mé tí nkexro nchekaá chojni. La ko kjaxin k'uetuanna Ìnchéni Jesucristo tí nkexro tjejóchónhenni itsi. ² Ikjian tí xroon chr'anhan jaha Timoteo. T'íkuan éxi xjanna tí jaha kíxin jaha tinkachónkia Cristo Jesús. Kjuasáyé It'eni Dios la ko Ìnchéni Jesucristo chrókjuntayavan ch'án la ko chrókuikonóha ch'án kíxin kjuaxróxin tsjak'e jaha.

Chrókjuechráxinkaon ch'án sín kíxin chrókuitakuenhyá sín tí nkehe chaxínhya

³ Éxi xríannóha tió sákjuia estado Macedonia la mé jaha chrókuitoha tí chjasin Éfeso la ntaha chrókuétuénhén iso tí sín ntiha kíxin chrókuahya sín tí nkehe ntoáhya. ⁴ La ko chrókuétuénhén sín kíxin chrókuahya sín kuenté tí cuento tsíchronka chojni tí ósé a. Tí tinhin sín tíha la imá tjachaxin kichó sín la ó chónkó tíha. Kaín tíha la í tsjinkitsahya kíxin sinchexiteyéheni Dios kíxin tinkáchónkini ch'án.

⁵ Tí nkehe tjinkaonni la chrótjuéheni kichó ni kaín ni kíxin ó kótjoá asénni la ko ó noheni kíxin jína tjenkayáxinni la ko kaín asénni tinkáchónkini Cristo. ⁶ Iso sín la kjuíchröe sín kíxin itjo tí nkehe chónkó. ⁷ Tjinkaon sín chrók'óna sín maestro chrókjuako sín tí ley a ntá jehe sín tienxínhya sín tí nkehe tjako sín kjanchó ntáchro sín kíxin ó ntoá tí nkehe tjako sín, ntá chaxínhya.

⁸ A ntá jeheni la ó noheni kíxin tí ley la jína tí chrokjuakoni éxi tjinkaon Dios. ⁹ Ó noheni kíxin tí sín tjasinhya jie t'ichjánxienhyá sín tí ley tsík'etoan Moisés. Tíhi la t'ichjánxihin tí sín titekakonhyá la ko tí sín jiehe la ko tí sín jínahya tjasin jie la ko tí sín chontahya kjuasáyé Dios la ko tí sín t'oyán it'el la ko iné sín la ko kaín tí sín tjaya. ¹⁰ La ko tí sín tjasinko jie ijkkochojni chjin ókjé la ko tí sín jnkokón ntoa sín takja kichó sín la ko tí sín teé chojni ntá nchekji, la ko tí sín ch'ia la ko tí sín nchenohe Dios ntá chaxínhya. Mé tí ley mé chrókuinhin kaín tí sín ch'e tí nkehe jínahya la nínkakonhen tí nkehe jína tjakoni. ¹¹ Tí nkehe tjakoni mé chaxín tí tan jína sinchekaá chojni la tí Dios tjetoan mé k'uetuanna kíxin tsjákuua tíha.

Ch'ín Pablo kjuanchehe ch'án kjuasáyé Dios

¹² Tjancháhá kjuasáyé Ìnchéni Jesucristo kíxin imá kjuínkitsana ch'án la ko k'uíkon ch'án kíxin jína sit'aħa ch'án xra ntá chjina ch'án tí xra i. ¹³ Mé xikaha kjueyána ch'án kjónté senó imá k'uék'ántaxíñhañ tí sín tinkáchónki ch'án la ko k'uéchonkíha sín la ko chrók'oyán sín. Kjónté la Dios imá kuijkonóhe ch'án tí janhan kíxin ó nohe ch'án kíxin k'uékinkachónkiha janhan tí jehe ch'án la ko k'uénonahya nkehe tí xra k'uékjít'a. ¹⁴ Méxra Ìnchéni antsí má kjuincheyonna kíxin ntá kjuanon ch'án kjuachaxin kíxin tsinkachónkia ch'án la ko tsotjuahá ch'án. Mé xikaha kaín ni chontani tí kjuachaxin tinkáchónkini Cristo Jesús.

¹⁵ Tíhi mé chaxín la kaín ni chrókuitekaonni. Ikui Jesucristo chjasintajni kíxin sinchekaá ch'án tí sín kjuasin jie. Ntá janhan mé antsí má kjuásian jie. ¹⁶ Kjónté xikaha kjuit'a la Dios antsí má kuijkonóana ch'án tí janhan kíxin xikaha kjuakoxin Jesucristo kíxin kóninkakonhyá ch'án. Mé xikaha tsjákuaxian kaín nkexro tsitekaon tí jehe ch'án kíxin tsochonta sín kjuachón jnkochríxín. ¹⁷ Ntá jnkochríxín tsochónteheni kjuasáyé tí Rey t'etoan. Jehe ch'án mé ijkkochojni nkeexo xráxín tjen la mé ijkkochoexo chónhyá ts'en la xitjahya ts'ikonni ch'án. Jehó ch'án mé Dios la imá nohe ch'án. Amén.

¹⁸ Timoteo, éxi xjanna t'íkuan tí jaha, la kaín tí xra i tjaha kíxin tsjanjonkoa tí jínahya la tsjacha kíxin tinkachónkia jína Ìnchéni la ko tjenkayáxian tí nkehe jína. Mé xikaha

sinchexiteyá tí nkehe kuínhín senó kíxín tí sín kíchó ni chrónkaxín ihnié Dios. ¹⁹ Í so sín la kjuenkayáxinha sín tí jína ntá kjuíchròe sín kuitohe sín tí nkehe tinkáchónki sín. ²⁰ Mé xíkaha kónhen ch'ín Himeneo la ko ch'ín Alejandro. Janhan kjuánjuan kjuachaxin kíxín ch'ín Tsochren mé sinchekjasóte sín kíxín mé xíkaha ts'itja sín kíxín í ts'ántaxiénya sín Dios.

2

Nkexrí chrónixjeheni Dios

¹ A ntá saoxín la xrjanóaha kíxín kaín chojni chrónixjehé sín Dios la chrókjanchehe sín kjuasáyé ch'án kíxín chrókjunkitsa ch'án kaín xín chojni. ² Chrókjanchia sín kíxín Dios imá chrókjunkitsa ch'án kaín tí sín t'etoan la ko tí sín gobierno kíxín ntá kjuaxróxin ts'ejóni la ko sinchexiteyéheni Dios la ko ntoá ts'ejóni. ³ Xíkaha mé imá jína la tóxrjíñhín Dios, mé tí nkexro tsaáxinni. ⁴ Jehe ch'án mé imá tjinkaon ch'án kíxín tsaá kaín xín chojni la ko tjinkaon ch'án kíxín tsongohe chojni tí nkehe chaxín ntoá. ⁵ Mé itjen jnkokoáxón Dios la ko itjen jnkokoáxón nkexro nixjayákonhenni kíxín tsochóxinni Dios. Tíha mé Jesucristo mé k'óna chojni ikui ch'án chjasintajni. ⁶ Jehe Jesucristo mé k'uenyákonhenni kaín xínni, kjuenkayákonhenni ch'án ijiéni kíxín tsaáxinni ch'án. Táha mé xiteyá tí tsintáchro Dios ósé kíxín xíkaha tsónhen ch'án. ⁷ Méxra tí xra mé kjueyána Dios kíxín tsíjkákohá tí sín jehya judío kíxín tsinkáchónki sín Jesucristo la ko tsongohe sín tí nkehe chaxín. Janhan mé tinkachónka Cristo la xrjanáka tí nkehe chaxín mé t'ayahya.

⁸ Méxra tjínkaván kíxín kaín tí sín ntoá mé chrónixjehé sín Dios la chrókjuya sín tja sín la chrókótjóá qasén sín la ko chrókónínkakonhya sín la ko chrókjuehya sín kjuaníkaon. ⁹ A ntá tí chojni chjin mé ntoá chrók'uitsa sín ka la chrókjinchehnkehya sín la ko chrókjusin chónthaya sín kaxihí sín nkehe tjete xroxrjo náxrjón la ko chrók'uitsahya sín ika imá tjete. ¹⁰ Íchá jína kíxín tí chojni chjin chrókjuch'e sín tí xra jína éxi chrókjuch'e kaín tí sín tsíkjinchetjóá Dios. ¹¹ Tí chojni chjin t'ichjánxín chrókuinhin sín itén Dios la chrónixjahya sín la ko chrók'uetoanhya sín. ¹² A ntá janhan tjánjonhya kjuachaxin kíxín chojni chjin chrókjako tí nchónhya chojni siín la ko tjánjonhya kjuachaxin chrók'uetuñhen sín chojni ntoa. Jehe sín la tání sín chrók'uejó sín ¹³ kíxín saoxín la Dios kjuich'eña ch'án tí ch'ín Adán la ntá chrí'exin kjuich'eña ch'án tjan Eva. ¹⁴ A ntá ch'ín Adán la ninkexró kjuich'iyehya ch'án. Náhí. Tí tjachjin mé tsíkitekakonhen tjan tí nkexro tsíkjich'iyehya tjan ntá xíkaha xrankíxixín k'uixin jie. ¹⁵ A ntá tí chojni chjin la kjónté xíkaha kjuich'e sín la Dios sinchekaá sín tí jína ts'ayakonhen sín xjeen sín la tí chaxín tinkáchónki sín Dios la ko tjuèhe sín ch'án la ko ntoá ts'ejó sín la ko jína tsjenkayáxin sín.

3

Jína chrók'uejó tí sín t'etuñhen tí njinko

¹ Ijnko nkehe chaxín tjonka. Tí nkexro tjinkaon sich'e xra kuénte njinko mé imá jína xra tjinkaon ch'án. ² Tí ch'ín chrók'uetoan mé ntoá chrókjuk'e ch'án kíxín kohya nkexro chrók'ueka ch'án jie la ko kjaxin chróchóntha ch'án jnkokoá ichjién ch'án ó la ko kjaxin chrókjuk'e ch'án jína la ko chrókjuenkayáxin ch'án jína la ko chróchóntha ch'án kjuasáyé ch'án la ko kjaxin jína chrónixjehé ch'án tí nkexro tiji ntoe la ko kjaxin chrókonohe ch'án tí nkehe chrókjuko ch'án. ³ La ko kjaxin chrókókoanhya ch'án la ko chrókjuehya ch'án kjuaníkaon la ko kjaxin chrókóxrjíñhya ch'án kíxín chrókjucha ch'án nchónhya chichaon. A ntá chrókójehya ch'án la ko kjuaxróxin chrókjuk'e ch'án la ko chrókóxrjíñhya ch'án chróchóntha ch'án itsjé chichaon. ⁴ Jehe ch'án mé kjaxin jína chrók'uetuñhen ch'án tí sín tjejó ntoe ch'án la ko chrókjuentuéhe ch'án xjeen ch'án kíxín tsitekaon xjan la tsjikosáyehe xjan it'é xjan. ⁵ Tí tsjachahya ch'án ts'etuñhen ch'án tí sín tjejó ntoe ch'án la ¿ntá nkexrí chrók'uetoan ch'án tí njinko kuénte Dios? ⁶ Íchá jína

kíxin jehya ijnko nkexro na ntá k'uixenhen chrókjuako kíxin tí nkexro na ntá k'uixenhen la imá chrókjuinchehnke ch'án la ntá chrókjuasin ch'án jie éxí kjuasin ch'ín Tsochren ijie senó. ⁷ Kjaxin t'ichjánxín kíxin kaín xín tí sín naxa tinkáchónkihya Ìnchéni mé tsochonta sín kjuasáyé tí ch'ín t'etoan a. Tí náhi la ts'eka sín ch'án jie ntá tí xikaha la ch'ín Tsochren tsjacha tsjachròe tí ch'ín a ntá tsjasin ch'án jie.

Nkexrí chrók'uejó tí sín tsjinkitsa tí xra kuènte ninko

⁸ Kjaxin tí sín diácono ch'e xra kuènte ninko la kjaxin ntoá chrók'uejó sín kíxin chróchónthe sín kjuasáyé chojni. Kjaxin t'ichjánxín kíxin chrókjuinchexiteyá sín tí nkehe ntáchro sín la ko chrókókoanhyá sín la ko kjaxin chróchontiaxinhya sín itsjé chichaon chrókjuacha sín. ⁹ T'ichjánxín chrókónohe sín jína tí nkehe tinkáchónki sín kíxin jehe sín chróxraxinkaon sín á nchoxon tí xra ch'e sín. ¹⁰ Saoxín chrótsjehe kaín chojni á ninkehó jie chóntahya tí nkexro la ntá tí chaxín jína jehe ch'án la ninkehó jie chóntahya ch'án ntá jína ts'ixenhen ch'án tí xra kuènte ninko. ¹¹ La ko kjaxin tí chojni chjin mé chrók'uejó sín jína kíxin chróchóntha sín kjuasáyé sín. Kjaxin chrókuinkáchónkihya sín kjuach'ia la ko jína chrók'uejó sín la ko chrókjuinchexiteyá sín kaín nkehe. ¹² Tí sín diácono la mé chróchóntha sín jinkokoá ichjién sín la jína chrók'uetuenhen sín xjeen sín la ko jína chrók'uetuoan sín ntœ sín. ¹³ T'ichjánxín ijnko xra jína sich'e sín kíxin ntá tsjacha sín ts'ayéhé sín ijnko nkehe jína tsjanjon ìnchéni la ko kjaxin tsosuèhya sín tsochrónka sín nkexrí tinkáchónki sín Cristo Jesús.

Dios mé kjuíchenoheni tí nkehe k'uékienxínhyani

¹⁴ Tjinkavan tjoka chrókjuasántsjahá tí jaha kjánchó senó tsokjian tí xroon i. ¹⁵ A ntá tí tsoxrjenna isé ntá kjónté tsotonha nkexrí chrók'uejó tí sín naxa kjéhya Dios mé tí sín t'óna ninkoe Dios tjechón. Jeheni kaín ni mé tjejót'ayakonhenni tí tan chaxín ntoá. ¹⁶ Ninkexró chróntáchrohya kíxin chaxínhyá tí nkehe tinkáchónkini mé ijnko nkehe imá jié tíha la ninkexró k'uénoehya tí senó a.

Dios mé ikui k'óna chojni;

ikui ch'án kjuakoxín ch'án kjuachaxién Nchakuen Dios chóntha ch'án kíxin jína tí jehe ch'án.

La ntá tí sín ángel mé k'uikon sín ch'án

la kuenté chjasintajni mé ó kuínhin sín nkehe chrónka ch'án
ntá itsjé sín kuítekaon sín ch'án.

Ntá Dios k'uáyéhé tí jehe ch'án nkaya nkajní.

4

Tí sín kuítuhe tinkáchónkihya Cristo

¹ A ntá ntáchro Nchakuen Dios kíxin tí chjina tsjeje chjasintajni mé iso sín mé tsítuhe sín í tsinkáchónkihya sín Ìnchéni la ntá tsitekaon sín nchakuen tí jínahya sich'iyeha sín la ko tsitekaon sín tí nkehe tjako tí sín demonio. ² Mé tsinhin sín tí nkehe tjako tí chojni tjuáhya la ch'ia sín. Kjónté imá tsjasin sín jie la í tsosuèhya sín kíxin éxí tsichján tí tjenkayáxihna sín la í tjenkayáxihna sín jína. ³ Jehe sín mé tjinkakonhya sín kíxin chrókótehe chojni la ko kjaxin tjinkakonhya sín kíxin chrókjóneni nto. A ntá jeheni ó noheni kíxin Dios mé kjuích'eña ch'án kaín xín nkehe ineni la tjinkaon ch'án kíxin tí jeheni tinkáchónkini ch'án la ó noheni tí tan chaxín ntoá mé chrókjuancheheni ch'án kjuasáya ntá chrókjóneni. ⁴ Méxra kaín xín tí nkehe kjuích'eña Dios la jína la kohya nkehe chróntáchroni kíxin jehya jína sineni. Chrókjuancheheni Dios kjuasáya la ntá jína chrókjóneni ⁵ kíxin tió tsoxraxinkaonni itén Dios la tsonixjeheni ch'án la ntá sincheyaon ch'án tí nkehe sineni.

Ijnkо chojni jína ch'ehe xra Jesucristo

⁶ Jaha tjácohé tí sín kíchó ni kaín tí nkehe i la ntá xíkaha imá jína sich'ehé xra Jesucristo la ko əntsí tsjinkitsa ch'án ts'ánkí kjuaxrexinkaon kuéntá tí tinkachónkia tí tan kuénté ch'án la ko naxa tjákua tí nkehe jína ó xrákoha. ⁷ Jaha mé tahya kuenté tí cuento chónkó la ko tí nkehe ntoáhya tinkáchónki iso sín. A ntá jaha la chrókuitoéhya chrókuinkachónkia Dios. ⁸ Tí chojni tsítán la jína tíha kjánchó əntsí má tjetoan chróxraxinkaonni Dios. Tíha la tsjinkitsa kíxin jína xritjejóni ijie la ko kjaxin tsjinkitsa kíxin ts'ayéheni kjuachón jnkochríxín tió tsokjan Ínchéni. ⁹ Kaín tíhi mé chaxín la kaín chojni chrókuitekaon. ¹⁰ Mé xíkaha kjónté t'ántaxínhinni chojni la jína ch'eni tí xra i kíxin tinkáchónkini Dios tjechón. Jéhe ch'án chaxín sinchekaá ch'án kaín tí chojni titekaon tí jehe ch'án.

¹¹ Kaín tíha mé t'ichjánxin tsétoan la ko tsjákua. ¹² Jaha chrókuitoéhya kíxin chrokjuanoá sín kjónté naxa ntasoyá. Chrókjuáqexián tí sín tinkáchónki Ínchéni nkexrí chrónixja sín la ko nkexrí ntoá chrók'uejó sín la ko nkexrí chrótjuéhe sín Dios la ko nkexrí chrókuitekaon sín Ínchéni la ko nkexrí tjóá chrók'uejó sín. ¹³ Nachrohe tsjasán la jaha sinchekuáxian tí xroon itén Dios kíxin tsinhin kaín sín la ko sinchexraxinkávan kaín tí sín kíchó ni la ko tjácohé sín. ¹⁴ Sinchek'itjáyanhya tí kjuachaxién Dios k'uayéhé tió tí sín t'etóan kuénte niniko kjuachaxién Dios k'uejotja tja sín chrítaón ikjá.

¹⁵ Chrókóxakonhan chrókjuinchexiteyá kaín tíha kíxin kaín chojni tsotsjehe sín kíxin jína noha. ¹⁶ Chrókjuenkayáxian jína tí nkehe tjákua kíxin jína chrókjuak'e jaha, chrókjuinchexiteyá kaín nkehe la ntá tí xíkaha sich'e la tsaá jaha la ko tí sín tjejótinhin tjákua la tsaá sín kjaxin sín.

5

Jína chrók'uejó tí sín tinkáchónki Cristo

¹ Jaha la chrókóninkákuenhya tí sín ó táda. Náhí íchá jína chrónixjehé sín jnkójina éxi chrónixjehé it'á. La kjaxin tí sín ntasoá chrónixjehé sín éxi chrónixjehé kíchuá mero. ² A ntá tí sín ó nána la mé chrónixjehé sín éxi chrónixjehé iná xíkaha. Kjaxin tí sín tjarisoá mé jnkójina chrónixjehé sín éxi chrónixjehé kíchuá mero la kjaxin chróchóntehé sín kjuasáya.

³ La ko kjaxin chrókjuinkitsa tí sícjin tsíkók'án la ko nchekitonhén sín nkehe sine sín tí chaxín kohya nkekro tsjinkitsa sín. ⁴ A ntá tí chojni chjin tsíkók'án chóntha xjeen o chóntha inté, a ntá tí jehe sín mé chrók'uitja sín chrókjuinkitsa sín kíxin sine tí sín kjéhya sín. Tíha mé chrókjuenkaxin sín tí it'é, iné sín kíxin kjuínchek'ánkí sín, kíxin xíkaha mé jína tóxrjíñhí Dios. ⁵ Tí tjan chaxín tsíkók'án na jehó tjan tjen tjan la imá chrónóehé tjan Dios tie la ko nchakotjin. ⁶ A ntá tí sín tsíkók'án ixri sín tjasin sín jié la kjónté tjejóchón sín la éxi tsík'en sín xíkaha tjejó sín. ⁷ Tétuénhén tí sín kíxin sinchexiteyá sín kaín tíha kíxin tsokohya nkekro tsjanchia jié. ⁸ A ntá tí nkekro tóxakuenhya kíxin tí sín naxa kjéhya la ko kjaxin tóxakuenhya kíxin tí sín tjejó ntøe ch'án mé xíkahó tjakoxín kíxin ninkehó tinkáchónkihya ch'án Dios. Mé xíkaha əntsí chóntha ch'án jié a ntá tí sín tinkáchónkihya Ínchéni la kénhyó.

⁹ Tí ts'íníxín iñnié tí sín tsíkók'án la chrók'uínixín jehó tí sín chóntha sesenta nánó la ko tí sín k'uéchóntha sín jnkokoá xí. ¹⁰ Kjaxin chrókjuakoxín tjan kíxin jína ch'e tjan xra la ko chrókjuakoxín tjan kíxin jína kjuínchek'ánkí xjeen tjan la ko kjaxin jína nixjehé tjan tí nkekro tjií ntøe tjan la ko kjaxin k'uayakonhen tjan tí sín tinkáchónki Cristo la nchehnkehya tjan la ko kjaxin kjuínkitsa tjan tí sín níhi la ko í so xra jína kjuich'e tjan.

¹¹ A ntá chrók'uénixínhyá iñnié tí sín tsíkók'án naxa tsjéhya nánó chóntha kíxin tsontáchro ašén sín kíxin í jnko chojni ntoa tsotéhe sín ínaá la ntá tsítóhe sín ixra kuénte Cristo. ¹² Ntá xíkaha tsjasin sín jié kíxin sinchexiteyáhya sín tí nkehe tsítáchro sín. ¹³ Kjaxin sátsji sín iñko nchia la í jnko nchia la ntá tsoséhe sín la ntá kjaxin xriko sín kjuach'ia la ko ch'eña sín kjuach'ia la kaín nkehe nixja sín la jehya jína tí xíkaha chrónixja sín. ¹⁴ Méxra tí sín tsíkók'án naxa tjarisoá sín la íchá jína chrókótehe sín chróchóntha sín xjeen sín la ko

chrók'uàyakonhen sín ntœe sín. A ntá tí xikaha la tí sín nínkakonhan la chrókjontahya sín tí jaha. ¹⁵ A ntá iso tí sín tsíkók'án ó kuítøhe sín tinkáchónki sín Închéni kíxin ch'ín Tsochren tsíkjachrœ sín.

¹⁶ A ntá jnkoyín chojni tinkáchónki Cristo ts'ikon sín kíxin tsíkók'án tí sícjin kjéhya sín ntá t'ichjánxín tsjinkitsa sín kíxin sine tí sín a kíxin tsochóntahya sín tí njinko tsjinkitsa. Méxra jehó tí sín chaxín tsíkók'án chóntahya ninkexró tsjinkitsa mé chrókjuinkitsa tí njinko.

¹⁷ Tí nkexro jína t'etoan xra kuènte njinko la jehe sín chrókjuacha sín la ko kjaxin antsí chrókuiskosáyehe chojni tí sín chaxín xra ó tjejóchronkaxín sín la ko tjako sín. ¹⁸ Kíxin xroon itén Dios mé ntáchro kíxin: "Chrók'uéjóyáhyará kampoxa ir'va tí koxinta tjejóch'e xra", la ko kjaxin ntáchro kíxin: "Tí sín ch'e xra la siín kjuachaxin chrókjuacha sín."*

¹⁹ Chrókuahya kuenté jnkoyín nkexro tsjikao kjuach'ia t'eka jie tí nkexro t'etoan xra kuènte njinko. T'ichjánxín tsônoxín yaá o iy'á sín tsochrónka kíxin chaxín chóntha jie tí nkexro a. ²⁰ Chrókjuéntuéhé tí sín tjasin jie nkayakon kaín sín kíxin ntá tsinhin tí í so sín kíxin tsochrakon sín, í tsjasinha sín jie. ²¹ Tétuqxian kjuachäxién Dios la ko Închéni Jesucristo la ko tí sín ángel kjueyá ch'án kíxin jnkokón tsjéntuéhé kaín chojni la ko jnkokón tétueñhén sín kaín tí nkehe xrajka. ²² Chrókjuéyáhyará chjini jnkoyín sín kíxin ts'etoan sín xra kuènté njinko kíxin tí chróchóntha sín jie la kjaxin jaha chrókuamá tí jie. A ntá jaha chrókuitohé kaín nkehe jínahya.

²³ Jaha la jnkoyaxón tóníha tjoté tsaa. Jehya inta ó chrók'uia. Kjaxin intsí xranvino chrók'uia ntá chrókuítaxián jína.

²⁴ Tí ijié jnkoyín chojni la t'ikonni noxín tí naxa kuítøexínha ijié sín. A ntá í so sín nòxinhya tjasin sín jie kjanchó tió tsjixixín la tsônoxín tí jie tjasin sín. ²⁵ Mé xikaha kjaxin ó t'ikonni kíxin iso chojni imá ch'e sín tí xra jína. A ntá í so sín kjónté t'ikonhyani la xitjahya tsjak'emá sín tí nkehe jína ch'e sín.

6

¹ Tí sín ch'exín xra mé t'ichjánxín tsochónteha sín kjuasáya tí lamo kuènte sín, kíxin ntá tí í so sín la ts'ántaxiéñhya sín ihnié Dios la ko ts'ántaxiéñhya sín tí nkehe tjakoni. ² A ntá tí sín ch'exín xra la chóntha sín lámoé sín tinkáchónki Cristo la mé chrókuitøehya sín tsjikosáyehe sín tí lamo kíxin jnkokoá kichó sín. La mé antsí jína chrókjuinkitsa sín kíxin ó nohe sín kíxin tjinkitsa sín ijkno nkexro tinkáchónki Cristo la chrótjuéhe sín kichó sín. Jaha mé tjákohé sín kaín tíha.

Tí nkehe tinkáchónkini tsôchëxinni

³ Iso sín tjako tí nkehe jehó sín tjenkayáxin sín la tóyóehya tí nkehe jína kjuako Închéni Jesucristo la ko jehya tí nkehe tinkáchónkini. ⁴ Ó jehí nchehnke sín la nínehó noehya sín. Tí ntoáhya nixja sín la tíha mé exí ijkno chin chóntha sín la tíha mé tjixín tí kjuachjinoxínha la ko tjanjonko kichó sín la ko t'ántaxíñha sín kichó sín la ko chóntehya sín kichó sín kjuasáya. ⁵ Mé tí sín la naxrjónhya tjenkayáxin sín la jnkochríxín tjanjonko kichó sín la noehya sín tí nkehe chaxín. Mé tjenkayáxin sín kíxin tinkáchónki sín Închéni kíxin xikaha chrókjuacha sín nchónhya chichaon, ichro sín. Jaha la chrókuitohé tí sín xikaha ch'e.

⁶ Tí tinkáchónkini Închéni la ijkno nkehe imá tjetoan la ko tjete tíha a ntá kjuaxróxin chrók'uejóni kjónté tí nkehe chóntani ó. ⁷ A ntá tí kokjihini la ninkehó kuikohyani tí kuini chjasintajni la kjaxin tió ts'enni la ninkehó nkehe xitjahya sátsjikoni. ⁸ A ntá tí chóntani nkehe sineni la ko chóntani ikéni la kjónté táchó la chrókóchéheni. ⁹ A ntá tí sín tjinkaon sín imá chrókóríko sín mé tí sín a mé tsjichrœ sín la lonti sín kíxin xikaha tjenkayáxin sín, la mé ts'itjáyanxín sín tíha. ¹⁰ Tí imá tjuéheni chichaon la tíha mé nuéé kaín nkehe

* ^{5:18} Deuteronomio 25.4, Mateo 10.10; Lucas 10.7

jínahya. Jnkojín chojni imá tjinkaon sín tsochónta sín chichaon ntá tsjichròe sín tsítóhe sín tsinkáchónki Ìnchéni la tíha mé imá sinchekjasótexín sín əsén sín.

Jína tí nkehe tinkáchónkini

¹¹ Jaha mé tinkachónké Dios la títóhé kaín tí nkehe i. Chrókjuak'e ntoá la ko kaín əsán chróxráxinkávan Dios la ko chrókuinkachónkia ch'án la ko chrótjuéhé kíchua la ko chrókónínkákonhya tjoka la ko chrókjuinchehnkehya əsán. ¹² Tjanjonkoa kaín nkehe jehya tí jína la ko kaín əsán tinkachónkia Ìnchéni kíxin ntá chrókjuacha chrók'uayéhé tí kjuachón jnkochríxín kíxin mé xíkaha k'uíyaha Dios tí jaha. Jaha la ó tsíchronka kíxin tinkachónkia Ìnchéni la ó kuínhin la ko k'uíkon nchónhya chojni. ¹³ Nkayakon Dios, tí nkexro chjéhe kjuachón kaín xín tí nkehe síchón, la ko Jesucristo, tí nkexro tsíchrónka jína nkayakon ch'ín Poncio Pilato, mé tétuanhán ¹⁴ kíxin sinchexiteyá kaín tí nkehe t'etoan Dios kíxin í chrókjuínkíhya tí nkehe chrókuinkachónkia la ntá tsokohya ninkexró ts'eka jie tió tsjixrakájia tí yaon tsokjan Ìnchéni Jesucristo. ¹⁵ Tsjixraká tí yaon kjueyá Dios ntá jehe ch'án mé tsjanjon ch'án kjuachaxin kíxin itsi Jesucristo. Dios la jehó ch'án mé chóntha ch'án kjuachaxin ts'etoan ch'án. Jehe ch'án mé tí Rey t'etuēnhen kaín xín tí sín rey la ko jehe ch'án mé Ìnché kaín chojni. ¹⁶ Jehó Dios mé chónhya ts'en la tí tjen ch'án la imá t'inkaséyan la ko kohya nínkexró tsjacha tsochjina tí tjen ch'án. Nínkexró k'uíkonhya tí jehe ch'án la ko ninkexró xitjahya ts'ikon tí jehe ch'án. Tsjikosáyeheni ch'án kíxin jehe ch'án chóntha ch'án kjuachaxin ts'etoan jnkochríxín. Amén.

¹⁷ Tí sín chóntha itsjé nkehe chjasintajni mé tétuēnhen sín kíxin sinchehnkehya sín la ko tétuēnhen sín kíxin tsochontiāxinhya sín tí nkehe chóntha sín kíxin jnkochríxinhya tsochóntha sín tíha. Íchá jína chrókuinkáchónki sín Dios tjechón kíxin jehe ch'án tjanjon ch'án kaín xín nkehe kíxin mé xíkaha tjinkaon ch'án tsochéheni. ¹⁸ Tétuēnhen sín kíxin chrókjuch'e sín tí nkehe jína kíxin tí chaxín chrókóríko sín la chrókjuinkitsa sín kíchó sín la chrók'óxikayéhe sín tí nkehe chóntha sín. ¹⁹ Mé xíkaha chrókjuacha sín tí nkehe tjete kíxin chr'éxín la jína chrók'uejó sín kíxin chrókjuacha chróchóntha sín tí kjuachón jnkochríxín.

Kjuixixín k'uítuenhen ch'ín Timoteo

²⁰ Jaha Timoteo t'ayakonhén tí xra la tiénya tí nkehe ntoáhya nixja chojni. Ntáchro sín kíxin imá nohe sín kjánchó chaxínhya tíha. ²¹ Iso sín ó xíkaha ntáchro sín kíxin imá nohe sín la ntá kjuíchròe sín í tinkáchónkhyá sin Ìnchéni. Dios chrókjuintayavan tí jaha. Amén. Ó tjen.

Tí xroon yóxin ikjin ch'ín Pablo chr'éhen ch'án tí ch'ín Timoteo

Ch'ín Pablo nixjehé ch'án tí ch'ín Timoteo

¹ Janhan Pablo mé kjueyána Jesucristo t'ahá ch'án xrä kíxín xíkaha tjinkaon Dios kíxín mé xíkaha ó chrónka ch'án kíxín tsjanjon ch'án kjuachaxin tsochónta chojni kjuachón jnkochríxín tí tsinkáchónki sín Jesucristo. ² Ikjian tí xroon i chr'anhan jaha kichó ni Timoteo. Tíkuān éxí xjanna tí jaha mé imá tjuāha. Kjuasáyé It'eni Dios la ko Inchéni Jesucristo chrókjuntayavan ch'án la ko chrókuikonóha ch'án la ko chrótjáha ch'án kjuaxróxin.

Chróchrónka ch'án kíxín tinkáchónki ch'án Jesucristo

³ Xráxinkávan tí jaha tió níxjaha Dios nchakotjin la ko tie la ko tjétjáncháha kjuasáyé Dios kíxín imá tinkachónka ch'án. Jehe ch'án mé t'ahá xrä kaín asenná éxí xíkaha mé k'uékjich'e tí sín tsík'axrjeníxina. ⁴ Xráxinkávan jnkochríxín nkexrí tsjanka la tjíkávan kíxín chrótsjaha tí jaha ínaá kíxín tsochéhé asenná. ⁵ Ó nòna kíxín kaín asán tinkachónka Jesucristo. Kjáxin náchría tjan Loida la ko iná tjan Eunice mé saoxín kuinkáchónki sín Inchéni Jesús la ntá ó nòna kíxín kjá kjáxin jaha xíkaha tinkachónka ch'án.

⁶ A ntá ijie ntaxráxinkávan kíxín chrók'uitjáyanha tí kjuachaxién Dios kjuanjon ch'án k'uayéhé tió kjuaké tjaná chrítaón tí jaha. ⁷ Dios la kjuanjonhyá Nchakuen ch'án kíxín tsochrakonni. Náhí. Kjuanjon ch'án tí Nchakuen ch'án kíxín tsochontani kjuachaxin la ko jína tsotjuéheni ch'án la ko jína tsjenkayáxinni. ⁸ Chrókósúàhya chróchronka kíxín tinkachónka Inchéni la ko kjáxin chrókósúàhya chróchronka kíxín janhan tjéchjíaxián tí xrjanka itén ch'án. Kjónté la íchá jína chrókjuasótxesián tí tjákua tí tan tsaáxinni kíxín tí kjuachaxin kuente Dios ó k'uayéhé. ⁹ Jehe Dios mé kuaáxinni la ko kjueyá ch'án tí jeheni kíxín jína chrók'uejóni. La jehya tí xrä jína kjuich'eni ntá chrókuaáxinni. Náhí. Kjuasáyé Dios kjueyá ch'án tí jeheni kíxín tsinkáchónkini Jesucristo. Tí naxa xrankíxíxínya chjasintajni mé tsíkjenkayáxin ch'án tíha kíxín jehe ch'án mé imá tjuéheni ch'án. ¹⁰ Ntá jie ó kjuakoxín Dios kíxín tjuéheni ch'án kíxín ó kui tí nkexro tsaáxinni mé Jesucristo. Kjuínchek'itjáyan ch'án tí kjuachaxin k'uéchónta tí kjuach'én kíxín kjuacha ch'án xechón ch'án ínaá. Chronkaxín itén ch'án nkexrí tsaáxinni ntá ó kónoexínni kíxín tí kjuachón kjuakoxín ch'án mé xitjahya ts'itjáyan.

¹¹ Dios mé k'uettuanna sátsjixrjanka itén ch'án la ko kjueyána ch'án tsjákohá tí sín jehya sín judío tí tan jína. ¹² Mé xíkaha tjétjasótxinna kaín tí nkehe i la kjónté tósuanahya kíxín ó choxian jína tí nkexro tinkachónka. Mé ó nòna kíxín chóntha ch'án kjuachaxin ts'ayakonhenni ch'án tsjixrakájia tí yaon tsokjan ch'án. Méxra janhan tjaħa ch'án asenná kíxín ts'ayakonhen ch'án.

¹³ T'itjáyanha tjákua kaín nkehe jína ó kjuákoha. Naxa títekávan la ko tjuéhé kíchuárá kíxín tinkachónka Cristo Jesús. ¹⁴ Kjuachaxién tí Nchakuen Dios chónthani jnkojnkoni mé t'ayakonhén jína tí tan tjákua kjuíntakítónhan Dios k'uayéhé.

¹⁵ Jaha mé ó noha kíxín kaín tí sín estado Asia mé jehe sín kuítóna sín la ko kjáxin tí ch'ín Figelo la ko ch'ín Hermógenes. ¹⁶ Tjáncháha Inchéni kíxín imá tsikonóehe ch'án tí sín tjejó ntøe tí ch'ín Onesíforo kíxín jehe ch'án mé imá kjuínkitsana ch'án la ko kósuèhya ch'án ikui ch'án kjónté tjéchjina. ¹⁷ Tí nantá kjuíji ch'án chjasin Roma ntá kuítøehya ch'án kjueyána ch'án hasta k'uitjana. ¹⁸ Tjáncháha Inchéni kíxín tí yaon itsi ch'án ntá chrókuikonóehe ch'án tí ch'ín a kíxín jaha ó noha jína kíxín nkexrí kjuínkitsa ch'án tí janhan tí chjasin Éfeso kjáxin.

2

Kjuíncheyóexin ch'ín Pablo kíxin jeheni éxí yóhē ijnko soldado jína kuènte Jesucristo

¹ Jaha xjeenni tákjá tí kjuachaxin kjuasáyé Jesucristo kjuanjon ch'án kíxin tsjinkitsa kíxin tinkáchónkini ch'án. ² Tí nkehe kuínhín kjuàkua nkayakon nchónhya chojni mé xikaha chjehé tí xrä tí sín jína choxian jína ch'e xrä kíxin ntá jehe sín mé xikaha chrókuakohé sín í so chojni ínaá.

³ Jaha la kjónté nchónhya nkehe kjuasótia la chrókuacha kíxin ijnko soldado jína kuènte Jesucristo. ⁴ Kohya nijnko soldado jína ch'e xrä chrók'uixenhen ókjé xrä kíxin t'ichjánxin jnkójinxón xrä sich'e ch'án kíxin éxí tjinkaon tí nkexro t'etueñhen ch'án. ⁵ Mé xikaha éxí yóhē ijnko nkexro tsotsítán. Ntá tsjachahya ts'áyéhē ch'án nijnko nkehe tí sinchexiteyéhya ch'án tí sín t'etoan. ⁶ La éxí yóhē ijnko nkexro ch'e xrä nonte ntá chóntha ch'án kjuachaxin saoxín tsakja ch'án tí nkehe ts'óna. ⁷ Chróxraxinkávan jína kaín tí nkehe xräjaka la ñinchéni mé tsjinkitsa tsíénxian kaín nkehe.

⁸ Xráxinkávan kíxin Jesucristo la ó xechón ch'án. Jehe ch'án mé k'uaxrjeníxin ch'án ch'ín rey David. Tíha mé tí tan jína tsaáxinni tjétjàkua. ⁹ Tí tan tjéxräjaka mé tjasótexinna. Tíha mé tjéchrontetoxínna cadena éxí ijnko chojni tsíkjaya la kjónté tí itén Dios la jehya tjéchrontetoxín cadena. ¹⁰ Méxrä kjónté nchónhya t'atsínka tí janhan la ntaxiteyá kíxin tí í so sín kjueyá Dios tsaáxin sín ch'án kíxin tsochóntha sín kjuachón jnkochríxín kíxin tinkáchónki sín Jesucristo.

¹¹ Tíhi mé chaxín:

Tí jehe ch'án k'uénxinni ch'án a ntá chr'éxín ts'ejókoni ch'án.

¹² La tí tsjasótexínni tí jehe ch'án la ntá kjaxin ts'áyéheni kjuachaxin kuènte ch'án ts'etoanni.

A ntá tí chrókuinchemáni tí jehe ch'án na ntá kjaxin ch'án la xikaha sich'e ch'án.

¹³ Kjónté nchexiteyéhyani ch'án la jehe ch'án tjenchexiteyá ch'án kíxin Dios la xitjahya sich'ia ch'án.

Chrókuich'eni tí xrä jína

¹⁴ Nchexraxinkávan sín kaín tí nkehe i. Dios tjetsjehe tétuenhén sín kíxin chrókuítóhe sín tí nixja sín tjanjonxín sín kíxin ó chónkó tíha la ninkehó sínkíhya. Tí xikaha ch'e sín la sinchek'itjáyan sín tí sín tjejótinhin. ¹⁵ Sich'e xrä jína kíxin tsöxrjíñin Dios tí xrä tjech'e a. Ntoá chrókuàkua tí tan jína chaxín kíxin ntá chrók'uichjánxínhyá chrókuítóhe. ¹⁶ La titohé tí nkehe náxrjónhya la ko chónkó nixja iso sín kíxin tí sín nixja xikaha la antsí tsinkák'ánkí tí nkehe jínahya nixja sín. ¹⁷ Tí nkehe jehya jína tjako sín mé éxí yóhē ijnko itón sóa sítinkáchr'enka. Mé xikaha tjako tí ch'ín Himeneo la ko ch'ín Fileto. ¹⁸ Jehe sín mé ó kjuixin kuítóhe sín tí ntja ntoá la ntáchro sín kíxin ó kjuixin k'uátsínka tí tsoséchón chojni. Ntá xikaha ch'iyeha sín tí í so sín la tsjítóxín sín tí nkehe tinkáchónki sín. ¹⁹ Kjánchó tí sín tinkáchónki Dios éxí yóhē tí xrä xrankíxixín tjał'qo xitjahya tsoxíka la chóntha éxí ijnko sello tí itén Dios ntáchro kíxin: "Ínchéni mé tjatsoan ch'án tí chojni kuénte ch'án",* la kjaxin ntáchro kíxin: "Kaín tí sín tinkáchónki Cristo mé t'ichjánxin chrókuítóhe sín kaín nkehe jínahya," mé xikaha ichro itén Dios.

²⁰ Ijnko nchia jié kuénte tí sín rico la siín vaso tsík'óna chica oro la ko vaso tsík'óna chica plata. La kjaxin siín nkehe tsík'óna ntachiso la ko nkehe tsík'óna nchetje. Iso la xrä ó tsík'óna kuénte tí xrä tjetean la í so la tsík'óna kuénte tí xrä tjetuanhya. ²¹ A ntá ijnko chojni chrókuítóhe kaín jié chrókóyóhē éxí ijnko vaso tjóá jína kíxin chrókuicháxinhin Ínchéni. A ntá tí nkexro xikaha chrókuich'ehya tí nkehe jínahya kíxin chrókuicháxinhin Ínchéni tí xrä jína.

²² Titohé kaín tí nkehe jehya tí jína tóxrjíñin í so tí sín ntasoá a. Chrókuak'e tí ntja ntoá la ko kaín əsán chrókuinkachónkia Cristo la ko chrótjuéhē kaín chojni la ko kjuaxróxin

* **2:19** Números 16.5; Juan 10.14

chrók'uejokoa kaín sín. Mé xíkaha chrók'uéjó kaín xín tí sín kótjóá əsén mé kaín tí sín tinkáchónki Închéni. ²³ Jaha chrókuahya kuénté tí sín lonti tjenkayáxinhya jína kíxin jaha ó noha kíxin xráhya chrókjuanjonko kíchó sín. ²⁴ A ntá ninkexro ch'ehe xrä Închéni chrókjuanjonko kíchó sín kíxin jína chrókjuinkitsa kíchó sín. Chrókónohe sín kaín nkehe jína chrókjuako sín la ko chrókóninkakuenhyá sín kíchó sín. ²⁵ Kaín əsén sín jnkójína chrónixjehé sín tí sín titekakonhyá kíxin chróchónhen sín kíxin Dios chrókjuinkitsa tí sín a chrók'uíxinkí tí ntoáhya tjenkayáxin sín kíxin ntá chrókónohe sín tí nkehe chaxín ntoá chrókjuich'e sín ²⁶ kíxin t'ichjánxín chrókónohe sín nkexrí chrókuaáxin sín kíxin ch'ín Tsochren tjinkaon chrókjuich'yehe sín ntá chrókjuasin sín jie.

3

Nkexrí ts'ejó tí chojni chjasintajni tí yaon tsjixixín

¹ T'ichjánxín chrókónoha kíxin tí yaon tsjixixín ntá itsi tí yaon kjuaxróxinhya ts'ejó chojni. ² Tí sín chjasintajni tsinkáchónkiha Închéni mé imá chrók'uetqan sín jehó la ko imá tsöxrjínhin sín chichaon la ko sinchehnke sín la ko imá ts'ántaxínhin sín Dios. Sinchexiteyèhya sín it'é sín la ko tsochóntahya sín kjuasáya la ko tsinkáchónkiha sín ninkehó dios. ³ Tsotjuèhya sín kíchó sín la ko tsikonóehya kíchó sín la ko tsjonta sín kíchó sín la ko ninkexró tsochrakuenhyá sín la ántosén sín tsjasin sín jie, la ko imá tsojijehé sín la ko imá tsöñinkakonhen sín kaín nkehe jína. ⁴ Jehe sín mé sinchekji kíchó sín la ko tsjenkayáxinhya sín jína la ko sinchehnke sín. Tsotjinkaon sín tsjeyá sín tí nkehe ntáchro əsén sín ó a ntá tsjeyáhya sín Dios. ⁵ Jehe sín la éxi chojni tinkáchónki Dios xíkaha ts'ejó sín. Kjánchó chaxínhyá. Tsinkáchónkiha sín tí kjuachaxin kuénte Dios chaxín ntoá.

Méxrä jaha la chrókuankiéhya tí chojni ch'e xíkaha. ⁶ Iso tí sín a mé ixri sín t'ixenhen ntøe ókjé chojni la ch'ijehe sín tí chojni chjin lonti tjasin jie la nchexiteyéhé sín kaín tí ntáchro əsén sín. ⁷ La xráxín ó tinkák'itja sín kjánchó nunca kuílenxínhya sín tí nkehe chaxín ntoá. ⁸ A ntá éxi yóhe tí sín k'uékjinhexroan mé ch'ín Janes la ko ch'ín Jambres mé k'uéninkakonhen sín ch'in Moisés mé xíkaha tí sín tjako ijie nínkakonhen sín tí nkehe chaxín ntoá. Imá jínahya tí kjuaxrexinkaon kuénte sín la ko titekakonhyá sín tí nkehe chaxín tinkáchónkini. ⁹ Kjánchó tsjachahya sín sich'ia sin isé kíxin kaín chojni tsonohe kíxin tí sín a mé lonti sín kíxin éxi xíkaha tsíkónhen tí yaá sín k'uékóninkakonhen ch'ín Moisés.

Tí nkehe kjuixixín k'uëtuenhen ch'ín Pablo tí ch'ín Timoteo

¹⁰ A ntá jaha mé ó kuítekávan tí nkehe kjuàkua. Ó noha nkexrí kjuak'é janhan la ko ó noha tí xrä kjuit'a janhan. Ó noha nkexrí tinkachónkiha Închéni la ko noha kíxin tjokahya kóninkávan la ko noha nkexrí tjuahqá chojni. Ó noha kíxin kjónté kóninkaon chojni la kuijtoahya tí xrä a ¹¹ kjónté chónkina sín la ko kjuasótena. Ó noha nkehe kònna tí chjasin Antioquia la ko Iconio la ko Listra. Chrók'oyánnna sín la kjuínchekjuasótena sín kjánchó Închéni mé kjuínkitsana kjónté kaín tí nkehe chrókònna. ¹² Kaínxín tí sín tjinkaon tjóá chrók'u'ejó sín nchexiteyéhé Cristo Jesús la t'ichjánxín tsjasóte sín. ¹³ A ntá tí sín jínahya la ko tí sín ixri ch'ia sín mé ts'óna sín antsí jínahya. Jehe sín xrich'ia sín la ch'iáxín sín nkehe jínahya.

¹⁴ Jaha la jína chrókjuak'e la í chrókjuíñkíhyá tí nkehe k'uítjá la ko tí nkehe ó kuítekávan. Jaha la ó noha tí nkexro kjuakoha. ¹⁵ Jaha la desde xjanntsia k'uítjá nkexrí nixja xroon itén Dios la tíha mé tónoexínni kíxin Cristo Jesús tsaáxinni kíxin tinkáchónkini ch'án. ¹⁶ Ntá kuénté xroon Biblia kjuachaxién Nchákuén Dios kjuínkitsa tí nkexro ikjin la tíha mé jína tsoxrácuexínni tí nkehe chaxín la ko tíha mé jína tsjentuéheni la ko tsjinkitsani tsonoheni nkexrí chrók'uejóni ntoá ¹⁷ kíxin tí nkexro tinkáchónki Dios chrókónohe jína la ko chrókjuacha sich'e kaín tí xrä jína.

4

¹ Kjuaqchaxién Dios la ko Ìnchéni Jesucristo, tí nkexro itsi éxí ijkno rey la sinchekitoexín ijié kaín chojni tjejóchón la ko tí chojni tsík'en, ² mé tétuanhan chrókuàkua itén Dios kaín asán kjónté á chrókuinhin sín o náhí. Nixjehé sín jnkójina kíxin tsitekaon sín la ko tjéntuéhé sín jnkójina. Chrókóninkákonhya chrókuákohé sín. ³ Itsi ijkno yaon ntá tsotjinkakonhya sín tsinhin sín tí nkehe jína. A ntá sinchexiteyéhe sín tí nkehe ntáchro asén sín ó. Tsjeyá sín nchónhya maestro tsjakohé sín jehó tí nkehe tóxrjínhin sín chrókuinhin sín. ⁴ Méxra tsítóhe sín tí nkehe chaxín ntoá la ntá itsa sín kuénté kaín nkehe chaxínya. ⁵ Méxra jaha jína chrókjuenkayáxian la chrókjuacha kjónté tsjasótia. Chrókjuintaxín chrókjuich'e xra chrókuákohé chojni itén Dios tsáxinni mé xikaha sinchexiteyá jína tí xra chonta.

⁶ Ntá janhan ó kjuixraká tí hora tsjasótena la ko ó kjuixraká tí hora its'en. ⁷ Ó kjuánjonkian jína kaín tí nkehe jínahya la ko ó kjuixinna tí xra kuéntana la ko kuitoahya jína kuinkachónkia Ìnchéni. ⁸ A ntá ijie la tí nkehe tsitonna mé tjechónhen kíxin jína kjuak'é ntihi. Tíha mé tsjanjon Ìnchéni tí yaon itsi ch'án. Jehe ch'án mé ijkno juez jína. Jehya kíxin janhván tsákjaá tí nkehe tsjanjon ch'án. Náhí, kjaxin kaín tí nkexro kuítekaon sin ch'án la ko chéhé sín tjejóchónhen sín tió tsi ch'án.

Ch'ín Pablo k'uetoan tsijitsjehe sín ch'án

⁹ Jaha chrókoxakonhan tjoka chrók'uinkatsjehé tí janhan ¹⁰ kíxin ch'ín Demas la kuítóhe ch'án tí janhan kíxin imá kóxrjínhin ch'án tí nkehe kuénte chjasintajni. Sátsíkji ch'án chjasin Tesalónica. Ch'ín Crescente mé sátsíkji ch'án chjasin Galacia a ntá ch'in Tito sátsíkji ch'án chjasin Dalmacia. ¹¹ Jehó ch'ín Lucas naxa tjékian ch'án. Tjíkjeyá ch'ín Marcos la tsjíkuana ch'án ntihi kíxin jehe ch'án mé jína tsjinkitsa ch'án tí xra chonta ntihi. ¹² A ntá ch'ín Tíquico mé kuétuanhan ch'án sátsji ch'án chjasin Éfeso. ¹³ Tió ts'inka ts'inkakuana tí ka t'ítsate kuítóha chjasin Troas ntqé ch'ín Carpo la ko kjaxin ts'inkakuana tí libro kuéntana la ko koí tí tjoé iko tsík'óna xroon.

¹⁴ Tí ch'ín Alejandro tí ch'ín ch'e xra chica mé nchónhya nkehe jínahya kjuich'ena ch'án. Kjánchó Ìnchéni mé tsjenkehe ch'án kaín nkehe kjuich'e ch'án. ¹⁵ Jaha mé tóxakonhan kíxin tí jehe ch'án kíxin imá nínkakonhen ch'án tí nkehe tjakoni.

¹⁶ A ntá tí saxon k'uèya tí síxree tí kjuia tí tjejó sín la ninkexró kjuinkitsahiana. Kaín sín me kuítóna sín janhván. Kjónté xikaha la tjáncháhá Dios kíxin chrókuahya ch'án kuéntá kíxin xikaha kjuich'e sín. ¹⁷ Kjánchó Ìnchéni mé chaxín kjuinkitsana ch'án la kjuanjon ch'án kjuachaxin kíxin tsjachana naxa jína tsjakua itén ch'án. Ntá kuínhin kaín tí sín jehya judío. A ntá Ìnchéni kjuinkitsana kíxin kjónehyana koxra. ¹⁸ Ìnchéni mé tsjinkitsana kíxin naxa tsannahya kaín nkehe jínahya. Jehe ch'án mé ts'ayakonna ch'án ts'ixanhán tí jet'etoan ch'án nkaya nkajní. Kjuasáyé ch'án kíxin xikaha jnkochríxín tsoxiteyá. Amén.

Ch'ín Pablo kjuixixín nixja ch'án

¹⁹ Jaha nixjehé tí tjan Prisca la ko ch'ín Aquila la ko nixjehé tí sín siín ntqé ch'ín Onesíforo. ²⁰ Kuítóhe ch'ín Erasto chjasin Corinto. A ntá ch'ín Trófimo kuítóhe chjasin Mileto kíxin kóníhi ch'án. ²¹ Tóxakonhan chrók'uinka naxa t'ixenhya nchakuen kin. Tí ch'ín Eubulo la ko ch'ín Pudente la ko ch'ín Lino la ko tjan Claudia la ko kaín sín kíchó ni ntihi nixjaha sín jnkójina.

²² Ìnchéni Jesucristo chrók'uajikoa ch'an la Dios chrókjuintayaonrá kaín rá mé xikaha tsoxiteyá. Amén. Ó tjen.

Tí xroon ikjin ch'ín Pablo chr'énen ch'án tí ch'ín Tito

Ch'ín Pablo nixjehé tí ch'ín Tito

¹ Janhan Pablo mé t'ahá xrä Dios la ko tsíkjeyána Jesucristo kíxin tsjákoħaq tí í so sín tsíkjeyá Dios kjaxin kíxin ts'itja sín tsongohe sín kíxin nkexrí chrókuinkáchónki sín tí nkehe chaxín. ² Ntá ts'ejóchónhen sín tsochónta sín kjuachón jnkochríxín. Dios la xitjahya sich'ia la kaín tí nkehe tsíchrónka ch'án ósé tí naxaq k'ónahya chjasintajni la mé xikaha tsonhen. ³ Ntá tí yaon tsíntáchro Dios la mé jie ó xiteyá la ntá kónoxín tí tan kuènte ch'án. A ntá Dios tí nkexro tsaáxinni mé k'uetoan kíxin sit'ahá ch'án xrä tsjàkua itén ch'án. ⁴ Ikjian tí xroon i chr'anhan jaha Tito. T'íkuān éxi chaxín xjanна tí jaha kíxin yóíni tinkáchónkini Jesús. Kjuasáyé It'éni Dios la ko Jesucristo tí nkexro tsaáxinni, chrókjuintayavan la ko chrókuikonóha ch'án la ko chrótjáha ch'án kjuaxróxin.

Tí xrä sich'e tí ch'ín Tito chjasin Creta

⁵ Kuiṭoha jaha tí isla Creta kíxin jaha chrókuétuēnhén tí sín siín ntiha kíxin nkexrí chrók'uejó sín la ko chrókónoxín nkexro ts'etoan kuènte jnkojnko ninko jnkojnko chjasin éxi tí kuétuanhan jaha. ⁶ T'ichjánxín kíxin tí nkexro ts'etoan xrä kuènte ninko la jína chrókuak'e kíxin kohya nkexro chrók'ueka jie, la ko chróchóntha jnkokoá ichjién la ko tí xjeen sín chrókuinkáchónki Įnchéni kíxin tsokohya nkexro chrókjuanchia jie kíxin jehya tí jína tjejóch'e sín, la ko kjaxin chrókójiehyá sín. ⁷ Mé xikaha tí nkexro ts'áyéhe tí xrä ts'etoan xrä kuènte ninko mé ts'etoan nkexrí tsonhen xrä kuènte Dios la ntá t'ichjánxín ijkno nkexro tsjenkayáxin jína, chrókjuañhya jie. La chrókjuinchehnkehya la ko chrókóninkakonhyá tjoka. La ko kjaxin jehya ijkno nkexro tókoan la ko jehya ijkno nkexro tjeyá kjuaníkaon la ko chrókóxrjéñhya sín chrókjuch'ia sín ntá chrókjuañcha sín chichaon. ⁸ Kjaxin jína chrókuak'e ch'án kíxin tí tsjiji ijkno nkexro ntøe ch'án chrókjuanjon ch'án kjuachaxin chrókuak'e tí nkexro a. La ko jína chrókuak'e ch'án la ko jína chrókjuenkayáxin ch'án kíxin ijkno nkexro ó tsíkjinchetjóá Dios la ko chróchóntha ch'án kjuasáyé ch'án. ⁹ Kjaxin t'ichjánxín chrókuítøehya ch'án tí tan jína xrákohé ch'án kíxin ntá jína tsjakohé ch'án í so chojni tí nkehe ntoá la kjonté nkexro tjinkakonhyá tsinhin la jína chróchenka ch'án chrókuinhin.

¹⁰ Siín itsjé tí sín nínkaon mé tí sín a la mé tí sín judío la mé nixja sín éxi lontí sín mé xikaha ch'yehe sín chojni. ¹¹ Tí sín a la chrók'uíkjhéni ir'va sín kíxin tjachròe sín nchónhya chojni kíxin tjako sín tí nkehe jehya jína kíxin chrókjuch'ia sín chrókjuañcha sín nchónhya chichaon.

¹² Ijkno ch'ín kuènte chjasin Creta la mé tsíchrónka ch'án nkexrí tjejó tí sín chjasén ch'án. Ntáchro ch'án kíxin: "Kaín tí chojni chjasénni mé imá ch'ia sín la ko imá jiehe sín la ko imá kóchjinka sín la séhe sín", mé xikaha chrónka ch'án. ¹³ Tí nkehé tsíchrónka ch'án mé chaxín ntoá. Méxrä antsí fuerte chrókjueñtuéhé sín kíxin ntá jína chrók'uejó sín chróxraxinkaon sín Dios. ¹⁴ Nixjehé sín kíxin chrókuahya sín kuenté kaín tí nkehe tsíkrjeníxin kja tí sín judío tjako la ko chrókuitækakonhyá sín tí nkehe t'etoan tí sín nínkakonhen tí nkehe chaxín.

¹⁵ Tí sín chaxín tjóá kjuaxrexinkaon kuènte sín ntá kaín nkehe ch'e sín la jína. A ntá tí nkexro titekakonhyá la tjuáhya kjuaxrexinkaon kuènte la kohya ninkehó nkehe jína tí kjuaxrexinkaon kuènte sín la kaín nkehe tjenkayáxin sín mé tjuáhya. ¹⁶ Ntáchro sín kíxin chóxin sín Dios q ntá tí t'ikonni nkexrí ch'e sín ó noexínni kíxin chaxíñhya tíha la ch'ia sín. Jehe sín mé ntoáhya tjenkayáxin sín la ko jiehe sín la ko titekakonhyá sín. A ntá tí xikaha ch'e sín la, ¿nkexrí chrókjuch'ie sín tí xrä jína?

2*Chrókjuako ch'ín Tito tí tan chaxín*

¹ A ntá jaha chrókjuàkua éxí tí chrónka tí tan jína chaxín. ² Tjácohé tí sín ó táda kíxin chrókókoanhya sín la ko jína chrók'uejó sín la ko chróchóntha sín kjuasáyé sín la ko chróchóntha sín ijnko kjuaxrexinkaon jína la ko jína chrókuinkáchónki sín tí nkehe chaxín la ko chrótjuèhe sín kíchó sín la ko chrókóninkakonhya sín kjónté tsjasóte sín. ³ A ntá kjaxin xíkaha tí sín ó nána la kjaxin jína chrók'uejó sín la kjaxin chrókjuinchekuáxinha sín chrókuinkáchónki sín kjuach'ia la ko kjaxin chrókókoanhya sín. Chrókjuakoxín sín ijnko kjuaxrexinkaon jína ⁴ kíxin xíkaha chrókjuakuexín sín tí chojni chjin tjarisoá a kíxin chrótjuèhe sín xíi sín la ko chrótjuèhe sín xjeen sín ⁵ la ko chrókjuich'e sín xrä jína la ko ntoá chrókjuenkayáxin sín la ko jína chrók'uàyakonhen sín nchia ntoé sín la ko chrókójína sín la ko chrókuitekakonhen sín xíi sín. Tí xíkaha chrókjuich'e sín chrókjuinchexiteyá sín la kohya nkexro chrók'uántaxíñijín tí itén Dios tinkáchónkini.

⁶ Kjaxin xíkaha chrókjuinchexraxinkávan tí sín ntasoá kíxin jína chrók'uejó sín chróchóntha sín kjuasáyé sín. ⁷ Jaha mé chrókjuákoéxian sín kaín nkehe jína la ko chrókjuácohé sín kíxin ntoá chrók'uejó sín. ⁸ Jaha la chrónixja tí nkehe jína kíxin kohya nkexró chrók'uántaxín la ntá xíkaha chrókósuehē tí sín nínaon la ntá kohya nkehe jínahya chróntáchro sín kuènte tí jeheni.

⁹ Tétuënhen tí sín xrich'exón xrä kíxin chrókjuinchexiteyéhe sín tí lamo kuènte sín la ko chrókójína sín la ko chrónixjankjehya sín tí nkexro ch'ehe sín xrä ¹⁰ la ko kjaxin chrókueéhya sín kíxin jehya ijnko chojni chee tí jehe sín. Ntá kaín chojni chrók'uikon sín kíxin tjakoxín sín kíxin náxrjón tí itén Dios chrókuaáxinni.

¹¹ Kíxin Dios mé kjuakoxín ch'án kíxin nkexrí tjuèheni ch'án kíxin jehe ch'án mé tsaáxin kaín chojni. ¹² Kjuasáyé Dios mé tjakohéni ch'án kíxin chrókuítóheni kaín nkehe jie la ko kaín tí nkehe jínahya tjenkayáxinni. La ko jína chrók'uejóni chjasintajni la ko ntoá chrók'uejóni la ko chrókuinkáchónkini Dios. ¹³ Kjaxin chrók'uejóni jína kíxin chrókochéheni chrók'uejóchónhenni tí yaon kjuachaxién Dios jíe itsi Dios la ko Jesucristo tí nkexro tsaáxinni. ¹⁴ A ntá jehe ch'án mé k'uenyákonhenni ch'án kíxin tjinkaon ch'án tsaáxinni ch'án kíxin tsotjuáxin kaín jie chóntani kíxin ntá jeheni mé ts'ónani ijnko chojni sich'ehe ch'án xrä la ko tsoxrjíñhenni sich'eni kaín xrä jína tjinkaon ch'án.

¹⁵ Tíhi mé chrókjuàkua la ko chrókjuinchexraxinkávan sín la ko chrókuétuënhen sín kjuachaxién Dios. Chrókuítóéhya kíxin ninkexró chrókókjonehaya tí nkehe tjákua jaha.

3*Jína chrók'uejó tí sín tinkáchónki Cristo*

¹ Chrókjuinchexraxinkávan sín kíxin sinchexiteyéhe sín tí gobierno la ko tsitekaon sín ichrén xrä ts'etqan tí síxréé kíxin chrókjuich'e sín kaín xrä jína ts'etqan tí sín a. ² La ko chrók'uántaxiénya sín ninkexró la ko kjuaxróxin chrók'uejó sín la ko chrók'óna sín ijnko chojni jína la ko chrókjuakoxín sín kíxin jehya ijnko chojni nchehnke la chrókjuikosáyehé sín kaín chojni.

³ Jeheni kjaxin ósé k'uélontini la ko k'uékitekakonhyani Dios. Chjini k'uék'ajini la k'uékóxrjíñhenni kaín nkehe jínahya. La ko jehya jína k'uék'ejóni la ko k'uéchóntani kjuachjinoxíñhin la ko k'uéchjinoxíenhenni í so chojni. ⁴ A ntá tí Dios tsaáxinni mé kjuakuexinni ch'án kixin jína ch'án la ko tjuèhe ch'án kaín chojni. ⁵ Jehe ch'án kuaáxinni ch'án la jehya kíxin ichrén xrä jína chrókjuich'eheni ch'án. Náhí, ó jehí kujikonóeheni ch'án la ntá kjuínchekaáni ch'án la ko kjuínchetjóáni ch'án. Ntá kokjíhini nixin kíxin tí Nchákuén ch'án la mé k'uáyèxinni kjuachón nixin. ⁶ Kjuasáyé Jesucristo tí nkexro tsaáxinni ntá kjuínchekitonhenni Dios Nchákuén ch'án kíxin tsochóntani kjuachaxin kuénté ch'án.

⁷ A ntá xíkaha kjuasáyé ch'án kjuínchetjóáni ch'án kíxin ntá tjejóchónhenni tí kjuachón jnkochríxín tsjanjon ch'án.

⁸ Kaín tíha mé chaxín. Tjínk̄avan kíxin jaha chrókuétoan kaín tíha kíxin ntá kaín tí sín tinkáchónki Dios mé chrókuitekaon sín chrókjuich'e sín kaín nkehe jína. Kaín tí nkehe la mé jína la ko tsjinkitsa kaín chojni. ⁹ A ntá jaha mé títóhé tí sín tjächaxin kíchó sín lontí sín la ko títóhé tí nkehe tinkáchónki sín kuènte tí sín tsík'axrjeníxín sín la ko títóhé tí sín tjanjonxín tí ley kuènte Moisés. Kaín tíha la ó chónkó la ninkehó kjuaxrexinkaon chóntahya.

¹⁰ Jnkojín nkexro tjinkaon tsjixrónkáxin tí tójnoksé ninko ntiha la nixjehé ch'án jnkojína senó la ko yóxin ínaá ntá tí titekakonhya ch'án ntá títóhé sátsji ch'án ¹¹ kíxin ó noha kíxin tí chojni xíkaha a mé ntoáhya tjenkayáxin sín kíxin jehó sín ncheck'ánkí sín ijje sín.

Tí nkehe k'uetoan ch'ín Pablo

¹² Tí tsétuñhan ch'ín Artemas la ko ch'ín Tíquico kíxin tsiji sín tí tjen jaha la ntá tjoka chrók'uinkatsjehé tí janhan chjasin Nicópolis kíxin ntiha tsjak'é ts'atsínkajia tí nchákuén kin. ¹³ Jína chrókjuínk̄itsa jaha tí ch'ín Zenas tí ch'ín nixjayákonhen í jnko chojni la ko tí ch'ín Apolos la ko chróchjehé sín kaín tí nkehe t'ichjánxihin sín tió sátsji sín kíxin ninkehó nkehe chrók'uitjáyanhya tí t'ichjánxihin sín. ¹⁴ Ntá tí sín í so chrók'uitja sín nkexrí sich'e sín tí xrä jína la ko chrókjuink̄itsa sín kíchó sín ichréñ nkehe t'ichjánxihin sín kíxin chrókjuakoxín sín kíxin jína tjejó sín.

Ó kjuixixín nixja ch'ín Pablo

¹⁵ Kaín tí nkexro tjékjan janhan ntihi nixjähä sín jnkojína. Jaha mé nixjehé kaín tí sín tinkáchónki Inchéni ntiha mé kaín tí sín imá tjuèheni sín. Dios mé chrókjuincheyáonrá ch'án kaín rá. Amén. Ó tjen.

Tí xroon chr'éhen ch'ín Pablo tí ch'ín Filemón

Ch'ín Pablo nixjehé ch'ín Filemón

¹ Janhan Pablo tjéchjinaxián tí xrä kuènte Cristo Jesús tjékjian tí xroon i la ko kichó ni Timoteo kixin tí jaha Filemón ts'ayéhé. Jaha mé tjuaha kixin jnkokón tjejóch'eni xra kuènte Dios. ² Kjaxin chrókuinhin kaín tí sín tinkáchónki Ìnchéni tójkotsé ntoa la ko tí tjan kichó ni Apia la ko tí ch'ín kichó ni Arquipo, mé tí ch'ín ch'e xrä éxí tí jeheni. ³ Kjuasáyé It'éni Dios la ko Ìnchéni Jesucristo chrókjuintayaonrá ch'án kixin chrótjáhará ch'án kjuaxróxin.

Ch'ín Filemón tjuèhe ch'án chojni la ko tinkáchónki ch'án Jesú

⁴ Xráxín tjáñcháha kjuasáyé Dios tí xráxinkävan tí jaha tí nixjaha Dios ⁵ kixin ó kuinhán kixin imá tinkachónkia Ìnchéni Jesucristo la ko imá tjuèhé ch'án la ko kaín tí sín tinkáchónki Dios. ⁶ Tjáñcháha Dios kixin tsjinkitsa ch'án tí sín kuítekaon tió kjuákohé sín kixin ntá tsienxín sín jína nkexrí kaín tí nkehe chontani kixin kjuincheyaonni Cristo Jesús. ⁷ Imá chàna kixin ó nòna kixin jaha kichó ni imá tjuèhé tí sín kíchuá ntiha la ko imá kjuinchechéhé əsén tí sín tinkáchónki Ìnchéni.

Ch'ín Pablo chrónóehe tí ch'ín Filemón kixin tsikonóehe ch'án tí ch'ín Onésimo

⁸ Janhan na kjueyána Jesucristo t'ahá ch'án xrä méxrä chonta kjuachaxin tsétuñhan jaha tí nkehe chrókjuiç'h'e. ⁹ A ntá íchá jína jehó xrjannóaha tsitékávan kixin jaha tjuèhé tí janhan. Janhan Pablo mé ó tádana la ko tjéchjinaxián tí xrä kuènte Jesucristo. ¹⁰ Méxrä xrjannóaha tsjinkitsa tí ch'ín Onésimo. Jehe ch'án mé t'íkuān éxí xjanna kixin kjuankíxiñ ch'án tsinkáchónki ch'án Jesucristo tí tjéchjinakian ch'án ntihi.

¹¹ A ntá tí ósé ch'ín Onésimo mé kjuít'ahya xrä jína. A ntá ijie ó nòna kixin imá jína sit'aha ch'án xrä tí jaha la ko jína sich'ena ch'án xrä kjaxin. ¹² Ntá ijie tsétuñhan ch'án tsjiji ch'án tí tjen jaha ínaá. Chrótjuèhé ch'án éxí chrótjuèhé tí janhan. ¹³ Janhan tjinkävan chrókuitonakian ch'án ntihi kixin chrókjunkitsana ch'án chrínkí tí chrókjuk'e jaha kixin tjéchjinaxián tí itén Jesucristo. ¹⁴ Kjánchó tjinkakonhya tsjáncháha xíkaha tí tjinkákonhya jaha. Jehya kixin jaha chrókjunkitsani kixin chrókuétuñhan xíkaha. Náhí. Jehí tjinkaonni éxí jaha tóxrjíñhan chrókjuiç'h'e. ¹⁵ Tí ch'ín Onésimo kuítøha ch'án iso yaon ə ntá jie la tsochonta ch'án jnkochríñ. ¹⁶ Ijie la jehya éxí ijnko chojni tsík'ína chrókjuiç'h'an. Náhí. Ntá jie la éxí ijnko nkexro ch'e xrä əntsí jína mé éxí ijnko kíchua chrótjuèhé ch'án. Janhan na tjuahá ch'án kjánchó tí jaha la əntsí má chrótjuèhé ch'án. Jehya éxí chojni ó chrókjuiç'h'an. Náhí. Chrókjuiç'h'an éxí ijnko kíchua kuènte Ìnchéni.

¹⁷ Méxrä tí chaxín t'íkuán tí janhan éxí kichó ni jnkokoá tinkáchónkini Ìnchéni ntá chrókjuiç'h'e ch'án éxí chrókjuiç'h'e tí janhan. ¹⁸ A ntá tí ichréñ nkehe kuaáha ch'án ə ichréñ nkehe síkaha ch'án la janhan tsjénkaha tíha. ¹⁹ Janhan Pablo mé tjaná kjinxian tí xroon i na mé janhan tsjénkaha tíha. A ntá janhan tjinkakonhya chrókjuiñtaxraxinkávan tí jaha kixin kaín tí nkehe tjasikàna tí janhan kixin kjuákohá jaha. ²⁰ Méxrä kichó ni tsotsenkávan sich'e tí nkehe tjáncháha chaxín tinkachónkia Ìnchéni. Mé xíkaha sinchechéhé əsenná kixin jaha mé kichó ni tinkachónki Cristo.

²¹ Méxrä ikjian tí xroon i chr'anhan kixin ó nòna kixin jaha la sinchexiteyá tíha la ko ó nòna kixin jaha la sich'e əntsí má que tí nkehe tjáncháha jaha. ²² Kjaxin tjáncháha kixin tjéyá ijnko nchia tsjak'é. Tjéchonhan kixin jahará la nixjehérá Dios la ntá Dios chrókjuanjon kjuachaxin kixin chrókjuiç'h'an.

Kjuixixín nixja ch'ín Pablo

²³ Kjäxin ch'ín Epafras mé nixjahará ch'án jnkójína. Jehe ch'án mé tjéchjinakian ch'án jnkokoá tí ntqéchiso ntihi kíxin kjäxin tinkáchónki ch'án Cristo Jesús. ²⁴ Ch'in Marcos la ko ch'ín Aristarco la ko ch'ín Demas la ko ch'ín Lucas mé kaín sín nixjaha sín jnkójína. Jehe sín mé tjinkitsana sín tí xra.

²⁵ Tjétjáncháhə Ìnchéni Jesucristo kíxin sintayaonrá ch'án kaín rá. Amén. Ó tjen.

Tí xroon k'uáyéhé tí sín Hebreos

Dios nixjaxin ch'án tí Xjeen ch'án

¹ A ntá tí imá ósé Dios mé nixjehé tí sín tsík'axrjeníxinni nchónhya veces kíxin nchónhya nkexrí chrókienxín sín, nixjaxin ch'án tí sín k'uéchrónka tí itén ch'án. ² A ntá jie tió tsjixixín Dios nixjaxin ch'án tí Xjeen ch'án, na mé Dios kjuich'eña ch'án kaín xín nkehe siín kíxin kjuachaxién tí Xjeen ch'án, mé tí nkexro k'uáyéhé kaín xín nkehe. ³ Jehe ch'án mé t'inkaséyanxín ch'án tí kjuachaxin kuènte Dios, la ko jehe ch'án mé kjaxin éxí tsjehe Dios xíkaha tsjehe tí jehe ch'án. Jehe ch'án t'aykonhen ch'án kaín xín nkehe siín kíxin tí kjuachaxin jié chóntha tí tan nixja ch'án. A ntá kjuixin kjuíncchetjóá ch'án tí jie chontani, ntá sákjui ch'án kjuák'etjaxin ch'án tí tja chjina It'é ch'án tí tjen ch'án t'etoan ch'án nkaya nkajní.

Tí Xjeen Dios imá t'etoan, a ntá tí sín ángel la kénhyó

⁴ Tí Xjeen Dios k'uáyéhé ch'án kjuachaxin ts'etuñhen tí sín ángel, kíxin tsík'áyéhé ch'án tí kjuachaxin kuènte It'é ch'án, a ntá imá t'etoan ch'án, a ntá tí jehe sín la náhí. ⁵ Méxra Dios ntáchehyá nijnko ángel kíxin:

Jaha mé Xjanna,
janhan mé kjuit'ána tí jaha ijie.

la ko kjaxin ntáchrohya Dios kuènte nijnko ángel kíxin:
Janhan mé chrók'óna It'é ch'án,

la ko jehe ch'án mé chrók'óna xjanna.*

⁶ A ntá tió kui tí jnkokoá Xjeen Dios chjasintajni, ntá ntáchro Dios kíxin:
Kaín tí sín ángel kuènte Dios chrókjuikosáyehe tí jehe ch'án.†

⁷ A ntá ntáchro Dios kuènte tí sín ángel kíxin:
Tí sín ángel ch'eña ch'án éxí xrínto kíxin nchakuen sín ó,
la ko tí sín ch'ehe ch'án xra la ch'eña ch'án éxí xrohinene.‡

⁸ A ntá ntáche ch'án tí Xjeen ch'án kíxin:
Tí trono kuèntá itjen jnkochríxín, jaha Dios,
la mé jaha mé ijnko nkexro t'etoan jína.

⁹ Jaha tóxrínhán tí nkehe jína, a ntá ninkákonhén tí nkehe jínahya.
Mé xíkaha tí Dios tsíkjeyá jaha, la Dios kuèntá kjuíntacháha má,
a ntá tí í so sín k'uájikoa la kánhyó.§

¹⁰ Kjaxin ntáchro kíxin:
Jaha Ínchéni, tí xrankíxixín kjuich'eña chjasintajni,
la ko jaha kjuich'eña nkajní.

¹¹ Táha mé ts'itjáyan, a ntá jaha la tsjak'e jnkochríxín.
Kaín tíha tsontaxín éxí iké chojni,

¹² éxí ijnko iké chojni xíkaha tsoxrát'o,
ts'ixinkí éxí ijnko iké chojni.

A ntá jaha la ts'ixitóxinha jnkochríxín tsjak'e,
a ntá tí kjuachón chonta jaha la nunca tsjejehya.*

¹³ Dios la ntáchehyá nijnko tí sín ángel kuènte ch'án kíxin chrók'uejó sín tja ch'án chjina ntahó chrók'uetoan sín, tsjixinjian kaín xín tí sín nínkakonhen sín la chrókjuachahya sín

* **1:5** Salmo 2.7; 2 Samuel 7.14; 1 Crónicas 17.13 † **1:6** Deuteronomio 32.43 ‡ **1:7** Salmo 104.4 § **1:9** 1.8-9
Salmo 45.6-7 * **1:12** 1.10-12 Salmo 102.25-27

chrók'uetoan sín.[†] **14** Kaín tí sín ángel mé nchákuén sín ó mé ch'ehe Dios xra mé k'uítuenhen sín tsjinkitsa tí sín ts'áyéhé kjuachaxin tsaá sín.

2

Chrókjoniehyani tí nkehe tsaáxinni

1 Mé xíkaha chrókjuenkayáxinni jína tí nkehe ó kuínhinni kíxin chrókuítóehyani tí ntja ó kuákjani. **2** A ntá tí tan tsíchrónka tí sín ángel ósé la mé tsíkónoxín kíxin chaxín tíha. A ntá tí sín kuítekakonhya sín tí tan jína kuínhin sín la kjuasin sín jíe, na mé kjuasóte sín la táhó mé kjuacha sín. **3** ¿Xá nkexrí chrókuaáni tí chrókuahyani kuentá tí nkehe jíe chrókuaáxinni? Jehe Inchéni tsíchrónka ch'án saoxín nkexrí chrókuaáxinni, a ntá chr'éxín tí sín tsíkinhin mé kjuakohé sín tí jeheni. **4** Méxra Dios kjuakoxín ch'án kjuaxroan jíe la ko kjuachaxin jíe kíxin chaxín tíha, la ko noexínni kaín tí kjuachaxién Nchákuén ch'án tsík'áyéhení éxi tjinkaon ch'án tsjanjon ch'án.

Jesucristo k'óna ch'án chojni

5 Dios la tsíchjéhya tí sín ángel kjuachaxin kíxin chrók'uetoan chjasintajni chr'éxín éxi tí jie tjejónixjani. **6** Náhí. Éxi nixja xroon itén Dios chronkaxín kíxin:

¿Xá nkexéhe tí chojni a, jaha It'éni Dios, kíxin imá xráxinkávan tí jehe ch'án?
¿Xá nkexro tíha kíxin imá tóxakonhan kíxin tí jehe ch'án?

7 Jaha tsíkjich'éna ch'án éxi ijkno chojni t'etuanhya kjánchó kánhyó isé, a ntá tí sín ángel antsí má k'uéchonta sín kjuachaxin,
a ntá jie la imá kjuíkosáyehé ch'án;

8 la jaha tsíchjéhe ch'án kjuachaxin kíxin kaín nkehe ts'etuenhen ch'án.*

Mé xíkaha ntáchro tíha kíxin tsíchjéhe Dios tí chojni kjuachaxin kíxin chrók'uetoenhen ch'án kaín xín nkehe, ntá Dios kuítóehya ninkehó nkehe chrókuitekakuenhya ch'án. Kjánchó naxá t'ikonyáni kíxin á kaín nkehe titekakonhen ch'án. **9** Kjánchó ó noheni kíxin Jesúz la tsíkjich'éna Dios éxi chojni t'etuanhya kjánchó kánhyó isé, a ntá tí sín ángel antsí má k'uéchonta sín kjuachaxin. Dios mé tjuéhe kaín xín chojni ntá tjinkaon ch'án kíxin ch'ín Jesúz chrók'uenyákonhen kaín chojni. A ntá jie tsík'áyéhé ch'án kjuachaxin náxrjón la ko Dios tjikosáyehé tí jehe ch'án kíxin tí kjuasóte ch'án, ik'uén ch'án.

10 Kaín nkehe siín la kuénte Dios la ko tjejó kíxin tí kjuachaxin kuénte tí jehe ch'án. A ntá Dios tjinkaon ch'án kíxin kaín xín tí xjeen ch'án chrók'uejó sín tí tjen ch'án tí t'inkaséyan. Méxra Dios kjuanjon Inchéni Jesucristo kíxin tsjasóte ch'án kíxin ntá jína kjuakoxín ch'án kíxin ntá jehe ch'án tsaáxinni ch'án. **11** Kaín tí sín tsíkótjóá la ko tí nkexro kjuíncchetjóá na mé chóntha jnkokoá It'é. Méxra tí Xjeen Dios tósuhéya ch'án tsontáchro ch'án kíxin kichó ch'án tí jehe sín. **12** Éxi ntáchro tí xroon itén Dios kíxin:

Tsochénkani tí sín kichó ni kíxin nkexro tí jaha,
tsjikosáyahani tsotsjeni himno tí tójnoksékoní sín kichó ni.[†]

13 Kjáxin ntáchro kíxin:

Janhan titékavan Dios.[‡]

La ko kjáxin ntáchro ínaá kíxin:

Ntihí tjékian tí xjeen Dios tsíkjanjon ch'án tsík'ayáha.[§]

14 A ntá tí xjeen chojni mé jnkokoá kichó la k'óna nto la ko ijni; la kjáxin ch'ín Jesúz xíkaha tsík'óna ch'án nto la ko ijni kíxin jína its'en ch'án kíxin jína sinchek'itjáyan ch'án tí nkexro chóntha kjuachaxin t'oyán chojni, na mé t'axrjexín kíxin diablo tíha, **15** mé xíkaha chrókjuinchekaá ch'án kaín tí sín chrakonhen sín tí kjuach'en, tjejó sín éxi t'ituenhen sín kaín yaon tjejó sín. **16** Kjáxin kuihya ch'án kíxin chrókjuinkitsa ch'án tí sín ángel. Náhí. Ikui ch'án kíxin tsjinkitsa ch'án tí sín tsík'axrjeníxín ch'ín Abraham. **17** A ntá

* 1:13 Salmo 110.1 * 2:8 2.6-8 Salmo 8.4-6 † 2:12 Salmo 22.22 ‡ 2:13 Isaías 8.17,18 § 2:13 Isaías 8.17,18

t'ichjánxín chrókóyóhé ch'án éxí tí sín kíchó ch'án kíxin jína chrók'óna ch'án nchat'á t'etoan kuénte Dios la chrókuikonóhenni ch'án, ntá jína tsjatsen ch'án ijié kaín chojni kíxin k'uenyákonhenni ch'án. ¹⁸ Kíxin jehe ch'án kjuasóte ch'án la ko tí Jínahya tjinkaon chrókjuachroe ch'án la kjuachahya, a ntá jie la jína tsjinkitsa ch'án tí sín chrókjuachroe tí Jínahya kíxin chrókjuasinhya sín jie.

3

Antsí tjetoan ch'ín Jesús, a ntá ch'ín Moisés la káhyó

¹ A ntá kíchó ni, jahará la tsíkótjóará, la mé Dios tsík'iyahará ch'án kíxin ts'ónará xjeen ch'án, a ntá chróxraxinkáonrá jína Cristo Jesúus na mé jehe ch'án mé tí apóstol la ko tí nchat'á t'etoan kuénte tí nkehe tinkáchónkini. ² Tí ch'ín Jesúus jína kuítekakonhen ch'án Dios, mé tí nkexro tsíkjeyá ch'án sich'ehe ch'án xrä, éxí kjaxin ch'ín Moisés jína kjuich'e ch'án xrä k'uáyakonhen ch'án ntœ Dios. ³ Dios antsí kjuikosáyehe tí ch'ín Jesúus, a ntá ch'ín Moisés la kénhyó, éxí antsí tjikosáyehe sín tí nkexro kjuich'ena ijnko nchia, a ntá tí nchia la kénhyó tjikosáyehe sín. ⁴ Jnkojnko nchia k'óna kíxin siín nkexro kjuich'ena, kjanchó Dios mé kjuich'ena kaín nkehe siín. ⁵ Ch'ín Moisés jína kjuich'e ch'án xrä k'uáyakonhen ch'án tí nchia kuénte Dios. Tí xrä kjuich'e ch'án mé k'uénixja ch'án kuénte tí nkehe tsontáchro Dios chr'éxín. ⁶ A ntá Cristo la mé Xjeen Dios tí jehe ch'án, ntá kjuinchexiteyá ch'án jína la t'ayakonhen ch'án tí nchia kuénte Dios, la tíha mé jeheni, kíxin tí tsítöehyani ch'án la naxa tsinkáchónkini ch'án ntá tsochéhenni kíxin tí nkehe tjejóchónhenni.

Ts'ok'éheni tí tjen Dios

⁷ Mé xíkaha éxí ntáchro Nchäkuen Dios nixja xroon itén Dios kíxin:
A ntá jie tí chrókuinhínrá tí nkehe ntáchro Dios,

⁸ chrókjuich'ehyará éxí kjuich'e tí sín ósé kuítekakonhya sín Dios
tí yaon kjuich'ehe sín prueba Dios tí nteje.

⁹ A ntá ntaha tí sín tsík'axrjeníxirá ósé kjuich'ena sín prueba,
kjónté cuarenta nánó k'uíkon sín tí xrä kjuit'a.

¹⁰ Méxra kóninkakonhan tí chojni a,
ntáxrjan kíxin: "Xráxín xrichoe asén sín,
tjinkakonhya sín tsochóxin sín ntjaná."

¹¹ Méxra kóninkakonhan tí jehe sín, ntátjan sín
kíxin chaxín tsoxitayá kíxin ts'ixenhya sín ts'ok'éhe sín tí tjén janhan.*

¹² Kíchóni, chrókóxakonhanrá kíxin chrókókohya nijnko tí jahará chróchontará asánrá jínahya chrókuítghérá Dios tjechón chrókuítekakuenhyará tí jehe ch'án.

¹³ Chrókjuinchéchéhérá kíchuárá jnkojnko yaon naxa tjen tiempo kíxin nijnko tí jahará chrókjuenkayáxinrá kíxin naxa chrókjuásinrá jie, í chróntáchrohya asánrá kíxin naxa chrókójiahárá. ¹⁴ A ntá tí chrók'uejóni jnkojína hasta tsjixixín éxí kuinkáchónkini tí xrankíxixín, ntá siín kjuachaxin ts'ejókoni Cristo.

¹⁵ Mé xíkaha ntáchro kíxin:

A ntá jie tí chrókuinhínrá jahará tí nkehe ntáchro Dios,
chrókjuich'ehyará éxí kjuich'e tí sín ósé kuítekakonhya sín Dios.†

¹⁶ ¿A ntá nkexro tí sín kuínhin itén Dios, a ntá tí chr'éxín kuítekakonhya sín? ¿Á jehya kaín tí sín tsíkakitsjexín ch'ín Moisés tí nación Egipto? ¹⁷ ¿A ntá nkexro tí kóninkakonhen Dios tí cuarenta nánó? ¿Á jehya tí sín kjuasin jie k'uénxin nteje? ¹⁸ ¿A ntá nkexro ntáche Dios kíxin chaxín tsoxitayá kíxin ts'ixenhya sín ts'ok'éhe sín tí tjen tí jehe ch'án? ¿Á jehya tí sín kuítekakonhya? ¹⁹ A ntá ó noheni kíxin kjuachahya sín k'uíxenhen sín kíxin kuítekakonhya sín.

* **3:11** 3.7-11 Salmo 95.7-11 † **3:15** Salmo 95.7-8

4

¹ Méxra, tsíntáchro Dios kíxin tsjanjon ch'án kjuachaxin ts'ixenheni ts'ok'éheni tí tjen ch'án, a ntá tóxakonhenni kíxin ách'e jnkojín tí jahará chrókjuachahyará chrók'uixenhenrá ntihá. ² Kíxin kjaxin jeheni kuínhinni itén ch'án tsaáxinni éxi kuínhin tí jehe sín, kjánchó tí jehe sín la ninkehó kjuinkitsahya sín tí tan jína kuínhin sín, kíxin kjónté kuínhin sín tí tan na kuítekakonhya sín. ³ A ntá jeheni kuítekaonni, ntá ts'ixenheni ts'ok'éheni ntaha, éxi tsíntáchro Dios kíxin:
Méxra kóninkakonhán sín tí jehe sín ntátjan sín kíxin chaxín tsoxiteyá
kíxin ts'ixenhya sín ts'ok'éhe sín tí tjén janhan.*

Kíxin Dios la tió kjuixinhin ch'án xrá kjuich'éna ch'án chjasintajni ntá kjuák'e ch'án k'ok'éhe ch'án. ⁴ Mé xikaha í jnko nketí nixja tí xroon itén Dios chrónka kuénte tí yaon yatoxin ntáchro kíxin:

Kjuixinhin Dios kaín xrá ntá kjuák'e ch'án k'ok'éhe ch'án tí yaon yatoxin.†

⁵ A ntá ínaá ntáchro tí xroon itén Dios kíxin:
Ts'ixenhya sín ts'ok'éhe sín tí tjén janhan.‡

⁶ Kjánchó naxa t'itjáyan jnkojín chojni chrók'uixenhen sín chrók'ok'éhe sín. A ntá tí sín saoxín kuínhin tí tan chrókuaáxin sín la k'uínenhyá sín kíxin kuítekakonhya sín tí tan a.

⁷ Méxra Dios tsíkjeyá ch'án í jnko yaon, mé tí yaon jie, a ntá chr'éxín nixjaxin ch'án tí nkehe tsíchrónka ch'ín David éxi ntáchro tí xroon itén Dios kíxin:

A ntá jie tí tsinhínrá tí nkehe ntáchro Dios, chrókjuinchexiteyará.§

⁸ Kíxin tí chrókjuanjon ch'ín Josué kjuachaxin kíxin chrók'ok'éhe tí sín israelita,* ntá Dios la í chrónixjahya ch'án kuénte í jnko yaon. ⁹ A ntá naxa tjechónhen tí ts'ok'éhe tí sín tinkáchónki Dios; ¹⁰ kíxin tí nkexro ts'ixenhen ts'ok'éhe tí tjen Dios tsíkjixinhin ch'án tí xrá kuénte ch'án éxi yohé kjaxin Dios kjuixinhin ch'án tí xrá kuénte ch'án ntá kjuák'e ch'án k'ok'éhe ch'án. ¹¹ T'ichjánxín kíxin kaín asénni chrókjueyáni nkexrí chrók'uixenheni chrók'ok'éheni, kíxin chrókoyóehyani éxi tí sín kuítekakonhya.

¹² Kíxin tí itén Dios la mé tjechón la ko chóntha kjuachaxin. Tíha la imá taté, a ntá kánhyó taté tí chica espada yánjín taté, la tíha mé t'ixenhen tí ninká asén chojni la ko nchákuén chojni hasta tí nkaya asén chojni. Tíha mé nchexraxinkaon chojni kaín nkehe tjenkayáxin sín la ko kaín nkehe ntáchro asén sín. ¹³ Kohya ninkehó nkehe tsíkjich'éna Dios tsjacha chrók'uejóméhe tí jehe ch'án kíxin kaín nkehe la noxín siín t'ikon tí nkexro ts'ayéhé kuentá.

Jesús mé tí nchat'á imá tjetoan

¹⁴ Jesús tí Xjeen Dios mé tí nchat'á tjetoan kuénténi mé k'uíxenhen tí tjen Dios la méxra chrókuítóehyani tí tinkáchónkini tí jehe ch'án. ¹⁵ Méxra jehe ch'án mé tí nchat'á tjetoan kuénténi mé tsjinkitsa ch'án tí jeheni kíxin fuértehyani kíxin kjaxin tí Jínahya chrókjuachroe tí jehe ch'án éxi sítónen tí jeheni, kjánchó jehe ch'án la ninkehó jie kjuasinha ch'án kjónté xikaha kónhen ch'án. ¹⁶ Méxra kaín asénni chrókóchjineheni Dios tí tjen ch'án t'etóan ch'án kíxin chrókuikonóeheni ch'án la ko chrókjuinkitsa ch'án tí jeheni tí nkehe chrók'uichjánxín hinni.

5

¹ Kaín nchat'á t'etóan tsíkónoxín la chojni ó, tsík'ayéhé xrá tsonixayákonhen chojni nkayakon Dios, la ko tsjanjon nkehe la ko iko its'en kíxin ts'itjáyanxín tí jie kuénte chojni.

² Kjaxin tí nchat'á a la fuértehyá kíxin chojni ó, a ntá chrókóninkakuenhyá ch'án tí sín noehyá la ko tí sín tsíkjichroe. ³ Kjaxin jehe ch'án, kíxin fuértehyá ch'án t'ichjánxín tsjanjon ch'án iko its'en kíxin tí jie chóntha ch'án jehe ch'án éxi tjanjon ch'án nkehe kuénte tí í so chojni chóntha jie.

* **4:3** Salmo 95.11 † **4:4** Génesis 2.2 ‡ **4:5** Salmo 95.11 § **4:7** Salmo 95.7-8 * **4:8** Josué 22.4

⁴ Ninkexró xitjahya jehó sich'éna əsén ncháñ'á t'etoan. Náhí. Jehó tí sín tsíkjeyá Dios tsík'ayéhé tí xra exí tsík'ayéhé ch'ín Aarón. ⁵ Mé xíkaha Cristo, kjuich'enahya ch'án jehó ch'án əsén ch'án ncháñ'á t'etoan. Náhí. Dios mé kjuikosáyehe ch'án mé tsíkjanjon tí xra exí tsíntáchro kíxin:

Jaha mé xjanna;

Janhan mé kjuít'ána ijie.*

⁶ Kjaxin í jnko nketí nixja xroon itén Dios ntáchro kíxin:

Jaha mé ijnko ncháñ'á tsjak'e jnkochríxín,

exí yóhé k'uékjak'e ch'ín Melquisedec.†

⁷ Tió kjuák'e Cristo ntihi chjasintajni imá tsjánka ch'án la ko itsen chrónóehe ch'án Dios, kíxin Dios chóntha kjuachaxin chrókuinchekaá ch'án kíxin chrók'uenhya ch'án; la Dios la kuínhin kíxin xíkaha kuítekaon ch'án. ⁸ Mérxa Cristo, kjónté Xjeen Dios, la kuítekaon ch'án kjuinchexiteyá ch'án kjónté tí kjuasote ch'án. ⁹ Mé kjuinchexiteyá ch'án, ntá kjuacha ch'án k'óna ch'án tí nkexro sinchekaá jnkochríxín kaín tí chojni sinchexiteyéhe tí jehe ch'án. ¹⁰ A ntá Dios mé tsíkjich'éna ch'án ncháñ'á t'etoan exí yóhé kjuák'e ch'ín Melquisedec.

Jehya jína chrókuítgheni tí tinkáchónkini Inchéni

¹¹ Chóntani nchónhya nkehe chróchrónkani kuénte tíha, kjánchó imá xra chróchrónkaxínni tíha kíxin tiénxinhyará jahará. ¹² Ntá k'uátsínska nchónhya tiempo, a ntá ó jína chrók'ónará maestro, ntá náhí kíxin naxa t'ichjánxíñhanrá nkexro chrókuakohará ínaá tí nkehe xrahyá kuénte itén Dios. Exí xík'ónará lontirá, t'ichjánxín chrók'uirá tsjen ínaá kíxin xitjahya sinterá nkehe cha. ¹³ A ntá tí sín it'i tsjen ó, na mé yóhé chánjan takí tsjachahya sín tsjeyá sín nkexrí chrók'uejó sín jína. ¹⁴ A ntá tí nkehe cha mé ine tí chojni nteto kíxin ó nohe sín ti nkehe jína la ko tí nkehe jínahya.

6

¹ Naxa chrókjueyáni kíxin jína chrókjuenkayáxinni exí chojni nteto. Chróchenkahyani tí jahará ijie tí nkehe kánhyó xra tsíxrakohará tí xrankíxín kuénte Cristo. Náhí. T'ichjánxíñhya naxa chrókuakoharáni kíxin chrókuítgherá tí jie k'uékjásinrá chrók'úénxinxíñ, la ko nkexrí chrókuinkachónkirá Dios, ² la ko nkexrí chrókuikite chojni, la ko nkexrí ts'ejotja tjárá chrítaón tí sín tinkáchónki Cristo, la ko nkexrí tsozechón chojni tsík'en, la ko nkexrí chrókuítexín ijé chojni. ³ A ntá tí Dios chrókuanjon kjuachaxin la chrókuakoni í so nkehe.

⁴ A ntá tí sín ó tsík'ayéhé sín tí xrohi, la ko ó tsjexín sín tí nkehe kjuanjon Dios, la ko tsík'ayéhé sín tí Nchákuén Dios, ⁵ la ko kóxrjíñhín sín tí nkehe jína kuénte itén Dios, la ko konohe sín nkexrí tí kjuachaxin tsochóntha tí chjasintajni chr'éxin, ⁶ a ntá tí chrókuítóhe sín Dios, í chrókuinkachónkihya sín, ntá xitjahya tsokjan sín ínaá, kíxin tí xíkaha la exí chrókuak'énkani sín ntacruz tí Xjeen Dios ínaá la ko chrókjuanoá sín ch'án nkayakon nchónhya chojni. ⁷ Exí nonte jnkojko vez t'aniá chrin la tsjátan la ts'óna jína, a ntá kjuacha tí sín kjuich'e xra kíxin Dios kjuincheyaon ntiha. ⁸ A ntá tí t'óna ntach'i la ko kach'i la ninkehó sínkíhya la tsónínkakonhen Dios, la tí tsjixixín mé tsoche.

Tí nkehe tjejóchónhenni mé tjinkitsa kíxin jína ts'ejóni

⁹ Kjónté nixjani xíkaha, kíchó ni, ó noheni kíxin chaxín jína tjejorá k'uitjará tí ntia tsaáxinrá. ¹⁰ Kíxin Dios la jína, la ts'itjáyenhya ch'án tí xra jína tjejoch'erá kíxin tjuéherá kíchuárá, mé xíkaha kjuákoxinrá kíxin kjuínkitsará tí kíchuárá tinkáchónki Cristo la naxa tjejótjinkitsará sín xíkaha. ¹¹ Tjinkaonni kíxin jnkojkorá chrókuakoxinrá hasta tsjixixín kíxin chontará kjuachéhé chrókuinkitsará kíchuárá kíxin chaxín ts'ayéhérá tí nkehe tjejochonhénrá. ¹² Tjinkakonhyani kíxin chrókjanrá chrókósáhará. Náhí. Tjinkaonni kíxin

* ^{5:5} Salmo 2.7 † ^{5:6} Salmo 110.4

chrókuákoxinrá éxí tí sín chaxín tinkáchónki Ínchéni tjejóchónhen sín ts'áyéhe sín tí nkehe tsíntáchro Dios kíxin tsjanjon ch'án.

¹³ A ntá Dios, tió tsíntáchro ch'án kíxin tsjanjon ch'án nkehe ts'áyéhe tí ch'ín Abraham la jehó Dios k'uákjenxín asén kíxin kohya nkexro antsí tjetoan chrók'uákjenxín ch'án. ¹⁴ Ntáchro ch'án kíxin chaxín sincheyaon ch'án tí ch'ín Abraham la ko nchónhya chojni ts'axrjeníxín tí jehe ch'án.* ¹⁵ Ch'ín Abraham kjuák'echónhen ch'án isé kíxin ts'áyéhe ch'án tí nkehe tsíntáchro Dios. ¹⁶ A ntá tió t'ákjenxín chojni ijnko nkexro la mé t'ákjenxín sín ijnko nkexro antsí tjetoan, a ntá jehó sín la náhí. A ntá ts'ákjenxín sín tí xíkaha kíxin ijnko nkehe tsoxiteyá, a ntá kohya nkexro tsontáchro ninkehó. ¹⁷ Méxrä Dios k'uákjenxín ch'án asén ch'án tsíntáchro ch'án kíxin chaxín tsoxiteyá, kíxin tjinkaon ch'án chrókuakoxin ch'án noxín kíxin chrókónhe tí sín ts'áyéhe tí nkehe tsjanjon ch'án kíxin sinchexiteyá ch'án tí nkehe tsíntáchro ch'án la í tsjitóxienhya ch'án ninkehó tíha. ¹⁸ Mé xíkaha siín yaá nkehe xitjahya ts'ixitóxien, kíxin Dios la xitjahya sich'ia; kíxin tíha Dios nchenoexínni kíxin chaxín tsoxiteyá, la mé jeheni kjuancheheni ch'án kíxin chrók'uayakonhenni ch'án la ko tjejóchónhenni tí nkehe tsjanjon ch'án. ¹⁹ Tí tjejóchónhenni xíkaha la jína ts'ejó asénni éxí yóhe tí ntabárco chóntha gancho tjechruéxin kíxin kohya nketí sátsji. Méxrä xíkaha kjaxin tí nkehe tjejóchónhenni la sátsíkjí hasta nóton tí ka cortina tjen nkaxenhen níinko tjen nkaya nkajní, ²⁰ tí senó k'uíxenhen Jesús kuakitjehe ch'án ijnko ntja ts'ixenxínni. Mé xíkaha jehe ch'án k'óna ch'án nchat'á t'etqan jnkochríxín éxí yóhe kjuák'e tí ch'ín Melquisedec.

7

Ch'ín Jesús mé nchat'á éxí yóhe k'uékjak'e ch'ín Melquisedec

¹ Tí ch'ín Melquisedec mé k'ué rey kuènte chjasin Salem la ko nchat'á kuènte Dios tjen nkaya nkajní. A ntá tió ch'ín Abraham kjanxín ch'án tí tsíkjikjanjónko ch'án tí í so sín rey, kjuacha ch'án, ntá ch'ín Melquisedec kjuíxinhin ch'án ntja ikui ch'ín Abraham, ntá jehe ch'ín Melquisedec kjuíncheyaon ch'án tí ch'ín Abraham. ² A ntá tí ch'ín Abraham chjéhe ch'án tí ch'ín Melquisedec diezmo kaín xín nkehe tsíkjacha ch'án tí tsíkjikjanjónko ch'án tí sín rey.* A ntá ihnié ch'ín Melquisedec mé t'axrjexín saoxín kíxin "ijnko rey jína"; a ntá jehe ch'án k'ué rey kuènte chjasin Salem, tíha mé t'axrjexín kíxin "kjuaxróxin", la mé xíkaha jehe ch'án mé "ijnko rey tjanjon kjuaxróxin". ³ A ntá ch'ín Melquisedec la noehya sín nkexro it'é ch'án la ko nkexro iné ch'án la ko nkexro tsík'axrjeníxín ch'án; la ko noehya sin nkesá tsíkokjíhi ch'án la ko nkesá tsík'en ch'án. Mé xíkaha tóyóhe tí Xjeen Dios kíxin jehe ch'án mé ijnko nchat'á jnkochríxín.

⁴ A ntá jie, tsjehérá kíxin imá t'etqan tí ch'ín Melquisedec kíxin tí ch'ín Abraham k'uaxrjeníxinni, la tsíchjéhe ch'án tí ch'ín Melquisedec diezmo tí nkehe tsíkjacha ch'án tí tsíkjajónko ch'an tí sín rey. ⁵ Éxí nixja ley tsík'etqan ch'ín Moisés, kíxin tí sín nchat'á tsík'axrjeníxín tí ch'ín Leví chóntha sín kjuachaxin tsjanchehe sín kaín xín chojni diezmo kjónté naxa kjéhya sín, tsík'axrjeníxín sín tí ch'ín Abraham éxí tí jehe sín. ⁶ A ntá ch'ín Melquisedec, kjónté tsík'axrjeníxinha ch'án tí ch'ín Leví, na mé kjuich'ehe ch'án cobra tí ch'ín Abraham, mé tí ch'ín tsík'áyéhe tí nkehe tsíntáchro Dios. Mé xíkaha tí ch'ín Melquisedec tsíkjincheyaon ch'án tí ch'ín Abraham. ⁷ Kohya nkexro tsontáchro kíxin chaxínhya kíxin tí nkexro ncheyaon la antsí má t'etqan, a ntá tí nkexro tsíkóyaon la t'etqanhya. Náhí. ⁸ A ntá tí tjejóni, tí sín t'áyéhe tí diezmo la mé chojni ts'en ó. Kjánchó ntáchro tí xroon itén Dios kíxin tí ch'ín Melquisedec mé ijnko chojni naxa tsík'enhya, la naxa tjechón. ⁹ Mé t'axrjexín kíxin ch'ín Leví la ko kaín xín tí sín nchat'á tsík'axrjeníxín ch'án, mé tí sín t'áyéhe sín diezmo jie, la mé kjaxin jehe sín tsíkjenkehe sin diezmo tí ch'ín Melquisedec tió tsíkjenká ch'ín Abraham, ¹⁰ kíxin naxa tjiko cuerpo kuènte ch'án tí sín ts'axrjeníxín ch'án, naxa kokjéhya sín tió xeta ch'án tí ch'ín Melquisedec.

* **6:14** Génesis 22.16-17 * **7:2** 7.1-2 Génesis 14.17-20

¹¹ Tí sín nación Israel tsík'áyéhé sín tí ley kíxin tí sín ncháñ'á levita, mé tsík'axrjeníxín sín tí ch'ín Aarón. A ntá jie tí chaxín chrókjuacha sín chrókjuentoá sín tí sín tinkáchónki tí ley, la í t'ichjánxinhya naxá chrókónoxín í jnko ncháñ'á í chrókoyóehya éxi tí ch'ín Aarón. A ntá kjuachahaya sín xíkaha ntá t'ichjánxín chrókónoxín ijkno ncháñ'á chrókoyóehya éxi tí ch'ín Melquisedec. ¹² A ntá tí chrók'uixinkí tí ncháñ'á la kjaxin chrók'uixinkí tí ley. ¹³ A ntá tí xroon itén Dios chrónka tíhi kuènte Ínchéni. A ntá jehe ch'án la tsík'axrjeníxín ch'án í jnko nkexro kuènte Israel la kohya ninkexró tsík'óna ncháñ'á tsík'axrjeníxín tí sín a. ¹⁴ Kíxin ó noxín kíxin Ínchéni tsík'axrjeníxín ch'án tí ch'ín Judá, a ntá ch'ín Moisés la chrónkahaya ch'án ninkehó kuènte tí sín ts'axrjeníxín tí ch'ín a tió nixja ch'án kuènte tí sín ncháñ'á.

¹⁵ A ntá tíhi la qantsí má kónoxín kíxin tí ncháñ'á nixin la tóyóehya éxi ch'ín Melquisedec ¹⁶ kíxin tió k'óna ch'án ncháñ'á la jehya kíxin xíkaha chrók'uetoan ijkno ley kíxin nkexro chrók'uaxrjeníxín ch'án. Náhí. Ó jehí k'óna ch'án ncháñ'á kíxin tí kjuachaxin chónta ch'án la xitjahya ts'itjáyan. ¹⁷ Kíxin nixja Dios kíxin nkexrí tjen tí jehe ch'án, ntáchro kíxin: Jaha mé ijkno ncháñ'á tsjak'e jnkochríxín, éxi yóehya k'uékjak'e ch'ín Melquisedec.[†]

¹⁸ Méxra tí nkehe k'uék'etoan senó mé ch'ehya xra jie kíxin kánhyó kjuachaxin k'uéchónita la ko kjuachahaya, ¹⁹ kíxin tí nkehe k'uetoan ch'ín Moisés kjuachahaya kjuinchetjóá ninkehó nkehe. A ntá jie chóntani ijkno nkehe qantsí jína tjejóchónhenni kíxin tíha mé qantsí jína tsóchjinexínni Dios.

²⁰ A ntá tió ntáchro Dios tíha la tsík'ákjenxín ch'án qasén ch'án jehó ch'án. ²¹ La ntá tí í so ncháñ'á, tió tsíkónoxín sín, tsík'ákjenxinhya Dios qasén ch'án. A ntá tió tsíkónoxín tí ncháñ'á i la Dios tsík'ákjenxín ch'án qasén ch'án. A ntá ntáchro xroon itén Dios kíxin:

Ínchéni tsík'ákjenxín qasén ch'án
a ntá ts'ixítóxinhya tí nkehe tsíntáchro ch'án:
"Jaha mé ijkno ncháñ'á tsjak'e jnkochríxín
éxi yóehya k'uékjak'e ch'ín Melquisedec."[‡]

²² Méxra ch'ín Jesús ntáchro kíxin tí pacto t'etoan ch'án la qantsí má jína, a ntá tí pacto senó la náhí. ²³ Ntá k'uixin nchónhya sín ncháñ'á, kjánchó nkák'en sín, ntá xitjahya naxá chrókjuich'e sín tí xra a. ²⁴ A ntá ch'ín Jesús la ts'enhya ch'án la t'ichjánxinhya kíxin í jnko nkexro chrókuakja tí xra kuènte ch'án chrók'óna ncháñ'á. ²⁵ Méxra jehe ch'án tsjacha sinchekaá ch'án jnkochríxín tí sín tsóchjinehe Dios kíxin tinkáchónki sín tí jehe ch'án kíxin itjen ch'án jnkochríxín chrónóehya ch'án Dios kíxin chrókjuinchekaáni ch'án.

²⁶ Mé xíkaha Jesús mé tí ncháñ'á t'etoan t'ichjánxinhinni; jehe ch'án mé ijkno nkexro tjóá, chóntahya ninkehó jie, la ko tjenkákjanha ch'án tí sín tjasin jie, a ntá sákjuí ch'án nkaya nkajní. ²⁷ Ntá tóyóehya tí í so ncháñ'á t'etoan, kíxin t'ichjánxín ts'oyán sín iko tsjanjon sín tsóchjéhe sín Dios kaín yaon, saoxín kíxin tí jie kuènte sín, a ntá chr'éxín kíxin tí jie chónta tí í so chojni. A ntá ch'ín Jesús jnkokoaxón vez kjuanjon qasén ch'án ik'uén ch'án. ²⁸ Tí ley k'uék'etoan ch'ín Moisés t'etoan kíxin chojni naxá chónta jie chrók'óna ncháñ'á, a ntá Dios tsík'ákjenxín qasén ch'án tió kjuixin k'óna tí ley, ntáchro ch'án kíxin tí Xjeen ch'án mé ts'óna ncháñ'á t'etoan kíxin jína kjuinchexiteyá ch'án jnkochríxín.

8

Ch'ín Jesús nixjaxin ch'án ijkno pacto nixin

¹ Tí nkehe qantsí má tjetjanon chrónkani la mé tíhi kíxin tí ncháñ'á kuènteni mé t'etoan ch'án, la ko tjetjaxin ch'án nkaya nkajní, nó chjina tí trono t'etoanxín Dios, ² k'óna ch'án ncháñ'á tí ninko chaxín tsíkjich'eña Ínchéni, la jehya chojni tsíkjich'eña tíha. ³ Kaín ncháñ'á t'etoan tsík'áyéhé xra kíxin tsjanjon nkehe la ko iko its'en. Méxra Jesucristo t'ichjánxín kíxin tsjanjon ch'án ichréñ nkehe. ⁴ Tí chrókjuak'e ch'án chjasintajni, chrók'ónahya ch'án

[†] 7:17 Salmo 110.4 [‡] 7:21 Salmo 110.4

ncháñt'á kíxin naxa siín ncháñt'á tjanjon nkehe k'uetoan tí ley tsík'áyéhé ch'ín Moisés. ⁵ A ntá tí sín ncháñt'á k'uékjanjon nkehe tóyohó tí nkehe siín nkaya nkajní. Noheni kíxin tóyohó kíxin tió ch'ín Moisés chrókjuch'eña ch'án ninko la ntáche Dios tí jehe ch'án kíxin: "Tjenkayáxian jína, a ntá sich'eña jaha éxi tí nkehe kjuákuáxian chrítaón jna."* ⁶ A ntá tí ncháñt'á t'etoan kuénteni tjech'e ch'án xrä qantsí jína kíxin jehe ch'án mé tí nkexro nixjaxin tí pacto nixin tsíntáchro Dios chrónka tí nkehe jína tsónhen chr'éxín.

⁷ A ntá tí pacto tsík'etoan sáoxín la tí chróxitayá jína, la t'ichjánxinhya chrók'óna yóxin pacto. ⁸ A ntá Dios k'uíkon kíxin kjuínchexiteyáhya tí sín a, éxi ntáchro xroon itén Dios kíxin: Ntáchro Ínchéni kíxin: Itsi ijnko yaon mé tsjánjuan ijnko pacto nixin tsochóna tí sín nación Israel la ko tí sín chjasin Judá.

⁹ Jehya xikaha tí pacto kuétuanhán tí sín tsík'axrjeníxirá ósé, tí yaon kjuínkitsa sín k'uaxrjexín sín tí nación Egipto; kjánchó kjuínchexiteyáhya sín tí pacto kuétuanhán sín, méxrä kuitohá sín, ichro Ínchéni.

¹⁰ Tí pacto tsétuanhán tí sín chjasin Israel tió ts'atsínka tí yaon a, mé xikaha tíhi, ichro Ínchéni:

Sintaxráxinkávan asem sín tí ley tsétoan, a ntá tí kjuaxrexinkaon kuénte sín tsokjian tí nkehe tsétuanhán sín. A ntá janhan ts'óna Dios kuénte sín, a ntá jehe sín mé ts'óna chjasin kuéntana.

¹¹ Ts'ichjánxinhya naxa tsjakohé kichó sín kíxin chróchóxin sín Ínchéni, kíxin kaín sín tsochóxinna sín, kjónté chojni imá ntsíntsí la ko chojni imá hyé.

¹² Sintak'itjáyan tí nkehe jinahya kjuich'e sín la ko í tsoxráxinkakonhyá ínaá tí jié chónata sín.†

¹³ Xikaha nixa Dios kuénte tí pacto nixin ts'etoan ch'án kíxin tsíkóntaxin tí pacto sáoxín k'uetoan ch'án, tíha mé tinkákóntaxin la ko tinkákjeje, na í séhya ts'itjáyan.

9

Tí ninko chjasintajni la ko tí ninko nkaya nkajní

¹ A ntá tí pacto sáoxín t'etoan nkexri chróxraxinkaonni Dios, kíxin tí ninko ntihyó chjasintajni. ² A ntá tí ninko k'uékjak'e mé tí cuarto sáoxín k'uekjinchek'in sín tí Cuarto Tjóá, tí kjuák'e tí candelero la ko tí mesa tjejókjen tí niotja k'uéxraxinkakonxín sín Dios. ³ Nótton tí yóxin ka cortina kjuák'e tí cuarto k'uékjincheck'in sín tí Cuarto Antsí Tjóá. ⁴ Ntiha k'uékjak'e tí altar tsík'óna chica oro k'uékjakaxín sín tí chijincó la ko k'uékjak'e tí ntacajón chr'ísimá chica oro tjenkáya tí pacto. Nkaxenhen tí ntacajón k'uékjak'e ijnko nchésen tsík'óna chica oro k'uék'inka maná k'óna niotja, la ko kjaxin k'uékjak'e tí nta k'uékjixín ch'ín Aarón kjuankíxin k'uayan nta ntahnté, la ko kjaxin ntiha kjuák'e tí xro chónata tí tan k'uetoan Dios. ⁵ Chrítaón tí ntacajón k'uék'ejó yaá ángel tsíkjanoya tsíkjentoá kañenée chrítaón tí kjuák'e tí kjuachaxin kuénte Dios; ntaha k'uékjinxín tí jié k'uéchónata chojni. A ntá ijie la t'ichjánxinhya naxa tsonixjani kuénte tíha.

⁶ A ntá xikaha k'uéjó tí nkehe a, a ntá tí sín ncháñt'á jnkoyaxón t'ixenhen sín tí cuarto sáoxín kuénte ninko kíxin tí xrä ch'e sín kuénte ninko. ⁷ A ntá tí yóxin cuarto jehó tí ncháñt'á t'etoan t'ixenhen ch'án jnkokoá vez jnkojnko nánó; a ntá tí t'ixenhen ch'án t'ichjánxin ts'ixenko ch'án ijné iko tsochjéhe ch'án Dios tsotjuáxin ijé ch'án la ko ijé tí i so chojni.

⁸ A ntá tí Nchákuén Dios nchenoexínni tíhi kíxin nachrohe k'uékjich'e xrä tí cuarto sáoxín la naxa tjexrankehya kíxin chrók'uixenhenni tí Cuarto Antsí Tjóá. ⁹ Kaín tíha tjakoxin

* ^{8:5} Éxodo 25.40 † ^{8:12} 8.8-12 Jeremías 31.31-34

ijnko nkehe chrókónoheni jie, kjánchó tí nkehe chjéhe sín Dios la ko tí ko t'óyán sín xitjahya nchenoexín sín kíxin á chaxín kótjóá tí jie k'uéchonta sín kíxin xíkaha k'uéxraxinkaon sín Dios. ¹⁰ A ntá tíha jehó t'etqan kuènte tí nkehe chrókjóne sín la ko tí nkehe chrók'ui sín la ko tí chrók'onti sín kíxin chrókótjuáxin ijé sín, kaín tíha mé k'uítuenhen sín kuènte cuerpo ó la jehó k'uéchonta kjuachaxin tí naxa kjuinkíhya Dios nkexrí chróxraxinkaon sín ch'án.

¹¹ A ntá ó kui Cristo, jehe ch'án mé ncháat'á t'etqan kuènte tí nkehe antsí jína itsi. A ntá tí ninko ch'e ch'án xra la antsí jína la ko antsí ntoá, la jehya chojni tsíkjich'éna tíha kíxin jehya chjasintajni ntihi tjen. ¹² Tió k'uíxenhen Cristo tí Cuarto Tjóá, la jehya kíxin chrókuanjon ch'án ijnié koténtsø la ko ijnié koxintáxjan. Náhí. Ijnié ch'án kjuanjon ch'án; mé xíkaha k'uíxenhen ch'án jnkokoá vez ntiha mé xíkaha kjuenkä ch'án kíxin chrókuaáxinni jnkochríxín. ¹³ A ntá tí ijnié koxinta la ko ijnié koténtsø la ko tí nteso kuènte tí koxintáxjan tsíchexín tí altar tikitexín tí sín tjuáhya la mé tíha chóntha kjuachaxin tsotjuáxin tí chrítaón ó. ¹⁴ A ntá tí xíkaha, la kjá antsí má chóntha kjuachaxin tí ijnié Cristo. Kíxin tí kjuachaxin Nchákuén Dios tjen jnkochríxín, la Cristo kjuanjon asén ch'án ik'uén ch'án k'uáyéhé Dios, la jehe ch'án la ninkehó jie chóntahya ch'án. A ntá ijnié ch'án nchetjóá tí nkehe kjuich'eni senó chrók'uenxínni kíxin ntá jie la jína chrókjuich'eheni xra Dios tjechón.

¹⁵ Méxra Jesucristo nixjaxin ch'án tí pacto nixin k'uetoan Dios. Kíxin k'uenyákonhenni Cristo ntá tsotjuáxin tí jie kjuasinni kjuinchexiteyáhyani tí pacto k'uítuenhenni senó; kíxin tí sín k'uíyéhé Dios la jína chrók'uáyéhé sín tí nkehe tsjejehya kíxin jehe ch'án xíkaha tsíntáchro ch'án tsjanjon ch'án. ¹⁶ A ntá tí siín ijnko nkehe tsíntáchro ijnko chojni kjuák'e na ntá ik'uén la t'ichjánxín tsónoxín kíxin chaxín tsík'en tí nkexro tsíkjich'éna. ¹⁷ A ntá tí nkehe tsíntáchro ch'án la sínkíhya tí naxa tjechón tí nkexro tsíkjich'éna; jehó tió chrók'uen ch'án mé sínkí. ¹⁸ Méxra tí pacto xrankíxíñ tsík'etqan Dios kjuankíxín kjuich'e xra kíxin k'uítji ijni. ¹⁹ Ch'ín Moisés tsíchrónka ch'án kaín nkehe tsík'etqan tí ley kuínhin kaín tí chojni; a ntá chr'éxín kuákja ch'án ichjoén kolélo kjátse la koí ntarama hisopo, ntá kjuinchekjatjaxín ch'án ijnié koxintáxjan la ko ijnié koténtsø tsíkjiko inta, ntá kuíkjánjin ch'án tí libro chóntha ley la ko kuíkjánjin ch'án kain tí chojni. ²⁰ A ntá ntáchro ch'án kíxin: "Tí jni i tsoxiteyáxin tí pacto k'uetoan Dios chrókjuinchexiteyéhérá jahará."* ²¹ Tí ch'ín Moisés kjáxin kuíkjánjin ch'án jni tí ninko la ko kaín nkehe t'ichjánxín tí nkaxenhen ninko. ²² Kíxin xíkaha ntáchro tí ley kíxin kaín nkehe la chrókótjuáxin tí jni; a ntá xitjahya chrókótjóá tí jie tí chrók'uijikjanjinhya jni.

Tí ik'uén Cristo mé tsjìinxín ijíeni

²³ Méxra t'ichjánxín kíxin ik'uén iko kótjuáxin tí nkehe a, táha mé tóyohó tí nkehe siín nkaya nkajní; a ntá tí nkehe chaxín kuènte nkaya nkajní t'ichjánxín ijnko nkehe antsí jína chrók'uen. ²⁴ A ntá Cristo k'uíxenhya tí ninko tsíkjich'énaxín chojni tja, táha mé ijnko nkehe tóyohó tí ninko chaxín. Náhí. Jehe ch'án mé k'uíxenhen ch'án tí nkaya nkajní, a ntá jie mé tjen ch'án tí tjen Dios nixjaxin ch'án kaín ni. ²⁵ A ntá jehe ch'án la jehya jnkoyaxón k'uíxenhen ch'án ntiha k'uenyákonhenni ch'án. Náhí. A ntá tí ncháat'á t'etqan t'ixenhen tí Cuarto Tjóá jnkojnko nánó kíxin tsjanjon ch'án ijnié ko ó. ²⁶ A ntá tí xíkaha chrókónhen Cristo la t'ichjánxín kíxin jnkoyaxón chrók'óyán sín ch'án desde tí k'óna tí chjasintajni. A ntá jie la ó chjina, tsjixraká tsjeje chjasintajni, a ntá kónoxín Cristo la ik'uén ch'án jnkokoá vez kíxin tsjìinxín ijíeni. ²⁷ Mé xíkaha kjáxin Cristo jnkokoá vez ik'uén ch'án kíxin tsjìinxín ijé nchónhya chojni. A ntá chr'éxín itsi ch'án ínaá, jehya kíxin naxa tsjatsen ch'án ijé chojni. Náhí. Sinchekaá ch'án tí chojni ó tsíkótjóá tjejochónhen itsi ch'án.

* **9:20** 9.19-20 Éxodo 24.6-8

10

¹ A ntá tí ley k'uetoanxín ch'ín Moisés la tóyohó tí nkehe jína tsi la jehya tí nkehe chrókuaáxinni. Méxra tí ley kjuachahya kjuíncchetjóá tí sín kóchjinehe Dios kjuanjon sín iko its'en jnkojnko nánó. ² A ntá tí chrókjuacha tí ley chrókjuinchetjóá ijé sín, ntá chrókjuenkayáxinha sín kíxin naxa chróchónita sín ijé, la chrókuítohe sín, í chrókjuanjonhya sín iko its'en. ³ A ntá xíkaha ich'e sín t'oyán sín ko, la jnkojnko nánó xraxinkakonxín sín tí jie tsíkjasin sín ⁴ kíxin ijnié koxinta la ko ijnié koténtso xitjahya tsjìinxín ijé chojni.

⁵ A ntá tió Cristo kui chjasintajni ntáche ch'án Dios kíxin:
Tjinkákonhya jaha iko its'en la ko tjinkákonhya jaha ninkehó nkehe chrók'uayéhé. Náhí.
Jaha tsíkjich'eña ijkno cuerpo kíxin tsochonta janhan.

⁶ Jaha tóxrjánhya iko tsíchján la ko tí í so nkehe chrókuanjonni chrókjuakjìinxian ijé.

⁷ A ntá ntátjan ch'án kíxin: "A ntá ijie la ntihi tjén janhan kíxin sintaxiteyá tí nkehe tóxrjínhan jaha Dios,

éxi nixja xroon chrónka nkexrí chrókjuit'a."*

⁸ Senó ntáchro kíxin Dios tjinkakonhya la ko tóxrjénhya ch'án iko its'en chrókuanjonni la ko ninkehó nkehe chrókuanjonni chrókjùinxín ijéni kjónté tí ley k'uetoan kíxin xíkaha chrókónhen. ⁹ A ntá chr'ejin tsíntáchro kíxin: "A ntá k'uinka janhan kíxin sintaxiteyá tí nkehe tóxrjínhan jaha Dios," ichro ch'án. Mé xíkaha kjuatsen ch'án tí ko k'uék'oyán sín ósé, a ntá jehe ch'án kjuanjon ch'án ijkno nkehe nixin. ¹⁰ Dios kjuíncchetjuáxinni kíxin Jesucristo kjuínchexiteyá éxi tóxrjínhan Dios kíxin tí cuerpo kuénte ch'án kjuanjon ch'án ik'uén ch'án jnkokoáxon vez para jnkochríxín.

¹¹ A ntá kaín nchat'á judío tí xra ch'e sín jnkojnko yaon la jnkokón nkehe its'en tjanjon sín kjánchó tíha la xitjahya tsjìinxín ijé chojni. ¹² A ntá Jesucristo mé jnkokoá vez k'uenyákonhenni ch'án kíxin tsotjuáxin ijéni la tíha mé sich'e xra jnkochríxín. A ntá kjuixin ntá sákji ch'án kjuák'etjaxin ch'án nó tí tja chjina kuénte Dios. ¹³ A ntá ntiha tjechónhen ch'án tsjixinjian kaín tí sín nínkakonhen ch'án tsjachahya sín ts'etoan sín. ¹⁴ Mé xíkaha jnkokoá nkehe kjuich'e ch'án chjéhe ch'án Dios, kíxin jína ts'ejó tí sín ó tsíkótjoá.

¹⁵ A ntá tí Nchakuen Dios nchenoheni tíhi kíxin senó tsíntáchro kíxin:

¹⁶ Tí pacto tsotjaha tí jehe sín tió ts'atsínska tí yaon a, ichro Ìnchéni;

Sintaxráxinkavan asén sín tí ley tsétoan,

a ntá tí kjuaxrexinkaon kuénte sín tsokjian tí nkehe tjínkavan.†

¹⁷ Kjaxin ntáchro kíxin:

Í tsoxráxinkakonhya ínaá tí ijé sín la ko tí nkehe jínahya kjuich'e sín.‡

¹⁸ Mé xíkaha tí ó kótjoá ijéni la t'ichjánxihya í so nkehe chrókuanjonni chrókótjuáxin tí ijéni.

Méxra t'ichjánxiha tsochjineheni Dios

¹⁹ Kíchóni, a ntá la í kohya kjuachrakon ts'ixenhenni tí Cuarto Antsí Tjóá tí tjen Dios kíxin kjuachaxién ijnié Jesucristo, ²⁰ chréheni tí ntia nixin mé tí ntia tjechón kuakitjehe ch'án nótton tí ka cortina, tíha mé tí cuerpo kuénte ch'án. ²¹ Jesús mé tí nchat'á tjetooan kuénteni t'etoan tí ntoe Dios. ²² Méxra xíkaha chrókóchjineheni Dios kaín asénni chrókuinkáchónkini ch'án chaxín kíxin jehe ch'án tsíkjinchetjóá ch'án asénni kíxin chrókjuenkayáxinha sín naxa chontani jie kíxin tí cuerpo kuénteni kótjuáxin tí ntia jehó. ²³ Chrókuítoehyani chrók'uejochónhenni tí nkehe tinkáchónkini kíxin Dios la chaxín sinchexiteyá ch'án tí nkehe tsíntáchro ch'án. ²⁴ Chrókjueyáni nkexrí chrókjuinkitsani kíchó ni kíxin chrótjuéheni kíchó ni la chrókjuich'ení tí nkehe jína. ²⁵ Chrókuítoehyani chrókójnkotséni, chrókóyóehyani éxi tí sín í tójnkotséhya sín. Náhí. Chrókjuinchéheni kíchó ni antsí má jie kíxin ó noheni kíxin í séhya tsokjan Ìnchéni.

* **10:7** 10.5-7 Salmo 40.6-8 † **10:16** 10.16-17 Jeremías 31.33-34 ‡ **10:17** 10.16-17 Jeremías 31.33-34 § **10:22**
Ezequiel 36.25

²⁶ A ntá tí naxaq chrókjuenkayáxinni chrókjuasinni jie tí ó noheni tí nkehe chaxín, la kohya í jnko nkexro chrók'uenyákonhenni chrókótjuáxin tí jie chóntani. ²⁷ A ntá jehó itjen tí kjuachrakon jie tsitqexín jie la ko tí xrohi tjeche ts'itjáyanxín tí sín nínkakonhen Dios. ²⁸ A ntá tí tjen jnkojín nkexro titekakonhya tí ley k'uetoanxín ch'ín Moisés, la tsønoxín yaá o y'á tí sín tsík'ikon tí jie tsíkjasin sín, tíha mé ts'enxín sín la kohya nkexro tsíkonóehe tí jehe sín. ²⁹ ¿Á tjenkayáxinhýará kíxin antsí má chrókjuasóte tí sín kuítekakuenhya tí Xjeen Dios la ko chónchtehya sín kjuasáya tí ijnjé ch'án la ko t'ántaxínhjin sín tí Nchakuen Dios tjuéheni? Kíxin tí jnijchrónkaxín kíxin ts'etqanxín tí pacto la ko tí jnij k'uíjmáxinni. ³⁰ Noheni kíxin tsíntáchro Inchéni kíxin: "Janhan mé tóna tocar sintakitoaxián ijié chojni la ko janhan tsjénkaha sín."* Kjaxin tsíntáchro kíxin: "Inchéni sinchekitoexín ijié tí sín tinkáchónki ch'án."† ³¹ Méxra kjuachrakon jie chrók'uanótjenyáni tí tja Dios tjechón.

³² A ntá chróxráxinkáonrá jahará tí nkehe tsíkónhen ósé kíxin tió jahará nantá tsík'ayéhérá tí nkehe t'inkaséyan, a ntá kjuachará kjónté tí nchónhya nkehe tsíkónhanrá. ³³ A ntá jnkojín tí jahará k'uántaxínhanrá sín la ko kjuatiará sín nkayakon nchónhya chojni, a ntá í so sín la kjuínkitsa tí sín tsík'ekon. ³⁴ A ntá jahará kuíkonóeherá tí sín tjejóchjina ntoechiso, a ntá jahará kóninkákonhyará kjónté k'uaxrjahará kaín nkehe chontará, kíxin ó nohará kíxin nkaya nkajní chontará nkehe antsí jína chónhya tsjeje. ³⁵ Chrókuítóéhyará tí nkehe tinkachónkirá kíxin ó nohará kíxin tíha mé ts'ayéxinrá nkehe chréxín. ³⁶ Kjaxin jahará t'ichjánxín chrók'uejochonhénra chrókóninkákonhyará kjónté ichréni nkehe chrókónhanrá, kíxin sich'erá tí nkehe tjinkaon Dios, kíxin xíkaha chrók'uayéhérá tí nkehe tsíntáchro tí jehe ch'án. ³⁷ Kíxin xíkaha ntáchro xroon itén Dios kíxin:

Kánhyó sé

itsi tí nkexro tsi, í sinchexrjenhya.

³⁸ Tí sín kótjóá aseñ mé tjejóchónxin sín kíxin tinkáchónki sín Dios;

a ntá tí sín tsítóhe tí janhan la í tsøchànahya tí xíkaha ch'e sín.‡

³⁹ Kjánchó jeheni jehya xíkaha chrókuítóheni chrókuinkáchónkihyani tí jehe ch'án kíxin ntá chrókjuasinni jie chrók'uitjáyanxínni. Náhí. Tinkáchónkini ch'án la tíha chrókuaáxinni.

11

Tífe

¹ Tí fe chóntani la mé noexínni chaxín kíxin tsoxiteyá ts'ayéheni tí nkehe tjejóchónhenni, la ko noexínni chaxín kíxin kjónté ijnko nkehe t'ikonyani la chaxín tjen. ² Tí sín tsík'axrjeníxinni ósé la kóxrjínhjin Dios kíxin k'uéchonta sín fe.

³ Tí fe mé noexínni kíxin Dios tsíkjich'éna kaín nkehe tí kjuachaxin tí nixja ch'án la ko noexínni kíxin tí nkehe t'ikoni mé tsík'óna tí nkehe t'ikonyani.

⁴ A ntá tí fe k'uéchonta ch'ín Abel mé k'oyán ch'án ijnko kolélo chjéhe ch'án Dios. Tíha ijnko nkehe antsí jína kjuanjon ch'án, a ntá tí nkehe tsíkjanjon ch'ín Caín la náhí. Méxra Dios kóxrjínhjin tí nkehe kjuanjon ch'ín Abel ntá ntáchro Dios kíxin jína tí ch'ín a. Kjónté ó tsík'en ch'ín Abel la tí nkehe tsíkjich'e ch'án naxaq tjakoxín kíxin jína tí fe k'uéchonta ch'án.*

⁵ A ntá tí fe k'uéchonta ch'ín Enoc la Dios sátsíkjiko tí jehe ch'án la k'uénya ch'án, a ntá k'uitjahya sín ch'án kíxin Dios sátsíkjiko. Naxaq sákjuíhya ch'án la xráxín kóxrjínhjin Dios nkexrí k'uékjak'e ch'án.† ⁶ A ntá tí chróchóntahyani fe la xitjahya chrókjuinchéhéni Dios, kíxin t'ichjánxín kíxin tí sín chrókóchjinehe sín Dios chrókuitekaon sín kíxin chaxín itjen ch'án la ko jehe ch'án tsjenkehe ch'án tí sín xritjeyá sín tí jehe ch'án.

⁷ A ntá tí fe k'uéchonta ch'ín Noé tí Dios chénka tí jehe ch'án tí nkehe naxaq k'uíkonhya ch'án tsønhen, la kuítekaon ch'án kjuich'éna ch'án ntabárco kíxin tsaáxin ch'án la ko tí sín

* **10:30** Deuteronomio 32.35-36 † **10:30** Deuteronomio 32.35-36 ‡ **10:38** 10.37-38 Habacuc 2.3-4 * **11:4** Génesis 4.3-10 † **11:5** Génesis 5.21-24

naxaq kjéhya ch'án. Tí fe k'uéchóna ch'án kjuakoxin kíxin tí í so chojni chjasintajni la jínahya sín tsjasóte sín. A ntá kóxrjhíñ Dios tí jehe ch'án kíxin kuítekaon ch'án la tí xra kjuich'e ch'án mé kuaáxin ch'án.[‡]

⁸ A ntá tí fe k'uéchóna ch'ín Abraham tí k'uíyehé Dios tí jehe ch'án la kuítekaon ch'án sákui ch'án tí nonte tsjanjon Dios ts'ayéhē ch'án, ntá k'uaxrjexín ch'án chjasén ch'án kjónté noehya ch'án nketí nó sátsji ch'án.[§] ⁹ A ntá tí fe k'uéchóna ch'án k'uékjak'e ch'án tí nonte chrókjuanjon Dios, exí jehya nontee ch'án tíha. Kjuák'e ch'án nchia tsík'óna ka, la ko kjaxin xíkahá k'uéchóna ch'ín Isaac la ko ch'ín Jacob la ko kjaxin jehe sín tsík'ayéhē sín tí nkehe tsíntáchro Dios.* ¹⁰ A ntá ch'ín Abraham k'uékjak'echónhen ch'án tí chjasin tsíkjich'éna Dios ts'itjáyanha.

¹¹ A ntá tí fe k'uéchóna tjan Sara kjónté ó nána tjan, k'uáyehé tjan kjuachaxin sich'éna tjan ijkno xjan; a ntá kjuich'éna tjan ijkno xjan kíxin kuítekaon tjan kíxin Dios sinchexiteyá tí nkehe tsíntáchro ch'án.[†] ¹² Kjaxin xíkahá ch'ín Abraham, kjónté ó mero chrók'uen ch'án kíxin ó tada ch'án, la k'uaxrjeníxin ch'án nchónhya chojni exí konotsé siín nkajní o exí nchesen siín chrínta ntayaon, xitjahya ts'ekini.[‡]

¹³ A ntá kaín tí chojni a ik'uén sín k'uáyehya sín tí nkehe tsíntáchro Dios kíxin chrók'uáyehé sín, a ntá k'uéchóna sín fe, la kjónté ijkjín k'uíkon sín la ko kuítekaon sín kóchéhē sín. Mé xíkahá k'uéchrónka sín kíxin tí chjasintajni jehya chjasén sín. ¹⁴ Mé xíkahá k'uénixja sín la tienxínni jína kíxin naxaq xritjeyá sín nketí chrók'óna chjasén sín. ¹⁵ A ntá tí chróxraxinkaon sín tí chjasin tsík'axrjexín sín ntá jína chrókjan sín ntiha ínaá. ¹⁶ Kjánchó tjinkaon sín ijkno chjasin qantsí má jína, tíha mé chjasin nkaya nkajní. Méxra Dios la tósuèhya ch'án kíxin chrókjuinchek'in sín ch'án tí Dios kuente tí jehe sín, kíxin ó tjechónhen tí chjasin ts'ayéhē tí jehe sín.

¹⁷ A ntá fe k'uéchóna ch'ín Abraham kíxin Dios kjuich'e prueba tí jehe ch'án kjuanchia tí xjeen ch'án Isaac, a ntá kjuikqao ch'án chrók'oyán ch'án, chrókjuanjon ch'án. Tjechónhen ch'án chrókjuanjon ch'án kjónté jnkokoáxón xjeen ch'án tsíkjanjon Dios[§] tsíntáchro kíxin: ¹⁸ "Tí ch'ín Isaac ts'axrjeníxin nchónhya xjan."* ¹⁹ A ntá ch'ín Abraham kjuátsoan ch'án kíxin Dios imá chóntha kjuachaxin, la kjónté chojni tsík'en na nchexechón ch'án, la exí yóhē chrók'uen tí xjeen ch'ín Abraham ntá chrók'uáyehé ch'án ínaá.

²⁰ A ntá tí fe k'uéchóna ch'ín Isaac kjuíncheyaon ch'án tí xjeen ch'án ch'ín Jacob la ko Esaú, kíxin jína ts'ejó sín.[†] ²¹ A ntá tí fe k'uéchóna ch'ín Jacob tió chjina its'en ch'án kjuíncheyaon ch'án jnkojnko tí xjeen ch'ín José, a ntá tí nta tjixin ch'án kjuisójixin ch'án nixjehé ch'án Dios.[‡] ²² A ntá tí fe k'uéchóna ch'ín José tió chjina its'en ch'án tsíntáchro ch'án kíxin tí sín israelita la chr'éxin ts'axrjexín sín chjasin Egipto, tsík'etjoan ch'án kíxin tió sátsjí sín la sátsjiko sín tí huesoé ch'án.[§]

²³ A ntá tí fe k'uéchóna it'é la ko ìné ch'ín Moisés tió kokjíhi ch'án kjuak'émä sín ch'án iní nitjó kíxin tsík'ikon sín kíxin ijkno xjan ntoa náxrjón tsjehe ch'án, la ko chrakuenhya sin tí nkehe tsík'etjoan tí ch'ín rey kíxin chrók'oyán sín xjan.* ²⁴ A ntá tí fe k'uéchóna ch'ín Moisés tió kónteto ch'án la chrohya ch'án its'en ch'án xjeen tí tjan xjeen ch'ín rey Egipto.[†] ²⁵ Náhí. Kjueyá ch'án kíxin kjónté chrókjuasóteko ch'án tí sín tinkáchónki Dios, la kóxrjhíñhya ch'án kíxin séhya náxrjón chrókjuak'e ch'án chrókjuasin ch'án jie. Náhí. ²⁶ Kjuenkayáxin ch'án kíxin qantsí tjetoan chrókjuasótexín ch'án tí tinkáchónki ch'án tí Cristo itsi chr'éxin, a ntá kánhyó tjetoan chróchóna ch'án kaín nkehe tjete siín chjasin Egipto. Kjuenkayáxin ch'án kíxin chrók'uáyehé ch'án tí nkehe chrókjuanjon Dios. ²⁷ A ntá tí fe k'uéchóna ch'ín Moisés sákjuixin sín tí chjasin Egipto,[‡] chrakonhya ch'án kjónté

‡ 11:7 Génesis 6.13–22 § 11:8 Génesis 12.1–5 * 11:9 Génesis 35.27 † 11:11 Génesis 18.11–14; 21.2 ‡ 11:12 Génesis 22.17 § 11:17 Génesis 22.1–14 * 11:18 Génesis 21.12 † 11:20 Génesis 27.27–29,39–40 ‡ 11:21 Génesis 47.31–48.20 § 11:22 Génesis 50.24–25 * 11:23 Éxodo 1.2; 2.2 † 11:24 Éxodo 2.10–12 ‡ 11:27 Éxodo 2.15

kóníkaon tí ch'ín rey, a ntá kuítøehya ch'án tí tinkáchónki ch'án Dios kíxin éxí t'ikon ch'án tí Dios ninkexró t'ikonhyá.

²⁸ A ntá tí fe k'uéchónta ch'ín Moisés kjuasin ch'án tí kia pascua, k'uëtoan ch'án kixin chrókuikjanjin sín jni tí puerta, kíxin tí ángel t'óyán chojni chrókuinchénhyá nijnko tí xjan sao kuènte tí sín Israel. [§] ²⁹ A ntá tí fe k'uéchónta tí sín israelita k'uátøye sín tí Ntayaon Kjátse kíxin k'óna nche xámá, a ntá tió tí sín Egipto tjinkaon sín chróchréhe sín xíkaha la kjáñchó kjuinhin sín tí ntá a.*

³⁰ A ntá tí fe k'uéchonta tí sín israelita la xítjen tí tjat'q t'inkákuènxín tí chjasin Jericó, tió kjuixin k'uántatjen sín yato yaon tí chjasin a.† ³¹ A ntá tí fe k'uéchónta tí tjan Rahab, na mé ijnko tjan k'uéchonta nchónhya chojni ntoa, ntá k'uénkohya tjan kaín tí sín jiehe kuítekakonhya, kíxin tsíkjanjon tjan kjuachaxin kíxin kjuaxróxin tsíkitøhe ntøe tjan tí sín israelita kjuíjitsàya sín tí chjasin Jericó.‡

³² ¿Nkehe naxa chróntáxrjan? Sintak'itjáyan tiempo naxa chrónixja kuènte ch'ín Gedeón, la ko ch'ín Barac, la ko ch'ín Sansón, la ko ch'ín Jefté, la ko ch'ín David, la ko ch'ín Samuel, la ko tí sín profeta. ³³ Kíxin tí fe k'uéchónta tí jehe sín kjuacha sín k'uëtoan sín jína ókjé chjasin, la ko jína kjuínchekitoexín sín ijié chojni, la ko k'uáyéhe sín tí nkehe tsíntáchro Dios kíxin tsjanjon ch'án, la ko k'uikjehé sín ir'va koxra, ³⁴ la ko k'uanka tí xrohi chróchexín sín, la ko kjuachahya tí espada chrók'uenxín sín. A ntá tí sín chrakon la kófuérte sín, k'óna sín chojni tsehe kjuacha sín kjuánjonko sín tí sín soldado tsíkjixín ókjé. ³⁵ Kjáxin k'uék'ixin chojni chjin k'uáyéhe ínaá tí chojni tsík'en kuènte sín tsíxechón ínaá.

A ntá í so sín la kjuasote sín k'uénxin sín kíxin kjuínchemáhya sín kíxin kuinkáchónki sín Dios kíxin ó nohe sín kíxin tsoxechón sín antsí jína ínaá. ³⁶ A ntá í so sín kjuasóte sín la nchónhya chojni kjuanoá tí jehe sín, la ko tsík'ekon sín la ko kjáxin cadena chróntetoxín sín k'uejóchjina sín. ³⁷ I so sín la ixro k'uénxin sín, la í so sín cierra chrít'oxin sín, la í so sín la nchónhya nkehe kjuasótexín sín, la í so sín k'uénxin sín espada, la í so sín k'uék'aji sín tsík'inkáya sín tjoe kolélo la ko tjoe koténtso, nòa sín, kjuasóte sín, kjuaxróxinhya la náxrjónhya k'uéjó sín. ³⁸ A ntá tí sín chjasin ntiha kjuikosáyehya tí sín a la ntá k'uínkíté sín, la tí sín a la chóntahya chjasén sín la sákjuí sín nteje, la ko jna, la ko tjo síxrja la ko tóye. ³⁹ Kaín tí sín a kónhen sín prueba kíxin á chaxín chónta sín fe la kjónté xíkaha k'uáyéhya sín tí nkehe tsíntáchro Dios kíxin tsjanjon ch'án ⁴⁰ kíxin Dios kjuenkayáxin ch'án ijnko nkehe antsí jína kíxin jehó jnkokoá chrók'uáyèkoni sín tí nkehe tsjanjon ch'án.

12

Jehó Cristo chrókuinkáchónkini

¹ Méxrä tí jeheni la tsík'antájenni nchónhya chojni tsíkjakoxin sín tí fe k'uéchónta sín, la ntá chrókuítøheni ntáha kaín tí nkehe t'inkákonhen, la ko tí jie chrókuachroeni, a ntá chrókuich'eni jína tí xrä chóntani la ntá chrókuachani antsí má chrókónoheni. ² Jehó Jesús chrókuinkáchónkini kíxin jehe ch'án kjuanjon tí fe chóntani kíxin jína kjuakoxin ch'án kjuínchexiteyá ch'án, la kjuasótexín ch'án tí ntacruz, la kuáhya ch'án kuentá kósuehya ch'án tí nkehe kónhen ch'án ik'uén ch'án, kíxin nohe ch'án kíxin tsjixin tsjasóte ch'án ntá náxrjón tsjak'e ch'án la ko tsochéhe ch'án kíxin tsjak'etjaxin ch'án tí tja chjina tí trono kuènte Dios.

³ Méxrä chrókjuenkayáinxrá jahará nkexrí kjuakoxin ch'ín Jesús. Tí sín chónta jie imá kjuínchekjasóte tí jehe ch'án la kjónté jahará xíkaha chrókuasóterá la chrókóxrjéhyará chrókuinkachónkirá ch'án. ⁴ A ntá jahará naxa k'uénxinhýará tí tjanjonkoará tí jie. ⁵ ¿A k'uitjáyanhanrá tí jahará tí nkehe ntaxraxinkaonrá Dios kíxin éxí xjeen ch'án t'ikon ch'án tí jahará? Éxí ntáchro xroon itén Dios kíxin:

Xjeenni, tóninkákonhya tí nkehe tjentuáha Închéni, chrók'uaváhya tí chrókjentuáha ch'án. ⁶ Kíxin Închéni mé tjentuéhe tí sín tjuèhe ch'án la ko ncheckjasóte kaín tí sín ts'áyéhe ch'án ts'óna xjeen ch'án.*

⁷ Chrókuítekáonrá tí nkehe t'etoan Dios kíxin Dios t'ikon kíxin éxí xjeen ch'án tí jahará. ¿Á siín ijkno it'é xjan chrokjuentuéhya tí xjeen? ⁸ A ntá tí chrókjentuáhyará Dios tí jahará éxí tjentuéhe ch'án kaín tí xjeen ch'án, ntá jahará kjá jehya xjeen ch'án chaxín. ⁹ A ntá tí naxqá k'uéchánjanni, na mé it'éní ntihi chjasintajni kjuentuéhe tí jeheni, la jeheni kjuikosáyeheni sín. A ntá xikaha antsí chrókjuchexiteyéheni It'éní tjen nkaya nkajní kíxin chróchóntaxínni kjuachón. ¹⁰ It'éní ntihi chjasintajni kjuentuéheni ch'án kjónté kánhyó sé éxí nkexrí kóxrjinhij ch'án; a ntá It'éní Dios tjentuéheni ch'án kíxin jnkójina chrók'uejóni, kíxin chrók'ónani tjóá kíxin jehe ch'án la tjóá ch'án. ¹¹ Chaxín ninkehó xikaha chrókjuchekjasóte Dios tí jeheni chrókóxrjinhijnni tí nantá chrókónhenni kíxin tí kjuatjoté. A ntá xikaha ts'itjaxínni tí kjuaxróxin éxí ijkno nkehe náxrjón kjuachani.

Tí sín tjanáá tí kjuasáyé Dios

¹² Méxrä tjisójirá tí tjárä tsíkóxrjé la ko tóch'inrá chóntahya fuerza, ¹³ la ko chrókjuyéará tí ntia ntoá. A ntá tí totárá níhi xitjahya tixinrá chrókuitóhe jína la ko chrókóníehya ínaá.

¹⁴ Chrókóxakonhanrá kíxin kjuaxróxin chrók'uejorá kaín rá, jnkójina tjóá chrók'uejorá. A ntá tí tjuáhya chrók'uejorá la xitjahya ts'ikonrá Închéni. ¹⁵ Chrókóxakonhanrá kíxin nijnkorá chrókuitóéhyará tí kjuasáyé Dios la ko nijnkorá chrók'ónahyará éxí ijkno nuëe ka tsjá chóntha veneno chrókóníexín tí so chojni. ¹⁶ Nijkno tí jahará chrókjuásinkoará jié ijkno chojni chjin ókjé, la ko chrókoniéhyará tí nkehe tjóá éxí kjuich'e ch'ín Esaú, kíxin jnkokoá comida kjuínchekjixin ch'án tí nkehe chróchóntha ch'án kíxin xjan sao jehe ch'án.† ¹⁷ Juhará ó nohará kíxin chr'éxin, tió tjinakaon ch'án kíxin chrókjuchexayaon it'é ch'án tí jehe ch'án la í xitjahya tsoyaon ch'án kíxin kohya nkexrí chrók'uixítóxín tí nkehe tsikjich'e ch'án kjónté imá chrótjánka ch'án.‡

¹⁸ A ntá jahará la jehya kóchjinára éxí kóchjina tí sín israelita tí jná jína chrótsé sín tí síchr'ákjen xrohi, tí tjen tí sítié t'inkaséyanhya la ko tí chjéhe xrínto. ¹⁹ Na ni tsíkíenhyará tí tsíntáchro trompeta, la ko tí itén Dios nixja. A ntá tí sín tsíkinhin tí tan a na mé chronòa sín kíxin í chrónixjahya ch'án ínaá,§ ²⁰ mé xikaha ichro sín kíxin tsjachahya sín sinchexiteyá sín tí nkehe k'uetoan ch'án kíxin "Tí nkexro tsinkátja tí jná mé its'en, la ixro la o chicha lanza chrók'óyánxin sín, la kjónté ijkno ko tsinkátja va tí jná la chrók'uen."* ²¹ Ijkno kjuachrakon jié tí nkehe k'uíkon sín la kjónté ch'ín Moisés tsíntáchro ch'án kíxin: "Kjaxin síxrànkana chراكوننا."†

²² A ntá jahará tsíkóchjineherá tí jná Sión, tí chjasén Dios tjechón, mé tí Jerusalén itjen nkaya nkajní, la ko nchónhya miles ángel ²³ tsíkójnkotsé sín kíxin tsochjéhe sín kjuasáyá Dios, la ko tí sín tsíkójnkotsé sín tsík'óna sín xjeen Dios saoxín tsíinxín ihnié sín nkaya nkajní. Juhará tsíkóchjineherá Dios, jehe ch'án mé Juez sinchekitqexín ch'án ijié kaín chojni, la ko tsíkóchjineherá tí nchakuen chojni jína ó tsíkjinhetjóá Dios, ²⁴ la ko tsíkóchjineherá ch'ín Jesús, jehe ch'án mé nixjaxín ch'án tí pacto nixin kíxin tí ijnié ch'án k'uítji kjuínchekjixin ch'án. A ntá antsí jína chrónkaxín tí ijnié ch'án, a ntá kánhyó tí ijnié ch'ín Abel.

²⁵ Chrókóxakonhanrá chrókuítekáonhénrá tí nkexro tjenixja. Kíxin tí sín kjuanoá Dios tió kjuínchexraxinkaon ch'án tí jehe sín ntihi chjasintajni ó la kuaáhya sín; a ntá antsí má xitjahya chrókuaáni tí chrókuitekakuenhyani tí nkexro nchexraxinkaonni kuixín nkaya nkajní. ²⁶ A ntá tí itén Dios tí yaon a kjuínchekinkí nonte. A ntá jie tsíntáchro ch'án kíxin: "A ntá ínaá jehya nonte ó sintakinkiá. Náhí. Kjaxin nkajní sintakinkiá",‡ ²⁷ A ntá tí tsíntáchro

* **12:6** Job 5.17; Proverbios 3.11-12 † **12:16** Génesis 25.29-34 ‡ **12:17** Génesis 27.30-40 § **12:19** Éxodo 19.16-22, 20.18-21 * **12:20** Éxodo 19.12-13 † **12:21** Deuteronomio 9.19 ‡ **12:26** Hageo 2.6

ch'án kíxin "ínaá" mé t'axrjexín kíxin tsjakjìn ch'án tí nkehe jína tsinkí, a ntá tsítóhe ch'án tí nkehe xitjahya tsinkí. ²⁸ A ntá tí ts'áyéheni tí kjuachaxin kjuanjon Dios la xitjahya ts'ixinkí tíha. Méxra chróchjéheni Dios kjuasáya chróxraxinkaonni ch'án chróchrakonhenni ch'án ²⁹ kíxin tí Dios kuènteni mé éxi ijnko xrohi tsjacha sinchek'itjáyan kaín nkehe. §

13

Nkexrí chrók'uejóni kíxin chrókóchéhe Dios

¹ Méxra chrókuítóéhyará chrótjuéherá kíchuárá. ² Chrók'uitjáyanhyará chrókjuánjonrá kjuachaxin chrókuitóhe ntóará tí sín tsíkjixín kjín. Mé xíkaha kjúich'e iso sín la kjónté ángel tsík'áyéhe sín la kónoehya sín.*

³ Xráxinkáonrá tí sín tjejóchjina éxi kjaxinrá chrók'uejochjinakoará tí jehe sín. Xráxinkáonrá tí sín tsík'ekon éxi kjaxin tí jahará xíkaha chrókonhanrá kjaxin.

⁴ Kaínrá chróchontehera kjuasáya tí kótehe chojni. A ntá jahará tsíkótahará la jína chrók'uejokoará kíchuárá chrótjuéhérá kíchuárá. A ntá tí sín tjinkaon tsochóntha chojni chjin ókjé la Dios sinchekjasóte sín kíxin xíkaha ich'e sín.

⁵ Kényó má chrókóxrjíhanrá itsjé chichaon. Chrókócháhará kjónté tí kánhyó tsjé chontará; kíxin tsíntáchro Dios kíxin: "Janhan na tsítoahya tí jahará la ko ts'itjáyannahya tí jahará."† ⁶ Mé xíkaha chrakonhyani tsontáchroni kíxin:

Ínchéni mé tjinkitsani,

méxra chróchrakonhyani kjónté ichréni nkehe chrókjuich'eheni chojni.‡

⁷ Chróxráxinkáonrá tí sín kjuínkitsa tí jahará kjuakohárá sín itén Dios, chrókjuenkayáxinrá nkexrí k'uejó sín ntá xíkaha chrókoyohárá sín éxi tí fe k'uéchóntha sín.

⁸ Jesucristo mé itjen ch'án ijna la ko ijie la ko jnkochríxín. ⁹ Chrókuítóéhyará chrókjuakohárá chojni ijnko nkehe ókjé chrókuinkachónkirá. Íchá jína tí asánrá chrók'uáyéhe fuerza kíxin Dios tjuahará la jehya tjetoan chrókjuinchexiteyéheni tí nkehe t'etoan nkehe sineni. Mé xíkaha tí sín kjúich'e xíkaha kjuínchexiteyá tí nkehe k'uítuenhen sín nkexrí chrókjóne sín la ninkehó kjuínkitsahya tíha.

¹⁰ A ntá jeheni chóntani í jnko altar kíxin k'uenyákonhenni Cristo la ntíha kohya kjuachaxin chrókónexín tí ncháta' kjuích'e xrä nkaxenhen ninko ósé. ¹¹ A ntá tí ncháta' t'etoan judío kjuíko sín tí ijníé ko nkaxenhen tí Cuarto Antsí Tjóá kíxin tí nkehe la tsjatséen tí ijíe sín. A ntá tí cuérpoé tí ko kjuakaxín sín ikon tí chjasin k'uejó sín. ¹² Kjaxin Ínchéni Jesús kjuasóte ch'án k'uénxin ch'án ikon chjasin kíxin tsotjuáxin kaín ijíe chojni tí ijníé ch'án. ¹³ Tsochréheni Ínchéni Jesús éxi k'uénxin ch'án ikon chjasin kjónté tsjasóteni éxi kjuasóte tí jeha ch'án kjuikosáyehya sín tí jeha ch'án. ¹⁴ A ntá ntíhi chjasintajni chóntahyani nijnko chjasénni chrók'uitjáyanhy; a ntá xritjeyáni tí chjasin itsi chr'éxín. ¹⁵ Méxra chrókuítóehyani chrókjuikosáyeheni Dios kíxin Jesucristo k'uenyákonhenni ch'án. Tí xraxinkaonni ch'án la yóhe tí ko tsík'en tsíchjéhe sín Dios. Yóhe xíkaha chrókjuanjonni kíxin ir'vani ó chrókjuikosáyexínni ch'án. ¹⁶ Chrók'uitjáyanhyará chrókjuich'erá xrä jína la ko chrókjuínkitsará kíchuárá. Tí xíkaha chrókjuich'erá la imá tóxrjínhin Dios.

¹⁷ Chrókuítékákonhénrá tí sín tjakohárá chrókjuinchexiteyéhérá tí jeha sín. Jehe sín mé t'ayakonhen sín asánrá kíxin jeha sín la ó nohe sín kíxin tsjanjon sín kuentá tí tjen Dios. Tsjínkitsará sín kíxin tsóchéhe sín sich'e sín xrä la tsónínkakonhya sín. A ntá tí chrókjuínchek'ávárá sín, ntá ninkehó tsjachahya sín tsjinkitsa sín tí jahará.

¹⁸ Nixjéhérá Dios kíxin tí jeheni kaín ni, kíxin chaxín jína kjuenkayáxinni la ko tjinkaonni kíxin jína chrók'uejóni. ¹⁹ Tjánchíá xrä ó kíxin chrónixjéhérá Dios kíxin chrókjuanjon ch'án kjuachaxin kíxin tjoka chrókjan janhan chrók'uejóni.

Tjanchia ch'án kíxin chrókóyaon sín

²⁰ Tí Dios tjanjon kjuaxróxin, mé tí nkexro kjuínchexechón Ìnchéni Jesucristo kjónté tsík'en ch'án, jehe Jesucristo mé tí Pastor tjetoan t'ayakonhen tí kolélo, la tí ijnié ch'án mé tsoxiteyáxin tí pacto sich'e xrə jnkochríxín, ²¹ jehe Dios mé tsjinkitsa tí jahará kíxin jína chrók'uejorá la ko kaín xrə jína chrókjuich'erá kixin xíkaha tjinkaon ch'án; kíxin jehe ch'án t'etueñhenni ch'án kaín nkehe nkexrí tjinkaon ch'án kíxin tí kjuachaxin chóntha Jesucristo. Mé xíkaha chjéheni Cristo kjuasáya jnkochríxín. Amén.

²² Kíchóni, xrjanóahará kíxin tóninkákonhyará kíxin tí palabra xrjanka sintaxraxinkáonrá. Méxrə ikjian tí xroon kjónté kánhyó tsjé nixja ts'ayéhérá.

²³ Chrókónohará kíxin kíchó ni Timoteo la í tjechjinahya ch'án jie. Tí tjoka tsi ch'án la tsjasánkian ch'án tí tsjasántsjahará tí jahará.

²⁴ Nixjehérá jnkójína kaín tí sín tjítaón ntja tjako la ko kaín tí sín kíchó ni tinkáchónki Dios. Tí sín tinkáchónki Ìnchéni tjejó Italia mé nixjahará sín.

²⁵ Dios sintayaonrá ch'án kaín rá. Amén. Ó tjen.

Tí xroon tsíkjin ch'ín Santiago

Tí ch'ín Santiago tsíkjin ch'án xroon ts'áyéhé kaín tí sín tsíkayéhe

¹ Janhan Santiago mé t'ahq̃ xraq̃ Dios la ko Închéni Jesucristo nixjähä kaín tí sín tsík'axrjeníxin tí teyó xjeen ch'ín Israel tsíkayéhe sátsíkji kuenté chjasintajni.

Dios mé tsjanjon tí kjuaxrexinkaon jína

² Jahará kíchó ni, chrókócháhará kjónté chrók'uats'íñkará ichréne nkehe náxrjónhya. ³ Ó nohará kíxin tí ichréne nkehe chrókónhanrá kíxin tinkachónkirá Închéni la t'ichjánxín chrókjuachará la chrókóninkákonhyará. ⁴ Chrókónohará kíxin tí chrókóninkákonhyará la tíha mé ijnko xraq̃ jína chaxín kíxin ntá jahará ijnko chojni chaxín kjuacha titekaon la í t'itjáyanhya ninkehó.

⁵ Tí jnkoyín tí jahará t'itjáyan kjuaxrexinkaon la chrókjuancheherá Dios la Dios mé chrótjáhará ch'án tíha. Jehe ch'án mé xráxín tsjanjon ch'án kaín nkehe ts'áyéhé tí chojni tjanchia la tsónínkakonhyá ch'án. ⁶ Tió chrókjuancheherá Dios nkehe la kénxín əsánrá chrókjuanchiará la chrókjöhya əsánrá ninkehó. A ntá tí chojni tjo əsén la éxi ntayaon tjiko xrinto ijnko lado la í jnko lado. ⁷ A ntá tí xíkaha itjo əsén sín la chróntáchrohya sín kíxin chrók'uáyéhé sín ichréne nkehe chrókjuanjon Închéni. ⁸ A ntá tí nkexro xíkaha tjenkayáxin ijnko nkehe ijie la í jnko nkehe ntóye la jnkokoáhya nkehe tjenkayáxin.

⁹ Tí kíchó ni tinkáchónki Cristo la kjónté nòa chóntahya itsjé nkehe chjasintajni la kjónté xíkaha chrókóchéhé kíxin tí tinkáchónki ch'án Închéni la əntsí má sínkí tíha. ¹⁰ A ntá tí nkexro rico kjónté chrók'uitjáyan tí nkehe chóna la əntsí chrókóchéhé kíxin tinkáchónki ch'án Închéni, kíxin tí nkehe chóna ch'án la kánhyó sínkí la ts'itjáyan éxi itsjo tsík'óna ka. ¹¹ Tió tsjiton yaon la tsosóa imá la tí ka tsoxámá la ko tí tsjo la ts'ánótjen la tí náxrjón tsjehe la tsjeje. Mé xíkaha tsónhen tí ch'ín rico, ts'itjáyan ntá tsítóhe ch'án tí xraq̃ k'uéchóna.

Tí nkehe tsónhen chojni

¹² Náxrjón tí nkexro tsjacha ts'atsínska tí nkehe náxrjónhya tsónhen. A ntá tí tsjacha ch'án ts'atsínska kaín tí nkehe náxrjónhya tsónhen ntá ts'áyéhé ch'án tí corona kuènte kjuachón kíxin Dios tsíntáchro ch'án kíxin tíha mé tsochjéhe ch'án tí sín tjuèhe ch'án. ¹³ A ntá jnkoyínrá tí chróntáchro əsánrá chrókjuch'erá ichréne nkehe jínahya, la chróntáchrohya kíxin Dios tsíkjanjon kjuachaxin xíkaha sich'erá kíxin Dios la tjinkakonhyá chrókjuch'e ch'án nkehe jínahya la ko tjinkakonhyá ch'án chrók'uetoan ch'án kíxin ninkexró chrókjuch'e ijnko nkehe jínahya. ¹⁴ A ntá jnkoyín chojni tí ó jehó tjenkayáixin əsén tí jínahya la mé xíkaha tsjachroe, tsjasin sín jie. ¹⁵ Mé xíkaha tí nkehe jínahya tjenkayáxin chojni mé tjixín tí jie. La mé xíkaha ts'ánki tí jie la ntá tíha ts'enxín chojni.

¹⁶ Kíchóni, chrókjuch'iýéhyará əsánrá. ¹⁷ Kaín nkehe jína ntoá t'áyéheni mé tjixín nkajní tí tjen Dios tí nkexro kjuich'eña kaín tí xrohi kuènte nkajní. Jehe ch'án mé Dios jnkochríxín la jehe ch'án mé xitjahya ts'ixitóxín. ¹⁸ Jehe ch'án kjuanjon ch'án kjuachón k'uáyéheni kíxin tí tan ntoá nixja ch'án, kíxin éxi tí nkehe senó tsík'óna, mé xíkaha tjinkaon ch'án chrók'óna tí jeheni.

Tí nkehe chaxín chrókuinkáchónkini

¹⁹ Méxraq̃ chróxráxinkáonrá tíhi jahará kíchó ni. Kaínrá chrók'uejorá chrókuinhínrá jína la tjokahya chrónixjará kíxin tjokahya chrókóninkáonrá. ²⁰ A ntá tí chojni tjoka tónínkaon la ch'ehya tí xra jína éxi tóxrjínhin Dios. ²¹ Méxraq̃ titohérá tí nkehe tjuáhya la ko tí nkehe jínahya kjuachjíngoxínhin siín nkuíxín la chrókjuchehnkehýará, chrók'uayéhérá tí itén Dios chrók'uinka nkaya əsánrá. Tí tan a mé chóna kjuachaxin kíxin chrókuaáxinrá.

²² Jehya kixin chrókuinhónrá; jahará chrókjuch'erá éxí tí nkehe tjako tí tan a. A ntá tí náhí la jahórá ch'iyehérá asánrá. ²³ A ntá tí chojni tsinhón tí tan la ntá sinchexiteyáhya la éxí ijkno chojni tsjexín xrosentá tí kon ó. ²⁴ A ntá tí k'uikon tí kon la sátsji la tuénxín k'uitjáyehen nkexrí tsjehe. ²⁵ A ntá tí nkexro k'uitjáyenhya tí nkehe kuínhin la mé tsjehe ch'án jína tí ley chaxín ntoá, mé tí nkehe chaxín tsaáxinni la titekaon ch'án jína la ich'e ch'án nkehe t'etoan tíha la ntá náxrjón tsjak'e kixin kjuínchexiteyá ch'án.

²⁶ A ntá jnkoyín nkexro tjenkayáxin kixin imá tinkáchónki ch'án Dios kjánchó tí noehya tsochjéhe freno nejen la jehó ch'iyehé asén la ninkehó sínkíhya tí nkehe tinkáchónki ch'án. ²⁷ A ntá tí nkexro tinkáchónki Dios chaxín jína la ko tjasinhyá jie nkayakon It'eni Dios la mé tíhi: mé chrókjunkitsa tí chojni nòé la ko tí chojni k'án chontahya nkehe sine sín o níhi sín, la ko chrókuasinha tí jie jinahya siín chjasintajni.

2

Jnkokón chrókjukosáyehe kichó ni

¹ Kichóni, jahará tinkáchónkirá Inchéni Jesucristo imá tjetoan la t'ichjánxín chrókjukosáyehérá kaín chojni jnkokón. ² Éxí ijkno chojni rico chrók'uixenhen tí tójkotsérá la chóntha koch'qaninko oro la ko chóntha iké náxrjón, a ntá ntiha kjaxin chrók'uixenhen ijkno chojni nòa chóntha iké ntaxin. ³ A ntá tí chrókjukosáyehérá tí chojni t'itsa ka jína la tsontácherá ch'án kixin: "Ntihí qantsí jína tjak'e." A ntá tí chojni nòa tsontácherá ch'án kixin: "Jaha la tjak'exian totá ntiha o tjak'e nonte ó." ⁴ Mé xikaha la jnkokónhya tjíkosáyehérá kíchuárá la tí nkehe jinahya tjenkayáxinrá.

⁵ Kichóni tjuáhará, tsinhínrá tíhi: Dios tsíkneyá tí sín nòa ntihi chjasintajni kixin qantsí má tsinkáchónki sín tí jehe ch'án kixin ts'ayéhé sín tí kjuachaxin kuente ch'án éxí tsíntáchro ch'án tsochjéhe ch'án tí sín tjuéhe ch'án. ⁶ A ntá jahará mé tjíkosáyehyrá tí sín nòa. A ntá tí sín rico mé tjíkosáyehérá. ¿Á jehya tí sín rico tjanchia sín jie sájtiko sín tí jahará nkayakon tí sín t'etoan ní? ⁷ ¿La á jehya jehe sín t'ántaxínhin sín tí ihnié Cristo tjíkosáyeheni?

⁸ A ntá jahará la jína tjejoch'erá tí nchexiteyárá éxí t'etoan tí ley éxí nixja tí xroon itén Dios kixin: "Chrótjuéherá kíchuárá éxí tjuéxíná asánrá". ⁹ A ntá tí jnkokónhya tjíkosáyehyrá chojni la ntá xikaha la tjásirá jie la nchexiteyéhyará éxí tí nixja tí ley kuente Dios. ¹⁰ A ntá ijkno nkexro titekaon kaín tí ley la ntá kjuínchexiteyáhya jnkokoá tí nkehe tjetoan la mé tí xikaha la kjuínchexiteyéhya kaín tí nkehe t'etoan tí ley. ¹¹ Ntá Dios tsíntáchro kixin: "Chrókuákjahyará í jnko chojni chjin ókjé", la kjaxin tsíntáchro ch'án kixin: "T'oyánhyará kíchuárá." A ntá tí nkexro kuákjahyá í jnko chojni chjin ókjé kjánchó kjuáya la kjuínchexiteyéhya tí nkehe t'etoan tí ley. ¹² A ntá jahará chrónixjará la ko chrókjunkexiteyárá kixin chrókuanchiahya jie tí ley sinchekaáni. ¹³ A ntá tí nkexro kuíkonóehya í jnko chojni la kjaxin tsíkonóehya Dios tí jehe. A ntá tí nkexro kuíkonóehya kichó la mé xikaha tsáxin ch'án tí yaon tsjixixín tsitoexín jie.

Tífe ch'ehya xra la tsík'en

¹⁴ Kichóni, ¿nkehe tsónhen ntáchrórá kixin chontará fe a ntá ninkehó nkehe jína tjákoxínhyará? ¿Á ntáchrórá kixin xikahó chrokuaáxinrá? ¹⁵ Éxí ijkno kichó ni ntoa o kichó ni chjin chontahya iké o chontahya nkehe sine sín t'ichjánxín sín jnkoyín yaon. ¹⁶ Ntá jnkoyín tí jahará tsontácherá sín kixin: "Sátjia jnkoyína la ko ts'itsa ká la ko sinte jína." A ntá tí kjuánjonhyará tí nkehe t'ichjánxín sín la cuerpoé sín la sínkíhya tí nkehe ntáchrórá. ¹⁷ La mé xikaha tónhen tí fe la tí tjákoxínhyará ninkehó nkehe jína kjuich'erá la éxí nkehe tsík'en tí ntáchrórá.

¹⁸ A ntá jnkoyín chojni tsontáchro kixin: "Jaha chonta fe a ntá janhan it'a tí xra jína." Tí xikaha la jaha tjákoxian tí fe kjónté kohya xra la janhan tsjákoxian tí fe la ko tí xra jína tjét'a. ¹⁹ Jaha títekávan kixin jnkokoá Dios itjen la chaxín jína xikaha, kjánchó kjaxin tí jinahya titekaon tíha la ko síxrànká chrakon. ²⁰ T'ónahyará lonti. Jahará la nohará kixin tí

fe ch'ehya xra la chónkó tíha. ²¹ Dios kóxrjíñjin tí nkehe chrókjuch'e ch'ín Abraham, tí nkexro k'uaxrjeníxinni ósé, tió chrók'óyán ch'án tí xjeen ch'án Isaac la chrókjuanjon ch'án chrók'uáyéhë Dios. ²² Chrókónohará kíxin tí fe k'úechóntha ch'ín Abraham la kjuakoxin ch'án tí xra kjuich'e ch'án la ntá xikaha kjuakoxin ch'án kíxin antsí má kuinkáchónki ch'án Dios. ²³ Mé xikaha xiteyá éxí ntáchro xroon itén Dios kíxin: "Abraham kuítekaon Dios la ntá Dios ntáchro kíxin jína ch'án", la ntá Dios kjuinchech'in ch'án amigo kuènte ch'án.

²⁴ Chrókónohará jahará kíxin Dios la t'áyéhë ch'án chojni la nchetjóá ch'án kíxin tí xra jína ch'e sín la jehya kíxin jehó chrókuinkáchónki sín ch'án. ²⁵ Mé kjaxin xikaha kónhen tí tjan Rahab, tí tjan k'úechóntha nchónhya chojni ntoa. Jehe tjan kjuanjon tjan kjuachaxin kuitohe ntoe tjan tí sín kjuitsjehe chjasén tjan la ko kjuinkitsa tjan sákjuixin sín ókjé ntia, a ntá Dios la kóxrjíñjin tí nkehe kjuich'e tjan. ²⁶ Éxí tí cuerpoé chojni chontahya nchakuen la tsík'en la kjaxin xikaha tí fe la tsík'en tí ninkehó tjakoxinhya tí nkehe jína chrókjuch'e sín.

3

Tí kjuachaxin chóntha nejen chojni

¹ Kíchóni, chrók'ónahya tí jahará nchónhya maestro kíxin tí ntoáhya chrókjuàkorá la tíha mé chrókjuasótiaxínrá imá. ² Kaínni chóntani jie, a ntá tí nkexro ninkehó jie ntáchrohya la ijnko chojni jína tíha la ó tsjacha ch'án ts'etueñhen ch'án kuenté tí cuerpo kuènte ch'án. ³ Éxí tí kokate tsochóntha chica freno tí ir'va va kíxin tsitekaon va la sátsjiko tí ìnché va la tsjacha ch'án ts'etueñhen kuenté tí cuerpo kuènte va. ⁴ Tjenkayáxinrá kjaxin nkexrí tjejó tí ntabárco kjónté imá jíe la tsjacha tí xrínto chjéhe tjan sátsjiko, la ntá tí ch'ín tjiko la kjónté ijnko nta ntsí la tsjacha ch'án sátsjikoxín ch'án tí tjinkaon ch'án sátsjiko ch'án. ⁵ Mé xikaha tí ir'va chojni. Kjónté ijnko nkehe imá ntsí kuènte tí cuerpo kjánchó nchónhya nkehe jínahya ntáchro éxí ijnko xrohi ntsí la tsjacha tsochéxin kuenté ijnko jna jíe. ⁶ Mé xikaha tí ir'vani la éxí ijnko xrohi kíxin nchónhya jíe t'axrjexín la éxí ijnko veneno ncheníhi cuerpo mé xikaha mé tsjasixín kuenté cuerpoé chojni jíe. La tí kjuachaxin kuènte ir'vani la mé tjixin tí infierno la tíha mé tjixin tí ts'itjáyanxínni. ⁷ Tí chojni la tsjacha sinchesáncho kaín ko jiehe la ko tí ko xritjaká la ko tí konche la ko tí ko sínkankí ntayaon la mé xikaha kjuacha sín nchesáncho sín va. ⁸ A ntá tí ir'va chojni la kohya nijnko chojni tsjacha sinchesáncho. Tíha mé jínahya la xitjahya tsosáncho. Tíha mé éxí ijnko nkehe chóntha nchónhya veneno ts'enxín chojni. ⁹ Tí ir'vani la kjaxin tjikosáyexinni It'éni Dios la tíha kjaxin t'ántaxíñxinni chojni tsíkjich'eña Dios éxí tsjehe tí jehe ch'án. ¹⁰ Kjaxin tí ir'vani t'axrjexín tí nkehe itsjeni kuènte Dios la kjaxin tíha t'ántaxíñxinni. Kíchóni, xikahya chrókjuch'erá. ¹¹ Jnkokoá tòye xitjahya ts'axrje ntá xé la ko kjaxin ntá tsjá. ¹² Kíchóni, ¿á jína tí nta higuera chrók'óna to aceituna o tí nta to uva chrók'óna to higo? Kjaxin xitjahya ijnko tòye chrók'uaxrje ntá xíjnta la ko ntiha kjaxin chrók'uaxrje ntá xé.

Tí kjuaxrexinkaon jína

¹³ Tí tjen jnkojín nkexro tí tjejorá nohe jína la ko tienxín la chrókjuakoxin ch'án jnkójina la ko chrókjuchehnkexinhya ch'án tí nkehe imá nohe ch'án. ¹⁴ A ntá tí jahará chóntha kjuachjinoxínhin asánrá la tjinkáonrá jahórá chrókuétoanrá. A ntá tí xikaha la chrókjuinchehnkexínhyará tí nkehe nohará kíxin tí xikaha la ch'iyará la tjinkákonhyará chróchronkará tí nkehe chaxín ntoá. ¹⁵ A ntá tí xikaha sinchehnkerá la jehya tí kjuaxrexinkaon kuijin tí tjen Dios. Tí xikaha la kjuachaxin kuènte chojni chjasintajni ó la ko kuènte ch'ín Tsochren. ¹⁶ A ntá tí xikaha siín kjuachjinoxínhin la ko tjinkaon chojni jehó chrók'uetoan la ntá xitjahya tsónhen xra yóxin kíxin xikaha siín nkehe jínahya. ¹⁷ A ntá tí siín kjuaxrexinkaon jína tsíkixín tí tjen Dios la sáoxín tjejó chojni jína la ko kjaxin kjuaxróxin tjejó sín la ko náxrjón tjejó sín la ko jnkójina nixjehé kichó sín la ko kjaxin

tikonóehé kíchó sín la ko tí xrä jína tjejoch'e sín la tí nkehe ntoá nixja sín. ¹⁸ Tí nkexro tjetá tí kjuaxróxin xíkaha chrók'uénka sín kjuaxróxin la ko xíkaha chrótjá sín tí nkehe jína.

4

Tí tjanjonxin chojni

¹ ¿Nketí tjixin tí guerra la ko tí kjuaníkaon tjanjonkoaxínrá kíchuárá? Táha la mé jahórá t'axrjeníxirá kaín tí kjuaníkaon a. ² Jahará tjinkáonrá tsocontará ichré nkehe ntá chontahyará ntá tónínkáonrá t'oyánrá kíchuárá. Tóchjinoxíñhanrá kíxin tsjachahyará sincheyóherá í so chojni ntá tónínkáonrá. Jahará ts'ayéhyará tí nkehe tjinkáonrá kíxin tjanchehyará Dios. ³ La tí tjanchiará la ts'ayéhyará kíxin ntoáhya kjuanchiará kíxin tjinkáonrá chrókuicháxíñhanrá ó la chrókjuinchehnkexínrá. ⁴ Jahará chojni titekakonhya Dios. ¿Á noahyará tí jahará kíxin tí imá tsotjuèhérá chjasintajni la ntá tsoninkákonhénrá Dios? A ntá tí jnkojínrá tjinkáonrá tsotjuèhérá chjasintajni la tsokjanrá tsoninkákonhénrá Dios. ⁵ ¿Á tjenkayáxinrá kíxin ti nkehe ntáchro xroon itén Dios la á chónkó? Ntáchro xíkihi: "Tí Nchákuén Dios kjuanjon ch'án k'uayéhérá la tjuahará ch'án la tsoníkaon tí tsítóhérá ch'án." Mé xíkaha ichro Dios. ⁶ Kíxin Dios la imá tjinkitsani ch'án, méxrä ntáchro xroon itén Dios kíxin: "Dios la nínkakonhen tí chojni nchehnke a ntá tjinkitsa ch'án tí chojni nchehnkehya."* ⁷ Méxrä chrókjuinchehnkehýará. Íchá jína chrókuítekáonrá Dios la chrókjuánjonhyará kjuachaxin tí jínahya chrók'uetuñhanrá ntá chrók'uikon tí jínahya kíxin chrók'uetuñhya ntá sáchrókjui. ⁸ Chrókóchjineherá Dios, la tí jehe ch'án kjaxin tsocchjinahará ch'án. Jahará chojni chóntha jie la chrókjonemárá tjárá. Chrókjuinchehetjóará asánrá kíxin chrótjuéhérá Dios la kánhyó chrótjuéhérá chjasintajni. ⁹ Chrók'uavárá la ko chrótsjankará. Chrókjuínkíra tí tjanorá la chrótsjankará la chrókjuínkí tí cháhárá la chrók'uavárá. ¹⁰ Chrókjuinchehnkehýará chróxráxinkáonrá Inchéni a ntá jehe ch'án chrókjuínkitsa ch'án antsí chrókónohará.

Chrók'uántaxíenhyani kíchó ni

¹¹ Kíchóni, chrók'uántaxíenhyará kíchuárá. A ntá tí nkexro t'ántaxíñhín ijkno kíchó la ntá jehe ch'án t'ántaxíñhín ch'án tí ley, la t'eka jie tí ley. A ntá tí t'eka ch'án jie tí ley la mé t'óna juez chrinkí chrókuítekaon tí ley. ¹² Kíxin jnkokoá nkexro kjuanjon tí ley la tí nkexro a mé tí juez la jehe ch'án sinchekaá ch'án chojni la ko sinchekjasóte ch'án chojni. ¿A ntá nkexro tí jaha kíxin chrókjuanchéhé jie tí kíchuá?

Ínoehyani nkehe tsonhen ntóye

¹³ A ntá jie jahará chrókuinhínrá tíhi kíxin tsíntáchrórá kíxin: "Ijie o ntóye sáchrókjuini ijkno chjasin la ntiha chrók'uejóni ijkno nánó chrókjuinchekjini nkehe chrókjuachani chichaon." ¹⁴ A ntá jahará noahyará nkehe tsonhen ntóye kíxin tí tjejóchónni la éxi ijkno tjuí nonte ts'ikoni a ntá tuénxín ts'itjáyan. ¹⁵ Íchá jína chróntáchrórá kíxin: "Tí tjinkaon Inchéni la naxa chrók'uejóchónni la chrókjuich'eni tíhi o tíha." ¹⁶ A ntá jahará tí nixjará la imá iñkerá la kaín tí kjuahnke la mé jínahya. ¹⁷ A ntá tí nkexro nohe chrókjuich'e tí nkehe jína la ntá ch'ehya xíkaha la mé antsí tjasin jie.

5

Tí nkehe chrókuinhin tí sín rico

¹ Jahará rícorá chrókuinhínrá tíhi. Chrótsjankará la ko chrók'uýatorá kíxin tí nkehe tsonhanrá tsjasótiará. ² Tí nkehe rícoxínrá la ó tsíkótje la ko tí ka chontará la ó tsík'in kué. ³ Tí oro la ko tí plata chontará ó tsíkóchjisen. Tíha mé tjakoxín kíxin nkexri tsonhen ntoará tsoche. ¿Nkehe tsonhen kjuásintonrá nkehe kíxin ó tsi tí yaon tsjixixín? ⁴ A ntá

* ^{4:6} Proverbios 3:34

tí nkehe chrókuacha tí sín kjuít'ahará xra la kjuénkehýará sín la ntá tjanchia sín jie tí jahará la t'èya sín, ntá Ìnchéni imá t'etoan mé kuínhin kíxín xíkaha ichro tí sín kjuich'e xra. ⁵ A ntá ntihi chjasintajni la náxrjón tjejorá la kaín nkehe tóxrjíñhanrá ch'erá la exí iko imá jína ine la tsíkotsànká la ntá itsji yaon ntá its'en la mé xíkaha tsónhanrá. ⁶ Kíxín jahará la kjuincheckjasóterá la k'oyánrá chojni ninkehó jie chóntahya kjónté kohya nkehe kjuít'ahará sín.

Chrókóníkakonhyani chróchónhenni la chrónixjeheni Dios

⁷ Méxra kichó ni, chrókóninkákakonhyará chróchonhénrā tsokjanjian Ìnchéni. Exí tí ch'in ch'e xra nontee chónhen xrakoa chrin senó la ko tí chrin tsjixixín ntá tsotjá ch'án tí nkehe náxrjón k'óna. ⁸ Mé xíkaha jahará la kjaxin chrókóninkákakonhyará chróchonhénrā chrókóxrjéhyará kíxín tí yaon itsi Ìnchéni la ó chjina tsi. ⁹ Kichóni, chrókoninkákuenhyará kíchuárá kíxín ntá chrókuanchahya Dios jie tí jahará kíxín Dios la mé tí juez la ó tjen ch'án tí ntója puerta. ¹⁰ Kichóni, chrókuanklhírá exí tí sín k'uéchrónka itén Dios k'uéchrónkaxín sín kjuachaxin ihnié Ìnchéni. Jehe sín kjónté kjuasóte sín la kónínkakonhyá sín. ¹¹ A ntá jeheni ntáchroni kíxín kóchéhé tí sín a kjónté kjuasóte sin la kjuacha sín. Jahará la ó kuinhínrá kíxín nkexrí kónhen ch'ín Job. Ó nohará kíxín Ìnchéni kjuinkitsa ch'án hasta kjuixixín kíxín Ìnchéni la imá jína ch'án la kuikónóhe ch'án tí ch'ín a.

¹² A ntá kichó ni, chrókuakjénxínhýará ihnié Dios tjen nkaya nkajní la ko ni chjasintajni la nijnko nkexro chrók'uakjénxínhýará. Tí chróntáchrórá chaxín la chaxín la tí náhí la náhí kíxín Dios la chrókjuinchekjasótiahýará.

¹³ A ntá jnkojín tí jahará náxrjónhya tjejorá la chrónixjehérá Dios, a ntá jnkojínrá náxrjón tjejorá la chrótsjerá kuénte Dios. ¹⁴ A ntá tí jnkojín nkexro níhi la chrók'uíyéhe sín tí sín tada t'etoan kuénte níjko kíxín ntá chrónixjehé sín Dios kíxín tí sinníhi la ko chróchjéhe sín aceite tí sín a kjuachaxín ihnié Ìnchéni. ¹⁵ Chrónixjehérá Dios kaín əsánrá kíxín tí sinníhi chrókuítge jína la ntá Ìnchéni chrókuinkitsa sín, a ntá ichréne jie kjuasin sín la jehe ch'án sincheck'itjáyan tíha. ¹⁶ Méxra chróchenkará kíchuárá tí jie chontará la ko chrónixjehérá Dios kíxín chrókuitohará jína. Tí nixjehé Dios ijnko chojni jína tinkáchónki Ìnchéni la chóntha nchónhya kjuachaxin tíha. ¹⁷ Tí ch'ín Elías, tí nkexro k'uéchrónka itén Dios, mé ijnko chojni exí tí jeheni la jehe ch'án kjuanchehe ch'án Dios kaín əsén ch'án kíxín ts'aniáhya chrin la ntá k'uániáhya chrin chjasintajni iní nánó ko t'o. ¹⁸ A ntá chr'éxín kjuanchehe ch'án Dios kíxín ts'aniá chrin la ntá k'uániá chrin ínaá chjasintajni la jína k'óna tí nkehe k'uénka sín.

¹⁹ Kichóni, tí jnkojín chojni chrókuichroe chrókuítge tí nkehe ntoá la í jnko nkexro chrókuinkitsa kíxín chrókjan tí nkexro a ²⁰ la chrókónohará tí jahará kíxín jnkojín chojni tjinkitsa ijnko nkexro chóntha jie tsokjanxin tí ntia jínahya k'uék'aji ch'án la ntá ó kjuinkitsa kíxín tsaáxin əsén tí ch'ín a kíxín ts'itjáyanhya ch'án la ntá chrók'uitjáyan tí nchónhya jie k'uéchóntha ch'án. Ó tjen.

Tí xroon saoxín tsíkjin ch'ín Pedro

Ch'ín Pedro ikjin ch'án xroon chr'énen ch'án tí sín tinkáchonki Inchéni tjejó ókjé

¹ Janhan Pedro, mé kjueyána Jesucristo t'ahq ch'án xrä mé ikjian tí xroon chr'anhnára jahará sátsíkjurá ókjé chjasin tjejorá, mé tjejorá estado Ponto, la ko Galacia, la ko Capadocia, la ko Asia, la ko Bitinia. ² Kjueyára It'éni Dios kíxin jehe ch'án tsíkjenkayáxin ch'án ósé xíkaha. Kótjuáxinrá Nchakuen ch'án kíxin chrókuítækáonrá ch'án la ko kótjuáxinrá ijníe Jesucristo. Kjuasáyé ch'án chrókjuintayaonrá ch'án kíxin antsí chrókuákjárá tí kjuaxróxin kuente ch'án.

Tjejóchónhenni kíxin jehe ch'án sinchekaáni ch'án

³ Tjancheheni kjuasáyé Dios mé It'é Inchéni Jesucristo kíxin kjuasáyé jehe ch'án kuikónóhenni ch'án kíxin éxi kokjílexínni níxin kíxin xechón Jesucristo. Mé xíkaha tjejóchónhenni sinchekaáni ch'án. ⁴ Mé xíkaha ts'ayéhérá jahará tí nkehe tsjanjon Dios chóntha ch'án nkaya nkajní mé ijkno nkehe chónhya ts'itjáyan, la ko chónhya tsokjita, la ko chónhya tsoxámá. ⁵ Dios mé t'ayakuanxínrá ch'án tí kjuachaxin kuente ch'án kíxin jahará tinkachónkirá ch'án kíxin ntá tsjacha tsaárá éxi tsíkjenkayáxin ch'án ósé mé tjinkaon ch'án kíxin chrókuaárá tí tsjixixín tsjeje chjasintajni.

⁶ Méxra xíkaha chrókocháhará kjónté ichréne nkehe chrókónhanrá iso yaon kíxin jehí t'ichjánxín xíkaha itsjé nkehe chrókónhanrá. ⁷ Méxra tí tinkachónkirá Inchéni la t'ichjánxín tsjachará nchónhya nkehe chrókónhanrá éxi yóhe chica oro xíkaha t'ichjánxín ts'atsínka tí siín xrohi tsotsjexín sín á chaxín jína kohya nkehe tsónhen. A ntá antsí má sínkí tí tinkachónkirá Inchéni a ntá tí chica oro la kénhyó sínkí kíxin tí chica oro la chóxin tsjeje. Mé xíkaha tí tinkachónkirá Inchéni t'ichjánxín xíkaha tsonhanrá kíxin tsontáchro Dios kíxin jína kjuachará ntá ts'ayéhérá kjuachaxin tió tsi Jesucristo.

⁸ Jahará tjuéhérá Jesucristo kjónté k'uíkonhyará ch'án. Ijie tinkachónkirá ch'án kjónté t'ikónhyará ch'án la ko tócháhará ijkno kjuachéhé imá jié kohya nkehe sincheyóhenni kíxin imá náxrjón tíha. ⁹ Mé xíkaha k'uitjará nkexrí tsaáxin əsánrá. Tíha mé tí nkehe tjejochonhénrá tinkachónkirá.

¹⁰ Mé xíkaha tí sín profeta tsíki ósé la kjueyá sín nkexrí chrókuaáxin chojni la ko k'uéchrónkaxín sín tí nkehe kjuasáyé Dios chrókjuanjon ch'án chrók'uayéhérá tí jahará. ¹¹ Nchakuen Cristo kjuínchenohe tí sín k'uéchrónka itén Dios kíxin Cristo tsjasóte la ko chr'éxín ts'ayéhérá ch'án tí kjuachaxin jié. A ntá tí sín k'uéchrónka mé tjinkaon chrókonohe sín nkexro tíha la ko nkesá tsónhen tí nkehe chrónkaxín Nchakuan Inchéni. ¹² Kjánchó Dios kjuínchenohe tí jehe sín kíxin tí nkehe chrónka sín jehya kíxin tjoka chróxitayá tí k'uéjó sín. Náhí. Hasta tí tjejóni jie mé ó xiteyá tíha. Tí nkehe chrónka sín la mé yóhe tí nkehe kuínhínrá, mé tí tan tsaáxinni k'uéchrónkaxín tí sín kjuakohará kíxin tí kjuachaxin Nchakuen Dios kuijxín nkaya nkajní mé kjuinkitsa tí jehe sín. Kjáxin tí sín ángel tjinkaon sín chrók'uinkon sín nkexrí tíha.

Dios k'uíyéhérá ch'án tí jeheni kíxin tjóá chrók'uejóni

¹³ Méxra chrókjuenkayáxinrá jína nkehe chrókjuich'erá kíxin chrók'uejorá jnkójína. Kaín əsánrá chrók'uejochonhénrá kíxin tí nkehe sintakitonhanrá Dios tió tsi Inchéni Jesucristo.

¹⁴ Éxi ijkno xjan titekaon mé xíkaha jnkójína chrók'uejorá jahará, chrókjuenkayáxinhyará éxi k'uékjenkayáxinrá senó naxq k'uéchonhyará Dios. ¹⁵ Náhí. Jnkójína tjóá chrók'uejorá kíxin Dios k'uíyáhará la mé jína ch'án la ko tjóá ch'án. ¹⁶ Kíxin ntáchro xroon itén Dios kíxin: "Jahará chrók'uejorá tjóá kíxin janhan na mé ijkno nkexro tjóá."*

* ^{1:16} Levítico 11.44

¹⁷ Tí ntáchrórá jahará kíxín It'árá mé Dios la ko ó nohará kíxín jehe ch'án sinchekitoexín ch'án ijíé jnkojnko chojni, kíxín t'ikon kíxín jnkokón sínkí jnkojnko chojni, a ntá jahará chróxráxinkáonrá ch'án jnkochríxín tí naxq̄ tjejochónrá ntihi chjasintajni. ¹⁸ Dios mé kjuíntakaárá ch'án kíxín chrók'uejohyará éxí k'uék'ejó tí sín tsík'axrjeníxinxínrá. Jahará ó nohará jína kíxín tí nkehe k'uínáxinxínrá tsaáxinrá jehya ijkno nkehe chrókjuejé éxí chica oro o chica plata. ¹⁹ Náhí. Ná mé k'uínáxinxínrá ijníé Jesucristo imá tjete. Jehe ch'án mé k'óyán sín la k'uáyéhé Dios éxí ijkno kolélo ninkehó xéhya va. ²⁰ Kíxín Cristo mé ósé tsíkónoxín ch'án tí naxq̄ k'ónahya chjasintajni. Kjánchó jehya tuénxín kónhen tíha hasta tí chr'éxín ntá kónoxín ch'án kíxín jína chrók'uejoxinxínrá tí jahará. ²¹ Ntá xíkaha kónhen Cristo a ntá jie jahará la kuítekáonrá Dios, mé tí nkexro kjuínchexechón Cristo la ko kjuikosáyeh ch'án. Mé xíkaha jahará tinkachónkirá Dios la ko tjejochonhérá sintakaárá ch'án.

²² A ntá jie ó kuítekáonrá tí tan chaxín ntoá kíxín tjinkitsará Nchákuén Dios. Tíha mé kótjuáxin asánrá kíxín ntá tsotjuéhérá kíchuárá. Mé xíkaha chrótjuéhérá kíchuárá kaín asánrá. ²³ Méxra jahará kokjíhará níxín, jehya kíxín naxq̄ chrók'uaxrjeníxinxínrá it'árá chjasintajni ntihó ts'itjáyan. Náhí. Kokjáxinxínrá itén Dios itjen jnkochríxín. ²⁴ Kíxín ntáchro xroon itén Dios kíxín:

Kaín chojni chjasintajni tóyóhé kayoa ó,
a ntá tí kjuachaxin chóntha la tóyóhé itsjo t'óna kayoa.
Tí ka la tsoxámá a ntá tí tsjo la ts'anótjen
²⁵ a ntá tí tan kuénte Ínchéni la tsjak'e jnkochríxín.†
Tí tan í mé tsaáxinni la kuinhínrá tí jahará.

2

¹ Méxra titohérá kaín nkehe jínahya, la ko kaín kjuach'ia, la ko tí ntoáhya tjenkayáxinxínrá, la ko tí kjuachjinoxínhin, la ko tí xrikoará kaín xín kjuach'ia. ² Chrók'uejorá éxí chánjan na ntá tsíkokjíhi la itsjen ó chrók'ui, mé xíkaha jahará chrókjueyárá itén Dios, tíha mé chrókónohará la chrók'uánkíxín kjuaxrexinkaon kuéntará kíxín chrókuaáxinxínrá, ³ tí chaxín kjuátsanrá kíxín Ínchéni la jína.

Cristo mé tí xro tjechón

⁴ Chrókóchjineherá Ínchéni, mé jehe ch'án me éxí tí xro tjechón. A ntá tí chojni la kuítekakonhya tí xro a, a ntá Dios la kjueyá ch'án tí xro a imá tjete sínkí. ⁵ Mé xíkaha Dios kjuich'énará tí jahará éxí xro tjechón la Dios chrókjuechón ch'án tí jahará jnkokoá níjiko kuénte ch'án, la mé ts'ónará ncháñt'á tsíkjinchetjóá Dios, a ntá chróchjehérá ch'án tí nkehe tóxrjínhin ch'án kíxín tinkachónkirá Jesucristo. ⁶ Mé xíkaha kjaxin xroon itén Dios ntáchro kíxín:

Tsjaké chjasin Jerusalén ijkno xro t'etoan ts'óna nchia, ijkno xro tsíkónoxín imá tjete sínkí a ntá tí sín tsitekaon tí jehe ch'án mé tsosuèhya sín.*

⁷ A ntá jahará titékáonrá tí xro kíxín imá tjete. A ntá tí sín kuítekakonhya, la mé tsoxiteyá éxí ntáchro xroon itén Dios kíxín:

Tí xro náxrjónhya kuítuenta tí sín ch'éna tjet'ó,
mé ijie mé k'óna tí xro tjetean.†

⁸ La ko kjaxin tsoxiteyá tí nkehe ntáchro xroon itén Dios kíxín:

Tí xro mé tsóténkíxín sín la mé tíha ijkno tjo tsjitsínkaxín sín.‡

Kjánchó jehe sín kóténkíxín sín tí xro kíxín kuítekakonhya sín tí itén Dios mé xráxín tsíkitoenxín sín xíkaha tsónhen sín.

Tí sín tinkáchónki Dios

⁹ A ntá jahará tsík'axrjeníxinxínrá tí sín tsíkjeyá Dios la ko tsík'ónará ncháñt'á ch'ehlerá xra tí rey, la ko tsík'ónará ijkno nación tjoá, la ko tsík'ónará ijkno chjasin kuénte Dios kíxín ntá

† 1:25 1.24-25 Isaías 40.6-8 * 2:6 Isaías 28.16 † 2:7 Salmo 118.22 ‡ 2:8 Isaías 8.14

tsochronkará tí xra náxrjón kuènte Dios. K'uíyáhará ch'án kíxin ts'axrjéxínrá tí sítie ntá ts'ixenhenrá tí siín xrohi náxrjón t'inkaséyan kuènte ch'án. ¹⁰ A ntá jahará tí ósé la jehya chjasén Dios, a ntá jie la tsík'ónará chjasén ch'án. Tí ósé la Dios k'uékikonóahyará. A ntá jie la kuijkonóahará Dios.

Chrók'uejóni ch'eheni xra Dios

¹¹ Kíchóni, xrjanóahará tí jahará kíxin éxí chojni tsíkjixin ókjé chrók'uejorá ntihí chjasintajni chrókjuánjonhyará kjuachaxin chrókóxrjíñin asánrá tí nkehe siín chjasintajni, mé tí nkehe tjanjonko asánrá. ¹² Jína chrók'uejorá tí siín tí sín chónhya Dios kíxin kjónté t'ántaxíñhanrá sín éxí chojni jínahya chóntha jie tí jahará, ichro sín, la ntá tí chrók'uikon sín kíxin jína tjejoch'erá xra ntá tsjanchehe sín Dios kjuasáya tsjixraká tí yaon tsjanchia ch'án nkehe tí xra kjuich'erá.

¹³ Jahará tinkachónkirá Ínchéni chrókjuinchexiteyéhérá kaín tí sín t'etoan kuènte chjasintajni, á tí ch'ín rey kíxin imá t'etoan ch'án, ¹⁴ o á tí ch'ín gobernador ichr'án Dios kíxin sinchekjasóte ch'án tí sín tjasin jie, a ntá tsjikosáyehe ch'án tí sín ch'e tí nkehe jína. ¹⁵ Dios tjinkaon kíxin jína chrók'uejorá kíxin tí sín noehya la ko tí sín lontj la kohya jie ts'ekará sín tí jahará.

¹⁶ Chrók'uejorá éxí chojni t'ítuenhya, a ntá tí kjuachaxin chontará jehya kíxin chróchontaxínrá kjuachaxin kíxin chrókjuich'erá tí jínahya. Náhí. Chrókjuákoxinrá éxí chojni ch'ehe Dios xra. ¹⁷ Chrókjuíkosáyehérá kaín chojni. Chrótjuéhérá tí sín kíchó ni, la ko chróchonteherá Dios kjuasáya, la ko chrókjuíkosáyehérá tí ch'ín gobierno t'etoan.

Tóyóexin éxí tí nkehe kjuasótexín Cristo

¹⁸ Jahará chojni ch'exón xra, chrókjuinchexiteyéhérá tí lámoárá, chróchontehérá kjuasáyé sín, kjónté tí sín jína la o tí sín jínahya. ¹⁹ Tíha mé ijkno nkehe jína chrókjuákoxinrá kjónté chrókjuasótiaxínrá ijkno nkehe jínahya kíxin xíkaha mé chrókjuinchexiteyéhérá Dios. ²⁰ A ntá tí tjejoch'erá ichrén nkehe jínahya, ntá nchekjasótiaxínrá sín la ¿nkehe tsonhen kíxin chrókóninkákonhyará? A ntá tí chrókjuasótiaxínrá ijkno nkehe jína la ntá chrókjuachará chrókóninkákonhyará, la tíha mé tóxrjíñin Dios. ²¹ Méxra xíkaha k'uíyáhárá Dios kíxin Cristo kjuasóteyákonhánrá. Tíha mé kjuakoxin ch'án kíxin mé xíkaha chrókjuich'erá. ²² Kíxin Cristo la ninkehó jie kjuasinha ch'án la ko ninkexró kjuich'iyehya ch'án, ²³ la ko ninkehó kjuáteehya ch'án tió k'uántaxíñin sín ch'án; a ntá tió kjuínchekjasóte sín ch'án la ninkehó k'ókjánxíñhya ch'án. Náhí. Jehe ch'án kjuanchia ch'án kíxin Dios ts'ayakonhen tí jehe ch'án kíxin Dios mé ntoá nchekitoexín ijíé chojni. ²⁴ Cristo mé kuamá ch'án tí ijíéni kíxin tí cuérpoé ch'án kjuák'enkáni ntacruz kíxin éxí tsík'enni k'uék'ejóni kíxin tí jie k'uéchontani, a ntá jie chrók'uejóni jnkójina. Kíxin Cristo kjuasóte ch'án, chrít'o ch'án kíxin jahará chrókuitqaxínrá jína. ²⁵ A ntá jahará k'uék'ejorá éxí kolélo tsíkjichroe. A ntá jie k'uitjará tí nkexro ts'ayakonhen asánrá.

3

Nkexrí chrók'uejó tí sín tsíkótehe

¹ Kjáxin jahará chojni chjin ó tsíkótahará chrókuítekákonhénrá tí xílyará, kíxin kjáxin jnkójin tí sín titekakonhya itén Dios chrókuitekaon sín kíxin jína tjen tí tjachjin, kjónté t'ichjánxíñhya chróchrónka tjan kíxin jína tjen tjan, ² kíxin chrók'uikon sín xíkaha kíxin jína tjen tí tjachjin chóntha kjuasáyé tjan. ³ Chrókjuinchehnkexinhýará nkehe náxrjón chróchontará la ko tí nkehe náxrjón chróchóntha kaxíhará la ko nkehe náxrjón tsík'óna chica oro la ko tí ikárá imá náxrjón. ⁴ Náhí. Chrókjuinchejínará asánrá, kíxin tí nkehe náxrjón chrók'uitjáyanhya na mé tí asén chojni tójiehýa la ko náxrjón. Tíha mé imá sínkí nkayakon Dios. ⁵ A ntá tí ósé xíkaha k'uékjenkayáxin tí chojni chjin jína. Jehe sín mé kuinkáchónki sín Dios la ko kjuínchexiteyéhé sín xíi sín. ⁶ Mé xíkaha kjuich'e tjan Sara kjuínchexiteyéhé tjan tí ch'ín Abraham, mé kjáxin ntáchro tjan kíxin ñché tjan tí jehe ch'án.

A ntá tí jahará tí xjeen tí jehe tjan la chrókjuinchexiteyará jína la ko ninkehó kjuachrakon chróchontahyará.

⁷ Kjáxin jahará chojni ntoará tsíkótahará chróchontehérá ichjiánrá kjuasáya kíxin ó nohará kíxin kánhyó tsehe tjan la ko ó nohará kíxin yóírá tjáhará Dios tí kjuachón. Xíkaha chrókjuich'erá ntá tió chrónixjehérá Dios la kohya nkehe chrók'uinkákonhen.

Tí sín tjasótexín sín kíxin jína kjuich'e sín

⁸ Méxra, jnkokoá chrókjuenkayáxinrá kaín rá chrókuikonóehérá kíchuárá, chrótjuéhérá kíchuárá. Jnkojína chrónixjehérá kíchuárá la chrókjuinchehnkehýará əsánrá. ⁹ Tí ichréñ nkehe jínahya chrókuit'ahará sín la jahará la xíkaha chrókjuich'ehérá sín. Tí chrók'uántaxínhanrá sín la jahará chrók'uántaxiényará sín. Náhí. Íchá jína chrókjuancheherá Dios kíxin chrókjuincheyaon ch'án sín kíxin Dios la k'uíyahárá ch'án kíxin chrók'uayéhérá kjuachaxin kuénte ch'án. ¹⁰ Kíxin:

Tí nkexro tjinkaon tsotjuéhe əsén kíxin jína chrókjuak'e kaín yaon
la chrónixjahya ch'án ninkehó nkehe jínahya
la ko ninkehó kjuach'ia chrók'uaxrjexínya ir'va ch'án.

¹¹ Tí nkexro la chrókuítóhe tí nkehe jínahya la íchá jína chrókjuich'e tí nkehe jína,
la ko íchá jína chrókjueyá ch'án kjuaxróxin chrókjuak'e ch'án.

¹² Kíxin Închéni t'ayakonhen tí nkexro jína
la ko tinhin ch'án tí nixjehé sín ch'án,
a ntá tí sín ch'e tí jínahya la tjinkitsahya ch'án.*

¹³ ¿Xá nkexro chrókuit'ahará nkehe jínahya tí jahará tjejoch'erá nkehe jína? ¹⁴ Kjónté chrókjuasótexínrá tí nkehe jína tjejoch'erá kjónté la chrókócháhará chróchrakuenhyará ninkexró la ko chróchrakonhyará. ¹⁵ Náhí. Íchá jína chrókjuíkosáyehérá Cristo nkaya əsánrá kíxin Închárá. Chrók'uejorá listo chrókjuátéherá tí nkehe chrókjuanchankíhará kaín chojni kíxin nkexrí tinkachónkirá Închéni, la chrókjuinchehnkehýará la kjuasáya chrókjuátéherá. ¹⁶ Chróchontará ijnko kjuaxrexinkaon jína kíxin ntá tí sín xrich'ia sín t'ántaxínhanrá sín kjónté jína tjejorá tinkachónkirá Cristo la mé chrókósuhé sín kíxin tí nkehe ntáchro sín la ntoáhya. ¹⁷ Íchá jína chrókjuasótiaxínrá kíxin tí jína tjejoch'erá tí xíkaha tjinkaon Dios, a ntá chrókósuháhará chrókjuasótiaxínrá tí ichréñ jie chrókjuich'erá.

¹⁸ Kíxin Cristo kjuasóte ch'án la ko k'uénxin ch'án tí jie kuénteni, ónaá k'uén ch'án kixin para jnkochríxín. Jehe ch'án la jína ch'án la kjuasóteyákonhenni ch'án kjónté jínahyani, kíxin ntá jína sáchrókjuikoni ch'án tí tjen Dios. A ntá ik'uén ch'án éxi chojni, a ntá Nchákuén ch'án la k'uénhya mé xechón ínaá, ¹⁹ kíxin tí Nchákuén ch'án sákjuíkjakohe tí nchákuén tí sín tsík'en tjejóchjina. ²⁰ Tí sín a mé kuítekakonhya sín tí ósé tió kjuák'e ch'ín Noé na mé Dios la kóníkkakonhya ch'án kjuák'echónhen ch'án nachrohe sít'óna tí arca, na mé ijníkóá chojni kuítekaon sín mé kuaá sín tí kuijtee sín ntá. ²¹ Tí ntá a mé tóyóhé tí tikitexín chojni ijie kíxin tí xíkaha tsonhenni la tsaáxinni ijie. A ntá tí tikite chojni la jehya kíxin tsotjuáxin tí cuerpo. Náhí. Tsjancheheni Dios kíxin sinchetjóá ch'án tí tjenkayáxinni. A ntá tí nkehe tsaáxinni la mé tí xechón Închéni Jesucristo, ²² mé tí nkexro sátsíkjí nkaya nkajní itjen ch'án itja chjina Dios. A ntá jehe ch'án la mé t'etueñhen tí sín ángel la ko tí sín t'etoan.

4

Chrókjuich'eheni Dios xra éxi tí kjuachaxin kjuanjon ch'án

¹ Méxra éxi Cristo kjuasóte tí cuérpoé ch'án ntá kjáxinrá kjónté xíkaha chrókjuasóterá chrókoxakuanhyará kíxin tí nkexro kjuasóte tí cuérpoé la ó kuítóhe tí jie. ² A ntá tí naxá chrók'uejochónrá intsí la chrók'uejorá éxi tóxrjínhin Dios. Jehya éxi k'uékoxrjínhanrá. ³ A

* ^{3:12} 3.10-12 Salmo 34.12-16

ntá tí ósé nchónhya nkehe k'uékjich'erá éxí ch'e tí sín naxa chónhya Dios. K'uék'ejorá k'uékjenkayáxinrá tí nkehe jinahya la ko k'uékjásinrá jie k'uéchontará ókjé chojni chjin la ko k'uékókoanrá la k'uekjásinrá kia ntá ntiha kjuánjonxín chojni la ko k'uékinkachónkirá tí nkehe tsíkjanoya. ⁴ A ntá ijie la jahará t'itohyará tí sín a kíxin tí jinahya ch'e sín. Méxra xíkaha t'ántaxíhanrá sín. ⁵ A ntá tí jehe sín tsjanjon sín kuentá tsochénka sín tí nkexro tjechónhen sinchekitoexín ijíe tí sín tjejóchón la ko tí sín tsík'en. ⁶ Méxrä kjónté tí sín tsík'en tsírakohé sín tí itén Dios kíxin tí nchákuén sín chrók'uejó éxí tjinkaon Dios kjónté naxa k'uéjó sín ntihi chjasintajni la kuítqexín tí ijíe sín éxí tsitoexín ijíe kaín chojni.

⁷ Ó kuichjina tsjeje chjasintajni a ntá xíkaha chrók'uejorá jnkójina la ko chrók'uejotsjehérá chrónixjehérá Dios. ⁸ Tí nkehe imá tjetoan kíxin antsí chrótjuéhérá kíchuárá. A ntá tí tjuéhérá kíchuárá la mé tíha chrók'uitjáyanxín tí nchónhya jie chonterá kíchuárá. ⁹ Chrókjuánjonrá kjuachaxin chrókuitohé jnkójin kíchuárá ntoará chrókóninkákuéhyará nijnko tí jehe sín. ¹⁰ Jnkójkorá nkehe tí xrä tjáhará Dios k'uayéhérá chrókjuínkitsará kíchuárá. Xíkaha jína chrókjuákoxínrá tí kjuasáyé ch'án tjáhará ch'án kíxin nchónhya xrä k'uayéhérá. ¹¹ Tí jnkójnrá tjinkáonrá chrónixjará ichré nkehe la chrónixjará éxí nixja itén Dios. Ti jnkójnrá tjinkáonrá chrókjuínkitsará la chrókjuákoxínrá tí kjuachaxin tjáhará Dios. Kaín tí xrä chrókjuich'erá chrókjuanchehérá Dios kjuasáya kíxin kjuasáyé Jesucristo tinkachónkirá tí jehe ch'án. Kíxin jehe ch'án la kaín tí kjuachaxin siín la kuénte ch'án jnkochríxín. Mé xíkaha chaxín. Amén.

Íchá jína chrókjuasótexínni kíxin tí tinkáchónkini Cristo

¹² Kíchóni, chrókoxakuanhyará kjónté ichré nkehe jinahya chrókónhanrá. Ó jehí t'ichjánxín xíkaha tsónhanrá. Chróntáchrohyará kíxin ókjé nkehe tjasótiaxínrá. ¹³ Náhí. Íchá jína chrókócháhará kíxin xíkaha chrókjuasóterá éxí kjuasótexín Cristo, kíxin kjaxinxínrá tsocháhará imá tió ts'ikorá tí kjuachaxin tsíkao Inchéni tí itsi ch'án. ¹⁴ Chrokócháhará tí t'ántaxíhanrá sín kíxin tinkachónkirá Cristo kíxin tí Nchákuén Dios chóntha kjuachaxin t'ayakonhanrá. Jehe sín t'ántaxínhin sín ch'an, a ntá jahará tjíkosáyehérá ch'án. ¹⁵ A ntá tí jnkójnrá tjejtjasóterá chrókójehya kíxin ichré nkehe chrókjuich'erá chrókjuáyará o chrókueerá o ichré nkehe jinahya chrókjuich'erá o chrókjiatérá kjuaníkaon kuénte ókjé chojni. ¹⁶ Náhí. A ntá jnkójnrá chrókjuasótiaxínrá kíxin tinkachónkirá Cristo la chrókósuáhyará. Náhí. Chrókjuanchehérá Dios kjuasáya kíxin xíkaha kónhanrá.

¹⁷ Ntá jie ó kui tí tsitoexín ijíe chojni mé xrankíxín tí sín tsík'óna xjeen Dios. A ntá tí xíkaha tsitoexín ijíe tí jeheni xrankíxín, a ntá íchá tí ó tsjixixín tí sín titekakonhya tí itén Dios. ¹⁸ Íchá tí sín jína la ko xíkaha tsónhen sín ntá tsaá sín a ntá íchá tí sín jinahya chóntha jie kjá antsí tsjasóte sín.* ¹⁹ A ntá tí nkexro tjasóte éxí tjinkaon Dios la kjónté xíkaha la naxa chrókjuich'e sín nkehe jína la ko chrókjuanon sín asén sín chrók'uyayakonhen Dios mé tí nkexro kjuich'éna sín la mé jehe ch'án xráxín jína ch'án.

5

Tí k'uítuenhen tí sín t'etqan kuénte ninko

¹ Tjínkavan tétuanhán tí chojni t'etqan kuénte tí ninko tjejorá ntiha kíxin kjaxin janhan tétoan kuénte ninko éxí tí jehe sín, a ntá janhan mé k'uíkuán kíxin nkexri kjuasóte Cristo, la ko kjaxin janhan mé tsochonta kjuachaxin kuénte Dios éxí tsochonta tí jehe sín tió itsi Inchéni chr'éxín. ² Jahará chrók'uyayakonhérrá tí kolélo kuénte Dios ntiha kíxin xíkaha tí xrä k'uayéhérá. Jnkójina chrókjuínkitsará sín éxí tjinkaon Dios la jehya kíxin ijkóchojní chrók'uétuáhanrá chrókjuich'erá xrä, la ko kjaxin jehya kíxin imá chrókóxrjíhanrá chichaon. Náhí. Kaín asánrá chrókjuich'erá xrä jína. ³ Jehya jahará kuéntará tí jehe sín

* **4:18** Proverbios 11.31

kixin chjini chrókuétuénhénrásín. Náhí. Jnkojína chrókuákoéxínrá tí jehe sín. ⁴ A ntá tió tsi tí Pastor chaxín t'etoan ntá jahará ts'ayéhérá ijnko corona náxrjón tsjehéhya.

⁵ Kjáxin jahará ntasoárá chrókuinchehexiteyéhérá tí sín t'etoan kuénte njinko. Kaínrá chrókuinchehexiteyéhérá kíchuárá chrókuinchehnkehýará kixin: Dios la tsqonínkakonhen tí sín ncheinke, a ntá tí sín ncheinkehýa mé tsjinkitsa ch'án.*

⁶ Méxra chrókuinchehnkehýará, chrókuinchehexiteyéhérá Dios kixin jehe ch'án imá ts'etoan ch'án kixin tsjixraká tí yaon mé jehe ch'án tsotjáhará ch'án kjuachaxin kixin tsétóanrá. ⁷ Chróchjehérá Dios kaín tí kjuaxrexinkaon chontará kixin kjáxin jehe ch'án tóxakonhen ch'án tí jahará.

⁸ Chrókóxakonhanrá jína chrók'uejorá. A ntá ijie ixri tí nkexro nínkakonhanrá mé tí ch'ín Tsochren éxí ijnko koxra tsjánka va xritjeyá va nkehe sine va. ⁹ Tjánjonhyará kjuachaxin kixin jehe ch'án chrókuacha ch'án chrókuachroerá ch'án, kixin ó nohará kixin kaín tí sín kíchuárá nkuixín chjasintajni xikaha tjejótjasóte sín kixin tinkáchónki sín Inchéni. ¹⁰ Kjánchó kánhyó sé tsjasótiará, a ntá Dios antsí tsjinkitsará ch'án kixin tsjachará ts'ejorá jína. A ntá jehe Dios a mé tjuahará ch'án la k'uíyahará ch'án kixin ts'ejokoará ch'án jnkokoá tí tjen Jesucristo chóntha kjuachaxin jnkochrixín. ¹¹ Jehe ch'án tsjancheheni ch'án kjuasáya kixin chóntha ch'án kjuachaxín ts'etoan ch'án jnkochrixín. Amén.

Kjuixixín nixja ch'ín Pedro

¹² Ch'ín Silvano mé t'íkuān ijnko kichó ni jína mé kjuinkitsa ikjinni tí xroon kjónté kánhyó tsjé nixja, la ntaxraxinkáonrá kixin kjuíntayaonrá Dios ntá xikaha kjuakoxín ch'án kixin chaxín tjuahará ch'án. Méxra xikaha jína chrók'uejorá kixin tjuahará ch'án.

¹³ Tí njinko tjen Babilonia mé tsíkjeyá Dios éxí tsíkjeyá ch'án tí jahará nixjahará sín la ko kjáxin nixjahará ch'ín Marcos, mé éxí xjanna t'íkuān tí jehe ch'án.

¹⁴ Nixjehérá kíchuárá jnkójína. Kjuaxróxin chrók'uejorá tinkachónkirá Jesucristo. Amén.

* **5:5** Proverbios 3.34

Xroon yóxin tsíkjín ch'ín Pedro

Ch'ín Pedro chr'énhen ch'án tí xroon tí sín tinkáchónki Cristo

¹ Janhan Simón Pedro, na mé t'ahá xrá Jesucristo. Ikjian tí xroon ts'ayéhérá jahará ó tinkachónkirá Ínchéni éxí tinkáchónkini jeheni kíxin Dios la ko Jesucristo tí nkexro sinchekaáni na mé jína ch'án. ² Sintayaonrá Dios la ko ąntsí ts'ayéhérá kjuaxróxin kíxin ó nohará nkexrí tjen Dios la ko Ínchéni Jesús.

Jína chrók'uejó tí sín tinkáchónki Jesús

³ Dios kjuanjon kjuachaxin tsochóntani kaín nkehe t'ichjánxinhinni kíxin chrók'uejóni jína chróxraxinkaonni tí jehe ch'án. Kíxin ó noheni nkexrí tjen tí nkexro k'uíyeheni kíxin tí kjuachaxin jié chóntha ch'án la ko tí xrá imá jié kjuich'e ch'án. ⁴ Mé xíkaha kjuanjon ch'án kaín xín tí nkehe a, táha la mé imá jié la ko imá tjete sínkí. Mé xíkaha kjuakoxin ch'án kíxin chrók'uayéhérá kjuachaxin chrók'uejorá éxí tjinkaon ch'án la ko chrókuítóhérá tí nkehe jínahya kíxin chrók'uitjáyanxínhyará tí nkehe k'uékjenkayáxinrá siín chjasintajni. ⁵ A ntá jahará tinkachónkirá Ínchéni la kjaxin chrókjuéyárá kíxin chrók'uejorá jnkojína; a ntá tí jína tjejorá ntá chrókjuachará ąntsí chrókónohará; ⁶ a ntá tí kónohará ntá chrókjuachará chrókjuenkayáxinrá jína; a ntá tí tjenkayáxinrá jína ntá chrókjuachará chrókóninkákonhyará tjoka; a ntá tí tóninkákonhyará ntá chrókjuachará chaxín xráxinkáonrá Dios; ⁷ a ntá tí chaxín xráxinkáonrá Dios ntá chrókjuachará chrótjuéhérá kíchuárá; a ntá tí tjuéhérá kíchuárá ntá chrókjuachará chrótjuéhérá kaín chojni.

⁸ A ntá xíkaha tjejoch'erá tinkák'ánkí tí kjuaxrexinkaon kuéntará, ntá jehya kíxin chónkó kuinkachónkirá Ínchéni Jesucristo. ⁹ A ntá tí nkexro ch'ehya xíkaha la mé éxí ijnko chojni t'ikonhya o ijnko chojni t'ikonhya jína, kíxin ó k'uitjáyehen kíxin Ínchéni ó kjuixin kjuinchetjóá tí jié k'uéchonta ósé. ¹⁰ Méxrá xíkaha kíchó ni jnkojína chrók'uejorá kíxin ntá tsonohará jína kíxin Dios tsíkjeyárá tí jahará la ko tsík'iyahará ch'án kíxin xíkaha jína chrókjuenkayáxinrá, a ntá xitjahya chrókjuichroerá. ¹¹ A ntá xíkaha chrókuítékaonrá ntá tsotjáhará Dios kjuachaxin ts'ixenhenrá tí tjen Ínchéni Jesucristo t'etoan ch'án jnkokchríxín. Jehe ch'án mé tí nkexro kjuínchekaáni.

¹² Méxrá titoahya ntaxráxinkáonrá kaín tí nkehe i, kjonté ó nohará tí nkehe ntoá kjuákohará. ¹³ Ntáxrijan kíxin jína tí naxqá tjén chrókjuíntaxráxinkáonrá kaín tí nkehe a

¹⁴ kíxin Ínchéni Jesucristo kjuínchenóna kíxin í séhya its'en janhan. ¹⁵ Na mé kaín tíha tjét'a kíxin tió its'en, ntá jahará tsoxráxinkáonrá jnkokchríxín kaín tí nkehe kjuít'a.

Tí sín k'uíkon tí kjuachaxin kuénte Cristo

¹⁶ Tí nkehe kjuákoháráni kuénte tí kjuachaxin kuénte Ínchéni Jesucristo la ko nkexrí itsi ch'án na mé jehya ijnko cuento kjuich'éna chojni chrókjuich'iyaxín. Náhí. Ikonni k'uíkonxínconi Ínchéni la ko tí kjuachaxin kuénte ch'án. ¹⁷ K'uíkonni tíha tió It'éni Dios kjuikosáyehe ch'án tí Xjeen ch'án, la ntá kuínhinni nixja Dios tjen nkaya nkajní ntáchro ch'án kíxin: "Tíhi mé xjanna tjuahá ch'án. Imá chàna kíxin nchexiteyá ch'án éxí tjínkaván janhan," ichro Dios. ¹⁸ Mé kuínhinni itén Dios kuixín nkaya nkajní kíxin xíkaha ntáchro tió k'uejókoni Ínchéni chrítaón tí jná tjóá.

¹⁹ Mé xíkaha k'uéchrónka tí sín tsíkjín itén Dios ósé ntá noexínni kíxin chaxín tsoxiteyá. A ntá jahará chrók'uejorá chrókuinhínrá jína nkehe k'uéntáchro sín kíxin tí tan mé éxí ijnko xrohi t'inkaséyanxín tí sítié tsjixrakájia tí yaon ts'inkaséyan itsi tí konotsé t'inkaséyanxín tí nchítjen mé xíkaha ts'inkaséyanxín nkaya ąsánrás. ²⁰ A ntá tjetean chrókónohará tíhi: kíxin ninkehó xroon itén Dios tsík'óna jehó chojni chrókjuacha chrókienxín. ²¹ Náhí. Tí

sín k'uéchrónka itén Dios la nixjahya sín tí nkehe jehó sín chrókjuenkayáxin sín. Náhí. Tsíkjinchetjóá Dios tí jehe sín, a ntá Nchákuén Dios kjuínkitsa k'uénixja sín itén Dios.

2

Tí sín tjako kjuach'ia (Judas 4-13)

¹ Kjaxin k'uék'ixin tí sín ntoáhya k'uéchrónka itén Dios tí chjasin Israel, mé kjaxin xíkaha tí jie ts'ixin maestro sit'ayahará. Jehe sín tsochr'ákjenhen sín iso nkehe ntoáhya ts'itjáyanxín tí nkehe chaxín tsaáxinni la xíkaha sinchemá sín tí Inchéni chrókuaáxinni. Tíha mé tsjixin tsjasótexín tí jehe sín. ² Nchónhya chojni tsochréhe sín tí nkehe jínahya ch'e sín. A ntá tí xíkaha ch'e sín la ts'ántaxíenxín chojni tí ntja ntoá kuènte Inchéni. ³ Tsóxrjínhin sín tsochónta sín nchónhya chichaon, ntá tsjanchiaxínrá sín chichaon tí nkehe ntoáhya tsjakohará sín. A ntá tí nkehe ts'itjáyanxín sín tjechónhen la kohya nkerí tsaáxin tí jehe sín kixin ósé tjechónhen xíkaha tsonhen sín.

⁴ Dios la kjónté tí sín ángel kjuasin jie la kuíkonóehya ch'án sín la k'uetoan ch'án kixin sátsji sín tsjasóte sín sátsjik'ikjehé sín tí sítié na tjejóchjina sín tsjixrakájia tí tsitoexín ijíe sín. ⁵ La ko kjaxin kuíkonóehya Dios tí sín k'uéjó chjasintajni ósé ntá ichr'án ch'án ntja kuitée tí sín jínahya, a ntá Dios kjuínchekaá jehó tí ch'ín Noé, na mé tí nkexro kjuako tí tan jína la ko kjuínchekaá ch'án tí yato sín ó.* ⁶ Kjaxin Dios kjuínchek'itjáyan tí chjasin Sodoma la ko tí chjasin Gomorra iche hasta k'óna nteso, kixin chrókonohe chojni jínahya ts'ejo chr'ejin kixin xíkaha tsonhen sín.† ⁷ Kjánchó Dios kjuínchekaá ch'án tí ch'ín Lot kixin ijkno chojni jína tí jehe ch'án la ko imá kóxakonhen ch'án tí k'uíkon ch'án tí jie kjuasin tí sín jínahya. ⁸ Tí ch'ín Lot mé jína əsén ch'án mé k'uékjak'e ch'án tí siín tí sín jínahya ntá kaín yaon kóxakonhen əsén ch'án k'uíkon ch'án la ko kuínhin ch'án tí nkehe jínahya k'uékjich'e sín.‡ ⁹ A ntá Inchéni na sinchekaá ch'án tí sín kaín əsén kuítekaon tí jehe ch'án kjónté nchónhya kónhen sín. A ntá tí sín jínahya la sinchekjasóte ch'án tí yaon tsitoexín ijíe chojni.

¹⁰ Dios əntsí sinchekjasóte ch'án tí sín nchexiteyéhe tí nkehe jínahya ntáchro əsén sín a ntá nchexiteyéhya sín tí nkehe t'etoan Inchéni. Titekakonhya sín la ko chrakonhya sín chrók'uántaxínhin sín tí sín ángel chóntha kjuachaxin. ¹¹ A ntá tí sín ángel imá tséhe sín la ko imá chóntha sín kjuachaxin la kjónté tjinkakonhya ts'ántaxínhin tí sín a nkayakon Inchéni.

¹² A ntá tí chojni a la éxi yóhé iko tjenkayáxinhya ninkehó la nchexiteyéhe tí nkehe ntáchro əsén, la kokjíhi kixin ts'óyán kíchó ó. T'ántaxínhin sín tí nkehe tienxínhya sín, mé xíkaha its'en sín éxi its'en tí ko a. ¹³ Tíha mé tsjasótexín sín kixin jehe sín kjuínchekjasóte í so chojni. Xráxín tóxrjínhin sín ich'e sín tí nkehe ntáchro əsén sín. Ijkno kjuatósueh kixin tjejóntaxín sín ntekoará sín tí kia chontará la kjónté tí xíkaha la naxa tjasin sín jie.

¹⁴ Kohya nijnko chojni chjin chrokjuasinkohya sín jie. Tóxrjéhya sín tjasin sín jie tsjasótexín sín. ¹⁵ Kuítóhe sín tí ntja ntoá ntá chréhe sín ntja kuènte ch'ín Balaam xjeen ch'ín Beor, kixin kóxrjínhin ch'án chrókjuacha ch'án nchónhya chichaon tí nkehe jínahya chrókjuich'e ch'án. ¹⁶ A ntá t'ichjánxín tsjasóte ch'án kixin tí jie kjuasin ch'án. A ntá ijkno kolócho chjin xitjahya nixja la xrínahya nixja itén chojni la kjuentuéhe tí ch'ín Balaam kixin tí jie chóntha ch'án ntá kuítóhe ch'án tí nkehe jínahya chrókjuich'e ch'án.§

¹⁷ Tí chojni tjako mé éxi yóhé tóye tjiáhya ntja la ko éxi tjuí tjakáko xrínto ó; ó kjuixin k'uítuenhen sín sátsji sín tí imá sítié tsjasóte sín jnkochríxín. ¹⁸ Kaín nkehe jínahya nixja sín, a ntá tí jie tjasin sín tóxrjínhin sín chojni chjin ókjé ntá tjachroexín sín tí sín na ntá tjinkaon chrókuitóhe sín tí jie. ¹⁹ Chrónka sín kixin kaín nkehe jínahya la jína, kixin jehe sín nchexiteyéhe sín tí nkehe jínahya ntoáhya; kixin jnkojnko chojni mé nchexiteyéhe tí nkehe kjuacha k'uëtuñhen sín. ²⁰ A ntá tí nkexro ó chóxin Inchéni Jesucristo tsaáxinni mé

* **2:5** Génesis 6.1-7.24; 8.18 † **2:6** Génesis 19.24 ‡ **2:8** 2.7-8 Génesis 19.1-16, 29 § **2:16** Números 22.35-46

kuítuhe sín tí nkehe chrók'uitjáyanxín sín kuénte chjasintajni. A ntá chr'éxín tí chrókuakja sín ntia jinahya ínaá tí chrókuachra tí jinahya chrókuachroe sín, a ntá antsí má jinahya chrókónhen tí jehe sín. ²¹ Íchá jína chrókónoehya sín tí ntia jína. A ntá jehya jína tí ó nohe sín ntá tsítuhe sín tí nkehe k'uetoan Dios kuinhin sín. ²² A ntá tí jehe sín kjuinchexiteyá sín éxi ntáchro tí proverbio kíxin: "Tí konja t'ókjan ntá xíkjan xíkjine ínaá,* la ko tí cochíno na ntá tsík'onti tjóá ntá xíkjan kjíankí tí nchet'o kjita."

3

Tió tsi Inchéni

¹ Kíchóni tjuahará tíhi la xroon yóxin ikjian ts'ayéhérá. Yói tí xroon a ntaxráxinkáonrá kíxin jína chrókjuenkayáxinrá. ² Chróxráxinkáonrá tí nkehe tsíchrónka tí sín k'uéchrónka itén Dios ósé la ko tí nkehe k'uetoan Inchéni, mé tí nkexro tsaáxinni, kjuakohará tí sín kjueyá ch'án.

³ Tjetoaan chrókónohará tíhi kíxin tí yaon tsjixixín la itsi chojni tsjanoá tí tan jína kuénte Inchéni, la sinchexiteyéhe sín kaín nkehe jinahya ntáchro asén sín. ⁴ Tsjanchankí sín nkehe kónhen tí nkehe tsíntáchro Cristo kíxin tsokjan ch'án, kíxin desde ik'uén tí sín tsík'axrjeníxinni k'uéjó ósé la xíkahó naxa sítónen éxi tió k'óna chjasintajni. ⁵ Tí sín a titekakonhya sín kíxin ósé k'uénixja Dios ntá k'óna nkajní la ko chjasintajni na mé kjuin tí ntá ntá kuítuhe nonte xámá. ⁶ A ntá tí ntá k'uitjáyanxín chjasintajni ínaá. ⁷ A ntá tí nkajní la ko tí chjasintajni naxa tjejó jie tjejochónhen tsoche kíxin xíkahá k'uetoan Dios kíxin xrohi tsochexín tí yaon tsjixixín tsitqexín ijié chojni la ko kaín tí sín jinahya tsjasóte sín.

⁸ A ntá kíchó ni, chrók'uitjáyanhyará kíxin Inchéni tí ijkno yaon t'ikon ch'án éxi mil nánó la ko mil nánó t'ikon ch'án éxi ijkno yaon ó.* ⁹ Ntá Inchéni í séhya sinchexiteyá ch'án tí nkehe tsíntáchro ch'án la jehya éxi tjenkayáxin í so chojni kíxin ó má sé tjejochónhen sín. Náhí. Jehí tjechónhen ch'án kíxin ninkexró chrók'uitjáyanhyará kíxin tjinkaon ch'án kíxin kaín chojni chrókjan sín chrókuinkáchónki sín Dios.

¹⁰ A ntá tí yaon tsokjan Inchéni mé tsí éxi xíchee itsi tí tie. A ntá tí nkajní ts'itjáyan, la mé nchónhya kjuachrakon ts'ixikónhen ts'ixikovékjan. A ntá kaín nkehe sínkáni nkajní na mé ts'itjáyan tsoche, la ko tí chjasintajni tsoche la ko kaín nkehe siín.

¹¹ A ntá tí xíkahá kaín nkehe ts'itjáyan, a ntá jahará la jína chrók'uejorá chróxráxinkáonrá Dios. ¹² Chrók'uejochonhénrá tí yaon itsi Dios chrókoxakonhanrá chrókjuich'erá xra kíxin ntá tjoka chrókui Inchéni. A ntá tí yaon tsjixixín mé ts'itjáyan nkajní tsoche, la ko kaín nkehe tsoxíka ts'itjáyan kíxin imá tsosóa. ¹³ A ntá jeheni tjejochónhenni nkajní nixin la ko chjasintajni nixin éxi tsíntáchro Dios kíxin tsjanjon ch'án. A ntá ntiha la mé imá náxrjón la ko kjuaxróxin ts'ixin tí chojni jína.

¹⁴ Méxra xíkahá kíchó ni, nachrohe tjejochonhénrá kíxin itsi tí yaon tsónhen xíkahá la kaín asánrá chrókjuéyará jnkojína chrók'uejorá kíxin ts'ikon Dios kíxin kjuaxróxin tjejorá chontahyará jie. ¹⁵ Chrókónohará kíxin naxa tjechónhen Inchéni, tjokahya itsi ch'án kíxin í so chojni naxa chrókuitekaon sín ch'án. Kjaxin xíkahá tsíkjín tí kíchó ni Pablo tí xroon chr'ánhanrá ch'án éxi tí kjuachaxién Dios tsík'ayéhe ch'án chrónka xíkahá. ¹⁶ Jnkojko tí xroon tsíkjín ch'án nixa xíkahá la imá xra chrókienxín chojni. A ntá tí sín noehya la ko tí sín kánhyó tinkáchónki Inchéni ntá tienxínya sín la ntá ntoáhya tjako sín nkexrí t'axrjexín tí nixa tí xroon tsíkjín ch'án la ko kjaxin ntoáhya tjako sín í so nkehe nixa xroon itén Dios. Ntá xíkahá jehó sín tjejá sín nkehe ts'itjáyanxín sín.

¹⁷ Méxra kíchó ni, ó nohará tí nkehe senó, ntá chrókoxakonhanrá kíxin chrókjuachruéhyará tí kjuach'ia xriko tí sín jinahya ntá chrókuítihérá tí nkehe jína

* ^{2:22} Proverbios 26.11 * ^{3:8} Salmo 90.4

ntoá tinkachónkirá. **18** Íchá jína qantsí má chróchoxínrá Inchéni Jesucristo, mé tí nkexro sinchekaáni la ko qantsí chrók'uánkí tí kjuaqchaxién ch'án chróchontará. Méxra tsjikosáyeheni ch'án ijie la ko jnkochríxín. Amén. Ó tjen.

Tí xroon saoxín tsíkjin ch'ín Juan

Tí tan tjanjon kjuachón

¹ Ikjinni tí xroon i ts'ayéhérá kíxin tsonohará kuènte tí nkexro xráxín kjuák'e tí naxa t'ónahya chjasintajni, mé tí nkexro kuínhinni nixja la ko tí nkexro k'uíkonxín konni. Kíxin tí nkexro mé k'uíkonni la ko tí nkexro kuákoxín tjaní, mé tí nkexro nixja tí tan tsjanjon kjuachón. ² Kjuakoxín ch'án nkexrí kjuák'e ch'án, a ntá kaín tí jeheni k'uíkonni ch'án, mé xíkaha chrónkaxínni nkexrí kjuák'e ch'án; a ntá tjakuexinni tí jahará nkexrí tjen tí kjuachón jnkochríxín, la mé jehe ch'án k'uékjak'eko ch'án It'é ch'án Dios, a ntá ikui ch'án ntihi chjasintajni. ³ Chrónkaxínni tí nkehe k'uíkonni la ko tí nkehe kuínhinni, kíxin kjaxinrá jnkokoá chrókuinkachónkirá éxí tinkáchónkini tí jeheni, éxí tí jeheni jnkokoá tinkáchónkini It'éní Dios la ko tí Xjeen ch'án Jesucristo. ⁴ Mé xíkaha ikjinni tí nkehe i, kíxin chrókjuintaxín chrókócháhará la ko chrókóchéheni.

Dios mé tí xrohi

⁵ Tí tan i mé Ínchéni Jesucristo kjuakohe tí jeheni, a ntá jie tjakoharáni tí jahará, kíxin Dios mé tí xrohi, a ntá kohya ninkehó sítié tí tjen tí jehe ch'án. ⁶ A ntá tí tsontáchroni kíxin tinkáchónkini tí jehe ch'án, a ntá naxa ixrini tí ntia sítié, na mé xíkaha ch'iáni kíxin ch'ehyani tí nkehe ntáchroni. ⁷ A ntá tí xritjejóni tí t'inkaséyan kíxin tí Dios mé jehe ch'án tí t'inkaséyan, na mé xíkaha jnkokoá tinkáchónkini ch'án, a ntá tí ijnié Xjeen ch'án Jesucristo mé ts'íjmáxin kaín jie chóntani.

⁸ Tí chróntáchroni kíxin ninkehó jie chóntahyani, mé xíkaha la jehóni ch'iyeheni asénni, a ntá tí nkehe chaxín la chóntahyani. ⁹ A ntá tí tsontáchroni kíxin chóntani jie, a ntá tsonoheni chaxín kíxin itjen ijko Dios la jína ch'án la ts'itjáyehen ch'án kaín jie chóntani la ko sinchetjóáni ch'án kíxin kaín tí nkehe jínahya kjuich'eni. ¹⁰ A ntá tí tsontáchroni kíxin kjuasihyani ninkehó jie, la éxí chróntáchroni kíxin Dios la ch'ia ch'án, a ntá tí xíkaha tsixroni la chaxínhyá tsík'ayéheni tí tan kuènte ch'án.

2

Cristo mé tsonixjayákonhenni ch'án

¹ Kíchóni, éxí xjanña t'íkuán tí jahará, a ntá tjékjian tí xroon ts'ayéhérá tsochrónka kíxin chrókjuañhyará jie. A ntá tí jnkójínrá chrókjuañnrá jie la chóntani ijko nkexro tsonixjayákonhenni nkayakon It'éní Dios, tíha mé Jesucristo, la jehe ch'án mé ijko nkexro jína. ² Jesucristo mé k'uenyákonhenni ch'án kíxin tí jie chóntani; a ntá jehya ijjiéni ó. Náhí. Ijjé kaín chojni siín chjasintajni.

³ Tí tsitekaonni tí nkehe k'uetoan Dios ntá tsongoexínni chaxín kíxin chóxinni ch'án. ⁴ A ntá jnkójín nkexro ntáchro kíxin chóxin Dios, a ntá titekakonhya tí nkehe tsík'etoan Dios, la mé ch'ia la noehya tí nkehe chaxín. ⁵ A ntá tí nkexro titekaon tí nkehe tsík'etoan Dios la chaxín tjuéhe Dios; mé xíkaha noheni kíxin chaxín jnkokoá tjejókoni ch'án. ⁶ Tí nkexro ntáchro kíxin chaxín tinkáchónki Dios chrókjuk'e éxí kjuák'e Jesucristo.

Tí mandamiento nixin

⁷ Kíchóni, méxra tí nkehe tjékjian jehya ijko nkehe nixin tsík'etoan Dios. Náhí. Tíha mé tí nkehe k'uayéhérá tí xrankíxín, mé tí mandamiento ósé tjen, mé tí nkehe ó tsíkinhínrá.

⁸ Kjánchó tí nkehe ikjian mé yóhe ijko nkehe nixin, éxí kjuakoxín Cristo mé xíkaha tjakoxínni, kíxin tí sítié la tinkák'itjáyan kíxin ijie la ó t'inkaséyanxín tí xrohi chaxín.

⁹ A ntá tí nkexro tsontáchro kíxin ixri tí t'inkaséyan, a ntá naxa nínkakonhen kíchó, na mé tí xíkaha naxa itjen tí sítié a. ¹⁰ A ntá tí nkexro tjuéhe kíchó mé tjen tí t'inkaséyan, a ntá xíkaha jína tjen, chóntahya jie la chrókjuchruéhya ch'án ninkexró kíxin chrókjuañsin sín jie

ínaá. ¹¹ A ntá tí nkexro nínkakonhen kíchó mé tjejó sín la ko ixri sín tí sítié a la ko noehya sín nketí nó sátsji sín kíxin tí sítié la kjuich'éná ntakótán sín.

¹² Éxí xjanna t'íkuān tí jahará, la méxra tjékjian tí xroon ts'ayéhérá kíxin tsōnohará kíxin kjuachaxin ihnié Dios kjuúncchetjuáxinrá tí ijiárá kíxin k'uenyákonhenni Ínchéní Jesucristo. ¹³ Jahará it'é xjan, ikjian tí xroon ts'ayéhérá jahará kíxin choxínrá tí nkexro tjen tí xrankíxixín. A ntá jahará ntasoírá kjaxin ikjian tí xroon ts'ayéhérá jahará kíxin kjuachará kíxin kjuachahya tí Jínahya chrók'uētuānhanrá.

Ikjian tí xroon ts'ayéhérá jahará chánjanrá, kíxin choxínrá It'éní. ¹⁴ A ntá jahará it'é xjan ikjian tí xroon ts'ayéhérá kíxin ó choxínrá tí nkexro itjen tí xrankíxixín tí naxa t'ónahya chjasintajni. Ikjian tí xroon ts'ayéhérá jahará ntasoírá, kíxin naxa fuérterá, la ko k'uayéhérá tí itén Dios, la ko kjuachará kíxin kjuachahya Tsochren chrók'uētuānhanrá.

¹⁵ Chrótjuèhyará tí chjasintajni la ko ni tí nkehe siín chjasintajni. A ntá tí chojni tjuèhe tí chjasintajni, na mé chaxínhya tjuèhe sín It'éní Dios. ¹⁶ Kíxin ninkehó tí nkehe chrókjuanjon chjasintajni chrókuixín tí tjen It'éní Dios. Tí nkehe tjinkaon tsjanjon chjasintajni na mé tíhi, mé tí nkehe jínahya chrókjuich'eni, la ko tí chrókjuak'e asénni tí nkehe ts'ikonni, la ko tí kjuahnke xrikoni kíxin itsjé nkehe chróchontani. ¹⁷ A ntá tí chjasintajni sítinkákjeje la ko tí nkehe jínahya tjenkayáxin chojni; a ntá tí nkexro nchexiteyá tí nkehe tóxrjínhin Dios mé ts'ejó sín jnkochríxín.

Tí nkehe chaxín la ko tí nkehe kjuach'ia

¹⁸ Éxí xjanna t'íkuān tí jahará, la chrókónohará kíxin ó kuichjina tí yaon tsjixixín. Jahará ó kuínhínrá kíxin ó tsi tí nkexro nínkakonhen Cristo. A ntá ijie tinkákónoxín nchónhya tí sín a, mé noexínni kíxin ó kuichjina tí yaon tsjixixín. ¹⁹ Jehe sín tsík'axrjekjanxín sín tí tjejóni; kjánchó chaxínhya kuinkáchónki sín éxí tinkáchónkini. Náhí. Tí chaxín chrókuinkáchónki sín éxí tinkáchónkini la chrók'uaxrjekjanxínha sín tí tjejóni, naxa chrók'uejókoni sín jnkokoá. A ntá xíkaha kónhen k'uaxrjekjan sín kíxin tsōnoxín kíxin kuinkáchónkiha sín éxí tinkáchónkini.

²⁰ A ntá jahará la Cristo tsíkjanjon Nchákuén ch'án tsík'ayéhérá kaín rá, ntá jie tiénxinrá intsi kuénte ch'án. ²¹ Ikjian tí xroon ts'ayéhérá kíxin ó nohará tí nkehe chaxín, jehya kíxin chrókónoahyará; jahará la ó nohará kíxin nijnko kjuach'ia tixínhya tí nkehe chaxín.

²² ¿Xá nkexro tí ch'ia? Mé tí nkexro ntáchro kíxin Jesús la jehya tí Cristo. Tí nkexro a mé nínkakonhen Cristo, mé titekakonhya It'éní Dios la ko tí Xjeen ch'án. ²³ A ntá tí nkexro titekakonhya tí Xjeen Dios la kjaxin chóntahya sín tí It'é ch'án, a ntá tí nkexro chrónka kíxin chóxin tí Xjeen Dios mé kjaxin chóxin sín tí It'é ch'án.

²⁴ Méxra tí nkehe tsíkhínrá tí xrankíxixín la chróxráxinkáonrá jnkochríxín. A ntá xíkaha tí chróxráxinkáonrá jnkochríxín tí nkehe tsíkhínrá tí xrankíxixín, la kjaxin xíkaha jnkokoá chrókuinkachónkirá tí Xjeen Dios la ko tí It'é ch'án. ²⁵ Kíxin Jesucristo tsíntáchro ch'án kíxin tsjanjon ch'án tí kjuachón jnkochríxín.

²⁶ Méxra xíkaha tjékjian tí xroon i ts'ayéhérá kíxin chrókónohará kuénte tí sín tjinkaon chrókjuit'ayahará. ²⁷ Kjánchó jahará la ó chontará Nchákuén Dios tsítjáhará Jesucristo, a ntá xíkaha la í t'ichjánxínhya kíxin ókjé nkexro chrókjuakohará, kíxin tí Nchákuén Dios mé tjakohará kaín xín nkehe, mé tjako tí nkehe jína la jehya kjuach'ia tíha. A ntá chaxín chrókuinkachónkirá Cristo éxí kjuako tí Nchákuén ch'án.

²⁸ A ntá jie éxí xjanna t'íkuān tí jahará, chrókuítóéhyará chrókuinkachónkirá Cristo, kíxin tió tsi ch'án la qantsí chróchoxínrá ch'án la ko chrókósuàhyará chrókóchjinará tió tsi ch'án, ²⁹ kíxin ó nohará kíxin Jesucristo la jína ch'án. A ntá chrókónohará kíxin kaín nkexro jína la xjeen Dios tíha.

¹ Chrókónohará kíxin It'éni Dios, imá tjuèhe tí jeheni kíxin ncheck'in ch'án xjeen ch'án tí jeheni, la mé chaxín jeheni tíha. Mé xikaha tí sín chjasintajni chónhya sín tí jeheni kíxin jehe sin la xráxín chónhya sín Dios. ² Mé xikaha kíchó ni, ó tsík'ónani xjeen Dios, a ntá naxa tjakoxinhya ch'án nkehe tsónhenni tí tsjixixín. Kjánchó ó noheni kíxin tió itsi Ínchéni Jesucristo la ts'ónani éxí tí jehe ch'án, kíxin ts'ikonní kíxin nkexrí tjen tí jehe ch'án. ³ A ntá kaín nkexro tjejóchónhen tí tsi ch'án la chrókuítóhe sín ijié sín kíxin tsotjóá sín kíxin jehe ch'án la tjóá ch'án.

⁴ Kíxin kain tí nkexro tjasin jie mé jínahya ch'e sín, kíxin tió tjasin chojni jie la mé xikaha kuítekakonhya sín tí ley a. ⁵ Jahará ó nohará kíxin Jesucristo kui chjasintajni kíxin tsjatsen ch'án tí ijiéni, a ntá jehe ch'án la ninkehó jie chontahya ch'án. ⁶ Mé xikaha kaín tí sín chaxín tinkáchónki tí jehe ch'án la mé tjasinhya sín jie; a ntá kain tí sín tinkákjasin jie la tsík'ikonhya sín ch'án la ko xráxín chónhya sín ch'án. ⁷ Éxí xjanna t'íkuān tí jahará; méxra chrókuítóéhyará kixin ninkexró chrókjuit'ayahará; a ntá tí nkexro ch'e nkehe jína la jína ch'án, kíxin Ínchéni la jína ch'án. ⁸ A ntá tí nkexro xritjasin jie la mé kuénte tí Jínahya; kíxin tí Jínahya mé kjuankíxin kjuasin jie desde tí xrankíxín k'óna chjasintajni. Méxra tí Xjeen Dios mé kui chjasintajni kíxin sincheck'itjáyan ch'án kaín tí xra kjuich'e tí Jínahya.

⁹ Nijnko tí chojni tsík'axrjeníxín Dios naxa chrónkákjasin jie, kíxin ó chóntha tí kjuachón kjuanjon Dios; la í xitjahya naxa chrókjuasin jie kíxin ó tsík'óna xjeen Dios. ¹⁰ Mé xikaha tónoxín kíxin nkexro tí xjeen Dios la ko nkexro tí xjeen tí Jínahya, kíxin tí nkexro ch'ehya tí jína la ko tjuéhya kíchó mé jehya xjeen Dios tíha.

Chrótjuèheni kíchó ni

¹¹ Méxra tí tan tsíkinhínrá tí xrankíxín mé tíhi, kíxin chrótjuèheni kíchó ni. ¹² Chrókjuich'ehyani éxí kjuich'e ch'ín Caín, kíxin jehe ch'án mé kuénte tí Jínahya, kíxin k'óyán ch'án tí kíchó ch'án. ¿Nkehuénte kíxin k'óyán ch'án? Kíxin tí ch'ín Caín la tí nkehe jínahya kjuich'e ch'án, a ntá tí kíchó ch'án la kjuich'e ch'án tí nkehe jína.

¹³ Kíchóni, chróchrakonhyará tí nínkakonhanrá tí sín siín chjasintajni. ¹⁴ A ntá noheni kíxin k'uatsíkani tí kjuach'en, a ntá kjuachón, mé noexínni tíhi kíxin tjuéheni kíchó ni. Tí nkexro tjuéhya kíchó la éxí tsík'en sín xikaha xritjejó sín. ¹⁵ Kaín tí nkexro imá nínkakonhen kíchó na mé chojni tjàya tíha, la ko ó nohará kíxin ijinko chojni tjàya la xitjahya tsochonta kjuachón jnkochríxín. ¹⁶ Ó noheni kíxin nkexro tí tjuéheni, kíxin Ínchéni Jesucristo mé k'uenyákonhenni ch'án; kjaxin jeheni kjónté chrók'uenyákonhenni tí sín kíchó ni. ¹⁷ A ntá tí tjen ijinko nkexro rico t'ikon kíxin ijinko tí kíchó ch'án t'ichjánxihin nkehe, a ntá tí tsjinkitsahya tí kíchó, ¿a ntá nkexrí chrótjuèhe ch'án Dios kaín asén ch'án? ¹⁸ Éxí xjanna t'íkuān tí jahará, méxra chrótjuèxíhyani tí kíchó ni tí tan náxrjón chrónixjani ó. Náhí. Chrókjuakoxinni tí nkehe jína chrókjuich'eni.

Jína tsochjineheni tí tjen Dios

¹⁹ Tíha mé noexínni kixin chaxín ntoá tjejóni, a ntá chrókónoheni kíxin chaxín tjejóni éxí tjinckaon Dios. ²⁰ A ntá tí tjoní asénni kíxin chontani ichréni jie, a ntá Dios la imá nohe ch'án la nohe ch'án kaín nkehe tónhen asénni. ²¹ Mé xikaha kíchó ni, tí tjohya asénni kíxin naxa ichréni nkehe jínahya tjenkayáxinni, a ntá qantsí jína tsochjineheni tí tjen Dios, ²² a ntá jehe ch'án tsjanjon ch'án kaín nkehe tsjancheheni ch'án, kíxin nchexiteyéheni tí nkehe k'uetqan ch'án la ko ch'eni tí nkehe tóxrjínhin ch'án. ²³ Tí nkehe tsík'etqan ch'án la mé tíhi kíxin chrókuitekaonni tí Xjeen ch'án Jesucristo, la ko chrótjuèheni kíchó ni éxí k'uetqan ch'án. ²⁴ Tí nkexro nchexiteyéhe tí nkehe k'uetqan ch'án mé tjejóko tí jehe ch'án, la ko jehe ch'án tjen tí tjejó sín. Tíhi mé noexínni kíxin jehe ch'án tjejókoni ch'án kíxin tí Nchákuén ch'án tsíkjanjon ch'án.

4

Tí Nchakuen Dios la ko tí nchakuen tí nkexro nínkakonhen Cristo

¹ Kíchóni, chrókuitékákonhyára kaín tí sín ntáchro sín kíxin Nchakuen Dios mé nixjaxín tí jehe sín. Náhí. Chrótsejérá tí nkehe ch'e sín kíxin chrókónohará kíxin á chaxín chóntha sín Nchakuen Dios o náhí, kíxin tí chjasintajni la ixri nchónhya chojni ch'ia, ntáchro sín kíxin nixja sín tí itén Dios. ² A ntá xíkaha mé chrókónoaxínrá kíxin á chaxín chóntha sín Nchakuen Dios kíxin kaín tí sín chaxín titekaon sín kíxin Jesucristo ikui éxí chojni mé chóntha sín Nchakuen Dios. ³ A ntá tí nkexro titekakonhya kíxin xíkaha tsíki Jesús, na chóntahya sín Nchakuen Dios. Náhí. Chóntha sín tí nchakuen tí nkexro nínkakonhen Cristo. Jahará ó kuínhínrá kíxin itsi tí nchakuen a, a ntá jie ó tsíki chjasintajni.

⁴ T'íkuán tí jahará éxí xjanna, kíxin jahará la ó títekáonrá Dios, a ntá kjuachará kíxin kjuachahya tí sín ch'ia chrók'uetoan, kíxin tí nkexro tjejókoará la imá t'etoan, a ntá tí nkexro t'etoan chjasintajni la kánhyó t'etoan. ⁵ Kíxin jehe sín la kuénte chjasintajni ó, méxrä nixja sín tí nkehe kuénte chjasintajni ó. A ntá tí chojni kuénte chjasintajni ó mé tjejótinhin sín. ⁶ A ntá jeheni mé xjeen Dios. A ntá tí sín chóxin Dios mé tjejótinhin sín tí nkehe tjakoni. A ntá tí nkexro chónhya Dios mé tjinkakonhya sín chrókuinhin sín tí nkehe tjakoni. A ntá tíha mé tjatsoanxínni nkexro chóntha tí Nchakuen tí nkexro chaxín la ko nkexro chóntha tí nchakuen tí nkexro xrich'ia.

Dios mé tjuéheni

⁷ Kíchóni, méxrä chrótjuéheni kíchó ni, kíxin tí tjuéheni kíchó ni mé tixín tí tjen Dios. Kaín nkexro tjuéhe kíchó mé xjeen Dios, la ko chóxin Dios. ⁸ A ntá tí nkexro tjuéhya kíchó na mé chónhya Dios kíxin Dios la xráxín tjuéhe chojni. ⁹ Dios la ó kjuakoxín ch'án kíxin tjuéhe tí jeheni kíxin tsíchr'án ch'án tí jnkokoá Xjeen ch'án chjasintajni kíxin tsochóntaxínni kjuachón tí jehe ch'án. ¹⁰ A ntá tí tjuéheni Dios la mé tíhi: jehya kíxin jeheni k'uétjuéheni tí jehe ch'án. Náhí. Jehe ch'án mé xráxín tjuéhe ch'án tí jeheni, a ntá ichr'án ch'án xjeen ch'án k'uenyákonhenni kíxin tsotjuáxin tí jie chóntani.

¹¹ Kíchóni, a ntá tí xíkaha Dios tjuéhe tí jeheni, a ntá kjaxinni jeheni xíkaha chrótjuéheni kíchó ni. ¹² A ntá Dios la ninkexró k'uíkonhya. Kjánchó tí chrótjuéheni kíchó ni la Dios ts'ejókoni ch'án, a ntá tsjinkitsa ch'án kíxin chaxín tsotjuéheni kíchó ni. ¹³ Tíhi mé noexínni kíxin tjejókoni Dios la ko jehe ch'án tjejóko tí jeheni kíxin tsíkjanjon ch'án tí Nchakuen ch'án chóntani. ¹⁴ Jeheni mé k'uíkonxín konni la mé chrónkaxínni kíxin It'éni Dios tsíchr'án ch'án Xjeen ch'án kíxin tsaáxin chojni siín chjasintajni. ¹⁵ A ntá jnkojín nkexro titekaon la ko chrónkaxín kíxin Jesús mé Xjeen Dios mé tjejóko Dios la ko Dios mé tjejóko tí jehe sín.

¹⁶ Mé xíkaha mé noexínni la ko titekaonni kíxin Dios la tjuéhe tí jeheni. Dios mé xráxín tjuéhe chojni, a ntá tí nkexro tjuéhe Dios mé tjejóko Dios la ko Dios tjejóko tí jehe sín. ¹⁷ Mé xíkaha chaxín chrótjuéheni Dios kíxin ntá chróchrakonhyani tí yaon tsitoexín ijiéni kíxin ó noheni kíxin Jesucristo la tjuéheni ch'án la ko jeheni la kjaxin tjuéheni tí jehe ch'án. ¹⁸ Kíxin tí tjuéheni Dios la kohya kjuachrakon. Tí chaxín tjuéheni Dios la tíha mé tsakitsje tí kjuachrakon. A ntá chojni chrakon mé chaxín tsjasóte. A ntá jnkojín chojni chrakon la mé chaxínya tjuéhe Dios.

¹⁹ A ntá jeheni la tjuéheni Dios kíxin jehe ch'án senó tjuéhe ch'an tí jeheni. ²⁰ A ntá jnkojín nkexro ntáchro kíxin jehe mé tjuéhe Dios, a ntá tuénxín nínkakonhen kíchó mé kjuach'ia xriko. Tí tjuéhya ch'án tí kíchó chóxin ch'án, la kjaxin xitjahya tsotjuéhe Dios kíxin tsík'ikonya ch'án Dios. ²¹ Tíhi mé tsík'etoan Jesucristo kíxin tí nkexro tjuéhe Dios la mé kjaxin chrótjuéhe kíchó.

5

Tí tinkáchónkini Dios la tsjachahya tí chjasintajni

¹ Kaín nkexro titekaon kíxin Jesús mé tí Cristo la jehe mé tsík'axrjeníxin Dios; a ntá tí nkexro tjuèhe tí it'é tí xjan mé kjaxin tsotjuèhe tí xjeen tí nkexro a. ² A ntá tí tjuèheni Dios la ko nchexiteyáni tí nkehe t'etqan ch'án, a ntá noheni kíxin kjaxin tjuèheni tí sín tsík'óna xjeen Dios. ³ Tí tjuèheni Dios la t'ichjánxiñ kíxin chrókuitekaonni tí nkehe k'uetqan ch'án, kíxin ti nkehe t'etqan ch'án la jehya ijnko nkehe imá xrä ⁴ kíxin kaín chojni tsík'óna xjeen Dios tsjacha, la ntá tí chjasintajni la náhi. A ntá tí tinkáchónkini Ínchéni la mé tsjachaxinni la tsjachahya tí chjasintajni. ⁵ A ntá tí sín tinkáchónki kíxin JesúS mé tí Xjeen Dios mé tsjachahya tí chjasintajni ts'etuñhen sín.

Tí nkehe chrónkaxín nkexrí tjen tí Xjeen Dios

⁶ Tió kui Jesucristo la kjuakoxin tí inta la ko tí jni. La jehya kíxin jehó tí inta kjuakoxin ch'án. Náhi. Kjaxin inta la ko ijni kjuakoxin ch'án. A ntá tí Nchakuen Dios mé chrónkaxín tíha, kíxin tí Nchakuen Dios la chaxín ntoá. ⁷ Siín iní nkexro chrónkaxín nkaya nkajní: ijnko la It'eni, la ijnko la tí Palabra, la ijnko la tí Nchakuen ch'án. Tíha mé iní, kjánchó jnkokoá nkexro tíha. ⁸ A ntá siín iní tí nkehe chrónkaxín ntihi chjasintajni, mé tí Nchakuen Dios, la ko tí inta la ko tí jni; a ntá tí iní mé jnkokoá chrónka. ⁹ Á chrókuitekaonni tí nkehe chrónka chojni ó? A ntá tí nkehe tsíchrónka Dios, antsí má tjetqan kíxin táha la Dios tsíchrónkaxín kíxin nkexrí tjen tí Xjeen ch'án. ¹⁰ Tí nkexro titekaon tí Xjeen Dios na mé asén ó tónoexín tíha. A ntá tí sín titekakonhya sín Dios, la ntáchro sín kíxin Dios la ch'ia ch'án kíxin kuítekakonhya sin tí nkehe tsíntáchro Dios kíxin nkexrí tjen Xjeen ch'án. ¹¹ Tí nkehe tsíchrónka Dios mé tíhi kíxin tsjanjon ch'án kjuachón jnkochrixín, a ntá tí kjuachón mé chóntha tí Xjeen ch'án. ¹² A ntá tí nkexro chóntha tí Xjeen Dios mé kjaxin chóntha kjuachón; a ntá tí nkexro chóntahya tí Xjeen Dios la mé chóntahya kjuachón.

Chrónkaxín nkehe kuente kjuachón

¹³ Tí nkehe mé kjinni kíxin jahará ó títekáonrá tí Xjeen Dios, kíxin mé tsongoaxínrá kíxin chaxín chontará kjuachón jnkochrixín.

¹⁴ Tíhi mé chóixínni Dios kíxin noheni kíxin ichréñ nkehe tsjancheheni ch'án éxi tjinkaon ch'án la jehe ch'án la tsinhin ch'án. ¹⁵ A ntá tí xikaha ó noheni kíxin Dios tjetinhin tí nkehe nixjehéni ch'án, a ntá kjaxin ó noheni kíxin ó chóntani tí nkehe kjuancheheni ch'án.

¹⁶ A ntá jnkójínrá ts'ikonrá ijnko kíchuárá tjasin jie, a ntá tí jehya ijnko jie chrók'uenxín ch'án, la chrókjuanchehérala Dios kíxin chrókjuinchexraxinkaon ch'án kíxin kjuasin ch'án jie, a ntá Dios chrókjuanjon ch'án kjuachón, tí chaxín jehya ijnko jie chrók'uenxín chojni. A ntá tí jie chrók'uenxín chojni la ntáxrjan kíxin íchá jína chrókjuanchehyará Dios kíxin chrókjuinkitsa tí ch'ín a. ¹⁷ Kaín nkehe jínahya la ijié tíha. Kjánchó siín jie ts'enxínya chojni.

¹⁸ Ó noheni kíxin tí nkexro tinkáchónki It'eni Dios tjasinhya sín jie, kíxin tí Xjeen Dios tjinkitsa tí jehe sín, a ntá tí Jínahya tsjachahya tsjachroe tí jehe sín.

¹⁹ Ó noheni kíxin Dios t'ayakonhen tí jeheni, a ntá tí Jínahya chóntha kjuachaxin t'etuñhen kuenté chjasintajni.

²⁰ Ó noheni kjaxin kíxin Xjeen Dios kui, la ko kjuinkitsa ch'án tí jeheni kíxin chrókónoheni nkexrí tjen Dios chaxín. A ntá tjejókoní jnkokoá tí nkexro chaxín, tíha mé Jesucristo tí Xjeen Dios. Tíha mé Dios chaxín, la tsochóntaxínni ch'án kjuachón jnkochrixín. ²¹ Éxi xjanna t'íkuñan tí jahará, la titohérá tí dios tsíkjanoya. Amén. Ó tjen.

Yóxin xroon tsíkjín ch'ín Juan

¹ Janhan mé ijnko nkexro ó táda t'ayakonhen ninko mé ikjian tí xroon ts'áyéhé tí sín tsíkjeyá Dios tójnkotsé sín ntiha, la mé chaxín tjuahá sín: a ntá jehya janhván, la kjaxin kaín tí sín chóxin tí tan chaxín. ² Tjuahará tí jahará kíxin tí tan chaxín ó chóntha ąsénni, tíha mé ts'ejókoni jnkochríxín. ³ It'eni Dios la ko Inchéni Jesucristo mé Xjeen Dios chrókjuintayaonrá ch'án la ko chrókuikónóahará ch'án la ko chrótjahará ch'án kjuaxróxin kíxin chaxín tjuahará ch'án.

⁴ Imá chàna k'uikuān kíxin isorá tjejorá títekáonrá tí nkehe chaxín, éxi tsík'etqan It'eni Dios. ⁵ A ntá jie jahará kichó ni, xrjanóahará kíxin chrótjuèhérá kíchuárá. Méxrä xíkaha tjékjian tí xroon i, la jehya ijnko nkehe níxin tsík'etqan Dios. Náhí. Tíha la mé tí nkehe tsík'áyéheni tí kjuák'e Inchéni Jesucristo. ⁶ A ntá tí tjuéheni kichó ni la mé tíhi kíxin chrók'uejóni éxi tsík'etqan Dios; a ntá tí nkehe tsík'etqan Dios la mé ó tsíkinhínrá jahará tí senó kíxin chrótjuèheni kichó ni.

Tí chojni xrich'ia

⁷ Nchónhya chojni chjasintajni xrich'ia sín titekakonhya sín kíxin Jesucristo kui k'óna chojni. A ntá tí chojni xíkaha mé ixri xrich'ia la ko nínkakonhen Cristo.

⁸ Chrókóxakonhanrá kíxin chrók'uitjáyanhya tí xra kjuich'erá kíxin naxqchrók'uyayéhérá tí nkehe tsjintaxín ts'ayéhérá.

⁹ A ntá tí siín ijnko nkexro kuítuhe tí nkehe kjuako Cristo ntá kjuichroe la mé chónthaya sín Dios; a ntá tí nkexro titóehya tí nkehe kjuako Cristo mé chóntha sín It'eni Dios la ko tí Xjeen ch'án. ¹⁰ A ntá jnkoyín sín chrókjuijitsjehe tí jahará, a ntá ntoáhya chrókjuako sín, la chrókjuánjonhyará kjuachaxin chrókuituhe tí sín a ntoará la ko ni chrónixjéhyará sín jnkoyína. ¹¹ A ntá tí nkexro tsonixjéhé tsontáchro kíxin: “¿Á jína k'uinka?” na mé éxi tóxrjínhijín sín tí nkehe jínahya ich'e tí sín a.

Tí tan tsjixixín

¹² Chonta nchónhya nkehe chrókuinhínrá jahará, kjánchó tjínkakonhya chrókjian xroon ó. Náhí. Tjínkaván kíxin tjoka chrókjuasántsjahará tí jahará tsonixjáhará kíxin chrókjuintaxín chrókóchéheni.

¹³ Tí sín kíchuárá tójnkotsé kuénte ninko ntihi, mé tí sin kjaxin tsíkjeyá Dios, mé nixjahará sín. Amén. Ó tjen.

Tí níxin xroon tsíkjin ch'ín Juan

¹ Janhan mé tí nkexro t'ayakonhen ninko mé tjékjian tí xroon ts'áyéhé tí ch'ín choxian, mé tí ch'ín Gayo tí ch'ín chaxín tjuahá.

² Kichóni, tjáncháha Dios kixin éxí jaha jína tjen tinkachónkia Inchéni la jína chrók'uaxrje kaín xrə ch'e la ko jína chrókuak'e jaha. ³ Imá kóchàna tió kui iso tí sín kichó ni chrónka sín kixin jína tjákoxian tí tan chaxín. ⁴ Kohya ijnko nkehe qantsí má nchechàna éxí tió kuinhán kixin tí sín t'íkuān éxí xjanna tjejótitekaon sín tí tan chaxín

⁵ Kichóni, chaxín jína tjech'e xrə tjinkitsa tí sín kichó ni la ko qantsí tjinkitsa tí sín tsíkjixin ókjé chjasin. ⁶ A ntá tí tsíkójkotsé tí sín kichó ni la tsíchrónka sín kixin nkexrí tjuéhé tí jehe sín. Jaha chrókuinkitsa tí nkehe t'ichjánxinhin sín tí sátsji sín. Xikaha mé tóxrjinhin Dios. ⁷ Tió sákjuí sín kjuankixin sín chrónka sín itén Inchéni la chrohya sín chrók'uáyéhé sín ninkehó nkehe kuènte tí sín chónhya Dios. ⁸ Méxrə tí jeheni t'ichjánxin chrókuinkitsani tí jehe sín kixin tsjacha sín tsocchrónkaxín sín tí tan chaxín ntoá.

Ntoáhya kjuako ch'ín Diótrefes

⁹ Janhan ikjian ijnko xroon k'uáyéhé tí sín tójkotsé ntiha. Kjánchó ch'ín Diótrefes kuítekakonhya ch'án tí nkehe k'uetuñhenni ch'án kixin tjinkaon ch'án chrók'uetoan ch'án jehó ch'án. ¹⁰ Méxrə xikaha tí sátsja ntiha tsonixjahá ch'án kixin tí kjuach'ia ntáchro ch'án t'ántaxínhin ch'án tí jeheni. Jehya táchó ich'e ch'án. Kjaxin tjanjonhya ch'án kjuachaxin ts'ejó tí sín kichó ni tji; a ntá tí sín tjinkaon chrókuanjon kjuachaxin la t'etoan ch'án kixin tsjanjonhya sín kjuachaxin la ko t'etoan ch'án kixin tsochjinahya sín tí tójkotsé tí chojni.

¹¹ Kichóni chrókuákoxinha tí nkehe jinahya. Ichá jína chrókuákoxian tí nkehe jína. Tí nkexro ich'e nkehe jína na mé kuènte Dios. A ntá tí nkexro ich'e nkehe jinahya la mé tsík'ikonhya sín Dios.

Jína tjákoxin tí ch'ín Demetrio

¹² Kaín sín ntáchro sín kixin jína tjákoxin tí ch'ín Demetrio la mé chaxín tíha. Kjaxin tí jeheni chrónkani tíha la ko jahará ó nohará kixin tí nkehe ntoá chrónkani.

Kjuixixín nixja ch'án

¹³ Janhan chonta nchónhya nkehe tsontáxrjan, kjánchó tjinkakonhya tsokjian ó ¹⁴ kixin tjinkaván tjoka ts'íkuān tí jaha, a ntá tsjoni.

¹⁵ Kjuaxróxin chrókuak'e jaha. Kaín nkexro choxian ntihi nixjaha sín. Tétuñhan nixjehé jnkojnko tí sín choxinni.

Tí xroon tsíkjín ch'ín Judas

¹ Janhan Judas, t'ahq̄ xra Jesucristo, la sana mé Jacobo la mé ikjian tí xroon í ts'ayéhé tí sín tsíkjeyá It'eni Dios tsíkjinchetjóá ch'án kíxin tsinkáchónki sín ch'án. Mé xíkaha Jesucristo t'ayakonhen ch'án tí jehe sín. ² Imá kuíkonóhará ch'án ntá ts'ayéhé rá kjuaxróxin kíxin tjuahará ch'án.

Tí sín ntoáhya tjako

(2 Pedro 2.1-17)

³ Kíchóni, imá tjínk̄avan tsokjian tí xroon ts'ayéhé rá tsochrónka nkexrí tsaáxinni kaín ni. A ntá t'íkuān kíxin t'ichjánxín tsokjian tí xroon ts'ayéhé rá tsōxrjanóaxínrá kíxin jína chrókiénxínrá nkehe chrókjúáteherá kíxin nkexrí tinkachónkirá Închéni kíxin tí fe la mé ónaá tsík'ayéhó tí sín tsíkjinchetjóá Dios. ⁴ A ntá jie ó kuik'ixenhen iso sín ch'ia tí tjejorá. A ntá ósé nixja xroon itén Dios kuénte tí sín a kíxin tsjasóte sín. Jehe sín la chojni jínahya ntá ntáchro sín kíxin tinkachónki sín Dios la ó ch'iaxón sín ntá imá tjasin sín jie. La titekakonhya sín Dios, jehó t'etoan, la ko titekakonhya sín Închéni Jesucristo.

⁵ Jahará kjónté ó nohará la jehí tjínk̄avan sintaxráxinkáonrá ínaá kíxin Închéni Dios kuakitsjexín ch'án Egipto tí sín chjasin Israel, ntá kjónté xíkaha la chr'éxín kjuínchek'itjáyan ch'án tí sín kuítekakonhya sín tí jehe ch'án.* ⁶ Kjaxin tí sín ángel kuítekakonhya sín tí k'uetoan Dios ntá kuítuhe sín tí kjuachaxin tsíkjanjon Dios tsík'ayéhé sín la ko kuítuhe sín tí k'uék'ejó sín jína, a ntá jie Dios k'uetoan ch'án kíxin ts'ejóchjina sín tí sitié la ts'ejóchónhen sín tsijia tí yaon tsitqexín ijié sín. ⁷ Kjaxin tí sín chjasin Sodoma la ko tí sín chjasin Gomorra la ko tí sín chjasin chjinaxón kóyóhē sín tí sín ángel kuítekakonhya la kjuasinko sín jie chojni chjin ókjé la ko kjuasinko sín jie kíchó sín kjónté jnkokón ntoa sín. Tíha mé chróxraxinkakonxín kaín chojni kíxin nkexrí tsónhen tí sín titekakonhya tsjasótexín sín tí xrohi jnkochríxín ts'ankahya.

⁸ Méxra kjaxin tí chojni a kotáchrién sín tsík'ikonxín kíxin ó nchoxon chrókjusinko sín jie chojni chjin ókjé la ko chrókuitækakonhya sín tí kjuachaxién Închéni la ko chrók'uántaxínhin sín tí sín ángel chóntha kjuachaxin t'etoan. ⁹ A ntá tí ch'ín arcángel Miguel kjuánjonko ch'án tí ch'ín Tsochren la ko ikjo sín kjuánjonxín sín nkehe tsónhen tí cuerpo kuénte ch'ín Moisés.† A ntá jehe ch'án kjónté xíkaha la kjuínchekjasótehyá ch'án tí ch'ín Tsochren. Jehó ntáche ch'án kíxin: “Închéni mé tsjentuáha tí jaha.” ¹⁰ A ntá tí chojni i t'ántaxínhin sín tí nkehe tienxínya sín la tjenkayáxin sín éxi ko tienxínya nchexiteyéhē tí nkehe ntáchro asén, mé xíkaha tí nkehe jínahya kjuich'e sín ts'itjáyanxín.

¹¹ ¡Nòa tí jehe sín! Chréhē sín éxi kjuich'e ch'ín Caín.‡ Tjinkaon sín chrókjuchacha sín chichaon ntá ntoáhya kjuich'e sín éxi kjuich'e Balaam, la ko its'en sín éxi ik'uén ch'ín Coré kíxin kuítekakonhya sín.§* ¹² Ijnko kjuatósuehē kíxin tjejóyákjanxín sín tí siín kia náxrjón chontará, kíxin tjejóné sín la ko tjejót'i sín chéhē sín la kjónté xíkaha la ninkehó kjuasáya chóntahya sín. Tjejó sín éxi tí sín t'ayakonhen kolélo kjánchó jehe sín t'ayakonhen sín asén sín ó. Jehe sín la éxi tjuí chóntahya ntá tjakáko xrínto; la ko éxi ijnko nta t'ónahya to tí nitjó chrók'óna to, éxi yáya tsík'en tsík'axrjenkíxín nuéé. ¹³ Jehe sín na mé éxi ntayaon jiehe síxróji lóxrjó ó chóntahya ntá jína mé xíkaha chónkó tí nkehe ch'e sín mé ijnko kjuatósuehē tíha; la ko éxi konotsé kjuichroe sákjuí ókjé; a ntá tjechónhen sátsji sín tsjasóte sín sitié jnkochríxín.

¹⁴ A ntá kjuák'e ch'ín Adán, a ntá yatoxin chr'éxín kui ch'ín Enoc nixjaxín kjuachaxién Dios ntáchro ch'án kíxin k'uíkon ch'án itjen Închéni kuíkao nchónhya mil tí sín ángel kuénte

* **1:5** Éxodo 12.51 Números 14.29-30 † **1:9** Deuterónomio 34.6 ‡ **1:11** Génesis 4.3-8 § **1:11** Números 31.16

* **1:11** Números 16.1-3

ch'án,¹⁵ kíxin sinchequitoexín ch'án ijié kaín tí sín jínahya kíxin kaín tí jínahya kjuich'e sín la ko kaín nkehe k'uénixja tí sín jínahya k'uántaxíñin sín tí jehe ch'án.¹⁶ Xráxín tóxrjíenhya sín nkehe sítónhen la ko ixri sín tjonta kichó sín. Jehó xritjeyá sín tí nkehe tóxrjíñin sín tjenkayáxin sín. Ihnke sín nixja sín la ko itjo sín jína chojni kíxin ntá tí sín a chrókjuiñkítsa jehe sín.

Nchexraxinkaon ch'án tí sín tinkáchónki Cristo

¹⁷ A ntá jahará kichó ni, xráxinkáonrá kíxin tí sín tsíkjeyá Închéni Jesucristo¹⁸ ntáchro sín kíxin tí yaon tsjixixín tsjejexin chjasintajni ts'ixin chojni tsitekakonhya sín ts'ántaxíñin sín tí nkehe tjinkaon Dios la ko tsotjinkaon sín sinchexiteyéhe sín tí nkehe jínahya ntáchro asén sín ó.¹⁹ Tí sín a mé tjinkaon ts'óxika tí sín jnkokoá tjejótójkotsé kíxin naxa tóxrjíñin sín sich'e sín nkehe siín chjasintajni kíxin chontahya sín Nchakuen Dios.

²⁰ A ntá jahará kichó ni tjuahará, qantsí jína chrók'uejorá tinkachónkirá Închéni. Chrónixjeexínrá Dios tí kjuachaxin kuènte Nchakuen ch'án.²¹ Jína chrók'uejorá kíxin tjuahará Dios ts'ejochonhérá tí yaon tsokjan Închéni Jesucristo kíxin kjuasáyé ch'án tsotjáhará ch'án kjuachón jnkochríxín.

²² Chrókuikonóehérá tí sín naxa tienxínya.²³ Jnkojín sín chrókjuiñchekaárá chrókuakitsjekjanxínrá sín chríkjan xrohi, la ko chrókuikonóehérá í so sín kjánchó chróchontará cuidado tí jehe sín kíxin kjónté ti iké sín kjaxin chóntha jie.

Tjanchia ch'án kjuasáya

²⁴⁻²⁵ Jnkokoá Dios tjen mé imá nohe ch'án la ko sinchekaáni ch'án la chóntha ch'án kjuachaxin ts'ayakonhenni ch'án kíxin chrókjuasinyani jie la ko tió tsijini tí tjen ch'án la ninkehó jie chróchontahyani, imá tsochéheni tí tjen ch'án ntiha. Kjuasáyé Dios imá chóntha ch'án kjuachaxin t'etqan ch'án la ko kjuinchekaáni ch'án kjuachaxin Închéni Jesucristo. Jehe ch'án jnkochríxín tjen ch'án chóntha ch'án kénxín kjuachaxin. Amén. Ó tjen.

Tí nkehe chrónka Jesucristo k'uíkon ch'ín Juan

18

Kaín tí nkehe i mé chénka Dios Jesucristo kíxin jehe ch'án tsochénka tí sín ch'ehe ch'án xrə́ tí nkehe tjoka tsønhen. Ntá Jesucristo kjuínchenohe ijkno ángel kuènte ch'án kíxin nkexrí chrókonohe tí ch'ín Juan ch'ehe ch'án xrə́. **2** A ntá jehe ch'án mé k'uítuenhen ch'án ntá chrónkaxín tí nkehe chaxín tsíntáchro Dios la ko tí nkehe chrónka Jesucristo la ko kaín tí nkehe tsík'ikon ch'án nkexrí kjuakoxín Dios.

3 Náxrjón tjejó tí sín nchekuáxin tí xroon i la ko kjaxin tí sín tjejótinhin tí palabra chrónka nkehe tsønhen la ko tóxrjinhín sín titekaon sín nkehe nixja tí xroon i kíxin ó kuichjina tí hora tsoxiteyá tíha.

Ch'ín Juan ikjin ch'án xroon ts'áyéhę́ tý yato níjko

4 Janhan Juan ikjian tí xroon tsochr'anhan tí yato níjko tjejó estado Asia. Jahará chrók'uayéhérá kjuasáyé Dios la ko kjuaxróxin. Jehe ch'án mé itjen ch'án la ko xráxín tjen ch'án la ko jehe ch'án mé xiki ch'án ínaá la ko kjaxin tí yato Nchäkuen ch'án tjejó tí trono t'etqanxín ch'án mé tjanjon kjuaxróxin. **5** La ko kjaxin kjuasáyé Jesucristo. Jehe ch'án chaxín chrónka kaín nkehe ntoá la ko jehe ch'án mé xrankíxixín xechón kjónté tsík'en kíxin tjetoan ch'án kíxin t'etueñhen ch'án kjónté kaín tí sín rey la ko tí sín t'etqan siín chjasintajni. Jehe ch'án mé tjuéheni ch'án la ko tí ijníé ch'án mé k'uíjmáxinni kaín tí jíe chóntani. **6** Jehe ch'án mé tsíkjanjon kjuachaxin tsík'ónani nchat'á kíxin sich'eheni xrə́ It'éní Dios. Tí kjuachaxin kuènte ch'án me ts'etqan jnkochríxín. Mé xíkaha tsøxiteyá. Amén.

7 Ts'íkon chojni kíxin Cristo la ó tsi chríkjan tjuí. Kaín chojni ts'íkon ch'án la ko kjaxin tí sín k'uékónínkakonhen tí jehe ch'án tsíkjincheckjasóte sín ch'án mé ts'íkon sín ch'án la ko kaín chojni chjasin siín chjasintajni tsotsjánka sín tió ts'íkon sín tí jehe ch'án. Mé xíkaha tsønhen. Amén.

8 Janhan mé tí xrankíxixín la ko tí tsjixixín éxí tí letra xrankíxixín A la tsjixixín Zeta. Mé xíkaha ichro Ínchéni Dios, tí nkexro imá t'etqan. Jehe ch'án mé itjen ch'án la ko xráxín tjen ch'án la ko jehe ch'án mé xiki ch'án ínaá.

Ch'ín Juan tsík'íkon ch'án kíxin Cristo chóntha kjuachaxin

9 Janhan Juan mé ijkno kíchó tí jahará mé tjékian Jesús la ko tí kjuachaxin kuènte Dios chonta la mé jahará la ko jeheni jnkokón tjejótjasóteni la jehe ch'án tjinkitsani kíxin tsjachani. Kjuàkua itén Dios éxí chrónka Jesucristo la mé tíha kjuak'échjinaxián tí isla it'in Patmos. **10** A ntá ijkno yaon xraxinkakonxínni Ínchéni la ikui kjuachaxin Nchäkuen Dios tí tjén tí janhan la kujñhān kíxin nóton tí janhan ijkno nkexro nixja imá itsen éxí itén ijkno trompeta. **11** Mé ntáchro ch'án kíxin:

—Janhan mé tí xrankíxixín la ko tí tsjixixín éxí tí letra xrankíxixín A la tsjixixín Zeta. Mé tsokjian jaha ijkno xroon kaín tí nkehe k'uíkuān kíxin tsochr'enhén tí yato níjko tjejó tí estado Asia na mé tí níjko tjen chjasin Éfeso, la Esmirna, la Pérgamo, la Tiatira, la Sardis, la Filadelfia, la ko Laodicea —ichro ch'án.

12 Ntá nkátjíá tsjahä kíxin nkexro itén tí tjenixjana ntá xrínahya k'uíkuān yato candelero tsík'óna chica oro. **13** A ntá chríkjan tí yato candelero k'uíkuān ijkno nkexro éxí yóhę Xjeen Dios tsík'óna chojni. Ntá tí iké ch'án la ika kjínjin tjenkáya ch'án hasta tsíkoyohę toté ch'án la ko mé chóntha ijkno cinta jehó oro tjenkáni ntakuin ch'án. **14** Tí kaxjihí ch'án la tjóá éxí kaxree kolélo tjóá o éxí chrinta tsjehe la ko tí ikon ch'án la éxí xrohi nene tsjehe. **15** Ntá tí toté ch'án la éxí chica sine tjákini na ntá tsík'axrjexín tja. A ntá tí itén ch'án la itsen éxí tóvéntó nchónhya ntarío. **16** A ntá tí tja ch'án chjina mé chóntha yato konotsé. A ntá tí ir'va

ch'án k'uaxrjexín chica espada iyo, yánjín taté. A ntá imá tjákini tsjehe ikon ch'án la éxi yaon t'inkaséyanxín imá.

¹⁷ A ntá tí k'uíkuan xíkaha la kjuáchr'ítsinka toté ch'án éxi tsík'enña. A ntá jehe ch'án kjuak'etja tja ch'án chjina chrítaón tí janhan ntá nixjana ch'án ntáchro ch'án kíxin:

—Chrakonhya jaha. Janhan mé tí xránkixixín la ko tí tsjixixín. ¹⁸ Janhan tí nkexro tjechón. Ik'uén, a ntá ijie la tjéchuán ínaá la itjén jnkochríxín. Amén. Janhan chonta llave kuénte chojni its'en la ko kuénte tí siín tí sín tsík'en. ¹⁹ Méxra ikjian jaha tí nkehe k'uíkuán mé tí nkehe siín ijie la ko tí nkehe tsónhen chr'éxin. ²⁰ Ninkexró k'uékienxínhyá nkexrí t'axrjexín tí yato konotsé k'uíkuán chonta tjana chjina, la ko tí yato candelero tsík'óna chica oro. Mé tí yato konotsé t'axrjexín kíxin tí yato ángel t'ayakonhen tí yato ninko la ko tí yato candelero k'uíkuán me kjaxin t'axrjexín tí yato ninko.

2

Tí tan k'uáyéhé tí yato ninko: Tí tan k'uáyéhé tí sín chjasin Éfeso

¹ 'Tsokjian tí nkehe ts'áyéhé tí ángel t'ayakonhen tí ninko Éfeso: "Xíkaha ichro tí nkexro chóntha yato konotsé itja ch'án chjina la ko xritjak'e ch'án jnkosiñé tí yato candelero tsík'óna oro. Ntáchro xíkihi: ² Janhan nòna kaín tí xra ch'erá la ko nòna kíxin tóxrjánhyará tí sín jínahya. Janhan la ó nòna kíxin kjuich'erá prueba tí sín ntáchro kíxin apóstol tí jehe sín la ntá jehya la ntá kónoxín kíxin xrich'ia tí jehe sín. ³ Nchónhyá kjuasótiará la kjónté chonhénrá kóninkákonhyará la imá kjuich'erá xra kíxin tinkachónkirá nína la ko nunca kóxrjéhyará. ⁴ Kjánchó tjánchía ijkno jie tí jahará kíxin tinkachónkihyará éxi kjuankixixínrá k'uétjuñarará. ⁵ Méxra chróraxinkáonrá kíxin ó kuijtohérá tí k'uétjuñarará la ntá chrókjuinkírá tí nkehe tjenkayáxinrá la ko chrókjuich'erá xra éxi tí kjuankixixínrá. A ntá tí náhí, la tjoka tsjasán la tsjakíyan tí candelero tí tjejorá tí nunca tsjinkíhyará tí nkehe jínahya tjenkayáxinrá la tí tsokjanhyará tsoxráxinkáonrá Dios. ⁶ Kjánchó chrókónohará kíxin tóxrjína tí nkehe tjejoch'erá kíxin tóxrjánhyará tí xra ch'e tí sín nicolaítas kíxin kjaxin janhan nínkakonhán tí nkehe ch'e sín. ⁷ Tí nkexro tjinkaon chrókuinhin la chrókuinhin sín tí nkehe nixjéhé Nchákuén Dios tí ninko ntáchro kíxin: Tí sín tsjacha sinchexiteyàna sín la tsotjáha sín kjuachaxin sine sín tí to t'óna tí nta tjanjon kjuachón itjen tí tjen Dios."

Tí tan k'uáyéhé tí sín chjasin Esmirna

⁸ 'Ikjian tí nkehe ts'áyéhé tí ángel t'ayakonhen tí ninko Esmirna: "Xíkaha ichro tí nkexro xránkixixín la tsjixixín, mé tí nkexro ik'uén la ntá jie tjechón: ⁹ Janhan la ó nòna kaín nkehe tjejoch'erá. Ó nòna kíxin nkexrí tjejótjasótiará la ko ó nòna kíxin nòará kjánchó jehya. Náhí. Jehe sín mé tójnkotsé sín tí ninkoé tí Jínahya. ¹⁰ Kjánchó chrakonhyará kjónté tsjasótiará. Tí ch'ín Tsochren tsochr'ánxanhánrá ntoiéchiso jnkojín tí jahará kíxin tsotsjexín nkexrí tí jahará ntá t'ichjánxín tsjasótiará iso yaon. Kjánchó chrókuítóéhyará Dios kjónté chrók'uenrá ntá janhan tsotjáhará tí kjuachón chr'éxin. ¹¹ Tí nkexro tjinkaon chrókuinhin la chrókuinhin tí nkehe nixjéhé Nchákuén Dios tí ninko: Tí nkexro tsjacha sinchexiteyàna sín la í tsjasótehya, la tí yóxin its'en chojni la í ts'enhyá tí jehe sín."

Tí tan k'uáyéhé tí sín chjasin Pérgamo

¹² 'Tsokjian tí nkehe ts'áyéhé tí ángel t'ayakonhen tí ninko Pérgamo: "Mé xíkaha ichro tí nkexro chóntha chica espada yánjín taté: ¹³ Janhan ó nòna kaín nkehe tjejoch'erá la ko ó nòna nketí tjejorá kíxin tí tjejorá la t'etoan ch'ín Satanás la kjónté la jína kuinkachónkirá tí janhan. Jahará kuijtoéhyará kuinkachónkirá tí janhan kjónté tí yaon tsík'en ch'ín Antipas, ijkno nkexro kjuinchexiteyàna jína. Jehe sín tsík'óyánxin sín ch'án tí tjejorá ntiha kíxin ntaha t'etoan ch'ín Satanás. ¹⁴ Kjánchó janhan tjánchía ijkno jie tí jahará kíxin iso nkehe ntoiáhya ch'erá. Siín ntiha chjasin Pérgamo tí tjejorá iso sín tjinkakonhya sín tsítóhe sín tí nkehe k'uékjako ch'ín Balaam, tí nkexro k'uék'etuñhen ch'án tí ch'ín Balac kíxin tí sín

israelita chrókjuasin sín jie chrókjóne sín tí nkehe tsíkjokehe sín tí nkehe tsíkjanoya la ko chróchóntha sín chojni chjin ókjé chrókjuasinko sín jie. ¹⁵ Kjaxin xikaha tí tjejorá la siín iso sín tjinkakonhya sín tsítuhe sín tí nkehe tjako tí sín nicolaítas. Janhan mé tjinkakonhya tí sín a. ¹⁶ Méxra chrókjanrá chrókuinkachónkirá Dios. A ntá tí náhí, la tjoka tsjasán tí tjejorá la tsjánxonkianxian sín tí espada t'axrjexín ir'vá. ¹⁷ Tí nkexro tjinkaon chrókuinhin la chrókuinhin sín tí nkehe nixjehé Nchákuén Dios tí njinko ntáchro kíxin: Tí nkexro tsjacha sinchexiteyána sín la tsotjaha sín kjuachaxin chrókjóne sín maná tjechónhen la ko tsotjaha sín ijnko xro tjóá la tí xro la ts'íníxín ihnié sín nixín chónhya ninkexró. Jehó tí nkexro ts'áyéhe mé tsongohe."

Tí tan k'uáyéhe tí sín chjasin Tiatira

¹⁸ 'Tsokjian tí nkehe ts'áyéhe tí ángel t'ayakonhen tí njinko chjasin Tiatira: "Mé xikaha chro tí Xjeen Dios, tí nkexro ikon éxi yóhe xrohi nene sít'axrjexín la ko toté éxi chica sine tjákini tsjehe. ¹⁹ Janhan ó nóna kaín tí nkehe tjejoch'erá la ko ó nóna kíxin tjuanará la ko tinkachónkirá tí janhan la ko ó nóna tí xra tjejoch'erá la ko ó nóna kíxin tjejochonhénrá tóninkákonhyará. La ko ó nóna kíxin antsí tjejoch'erá xra ijie ntá tí kjuankíxixínrá la kényo. ²⁰ Kjánchó tjánchía ijnko jie tí jahará kíxin tjánjonrá kjuachaxin tjako tí tjan Jezabel. Kjaxin ntáchro tjan kíxin nixja tjan itén Dios kjánchó ch'iyeho tjan tí sín ch'ena xra kíxin kjáxin sín chrókjuasinko sín jie chojni chjin ókjé la ko chrókjóne sín tí nkehe tsík'oyán sín tsíkjokehe sín tí nkehe tsíkjanoya. ²¹ A ntá janhan ó kuítóha tjan intsi kíxin chrókuinkí tjan tí tjenkayáxin tjan kjánchó tjinkakonhya tjan sich'e tjan xikaha la tjinkakonhya tjan chrókuítuhe tjan tí jie tjasinko tjan chojni ntoa. ²² A ntá jie tsjánjuan kjuachaxin tsóníhi tjan tsjak'eták'á tjan cama la ko kjáxin tsjasóte kaín tí nkexro kjuasinko tjan jie tí nunca tsítuehýa sín tí nkehe tjinkaon tjan sich'e tjan. ²³ A ntá janhan ts'oyán tí xjeen tí jehe tjan. Ntá kaín tí njinko tsongoexín sín kíxin janhan choxian nkehe tónhen asén kaín chojni. A ntá jnkojnko tí jahará la tsjénkahará nkexrí tí xra kjuich'erá. ²⁴ A ntá tí í sorá tjejorá chjasin Tiatira tí chréhyará tí nkehe ntoáhya tjako sín la ko tjinkákonhyará chrókónohará tí nkehe jínahya kuénte ch'ín Tsochren la xikahó la í tsétuñhyará í jnko xra. ²⁵ A ntá jahará la tí nkehe ó chontará la t'ayakonhénrá hasta tsokjan janhan. ²⁶ A ntá tí sín tsjacha sinchexiteyána sín la ko xikaha sich'e sín hasta tsjixixín kíxin janhan tjíkavan xikaha chrókjuich'e sín na mé janhan tsjánjuan kjuachaxin ts'etueñhen sín kaín nación. ²⁷ Na mé xikaha T'aná mé chjina kjuachaxin tsétoan la kjáxin xikaha jehe sín mé ts'etueñhen sin tí nación yóhe chróchóntha sín ijnko chica vara kíxin chróchjéhe sín tí chí chrók'ókuén tí chí tsík'óna nchetje. ²⁸ Me kjáxin tsotjaha sín tí konotsé tí tji nchítjen. ²⁹ A ntá ti nkexro tjinkaon chrókuinhin la chrókuinhin tí nkehe nixjehé Nchákuén Dios tí njinko."

3

Tí tan k'uáyéhe tí sín chjasin Sardis

¹ 'Tsokjian tí nkehe ts'áyéhe tí ángel t'ayakonhen tí njinko chjasin Sardis: "Xikaha ichro tí nkexro chóntha yato Nchákuén kuénte Dios la ko chóntha tí yato konotsé: Janhan nóna kaín nkehe ch'erá, ó nóna kíxin éxi tsík'en tí xra ch'erá kjónté nchehnkerá kíxin tjejochónrá. ² T'ayará. Naxa t'ayakonhénrá kjónté í tsjéhya tí nkehe kuítóhe kíxin kjáxin tíha mero its'en. Ó k'uíkuán kíxin tí xra ch'erá la t'ikon tí Dios kuéntana kíxin ntoáhya. ³ Chróxráxinkáonrá tí nkehe tsíxrakohará la ko tíha chrókjuich'erá la chrókjanrá chróxráxinkáonrá Dios. A ntá tí naxa tjejochrinrá la titaya tsjasán éxi ijnko síchee la tsongoahyará nkesá tíha. ⁴ Kjánchó naxa siín iso chojni ntaha chjasin Sardis naxa kjuínchekjítahya sín iké sín la jehe sín la ts'ájikian sín kíxin chóntha sín ka tjóá kíxin jehe sín la jína sín. ⁵ Tí sín tsjacha sinchexiteyána sín la ts'áyéhe sín ka tjóá ts'inkáya sín la ko tsoxíkahya ihnié sín chóntha tí libro ts'íníxín ihnié tí sín tsaá la ko tsochoxian sín

nkayakon T'aná la ko nkayakon tí sín ángel kuènte ch'án. ⁶ Tí nkexro tjinkaon chrókuinhin la chrókuinhin tí nkehe nixjehé Nchakuen Dios tí ninko."

Tí tan k'uáyéhé tí sín chjasin Filadelfia

⁷ 'Tsokjian tí nkehe ts'áyéhé tí ángel t'ayakonhen tí ninko chjasin Filadelfia: "Xikaha ichro tí nkexro tjóá la ko chaxín mé tí nkexro chónta llave kuènte ch'ín rey David. A ntá tí tsakitjehé ch'án puerta la ninkexró tsjachahya ts'ikjéhé, a ntá tí ts'ikjéhé ch'án puerta la ninkexró tsjachahya tsakitjehé. ⁸ Janhan ó nòna kaín nkehe tjeoch'erá. Kjuaké tí tjeorá ijnko puerta xitjehé la ninkexró xitjahya ts'ikjéhé. Kjónté intsíkoá kjuachaxin chontará la jahará kjuinchexiteyará tí nkehe kjuàkua la ko kjuinchemáhyará tí janhan. ⁹ Tí sín tsíkitekaon Satanás la ntáchro sín kíxin judío sín kjánchez jehya sín, xrich'ia sín la chr'éxín tsétuanhán sín ts'ejóxin toch'in sín chrínkí totárá la ntá tsongohe sín kíxin chaxín janhan tjuáhará. ¹⁰ Ó kuítekáonrá tí nkehe kuétuhanhanrá la jína tjeorá la mé xikaha janhan ts'ayakonhanrá tí ichrén nkehe tsonghanrá tió tsí nkehe tsonghen kuenté chjasintajni kíxin ó jehí xikaha tsonghen kaín chojni tjejó chjasintajni. ¹¹ Janhan mé tjoka ts'inka. Méxra t'ayakonhénrá tí nkehe chontará kíxin ninkexró chrókuakitsjahará tí nkehe ó kjuachará. ¹² Tí nkexro tsjacha sinchexiteyána la ts'óna sín columna kuènte ninko kuènte Dios kuéntana la nunca xitjahya sátsjixin sín ntiha. La janhan tsokjian ihnié tí Dios kuéntana tsjiko sín la ko tsokjian ihnié chjasén Dios kuéntana mé tí Jerusalén níxín tsixín nkajní tí tjen Dios kuéntana. Kjáxin tsokjian nína níxín tsochonta sín. ¹³ Tí nkexro tjinkaon chrókuinhin la chrókuinhin tí nkehe nixjehé Nchakuen Dios tí ninko."

Tí tan k'uáyéhé tí sín chjasin Laodicea

¹⁴ 'Tsokjian tí nkehe ts'áyéhé tí ángel t'ayakonhen tí ninko chjasin Laodicea: "Xikaha ichro tí nkexro chaxín ntoá mé tí nkexro chrónka tí nkehe chaxín. Tí kjuachaxién ch'án kjuich'énaxín Dios kaín nkehe. ¹⁵ Ó nòna kaín nkehe tjeoch'erá. Ó nòna kíxin jahará la ní jehya kinrá o sóará. Chrókóchaxín chrókókinrá o chrókóchaxín chrókósóará. ¹⁶ A ntá jahará la yásorá la jehya ikinrá la jehya sóará. A ntá ijie ir'vá ó tsíkia tí jahará la ts'itjia. ¹⁷ Ntáchrórá kíxin jahará rícorá la imá jína tjeorá la ko ninkehó t'itjáyanhya tí tjeorá, ichrorá. Kjánchez chontahyará kjuachhé la ko jehya jína tjeorá la ko nòará la ko ntakótánrá la ko tjóchínrá. ¹⁸ Méxra ijie ntaxraxinkáonrá janhan sintakjihará tí nkehe oro náxrjón ts'ík'axrjexín tja kíxin ntá chaxín ts'ónará rico. La ko janhan sintakjihará ika tjoá kíxin ts'ínkayará ntá tsjlinhanrá kjuatósuehé kíxin í tjóchínhyará. La ko janhan tsjánjuan xroqan kolirio tsjankí ikonrá kíxin ts'ikonrá. ¹⁹ Janhan mé tsjéntuáhá kaín tí sín tjuaha. Méxra íchá jína chrókjan sín chrókuinkáchónki sín Dios. ²⁰ Tsjehérá janhan itjén ntója puerta, tjét'eyá. A ntá jnkojín nkexro chrókuinhin tí tanná ntá chrókuakitjehé tí puerta ntá chrók'uíxanhán ntoe sín la chrókjonekian sín la ko jehe sín la ko janhan. ²¹ A ntá tí sín chrókjuacha chrókjuinchexiteyána la tsjánjuan kjuachaxin ts'ejókian sín tí tétoanxian ntiha la éxí xikaha janhan kjuacha ntá T'aná kjuanjon kjuachaxin tjékian ch'án tí tjen ch'án t'etqan ch'án ntiha. ²² Tí nkexro tjinkaon chrókuinhin la chrókuinhin tí nkehe nixjehé Nchakuen Dios tí ninko."

4

Tí sín tjikosáyehé Dios nkaya nkajní

¹ Ntá chr'éxín janhan k'uíkuqan ijnko puerta tjexrankéhé nkaya nkajní. Ntá kujnhán ijnko itén nkexro éxí trompeta mé tí nkexro nixjana tí xrankíxixín, ntá jehe ch'án nixjana ch'án, ntáchro ch'án kíxin:

—T'it'ótjen ntihi ntá tsjáko ha kaín nkehe tsonghen chr'éxín.

² Ntá tuénxín ikui tí kjuachaxin kuènte Nchakuen Dios k'uayáhá ntá k'uíkuan tí trono itjen nkaya nkajní ntá ntiha tjetjaxin ijnko nkexro. ³ A ntá tí ch'ín tjetjaxin tí trono mé tjákini tsjehe éxí ixro jaspe o ixro cornalina. A ntá jnkontatjen tí trono itjen ijnko

konchęcha tjákini tsjehe éxí ijnko xro esmeralda. ⁴ A ntá kjaxin jnkontatjen tí trono k'uíkuan í so veinticuatro trono kjaxin tjejótjaxin veinticuatro sín táda, iké sín la tjóá la ko tjejóya kja sín corona tsík'óna chica oro. ⁵ A ntá tí trono kuènte Dios la ntiha sít'axrjexín tí sítjónkíxín la ko sítjonta. A ntá nkayakon tí trono a kjaxin tjejóche yato xrohi la mé tí yato Nchakuen Dios. ⁶ A ntá nkayakon tí trono la kjaxin itjen ijnko ntayaon éxí xroxrjo tsjehe.

A ntá tí jnkosiné la ko jnkontatjen tí trono tjejó noó nkexro tjejochón chóntha nchónhya ikon nkayakon la ko nóton. ⁷ A ntá tí nkexro tjechón k'uíkuan saoxín mé éxí koxra tsjehe. A ntá tí nkexro yóxin tóyóhe éxí koxinta, a ntá tí nkexro níxín tsjehe éxí chojni. A ntá tí noóxin la éxí kotjuanhnko xritjaká tsjehe. ⁸ A ntá jnkognko tí noó nkexro tjejochón chóntha injon k'anenée sín la chóntha nchónhya ikon nóton la ko nkaxenhen, la nchakotjin la ko tie titóehya sín ntáchro sín kixin:

Santo, santo, santo,

Ìnchéni Dios, jaha chonta kaín kjuachaxin,
jaha xráxín tjen la ko itjen ijie la ko jaha ts'inka ínaá.

⁹ A ntá tí nkexro tjejochón jnkoyaxon tió tjanchia sín kjuasáyé Dios la ko tjikosáyehe sín ch'án la ko nixjehé sín ch'án chjéhe sín kjuasáyé tí nkexro tjetjaxin tí trono mé tí nkexro tjechón jnkochríxín. ¹⁰ La ntá tí veinticuatro tí sín táda tjejóxin toch'in sín nkayakon ch'án ntiha la tjikosáyehe sín tí jehe ch'án kixin jehe ch'án tjechón jnkochríxín la ko tjakjinjin sín corona tjoka sín tí tjen tí trono la ntáchro sín kixin:

¹¹ Ìnchéni Dios kuènteni, jaha la imá jína la t'ayéhé kjuasáya kixin tjikosáyahani tí jaha kixin tí kjuachaxin chonta;
kixin jaha kjuich'eña kaín nkehe siín kixin jaha kóxrjíhan xikaha k'óna.

5

Tí libro la ko tí Kolélo

¹ A ntá tí tja chjina tí nkexro tjetjaxin tí trono, k'uíkuan ijnko libro mé tsíkjin sín nkaxenhen la ko nóton la ko mé tsíkjéxin yato sello. ² La k'uíkuan ijnko ángel chóntha kjuachaxin ntá kjuanchankí ch'án itsen ntáchro ch'án kixin:

—¿Nkexro tí jína chrókjuacha chrókuakitjehe tí libro la ko chrókóchrítón tí sello chóntha?

³ La ninkexró ní nkajní o ní chjasintajni o ní chrínkí nonte tsjachahya tsakitjehe tí libro la ní komáhya sín. ⁴ A ntá janhan la imá tsjanka kixin naqá tónoxínya ninkexró chrókjuacha chrókuakitjehe tí libro o chrókjuinchekuáxin tí libro o chrókomá nkehe tí ntáchro tí libro. ⁵ Ntá ijnko tí sín táda ntá nixjana ntáchro kixin:

—Tsjanakahya, tsjehé ntihi tí Koxra k'uaxrjeníxin Judá la ko tsík'axrjeníxin rey David. Mé kjuacha la ó tsjacha tsakitjehe tí libro la ko tsóchrítón tí yato sello —ichro ch'án.

⁶ A ntá jnkosiné tí trono la ko tí tjejó tí noó tí nkexro tjejochón la ko jnkosiné tí tjejó tí sín táda ntaha mé k'uíkuan tjexín toté ijnko Kolélo tsjehe éxí tsík'óyán sín mé chóntha yato ntéé la ko yato ikon. A ntá tí kon mé tí yato Nchakuen Dios la táha mé tsík'ítuenhen t'ayakonhen kuenté chjasintajni. ⁷ A ntá tí Kolélo a kuákja tí libro itjen tja chjina tí nkexro tjetjaxin tí trono. ⁸ A ntá tió k'uáyéhé ch'án tí libro la ntá tí noó sín tjejochón la ko tí veinticuatro tí sín táda k'uéjóxin toch'in sín nkayakon tí Kolélo. A ntá kaín tí jehe sín chóntha sín ison arpa la ko xraá sín ihnti tsík'óna chica oro tsíkaón chijinco. Tíha mé oración nixjehé Dios kaín tí sín tsíkjinhetjóá ch'án. ⁹ Itsje sín nkehe nixin ntáchro kixin:

Jaha mé ijnko nkexro jína kjuacha kuákja tí libro la ko kóchrítuan tí sello;

kixin tsík'óyán sín tí jaha la ko tí ijniá k'uénaxian tí jeheni ts'ayéhé Dios,

mé ts'ayéhé ch'án kenxín chojni kjónté nkexrí tsjehe sín la ko kjónté nkexrí nixja sín la ko chojni kénxín chjasin la ko kaín nación.

¹⁰ Jaha tsík'ich'énani reyes la ko nchá'tá sich'eheni xra Dios kuènteni,
la ko jaha tsík'jánjuan kjuachaxin ts'etqanni chjasintajni.

Mé xikaha ichro sín.

¹¹ Ntá tuénxín k'uíkuān la ko kuinhān itén nchónhya sín ángel tjejó sín jnkontatjen tí trono la ko tí sín tjejóchón la ko tí veinticuatro tí sín táda. Nchónhya millones la ko millones tí jehe sín. ¹² Itsen nixja sín ntáchro sín kixin:

Tí Kolélo tsík'óyán sín,

tíha mé kjuacha k'uáyéhé kjuachaxin ts'etoan la ko k'uáyéhé tí nkehe tjete kuénte Dios, la ko tí kjuaxrexinkaon jína la ko kjuachaxin sich'e xra
la ko mé xikaha tjikosáyeheni ch'án.

¹³ Kjaxin kuinhān kixin kaín nkehe kjuich'éna Dios siín nkajní la ko chjasintajni la ko tí nkehe siín chrinkí nonte la ko kaín nkehe siín ntayaon la kaín tíha mé ntáchro kixin:
Chjéheni kjuasáya tí nkexro tjetjaxin tí trono la ko tí Kolélo
kixin chóntha kjuachaxin jnkochríxín.

¹⁴ A ntá tí noó sín tjejóchón ntáchro sín kixin:

—Xikaha tsónhen. Amén.

La ko tí veinticuatro tí sín táda k'uejóxin toch'in sín la chjéhe sín kjuasáyé tí nkexro tjechón jnkochríxín.

6

Tíyato sello

¹ A ntá k'uíkuān kixin tí Kolélo kóchrítón tí xránkíxixín tí yato sello ntá kuinhān ijkno tí noó tí noó sín tjejóchón nixja ch'án exí kjonta, la ntáchro ch'án kixin:

—Xrákiá tsjehé.

² Ntá k'uíkuān ijkno kokate tjóá. A ntá tí nkexro tjekjen tí kokate chóntha ch'án ijkno arco tí tja ch'án la tsík'áyéhé ch'án ijkno corona. Jehe ch'án mé kjuacha ch'án la naxa xikjacha ch'án inaá.

³ A ntá tí Kolélo kóchrítón tí yóxin sello ntá kuinhān tí nkexro yóxin tjechón ntáchro kixin:
—Xrákiá tsjehé.

⁴ Ntá sákjuí ijkno kokate kjátse. A ntá tí ch'ín tjekjen k'uáyéhé ch'án kjuachaxin tsjakjìn tí kjuaxróxin siín chjasintajni kixin ntá chojni mé ts'óyán kichó sín kixin jehe ch'án mé tsík'áyéhé ch'án ijkno espada ijié.

⁵ A ntá tí Kolélo kóchrítón tí níxin sello la ntá kuinhān nixja tí níxin nkexro tjechón ntáchro kixin:

—Xrákiá tsjehé.

Ntá k'uíkuān ijkno kokate tié. A ntá tí nkexro tjekjen tí kokate chóntha itja ch'án ijkno báscula. ⁶ La ntá kuinhān itén ijkno nkexro jnkosiné tí tjejó tí noó sín tjejóchón mé ntáchro kixin:

—Jehó ijkno kilo trigo ijkno chichaon denario la ko iní kilo cebada ijkno chichaon denario. Kjánchó chrókjuincheck'itjáyanhya tí aceite la ko tí vino. (Tíha mé t'axrjexín tsokjinta.)

⁷ A ntá tí Kolélo kóchrítón tí noóxin sello ntá kuinhān tí noóxin tí nkexro tjechón ntáchro kixin:

—Xrákiá tsjehé.

⁸ Ntá k'uíkuān ijkno kokate sine. A ntá tí ch'ín tjekjen va a mé it'in ch'án Muerte. A ntá nóton tí jehe ch'án la ikui nkehe tóyóhé tí tjejó tí sín tsík'en. Jehe ch'án k'uáyéhé kjuachaxin ts'etoan ch'án noóxin parte chjasintajni kixin ntá ts'óyán kichó sín la tsokjinta la ko ts'enxín sín ichin la ko kaín ko jiehe siín chjasintajni mé tsjaya va.

⁹ A ntá tí Kolélo kóchrítón tí n'óxin sello ntá k'uíkuān chrinkí tí altar tí asén tí sín tsík'enxín tí tan kuénte Dios tsíchrónka sín. ¹⁰ Ntáchro sín itsen kixin:

—Jaha mé Ínchéni tjóá jína la jaha mé sinchexiteyá tí nkehe tsíntáchrúa, ¿la nkesá sinchekitoexián ijié tí sín siín chjasintajni tsík'óyán tí jeheni? —ichro sín.

¹¹ A ntá tí sín a mé k'uáyéhé sín iké sín tjóá ntá k'uítuenhen sín nax̄a ts'ok'éhe sín í so yaon tsoxetajia tí número tí kichó sín ch'ehe xr̄a Cristo nax̄a ts'enxín sín éxí k'uén tí jehe sín.

¹² A ntá tí Kolélo kóchrít̄on tí injonxín sello ntá xr̄inahya imá kuinkí nonte. A ntá tí yaon la kótié éxí ika tjiko chojni tsík'en. A ntá nitjó k'óna kjátse éxí jni. ¹³ A ntá konotsé sít'ánótjenxín nkajní sítjitsínka nonte éxí yóhe tí inta t'óna to higo la síxènjin tí to yoa tió tsjixraya tí nta kixin tí imá fuerte chjéhe xr̄into. ¹⁴ A ntá nkajní k'uitjáyan éxí ijnko xroon tsíxrèya. Ntá kaín jn̄a la ko tí nonte ntsíntsí siín jnkosiné ntayaon sákjuí ókjé. ¹⁵ A ntá kaín tí sín reyes siín chjasintajni la kjaxin tí sín t'etoan la ko chojni rico la ko comandante la ko tí sín chóntha kjuachaxin la ko kaín tí sín ch'exón xr̄a la ko tí chojni náhí mé k'uíxenhen sín tjo siín nteje ts'ejomáxin sín. ¹⁶ Ntáche sín tí jn̄a la ko tí tjo kixin:

—Xrákiá xrátja tí jeheni nchemáni kixin chrók'uikonhyani tí nkexro t'etoan tjetjaxin trono la ko chrókjuasótehyani tí kjuachrakon jié tsjanjon tí Kolélo.

¹⁷ Kixin ó kui tí yaon imá jié kuénte kjuachrakon la, ¿xá nkexro chrókjuacha chrók'uejó ntiha?

7

Tí sín israelita chóntha sello

¹ A ntá chr'éxín k'uíkuān noó sín ángel tjejóxin toté sín la jnkojnko sín tjejó sín tí chrínta chjasintajni chónthehe sín tí noó xr̄into kixin tsochjéhya xr̄into chjini chrítaón chjasintajni la ko ní chrítaón ntayaon la ko nijnko tí nta yoa. ² Kjaxin k'uíkuān í jnko ángel kjuixin nō tjitoxin yaon la chóntha sello kuénte Dios tjechón. Ntá tí ángel mé k'uíyéhé ch'án itsen tí noó ángel tsík'ayéhé kjuachaxin sincheníhi nonte la ko ntayaon. ³ Ntáchro ch'án kixin:

—Náhí, sincheniéhya nonte la ko ntayaon la ko kjaxin tí nta la náhí tí nax̄a tsíkahya sello totjen tí sín ch'ehe xr̄a Dios kuénteni.

⁴ Kuinhán tí número tí sín tsíka sello la me ciento cuarenta y cuatro mil kain tí sín tsík'axrjeníxín tí sín israelita. ⁵ Teyó mil tí sín tsíka sello tsík'axrjeníxín tí Judá la ko teyó mil tí sín tsíka sello tsík'axrjeníxín Rubén la ko teyó mil tí sín tsíka sello tsík'axrjeníxín sín Gad ⁶ la ko teyó mil tí sín tsíka sello tsík'axrjeníxín sín Aser, la ko teyó mil tí sín tsíka sello tsík'axrjeníxín sín Neftalí la ko teyó mil tí sín tsíka sello tsík'axrjeníxín sín Manasés ⁷ la ko teyó mil tí sín tsíka sello tsík'axrjeníxín sín Simeón la ko teyó mil tí sín tsíka sello tsík'axrjeníxín sín Leví la ko teyó mil tí sín tsíka sello tsík'axrjeníxín Isacar ⁸ la ko teyó mil tí sín tsíka sello tsík'axrjeníxín sín Zabulón la ko teyó mil tí sín tsíka sello tsík'axrjeníxín José la ko teyó mil tí sín tsíka sello tsík'axrjeníxín sín Benjamín.

Siín nchónhya chojni chóntha ka tjoá

⁹ Ntá kjuixin tíha ntá k'uíkuān nchónhya chojni kaín xín nación la ko kaín xín nkexrí tsjehe sín la ko kaín xín nkiva la ko kaín xín chjasin mé tjejóxin toté sín nkayakon tí trono la ko nkayakon tí Kolélo. Nchónhya sín la kohya ninkexró tsjacha ts'ekin nkekjaín tí jehe sín la tjejóya sín ka tjoá la tjejóya kajni tja sín. ¹⁰ Kaín sín itsen nixja sín ntáchro sín kixin: Dios kuénteni mé kjuínchekaáni.

Jehe ch'án mé tjetjaxin tí trono tí tjen tí Kolélo kjuínchekaáni.

¹¹ Kaín tí sín ángel tjejóxin toté sín jnkontatjen tí trono la ko jnkontatjen tí sín táda la ko tí noó sín tjejóchón la ntá k'uejóxin toch'in sín la k'uísen sín hasta kaxín ikja sín nonte nkayakon tí trono la tjanchehe sín kjuasáye Dios. ¹² Ntáchro sín kixin:

Amén. Kjuíncheyaonni Dios la tsochjéheni Dios kjuasáya kixin kaín tí kjuaxrexinkaon jína tjanjon ch'án la ko tjancheheni ch'án kjuasáya.

Tsjikosáyeheni tí kjuachaxin kuénte ch'án kixin tjinkitsani ch'án jnkochríxín. Amén.

¹³ A ntá ijnko tí sín táda kjuanchankina, ntáchro kixin:

—A ntá tí sín tjejóya ika tjoá la, ¿xá nkexro tíha? la ko ¿xá nketí tsíkjixín sín?

¹⁴ Ntá janhan ntáxrjan kixin:

—Inchéni, jaha ó noha. Ntá jehe ch'án ntáchro ch'án kíxin:

—Tí sín i tsíkjixín sín tí kjuaxróxinhya k'uék'ejó sín, la tí sín a mé tsíjen sín iké sín la ko tsíkótjuáxin ijné tí Kolélo. ¹⁵ Méxra xikaha ntá ijie tjejó sín nkayakon tí trono kuènte Dios la tjejoch'ehe sín xra Dios nchakotjin la ko tie tí nkaxenhen ninko kuènte ch'án. A ntá tí nkexro tjetjaxín chrítaón tí trono mé t'ayakonhen ch'án sín. ¹⁶ A ntá tí sín a mé ts'enxinhya sín kjinta la ko ts'enxinhya sín inta la ko tsochjánxinhya sín yaon la ko ni sóa kohya nkehe sich'ehe sín. ¹⁷ Kixin tí Kolélo tjen jnkosiné tí trono mé t'ayakonhen ch'án tí jehe sín éxi iko kuènte ch'án la ko sájtiko ch'án tí tjiá ntá tjanjon kjuachón la Dios mé sinchexámá kaín tí ntákon tí jehe sín.

8

Tíyatroxin sello la ko tí ihnti oro

¹ A ntá tí Kolélo kóchrítón tí yatoxin sello kuènte tí libro la ntá kohya ninkehó ruido nkajní chjina it'q hora. ² Ntá tuénxín k'uíkuán yato ángel tjejóxin toté nkayakon Dios la jnkojnko sín k'uáyéhe sín jnkojnko trompeta. ³ Ntá chr'éxin ikui í jnko ángel xraá ihnti tsík'óna chica oro la kjuák'exín toté nkayakon tí altar. K'uáyéhe ch'án nchónhya chjincó tsjak'e ch'án kíxin sátsjiko tí oración kuènte kaín tí sín tsíkjinchetjóá Dios kíxin tsjak'e chrítaón tí altar oro nkayakon tí trono. ⁴ A ntá tí ihnci kuènte chjincó chrínxín tja tí ch'ín ángel tí tjen Dios la ko kjaxín tí oración kuènte chojni tsíkjinchetjóá Dios. ⁵ A ntá tí ch'ín ángel kuákja ch'án tí ihnti kjuúnchekaón ch'án xrinta kuènte xrohi kuènte tí altar la ik'ue ch'án chjasintajni. La ntá kjonta la ko nchónhya ruido la ko sítjónkíxín la ko kuínkí nonte.

Tí trompeta

⁶ A ntá tí yato ángel mé chóntha sín jnkojnko trompeta ó yaxínhin sín kíxin ts'ánoa sín.

⁷ A ntá tí ángel saoxín k'uánoa trompeta ntá k'uániá toni la ko xrohi tsíkíkjan jni mé xikaha ikui chrítaón chjasintajni. A ntá iche níxin parte nonte la ko níxin parte tí nta la ko kaín tí kayoa siín.

⁸ A ntá tí yóxin ángel k'uánoa trompeta la ijkno nkehe yóhē tsjehe éxi ijkno jna jié tjeche la sákjuí kjuíankí ntayaon la ntá níxin parte tí ntayaon la k'óna jni. ⁹ A ntá tí níxin parte kaín tí nkehe siín tí ntayaon la ik'ue la ko níxin parte kaín tí ntabárcó la xíka.

¹⁰ A ntá tí níxin ángel k'uánoa trompeta la ntá xríñahya k'uánótjen ijkno konotsé jié k'uánótjenxín nkajní mé tjeche éxi ijkno xrohi jié. K'uánótjen chrítaón níxin parte ntarió la ko tí sít'axrje ntá. ¹¹ Tí konotsé mé it'in Itsjá la tsíkjiankí níxin parte tí ntá ntá kótsjá tí ntá la nchónhya chojni ik'ue kíxin tí ntá xikaha tsíkótsjá.

¹² A ntá tí noóxin ángel k'uánoa trompeta la kjuíncheníhi ijkno níxin parte tí yaon la ko níxin parte tí nitjó la ko níxin parte tí konotsé. Méxra tí níxin parte kuitóhe sitié la í kohya t'inkaséyan tí níxin parte tí nchakotjin la ko tí tie.

¹³ Ntá tuénxín k'uíkuán la ko kuínhán ijkno ángel tjetjaká jnkosiné nkajní t'èya ch'án itsen, ntáchro ch'án kíxin:

—Nóa tí sín tjejó chjasintajni tió tsontáchro tí trompeta ts'ánoa tí iní ángel ínaá.

9

¹ A ntá tí n'óxin ángel k'uánoa trompeta la k'uíkuán ijkno konotsé tsík'ánótjenxín nkajní chrítaón chjasintajni ntá k'uáyéhe tí llave kuènte tí tóye ninka. ² A ntá tuénxín xitjehe tí tóye ninka ntá ntiha chriñxín nchónhya ihnci kuènte tja ntá tí t'inkaséyanxín yaon la ko tí xrínto k'uixin tié kíxin tí ihnci kuènte tí tóye. ³ A ntá tí ihnci mé k'uaxrjexín kochjoa xrítjaká chrítaón chjasintajni. A ntá tí kochjoa k'uáyéhe kjuachaxin éxi tí chóntha konchiá siín chjasintajni. ⁴ K'uítuenhen va kíxin sincheníehya va tí kayoa siín chjasintajni la ko ninkehó nkehe yoa la ko ninkehó ntayo. Jehó chojni chóntahya sello kuènte Dios tí totjen mé sincheníhi va. ⁵ Kjánchó k'uáyéhyva kjuachaxin ts'óyán chojni. Jehó sinchekjoté va

chojni hasta in'ó nitjó la tí kjuatjoté mé yóhe kjuatjoté éxí chojni tsíkjinehe konchja. ⁶ A ntá tí yaon a tsotinkaon chojni chrók'uen sín la ntá xitjahya its'en sín. Kjónté tjinkaon sín chrók'uen sín la tí muerte sátsíkji ókjé.

⁷ A ntá tí kochjoá éxí kokate tsjehe, listo tjen sátsíkjanjon va. A ntá tí ikja va itjen nkehe tóyóhe ijkno corona tsík'óna oro la ko tí káré la tóyóhe éxí káré chojni. ⁸ A ntá tí kaxree va tsjehe tóyóhe éxí kaxjhi chojni chjin, a ntá tí neno va la tóyóhe neno koxra. ⁹ A ntá tí cuérpoé la tjekjanjin nkehe tsík'óna chica kíxin kohya nkehe tsónhen va. A ntá ruido kuénte kanenée la éxí nchónhya carro tinkánkákjen kokate tió xritinká tí siín kjuaníkaon. ¹⁰ A ntá tí ntané va mé tsjiate chojni la éxí ntané konchja, la tíha mé tsochonta kjuachaxin sincheníhi chojni hasta in'ó nitjó. ¹¹ A ntá tí kochjoá mé chóntha ijkno nkexro t'etoan mé ijkno ángel kuénte tí tóye njinka. Tí ángel mé nkiva hebreo mé it'in Abadón la nkiva griego la mé Apolión mé t'axrjexín kíxin táha mé sinchek'itjáyan nkehe.

¹² Mé xikaha kónhen tí kjuachrakon xrankíxixín. A ntá naxa t'itjáyan yaá ínaá.

¹³ A ntá tí injonxin ángel k'uánoa trompeta la kuinhán ijkno itén nkexro k'uaxrjexín tí tjejó tí noó ntéé kuénte tí altar oro tí tjen Dios. ¹⁴ A ntá tí itén tí nkexro ntáche tí injonxin ángel chóntha trompeta kíxin:

—Tjasintankehé tí noó ángel kuénte tí jinahya tjejóchroé chjinaxón tí ntarío jié it'in Eufrates.

¹⁵ Ntá xikaha xintankehé tí noó sín ángel kíxin ts'oyán sín tí níxin parte chojni. Mé xikaha yaxníhin sín sátsji sín tí hora la tí yaon la tí nitjó la tí nánó. ¹⁶ Ntá kuinhán tí número tí soldado la ko tí kokate la doscientos millones.

¹⁷ Mé xikaha xrínahya k'uíkuán tí kokate. A ntá tí sín tjejókjen kokate la tí ntakuin sín chóntha nkehe tsík'óna chica kjátse la azul la sine. A ntá tí kokate la ikja la éxí kja koxra la tí ir'va la k'uaxrjexín xrohi la ko ihnchi la ko azufre. ¹⁸ A ntá níxin parte chojni tsík'enxín tí iní clase tí chin tsík'axrjexín ir'va kokate mé xrohi la ihnchi la azufre. ¹⁹ Tí kjuachaxin chóntha tí kokate la k'uaxrjexín ir'va va la ko tí ntané va. A ntá ntané la éxí konche tsjehe la tí kja va mé sincheníhi chojni.

²⁰ A ntá tí í so chojni kuítuhe k'uénxinha tí chin a la kjónté kjuinkíhyá sín tí nkehe tjenkayáxin sín la kuítuehya sín tinkáchónki sín nchakuen jinahya la ko tí nkehe tsíkjanoya chica oro la ko chica plata la ko chica bronce la ko ixro la ko inta, mé tí nkehe t'ikonhya la ko tienhya la ko tjihya. ²¹ La kjónté xikaha la kuítuehya sín tí nkehe jinahya ch'e la ko tí chrók'oyán kichó la ko tí nchekjiko kichó la ko tí chóntha sín chojni chjin ókjé la ko tí tjinkaon sín chrókueé.

10

Ijkno ángel la ko tí librito ntsí

¹ Ntá k'uíkuán í jnko ángel imá chonta kjuachaxin k'uínkajinxín nkajní tjenkakjan ch'án tjuí la ko ijkno konchechá chrítaón tí ikja ch'án. A ntá tí káré ch'án imá tjákini tsjehe éxí yaon, a ntá tí toté la éxí xrohi síchr'ákjen. ² Tjexraá ch'án ijkno libro ntsí tjexrankehé, la ntá toté ch'án chjina la chrítaón ntayaon la ntá toté ch'án kjon la chrítaón nche. ³ Ntá xrínahya k'uèya ch'án itsen éxí ijkno koxra tsjánka va tí tóninkaon va mé xikaha k'uèya la yato kjonta kjuáteyá tí itén ch'án. ⁴ Ntá kjuixin ntáchro tí yato kjonta la chrókjian ntá kuinhán ijkno itén nkexro nkaya nkajní ntáchro kíxin:

—Chróchxonkahya tí nkehe ntáchro tí yato kjonta la ko ni chrókjinhya tíha.

⁵ Ntá tuénxín tí ángel k'uíkuán ijkno toté tjekjen ntayaon la ijkno toté tjekjen nche ntá kjuaya tja chjina nó nkajní. ⁶ Ntá kjuasin ch'án testigo tí nkexro tjen jnkochríxín mé tí nkexro a mé kjuich'eña nkajní la ko chjasintajni la ko ntayaon la ko kaín xín nkehe siín la ntáchro ch'án kíxin:

—Í séhya má naxa tsoxrjen ⁷ ntá tsjixraká tí yaon tí yatoxin ángel ts'ánoa trompeta ntá tsoxiteyá tí nkehe jehó Dios nohe kíxin xíkaha tsíchénka ch'án tí sín k'uékjich'ehe ch'án xrä ósé k'uéchrónka sín itén ch'án.

⁸ A ntá tí itén nkexro kuiñhan k'uaxrjexín nkaya nkajní ntá xínixjána ínaá ntáchro kíxin:

—Sátjia tákjá tí libro ntsí tjexrankéhe tjexraá tí ángel itjen toté ch'án chrítaón ntayaon la ko chrítaón nche.

⁹ Ntá sákjuua kjuáncháha tí ángel tí libro ntsí ntá jehe ch'án ntáchro ch'án kíxin:

—Tákjá la inte. A ntá tí ir'va la tsoxé éxí tsjen kjánchó tí tsqa la tsotsjá.

¹⁰ Ntá kuákjaá tí libro ntsí tjexraá tí ángel ntá kjonè. A ntá ir'vá koxé éxí tsjen ntá chr'éxín la kótsjá nkaya tsena. ¹¹ Ntá tuénxín k'uetuqanna ch'án kíxin:

—Ínaá tsochronkaxián itén Dios tsinhin nchónhyá chjasin la nación la ko nkiva la ko tsinhin tí sín reyes.

11

Iyó testigo

¹ A ntá chjina ch'án ijkno ntavara éxí tji tsjehe tsjáchraxián ntá ntáchro ch'án kíxin:

—T'ayá tjáchraxián nkaxenhen ninko kuénte Dios la ko tí altar la téka nkekjaín nkexro tjejó ntiha tinkáchónki Dios. ² Kjánchó tí ntasín itjen ntója ninko la tjáchraxián kíxin táha ó tsík'ayéhe tí sín tsíkjixín kjín la ntá jehe sín tsjikosáyehya sín tí chjasin tjoá Jerusalén ijkno cuarenta y dos nitjó. ³ A ntá mé janhan tsochr'an iyó testigo kuéntana tsonixjaxinna mil doscientos sesenta yaon. Tí iké sín la ika tié ts'ejoya sín.

⁴ Tí yaá testigo i mé iyó nta olivo la ko iyó candelero tjejó tí tjen Ìnchéni kuénte chjasintajni. ⁵ A ntá tí jnkojín sín tjinkaon sich'ehe sín daño la jehe sín la xrohi ts'axrjexín ir'va sín la tsoche kaín tí sín nínkakonhen sín la mé xíkaha its'en kaín tí sín tjinkaon sich'ehe sín daño tí jehe sín. ⁶ A ntá tí testigo i chóntha kjuachaxin ts'ikjehé nkaya nkajní kíxin í ts'aniáhyá chrin tí tsonixja sín kuénte Dios la ko kjaxin chóntha sín kjuachaxin tsontáche sín tí ntá kíxin ts'ona jni la ko sinchekjasótexín sín chojni chjasintajni nchónhyá clase chin nchónhyá veces éxí tí tjinkaon sín. ⁷ A ntá tí kjuixinhin sín tí xrä ntá tí ko jiehe ts'axrjexín tí tóye ninka mé tsjankíxín tsjanjonko tí jehe sín ntá tsjacha va ts'oyán va tí jehe sín. ⁸ A ntá tí cuérpoé sín tsitohe sítsínska tí calle kuénte chjasin jié tí tsíkjak'enkaní sín Ìnchéni ntacruz mé tí chjasin mé kjaxin ncheck'in sín Sodoma la ko Egipto. ⁹ A ntá iní yaon ko t'o la kaín chojni itsjé chjasin la ko kaín nkexrí tsjehe sín la ko nchónhyá nkiva la ko nchónhyá nación ts'ikon sín tí chojni tsík'en tjejósínska sín ntiha la ko tsjanjonhyá sín kjuachaxin tsoxrvá tí chojni tsík'en a. ¹⁰ A ntá tí sín tjejó chjasintajni tsochéhe sín kíxin xíkaha tsík'en tí sín a la antsí má tsochéhe sín la tsochr'an sín nchónhyá nkehe ncheckitónen kíchó sín kíxin xíkaha ik'uén tí yaá sín k'uéchrónka itén Dios kíxin jehe sín kjuaxróxinha k'uék'ixin sín tí chjasintajni tí k'uék'ejó tí sín a. ¹¹ A ntá chr'éxín ó k'uátsínska iní yaon ko t'o la ntá Dios kjuinchexechón tí iyó tí sín a ínaá la k'uáya sín ínaá la ntá kaín chojni k'uíkon la imá chrakon sín. ¹² Ntá tuénxín tí iyó sín testigo kuínhin sín ijkno nkexro nixja itsen nkaya nkajní ntáchro kíxin:

—Chrìyan xrákiá antsí ntihi.

Ntá chriinxín sín nkajní ijkno tui. A ntá kaín tí sín nínkakonhen sín la k'uíkon sín kíxin xíkaha kónhen sákjuí tí iyó sín a. ¹³ Ntá tuénxín imá kuínkí nonte la ntá ijkno ite parte chjasin ntiha la k'uítjáyan la yato mil chojni tsík'en kíxin tí kuínkí nonte. A ntá kaín tí sín xéhe imá chrakon sín la kjuankíxín sín tinkáchónki sín Dios la tjanchia sín kjuasáya.

¹⁴ Mé xíkaha kónhen tí yóxin kjuaxikaon la ntá tuénxín itsi tí níxín kjuachrakon ínaá.

Tí yatoxin trompeta

¹⁵ A ntá tí yatoxin ángel k'uánoa trompeta ntá kuínhin sín ijkno tan nkajní itsen ntáchro kíxin:

À ntá tí sín k'uáyéhé kjuachaxin kuènte chjasintajni la ó kjaxin nchexiteyéhé sín Închéni Jesucristo

kíxin jehe Jesucristo mé ts'etoan ch'án jnkochríxín.

¹⁶ À ntá tí veinticuatro tí sín tada tjejótjaxin sín trono nkayakon Dios la mé k'uísén sín hasta káxín ikja sín nonte la tjanchehe sín kjuasáya Dios. ¹⁷ Ntáchro sín kíxin:

Tjáhani kjuasáya jaha Închéni Dios imá chonta kjuachaxin.

Jaha itjen la ko xráxín tjen la ko jaha ts'inka ínaá.

Kíxin jaha k'uayéhé kjuachaxin jié kíxin xráxín tétoan.

¹⁸ À ntá kaín tí nación kóninkaon,
a ntá ó kui tí yaon jaha sinchekjasóte sín

la ko kjaxin jaha sinchekitoexián ijié tí sín tsík'en

la ko tsjénkehé tí sín kjuít'aha xrä chrónkaxín itán

la ko tí sín ó kjuinchetjóá la ko tí sín kjuikosáyehe tí ihniá,

mé tí chojni nteto la ko tí sín chánjan ntsíntsí.

Jaha tjoka sinchek'itjáyan tí sín chrókjuinchek'itjáyan chjasintajni.

¹⁹ À ntá xitjehe tí njinkoe Dios tjen nkaya nkajní, a tí nkaxenhen kónoxín tí caja tjinká tí nkehe tsík'etoan Dios. À ntá sítjónkíxín la ko nchónhya ruido sítjonta la ko kuínkí nonte la ko imá tsanká k'uániá toni.

12

Tí chojni chjin la ko tí dragón

¹ À ntá kónoxín nkajní ijnko kjuaxroan jié mé ijnko chojni chjin iké tjákini éxi yaon tsjehe la chrínkí toté tjan itjen nitjó. À ntá tí kja tjan tjenkáya ijnko corona chóntha teyó konotsé. ² À ntá tí chojni chjin a mé tjezá tjan la t'ëya tjan kíxin tjoté tjan kíxin sinchekokjíhi tjan xjeen tjan. ³ Kjaxin kónoxín í jnko kjuaxroan nkajní mé ijnko dragón kjátse chóntha yato kja la ite ntéé la jnkojko corona jnkojko kja. [Tí dragón mé ijnko kots'aja jié.] ⁴ Tí ntané mé nkánkákjen níxin parte konotsé kuènte nkajní la ik'ue chrítaón chjasintajni. À ntá tí dragón kjuák'e chók'ëxin tí tjen tí chojni chjin mero tsokjíhi xjeen kíxin tjinkaon tjoka chrókjóne tí xjan tsokjíhi. ⁵ À ntá tí xjan kjuúnchekokjíhi tjan mé xjan ntoa kíxin jehe ch'án mé ts'etuñhen ch'án kaín nación la tsochóntha ch'án ijnko vara chica ts'etoanxín ch'án. Ntá tí xjeen tjan la mé Dios sákjuiko tí tjen ch'án t'etoan ch'án. ⁶ À ntá tí chojni chjin la kuinká tjan sákjuí tjan nteje kíxin tsíkjincheyóxin Dios nketí sátsji tjan kíxin ntaha tsoxranjon nkehe sine tjan mil dos cientos sesenta yaon.

⁷ Ntá chr'ëxín xríñahya k'uixin kjuanínkaon jié nkajní la mé tí arcángel Miguel la ko tí í so ángel xriko ch'án mé kjuánjonko sín tí dragón, la tí dragón la ko tí ángel kuènte mé kjuánjon sín. ⁸ Kjánchó kjuachahya tí dragón la kohya lugar kuènte nkaya nkajní. ⁹ Mé xíkaha kuakitsjexín sín tí dragón nkajní. Jehe mé tí konche ósé ikjí mé nchek'in sín diablo la ko Satanás. Jehe mé k'uékjich'ijehe tí chojni kuenté chjasintajni. Jehe la ko tí sín ángel kuènte k'uaxrjexín ntiha la kjuitsínska chjasintajni.

¹⁰ Ntá kuiñhan itén ijnko nkexro nkaya nkajní itsen nixja ntáchro kíxin:

—Ó kui ti tsaáxinni tí kjuachaxién tí Dios kuénteni la ko tí kjuachaxin t'etoan Cristo kíxin ó k'uaxrjexín nkajní tí nkexro t'eka jie tí kichó ni mé kjuanchia jie nchakotjin la ko tie nkayakon Dios kuénteni. ¹¹ Tí sín kichó ni la kjuacha sín kuaáxin sín kíxin tí ijnjé tí Kolélo k'uítji la ko kíxin jehe sín chrónkaxín sín tí tan tsík'áyéhé sín la chrakonhya sín kjónté chrók'uenxín sín. ¹² À ntá jie la tócháhará kaín rá tjejorá nkajní. Ntá nòa tí sín tjejó chjasintajni la ko ntayaon kíxin k'uínkajin tí ch'ín diablo la imá nínkaon ch'án kíxin ó nohe ch'án kíxin í kánhyó sé tsjak'e ch'án.

¹³ Ntá tí ch'ín dragón ó nohe kíxin k'uánótjenxín nkajní ikui chjasintajni ntá sákjuíchréhé tí chojni chjin chóntha tí xjan ntoa kíxin chrókjuinchek'itjáyan tjan. ¹⁴ Kjánchó

tí chojni chjin k'uáyéhe yaá kānēnee kuènte kotjuanhnko ijié kíxin jína tsjaká tjan sátsji nteje kíxin ntá ikjín tsitohe tí konche. Sátsji tjan kíxin ntiha tsoxranjon nkehe sine tjan iní nánó ko t'q. ¹⁵ A ntá tí konche mé k'uaxrjexín ntq ir'va kíxin ts'óna ijnko ntarío kíxin tjinkaon va chrók'uáyéhe a. ¹⁶ A ntá tí nonte kjuinkitsa tí tjan a kíxin xitjehé ir'va nonte la kaín tí ntq k'uaxrjexín ir'va tí konche la ntahó sákjuí k'uíxenhen. ¹⁷ A ntá tí dragón la imá kóninkakonhen tí tjan a ná imá kóninkaon kjuánjonko tí í so sín naxa kjéhya tí tjan a kíxin naxa titekaon sín tí nkehe tsíchrónka Jesucristo.

13

Tíyaá bestia

¹ Tí kjuak'é chrínta ntayaon ntá ntaha k'uíkuan chrìinxín ijnko bestia chóntha yato kja la ko ite ntéé chojni t'ántaxínhin Dios. ² Tí bestia k'uíkuan mé tóyóhe kotigre la chóntha toté éxi tqeté ko oso la ko tí ir'va la éxi ir'va koxraq. Tí dragón kjuanjon kjuachaxin imá ts'etoan tí bestia a. ³ A ntá ijnko kja tí bestia chóntha ijnko tsíchrít'o jié chóntha chrók'uenxín ntá tsíkitóhe jína ntá kuenté chjasintajni la chrakon chojni ntá chréhe sín tí bestia. ⁴ Kjuikosáyehe sín tí dragón kíxin jehe kjuanjon tí kjuachaxin k'uáyéhe tí bestia ntá kjaxin kjuikosáyehe sín tí bestia la ntáchro sín kíxin:

—¿Xá nkexro chrókoyóhe tí bestia la xá nkexro chrókjuacha chrókjuanjonko tí jehe?

⁵ Kjjaxin tí bestia k'uáyéhe kjuachaxin tsontáchro kíxin chóntha kjuachaxin má la ts'ántaxínhin Dios la tsochóntha kjuachaxin cuarenta y dos nitjó. ⁶ Ntá mé xikaha kjuich'e k'uántaxínhin Dios la ko k'uántaxínhin ihnié Dios la ko k'uántaxínhin tí njinko tjen nkaya nkajní la ko kaín tí sín tjejó ntiha. ⁷ Kjjaxin tsík'ayéhe kjuachaxin tsjanjonko tí sín tinkáchonki Dios hasta tsjacha ts'etuñhen tí sín ntá k'uáyéhe kjuachaxin ts'etuñhen kaín xín nkexrí tsjehe chojni la ko kaín xín chjasin la ko kaín xín tan la ko kaín xín nación. ⁸ A ntá tí bestia mé kaín xín chojni siín chjasintajni mé tsjikosáyehe sín tí bestia. Tí chojni a mé ts'íñixínya ihnié tió k'óna chjasintajni, mé ts'íñixínya ihnié sín tí libro ts'inixín ihnié tí sín tsaá. Tí xroon a mé chóntha tí Kolélo tsík'oyán sín.

⁹ La jnkoyín nkexro tjinkaon chrókuinhin la chrókuinhin tíhi. ¹⁰ Tí nkexro sátsjiko tsjik'ikjehé í so chojni la kjaxin ch'án ts'ikjehé ch'án la tí nkexro tsjayaxin espada la kjaxin espada ts'enxín. A ntá tí nkexro tinkáchónki Dios la t'ichjánxín tsóníñkakonhyá la ko tsochóntha fe.

¹¹ A ntá chr'éxín k'uíkuan í jnko bestia k'uaxrjexín nonte, chóntha yaá ntéé éxi tsjehe ntéé coronta la mé nixja éxi nixja tí dragón. ¹² Tí bestia la chóntha kaín xín kjuachaxin éxi k'uéchóntha tí bestia saoxín tí k'ué la t'etuñhen tí sín siín chjasintajni kíxin tinkáchónki sín tí bestia saoxín mé tí bestia tsíchrít'o kja ntá tsíkitóhe jína. ¹³ Kjjaxin kjuasin kjuaxroan jié hasta xrohi k'uánótjénxín nkajní ikui nonte ntá nchónhya chojni k'uíkonxín kon sín kíxin xikaha kónhen. ¹⁴ Mé xikaha tí bestia tsík'ayéhe kjuachaxin kjuasin kjuaxroan tí tjen tí bestia saoxín la kjuich'iyehé nchónhya chojni siín chjasintajni. La ntá k'uetuñhen tí sín siín chjasintajni sich'eña sín ijnko nkehe tsíkjanoya éxi yóhe tsjehe tí bestia tsíchrít'oxin espada la kjonté xikaha naxa kjuák'echón. ¹⁵ A ntá tí yóxin bestia k'uáyéhe kjuachaxin tsochjehé kjuachón tí nkehe tsíkjanoya tóyóhe tí bestia saoxín kíxin ntá tí nkehe tsíkjanoya la jína tsonixja la ko jína ts'etoan its'en kaín nkexro tinkáchónkiha tí jehe. ¹⁶ Kjjaxin ts'etoan kíxin kaín chojni tsochóntha marca, á chojni hyé o chojni ntsíntsí, la á chojni rico, la á chojni nòa la á chojni ch'exón xra la ko chojni náhí, mé kaín sín tsochóntha sín marca, á tja sín chjina o totjen sín. ¹⁷ Ntá ninkexró xitjahya ts'eña la ko ninkexró xitjahya sinchekji tí chontahya sín marca o ihnié tí bestia o chontahya sín número kuènte ihnié tí bestia. ¹⁸ T'ichjánxín chrókienxínrá tíhi. Tí nkexro tienxín la chrókonohe tí número chóntha tí bestia kíxin tíhi mé tí número chóntha ijnko chojni la mé tí número mé seiscientos sesenta y seis.

14

Tí nkehe itsje tí ciento cuarenta y cuatro mil

¹ A ntá k'uíkuān tí Kolélo tjexín töté chrítaón tí jnä Jerusalén. Jehe ch'án tjeko ch'án ciento cuarenta y cuatro mil chojni ts'íñixín totjen sín ihnjé tí Kolélo la ko ihnjé It'é ch'án. ² Ntá tuénxín kuinhān ijnko itén nkexro kuixin nkaya nkajní mé ijnko ruido éxí nchónhya ntarío la ruido éxí sítjonta itsen la éxí ijnko ruido nchónhya chojni it'in sín isón arpa. ³ Itsje sín nkehe nixin nkayakon tí trono la ko nkayakon tí noó nkexro tjejochón la ko tí sín tada. Nijnko nkexro chrók'uitjahya tí nkehe tjejotsje sín; jehó tí sín ciento cuarenta y cuatro mil mé sín tsíkaá k'uék'ejó chjasintajni. ⁴ Tí sín a mé k'uéchontahya sín itsje chojni chjin la tjóá sín la chréhe sín tí Kolélo kjónté nketí k'uáji. Tí sín a mé kuaá sín tí k'uék'ixin chojni k'uékjasin jié la ko tí sín a mé éxí ijnko ofrenda xrankíxixín k'uáyéhé Dios la ko tí Kolélo kjaxin. ⁵ Kónoxínhyá ninkehó kjuach'ia k'uaxrjexínhyá ir'va sín. La tí sín la ninkehó jié chóntahya sín tí tjejó sín nkayakon tí trono kuente Dios.

Tí nkehe chrónka tí iní ángel

⁶ A ntá k'uíkuān í jnko ángel tjetjaká jnkosiné nkajní chrónka tí tan tsaáxinni jnkochríxín tsinhhín tí sín siín chjasintajni, mé tsinhhin kaín nación la ko kaín nkexrí tsjehe chojni la ko kaín xín tan la ko kaín chjasin. ⁷ Ntá t'èya itsen ntáchro kixin:

—Chróchrakonrá la chróxráxinkáonrá Dios la chróchjéherá ch'án kjuasáya kixin ó kjuixraká tí yaon sinchekitoexín ch'án ijié chojni. Tjikosáyehérá ch'án kixin jehe ch'án kjuich'eña ch'án nkajní la ko chjasintajni la ko ntayaon la ko tí sít'axrje ntá.

⁸ Ntá xíki yóxin ángel, ntáchro kixin:

—Ó kjuixin kjuitsinka, ó kjuixin kjuitsinka tí chjasin jié Babilonia. Mé ntiha kuixin tí vino kókuñxín sín kaín nación ntá kjuasin sín jié chóntha sín chojni chjin ókjé.

⁹ Ntá xíki tí nixin ángel nixja itsen, ntáchro kixin:

—Jnkoyín sín tsjikosáyehé sín tí bestia la ko tí nkehe tsíkjanoya kuente o tsítohe sín tsochóntha tí marca tí totjen sín o tí tja sín, ¹⁰ mé t'ichjánxín its'i sín tí vino tsjasótexín sín kuixin tí tjen Dios kixin xikaha tjechónhen tí kjuaníkaon kuente Dios ntá ntiha tsjasótexín sín tí xrohi la ko azufre mé xikaha tsonhen tí sín a ts'ikon tí sín ángel kuente Dios la ko tí Kolélo. ¹¹ Tí ihnchi kuente xrohi sítjasótexín sín síchrìlin jnkochríxín la tí sín a kuinkáchónki tí bestia la ko tí nkehe tsíkjanoya kuente o chóntha sín ihnjé kuente. ¹² A ntá tí sín tinkáchónki Dios la kuítekaon sín tí nkehe k'uetoan ch'án la ko naxa jína tinkáchónki sín Jesús mé t'ichjánxín chrókuítgehya sín titekaon sín ch'án.

¹³ Ntá kuinhān itén ijnko nkexro kuixin nkajní ntáchro kixin:

—Ikjian tíhi: “Náxrjón tjejó tí nkexro kjónté its'en sín ijie o chr'éxín kixin tinkáchónki sín ñinchéni.” Kjá jína, ichro Nchakuen Dios, kixin tí jehe sín ts'ok'éhe sín kixin ó kjuich'e sín xra la tí xra kjuich'e sín mé kjuacha sín.

Tí nkehe tsík'óna chjasintajni

¹⁴ Ntá xrínahya k'uíkuān ijnko tjuí tjóá la chrítaón tí tjuí tjetjaxin ijnko nkexro éxí yóhe tsjehe tí Xjeen Dios Tsík'óna Chojni tjenkáya ijnko corona tsík'óna chica oro tí kja ch'án la ko ijnko chica hoz imá taté tixeráá ch'án. ¹⁵ A ntá nkaxenhen ninko mé k'uaxrjexín í jnko ángel itsen nixja ch'án nixjehé ch'án tí nkexro tjetjaxin chrítaón tjuí ntáchro ch'án kixin:

—Tjankíxian tatexian chica hoz kixin ó kjuixraká tí yaon tsotjá tí nkehe siín chjasintajni kixin tí nkehe tsík'óna chjasintajni la ó tsicha.

¹⁶ Ntá tuénxín tí nkexro tjetjaxin chrítaón tjuí ntá kjuincheck'átsínka ch'án chica hoz kuenté chjasintajni la kjuenájín ch'án nkehe tsík'óna chjasintajni.

¹⁷ Ntá k'uaxrjexín í jnko ángel tí ninko tjen nkaya nkajní la kjaxin sákjuíko ch'án ijnko chica hoz imá taté. ¹⁸ Ntá sákjuixin í jnko ángel tí tjen altar la chóntha ch'án kjuachaxin

kuènte xrohi la itsen k'uíyéhé ch'án tí nkexro chóna tí chica hoz imá taté la ntáchro ch'án kíxin:

—Tjankíxian tatemexian tí chica hoz taté la tjankíxian itja tí racimos to uva tsík'óna chjasintajni kíxin ó tsíchjé to —ichro ch'án.

¹⁹ A ntá tí ángel kjuínchek'atsínka tí chica hoz chrítaón tí nonte ntá chrínjin tí to uva tsík'óna tí nonte ntiha. Ntá sákjuík'enka ch'án to tí tjat'o ts'ényaxín sín to. Tíha mé t'axrjexín kíxin xíkaha Dios sinchekjasóte chojni. ²⁰ A ntá tí to uva tsík'énnyaxín sín tjat'o tí ikon chjasin a ntá tí tjat'o a mé k'uaxrjexín nchónhya jni noixín éxi tí freno tjinká ir'va kokaté la trescientos kilómetro kjínxin sátsíkji tí jni a.

15

Tí yato tí ángel la ko tí chin tsjixixín

¹ Ntá k'uíkuan tí nkajní í jnko kjuaxroan jié mé ijnko kjuachrakon: mé tí yato sín ángel kuíkao tí yato chin tsjixixín tsóníexín chojni. Tíha mé tí kjuaníkaon kuènte Dios tsjixixín.

² Kjaxin k'uíkuan ijnko nkehe tóyóhé ijnko ntayaon tsík'óna éxi xrosentá tsínkíjan xrohi. La tí sín tsíkjacha kíxin kuinkáchónkihya sín tí bestia la ko tí nkehe tsíkjanoya kuènte la ko kuáhya sín tí número kuènte iñnié tí bestia mé tjejóxin toté sín chjinaxón ntayaon tsík'óna éxi xrosentá la ko chóna sín isón arpa tsíkjanjon Dios tsík'ayéhé sín. ³ Itsje sín isón k'uétsje ch'ín Moisés, tí nkexro kjuich'ehe xra Dios la ko isón kuènte tí Kolélo la mé ntáchro kíxin:

Imá ijié tí kjuaxroan kuèntá kíxin kaín nkehe tsíkjich'eña.

Jaha Ínchéni Dios kaín kjuachaxin chonta.

Ntoá la ko chaxín tí ntia kuèntá.

Jaha mé ijnko Rey t'etóan kuènte chjasintajni.

⁴ ¿Xá nkexro chrakuanhya tí jaha Ínchéni?

¿Xá nkexro tjáhya kjuasáya kíxin jaha mé ijnko nkexro jína tjóá?

Kuenté chjasintajni tsjikosáyehe sín tí jaha

kíxin k'uíkon sín tí xra tsíkjich'e la jína tíha.

⁵ Kjuixin tíha la k'uíkuan nkajní tjexrankéhé tí ninko la ko tí cuarto tjóá t'inkachjina tí nkehe tsík'etóan Dios. ⁶ A ntá tí ninko a k'uaxrjexín yato ángel kuíkao yato chin. Tí iké sín la ika tjete tjóá tjákini. A ntá tí cinta chóna ntakuin sín mé jehó oro. ⁷ A ntá ijnko tí noó tí nkexro tjejóchón mé kjuanjon ijnko copa k'uayéhé jnkojnko ti yato ángel mé copa tsík'óna chica oro tsíkaón tí nkehe tsjasótexín chojni kuíxín tí tjen Dios tí nkexro tjechón jnkokchríxín. ⁸ A ntá tí nkaxenhen ninko la tsíkaón iñchi kuíxín tí kjuachaxin jié kuènte Dios la nijnko nkexro xitjahya ts'íxenhen ntiha tsjixinjian ts'átsínska tí yato tí chin kuíkao tí yato ángel.

16

Tí copa tjinká nkehe tsjasótexín chojni

¹ Ntá kuínhán ijnko itén ijnko nkexro imá itsen k'uaxrjexín nkaxenhen ninko, ntáche tí yato sín ángel kíxin:

—Sátjia tikíkjanjian chrítaón chjasintajni tí nkehe tjiá tí yato copa la táha mé tsjasótexín chojni kuíxín tí tjen Dios —ichro ch'án.

² A ntá tí ángel sáoxín sákjuík'itji tí nkehe tjiá tí copa chrítaón chjasintajni. A ntá kaín tí chojni chóna marca kuènte tí bestia la ko tjkosáyehe sín tí nkehe tsíkjanoya kuènte tí bestia mé tsík'ayan sín tósóa, imá tjotéhe sín.

³ A ntá tí yóxin ángel sákjuík'itji tí nkehe tjiá copa chrítaón ntayaon. A ntá tí ntayaon la k'óna jni éxi iñnié ijnko chojni tsík'oyán kichó la kaín ko sínkánkí ntayaon ik'uén.

⁴ A ntá tí níxin ángel sákjuík'itji tí nkehe tjiá copa chrítaón ntarío la ko chrítaón tí ntá sít'axrje tóye, la ntá tí ntá k'óna jni. ⁵ Ntá tuénxín kuinhán nixja tí ángel kuénte ntá ntáchro kixin:

—Jaha mé ijnko nkexro jína kixin kjuinchekitoexián ijié chojni. Íchéni jaha ijnko Dios jína, ósé tjen la ko naxa tjen ijie ⁶ kixin jehe sín k'óyán tí sín tinkáchónki tí jaha la ko tí sín tsíchrónka itan la ntá jaha Ínchéni chjehé sín ijni its'i sín kixin mé xikaha sítjasóte tí jehe sín.

⁷ Kjaxin kuinhán nó altar ijnko nkexro ntáchro kixin:

—Chaxín Ínchéni Dios, jaha mé chonta kaín kjuachaxin la ntoá jína kjuinchekitoexián tí ijie a.

⁸ A ntá tí noóxin ángel sákjuík'itji tí nkehe tjiá copa chrítaón yaon, a ntá tí yaon antsí k'uáyéhe kjuachaxin tsosoa kixin tsochjánxin chojni tí sóa kuénte. ⁹ A ntá kaín chojni chjánxin tí imá sóa kuénte yaon la k'uántaxínhín sín ihnié Dios mé jehe ch'án mé tí nkexro chóntha kjuachaxin kuénte tí chin a. La kjonté kjuinkíhya sín tí nkehe tinkáchónki sín la xraxinkakonhya sín Dios.

¹⁰ A ntá tí in'óxin ángel sákjuík'itji tí nkehe tjiá copa chrítaón tí trono t'etoanxín tí bestia. A ntá kaín tí k'uéchonta kjuachaxin k'uék'etqan tí bestia la k'uíxín tié. A ntá tí chojni a la netja nejen sín kixin tjotéhe sín. ¹¹ La kjonté xikaha la kjuinkíhya sín tí nkehe jínahya ch'e sín. Náhí. Íchá má k'uántaxínhín sín Dios tjen nkaya nkajní kixin tjotéhe sín kixin xikaha kónhen sín.

¹² A ntá tí injonxín ángel sákjuík'itji tí nkehe tjiá copa chrítaón ijkro ntarío jié it'in Eufrates. A ntá tí ntarío la kjuixié kixin jína tsakitjehé sín ijkro ntá tsjixín tí sín rey tsjixín nó tjitoxin yaon.

¹³ A ntá k'uíkuán kixin ir'va tí dragón la ko ir'va tí bestia la ko ir'va tí profeta ntoáhya tjako mé k'uaxrjexín iní nchákuén tí jínahya éxí korána tsjehe. ¹⁴ Tíha mé nchákuén tí jínahya kjuasixín sín kjuaxroan. A ntá sákjuikjinckójkotsé kaín rey siín chjasintajni kixin tsjanjon sín ijkro yaon jié kuénte Dios chóntha kaín kjuachaxin. ¹⁵ “Tsjehe, janhan titaya ts'inké éxí ijkro xíchee. Chéhe tí nkexro tjejótsjehe la t'ayakonhen tí iké kixin ts'itjáyanhya kixin chrók'ujahya sín tjochín sín la chrókósuehyá sín kixin chrókónoxín kixin tjochín sín.”

¹⁶ A ntá tsojnjkotsé tí sín rey tí nonte it'in Armagedón nkiva Hebreo.

¹⁷ A ntá tí ángel yatoxin sákjuík'itji nkehe tjiá copa chrítaón tí xrínto ntá nkaxenhen ninko nkaya nkajní k'uaxrjexín ijkro itén chojni itsen nixja mé kuixín tí tjen tí trono la ntáchro kixin:

—Ó kjuixin kónhen tíha.

¹⁸ A ntá sitjónkixín la ko ruido síjtonta la ntá imá kuínkí nonte fuerte. La desde tí kjuankíxín k'uíxín chojni chjasintajni la xikaha kónhen kuínkí nonte a ntá jie antsí fuerte kuínkí nonte. ¹⁹ A ntá tí chjasin jié xitjehé nonte la iní k'óna, chjenca. La koí kaín chjasin siín chjasintajni tsík'oya. A ntá Dios xraxinkaon kixin chrókjuínchekjasóte tí sín siín tí chjasin jié Babilonia la k'uetqan ch'án its'i sín tí vino tsjasótexín sín kixin mé xikaha kóninkaon ch'án. ²⁰ A ntá kain tí nonte sínkátaón ntayaon k'uániankí ntá la ko tí jna k'uitjáyan. ²¹ A nta nkajní k'uánótjenxin toni ijié xrátja chojni mé cuarenta kilo yexín jnkojnko toni. A ntá chojni na antsí má k'uántaxínhín sín Dios kixin tí xikaha kónhen sín xratja sín toni la imá kjoté sín.

17

Tsjasóte tí tjan jínahya

¹ A ntá ikui ijkro tí yatoxin ángel chóntha tí yato copa la ntáchro ch'án kixin:

—Xrákiá tsjáko ha nkexrí tsjasóte tí chojni chjin tjasin jié tjetjaxín tjan chrítaón tí nchónhya ntá. ² Tí sín rey t'etoan chjasintajni kjuasinko tjan jié la ko tí chojni siín chjasintajni kókuqxín sín tí vino a mé kjaxin kjuasixín sín jié.

³ A ntá tuénxín Nchakuen Dios sákjuikian ntejé ntá k'uíkuan ijkno chojni chjin tjetjaxin chrítaón ijkno bestia kjátse la kuenté tí ko a la símá ihnié náxrjónhya tsík'ántaxíenxín sín Dios la chóntha yato kja la ko ite ntéé. ⁴ A ntá jehe tjan chóntha tjan iké tjan morado la ko kjátse la teyá tjan chica oro la ko xro náxrjón la ko perla. Tjexraá tjan ijkno copa tsík'óna chica oro tsíkaón nkehe jínahya tsjasixín tjan jié. ⁵ Tí totjen tjan ts'íníxín ijkno ihnié kohya nkexro tienxín. “Tíha mé tí chjasin jié Babilonia, mé iné tí chojni chjin tjasin jié la ko kain chojni jínahya ch'e siín chjasintajni.” ⁶ Ntá kónóna kíxin tí tjan a la tsékánxin tí ijnié tí sín tinkáchónki Dios la ko tí ijnié tí sin tsík'enxín tí chrónka sín kíxin tinkáchónki sín Jesú. Ntá k'uíkuan xíkaha imá chrakonna. ⁷ A ntá ijkno ángel ntáchro ch'án kíxin:

—¿Nkekuénté chrakuan? Ntá ijie sintanoha tí nkehe tienxínhya chojni kuénte tí tjan a la ko kuénte tí bestia tjekjen tjan chóntha yato kja la ko ite ntéé. ⁸ Tí bestia k'uíkuan jaha kjuák'e ósé la ijie tjechónhya kjánchó senó tsochrinxín tí tóye njinka ntá chr'éxín ts'itjáyan. A ntá tí sín siín chjasintajni ts'íníxínhya ihnié sín tí libro ts'íníxín ihnié chojni tsaá desde k'óna chjasintajni, la mé jehe sín tsochrakon sín tió ts'ikon sín tí bestia kjuák'e ósé la tsík'en la ntá ijie xikjan ínaá.

⁹ Tí jnkojín nkexro chrókienxín la mé tí yato kja la t'axrjexín yato jná tjekjen tí chojni a. ¹⁰ A ntá tí kja kjáxin t'axrjexín yato rey la ntá in'ó tí sín rey la í t'etuánhya sín ijie la ijkno tí jehe sín t'etoan ijie la í jnko naxa tjihya. A ntá tió tsji tí yatoxin la í kánhyó sé ts'etoan. ¹¹ A ntá tí bestia kjuák'e senó la ijie tjechónhya mé tí jnixin rey la jehe ch'án kuénte tí yato rey la chr'éxín la ts'itjáyan.

¹² A ntá tí ite ntéé tsík'ikuan mé ite rey naxa t'etuánhya. A ntá ijie la ts'ayéhe sín kjuachaxin ts'etoankó tí bestia kjánchó kánhyó sé. ¹³ Tí ite tí rey la jnkokoá tsjenkayáxin sín la tsjanjon sín kjuachaxin kuénte sín kíxin ts'etoan tí bestia. ¹⁴ Tsjanjonko sín tí Kolélo a ntá tí Kolélo la tsjacha ts'etoan kíxin jehe ch'án mé Ínché kaín chojni la ko jehe ch'án mé tí Rey ts'etuenhen kaín rey la ko tí sín tjejóko ch'án mé tsík'íyehé Dios la tsíkjeyá ch'án sín la jína nchexiteyá sín.

¹⁵ Kjáxin ntáchro tí ch'ín ángel kíxin:

—Tí ntá k'uíkuan la chrítaón tjetjaxin tí chojni chjin tjasin jié la mé t'axrjexín kíxin nchónhya chjasin la ko nchónhya chojni la ko nchónhya nación la ko nchónhya nkiva. ¹⁶ A ntá tí bestia k'uíkuan la ko tí ite ntéé la tíha mé tsóníkkakonhen tí tjan tjasin jié la tsitohe tjan tjochín tjan la sine tí bestia tí nto chóntha cuérpoé tjan la ko tsoche tí huésóe tjan. ¹⁷ Dios tsík'etuenhen asén sín kíxin xíkaha sich'e sín exí tjinkaon ch'án kíxin jnkokoá tsjenkayáxin sín la ko tsjanjon sín kjuachaxin kuénte tí sín rey kíxin ts'etoan tí bestia tsoxiteyája tí nkehe tsíntáchro Dios. ¹⁸ A ntá tí chojni chjin k'uíkuan la táha mé tí chjasin jié t'etoan tí sín rey t'etoan chjasintajni.

18

Kjuítsíka chjasin Babilonia

¹ Ntá chr'éxín k'uíkuan í jnko ángel k'uínkajinxín nkajní chóntha nchónhya kjuachaxin ntá chjasintajni qantsí k'uínkaséyanni tí tjákini tsjehe ch'án. ² Ntá k'uíyato ch'án itsen ntáchro ch'án kíxin:

—Ó kjuítsíka, ó kjuítsíka tí chjasin jié Babilonia. Ntá tí jínahya ó kjuacha k'uíxenhen t'etoan ntiha la ntiha siín kaín xín clase nchakuen jínahya la ko siín kaké ko xritjaká tjuáhya la ko jínahya. ³ A ntá kaín xín nación kókuánxín tí vino kjuínchekji tjan ntá kjuasinko tjan sín jié la ko tí sín rey t'etoan chjasintajni kjaxin kjuasinko tjan jié. La tí sín nchekji nkehe chjasintajni kóríkoxín sín kíxin k'uéna tjan nchónhya nkehe.

⁴ Ntá kuiñhan í jnko itén nkexro kuijin nkaya nkajní ntáchro kíxin:

—T'axrjéxirá tí chjasin ntiha kíxin tí jahará tinkachónkirá tí janhan kíxin chrók'uícahyará tí ijié sín la ko chrókjuasótexíhyará tí nkehe tsónhen sín. ⁵ Kíxin

tí nchónhya jie tinkák'ánkí hasta kjuixraká nkajní la Dios ó nohe tí jie chóntha sín.
⁶ Ch'ehlerá tjan exí tí jehe tjan kjuich'ehe tjan í so chojni kíxin xikaha tsjasótexín tjan. Chrókjuenkehérá tjan iyó veces exí tí tsíkjhéna tjan ik'ui í so chojni. ⁷ Antsí chrókjuasóte tjan tóyóhé tí nkehe kjuich'e tjan kíxin kjuinchehnke tjan la ko k'uéchóntha tjan kaín nkehe tóxrjinhín tjan. Jehe tjan ntáche qasén tjan kíxin: "Ntihi tjétjaxian exí ijkno reina. Jehya ik'ána kíxin chrókjuasótena." ⁸ Mé xikaha kjaxin jnkokoá yaon itsi tí kjuaxikaon tsónhen tjan mé its'en tjan la ko tsjasótexín tjan kjinta la tsoche tjan kíxin Inchéni imá chóntha kjuachaxin la jehe ch'án sinchekjasóte ch'án tjan.

⁹ A ntá tí sín rey siín chjasintajni tsíkjasinko sín tjan jie la ko nchónhya nkehe kjuinchenko sín tjan la mé tsotsjánka sín la ts'èya sín tió ts'ikon sín ts'aya ihnchi tió tsoche tjan. ¹⁰ Ntá jehe sín tsitohe sín ikjín kíxin chrakon sín kíxin xikaha tsjasóte tjan la tsontáchro sín kíxin:

—Nòa tí jaha chjasin jié Babilonia, chjasin imá t'etoan kíxin titaya kjuasótia.

¹¹ Tí sín xrinchekji nkehe la kjaxin tsjánka sín, t'èya sín kíxin xikaha kónhen tí chjasin ntiha kíxin kohya nkexro ts'enehe sín tí nkehe sinchekji sín. ¹² Kjuincheckji sín chica oro la chica plata la ko ixro náxrjón la ko perla la ko ika náxrjón lino la ko ka seda la ko ika color morado la kjátse la ko kjaxin kaín xín clase nta náxrjón xraxé la ko tí nkehe tsík'óna neno elefante la ko inta náxrjón la ko bronce la ko ixro chica la ko ixro mármol. ¹³ Kjaxin xrinchekji sín canela la ko xroqan xraxé náxrjón la ko chjincó la ko xroqan mirra la ko crema la ko vino la ko aceite la ko harina náxrjón la ko noa trigo la ko iko tamá nkehe la ko kolélo la ko kokaté la ko carreta la ko chojni ch'exón xra kjaxin kjuincheckji sín. ¹⁴ Tsontáche sín tí chjasin a kíxin:

—Í chontahya kain to tjete imá k'uékóxrjínhan. Ó k'uitjáyan kaín nkehe náxrjón tjete k'uéchonta.

¹⁵ Tí sín k'uékjincheckji tí nkehe la kóríco sín kíxin kjuacha sín tí xra kjuich'e sín tí chjasin ntiha. Ikjín k'uéjo sín kíxin chrakon sín kíxin xikaha kónhen kjuasóte tí chjasin. Tsjánka sín la t'èya sín ¹⁶ la tsontáchro sín kíxin:

—Nòa tí chjasin jié. Exí ijkno chojni chjin tsík'itsa ka lino náxrjón la ko ika morado la kjátse la ko teyá nkehe oro la ko xro náxrjón tjete la ko perla. ¹⁷ A ntá jnkorato koá kjuixin kjuéje tí nkehe imá tjete —ichro sín.

Kaín tí nkexro t'etoan tí ntabárco la ko tí sín tsík'ixenhen tí ntabárco la ko tí sín ch'e xra chrítaón ntayaon kuítuhe sín ikjín ¹⁸ la tió k'uíkon sín tí ihnchi síche tí chjasin ntiha la k'óyako sín kíxin:

—¿Xá nkexéhé í jnko chjasin chrókoyóhé tí chjasin jié i?

¹⁹ La tjíkjanjin kja sín nche la tsjánka sín t'èya sín kíxin:

—Nòa tí chjasin jié. Kóríco tí sín k'uéchonta ntabárco chrítaón ntayaon kíxin tí chjasin i la ntá jnkorató koá kjuixin k'uítjáyan tí nkehe chóntha sín.

²⁰ A ntá jahará tjejorá nkajní tócháhará kíxin xikaha kónhen tí chjasin a. Tócháhará jahará k'uájikoará Inchéni la ko jahará k'uéchronkará itén Dios la ko kaín rá kuinkachónkirá tí jehe ch'án kíxin Dios kjuincheckjasóte tí chjasin a kíxin tí jie kjuasin sín kjuincheckjasótiará sín tí jahará.

²¹ A ntá ijkno ch'ín ángel chóntha kjuachaxin kjuatsen ijkno xro exí ijkno xro jié kuénte molino la k'uenki ch'án ntayaon la ntá ntáchro ch'án kíxin:

—Mé xikaha tsónhen tí chjasin Babilonia, tí chjasin jié la nunca ts'ikonhya chojni chr'éxín. ²² Nunca tsienhya sín música kuénte isón arpa la ko flauta la ko trompeta tí ntja la ko ninkexró xitjahya sich'e ninkehó xra ntiha la ko kjaxin tsienhya sín ninkehó tóvéntó xro molino. ²³ Í ts'inkaséyanxínhyá xrohi kuénte ninkehó lámpara la kjaxin í tsienhya sín ts'ixin kia tsotehe chojni ntiha. Tí sín k'uékjincheckji nkehe ntiha la imá

k'uék'etqan kuènte chjasintajni la tí sín k'uékjich'iyeho tí sín siín chjasintajni la k'uékjich'e sín jinahya, k'uédkinchexroqan sín.

²⁴ A ntá tí chjasin jié ntiha tsíkónoxín ijnié tí sín tsík'en k'uéchrónka itén Dios la ko tí sín tinkáchónki tí jehe ch'án la ko kain tí sín tsík'enxín chjasintajni.

19

¹ Ntá chr'éxín ntá kuinhán itén nchónhya nkexro tjejó nkaya nkajní itsen nixja, ntáchro sín kixin:

—¡Aleluya! Kjuasáyé Dios kuaáxinni la ko jehe ch'án t'inkaséyanxín ch'án ti jeheni la imá chóntha kjuachaxin Dios kuénteni.

² Kixin jehe ch'án ntoá kjuínchekjasóte ch'án tí tjan kjuasin nchónhya jie kixin jehe tjan kjuachroe tjan chojni siín chjasintajni kixin tí nkehe jinahya k'uékjich'e tjan.

Dios kjuínchekjasóte tjan kixin k'oyán tjan tí sín k'uékjich'ehe ch'án xra.

³ La ntá kjaxin ínaá xíntáchro kixin:

—¡Aleluya! Kjuasáyé Dios kixin tí ihnchi síchexín tí jehe tjan tsítóehya chriin hasta tí ntihi.

⁴ A ntá tí veinticuarto tí sín táda la ko tí noó nkexro tjejochón tjejóxin toch'in sín hasta káxín kja sín nonte kjuikosáyéhe sín Dios tí nkexro tjetjaxin tí trono la ntáchro sín kixin:

—¡Amén! ¡Aleluya! ¡Kjuasáyé Dios!

⁵ Ntá xrínahya kuínhin sín itén ijnko nkexro tjen nó trono ntáchro kixin:

Chjehérá kjuasáya tí Dios kuénteni kaín rá ch'ehérá ch'án xra

la kuítekákonhénrá ch'án,

mé kaín tí jahará kjonte chánjan ntsíntsí o chojni nteto.

Tí kia tsotehe tí Kolélo

⁶ Kjaxin kuinhán nkehe exí itén nchónhya chojni exí nchónhya ntarío sítovéntó la ko imá itsen sítjonta la ntáchro kixin:

—¡Aleluya! Kjuasáyé Inchéni ó kjuankíxin t'etqan Inchéni Dios kuénteni chóntha kaín kjuachaxin.

⁷ Chrókochéheni la chrókjuikosáyeheni Dios

kixin ó kjuixraká tí yaon ts'ixin kia kuénte Kolélo.

La tí tjan tsotehe la tsíkóyaxínhin tjechónhen,

⁸ mé tsík'ayéhé kjuachaxin tsík'itsa ka lino náxrjón tjóá tjákini.

A ntá tí ka lino náxrjón a mé t'axrjexín kixin tí jína k'uéjó tí sín tinkáchónki Dios.

⁹ Ntá tí ch'ín ángel k'uetoan ch'án kixin:

—Ikjian tíhi: “Náxrjón tjejó tí nkexro k'uayéhé kjuachaxin sátsji tí kia tsotehe tí Kolélo.”

A ntá ntáchro ch'án ínaá kixin:

—Tí palabra a mé chaxín ntoá nixja Dios.

¹⁰ Ntá kjuak'exian toch'ian toté tí ángel kixin chrókjuikosáyahá ch'án, kjanchó jehe ch'án ntáchro ch'án kixin:

—Xikahya chrokjuich'e kixin janhan kjaxian t'ahá xrá Dios exí tí jaha la ko exí tí sín kíchuá kuítóehya kuítekaon tí tan jína chrónka Jesú. Jehó Dios mé chrókjuikosáyehé jaha.

Tí nkehe k'uéchrónka Jesú mé k'uéchrónka tí sín profeta.

Tí nkexro kjuák'ekjen kokate tjóá

¹¹ Ntá k'uíkuán kixin nkajní tjexrankéhe la ntaha kónoxín ijnko kokate tjóá la ko tí nkexro tjekjen va mé it'in Jína la ko Chaxín kixin ntoá kjuínchekitóexín ch'án ijé chojni la ko ntoá kjuánjonko ch'án chojni. ¹² A ntá tí ikon ch'án mé tjákini exí xrohi nene xikaha tsjehe. A ntá kja ch'án la chóntha nchónhya corona la ko ts'íñixín ijnko ihnié ijnko nkexro la jehó ch'án mé nohe ch'án tíha. ¹³ Tjenkáya ch'án ijnko ka tsík'ixikjanjin jni ntá ihnié ch'án mé Itan Kuénte Dios. ¹⁴ Chréhe tí sín soldado kuénte nkajní. Iké sín mé ka lino

náxrjón tjóá la tjejókjen sín kokate tjóá. ¹⁵ Ir'va tí jehe ch'án k'uaxrjexín espada imá taté kíxin táha mé tsjik'óyánxin ch'án tí sín siín kaín nación la ko ts'etqanxín ch'án ijnko chica vara. Jehe ch'án mé sinchekitoexín ch'án ijié sín éxí t'énxin sín to uva toté sín mé xíkaha ts'etuenhen ch'án kíxin its'i sín vino tsjasótexín sín kíxin mé xíkaha tsixín tí kjuaníkaon kuènte Dios chóntha kaín kjuachaxin. ¹⁶ Iké ch'án mé ts'íníxín kíxin jehe ch'án me Rey t'etuenhen kaín rey la ko jehe ch'án mé Ínché kain chojni.

¹⁷ Ntá tuénxín k'uíkuan ijnko ángel tjexín toté tí tjen yaon la k'uéyato ch'án itsen k'uéyatohe ch'án tú ko xritjaká, ntáchro ch'án kíxin:

—Xrákirá tójkotsérá ntihi kíxin Dios tsjanjon nkehe sinterá ijie. ¹⁸ Sinterá cuerpo kuènte reyes la ko sinterá cuerpo kuènte tí sín comandante la ko cuerpo kuènte chojni jiehe la ko ntqe kokate la ko cuerpo kuènte tí sín tsíkjítak'á va la ko cuerpo kuènte kaín chojni libre o chojni ch'exón xrä la chojni hyé o chojni ntsíntsí.

¹⁹ K'uíkuan tí bestia la ko tí sín reyes t'etqan chjasintajni la ko tí soldado kuènte sín, tsíkójkotsé sín tsjanjónko sín tí nkexro tpekjen kokate la ko koí tí sín soldado kuènte ch'án. ²⁰ A ntá itsé sín tí bestia kíxin sátsji tsjasóte la ko kjaxin itsé sín tí nkexro ntoáhya k'uékjako itén Dios la ko k'uékjasin ch'án kjuaxroan náxrjón nkayakon tí bestia mé xíkaha kjuich'e tí nkexro ntoáhya kjuako, kjuich'iyehe ch'án tí sín tsíkítóhe tsíka marca kuènte tí bestia la ko kjuikosáyehe sín tí nkehe tsíkjanoa kuènte tí bestia. Ntá tí bestia la ko tí nkexro ntoáhya kjuako itén Dios mé k'uítuenhen sín sátsji tí siín xrohi tsoche tjejóchónxinhín sín tsochéxin azufre. ²¹ A ntá tí í so sín la ts'enxín tí espada k'uaxrjexín tí ir'va tí nkexro tpekjen tí kokate tjóá la kaín ko xritjaká ts'ixin tí siín tí cuerpo kuènte tí jehe sín la hasta tsokjehe va sine va.

20

Tí mil nánó

¹ Ntá xrínahya k'uíkuan ijnko ángel k'uínkajinxín nkajní tjexraá llave kuènte tí toye ninka la ko ijnko cadena jie tjexraá ch'án. ² A ntá tí ángel a itsé tí dragón mé tí konche ósé kjí mé tíha tí ch'ín diablo la ko Satanás la kjuak'echroé ch'án ijnko mil nánó. ³ Ichr'án ch'án sákjuí toye ninka ntá k'uikjehé ch'án la ko kjuak'e ch'án ijnko sello chrítaón puerta kíxin ntá tí dragón chrókjuich'iyehya tí chojni siín kaín nación hasta chrók'uatsínkajia tí mil nánó. A ntá ts'atsínska tí mil nánó ntá tsoxintankehe kjánchó séhya its'e.

⁴ Ntá tuénxín k'uíkuan tí trono la ko tí sín tjejótxaxín tsík'áyéhe sín kjuachaxin sinchekitoexín ijié chojni. Kjaxin k'uíkuan asén chojni tsíchrínjin kja kíxin kuítekaon sín Jesús la ko tsíchrónkaxín sín itén Dios. Jehe sín la kuinkáchónkihya sín tí bestia la ko tí nkehe tsíkjanoa kuènte la ko kuítóehya sín ikuá sín marca tí totjen sín o tí itja sín. Mé k'uíkuan kíxin tsíxechón sín la ko ts'etqanko sín Cristo ijnko mil nánó. ⁵ Ntá í so chojni tsík'en la naxa xechónhya hasta ts'atsínkajia tí mil nánó. Tíha mé xrankíxixín tsoxechón chojni. ⁶ Náxrjón tjejó tí sín tsíkjinchetjóá Dios mé tí sín a mé senó tsoxechón sín. A ntá tí yóxin chrók'uen sín la tíha chóntahya ninkehó kjuachaxin naxa xíkaha chrókónhen sín. Jehe sín mé nchat'a kuènte Dios la ko kuènte Cristo la ts'etqanko sín ch'án tí mil nánó.

⁷ A ntá ts'atsínska tí mil nánó ntá ch'ín Satanás tsoxintankehe tí kjichroé. ⁸ La sátsjikjich'iyehe tí chojni siín kuenté chjasintajni la ko sátsjikjich'iyehe tí chjasin Gog la ko Magog. La tsojnkotsé sín kíxin tsjanjon sín la ko tí soldado kuènte tí jehe sín. Nchónhya sín tsojnkotsé ntiha éxí tí nchesen siín ntayaon. ⁹ Mé xíkaha sátsji sín tí tonxín la ko tí tekaxín nonte la ts'ántatjen sín tí tjejó tí sín tsíkjinchetjóá Dios mé tí chjasin jie tjuéhe ch'án. A ntá xrohi tsixín nkajní kíxin tsochexín tí sín jinahya ts'itjáyanxín sín. ¹⁰ A ntá tí diablo tsíkjich'iyehe tí jehe sín kjaxin sátsji tsochexín xrohi la ko azufre tí sátsíkjí tsíchexín tí bestia la ko tí nkexro ntoáhya kjuako itén Dios. Mé ntiha mé tsjasótexín nchákotjin la ko tie jnkochríxín.

Tsitoexín ijié chojni tí tjen tí trono jié tjóá

¹¹ Ntá k'uíkuān ijnko trono jié tjóá la ko tí nkexro tjetjaxin nó ntiha. A ntá tí tjen ch'án ntiha la ó k'uitjáyankoá nonte la ko nkajní la í kónoxínhya ínaá tí nonte. ¹² Ntá k'uíkuān tí sín tsík'en; chojni hyé la ko chojni ntsíntsí tjejóxin toté sín nkayakon Dios la ntá xitjehé iso libro la ko xitjehé í jnko libro ts'íñixín ihnié tí sín tsaá. Ntiha tsitoexín ijié chojni tsík'en éxí nixja tí í so libro nkehe tí xrä kjuich'e sín ts'íñixín ntiha. ¹³ Tí sín tsík'enxín ntayaon la ntiha xrakuaxin sín la tí sín sátsíki tí siín chojni tsík'en la ntiha xrakuaxin sín kaín sín tsochjina sín tsitoexín ijié jnkojnkó sín kíxin nkexrí tí xrä kjuich'e sín. ¹⁴ Ntá tí kjuachaxin kuènte kjuach'én la ko tí tsík'ejó tí asén tí sín tsík'en sátsji tsoche tí xrohi tsochexín, mé tí muerte yóxin tíha. ¹⁵ La ko ntaha sátsji tí chojni ts'íñixínhya ihnié sín tí libro ts'íñixín ihnié chojni tsaá.

21

Nkajní nixin la ko nonte nixin

¹ Ntá k'uíkuān ijnko nkajní nixin la ko ijnko nonte nixin kíxin tí nkajní saoxín la ko tí nonte saoxin tsík'itjáyan la ko kjaxin kohya ntayaon. ² Janhan Juan k'uíkuān tí chjasin jié tjóá. Táha mé tí Jerusalén nixin k'uínkajinxín nkajní kuixín tí tjen Dios la kuenté tsíkoyóxin éxí ijnko chojni chjin tsotehe tsík'itsa kíxin tsákja tí xií. ³ Ntá kuinhán ijnko itén ijnko nkexro itsen kuixín nkajní ntáchro kíxin:

—Dios itjen tí siín chojni, la ts'ejóko sín tí jehe ch'án la jehe sín mé ts'óna chjasén ch'án la Dios a mé ts'ejóko sín ntiha la mé ts'óna Dios kuènte sín. ⁴ Jehe ch'án mé sinchexámá kaín ntákon sín la í tsokohya nkexro its'en la tsokohya nkexro tsotsjánka la ko ts'ávahya sín la ko tsokohya kjuatjoté kíxin kaín tí nkehe k'uékónen osé la ó kjuixin k'uátsinka.

⁵ A ntá tí nkexro tjetjaxin tí trono ntáchro ch'án kíxin:

—Janhan mé t'ána kaín nkehe nixin.

Kjaxin ntáchro ch'án kíxin:

—Ikjian tíha kíxin tíha mé palabra chaxín la chrókuítékavan kaín tíha.

⁶ Ntá chr'éxín chrónka ch'án kíxin:

—Kaín nkehe la ó kjuixin tsík'óna. Janhan la tí xrankíxín la ko tí tsjixixín éxí tí letra xrankíxín A la ko tsjixixín Zeta. Tí nkexro t'enxín ntá la janhan tsotjaha sín tí ntá its'i sín mé tí ntá tjanjon kjuachón la ninkehó ts'ixinkiéhya sín tíha. ⁷ Tí nkexro tsjacha tsítóehya tí janhan la ts'áyéhe sín kaín tí nkehe tsotjaha sín. La janhan mé ts'óna Dios kuènte sín, a ntá jehe sín mé xjanna ts'íkaan tí jehe sín. ⁸ A ntá tí chojni chrakon la chojni titekakonhya la tí sín chjinoxínhin la ko tí chojni ts'óyán kichó la ko tí chojni tsakja chojni chjin ókjé la ko tí chojni xrinchexroqan la ko chojni tinkáchónki nkehe tsíkjanoya la ko kain chojni ch'ia mé tí sín a mé ts'ítuhenen sátsji sín tí siín xrohi tsochexín sín azufre tió itsi tí yóxin muerte.

Tí Jerusalén nixin

⁹ Ntá ikui ijnko tí yatoxin ángel chóntha tí yatoxin copa tsíkaón tí yatoxin chin tsjixixín tsjasótexín chojni. Ntá ntáchro ch'án kíxin:

—Xrákia tsjákoha tí tjan tsotehe tí Kolélo.

¹⁰ Ntá k'uíkuān ijnko nkehe kjuakoxin Nchakuen Dios la ntá tí ángel sákjuíkian ijnko jná jié la ko noi la kjuakona ch'án tí chjasin jié tjóá mé tí Jerusalén ts'inkajinxín nkajní tsíkixín tí tjen Dios. ¹¹ A ntá tí chjasin a mé tjákijín xin kjuachaxin kuènte Dios. A ntá tjákini éxí ijnko xro imá náxrjón tjete éxí xro jaspe éxí xrosentá tsjehe. ¹² A ntá jnkontatjen tí chjasin chóntha tjat'o noi la chóntha teyó puerta la jnkojnkó ángel jnkojnkó puerta tjejónata la ihnié tí teyó tí sín tsík'axrjeníxín sín Israel ts'íñixín jnkojnkó puerta. ¹³ La iní puerta la nó tjitoxin yaon la iní puerta la nó norte la iní puerta la nó tjiatóxin yaon la iní puerta la nó sur. ¹⁴ Tí tjat'o tsík'antatjen tí chjasin chóntha teyó xro chóntaxín fuerza tí tjat'o la jnkojnkó ihnié tí teyó tí sín k'uájiko tí Kolélo a mé ts'íñixín jnkojnkó tí xro a.

¹⁵ A ntá tí ángel tjenixjana chóntha ijkno nta vara oro, éxí tji tsjehe, tsjachoxaxín tí chjasin la tí puerta kuènte chjasin la ko tí tjat'qo t'inkákuènxin. ¹⁶ Tí chjasin la cuadrada la tí kjinjinxin jnkokón la ko tonxín la jnkokón. A ntá tí ángel kjuachoxaxín tí chjasin tí nta vara éxí tji tsjehe tsíkjachoa ch'án tí chjasin mé chóntha dos mil dos cientos kilómetro tí kjinjinxin la ko tí ntetoxín la ko tí tonxín la jnkokón. ¹⁷ Ntá tsíkjachoa ch'án tí tjat'qo tsíkjintajin tí chjasin a la chóntha sesenta y cuarto metro kíxin éxí tjachroa chojni chjasintajni mé xikaha kjuachoa tí ángel.

¹⁸ Tí tjat'qo tsík'ántatjen tsík'óna xro jaspe, a ntá tí chjasin tsík'óna jehó chica oro tóyóhe jehó xrosentà tjóá. ¹⁹ Tí xro tsík'óna xrankíxixín tsík'antatjen tí tjat'qo la nchónhya xro chjiní náxrjón tsínkíkjan. A ntá tí xro xrankíxixín la jaspe, a ntá tí xro yóxin la zafiro, la tí xro níxin la ágata, a ntá tí noóxin la esmeralda. ²⁰ A ntá tí n'óxin xro la xro mármol la tí injonxin la cornalina, la tí yatoxin la crisólito, a ntá tí jnixin la berilo, la tí xro naxin la topacio, la tí texin la crisoprasa. A ntá tí tejnkoxin la jacinto, a ntá tí teyóxin la amatista. ²¹ A ntá tí teyó puerta mé tjejó perla la jnkojnko puerta tsík'óna jnkokoá perla. A ntá tí ntja jié kuènte chjasin la tsík'óna jehó chica oro éxí xrosentà tsjehe.

²² Ntaha la k'uíkonhya ninkehó níjko tí chjasin a, kíxin Ìnchéni Dios chóntha kaín xín kjuachaxin la jehe ch'án la ko tí Kolélo mé tí níjko ntiha. ²³ Tí chjasin a mé t'ichjánxihya yaon la ko ni nitjó ts'inkaséyanxín. Kíxin tí t'inkaséyanxín la Dios la ko tí Kolélo mé tí xrohi kuènte. ²⁴ A ntá tí chojni kuènte kaín nación tsíkaá la ts'ikonxín tí xrohi kuènte tí chjasin la tí sín tsík'óna reyes chjasintajni la ntiha tsjanjon sín tí nkehe k'uéchóntha sín. ²⁵ A ntá tí puerta kuènte chjasin la tsíkjehya tí nchakotjin la ntaha la tsókohya ts'ixin tie. ²⁶ Ntaha sátsjiko kaín xín nación tí nkehe náxrjón k'uéchóntha sín chjasintajni. ²⁷ A ntá ntaha mé xitjahya ts'ixenhen ninkehó nkehe tjuáhya, la ninkexró chjinoxínhin o chojni ch'ia. Jehó ts'ixenhen tí sín ts'íníxín ihnié tí libro ts'íníxín ihnié tí sín tsaá, mé tí libro chóntha tí Kolélo.

22

¹ A ntá tí ángel kjuákona ijkno ntarío tjóá, a ntá tí ntq a mé tjanjon kjuachón. Táha mé t'ikonxínni éxí xrosentà la mé k'uaxrjexín tí trono kuènte Dios la ko tí Kolélo. ² A ntá jnkosiné tí calle tjetoan kuènte tí chjasin a la ko nanánko tí ntarío ntiha itjen tí inta tjanjon kjuachón mé t'óna to teyó veces jnkojnko nánó kíxin t'óna to jnkojnko nitjó. Tí ka kuènte tí nta la xroqan tsitoexín jína tí nación siín ntiha. ³ La mé ntiha tsókohya ninkehó kjuachjinoxínhin la tí trono kuènte Dios la ko kuènte tí Kolélo la ntiha tjen tí chjasin. La tí sín ch'ehe ch'án xra la mé tsjikosáyehe sín ch'án. ⁴ Ts'ikon sín tí káré Dios la ko tsochóntha sín ihnié ch'án tí totjen sín. ⁵ Ntiha la tsókohya ts'ixin tie la tí sín siín ntiha la t'ichjánxienhya sín xrohi kuènte lámpara la ko ni xrohi kuènte yaon kíxin Ìnchéni Dios mé ts'inkaséyanxín sín ntiha la ko tsochóntha sín kjuachaxin kuènte Dios jnkochríxín.

Tí itsi Ìnchéni la kánhyo sé

⁶ A ntá tí ángel mé nixjana ch'án ntáchro kíxin:

—Tí itan a mé chaxín la chrókuítékákonhén tí tan a. La ko Ìnchéni mé tí Dios nchexraxinkaon tí sín nixja kjuachaxin ihnié ch'án mé ichr'án ch'án tí ángel kuènte ch'án kíxin tsjakuexin ch'án tí sín ch'ehe ch'án xra, tí nkehe tjoka tsónhen.

⁷ —¡Tjoka ts'inka janhan!

Náxrjón tjejó tí sín titekaon tí itén Dios nixja tí libro i.

⁸ Janhan Juan, kuinhán la ko k'uíkuán tíha. A ntá chr'éxin kjuixin kuinhán la ko k'uíkuán tíha ntá kjuak'éxiān toch'iān chrínkí toté tí ángel kíxin xikaha kjuákona la ntá chrókuíkosáyah ch'án. ⁹ A ntá jehe ch'án ntáchro ch'án kíxin:

—Xikahya sich'e kíxin janhan kjaxin t'ahá xra Dios éxí tí jaha xikaha la ko éxí tí sín kíchuá mé tí sín nixja itén Dios la ko kaín tí sín tjinkaon chrókuítekaon nkexrí nixja tí libro i. Mé jehó Dios chrókuíkosáyehé.

10 Kjaxin k'uetuqanna ch'án kíxin:

—Chrókjuak'echjinahya tí nkehe jahvá kuinhín kuènte Dios éxí nixja tí libro i kíxin ó kuichjina tí yaqon tsoxiteyá. **11** A ntá tí sín ch'e jinahya ája nohe sín ch'e sín tí jinahya. A ntá tí nkexro ntoáhya ch'e la ája nohe ch'e tí nkehe ntoáhya. A ntá tí nkexro ch'e nkehe tóxrjínhin Dios la naxq chrókjuich'e xíkaha la ko tí nkexro tsíkjinchetjóá Dios la naxq jína chrók'uejó sín chrókuitekaon sín tí jehe ch'án.

12 —Chaxín tjoka ts'inka janhan la ts'inkakian tí nkehe tsotjahará jnkojnkorá kíxin nkexrí tí xrq chuqich'erá. **13** Janhan mé tí xrankíxíxín la ko tí tsjixixín la janhan mé tí saoxín la ko tí tsjixixín éxí tí letra xrankíxíxín A la tsjixixín Zeta.

14 Náxrjón ts'ejó tí nkexro tsíkjén iké kíxin tsochónta sín kjuachaxin tsochjinehe sín tí nta tjanjon kjuachón kíxin jína ts'ixenxín sín tí puerta kuènte chjasin. **15** A ntá ntója tsitohe tí chojni jinahya kuítekakonhyá la ko tí chojni nchexroqan la ko tí sín chóntha nchónhyá chojni chjin la ko tí chojni tjàya la ko tí chojni tinkáchónki tí nkehe tsíkjanoya la ko tí chojni tóxrjínhin xrich'ia.

16 —Janhan Jesús mé ichr'an tí ángel kuéntqana kíxin tsochénka kaín nqinko kaín tíha. Janhan mé k'uaxrjeníxian tí rey David la ko janhan tí konotsé itji tí chjina t'inkáséyan.

17 Tí Nchakuen Dios la ko tí sín tinkáchónki tí Kolélo ntáchro kíxin:

—Xrákiá.

La tí sín tjejótinhin la ntáchro sín kíxin:

—Xrákiá.

A ntá tí nkexro t'enxín ntqa tjinkaon ntqa la chrók'ui tí ntqa tjanjon kjuachón la ninkehó ts'ixinkíhya tíha.

18 Kaín nkexro tjejótinhin itén Dios ts'ínxíxín tí libro i la chrókónohe sín tíha: Jnkójín sín chrókjuich'eña í so nkehe chrónixja la Dios mé qantsí sinchekjasóte tí jehe sín tsqníhi sín éxí nixja tí libro i. **19** A ntá jnkójín nkexro tsjatsen jnkójín palabra chóntha tí libro i la Dios tsjatsen tí nkehe chrók'uáyéhe sín chóntha tí libro ts'ínxíxín ihnqjé tí sín tsaá la ko Dios tsjatsen tí nkehe chróchóntha sín tí tjen tí chjasin tjóá kíxin éxí nixja tí libro i.

20 A ntá tí nkexro chrónkaxín tí tan i mé ntáchro kíxin:

—Tjoka ts'inka janhan.

Amén. ¡Xrákiá. Inchéni Jesús!

21 Inchéni Jesucristo mé sincheyaonrá kaín rá. Amén.